

Eyacuiñajjija Esohui

Ese Ejja New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

MATEO.....	4
MACOSO.....	50
NOCA.....	80
HUANI	129
HECHO.....	168
SHOMANO	216
1 CONITIO.....	240
2 CONITIO.....	264
JANATA.....	279
EPESIO.....	289
PINIPESSE	297
CONOSENSE	302
1 TESANONISESE.....	307
2 TESANONISESE.....	312
1 TIMOTEO.....	315
2 TIMOTEO.....	321
TITO	325
PINEMO.....	328
EMEO.....	330
SANTIACO	350
1 PENO	357
2 PENO	363
1 HUANI	367
2 HUANI	373
3 HUANI	374
JODE.....	375
APOCANISI.....	377

MATEO

Jesosa Quitoja etiiquiana (Noca 3.23-38)

1 Jiquio esohui etehue'yo Jesosa Quitoja etiiquiana. Yahuajo jama poa ba'a: Dabi Jesusaja etiiquiana poa, Amajama pea'ai. ² E'e, jamaya poa: Amajamaja bacua ejja Isaaca bajjani poa. Isaacaja bacua ejja Jacobo bajjani poa. Jacoboja bacua Joda bajjani poa; echahua mese cuana enequia poa pea'ai. ³ Jodaja bacua cuana Panesi bajjani, pea Sana bajjani poa, Tamaja mejo poa. Panesija bacua Esomo bajjani poa. Esomoja bacua Anami bajjani poa. ⁴ Anamija bacua Aminanami bajjani poa. Aminanamija bacua Nasoni bajjani poa. Nasonija bacua Sanamo bajjani poa. ⁵ Sanamoja bacua Bosi bajjani poa, Shajamija mejo poa. Bosija bacua Obeda bajjani poa, Shotija mejo poa. Obedaja bacua Isai' bajjani poa. ⁶ Isaija bacua emeshi mese Dabi poa. Dabija bacua Sanomoni bajjani poa. Sanomonija enaese e'ahuemano poa, Oniaja quijjojea, Dabija huana'yo poa. ⁷ Sanomonija bacua Shobiami bajjani poa. Shobiamija bacua Abiase bajjani poa. Abiaseja bacua Asa bajjani poa. ⁸ Asaja bacua Josapati bajjani poa. Josapatija bacua Jonami bajjani poa. Jonamija bacua Osia bajjani poa. ⁹ Osiaja bacua Jotami bajjani poa. Jotamija bacua Acasi bajjani poa. Acasija bacua Esequia bajjani poa. ¹⁰ Esequiaja bacua Manase bajjani poa. Manaseja bacua Amoni bajjani poa. Amonija bacua Josia bajjani poa. ¹¹ Josiaja bacua Jeconia bajjani poa; echahua mese cuana enequia poa pea'ai. Jeconia nequinajejo, Babinonia dejja cuaa Isaeni cuana iña majje dojo ca poa oja meshi yasijje sosema' chaco meeya. ¹² Majoya Babinonia meshi yasijje dojo majje Jeconiaja bacua Sanati cuaya poa. Sanatija bacua Sonomame bajjani poa. ¹³ Sonomameja bacua Amioni bajjani poa. Amionija bacua Eniaqui bajjani poa. Eniaquija bacua Asoni bajjani poa. ¹⁴ Asonija bacua Sanoco bajjani poa. Sanocoja bacua Aquimi bajjani poa. Aquimija bacua Eniodi bajjani poa. ¹⁵ Eniodija bacua Eneasa bajjani poa. Eneasaja bacua Matani bajjani poa. Matanija bacua Jacobo bajjani poa. ¹⁶ Jacoboja bacua Jose bajjani poa. Oya Maniaja yahue poa. Maniaja bacua Jesosa bajjani aca poa, Quito bajjani pea'ai poa, Eyacuiñajjija huoojea'yo ojjaña cuana jaahuanajji. ¹⁷ Jamajjeya Amajamaja bacua ejja tii majje jea ca poa pea. Majoya tii majje ohuaya pea jea ca poa. Jamaya aca poquiapoquia poa. Quijje nei etiiquiana Dabi cuaya poa. Etiiquiana Amajamaja jeaja osecua cuana 14 poa Dabi cuaya jjimahuajo. Majoya oya jayojja Dabija bacua ejja tii majje jea ca poa pea. Tii majje ohuaya

pea jea ca poa. Quijje nei Dabija osecuaja jeaja osecua cuana 14 po majje, dejja mase cuaa etiiquiana cuana Babinonia meshi yasijje dojo ca poa. Majoya Babinonia meshi yasijje poqui majje oya jayojja aca poquiapoquia poa. Majoya quijje nei Jesosa Quito cuaya poa Joseja tii mee. Ma etiiquinaja jeaja osecua cuana 14 poa Jesosa Quito cuaya jjimahuajo. E'e, jamaya poa.

Ebacua Jesosa Quito cuaya poa (Noca 2.1-7)

¹⁸ Jesosa Quitoja ecuaya'yo jama poa ba'a: Joseja Mania emese na poa. Mania bii ania poa; dejja cuana ba jjima poa. Jamatii o'ejji poa. Eyacuiñajjija Edojjoshahua Pameya ebacua ba'e mee ca poa, Maniaja ebacua. ¹⁹ Jose quea pame nee poa. Jamajjeya Mania o'ejji poajo jjahuanaqui sa po ajja poa. Jjashahuabaquia poa jama ba'a: —E'e pojja'a Mania pea cojjoji poanaje. Jamajjeya oya jjamejoquinaje. Eyaya oya cajaa aje. Quehuajje cajaa aje Mania, pea cuanaja ba jjima. Jamajjeya pea cuana Maniajo maimai ajja poaje. ²⁰ Jamaya jjashahuabaquianijo Joseya cahuiba ca poa. Oe Eyacuiñajjija esohuidojojji miminaje onijje. Jama poanaje ba'a: —Jose, ja'a Mania cajaa ajji! ¡Oya huanacue! Oja bacua Eyacuiñajjija Edojjoshahua Pameja ba'e mee. ²¹ Ojaya ebacua cuayaje. Jamajjeya jiquio ebacua tii majje ojaya epeeji cuanaja mimishi cuijea'yojji poaje. Jamajjeya ojaya ebajjani poaje Jesosa. ²² E'e, Eyacuiñajjija esohui huohuijija esohui yahuajo nei nei jayojjaya jjeya nei jamaya poani. Jamaya yahuajo poa ba'a: ²³ “Epona sho'i bii ani jamatii o'ejji poanaje. Cuayajo oja bacua bajjani acaje Emanuel. Ese Ejja esohuijo ca jama ba'a: Eyacuiñajji ecuana nijje nequi”. Jamaya Joseya cahuiba ca poa. ²⁴ Majoya shequi'yo majje Eyacuiñajjija esohuidojojji esohuijo Mania huana canaje, Joseya. ²⁵ Jamatii ebacua cuaya jjimajo, Joseja Mania napa jjima poa. Ebacua cuayajo Jesosa bajjani acanaje.

Dejja cuana majametajo jjashahuaba neineiquiani poeyanaje Jesosa baa

2 Jesosa cuayanaje Jodea meshijo, Benena cuiñajjijo. Cuayanajejo dejja Enode bajjani emeshi mese poa. Jamajjeya Jesosa Quito cuayanajejo, pea dejja cuana majametajo jjashahuaba neineiquiani, eshequi poeje mijijje meshijo ba'e quea huesha nee poeyanaje Jenosanena cuiñajji yasijje. ² Majoya oya cuanaa Enode huohui'ajja canaje jama ba'a: —Emeshi mese, ¿achejo

jaa ebacua esho'i nei, ma Jodio cuanaja Emeshi Mese poaje'yo? Pea meshijo eshequi poeje mijijjejo nequi ojaya majameta ai quea jiji nee nee ecuaa banaje. Ma-joya ecuaa poeyanaje o bihuiaa —poanaje.

³Jama huohui'ajjame acajje emeshi mese Enode quea ajjajja nee nee poanaje. Ojjaña dejja cuana Jenosanenajo ba'e pea'ai quea ajjajja poanaje. ⁴Jamajjeya Enodeya ojjaña Eyacuiñajji nijje emimijji etii cuana, ojjaña Moisesija esohui etehue'yo huohuijji cuana pea'ai iyaa canaje o que. Jama huohui'ajjame acanaje ba'a: —¿Achejo shai cuayaje ebacua Quito? Oya Eyacuiñajjija huoojea'yo ese jaahuanajji poaje'yo —acanjje Enodeya.

⁵Oya cuanaa huohui canaje jama ba'a: —Quito Benenajo cuayaje, Jodea meshijo. Yahuajo nei nei huohui canaje Eyacuiñajjija esohui huohuijjiya jama ba'a:

⁶“Cuiñajji sisi Benena bajjani Jodea meshijo yani. Pea cuiñajji cuana quea quemo Jodea meshijo yani pea'ai. Benena cuiñajji quea biso. Jamatii jomajo cuayaje Isaeni dejja cuanaja Emeshi Mese quea pame nee. Ohuaya Eyacuiñajjija epeeji cuana jaahuana caje'yo”. Jamaya aca poa esohui huohuijjiya yahuajo nei nei —oya cuana poanaje.

⁷Emeshi mese Enodeya dejja cuana eshequi poeje mijijje ba'e iyaa ca o'oyanaje o que. Quehuajje huohui'ajja canaje ebacujajo. Ma dejja cuana huohui canaje ache mecajje majameta ai quea jiji nee nee ba coo canaje, ebacua cuayajo pojja'a. ⁸Ebacujajo huohui mee majje Enodeya oya cuana huoojea canaje Benena huasijje ebacua baa. Jama huohui canaje Enodeya: —¡Poquicue miya! ¡Ebacua sa'ajja neineiquicue! ¡Ba'yo majje poecue! ¡Eya huohuihuacue achejo ebacua jaa! Jamajjeya eya poquije pea'ai ebacua bihuiaa —Enode sijje poanaje.

⁹Emeshi mese Enodeya huoojea cajje ma dejja cuana poquinaje ejiojjijje. Ejiojjijo poquianijo majameta ai quea jiji nee eyajo ba ca o'oyanaje ehui dojojji, yahuajo jama. Majameta ai nequi cojja nei poqui'yonaje ebacua huasijje. Majameta jijinequinaje tii ebacua jaa cojja nei. ¹⁰Majameta jijiqui ba majje quea bhui nee nee poanaje oya cuana. ¹¹Equi yasijje dobiquinaje. Ebacua Jesosa ba canaje enaese nijje, Mania nijje. Ba majje ebacua bihuia canaje ecui'oshajjajo nequiya. Bashosoco pichojea majje aquiana quea nahue quia canaje ebacujaja. Mei huo'o quia canaje, shiyeshiye quea nahue quia canaje, esei quea shiye nee quia canaje pea'ai. ¹²Majoya ma dejja cuana jjacahuibaquianijo, Eyacuiñajji onijje miminaje jama ba'a: —¡A'a poqui o'oyajji emeshe mese Enode yasijje! Jamajjeya oya cuana poqui o'oyanaje oja meshi yasijje pea ejiojjijje. Enode bana'yo jjima aca poa.

Ebacua Jesosa quehua dojo canaje Ejito meshi yasijje

¹³Majameta eba neinei'yojji dejja cuana poqui'yo majje Eyacuiñajjija esohuidojojji poeyanaje Jose que, Jose ecahuijaajo. Miminaje Jose nijje jama ba'a: —¡Shequicue oe! ¡Nequisohuacue oe! ¡Ebacua, enaese pea'ai dojocujajicue jjeyahua nei Ejito meshi yasijje! ¡Jomajo

nequicue! Quijje eyaya miya huohuije miquea meshi yasijje epo e'oyajji. Jjeya emeshi mese quea maseya Enode bajjaniya ebacua sa'ajja neinei cani equecua-jea'yojji.

¹⁴Jose nequisohua majje ebacua, enaese pea'ai dojocujajicue canaje ejiojjijje Ejito meshi yasijje, mecashono.

¹⁵Ejito meshijo nequi'yonaje emeshi mese Enode eshe nequijo. Enode mano'yajo Isaenija meshi yasijje poe o'oyanaje, Jose. Jamajjeya Eyacuiñajjija esohui huohuijji esohui yahuajo nei nei jayojja jama poa. Eyacuiñajjija esohui tehue ca poa yahuajo nei nei jama ba'a: “Ecua ebacua Ejito meshijo ba'e eyaya iyaa'yonaje”.

¹⁶Emeshi mese Enodeya ba canaje dejja majameta eba neinei'yojji cuanaa oya dasia ca poa. Jamajjeya oya quea quene nee nee poa. Oja sohuinano cuana huoojea ca'ya poa: —¡Ojjaña ebacua joya tonatona ai'ai quecuajeaquicue! ¡Benenajo ba'eja ebacua dejja sho'i cuana, Benena pejjejo ba'eja pea'ai oe quecuajeaquicue!

Jamajjeya mano'yonaje ojjaña ebacua dejja sho'i daqui she becanejjijji pea'ai epo tonatona ai'ai, esho'i nei pea'ai.

E'e, majameta eba neinei'yojji dejja cuanaja ehuhui'yojo, majameta ai quea jiji nee poanaje, ojjaña ebacua quecua sa poa Enode. ¹⁷Eyacuiñajjija esohui huohuijji Jenemiaja esohui yahuajo nei nei jayojja jama aca poa Enodeya. Ebacua cuana quecua ca'ya poa jamaya. Jenemiaa aca poa jama ba'a:

¹⁸“Shama cuiñajjijo eyiyo ao'ao cuiñajjijo quea shajjaquijjo. Ojjaña janobajjima nei nei pa tiitii'yani. Jodio enaese cuana pa'añani oja bacua cuana mano'yajo. Quea yeno nee nee. Papajea'yo ajja”. Jamaya etehue'yo yahuajo nei nei poa.

Ebacua Jesosa Ejito meshijo ani poe o'oyanaje

¹⁹Emeshi mese Enode mano'yajo Eyacuiñajjija esohuidojojji poeyanaje Jose que, Jose cahuijaajo, Ejito meshijo ba'ejo. ²⁰Huohui canaje jama ba'a: —¡Nequisohuacue, oe! ¡Ebacua, ojaya enaese pea'ai dojo'yocue Jodio meshi yasijje! Emeshi mese Enode mano'yonaje, ma ebacua Jesosa quecua'yojji nisho poanaje.

²¹Jamajjeya Joseya nequisohua majje ebacua Jesosa, enaese pea'ai dojo ca o'oyanaje oja meshi yasijje, Jodioja meshi yasijje. ²²Enodeja bacua eja Aquenao bajjani Jodea meshi mese eyacua poanaje. Jose jama shajja'ajja majje quea mete poanaje ma meshijo eba'ejji. Eyacuiñajjiya huohui canaje Jose jjacahuibaquianijo: —¡Janinea meshi yasijje poquicue, Jose!

Jamajjeya Jose poquinaje Janinea meshi yasijje ba'e'yohua. ²³Nasanena cuiñajjijo Jose ba'enaje. Jamajjeya Eyacuiñajjija esohui huohuijjiya esohui yahuajo nei nei jayojja jama poa ba'a: “Quijje pishana oya Nasanenajo ba'e dejja bajjani acaje”.

Huaniya esohui huohui canaje quima huasijje

(Macoso 1.1-8; Noca 3.1-9, 15-17; Huani 1.19-28)

3 Jesosa Nasanenajo ba'yanijo, Huani, ona besameejji poani poeyanaje Jodea meshi yasijje. Dejja

cuana meshi jabojo anica huasijje sohuihuohui hui-cha'a huicha'a canaje Huaniya. Jama acanaje ba'a: ²—¡Miquea mimishi cuanajo quea yeno pocue; miquea mimishi cuana pajea'yocue! Jjeya nei Eyacuiñajji poeje ojjañaja Emeshi Mese nei nei —acanaje.

³Isaiaa Eyacuiñajjija esohui huohuijjiya jama huohui ca poa yahuajo nei nei Huanijo ba'a:

“Oe dejja meshi jabojo nequi taaanequije. Jama poaje ba'a: —Jiquio ecua Emeshi Cuiñajji nei nejia ejiojji shabo jea cani jama, quea pojje nee nee acani jayojja jamaya ¡miquea ejjashahuabaquijji tai quea boejea nee nee a'yocue! Emeshi Mese nei nei poeje”.

Jamaya Isaiaa yahuajo nei nei tehue ca poa.

⁴Huaniya huo ña, cameno ña oja sipi huosho canaje. Ejjayica'aquijji ejee iya canaje. Shacui ijia canaje, huini pea'ai ishi canaje Huaniya. ⁵Quea huiso dejja cuana Jodea meshijo ba'e, pea cuana Jenosanenajo ba'e pea'ai, pea cuana cuei Jodana sahuajo ba'e pea'ai Huani que poeyanaje o shajja'ajjaa. ⁶Oya cuana quea mimishi poanijo quea yeno poani. Jamajjeya oja mimishi cuana huohui ca'yonaje. Mimishi cuana pajea sa poanijo, Huaniya oya cuana Eyacuiñajji nijje epo'yojji besa mee canaje Jodana cueijo.

⁷Jodioja esohui huohuijji Paniseo bajjani cuana, Sanooseo dejja cuana pea'ai poeyanaje Huani que; Eyacuiñajji nijje ejjapeequi'yojji nisho besa'yo sa poani pea'ai. Huaniya oya cuana ba majje tecuea canaje. Jama acanaje ba'a: —Miya peyo jama, jjadasiaquiani. ¿Aya acuae mi huohui canaje? Jama ba'a: “¡Eyacuiñajji-jo besa meecue! Jamajjeya ojaya miquianaya enapayojji pojjeama”. ⁸Chojja. ¡Quea pame tii oe ba'e'yocue! ¡Mimishi cuana oe pajea'yocue; a'a quea jjashahuabaqui tai po o'oyajji! Jamajjeya miya Eyacuiñajjija enapajji pojjeama. ⁹A'a jjashahuabaquijji jama ba'a: “Amajama ecuanaja etiiquiana. Oya quea pame nee poanaje. Ecuana Amajamaja bacua poanijojo, Eyacuiñajjija enapajji pojjeama”. Chojja de. Miquiana Amajamaja bacua quea mimishi poanijo, Eyacuiñajjiya cajaa mi acaje'yo. E'e de, ohuaya pea Amajamaja bacua jayojja epojji pana caje'yo pojja'a mei, meshi pojja'a —Huaniya acanaje.

¹⁰—Jama ba'a: Acui tai sajja jajacajja caje'yo cuaqui cabojjiya. Ejjajja chamajo acui cajaa acaje'yo. Jajajea'yo majje dahujaja caje'yo. Dejja mimishi acui tai jayojja jama acaje'yo Eyacuiñajjiya; cuaqui yasijje jea caje'yo.

¹¹Eyaya miquianaya Eyacuiñajji besa meeje'yo enajo, ca mique mimishi cuana epajea'yojo. Quijje pishana poeje Quito. Ohuaya mi que Eyacuiñajjija Edojjoshahua Pame dobiqúi mee caje'yo. Jamajjeya miya quea pame poaje'yo. Mimishi cuana pajea sa po'yo ajjajo ca ca jeajea caje'yo cuaqui yasijje. Jamaya pea'ai ba'a: Quito oe nei quea ca'a nee nee nequi. Eya ca iña quea ca'a pishana nequi. Jamajjeya eya ca iña onijje nequi sa po ajja miquiana que cojja. Quea bicho.

¹²Dejjaa oja tepeya shaa dojo mee majje anoso iya ca'yani equijo; eshaa dahujaja cani. Jiquio ecua anoso shaa dojo mee cani jama eseya acaje'yo Eyacuiñajjiya.

Joya quea pame nee ba'yani jaahuana caje'yo tii. Mimishi cuana ca ca quiyojea canequije'yo tii tii.

Huaniya Jesosa Eyacuiñajji besa mee canaje

(Macoso 1.9-11; Noca 3.21-22)

¹³Majoya Jesosa Janinea meshi yobijo ani macua huasijje po'oquequinaje Jodana cuei yasijje Huani que. Jesosaa Huani ba majje jama acanaje ba'a: —Huani, ¡eya besa meecue Eyacuiñajji, miyaya!

¹⁴—Chojja, Emeshi Mese —Huani poanaje—. ¡Miyaya eya besa meecue Eyacuiñajji, miya quea pame nee neejo! ¿Yajjaje miya e que poe'yonaje? Eya ca ca iña quea pame pishana, de.

¹⁵—¡Eyaya huohuiaña jama miyaya a'yocue! ¡Jamajjeya Eyacuiñajji ehuohui'yo ejo acue! —Jesosa poanaje.

Jamajjeya Huaniya Jesosa besa mee canaje Eyacuiñajji. ¹⁶Huaniya Jesosa besa mee majje jjequicuaya ca'yajje, ba canaje eyatahuatahua ca'apejo canaje.

Eyacuiñajjija Edojjoshahua Pame huia' jama o sapa biajje cuabesa ba'enaje. Ecapashinei ba'eoquenaje.

¹⁷Eyacuiñajjiya oja Bacua Ejja jama acanaje ba'a: —Miya ecue Bacua Ejja quea jea nee nee. Eya mijo quea bihui nee nee poani.

Jesosa quea mimishi po mee sa acanaje Edosiquiaa

(Macoso 1.12-13; Noca 4.1-13)

4 Jjeyahua nei Edojjoshahua Pameya Jesosa quima huasijje meshi jabo huasijje huoojea canaje. Majoya Edosiquiaa Jesosa quea mimishi po mee sa acanaje.

²Jesosa jomajo nequinaje peaja ejiojji cahui huisome, 40 cahuime. Mahuiso epojja, mecajje pea'ai nequinaje quimajo bobima' nei nei. Majoya quea shoe poanaje.

³Majoya aje Edosiquiana poeyanaje Jesosa que; mimi-nequinaje jama ba'a: —Miya Eyacuiñajjija Bacua Ejja jjabaqui majje ¡miyaya jiquio mei cuana pahui jayojja acue, miquea e'ijji! ¡Chojja!

⁴—Chojja de. ¡Bacue Eyacuiñajjija esohui etehue'yo! Jama poani ba'a:

“Dejja cuana bobijo ca'a po majje pojjeama ba'e tiitije'yo. Ojjaña Eyacuiñajjija esohui jayojja jama añajo ca se ca quea pame nee ba'e tiitije'yo”.

Jamaya aca poa —jamaya Jesosa poanaje.

⁵Majoya Edosiquiaa Jesosa dojo canaje Jenosanena huasijje. Jomajo Eyacuiñajjija equi quea ao nee nee yasijje nequisohuaqui mee canaje; equi jamacoo biajje nequi mee canaje. Jama acanaje ba'a: ⁶—Miya Eyacuiñajjija Bacua Ejja jjabaqui majje ¡tohuaacue meshi yasijje! Jamajjeya Eyacuiñajjija esohui jama etehue'yo jaa ba'a:

“Eyacuiñajjiya esohuidojojji cuana huoojea caje mi yasijje, mi jaahuanaa. Oquequiajo ojaya emeya miya iñajjequisohua caje'yo, ohuaya. Jamajjeya miya ejjajiojji quecuasajqui jjima poaje meijo”.

⁷Jesosa onijje miminaje jama ba'a: —Chojja. Yahuajo jama Eyacuiñajjija esohui etehue'yo pea'ai ba'a:

“A'a jama ajji ba'a: —¿A'a e'e jojo nei Eyacuiñajjiya oja sohui acaje'yo pojja'a? ¿A'a eya Eyacuiñajjiya jaahuana nei caje'yo? ¡Caba'ajjasahua! —a'a pojji”.

Jamaya yahuajo nei Moisesiya tehue ca poa —Jesosaa acanaje.

⁸ Majoya Edosiquiaa Jesosa dojosohuaqui canaje eyi-yo ao huasijje. O shajja'ajjajji nisho jamaya Edosiquiaa Jesosa huohui canaje: —¡Bacue ojjaña meshi cuana, emeshi mese cuana pea'ai, cuiñajji cuana, aquiana quea nahue cuana pea'ai! Ojjaña quea pame nee nee. ⁹ Ojjaña jiquio aquiana cuana, dejja cuana pea'ai mi-quea poaje'yo; miya Emeshi Mese nei nei eyaya po meeje'yo jjeja nei ca miyaya eya bihuia'yajo ecui'os-hajjajo nequi majje —jama siajje ameya acanaje Edosiquiaa Jesosa.

¹⁰ Jamajjeya Jesosaa jama huojeajeame acanaje ba'a: —¡Chojja Edosiquiana! Eyaya miya bihuia ajja, de. ¡Poquicue miya! Jamaya Eyacuiñajjija esohui etehue'yo yahuajo pea'ai ba'a:

“¡Eyacuiñajji oe nei bihuiaque! Oya oe nei ojjañaja Emeshi Mese nei nequi. ¡Ojaya esohui jama oe acue!”

¹¹ Jamajjeya Jesosaa huojea cajje Edosiquiana, Sata-nasa poqui'yonaje. Majoya Eyacuiñajjija esohuidojojji cuana quea huiso poeyanaje Jesosa jaahuanaa, bobiaa pea'ai.

Jesosaa esohui huohui canaje Janinea meshijo

(Macoso 1.14-15; Noca 4.14-15)

¹² Quijje pea cuaa Huani, ma ona besameejji poa jeanobiajea canaje. Shajja'ajja majje Jesosa posohuaqui o'oyanaje oja meshi yasijje, Janinea meshi yasijje.

¹³ Oya nequiñaquei jjima Nasanenajo. Pea cuiñajji yasijje, Capenaoma huasijje poquinaje ba'eya. Janinea bae sahuajo, Samononi meshi, Netani meshi pea'ai pejeje ba'enaje. ¹⁴ Yahuajo nei nei Eyacuiñajjija esohui huohuijjiya Isaiaa huohui ca poa jama ba'a:

¹⁵ “Ojjaña cuana quea mimishijo, esohui ba jjimajo quea apo ba'yani. Eyacuiñajji ba majje oya cuana quea ja'a nee ba'e mee caje'yo. Eyacuiñajji ojaya ba jjimajo quea yeno nee ba'yani. Jjeya ca ca quea jaji nee ba'e mee caje'yo. E'e, Samononi meshijo, Netani meshi pea'aijo, Janinea bae sahuajo ba'eca cuana, Cueji Pashi ma Jodana cuei bajjani sahuajo, ojje ba'eca cuana, Janinea meshijo, pea bajjani Ese Ejja sohuijo ba'a: Eyacuiñajji ba po jjimaja meshijo ba'eca cuana pea'ai quea mimishi poanaje. Jjeya ca ca quea ja'a nee ba'e mee caje'yo”.

Jamaya Isaiaa huohui ca poa yahuajo nei nei Jesosaja epoejjijo.

¹⁷ Majoya Jesosaa esohui huohui canaje jama ba'a: —Jjeyahua nei Eyacuiñajji miquea Emeshi Mese nei poeje. Jamajjeya ¡miquea mimishijo quea yeno pocue! ¡Mimishi cuana pajea'yocue miquiaaya! —acanaje.

Jesosaa nahuoo cuiashajjiji iyaa canaje onijje epo'yojji

(Macoso 1.16-20; Noca 5.1-11)

¹⁸ Majoya Jesosa poquinaje Janinea bae sahua huasijje. Jomajo ohuaya Anesi, Anesija o'i Peno bajjani, ma Simohui pea'ai bajjani ba canaje. Oya cuana nahuoo cuiashajjiji nei nei bajjo. Nahuoo cuiashaja cani. ¹⁹ Je-

sosaa oya cuana iyaa canaje: —¡Enijje po'yocue! Eyaya miya dejja cuana jjequi meesahua'yojji aje'yo e que.

²⁰ Jjeyahua nei nei oya cuana ojaya eshajajji cuana jeana'yo majje onijje poqui'yonaje.

²¹ Majoya Jesosaa poqui pishana majje pea cuana ba canaje. Semeneoja bacua ejja Jacobo ba canaje ojaya echahua mese nijje, Huani nijje. Bishe aijo eshajajji je'e'yo po'ani ba canaje. Jjeyahua nei Jesosaa oya cuana iyaa canaje. ²² Jamajjeya Jesosaa iyaa cajje oja chii Semeneo bishejo ani tii jiña ca'ya poa cuaa Jesosa nijje epoqui'yojji.

Jesosaa pea esohui huohui canaje emanojaa cuana huaquia mee ca'yonaje

(Noca 6.17-19)

²³ Jesosa poquinaje ojjaña cuiñajji cuana huasijje Janinea meshijo. Jodio dejja cuanaja equi ojje ejjachichaquijji yasijje dobiquinaje esohui huohuiya. Jama poanaje ba'a: —Eya ojjañaja Emeshi Mese poaje'yo.

Ohuaya quea huiso emanojaa cuana jjaajaqui mee ca'yonaje, huaquia mee ca'yonaje pea'ai. ²⁴ Quea huiso Sinia meshijo ba'eca cuaa Jesosaa huaquia mee ca'yoqui shajja'ajja canaje pea'ai. Jamajjeya o que jjequi canaje quea huiso emanojaa cuana. E'e, ojjaña cuana quea nee poani, pea cuana niñepoqui cuana, jjequi'ihuicajaa cuana pea'ai, jiojjijajja cuana pea'ai o que jjequi canaje. Ojjaña cuana huaquia mee ca'yonaje, jjaaja meequi ca'yonaje, Jesosaa. ²⁵ Jamajjeya Jesosa poquianajo, quea huiso nee nee cuana ojje poquinaje onijje. E'e, dejja cuana quea huiso nee, ponaponaña pea'ai Janinea meshijo ba'e cuana, Jenosanenajo ba'e cuana, Jodea meshijo ba'e cuana, pea Ome miji pea'ai Cuiñajjijo ba'e cuana, Cuei Cueji Pashijo Jodana cuei ojje mijijje ba'e cuana pea'ai; quea huiso nee nee Jesosa nijje poquinaje.

Jesosaa eyiyojo aniya esohui huohui canaje

(Noca 6.20-23)

5 Dejja quea huiso cuana ba majje Jesosa eyiyo huasijje jaasohua pishanaquinaje. ² Jomajo anioque majje ojjaña cuana sohuihuohui canaje jama ba'a: ³ —¡Bacue! Beca cuana jjashahuabaquiani jama ba'a: “E'e, de, eya quea mimishi nee. ¡Eyacuiñajjija ecuea mimishi cacuijea ca'yahua!” Jamaya jjashahuabaquinajo Eyacuiñajjija oya ba'e tiitii mee caje'yo onijje eyajo. ¡Oya cuana quea bihui nee capo'yahua! ⁴ Oja epeeji cuana mimishijo quea yeno poanajo, Eyacuiñajjija quea bihui nee po mee caje'yo mimishi cuijea ca'yajje. ⁵ Ojaya epeeji cuana quea bei poani Eyacuiñajjija quea jea nee; onijje ba'e tiitii mee caje'yo. ¡Quea bihui nee capo'yahua oya cuana!

⁶ —Ojaya epeeji cuana Eyacuiñajjija esohui jayojja jama a sa neinei poanajo, Eyacuiñajjija oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

⁷ —Ojaya epeeji cuana pea cuanajo jjashahuabaquiani pea jaahuanajji. Jamaya poanajo pea cuaa, Eyacuiñajjija pea'ai oya cuana jaahuana caje'yo. Tecue'a-

ma poaje'yo ona nijje. ¡E'e jojo nei quea bihui nee capo'yahua ojaya epeeji cuana! ⁸ Ojaya epeeji cuana mimishi cuana a'ajjajo Eyacuiñajji nijje ba'e tiitiije'yo. ¡Quea bihui nee capo'yahua oya cuana! ⁹ Ojaya epeeji cuaa pea cuana quea bei po meesahua canijo, ojjañaja eba oya cuana Eyacuiñajjija bacua cuana e'e jojo nei; quea pame nee. ¹⁰ Ojaya epeeji cuana quea ja'a nee ba'yanijo, onaaya oya cuana cuia caje'yo. ¡Jamatii oya cuana quea bihui nee capo'yahua! E'e, quijje eyajo oya cuana ojjaña huoojea'yojji enijje poaje'yo —Jesosaa huohui canaje.

¹¹ Majoya Jesosa Quitohua ojaya epeeji cuana huohui canaje jama ba'a: —Miquianaya ecuea epeeji poanijo, pea cuana minijje mimijajije; miya napa caje pea'ai, siajje poaje mijo pea'ai. Jamatii Eyacuiñajjiya miquianaya quea bihui nee po mee caje'yo. Eyajo onijje ba'e tiitii mee caje'yo. ¹² E'e, Eyacuiñajjija esohui huohuijji yahuajo nei nei ba'ya poa cuana jamaya aca poa mimishi cuaa; napa ca poa pea'ai. Jamajjeya jona jayojja jama pocue, quea bei! Eyacuiñajjiya miquianaya ojee ba'e mee caje'yo tiitii eyajo quea bihui nee nee —Jesosaa huohui canaje.

Ae jayojja Eyacuiñajjija epeeji
(Macoso 9.50; Noca 14.34-35)

¹³ —Ecuea esohui jayojja jama añajo, pea cuana mi jayojja jama ba'eje quea pame nee pea'ai. Jamajjeya miya sane jama, mei sese jama. Mei seseya shicui cajje bobi ihui'yo ajja poani. Jamatii mei sese sese'ama poa jojjemo ¿a'a quea sese po meeje o'oya? Chojja. Sese'amajo quea huesha jeajea'aña seya. Jiquio ecua sane sese'ama jeajea'aña seya jama miya ecuea esohui jama po ajjajo, cajaa achana' eyaya.

¹⁴ —Enijje jjapeequianijo miquianaya cuaquijji jama. Cuiñajji emaco ao'aojo nequi ba caje cuaa quea huesha nee mecaje pea'ai. Jiquio ecua emacojo nequia jama ecuea epeejiya pea cuana Eyacuiñajji ba meesahua caje'yo enijje jjapeequianiya jjejojo. ¹⁵ Cuaquijji sisi capaca ajja. Chojja. Cuaquijji sisi nequia cajji acui biajje, ojjaña equijo ani cuana jeaja'ajji. ¹⁶ ¡Jiquio ecua cuaquijjiya ojjaña equijo ani jeaja'a cani jayojja jama quea pame nee ba'ecue! Jamajjeya miquianaya quea pame ba majje pea cuanaa Eyacuiñajji, esejaya Chii eyajo bihua caje'yo —Jesosaa poanaje.

Moisesija esohui etehue'yo quea pame nee

¹⁷ Jesosaa pea esohui huohui canaje jama ba'a: —Eyaya Moisesija esohui yahuajo etehue'yo cajaa a'ajja. Eyacuiñajjija esohui huohuijji cuanaja esohui yahuajo nei eyaya cajaa a'ajja pea'ai. Cho. Eya poeyanaje onajaya esohui jama a'yohua. E'e, oya cuaa yahuajo nei nei ejo huohui ca poa. Jjeya eyaya onajaya esohui jayojja jama aje'yo. ¹⁸ E'e jojo nei ojjaña Moisesija esohui cuana cajaa pojjeama poaje'yo. Ojaya esohui biso nei pea'ai cajaa pojjeama poaje'yo. Quea pame nee ani tiitiije'yo. Jamajjeya ojjaña ojaya esohui yahuajo nei nei etehue'yo jama aje'yo. Ojjaña apoa ajeyo'yo majje ecuea echacojji jiquio meshijo apoa poaje'yo.

¹⁹ Jamajjeya joya Moisesija esohui etehue'yo jama ba'e sa po ajjajo, oja sohui jama pojjeama huohui cajo, enijje ba'e meemee ajja quijje eya ojjañaja Emeshi Mese nei poajo. Joya Moisesija etehue'yo jama acani, oja sohui jama huohui cani pea'ai ca ca enijje ba'eje'yo quijje eya ojjañaja Emeshi Mese oe nei poajo. ²⁰ ¡Bacue! Moisesija etehue'yo huohuijji poani, Jodioja esohui huohuijji Paniseo bajjani cuana pea'aiya quea pame nee huohui ajja; quea pame ba'e ajja pea'ai. Jamajjeya miquiana ona jama ba'yajo, ona jama huohuijji pea'ai miquianaya ba'e ajja enijje quijje eya ojjañaja Emeshi Mese nei poajo —Jesosa poanaje.

**Moisesija etehue'yo yahuajo nei quea pame pishana
Jesosaja huohui'yo quea pame nee nee**
(Noca 12.57-59)

²¹ —Miquea eba Moisesija etehue'yo yahuajo jama ba'a: “¡A'a pea quecuajji!” Jamajjeya pea quecuajji epo dojo caje'yo cuaa emeshi meseja dejja huoojeajji yasijje. ²² ¡Jjeya ecuea esohui eyacua shajja'ajjacue oe! Ojjaña joya pea nijje quea quene nee nee poani aje oe emeshi mese yasijje poquijje. Quea tecue poaje emeshi mese onijje. Joya pea nijje mimijajjajo, “miya cajaa” acajo, cadojo cahua emeshi meseja esohui huohuijji cuana huasijje jjabahuejjaqui meeya. Joya pea nijje panajaji neineiyajo, cajaa nei nei acajo pea'ai cuaqui yasijje huoojea ca chana' pea'ai —Jesosa poanaje.

²³ —E'e pojja'a miya Eyacuiñajjija equi yasijje poquiana aquiana quia'yohua Eyacuiñajji bihuiajji. Ma aquiana quia'yo jjimahuaajo ¡jjashahuabaquicue miquea epeeji-jo! ¿A'a miquea epeeji quea yeno poani minijje miya quea tai añajo? ²⁴ ¡Jamajjeya miquea epeeji yasijje poquicue! ¡Onijje mimiquicue! ¡Quea bei minijje po mee o'oyacue! ¡Majoya miquea aquiana quiaquicue Eyacuiñajji bihuiajji! —Jesosa poanaje.

²⁵ —¡Pea cuana quea quene minijje poajo o que poquicuaicue! ¡Quea bei po mee o'oyacue jjeya nei! Ohuaya miya dojo ca chana' emeshi mese yasijje, napa meeya. Emeshi meseja miya huoojea ca chana' sohuinano huasijje. Sohuinanohua miya equi ejjaejanobiaquijji yasijje jeanobia ca chana'. ²⁶ Jomajo nequi tiitii mee caje. Ma minijje quea quene nee poanaje sosequiajeyo'yo majje miya ejeanobianequi jeacuaya caje'yo, de —Jesosaa poanaje—. ¡Jiquio jayojjaya oe pocue! ¡Jamajjeya Eyacuiñajji nijje jjapeequicuaicue mano'yo jjimahua, cuaqui yasijje jeajea jjimahua!

¡A'a jjashahuabaquijji pea eponajo!

²⁷ —Cuanaya miquea eba Moisesija etehue'yo jama ba'a: “¡A'a pea cojjojji pojji!” ²⁸ Jjeya ecuea esohui eyacua shajja'ajjacue jama ba'a: Dejja pea eponajo jjashahuabaquianijo oya pea cojjojji epojji jayojja jama poani, ojaya ejjashahuabaquiyojjijo; quea mimishi poani. ²⁹ Jamajjeya ¡a'a quea mimishi pojji! Miya quea mimishi poani epona, aquiana pojja'a baqui majje ¡maya bapajea'yocue! Jea ba majje mimishi po majamajjañajo cuaqui yasijje dobiquije'yo tii. Jamajjeya ¡a'a jea bajji! ³⁰ Pea'ai miya quea mimishi poani aquiana

emeya napañajo ja'a aquiana napajji! Quea mimishi po chana'; cuaqui yasijje dobiqui'yo chana'. Jamajjeya ja'a onaja aquiana napajji! Sii chanaya —Jesosa poanaje.

Esohuhuei ehanase huei canijo

(Mateo 19.9; Macoso 10.11-12; Noca 16.18)

³¹ —Moisesija etehue'yo jama poa pea'ai ba'a: “Dej-jaa ojaya ehanase cajaa acajo, huei canijo jesohui catehue cahua ehueijji!” ³² ¡Ecuea esohui eyacua shajja'aj-jacue! ¡A'a miquea ehanase pea dejjaja sii jjima hueijji! Epona quea pame ba'e huei'yo majje pea dejja nijje jjahueaquiajo, yahue ebionei eshe nequijo, quea mimishi po mee cani ebionei yahueya. Oya eshe enequijojo oja yahue eyacua quea mimishi poani pea'ai —Jesosa poanaje.

³³ —Moisesija etehue'yo jama poa pea'ai ba'a:

“Miyaya huohuiaña jama ba'a: —Eyacuiñajjiya eya shajja'ajja canijo, e'e jojo nei eyaya ecuea esohui jama aje'yo. ¡Jamaya mimi majje miquea esohui jama acue; a'a pajea'yojji!” ³⁴ ¡Jjeya ecuea esohui eyacua shajja'aj-jacue! Jama ba'a: ¡A'a oe sijje pojji! ¡Pea nijje mimi majje miquea esohui jayoija jama acue! Jamajjeya pea nijje mimianijo a'a huohuiiji jama ba'a: “Eyacuiñajji eshe eyajo yanijo, ecuea esohui jama eyaya aje'yo. Ecuea esohui e'e nei pojjeama jojjemo eya quea nee po mee ca'yome”. Cho. Eyajo Eyacuiñajji ejjahuojeaquijji tii tii. ³⁵ Jamaya a'a mimijji pea'ai ba'a: “Meshi yanijo, oe po jjimajo ecuea esohui jama eyaya aje'yo. Ecuea esohui e'e nei pojjeama jojjemo meshi jjani yasijje eya mojea ca'yome”. Cho. Meshi cuana miquea pojjeama; Eyacuiñajji Emeshi Mese oe nei poani. Jamaya a'a mimijji pea'ai ba'a: “Jenosanena yanijo, oe po jjimajo ecuea esohui jama eyaya aje'yo. Ecuea esohui e'e nei pojjeama jojjemo Jenosanena cuiñajji esecue yasijje mo huoojeacuaya ca'yome”. Cho. Jenosanena miquea pojjeama; Eyacuiñajji Jenosanena Meshi Mese poani. ³⁶ Jamajjeya a'a huohuiiji miyaya: “Ecuea esohui e'e nei pojjeama jojjemo camano mee ca'yome”. Chojja. ³⁷ Jamajjeya huohuicue jama ba'a: “E'e, eyaya jama aje'yo”. “Chojja eyaya jama a'ajja” acue —Jesosa poanaje.

Esohuhuei dejja quea quenejo

(Noca 6.29-30)

³⁸ —Miquea eba Moisesija etehue'yo jama pea'ai ba'a: “¡Peaa cojja cuiasejjajea cajje jjasosequiaquicue; cojja cuiasejjajea pea'aicue! ¡Peaa se' cuiasajajea cajo se' cuiasajajea pea'aicue!” ³⁹ Ecuea esohui eyacua ca ca jama ba'a: Onaaya miya napa cajje ja'a jjashahuabaquijji onijje ejjasoseaquijji! ¡Mique shemo ebiane miijije cuia cajje shemo shani miijije cuia mee o'oyacue!

⁴⁰ Peaa miquea daqui sa poanijo miya dojo cani dejja etii bajjani yasijje huohuiya; miquea daqui dojo cajo, jamatii ¡miquea daqui moo quiacue pea'ai! ⁴¹ Dejja maseya miya iña cajje ojaya aquiana quea huesha pishana dojo mee cajo, ¡quea huesha nee dojocue, jamatii!

⁴² Pea Ese Ejja miquea aquiana sa neinei poanijo ja'a quea dejja tai pojji! ¡A'a quea nishehui pojji! ¡Oya quiacue! Pea cuana miquea aquiana dojo sa poanijo ¡oe

pojji cahuime dojo meecue! Minijje mimiajo: “¡Che iña jiquio dojo meecue; quijje aje jje jeahuaje'yo!” acajje; “¡E'e, dojocue!” saja'ame acue. Jamajjeya ¡ojjaña cuana nijje quea bei ba'ecue! ¡A'a o jayoijjaya quea mimishi, quea tai pojji! —Jesosa poanaje.

Joya minijje quea quene nee poani quea jea acue

(Noca 6.27-28, 32-36)

⁴³ —Miquea eba etehue'yo yahuaajo nei jama ba'a: “¡Miquea epeeji quea jea nee acue! Miquea epeeji pojjeama, cho. ¡Onijje quea quene pocue epeeji pojjeama jjejojo!” ⁴⁴ Ecuea esohui eyacua ca ca jama ba'a —Jesosa poanaje—: ¡Miquea epeeji pojjeama quea jea nee acue pea'ai! Miya Eyacuiñajjiya epeeji poanijo, miya napa cajje ¡Eyacuiñajji nijje mimicue maa mi napajji poanijo! Jamajjeya e'e pojja'a oya cuana Eyacuiñajji nijje jjapeequije'yo pea'ai. ⁴⁵ Jamaya poanijo miqianaya Eyacuiñajji esejja Chii eyajo anija bacua cuana poani. E'e, Eyacuiñajjiya eshequi quea ja'a nee jiji mee cani dejja quea pamejo, dejja quea mimishijo pea'ai. Ohuaya ena huoojea cani dejja quea pame neeja que shepajji, dejja quea mimishija que shepajji pea'ai —Jesosa poanaje.

⁴⁶ —Joya mi quea jea nee ajji poani miquea quea jea nee pea'ai; minijje quea mase ca ca miquea boti'ama. Eyacuiñajjiya epeeji pojjeama cuana aje oe jamaya poani pea'ai, de. Jamajjeya miya jamaya poanijo ¿a'a Eyacuiñajjiya miya bihuia caje? Cho. ⁴⁷ Miquianaya aje jja oe miquea epeeji cuana nijje quea bei nee mimiani, pea cuana nijje mimi ajja. ¿A'a jamaya poani ojjaña dejja cuana? E'e. Eyacuiñajjiya epeeji pojjeama cuana aje oe jamaya poani pea'ai, de. ⁴⁸ Jamajjeya esejja Chii eyajo quea pame nee ani. Ojjaña cuana Eyacuiñajjiya quea jea nee nee. ¡Eyacuiñajji jayoijjaya jama pocue quea bei nee nee! —Jesosa poanaje.

¡Quea ja'a nee jjapeequicue Eyacuiñajji nijje!

6 Jesosa poanaje pea'ai: —¿Apiojji miya Eyacuiñajji-jo chachacoani pea cuaa ba canijo? E'e pojja'a jjashahuabaquiani miya bihuia caje cuaa ba majje. Onaja ebajji chachacoanijo, quijje eyajo miquea echaco ojo Eyacuiñajjiya miya bihuia ajja, esosequajji pojjeama —Jesosa poanaje.

² —Aquiana aema huasijje quia'yo majje a'a mimijji jama ba'a: “¡Bacue, eya quea pame nee poani!” Chojo. Jamaya poani Eyacuiñajjiya epeeji nisho cuana Eyacuiñajjiya equijo, ejiojji cuanajo pea'ai. Onaaya Eyacuiñajji-jo chaco cani pea cuanaja ebajji. Jamajjeya quijje eyajo Eyacuiñajjiya oya ebihuajji pojjeama; ojaya echaco esosequajji pojjeama pea'ai. ³ ¡Miyaya aema huasijje aquiana cuana quehuajje quiacue! Jamajjeya ¡miquea epeeji neineija ba jjima quiacue! ⁴ Miquea Chiiya eyajo aniya ca ca oe ba caje; ohuaya miya quijje sosequia caje'yo —Jesosa poanaje.

Eyacuiñajji niije jama mimime pocue ba'a

(Noca 11.2-4)

⁵ Jesusaa o shajja'ajjajji cuana huohui canaje pea jama ba'a: —Eyacuiñajji niije mimianijo ja'a joya ecua Eyacuiñajji niije jjapee nishoquiani jayojja jama mimijji! Oya cuana aje oe Jodioja ojee ejjachichaquijji equijo nequiani, ojjaña eba'ji miminequiani. Esecuejo ojjaña anica cojja nei pea'ai miminequiani. Eyaya miya e'e jojo nei huohuaña oya cuana miminishonequiani —Jesosa poanaje—. Jamajjeya Eyacuiñajjija epeeji nei poso ojjaña oya ba cani. Jamajjeya onaaya bihuia canaje sosejje Eyacuiñajji niije miminisho'aninajejo quijje eyajo oya cuana enijje enequi'yoyji pojjeama, Eyacuiñajjija epeeji nisho jjejojo. ⁶ ¡Miquianaya ca ca miquea equi quecuayijji mee nei mimi'anicue Eyacuiñajji niije, pea cuaa eba ca poani jjejojo! ¡Eseja Chii niije jomajo mimicue! Ohuaya miya ba cani, shajja'ajja cani; mi pejejo nequiani oya. Eseyaya emimi bame bame jayojja jama acaje'yo, eseja Chiiya —Jesosa poanaje.

⁷ —Pea cuana Eyacuiñajji ba jjimajo eyacuiñajji nisho niije mimiani. Oya esohui majamaja acani. Mimi majamajani eyacuiñajji nishohua eshajja'ajja caje poso.

⁸ ¡A'a o jayojja jama pojji! Eyacuiñajji niije mimi sa po jjimahuaajo, ojaya eseyaya ejjashahuabaquijji eba, de, eseja Chiiya eyajo anija —Jesosa poanaje.

⁹ —Jamajjeya Eyacuiñajji niije mimianijo mimicue jama ba'a:

Eyacuiñajji, miya ecuanaja Chii quea bame nee.
Miya eyajo quea ca'a nee ani.

¡Ojjaña cuaa miya cabihuia cahua, oe nei quea ja'a nee!

¹⁰ Miya ojjaña cuanaja Emeshi Mese poani tii tii.

Eyajo miquea ejjashahuabaqui'yoyji jayojja jama poani ojjaña.

¡Jamaya oe pocue ojjaña meshijo pea'ai!

¹¹ ¡Jjeya eya ba'e meesahuacue!

¹² Eya quene'ama pea cuana niije, joya enijje quea mimishi poani niije.

Jamajjeya jecuea mimishi cuanajo a'a quea quene pojji pea'ai!

¹³ ¡A'a eya quea mimishi po meeji!

¡Nahue neineicue mo, Eyacuiñajji!

¡Edosiquianaja epeeji eya jaahuanacue!

E'e Eyacuiñajji, miya ojjaña Emeshi Mese poani tii tii.

Miya oe nei quea ca'a nee enequi tii tii, quea pame nee.

¡Ojjaña miya cabihuia cahua tii tii!

E'e, jamaya apoa ecuea emimi.

¡Jamaya Eyacuiñajji niije mimicue! —Jesosa poanaje.

¹⁴ —E'e, jiquio ecua eya jama jjashahuabaquime oe pocue! Pea cuana niije mimicue jama ba'a: "Miya enijje mimijajinaje quea tai. Jamatii eya miquea mimishijo quene'ama" jamaya pocue. Jamaya pea niije mimianijo Eyacuiñajji miquea mimishijo quene'ama poaje'yo pea'ai. ¹⁵ Pea niije quea quene tii tii poanijo ca ca Eyacuiñajji eseja Chii miquea mimishijo quea quene tii tii

poaje'yo pea'ai; miquea mimishi ecuijea'yoyji pojjeama —Jesosa poanaje.

Eyacuiñajji niije eseya bobima' mimi cajji ijia'ijia jjima ani majje

¹⁶ —Eyacuiñajjija epeeji nisho ijia'ijia jjima mimianijo quea yeno jayojja poani, ecojja topo jjima ojjaña cuanaja eba'ji. Jamajjeya ojo jama poani ba'a: "E'e, oya Eyacuiñajjija epeeji nei nei; ijia'ijia jjima mimiani Eyacuiñajji niije, de" poani —Jesosa poanaje—. Chojja, edasia'yoyji poani. Eyacuiñajjija epeeji nei poso pea cuaa acani. Jamajjeya ojjaña eba'ji oya mimiani. Quijje oya cuana enijje enequi'yoyji pojjeama eyajo Eyacuiñajjija epeeji nisho jjejojo —Jesosa poanaje—. ¹⁷ Miquianaya ca ca ecuea epeeji nei. Ijia'ijia jjima Eyacuiñajji niije mimianijo ja'a quea yeno jayojja pojji! ¡A'a jjadasiaquijji jayojja jama pojji! Chojja —Jesosa poanaje—. Ijia'ijia jjima Eyacuiñajji niije mimi huicha'a huicha'anijo ¡jamatii eme', ecojja pea'ai shacuacue; ehujjaña shiyeshiyejo shacue! ¹⁸ ¡Jamajjeya onaja ba jjima Eyacuiñajji niije mimicue ijia'ijia jjima ani! Jamajjeya eseja Chiiya ohuaye nei miya ba caje, mi pejejo nequiana. Miquea emimi bame bame jayojja jama acaje, ohuaya —Jesosa poanaje.

Jesosaa eseya quijje eyajo quea huiso sosequia caje'yo, ojo chachacoani sosejje

(Noca 12.32-34)

¹⁹ —Jiquio meshijo ba'yanijo ¡aquiana echicha'yo quea huisojo a'a quea nahue bajji! —Jesosa poanaje—. Siipojjiya miquea aquiana sii ca chana'. Mojo ca chana'. See'yo chana' pea'ai. ²⁰ Cho. ¡Jjeya Eyacuiñajjijo chachaco neineicue! E'e jojo nei ohuaya quijje miya sosequia caje'yo quea huiso nee nee eyajo. Esii'yoyji pojjeama; miquianajaya poaje'yo tii, miquea eba'e'yoyji eyajo. ²¹ E'e, jamaya jjashahuabaquijjo miquianaya quea ja'a ba'eje'yo, ecuea ehuhui'yo jayojja jjashahuabaquije eyajo eba'e'yoyji; aquiana quea huiso yanijo ca ca miquianaya jjashahuabaquije meshijo eba'ejiyo —Jesosa poanaje.

¡Quea ja'a nee ba'ecue!

(Noca 11.34-36)

²² —Miquea ecojja quea pame nee neejo miya quea ja'a nee baje'yo echacoji; quea ja'a nee ba'eje'yo pea'ai. Cojja jamajama ca ca quea ja'a eba'eji pojjeama. Quea apo nee nee, de, cojjama' —Jesosa poanaje—. Jiquio ecua quea cojja pame nee jayojja jama miya quea jjashahuabaqui pame nee neejo quea ja'a nee ba'eje'yo Eyacuiñajjija ejjashahuabaqui'yoyji jayojja. Quea jjashahuabaqui tai poanijo onaja aquiana cuana quea jea ba majje ca ca quea deja tai ba'eje'yo, quea nishehui. Jamajjeya Eyacuiñajjiya miya tecuea caje'yo jama ba'a: "Miya ca mi ca oe quea tai nee nee ba'yan, ojo jjashahuabaqui ajja" acaje'yo Eyacuiñajjiya —Jesosa poanaje.

¡A'a quea nahue, quea nishelui ba'ejji!

(Noca 16.13)

²⁴ —Cuanaya ¿a'a acuae chacochocho cajji beca dejjaa mee'ajja caje? Chojja. Oe echacomeeji shajja'ajja caje, quea boti acaje pea'ai. Pea echacomeeji shajja'ajja jji-ma acaje, boti'ama acaje pea'ai. Jamaya miqianaya aquiana cuanajo jjashahuaba tiitiquianajo Eyacuiñajji e chacojji pojjeama —Jesosa poanaje.

Eyacuiñajjiya oja epeeji cuana jaahuana cani

(Noca 12.22-31)

²⁵ Jamajjeya Jesosaa huohui canaje pea jama ba'a: —E'e jojo nei eyaya miya huohuiaña: ¡A'a quea yeno jjashahuaba tiitiquijji miquea eba'ejji! “E'e pojja'a eya bobimajo manoje'yo, bobi yasijje poaje'yo; e'ishijji pojja'a chama' poaje'yo, quea naba taja; ecuea daqui huiñaje pojja'a, daquima' nei nei eya poaje'yo”. ¡A'a jamaya jjashahuabaquijji! Eyacuiñajjiya miya eshe pana canaje, yamijji. Jamajjeya ohuaya miya bobi quia meesahua caje, daqui quia meesahua caje pea'ai. ²⁶ E'e de, ¡bacue cuichojji cuana! Quea jaji ba'yani. Oya cuanaa que chaco ajja, bobi chicha ajja, equi yasijje iya ajja quijje e'ijji'yojji. Eseja Chiiya oya cuana jaahuana cani. Cuichojji ojaya nahue'ama; miya ca ca oe ojaya quea nahue nee nee. ²⁷ ¡Jashahuabaquicue! ¿A'a miya quea ao nee epoaje poso jjashahuaba neineiquianajo miya tii aoje'yo? Chojja. Jamatii. Jamajjeya oya jayojja aquiana chama' epoaje poso ¡a'a quea mete pojji! —Jesosa poanaje.

²⁸ —¿Apiojji miya jjashahuabaquiani quea yeno daquijo? ¡Bacue eshasha ebiojo tiiani! Shasha cuana chaco ajja, oja daqui cuana soco ajja. ²⁹ Jamatii quea bame nee nee nequiani. Jodioja emeshi mese yahuajo nei nequiya Sanomo bajjaniya daqui quea nahue nee nee huosho ca poa; jamatii oja daqui quea bame pishana. Shasha ca ca quea bame nee nee. ³⁰ E'e —Jesosa poanaje—, Eyacuiñajjiya shasha cuana tii mee cani quea bame nee. Jjeya shasha cuana enequi; mecahuajje yaa'yani, joca'yani; dahuaajea cani cuaa pojja'a, chama'yo tii poani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miya ba'e meesahua caje'yo. Miya ojaya quea boti nee nee. Miquianaya jjashahuaba taiquiani jama ba'a: “E'e pojja'a Eyacuiñajjiya eseya jaahuana jjima” jamaya miqianaya poani —Jesosa poanaje.

³¹ —A'a jjashahuaba taiquijji jama ba'a: “¿A'ya cuee che ijji'aje, de? ¿A'ya cuee ishije, de, chama' ena? ¿A'ya cuee che huoshoje?” ³² Eyacuiñajjiya epeeji pojjeama cuana ojjaña aquianajo jjashahuabaquiani tii tii. Eyacuiñajjiyo jjashahuabaqui ajja. E'e jojo nei esejaya Chii eyajo ani miquea aquiana eba'e meejiyo jjashahuabaquiani. Ohuaya miya jaahuana caje'yo —Jesosa poanaje—. ³³ Jamajjeya jjashahuabaquicue tii tii jama ba'a: “Quijje Eyacuiñajji ojjaña Emeshi Mese po majje onijjeya eyaya pea cuana huoojeaje'yo eyajo. ¡Ojaya esohui quea ja'a jayojja jama ca'a'yahua!” acue —Jesosa poanaje—. Jamaya jjashahuabaquianajo ohuaya mi-

quiana huasijje aquiana eba'e meeji quia meesahua caje'yo pea'ai —Jesosa poanaje.

³⁴ —Jamajjeya a'a quea yeno jjashahuabaquijji jama ba'a: “¿Aya shai ecuana jaahuana caje mecahuajje?” Miya Eyacuiñajjiya jaahuana caje'yo. Quijje quea cama-ja eba'ejji poaje pojja'a. Jamatiiya ohuaya miya ba'e meesahua caje'yo —Jesosa poanaje.

¡A'a pea cuana niñebajji!

(Noca 6.37-38, 41-42)

7 —¡A'a pea niñebajji! —Jesosa poanaje pea'ai—.

Jamaya Eyacuiñajjiya boti'ama. ² Miya pea cuana niñebajji poanajo Eyacuiñajjiya miya tecuea caje'yo pea'ai. Miquiana pea nijje jjabeiqui'yajo Eyacuiñajjiya miquianajaya mimishi cuijea caje'yo. Ma ecua miyaya onaya aña, jamaya miya acaje'yo Eyacuiñajjiya.

³ —¿Apiojji acuae jja oe miquea epeeji tecueaña so'oca mimijajjiya? ¿A'a miquianaaya mimishi pajea'yona-je pea tecuea jjimahuajo ojaya mimishijo? Chojja, miya ca mi ca oe mimijajipajea'yo jjima pea'ai. Jamaya miya poani ba'a: Miyaya baña huenihueni shabo biso nei nei miquea epeejiya ecojjajo nequi. ¿A'a cuae jja oe miyaya miquea ecojja dojjojo nequi huenihueni shabo quea quemo baña so'o? ¡Miquea ecojjajo nequi huenihueni shabo quea quemo jja oe huijjeajea meecue! ⁴ A'a jiquio jama mimijji ba'a: “Epeeji, huenihueni shabo biso neiya mi cojja dobi canaje. Ache ba'ajja cahuijjea'ajja'yo sahua, de shabo biso nei”. Chojja. Shabo quea quemo nee miquea ecojjajo nequi, miya quea cojja shojo poanajo ca jje ca ebajji pojjeama. Miya ca mi ca oe ma shabo miquea ecojjajo nequi ¡ebionei huijjeajea mee'yo socue! ¡Majoya shabo biso nei nei miquea epeejiya ecojjajo nequi huijjeajea'yocue! —Jesosa poanaje.

⁶ —Miquea aquiana quea nahue nee nee ¿a'a quiaña iñahuehua huasijje, cuichi yasijje pea'ai? Aquiana nahue quishipasha caje'yo, de. Oya cuana quea mase; ijji ca chana' mi. Jamaya poani dejja jjashajja'ajjaqui ajja nei nei; quea mase iñahuehua jama, cuichi jama. Jamajjeya ¡ona huasijje Eyacuiñajjiya esohui quea pame nee a'a huohui tiitijji! —Jesosaa acanaje.

¡Eyacuiñajji nijje mimi neineicue! Ohuaya miya shajja'ajja caje

(Noca 11.9-13; 6.31)

⁷ Jesosa jama poanaje pea'ai ba'a: —Jama acue ba'a: ¡Mimi neineicue Eyacuiñajji nijje! Onijje mimianajo ohuaya miya jaahuana caje'yo. Cuanaya aquiana chama' ba majje sa'ajja neineiaña ¡jama mimi neineimeya pocue Eyacuiñajji nijje! Ohuaya miya shajja'ajja caje'yo. Cuanaya esecuejo nequiya miyaya taaaña miquea epeeji nijje emimijji. Esecuejo nequi taa tiiti nequiani jayojjaya ¡Eyacuiñajji nijje mimi majamajcua! Ohuaya miquea esohui jayojja jama acaje'yo. ⁸ E'e jojo nei onijje mimianajo Eyacuiñajjiya jaahuana caje'yo; o sa nei nei poanajo ohuaya miya saja'a caje'yo. Esecuejo taaa nequi jayojja jama pocue; ohuaya miya saja'a caje'yo —Jesosa poanaje.

⁹ —Ebacua ejja oja chii nijje jama mimime poajo ba'a: “Ecue chii, ¿che mo oe pahui quiacue e'ijji'ajji!” acajo, ¿a'a oja chiiya mei quia caje? Chojja. ¹⁰ “Ecue chii, ¿che mo oe jai quiacue e'ijji'ajji!” acajo, ¿a'a oja chiiya peyo quia caje'yo? Chojja. ¹¹ Jamajjeya miquianaaya, jamatii quea mimishi jjashahuabaquiya miquianajaya bacua cuana jaahuanaña. Jamajjeya esejaya Chii eyajo aniya miya jaahuana caje'yo e'e jojo nei onijje mimianijo. Oya ca ca oe quea pame nee nee enequi tii tii —Jesosa poanaje.

¹² —Miya mimiani pea nijje jama ba'a: “¿Enijje quea pame nee po tiitii'yocue!” Jamajjeya ipea cuana nijje quea pame nee po tiitii'yocue! E'e, jamaya yahuajo Moisesija esohui etehue'yo poa. Jamaya Eyacuiñajjija esohui huohuijji yahuajo nei ba'ya poa pea'ai —Jesosa poanaje.

Beca ejiojji (Noca 13.24)

¹³ Jesosaa huohui canaje pea jama ba'a: —¿Esecue biso neijje dobicue! ¿Ejiojji biso neijje poquicue, ma eyahuasijje epoquijji ejiojji! Jomajo ba'e tiitii'yo eseya. Eyacuiñajjija esohui ejiojji pame jayojja. Eya ejiojji esecue jayojja pea'ai poani —Jesosa poanaje—. Oe pojji cuana Eyacuiñajjija ejiojji poquiani, de. Pea esecue ejiojji ai'aijje epoquijji. Ma ejiojji ai'aijje poqui majje cuaqui yasijje poquije'yo. Jamajje quea huiso poquiani ejiojji ai'aijje, de —Jesosa poanaje.

Esohui huohuijji nisho, sijjepojji (Noca 6.43-44)

¹⁵ Jesosa jama poanaje pea'ai ba'a: —¿Esohui huohuijji nishoja esohui a'a shajja'ajjaji! Dasia ca chana' mi. Mi que poeje jjapee nishoquiya. Oya cuana quea bei jayojja poe'ani. Cho, quea bei pojjeama. Aquiana quea mase jama poani oya cuana. ¹⁶ ¿Quea mimishi poanijo bahuejjacue oya cuana esohui huohuijji nisho! ¿A'a acuae acuisha jjonajo acuijjajja quea pame ba'yani? Cho. ¿A'a shaponajo acuijjajja quea pame chicha cani? Cho. ¹⁷ Jamaya esejaya eba ba'a: Acui quea pamejo acuijjajja quea bame. Acui quea taijo ejjajja quea tai poaje. ¹⁸ Acui quea pamejo acuijjajja quea tai pojjeama ba'yani. Acui quea taijo ejjajja quea bame pojjeama ba'yani. ¹⁹ Acui taijo ejjajja quea tai poani. Jamajjeya jajajeaña seya, dahuajea'yaña seya. ²⁰ Acui eseya baje ejjajja ba majje. Acui quea tai ba majje esejaya eba acui quea tai. Jama jayojja esohui huohuijji quea mimishi ba majje eseyaya oya esohui huohuijji nisho bahuejjaje —Jesosa poanaje.

Jesosa shajja'ajjaji e'e jojo nei (Noca 13.25-27)

²¹ —Quea huiso dejja cuana huohui cani jama ba'a: “Jesosa Quito, miya ecuanaja Emeshi Mese e'e jojo nei”. Chojja, beca cuana sijje poani. Ecue Chii eyajo anija ejjashahuabaqui'yoyji jayojja jama po ajja. Jamajjeya oya cuana ecue Chii eyajo ani yasijje poqui'yo ajja. Pea cuana e'e jojo nei ecue Chii jajashahuabaqui'yoyji

jama poani. Oya cuana poquije'yo ecue Chii eyajo ani yasijje, ojaya Emeshi Mese nei yasijje. ²² Quijje e poe o'oyajo quea huiso cuana sijje poaje enijje jama ba'a: “Ecuea Emeshi Mese, Eyacuiñajjija eya huoojea canaje miquea esohui huohuiya. Ohuaya eya eshahua huoojeacuayajea meesahua ca'yonaje. Ohuaya eya ameesahua canaje ma dejjaa ajjima acani”. Quijje jiquio jayojja jama acaje'yo sijjepojjiya. ²³ Majoya eyaya oya cuana tecuea neineije'yo jama ba'a: “Chojja. Miquiana-ya enijje jjapeequi'yo jjima. ¡Miña ca oe poquicue quea huesha nee! Quea mimishi, quea mimijjequijje ca miña” aje'yo —Jesosa poanaje.

Equi iyajji jama Jesosaja epeeji cuana quea jjashahuabaqui ja'a nee

(Macoso 1.22; Noca 6.47-49)

²⁴ —Joya beca cuana ecuea esohui shajja'ajja majje jamaya acaje'yo. Ojaya ejjashahuabaqui'yoyji quea pame nee. Jamajjeya jiquio ecua equi quea ca'a emacojo iyaña jayojja jama jjashahuabaquime oya poani. ²⁵ Ena quea quemo poajo, jjayehuequiyajo beni quea quemohua equi jeaquena cani. Jamatii equi quea ca'a emacojo ani; jaabicha jjima acani. ²⁶ Pea cuana ecuea esohui shajja'ajja ajja. Ecuea esohui jayojja jama a'ajja pea'ai. Oya cuana quea jjashahuabaqui quehua jayojja jama poani, equi quea quemo iya cani meshijajji jama. ²⁷ Ena quea quemo poajo ohua caje. Beni quea quemohua po majje equi janabajjima nei jeabichajea caje'yo —Jesosa poanaje.

²⁸ Jesosaa eyiyo quibojo esohui huohui ca poa. Apoa po majje dejja quea huiso cuana shajja'ajja majje jama poanaje ba'a: —E'e de, Jesosaa esohui quea ja'a nee nee huohui cani. ²⁹ Ohuaya huohui cani emeshi mese jayojja jamaa, Moisesija esohui etehue'yo huohuijji jayojja jama pojjeama, de —poanaje ojjaña cuana.

Dejja batata epo'yo, ma dejjaa shicui jjima acani jjajee meequi ca'yonaje Jesosaa

(Macoso 1.40-45; Noca 5.12-16)

8 Majoya Jesosa eyiyo biajje ani esohui huohuipajja majje jaaque'yonaje. Quea huiso dejja cuana poquinaje onijje. ² Oe dejja quea mano nee, batata epo'yo poeyanaje Jesosa que. Ecui'oshajjajo nequinaje o bihuijji. Jama poanaje ba'a: —Jesosa, ecuea eba miya ona jjajeequi mee'yoyji nei nei poani. Jamajjeya miyaya eya jjajeequi mee'yo sa amajje imo che jjajeequi mee'yocue!

³ Jesosaa ma dejja napa'ajja canaje emeya. Jama minajje onijje ba'a: —E'e, eyaya miya jjajeequi mee'yo sa aña. ¡jjajeequi'yocue miya!

Jajeequinana'yonaje jjeya nei. ⁴ Jamajjeya Jesosaa oya huohui canaje: —¿Shajja'ajjacue mo! Eyaya miya jjajeequi mee'yonaje. Jamatii ja'a jjeya pea cuana huohuijji! ¿Poquicujacue Jenosanena huasijje, Eyacuiñajjija equi yasijje, Eyacuiñajji nijje mimiani yasijje! Oya huohuicue miyaya: “Eya huaquia'yonaje, jjajeequi'yonaje mo” acue. ¡Moisesija esohui jayojja jama oe pocue pea'ai! Miya ehuaquia'yohua jjejojya ¡Eyacuiñajji nijje

mimiani yasijje beca huia' quiaquicue Eyacuiñajji bihuiajji! Jamajjeya ojjaña ba caje miya e'e jojo nei ej-jajeaqui'yo —oya acanaje Jesosaa.

Jesosaa sohuinano huoojeajji poanija echacojji huaquia mee ca'yonaje
(Noca 7.1-10)

⁵ Quijje Jesosa Capenaoma huasijje poqui'yonaje. Jomajo oe dejja sohuinano quea huiso nee, 100 huoojeajji poani Jesosa que poeyanaje. Oya pea, Jodio dejja pojjeama. ⁶ Ohuaya Jesosa huohui neinei canaje jama ba'a: —Jesosaa, ecuea epeeji, ishajja'ajjacue mo che! Ecuea echacojji poani quea mano nee nee ecuea equijo jaa. Jeo'yo ajja poanaje. Quea yami nee nee jaa —poanaje.

⁷ Jesosaa oya saja'a canaje jama ba'a: —E'e, eya poquije miquea equi yasijje miquea echacojji poani huaquia mee'yohua.

⁸ —Chojja, Jesosa —sohuinano huoojeajji poanaje—. Miya Jodio dejja quea pame nee nee poanijo ¿apiojji ecuea equi yasijje dobiquije? Eya Jodio pojjeama; quea pame pojjeama. Miya jhahuaquiameequi'yojji nei nei. Jamajjeya ecuea echacojji quea huesha jaa. ¡Miyaya jiquiojo tii nequiya huohucue! ¡Huaquia mee'yocue!
⁹ E'e, jamaya poani ba'a: Pea emeshi mese cuaa eya huoojea cani. Ojaya esohui jama eyaya aña. Pea'ai eyaya sohuinano cuana huoojeaña. Eya huoojeajje poquije. Eya iyaajje pea sohuinano poeje. Eya huohuiajje ecuea echacojji chachacoje ejo. Jamajjeya miya huohuiajje ecuea echacojji jjaajaquije'yo, de.

¹⁰ Shajja'ajja majje Jesosa quea bihui nee nee poanaje. Ojjaña cuana huohui canaje: —¡Shajja'ajjacue! Jiquio dejja Jodio pojjeama. Jamatii Eyacuiñajji nijje jja-peequiani e'e jojo nei. Miya ca mi ca oe, oe pojji jjahahuabaquiani Eyacuiñajji. ¹¹ E'e de, quea huiso dejja cuana Jodio pojjeama ojjaña meshijo ba'e enijje jjapeequije'yo. Eyajo eya Emeshi Mese oe nei poaje, oya cuana ojee ijji'ijji Jodio etiquiana cuana nijje, Amajama nijje, Isaaca nijje, Jacobo pea'ai nijje. ¹² Beca Jodio cuana ca ca jhashajja'ajjaqui ajja jjejojo enijje eba'eji pojjeama. Eyacuiñajjiya oya cuana jeacuayajea caje'yo quea misi nee yasijje. Jomajo pa neineije'yo. Quea yehohua jjejojo ese' ijjiayaijea caje'yo —Jesosaa poanaje.

¹³ Jamajjeya sohuinano huoojeajji acanaje: —¡Poquicue miya miquea equi yasijje! Miquea eba eya ejjaaquimee'yojji nei nei. Jamajjeya eyaya miquea echacojji jjaajaqui meeje'yo.

Jesosaa mimianijo tii sohuinanoja echacojji jjaajacuajiqui'yonaje.

Quea huiso cuana huaquia mee ca'yonaje Jesosaa
(Macoso 1.29-34; Noca 4.38-41)

¹⁴ Majoya Jesosa poquinaje Penoja equi yasijje. Penoja ano ba canaje quea quiyo nee nee jaa. ¹⁵ Emanojaa me' napa cajje jjaajaqui'yonaje. Boe canana'yonaje. Jamajjeya anisohua'yo majje Jesosa, pea cuana pea'ai bobia canaje, Penoja anohua.

¹⁶ Majoya aje oe sinecua dejja cuaa quea huiso niñepoqui cuana Jesosa que ye canaje. Jesosaa eshahua cuana huoojeacuayajea ca'yonaje: —¡Cuayaqui'yocue, oe! —poanaje.

Jesosaa mimi jeahuajo, o niñepoqui po meeji poani cuayaquinanaje. Ojjaña emanojaa cuana jjaajaqui mee ca'yonaje, huaquia mee ca'yonaje pea'ai, Jesosaa.

¹⁷ Jamaya poanijo Jesosa Isaiaja esohui yahuajo nei jayojja jama aca'yonaje. Isaia Eyacuiñajji esohui huohuijji yahuajo nei nei Jesosa Quitojo jama poa ba'a: —“Ohuaya ecua quea mano poanijo, quea nee pea'ai poanijo, quea jaji nee po mee ca'yonaje; huaquia mee ca'yonaje”.

Isaiaa jamaya aca poa yahuajo nei nei Jesosa Quitojo.

Beca cuana Jesosa nijje poqui sa poani
(Noca 9.57-62)

¹⁸ Pea pojjaajo quea huiso dejja cuana Jesosa que jja-chichaquinaje. Poqui sa poanijo Jesosaa ojaya epeeji cuana huohui canaje: —Cua'a ¡bae ojje miji yasijje besapoquicue!

¹⁹ Poqui jjimahuajo oe dejja Jesosa que poeyanaje, Moisesija etehue'yo huohuijji poani. Ohuaya Jesosa huohui neinei canaje: —Miya esohui huohuijji quea pame nee. Eya miquea epeeji nei poaje'yo. Minijje tii eya po'ayequi sa poani —poanaje.

²⁰ Jesosaa oya saja'a canaje jama ba'a: —E'e pojja'a, de. Eya ojjaña cuanaja Edoe Mese poani. Jamatii ecuea equi chama' ejomishocajji, de. Samao ca ca oja jjanijo cahuijaa. Cuicho'ji cuana pea'ai oja ejajo cahuiani. Jiquiojo ecuea equi chama'.

²¹ Majoya Jesosaja pea epeeji poeyanaje o que. Ohuaya Jesosa huohui canaje: —Ecuea esohui huohuijji, eya ecue chii cuiña poaje so'o. Oya etii nei nei. Quijje oya mano'yajo ohuajeaje'yo. Majoya aje mo oe minijje poquije'yo chachacohua.

²² —Chojja —Jesosaa oya saja'a canaje—. Pea cuaa, Eyacuiñajji epeeji pojjeama cuaa mique chii cacuiña cahua; ohuaya camojea cahua mano'yajo. ¡Jjeyahua nei enijje po'yocue!

Beni pajji

(Macoso 4.35-41; Noca 8.22-25)

²³ Majoya Jesosa bishe ai yasijje nequisohuaqui majje ojje besapoquinaje. O shajja'ajjaji cuana nijje besapoquinaje. ²⁴ O besapoquianijo beni quea quemo nee nee poeyanaje. Enashajohua bishe nanejea canaje. Jeasohuajea canaje. Bishe ai yiyedojojo Jesosa cahuijaanaje. ²⁵ O shajja'ajjaji cuaa Jesosa ishe acanaje. Jama poanaje ba'a: —Emeshi Mese Jesosa, ¡shequicue oe! ¡Coya aje se hui'ya! —taanaje.

²⁶ Shequi'yo majje Jesosaa oya cuana saja'a canaje: —¿Apiojji acuae nequiana quea mete nee nee poani? ¿A'a mi ejo e'e nei pojjeama poani?

Jamaya mimi majje Jesosa nequisohuanaje. Beni tecuea canaje: —¡Beni, jamaya, nequioquequicue oe!

Majoya bae ena nijje jama poanaje ba'a: —¡A'a enashajo pojji! ¡Enashajo popaje'yocue!

O jama mimime poajo, enashajo popajea'yonaje. Beni popajea'yonaje. ²⁷ Jamajjeya bishe aijo anica Jesosajo quea bihui nee nee poanaje. Ojee mimimiminaje jama ba'a: —¡Ache dejja shai jiquio quea sohui poja nee nee! Beniya, enashajo cuaa pea'ai oja sohui shajja'ajja cani, de.

Eshahua ojo nequiajo, dejja quea mase nee Jesusaa niñe poquipajea mee ca'yonaje
(Macoso 5.1-20; Noca 8.26-39)

²⁸ Jesosa bae oje miji yasijje ba'eñaquinaje, Jjanana meshi yasijje. Majoya beca dejja Jesosa que poeyanaje. Oya cuana ba'enaje mei jjanijo, ma emano'yo cuana sajaajo. Eshahuaa oja eyami yasijje dobiquinajejo, quea mase nee nee, niñepoqui poanaje. O ani chipi nei jjayejequi ca ajja pea cuana. ²⁹ Niñepoqui cuana Jesosa ba majje taaanaje jama ba'a: —Miya Eyacuiñajjija Bacua Ejja. ¿Apiojji miya ecuana que poeyanaje? ¿A'a jjeyahua nei ecuana cuaqui yasijje jeajeaje'yo? Eyacuiñajjiya eshahua cuana cuaqui yasijje huoojea caje'yo quijje, jjeya nei pojjeama, de —taame poanaje niñepoqui.

³⁰ Quea chipi nee cuichi cuana quea huiso ijjiia'ijji nequi. ³¹ Eshahua cuaa Jesosa jama huohuime acanaje ba'a: —Miyaya ecuana dejjajo nequi cuayaqui mee'yo majje ¡cuichi cuana huasijje ecuana huoojea'yocue!

³² —E'e, ¡poquicue cuichi cuana huasijje! ¡Dobiquicue! —Jesosa poanaje.

Jamajjeya dejja cuana jeanana'yo majje eshahua cuana cuichi cuana huasijje dobiquinaje, ojjaña. Dobiqui majje cuichi cuana cuajicuaji jaoquequinananaje. Bae quea sahua doe nee nee yasijje cuichi cuana hui'i'yonaje, ojjaña.

³³ Ba majje cuichi jaahuanajji cuana jjajjasoaquinaje. Cuajicuajipoquinaje cuiñajji yasijje. Ojjaña cuana ma cuiñajji jo ba'e huohui capoquinaje. Eshahua cuanajo, cuichi cuanajo, dejja cuana niñepoqui jjiima' po mee canaje pea'ai huohui canaje. ³⁴ Jamajjeya ojjaña cuana ma cuiñajji jo ba'e quea mete poeyanaje Jesosa que. Jesosa quea sohui poja nee nee jojoya ojjaña onijje quea mete miminaje jama ba'a: —¡Poquicue miya pea meshi yasijje!

Ojjaña ojo quea mete poanijo Jesosa oje besapoqui o'oyanaje.

Jesosaa pea emanojaa jjaajaqui mee ca'yonaje, quibojjisha
(Macoso 2.1-12; Noca 5.17-26)

9 Jamajjeya Jesosa bisheje besapoqui o'oyanaje oje miji yasijje, Capenaoma huasijje. ² Jomajo pea dejja cuaa quibojjisha quea mano nee jaa ye canaje Jesosa que, equipajaajji. Ma ba majje Jesosa jjashahua-baquinaje jama ba'a: —E'e, jiquio dejja cuana jjashahuaquiani eya ejjaajaqui mee'yojji nei nei.

Jamajjeya Jesusaa emanojaa huohui canaje: —E'e ecuea epeeji, ¡quea bihui nee pocue! Eyaya miquea mimishi cuana cuijea'yonaje.

³ Jesosaja esohui shajja'ajja majje Moisesija etehue'yo huohuijji poani cuana quenequenaje. Jjashahua-ba taiquinaje jama ba'a: —¡De! Jiquio oya Eyacuiñajji pojjeama. ¿Apiojji Eyacuiñajji jayoja jama nei nei mimiani, de? Jamaya quea mimishi.

⁴ Jamajjeya Jesosa ojaya ejjashahuaba taiquijji ba majje jama poanaje: —¿Yajjaje acuae quiana quea quene enijje poani so'o? ⁵ ¿Ache shai quibojjishajo quea camaja eyaya anaje? ¿A'a ojaya mimishi cuijea'yojji quea camaja? ¿A'a jja oya nequisohua meeje'yo eyaya? Ba'ajja —Jesosa poanaje—. ⁶ Jamajjeya eyaya ojjaña Edoe Meseya miqianaya ba meeña eya ca ca iña Emeshi Cuiñacoojji quea ca'a nee nee nequi. Jamajjeya eyaya mimishi cuijeaje'yo nequianaja.

Majoya Jesusaa quibojjisha acanaje: —¡Nequisohua-cue! ¡Miquea equipajaajji bebo majje miquea equi yasijje poquicue!

⁷ Jjeya nei quibojjisha nequisohua majje jeo'yonaje. Jeojeopoquinaje ojaya equi yasijje. ⁸ Ba majje ojjaña cuana quea bihui nee nee poanaje: —¡E'e nei, joya quibojjisha jeo'yonaje jjeya nei! ¡E'e e, Eyacuiñajji nijjeya Jesusaa emanojaa cuana huaquia mee ca'yani! ¡Mimishi cuijea mee ca'yani pea'ai! —poanaje ojjaña.

Jesosaa dejja Mateo bajjani iyaa canaje
(Macoso 2.13-17; Noca 5.27-32)

⁹ Majoya Jesosa poquinaje pea cuiñajji cuana huasijje. Poquijeya Mateo ba canaje equi ejjeshejji jaahuanajji jo ani. Mateo ona sose jjeshejji poani, eba'ejji soseje. Ojjaña emeshi meseja esohuijo jjeshe mee cani, dejja cuana eba'ejji soseje. Ba majje Jesusaa Mateo iyaa canaje: —Mateo, jenijje po'yocue!

Jamajjeya Mateo nequisohua majje Jesosa nijje poquiyonaje.

¹⁰ Majoya Mateohua ojaya epeeji cuana iyaa canaje ojaya equi yasijje e'ijjiia'ijji Jesosa nijje. Jamajjeya Jesosa o shajja'ajjaji cuana nijje Mateoja equi yasijje poquinaje ijjiia'ijji. Quea huiso dejja cuana Mateo jama ona sose jjeshejji poani, dejja mimishi cuana pea'ai poquinaje. Ojee ijjiia'ijji'aninaje Jesosa nijje, Jesosa shajja'ajjaji cuana nijje pea'ai. ¹¹ Ba majje Jodio esohui huohuijji Paniseo cuana Jesosa shajja'ajjaji cuana nijje mimijajinaje jama ba'a: —¿Apiojji miquea esohui huohuijji ijjiia'ijjiani dejja mimishi nijje, ejjeshejji chichajji cuana nijje pea'ai? ¿Apiojji, de?

¹² Jesosaa oya cuana shajja'ajja canaje. Huohui canaje: —¿A'a dejja cuana quea mano pojjeama eshicuijji-quiajji sa poani? Quea mano poanijo ca ca eshicuijji quia cajji. Jamaya miqianaya joya mimishi'ama poso jjabaquiani ecuea esohui shajja'ajja sa po ajja. Mimishi cuaa ca ca shajja'ajja cani. Jamajjeya eya dejja quea mimishi nijje jjapeequiani quea ja'a nee epo meeji.

¹³ ¡Bacue oe! Sjajjepojji jama poani ba'a: "Eya ca ca iña quea pame nee, mimishi'ama nei nei". Jamajjeya joya quea pame poso jjabaquiani ecuea e'iyaa'yojji pojjeama enijje ejjapeequijji. Chojja. Eya poeyanaje dejja joya quea mimishi nee nee iyaaa, mimishi pajea mee'yojji. Jamajjeya esohui etehue'yojo jjabahuejjaquicue jama

ba'a: Yahuaajo nei nei Eyacuiñajjiya Osea tehue mee ca poa jama ba'a:

“Huo cuana cuia cani. Cuia majje na sho cani e bihuiajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue mee ca poa yahuaajo —jamaya Jesusaa Paniseo cuana acanaje.

Bobi ijjia jjima yajji hoohui'ajja canaje cuaa

(Macoso 2.18-22; Noca 5.33-39)

¹⁴ Majoya Huani, ma ona besameeji poa ejeanobia-jea jaa. Ojaya eshajja'ajjajji cuana poeyanaje Jesusa que. Jama huohui'ajjame acanaje ba'a: —Ecuana, Paniseo cuana pea'ai Jodio etiiquianaja esohui jama poanijo bobi ijjia'ijjia jjima ani Eyacuiñajjiyo jjashahuaba neineiquianijo, onijje mimi neineianijo. Jesusa, ¿apiojji acuae mi mi shajja'ajjajji cuana jama po ajja? —oya cuana poanaje beshahua nei quea tecue.

¹⁵ Jesusaa oya cuana saja'a canaje: —Chojja, eya ecuea epeeji cuana nijje yanijo ca'ijjia cahua. Ejjahua-naquijjiyo yahueja epeeji cuana onijje yanijo ca'ijjia'ijjiaquiahua. ¿A'a yahueja epeeji cuana onijje yanijo quea yeno? Chojja. Quea bihui nee. Yahue poqui'yajo ca ca oe ojaya epeeji cuana ijjia'ijjia sa po ajja poaje, quea yeno jjejojo jjashahuaba neineiquiani. Eya jiquio ecua yahue poquiani jayojjaya jama poaje: Quijje eya poqui'yo majje ecuea epeeji cuana Eyacuiñajjiyo jjashahuaba neineiquianijo ijjia'ijjia ajja poaje.

¹⁶ Majoya Jesusaa huohui canaje pea esohui ejjashahuabaqui meejji: —Eseyaya baacojja esee'yohua ca ca ajja bishe eyacuajo. Cho. Baacojja etii enajo nequi see'yani, ca'a'ama. Jjasajajeaqui'yo. Bishe ihuicuaajicuaajije. Bishe eyacuajo ca ca baacojja eyacuaa cacaña.

¹⁷ —Pea'ai ena sese cuatatanijo iya ajja meshimisi etiijo. Ena sese cuatata neineianijo, meshimisi ca'a'ama jjaajajeaqui majje ena sese jjashojeaqui'yo. Cho, ena sese cuatatanijo meshimisi eyacua quea ca'ajo iya cajji.

Jamaya Jesusaa huohui canaje o jjabahuejjaquijji ba'a: Ojaya esohui eyacua quea ja'a jama ca'a cahua. Jamajjeya Eyacuiñajjiya oya cuana quea boejea nee ba caje'yo.

Epona sho'i emano'yooja Pea epona najji poani tii tii

(Macoso 5.21-43; Noca 8.40-56)

¹⁸ Jesusa jamaya dejja cuana nijje mimianijo, pea Jodio dejja o que poeyanaje, ma Jodioja ojee ejjachichaquijji equi jaahuanajji poani. Ecuio'oshajjajo nequinaje o bihuiajji. Jama poanaje ba'a: —Esohui huohuijji, ecuea ebacua piona mano'yonaje jjeya nei. ¡Poecuajicue o napa'ajjaa emeya! Jamajjeya oya shequije o'oya, de.

¹⁹ Nequisohua majje Jesusa epona sho'ija chii nijje poquinaje. Jesusa shajja'ajjajji cuana onijje poquinaje pea'ai. ²⁰ Jesusa poquije oe eponaa ba canaje. Oya quea mano, najji popajea'yo ajja. Ome miji pea beca, 12 eshequajame na cuayapajeaqui'yo ajja poa. Jesusa que quehuajje poeyanaje. Ohuaya oja daqui cuema

iña canaje, emeya. ²¹ Jjashahuabaquinaje jama ba'a: —Eya Jesusaja daqui cuema iña majje najji popajea'yo.

Ohua daqui cuema iña cajje Jesusa jjabajeaquinaje.

²² Epona nama'yo ba canaje. Jama poanaje onijje ba'a: —She, ¡quea bihui nee pocue! Miya quea ja'a jjas-hahuabaquinaje ejo jama ba'a: “E'e jojo nei Jesusaa eya najji popajea mee caje'yo”. Jamajjeya eyaya miya najji popajea mee'yonaje.

Jamajjeya ma epona najji popajea'yonaje.

²³ Majoya Jesusa equi jaahuanajji equi yasijje poquinaje. Dobiquinaje. Ba cañaquinaje quea huiso dejja cuana, ponaña pea'ai equijo nequi. Epona sho'i emano'yojo ojee pa'ani. Ojjaña quea shajjaquijji poani. Dehue mia cani emojea'yojjiyo pea'ai. ²⁴ Jesusaa ojjaña cuana huoojeacuayajea canaje: —¡Cuayaquicue nequiana esecue yasijje! Jiquio epona sho'i cahuijaa; epouquieyo'yo pojjeama —poanaje.

—Chojja de. Oya mano'yonaje, de; shequi'yo ajja —poanaje cuana.

²⁵ Ojjaña cuana esecue yasijje cuayaqui'yajo, Jesusa epona sho'i jaa huasijje dobiquinaje, pea equecuayijji yasijje. Me' iña majje epona sho'i shequi mee ca'yonaje. ²⁶ Jamajjeya ojjaña ma meshijo ba'e yasijje huohuiqui canaje cuaa: —¡Jesusa jjashequi meequi'yojji, de! ¡Jiquio epona sho'i ma emano'yo poanaje shequi'yonaje! —poanaje.

Jesusaa beca dejja cojjama' quea cojja ja'a po mee ca'yonaje

²⁷ Quijje pishana Jesusa ma equijo ani cuayaqui'yonaje. Ejojijje poquianijo beca dejja o quiquishijji poquinaje, cojjama' cuana. Taaanaje jama ba'a: —Jesusa, miya emeshi mese Dabija bacua. ¡Ecuanao jjashahuabaquicue! ¡Cojjajji mo po mee'yocue!

²⁸ Jesusa pea equi yasijje dobiquijajo cojjama' cuana o que poeyanaje. Jesusaa oya cuana huohui'ajja canaje: —Miquianaya ejo jjashahuabaquiani jama ba'a: “E'e, Jesusa ca ca quea cojja ja'a jjapo meequi'yojji, de”.

—E'e, Jesusa, miya quea cojja ja'a jjapo meequi'yojji —poanaje cojjama'.

²⁹ Jamajjeya Jesusaa ojaya ecojja napa'ajja canaje emeya. Huohui canaje jama ba'a: —E'e, miquianajaya ejjashahuabaquijji ejo quea ja'a nee nee. Jamajjeya eyaya cojjajji po mee'yo nequiana.

³⁰ Jjeya nei quea cojja ja'a nee nee po'yonaje. Jesusaa huohui neinei canaje pea'ai: —E'e, eyaya miquianaya quea cojja ja'a po mee'yonaje. Jamatii ja'a jihuhuijji so'o! —acanaje.

³¹ Jamatii poqui majje huohui poanaje ojjaña huasijje: —¡Jesusaa ecuana quea cojja ja'a nee nee po mee ca'yonaje, de! —jamaya poanaje.

Dejja mimi'ajja mimi mee ca'yonaje Jesusaa

³² Majoya ma cojjama' poanaje cuana poqui'yajo, pea cuaa dejja mimi'ajja jjequi canaje Jesusa que. Es-hahuaa oja yami yasijje dobiqui majje mimi'ajja po

mee canaje. ³³ Jesusaa eshahua huoojeacuayajea'yo majje dejja mimi'ajja quea ja'a nee mimi o'oyanaje. Ba majje ojjaña cuana quea bihui nee nee poanaje. Miminaje jama ba'a: —¡Chama' beca dejja Jesosa jama, de! Ohuaye nei eshahua huoojeacuayajea ca'yani, mimi'ajja mimi mee ca'yonaje, de —poanaje.

³⁴ Jamatii Paniseo cuanaa Jesosa quehua niñeba canaje. Jama acanaje ba'a: —Chojja de, Jesosa eyamiquecua pojja'a. Pea eshahua huoojeacuayajea mee cani Edosiquiana nijjeya —sijje pome poanaje.

Jesosa Quito ojjaña cuanao jjashahuabaquinaje quea yeno

³⁵ Jamajojoya Jesosa poquinaje ojjaña cuiñajji quea quemo huasijje, ojjaña cuiñajji sisi cuana huasijje pea'ai. Jodioja equi ojee ejjachichaquijji cuana huasijje dobiquinaje esohui huohuiya.

—Eya quijje eyajo ojjañaja Emeshi Mese oe nei poaje'yo —Jesusaa acanaje.

Ojjaña quea mano jaa jjaajaqui mee ca'yonaje, huaquia mee ca'yonaje pea'ai. ³⁶ Dejja cuana quea huiso nee nee jjachichaquinaje o que. Jesusaa oya cuana ba canaje ñajjajja jama. Ejaahuanajji quea pame chamajo ñajjajja nequi mee ajja quea pame nee. Jamaya ojjaña cuana quea yeno poani; eba'ejji quea camaja ba'yani, ejaahuanajji quea pame chama' pea'ai, de. Jamajjeya Jesosa ojjañajo quea yeno poanaje. ³⁷ O shajja'ajjajji cuana nijje miminaje dejja cuanao. Jama poanaje Jesosa ba'a: —Anoso quejo jahua majje echacojji cuanaa cachicha cahua. Dejja cuana anoso jahuahua jayojja jama, quea huiso nee nee. E'e de, jjeja ojjaña cuana jjashahuabaquiani e'e jojo nei epojji; shajja'ajja caje eya Emeshi Mese nei poeyanaje o jaahuanaa. Jamatii oe pojji Eyacuiñajji chaco sa poani. ¿Aya acuae oya cuana jjabahuejjaqui mee caje'yo Eyacuiñajji? ³⁸ Jamajjeya ¡Eyacuiñajji nijje mimicue! Jama acue ba'a: “Eyacuiñajji, ¡huoojeacue oe miquea echacojji cuana esohui huohuiya, pea cuana minijje ejjapeequi mee'yojji!” —Jesusaa poanaje.

Jesosaa iyaa canaje o shajja'ajjajji cuana 12 huisome

(Macoso 3.13-19; Noca 6.12-16)

10 Jamajjeya Jesusaa o que iyaa canaje o shajja'ajjajji cuana. Oya cuana quea ca'a po mee canaje eshahua cuana huoojeacuayajea mee'yojji, ojjaña emanojaa cuana huaquia mee'yojji, ejjaajaqui mee'yojji pea'ai.

² Jesosa shajja'ajjajji nei 12 poa, yohua bajjani ba'a: Simohui ojaya pea bajjani Peno, oja chahua Anesi; Semeneoja bacua ejja Jacobo, oja chahua Huani; ³ Penipe, Matonome, Tomasi, Mateo ma bejjo chichajji emeshi mesejo poa; Apeoja bacua ejja Satiaco; ⁴ Simoni Senote; Nemeo ojaya pea bajjani Taneo; Jodasa Isicaniote, ma Jesosa iña meesahuajji poanaje dejja mimishija quecua'yojji. Mahuiso Jesusaa babaca ca'yonaje ojaya esohui huohuijji epojji.

Jesosaa o shajja'ajjajji huoojea canaje esohui huohuiya

(Macoso 6.7-13; Noca 9.1-6)

⁵ Jamajjeya Jesusaa jiquio 12 huoojea canaje onijje chacohua. Jamaya huohui canaje: —¡A'a poquijji Jodio dejja pojjeama cuanaja meshi yasijje! ¡Dejja cuana Samania meshijo ba'e cuana huasijje pea'ai a'a poquijji jjeja! ⁶ Chojja, ijjeja poquicue Jodio cuana huasijje! Oya cuana poquiquehuanaje; Eyacuiñajji nijje jjaapeepajequinaje ñajjajja epoquiquehua jayojja jama, de. ⁷ Ojjaña cuana huohucue jama ba'a: “Jjeja Jesosa ojjaña huoojeajji poani” acue. ⁸ ¡Emanojaa cuana jjaajaqui mee'yocue! ¡Emano'yo cuana shequi mee o'oyacue! ¡Dejja batata epo'yo cuana jjajeaqui mee'yocue pea'ai! ¡Eshahua cuana dejja cuana huasijje dobiquiajo huoojeacuayajea'yocue pea'ai! Eyaya miqianaya huaquia meesahuaña pea dejja cuana sosema'. Jamajjeya ¡pea cuana quea bihui nee oe huaquia mee'yocue sosema'! ⁹ Jjeja ¡ejjeshejji, mei huo'o pea'ai, bejjo pea'ai a'a dojojji! ¹⁰ ¡Bashosoco bobi dojojji a'a dojojji! ¡A'a beca daqui dojojji! ¡Miquea ejiojji nequi ejiojji shejee dojocue! ¡Oe acui ejjaquecuaca'aquijji dojocue, beca pojjeama! Miquea esohui shajja'ajja majje pea cuaa miya cabobia cahua. E'e, miyaya esohui huohuañajo, bobi cahua. ¹¹ Miquianaaya pea cuiñajji yasijje poqui majje ¡sa'ajjacue oe dejja miquea epeeji epojji, joya bei bei! ¡Ojaya equijo anicue ma cuiñajji ani majje! ¹² Ojaya equi yasijje dobiqumajje huohucue jama ba'a: “¡Eyacuiñajjiya miqianaya cajaanuana cahua!” ¹³ Ojjaña ma equijo ba'eya miya quea pame nee acajo, Eyacuiñajjiya miquea esohui jayojja jama oya cuana jaahuana caje. Miya quea pame nee mi ba'e mee cajo, cho; Eyacuiñajjiya oya cuana ejaahuanajji pojjeama. ¹⁴ E'e pojja'a beca equijo, beca cuiñajji miquea esohui shajja'ajja sa po'yo ajjajo, niñeba cani pea'aajo, joya cuana jeajeana'yocue! Poquije'yohua jama acue ba'a: “Eyaya miqianaya cajaa aje'yo, ¡quea mimishi nee com. Eyacuiñajjiya miya ba cani quea mimishi nee nee. Ohuaya miya quea nee nee po mee caje'yo” acue —Jesusaa poanaje—. ¹⁵ Eyaya miya e'e jojo nei huohuaña jama ba'a: Quijje Emeshi Mese nei poeje o'oya, ojjaña quea mimishi poani quea nee nee po meeje'yo. Yahuajo nei nei dejja cuana Sonomajo ba'e, Jomoshajo ba'e pea'ai quea mimishi nee ba'yanajo, Eyacuiñajjiya quea nee po mee ca'ya poa, yahuajo. Ma dejja shajjama' cuana ca ca Eyacuiñajjiya quea nee nee po tiitii mee caje'yo, de. Sonomajo ba'e cuana ca ca quea nee pishana po tiitii mee caje'yo.

Quijje dejja cuana quea mase nee poaje

¹⁶ Jesusaa o shajja'ajjajji cuana huohui canaje pea'ai: —Eyaya miya huoojeaña dejja quea mase ibia jama huasijje. Miquianaya quea bejjo ohuaya mi napa ca chana'. Jamajjeya ¡quea jjashahuabaqui ja'a pocue! ¡Quea bei pocue; mimishi'ama pea'ai! ¹⁷ ¡A'a pajea'yojji dejja cuana quea mase poaje'yo minijje! Miya iña majje dojo caje Jodio etii ani yasijje jeanobiaa. Janobajjima nei cuia caje Jodioja equi ojee ejjachichaquijji. ¹⁸ Miya

cuana enijje jjapeequianijo dojo caje cuaa pea emeshi mese cuana huasijje, ona huoojeajji nei nei yasijje pea'ai. ¡Jamajjeya miquianaaya esohui quea pame nee ejo huohuicue ona huasijje, Jodio pojjeama cuanaja ej-jahuoojeaquijji nei nei yasijje pea'ai! ¹⁹ Dojo majje huohui'ajja caje jama ba'a: "¿Ae poani miquianaya?" Jamaya acajje ¡a'a quea mete pojji! A'a jjashahuabaquijji jama ba'a: "¿Ae shai eyaya huohuije?" ²⁰ E'e nei Eyacuiñajjiya miya mimi meesahua caje. Ohuaya huoojea caje Edojjoshahua Pame mi que. Edojjoshahua Pameya miquianaya huohui meesahua caje —Jesosa poanaje.

²¹ —E'e, quijje pishana dejja cuana, ponaña pea'ai quea mase nee poaje ecuea epeeji cuana nijje. Jamajjeya e'o'i mese oja chahua iña meesahua caje'yo onajaya equecua'yojji. Ejeajji cuaa jamaya acaje'yo oja bacua. Ebacua cuana shajjama' poaje. Dejja mase oja chii, oja enaese pojja'a iña mee caje'yo equecua'yojji. ²² Miquiana enijje jjapeequianijo, quea huiso cuana quea quene nee nee poaje'yo minijje. Jamatii enijje jja-peequi pajaja'yo ajjajo nequi tiitii meeje'yo enijje eyajo, eya ojjañaja Emeshi Mese oe nei, ejjahuojeaquijji nei nei poaje. ²³ Dejja cuaa oe cuiñajji ba'eya miquianaya janobajjima napa cajo, ipoquicue pea cuiñajji yasijje! Eyaya miya e'e jojo nei huohuiaña: Ojjaña Jodio dejja cuanaja cuiñajji cuana huasijje poqui jjimahuajo, ojjaña cuana huasijje ecue sohui huohui jjimahuajo pea'ai eya, ojjañaja Edoe Mese poeje o'oya —Jesosa poanaje.

²⁴ —Ojjaña cuana enijje quea mase poani. Jamajjeya minijje quea mase poaje pea'ai e shajja'ajjajji poani joojya. ²⁵ Echacojji poani o chacomeejji nijje chacocho- coanijo, pea cuaa echacomeejji napa cajo, echacojji poani pea'ai napa caje cuaa. ¿A'a e'e? Dejja mimishi cuana ejo sía jje poanaje jama ba'a: "Miya Edosiquiana Meesemo bajjani". Jamaya enijje quea tai mimijajianijo quijje quea tai nee nee mimijajije minijje ecuea epeeji poani joojya. Jamajjeya miya e jayojjaya acaje'yo; ¡jamatii quea bhui nee pocue! —Jesosa poanaje.

¡A'a quea mete pojji dejja cuanajo!

(Noca 12.2-7)

²⁶ —Jamajjeya dejja mimishi cuanajo ¡a'a quea mete pojji! Ojjaña esohui quehuajje acani, pea cuanaja shajja'ajja jjima, quijje shajja'ajja caje. Ojjaña quehuajje amajje quijje ojjaña ba mee caje'yo.

²⁷ —Jjeya eyaya esohui huohuiaña miquiana huasijje, ma pea cuanaja shajja'ajja jjima. Quijje pishana miquianaaya ojjaña huasijje huohuiquije ecuea esohui. ¡Quea ja'a nee huohuicue! ²⁸ Ojjaña cuanajo, eshahua cuanajo pea'ai ¡a'a quea mete pojji! Oya cuanaa miya quecua caje'yo pojja'a. Jamatii, miquea edojjoshahua mano meeme ajja. ¡Eyacuiñajji oe neiyo jjashahuaba- quicue! Shajjama' poajo ohuaya miya mano mee'yo majje cuaqui yasijje jea caje'yo miquea edojjoshahua —Jesosa poanaje.

²⁹ —E'e —Jesosa poanaje—, beca anohuii jjeshe caji beshahua nei sosema'. Nahue'ama nei cuichoiji cuana. Jamatii Eyacuiñajjiya, esejaya Chiya cuichoiji cuana ba cani, bobi ijja mee cani. ³⁰ Pea'ai ¿ache huiso ehoojja-

ña miquea esapajo ba'e? Eyacuiñajjiya eba. Ojjaña oja- ya ehoojjaña esico, de. ³¹ Jamajjeya ¡a'a quea mete pojji! Cuichoiji cuana Eyacuiñajjiya nahue'ama; miya ca ca ojaya quea nahue nee nee —Jesosa poanaje.

¡A'a quea bicho pojji Jesosa nijje jjapeequiani!

(Noca 12.8-9)

³² —Beca cuaa bicho'ama huohui cani: "E'e, eya ca iña bicho'ama Jesosaja epeeji e'e jojo nei". Jamajjeya eyaya ecue Chii eyajo ani huohuije bicho'ama jama ba'a: "E'e, oya cuana ecuea epeeji e'e jojo nei". ³³ Pea cuana quea bicho poani: "Cho, eya Jesosa Quitoja epeeji pojjeama". Jamajjeya eyaya ecue Chii eyajo ani huohuije jama ba'a: "Cho, oya cuana ecuea epeeji pojjeama. Cajaa" eyaya aje —Jesosa poanaje.

Ojjaña dejja Jesosajo ojee ba'e meeme ajja quea bei

(Noca 12.51-53; 14.26-27)

³⁴ —¡A'a jjashahuabaquijji eya poeyanaje ojjaña cuana ojjaña meshijo ojee quea bei ba'e meeya! Chojja, de. Pea cuana quea mase poaje ecuea epeeji cuana nijje. ³⁵ E'e, ecuea esohui ohua shajja'ajja canijo, oja chii nijje oja bacua ejja cuana quea quene poaje. Ecuea esohui jayojja jama ohua acanijo, oja enaese nijje oja- ya ebacua piona quea quene poaje pea'ai. Enijje jja- peequianijo, oja ano nijje oja bacua ejjaja huanase quea quene poaje pea'ai. ³⁶ Jamajjeya ecuea epeeji huapa pojjeama cuana quea quene poaje onijje ecuea epeeji pojjeama jjejojo; pea cuana quea quene pishana poaje onijje —Jesosa poanaje.

³⁷ —Ojjaña joya oja chii, ojaya enaese pojja'a quea jea nee nee acanijo eya quea jea pishana acani ecuea epeeji pojjeama, de. Pea'ai ojjaña joya oja bacua ejja, oja bacua piona pojja'a quea jea nee nee acanijo eya quea jea pishana acani enijje jjapeequi meeme ajja. Cajaa. ³⁸ Eyaya Eyacuiñajjiya esohui huohuiañajo, pea cuana enijje quea quene poaje'yo. Dejja mimishiya enapa ca poani jjejojo enijje mi jjapeequiani. Ojjaña joojya e jayojjaya ba'e sa po ajja ecuea epeeji pojjeama. E'e, jiquio ecua acui ecueata'apee quea camaja e'abojji jama jayojja enijje jjapeequiyajo quea camaja poaje.

³⁹ Dejja mimishi cuaa ecuea epeeji quecua ca chana'. Jamajjeya quea mete nee nee enijje jjapeequi sa po ajja. Cuaqui yasijje dobiquije'yo tiitii. Joya enijje jjapeequiani ca ca dejja mimishi cuaa quecua caje'yo pojja'a. Jamatii. Mano'yo majje enijje ba'e tiitiije'yo quea pame nee eyajo —Jesosa poanaje.

Ojjaña joya quea pame poani sosequia caje'yo quijje

Eyacuiñajjiya

(Macoso 9.41)

⁴⁰ —E'e —Jesosa poanaje pea'ai—, beca cuana minijje jjapeequije'yo miya ecue sohui huohuiañajo. Jamajjeya oya ecuea epeeji poani pea'ai. Eyacuiñajji e huoojeajji poani; ojjaña joya enijje jjapeequiani Eyacuiñajjiya epeeji poani pea'ai. ⁴¹ Quijje Eyacuiñajjiya ojaya esohui huohuiji sosequia caje'yo ojaya esohui huohui cani soseje. Pea cuana ojaya esohui huohuiji nijje jja-

pee neinei-quianijo, sosequia caje'yo esohui huohuijji jayoija jama. Ojjaña jaya Eyacuiñajji epeeji nije e'e jojo nei jjapeequiani Eyacuiñajjiya sosequia caje'yo quea pame nee oya quea pame nee poanijo. ⁴² E'e jojo nei ojjaña jaya ecuea eshajja'ajjaji poani ba'e mee-sahua cani, ena e'ishijji quia cani pojja'a eya ojaya quea boti neejo, Eyacuiñajjiya oya quijje sosequia caje'yo oya quea pame nee poanijo —Jesosaa o shajja'ajjaji cuana huohui canaje mahuiso huoojea jjimahuajo.

Huaniya Jesosa que huoojea canaje o shajja'ajjaji cuana
(Noca 7.18-35)

11 Majoya Jesosaa ojaya ome miji becanejijji pea'ai, ¹² eshajja'ajjaji cuana huasijje esohui huohui majje pea cuiñajji quea chipi nee yasijje poquinaje esohui huohuiya.

² Yahuajo pea dejja cuaa Huani iña ca poa, ma ona besameejji poa. Dejja maseja equi ejjaje-anobiaquijji yasijje jeanobiajea ca poa, eme' jeyo'yo. Ejeanobiajaa Huaniya shajja'ajja canaje onaja ehuohui'yo Jesosajo. Jamajjeya o shajja'ajjaji cuana huoojea canaje Jesosa que. ³ Oya cuana Jesosa huohui'ajjaña meequi canaje jama ba'a: —Jesosa, yahuajo Huaniya huohui canaje jama ba'a: “Eyacuiñajjiya Emeshi Mese nei ojjaña jaahuanajji huoojea caje'yo ecuaa huasijje”. ¿A'a miya ma Emeshi Mese nei? E'e pojja'a ecuaa pea ishoaje. ¡Jamajjeya huohucue miyaya! ¿Yajja shai ecuaa Huani aje'yo so'o? —Huaniya eshajja'ajjaji cuana poanaje.

⁴ Jesosaa oya cuana saja'a canaje: —¡Poqui o'oyacue Huani que! ¡Ecuea esohui miquianaaya shajja'ajjaña, jiquio miya eya banajeya pea'ai oe Huani huohuiquicue! Jama acue ba'a: ⁵ “Huani, Jesosaa cojjama' cuana quea cojja ja'a po mee ca'yani. Jiojijijajja jeo mee ca'yani. Dejja batata epo'yo cuana jjajeaqui mee ca'yani. Shajjaqueba pea'ai quea shajja ja'a po mee ca'yani. Emano'yo cuana shequi mee ca'yani pea'ai. Esohui quea pame nee huohui ca'yani ojjaña dejja quea yeno huasijje”. ⁶ E'e, eya Eyacuiñajjiya huoojea'yo ojjaña jaahuanajji. Quea bihui nee capo'yahua ojjaña jaya ejo jjas-hahuabaquiani jama ba'a: “E'e jojo nei Jesosa Eyacuiñajjiya huoojea'yo ojjaña jaahuanajji”. ¡A'a jjas-hahuaba quehuaquijji! —Jesosa poanaje.

⁷ Jamajjeya Huaniya epeeji cuana poqui o'oyanaje Huani que. Majoya poqui'yajo Jesosa miminaje pea cuana nijje: —Yahuajo Huani meshi jabojo, quimajo aninaje. Miquianaya o que poquinaje. ¿Ae shai banaje miyaya? ¿Ae jjas-hahuabaquinaje Huani? ¿A'a jjas-hahuabaquinaje Huani esohui huohuijji quea ja'a pojjeama? Chojja. ⁸ Miquianaya Huani que poquinaje ¿ae baa? ¿A'a dejjaja daqui quea nahue nee ehuosho ba'e banaje? Chojja. Dejja daqui quea nahue nee huosho cani equi quea quemojo ba'eya. ⁹ ¿Achajja Huani ba'ya poa? ¿A'a miya jjas-hahuabaquinaje Huani Eyacuiñajjiya esohui huohuijji nei nei? E'e, de. Jamatii Eyacuiñajjiya esohui huohuijjiya ba cani oe pojji. Huaniya eba quea huiso nee. ¹⁰ Yahuajo nei Eyacuiñajjiya esohui etehue'yo Huani jama poa ba'a:

“¡iquio dejja ecuea esohui huohuijji nei poani. Jamaya eya sa poani. Eyaya oya huoojeaje ebionei, mi hui do-jojji. Ohuaya dejja cuana huasijje huohui caje miquea epoejjiyo”.

Jamaya yahuajo nei nei Eyacuiñajjiya ojjaña ba mee ca poa Huaniya poe majje ejo jjabahuejjaqui mee caje cuana. ¹¹ Ecuea pea esohui a'a pajea'yojji jama ba'a: Ojjaña pea cuana quea pame. Huani ma ona besameejji poa quea pame nee. Jjeya pea chama' Huani jayoija jama. Jamatii quijje eya Emeshi Mese nei poaje, ojjaña ecuea epeeji cuana Huani jayoija jama poaje'yo, quea pame nee. ¹² Eya poeyanaje Huaniya ojjaña pojja ejo huohui canaje jama ba'a: “Jjeya nei Emeshi Mese nei Quito poeje”. Jamatii dejja mase cuaa Huani napa cani ojjaña pojja. Eya, Emeshi Mese nei jeabichaje sa acani cuaa pea'ai. Oya cuana emeshi mase jayoija jama huohui sa poani —Jesosa poanaje.

¹³ —Yahuajo nei Eyacuiñajjiya esohui huohuijji cuaa huohui ca poa, Moisesija esohui etehue'yojo jama poa pea'ai ba'a: “Quijje Eyacuiñajjiya huoojea'yo ojjaña jaahuanajji Emeshi Mese oe nei poeje”. Jamaya Huani miminaje. Jamaya pea cuana miminaje Huani poe jji-mahuajo pea'ai. ¹⁴ E'e, yahuajo nei Eyacuiñajjiya esohui huohuijjiya tehue ca poa jama ba'a:

“Ecuea ehoojea'yo ojjaña jaahuanajji poe jjimahuajo, eyaya Enia huoojeaje ebionei, ehui dojojji”.

—Huaniya Enia jayoija jama huohui canaje, ma Eyacuiñajjiya esohui huohuijji yahuajo nei nequia poa jama. ¹⁵ Jamajjeya ¡bacue; a'a shajjama' pojji, ca miquiana ba sa poanijo! ¹⁶ Ojjaña cuana jjeya nei ba'e ecuea eba. Oya cuana esho'iquiana quebanei poani jayoija jama. Quebanei poanijo jama poani: Esho'i cuaa pea esho'i taaa cani. ¹⁷ Jjamimihue'equiani jama ba'a: “Ecuaa dehue miaña epona ejjahueaquijji jama. Jamatii miquianaya majamaja ajja. Pea'ai e pa nishoanijo, emano'yojo pa'ani jayojjajajo, miquianaya pa nisho ajja. Jamajjeya miquianaya quebanei po ajja ecuaa nijje” poani esho'iquiana —Jesosa poanaje—. Jamaya miquianaya jjeya poani, de. ¹⁸ E'e, yahuajo pishana Huani poeyanaje. Eyacuiñajji nijje mimi titiianijo bobi ijia'ijia ajja. Ecahuishi ishi jjima pea'ai. Jamajjeya ojjaña cuaa huohui canaje ojo jama ba'a: “Huani jja ca niñepoqui jama”. ¹⁹ Eya ojjaña cuanaja Edoe Mese poeyanaje. Eya ca jja ca ijia'ijiani; ojjaña nijje mimimimiani. Jamajjeya miquianaya ejo siajje poani jama ba'a: “¡Bacue ¡iquio dejja Jesosa! Oya jejje ajja tii. Dejja mimishi nijje jjapeequiani, bejjo chichajji cuana nijje pea'ai, de”. ¡iquio ecua esho'iquiana pea nijje jjapeequi sa po ajja jama jayoija miquianaya ecuaa nijje jjapeequi sa po ajja. Miquianaya jjas-hahuaba quehuaquiani Huani, ejo pea'ai. Jamatii ecuaa Eyacuiñajjiya ejjas-hahuabaquijji quea ja'a nee jayoija jama añajo ecuaa quea pame nee añajo —Jesosa poanaje.

Beca cuiñajjiyo ba'e cuana shajjama' poanaje
(Noca 10.13-15)

²⁰ Quea huiso cuiñajjiyo Jesosaa ma dejja cuaa ajjima acani ahuicha'a huicha'a canaje. Jamatii quea huiso

cuana mimishi pajea sa po'yo ajja. Jamajjeya Jesosaa oya cuana tecuea canaje. ²¹ Jama poanaje ba'a: —Miquianaya quea mimishi nee nee. ¡Quea yeno nee nee miquianaya poaje Conasijo ba'e, Betesainajo ba'e pea'ai! Ma dejjaa ajjima acani eyaya ahuicha'a hui-ch'a'anaje miquianaja cuiñajji cuanajo miquea ebajji nisho. Yahuajo nei nei pea dejja cuana Tinojo, Sinonojo pea'ai ba'eja ojaya ba jjima eyaya ma dejja cuaa ajjima aña. Eba jojjemo oya cuanaa mimishi cuana pajea ca'-yo queaye mimishijo quea yeno po majje. ²² ¡Bacue oe! Quijje Eyacuiñajjiya ojjaña cuana sosequia caje'yo oja-ya eba'e'yojji sosejji. Ohuaya yahuajo nei nei Tinojo ba'e cuana, Sinonojo ba'e cuana pea'ai quea nee po mee caje'yo mimishijo. Miquianaya Conasijo ba'e, Betesainajo ba'e pea'ai ca ca quea nee nee po mee caje'-yo ecuea esohui miquiaaya mi shajja'ajjajo. ²³ Miquianaya Capenaomajo ba'e quea pame poso jjabaquiani, jjashahuabaquiani jama ba'a: "Ecuana quea pame nee nee; pea meshijo ba'e cuana quea pame pishana". Chojja, de. Siajje miya poani. Quijje Eyacuiñajjiya janobajjima nei napa caje miquianaya quea yeno poaje. Eyaya ma dejjaa ajjima acani aña miquianajaya cuiñajjiyo quea huiso. Jamatii miquea mimishi cuana pajea sa po'yo ajja. Yahuajo nei nei pea cuiñajji Sodoma bajjani yania poa. Eyacuiñajjiya ma dejjaja ba jjima acani eba jojjemo oya cuana quiyo jeyojeyo'yo jjima poqueaye. Jamatii jjeya Sodoma chama'yo tii. ²⁴ ¡Bacue oe! Quijje aje Eyacuiñajjiya ojjaña cuana sosequia caje'yo ma ecua oya po nequia poa jama. Ma pojajjo ohuaya dejja cuana yahuajo nei Sodomajo ba'e quea nee po mee caje'yo quea mimishijo. Miquianaya Capenaomajo ba'e ca ca quea nee nee po mee caje'yo ecuea esohui miquiaaya mi shajja'ajjajo —Jesosaa poanaje.

Jesosaa Quitohua eseya jomishoca mee caje
(Noca 10.21-22)

²⁵ Jamaya dejja cuana tecuea majje Jesosaa eseya Chii ai nijje miminaje jama ba'a: —Ecueta Chii, miya eyajo Emeshi Mese nei poani. Ojjaña meshi cuana miquea poani pea'ai. Eyaya miya bihuiaña. E'e, beca cuana jjashahuabaquiani jama ba'a: "Ecueta eba quea huiso esohui, quea huiso aquiana pea'ai". Jamajjeya miyaya oya cuana ba meesahua ajja. Jamajjeya oya cuanaja ba jjima eya Emeshi Mese oe nei poani. Pea cuana esho'i cuana jama ca ca miyaya jjashahuabaqui meesahuaña quea ja'a nee eya Emeshi Mese nei poani. Jamajjeya eyaya miya bihuiaña. ²⁶ E'e ecue Chii, jamaya miyaya aña miquea ejjashahuabaquiiji. Apoa —jamaya Jesosaa miminaje eseya Chii ai nijje.

²⁷ Majoya Jesosaa jama poanaje ba'a: —Eyacuiñajji ecue Chii e huoojajji epo. Eya ojaya esohui huohuiiji poani. Ecue Chiiya eyajo anija ecuea ejjashahuabaquiiji ojaya eba nei nei, ojaye nei. Ecue Chiiya ejjashahuabaquiiji ecuea eba nei nei pea'ai, ecuee nei. Eyaya ecuea epeeji ba meesahuaña quea ja'a nee ecue Chiiya ejjashahuabaquiiji —Jesosaa poanaje.

²⁸ —¡Enijje jjapeequicue quea bei! Mique mimishi cuanajo miya quea yeno. Miquea echaco quea camaja-

jo miya quea yeno poani pea'ai. ¡Enijje jjapeequicue! Eyaya miya jomishoca meeje'yo camaja'ama eba'e'yojji. ²⁹ Eyaya quiana ca ca oe miquianaya jama pojjeamaa jjejojo quea jea aña; tecue'ama; quea bei pea'ai. Ecuea epeeji po majje miquianaya quea bei poaje'yo. Ba'e tiitii meeje'yo enijje eyajo pea'ai. Jamajjeya jecuea esohui jayojja jama acue! ¡Jjashajja'ajjaquicue quea ja'a nee ecuea esohuijo! ³⁰ Camaja'ama ecuea esohui jama eba'e'yojji. Ecuea esohui aquiana pejapeja e'abojji jayojja poani —Jesosaa poanaje.

Esohui epojja ejomishocajjiyo
(Macoso 2.23-28; Noca 6.1-5)

12 Majoya epojja ejomishocajjiyo Jesosaa o shajja'ajjajji cuana nijje ejjojjiye poquinaje. Que yiyejje poquije quea shoe poanaje; quejo nequi anoso ai sejja canananaje eshe tii e'ijjajji, o shajja'ajjajjiya. ² Maya Paniseo cuaa ba canaje. Jamajjeya Jesosaa nijje mimijajinaje jama ba'a: —¡Bacue oe! Mi shajja'ajjajji poani cuaa chaco cani. Anoso ai sejja cani epojja ejomishocajjiyo. Moisesija etehue'yo jama poani ba'a: "¡A'a chacojji epojja ejomishocajjiyo!"

³ Jesosaa oya cuana saja'a canaje jama ba'a: —¿A'a miquea ba jjima esohui etehue'yo emeshi mese Dabija? ⁴ Yahuajo nei nei ojaya epeeji cuana quea shoe po majje ojee Eyacuiñajjiya equi yasijje dobiquinananaje. Ijja ca poa ejji ecabeje, maya Eyacuiñajji yasijje quia ca poa cuaa ojaya ebajji. Jiquio ca oe Eyacuiñajji nijje mimianiya ca'ijjia cahua; pea cuanaja e'ijjajji pojjeama. ⁵ ¿A'a miquea ba jjima Moisesija esohui etehue'yo? Jama poa ba'a: Ojjaña epojja ejomishocajjiyo Eyacuiñajji nijje mimiani cuaa ca oe Eyacuiñajjiya equijo cachaco cahua. Jamatii mimishi'ama, mimijajji ajja, de; ojaya yajjiyo cachaco cahua.

⁶ —E'e, eyaya e'e jojo nei huohuiaña jama ba'a: Moisesija esohui Eyacuiñajjiya equijo quea ja'a pishana yahuajo nei poa. Ecuea esohui ca ca quea ja'a nee nee —Jesosaa acanaje—. ⁷ E'e, miquianajaya Eyacuiñajjiya esohui etehue'yo eba neinei'yo jojjemo dejja cuana mimishi'ama jjaniñebaqui ajja pome. Jamaya quea tai. Yahuajo Eyacuiñajjiya esohui etehue'yo jama poa ba'a: "Huo cuana cuia cani. Cuia majje na sho cani e bihuiajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee". Jamaya tehue ca poa yahuajo.

⁸ —Jamajjeya eya ojjañaja Edoe Mese Emeshi Mese nei poani. Eyaye nei huohuije epojja ejomishocajjiyo; ¡quea pame nee nee acue! ¡Pea cuana quea jea nee acue! —Jesosaa poanaje.

Meshahuama'yo epo jjameshahuanequi mee ca'yona-
je

(Macoso 3.1-6; Noca 6.6-11)

⁹ Majoya Jesosaa poquinaje pea huasijje. Equi ojee ejjachichacuiiji yasijje dobiquinaje. ¹⁰ Jomajo dejja meshahuama'yo epo aninaje. Jamajjeya Jesosaa ba majje Paniseo cuana jama jjashahuabaquinaje ba'a: —E'e

pojja'a Jesosaa chaco caje epojja ejomishocajjijo; e'e pojja'a eme' jeapisa mee caje'yo epojja ejomishocajjijo. Caba'ajja sahua —poanaje Paniseo.

Jesosa nijje mimijaji sa poanaje. Jamajjeya oya huohui'ajja canaje Paniseo cuaa: —Jesosa, ¿a'a dejja quea mano jaa miyaya huaquia mee'yome epojja ejomishocajjijo?

¹¹ —Epeeji cuana, e'e pojja'a miquea ñajjajja jjani quea doe yasijje oquequije epojja ejomishocajjijo. ¿A'a miyaya ñajjajja iña majje ma pojajajo jjequisohuaje'yo? E'e, de. ¹² ¡Bacue oe! —Jesosa poanaje—, dejja Eyacuiñajjija quea boti nee; ñajjajja ca ca quea boti pishana. Jamajjeya e'e, pea cuana ca'a meesahua'yahua epojja ejomishocajjijo. Jamaya Moisesija esohui etehue'yojo poani pea'ai —Jesosa poanaje.

¹³ Ma mimi majje Jesosaa meshahuama'yo epo jama acanaje ba'a: —Epeeji, ¡miquea eme' jeapisa'ajja'yo socue!

Jamajjeya eme' jeapihui majje eme' jeapisa ca'yona-je; pea mijijje jayojjaya po'yona-je. ¹⁴ Majoya Paniseo cuana esecue yasijje cuayaqui majje ojee miminaje: —¿Yajja amajje Jesosa quecua ca'yoyji so'o, de? —jama-ya poanaje Paniseo cuana.

Jesosa Eyacuiñajjija echacojji ojaya yajjijo

¹⁵ E'e, Paniseo cuaa oya quecuapana canaje. Ma shajja'ajja majje Jesosa poquinaje pea meshi yasijje. Quea huiso dejja cuana onijje poquinaje. Ojjaña cuana huaquia mee ca'yona-je, jjaajaqui mee ca'yona-je, Jesosaa. ¹⁶ Jama poanaje ba'a: —E'e, eyaya miya huaquia mee'yona-je. ¡Jamatii a'a jihuhuijji so'o!

¹⁷ E'e, Jesosaa ojjaña cuana huaquia mee ca'yona-je, sohuihuohui canaje pea'ai. Jamaya Isaiaja esohui etehue'yo ojo yahuajo nei nei jayojja jama poa. Eyacuiñajjija Isaia yahuajo nei nei tehue mee ca poa Jesosajo jama ba'a:

¹⁸ “¡Bacue! Jiquio dejja ecuea echacojji ecuea yajjijo. Eyaya oya huoojeaje'yo. Oya ecuea quea jea nee nee. Ojo eya quea bihui nee nee. Ecuea Edojjoshahua Pame o que eyaya huoojeaje'yo; ohuaya ojjaña Jodio pojjeama cuana huasijje huohui caje jama ba'a: —¡Ojjaña cuana ecuea esohui e'e jojo neiyo jjabahuejjaqui'yajo Eyacuiñajjija quea boejea po mee caje'yo! ¹⁹ Oya ecuea echacojji jjamimicuijea nobiajeaqui ajja. Quea bei nee mimije'yo. Ejiojjijje poquiani quea shajjaquijjo po'yo ajja. ²⁰ Joya quea mimishi nee nee aje jja oe ohua mimishi cuana cuijea ca'yajje quea boejea poaje'yo. Cuanaya jiquio ecua cuaquijji quijjo'yo jjimahuajo esei sho o'oyaña jama jayojja ecuea epeeji quea mimishi po o'oya chana-jo ohuaya quea ja'a nee nee po mee caje o'oya, de. E'e, ohuaya ejo chaco tiitii caje'yo; quea huiso nee nee ba'e mee caje'yo quea ja'a nee nee.

²¹ Jodio pojjeama quea huiso nee nee ojjaña meshijo ba'e cuanaya e'e jojo nei onijje jjapeequije'yo pea'ai”. Jamaya Eyacuiñajjija Isaia tehue mee ca poa yahuajo nei nei Jesosa Quitotojo.

Jesosa niñeba canaje cuaa

(Macoso 3.20-30; Noca 11.14-23; 12.10)

²² Majoya Jesosa que jjequi canaje cuaa dejja niñepoqui. Oya cojjama', mimi'ajja pea'ai. Jesosaa eshahua huoojeacuayajea ca'yona-je. Jamajjeya oya quea cojja ja'a poanaje, emimijji pea'ai. ²³ Ba majje ojjaña cuana quea bihui nee poanaje. Jama acanaje ba'a: —E'e de, a'ya shai de, ¿a'a pojja'a Jesosa Eyacuiñajjija huoojea'yo Quito?

²⁴ Ma shajja'ajja majje Paniseo cuaa Jesosa niñeba canaje. Jama poanaje ba'a: —Chojja, de. Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Sata-nasa bajjani, pea bajjani Meesemo nijjeya —poso acanaje Paniseo cuaa.

²⁵ Paniseo cuanaja ejjashahuabaqui'yoyji quea tai Jesosaja eba poanaje. Jamajjeya oya cuana tecuea canaje jama ba'a: —¡Shajja'ajja-je oe! Joya emeshi mese shajja'ajja sa po ajjajo ojee jjaquecuaqui majje jjaquecua iyaiyaquije'yo; dejja cuana ma meshijo ba'e chama'yo tii poaje'yo. Cuiñajjijo ba'e cuana jamaya po pea'ajje, chama'yo tii poaje emeshi meseje echacojji cuana. Huapa pojjeama cuana jjaquiaquijjo chama' epeeji cuana poaje'yo pea'ai. ²⁶ Jamaya pea'ai Edosiquiana, Satanasaa pea eshahua ehoojeacuaya'yo jojjemo dejja huoojea'yoyji pojjeama po'yoqueaye —Jesosa poanaje. ²⁷ —¿A'a ya eya Edosiquiana nijjeya niñe, pea eshahua cuana pea'ai huoojeacuayajeaña poso aña? Jamajjeya miquea epeeji cuanaa ¿ae nijje eshahua huoojeacuayajea cani? Eyacuiñajjija asahua canijo. Jamajjeya ojaya eba miqianaya ejo siajje poani. ²⁸ E'e, Eyacuiñajjija nijjeya eyaya eshahua huoojeacuaya-jea'yaña. Jamajjeya bacue eya e'e jojo nei Eyacuiñajjija, Emeshi Mese oe nei jjeja poani tii. ²⁹ Cuanaya ¡bacue! ¿A'a dejja quea ca'a neeja equi yasijje dobiqiani oja aquiana siiya o jeyo jjima nequijo? Chojja. O jeyo majje ojaya aquiana cuana sii caje cuaa. Jiquio ecua e'aquiana mese ebionei jeyo cani jama amajje eyaya eshahua cuana jeacuayajeaña —Jesosa poanaje pea'ai.

³⁰ —Cuanaya ojjaña joya enijje jjapeequi ajja aje oe e quecuapanajji poani, ojjaña enijje chaco ajja ecuea epeeji pojjeama aje oe e ejeabichajjaji nisho poani —poanaje.

³¹ —Jamajjeya eyaya miya e'e jojo nei huohuaña: Eyacuiñajjija ojjaña mimishi cuana, siajjepojji cuana pea'ai cuijea caje'yo. Jamatii joya Edojjoshahua Pame niñeba cani tii ca ca Eyacuiñajjija maya emimishi cuijea'yoyji pojjeama tii tii. ³² E'e —Jesosa poanaje—, eya niñeba cajo Eyacuiñajjija ma mimishi cuijea caje'yo. Joya Edojjoshahua Pame niñeba cani tii ca ca Eyacuiñajjija maya emimishi cuijea'yoyji pojjeama tii tii. Jjeja ecuijea'yoyji pojjeama; quijje ecuijea'yoyji pojjeama tii tii poaje'yo, eya ecue Chii nijje eyajo ojjaña huoojea'yoyji poaje —Jesosa poanaje.

Dejja mimishi acui tai jjajja ajja jayojja

(Noca 6.43-45)

³³ Jesosaa Paniseo tecuea canaje pea'ai jama ba'a: —Acui quea pame jjajjani. Acui quea tai jjajja ajja, quea jjajja biso. Jamajjeya miyaya baña dejja mimishi acui tai jayojjaya; ohuaya quea tai acani. ¿A'a miyaya eya baña quea pame nee? Jamajjeya eya quea pame acui quea pame jayojja. ³⁴ Miquianaya aje oe peyo quea se nee nee jama, quea mase. Miquianaya quea tai poanijo quea pame mimi ajja. E'e, quea jjashahuabaqui tai po tiitianijo quea tai mimiani —Paniseo cuana acanaje Jesosaa—. ³⁵ E'e, joya quea jjashahuabaqui ja'a nee poanijo quea ja'a nee ba'vani. Quea jjashahuabaqui taijo ca ca quea tai ba'vani. ³⁶ Jamajjeya eyaya miya huohuije e epoe o'oyajjijo ojjaña mimishi tecueaa, ojjaña joya jjanifebaquiani, mimijajiani, sijje poani pea'ai quea nee nee po tiitii meeje'yo. ³⁷ E'e, miquea esohui quea ja'a nee poanijo, Eyacuiñajjiya miya etecueajji pojjeama. Quea sho'i taijo ca mi ca Eyacuiñajjiya quea nee nee po tiitii mee caje'yo —Jesosa poanaje.

Paniseo cuana Jesosaa acani ba o'oya sa poanaje

(Macoso 8.12; Noca 11.29-32)

³⁸ Majoya beca Paniseo cuaa, Moisesija tehue huohuijjiya pea'ai Jesosa huohui canaje jama ba'a: —Esohui huohuijji Jesosa, ¡quea pame acue! ¡Ma dejjaa ajjima acani a'o'oyacue so'o, Eyacuiñajjiya miya huooje canaje ecuanaja ebajji! —poanaje.

³⁹ —Chojja. Miquianaaya Eyacuiñajjiya esohui cajaa anaje. Jamajjeya miya peapea ba sa poani. Jamatii Eyacuiñajjiya yahuajo nei Jjonajo aca poa jayojja jama ohuaya jjeja acaje o'oya miquianaja ebajji. ⁴⁰ Ma ecua yahuajo Eyacuiñajjiya esohui huohuijji Jjona jai ai'ajja seejo ba'ya poa pea beca peejjima cahuime jama jayojjaya aje eya ojjañaja Edoe Mese bajjani quijje pishana mano'yo majje mei jjanijo ehuananobia jaa shequije o'oya —Jesosa poanaje.

⁴¹ —Yahuajo nei nei dejja cuana Ninebejo ba'eya Jjonaja esohui shajja'ajja majje mimishi cuana pajea ca'ya poa. Jjona quea ca'a pishana poa; eya ca iña quea ca'a nee nee. Jamatii miquianaya ecuea esohui shajja'ajja sa po ajja. Jamajjeya quijje eya poe o'oya majje mimishi cuana tecueajeaje. Ninebe dejja cuaa miya tecuea caje jama ba'a: “Miquianaya ca ca oe quea mimishi nee nee poanaje”. ⁴² Jama pea'ai poaje ba'a: Yahuajo nei nei Sama mese epona quea huesha nee poeya poa Jodioja emeshi mese Sanomoja esohui shajja'ajjaa. Sanomo quea jjashahuabaqui ja'a pishana poa; eya ca quea jjashahuabaqui ja'a nee nee. Jamatii miquianaya ecuea esohui shajja'ajja sa po'yo ajja. Jamajjeya quijje eya poe o'oyaje mimishi cuana tecuejeaa, eeno poeijije emeshi mese ponaa, Sama meseya jama miquianaaya tecueame acaje pea'ai ba'a: “Miquianaya ca ca oe quea mimishi nee nee poanaje” acaje nequiana —Jesosa poanaje.

Eshahua dejjaja yami yasijje poe o'oyanaje

(Noca 11.24-26)

⁴³ Jesosaa esohui ejjabahuejjaqui meeji huohui canaje pea'ai jama ba'a: —Eshahua dejjaja yamijo nequi cuayaqui'yo majje quea huesha poquinaje. Sa'ajja canaje pea huasijje enequijji. Jamatii ba'yo jjima. Oya po'ayequequi tii. ⁴⁴ Jamajjeya oya jjashahuabaquiani jama ba'a: “Eya poquije o'oya huacuaya oya' dejja huasijjeya, ma e cuayaquinaje yasijjeya, ma ecuea equi jayojja huasijjeya”. Jamajjeya oya' dejja huasijje poe o'oya majje ba cañaquei'vani chama' enahuejji Eyacuiñajjiya epeeji nei pojjeama jjejojo. Ojaya eyami equi ecuias-haba jayojja jama, ehua bame bame jayojja, equi se ejjama' jayojja. ⁴⁵ Jamajjeya oya poquije pea eshahua cuana sa'ajjaa. Ba caje quea huiso, me mijijje beca onijje enequijji. Oya cuana quea mase nee nee; pea quea mase pishana. Majoya ojjaña dobiquiajo ma dejja quea yeno nee nee poani. Yahuajo oe eshahua nequia huajo quea yeno pishana poanaje.

Jamaya poanaje Jesosa shajjama' cuana nijje, oya cuana onijje jjapeequi sa po ajjajo.

—Ma dejja jayojjaya miya poaje, quea mimishi nee nee tii tii poaje —Jesosa poanaje.

Jesosaja huapa pojjeama poeyanaje

(Macoso 3.31-35; Noca 8.19-21)

⁴⁶ Jesosa mimianijo ojaya enaese, oja chahua cuana pea'ai o que poeyanaje. Esecuejo nequinaje. ⁴⁷ Majoya Jesosa huohui canaje cuaa: —Miquea enaese, mique chahua cuana esecuejo nequi. Minijje mimi sa poani.

⁴⁸ Jesosaa saja'a canaje: —¿Ache shai ecuea huapa pojjeama cuana? ¡Bacue! Jiquio ecuea shajja'ajjaji cuana ecuea huapa pojjeama cuana, ecuea quea jea nee nee ecuea ecue nae quea jea aña jayojja jama. ⁵⁰ E'e, ecue Chii eyajo ani; ojjaña jjashajja'ajjaquiani ojaya esohuijo ecuea huapa pojjeama, ecue chahua, ecue jjo'i, ecuea enaese pea'ai —Jesosaa acanaje.

Eso' jeaajaji

(Macoso 4.1-9; Noca 8.4-8)

13 Majoya Jesosa equijo ani cuayaquinaje. Bae sahua huasijje poqui majje anioquenaje. ² Majoya o que jjachichaquinaje dejja cuana quea huiso nee nee. Jamajje bishe yasijje nequisohuaqui majje anioquenaje esohui huohuiya. Dejja cuana meshijajijo aninaje. ³ Bishe quecuayijejea cajo, Jesosaa oya sohuihuohui canaje quea huiso nee nee. Pea esohui ona jjashahuabaquijji huohui canaje o ba meesahuajji. Jama acanaje ba'a: ⁴ —Ebanajji cuana poquinaje banna. Eso' jeaaja canijo, oe pojji eso' oquequinaje ejiojji yasijje. Poeyanaje cuichoiji cuana; ijjia ca'yonaje eso'. ⁵ Pea eso' oquequinaje mei biajje. Meshi chamajo eso' pohua'ajja'yonaje. ⁶ Quijje cuayanaje eshequi. Quiyo'yonaje, esajja joca'yonaje, mano'yonaje. ⁷ Pea eso' oquequinaje acuisha huasijje. Pohua'yo majje jjonohua bebo ca'yonaje. Tatajo nequi jjajja ajja poanaje. Mano'yonaje. ⁸ Pea eso' oquequinaje meshi quea pa-

me yasijje. Pohua'yonaje eso' cuana. Ejjajja quea pame nee nee poanaje. Oe esajo ejjajja iye huiso aninaje; pea esajo ejjajja quea huiso, pea esajo quea huiso nee nee aninaje. Sejjja canaje quea huiso nee. ⁹ ¡Miya jjas-hajja'ajjaquicue! ¡A'a shajjama' pojji! —Jesosa poanaje.

Esohui eba meesahuajji Jesosaa sohuihuohui canaje ona jlashahabaqui meeji
(Macoso 4.10-12; Noca 8.9-10)

¹⁰ Quijje o shajja'ajjajji cuana poeyanaje Jesosa que. Huohui'ajja canaje: —Jesosa, ¿apiojji miyaya esohui eba meesahuajji quea quehua huohuiaña jiquio dejja cuana huasijje?

¹¹ Oya cuana saja'a canaje Jesosaa: —Miya ca ca oe Eyacuiñajjiya ba meesahua cani eya ojjañaja Emeshi Mese nei poaje'yo. Yahuaajo ba mee jjima poa. Pea cuana ca ca eba meesahuajji pojjeama. ¹² Jamajjeya joya Eyacuiñajjiya esohui ba cani quea huiso pishana quijje quea huiso ba mee caje'yo. Joya ojaya esohui ba sa po ajjaa ca ca pajea caje'yo. ¹³ Jamajjeya eyaya peapea esohui eba meesahuajji huohuinaje o ba meesahuajji. Jamatii ecuea esohui shajja'ajja majje oya cuana jlashahuabaqui ajja, de, shajja'ajja jjima jama acani, de. ¹⁴ E'e, oya cuana quea sapa ca'a nee poani. Jamajjeya Eyacuiñajjiya Isaia tehue mee ca poa yahuaajo nei nei jama ba'a:

“Shajja'ajja huicha'a huicha'a majje jamatii jlashajja'ajjaqui ajja poaje. Eyacuiñajjiya acani ba huicha'a huicha'a majje jamatii jlashahuabaqui ajja poaje.

¹⁵ Quea sapa ca'a nee nee poani, shajja dojjoma' jama, cojjama' jama pea'ai. Ecuea esohui eba jojjemo, eshajja'ajja jojjemo jjabahuejjaqui'yome. Pea'ai enijje ejjapeequi'yo jjemo eyaya mimishi cuijea'yome”.

Jamaya yahuaajo nei nei tehue ca poa etiiquiana Isaiaa —Jesosaa acanaje.

¹⁶ Jamajjeya Jesosaa o shajja'ajjajji cuana jama acanaje pea'ai ba'a: —Miquianaya ca ca quea cojja ja'a, quea shajja ja'a pea'ai. ¡Jamajjeya quea bihui nee pocue!

¹⁷ E'e jojo nei eyaya miya huohuiaña jama ba'a: Quea huiso Eyacuiñajjiya esohui huohuijji yahuaajo, ojaya epeeji nei yahuaajo ba'e pea'ai e ba sa neinei poa. Ecue huohui shajja'ajja sa neinei poa pea'ai. Jamatii ojaya eya ba jjima poa. Ecue huohui shajja'ajja jjima pea'ai poa. E'e jojo nei eya Eyacuiñajjiya huoojea'yo ojjaña jaahuanajji. Ma ba sa poa Eyacuiñajjiya esohui huohuijji yahuaajo nei nei.

Jesosaa esohui ebanajjiyo ba mee canaje
(Macoso 4.13-20; Noca 8.11-15)

¹⁸ Majoya ojjaña cuana acanaje Jesosaa: —Jamajjeya eyaya miquianaya ba meesahuaje ecuea esohui ebanajjiyo. ¹⁹ Maya: Beca cuana ejiojji yasijje oquequi eso' cuana cuichoijjiya ijiajeyo ca'yonaje. Jamaya beca cuana ecuea esohui eya ojjañaja Emeshi Mese oe nei poaje shajja'ajja majje jamatii jlashahuabaqui ajja. Jamajjeya Edosiquiaa o que poe majje ecuea esohui pajea mee cani. ²⁰ Beca cuana eso' mei biajje oquequinaje jayojja jama ecuea esohui shajja'ajja majje quea bihui

nee enijje jjapeecuaji'ajjaquiani. Jamatii ecuea esohui jayojja jama ba'e tiitii ajja. ²¹ Eso' mei biajje pohua esajja joca'yajo mano'yani jayojja jama poani; pea cuaa oya napa cajje Eyacuiñajji nijje jjapeequipajeani. ²² Beca cuana eso' acuisha nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjapee nishoquiani. Jamatii oya cuana quea bejjo nahue poanijo, aquianajo quea huiso jlashahuabaquianijo, quea mete pea'ai poanijo Eyacuiñajji chaco ajja. ²³ Eso' meshi quea pame neejo pohua majje quea jjajja huiso poanaje jayojja jama beca cuana; ecuea esohui shajja'ajja majje jjabahuejjaquiani; ecuea epeeji quea ja'a nee nee poani, pea cuana ejo jjabahuejjaqui meesahua cani iye huiso pojja'a, quea huiso pojja'a, quea huiso nee nee pojja'a —Jesosaa mahuisoya oya cuana acanaje.

Esohui acuisha cuanajo

²⁴ Majoya Jesosaa oya cuana huohui canaje pea esohui eba meesahuajji. Jama poanaje ba'a: —Eyacuiñajjiya esohui ejo ebanajjiya eso' bana canaje jama. Eso' ache bame nei quecua canaje quejo, anoso. ²⁵ Majoya ojjaña echacojji cuana ecahuijaajo, dejja quea mimishi, o jeabichajeajji epo poeyanaje. Sipone so' quea huiso quehuajje nei jeaajaqui canaje quejo. ²⁶ Anoso pohua'yo majje jjajjanaje. Sipone pohuanaje anoso tejje, jjajjanaje pea'ai. ²⁷ Quijje pishana eque meseja echacojji cuana o que poeyanaje. Jama poanaje ba'a: “Emeshi mese, ¿a'a miquea anoso sipone tejje quecua pojjeama poanaje?” huohui'ajja canaje.

²⁸ —Echacojji meseya saja'a canaje: “E'e, quea pame poanaje. Dejja quea mimishiya quehuajje jeaajaqui canaje sipone so' ecuea quejo, de” poanaje.

—Echacojji cuaa huohui'ajja canaje: “¿A'a sipone chiyojea'yo?”

²⁹ —“Chojja” poanaje eque mese. “Anosoya miyaya chiyojea chana'. Jamatii. ³⁰ Ojee sipone nijje catiiquiahua. E'e, majoya anoso jahuaajo eyaya huoojeaje anoso sejjja'yojji cuana anoso sejjaa. Sejjajeyo majje anoso chichaje. Ecuea equi yasijje iyanobiaje anoso, ecuea ejaahuanajji. Sipone ca oe caquiyojeaqui'yahua pasi'yo majje” poanaje eque mese.

—E'e, jiquio eque meseya sipone dahuaajea cani jama dejja mimishi Eyacuiñajjiya acaje'yo. Anoso sejjajeyo majje equijo huana cani jamaya ecuea epeeji aje'yo —Jesosa poanaje.

Esohui acui so' che biso nei neijo motasa bajjanijo
(Macoso 4.30-32; Noca 13.18-19)

³¹ Majoya Jesosaa pea esohui eba meesahuajji huohui canaje jama ba'a: —Eyacuiñajjiya ehuohui ojaya epeeji cuanajo jama pea'ai ba'a: Pea eso' motasa che biso nei eso' bana cani equi quibojo. ³² Jiquio eso' che biso nei nei; tii majjeya quea cui quemo nee poaje apo'e cui quemajja. Jamajjeya cuichoijji cuana poeyani motasa acui biajje cahuiya —jamaya Jesosaa huohui canaje ojjaña ba meeji quijje Eyacuiñajjiya epeeji cuana quea huiso nee, quea ca'a nee poaje'yo.

Esohui eba meesahuajji eshejee meejjijo

(Noca 13.20-21)

³³ Pea esohui eba meesahuajji huohui canaje Jesusaa jama ba'a: —Eponaa pahui dahuajjiya quea huiso nee pohuipohui tejee oe pojji nei nei eshejee meejjij iñahuahuo neinei cani, ojjaña eshejee meejjij. Jiquio eshejee meejjijya ojjaña pohuipohui shejee mee cani jamaya poaje ecuea epeeji cuana. Jama ba'a: Jjeya beca cuana jjashajja'ajjaquiani. Majoya aje quea huiso nee ojjaña pojja'a jjashajja'ajjaqui mee caje'yo Eyacuiñajji —Jesusa poanaje.

Esohui eba mee'yojji

(Macoso 4.33-34)

³⁴ E'e, jiquio esohui ehuhui'yo cuana Jesusaa ma bishejo nequiya huohui canaje. Esohui eba meesahuajji ca ca oe huohui canaje. ³⁵ Jamaya poanijo ohuaya Eyacuiñajji esohui huohuijija esohui yahuajo nei nei jama acanaje. Jamaya aje yahuajo nei nei Eyacuiñajjiya ojaya esohui huohuijij huohui mee ca poa Jesusajo ba'a:

“Eyaya aje jja esohui huohuije esohui eba meejjij. Yahuajo jiquio meshi panajeyo majje ecuea dejja cuana ba meesahua jjima poanaje ecuea ejjashahuabaqui'yojji. Jjeyahua ca ca ecuea ejjashahuabaqui'yojji ba meeje'yo, eyaya”.

Ehuohui'yo siponejo ba mee canaje Jesusaa

³⁶ Majoya Jesusaa —Poquia iña —acanaje dejja cuana. Bishejo ani cuayaqui'yo majje poquinaje equi yasijje. Dobiqij majje o shajja'ajjajji cuana o que poeyanaje. Huohui'ajja canaje: —Jesusa, jba meesahuacue ehuhui'yo siponejo! Maya ecuanaja quea quehua.

³⁷ Jamajjeya Jesusaa oya cuana huohui canaje: —E'e, eya ojjañaja Edoe Mese anoso banajji nei nei jama.

³⁸ Que quea pame jayojja ojjaña dejja ojjaña meshijo ba'e cuana. Eso' quea pame nee Eyacuiñajjiya epeeji nei jayojja jama. Sipone so' quea tai jayojja eshahujaja epeeji cuana. ³⁹ Joya dejja sipone so' jeaajjij epo jayojja jama dejja mimishi, e cuajji nisho epo, Edosiquiana, de, Satanasa. Jiquio ecua epojja anoso jahujajo sejjajeyo ca'yonaje jama meshi oe poaje. Joya anoso sejjajayojji ca ca Eyacuiñajjiya esohuidojojji cuana jama.

⁴⁰ Jamajjeya jiquio ecua sipone pasi'yo majje dahuajja canaje jayojja jamaya poaje dejja mimishi meshi oe poajo.

⁴¹ —E'e, eyaya ojjañaja Edoe Meseja esohuidojojji cuana huoojeaje dejja mimishi cuana iña, ona mimishi po meejjij poani pea'ai iña. ⁴² Iña majje jeajea caje'yo cuaqui quea quiyo nee nee yasijje. Jomajo pa nei-neije'yo; ese' ijjiayajjea caje'yo cuaqui quea quiyo nee neeje. ⁴³ Ecuea epeeji ca ca ecuea esohui jama acanijo ba'e tiitije'yo eyajo eseja Chii nijje quea ja'a nee nee, eshequi ja'ajja, de —Jesusa poanaje.

Aquiana quea nahue ehuanaquehua'yo

⁴⁴ Majoya Jesusaa huohui canaje pea esohui eba meesahuajji jama ba'a: —Eyacuiñajjiya esohui cuana ojaya epeeji cuanajo jama pea'ai ba'a: Quejo aquiana pame quea nahue nee nee ba majje dejja jjataqui canaje jomajo tii. Majoya oya quea bhui nee poquinaje. Ojjaña ojaya aquiana cuana dojo canaje; quia canaje que sosejje. Jiquio ecua aquiana quea nahue nee nee jjeshe canaje jama jayojja dejja Eyacuiñajji nijje jjapeequiani —Jesusa poanaje.

Pea esohui aquiana quea nahue nee neejo

⁴⁵ —Eyacuiñajjiya esohui ojaya epeeji cuanajo jama pea'ai ba'a: Dejja aquiana nahuejjijya sa'ajja tiitij canaje mei sisi siyosiyoy copocopo quea nahue nee. ⁴⁶ Oe mei sisi siyosiyoy copocopo quea nahue nee nee ba majje ojjaña ojaya aquiana quiaa dojo canaje mei siyosiyoy quea pame nee nee jjeshejji. Eya ca ca iña mei quea nahue nee nee quea pame nee nee jama, ojjaña jaahuanajji —Jesusa poanaje.

Esohui nahuoo cuiashajjijjo

⁴⁷ —E'e jojo nei pea ba'eme epojji jamaya pea'ai ba'a: Nahuoo cuiashajjij jea cani cuaa bae yasijje. Nahuoo cuiashajja cajje dobiqiani. Peapea nahuoo cuiashajja cani. ⁴⁸ Quea huiso yanijyo nahuoo cuiashajjij cuaa meshijajij sahua huasijje jjequisohua cani. Majoya pejo majje nahuoo cuana ba cani. Ojjaña nahuoo quea pame nee bio cani jjepai yasijje; peajja ijji ca ajja jojoya ca ca jeajea cani. ⁴⁹ Jamaya poaje e poe o'oyajo. Esohuidojojji cuana poeje; Eyacuiñajjiya epeeji cuana ojjaña quea pame ba'e chicha caje'yo. Dejja mimishi cuana ca ca jeajea caje'yo cajaanajo. ⁵⁰ Cuaqui quea quiyo nee nee yasijje dobiqijje'yo tii tii. Jomajo siasia'yoquije tii; ese' ijjiayajjea caje'yo quea nee poanijo —Jesusa poanaje.

Esohui eyacua

⁵¹ Majoya Jesusaa oya cuana huohui'ajja canaje: —¿A'a ecuea esohui quea ja'a nee? ¿A'a jjabahuejjajjij naje?

—E'e, quea ja'a nee.

⁵² Jamajjeya Jesusaa o shajja'ajjajji cuana acanaje: —E'aquiana meseja ojaya aquiana cuana etii, aquiana eyacua pea'ai ojjaña cuana huohui'ajja cani. Jiquio ecua pea huohui'ajja pea huohui'ajja acani jayojja jama esohui huohuijij poani, jjabahuejjajjij majje, Jodio esohui huohuijijya Eyacuiñajjiya esohui yahuajo etehue'yo, ecuea esohui eyacua pea'ai pea cuana ba meesahua cani —poanaje.

Jesosa Nasanena meshi yasijje poquinaje

(Macoso 6.1-6; Noca 4.16-30)

⁵³ Majoya esohui huohuijajjea majje Jesusa jomajo ani poqui o'oyanaje ojaya cuiñajji yasijje, Nasanena huasijje. ⁵⁴ Jodioja equi ojee ejjachichajjij yasijje do-

biquinaje. Eshui huohui canaje. Ojaya esohui shajja'ajja majje Nasanenajo ba'eca cuana quea tecue poanaje. Oya Jesosa Joseja jea poso acanaje cuaa: —¿Yajjaje shai jiquio dejjaa Jesusaa esohui quea ja'a nee nee huohui cani, de? ¿Eyacuiñajji jayojjaya jjaajaqui mee cani emanojaa quea huiso nee, de? ⁵⁵ Oya aje oe acui cacajji nei neija bacua ejja pojja'a, oja nae Mania bajjani, oja chahua cuana Jacobo, Jose, Simohui, Jonsa pea'ai bajjani. ⁵⁶ Oja jjo'i cuana pea'ai jiquiojo ba'e, de. Jamajjea ¿achejo joya Jesusaa ojjaña jiquio esohui ba canaje so'o? —jamajjea quea quene poanaje Jesosa nijje. Joseja jea poso cajaa acanaje.

⁵⁷ Jamajjea Jesosa oya cuana jama acanaje ba'a: —E'e de, pea cuaa Eyacuiñajji esohui huohuijji shajja'ajja cani. Jamatii oja meshijo ba'e cuana ojaya huapa pojjeama cuana ca ca oe jashajja'ajjaqui sa po'yo ajja.

⁵⁸ Jamajjea oya cuana jashajja'ajjaqui sa po ajja. Jesosa Eyacuiñajji bacua pojjeama posojo, ohuaya emanojaa cuana oe pojji jjaajaqui mee ca'yonaje, ma dejjaa ajjima acani oe pojji nei acanaje Nasanenajo, Jesosa.

Enodeya Huani sapa jajasejjajea mee canaje

(Macoso 6.14-29; Noca 9.7-9)

14 Jesosa Janinea meshijo anijo, Janinea meshi mese Enode bajjaniya shajja'ajja canaje onaja ehuhui'yo Jesusajo. Ma Enode pea emeshi mese, Enode pea'ai bajjani. Oya emeshi mese Enodeja bacua ejja; oya Enode Antipa bajjani pea'ai poanaje. Shajja'ajja majje ma Enodeya Huani shequi o'oya posoya acanaje: —E'e de, jiquio dejja aje oe Huani, ma ona besameejji poa. E'e pojja'a oya mano'yo majje shequi o'oyanaje. Jamajjea ohuaya Eyacuiñajji jayojjaya acani —jamaya ohuaya ojo chacochoacani acanaje.

Yahuajo nei Jesusajo shajja'ajja jjimahuajo ma Enodeya Huani sapa jajasejjajea mee canaje. ³ E'e, yahuajo ma emeshi mese Enodeja edoe mese Penipeja ehuanase Enodiasi bajjani Huani nijje quea quene poa. Jamajjea ma Enodeya Huani iña mee canaje; jeanobiajea mee canaje. ⁴ E'e, Huaniya yahuajo ma Enode jama tecueame aca poa ba'a: —iMiyaya aje oe mique doeja Penipeja ehuanase Enodiasi a'a huana'yojji! Jamaya pojjeama Jodioja etehue'yo; quea mimishi.

⁵ Jamajjea ohua tecuea cajje quenequenaje Huani nijje. Quecua sa aca poa. Jamatii quecua jjiima; quea mete poanaje pea Jodio cuanajo. E'e, quea huiso Jodio cuana jashahuabaquinaje Huani Eyacuiñajji esohui huohuijji nei nei poanaje. ⁶ Jamatii ma Enodeya o cuaya poa pojja ojaña ojaya epeeji cuana iyaa canaje ojee ijia'ijiaa, majamajaqui baa pea'ai. Enodiasija bacuase pea'ai oe nei majamaja nequinaje ojjañaja ebajji, quea bihui nee epo meeji. Enode Antipa quea bihui nee nee poanaje epona sho'ijo. ⁷ Jamajjea onijje minaje jama ba'a: —¿Ae shai sa poani miya? ¡Huohui-cue mo! Eyaya miya quiaje. E'e jojo nei nei she, coya miya sañaya aje mi quiaje —acanaje Enodeya.

⁸ Jamajjea epona sho'i poquinaje ojaya enaese Enodiasi huohuiya.

—E'e —oja nae poanaje—, e'e ¡Huani sapa jajasejjajea meequicue, she!

Epona sho'i poe o'oyanaje Enode que. Huohui canaje jama ba'a: —Huani, ma ona besameejji poani ejeanobia jaa. ¡Ojaya esapa jajasejjajea'yo majje piatojo jjequicue jjeyahua nei! Maya eya sa poani.

⁹ Shajja'ajja majje emeshi mese Enode quea ajjajja nee nee poanaje. Jamatii ojaya esohui epona sho'i nijje ojjaña ojaya epeeji cuana shajja'ajja canaje. Jamajje-ya ojaya esohui pajea ajja, Enodeja. Jamajjea ohuaya sohuinano cuana huoojea canaje: —¡Epona sho'ija esohui jayojja jama acue! ¹⁰ ¡Huani ma ejeanobia jaa oe sapa jajasejjajea quicue! —poanaje.

¹¹ Jjea nei sohuinano cuana poquinaje Huani que. Huani sapa jajasejjajea ca'yonaje. Esapa jjequi canaje piatojo. Epona sho'i quia canaje. Majoya ohuaya Huani esapa oja nae yasijje quia cañajji'yonaje, epona sho'iya.

¹² Majoya Huani shajja'ajjajji cuana poe'yonaje o do-jo'yohua emojea'yojji. Mojea'yo majje papoqui'yonaje Jesosa huohuiya.

Jesosa 5.000 dejja cuana bobia canaje

(Macoso 6.30-44; Noca 9.10-17; Huani 6.1-14)

¹³ Jesosa Huani emano'yo shajja'ajja majje o shajja'ajjajji cuana nijje sohuaquinaje bishe aijo quima huasijje.

Jamatii ma ba majje quea huiso dejja cuana cuiñajji cuanajo ba'e ejiojijje poquinaje Jesosa baa. Poquicuajinaje ma Jesosa besapoquije yasijje. Onaya jjaja ebionei aniñaquinaje Jesosa hui que añajjiya. ¹⁴ Quijje pishana Jesosa o shajja'ajjajji cuana nijje ba'eñajji. Bishe aijo ani nequisohuaquinaje etaja huasijje. Quea huiso nee nee dejja cuana ba cañajji. Onajo quea yeno jashahuabaquinaje, quea huiso emanojaa, quea nee jaajo pea'ai. Jamajjea ojjaña huaquia mee ca'yonaje, jjaajaqui mee ca'yonaje, Jesosa.

¹⁵ Siniajo Jesosa que poe majje o shajja'ajjajji cuana huohui canaje jama ba'a: —Jesosa, sinia coma, de. Jiquiojo chama' equi, chama' bobi pea'ai. ¡Dejja cuana huoojeacue cuiñajji sisi cuana huasijje oja bobi jjesheya!

¹⁶ —Chojja. Ca'anahua cuana. ¡Bobiacue oe miquiaa-ya! —Jesosa acanaje.

¹⁷ —¿Yajja yajji? Oya cuana quea huiso nee nee añajji ebobajji. Ecuanaja bobi oe pojji yani. Me oejje pahui, beca nahuoo sisi pea'ai yani —poanaje cuana.

¹⁸ —¡Comaya jjaaja oe yacua yecue! —Jesosa poanaje—. ¹⁹ Ojjaña cuana jama acue pea'ai ba'a: “¡Ojjaña anioquecue sipone biajje!” acue.

Anioque mee canaje sipone biajje. Majoya pahui me oejje huiso, nahuoo sisi becanejjijji pea'ai jjeshe majje Jesusaa eyahuasijje jjabajeasohuaquinaje. Eyacuiñajji bihuia canaje. Eyacuiñajji nijje bobijo mimi majje pahui miji canaje, nahuoo sisi pea'ai. O shajja'ajjajji que quia canaje, Jesusaa. Majoya ohuaya bobi quia canaje dejja cuana huasijje. Quia ca poquije quea huiso nee nee jja-panaqui poquipoquinaje bobi, de. ²⁰ Ojjaña jjeje majje eshajja'ajjajji cuana chicha ca'yonaje bobi ojjañaja ijia-

sejja. Jjepai ai yasijje iya ca'yonaje. Quea huiso nee poanaje; 12 jjepai huisome bobi e'ijjiasejjaja ecuatajea poanaje. ²¹ Quea huiso nee nee bobi ijji mee canaje, de, 5.000 dejja. Epona cuana, esho'i cuana pea'aiya quea huiso nee nee ijji canaje.

Jesosa bae ena biajje poquinaje
(Macoso 6.45-52; Huani 6.16-21)

²² Majoya siniajo Jesusaa o shajja'ajjaji cuana huoojea canaje. Jama acanaje ba'a: —iBishe ai yasijje nequi-sohuaquicue! iBae ojje miji yasijje besapoquicue! Quijje eya poquije mi que pea dejja cuana quea huiso nee nee cuana huoojea'yo majje —poanaje.

²³ Majoya dejja cuana quea huiso cuana huoojea'yo majje eyiyo huasijje jaasohuaquinaje oe nei oja Chii nijje mimiya. Mecajje Jesosa oe nei aninaje eyiyojo.

²⁴ Jesosa eyiyojo anijo o shajja'ajjaji cuaa bishe ai quea huesha nee dojo canaje. Bae yiyesamajo o epojo beni quea quemo poeyanaje. Enashajohua bishe ai janobajjima nei nane canaje, cuio canaje enaa. ²⁵ Mecashono Jesosa eyiyojo ani o que poquinaje ena biajje. ²⁶ O shajja'ajjaji cuaa Jesosa quea huesha pishana ena biajje jeojejebeje ba majje quea ajjajja nee nee poanaje. Quea metejo taaanaje; jama poanaje ba'a: —iCoya ae shai poeje ba'a! —siasianaje—. iCoya eshahua, de!

²⁷ Jamajjeya Jesosa onijje miminaje. Jama poanaje ba'a: —iA'a quea mete pojji! Eya jja iña iquio, eshahua pojjeama. iQuea jaji nee pocue!

²⁸ Jamajjeya Penohua jama huohuime acanaje ba'a: —Ecuea Emeshi mese, miya enequiya jjejojya, ieya mi que poqui meecue ena biajje!

²⁹ —E'e Peno, ipoecue! —oya acanaje Jesusaa.

Jamajjeya Peno bishe aijo ani nequioquequinaje. Ena biajje Jesosa que poquinaje. ³⁰ Jamatii poqui pishana majje beni tii tii, enashajo quea quemo nee nee ba majje metenaje, de. Mete majje jaadobi'ajjaquinaje Peno. Taaanaje: —Jesosa, ieya hui'ije'yo! iIñacue mo, oe! —poanaje.

³¹ Jesusaa me' iñacuaji canaje. Peno jama acanaje ba'a: —iApiojji acuae mi meteani so'o? iA'a eya quea ca'a nee nee miquea ba jjima?

³² Majoya Jesosa Peno nijje bishe ai yasijje anisohuaquiyajo beni nequioquequinaje. ³³ Jamajjeya ojjaña cuana bishe aijo aniya Jesosa bihuia canaje. Jama poanaje ba'a: —iE'e jojo nei miya Eyacuiñajjija Bacua Ejja oe nei!

Cuichi cuana hui'i ca ya poa meshi yasijje Jenesane' meshi yasijje besapoqui o'oyanaje
(Macoso 6.53-56)

³⁴ Majoya bae ai ojje miji yasijje Jenesane' meshi yasijje besapoqui o'oyanaje Jesusa. Ba'eñaquinaje. ³⁵ Dejjaja cuanaja jomajo ba'eja Jesosa eba poanaje yahuajo. Jamajjeya oya ba o'oya majje ojjaña cuana iyaa meequi canaje Jesosa que. Jamajjeya ojjaña emanojaaca cuana Jesosa que ye canaje. ³⁶ Jama huohui'ajjame acanaje cuaa ba'a: —Jesosa, iojjaña emanojaaca cuana che mi-que daqui iña'ajja meecue ehuaquia'yoyji! —acanaje.

Ojjaña oja daqui cuema iña'ajja majje jjaajacuajiqui'yonaje, huaquia'yonaje pea'ai, de.

Dejja quea jjashahuabaqui tai po majje quea tai poani
(Macoso 7.1-23)

15 Majoya Paniseo cuana Jodio esohui huohuijji cuana pea'ai Jenosanenajo ba'e Jesosa que poeyanaje. Oya huohui'ajja canaje: —Esohui huohuijji, iapiojji acuae mi mi shajja'ajjaji cuana etiiquianaja ehuhui'yo jama po ajja? ² E'e, ijji'ijji jjimahuaajo eme' topo neinei ajja, de.

³ Jesusaa saja'a canaje jama ba'a: —Miquianaya acuae iae poani pea'ai? iApiojji acuae miquianaaya Eyacuiñajjija esohui pajea'yaña etiiquianaja ehuhui'yo yajji nisho? ⁴ E'e, Eyacuiñajjija esohui jama poani ba'a: “iMique chii, miquea enaese etii pea'ai jaahuana-cue! iJoya oja chii, oja nae pea'ai cajaa acajo cajajahuejjajea ca'yahua cuaa, meiya!” ⁵ Miyaya ca ca jama huohui taime yaña ba'a: “Dejja oja chii etii nijje, oja nae etii nijje pojja'a mimije jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuiajji”. ⁶ Jamajjeya oja chii etii, ojaya enaese etii pea'ai pajea meeaña. Pea'ai Eyacuiñajjija esohui pajea mee'yo sa aña etiiquianaja ehuhui'yo yajji nisho. ⁷ iMiya ca mi ca oe jjadasiaquijji nei nei! Eyacuiñajjija esohui huohuijji Isaiaja esohui mijo e'e jojo nei yahuajo nei poa. E'e, yahuajo nei Eyacuiñajjija Isaija tehue mee ca poa jama ba'a:

⁸ “Iiquio dejja cuanaa eya bihuia nisho cani. Jamatii jjashajja'ajjaqui ajja.

⁹ Jamajjeya ecuea equi yasijje jjachichaquiani ejjachichajequijji. Ohuaya ojaya ejjashahuabaqui'yoyji huohui cani, ecuea esohui pojjeama”.

Jamaya Isaija yahuajo nei tehue ca poa miquianajo —Jesosa poanaje.

¹⁰ Jamajjeya Jesusaa pea cuana huasijje jama huohuime acanaje ba'a: —iShajja'ajjacue, jjabahuejja neinei-quicue oe! ¹¹ Bobi cuana, ojjaña aquiana enabajje dobi-quianajo pojjeama miquianaya quea mimishi poani. Chojja. Quea jjashahuabaqui tai po majje esohui quea tai enabajje cuayaquianajo ca ca quea mimishi poani. Eyacuiñajjija miquianaya ba cani quea mimishi —Jesosa acanaje.

¹² Quijje o shajja'ajjaji cuaa Jesosa huohui canaje jama ba'a: —Jesosa, miquea esohuijo Paniseo cuana quea quene poani minijje —poanaje.

¹³ Jesusaa oya cuana saja'a canaje jama ba'a: —Ojjaña acui ecue Chiija eyajo anija bana pojjeama ohuaya chiyojea caje'yo iiquio ecua ohuaya ojaya epeeji nisho acaje'yo jama. ¹⁴ Jamajjeya i'a Paniseo cuanajo quea mete pojji! Oya cuaa aje oe esohui huohui cani quea tai, quea ja'a pojjeama. Cojjama' jayojja jama poani, de. Cojjamaa pea cojjama' mepejjejea cani jayojja o pea'ai oquejajquije'yo jjani yasijje. Cojjama' jayojja dejja mimishi pea dejja mimishiya dojo cajje cuaqui yasijje poquije'yo onijje tii —jamaya Jesusaa acanaje.

¹⁵ Penohua Jesosa huohui'ajja canaje: —Jesosa, ecuanajaya ca ca esohui quea quehua miquea. ¡Ba mee-sahuacue mo!

¹⁶ —¿A'a ecuea esohui miqianajaya ba jjima pea'ai? —Jesosa poanaje—. ¿A'a miquea eba pojjeama? ¹⁷ Ojjaña bobi, pea aqui ana pea'ai enabajje ijiajaja see ai yasijje dobiqiani. Quijje jamatii seejaja caje'yo. ¹⁸ Joya quea tai jjashahuabaquianiya ca ca esohui tai jeacuaya cani. Maaya oya quea tai po mee ca'yani; quea mimishi Eyacuiñajjiya oya ba cani. ¹⁹ E'e, jjashahuaba taiqui majje pea quecua cani, onaja eponajo ba'e sa poani, peaja yahuejo ba'e sa poani, quehuajje cojjo cani, sii cani, siajje poani, mimijajiani pea'ai. ²⁰ E'e, joya jama acanijo Eyacuiñajjiya ba cani quea mimishi; bobi ijia cani eme' shacua neinei jjimajo pojjeama quea mimishi poani.

Cananea epona Jesosa que poeyanaje

(Macoso 7.24-30)

²¹ Majoya Jesosa Jenesane' meshijo ani poquinaje Sinono meshi yasijje, Tino meshi yasijje pea'ai. ²² Jomajo poquiani oe Cananea epona ma meshijo ba'e o que poeyanaje. Oya Jodio pojjeama. Jamatii ejiojjijje poquijje taaa majamaja poquinaje: —Emeshi Mese nei, Dabi-ja osecua, ¡ejo jjashahuabaquicue! Ecue bacua piona quea sapa niñe jaa. Quea nee nee poani, quea mano.

²³ Jamatii Jesosaja oya saja'a jjima. Jamajjeya ojaya eshajja'ajjaji cuana Jesosa nijje miminaje: —Jesosa, jepona huoojeacue! Joya ese nijje taaajebeje.

²⁴ Jamajjeya oya cuana saja'a canaje Jesosaa: —Oya Jodio pojjeama. Eyacuiñajjiya eya huoojea canaje Jodio cuana sa'ajja'yohua. Oya cuana ñajjajja ecuaquisho'yo jayojja jama poquiquehuani Eyacuiñajjiyo.

²⁵ Jamatii epona Jesosa que poe majje ecui'oshajjajo nequifanaje; jama poanaje ba'a: —Emeshi Mese nei, ¡ecuea ebacua piona jjaajaqui mee'yocue, quea mano nee nee jaa!

²⁶ Ma epona Jodio pojjeamajo huapa jayojja saja'ame acanaje Jesosaa: —¿A'a acuae ecue bacuaja bobi jeaje ñahuehua que? ¿A'a cuae jamaya quea pame? —poanaje.

²⁷ Epona quea shoe jama jjejojo jama poanaje ba'a: —E'e, Emeshi Mese. Jamatii o huonejjiya ijia canijo, ñahuehuua ehuonejjiya ijiajajja ca'ijia cahua —poanaje.

²⁸ —Epona, miya ca mi ca oe quea ja'a nee, quea pame nee ejo jjashahuabaquiani. Jamajjeya eyaya mi-quea esohui jayojja jama aje'yo. Jjeya nei miquea eba-cua piona jjaajaqui meeje'yo —Jesosaa acanaje.

Jamajjeya jjeya nei oja bacua piona jjaajaqui'yonaje; quea aja nee po'yonaje.

Jesosaa quea huiso emanojaaca huaquia mee ca'yonaje

²⁹ Majoya Jesosa jomajo ani ejiojjijje poqui o'oyanaje Janinea bae sahuajje. Eyiyo huasijje jaasohuaqui majje anioquenaje. ³⁰ Quea huiso nee nee poeyanaje; o que jjachichaquinaje. Jjequi canaje emanojaaca cuana: qui-

bojjisha cuana, cojjama' cuana, jiojjijajja cuana, mimi'ajja cuana pea'ai, peapea epo'yo cuana pea'ai hua-naoquea canaje cuaa Jesosa pejejejo ejaajaqui'yojji. Oj-jaña cuana jjaajaqui mee ca'yonaje, huaquia mee ca'yonaje, de, Jesosaa. ³¹ Ba majje ojjaña cuana quea bihui nee nee poanaje. Eyacuiñajji bihuia neinei canaje: —E'e, e, mimi'ajja cuana quea ja'a mimi mee ca'yonaje; jiojjijajja jeo mee ca'yonaje; quibojjisha jjaquibopiqui mee ca'yonaje; cojjama' quea cojja ja'a po mee ca'yonaje, jjabaqui mee ca'yonaje pea'ai. Ma ecua ohuaya jjaja'acui jjimahua Isaeni cuana nijje acaninaje, jamaya aje jja oe jjeya acani, Jesosaa —acanaje cuaa.

Jesosaa quea huiso cuana bobia canaje, 4.000

(Macoso 8.1-10)

³² Majoya Jesosaa o shajja'ajjaji iyaa canaje. O que poeyajo huohui canaje jama ba'a: —Jiquio dejja cuana enijje poani beca cahuime. Ojaya bobi oe poanaje. Jamajjeya ojo eya quea yeno jjashahuabaquiani bobimajo. Oja equi yasijje huoojea sa po'yo ajja. Quea shoe nee nee; ejiojjijo bobi yasijje po chana'.

³³ O shajja'ajjaji cuaa Jesosa saja'a canaje: —Jiquiojo chama' bobi, dejjama'. ¿Yajja yajji? Oya cuana quea huiso nee nee ebobajji. ¿Achacua pahui ejjeshejji ojjaña bobajji?

³⁴ —¿Ache huiso pahui miquea yani? —Jesosaa huohui'ajja canaje.

—Me oeje beca pea'ai, 7 pahui yani. Nahuoo sisi oe pojji yani pea'ai —acanaje cuaa.

³⁵ Jamajjeya Jesosaa ojjaña ejjachichaquiani cuana jama acanaje ba'a: —¡Meshijo anioquecua! —acanaje.

³⁶ Majoya ma 7 pahui, nahuoo sisi pea'ai jjeshe majje Eyacuiñajji nijje, oja Chii nijje miminaje bobijo. Pahui, nahuoo pea'ai miji canaje, Jesosaa. O shajja'ajjaji que quia canaje. Majoya ohuiya dejja cuana huasijje quia canaje. Quia ca poquije quea huiso nee nee jjapanacui poquipoquinaje, bobi. ³⁷ Jamajjeya ojjaña cuaa ijia canaje, quea jeje poanaje, de. Ijia majje o shajja'ajjaji cuaa bobi e'ijjasejja jjepei aijo chicha ca'yonaje. Quea huiso poanaje, 7 jjepeime. ³⁸ E'e, dejjaa quea huiso nee nee bobi ijia canaje, 4.000 dejjaa. Quea huiso nee epona cuana, esho'i cuana pea'aiya ijia canaje. ³⁹ Majoya Jesosaa ojjaña cuana huoojea canaje ojaya equi yasijje. Majoya Jesosa o shajja'ajjaji cuana nijje bishe ai yasijje nequisohuquinaje. Besapoquinaje ojje, pea meshi yasijje, Majadana meshi yasijje.

Jodio etiiya Jesosaa acani quea pame ba sa acanaje

(Macoso 8.11-13; Noca 12.54-56)

16 Majoya Paniseo cuana, Sanoseo cuana pea'ai poeyanaje Jesosa que. Oya cuaa Jesosa Eyacuiñajji huoojea'yo pojjeama poso acanaje. Jamajjeya jama anisho canaje ba'a: —Esohui huohuijji Jesosa, ¿a'a miya Eyacuiñajji huoojea'yo nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiya jayojja jama acue ecuanaja ebajji! ¡Eyajo oe panacue! —acanaje Paniseo cuaa.

Jamatii Paniseo cuaa Jesosa Eyacuiñajjija huoojea'yo pojjeama poso acanaje. Jamajjeya pea Paniseo cuana nijje jama poanaje ba'a: —Chojja, Jesosa Eyacuiñajjija huoojea pojjeama. Jamajjeya Eyacuiñajjija jama pojjeama mi pana cajo, capajea ca'yahua.

²Jesosaa oya cuana saja'a canaje: —Eshequi oquequijajo bo huo'ohuo'o poanijo miquianaaya huohuiaña: “E'e, de, mecahuajje quea jea poaje eshequi, ena epojji pojjeama”. ³Mecajjeahua ca ca quea apo nee nee poanijo miquianaya jama poani ba'a: “E'e de, quea apo; ijjea ena poaje”. E'e —Jesosaa poanaje—, eyahuasijje bo ba majje miquianaaya huohuiaña ena chama'pojja'a, ena poaje pojja'a. Jamatii Eyacuiñajjija esohuijo miquianajaya ba jjiima ache shono ojjaña jaahuanajji poeje. ¿Apiojji miquea ba jjiima? ⁴Miquianaaya Eyacuiñajjija esohui pajea yaña. Jamajjeya Eyacuiñajjija pana cani ba majamaja sa poani. Jamatii Eyacuiñajjija Jjona yahuajo nei nei aca poa jayojja jama ohuaya jjeyahua acaje miquea ebajji.

Jamajjeya Jesosaa oya cuana jea cana'yonaje jja-bahuejjaqui ajjajojo.

Paniseoja esohui tai pahui shejje meeji jayojja

(Macoso 8.14-21)

⁵Majoya bae ojje miji yasijje besapoquianajo Jesosa shajja'ajjajji cuana jjashahuabaquinaje. Jama poanaje ba'a: —E'e de, ecuanaa bobi pajea'yonaje.

⁶Jamajjeya Jesosaa oya cuana huohui canaje: —¡Quea ja'a nee jjashahuabaquicue! Paniseo cuana, Sanoseo cuana pea'aia pahui shejje meejjijo miya quea tai poaje.

⁷Jamajjeya o shajja'ajjajji cuana ojee mimimiminaje: —E'e pojja'a oya jama poanaje ecuanaja pahui ye jji-majo.

⁸Ojaya ejjashahuabaqui'yojji Jesosaja eba poanaje. Jamajjeya oya cuana acanaje: —¿Apiojji acuae jja nequiana ojee mimimimiani pahuijo? ¿A'a jja nequianajaya eya ba jjiima quea ca'a nee nee? ⁹¿A'a jja quiana ejo jjashahuabaqui jjiima tii? Eyaya me oeje pahui miji majje quea huiso dejja bobianaje, 5.000 dejja. ¿A'a jja miyaya maya pajea'yonaje? Ijjia'ijjijajeyo majje acuae jjaya ¿ache jjepai huiso chicha'yonaje pahui? ¹⁰Oya jayojjaya me oeje beca pahui, 7 pahui miji majje quea huiso dejja bobianaje, 4.000 dejja. Majoya miyaya pahui ¿ache jjepai huiso chicha'yonaje so'o? ¿A'a ya pajea'yonaje? ¹¹Eyaya miquianaya huohuinaje jama ba'a: “Paniseo, Sanoseo pea'aia pahui shejje meejjijo quea tai miya poaje” —Jesosaa poanaje.

¹²Jamajjeya o shajja'ajjajji cuana jjabahuejjaquinaje Jesosaa huohui cajje: —E'e, Paniseo, Sanoseo pea'aia huohui taijo se quea tai poaje; pahui shejje meejjijo pojjeama Jesosaa huohui canaje —poanaje.

Penoja esohui quea pame Jesosajo

(Macoso 8.27-30; Noca 9.18-21)

¹³Majoya Jesosa Pinipo meshi yasijje poquinaje. Sesanea huasijje poquijeya o shajja'ajjajji huohui'ajja ca-

naje Jesosaa: —Dejja cuana acuae jja ¿yajja poani ejo, ojjañaja Edoe Mesejo? ¿A'ya cuae eya?

¹⁴Oya cuaa saja'a canaje: —Beca cuana jja jama poani ba'a: Miya Huani, ma ona besameeji poa shequi o'oyanaje poso ca jja mi ca acani. Pea cuana aje jja oe jama poani: Miya Enia, Eyacuiñajjija esohui huohuijji yahuajo nei nequia poa. Pea poani jama ba'a: Miya Jenemia pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjajji.

¹⁵Jamajjeya Jesosaa oya cuana huohui'ajja canaje:

—¿Miyaa acuae yajja poani ejo? ¿A'ya cuae eya?

¹⁶—¡Miyaa ca ca Eyacuiñajjija Bacua Eja oe nei, oja huoojea'yo ojjaña jaahuanajji! —Simohuiya Jesosa saja'a canaje.

¹⁷Jamajjeya Jesosaa oya jama acanaje ba'a: —Simohui, Jjonaja bacua, ¡quea bihui nee pocue! Ecue Chii eyajo anaya miya ba meesahua cani eya oja huoojea'yo ojjaña jaahuanajji. Dejjaa pojjeama miya ba meesahua cani, de. ¹⁸Jamajjeya eyaya miya huohuiaña miya bajjani aje Peno, esejaya esohuijo Mei bajjani. Eyacuiñajjija esohui e'e jojo nei ejo eyaya miya huohui meesahuaje'yo ecuea epeeji cuana quea ca'a nee epo'yojji. Equi mei jjiyo nei jayojja jama quea ca'a nee nequi tii jayojja jama ecuea epeeji cuana quea ca'a nee nequi tiitiije'yo; ejeabichajea'yojji pojjeama Edosiquianaja, eshahua cuanaja pea'ai.

¹⁹—Eya Emeshi Mese nei jiquio meshijo poaje'yo. Jamajjeya aje miya huoojeaña ecue sohui huohuiya. Ecuea esohui esecue ca'apejojji jayojja jama eyahuasijje edobiqui mee'yojji. Jamajjeya ecuea esohui ba majje miyaya huohuije ache eba'eji quea mimishi Eyacuiñajjija boti'ama. Miyaya huohuije pea'ai ache eba'eji quea pame nee Eyacuiñajjija eyajo anija quea boti nee.

²⁰Majoya Jesosaa o shajja'ajjajji cuana huohui neinei canaje jama ba'a: —E'e, eya Eyacuiñajjija huoojea'yo ojjaña jaahuanajji. Jamatii ja'a oe jihuhuijji so'o! —poanaje.

Ojaya emano'yojji Jesosa miminaje

(Macoso 8.31-9.1; Noca 9.22-27)

²¹Majoya Jesosaa o shajja'ajjajji cuana huohui coo canaje ojaya emano'yojji: —Eya quijje Jenosanena huasijje poquije. Jomajo Moisesija etehue'yo huohuijji cuaa, Jodio etii bajjani cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manoje'yo ohua me caca mee cajje. Jamatii beca cahuime po majje mo shequi mee caje o'oya ecue Chiiya —acanaje.

²²Jamajjeya Peno quea yeno nee poanaje Jesosajo. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese, miya Eyacuiñajjija jaahuana caje'yo. Peaa aje oe miya enapajji pojjeama, equecua'yojji pojjeama jja mi, de.

²³Jamajjeya aje jja oe Jesosaa oya Peno cojja ba neinei cani jama tecueame acanaje ba'a: —Peno, ja'a jama miyaya mimijji! Miya e dasajji nisho epo jayojja mimiani.

Miya Edosiquiana Satanasa jama mimiani. Jjashahua-baquiani quea tai, dejja jama; Eyacuiñajjiija ejjashahua-baquiyoyji jama pojjeama —poanaje.

²⁴ Jamajjeya Jesosa ojjaña o shajja'ajjajji nijje jama miminaje ba'a: —¡Ojjaña joya enijje e'e jojo nei jjapee-qui'yo sa poani Eyacuiñajjiija esohui jayojja jama ba'e-cue! E'e, e jayojjaya jja enijje capoquiahua, jamatii onaa napa cajje aje jja oe quea nee poaje'yo pojja'a.

²⁵ E'e, ojjaña joya Eyacuiñajjiija esohui jayojja jama ba'e sa po ajja aje oe ba'e tiitii ajja enijje. Joya ecuea esohui jayojja jama ba'e sa poani ca ca ba'e tiitii'yo enijje eyajo. ²⁶ E'e pojja'a dejjaa quea huiso nee nee aquiana ojaya yajji chicha caje. Jamatii oya cuana cuaqui yasijje jeajea cajo, ojjaña ojaya aquiana cuana edojjji pojjeama. ¿A'a ojjaña ojaya aquiana cuana Eyacuiñajji yasijje quia cajo, oya cuana cuaquijo ani cuayaquiy mee caje'yo? ¿A'a Eyacuiñajjiya oya cuana onijje eyajo ba'e mee caje'yo ma aquiana quea huiso nee nee sosejje? Chojja. ²⁷ E'e jojo nei eya ojjañaja Edoe Mese poeje o'oya. Quea jeajahua nee nee, quea ca'a nee nee poeje'yo. Eya esohuidojojji quea huiso nee nijje poeje'yo. Poe majje eyaya ojjaña cuana sosequiaje'yo. Ojjaña ba'enaje jayojja eyaya sosequiaje'yo. ²⁸ E'e jojo nei eya ojjañaja Edoe Mese ojjaña huoojea'yoyji quea ca'a nee nee poaje'yo. Beca cuaa jiquiojo nequiya jjaja mo jamaya ba caje mano'yo jjimahuaa —Jesosaa o shajja'ajjajji cuana acanaje.

Jesosa quea cojja jiji poanaje oja Chii nijje mimianijo
(Macoso 9.2-13; Noca 9.28-36)

17 Quijje pishana me oejje pea emejje oe cahuime po majje Jesosa poquinaje o shajja'ajjajji nijje pea beca peejjima dejja nijje, Peno nijje, Satiaco, oja doe Huani nijje pea'ai. Mahuiso dejja nijje poquinaje eyiyo huasijje quea huesha nee. ² Jocuama nequi oya Jesosa jjahuapaqui'yonaje; quea cojja jiji nee poanaje, eshequi jayojja poanaje, quea jeajahua nee nee. Oja daqui quea oshe nee nee, bo oshe jayojja poanaje. ³ Moisesi, Enia pea'ai ma yahuajo nei ba'ya poa Jesosa nijje mimimiminequi ba canaje o shajja'ajjajji cuaa. Moisesi, Enia pea'ai Jesosa nijje mimimiminequinaje Jesosa onaja mimishijo emano'yoyji jjejojya. ⁴ Jamajjeya Peno Jesosa nijje jama poanaje ba'a: —E'e Emeshi Mese, jiquiojo ecuaa canequiquiahua, quea pame nee. Pea beca peejjima equi sisi euaaya ca'iyahua miquea, Moisesija, Eniaja pea'ai eba'ejji.

⁵ Peno mimianijo tii bo quea oshe nee nee nequiquenaje. Queya canaje huojaa. Shajja'ajja canaje Eyacuiñajji jama poani ba'a: ⁶ —¡Jiquio ecuea ecue Bacua Ejja quea jea nee nee. Eya ojo quea bihui nee nee. ¡Oya oe shajja'ajjacue!

O shajja'ajja majje quea mete nee nee poanaje Peno, Satiaco, Huani pea'ai. Meshi yasijje hui oquequinaje. Ecuio'oshajjajo nequinaje. ⁷ Jamajjeya o que poeyanaje Jesosa. Napa canaje emeya.

—¡Nequisohuacue! ¡A'a quea mete pojji! —Jesosa poanaje.

⁸ Jamajjeya oya cuana nequisohuanaje. Jesosa oe nei nequi bajea canaje.

⁹ Eyiyojo jaoquequije'yo mimimimi jaoque'yonaje. Jesosaa ma ojjañaja Edoe Meseya acanaje jama ba'a: —¡Ma miya eyiyojo banaje a'a jihuohuijji! ¡Quijje eya emano'yojaa shequi o'oyajo mo oe pea cuana huohuicue! —Jesosaa acanaje.

¹⁰ Jamajjeya oya cuaa huohui'ajja canaje: —Jesosa, Moisesija etehue'yo huohuijji poaniya jama acani ba'a: “Enia oe ebionei capoe'yahua Eyacuiñajjiija huoojea'yo ojjaña jaahuanajji poe jjimahuaajo”. ¿Yajjaje acuae Moisesija esohui huohuijji cuaa jama acani? —poanaje Peno, Satiaco, Huani pea'ai.

¹¹ Jesosaa saja'a canaje jama ba'a: —E'e jojo nei Enia jayojja jama oe dejja ebionei epoejji, ojjaña cuana ejo e'e jojo nei ejjashahuabaqui meesahuajji. ¹² E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poa. Pea poso acanaje. Jamajjeya cuia ca'ya poa. Jamaya pea'ai eya acaje'yo cuaa. Eya ojjañaja Edoe Mese quea nee nee po mee caje'yo cuaa —poanaje Jesosa.

¹³ Jamajjeya o shajja'ajjajji cuana jjashahuabaqui nequinaje. Jama poanaje: —E'e de, oya Huanijo mimiani, ma ona besameejji poajo. Eniaa jama sohui huohuime acanaje Huaniya, de —poanaje Peno Satiaco nijje Huani pea'ai nijje.

Esho'i niñepoquipajea mee ca'yonaje Jesosaa
(Macoso 9.14-29; Noca 9.37-43)

¹⁴ Eyiyojo nequi jaoque'yo majje Jesosaa, o shajja'ajjajjiya pea'ai ba cañaquinaje quea huiso cuana ejjachichaqui nequica. Oe dejja Jesosa que poeyanaje.

Ecuio'oshajjajo nequiya huohui'ajja canaje: ¹⁵ —Emeshi Mese Jesosa, ¡ecuea ebacua ejjajo quea yeno jjashahuabaquicue! Oya quea mano nee nee, niñepoqui poani. Niñepoqui majje ena huasijje jea cani, cuaqui yasijje pea'ai jea cani. ¹⁶ Eyaya oya yenaje mi shajja'ajjajji cuana huasijje. Jamatii niñepoquipajea ajja.

¹⁷ Jesosaa ojjaña cuana acanaje: —¡De! ¿Ache shono acuae jja nequiana ejo jjashahuabaquije e'e jojo nei? Quea sapa ca'a mi coma. ¿Ache cahui huiso minijje nequi majje miyaya eya baje'yo Eyacuiñajjiija huoojea'yo ojjaña jaahuanajji quea ca'a nee nee? ¡Miquea ebacua ejja e que jjequicue!

¹⁸ Jjequi canaje Jesosa que. Jesosaa o niñepoquimeejji poani huoojeacuayajea ca'yonaje: —Eshahua, ¡cuaya-qui'yocue, esho'i niñepoquimeejji poani! —Jesosa poanaje.

Cuayaqui'yonaje. Jamajjeya oja bacua ejja niñepoquipajea'yonaje, quea aja nee po'yonaje.

¹⁹ Quijje ojjaña cuana poqui majje Jesosa que poeyanaje o shajja'ajjajji cuana. Huohui'ajja canaje: —¿Yajjajo acuae euaaya eshahua mi huoojeacuayajea mee'ajja'yonaje?

²⁰ Jesosaa saja'a canaje: —Miquianaya jja ejo jjashahuabaqui ja'a jjima. Jjashahuabaquiani jama ba'a: “E'e pojja'a Jesosaa ecuanaja eshahua huoojeacuayajea mee ajja”. Jamajjeya mi huoojeacuayajeaña. ¡Bacue

oe! Ejo jashahuabaquicue jama ba'a: "Jesosaa e'e nei ohuaya jayojja jama ecuana ameesahua caje'yo". Miya jama jashahuabaquiajo, Eyacuiñajjiya miya amee caje'yo ojjaña eyaya aña jayojja jama, ma dejjaa ajjima acani amee caje'yo pea'ai. ²¹ E'e, jamatii jiquio eshahua jayojja quea huoojeacuayajea camaja. Eyacuiñajji nijje mimi huicha'a huicha'a majje, ojo jashahuabaquianijo ijia'ijia jima po majje pea'ai huoojeacuayajeaje'yo miyaya —Jesosa poanaje.

—Quijje eya manoje'yo —Jesosa poanaje
(Macoso 9.30-32; Noca 9.43-45)

²² Majoya Janinea meshijo ojee poquijeya Jesosaa o shajja'ajjaji cuana huohui canaje: —E'e, quijje eya iña meesahuaje onaja equecua'yojji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

O shajja'ajja majje o shajja'ajjaji cuana quea yeno nee nee poanaje. Quea mete pea'ai poanaje.

Eyacuiñajjiya equi iya bame'yojji bejjo chicha canaje bejjo chichajji poaniya

²⁴ Majoya Capenaoma huasijje poeyajo, bejjo chichajji poani Peno que poeyanaje; huohui'ajja canaje jama ba'a: —¿A'a acuae mi mi sohui huohuijjiya bejjo quia cani, ma Eyacuiñajjiya equi iya bame'yojji?

²⁵ —E'e de, quia cani —Peno poanaje.

Majoya Simohui Peno equi yasijje dobiqiajo, Jesosaa oya huohui'ajja canaje: —Simohui, ¿yajjajje acuae mi jashahuabaquiani? ¿Emeshi mese neiya ajea bejjo sosequia mee cani? ¿A'a quea huesha ba'aja? ¿A'a oja meshijo ba'aja pojja'a?

—Quea huesha ba'eya poe majje sosequia caje'yo —poanaje Peno.

²⁶ —E'e —Jesosa poanaje—. Jamajjeya emeshi mese neiya echacojji cuana esosequia'yojji pojjeama. ²⁷ Jamatii oya quene'ama epojji ejjasosequiaquijji. ¡Poquicue miya bae yasijje! ¡Joya ebionei ijia caje oe jjequiquiayacue! ¡Oja nabajo ba'e oe bacue ejjeshejji quea sose huiso nee nee, ojo, mijo pea'ai esosequia'yojji! ¡Dojocue! ¡Bejjo chichajji poani yasijje quiacue! "Ma'aje esohui huohuijjiya, ecuea pea'ai" acue —Jesosa poanaje.

¿A'ya ona huoojeajji jayojja nequije eyajo?
(Macoso 9.33-37; Noca 9.46-48)

18 Majoya ojjaña o shajja'ajjaji cuaa Jesosa que poe majje huohui'ajja canaje: —Jesosa, quijje miya ojjaña huoojeajji poaje. ¿A'ya cuae mi jayojja jama poaje minijje ona huoojeajji? ¿A'a ecuanaya pojja'a?

² Jamajjeya Jesosaa oe esho'i nei o que iyaa canaje. O cojja nei nequinaje. ³ O shajja'ajjaji cuana huohui canaje Jesosaa: —¡Bacue oe! ¡Jiquio esho'i nei jama pocue! ¡Jashajja'ajjaquicue oe! Esho'i nei pojji mi po'yajo ca ca enijje eba'e'yojji pojjeama quijje eya ojjaña huoojea'yojji poaje. ⁴ Jamajjeya joya esho'i jama quea bei

jashajja'ajjaquiani e que poquije'yo, e jayojja ona huoojea'yojji eyajo poaje. ⁵ E'e, ecuea epeejji esho'i quea pame jama jashajja'ajjaquiani. Ojjaña joya ecuea epeejji quea jea acani eya pea'ai quea jea acani —Jesosa poanaje.

Quea mimishi mi po o'oya chana'
(Macoso 9.42-48; Noca 17.1-2)

⁶ —Ecuea epeejji jjeya nei jjapeequi ca'a'ama ja'a quea mimishi po meeji cuana! Joya o mimishi pomeejji poani Eyacuiñajjiya quea nee nee po mee caje'yo, de. Jamajjeya ¡quea mimishi epo mee cuahuajje oe mano'yocue! ¡Janaayipecaqui majje mei quea quemo nee jeyocue; bae quea doe yasijje oe tohuaacue! ⁷ Mimishi pomeejji cuanajo quea yeno nee nee ojjaña poani. Jamatii mimishi pomeejji yani, de. Quea yeno ca ca oe mimishi pomeejji poaje, quea nee nee po mee caje'yo tii Eyacuiñajjiya —Jesosa poanaje.

⁸ —Jamajjeya miya quea mimishi po mee cani emeya, ejiojjiya pojja'a. ¡Ejiojji, eme' pojja'a ejajasejjajea jayojja jama acue mimishi'ama epojji! Eme', ejiojji pea'ai chamajo eyahuasijje poqui'yajo Eyacuiñajji nijje eba'e tiitii'yojji quea pame nee nee. Miquea beca eme', ejiojji pea'ai yanijo pojja'a quea mimishi tii poani ca ca cuaqui yasijje poquije'yo. Quea tai nee nee, quea nee nee; cuaqui jijipajea'yo ajja, de. ⁹ Ecojjaajo jjabajji majje miya quea mimishi poani pojja'a. Jamajjeya ¡ecojja ecajja-jea jayojja jama acue! Cojjama', mimishi'ama miya eyahuasijje poquije'yo quea pame nee nee poaje'yo. Cojjajji, quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. E'e, ¡quea jashahuabaqui ja'a oe pocue! ¡Mimishi cuana oe pajea'yocue! —Jesosa poanaje.

¹⁰ —Jamajjeya ¡ecuea epeejji eyacua a'a boti'ama ajji! E'e jojo nei eyaya miya huohuiaña eyajo esohuidojojjiya, o jaahuanajjiya ecue Chii yasijje huohuiqui cani.

¹¹ Eya ca iña ojjañaja Edoe Mese poeyanaje mimishi cuana cuijea'yohua cuaqui yasijje miquianaya epojji poani jjejojo —Jesosaa o shajja'ajjaji huohui canaje.

Esohui eba meesahuajji ñajjajja epoquiquehuajo
(Noca 15.3-7)

¹² —Jamajjeya eyaya miquianaya huohuije esohui ejjashahuabaquijji —Jesosa poanaje—. Oe dejjaja quea huiso ñajjajja yaninaje, 100 huisome. Oe nei poquiquehua'ya poa, ¿ae poanaje oya? ¿A'a sa'ajja canaje? E'e. Pea cuana, 99 huisome ñajjajja ojee ijia'ijiaqui jeanana canaje epoquiquehua sa'ajja'yohua. ¹³ Ba'yo majje quea bihui nee po'yonaje. Pea ñajjajja poquiquehua jimajo quea bihui pishana poanaje: "¡Jiquioya ecuea ñajjajjaja bacua, de!" poanaje eñajjajja mese. ¹⁴ Ñajjajja jaahuanajji ñajjajja ba'yo majje quea bihui nee nee poa. Jamaya poaje ecue Chii: Ecuea epeejji eyacua quea mimishi jjejojo epoquiquehua'yo jayojja jama ojo jashahuabaqui o'oyajo, Eyacuiñajji quea bihui nee poaje'yo —Jesosa poanaje.

¡Miquea epeeji minijje quea mimishi poajo oja mimishi pajea'yocue, quea bei po o'oyacue onijje!
(Noca 17.3)

¹⁵ —Ecuea epeeji minijje quea mimishi poanijo, ¡onijje mimi quicue! ¡Ojaya mimishijo jashahuabaqui meesahuacue! Jashahuabaqui majje mimishi capajea ca'yahua. Jamajjeya minijje japeequije o'oya. ¹⁶ O mi jashajja'ajjaquajajo ¡pea iyaacue, beca pojja'a, ecuea epeeji pea'ai! ¡Ojee poquicue onijje mimiya! Jamajjeya oya cuaa miya ba caje e'e jojo nei miquea epeeji nijje japeequi o'oya sa poani. ¹⁷ Ohuaya oya cuana mi jashajja'ajjaquajajo ¡ojjaña Eyacuiñajjija epeeji cuana huasijje iyaacue emimijji, ojaya mimishi epajea'yojji! Ojjaña niñeshe'ajja cajo mi jashajja'ajjaquajajo, Eyacuiñajjija epeeji jama pojjeama oya. Jamatii jadasiaquijji jama, de —Jesosa poanaje.

¹⁸ —Jamajjeya ojjaña ecuea epeeji cuana miqianaya huohui meeje ache eba'ejji quea mimishi, ma Eyacuiñajjija eyajo anija boti'ama pea'ai. Huohui meeje pea'ai ache eba'ejji quea pame nee, ma Eyacuiñajjija eyajo anija quea boti nee pea'ai —Jesosa poanaje.

¹⁹ —E'e jojo nei miqianaya meshijo ba'e ojee mimijjo, Eyacuiñajjija, ecue Chiiya eyajo anija miqianajaya esohui saja'a cani. ²⁰ Beca cuana enijje japeequiani ejjachichaquianijo, eya o pejeje nequiani —Jesosa poanaje.

Esohui ejjashahuabaqui meeji oe dejja onaja mimishi jo quea quene tii tii poani

²¹ Majoya Penohua Jesosa huohui'ajja canaje: —Emeshi Mese Jesosa, ecuea epeejiya quea mimishi ahucha'a huicha'a cajo, ¿a'a eyaya oja mimishi capajea huicha'a huicha'a'yahua? ¿Ache huiso huohui'yome amajje jabeiqui ca'yojji? ¿A'a quea huiso pojja'a, me oeje pea beca, 7 pojja'a?

²² Jesosaa saja'a canaje: —Chojja, Peno, me oeje pea beca, 7 pojjeama. Quea huiso nee nee huohui'yome amajje jabei neinei'iqui ca'yojji, jama tii tii epo'yojji —Jesosaa acanaje.

²³ Jamajjeya Jesosaa pea esohui ejjashahuabaqui meeji huohui canaje jama poani ba'a: —Eyacuiñajji ojjaña huoojea'yojji poaje. Jamaya poaje ba'a: Emeshi meseya aquiana oja quia sosequia mee ca'yani echacojji cuana. ²⁴ Sosequia mee canijo o que jjequi canaje oe echacojji poani. Aquiana quea huiso nee nee oja jjeshe poanaje. Jamajjeya sosequia ajja'ajja jjima, ojaya. ²⁵ Ma echacojji sosequiaquajaja; yajja sosequia'yome yajji joya mi sosequiajeyo ca'yonaje. Jamajjeya emeshi meseya quea quene huohui canaje: “¡Oya oe quiacue ejjeshejji soseje! Sosema' cachaco cahua. ¡Ojaya ehuanase, oja bacua cuanaya quiacue pea'ai, ojaya aquiana cuana pea'ai quia'yocue e sosequia'yojji!”

²⁶ —O shajja'ajja majje echacojji o que poquinaje. Ecuio'oshajjajo nequi oya mimi nequinaje: “Ecuea emeshi mese, ¡a'a ecuaña dojojji equia'yojji bejjo soseje! ¡Ishoa'ajjacue! Eyaya ojjaña sosequia jeyojeyo'yo miya”.

²⁷ —Emeshi mese ojo jashahuabaquinaje. Quea aquiana huiso nee nee nee sosequia jjima. Jamatii oja bajjani cuijea ca'yonaje, sosequia jjima tii. Poqui mee ca'yonaje, de.

²⁸ —Majoya echacojji poquinaje quea bihui nee nee. Jamatii poqui majje ma echacojjiya pea echacojji onijje nequi sa'ajja canaje. Ba majje iñasibijea canaje. Jama poanaje ba'a: “¡Jjeya nei mo sosequiacue mique jjeshe cuana!” oya poanaje. Ojaya oe pojji nei sosequia jjima poanaje. ²⁹ Ecuio'oshajjajo nequi mimi nequinaje jiquio pea echacojji: “Epeeji, ¡ejo jashahuabaquicue! ¡Ishoa'ajja socue! Ojjaña aje mi sosequia jeyojeyo'yo de”.

³⁰ —“¡Chojja! ¡Ishoa sa po ajja iña!” poanaje. Jeanobiaa dojo canaje; ohua sosequiajeyo ca'yajje huoojea ca'yonaje.

³¹ —Pea echacojji cuaa ba canaje. O dojo cajo quea yeno jashahuabaquinaje. Poquinaje emeshi mese huohui'yohua. ³² Ma shajja'ajja majje emeshi meseya huoojea canaje ojaya echacojji jjequi'yohua. Poeyajo tecuea canaje emeshi meseya: “Miya ca mi ca oe quea mimishi nee. Miquea aquiana quea huiso nee nee sosequia jjima. Jamatii enijje mimi'yajo eyaya miquea bajjani cuijea'yonaje, sosequia jjima tii. ³³ Jamajjeya zyajjajo miquea epeejiyo mi jashahuabaquinaje miya? ¡E jayojja oe miya mi poanaje!” emeshi mese poanaje. ³⁴ Quenequene neinei'yonaje emeshi mese. Ejeanobiajji huoojea ca'yonaje quea nee nee po meeya ohua sosequiajeyo ca'yajje —Jamaya Jesosa poanaje.

³⁵ —Jamajjeya jiquio ecua emeshi meseya acani jayojjaya jamaya miqianaya acaje'yo ecue Chiiya, ca onaja mimishi miya mi pajea neinei'yajo. Miquea mimishi cuana pajea'yo ajja, cuijea'yo ajja pea'ai —Jesosaa acanaje.

Esohui huohui canaje ehueijji, Jesosaa

(Macoso 10.1-12; Noca 16.18)

19 Majoya esohui huohui majje Jesosa Janinea meshijo ani po'oquequinaje Jodea meshi yasijje, Jodana cuei ojje miji yasijje. ² Jomajo quea huiso dejja cuana onijje poquinaje. Ohuaya ojjaña jjaajaqui mee ca'yonaje, huaquia mee ca'yonaje. ³ Paniseo cuana ca ca o que poeyanaje jadasiaquiy nisho. Jamaya jashahuabaquinaje ba'a: —E'e pojja'a Jesosa Moisesija etehue'yo jayojja jama pojjeama mimijje. Jamajjeya ecuaaya oya tecueaje.

Jamajjeya Jesosa huohui'ajja canaje cuaa jama ba'a: —Esohui huohuijji, ¿a'a acuae ehuanase huei cajji? ¿Yajjajo acuae ehuanase hueijea cajji so'o? ¿Achajja tehuemeya acuae oe Moisesiya aca poa?

⁴ Saja'a canaje Jesosaa: —¿A'a miquea Moisesija etehue'yo ba jjima esohui? Yahujajo nei nei tehue ca poa Moisesiya jama ba'a:

“Yahujajo Eyacuiñajjija pana coo ca poa yahue, epona pea'ai. ⁵ Huohui ca poa ohuaya: —Jamajjeya yahueya oja chii, ojaya enaese pea'ai cajifayiya ca'yahua oja huanase nijje eba'ejji”.

⁶ Oya cuana beca. Jamatii oe nei jayojja Eyacuiñajjiya oya ba caní, becanejjijji pea'ai pojjeama, oe nei jayojja-ya. Cuanaya Eyacuiñajjiya oe jayojja aca poa. Jamajjeya ja'a oe jea meeji! ¡Jama tii tii oe nei oe acue! —Jesosa acanaje.

⁷ Huohui'ajja o'oya canaje Paniseo cuaa: —Jamajjeya ¿yajjajo acuae Moisesiya tehueme aca poa? Jama ba'a: “Huei'yo majje yahueya ehueijeajji papeni etehue'yo caquia cahua oja huanase. Majoya cahuojea cahua”.

⁸ Saja'a canaje Jesosa: —Miquea etiquiana quea mimishi nei jjejojya Moisesiya huei mee'ajja canaje. Quijje nei Moisesiya jamaya tehue ca poa; jamatii Eyacuiñajjiya jamaya pojjeama pana coo ca poa. ⁹ Jamajjeya eyaya miya huohuiaña e'e jojo nei ehuanase pea dejjaja sii jjima huei ca ajja. Joya ehuanase hueijji epo pea epona ehua'yojji quea mimishi nee, epona siijji epo jama. Eyacuiñajjiya oya ba caní quea mimishi. Joya ma eponajo jjahuanaquajo quea mimishi pea'ai poani; onaja ehuanase nijje poani —Jesosa poanaje.

¹⁰ —¡De! Jamajjojya eseya jjahuanaqui ca ajja. Jamatii shacuima' nequi cajji ojjaña eseya cuana. —o shajja'ajjajji poanaje.

¹¹ —Cho, ojjaña pojjeama shacuima' nequi cajji —Jesosa poanaje—. Beca cuana Eyacuiñajjiya huoojea caje'yo shacuima' tii enequijji. ¹² Beca cuana jjahuanaqui ajja, jamatii ejjahuanajji pojjeama. (Jamaya joya quibojjisha nei, biñajjajama' cuana pea'ai.) Beca cuana jjahuanaqui ajja jamatii yajjajje shai jjahuanaqui sa po'yo ajjajo. Beca cuana Eyacuiñajjiya esohui ehuhui aiqijji, ojo echaco neinei cajji Eyacuiñajjiya huoojea canaje jjahuanaqui jjima tii tii enequijji. Jamatii Eyacuiñajjiya ojjaña huoojea'yo ajja shacuima' tii enequijji. Jamajjeya ¡ojaya ejjashahuabaqui'yojji mijo jamaya acue, miyaya! —Jesosa poanaje.

Esho'iquianajo Eyacuiñajji nijje miminaje Jesosa

(Macoso 10.13-16; Noca 18.15-17)

¹³ Majoya Jesosa que esho'i nei cuana jjequi canaje cuaa. Huohui canaje: —Jesosa, ¡iquio esho'i nei sapa napa'ajja majje ¡Eyacuiñajji nijje mimique ojaya ejaahuanajji! —poanaje.

Jesosa shajja'ajjajji cuaa oya cuana tecuea canaje: —¡A'a jja oe Jesosa que jjequi majajji esho'iquiana! ¡Esohui oe cahuohui cahua!

¹⁴ Ma ba majje Jesosa poanaje: —¡Esho'iquiana e que capoe'yahua! ¡A'a quea huesha nequi meeji! E'e, esho'iquiana jjashahuabacuajiquiani; enijje jjapecuajiquiani. Jamaya ecuea epeejji esho'i jayojja eyaya jaahuana mee sa aña pea'ai. Jamajjeya e que poquije'yo, eya eyajo ojjaña huoojea'yojji poaje —poanaje.

¹⁵ Jamajjeya esho'i cuana biajje eme' huana majje Jesosa poquinaje.

Edejja etii pishana quea aquiana huiso Jesosa nijje miminaje

(Macoso 10.17-31; Noca 18.18-30)

¹⁶ Majoya oe dejja Jesosa que poeyanaje. Huohui'ajja canaje jama ba'a: —Emeshi Mese, ¿achajja po majje

acuae mo eyahuasijje poqui ca'yojji Eyacuiñajji nijje eba'e tiitii'yojji? ¿Achajja acuae ba'e cajji quea pame nee epojji?

¹⁷ —¿Apiojji miyaya eya huohui'ajjaña: “¿Ae quea pame nee epo'yojji?” Eyacuiñajji ca oe nei quea pame nee. Jamajjeya onijje ba'e tiitii'yo sa po majje ca oe ¡oya shajja'ajjacue! ¡Ojaya esohui etehue'yo jayojja jama oe ba'ecue! —Jesosa poanaje.

¹⁸ —¿Ache esohui etehue'yo? —huohui'ajja canaje.

¹⁹ Jesosa saja'a canaje: —Eyacuiñajjiya esohui etehue'yo jama poani ba'a:

“¡A'a pea quecuajji!

¡A'a sii pojji!

¡A'a sijje pojji!

¡A'a pea siijji!

¡Mique chii, mique nae pea'ai oe shajja'ajjacue!

¡Pea cuana mi pejejo ba'e mique huapa pojjeama jayojja quea jea oe acue!”

²⁰ —E'e, eyaya jamaya aña, esho'yahuaa jama tii tii sohuaqui eya. ¿Pea acuae yajja po cajji eyajo eba'e tiitii'yojji? —¡iquio dejjaa Jesosa huohui'ajja canaje.

²¹ —E'e, miya quea pame nee nee Eyacuiñajji jayojja-ya po sa po majje ¡poquicue, miquea aquiana cuana quiaquicue ejjeshejji sosejje! ¡Ejjeshejji quia'yocue aema' cuana huasijje! ¡Majoya poecue, enijje epo'yojji! Jamajjeya eyajo Eyacuiñajjiya miya aquiana quea pame nee quea huiso quia caje'yo quijje.

²² Jesosaja esohui shajja'ajja majje dejja etii pishana quea dejja tai jjejojo quea yeno poquinaje; ojaya aquiana quea huiso nee nee yani jojya quia sa po'yo ajja.

²³ Jamajjeya Jesosa o shajja'ajjajji cuana huohui canaje: —E'e, dejjaa quea mimishiya jjejojya aquiana quea huiso, meshi quea quemo pojja'a nahue canijo beshahua nei e que poqui ajja, eya eyajo ojjaña huoojea'yojji poaje'yo.

²⁴ —E'e, eyaya huohuiaña pea'ai jama ba'a: Ahuoja quii huejjajje ino jeanobiaña jamaya, ¿a'a mapichi jeanobia cajji ahuoja quii huejjajje? Quea camaja coma. ¡iquio ecua mapichi ahuoja quii huejjajje jeanobia cajji pome jamaya dejja quea aquiana huiso nee nee nahue caní eyahuasijje edobiquijji pojjeama.

²⁵ O shajja'ajja majje jjashahuaba neineiquinaje o shajja'ajjajji. Ojee mimimiminaje: —Jamajjeya ¿a'ya shai eyahuasijje dobiqúi mee caje'yo?

²⁶ Cojja ba neinei canaje Jesosa. Huohui canaje: —Dejjaa jamaya amee ajja tii. Eyacuiñajjiya oe neiya ojjaña acani. (Eyahuasijje dobiqúi mee caní pea'ai joya quea aquiana huiso nee) —Jesosa poanaje.

²⁷ Jamajjeya Peno jjashahuabaquinaje ma dejja aquiana quea huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yonaje minijje epoqui'yojji. Jamajjeya ¿ae acuae ecuaña quiaje so'o, de?

²⁸ Jesosa saja'a canaje: —E'e jojo nei quijje Eyacuiñajjiya ojjaña eyacua pana ca'yajo eya eyajo nequije'yo ojjaña huoojea'yojji nei. Miquianaya, 12, e shajja'ajjajji poani enijje nequije'yo, enijje ona huoojea'yojji poaje'-

yo. E'e, miqianaaya Jodio cuana, ecuea pea epeeji cuana pea'ai huoojeaje'yo tii. ²⁹ E'e nei beca cuana ecuea esohui jama a sa poanijo aquiana cuana jeana ca'yani: Ojaya equi, oja huapa pojjeama, oja chii, oja nae pojja'a, oja bacua cuana pojja'a, oja huanase pojja'a jeana ca'yani. Jamajjeya e'e jojo nei quijje Eyacuiñajjiya oya cuana quea huiso nee nee o jayojja quia caje'yo; quea bihui nee nee ba'e tiitii mee caje'yo pea'ai eyajo onijje. ³⁰ Jamatii beca cuana jjeya ona huoojeajji poani eyajo ona huoojea'yojji pojjeama poaje'yo. Joya jjeya ona huoojea'yojji pojjeama ca ca eyajo ona huoojea'yojji nei nei poaje'yo e jayojja —Jesosa poanaje.

Esohui ese jashahuabaqui meeji huohui canaje Jesosaa e'acuijjajja mesejo

20 —E'e —Jesosa poanaje—, quijje eya ojjaña huoojea'yojji poaje, ojjaña sosequiaje'yo jjeya enijje chaco canaje sosejje. Jamaya poaje ba'a: Oe dejja, e'acuijjajja mese mecajjeahua poquinaje. Echacojji cuana iyaa canaje. Huohui'ajja canaje: ² “¿A'ya cuae jjeya poquije acuijjajja huojohua? Ojjaña miya eyaya sosequiaje oe esodojjo quea sose huiso nee nee sosejje”. “E'e” poanaje, “chacoje ecuaaya oe esodojjo quea nahue nee sosejje”. Majoya huoojea canaje chacohua.

³ —Quijje pishana eshequi jaasohua pishana majje ona ijia'ijia'ani yasiije poquinaje e'acuijjajja yiye mese. Beca dejja chacochocho jjima ani ba canaje. ⁴ Huohui'ajja canaje: “¿A'a miyaya acuijjajja yiyejo chacoje pea'ai? Miya eyaya sosequiaje quea sose huiso pea'ai”. “E'e, chacoje” poanaje. Poquinaje chacohua.

⁵ —Quijje eshequi biacojjajja nequijo, sinecua nei pea'ai oya poqui majamajanaje pea cuana iyaa echacojji. ⁶ Eshequi ejjajeapaaquijo pea'ai poqui o'oyanaje. Dejja cuana chacochocho jjima ani ba canaje. “¿Apiojji acuae mi chacochocho jjima ani?” acanaje e'acuijjajja meseya. ⁷ “Chama oya ecuea echacomeeji aña, de; ajea esosequia'yojji” saja'ame acanaje cuaa. “E'e. ¡Ecuea acuijjajja yiyejo chacoquicue pea'ai!” poanaje.

⁸ —Meca nei e'acuijjajja meseya ona chacomeeji huohui canaje: “¡Echacojji cuana iyaacue! ¡Sosequia-cue! ¡Joya quijjejeje nei dobiquinaje ebionei sosequia-cue! ¡Joya ebionei dobiquinaje quijje yeje nei sosequiacue!”

⁹ —Majoya echacomeejiya joya eshequi ejjajeapaaquijo dobiqui cuana sosequia canaje oe esodojjo quea nahue. ¹⁰ Jamajje quijje joya mecajjeahua dobiqui cuana poeyanaje. Sosequia canaje oe esodojjo quea nahue pea'ai. Ba majje quea yeno poanaje, quea huiso nee nee esosequia caje poso. Jamatii oya sose huisoajja pea'ai sosequia canaje. E'acuijjajja mese nijje quenequenaje. ¹² Mimijajinaje jama ba'a: “Joya eshequi ejjajeapaaquijo poeyanajeya aje oe oe pojji chaco canaje. Ecuanaaya ca chaco neineinaje eshequi quea quiyojo. Jamatii miyaya oya sose huisoajja pea'ai sosequianaje. ¿Apiojji acuae jja ecuaana jayojja pea'ai sosequianaje so'o?” poanaje. ¹³ “E'e epeeji cuana, eyaya miya sosequianaje quea pame nee” poanaje. “Mi poeyajo jama poanaje ba'a: —E'e, chacoje oe esodojjo quea

nahue sosejje —poanaje. ¿A'a e'e? Jamajjeya eyaya jamaya miya quia meenaje. Jamajjeya ja'a quea quene pojji! ¹⁴ Eyaya jiquio dejja quijjejeje nei cuana oe esodojjo quea nahue nee quia sa poani mi jayojjaya. Jamaya quea pame. ¹⁵ Mi jayojjaya quea huiso sosequianaje. ¡A'a jja oe miya quea quene pojji! Bejjo ecuea jojya eyaya quia sa amajje eyaya quiaña” e'acuijjajja mese poanaje —Jesosa poanaje.

¹⁶ —E'e, e'acuijjajja meseya ojjaña sosequia canaje ojaya ejjashahuabaqui'yojji jayojja jama. Jamaya Eyacuiñajjiya acaje'yo. Joya quijje nei jjapeequije'yo quea bihui nee ba'e tiitii mee caje'yo eyajo onijje pea'ai. Ojjaña ojaya ejjashahuabaquijji jayojjaya jama sosequia caje'yo pea'ai. Eyacuiñajjiya quea huiso iyaa caje onijje eba'e tiitii'yojji. Jamatii oe pojji babaca caje'yo oja epeeji huoojea'yojji epojji —Jesosa poanaje.

—Quijje eya manaje'yo —Jesosa po o'oyanaje
(Macoso 10.32-34; Noca 18.31-34)

¹⁷ Majoya Jenosanena huasijje poquinaje. Jesosaa o shajja'ajjajji cuana dojo canaje ejiojji sahua huasijje esohui huohuijji: ¹⁸ —¡Bacue oe! Eya jiquio ojjaña Edoe Mese. Eseyá Jenosanena huasijje poquije. Jomajo mo iña meesahuaje eya Jodio cuanaja equecua mee'yojji. E'e, Moisesija etehue'yo huohuijjiya, Eyacuiñajji nijje emimijji etii cuaa pea'ai eya iña mee caje. Taaa neineije cuana: “¡Oya quecuajeacue!” poaje. ¹⁹ Jodio pojjeama cuana huasijje mo huoojea caje. Ejo soa neineije cuana; cuia caje'yo mo cuaa huaca jee ejeapas-hajjajja; acui ecueata'apeejo me cacajea majje mo ba'ehuanasohuajea caje cuaa emano'yojji. Jamatii mo beca cahuime po majje Eyacuiñajjiya shequi mee caje'yo —Jesosaa huohui canaje.

Semeneoja ehuanase Jesosa nijje miminaje oja bacua ejjajo
(Macoso 10.35-45)

²⁰ Majoya Jacobo, Huani pea'ai enaese nijje Jesosa que poeyanaje. Ecu'oshajjajo nequifanaje onijje emimijji.

²¹ —She, ¿ajeo ami poeyanaje? —Jesosa poanaje.

—Jesosa, ecuea ebacua ejja cuana mi pejejo canequi'yahua quijje miya ojjaña huoojea'yojji poaje. Oe shani mijijje, pea ebianeijje mijijje canequi'yahua minijje, ona huoojea'yojji. ¡Jamaya oe acue! —poanaje enaese.

²² —Chojja. Miquianajaya ba jjima —Jesosaa oya cuana acanaje—. Eya quea nee nee po mee caje'yo cuaa. ¿A'a miqianaya e jayojja quea nee nee poajo quea ca'a poaje? Eya quecua caje'yo pea'ai cuaa. Enijje jja-peequianajo miquiana quecua caje'yo pea'ai pojja'a cuaa. ¿A'a jamatii miquianaya quea ca'a poaje?

—E'e —saja'a canaje Jacobohua, Huaniya pea'ai—. Quea ca'a poaje mi jayojja onaa quea nee nee po mee ca'yajje. ¡Jamaya capoahua, jamatii caquecua cahua cuaa mo!

²³ —E'e —poanaje Jesosa—, jamajjeya e'e jojo nei miqiana e jayojja quea nee nee po mee caje'yo cuaa; e jayojja quea ca'a nee nee poaje, onaa mano mee ca'

yajje. Jamatii, e pejeje eyajo eyaya miya enequi mee'yojji pojjeama enijje ona huoojea'yojji. Chojja, ecue Chiiya eyajo aniya yahuajo nei pea cuana babaca ca'yonaje. Ohuaye nei nequi mee caje'yo e pejeje quijje, eya ojjaña huoojea'yojji poajo —Jesosa poanaje.

²⁴ Jesosa pejeje nequi sa pea'ai poanijo onijje ona huoojea'yojji epojji, Jacobo, Huani nijje pea'ai quea quene poanaje pea shajja'ajjajji cuana, ome mijijje pea'ai. ²⁵ Jamajoya aje oe Jesosaa oya cuana iyaa canaje. Jama huohuime acanaje ba'a: —¡A'a onijje quea quene pojji! Miquea eba dejja cuana, Eyacuiñajjija epeeji pojjeama. Onajaya emeshi mese cuaa, ona huoojeajji cuanaa pea'aiya pea cuana huoojea neinei cani; quea quene nee nee poani, quea mase. ²⁶ Jamaya pojjeama miqianaya poaje, ecuea epeeji cuana. ¡E jayojjaya po sa poanijo pea cuana ba'e meesahuacue! ²⁷ Joya ona huoojea'yojji po sa poani ca ca echacojji so-sema' jayojja capoahua. ²⁸ E'e, je jayojja jama pocue! Eya ca ca iña ojjañaja Edoe Mese poeyanaje ojjaña cuana ba'e meesahuua; ojjañaja eya eba'e meesahuajji pojjeama. Ojjañaja mimishi sosequia'yojji mo manoje'yo, ojjaña cuaqui yasijje epoqui'yo poani jjejojya —Jesosa poanaje.

Cojjama' cuana quea cojja ja'a po mee ca'yonaje Jesosaa

(Macoso 10.46-52; Noca 18.35-43)

²⁹ Jenosanena huasijje poquije Jesosa dobiquinana naje Jenico huasijje. Majoya dobinana majje poquinaje Jenosanena huasijje. Quea huiso nee nee cuana onijje poquinaje. ³⁰ Becanejjijji pea'ai cojjama' ejiojji sahuajo e'anioque ani. Jesosa shajja'ajja canaje poeje. Taaa neine naje cuana: —Jesosa, miya emeshi mese Dabija osecua. ¡Ejo jashahuabaquicue quea yeno! —taanaje.

³¹ —¡A'a oe taaa majajji! ¡Esohui oe ca'acue! —acana-je cuaa.

Jamatii taaa neineinaje cojjama' cuana: —Jesosa, Dabija osecua, jejo jashahuabaquicue!

³² Jamajjeya o shajja'ajja majje Jesosa nequiñaquina-je. Cojjama' cuana iyaa canaje: —E'e, ipoecue! ¿A'ya so'o? —poanaje.

³³ —Emeshi Mese, ¡miyaya iña jjacojjapojjaqui mee'yo-cue! —poanaje.

³⁴ Jamajjeya Jesosa cojjama' cuanajo jashahuabaqui-naje. Cojja napa canaje. Cojja napa cajje ecojja jjabapojjaqui'yonaje. Quea bihui nee nee po'yonaje jjacojja-ja'aqui mee ca'yajje. Jamajjeya Jesosa nijje poquinaje.

Jenosanenajo Jesosa nequiñaquinaje

(Macoso 11.1-11; Noca 19.28-40; Huani 12.12-19)

21 Majoya Jesosa Mepajejo nequiñaquinananaje Jenosanena pejeje, acui tii'ajja yiyejo, Onimo bajjani eyiyo pejeje pea'ai. Nequiñaquinana majje o shajja'ajjajji becanejijji pea'ai huoojea canaje Jesosaa. ² Jama poanaje ba'a: —¡Poquicue Mepaje yasijje! ¡Dobi-qui majje mapichi sisi, ebacua sho'i ai nijje ejeyo ne-quia nequi bañaquicue! ¡Ba majje, picho majje yecue e que! ³ Onaa: “¿Apiojji acuaya ecua mapichi sisi picho-

jeaña so'o?” acajje, “Ecuea Emeshi Mese sa poani” sa-ja'ame acue. Jamajjeya: “Ee, ocue dojo'ajja joya mapichi” acaje dejjaa Mepajejo ba'eya —Jesosa poanaje.

⁴ E'e, jamaya acanaje Jesosaa, Eyacuiñajjija esohui huohuijji yahuajo nei nei ojo tehue ca poa jama ba'a:

⁵ “Ojjaña Jenosanenajo ba'e huohucue jama ba'a: —¡Bacue oe! Mi huoojea'yojji nei poeyani; oya quea bei nee. Jamajjeya mapichi sisija daasa biajje poeyani, mapichi sisija ebacua daasa biajje”.

Jamaya yahuajo nei nei Jesosajo tehue ca poa Eyacuiñajjija esohui huohuijjiya.

⁶ Jamajjeya Jesosaa huoojea cajje o shajja'ajjajji po-quinaje. ⁷ Mapichi sisi bacuajji dojo canaje. Daqui ao cuana mapichi sisija bacuaja daasa' biajje iya canaje. Jesosa anisohuaquinaje mapichija bacua sho'i aija daa-sa' biajje. ⁸ Ojjaña cuana ejjachichaqui nequi canaje, quea huiso nee nee. Ojaja daqui ao cuana ejiojji jo-jea-pihui canaje Jesosa ja'ajjequijji. Pea cuaa acui iña jaja-sejja canaje. Huana yiyoyiyo canaje ejiojjiyo. Jama yahuajo nei Jodio cuaa emeshi mese cuana ja'ajjequi caninaje cuiñajji yasijje, jama ja'ajjequimeya acaninaje ohua ba cahuajje. ⁹ Ojjaña ehui dojji poquije, Jesosa quishishijji poquije pea'ai taaaca poquinaje quea bihui nee nee: —E'e Jesosa, emeshi mese Dabi yahuajo ba'e miquea eti-quiana. Mi poeyajo ecua quea bihui nee nee. Quea pame nee nee miya, Jesosa. ¡Eyacuiñajji eya-jo aniya miya caha huana cahua! ¡Eyacuiñajji cabihuia cahua, ojjaña!

¹⁰ Jamajjeya Jesosa Jenosanena huasijje dobiquianajo, ojjaña cuana jomajo ba'e cuajicua jjebenaje jjachicha-quiya, ojjaña. Huohui'ajja canaje: —¿A'ya shai poeje? —poanaje.

¹¹ —Jesosa poeje, Eyacuiñajjija esohui huohuijji nei, ma Nasanenajo ba'enaje —saja'ame acanaje cuaa.

Aquiana quiajji poani Eyacuiñajjija equijo nequi cuana huoojeacuayajea canaje Jesosaa

(Macoso 11.15-19; Noca 19.45-48; Huani 2.13-22)

¹² Quijje pishana Jesosa ojjaña cuana nijje Eyacuiñajji-ja equi yasijje poqui o'oyanaje. Dobiquinaje. Aquiana quiajji poani Eyacuiñajjija equijo nequi cuana huoojea-cuayajea canaje Jesosaa, aquiana jjeshe poequi pea'ai. Aquiana cuana jjahuojjeajjeaqui canaje; bejjo, pea bejjo sosejje quia cani cuanaja bejjo nequijji cuana jea-pajjajea canaje; huia' quiajji pea'aija huia' nequijji cua-na jeabichajea canaje: ¹³ —¡A'a jja oe Eyacuiñajjija equi-jo aquiana quiajji! —tecueame acanaje Jesosaa—. Eyacuiñajjija esohui jama poani ba'a: “Ecuea equi ojjaña cuana enijje emimijji”. Miquianaaya ca ca siipojji ne-quiijji jayojja amee aña Eyacuiñajjija equi.

¹⁴ Majo tii aniya cojjama' cuana, jeo'ajja cuana pea'ai Jesosa que poeyanaje. Ojjaña cuana Jesosaa quea pame nee po mee ca'yonaje. ¹⁵ Jesosaja jjaajjaqui mee'yo cuana quea pame nee ba canaje; esho'iquiana majo tii ani sohuicuayanaje shajja'ajja canaje pea'ai. Jamatii Jodio etii cuana aje oe Jesosa nijje quea quene poanaje. Jesosa Eyacuiñajjija Bacua Ejja pojjeama poso tecuea canaje Moisesija etehue'yo huohuijji poaniya, Eyacui-

ñajji nijje emimijji etii cuaa. Jama poanaje ba'a:

¹⁶ —¿Apiojji acuae jiquio esho'iquiana sohuicuaya meeaña mi bihuiajji? ¿A'a shajja'ajja jjima?

—E'e, shajja'ajjaña —Jesosa poanaje—. ¿A'a miquea ba jjima Eyacuiñajjija esohui etehue'yo ejo? Jama poani ba'a:

“Joya esho'i ai'ai, esho'i jjonajjona ai pea'ai quea pame nee esohui cuaya mee'yojji mi bihuia'yojji”.

Jamaya Eyacuiñajjija esohui yahuajo nei ejo etehue'yo poani —Jesosa poanaje.

¹⁷ Mimi majje Jesosa poquinaje. Jea cana'yonaje. Jenosanenajo ani poquinaje Betania huasijje cahuiya.

Acui etona jjajja jayojja, iquena bajjani sajjai mee ca'yonaje Jesosaa

(Macoso 11.12-14, 20-26)

¹⁸ Mecajjeahua Jenosanena huasijje poe o'oyanaje; quea shoe poanaje Jesosa. ¹⁹ Ba canaje ejiojji sahuajo nequi acui etona jjajja jayojja. Acuijjajja ba'ajjaqui canaje. Chama' poanaje ejjajja. Eña oo pana nequi'yo. Jamajjeya oya Jesosaa huohui canaje: —Jamajjeya jjajjama' tii capo'yahua acui! —Jesosaa jama acajje jjeya nei sajjainana'yonaje acui.

²⁰ Quijje pishana acui esajjai'yo ba majje o shajja'ajjaji cuana jjajjasoquinaje: —¡De! ¡Jjeya nei ca ca sajjai'yonaje! —poanaje.

²¹ —E'e —Jesosa poanaje—. ¡Miya Eyacuiñajjijo quea ja'a nee jjashahuabaquicue! A'a jjashahuabaquijji jama ba'a: “E'e pojja'a Eyacuiñajjija eya shajja'ajja'yo jjima”. Cho, jama jjashahuabaquicue ba'a: “Eyacuiñajjija e'e jojo nei nei eya saja'a caje'yo”. Jamaya miya jjashahuabaquijjo, Eyacuiñajjija miquea esohui saja'a caje. E'e, Eyacuiñajjija e jayojja jama ameesahua caje'yo pea'ai, ma dejjaa ajjima acani.

¿Aya acuae Jesosa huoojea canaje esohui huohuiya?

(Macoso 11.27-33; Noca 20.1-8)

²³ Majoya Jesosa Eyacuiñajjija equi yasijje dobiqui o'oyanaje. Esohui huohui canijo, Jodio etii cuana, Eyacuiñajji nijje emimijji etii cuana pea'ai o que poeyanaje. Jesosa ojaya ba jjimajo huohui'ajja canaje: —¿Aya acuae mi huoojea canaje? ¿Apiojji acuaeya esohui huohuiaña so'o? ¿Apiojji acuaeya aquiana quiajji poani huoojeacuayajeanaje oma mecajje? —acanae Jodio etii cuaa.

²⁴ Jesosaa oya cuana saja'a canaje: —E'e, eyaya miya ebionei huohui'ajjaje. ¿Aya Huani huoojea canaje ona besa meeya? ¿A'a Eyacuiñajjija? ¿A'a dejja cuaa pojja'a? ¡Huohuicue mo! Eyaya majoya huohuije e huoojea'yojji epo.

²⁵ Shajja'ajja majje Jodio cuana ojee mimimiminaje: —¿Yajja saja'ame shai eseya aje so'o, de? Quea mete ojjaña dejja cuanajo. Ojjaña ba cani Huani Eyacuiñajjija huoojea canaje esohui huohuiya. Jamajjeya: “Dejjaa Huani huoojea canaje” eseya ajje se jahuejjajee ca chana' meiya. “Eyacuiñajjija Huani huoojea canaje” eseya ajje aje se oe jama acaje ba'a: “Jamajje, ¿apiojji miyaya Huani shajja'ajja jjima aña?” Jesosaa acaje.

²⁷ Jamajjeya jjashahuabaqui majje Jesosa huohui canaje Jodio cuaa: —Cua'a, de. Ecuanaja ba jjima —anisho canaje.

—Jamajjeya ecuea miya ehuohuijji pojjeama e huoojea'yojji epo —Jesosaa acanae Jodio esohui huohuijji cuana, etii cuana pea'ai.

Esohui ejjashahuabaqui meeji beca ebacua ejjajo

²⁸ Jesosaa oya Jodio cuana huohui canaje pea'ai jama ba'a: —Shajja'ajjacue oe ecue sohui ejjashahuabaqui meeji jama ba'a: Oe dejjaja becanajjiji pea'ai ebacua ejja yaninaje, shacuima' nequi cuana. Ejeajjiya oja bacua ejja etii huohui canaje: “Cha, ¡che oe jjeya que chacoquicue!” ²⁹ “Cho, cajaa. Mijo chaco sa po'yo ajja ca iña” poanaje. Jamatii, jjashahuabaqui majje “Cachacoquiahua” poanaje. Poquinaje que yasijje.

³⁰ —Ejeajjiya oja pea ebacua ejja, echahua mese huohui canaje pea'ai: “Cha, ¡che oe que chacoquicue jjeya!” poanaje. “E'e ecue Chii, jaaya chacoquije aje ca eya” poanaje. Jamatii poqui jjima poanaje, de.

³¹ —Jamajjeya ¿ache esho'i oja chiiya ehuohui jama poanaje? ¿Achajja acuae miña jjashahuabaquiani?

—E'o'i mese —acanae cuaa.

—E'e —Jesosa poanaje—. Eyaya miya e'e nei huohuiaña jama ba'a: Jiquio ecua e'o'i mese jjashahuabaqui majje oja chiiya huohui canaje jayojja jama acanae jama jayojja dejja mimishi cuana, epona pea cojjojji poani pea'ai. Eyacuiñajji nijje jjapeecuajiquiani oja ejaahuanajji. Miquiana ca mi ca oe, cho. Eyacuiñajji nijje jjapeequi jjima. ³² E'e, Huani, ma ona besameeji poa yahuajo nei poeya poa miquiana ba meesahuaa. Huohui ca poa jama ba'a: “¡Miquea mimishijo quea yeno pocue! ¡Mimishi cuana pajea'yocue Eyacuiñajjija esohui jama eba'eji, onijje ejjapeequijji!” Huani poa. Miquianaya aje oe Huani shajja'ajja sa po ajja poanaje. Dejja mimishi cuana, epona quea mimishi cuanaya ca ca shajja'ajja majje: “E'e, ¡Eyacuiñajji nijje ejjapeequi, mimishi cuana ejjapajeequi'yo!” poanaje. Ma ba majje jamatii miquianaya jjashahuabaqui jjima, Eyacuiñajjija esohui jama a sa po ajja tii poanaje —Jesosaa acanae Jodio etii cuana.

Pea esohui ejjashahuabaqui meeji jjonojjajja yiyejo

(Macoso 12.1-12; Noca 20.9-19)

³³ —Jiquio shajja'ajjacue pea esohui ejjashahuabaqui meeji! —Jesosa poanaje—. Oe dejjaa emeshi meseya que quea quemo nee neejo bana canaje jjonojjajja oo pana, uva. Que peeyi canaje meija peeyi. Majoya que yiyesamajo equishipashajji iya canaje, mei cuehue iñaca canaje jjonojjajja na quishipashajjiji. Majoya mei iyasohua ao'ao majje peehuana canaje que jaahuanajji quea huesha nee ojaya ebajji. Pea echacojji cuana iyaa canaje. Huohui canaje emeshi meseya: “¡Ecuea que jaahuanacue! Jaahuana sosejje quiaje'yo oya jjonojjajja quea huiso nee” poanaje. Majoya emeshi mese quea huesha poquinaje. ³⁴ Quijje jjonojjajja jahuajo emeshi meseya pea o chacosahuajji poani beca huoojea canaje que jaahuanajji que, jjonojjajja jje-

quiya. Que jaahuanajji bañaquei majje huohui canaje jama ba'a: "¡Che mo jjonojajja joya ecuea emeshi meseya pa cadojo'yahua, de!" poanaje.

³⁵ —Que jaahuanajji cuana quea mimishi poanaje. Jjonojajja quia sa po ajja, joya emeshi meseja iya tepe mee. Jamajjeya o chacosahuajji cuana iña canaje, cuiajea canaje, pea quecua canaje, pea jajahuejjajea canaje meiya. ³⁶ Emeshi meseja pea huoojea ca o'oyanaje huacuaya o chacosahuajji poani quea huiso pishana. Jamatii yahuajo jama acanaje que jaahuanajji cuaa. Cuiajea ca o'oyanaje pea'ai. ³⁷ Quijje yejje nei oja bacua ejja oe nei huoojea canaje que jaahuanajji baa: "E'e, ohuaya ecuea ebacua ejja shajja'ajja caje" poanaje emeshi mese. ³⁸ Cho, oja bacua ejja poeje ba majje jama poanaje ba'a: "Joya emeshi meseja bacua ejja poeje. Jiquio meshi quijje ojaya poaje, ejeajji mano'ya-jo. ¡Cua'a, ejjaquecuajeaquei oya eque mesena'yoyji! Jamajjeya meshi esejaya tii poaje'yo, de" poanaje que jaahuanajji quea mimishi cuana.

³⁹ —Jamajjeya aje oe ebacua ejja iña canaje, quecua-jea canaje, jeaqui canaje quea huesha nee, que jaahuanajji cuaa. Mahuiso esohui.

⁴⁰ —Jamajjeya emeshi meseja poe o'oya majje ¿yajja acuae acaje'yo jiquio que jaahuanajji quea mimishi cuana? —Jesosaa huohui'ajja canaje Jodio cuana.

⁴¹ —Oya quea quene nee nee poaje'yo. Ma que jaahuanajji quea mimishi cuana quecuajea caje'yo, de. Que cuiña meequi caje'yo pea cuana, joya ojjaña jjonojajja shejo jjasosequiaquijji cuana —acanaje Jodio cuaa.

⁴² —E'e —Jesosa poanaje—. ¿A'a miquea eba Eyacuiñajji esohui etehue'yo yahuajo nei? jama ba'a:

"Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee nequi mee ca poa. Jamajjeya ojjaña ojaya epeeji cuanaa Eyacuiñajji bihuia cani". Jamaya yahuajo nei tehue ca poa ejo; eya ma eyamajjana equi iyajji jayojja jama quea ca'a nee nee nequi —Jesosaa acanaje.

⁴³ —E'e, jiquio esohui eba meesahuajji jayojja jama Eyacuiñajjiya acaje'yo —Jesosa poanaje—. Ohuaya yahuajo nei miquianaya babaca ca'ya poa ojo echaco'yoyji, onijje eba'e tiitii'yoyji. Jjeya ca ca Eyacuiñajjiya miquianaya, Jodio cuana, cajaa acaje'yo shajjama' joya. Pea cuana babaca caje'yo ojo echacojji, onijje eba'e tiitii'yoyji pea'ai, joya e'e jojo nei ojo jjashahuabaquiani.

⁴⁴ —Jiquio ecua eyamajjana cajaa aca poa cuaa jjeya quea ca'a nee nequi jama eya miquianaaya cayaaya anaje; jjeya ca ca iña quea ca'a nee eya nequi'yo. Ojjaña joya e ba jjima e cajaa amajje quea yeno poaje, de. E cajaa tiitii amajje ca ca quea nee nee po tiitii'yo —Jesosa poanaje.

⁴⁵ Jesosaja esohui shajja'ajja majje Moisesija etehue'yo huohuiji cuana, Eyacuiñajji nijje emimijji etii cuana pea'ai quea quene nee poanaje: —¡De! Ecuanajo oya mimiani, equi yamajjanajo pojjeama. Eseyá que jaahuanajji quea mimishi jayojja pea'ai ohuaya acani —poanaje Jodio cuana.

⁴⁶ Jamajjeya Jesosa iña sa acanaje ejeanobiajeajji. Jamatii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajjiya esohui huohuiji nei nei ba cani. Onajaya quea nahue nee nee Jesosa e'iñajji.

Ebacua ejjaja ejjahuanaquijji ojjaña ijja mee'ajja ca poa ejeajjiya
(Noca 14.15-24)

22 Jamajjeya Jesosaa o poe o'oyajji pea esohui ej-jashahuabaquijji huohui canaje Jodio cuana huasijje jama ba'a: ² —Eyacuiñajjiya ojjaña cuana huoojea'yoyji poajo jamaya poaje: Oe emeshi meseja oja bacua ejjaja ejjahuanaquijji bobi quea huiso dahua mee canaje ojaya epeejiya e'ijjiya nisho. ³ Ojjaña apoa poajo, o chacosahuajji huoojea canaje epeeji cuana iyaaa, bobi ijjiya. Cho, poe sa po ajja poanaje. ⁴ Jamajjeya emeshi meseja pea chacosahuajji cuana huoojea canaje. "¡Jamaya acue!" poanaje: "Epeeji, ¡poecuajicue oe! Ojjaña apoa. Ana'ai quea sei quecua meenaje. Bobi cuana apoa, ojjaña. ¡Poecue ecue ebacua ejjaja ejjahuanaquijji quea bihui nee epojji! acue" emeshi mese poanaje.

⁵ —Jamatii jjashajja'ajjaqui ajja poanaje cuana. Poe ajja. Beca cuana que yasijje poquinaje; peaa aquiana quiaa poquinaje; ⁶ pea cuaa emeshi meseja echacosahuajji iña majje cuia canaje, quecua ca'yonaje. ⁷ Ma shajja'ajja majje emeshi mese quea quene poanaje. Sohuinano cuana huoojea canaje dejja shajjama' iña. Quecuajeyo ca'yonaje; equi cuana dahuajea canaje, sohuinano cuaa. ⁸ Majoya emeshi meseja o chacosahuajji iyaa canaje pea cuana: "Ojjaña apoa e'ijjiya ejjahuanaquijji. Pea cuana epeeji nisho poanaje, jamajjeya epoeji pojjeama. Cajaa. ⁹ ¡Poquicue! Quea huesha ba'e cuana iyaaquicue: —¡Poecue emeshi meseja bacua ejjaja ejjahuanaquijji yasijje! ¡Bobi quea huiso ijjiahuacue! —acue" emeshi mese poanaje.

¹⁰ —Jamajjeya poquinaje. Ojjaña cuana iyaa canaje; dejja quea pame, dejja quea mimishi cuanaya. Quea huiso poeyanaje. Dobiquinaje. Equi cuio canaje. Chama' pea e'anijji poanaje. ¹¹ Majoya emeshi meseja ojjaña cuana baa poeyanaje, ojjaña cuana nijje mimiya. Ba canaje oe dejja daqui jehuejji. ¹² "Epeeji, ¿apiojji acuae miya poeyanaje daqui quea jehuejji? ¡Jamaya pojjeama ecue bacua ejjaja ejjahuanaquijji yasijje epoeji!" poanaje. Saja'a jjima ma dejjaja. ¹³ Jamajjeya emeshi mese quea tecue poanaje. Iyaa canaje o chacosahuajji: "¡Oya jeyo majje jeaquicue quea misi nee yasijje! Jomajo pa neineije'yo, ese' ijjaiyajea caje'yo quea nee neejo" poanaje. Mahuiso ecuea esohui —Jesosa poanaje.

¹⁴ —E'e, ojjaña cuana iyaa'ajja caje Eyacuiñajjiya. Jamatii oe pojji dobiquire'yo onijje eba'e tiitii'yoyji —Jesosaa ojjaña cuana acanaje. (E'e, Eyacuiñajjiya Jodio cuana iyaa coo canaje onijje eba'e'yoyji quea bihui nee. Jamatii shajjama' poanaje. Ojaya huoojea'yo quecuajea canaje. Jamajjeya Eyacuiñajjiya Jodio pojjeama iyaa canaje. Quea huiso poeyanaje. Ma dejja daqui jehue ja-

yojja jama beca cuanaja mimishi cuijea'yo jjima. Jama-joya jeacuayajea caje'yo quea nee nee epo'yojji.)

Bejjo oe pojji quia cajji ba'e sosejje emeshi meseja yajji
(Macoso 12.13-17; Noca 20.20-26)

¹⁵ Jesosa mimije shajja'ajja majje Paniseo cuana quea quene poanaje: —Oya Jesosa jashahuabaquiani eseya epeejji nisho jayojja jama, de —poanaje.

Poqui majje ojee mimimiminaje: —Cua'a, Jesosa ejja-dasiaquiqui; esohui quea camaja nee ejjahuhui'ajja-quiqui, ojaya yajja saja'ame ya'yojji. Jamajjeya Moisesija etehue'yo jayojja jama mi saja'a cajo, cacuiajea mee-qui'yahua.

¹⁶ Jamajjeya Paniseo cuaa o shajja'ajjajji cuana, joya Enodeja esohui quea boti nee poani pea'ai huoojja canaje Jesosa que. Huohui'ajja mee canaje jama ba'a: —Esohui huohuijji, miyaya e'e jojo nei huohuiaña Eyacuiñajjiya ejjashahuabaqui'yojji jama. Miya etii cuanajo jashahuabaqui ajja; emeshi mese cuanajo pea'ai met'e'ama. Jamajjeya quea ja'a nee huohuiaña. ¹⁷ E'e. Jamajjeya mo oe che huohuicue: ¿A'a bejjo quia cajji Shomano meshi mese Sesa bajjanija yajji? ¿A'a equiajji pojjeama esejaya pojja'a? ¿A'a cuae jja ma Sesaja meshijo ba'e sosejje quia cajji so'o? —acanjje cuaa.

¹⁸ Ma Jodio cuanaja ejjashahuabaquijji Jesosaja eba poanaje. Jamajjeya: —¡Miquianaya ca mi ca oe e dasiajji nisho cuana, epeejji nisho quea tai nee nee! ¿Apiojji nequiaa eya dasia sa aña? ¹⁹ ¡Bejjo mo huohui'ajjacue esodojjo! —poanaje.

²⁰ ¡Jequi canaje cuaa. Esodojjo ba majje huohui'ajja canaje Jesosaa: —¿Ae ecajja'yo jiquio? ¿Ae bajjani tehume'ya?

²¹ —Emeshi mese ecajja'yo, Sesa bajjani —acanjje Jodio cuaa.

—E'e —poanaje Jesosa—. Jamajjeya ¡Sesaja bejjo quiaquicue ohua sa cajo! ¡Eyacuiñajji a'a pajea'yojji; oya bihuiaque, shajja'ajjacue pea'ai!

²² Jesosa shajja'ajja majje ojjaña cuana quea mete nee poanaje: —¡Quea jashahuabaqui ja'a nee nee oya Jesosa! ¡Jadasia meequi ajja!

Jamajjeya poquinaje, jeana ca'yonaje Paniseo cuaa.

¿A'a e'e jojo nei mano'yo majje shequije o'oya quijje?
—huohui'ajja canaje cuaa Jesosa
(Macoso 12.18-27; Noca 20.27-40)

²³ Ma pojajjo tii beca Sanoseo cuana poeyanaje Jesosa huohui'ajjaa. Sanoseo cuana aje oe jama poani ba'a: —Mano'yo majje jama tii tii; eshequi o'oyajji pojjeama quijje.

Jesosaja ca ca jama sohuihuohuime ajjima. Jamajjeya Jesosa huohui'ajja canaje Sanoseo cuaa; edasiajji nisho jama acanjje ba'a: ²⁴ —Esohui huohuijji, Moisesiya jama tehue ca poa yahuajo nei nei ba'a: “Dejja ejjahuanacui, bacuama' mano'yajo, oja chahuaa ehuanase equijjojea ani cahuana ca'yahua, oja o'ija bacua jea jayojja jama epojji”. ¿A'a e'e? ²⁵ Jamajjeya jama poso ba'a: Quea huiso edoe mese, me oejje pea beca nequia poa. E'o'i mese ebionei jjahuanacui poa epona-

jo. Mano'yonaje bacuama' tii. Oja chahuaa epona equijjojea ani huana ca o'oyanaje, bacuama' tii ani.

²⁶ Oya jayojja mano'yonaje bacuama' tii. Jamajjeya pea echahua meseya huana ca o'oyanaje. Mano'yonaje bacuama' pea'ai. Jamaya ojjaña manojejo'yonaje. ²⁷ Quijje ehuanase pea'ai mano'yonaje. ²⁸ Jamajjeya shequi o'oya majje eyajo, ¿ajea ehuanase epona poaje, ache edoe meseja? Ojjaña echahua cuana huea'ajja'yo epo —Sanoseo cuaa acanjje.

²⁹ Jesosaa saja'a canaje jama ba'a: —Chojja. Jamaya pojjeama. Miquea ba jjima Eyacuiñajjiya esohui; oya quea ca'a nee nee miquea ba jjima pea'ai. ³⁰ E'e, shequi o'oya majje ejjahuanacui'yojji pojjeama. Esohuido-jojji eyajo ani jama poaje. ³¹ Cuanaya ¿a'a miquea ba jjima dejja cuana ojjaña mano'yo majje shequije o'oya? Jamajjeya Eyacuiñajjiya yahuajo nei esohui tehue mee ca poa miquiana jjabahuejjaquijji. Jamaya poa ba'a: ³² “Eya ca ca iña Amajama jaahuanajji, Isaaca, Jacobo pea'ai jaahuanajji”. ¿A'a Eyacuiñajjiya emano'yo cuana meshijo e'ohuajjea jaa jaahuana cani? Cho. Ojaya epeejji cuana eshe nequi, mano'yo majje shequi'yo pea'ai jaahuana cani Eyacuiñajjiya —Jesosaa acanjje.

³³ Jesosaja esohuijo ojjaña cuana quea bihui nee poanaje: —¡Quea pame nee ohuaya Jesosaa huohui cani! —poanaje cuana.

¡Eyacuiñajji quea jea nee acue, mi pejjejo nequi cuana pea'ai!

(Macoso 12.28-34)

³⁴ Majoya Paniseo cuaa shajja'ajja canaje Jesosa quea jashahuabaqui ja'a nee; Sanoseo cuana jadasia mee-qui ajja. Jamajjeya jachichacui majje ojee jashahuabaqui o'oyanaje Jesosa dasiaquijji, esohui quea camaja nee ehuhui'ajjaquijji. ³⁵ Majoya Jesosa que poe o'oyanaje Paniseo cuana. Dasia'yohua nisho Moisesija etehue'yo huohuijjiya huohui'ajja canaje jama ba'a: ³⁶ —Esohui huohuijji, yahuajo Moisesiya tehue ca poa Eyacuiñajjiya esohui. ¿Ache esohui quea pame nee nee e'ajji?

³⁷ Jesosaa acanjje: —E'e, jamaya quea pame nee acue ba'a:

“¡Eyacuiñajji miquea Emeshi Mese nei quea jea nee nee acue! Miquea huapa pojjeama cuana miquea quea jea; ¡quea jea nee neeya oe acue Eyacuiñajji! Jamajjeya ¡jojo jashahuaba tiitiquicue!”

³⁸ Jiquio ehuhui'yo quea pame nee. Pea oya jayojja quea pame nee jama ba'a:

“¡Ojjaña pea cuana quea jea nee acue, miquea huapa pojjeama jama quea jea neeya oe acue!”

⁴⁰ Jamaya miya poajo miya Moisesija etehue'yo jama ba'e; Eyacuiñajjiya esohui huohuijji yahuajo nei ba'ea esohui jama ba'e pea'ai —Jesosa poanaje.

Eyacuiñajjiya huoojja'yo dejja jaahuanajji Quito

(Macoso 12.35-37; Noca 20.41-44)

⁴¹ Jamajjeya ojjaña Paniseo cuana jachichacuijo oya cuana huohui'ajja canaje Jesosaa: ⁴² —¿Yajja huohuime

acuae nequiaa aña Eyacuiñajjija huoojea'yo dejja jaahuanajjijo Quitojo? ¿Ache etiiquianaja osecua oya?

—Quito emeshi mese Dabija osecua, ma yahuajo ba'ya poaja —acanjaje Paniseo cuaa.

⁴³ —Jamajjeya ¿yajjajje acuae Eyacuiñajjija Edojjos-hahua Pameya emeshi mese Dabi jama amee ca poa yahuajo ba'a: “Eyacuiñajjija huoojea'yo ojjaña jaahuanajji Quito ecuea Emeshi Mese nei”? Yahuajo nei Dabiya jama huohui ca poa pea'ai ba'a:

⁴⁴ “Eyacuiñajjija ecuea Emeshi Mese Quito jama aca poa: —iEnijje anioquecue ebiane miijije ojjaña cuana huoojea'yojji! Eyaya mi quecuajji nisho epo jeabichajea jeyojeyoje'yo”.

Jamaya huohui ca poa yahuajo Dabiya ojo. ⁴⁵ E'e, Dabiya Eyacuiñajjija huoojea'yo Quito aca poa “Ecuea Emeshi Mese”. Jamajjeya Quito Dabiya Emeshi Mese nei poani. Jamatii oya Dabiya osecua pea'ai, de —Jesosaa acanjaje—. Eya, Eyacuiñajjija huoojea'yo, dejjaja jea pojjeama; Eyacuiñajjija Bacua Eja. Jamajjeya eya ojjaña Emechi Mese nei.

⁴⁶ Jesosa mimije shajja'ajja majje Paniseo cuana quea mete poanjaje. Jeca poanjaje, mimima'yo aninaje; huohui'ajja beca'yo jjima tii acanjaje.

—iA'a Jodio esohui huohuijji jama ba'ejji! —Jesosa poanjaje

(Macoso 12.38-40; Noca 11.37-54, 20.45-47)

23 Majoya Jesosaa ojjaña cuana, o shajja'ajjajji cuana pea'ai huohui canaje jama ba'a: ² —Moisesija etehue'yo huohuijji, Paniseo cuana pea'ai miquea esohui huohuijji. ³ Jamajjeya jaya cuana shajja'ajjacue! jOjaya esohui jayojja jama acue ojjaña! Jamatii oya cuana aje oe esohui jama ba'e ajja; quea mimishi. Jamajjeya ja'a o jayojja ba'ejji! —poanjaje—. ⁴ E'e, jamaya poani ba'a: Dejjaa aquiana quea biquie abo mee cani pea dejja. Jamatii huanasohua sahua ajja, de, quea mimishiya jjejojo. O jayojja Jodio esohui huohuijjiya pea cuana ba'e meesahua ajja Eyacuiñajjija etehue'yo jama —Jesosa poanjaje.

⁵ —Quea pame poso oya jjabaquiani onaja ebihuijji: “E'e de, oya esohui huohuijji quea pame nee” epo meeji acani. Jamajjeya esohui etehue'yo quea quemo jjasapahuahuo iyaquiani, aa huahuo pea'ai ojjañaja ebajji. Daqui quea pame nee nee, quea ao nee huosho cani ojjañaja ebajji pea'ai. ⁶ Ojee ijja'ijjianijo, emeshi mese pejejo anioqueani ebionei ijja sa poanijo. Jodioja equi ojee ejjachichaquijjijo pea'ai ebionei anioque sa poani Eyacuiñajjija esohui huohuijji pejejo, ojjaña nijje emimimimijji. “E'e, oya cuana Eyacuiñajjija esohui huohuijji nei quea pame nee” epo meeji acani. ⁷ Ejojijije poquiani ojjaña aquiana quia cani yasijje anicuaa, pea cuaa jama bihuia cani ba'a: “Esohui huohuijji, miya quea pame nee nee.” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee poso jjabaquiani —Jesosa poanjaje.

⁸ Jamajjeya o shajja'ajjajji cuana Jesosaa acanjaje pea'ai jama ba'a: —iA'a miquianaya o jayojja jama pojji! Pea cuana a'a jjabihuia meequijji: “iMiya esohui

huohuijji quea pame nee nee!” a'a jjapo meequijji cuana. Cho. Miquea Esohui Huohuijji quea pame nee oe nei yani, miquea Emeshi Mese nei. Miquianaya ecuea epeeji cuana ca ca Eyacuiñajjija ba cani pea epeeji jayojjaya. ⁹ Oe nei eyajo ani eseja Chii. Jamajjeya jesohui huohuijji oya jayojja “Esejaya Chii” a'a ajji! ¹⁰ Cuanaya Eyacuiñajjija huoojea'yo ojjaña jaahuanajji, Quito miquiana huoojea'yojji nei nei. Jamajjeya pea cuana “ese huoojea'yojji nei” a'a jjapo meequijji. ¹¹ E'e, jemeschi mese jayojja jama nequi sa poani ca ca pea cuana chacosahuacue! ¹² Jamajjeya joya emeshi mese poso jjabaquiani Eyacuiñajjija emeshi mese pojjeama acaje'yo. Echacosahuajji jjabaquiani ca ca Eyacuiñajjija emeshi mese jayojja po mee caje'yo —jamaya acanjaje Jesosaa o shajja'ajjajji cuana.

Jesosaa Jodio etii cuana tecuea canaje

¹³ Majoya Jesosaa Paniseo cuana, Moisesija etehue'yo huohuijji poani pea'ai jama tecueame acanjaje ba'a: —Miquianaaya aje oe Moisesija etehue'yo huohuiaña, Jodioja esohui huohuijji poaniya pea'ai. Jamatii miya ca mi ca oe esohui huohuijji nisho, sijjepojji. E'e, miquianaya Eyacuiñajji nijje jjapeequi ajja. Pea cuana Eyacuiñajji nijje jjapeequi sa poani miyaya jjapeequipajea meeyaña, de. E'e, jiquio ecua esecue ca'a cani cuaa ona edobiqui poani jjejojo jama jayojja miquiaaya pea cuana dobiqui mee ajja eyahuasijje Eyacuiñajji nijje eba'e tiitii'yojji. Jamajjeya miquianaya quea nee nee po mee caje'yo quijje, quea nee nee tii tii, de —Jesosa poanjaje.

¹⁴ —E'e, miquianaya ca ca oe e'ahuemanoja equi cuana jjesheaña sosema'. Majoya Eyacuiñajji nijje mimi nishoani quea huiso nee. Jamajjeya Eyacuiñajjija miquianaya cajaa acaje'yo. Quea nee nee po mee caje'yo tii tii —Jesosa poanjaje.

¹⁵ —Jodioja esohui huohuijji cuana, Moisesija etehue'yo huohuijji cuana pea'ai, miquianaya aje oe esohui huohuijji nisho, peajja. Miquianaaya chaco nei-neiaña; quea huesha poquiani pea'ai pea cuana Moisesija etehue'yo shajja'ajja meeya. Jamatii mi shajja'ajjajji cuana mi jayojja quea mimishi nee nee. Jamajjeya oya cuana e'e jojo nei quea nee nee po mee caje'yo, mi jayojjaya —Jesosa poanjaje.

¹⁶ —E'e, miquianajaya ehuohui quea quehuajo cojjama' jama poani. Cojjama' cuana pea cojjama' cuaa me iña majje mepejejea cani jayojja. Ojjaña poquiquehua-je'yo —Jesosa poanjaje—. Miquea ehuohui jama ba'a: “Eyacuiñajjija equi nequianijo, ecuea ehuohui jama eyaya e'e jojo nei aje”. Pea cuana jama poani ba'a: “Chojja, jamaya mimi majje miquea ehuohui jama e'ajji pojjeama”. Jamaya huohui cani cuaa pea'ai ba'a: “Ma mei huo'o Eyacuiñajjija equijo anijo, ecuea ehuohui'yo jayojja jama eyaya aje”. “E'e, jamaya mimi majje miquea ehuohui jayojja jama e'e jojo nei acue!” pea cuana poani. Jamaya mimi quehuani miquianaya —Jesosa poanjaje.

¹⁷ Oya cuana tecuea canaje jama pea'ai ba'a: —Chojja, de. Miquianaya jjashahuaba quehuauquiani. Mei

huo'o Eyacuiñajjija equijo quea pame ani; Eyacuiñajjija equi quea pame nee pea'ai. ¹⁸ Miquianajaya pea ehuohui quea quehua pea'ai jama ba'a: "Mei ehuana huicha'a huicha'a pea mei biajje yani Eyacuiñajjija equijo aquiana dahuajji, Eyacuiñajji bihuiajji. Ma mei e'ia cuana nequianijo, eyaya ecuea ehuohui jayojja jama e'e jojo nei aje" amajje, dejja ojaya ehuohui jama e'ajji pojjeama, miquianaya poani. Jiquio jama poani ba'a: Aquiana mei e'ia biajje huana cani cuaa. Majoya jama mimiani ba'a: "Ma aquiana mei e'ia biajje yanijo, ecuea ehuohui jayojja jama eyaya aje". "E'e, ¡Jamaya mimi majje ca ca miquea ehuohui jayojja jama e'e jojo nei acue!" ¡Miquianaya jamaya mimi quehua'ani cuana! ¹⁹ ¡Ma ehuohui'yo cajaan! —Jesosa poanaje—. Mei e'ia quea pame nee; aquiana mei e'ia biajje ani quea pame pea'ai. Pea jayojjaya. ²⁰ Jamajjeya dejja mei e'ia-ajo mimianijo oya ojjaña aquiana mei e'ia biajjejo mimiani pea'ai. Pea jayojjaya poani. ¡Jamaya a'a mimijji ma aquiana cuanajo! —Jesosa poanaje. ²¹ —Miquianaya Eyacuiñajjija equi yasijje mimiani cuana jama ba'a: "Eyaya ecuea ehuohui'yo jayojja jama e'e jojo nei aje Eyacuiñajjija equi yanijo". Jamaya aje oe miya mimiani Eyacuiñajjijo, ma equijo ba'yanijo pea'ai. Jamajjeya ¡Eyacuiñajjija equi yasijje a'a jama mimijji! ²² Pea cuana mimianijo eyahuasijje jama poani ba'a: "Eyajo Eyacuiñajjija eba'ejji yanijo eyaya ecuea ehuohui'yo jayojja jama e'e jojo nei aje. Ecuea esohui e'e nei pojjeama jój-jemo eya quea nee capohua". Jamaya amajje miya Eyacuiñajjija eba'ejjijo mimiani; "Eyacuiñajji eyajo aniya eya ba canijo, eyaya ecuea ehuohui'yo jayojja jama e'e jojo nei aje". "Ecuea ehuohui'yo jayojja jama ajjima jój-jemo eya quea nee po mee ca'yome" beshahua nei aña; oya jayojjaya. Jamajjeya ¡a'a jamaya mimijji Eyacuiñajjijo; quea tai! —Jesosa poanaje.

²³ Majoya Jesosaa Moisesija etehue'yo huohuijji cuana, Paniseo cuana pea'ai jama tecueame acanaje ba'a: —Miquea aquiana bobi quea johua e'ajji equi pejjejo pohuani. Tiiyajo quiaña iye huiso Eyacuiñajjija epojji, ojaya ehuohui'yo jayojja jama poani:

"Miquianajaya aquiana ipiacue; ome miji pea'ai, 10 oya jayojjaya, oe Eyacuiñajjija epojji, pea me oejje ebeca pee pea'ai, 9 miquea epojji". Eyacuiñajji yahuajo nei jamaya poa. Jamaya miya poani. Quea pame. Jamatii de, Moisesija etehue'yojo quea ja'a jjashahuaba tiitiiqui ajja. Jamaya quea tai aña ba'a: Miya e'e jojo nei jjashahuabaqui jjima, siajje poani, jjashahuabaqui ajja aema' cuana ba'e meesahuajji. Eyacuiñajjija esohui jayojja jama po tiitii ajja. Jamajjeya ¡Eyacuiñajjija etehue'yo jama ba'ecue! ¡Majoya Eyacuiñajji yasijje iye huiso quiacue ojjaña miquea aquiana pea'ai! —Jesosa poanaje.

²⁴ —Miquianaya cojjama' jama; jjashahuabaqui ajja pea'ai. ¿A'a huashapa bobijo anidobiquiajo jeajea'aña, jamatii aquiana quea quemo anidobiquiajo ijjiajeaña? Jamaya miya poani; ojjaña miquea aquiana quea biso pea'ai ipia'ajja majje iye huiso quiaña Eyacuiñajjija epojji. Jamatii pea cuana ba'e meesahua ajja, de. Jama-

jaya Eyacuiñajjija miquianaya cajaa acaje'yo; quea nee nee po mee caje'yo —Jesosa poanaje.

²⁵ —E'e Paniseo cuana, miquianaya Moisesija etehue'yo huohuijji pea'ai. Jamatii miquianaya ca ca oe esohui huohuijji nisho de, quea tai. ¿A'a caneco cueehue topo cani cuaa ena ishi jjimahuaajo, jamatii eyiyedojojje quea ihui shacua jjima? Jamaya miya. Jjabaquiani quea pame jayojja. Jamatii quea jjashahuabaqui tai nee; sii poani; epona, onaja aquiana jea baña pea'ai. ²⁶ Paniseo cuana, miquianaya aje oe quea jjashahuabaqui quehua. Jamajjeya Eyacuiñajjija miquianaya cajaa acaje'yo; quea nee nee po mee caje'yo, de. ¿A'a caneco yiyedojojje ebionei topo cani cuaa? Jamajjeya e'e jojo nei quea pame nee. ¡Caneco topo cani jayojja jama acue miquiaaya; ebionei jjashahuabaqui tai pajea'yocue e'e jojo nei quea pame epojji! —Jesosa poanaje.

²⁷ —Paniseo cuana, Moisesija etehue'yo huohuijji pea'ai, miquianaya esohui huohuijji nisho de, quea mimishi. Emano mojea'yojji cuia'asha cani cuaa quea pame jayojja. Jamatii eyiyedojojje quea ihui, emano'yo sajaajji. ²⁸ Emano'yo mojea'yojji jayojja jama miquianaya cuana; quea pame jayojja ojjaña ba cani; jamatii quea jjashahuabaqui tai. Shajjama', quea pame po nishoani pea'ai. Jamajjeya Eyacuiñajjija miquianaya cajaa acaje'yo; quea nee nee po mee caje'yo —Jesosa poanaje.

²⁹ —Moisesija etehue'yo huohuijji, Paniseo cuana pea'ai, miquianaya aje oe esohui huohuijji nisho, quea mase. Jamajjeya Eyacuiñajjija miquianaya quea nee nee po mee caje'yo. E'e, miquianaya emano sajaajji mo'yaña, quea pame a'yaña ma Eyacuiñajjija esohui huohuijji yahuajo mojea jaa. Esajaajji cuia'asha'aña quea pame nee Eyacuiñajjija epeejji nei yahuajo emano'yo bihuia'yojji —Jesosa poanaje—. ³⁰ Siajje miya poani jama ba'a: "Yahuajo ecuanaja etiiquiana cuana nijje eba'e'yo jój-jemo ecuanaja ca ca oe Eyacuiñajjija esohui huohuijji cuana ecuiajea'yojji pojjeama poquea-ye. Chama' ecuanaja ejjashahuabaqui etiiquiana jama; ecuanaja ca ca pea" miquianaya poani —Jesosa poanaje—. ³¹ Chojja. Jamaya miquianaya po nishoani. Jamatii miquianajaya etiiquiana jama Eyacuiñajjija esohui huohuijji quecuajji nei nei pea'ai. ³² Jamajjeya o jayojja jama poani quiana; Eyacuiñajjija huoojea'yo cuana cuiajea jeyojeyoje'yo, de —Jesosa poanaje—. ³³ Miquianaya peyo quea se nee nee jama de, quea mase nee nee, esohui huohuijji quecuajji, miquea etiiquiana cuana jama. Jamajjeya ¿a'a acuae nequiana Eyacuiñajjijo jjanequiquehuaquiijji? Chojja. E'e jojo nei ohuaya miya huohui caje'yo: "¡Poquicue nequiana! ¡Cuaqui yasijje dobiquicue! ¡Quea mase nee nee aje oe nequiana!" —Jesosa poanaje.

³⁴ —Jamajjeya eyaya miquiana huasijje huoojeaña Eyacuiñajjija esohui huohuijji, esohui bameesahuajji, dejja quea jjashahuabaqui ja'a nee pea'ai. Jamatii beca cuana cuiajeaje'yo; pea cuana acui ecueata'apeejo me cacajeaje'yo; pea cuana cuiasejjajeaje'yo miquea equi ojee ejjachichaquijji yasijje; pea cuana ocuenaje'yo oj-

jaña cuiñajji yasijje equecua'yojji, miqianaaya —Jesosa poanaje—. ³⁵ E'e Jodio cuana, miquea etiiquiana cuaa dejja mimishi'ama quecuajea ca'yonaje quea hui-so. Eyacuiñajjija etehue'yo ebionei tehue ca poa jama ba'a: Abeni cuiahuejjajea ca poa miquea etiiquiana Cainiya. Oya jayojja quea huiso cuiajea ca poa cuaa. Quijje nei Eyacuiñajjija etehue'yo quijje yejje nei tehue ca poa oja sohui huohuijji Sacania, Benequijaja bacua ejja cuiahuejjajea ca poa cuaa Eyacuiñajjija equijo, aquiana dahuaejajji pejjejo —Jesosa poanaje—. ³⁶ Jamajjeya eyaya miya e'e jojo nei huohuiaña: Jjeya nei apoa poaje; Eyacuiñajjija miqiana cuana quea nee nee po mee caje'yo ojjaña miquea etiiquianaja mimishi cuanajo, o jayojja jama miqianaya poani jojoya.

Jamaya Jesosaa Jodio cuana tecuea canaje quea mimishi nee jojoya.

Jesosa quea yeno poanaje ojjaña Jenosanenajo ba'e cuanajo
(Noca 13.34-35)

³⁷ Majoya Jesosa quea yeno nee nee ojjaña cuana Jenosanenajo ba'e cuanajo jama poanaje ba'a: —Jodio cuana Jenosanenajo ba'e, miqiana cuana ecuea quea jea nee nee. Jamajjeya eya miqianajo quea yeno poani. E'e, miqianaaya aje oe Eyacuiñajjija esohui huohuijji quecuajea'ya poa; ojaya huoojja'yo jajahuejjajea'ya poa meiya pea'ai. ¡Bacue oe! Cachina enaese-ya ebacua huojje cani ejaahuanajji jama jayojja eyaya miqiana iyaa sa neineiaña e que, ejaahuanajji. Jamatii enijje jjapeequi sa po ajja. Cajaa aña jama ba'a: "Chojja, Eyacuiñajjija miya huoojja jjima ojjaña jaahuanajji". ³⁸ Jamajjeya ¡bacue! —Jesosa poanaje—, Eyacuiñajjija miqianaya cajaa acaje'yo. Jeaaja caje'yo ejaahuana majajji pojjeama. ³⁹ E'e, eya jiquiojo tii nequi tii ajja. Jamajjeya eya miqianajaya ba o'oya jjima poaje e poe o'oya jjimahuajo. Quijje e poe o'oyajo ca nequiana ca oe jama poaje ba'a: "Jesosa miya Eyacuiñajjija huoojja'yo ojjaña jaahuanajji. ¡Eyacuiñajjija miya cajaanahua cahua quea pame!" poaje miqianaya quijje —Jesosa poanaje Jenosanenajo ba'e cuana nijje.

—Eyacuiñajjija equi cajjajea caje'yo cuaa mei cuana —Jesosa poanaje
(Macoso 13.1-2; Noca 21.5-6)

24 Jesosa Eyacuiñajjija equijo ani poquinaje. Poquijeya o shajja'ajjajji cuaa oya huohui canaje: —¡Bacue Eyacuiñajjija equi! Quea quemmo, quea pame mei cuana.
² —E'e. ¿A'a jiquio equi quea pame nee baña? E'e jojo nei quijje mei cuana cajjajea caje'yo cuaa. Chama'yo tii acaje'yo —Jesosa poanaje.

Dejja cuana quea mase nee poaje quijje
(Macoso 13.3-13; Noca 21.7-19)

³ Quijje Jesosa eyiyo huasijje Onimo acui yiye yasijje jaasohuaquinaje o shajja'ajjajji cuana nijje. Anioquena-je. Pea dejja poqui jjima. Jamajjeya o shajja'ajjajji cuaa huohui'ajja canaje: —Jesosa, ¿ache shono acuae mei

cuana cajjajea caje'yo cuaa so'o? ¿Ae acuae poaje mi epoe o'oya cuahuajje? ¿A'ya ba majje ecuanaja eba poaje miya poeje o'oya, meshi chama'yo tii epojjijo?

⁴ Jesosaa saja'a canaje: —¡Jashahuaba neineiquicue onajaya miya edasiajji pojjeama! ⁵ Quea huiso siajje-pojji poeje, ecuea ehoojja'yo pojjeama: "Eyacuiñajjija eya huoojja canaje, eya ca ca iña ojjaña jaahuanajji" siajje poaje. Quea huiso dasia caje'yo. ⁶ "Ojjaña jjaquecuaquiani ojjaña meshi yasijje" huohui caje peaaya pea'ai. Jamatii ¡a'a quea mete pojji! Jamaya poaje. Jamatii apoa pojjeama, oe po ajja jjima poaje so'o —Jesosa poanaje—. ⁷ E'e, jjaquecuaqui caje'yo cuana ojjaña meshi yasijje, ojjaña cuiñajji yasijje pea'ai. Quea huiso emanomeejjija mano mee caje'yo; bobi yasijje po majje manojje'yo quea huiso; meshi huehuahuehuajje ojjaña meshi yasijje pea'ai —Jesosa poanaje—. ⁸ E'e, jiquio ecua epona bacua cuayaje ebionei jjapashineijje nee'ani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

⁹ —Majoya pea cuaa miqianaya iña majje jeanobia-jea caje'yo ecuiasejjajjajji, equecua'yojji pea'ai. Enijje jjapeequianajo miqianaya boti'ama nei poaje ojjaña meshijo ba'e cuanaja. ¹⁰ Jamajjeya quea huiso enijje jja-peepajeaqui'yo majje mimishi aje o'oya. Peaja epeejjija boti'ama poaje'yo —Jesosa poanaje—. Jamajjeya dejja mase iña mee caje'yo equecua'yojji. ¹¹ Quea huiso pea cuana poeje: "Eya Eyacuiñajjija esohui huohuijji" siajje poaje. Cho, Eyacuiñajjija pojjeama. Jamatii, ecuea epeejji dasia caje'yo quea huiso. Poquiquehua mee caje'yo eshahua nijje. ¹² Dejja cuana shajjama' jayojja po majje emeshi mese cuana shajja'ajja sa po ajja poaje'yo. Jamajjeya pea cuana boti'ama poaje'yo. ¹³ Jamatii e poe o'oya jjimahuajo, enijje jjapeequi pajea'yo ajja tii ca ca Eyacuiñajji nijje ba'e tiitije'yo, enijje pea'ai —Jesosa poanaje.

¹⁴ —Eya poeje o'oya. Eyacuiñajji nijje ojjaña cuanaja Emeshi Mese nei poaje'yo. Ma ehohui'yo quea pame nee ojjaña meshi cuana huasijje huohui caje, ojjaña dejja cuana huasijje pea'ai ojjañaja eshajja'ajjajji. Majoya e poe o'oyajo ojjaña oe poaje —Jesosa poanaje.

Aquiana quea tai nee ojjaña quea mete nee nee epo meejji

(Macoso 13.14-23; Noca 21.20-24, 17.22-24)

¹⁵ —Eyacuiñajjija esohui huohuijji Dañeniya yahuaajo nei huohui ca poa jama ba'a: "Quijje Eyacuiñajjija equijo nequije aquiana quea tai nee nee, ojjaña quea mete nee nee epo meejji". ¹⁶ Jamajjeya ma ba majje ca ca, ma pojjaajo tii ojjaña Jodio meshijo ba'e capoquicuaajahua eyiyo cuana huasijje. (Jiquio ehohui'yojo cajjashahuabaquiahua quea ja'a epojji.) ¹⁷ ¡Joya equi huisa biajje chacochoani a'a equi yasijje dobiquinanajji aquiana cuana biohua edojjiji! ¹⁸ ¡Joya quejo chacochoqui pea'ai a'a equi yasijje poquinanajji daqui moojo! Eyiyo huasijje poquicuaaji ajja aje oe mano'yo chana'. ¹⁹ Epona cuana o'ejji, ba-

cua sho'ijji pea'ai quea yeno poaje; quea camaja equehua poquicuaajijji poaje. ²⁰ Jamajjeya Eyacuiñajji nijje mimicue jama ba'a: "Eyacuiñajji, ieenajo pojjeama capoahua, epojja ejomishocajijji pojjeama pea'ai ecuanaja epoquijji eyiyo cuana huasijje!" acue —Jesosa poanaje—. ²¹ E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma pojja cuanajo ca ca quea nee nee poaje dejja cuana —Jesosa poanaje.

²² —Eyacuiñajjiya oe pojji cahuime quea camaja po mee caje'yo; oe pojji cahuime epo'yo jojjemo ojjaña cuana mano'yome. Ojaya epeeji jaahuana canijo, ojaya quea nahue nee emano jeyoje'yo'yojji, Eyacuiñajjiya oe pojji cahuijo quea camaja po mee caje'yo, quea cahui huiso pojjeama —Jesosa poanaje.

²³ —Ma pojja cuanajo a'a jjashajja'ajjaquijji ona siajje poajo jama ba'a: "¡Bacue oe, Eyacuiñajji huojea'yo Quito jiquiacua poe'yonaje!" jama poso, ¡a'a shajja'aj-jajji! "¡Bacue oe, Quito jocuama pa poe'yonaje!" jama onaa acajje ¡a'a jjashajja'ajjaquijji, a'a poquijji! ²⁴ E'e, Eyacuiñajji huojea'yo ojjaña jaahuanajji e jayojja nisho, Eyacuiñajji esohui huohuijji nisho pea'ai poeje quea huiso nee nee. Ohuaya ma pea dejjaa ajjima acani acaje'yo Eyacuiñajji epeeji cuana dasia'yojji nisho. Dasia caje'yo quea huiso nee; ecuea epeeji nei pea'ai beshahua nei eya pajea mee caje'yo o jayojja epojji; chojja, jjadasia meequi ajja. ²⁵ E shajja'ajjajji cuana, eyaya miya huohuinaje quijje oya poeje ejjadasiaqui'yojji. ¡A'a oya cuana shajja'ajjajji! —Jesosa poanaje.

²⁶ —Jamajjeya a'a jjashajja'ajjaquijji onaa miya siajje acajje jama ba'a: "¡Baquicue oe, Quito jocuama hue-nihueni aijo nequi!" jama acajje ¡a'a baquijji! "¡Bacue oe, Quito equi equecuayijji dojjojo ejja'aniquehuaqui ani!" acajje ¡a'a jjashajja'ajjaquijji; a'a o que dobiqijji! ²⁷ Cho, shajja'ajjacue ecue sohui: ¿A'a joya e'ihuijaa huasijje be'o cuana cuabesajebeje? E'e jojo nei miquianaaya eya baje joya ecua be'o e'ihui yasijje oqueani jama. Cuanaya pojjeje nei nei poajo jeaja'a cani eyajo; ojjaña ba caje quea huesha nee. Jamaya eya ojjañaja Edoe Mese poeje o'oya, pojjeje jama. Jeaja'ajeajebeje. Eya ojjaña ba caje'yo. Quehuajje pojjeama eya poeje'yo —Jesosa poanaje.

Jesosa ojjañaja Edoe Mese poeje o'oya

(Macoso 13.24-37; Noca 21.25-28)

²⁹ —E'e, quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. Majameta cuana jjacajjaqui'yo majje jijijijioqueje'yo ojjaña pea'ai. Majameta nequijji cuana huehuahuehuaje'yo janobajjima nei pea'ai.

³⁰ —Majoya miquianaaya baje aquiana eyajo. Ma ba majje huohuije jama ba'a: "¡E'e jojo nei Jesosa Quito ojjañaja Edoe Mese jjeyahua nei poeje o'oya, de!" poaje.

—Jamajjeya ojjaña cuana ojjaña meshijo ba'e quea mete nee nee poaje'yo. Ecuea epeeji pojjeama siasiaje jama ba'a: "Coya aje oe ¿ae shai poeje ba'a? ¡Bacue, oj-

jañaja Edoe Mese Jesosa Quito poeje o'oya bo biajje! Oya oe nei quea ca'a nee nee, quea sohui poja nee nee. Quea jeajahua nee nee pea'ai. Esohuidojojji quea ca'a nee onijje poeje quea huiso nee nee" poaje cuana —Jesosa poanaje—. ³¹ Esohuidojojji quea ca'aa aquiana eshe'ana ai jayojja mia cajo, eyaya esohuidojojji cuana huoojeaje'yo biacua, macua huasijje pea'ai ojjaña ecuea epeeji cuana jjequiya —Jesosa poanaje.

Esohui acuijo, iquenajo, huohui canaje Jesosaa

(Macoso 13.18; Noca 21.29-33)

³² Jesosaa huohui canaje pea esohui jama ba'a: —E'e, eyaya miquianaya esohui ejjashahuabaqui meeji huohuije iquena acuijo. Eseyaya meshijo acui iña'yani ba majje eseya jama poani ba'a: "E'e nei, nayaja po'yonaje. Jjeya eshequiaja po pajea'yonaje". ³³ —Jamaya eshequi, ba'i quea misi, majameta eyajo jijijijioque'ani ba majje pea'ai quea bihui jjashahuabaquicue jama ba'a: "E'e, jjeya nei apoa poaje. ¡Jjeyahua nei eseyaya Emeshi Mese nei Jesosa Quito poeje o'oya!"

³⁴ —E'e jojo nei ojjaña ma pojja cuanajo ba'e cuana mano jeyoje'yo jjimahuajo ojjaña apoa poaje'yo; eya ojjañaja Emeshi Mese oe nequije'yo. ³⁵ E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yojji pojjeama; shajja'ajja tiitii caje'yo cuaa —Jesosa poanaje—. ³⁶ ¿Ache shono shai jamaya poaje, ojjaña apoa poaje'yo? Dejja cuanaja ba jjima; esohuidojojji cuanaja ba jjima pea'ai; ecuea ehuhuijji pojjeama. Ecue Chiija eba ojaye nei. Ohuaye nei huohui caje'yo ojjaña apoa epo'yojji —Jesosa poanaje.

¡Jesosa poe o'oyajji jja'ishoa'ajjaqui anicue!

(Noca 17.26-30, 34-36)

³⁷ —Yahuajo nei nei dejja Noe bajjani nequia poa. Noe enequiahuaajo ojjaña cuana quea mimishi poa. Quijje eya ojjañaja Edoe Mese poe o'oyajo, ojjaña cuana quea mimishi poaje o'oya, yahuajo nei nei jayojjaya poaje o'oya. ³⁸ Yahuajo ojjaña meshi ohua jjimahuajo jamatii dejja cuana ijja'ijjia ania poa. Ishi'ishi nequia poa pea'ai. Jjahuanaqui nequia poa. Jamaya poanaje Noe bishe ai yasijje dobiqui jjimahuajo. ³⁹ Ona ojjaña jjashahuabaqui jjima anijo ena quea quemo poa. Jjayequea poa; johui oquea poa; hui'i ca'ya poa. Jamaya poaje o'oya eya ojjañaja Edoe Mese epoe o'oya cuahuajo: jjashahuabaquije cuana jama ba'a: "Jamatii ecua quea pame nequi". Ojjañaja ba jjima meshi ojjaña tii chama'yo tii poaje'yo. ⁴⁰ E'e, e poe o'oyajo beca dejja nequije quejo. Oe dojosohuaqui caje'yo; pea jea canaje'yo. ⁴¹ Beca epona quecuapasha pashaqui, oe dojosohuaqui caje'yo; pea jea canaje'yo, Eyacuiñajjiya —Jesosa poanaje—. ⁴² ¡Jamajjeya jjashahuabaqui tiitii anicue! Ache pojja Emeshi Meseja epoe o'oyajji miquea ebajji pojjeama. ⁴³ Jiquio jama poaje ba'a: Equi mese siipojji ache shono poeje poso jjabaquiani. Ojaya eba jojjemo ohuaya ishoa ca'anime, equi jaahuanajjiya. ⁴⁴ Eya miquianajaya Edoe Mese ache pojja mi-

quiانا que poeje o'oya ebajo ese. Jamajjeya ijja'isho'a'ajjaqui anicue! —Jesosa poanaje.

Pea echacomeeji quea pame nee poanaje

(Noca 12.41-48)

⁴⁵ —Ecuea esohui shajja'ajjacue echacomeeji cuana-jo jama ba'a: Equi ai meseya poqui jjimahuaa echacomeeji iyaa canaje. Huoojea canaje: “¡Ecuea equi cuiña-cue, miyaya! ¡Ecuea pea echacoji cuana oe bobiacue pea'ai! Quijje eya poeje o'oya”.

⁴⁶ —Equi mese poe'yo majje ojjaña quea pame nee ba caña'ya poa; quea bihui nee poña'ya poa. Jamajjeya echacomeeji quea bihui nee poanaje. ⁴⁷ Jamajjeya equi meseya echacomeeji quea pame huoojea caje'yo ojjaña ojaya aquiana cuiña. ⁴⁸ Pea echacomeeji siipoji ca ca jjashahuaba taiquiani jama ba'a: “Equi mese poquinaje quea huesha nee. Quijje nei nei poeje'yo”. ⁴⁹ Quea tecueya jjejojo ohuaya echacoji cuana cuia cani. Pea cuana nijje ishi'ishiani, huooani. Apoa pojjeama nequi. ⁵⁰ Equi mese ache pojjajo epoeje'yo poso acani. Jamajjeya equi mese quehua poeje'yo. ⁵¹ Ojaya equi cuiñajji poani ehoo jaa baña'yo majje tecuea cañaje'yo. Jea-cuayajea cañaje'yo ojjaña quea mimishi poani nijje. Jomajo quea nee nee poaje'yo tii tii; ese' ijjiyajjea caje'yo quea neeje —Jesosa poanaje—. Jiquio ecua equi meseya ojaya equi cuiñajji shajjama' tecueajea majje jea-cuayajea caña'yonaje jayojja jamaya eyaya aje'yo ojjaña ejo ishoa'ajja, poe o'oya majje —Jesosa poanaje.

Epona sho'i cuana poquinaje pea epona sho'i jjahueaqueiquei baa

25 —¡Pea esohui shajja'ajjacue Eyacuiñajji ojjañaja Emeshi Mese oe nei poajejo! Jiquio jayojja jama poaje ba'a: Epona sho'i ahuema'ani ome miji pea'ai huisome, 10 poa. Ma jjahueaqueiquei baa cuaquijji do-jo canaje. ² Me oeje epona jjashahuabaquinaje. Pea me oeje jjashahuabaqui jjima. ³ Joya jjashahuabaqui jjimaa cuaquijji do-jo canaje; jamatii esei do-jo jjima eji-jiji, de. ⁴ Pea jjashahuabaqui majje cuaquijji do-jo canaje esejji. Tahuoojo do-jo canaje pea'ai ejiijji.

⁵ —Epona sho'i cuana quea cojja jee mano po majje cahuinaje. Shacuima' nequi mecashono poeyanaje. ⁶ Jamajjeya mecashono pea equi yasijje poe'yo majje taaanaje; “Shacuima' nequi aje poe'yonaje. ¡Cua'a, ba-queique!”

⁷ —Taaaje shajja'ajja majje ojjaña epona sho'i cuana shequinaje. Ejiijji hui jea-cuaya canaje. ⁸ Epona sho'i jjashahuabaqui jjima cuaa ma ejjashahuabaqui cuana huohui'ajja canaje jama ba'a: “¡Esei mo quiacue! Esei ecuanaja oe poanaje. Cuaquijji ecuanaja jiji'yo ajja”.

⁹ —Epona sho'i ojaya ejjashahuabaqui'yo cuaa saja'a canaje: “Miquea esei chama' eshojji. Ecuea ca ca jiquio che oe pojji. ¡Poquicue miya ma esei quia caqui yasijje; jocuama jjequicue!”

¹⁰ —Jocuama o poquiahuaajo, shacuima' nequi poeyanaje. Ojjaña dobiqui'yonaje, joya apoa epo, o jjahueaqueiquei equi yasijje. Dobiqui majje esecue ca'a canaje.

¹¹ Joya esei jjequiya poquiya cuana poe'yo majje esecue eca'a nequi ba caña'yonaje. Taaa aninaje: “¡Che esecue ca'apejocue!”

¹² —Shacuimaa eyiye dojjojo nequiya saja'a canaje: “Chojja, ecuea miya ba jjima” acanaje. Jamaya poanaje —Jesosa poanaje.

¹³ —E'e —Jesosa poanaje oja epeeji cuana nijje—, ijajmajjeya jja'isho'a'ajjaqui ani tiiticue pea'ai! Ecuea epoe o'oyajji miquea ebajji pojjeama.

Esohui ejjeshejji

(Noca 19.11-27)

¹⁴ Jesosaa pea esohui eba meesahuajji huohui canaje: —Jjeya eyaya pea esohui huohuije, eya ojjañaja Emeshi Mese poe o'oyajo —Jesosa poanaje—. Jama poaje ba'a: Oe dejjaa, emeshi meseya quea huesha poqui jjimahuaajo iyaa canaje ojaya echacoji cuana, ojjaña ojaya aquiana jaahuana meeji. ¹⁵ Majoya ohuaya oe echacoji quea jjashahuabaqui ja'a huasijje esodojjo me oeje, 5 huisome quea nahue nee nee quia canaje aquiana jjeshejji, quea huiso bejjo chichajji. Pea echacoji quea jjashahuabaqui ja'a pishana huasijje beca esodojjo quea nahue nee nee quia canaje aquiana jjeshejji, quea huiso bejjo chichajji. Pea echacoji behahua nei jjashahuabaqui ajja huasijje oe esodojjo quea nahue nee nee quia canaje bejjo chichajji nisho. Esodojjo quia majje emeshi mese poquinaje.

¹⁶ —Echacoji quea jjashahuabaqui ja'aa ojaya esodojjo me oeje huisome quea nahue quia canaje aquiana jjeshejji. Majoya chicha canaje ome pea'ai huisome. ¹⁷ Oya jayojjaya pea echacojiya ojaya beca esodojjo quea nahue quia canaje aquiana jjeshejji. Majoya ohuaya chicha canaje ebeca pee pea'ai huisome esodojjo. ¹⁸ Pea echacoji aje oe jjashahuabaqui ajja poanaje. Ojaya emeshi meseja esodojjo oe nei quehuajje nei ohua canaje.

¹⁹ —Quijje nei emeshi mese poe o'oyanaje ojaya echacoji cuana huasijje. Jjashahuabaquinaje jama ba'a: “¿Ae shai poani so'o echacoji cuana ecuea esodojjo?” Jamajjeya echacoji cuana iyaa majje huohui'ajja canaje: “¿Ache huiso esodojjo yani so'o jje-ya?”

²⁰ —Echacoji esodojjo me oeje huisome jaahuanajji ojaya emeshi mese nijje jama poanaje ba'a: “Yahuajo nei miyaya me oeje esodojjo quia'yonaje eya. Ma'aje miquea. Pea me oeje huisomeya miquea poanaje. Ma'aje pea me oeje ecue chicha” poanaje echacoji.

²¹ —Ojaya emeshi mese onijje quea bihui nee poanaje jama ba'a: “E'e de, miya echacoji quea pame nee. Yahuajo eyaya miya quianaje me oeje esodojjo. Miyaya maya quea pame nee chichanaje. Jamajjeya jjeya eyaya miya ecuea aquiana quea huiso jaahuana mee-je'yo. Cua'a, ¡enijje anicue quea bihui nee!” emeshi mese poanaje quea bei nee.

²² —Majoya pea echacoji poeyanaje, ma beca esodojjo yahuajo quia canaje. Ma echacoji jama poanaje ba'a: “Emeshi mese, yahuajo nei miquea esodojjo beca-nejji pea'ai quia'yonaje eya. Ma'aje miquea beca

esodojjo. Pea esodojjo becanejjijji pea'ai ecue chicha yenaje. Ma'aje ecue chicha esodojjo pea'ai" echacojji poanaje.

²³ —Emeshi mese onijje quea bei miminaje jama ba'a: "E'e, de, miya echacojji quea pame nee. Yahuaajo eyaya miya quianaje esodojjo becanejjijji pea'ai. Miya-ya pea chichanaje quea pame nee. Jamajjeya jjeya eyaya miya ecuea aquiana quea huiso jaahuana meeje'yo. Cua'a, ¡enijje anicue quea bihui nee!" emeshi mese poanaje.

²⁴ —Majoya pea echacojji poeyanaje, ma esodojjo oe nei quia canaje. Emeshi mese huohui canaje ohuaya jama ba'a: "Emeshi mese, ecuea eba miya queneque-ne cuajiani. Miyaya miquea echacojji chaco meeaña sosema'. Quea dejja taija jjejojo miquea aquiana quea huiso yani" jama posoya acanaje echacojjiya. ²⁵ "Jamajjeya eya quea mete poanaje. Miquea esodojjo emoquehua aninaje onaa esii ca poani jjejojo. Ma'aje miquea bejjo, ma miyaya quianaje huisome tiya" echacojji poanaje.

²⁶ —Ojaya emeshi meseya oya acanaje: "Miya echacojji quea mimishi, quea huea. Miya quea jjashahuabaqui tai poanaje jama ba'a: —Ecuea echacojji sosema' poanaje. Ecuea emeshi mese quea dejja tai. Jamajjeya quea huiso ojaya aquiana yani —miya poanaje. Sijaje miya poani. Miquea ejjashahuaba taiquijji jayojja jama eyaya miya aje. ²⁷ ¿Apiojji acuae miyaya ecuea ejjeshejji mi quianaje bejjo jaajji yasijje? Quijje pishana ohuaya eya quea huiso quia ca'yo queaye".

²⁸ —Emeshi mese ma echacojji nijje quea tecue poanijo pea cuana huoojea canaje jama ba'a: "Echacojji quea hueaa jjejojo ecuea esodojjo mi chicha canaje. ¡Maya esodojjo oe nei jjeshe majje quia'yocue pea echacojji huea'ama huasijje, maya ecuea esodojjo me oeje ecue quia poanaje yasijje quiacue! ²⁹ E'e, joya huea'ama poani aquiana cuana quia caje cuaa. Dejja aema' quea hueaja aquiana ojjaña jjeshe'yo majje dojo caje'yo cuaa. ³⁰ Jiquio echacojji cajaa ajeaje'yo; quea huea coma. Enijje oya enequijji pojjeama. Huoojeacua-yajeaje'yo. Oya quea yeno nee nee poaje'yo. Quea nee nee pea'ai poaje'yo" emeshi mese poanaje —jamaya Jesosaa acanaje.

E'e, jiquio Jesosaja ejjashahuabaqui'yojji jama ba'a: Poe o'oya majje Jesosaa ojaya epeeji quea jjashahuabaqui ja'a quea pame ba'e mee caje'yo onijje eyajo. Onijje ona huoojea'yojji po mee caje'yo. Pea echacojji quea huea ba majje ca ca cajaa acaje'yo. Quea nee nee poaje'yo oya cuana.

Eshui Jesosa Quitoja ojjaña Edoe Meseja epoe o'oyajjjo

³¹ Jesosaa huohui canaje pea'ai: —Eya poe o'oya majje quea ca'a poaje'yo. Ojjaña huoojea'yojji poaje'yo. Ojjaña esohuidojojji cuana enijje poeje'yo. Majoya eya ba'esohuaqui'yo majje eyahuasijje, jocuama eya nequije'yo, Emeshi Mese nei. ³² Ojjaña cuana e que jjachichaqui meeje'yo. Majoya eyaya ñajjajja cuiñajji jayojja jama aje jama ba'a: Ñajjajja cuiñajjiya ñajjajja cuana,

chivo cuana nequiashiña cani. ³³ Ñajjajja oo pana nequiashiña cani ebianeijje. Chivo ca ca huapa nequia acani, shanijje. ³⁴ Ñajjajja cuiñajji jayojja jama eyaya, ojjaña Emeshi Meseya ojjaña dejja cuana nequiashiñaje'yo. Ecuea epeeji quea pame nee ebianeijje nequiashiñaje'yo. Oya cuana aje'yo jama ba'a: "Miquianaya ecue Chijja bacua cuana e'e jojo nei poanaje, ojaya huapa pojjeama. Jamajjeya onijje nequi tiitiije'yo. Eyacuiñajji jamaya jjashahuabaqui'ya poa yahuajo nei nei, meshi pana jjimahuaajo. ³⁵ Jamaya poaje'yo jjeya miquianajo, miya quea pame nee nee poanajejo. E'e, yahuajo eya quea shoe poajo, eya bobi quianaje miyaya. Eya quea naba taja poajo, ena quianaje miyaya. Eya miquianajaya ba jjima poanaje. Jamatii miquea equi yasijje dobi-qui meenaje. ³⁶ Eya daquima' poajo, miquianaaya daqui huosho meenaje. E emanojaajo, ejeanobiajaajo pea'ai, miquianaya poeyanaje enijje jjapeequiya" jamaya eyaya aje'yo —Jesosa poanaje.

³⁷ —Majoya dejja pame cuaa eya huohui'ajja caje jama ba'a: "¿Ache shono acuae ecuaaya miya bobianaje, miya quea shoe poanajejo? ¿Ache shono ena quianaje miya quea naba taja poanajejo? ³⁸ ¿A'a miya ecuanaja equi yasijje dobi meenaje? ¿A'a daqui huosho meenaje miya daquimajo? ¿Ache shono shai ecuaaya jamaya anaje? ³⁹ Mi emanojaajo, ejeanobiajaajo pea'ai, ¿a'a ecuaa mi que poeyanaje? ¿Ache shono acuae jja jama ecuaaya mi anaje so'o?" Jamaya dejja pame cuaa quijje huohui'ajja caje eya eyajo.

⁴⁰ —Jamajjeya eyaya, Emeshi Mese neiya saja'aje'yo quijje eyajo jama ba'a: "Miyaya ecuea huapa pojjeama aema' yahuajo jaahuananajejo, eya jaahuananaje. Jamajjeya ecuea eba miquianaya ecuea epeeji e'e jojo nei poanaje. Ecuea ejjashahuabaqui'yojji jayojja jama ca ca miyaya a'yonaje".

⁴¹ —Mayoya eyaya, Emeshi Mese neiya dejja tai cuana shanijje nequi tecueaje'yo jama ba'a: "¡Poquicue miya! Cajaa'yo ca mi ca ecua. Edosiquiana etii Satanasa, eshahua cuana pea'ai cuaqui yasijje poquije'yo. Miya cuana pea'ai anije'yo cuaquijo tii. ⁴² Yahuaajo eya quea shoe, bobia jjima poanaje miquea. Eya quea naba taja, ena quia jjima poanaje. ⁴³ Eya miquea eba pojjeama, miquea equi yasijje dobi mee jjima poanaje. Eya daquima', daqui huosho mee jjima poanaje miquea. E emanojaajo, ejeanobiajaajo pea'ai miya poe jjima poanaje e jaahuanaa" jamaya eyaya aje dejja mimishi cuana —Jesosa poanaje.

⁴⁴ —Majoya dejja mimishi cuaa eya huohui'ajja caje jama ba'a: "¿Ache shono acuae miya bobia jjima apoa? ¿Ena cuana quia jjima apoa? ¿A'a ecuanaya miya ecuanaja equi yasijje dobi mee jjima apoa? ¿A'a daquimajo, ecuanaya daqui huosho mee jjima apoa? ¿A'a mi emanojaajo, ejeanobiajaajo pea'ai, a'a miya ecuanaja jaahuana jjima apoa? ¿Ache shono shai, de?" dejja mimishi cuaa huohui'ajja caje —Jesosa poanaje—. ⁴⁵ Majoya eyaya, Emeshi Mese neiya saja'aje'yo jama ba'a: "Ecuea huapa pojjeama cuanaje jaahuana jjima. Jamajjeya miquianaaya eya cajaa a'yonaje pea'ai".

⁴⁶ —Majoya eyaya, Emeshi Mese neiya dejja quea mishishi cuana quea huesha nee huoojeaje'yo cuaqui yasiije edobiqui'yojji. Quea nee nee po tiitiije'yo. Dejja pame cuana ebianeije nequi ca ca ba'e tiitii meeje'yo Eyacuiñajji nijje —jamaya huohui canaje Jesusaa.

Jodio etii cuana jjashahuabaquinaje Jesusa quecua'yojji

(Macoso 14.1-2; Noca 22.1-2; Huani 11.45-53)

26 Majoya Jesusaa o shajja'ajajji cuana jjabahuej-jaqui mee canaje. Pea esohui huohui canaje jama ba'a: ² —Quiije pishana, becanejjijji pea'ai cahuime po majje, Jodio cuana jjashahuabaquije o'oya etiiquinajaja bacua cuana yahuajo Ejitojo mano'yo jjima poajo. Jamajjeya ojee ijia'ijiaje o'oya quea bei nee. E'e, yahuajo nei nei Ejito meshijo ani Jodioja ebacua eija cuia'yo jjima aca poa esohuidojojjiya. Ma shejo ijia jji-mahuajo Jodio cuaa eya iña majje dejja quea mase yasiije quia caje'yo equecua'yojji. Acui ecueata'apeejo me caca majje ba'ehuanasohuajea caje'yo —Jesusa poanaje.

³ Majoya Eyacuiñajji nijje emimijji etii cuana, Jodio dejja jaahuanajji cuana pea'ai ojee jjachichaquinaje Eyacuiñajji nijje emimijji etii equi aijo, Caipa bajjanija equijo. ⁴ Caipa jjashahuaba taiquinaje pea cuana huoojeajji Jesusa iñajji, quiije equecua'yojji. ⁵ Jodio etii cuana ojee miminaje jama ba'a: —Jesusa quehua neije iñacue ojjaña Jodio cuana jjachichacui jjimahuajo, ojee ijia'ijia jjimahuajo! ¡Oya iñacue jjeyahua nei, de! Quiije pishana ojjaña ojee ijia'ijia anijo, ecuanajaya Jesusa e'iñajji pojjeama. Chojja. Ojjaña Jodio cuana quea quene nee nee ecuaana nijje po chana', Jesusa onajaya quea nahue nee equecua mee'yojji. Quea shajjaquijjo po chana' pea'ai —jamaya acanaje Jodio etii cuana.

Jesosa Betaniajo ani sapa sha canaje shiyeshiyeya eponaa

(Macoso 14.3-9; Huani 12.1-8)

⁶ Jesosa Betaniajo aninaje dejja Simoni bajjanija equijo. Yahuajo nei Simoni quea mano nee nee batata epo'yo poa, ma dejja cuaa jjajeaqui mee'yo jjima acani. Jesusaa oya yahuajo huaquia mee ca'yonaje, jjajeaqui mee ca'yonaje. Simonija equijo Jesusa e'anioque aninaje. Ijia'ijia aninaje bobi ijiajji pejjejo. ⁷ Jesosa ijia'ijia anijo, oe epona poe'yonaje o que. Ohuaya tahuoo quea nahue neejo shiyeshiye ye canaje Jesusa huojja shajji. Huojja sha canaje. ⁸ Ba majje Jesusa shajja'ajajji cuaa epona tecuea canaje: —¿Apiojji acuae miyaya shiyeshiyeya shaña so'o? ⁹ ¿Sha jjima yajjijo poso ca mi ca oe shiyeshiye dojo meenaje esodojjo quea huiso soseije? E'e, aema' cuana huasijje esodojjo equiajji poso —Jesusa shajja'ajajji cuana poanaje.

¹⁰ Jesusaa oya cuana shajja'ajja majje huohui canaje: —¿Apiojji acuaeya epona tecueaña so'o? E'e, eya ohuaya huojja sha canaje. Jamaya quea pame nee. ¹¹ Aema' cuana minijje po tiitiije'yo. ¡Oya cuana jaahuana'yocue quiije pea'ai! Eya ca ca nequi tiitii ajja minijje. ¹² Eya huojja sha cajo epona jjashahuabaquinaje jama ba'a:

“Jesusa mano'yo jjimahuajo eyaya oya huojja shaña shiyeshiyeya, onaja mojea jjimahua shaña” poanaje epona —Jesusaa acanaje—. ¹³ Jamajjeya quiije ojjaña meshijo ecuea esohui huohui caje. Jiquio eponajo huohui caje pea'ai jama ba'a: “Oe eponaa Jesusa huojja sha ca poa shiyeshiyeya, quea jeajojo”. Jiquio epona pajea'yo ajja tii tii, e'e jojo nei —jamaya Jesusaa acanaje.

Jodasaa onaya iña meesahua canaje Jesusa

(Macoso 14.10-11; Noca 22.3-6)

¹⁴ Yaninaje quea huiso Jesusa shajja'ajajji cuana, 12. Oe nei Jodasa Isicaniote bajjani poquinaje Eyacuiñajji nijje emimijji etii cuana huasijje. ¹⁵ Miminaje jama ba'a: —Eyaya miya Jesusa iña mee sahuaje. ¿Ache sose huiso acuae mo ya oe sosequiaje'yo so'o?

¹⁶ Onaaya saja'a canaje jama ba'a: —Quea huiso, 30 esodojjo quea nahue nee sosequiaje'yo miya.

Jamajjeya Jodasa jjashahuaba neinei equi aninaje achajja iña meeme aje so'o cuana: —Caba'ajjaquisahua —poanaje.

Jesosa o shajja'ajajji cuana bobi ijia mee canaje

(Macoso 14.12-25; Noca 22.7-23; Huani 13.21-30; 1 Conitio 11.23-25)

¹⁷ Jodio cuana quea bihui ojee ijia'ijianaje yohua shejo ba'a esohuidojojjiya yahuajo nei etiiquinajaja bacua cuana cuia'yo jjima ñajajja na' esecuejo ecuiapepa ba majje shejo. Pahui quea ca'a eshejee meejji chama'ijia ca poa. Ebionei epojja e'ijia'ijiajji, Jesusa que poe majje o shajja'ajajji cuaa huohui'ajja canaje jama ba'a: —Jesusa, ¿ache equijo acuae seya pahui ca'a ijiaje so'o? ¡Ecuana huoojecue aquiana iyajea, miquiana ishoajji!

¹⁸ Jesusaa huohui canaje jama ba'a: —¡Poquicue miya cuiñajji yasiije! ¡Jomajo ecuea epeeji baquicue! Onijje mimicue jama ba'a: “Ecuana sohui huohuijji jama poanaje ba'a: —E mano'yajo aje apoa poaje. Miquea equijo eyaya e shajja'ajajji cuana nijjeya pahui ca'a ijiaje'yo, esohuidojojjiya etiiquinajaja bacua eija cuana cuia'yo jjima poa shejo” acue —Jesusaa huohui canaje.

¹⁹ Jamajjeya o shajja'ajajji cuana ojaya ehoojea'yo jayojjaya jama poanaje. Bobi iyajea canaje pahui ca'a ijiajji.

²⁰ Majoya sinecua neijo Jesusa o shajja'ajajji cuana nijje anioquenaje bobi ijiajji pejjejo ijia'ijiaa. ²¹ Ojee ijia'ijia anijo Jesusa jama poanaje ba'a: —E'e jojo nei jiquiojo ani oe dejja poquije ona jjequiya e iña'yojji. Ohuaya eya huohui caje cuana.

²² Eshajja'ajajji cuana quea yeno nee nee poanaje. Pea mimiajo pea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei.

Jamaya ojjaña miminaje. ²³ Majoya Jesusa onijje miminaje jama ba'a: —Oe dejjaa e shajja'ajajjiya joya enijje pahui shapeshi po'anaya eya onaya cuana iña mee caje'yo. ²⁴ E'e, yahuajo nei Eyacuiñajji esohui tehueji cuaa esohui tehue ca poa jama ba'a: “Quiije oe dejjaa Eyacuiñajji huoojea'yo ojjaña jaahuanajji onaya cuana iña meesahua caje'yo equecua'yojji”. Jamajje-

ya ma dejja quiije quea yeno poaje. Jjashahuabaquiije jama ba'a: "¿Apiojji shai eya ecue naeya mejo ca poa? Eya ca ca nequi sa po ajja. Ecuea ejjashahuaba taiquij-jiijo mano'yo sa poani" oya poaje. Quiije oya quea nee nee po tiitiije'yo —Jesosa poanaje.

²⁵ Majoya Jodasa Jesosa nijje miminaje jama ba'a: —Emeshi Mese, eya ca ca o jayojja pojjeama. Eyaya miya onaya e'iña meesahuajji pojjeama —poanaje.

Jesosa onijje miminaje: —E'e, Jodasa, miya jama quea tai poaje, e'e jojo nei —Jesosa poanaje.

²⁶ Majoya ojee ijia'ijia'anijio tii Jesosaa pahui ca'a jjeshe canaje. Eyacuiñajji bihuia majje, pahui mijisisi majje quia canaje o shajja'ajjajji cuana. Jama huohui-me acanaje Jesosaa ba'a: —¡Ijjiacue! Jiquio ecuea eyami —poanaje.

²⁷ Pahui ijia majje caneco jjeshe canaje, Jesosaa. Eyacuiñajji bihuia majje quia canaje ojjaña o shajja'ajjajji cuana. —¡Ishicue! Jiquio ecuea ena'. ²⁸ Ecuea ena' cuayaquiao eya manojje'yo. Jamajoya eyaya Eyacuiñajji esohui eyacua jayojjaya aje. E'e, ojjaña ecuea epeejiija mimishi cuana cuijeaje'yo. ²⁹ Jjeya eyaya jiquio jjonoj-jajja na, uva na e'ishi o'oyajji pojjeama miqiana nijje; eya manojje'yo. Quiije nei poe o'oya majje eyaya jiquio ishije o'oya miqiana nijje. E'e, eya poe o'oyajo ecue Chiiya eya ojjaña huoojea'yojji po mee caje'yo. Ojjaña eya shajja'ajja caje'yo —jamaya Jesosaa acanaje.

Jesosa miminaje Peno nijje

(Macoso 14.26-31; Noca 22.31-34; Huani 13.36-38)

³⁰ Majoya ojee sohuicuaya majje poquinaje eyiyo huasijje Onimo yiye yasijje.

³¹ Majoya Jesosa o shajja'ajjajji cuana nijje miminaje jama ba'a: —Jiquio mecajje ojjaña miqianaya enijje jjapeequi pajaje'yo. E'e, yahuajo Eyacuiñajji esohui tehuejji cuaa tehue ca poa ejo: Eya ñajjajja cuiñajji jayojja jama poaje. E mano'yajo ecuea epeeji cuana ñaj-jajja cuana jayojja jama poaje; jjajeaajjaequinanaje'yo. Etehue'yo yahuajo nei nei jama poa ba'a:

"Quiije eyaya ñajjajja cuiñajji jaahuana neinei ajja. Jamajjeya onaaya oya cuia caje'yo. Ñajjajja cuiñajji chamajo, ñajjajja cuana jjajeaajjaequinanaje'yo". Jamaya aca poa yahuajo nei nei —Jesosa poanaje—. ³² Jamatii, shequi o'oya majje eya poquije Janinea meshi yasijje. Jomajo aje mi poeyajo ishoañaquije —Jesosa poanaje.

³³ Penohua Jesosa jama acanaje ba'a: —E'e pojja'a pea cuana minijje jjapee tiitiqui'yo ajja. Eya ca ca pea jayojja jama pojjeama. Eya jjapee tiitiquije'yo minijje —Peno poanaje.

³⁴ Jesosaa Peno jama acanaje ba'a: —Eyaya e'e jojo nei miya huohuiana Peno, jiquio mecajje tii cachina yahue pea beca peejjima taaame po jjimahuajo, pea beca peejjima huohui'ajjame amajje miya ejo poaje jama ba'a: "Chojja, ¡ecuea Jesosa ba jjima nei nei!" miya ya saja'ame aje quea meteya jjejojo —Jesosaa Peno acanaje.

³⁵ —Chojja, Jesosa —Peno poanaje—. E'e pojja'a eya minijje jjapeequianijio, pea cuaa eya cuiajea caje'yo. Jamatii ¡ecuea ca mi ca epajea'yojji pojjeama!

Oya jayojja pea cuaa jama acanaje pea'ai ba'a: —E'e Jesosa, ¡ecuanajaya ca mi ca epajea'yojji pojjeama tii!

Jetesemani quejo Jesosa miminaje oja Chii nijje

(Macoso 14.32-42; Noca 22.39-46)

³⁶ Majoya Jesosa o shajja'ajjajji cuana nijje Jetesemani que yasijje poquinaje. Jesosa jama poanaje ba'a: —¡Anioquecue jiquiojo tii! Jocuama eya poquije ecue Chii nijje mimiya.

³⁷ Jesosaa Peno, Huani, Satiaco pea'ai dojo canaje jocuama, ma Semeneoja bacua ejja cuana bajjani Huani, Satiaco pea'ai. Jesosa jjashahuabaquinaje quea yeno nee nee. ³⁸ Jamajjeya onijje jama poanaje ba'a: —Eya quea yeno nee nee, emano ca'yojji jayojja. ¡Anioquecue enijje; a'a cahuijji! —Jesosa poanaje.

³⁹ Jesosa cuama pishana ani poqui majje ecui'oshaj-jajo nequinaje. Oja Chii nijje miminaje jama ba'a: —Ecue Chii, miquea ejjashahuabaqui'yojji jayojja jama aje'yo eyaya. Miyaya eya huoojeanaje dejjaja mimishi cuanajo mano'yohua. Quea camaja nee nee ejo. ¿A'a miyaya che onaaya eya quecua mee'yo jjima aje so'o? ¿A'a onaaya eya iña mee'yo jjima aje'yo? Jamatii ¡miquiea ejjashahuabaqui'yojji jayojja jama acue! ¡Ecuea ejjashahuabaqui'yojji jayojja jama a'a ajji! —Jesosa jamaya poanaje.

⁴⁰ Majoya oya poqui o'oyanaje o shajja'ajjajji cuana que. Ba cañaquei'yonaje cahuijaa. Tecue'ama Peno nijje miminaje jama ba'a: —¿A'a mi cahuijaa? ¿A'a che enijje cahui jjima nequi jjima so'o? ⁴¹ ¡A'a cahuijji! ¡Eyacuiñajji nijje mimi majamajacue! Jamajoya pea cuaa miya quea mimishi epo mee'yojji pojjeama. E'e, miqianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

⁴² Majoya Jesosa poqui o'oyanaje jocuama pishana oja Chii nijje mimi o'oyaa. Mimi o'oyanaje jama ba'a: —Ecue Chii, eya ojjaña mimishijo mano'yo ajjajo, ¿a'a onajaya mimishi ecuijea'yojji pojjeama poaje'yo? Jamajjeya ¡miquiea ejjashahuabaqui'yojji jayojja jama acue! —Jesosa poanaje.

⁴³ Oja Chii nijje mimi'yo majje Jesosa poqui o'oyanaje o shajja'ajjajji cuana que. Oya cuana quea cojja jee mano poanaje; cahui o'oyanaje. Jamatii Jesosaa onijje mimi jjima; shequi mee'yo jjima acanaje. ⁴⁴ Ona jeana o'oya majje jocuama pishana poqui o'oyanaje Jesosa, oja Chii nijje mimi o'oyaa. Oya jayojja mimi o'oyame poanaje. ⁴⁵ Mimi o'oya majje poe o'oyanaje o shajja'aj-jajji cuana que. Onijje mimi o'oyanaje: —¿A'a mi cahui-jaa tii? ¿Jomishocajaa pojja'a ca mi ca oe? Jjeyahua nei dejjaa eya onaya iña meesahua caje'yo. ⁴⁶ ¡Cua'a, jjeya nei ecuea epeeji nisho poeje'yo! Joya aje poeje ba'a.

Jesosa iña canaje

(Macoso 14.43-50; Noca 22.47-53; Huani 18.2-11)

⁴⁷ Jesosa mimianijio tii, Jodasa o que poeyanaje, ma eshajja'ajjajji cuana sohuihuohui poequi yasijje. Oya aje oe Jesosaja epeeji pea'ai poanaje; pea 11 nijje nequinaje tii. Quea huiso nee nee dejja nijje Jodasa poeyanaje; yohuajji poeyanaje acuijji, baajji, mejeji pea'ai

poeyanaje. Jodio etii cuaa, Eyacuiñajji nijje emimijji etiiya pea'ai ojjaña huoojea canaje Jesosa iña. ⁴⁸ Jodasaa, Jesosa e'iña meejjiya yahuajo jama huohuime aca poa ba'a: —¡Bacue oe! Eyaya oe dejja ba majje cuiapashi nishoje. ¡Majoya oe miquianaaya iñacue!

⁴⁹ Jamajjeya Jodasa Jesosa que jjanequichipiquinaje: —¡A'a mi ecuea Emeshi Mese nei jiquio! —amajje cuiapashi nisho canaje.

⁵⁰ Jesosaa acanaje: —Ecuea epeeji Jodasa, ¿ajeo ami poeyanaje? —Jesosa poanaje.

Pea dejja cuaa ba majje, Jesosa que poe majje iña canaje edojjji. ⁵¹ Jesosa iña cajo, oja epeejiya onijje nequiya baa iña canaje. Onaja sapa jajapojojeajji nisho shajja jajasejja canaje, Eyacuiñajji nijje emimijji etiiya echacojji poanija eshajja.

⁵² —Chojja. ¡A'a jja oe jajajji! —Jesosaa oya huohui canaje—. ¡Baa oe ejee yasijje nequianobia'yocue! Ojjaña jjajajaquiani manoye'yo yacua ca'yajje. ⁵³ ¿A'a miquea eba pojjeama eyaya ecue Chii ehuhui jjojemo ohuaya esohuidojojji ache huiso nei nei huoojea came jje-yahua nei, e jaahuanaa? ⁵⁴ Jamatii eya jama po ajja. E'e, yahuajo nei Eyacuiñajjija esohui etehue'yo jama tehue-me ejo aca poa ba'a: “Onaaya iña mee majje dojo caje emano mee'yojji”. Jamaya ejo yahuajo nei tehue ca poa. Jamaya eya acaje'yo cuaa jjeja —Jesosa poanaje.

⁵⁵ Jamajjeya Jesosaa ojjaña dejja ejjachichaqui'yo nequi yasijje huohui canaje: —¿Apiojji miya poeyanaje baajji, acuijji, mejeji pea'ai e iña? ¿A'a cuae jja iña siipojji so'o? Ojjaña pojjaajo eya ojjaña nijje esohui huohuijji po nequinaje Eyacuiñajjija equijo. Jamatii eya miquianajaya iña jjima poanaje. ¿Apiojji miquianaya mecajje poeyanaje e iña? ⁵⁶ Jamatii jamaya nequiana poani. Miquianaaya ca mi ca oe Eyacuiñajjija esohui huohuijji etehue'yo yahuajo nei nei miquianajo jayojja jama quea tai aña.

Majoya o shajja'ajajji cuana cuajicujainananaje; Jesosa jeajea canananaje.

Jodio etiiya Jesosa cuia mee canaje

(Macoso 14.53-65; Noca 22.54-55, 63-71; Huani 18.12-14, 19-24)

⁵⁷ Jamajjeya joya Jesosa iñajji cuaa oya dojo canaje Eyacuiñajji nijje emimijji etiiya equi yasijje, Caipaja equi yasijje. Jocuama Jodio cuana jjachichaquinaje, Jodio etii cuana, Moisesija etehue'yo huohuijji poani pea'ai.

⁵⁸ Penohua ca ca equijje aca poquinaje Jesosa onaa dojo caje. Caipaja equi yasijje Peno nequiñaquinaje. Dobiquinaje epeeyi nequi yasijje, sohuinana cuana nijje anioquenaje ae onaa Jesosa acaje ebajji.

⁵⁹ Eyacuiñajji nijje emimijji etii, ojjaña Jodio etii cuana, Jodio esohui huohuijji poani pea'aiya ojee mimimimijnaje Jesosajo, ojjaña ejjachichaqui nequiya o quecua'yo sa acani. Jamajjeya sa'ajja canaje dejja cuana Jesosa huohuijji nisho, Shomano emeshi mese Pinato bajjani yasijje dojo majje Jesosa huohuijji nisho: —Jesosa ca ca jama acanaje ba'a —sijje yajji.

⁶⁰ Quea huiso dejjaa Jesosa sijje acanaje. Jamatii peaa sijje'a, peaa sijje'a acanaje Jesosajo. Chama' beca oya jayojja mimime epojji Jesosa mano mee'yojji.

⁶¹ Quijje yejje nei beca dejja poeyanaje e'e jojo nei jayojja emimijji. Jama poanaje ba'a: —Eyaya oya shajja'ajjanaje. Jama poanaje Jesosa ba'a: “Eyaya Eyacuiñajjija equi jeabichajeaje'yo. Jeabichajeaje'yo majje pea equi iyaje'yo pea beca peejjima cahuime”.

⁶² Ma shajja'ajja majje Eyacuiñajji nijje emimijji etiiya nequisohua majje Jesosa huohui'ajja canaje: —¿A'a pa miya jama poanaje? ¿Jesosa, a'a acuaeya dejja cuana miyaya saja'aje'yo so'o?

Jamatii Jesosa jjamimisaja'aqui ajja poanaje.

⁶³ Jamajjeya Eyacuiñajji nijje emimijji etiiya huohui neinei canaje: —¡Eyacuiñajji eshe nequi tiya eseya ba canijo, ecua huohuicue e'e nei! ¿A'a acuae miya Eyacuiñajjija Bacua Ejja nei, oja huoojea'yo ojjaña jaahuanaajji? ¡Huohuicue mo oe!

⁶⁴ Jamajjeya Jesosaa huohui canaje: —E'e, joya ecua miya mimiani jayojjaya eya. Cuanaya eyaya miya e'e nei huohuiaña: Quijje miyaya eya baje'yo ecue Chii nijje ebianeijje ani. Oya quea ca'a nee nee enequi tii tii. Eya miquianaaya baje pea'ai poeje o'oya; bo biasje poeje'yo —Jesosa poanaje.

⁶⁵ Shajja'ajja majje Jodio etii quea quene nee nee poanaje. Quea quene nee nee po majje ojaya daqui, oja huosho ba'e daqui isajea canaje. Jodio dejjaa jama oja daqui isajea cani quea quene po majje. Ojjaña cuana huohui canaje jama ba'a: —De, ¡pea dejja a'a iyaajji Jesosa huohuijji! Jamatii. ¡Oya Jesosa mimiqui Eyacuiñajjija Bacua Ejja miame! ¿A'a acuae miquiaaya shajja'ajjanaje oja sohui? Jamajjeya ¿yajja acuae seya aje so'o, de, Jesosa?

⁶⁶ —¡Oya oe manojea mee'yocue; quea tai ca esohui acanaje! —jamaya acanaje Jodio dejja cuaa, Jesosa Eyacuiñajjija Bacua Ejja pojjeama posojo.

⁶⁷ Majoya aje oe Jodio dejjaa Jesosa cojja cuichojea canaje. Ejjachichaqui nequiya cuia canaje pea'ai emeya. ⁶⁸ Cuia majje huohui'ajja canaje: —¡Miya Eyacuiñajjija huoojea nei jjabaqui majje jja ca oe huohui pocue! ¿Aya acuae mi cuia canaje so'o? —acanje cuaa.

Penohua sijje acanaje Jesosa oja ba jjima nisho acanaje

(Macoso 14.66-72; Noca 22.56-62; Huani 18.15-18, 25-27)

⁶⁹ Ojjaña cuaa napa caqui Penohua ba canaje Jesosa; esecuejo sohuinano pejejo e'anioque aniya ba ca'ani-naje. Oe echacojjiya ahuema'aniya Peno ba majje huohui'ajja canaje: —¡Miya ca jja mi ca oe Jesosa nijje aninaje Janinea meshijo!

Eponaa huohui cajje ojjaña cuaa Peno bajea canaje. Jamajje Peno metenaje. Jama saja'ame acanaje ba'a: ⁷⁰ —¡Chojja, ecuea oya ba jjima! ¿Ajeo acuae mi mimiani? —Peno sijje poanaje. ⁷¹ Majoya Peno epeeyijo nequi cuayaquinaje quea mete jjejojo. Pea epona echacojjiya Peno ba canaje esecuejo nequi. Ohuaya ojjaña dejja cuana huohui canaje: —E'e jojo nei oya Jesosa nijje aninaje, ma Nasanenajo ba'e nijje —poanaje.

⁷² —Chojja, ecuea oya ba jjima nei nei. Eyacuiñajjija eba eya e'e jojo nei mimiani —Penohua saja'a canaje.

⁷³ Quijje pishana beca cuana Peno que ojee nequi jja-nequichipiquinaje. Jama poanaje ba'a: —E'e nei miya Jjesosaja epeeji pea'ai pea cuana nijje. Jamaya miquea emimi, pea Janinea meshijo ba'e jayojja jama miya mimi-miani, de —poanaje.

⁷⁴ Ojaya esohui shajja'ajja majje Peno quea mete nee nee poanaje; ona nijje mimijajinaje: —¡Siajje miya poani! Jiquio dejja ecuea ba jjima. Eya e'e jojo nei pojjeama poani jojjemo Eyacuiñajjiya eya mano mee ca'yome —Peno poanaje. Jamatii Peno siajje poanaje.

Peno jamaya poajo, cachina yahue taaanaje. ⁷⁵ Cachina taaajo Penohua shahuaba ca'yonaje ma Jjesosaa oma mecajje o jama acanaje jama ba'a: —Peno, cachina yahue taaa jjimahuajo miyaya eya ba jjima nei nei nisho aje'yo, ebeca pee peejjima huohuime aje'yo —jamaya Jjesosaa Peno acanaje.

Jamajjeya jjashahuabaqui majje Peno quea yeno nee nee poanaje; pa neinei poqui'yonaje Jjesosa ba jjima nisho epo jjejojo.

Jjesosa emeshi mese Pinato huasijje dojo canaje

(Macoso 15.1; Noca 23.1-2; Huani 18.28-32)

27 Mecajjeahua ojjaña Jodio etii cuana, Eyacuiñajji nijje emimijji etii cuana ojee miminaje Jjesosajo: —¿Achajja amajje acuae seya Jjesosa quecua meeje'yo so'o? Cua'a, jejaquecua meequiqui! —poanaje.

² Jamajjeya Jjesosa me jeyo majje dojo canaje Shomano emeshi mese Pinato bajjani yasijje.

Jodasa jjanaayisibijeaqui'yonaje Jjesosa quecua mee'yo majje quea yeno jjejojo

(Hecho 1.18-19)

³ Jamajjeya Jodasa, ma Jjesosa iña meesahuajji epo Jjesosa quecua caje'yo ba majje quea yeno nee nee poanaje. Poquicujinaje Jodio etii yasijje, Eyacuiñajji nijje emimijji etii yasijje pea'ai. ⁴ Huohui cañaquinaje: —Eya Jjesosa iña mee majje quea mimishi poanaje; oya ca ca Jjesosa mase'ama nei nei poanaje, mimishi'ama nei. ¡Ma'aje miquea esodojjo, 30, ma miyaya eya quianaje Jjesosa iña meesahua sosejje!

—E'e pojja'a, de. E'e jamatii, Jjesosa caquecuajea cahua —Jodio etiiya saja'a canaje—. Miquea mimishijo ca jja mi ca jjashahuabaquiani, de —poanaje.

⁵ Jamajjeya Jodasaa esodojjo meshi yasijje huojjojeaje canaje. Pa poquinaje ebio huasijje jjanaayisibijeaqui'yohua. Mano'yonaje. Chama'yo tii Jodasa po'yonaje.

⁶ Jodio cuaa aje oe esodojjo meshijo ani chicha canaje: —¿Yajja acuae jja seya jiquio esodojjo aje so'o? Jjesosa sosequia'yoyji ya ca coma, de. Eyacuiñajji equi yasijje iya sa po ajja. Jamaya pojjeama eseyaya aña —poanaje.

⁷ Jamajjeya mimimimi majje meshimisi iñabajjijja meshi, Apaneno meshi jjeshe canaje emano ohuajejji, Jodio pojjeama ohuajejji, ma 30 esodojjo sosejje jjeshe canaje. ⁸ Jjeya ca ca yohua bajjani ba'a ma ena' cuayaquinaje meshi bajjani'yo, Jjesosaja ena' cuayaquinajejo.

⁹ E'e, yahuajo nei nei Eyacuiñajji esohui huohuijji Jenemiaa tehue ca poa jama ba'a:

“Ecuea Emeshi Meseya eya huohui canaje: —¡Ma 30 esodojjo sosejje meshi jjeshequicue! —aca poa—, ma bajjanija ba'a meshimisi iñabajjiji poanija meshi. Mahuiso esodojjo quia canaje Jodio cuaa Eyacuiñajji huoojea'yo Quito iña meesahuajji, equecua'yoyji”. Jamaya Jenemia poa yahuajo nei nei.

Emeshi mese Pinatohua Jjesosa ba canaje

(Macoso 15.2-5; Noca 23.3-5; Huani 18.33-38)

¹¹ Jamajjeya Jjesosa emeshi mese Pinato huasijje dojo canaje, eme jeyo. Pinatohua ba majje huohui'ajja canaje: —¿A'ya acuae mi so'o? ¿A'a miya Jodioja Emeshi Mese poaje'yo?

—E'e, joya ecua miyaya huohuiaña jamaya epo'yoyji eya —Jjesosaa saja'a canaje.

¹² Jodio etii cuaa, Eyacuiñajji nijje emimijji etiiya pea'ai siajje acanaje Pinato Jjesosajo. Jamatii Jjesosaa saja'a jjima acanaje. ¹³ Jamajjeya Pinatohua huohui'ajja canaje: —¿Yajjajje acuae mi mi jjasaja'aquiani so'o? ¿A'a jje shajja'ajja jjima?

¹⁴ Chojja, Jjesosa jjasaja'aqui ajja nei nei. Ba majje Pinato jjashahuaba neineiquinaje: —¿Yajjajje shai Jjesosa jjasaja'aqui ajja, de?

¹⁵ Jamajjeya Pinatohua niñeba ca'yonaje jama ba'a: —Ojjaña eshequiaja eyaya oe Jodio dejja jeacuaya'yaña Jodio quea bihui nee poanijo. E'e, ojjaña Jodio cuana jjashahuabaquiani jama ba'a: Yahuajo Ejito meshijo Jodio etiiquianaja bacua ejja cuia'yo jjima aca poa esohuidojojjiya, ena' ecuipepa jojjoja —Pinato poanaje.

Jiquio shejoya Pinatohua oe Jodio dejja ejeanobia nequi huoojeacuayajea mee ca'yaninaje. Jamajjeya oya Pinato jjashahuabaquinaje: —E'e, eyaya oe Jodio huoojeacuayajea meeje'yo jjeyahua nei. Jjesosa pojja'a pichojea meeje'yo. Pea yani Mashama bajjani, ojjañaja eba nei. Oya ejeanobia nequi quea masejojo. ¿Ache dejja shai Jodio cuaa sa cani so'o? Caba'ajja sahua —jamaya Pinato jjashahuabaquinaje.

¹⁷ Jamajjeya Pinatohua ojjaña Jodio cuana ehuhui'ajjajji iyaa canaje. Jjachichaquiajo huohui'ajja canaje: —Jjeyahua nei eyaya jeacuayajeaje'yo oe Jodio dejja. ¿Ache acuae jja oe jeacuayajeaje'yo so'o? ¿A'a Mashama? ¿A'a Jjesosa Quito pichojeaje'yo? —poanaje.

¹⁸ Pinatoja eba poanaje Jodio etiiya quea quene nee poani ojjaña cuana Jjesosa nijje jjapeequianijo. Jamajjeya Jjesosa iña mee canaje equecuajea'yoyji, Jodio etiiquiaa.

¹⁹ Emeshi mese chacochoañani yasijje Pinato Jjesosa nijje mimiminequianijo, oja huanaseya pea echacoyji huoojea canaje Pinato huohuiya. Jama huohuime acanaje ba'a: —Huee, mecajje eyaya cahuibanaje Jjesosa mimishi'ama nei nei. ¡A'a oya quecua mee'yoyji! Eya quea mete ani ojo. E'e, jjacahuibaqui majje piopionaje quea mete jjejojo —Pinatoja huanaseya echacoyji huohui mee canaje.

²⁰ Oja huanase quea mete poanijo, Pinatohua Jesosa pichojea'yo sa acanaje. Jamatii Jodio etii cuaa, Eyacuiñajji nijje emimijji etiiya pea'ai ojjaña ejjachichaqui nequi taaa mee canaje: —¡Mashama oe huoojeacuaya-jea'yocue! ¡Jesosa a'a pichojeajji! ¡Quecuajea'yocue ca oma oe!

²¹ Jamajjeya Pinatohua: —¿Ache acuae jja oe pichojeaje'yo?

Jamaya acajje, taaa neinei canaje cuana: —Mashama, ¡Mashama jeacuayajea'yocue! —poanaje cuana.

²² —Jamajje ¿yajja acuae oe eyaya Jesosa Quito aje so'o? Eyacuiñajjija huoojea'yo ojjaña jaahuanajji ca pa coma —Pinatohua huohui'ajja canaje.

—¡Me cacajeacue oe acui ecueata'apeejo! —acanje cuaa.

²³ —¿Yajja acuae jja so'o? ¿Yajjajo acuae jjaya quecua'yo sa aña Jesosa? —Pinatohua huohui'ajja canaje.

Jamatii taaa majamajanaje Jodio cuana: —¡Me cacajeacue oe; me cacajeacue oe Jesosa! —jama taaameya Jodio cuana poanaje.

²⁴ E'e, Jesosa pichojea mee jjima acanje cuaa; quea quene nee neejo janobajjima nei siasianaje; taaa nequinaje Jodio. Taaa majamajajo Pinatohua huoojea canaje ena eme shacuajji jjequiya. Majoya ojjaña cuanaja ebajji Pinatohua eme topo canaje: —¡Eyaya pojjeama me cacaje Jesosa emano'yojji! ¡Jamaya pojjeama ecuea esohui! ¡Miyaya ca jja ca oe jamaya aña! —Pinatohua acanje.

²⁵ Taaajebenaje ojjaña Jodio etii cuana: —E'e, ¡ecuaaya oya mano meeje'yo Jesosa; quea tai coma! ¡Oya mimishi'ama jojaya, ecuanajaya ebacua, osecua cuana pea'ai cacua ca'yahua, Eyacuiñajjiya! —Jesosa quea mimishi poso acanje cuaa.

²⁶ Jamajjeya Pinatohua ohua sa canijo Mashama jeacuayajea mee ca'yonaje; Jesosa ca ca huoojea canaje cuiasejjajea majje me cacajeaa, emano'yojji.

Sohuinano soa neineinaje Jesosajo

(Macoso 15.16-20; Huani 19.2-3)

²⁷ Majoya emeshi meseja sohuinano cuaa Jesosa dojo canaje emeshi mese chacochochoañani equi dojjo huasijje. Ojjaña sohuinano o que jjachichaquinaje.

²⁸ Oja daqui huijjiajea mee majje daqui huo'o nei huosho mee canaje emeshi mese nisho'yajji. ²⁹ Acuisha sipi majje sapahuahuo iya canaje emeshi mese jayojja nisho epojji. Emeshi meseja acui ejehuijjajja ifanequia mee canaje ebiane meje. Majoya ecui'oshajjajo nequianaje ojjaña, Jesosa bihuajji nisho. Jama bihuia nishome acanje cuaa ba'a: —¡Miya Jodioja Emeshi Mese quea ca'a nee! ¡Ba'e tiitii'yocue! —jama sajeameya anisho canaje cuaa Jesosa.

³⁰ Majoya cuichojea canaje oja yami yasijje; acui ejehuijjajja jjequisejjajea ca'yonaje oja emejo nequi. Jjequisejjajea'yo majje sapa cuiape'ejea canaje. ³¹ Ojo soa neinei'yo majje daqui huo'o nei huijjeajea ca'yonaje; ojaya daqui quia ca o'oyanaje. Majoya Jesosa dojo canaje me cacajeaa, ba'ehuanasohuajee pea'ai, sohuinano cuaa.

Jesosa acui ecueata'apeejo me cacajea canaje sohuinano cuaa

(Macoso 15.21-32; Noca 23.26-43; Huani 19.17-27)

³² Jenosanenajo aniya Jesosa dojo caje, ba cajjequina-je pea dejja Simoni bajjani, Sinene meshijo ba'e poe'yo. Sohuinano cuaa Simoni acui ecueata'apee dojo mee canaje Jesosa quishishijji, Jesosa ba'ehuanasohuajeejji. ³³ Jamaya oya poquinaje Jonijota eyiyo huasijje, Ese Ejjaja esohuijo Esapa Jjii anijji bajjani yasijje.

³⁴ Nequiñaquiajo Jesosa ishi mee'ajja canaje cuaa acuijjajja na quea sese, quea pase. Ishi mee'ajja canaje quecua ca'yajje nee'ama epojji. Sio majje ishi jjima acanje Jesosaa. Majoya me cacajea ca'yonaje. Me cacajje nequiasohuajee canaje. Majoya oja daqui cuana chicha ca'yonaje, sohuinano cuaa. Iyachicha'yo majje, hue'e nisho majje daqui majjo ca'yonaje, ojaya pojji epo'yojji. ³⁵ Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a: **OYA JESOSA JODIOJA EMESHI MESE EPO'YOJJI**

Jesosa ba'e pejejo beca siipojji pea acui ecueata'apee cuanajo ba'ehuanasohuajee pea'ai ca'yonaje, Jesosaja ebiane mijijje, pea shani mijijje. Majoya e'anioque aniya ojjaña cuaa ba neinei ca aninaje oja epeejji-ya eba'ehuanaoquea ca'yo poajejje.

Ejiojjije poquije Jesosa nijje mimijajinaje cuana

(Salmos 22.7; 109.25; Mateo 26.61)

³⁹ Pea dejja cuaa ejiojjije poquianiya Jesosa que poe majje esapa jeacajjajja canaje, soa huisahuisa nequinaje. Jama mimijajime poanaje ba'a: ⁴⁰ —¿A'a acuae oe miyaya Eyacuiñajjija mei equi ifajeabichajea'yo majje pea equi iyaje o'oya so'o pea beca peejjima cahuime? ¡Ba'ajja socue! Ache ba'ajja; miya Eyacuiñajjija Bacua Ejjaja nei jjabaqui majje ca oe ¡acui ecueata'apeejo ba'e nequioque'ajja'yo socue emano'yojji pojjeama! —poanaje cuana.

⁴¹ Jamaya pea'ai Jodio etii bajjani cuaa, Moisesija etehue'yo huohuijji cuaa, Eyacuiñajji nijje emimijji etii cuaa pea'aiya Jesosa niñeba canaje: ⁴² —¿A'a Jesosa ojjaña jaahuanajji epo'yojji? Oya ona nahuejji pojjeama. Oya ca ca oma nequioque'yo jjima poani, de. ¿A'a acuae jja oe oya Jodioja Emeshi Mese poaje'yo? ¡Jjaba'ajjaqui socue! Jodioja Emeshi Mese nei epo'yojji jjabaqi majje ¡acui ecueata'apeejo ba'e jja ca oe canequioqueahua jjeyahua neiya ecuanaja ebajji! Ba majje ecuaaya: "Jesosa e'e jojo nei Eyacuiñajjija Bacua Ejjaja poanaje" aje'yo. ⁴³ Ohuaya: "E'e, eya ca ca ifa Eyacuiñajjija Bacua Ejjaja; ohuaya eya jaahuana cani" acanje yahuajo. Jamajjeya oya Jesosa Eyacuiñajjija quea boti nee neejo, ¡Eyacuiñajjiya oya canahue cahua jjeyahua nei! —Jodio cuana poanaje.

⁴⁴ Siipojji cuaa ma o pejejo eba'ehuanasohuajee ba'eya pea'ai Jesosa jamaya niñebame acanje, quea huiso nee.

Jesosa mano'yonaje

(Macoso 15.33-41; Noca 23.44-49; Huani 19.28-30)

⁴⁵ Majoya eshequi biacojajja nequijo shequima' jayojja poanaje; quea misi nee poanaje ojjaña meshi yasijje. Quijje eshequi jjaeapaaqui'yo majje jiji o'oyanaje. ⁴⁶ Sinecua, quea misi poajo Jesosa quea yeno nee nee jo taaa neineinaje: —¿Eli, Eli, lama sabactani? —taame poanaje—; ecue Chii, ecue Chii, ¿yayjajo acuae moya jeana'yonaje so'o? —Jesosa poanaje Jodioja esohuijo.

⁴⁷ Shajja'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiiquiana Enia iyaa cani pojja'a!

⁴⁸ Jamajjeya oe dejja poquicuajinaje acuijjajja na sese jjequiya. Jjequi majje shajashaja iyanobia canaje ena ejjequi yasijje. Majoya bequiobo sajo quecuahuosho majje Jesosaja enaba huasijje huoo canaje ojaya e'ishijji nisho.

⁴⁹ —Chojja, ¡ishoa socue! ¡Enia pojja'a poeje o nahueya! ¡Ba'ajja socue! —Jodio cuana poanaje.

⁵⁰ Jamatii taaa neinei o'oya majje Jesosa mano'yonaje. Chama'yo tii poanaje. ⁵¹ Jesosa mano'yajo tii, Eya-cuiñajjija equijo daqui quea moo eba'ehuana ba'e Eya-cuiñajjiya eyajje jja'isajea meequi canaje; biacuajje ebionei jja'isajeaquinaje. Meshi janobajjima nei huehuahuehuanaje pea'ai. Mei quea quemo cuana jja-yajjejaquinaje pea'ai. ⁵² Mei jjani, esajaajji cuana pea'ai jjayajjejaquinaje. ⁵³ Quijje Jesosa eshe o'oya poajo, Eyacuiñajjija epeeji yahuajo emano'yo ma jjani cuanajo jaa cuayaqui'yonaje, quea huiso Jenosanena huasijje poquinaje cuana; quea huiso dejjaa ba canaje ma emano'yo cuana.

⁵⁴ Ojjaña ba majje, meshi huehuahuehuani ba majje pea'ai sohuinano quea huiso nee, 100, huoojeajji poaniya pea sohuinano cuana nijjeya, ma Jesosa nahuejji poani, quea mete nee nee poanaje.

—¡E'e jojo nei, de, oya Jesosa Eyacuiñajjija Bacua Ejja nei poanaje! —sohuinano poanaje.

⁵⁵ Quea huesha nequiya epona cuaa pea'ai Jesosa eba'ehuanasohuajea ba'e ba canaje. Oya cuana yahuajo Jesosa nijje Janinea meshijo ania poa. Onijje Jenosanena huasijje poeyanaje oja bobi cuacua meesahuaa. ⁵⁶ Oya cuana ma bajjani ba'a: Mania Madanena; Satiaco, oja chahua Jose pea'aija enaese Mania bajjani; Semeneoja ehuanase pea'ai; Jesosaja enaese pea'ai.

Jesosa mei jjani yasijje huananobia ca'yonaje

(Macoso 15.42-47; Noca 23.50-56; Huani 19.38-42)

⁵⁷ Jamajjeya sinecua nei Jesosa mano'yajo, dejja quea aquiana huiso nee Jose bajjani poeyanaje, pea Jose, Amatea meshijo ba'e. Oya Jesosa nijje jjapee tiitiiquia poa yahuajo nei. ⁵⁸ Jamajjeya poe majje oya Pinato baa poquinaje. Huohui cañaquinaje: —Emeshi mese Pinato, Jesosa mano'yonaje. Eyaya oya cadojo'yahua ecuea mei jjani yasijje ehuananobiaqui'yojji —poanaje.

Pinatohua huoojea canaje: —E'e, ¡dojocue! Eyaya sohuinano cuana jamaya huohuime aje —poanaje.

⁵⁹ Jamajjeya Joseya Jesosa acui ecueata'apeejo emano'yo ba'e jjequioquea'yo majje dojo ca'yonaje. ⁶⁰ Daqui oshe eyacua neijo bebo majje huananobia ca'yonaje ojaya mei jjani yasijje, ma oja jjeya nei tio huasijje. Majoya mei quea quemo jeacajjajja canaje mei jjani naba capa'yojji. Jesosa mei jjani dojjojo jaa capajea canaje. Capa'yo majje poquinaje Jose pea cuana nijje.

⁶¹ Mania Madanena, pea epona Mania bajjani pea'ai mei jjani yasijje poeyanaje pea'ai Jesosa jjanijo ehuananobia jaa baa. Jomajo e'anioque aniya ba canaje, epona cuaa.

Sohuinano cuaa mei jjani nahue canaje

⁶² Jamajjeya mecahuajje epojja ejomishocajji jjayejjequiajo Paniseo cuana, Eyacuiñajji nijje emimijji etii pea'ai poqui o'oyanaje Pinato que. ⁶³ Huohui caña'yonaje: —Emeshi mese, ecuana jjashahuabaquiani yahuajo Jesosa mano'yo jjimahua siajje poanaje jama ba'a: “Beca cahuime po majje eya emano'yojaa shequije'yo” —Jodio poanaje, Jesosa siajje poanajejo poso—.

⁶⁴ Jamajjeya ijyehua nei sohuinano huoojeacue jjani baa, beca cahuime pohua, Jesosaja epeejiya oe equehua dojo'yo bacue! Jamaya po majje ojjaña cuana dasia ca chana' jama ba'a: “¡Bacue oe! ¡Jesosa ca jja ca emano'yojaa shequi o'oyanaje!” huohui ca chana' oja epeejiya. Ojjaña cuana siajje nei nei aca'yo chana' —Jodio cuana jamaya poanaje, Jesosa eshequi o'oyajji pojjeamajo poso.

⁶⁵ Jamajjeya Pinatohua huoojea canaje: —¡Ma'aje sohuinano cuana! ¡Dojo'yocue mei jjani yasijje, ma Jesosa ehuananobia jaa huasijje! ¡A'a acuae jjani ca'aje'yo ba'ajja socue! —poanaje Pinato.

⁶⁶ Jamajjeya poquinaje Jodio cuana sohuinano cuana nijje mei jjani yasijje. Jjani capajji ijji ca'a meequi ca'yonaje baacuiya. Majoya esecue jjanijo emeshi mese nisho iya canaje ona edobiqui poaje jjejojo. Etehue iya canaje, emeshi mese nisho. Majoya Jodio cuana poquinaje. Sohuinano ca ca enequinaje tii, esecue jaahuanajjiya.

Jesosa shequi'yonaje

(Macoso 16.1-10; Noca 24.1-12; Huani 20.1-10)

28 Jamajjeya epojja ejomishocajji jjayejjequiajo mecajjeahua nei nei, ebionei jjapojjaquiajo, nomico pojajajo, Mania Madanena, pea Mania nijje poquinaje mei jjani yasijje. ² Epona cuana jjani pejje yasijje poeyajo, meshi huehuahuehuanaje janobajjima nei. Eyacuiñajjija esohuidojojji eyajo ani nequioquenaje. Mei jeacajjajjajea canaje. Majoya esohuidojojji mei biajje anioquenaje. ³ Oya quea jiji nee nee poanaje pojjeje jayojja; ojaya daqui quea oshe nee nee, bo oshe nee nee jayojja ani ba canaje epona cuaa. ⁴ Sohuinano cuana quea mete nee nee poanaje. Piopio neineinaje; meshi yasijje jaabichajeaquinaje, emano'yo jayojja jama jaa naje esohuidojojji yajjajo. ⁵ Majoya esohuidojojjiya epona cuana jama huohuime acanaje ba'a: —¡A'a

quea mete pojjii! Ecuea miya eba. ¿A'a Jesosa, ma acui ecueata'apeejo mano'yonaje sa'ajja'yo poequi? ⁶ Chama' oya jjeya jiquiojo. Shequi'yonaje ca jja coma; ma ecua ohuaya huohui canaje jamaya e'e jojo nei po'yonaje; oya shequi'yonaje jjeya. E'e, ¡quia'o jiquio ba'ajjahua'yo! Jiquiojo jaanaje. ⁷ ¡Jjeyahua nei poquicuaajicue oja epeeji cuana huohuiya! ¡Jama huohuime acue ba'a: "Jesosa pa shequi'yonaje" acue! "Oya jjeya nei Janinea meshi yasijje poquije miqiana poqui jjimahua-jo. ¡Oya oe jocuama baquicue!" jamaya o shajja'ajjaji cuana huohuicue! ¡Ecue sohui ma eya huohuinaje oe a'a pajea'yojji; pea huasijje huohui neiquicue! —sohuidojojji jamaya poanaje.

⁸ Jamajjeya epona cuana poqui cuajicuajinaje. Quea mete, quea bei nee nee poanaje. Cuajicuajinanaje Jesosa shajja'ajjaji cuana esohuidojojji esohui huohuiya.

⁹ Ejiojjijje poquijejo Jesosa jjanequipanajinaje. Ehui dojojji nequinaje. Huohui canaje: —Jjo'i, ¡ejo quea bei pocue! Eya poeyanaje —Jesosa poanaje.

O que poe majje o que jjanequichipiquinaje. Ecui'os-hajjajo nequinaje; jiojji napa canaje. Quea bihui nee nee yajji epona cuaa oya bihuia canaje. ¹⁰ Jamajjeya Jesosaa oya cuana huohui canaje: —¡A'a quea mete pojjii! ¡Poquicue; ecuea epeeji cuana huohuicue, miyaya! ¡Jama oe acue ba'a: "¡Jjeyahua nei oe Janinea meshi yasijje poquicue! ¡Jocuama oe Jesosa baquicue, Janinea meshi yasijje!" acue! —Jesosa poanaje.

Sohuinano cuana Jesosajo siajje poanaje

¹¹ Epona cuana poqui'yajo sohuinano cuana meshijo jaa nequisohua'yonaje. Jenosanena huasijje poquinaje Jodio etii baa. Eyacuiñajji nijje emimijji etii huohui cana'yonaje ojjaña ohua jama acanaje, sohuinano cuaa.

¹² Huohui poña'yonaje. Sohuinano esohui shajja'ajja majje Jodio etii cuana jjachichaquinaje emimimimijji. Majoya sohuinano cuana quea huiso bejjo quia canaje o siajje poani sosejje. ¹³ Jama huohuime acanaje ba'a: —¡Miyaya ojjaña cuana jama huohuime acue ba'a: "Mecajje ecua ecahuiaajo Jesosa sii ca'yonaje jjanijo

jaa, o shajja'ajjajiya" acue! ¹⁴ Emeshi mese Pinato mi-quea ehuhui shajja'ajja cajo ecua onijje mimije, e'e jojo nei, miya ojaya enapa'yojji pojjeama. Pinato quea bei po meeje'yo ecuaana —Jodio cuana poanaje.

¹⁵ Jamajjeya Jodio etii cuaa sohuinano bejjo quia canaje. Bejjo jjeshe majje sohuinano cuana poquinaje ojjaña huasijje huohui pohua. Jodio etii esohui jayojja jama acanaje. Jamajjeya quea huiso Jodio cuana sohuinano esohui shajja'ajja majje e'e jojo nei poani poso-jo jjashajja'ajjaquinaje. Jjeya jiquio pojjajo cuanaya jamaya Jodio cuaa huohui cani tii: —¡Jesosa ca jja ca oja-ya epeejiya quehuadojo ca'yonaje; shequi o'oya ajja! —sohuinano siajje poanaje jayojja jama poani tii, Jodio cuana.

Jesosa ba canaje o shajja'ajjaji cuaa

(Macoso 16.14-18; Noca 24.36-49; Huani 20.19-23; Hecho 1.6-8)

¹⁶ Jamajjeya Jesosa shajja'ajjaji cuana 11 huisome poquinaje Janinea meshi yasijje Jesosa baa. Poquinaje eyiyo huasijje ma Jesosa huohui poequi baa. ¹⁷ Poqui majje, Jesosa ba majje bihuia canaje cuaa. Jamatii beca cuana ca ca jama poanaje ba'a: —E'e pojjia'a. Edojjoshahua pojjia'a coma, Jesosa pojjeama —jjashahuabaquinaje.

¹⁸ Jamajjeya Jesosa o que jjanequichipichipiqui majje jama huohuime acanaje ba'a: —Eyacuiñajjiya eya Emeshi Mese nei epojji aca'yonaje eyajo, meshijo pea'ai. ¹⁹ Jamajjeya ¡poquicue ojjaña dejja cuana huasijje! ¡Ojjaña pea esohui mimiani yasijje ecuea esohui ba meequicue pea'ai! ¡Enijje jjapeequi meequicue! Enijje jjapeequiyajo, jena huasijje besa meecue, eseja Chii nijje epojji, enijje epojji, Edojjoshahua Pame nijje pea'ai epojji! ²⁰ ¡Ojjaña cuana ecue sohui ba meesahuacue oe! ¡Ojjaña oe jjashajja'ajja meequicue quea bame nee nee eba'ejji, mimishi'ama eba'ejji! ¡Bacue oe! Eya e'e jojo nei minijje nequi tiitiije'yo ojjaña pojjajo, jiquio meshi oe epojji jiquio epojja huisome tii —Jesosa poanaje.

Mahuiso ecuea esohui etehue'yo. Eyaya Mateo bajjanija tehuejyonaje. Apoa.

MACOSO

Huaniya, ma ona besameeji poaniya esohui huohui canaje Jesosa Quitoja

(Mateo 3.1-12; Noca 3.1-9, 15-17; Huani 1.19-28)

¹ Eyaya, Macoso bajjaniya esohui quea pame nee tehueaña Jesosa Quitoja, Eyacuiñajjija Bacua Ejja-ja, ojjañaja ebajji. Jamaya poanaje ba'a:

² Yahuajo nei nei ecuanaja etiiquiana Isaia bajjani Eyacuiñajjija esohui huohuiji poa. Eyacuiñajjija Bacua Ejja Jesosa Quitoja Isaiaa tehue ca poa Eyacuiñajjija esohui. E'e, Eyacuiñajjiya oja Bacua Ejja jama aca poa ba'a:

“iShajja'ajjacue! Eyaya ecuea esohui huohuiji huoojeaje mi huoojea jjimahuajo. Ohuaya miquea ejiojji shabojea caje. ³ E'e, oya quimajo, meshi jabojo nequi taaanequije. Jama poaje ba'a: —iIiquio ecua emeshi cuiñajji nei neija ejiojji shabojea cani jama, quea pojje nee nee acani jayojja jamaya miquea ejjashahuabaquijji tai quea boejea nee nee a'yocue! Emeshi Mese nei poeje. ¡Jamajjeya oe apoa pocuajicue!”

Jamaya Isaiaa yahuajo nei nei tehue ca poa Jesusajo. ⁴ Jamajjeya Isaiaja esohui jayojjaya Huaniya, ma ona besameeji poaniya, meshi quimajo aniya esohui quea bihui nee Jesusajo huohui canaje. Jama acanaje ba'a: —iMiquea mimishijo quea yeno pocue! ¡Mimishi jja oe pajea'yocue! E'e, jamaya poajo, Eyacuiñajjiya miquea mimishi cuana cuijea caje'yo. Jamajjeya eyaya miya besa meeje ojjañaja ebajji miya Eyacuiñajjija epeeji po'yonaje —acanaje Huaniya.

⁵ Quea huiso nee nee cuana Jenosanena cuiñajjijo ba'eca, ojjaña Jodea meshijo ba'eca pea'ai poquinaje Jodana cuei yasijje Huani baa. Huani shajja'ajja majje oya cuana quea yeno nee poanaje ojaya mimishijo. Miminate Eyacuiñajji nijje. Ojaya mimishi huohui canaje. Majoya Huaniya oya cuana besa mee canaje Jodana enajo, Eyacuiñajjija epeeji epojji.

⁶ Huaniya huo ña, cameno ña oja sipi huosho canaje. Ejjayiica'aquijji ejee iya canaje. Shacui ijji canaje, huini pea'ai ishi canaje, Huaniya. ⁷ Ohuaya huohui canaje jama ba'a: —Quijje pishana poeje Jesosa Quito. Oya oe nei quea ca'a nee nee nequi. Eya ca iña quea ca'a pishana nequi. Jamajjeya eya ca iña onijje nequi sa po ajja miquiana que cojja. Quea bicho. ⁸ Eyaya miquianaya Eyacuiñajjijo besa meeña enajo. Poe majje ohuaya, Jesosa Quitohua miquiana que Eyacuiñajjija Edojjoshahua Pame dobiqúi mee caje'yo. Jamajjeya miquiana-ya quea pame nee poaje'yo —acanaje Huaniya ojjaña.

Huaniya Jesosa besa mee canaje Eyacuiñajjija esohui jayojja jama epo'yojji

(Mateo 3.13-4.11; Noca 3.21-22)

⁹ Majoya Huaniya Jodana cuei sahuajo sohuihuohui canijo tii, Jesosa Janinea meshijo ba'enaje, Nasanena cuiñajjijo. Macua huasijje po'oquenaje Huani que. Huani jama acanaje ba'a: —Huani, ¡eya besa meecue Eyacuiñajjijo, miyaya! Jamajjeya Huaniya Jesosa besa mee canaje Eyacuiñajjijo Jodana enajo. ¹⁰ Huaniya Jesosa besa mee majje, jjequicuaya ca'yajje ba canaje eyatahuatahua ca'apejo caje. Eyacuiñajjija Edojjoshahua Pame huia' jama Jesosa sapa biajje cuabesa ba'enaje. Ecapashi nei ba'eoquenaje. ¹¹ Eyacuiñajjiya eyajo aniya oja Bacua Ejja jama acanaje ba'a: —Miya ecue Bacua Ejja quea jea nee nee. Eya mijo quea bihui nee nee poani.

Jesosa mimishi po mee sa acanaje Edosiquiaa

(Mateo 4.1-11; Noca 4.1-13)

¹² Jjeyahua nei Edojjoshahua Pameya Jesosa quima huasijje, meshi jabo huasijje huoojea canaje. ¹³ Jesosa jomajo nequinaje peaja ejiojji huiso cahuime, 40 cahui-me. Mahuiso epojja cuana, mecajje cuana pea'ai aninaje. Oe nei nei aninaje. Ijjiacajji quea mase cuana jomajo nequinaje pea'ai. Edosiquiana aje Jesosa que poeyanaje. Quea mimishi epo meeji nisho acanaje. Majoya Eyacuiñajjija esohuidojojji cuana quea huiso poeyanaje Jesosa bobiaa.

Jesosaa sohuihuohui canaje Janinea meshijo, Eyacuiñajji ba po jjimaja meshijo

(Mateo 4.12-17; Noca 4.14-15)

¹⁴ Majoya pea cuaa Huani, ma ona besameeji poani iña canaje; equi ejjaje nobiaquijji yasijje jeanobiajea canaje. Jamajjeya Jesosa posohuaquinaje Janinea meshi yasijje. Eyacuiñajjija esohui quea pame nee huohui canaje. ¹⁵ Jama poanaje ba'a: —Jjeyahua nei Eyacuiñajji miquea Emeshi Mese nei poaje. ¡Jamajjeya miquea mimishijo quea yeno pocue! ¡Mimishi cuana pajea'yocue miquiaaya! ¡Ecuea esohui quea pame shajja'ajjacue! E'e, enijje jjapeequajo, eyaya miya ba'e tiitii meeje'yo enijje —Jesosaa huohui tiitii canaje.

Jesosaa nahuoo cuiashajjiji iyaa canaje onijje epo'yojji

(Mateo 4.18-22; Noca 5.1-11)

¹⁶ Majoya Jesosa poquinaje Janinea bae ai sahua huasijje. Jomajo ohuaya Anesi, Anesija o'i Peno bajjani, Si-

mohui pea'ai bajjani ba canaje. Oya cuana nahuoo cuiashajjii nei nei bajio. Nahuoo cuiashaja poequi. ¹⁷ Jesosaa oya cuana iyaa canaje: —¡Enijje po'yocue! Eyaya miya dejja cuana jjequi meesahua'yojji aje'yo e que.

¹⁸ Jjeyahua nei nei oya cuana ojaya eshajajji cuana jeana'yo majje onijje poqui'yonaje.

¹⁹ Majoya Jesosaa poqui pishana majje pea cuana ba canaje. Semeneoja bacua ejja Jacobo ba canaje oja chahua mese nijje, Huani nijje bishe aijo eshajajji je'e'yo po'ani oja chii nijje. ²⁰ Jjeyahua nei Jesosaa oya cuana iyaa canaje. Jamajjeya Jesosaa iyaa cajje oja chii Semeneo bajjani echacojji cuana nijje bishejo ani tii jiña ca'yonaje cuaa, Jesosa nijje epoqui'yojji.

Dejja niñepoqui (Noca 4.31-37)

²¹ Majoya quijje pishana Jesosa o shajja'ajajji nijje posohuaquinaje Capenaoma cuiñajji yasijje. Epojja ejomishocajjijo oya cuana poquinaje Jodio cuanaja equi ojee ejjachichaquijji yasijje. Dobiqini majje Jesosaa ojjaña jomajo ani sohuihuohui canaje. ²² O shajja'ajja majje ojjaña cuana jama poanaje ba'a: —¡De! Ohuaya Jesosaa esohui huohui cani quea ja'a nee. Huohui cani emeshi mese jayojja jamaa quea ja'a nee nee. Moisesija esohui etehue'yo huohuijji quea ja'a pishana esohui huohui cani, de. ¡Cashajja'ajja'yahua Jesosa! —poanaje ojjaña cuana.

²³ Jjeyahua nei dejja niñepoqui dobinaje ma equi yasijje. ²⁴ Jesosa ba majje eshahua o niñepoqui meejji poani siasianaje jama ba'a: —Jesosa, Nasanenajo ba'e, ¿apiojji miya poeyanaje ecuana que ecuana quea nee nee po meeya? Ecuana eba miya Eyacuiñajjija Bacua Ejja quea pame nee. ¡A'a JJeyahua nei ecuana cuaqui yasijje jeajeajji! Eyacuiñajjiya eshahua cuana cuaqui yasijje huoojeajea caje'yo quijje, JJeya nei pojjeama, de —taame poanaje eshahua.

²⁵ Jamajjeya Jesosaa eshahua, o niñepoqui meejji poani huoojeacuayajea ca'yonaje: —Eshahua, ja'a mimijji! ¡Cuayaqui'yocue oe, jiquio dejjajo nequi! —Jesosaa acanaje.

²⁶ Jesosa mimi jeahuajo, eshahua o niñepoqui meejji poaniya dejja jjequi'ihui mee majje, siasia mee majje cuayaquinananaje. Dejja jea cana'yonaje. ²⁷ Ba majje ojjaña cuana quea mete nee nee poanaje. Ojee miminaje jama ba'a: —¡De! ¿Yajja shai poani? Jamaya yahua jo ecuanaja ba jjima, de. Jesosaa quea ja'a nee huohui cani emeshi mese jamaa, oya quea sohui poja nee nee. Ojaya esohui shajja'ajja cani eshahua. Oja sohui jayojja jama acani, de —poanaje ojjaña.

²⁸ Jjeyahua nei ojjaña Janinea meshijo ba'ecaa shajja'ajja canaje Jesosajo. Jama poanaje ba'a: —Jesosaa quea ja'a nee ojjaña acani. Oya Eyacuiñajjija huoojea'yo ojjaña jaahuanajji e'e jojo nei —ojjaña poanaje.

Jesosaa Simohuija yano mese huaquia mee ca'yonaje (Mateo 8.14-15; Noca 4.38-41)

²⁹ Jesosa Jodio cuanaja equi ojee ejjachichaquijji nequi cuayaqui'yo majje poquinaje Simohuija equi yasijje, Anesija pea'ai equi yasijje. Dobiquinaje Jacobo nijje, Huani pea'ai nijje. ³⁰ Simohuija ano quea quiyo nee jaa. Jamajjeya Jesosa huohui canaje jama ba'a: —Jesosa, ecue ano, ecue huanaseja enaese quea quiyo nee nee jaa, quea mano, de —Simohui Peno poanaje.

³¹ Jamajjeya Jesosa o que poquinaje. Emanojaa ba canaje. Napa'ajja canaje emeya. Me napa'ajja cajje, boe canana'yonaje. Jamajjeya me iña majje jjequisohua canaje Jesosaa. Majoya ohuaya, Simohuija anohua, bobi ojjaña huasijje jjequi canaje.

Jesosaa quea huiso emanojaaca cuana jjaajaqui mee ca'yonaje (Mateo 8.16-17; Noca 4.40-41)

³² Majoya sinecua neijo, eshequi e'oquequajo, dejja cuaa quea huiso emanojaa cuana, niñepoqui cuana pea'ai Jesosa que jjequi canaje ejjaajaqui mee'yojji. ³³ Ojjaña jiquio cuiñajjijo ba'eca Jesosa que jjachichaquinaje Simohuija equi yasijje. ³⁴ Jesosaa ojjaña emanoojaa jjaajaqui mee ca'yonaje, huaquia mee ca'yonaje pea'ai. Eshahua cuana huoojeacuayajea ca'yonaje pea'ai. Eshahua cuana, o ebajo, jama acanaje Jesosaa ba'a: —Eya miquianajaya ebajo ja'a mimijji! Eya Eyacuiñajjija huoojea'yo ojjaña jaahuanajji, oja Bacua Ejja ja'a pea cuana huohuijji! —poanaje Jesosa.

Jesosaa esohui huohui ca o'oyanaje Janinea meshijo (Noca 4.42-44)

³⁵ Mecajjeahua nei, eshequi jjaja'a'ajjaqui jjimahuajo, Jesosa shequi majje cuiñajji esecue yasijje poquinaje dejjama huasijje. Jocuama oya miminaje Eyacuiñajji nijje, oja chii nijje. ³⁶ Jamajjeya shequi majje pea cuaa Simohui nijjeya oya sa'ajjaqui canaje. ³⁷ O ba majje jama poanaje ba'a: —Jesosa, ojjaña miya sa'ajja caqui —poanaje.

³⁸ Jamajjeya Jesosaa oya cuana jama acanaje ba'a: —¡Cua'a, enijje poquicue pea cuiñajji cuana huasijje! Eyacuiñajjiya eya huoojea canaje pea cuiñajji yasijje ojaya esohui jocuama huohuiya pea'ai.

³⁹ Jamajjeya Jesosa Janinea meshijo ojjea poquinaje ojjaña cuiñajji cuana huasijje. Ojjaña Jodioja equi ejjachichaquijji yasijje dobiquinaje; esohui huohui canaje. Eshahua cuana huoojeacuayajea ca'yonaje pea'ai.

Dejja batata epo'yo, ma dejja shicui jjima acani jjajea meequi ca'yonaje Jesosaa (Mateo 8.1-4; Noca 5.12-16)

⁴⁰ Majoya oe dejja quea mano nee batata epo'yo poeyanaje Jesosa que. Ecuio'shajjajo nequinaje o bihuiajji. Onijje miminaje jama ba'a: —Jesosa, ecuea eba miya jjajea meequi'yojji nei nei poani. Jamajjeya miyaya jjajeaqui mee'yo sa amajje imo che jjajeaqui mee'yocue! —poanaje.

⁴¹ Jesosa ma dejja quea mano ba majje quea yeno poanaje. Oya napa'ajja canaje emeya. Jama poanaje ba'a: —E'e, eyaya miya jjaaequi meeje'yo. ¡Jjaaequi'yocue, miya! —Jesosaa acanaje.

⁴² Jjaaequinana'yonaje jjeya nei. Quea pame nee po'yonaje. ⁴³ Jamajjeya Jesosaa oya huohui canaje jama ba'a: —¡Shajja'ajjacue mo! Eyaya miya jjaaequi mee'yonaje. ¡Jamatii a'a oe jjeya huohuipojji ecue jjaaequi mee'yo! ¡Poquicuaajicue Jenosanena huasijje, Eyacuiñajjiji equi yasijje, ma onajo Eyacuiñajji nijje mimiani yasijje! Oya huohuicue jama ba'a: “Eya jjaaequi'yonaje” acue. ¡Moisesija sohui jayojja jama oe pocue pea'ai! Miya ehuaquia'yohua jjejojya ¡Eyacuiñajji nijje mimiani yasijje beca huia' quiaquicue Eyacuiñajji bihuiajji! Jamajjeya ojjaña ba caje miya e'e jojo nei ejjaaequi'yo —oya acanaje Jesosaa. ⁴⁵ Jamatii poqui majje huohui canaje ojjaña huasijje jama ba'a: —¡Jesosaa eya jjaaequi mee ca'yonaje de, huaquia mee ca'yonaje jjeya nei! Jamajjeya dejja quea huiso nee nee o ba sa poanaje, ejjaaequi'yojji. Quea huiso nee nee jjachichaqui majje Jesosa cuiñajji cuana huasijje dobiqui mee jjiima acanaje. Oya quimajo nequinaje. Quea huiso nee nee o que poeyanaje, ojjaña huapajje aequiana poeyanaje o baa.

Quibojjisha quea mano nee nee jaa jeo mee ca'yonaje (Mateo 9.1-8; Noca 5.17-26)

2 Majoya quijje pishana Jesosa Capenaoma huasijje poe o'oyanaje. Jamajjeya pea cuaa jomajo nequiya huohui canaje jama ba'a: —Jesosa poe'yonaje ojaya equi yasijje. ¡Cua'a, ejjabaquiqui! ² Jamajjeya quea huiso nee nee jjachichaquinaje ojaya equi yasijje. Dobiqui mee aija quea dejja huisojojo. Esecuejo nequinaje; equi shajjaquibojo aequiana nequi canaje pea'ai. Jesosaa oya cuana Eyacuiñajjiji esohui huohui canaje. ³ Majoya pea dejja cuaa, ebeca pee pea'aiya, quibojjisha quea mano nee nee equipajaajji jaa sejjaiña majje Jesosa que dojo canaje. ⁴ O que poe meeme aija, quea huiso equi jjachichaqui nequijojo. Jamajjeya oya cuanaa equi biajjeje quibojjisha dojosohuaqui canaje. Equi huejja ca'yonaje. Huejjajje equipajaajji ecapashinei jeaoquea ca'yonaje jjonajo. ⁵ Ma ba majje Jesosa jashahuabaquinaje jama ba'a: —E'e, jiquio dejja cuana jashahuabaquiani eya ejjaajaquimee'yojji nei poani.

Jamajjeya quibojjisha nijje jama poanaje ba'a: —Cha, ¡quea bihui nee pocue! Eyaya miquea mimishi cuana cuijea'yonaje.

⁶ Jesosaja esohui shajjaajja majje Moisesija etehue'yo huohuijji poani jomajo ani quenequenaje. Jesosa Eyacuiñajjiji Bacua pojjeama posojo jashahuaba taiquinaje jama ba'a: ⁷ —¡De! Jiquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi. ¿A'a acuae ohuaya mimishi cuijea mee caje'yo jjabaquiani? Chojja, Eyacuiñajji oe nei mimishi cuijea'yojji poani —poanaje Jodio etii cuana, Jesosa Eyacuiñajjiji Bacua Ejja pojjeama poso acanaje.

⁸ Jamajjeya Jesosa Jodio etiija ejjashahuaba taiquijji ba majje jama poanaje ba'a: —¿Yajjajje acuae nequianna enijje quea quene poani so'o? ⁹ ¿Ache shai quibojjishajo quea camaja eyaya aje'yo? ¿A'a ojaya mimishi cuijea'yojji quea camaja? ¿A'a jja eyaya oya nequisohua meeje'yo? Ba'ajja —Jesosa poanaje—. ¹⁰ Jamajjeya eyaya ojjañaja Edoe Meseya miquianaya ba meeña eya ca ca iña Emeshi Mese nei quea ca'a nee nee nequi. Jamajjeya eyaya mimishi cuijeaje'yo nequianaja.

¹¹ Majoya Jesosaa quibojjisha acanaje: —¡Nequisohuacue! ¡Miquea equipajaajji bebo majje miquea equi yasijje poquicue!

¹² Jjeya nei quibojjisha nequisohua majje jeo'yonaje. Equipajaajji bebo canaje. Jeojeopoqui'yonaje oja equi yasijje. Jamajjeya ba majje ojjaña cuana quea bihui nee nee poanaje. Eyacuiñajji bihuia canaje jama ba'a: —¡E'e nei, joya quibojjisha jeo'yonaje jjeya nei! ¡E'e, e, Eyacuiñajjiya Jesosa quea ca'a nee po mee cani; emanojaa cuana huaquia mee ca'yani! ¡Mimishi cuijea mee ca'yani pea'ai!

Jesosaa Mateo pea bajjani Nemi iyaa canaje onijje epo'yojji

(Mateo 9.9-13; Noca 5.27-32)

¹³ Majoya Jesosa poqui o'oyanaje meshijaji yasijje, bae sahua huasijje. Quea huiso nee nee o que poeyajo, oya cuana Eyacuiñajjiji esohui huohui canaje.

¹⁴ Majoya Jesosaa poquijeya Apeoja bacua ejja Mateo ba canaje, ma Nemi pea'ai bajjani. Oya yaninaje equi ejjeshejji jaahunajjijo, ojjañaja emeshi meseja esohuijo jjeshe mee cani dejja cuana eba'ejji sosejje. Oya bejjo jjeshejji poani. Ba majje Jesosaa oya iyaa canaje: —Nemi, ¡enijje po'yocue!

Jamajje Nemi nequisohua majje Jesosa nijje poqui'yonaje. ¹⁵ Majoya Jesosa iyaa canaje ojaya equi yasijje ijja'ijjiaa. Jamajjeya Jesosa o shajja'ajjaji cuana nijje Nemiya equi yasijje poquinaje ijja'ijjiaa. Quea huiso dejja cuana Nemi jama bejjo jjeshejji poani, dejja mimishi cuana pea'ai poquinaje. Oje ijja'ijjia aninaje Jesosa nijje, Jesosa shajja'ajjaji cuana nijje pea'ai. ¹⁶ Jesosa ma dejja mimishi cuana nijje ijja'ijjia ani ba majje Jodio esohui huohuijji Paniseo cuana bajjani, Moisesija esohui etehue'yo huohuijji cuana pea'ai quea quene poanaje. Jesosa shajja'ajjaji cuana nijje mimijajinaje jama ba'a: —¿Apiojji miquea esohui huohuijji ijja'ijjiani bejjo jjeshejji cuana nijje, dejja mimishi nijje pea'ai? ¿Apiojji, de?

¹⁷ Jesosaa oya cuana shajja'ajja canaje. Huohui canaje jama ba'a: —¿A'a dejja cuana quea mano pojjeama eshicuijji quia sa poani? Quea mano poanijo ca ca eshicuijji quia cajji. Oya jayojja eya dejja quea mimishi nijje japeequiani quea ja'a nee epo mee'yojji. ¡Bacue! Beca cuana jama poani ba'a: “Eya ca ca iña quea pame nee, mimishi'ama nei nei” poso jjabaquiani. Jamajjeya ma dejja cuana ecuea e'iyajji pojjeama enijje ejjapeequi'yojji. Chojja, eya poeyanaje dejja quea mimishi iyaaa, mimishi pajea mee'yojji.

Bobi ijjia ajjajo huohui'ajja canaje cuaa

(Mateo 9.14-17; Noca 5.33-39)

¹⁸ Majoya Huani, ma ona besameeji poani, jeanobia-jea canaje cuaa. Jamajjeya Jodio etiiquianaja esohui jama poanijo o shajja'ajjajji cuanaa bobi ijjia jima aninaje Eyacuiñajji ejjashahuabaquijji, onijje emimijji pea'ai. Jamaya Paniseo shajja'ajjajji cuana poa pea'ai. Jamajjeya beca cuana Jesosa que poeyanaje. Jama huohui'ajjame acanaje ba'a: —Jesosa, ecua, Paniseo cuana pea'ai, Jodio etiiquianaja esohui jama poanijo bobi ijjia ajja Eyacuiñajji ejjashahuaba neineiquijji. ¿Apiojji acuae mi shajja'ajjajji poani jama po ajja? —poanaje; beshahua nei tecuea canaje.

¹⁹ Jesosaa oya cuana acanaje jama ba'a: —Chojja, ¿eya ecuea epeeji cuana nijje yanijo, ca'ijjia cahua! Ma jayojja jama ba'a: Ejjahuaquijji yahueja epeeji cuana onijje yanijo ca'ijjia cahua quea bihui nee. ¿A'a yahueja epeeji cuana onijje yanijo quea yeno? Chojja, quea bihui nee. ²⁰ Yahue poqui'yajo ca ca oe ojaya epeeji cuana ijjia'ijjia sa po ajja poaje. Quea yeno jjejo-jjashahuaba neineiquiani. Eya jiquio ecua yahue jama poani: Quijje eya poqui'yajo, ecuea epeeji cuana ijjia'ijjia ajja poaje, Eyacuiñajji ejjashahuaba neineiquijji, onijje emimi neineijji pea'ai.

²¹ Majoya Jesosaa huohui canaje pea ejjashahuabaquimeejji: —Eseyaya baacojja esee'yohua bishe eyacuajo caca ajja. Cho. Baacojja etii enajo nequi see'yani, ca'a'ama po'yani. Jjasajajeaquije'yo. Bishe ihuije'yo. Bishe eyacuajo ca ca baacojja eyacuaa cacaña.

²² Pea esohui huohui canaje jama ba'a: —Ena sese cuatatanijo iya ajja meshimisi etiijo. Ena sese cuatata neineianijo, meshimisi ca'a'ama jjaajajeaquimeejji ena sese jashoajeaquije'yo. Cho, ena sese cuatatanijo meshimisi eyacua quea ca'ajo iya cani cuaa —jamaya Jesosaa huohui canaje ejjashahuaba meequijji onijje japeequi majje eyacua caba'yahua, yahuajo jama pojjeama, etiiquianaja esohui jama pojjeama.

Esohui epojja ejomishocajji

(Mateo 12.1-8; Noca 6.1-6)

²³ Majoya Jodioja epojja ejomishocajji Jesosa o shajja'ajjajji cuana nijje etiojijje poquinaje. Que yiyejje poquije quea shoe poanaje. Quejo nequi anoso ai seija canana majje oe pojji ijjia canaje, o shajja'ajjajjiya.

²⁴ Maya Paniseo cuaa ba canaje. Jamajjeya Jesosa nijje mimijajinaje jama ba'a: —¡Bacue oe! Mi shajja'ajjajji poani cuaa chaco cani. Anoso ai seija cani esejaya epojja ejomishocajji. Eseyaya etiiquiana Moisesija etehue'yo jama poani ba'a: “¡A'a chacojji epojja ejomishocajji!”

²⁵ Jesosaa oya cuana acanaje jama ba'a: —¿A'a mi-quea ba jima esohui etehue'yo emeshi mese Dabija, ojaya epeeji cuanaja pea'ai? ²⁶ Yahuajo nei nei Abiata Eyacuiñajji nijje emimijji etii poanijo, Dabija epeeji cuana quea shoe nee po majje Dabi Eyacuiñajji equi yasijje dobiquia poa. Ijjia ca poa pahui, maya Eyacuiñajji yasijje quia ca poa cuaa o bihuiajji. Ojaya epeeji

cuana ijjia mee ca poa pea'ai. Jiquio ca oe Eyacuiñajji nijje mimianiya ca'ijjia cahua; pea cuanaja e'ijjiajji pojjeama.

²⁷ Majoya Jesosa ojjaña nijje jama poanaje ba'a: —Dejja, epona pea'ai pana majje Eyacuiñajjiya oe epojja ejomishocajji aca'yonaje dejja cuana jomishocajji. A'a jjashahuabaquijji jama ba'a: “Epojja ejomishocajji eya jamatii anije”. ¡Cho, quea pame nee acue ma pojja! —Jesosa poanaje—. ²⁸ Eya, ma ojjaña Edoe Mese Emeshi Mese nei poani. Jamajjeya eyaya eyaye nei huohuije epojja ejomishocajji: ¡Quea pame nee nee acue! ¡Pea cuana quea jea nee acue! —Jesosa poanaje.

Meshahuama'yo epo jjameshahuanequi mee ca'yonaje

(Mateo 12.9-14; Noca 6.6-11)

3 Majoya Jesosa Jodioja equi ejjachichaquijji yasijje poqui o'oya majje dobiquinaje. Jomajo dejja meshahuama'yo epo aninaje. ² Jamajjeya Jesosa ba majje Paniseo cuana jama jjashahuabaquinaje ba'a: —Eseyaya etiiquiana jama poani ba'a: “¡A'a chacojji epojja ejomishocajji!” poani. E'e pojja'a Jesosa esejaya etiiquianaja esohui jama poaje, chaco ajja pojja'a jjeja. E'e pojja'a oya chaco caje jjeja, epojja ejomishocajji; meshahuama'yo epo pojja'a jjameshahuanequi mee caje'yo. ¡Caba'ajja sahua! —poanaje.

Jesosa nijje mimijaji sa poanaje. Jamajjeya oya ba neinei canaje Paniseo cuaa.

³ Jamajjeya Jesosaa meshahuama'yo epo iyaa canaje jama ba'a: —¡Poecue e que! ¡Ojjaña cojja nei nequicue, eyiyesama neijo!

⁴ Majoya oya nequisohuajo, Jesosa esohui jaahuanajji nijje, Paniseo cuana nijje jama poanaje ba'a: —¿Yajja poani etiiquiana Moisesija esohui etehue'yo? ¿A'a epojja ejomishocajji pea cuana quea pame acajji pojja'a? ¿A'a quea tai acajji pojja'a? Jamajjeya ¿a'a emanojaa huaquia mee ca'yoyji epojja ejomishocajji? ¿A'a mano mee cajji pojja'a? —poanaje Jesosa.

Jamatii Jesosa Paniseo cuanaja saja'a jima quea mimishi neija jjejojo.

⁵ Jamajjeya Jesosa ojjaña bajea majje quea quene nee nee poanaje. Ojjaña shajjama' poanijo oya quea yeno poanaje. Jamajjeya ohuaya meshahuama'yo epo jama acanaje ba'a: —¡Epeeji, miquea eme jeapisa'ajja'yo socue! —acanaje Jesosaa.

Jamajjeya mejjajja eme' jeapisa ca'yonaje; pea mijjije jayojjaya po'yonaje. ⁶ Jjeja nei Paniseo cuana esecue yasijje cuayaqui majje pea Jodio etii cuana nijje miminaje, emeshi mese Enodeja epeeji cuana nijje pea'ai. Jama poanaje ba'a: —¿Yajja amajje Jesosa quecua ca'yoyji so'o, de? —poanaje Paniseo cuana.

Dejja quea huiso bae sahuajo sohuihuohui canaje Jesosaa

(Mateo 4.24; 12.15-16; Noca 6.17)

⁷ Majoya Jesosa o shajja'ajjajji cuana nijje poquinaje. Janinea bae sahua huasijje poe o'oyanaje. Quea huiso

nee nee onijje poquinaje Janinea meshijo ba'eca cuana, Jodio meshijo ba'eca cuana, ⁸Jenosanenajo ba'eca cuana, Idomea meshijo ba'eca cuana, Jodana cuei ojje mijijje ba'eca cuana, Tinojo ba'eca, Sinonojo ba'eca cuana pea'ai. Jesosaa jjaajaqui mee ca'yoqui shajja'ajja majje o que poeyanaje quea huiso nee nee, de. ⁹Jamajjeya Jesosaa o shajja'ajjajji cuana huoojea canaje bishe jjequiya. Jama poanaje ba'a: —¡Bishe jjequicue! Quea huiso nee nee nequicua quishi ca chana' cuaa mo. Jamajjeya eyaya bishejo nequi majje ojjaña cuana sohuihuohuije.

¹⁰E'e, yahuajo pishana Jesosaa quea huiso jjaajaqui mee ca'yonaje. Jamajjeya quea huiso emano cuana Jesosaa que jjachichaquinaje; mojoiya ca'yonaje oja daqui napajji. Jama poanaje ba'a: —E'e, Jesosaa daqui cuema napa majje jjaajaquije'yo.

¹¹Jesosaa ba majje eshahua cuana siasianaje. Niñepoqui cuana Jesosaa cojja nei ecui'oshajajo nequinaje o bihuiajji. Jama poanaje ba'a: —Jesosaa Quito, miya Eyacuifajji huojea'yo ojjaña jaahuanajji, oja Bacua Ejja quea pame nee —poanaje eshahua cuana.

¹²Jamajjeya Jesosaa eshahua cuana tecueahuoojeacuayajea ca'yonaje jama ba'a: —¡Eshahua cuana, esohui oe ca'acue! ¡A'a ona huohuijji eya Eyacuifajji huojea'yo ojjaña jaahuanajji! —Jesosaa acanaje.

Jesosaa o shajja'ajjajji cuana iyaa canaje 12 huisome

(Mateo 10.1-4; Noca 6.12-16)

¹³Majoya Jesosaa jaasohuaquinaje eyiyo huasijje. Ojjaña ohua sa cani ohuaya iyaa canaje onijje epoqui'yojji. Jiquio dejja cuana o que poeyanaje. ¹⁴Majoya ohuaya ome miji pea beca huisome, 12 huisome dejja babaca ca'yonaje ojaya esohui huohuijji nei epojji. Oya cuana huohui canaje jama ba'a: —Eyaya miquianaya babacanaje enijje e'anijji. Miquianaya huoojeaje ojjaña meshi yasijje ecuea esohui huohuiya.

¹⁵Jesosaa oya cuana quea ca'a po mee canaje eshahua cuana huoojeacuayajea mee'yojji, ojjaña emanoojaa cuana huaquia mee'yojji, ejjaajaqui mee'yojji pea'ai.

¹⁶Jesosaja huoojea'yo esohui huohuijji ma bajjani ba'a: Simohui, ma pea bajjani Peno; oja chahua Anesi; ¹⁷Semeneoja bacua ejja Jacobo, oja chahua Huani pea'ai Jesosaa pea bajjani aca'yonaje Cueji bajjani, oja sohuijo ca ca Boaneje bajjani; ¹⁸Penipe; Matonome; Tomasi; Mateo, ma bejjo jjeshejji poani; Apeoja bacua ejja Satiaco; Simoni Senote; Taneo; ¹⁹Jodasa Isicaniote, ma Jesosaa iña meesahuajji poanaje dejja mimishija quecu'yojji. Mahuiso Jesosaa babaca canaje ojaya esohui huohuijji epojji.

Jesosaa niñeba canaje cuaa

(Mateo 12.22-32; Noca 11.14-23; 12.10)

²⁰Majoya Jesosaa eyiyojo ani equi yasijje jaooque o'oyanaje o shajja'ajjajji nei cuana nijje. Quea huiso nee nee o que jjachichaqui o'oyanaje. Quea huiso nee nee jo Jesosaa, o shajja'ajjajji cuana pea'ai, iijja'ijjia mee jji-ma acanaje. ²¹Ma shajja'ajja majje ojaya enaese poe-

yanaje oja chahua cuana nijje Jesosaa nahueya, Jesosaa dojuhua pea'ai. E'e, onaaya Jesosaa niñeba canaje jama ba'a: —Oya Jesosaa niñe poquinaje —sijje poanaje cuana.

²²Paniseo cuaa pea'ai Jesosaa niñeba canaje: —E'e, Jesosaa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

²³Paniseo cuanaja ejjashahuabaqui'yojji quea tai Jesosaja eba poanaje. Jamajjeya oya cuana tecuea canaje jama ba'a: —¡Shajja'ajjacue oe! ¿A'a acuae jja Edosiquiaa, Satanasa pea eshahua huoojeacuayajea came?

²⁴Chojja. Joya emeshi mese shajja'ajja sa po ajjajo, jja-cuiaquianijo, dejja cuana ma meshijo ba'e chama'yo tii poaje'yo. Cuiñajji ba'e cuana jamaya po pea'aije,

chama'yo tii poaje'yo pea'ai. ²⁵Huapa pojjeama cuana jja-cuiaquianijo chama'yo tii poaje'yo pea'ai. ²⁶Jamaya pea'ai Edosiquiana, Satanasa pea eshahua huoojeacuayajea'yo jojjemo, chama'yo tii po'yoqueaye —Jesosaa poanaje—.

²⁷Cuanaya bacue ba'a: ¿A'a dejja quea ca'a nee jeyo jjima nequijo oja aquiana sii cajji? Chojja, o jeyo majje ojaya aquiana cuana sii caje cuaa. Jiquio ecua e'aquiana mese ebionei jeyo cani jama amajje eyaya eshahua cuana jeacuayajeña —Jesosaa poanaje pea'ai—.

²⁸Jamajjeya eyaya miya e'e jojo nei huohuiña: Eyacuifajjiya ojjaña mimishi cuana, sijjepojji cuana pea'ai cuijea caje'yo. E'e, eya ojjañaja Edoe Mese niñeba cajo cuaa, Eyacuifajjiya ma mimishi cuijea caje'yo pea'ai, ojjaña mimishi cuana ohuaya cuijea caje'yo.

²⁹Jamatii Edojjoshahua Pamejo sijje poajo ca ca, Edojjoshahua Pame niñeba cajo ca ca, Eyacuifajjiya ma mimishi ecuijea'yojji pojjeama tii tii. Jjeya ecuijea'yojji pojjeama; quijje eya ecue Chii nijje eyajo ojjaña huoojea'yojji poaje ecuijea'yojji pojjeama tii tii poaje pea'ai —Jesosaa poanaje.

³⁰Yahuajo Paniseo cuana Edojjoshahua Pamejo sijje poanaje jama ba'a: —Jesosaa Edosiquiana nijjeya aje oe eshahua cuana dejjajo ani huoojeacuayajea cani —jamaya sijje poanijo, Jesosaa oya cuana tecuea canaje.

Jesosaja enaese, echahua mese cuana pea'ai poeyanaje

(Mateo 12.46-50; Noca 8.19-21)

³¹Majoya Jesosaa mimianijo tii, ojaya enaese, oja chahua cuana pea'ai poeyanaje. Esecuejo nequinaje. Onaaya Jesosaa huohui canaje jama ba'a: ³²—Miquena poeyanaje; esecuejo nequi, minijje emimijji —o pejjejo e'anioque'aniya huohui canaje.

³³Jesosaa ojjaña ejjachichaqui'yo bajea majje jama acanaje ba'a: —¿Ache acuae ecuea huapa pojjeama cuana so'o? ³⁴¡Bacue! Jiquio ecuea epeejji cuana ecuea huapa pojjeama cuana jama ecuea quea jea nee nee, ecuea ecue nae quea jea añña jayojja jama. ³⁵E'e, ecue Chii eyajo ani; ojjaña joya ojaya ejjashahuabaqui'yojji jayojja jama ba'yani, ojaya esohuijo jjashajja'ajjaquiani

pea'ai ecuea huapa pojjeama, ecue chahua, ecue jjo'i, ecuea enaese pea'ai —Jesosaa acanaje.

Eso' jeaajaji
(Mateo 13.1-9; Noca 8.4-8)

4 Majoya Jesosa equijo ani cuayaquinaje. Bae sahua huasijje poqui majje anioquenaje. Majoya o que jjachichaquinaje dejja cuana quea huiso nee nee. Jamajjeya bishe yasijje nequisohuaqui majje anioquenaje esohui huohuiya. Dejja cuana ca ca meshijajijo aninaje. ² Jesosaa oya cuana sohuihuohui canaje quea huiso nee nee. Pea esohui ebameesahuajji huohui canaje ona jjashahuabaquijji. Jama acanaje ba'a: ³ —¡Bacue! Ebanajji poquinaje banaa. ⁴ Eso' jeaaja canijo, oe pojji eso' oquequinaje ejiojji yasijje. Poeyanaje cuichojji cuana; ijji canaje eso'. ⁵ Pea eso' oquequinaje mei biajje. Meshi chamajo eso' pohua cuaji'ajja'yonaje. ⁶ Quijje cuayanaje eshequi. Eshequi quea quiyo nee poajo, eso' quiyomano'yonaje. Esajja joca'yajo mano'yonaje. ⁷ Pea eso' oquequinaje acuisha huasijje. Pohua'yo majje jjonohua bebo ca'yonaje. Tatajo nequi jjajja ajja poanaje; mano'yonaje. ⁸ Pea eso' ca ca oquequinaje meshi quea pame yasijje. Pohua'yonaje eso' cuana. Ejjajja quea pame nee nee poanaje. Oe esajo ejajja iye huiso aninaje; pea esajo ejajja quea huiso aninaje, pea esajo quea huiso nee nee aninaje. Sejja ca'yonaje quea huiso nee. ⁹ ¡Jamajjeya ecuea esohui shajja'ajjacue! ¡Jashahuabaquicue! —Jesosaa acanaje.

Esohui ebameesahuajji Jesosaa sohuihuohui canaje ona jjashahuabaquijji
(Mateo 13.10-17; Noca 8.9-10)

¹⁰ Quijje pea cuana o shajja'ajjajji cuana nijje poeyanaje Jesosa que. Huohui'ajja canaje jama ba'a: —Jesosa, ¿apiojji acuae miyaya esohui ebameesahuajji huohuiaña? Maya ecuanaja quea quehua pishana. ¡Bameesahua socue! —poanaje.

¹¹ Oya cuana saja'a canaje Jesosaa: —Miquianaya ca ca oe Eyacuiñajjiya ba meesahua cani eya ojjaña Emeshi Mese nei poaje'yo. Yahuaajo ba mee jjima poa. Pea cuana ca ca ba meesahua ajja. Jamajjeya eyaya esohui ebameesahuajji huohuinaje ona jjashahuabaquijji. ¹² Jamatii ecuea esohui shajja'ajja majje oya cuana jjashahuabaqui ajja, jjashajja'ajjaqui ajja, de. E'e, Eyacuiñajjiya esohui huohuijji Isaia yahuajo nei nei jama poa ba'a:

“Shajja'ajja huicha'a huicha'a majje jamatii jjashajja'ajjaqui ajja poaje. Eyacuiñajjiya acani ba huicha'a huicha'a majje jamatii jjashahuabaqui ajja poaje. Ecuea esohui eba jojjemo, eshajja'ajja jojjemo jjabahuejjaqui'yome. Pea'ai enijje ejjapeequi'yo jojjemo, eyaya mimishi cuijea'yome”.
Jamaya yahuajo nei nei tehue ca poa etiiquiana Isaiaa shajjama' cuanajo —Jesosa poanaje.

Jesosaa esohui ebanajjiyo ba mee canaje
(Mateo 13.18-23; Noca 8.11-15)

¹³ Majoya Jesosaa oya cuana jama acanaje ba'a: —¿A'a ma esohui ebameesahuajji miquianajaya quea quehua? ¿Jamajjeya achajja acuae oe miquianajaya eba poaje pea esohui ebameesahuajji? ¡Shajja'ajjacue! Eyaya miquianaya ba meesahuaje ecuea ehuhui'yo ebanajjiyo: ¹⁴ ¡Iquico ecua ebanajjiya eso' jeaaja cani jayojja jama Eyacuiñajjiya esohui huohuijjiya esohui huohui canaje ojjaña huasijje. Beca cuana ejiojji yasijje oquequi eso' cuana cuichojjiya ijjiayeyo ca'yonaje. ¹⁵ Jamaya pea'ai beca cuana ecuea esohui eya ojjaña Emeshi Mese oe nei poaje shajja'ajja majje jamatii jjashahuabaqui ajja. Jamajjeya Edosiquiaa o que poe majje ecuea esohui pajea mee cani. ¹⁶ Beca cuana eso' mei biajje oquequinaje jayojja jama ecuea esohui shajja'ajja majje quea bhui nee enijje jjapeecuaji'ajjaquiani. ¹⁷ Jamatii ecuea esohui jayojja jama ba'e tiitii ajja. Eso' mei biajje pohua esajja joca'yajo mano'yanii jayojja jama poani; pea cuaa oya napa cajje, Eyacuiñajji nijje jjabepajequi'yanii. ¹⁸ Beca cuana eso' acuisha nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjabee nis-hoquiani. ¹⁹ Jamatii oya cuana quea bejjo nahue poanijo aquianajo quea huiso jjashahuabaquianijjo, quea mete pea'ai poanijo Eyacuiñajjiyo chaco ajja. Esohui pajea cani. ²⁰ Eso' meshi quea pame neejo pohua majje quea jjajja huiso poanaje jayojja jama ca ca beca cuana; ecue sohui shajja'ajja majje jjabahuejjaquiani; ecuea epeejji quea ja'a nee nee poani, pea cuana ejo jjabahuejjaqui meesahua cani; iye huiso pojja'a, quea huiso pojja'a, quea huiso nee nee pojja'a —Jesosaa oya cuana acanaje. Mahuiso.

Esohui ebameesahuajji cuaquijijji
(Noca 8.16-18)

²¹ Majoya Jesosaa pea esohui ebameesahuajji huohui canaje cuaquijijji jama ba'a: —¡Bacue! Cuaquijijji dedo majje eseyaya nequia ajja tepe quimejjeje. Ejaajji quimejjeje pea'ai nequia ajja. Chojja, de. Acui ecaca biajje nequia'aña equi jeaja'ajji. ²² ¡Iquico ecua dedo majje cuaquijijjiya eyajo nequiya ojjaña jeaja'a cani jama jayojja Eyacuiñajjiya ojjaña ecuea esohui onaya ba mee caje'yo quijje. E'e, ojjaña ecuea esohui miquianajaya eba jjeya, Eyacuiñajjiya quijje pea cuana ba mee caje'yo. Quea ja'a nee poaje'yo. ²³ ¡Jamajjeya miquianaaya quea shajja ja'aa shajja'ajjacue! ¡Ecuea esohuijjo jjashahuabaquicue!

²⁴ Majoya Jesosa ojjaña nijje jama poanaje pea'ai ba'a: —¡Ecuea esohui shajja'ajja majje ecuea esohui shahuaba neineicue; jama acue! E'e jjashahuaba neineiquianijjo, Eyacuiñajjiya miquianaya quea huiso nee nee ba meesahua caje. Oe pojji jjashahuabaquianijjo ca ca oe pojji ba meesahua caje. ²⁵ Jamajjeya joya Eyacuiñajjiya esohui ba cani quea huiso pishana, quijje quea huiso nee ba mee caje'yo. Joya ojaya esohui ba sa po ajja ca ca pajea caje'yo. Mahuiso —Jesosa poanaje.

Esohui ebameesahuajji eso' pohuanijo

²⁶ Majoya Jesusaa oya cuana huohui canaje pea esohui ebameesahuajji. Jama poanaje ba'a: —Eyacuiñajjija esohui ejo ebanajjiya eso' bana canaje jama. Eso' ache bame nee quecua canaje quejo, anoso pojja'a. ²⁷ Majoya ojjaña echacojji cuana ecahuijaajo, epojjajo po'ayequiequijo pea'ai eso' pohuani, tiiani pea'ai. Jamatii ojaya ba jjima achajja shai eso' tiiani. ²⁸ E'e, meshi quea pame neejo bana eso' jamatii pohuani, tiiani. Tii majje jjajjani. Majoya jamatii jahuani. ²⁹ Jahuajo, eque meseya echacojji cuana huoojea cani anoso sejja'yohua. Jiquio ecua eso' tii majje quea jjajja huiso poani jayojja jama ecuea epeeji cuana jjeja oe pojji yani; jamatii quijje quea huiso nee nee poaje'yo. Majoya ojjaña jjachichaqui mee caje'yo Eyacuiñajji cojja nei enequijji —jamaya Jesusaa huohui canaje.

Esohui acui so' che biso nee neejo, motasa bajjanijo
(Mateo 13.31-32; Noca 13.18-19)

³⁰ Majoya Jesusaa pea esohui eba meesahuajji huohui canaje jama ba'a: ³¹ —Eyacuiñajjija esohui ojaya epeeji cuanajo jama pea'ai ba'a: Motasa bajjani eso' bana cani equi quibojo. Jiquio eso' che biso nee nee. ³² Tii majjeya ca ca quea cui quemo nee poaje, apo'e cui quemajja. Jamajjeya cuichoiji cuana poeyani motasa acui biajje cahuiya —jamaya Jesusaa huohui canaje ojjaña ba meeji quijje Eyacuiñajjija epeeji cuana quea huiso nee, quea ca'a nee nee po mee caje'yo. ³³ Quea huiso nee pea esohui ebameeji Jesusaa huohui canaje Eyacuiñajjija esohui eba meesahuajji. Onaya quea jjashahuabaqui ja'a pishanajo mi huohui tiitii canaje. ³⁴ Esohui ebameesahuajjijo ca ca oe ojjaña sohuihuohui canaje Jesusaa. Majoya ona poqui'yajo ohuaya o shajja'ajjaji nei ba meesahua canaje.

Beni quea quemo nee nee
(Mateo 8.23-27; Noca 8.22-25)

³⁵ Ma pojajoya siniajo Jesusaa o shajja'ajjaji cuana iyaa canaje; jama acanaje ba'a: —Cua'a, Janinea bae ojje miji yasijje ebesapoqui —poanaje.

³⁶ Jamajjeya ojjaña cuana bae sahuajo ani equi yasijje huoojea majje o shajja'ajjaji cuana bishe ai yasijje nequisohuaquinaje Jesusa ani yasijje, ojje besapoquinaje. Pea cuana ca ca bishe sisi cuanajo besapoquinaje Jesusa quishishi. ³⁷ O besapoquianijo beni quea quemo nee nee poeyanaje. Ena shajohua bishe nane canaje. Jeasohuajja canaje. Cuio canaje enaa. ³⁸ Bishe ai yiye-dojojo Jesusa cahuijaanaje, ehoojjajajji biajje jaa. O shajja'ajjaji cuana quea mete po majje Jesusa ishe acanaje. Jama poanaje ba'a: —Emeshi Mese Jesusa, ¡shequicue oe! ¡Coya aje se hui'i'ya! —taananaje.

³⁹ Shequi'yo majje Jesusa nequisohuanaje. Beni tecuea canaje jama ba'a: —Beni, jamaya, ¡nequioquequicue oe! —majoya bae ena nijje jama poanaje—; ja'a enashajo pojji!

O jama mimime poajo, enashajo popajea'yonaje. Ena shajoma'yo poanaje. Beni popajea'yonaje. ⁴⁰ Majoya Jesusaa o shajja'ajjaji cuana jama acanaje ba'a:

—¿Apiojji acuae nequiana quea mete nee nee poani? ¿A'a mi ejo e'e nei pojjeama poani? Jamajjeya meteani.

⁴¹ Jamajjeya oya cuana bishe aijo ani Jesusajo quea bihui nee poanaje. Ojee miminaje jama ba'a: —¡Ache dejja shai jiquio quea sohui poja nee nee! Beniya, enashajo cuana pea'aiya oja sohui shajja'ajja cani —ojjaña poanaje.

Dejja quea mase nee nee Jesusaa niñe poquipajea mee ca'yonaje

(Mateo 8.28-34; Noca 8.26-39)

5 Jesusa o shajja'ajjaji cuana nijje besapoquinaje Janinea bae ojje miji yasijje, Jjanana meshi yasijje, Jenesane dejja cuanaja meshi yasijje. Jesusa bishe aijo ani ba'eñaqui majje etaja huasijje nequisohuaquinaje. ² Ma meshijo dejja niñepoqui quea mase nee nequi. Eshahua quea huisohua oja eyami nequijji aca'yajje, ma dejja jjanijo emano'yo sa' jaajo nequinaje. ³ Majo tii oya ba'e'yonaje jjanijo, ma emano'yo huananobia cajjijo tii. Oya quea mase nee nee jjejojo jeyo'ajja canaje cuana cadenaa. Jjajeyo meequi ajja, quea ca'a nee nee poanaje. ⁴ Yahuajo onaaya ojaya eme', ejiojji pea'ai jeyo'ajja huicha'a huicha'a canaje cadenaa, jjonohua pea'ai. Jamatii ohuaya cadena cuana jjequisejjajea canaje, sejjaquiquipijea canaje. Onaaya oya jjabahuone meequi ajja, quea mase, quea ca'a, de. ⁵ Mecajje, epojjajo pea'ai oya eyiyo cuanajo, jjani cuanajo pea'ai siasia'ani'yonaje. Jjajehuijjeaqui'aninaje meiya. ⁶ Jamajjeya oya niñepoqui Jesusa quea huesha nee ba majje o que jaaoquecuajinaje. Quea ajjajja jjejojo ecui'oshajjajo nequinaje Jesusa bihuiajji. ⁷ Jamajjeya Jesusaa eshahua huoojeacuayajea ca'yonaje; jama poanaje ba'a: —¡Eshahua dejjajo nequi, cuayaqui'yocue! —Jesusaa acanaje.

Eshahua taa neineinaje jama ba'a: —Jesusa, miya Eyacuiñajji quea ca'a neeja Bacua Ejja. ¡A'a jjeja eya quea nee nee po meeji! Eyacuiñajji huohuicue jama ba'a: “Jjeya eshahua ecuea enapajji pojjeama” acue —eshahua poanaje.

⁹ —¿Ae bajjani miya? —Jesusaa oya acanaje.

—Ecuana quea huiso neejo Quea Shahua Huiso bajjani —saja'a canaje niñepoquiya—. Che mo miyaya ecuana dejjajo nequi cuayaqui mee'yo majje ja'a quea huesha nee huoojeajji! —poanaje eshahua cuana.

¹¹ Quea chipi nee cuichi cuana quea huiso ijia'ijia nequi. ¹² Jamajjeya eshahua cuana Jesusa jama huohuime acanaje ba'a: —Che ecuana dejjajo nequi huoojeacuayajea majje ¡cuichi cuana huasijje ecuana huoojea'yocue!

¹³ —E'e, ipoquicue cuichi cuana huasijje! ¡Dobiquicue! —Jesusa poanaje.

Jamajjeya dejja niñepoqui jeanana'yo majje eshahua cuana cuichi cuana huasijje dobiquinaje, ojjaña. Dobi-qui majje cuichi cuana cuajicuaji jaaoquequinananaje. Bae quea sahua doe nee nee yasijje cuichi cuana hui'i'-

yonaje, ojjaña, beca mil huisome. ¹⁴ Ba majje cuichi jaahuanajji cuana jjaajasoquinaje. Cuajicuaajipoquinaje cuiñajji yasijje huohui pohua. Ojjaña equi yasijje huohui capoquinaje eshahua cuanajo. Cuichi cuanajo, dejja niñepoqui'yo jjima po mee canajejo pea'ai huohui canaje. Jamajjeya ojjaña cuana ma cuiñajji ba'e poeyanaje Jesosa baa; dejja niñepoqui'yo jjima baa pea'ai: —¿Ae shai poanaje, de? —poanaje cuana.

¹⁵ Jesosa que poe majje ojjaña dejja niñepoqui'yo jji-ma ba canaje. Jjeya oya quea bei nequi, daquijji, quea pame nee jjashahuabaquiani. Eshahua cuana chama'yo. Jamajjeya ojjaña cuana quea mete poanaje Jesosajo, ¹⁶ eshahua huoojeacuayajea mee ca'yonajejo, cuichi cuana ehui'i'yojojo pea'ai. Jamajjeya cuichi jaahuanajji cuaa pea cuana huohui majamaja canaje niñepoquijo, Jesosaa eshahua huoojeacuayajea canajejo, cuichi ehui'i'yojojo pea'ai. ¹⁷ Ojjaña quea mete nee poanaje. Huohui canaje jama ba'a: —¡Jesosa, pea meshi yasijje poqui socue oe! Quea mete ca iña mijo mi quea sohui poja nee nee jojoya —poanaje ojjaña.

¹⁸ Jamajjeya Jesosa bishe ai yasijje nequisohuaquina-je ojje ebesapoqui'yojji. Dejja ma niñepoqui poanaje onijje poqui sa poanaje, onijje e'anijji. ¹⁹ Jamatii Jesosaa oya jama acanaje ba'a: —Chojja, ¡miquea equi yasijje poquicue! ¡Miquea huapa pojjeama cuana huohui-cue ejo, Emeshi Mese neijo, ma miya ecuea quea boti neejo quea pame nee anaje huohucue! —Jesosa poanaje.

²⁰ Jamajjeya ojaya equi yasijje poqui majje ohuaya Jesosajo huohui canaje. Ome Miji pea'ai Cuiñajji yasijje huohui canaje pea'ai. Ojaya esohui shajja'ajja majje ojjaña quea bihui nee poanaje: —¡Ache dejja quea ca'a nee nee Jesosa! ¡Eshahua cuana huoojeacuayajea ca'yonaje, de. E'e e, dejja niñepoqui quea pame nee jjeya, de! —poanaje ojjaña.

Jainoja ebacua piona emano'yojaa; pea epona najji poani tii tii

(Mateo 9.18-26; Noca 8.40-56)

²¹ Majoya Jesosa o shajja'ajjajji cuana nijje bae ojje miji yasijje poqui o'oyanaje bishejje. Quea huiso cuana jjachichaqui o'oyanaje o que, Janinea bae sahuajo.

²² Jesosa ojjaña cuana nijje mimianijo, pea Jodio dejja o que poeyanaje Jaino bajjani, ma Jodioja ejjachichaquijji equi jaahuanajji poani. Ecu'i'oshajjajo nequiya oya bihuia canaje. ²³ Jama poanaje ba'a: —Esohui huohuijji, ecuea ebacua piona quea mano nee nee jaa, behahua nee poquijeyonaje. ¡Ecuea equi yasijje poecuajji-cue o napa'ajjaa emeya! Jamajjeya oya huaquijaje'yo. Quea aja nee poaje'yo.

²⁴ Nequisohua majje Jesosa o shajja'ajjajji cuana nijje poquinaje Jaino nijje. Quea huiso cuana poquinaje onijje pea'ai, ojjaña Jesosa nijje nequi canaje cuana.

²⁵ Poquijje, oe eponaa Jesosa ba canaje. Oya quea mano, najji popajea'yo ajja. Ome miji pea beca, 12 shequijame na cuayapajeaqui'yo ajja poa. ²⁶ Quea huiso eshicuijji quiajji cuaa oya na cuayapajeaqui mee'yo jjima acanaje. Jamajjeya eshicuijji sosejje ojja-

ña ojaya ejjeshejji oe poanaje. Jamatii na' huosa jjima tii, quea nee tii. Yahuajo quea mano pishana poanaje; jjeya ca ca quea mano nee nee. ²⁷ Jesosajo shajja'ajja majje, ma Jesosaa ojjaña huaquia mee cani shajja'ajja majje oya poeyanaje o que. Quea huiso nequi dejja tej-je poeyanaje epona. ²⁸ Jamaya oya jjashahuabaquina-je ba'a: —Eya Jesosa daqui napa majje na huosaje'yo —jama jjashahuabaquimeya poanaje epona.

²⁹ Jamajjeya Jesosaja daqui quehuajje napa canaje. Jjeyahua nei najji po pajea'yonaje. Ma epona quea bihui nee jjashahuabaquinaje: —E'e e jjeya nei eya na cuayapajeaqui'yonaje, apoa po'yonaje.

³⁰ Jesosa epona nahuosa mee'yo jeahuajo jjashahuabaquinaje jama ba'a: —E'e nei, jjeyahua nei Eyacuñajjiya a'ya shai huaquia mee ca'yonaje e daqui napa'ajja cajo.

Jjeyahua nei Jesosa jjabajeaquinaje. Ojjaña cuana ej-jachichaqui nequi huohui'ajja canaje jama ba'a: —¿Aya acuae ecuea daqui napa'ajja canaje so'o?

³¹ O shajja'ajjajji cuana onijje jama poanaje ba'a: —Jesosa, quea huiso nee nee ejjachichaqui nequi minijje. Jamajjeya ¿yajjajje shai miyaya huohui'ajjaña jama ba'a: “¿Aya shai ecue daqui napa'ajja canaje?”

³² Jesosaa ca ca bajea neinei canaje epona ena huosa'yo ebajji. ³³ Jamajjeya ma epona ojaya emanomeejji chama'yo ba majje Jesosa que poqui'yonaje; Jesosa yajjajo piopionaje. Ecu'i'oshajjajo nequiya Jesosa huohui canaje ohua na' huosa mee ca'yajje. Ojjaña huohui canaje eponaa. ³⁴ Majoya Jesosaa oya acanaje jama ba'a: —¡She, quea bihui nee pocue! Miya quea ja'a jjashahuabaquinaje jama ba'a: “E'e jojo nei Jesosaa eya huaquia mee caje'yo”. Jamajjeya eyaya miya huaquia mee'yonaje. ¡Quea quijijji jaji oe po'yocue! ¡A'a manoshishi o'oyajji! —Jesosaa acanaje.

Epona sho'i eshe po mee ca o'oyanaje

(Mateo 9.23-26; Noca 8.49-56)

³⁵ Majoya Jesosa epona nijje mimianijo tii, Jainoja epeeji poeyanaje. Jama poanaje ba'a: —Jaino, miquea ebacuase mano'yonaje. Chama'yo tii po'yonaje. ¡Jamajjeya esohui huohuijji a'a iyaajji equi yasijje o baal! —poanaje.

³⁶ Jiquio esohui shajja'ajja majje Jesosaa Jaino jama acanaje ba'a: —¡A'a quea yeno pojji! Jamaya jjashahuabaquicue ba'a: “Jesosa quea ca'a nee nee. Ohuaya ecuea ebacuase shequi mee caje'yo e'e jojo nei” acue.

³⁷ Majoya Jesosaa pea cuana huoojea canaje jama ba'a: —¡A'a enijje poquijji! —poanaje.

Jamajjeya Jesosa, Peno, Satiaco, oja chahua Huani ca ca oe Jaino nijje poquinaje oja equi yasijje, oja bacua baa. ³⁸ Jainoja equi yasijje poqui majje ba cañaquinaje quea huiso dejja cuana, ponaña pea'ai equijo nequi. Epona sho'i emano'yojo ojee pa'ani. Ojjaña quea shajjaquijjo poani. Dehue mia cani emojea'yojji pea'ai.

³⁹ Equi yasijje dobiqui majje Jesosa jama poanaje ba'a: —¿Yajjajje acuae pa neinei, quea shajjaquijjo nee poani nequiana? Jiquio epona sho'i epoquijeyo'yo pojjeama. Oya cahuijaa.

⁴⁰ —Chojja de, oya mano'yonaje, de; shequi'yo ajja —poanaje cuana.

Ojjaña cuana esecue yasijje huoojeacuayajea majje Jesosa o shajja'ajjajji cuana nijje, ejeajji nijje, enaese nijje cuanaya epona sho'i jaa huasijje dobiquinaje pea equecuayijji yasijje. ⁴¹ Me' iña majje epona sho'i oja sohuijo huohui canaje: —iTanitacomí!

Ese Ejja esohuijo ca jama poanijje ba'a: —iEpona sho'i, nequisohuacue! —Jesosaa acanaje.

⁴² Me' iña majje epona sho'i shequi mee ca'yonaje. Jjeyhua nei oya nequisohua majje jeo'yonaje. E'e, oya etii pishana, ahuema' ani, 12 shequi ajame.

Jamajjeya epona sho'i shequi mee ca'yonaje ba majje ojjaña cuana jjajjasoquinaje; jama poanaje ba'a: —iE'e jojo nei Jesosa jjashequimeequi'yojji, de! Jiquio epona sho'i emano'yojaa jjeya nei shequi mee ca'yonaje, de —poanaje.

⁴³ Jesosaa ojjaña huohui canaje jama ba'a: —E'e, ijamatii a'a jjeya pea cuana huohuijji jiquio eya mique bacua shequi mee'yonajejo!

Majoya Jesosa jama poanaje enaese nijje, ejeajji pea'ai nijje ba'a: —iMiquea ebacua piona bobiacue! —poanaje.

Jesosa Nasanena meshi yasijje poqui'yonaje

(Mateo 13.53-58; Noca 4.16-30)

6 Majoya Jesosa jomajo ani poqui o'oyanaje ojaya cuiñajji yasijje, Nasanena huasijje. O shajja'ajjajji cuana nijje poquinaje. ² Epojja ejomishocajji Jodioja equi ejjachichaquijji yasijje poqui majje dobiquinaje. Esohui huohui canaje. Ojaya esohui shajja'ajja majje ojjaña cuana quea tecue nee poanaje, Nasanenajo ba'eca cuana. Oya Jesosa Joseja jea poso acanaje cuaa.

—iDe! ¿Yajjajje shai jiquio dejjaa Jesosaa esohui quea ja'a nee nee huohui cani? ¿Eyacuiñajji jayojjaya jjaajajqui mee ca'yani emanojaa quea huiso nee, de? ³ Oya aje oe acui cacajjija bacua ejja pojja'a. Oja nae Mania bajjani, oja chahua cuana Jacobo, Jose, Simohui, Jonasa pea'ai bajjani. Oja jjo'i cuana pea'ai jiquiojo ba'e.

Jamajjeya quea quene poanaje Jesosa nijje; Joseja jea poso cajaa acanaje cuaa. ⁴ Jamajjeya Jesosaa oya cuana jama acanaje ba'a: —E'e de, pea cuaa Eyacuiñajjija esohui huohuijji shajja'ajja cani. Jamatii ojaya cuiñajjijo ojaya huapa pojjeama cuana ca ca oe o shajja'ajja sa po'yo ajja. Oya jayojjaya miqianaya e shajja'ajja sa po'yo ajja.

⁵ Jamajjeya oya cuana shajja'ajja sa po'yo ajjajo, oya Eyacuiñajjija Bacua pojjeama posojo, Jesosaa oe pojji napa'ajja cajje jjaajajqui mee ca'yonaje. Ma dejjaa ajjima acani oe pojji nei acanaje Nasanenajo. ⁶ Jamajjeya Jesosa jjashahuabaquinaje jama ba'a: —¿Yajjajje shai Nasanenajo ba'eca cuana quea sapa ca'a poani? Ejo e'e nei jjashahuabaqui ajja —poanaje.

Jamajjeya Jesosa o shajja'ajjajji cuana nijje poquinaje quea huiso cuiñajji sisi cuana huasijje esohui huohuiya.

Jesosaa o shajja'ajjajji huoojea canaje esohui huohuiya

(Mateo 10.5-15; Noca 9.1-6)

⁷ Majoya Jesosaa o shajja'ajjajji 12 huisome iyaa canaje o que. Oya cuana quea ca'a po mee canaje eshahua cuana huoojeacuayajea'yojji, ojjaña emanojaa cuana huaquia mee'yojji, ejjaajajqui mee'yojji pea'ai. Oya cuana becanejijji pea'ai huoojea canaje ojaya esohui shajja'ajjajji cuana pea cuiñajji cuana huasijje ojaya esohui huohuiya. ⁸ Huohui canaje jama ba'a: —iJjeya a'a aquiana dojojji! ;Oe acui ejjaquecuaca'a-quijji dojocue, beca pojjeama! ;Bashosoco bobi dojojji a'a dojojji! ;Ejjeshejji, bobi pea'ai a'a dojojji! ⁹ ;Ejiojji shejee oe huosho'yocue! ;Daqui oe nei, ma miquea eyamijo ba'e nei oe dojocue, beca pojjeama! ¹⁰ ;Pea cuiñajji yasijje poqui majje sa'ajjacue oe dejja miquea epeejji epojji, joya bei bei! ;Ojaya equijo anicue ma cuiñajjijo nequi majje! ¹¹ E'e pojja'a beca equijo, beca cuiñajjijo miquea esohui shajja'ajja sa po'yo ajjajo, niñeba canijo pea'ai, ;oya cuana jeajeana'yocue! Poquijje'yohua jama acue ba'a: “Eyaya miqianaya cajaa aje'yo, quea mimishi mi coma. Eyacuiñajjija miya ba cani quea mimishi nee nee. Ohuaya miya quea nee nee po mee caje'yo” acue —Jesosaa poanaje.

¹² Jamajjeya Jesosa shajja'ajjajji cuana poquinaje. Ojjaña cuiñajji cuana huasijje esohui huohui canaje. Jama poanaje ba'a: —iMiquea mimishi cuanajo quea yeno pocue! ;Mimishi pajea'yocue Eyacuiñajjija epeejji epo'yojji! —acanaje cuaa.

¹³ Quea huiso eshahua cuana dejja cuanajo nequi huoojeacuayajea ca'yonaje. Quea huiso emanojaa cuana acuijajja seiyiya shicui majje jjaajajqui mee ca'yonaje, huaquia mee ca'yonaje pea'ai, Jesosa shajja'ajjajji cuaa.

Enode Antipaa Huani sapa jajasejjajea mee canaje

(Mateo 14.1-12; Noca 9.7-9)

¹⁴ Jesosa Janinea meshijo anijo, Janinea meshi meseya Enode Antipa bajjaniya shajja'ajja canaje onaja ehuhui'yo ojo. Beca cuana Jesosa Huani shequi o'oyanaje poso acanaje jama ba'a: —E'e nei jiquio dejja aje oe Huani, ma ona besameejji poa. E'e pojja'a oya mano'yo majje shequi o'oyanaje. Jamajjeya ohuaya Eyacuiñajjija jayojjaya acani, ma dejjaa ajjima acani —poanaje beca cuana.

¹⁵ Pea cuana ca ca jama poanaje ba'a: —Chojja, oya etiiquiana Enia, ma yahuajo nei Eyacuiñajjija esohui huohuijji poanaje poe o'oyanaje.

Pea cuana ca ca jama poanaje ba'a: —Oya ca ca oe Eyacuiñajjija esohui huohuijji eyacua, yahuajo nei nei ba'e Eyacuiñajjija esohui huohuijji jayojja jama.

¹⁶ Enode Antipa ca ca onajaya ehuhui'yo Jesosajo shajja'ajja majje quea mete nee jama poanaje ba'a: —E'e de, yahuajo ecuea esohuijo Huani sapa jajasejja ca poa. Oya shequi o'oyanaje e'e jojo nei. Jamajjeya Eyacuiñajjija jayojjaya acani ma dejjaa ajjima acani; quea huiso huaquia mee cani —poanaje Enode.

¹⁷ E'e, yahuajo emeshi mese Enode Antipaja edoe mese Penipeja ehuanase Enodiasí bajjani Huani nijje quea quene nee nee poa. Jamajjeya Enode Antipaya Huani iña mee ca poa; jeanobiajea mee ca poa. Enodiasíya aje oe oja yahue huei ca poa Enode nijje eba'ejji, ojaya esha mese nijje eba'ejji. ¹⁸ Jamajjeya Huaniya yahuajo Enode Antipa jama tecueame aca poa ba'a: —¡Miyaya aje oe mique doeja, Penipeja ehuanase Enodiasí a'a huana'yojji! Jamaya quea mi-mishi —Huaniya aca poa.

¹⁹ Jamajjeya ohua tecuea cajje quenequenea poa Enodiasí Huani nijje. Quecua sa aca poa. Jamatii quecua jjima; ²⁰ oya Enode quea mete poanaje. Oya jjas-hahuabaquinaje Huani Eyacuiñajji esohui huohuijji nei neiyojo, ojaya epeeji nei poanaje. Jamajjeya nahue canaje Enodiasíya equecua ca poaje jjejojo. Huanija esohui shajja'ajja sa poa Enode Antipa, jamatii ojaya quea quehua. Huani equi ejjajeanobiaquiijji jaa iyaa huicha'a huicha'a canaje esohui huohuiya. ²¹ Jamatii quiije Enodiasíya Huani sapa jajasejja mee canaje. Jiquio jama poanaje ba'a: Enodeya o cuaya poa pojjajo ojjaña ojaya epeeji cuana iyaa canaje ojee ijjia'ijjiaa, majamajaqui baa pea'ai. Ojaya echaco meesahuajji, dejja etii cuana, sohuinano huoojeajji poani cuana pea'ai, Janinea meshijo ba'e dejja etii cuana pea'ai quea huiso nee nee iyaa canaje. ²² Ojjaña ijjia'ijjia'anijo, Enodiasíya bacuase pea'ai oe nei majamaja nequinaje ojjaña eba'ji, quea bhui nee epo meeji. Enode Antipa quea bhui nee nee poa epona sho'ijo. Jamajje onijje miminaje jama ba'a: —¿Ae shai sa miya poani? ¡Huohuicue mo! Eyaya joya miya sañaya quiaje e'e jojo nei, she —acanaje Enodeya—. ²³ E'e jojo nei she coya miya saje aje mi quiaje; miya huohuiañaya ca mi ca quiaje, ecue meshi sejja aje mi quiaje miquea epojji —huohui neinei canaje Enodeya.

²⁴ Jamajjeya epona sho'i poquinaje ojaya enaese Enodiasí huohui'ajja.

—E'e —oja nae poanaje—, e'e, ¡Huani sapa jajasejja-jea meequicue she!

²⁵ Epona sho'i poe o'oyanaje Enode que. Huohui canaje jama ba'a: —Huani, ma ona besameeji poani ejeanobiajaa. ¡Ojaya esapa jajasejjae'yo majje piatojo jjequicue jjeyahua nei! Maya eya sa poani.

²⁶ Ma shajja'ajja majje emeshi mese Enode quea aj-jajja nee nee poanaje. Jamatii ojaya esohui epona sho'i nijje ojjaña ojaya epeeji cuana shajja'ajja canaje. Jamajjeya ojaya esohui pajea ajja, Enodeja. ²⁷ Jamajjeya ohuaya sohuinano cuana huoojea canaje: —¡Epona sho'ija esohui jayojja jama acue! ¡Huani ma ejeanobiajaa oe sapa jajasejjaequicue! ¡Jjequicue jjeyahua nei! —poanaje.

²⁸ Jjeyahua nei sohuinano cuana poquinaje Huani que. Huani sapajajasejjae ca'yonaje. Esapa jjequi canaje piatojo. Epona sho'i quia canaje. Majoya ohuaya Huanija esapa oja nae yasijje quia cañaqui'yonaje, epona sho'ia. ²⁹ Majoya aje oe Huani shajja'ajjaji poani huohui canaje cuaa. Jamajjeya oya cuana poeyanaje

o dojo'yohua, emojea'yojji. Mojea'yo majje papoqui'-yonaje Jesosa huohuiya.

Jesosaa 5.000 dejja cuana bobia canaje

(Mateo 14.13-21; Noca 9.10-17; Huani 6.1-14)

³⁰ Majoya quiije pishana Jesosaja huoojea'yo cuana ojjaña cuiñajji yasijje esohui huohuiya poqui huacuaya poe o'oyanaje o que. Oya cuana huohui poñaquinaje ojjaña ohua acanaje, ojjaña ojaya esohui ma ohua huohui canaje pea'ai huohui canaje Jesosa huasijje.

³¹ Quea huiso nee nee dejja poe majamajanijo ijjia'ijjia meeme ajja. Jamajjeya Jesosaa oya cuana acanaje: —¡Cua'a, dejjama huasijje ejomishocaqui! Quea huiso nee nee ejjachicaqui nequi cuaa se ijjia'ijjia mee jjima acaje —Jesosaa acanaje.

³² Jamajjeya Jesosa o shajja'ajjaji nijje nequisohuaquinaje bishe ai yasijje. Besapoquinaje quima huasijje.

³³ Jamatii Jesosa besapoquije ba majje quea huiso dejja cuana cuiñajji cuanajo ba'e ejiojjije poqui canaje Jesosa baa. Poquicuajinaje ma Jesosa besapoquije yasijje. Ebionei jjaja onaya aniñaquinaje, Jesosa hui que añaquiya. ³⁴ Quiije pishana Jesosa o shajja'ajjaji cuana nijje ba'eñaquinaje. Bishe aijo ani nequisohuaquinaje etaja huasijje. Quea huiso nee nee cuana ba cañaquinaje. Onajo Jesosa quea yeno jjashahuabaquinaje. E'e, oya cuana quea yeno, quea mano nee ñajajja jaahua-na jjima jayojjaya. Jamajjeya oya cuana sohuihuohui canaje quea huiso nee nee Jesosaa. ³⁵ Siniajo Jesosa que poe majje o shajja'ajjaji cuaa huohui canaje jama ba'a: —Jesosa, sinia coma, de. Chama' jiquiojo bobi, equi pea'ai. ³⁶ ¡Dejja cuana huoojeacue cuiñajji sisi cuana huasijje oja bobi jjesheya!

³⁷ —Chojja. Ca'aniahua cuana. ¡Bobiacue oe miquiaa-ya! —Jesosaa acanaje.

—¿Yajja yajji? Ecuanaa bobi quea huiso nee nee jjeshe ajja. Quea nahue nee nee, de, 200 epojja echacjji sosejje. E'e, quea huiso pojjajo chaco majje sosejje, pahui jjeshe cajji, ca ojjaña bobiajji.

³⁸ Jamajjeya Jesosaa jama acanaje ba'a: —¿Ache huiso pahui yani esejaya? ¡Pahui baquicue!

Ba majje oya cuana jama poanaje ba'a: —Jesosa, esejaya bobi oe pojji yani. Me oejje pahui, beca nahuoo sisi yani pea'ai —poanaje o shajja'ajjaji cuana.

³⁹ Jesosa jama poanaje ba'a: —Ojjaña cuana jama acue ba'a: “¡Ojjaña anioquecue sipone biajje!” acue —Jesosaa acanaje—. ¡Ojee jja'anichicha meequicue! ¡Anijji becabeca anioque meeme acue!

⁴⁰ Jamajjeya quea huiso sipone yanijo, ojjaña cuana anioque mee canaje sipone biajje. Jomajo iye huiso anioquenaje, 50; quea huesha pishana iye huiso anioquenaje, 100. Jamaya anioque bamebamenaje cuana ojjaña, de.

⁴¹ Majoya Jesosaa me oejje huiso pahui, nahuoo sisi becanejjijji pea'ai jjeshe majje eyahuasijje jjabajea-sohuaquinaje Eyacuiñajji nijje emimijji. Bobijo mimi majje pahui miji canaje. O shajja'ajjaji cuana quia mee canaje dejja cuana e'anioqueani yasijje. Nahuoo sisi pea'ai miji majje quia mee canaje ojjaña huasijje. Quia

capoquijeya quea huiso nee nee jipanaqui poquipo-quinaje bobi, de. ⁴² Jamajjeya ojjaña ijia neinei canaje. Quea jeje poanaje. ⁴³ Ojjaña jeje majje eshajja'ajjaji cuaa chicha ca'yonaje bobi ojjaña ijia ijasejja. Jjepai ai yasijje iya ca'yonaje. Quea huiso nee poanaje, 12 jepai huisome quea cuata poanaje bobi e'ijjasejja. ⁴⁴ E'e, Jesosaa quea huiso nee nee bobia canaje, de, 5.000 deaja.

Jesosa bae ena biajje poquinaje

(Mateo 14.22-27; Huani 6.16-21)

⁴⁵ Jjeyahua nei siniajo Jesosaa o shajja'ajjaji cuana huoojea canaje. Jama acanaje ba'a: —¡Bishe ai yasijje nequisohuaquicue! ¡Bae ojje miji yasijje besapoquicue Betesaida cuiñajji yasijje! Quijje eya poquije mi que, pea cuana huoojea'yo majje —poanaje.

⁴⁶ Majoya deaja cuana quea huiso cuana huoojea'yo majje Jesosa eyiyo huasijje jaasohuaquinaje oe nei oja Chii nijje mimiya. ⁴⁷ Mecajje Jesosa oe nei jomajo aninaje, eyiyojo. O shajja'ajjaji cuaa ca ca bishe ai quea huesha nee yo canaje, bae yiyesama huasijje.

⁴⁸ Jomajo ani Jesosaa oya cuana ba canaje, janobajjima nei yoyo'ajja ba'e. E'e, beni quea quemo nee poyanaje. Bishe cuiajea ca'yonaje huacuaya. Enashajohua bishe janobajjima nei nane canaje, cuio canaje enaa. Mecashono quea apo nee nee poanaje. Jamatii Jesosa eyiyojo ani o que poquinaje ena biajje. ⁴⁹ Jesosa ena biajje jeojejebeje ba majje o shajja'ajjaji cuana quea mete nee nee poanaje. Quea metejo taaanaje jama ba'a: —¡Coya ae shai poeje ba'a! —siasianaje—. ¡Coya eshahua, de!

⁵⁰ Jamajjeya Jesosaa oya cuana huohui canaje jama ba'a: —¡A'a quea mete pojji! Eya jja iña jiquio, eshahua pojjeama. ¡Quea jaji nee pocue!

⁵¹ Majoya Jesosa bishe ai yasijje aniajo, beni nequioquequi'yonaje. Jamajjeya ojjaña cuana bishe aijo aniya jjajjasoquinaje. Quea jaji nee po'yonaje: —E'e pojja'a, e'e jojo nei, de —poanaje.

⁵² E'e, Jesosaa ma dejjaja ba jjima acanaje; 5.000 deaja cuana bobia canaje me oeje pahuijo. Jamatii oya canaja eba pojjeama Jesosa quea ca'a nee nee, ojjaña acani. Oya cuana ca ca quea jjashahuabaqui ja'a po jji-ma.

Cuichi cuana hui'i'ya poa meshi yasijje Jenesane' meshi yasijje besapoqui o'oyanaje

(Mateo 14.34-36)

⁵³ Quijje pishana bae ojje miji yasijje, Jenesane' meshi yasijje besapoqui o'oyanaje Jesosa. Ba'eñaquinaje o shajja'ajjaji cuana nijje. ⁵⁴ Bishejo ani nequisohuaquinaje etaja huasijje. Deaja cuaa jomajo ba'eya Jesosa ba canaje yahuajo. ⁵⁵ Jamajjeya o ba o'oya majje ojjaña iyaaqui canaje Jesosa que epoecuajjiji. Ojjaña emanojaaca cuana equipajaajjijo jaa Jesosa que ye canaje.

⁵⁶ Jamajjeya Jesosa cuiñajji quea quemo huasijje, pea cuiñajji sisi cuana huasijje pea'ai, equi cuana huasijje pea'ai dobiqui yajo, deaja cuaa emanojaa cuana jjequi canaje o que, jjaajaqui mee'yohua. Huohui canaje

cuaa jama ba'a: —Jesosa, ojjaña emanojaaca cuana mique daqui che napa'ajja meecue ehuaquia'yojji, ejaajaqui'yojji —acanje.

Ojjaña Jesosaja daqui napa'ajja majje jjaajananaqui'yonaje, huaquia'yonaje pea'ai, de.

Quea jjashahuabaqui tai poanijo quea tai poani

(Mateo 15.1-9)

7 Majoya Paniseo cuana, Jodio esohui huohuijji cuana pea'ai Jenosanenajo ba'e Jesosa que poeyanaje. ² Poe majje o shajja'ajjaji cuana ba canaje ijia'ij-jia'ani eme' shacua neinei jjimajo. Jamajjeya Jesosa tecuea canaje Jodio etii cuaa. Jama poanaje ba'a: —Esohui huohuijji, ¿apiojji acuae mi mi shajja'ajjaji cuana eme' shacua neinei jjimajo ijia'ijjiani? —acanje Jodio etii cuaa.

³ E'e, ojjaña Jodio cuaa aje oe ijia jjimahuajo eme' shacua neinei cani; quea huiso shacuame acani, 7 huisome, ojaya etiiquiana cuanaja esohui jama. ⁴ Equi aquiana jjeshejji yasijje bobi jjeshe majje eme' shacua neinei cani ijia jjimahuajo pea'ai Jodio cuanaja etii-quianaja esohui jayojja jama. Quea huiso etiiquianaja esohui jayojja jama acani pea'ai: piato cuana, oña cuana, caneco cuana jamaya topo neinei cani pea'ai; meshimisi ca'a quea quemo cuana, e'anioquejji cuana jamaya topo neinei cani pea'ai. ⁵ Jamajjeya Paniseo cuana, Jodio etii cuana Jesosa nijje mimijajinaje: —Jesosa, ¿apiojji acuae mi mi shajja'ajjaji poanija esejaya etii-quianaja esohui jama po ajja? ¿Apiojji acuae ijia'ijjia jjimahuajo eme' shacua neinei ajja, de? —poanaje.

⁶ Jesosaa oya cuana quea tecue saja'a canaje jama ba'a: —¡Miquianaya ca mi ca oe jjadasiaquijji nei nei! Eyacuiñajjija esohui huohuijji Isaiaja esohui miquianajo e'e jojo nei poa. E'e, yahuajo nei Eyacuiñajjiya Isaija tehue mee ca poa jama ba'a:

“¡Iquio deaja cuaa eya bihuia nisho cani. Jamatii jjas-hajja'ajjaqui ajja. ⁷ Jamajjeya ecuea equi yasijje jjachichaquiani ejjachichajaequijji. Ohuaya ojaya ejjashahuabaqui'yojji huohui cani, ecuea esohui pojjeama”. Jesosa Isaija yahuajo tehue ca poa miquianajo —Jesosa poanaje—. ⁸ De, ¡yajja acuae nequiana poani so'o? ¿Apiojji acuae Eyacuiñajjija esohui pajea'yaña etiiquianaja esohuijo? ⁹ E'e, miquianaya jama poani ba'a: ¹⁰ Yahuajo nei Eyacuiñajjiya Moisesi tehue mee ca poa oja sohui jama ba'a: “¡Mique chii, miquea enaese etii pea'ai jaahuanacue! Joya oja chii, oja nae pea'ai ca-jaa acajo ¡cajahuejjajea ca'yahua cuaa, meiya!” Jamanya tehue mee ca'ya poa yahuajo nei. ¹¹ Miquianaaya ca ca huohui tai yaña jama ba'a: “Deja oja chii etii nijje, oja nae etii nijje pojja'a camimiyahua jama ba'a: “Eya-ya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuajji”. Jamanya huohui taiyaña miquianaaya. ¹² Jamajjeya oja chii etii, oja nae etii pea'ai pajea meeyaña, miquianaaya. ¹³ Eyacuiñajjija pea esohui quea huiso nee pajea mee'yo sa'aña etiiquianaja esohui yajji nisho —Jesosaa Jodio etii acanje.

¹⁴ Jamajjeya Jesosaa ojjaña cuana iyaa majje huohui canaje jama ba'a: —¡Shajja'ajjacue mo, jjabahuejja nei-neiquicue oe! ¹⁵ Bobi cuanaajo, ojjaña aquiana enabajje dobiqianajo pojjeama miqianaya quea mimishi poani. Chojja. Quea jjashahuabaqui taijo, esohui quea tai miquea enabajje cuayaquianajo ca ca quea mimishi poani. Eyacuiñajjiya maya ba cani quea mimishi —Jesosaa acanaje.

¹⁶ —E'e, ¡miqianaaya quea shajja ja'aa ecuea esohui shajja'ajja majje jama acue! ¡jjashahuabaquicue oe!

¹⁷ Majoya Jesosaa ojjaña cuana jeanana majje equi yasijje dobiquinaje o shajja'ajjajji cuana nijje. Dobiqimajje o shajja'ajjajji cuaa huohui ajja canaje: —Jesosa, ecuanajaya ca ca esohui quea quehua miquea. ¡Che mo oe ba meesahuacue! —poanaje.

¹⁸ —¿A'a ecuea esohui miqianajaya ba jjima pea'ai? —Jesosa poanaje—. ¿A'a miquea eba pojjeama? Eme' shacua neinei jjimajo pojjeama miqianaya Eyacuiñajjiya quea mimishi ba cani. ¹⁹ ¡Bacue! Ojjaña bobi, pea aquiana pea'ai enabajje ijiajaja majje see ai yasijje dobiqianajo. Quijje jamatii seejeaje'yo. ²⁰ Joya quea tai jjashahuabaquianaya ca ca esohui tai jeacuaya cani. Maa-ya oya quea tai po mee cani: Quea mimishi Eyacuiñajjiya oya ba cani. ²¹ E'e, ejjashahuabaqui'yojji quea taijo pea eponajo ba'e sa poani, peaja yahuejo ba'e sa poani, sii cani, siajje poani, pea quecua cani pea'ai, ²² quehuajje cojjo cani, quea dejja tai poani, quea nishehui poani, ojjaña mimishi acani, ona dasiajji poani, quea mimishi pea nijje ba'yani, pea jayojja ba'e sa poani, mimijajjani pea'ai. Jama poani ba'a: "Eya oe nee quea pame nee" poani, esho'i jayojja mimi naanaani, Eyacuiñajji niñeba cani pea'ai. ²³ E'e jojo nei ojjaña joya jama acani Eyacuiñajjiya ba cani quea mimishi, quea mimijjequijjea; bobi ijia cani eme' topo neinei jjimajo pojjeama quea mimishi poani —jamaya Jesosaa o shajja'ajjajji cuana saja'ame acanaje.

Cananea epona Jesosa que poeyanaje

(Mateo 15.21-28)

²⁴ Majoya Jesosa ma equijo ani poquinaje pea meshi yasijje. Tino pejejo, Sinono pea'ai pejejo aninaje. Jjeya Jesosa mimi sa po ajja ojjaña cuana nijje. Jamajjaya equi yasijje quehua dobiquinaje o shajja'ajjajji cuana nijje. Jamatii oya quehuajje ani meemee ajja; jjanequiquehuaqui meemee ajja. ²⁵ E'e, jjeyahua nei oe eponaa shajja'ajja canaje Jesosa jomajo ani. Jamajjeya o que poeyanaje. Oya pea, Jodio epona pojjeama, Jieno pona pea meshijo ba'e, Sinia meshijo, Penisajjo ba'e. Ojaya ebacua piona huasijje eshahua yahuajo dobiqia poa. Jamajjeya enaese Jesosa que poe majje ecui'oshajjajo nequinaje o bihuiajji, onijje emimi neinei. Jama poanaje ba'a: —Emeshi Mese nei, ¡ecuea ebacua piona jjaajaqui mee'yocue, quea mano nee nee jaa, quea niñe nee nee jaa! —enaese poanaje.

²⁷ Ma enaese Jodio pojjeamajo, huapa jayojja. Jesosaa oya saja'a canaje jama ba'a: —¿A'a cuae ecue bacuaja bobi jeajeaje iñahuehuaja e'ijjajji? ¿A'a cuae jamaya quea pame? —Jesosa poanaje.

²⁸ Epona quea shoe jama jjejojo jama poanaje ba'a: —E'e, Emeshi Mese nei. ¡Jamatii o huonejjiya bobi ijia canijo, eshaa oquequianajo ijia cani iñahuehuaa! —acanaje enaeseya.

²⁹ Jamajjeya Jesosa quea bihui nee poanaje: —Epona, miya ca ca oe quea ja'a nee, quea pame nee ejo jjashahuabaquiani. Jamajjeya eyaya miquea esohui jayojja jama jjeya nei aje'yo. Miquea ebacua piona jjaajaqui mee'yonaje. Eyaya eshahua ojo nequi huoojeacuaya-jea'yonaje. ¡Quea bihui poquicue miquea equi yasijje! —Jesosa poanaje.

³⁰ Jamajjeya jjeya nei ma epona poquicuaji'yonaje oja equi yasijje. Ba cañajji'yonaje oja bacua piona quea pame nee, eshahua'yo, ejaajji biajje quea bei ani'yo.

Jesosaa shajjaqueba jjashajjaja'aqui mee ca'yonaje mimi mee ca'yonaje pea'ai

³¹ Jjeyahua nei Jesosa Tino pejejo ani poquinaje. Sinono yejjenana majje Ome Miji pea'ai Cuiñajji cuana yejjenana majje, Janinea bae yasijje poe o'oyanaje, ma Dejja Eyacuiñajji ba po jjimaja bae bajjani yasijje.

³² Majoya pea cuaa dejja shajjaqueba, mimi'ajja pea'ai ye canaje o que. Jama poanaje ba'a: —Jesosa, ¡iquio dejja shajjaqueba, mimi'ajja pea'ai. ¡Oya che napa'ajjacue emeya quea ja'a nee epojji!

³³ —E'e, —Jesosa poanaje. Jamajjeya ma dejja oe nei dojo canaje huesha'ama onijje mimiya, o huaquia mee'yohua. Ojaya eme sisi shajjaquebaja eshajja huejja huasijje jeanobia canaje. Majoya jjamecuichoqui majje ana napa canaje emeya. ³⁴ Eyahuasijje jjabajea-sohuaquinaje Eyacuiñajji nijje emimijji. Jjajjeanajequinaje jama ba'a: —¡Quea ja'a pocue! —poanaje shajjaqueba nijje. Jesosaja mimijo: —¡Epata! —poanaje.

³⁵ Jesosa mimi jeahuajo, ma dejjaa quea ja'a nee nee shajja'ajja ca'yonaje. Miminaje quea ja'a nee. ³⁶ Majoya Jesosaa ojjaña cuana huohui canaje jama ba'a: —E'e, eyaya shajjaqueba jjashajjaja'aqui mee'yonaje, mimi mee'yonaje. ¡Jamatii pea cuana a'a jihuhuijji so'o! —Jesosaa jamaya ojjaña cuana huohui canaje.

Jamatii oya cuaa huohui majamaja canaje ojjaña huasijje. ³⁷ Shajja'ajja majje ojjaña quea bihui nee jama poanaje ba'a: —E'e e, Jesosaa ojjaña acani quea pame nee nee. E'e e, shajjaqueba jjashajjaja'aqui mee ca'yonaje jjeya nei. Mimi'ajja pea'ai quea ja'a nee mimi mee ca'yonaje —jamaya ojjaña Jesosa bihuia canaje.

Jesosaa quea huiso cuana bobia canaje, 4.000 dejja

(Mateo 15.32-39)

8 Majoya quijje pishana quea huiso nee nee cuana poeyanaje. Jesosa que jjachichiqui o'oyanaje. Onijje ani tiiti canaje esohui shajja'ajjaa. Bobima' poanaje. Jamajjeya Jesosaa o shajja'ajjajji cuana iyaa canaje. ² O que poeyajo, huohui canaje jama ba'a: —¡iquio dejja cuana enijje nequi pea beca peejjima cahuime. Ojaya bobi oe poanaje. Jamajjeya eya ojo quea yeno jjashahuabaquiani, bobimajo. ³ Oja equi yasijje huoo-

jea sa po'yo ajja, quea shoe nee nee; ejiojjijje poquiani-jo bobi yasijje po chana'.

⁴ O shajja'ajjajji cuanaa Jesosa saja'a canaje: —E'e. Ji-quojo chama' bobi, dejjama'. ¿Yajja yajji? Oya cuana quea huiso nee nee ebobajji. ¿Achacua pahui ejjeshejji ojjaña bobajji? —acanae cuaa.

⁵ —¿Ache huiso pahui miquea yani? —Jesosaa huohui'ajja canaje.

—Me oejje becanejjijji pea'ai, 7 pahui yani —poanaje.

⁶ Jamajjeya Jesosaa ojjaña ejja'anichichaqui'yo ani cuana jama acanae ba'a: —iMeshijo anioquecuel! —acanae.

Majoya Jesosa ma 7 pahui jjeshe majje Eyacuiñajji oja Chii bihuia canaje bobijo. Majoya pahui miji canaje. O shajja'ajjajji cuana quia canaje. Majoya oya cuanaa dejja cuana huasijje quia canaje. Quia capoquije quea huiso nee nee jjapanaquipoquinaje, bobi. ⁷ Ojaya oe pojji nahuo sisi yaninaje pea'ai. Oya jayojja Jesosaa nahuo sisi miji majje quia canaje o shajja'ajjajji cuana quee ojjaña cuana huasijje equiajji. ⁸ Jamajjeya ojjaña cuaa ijji canaje; quea jeije poanaje. ⁹ Ijji majje, mi ijji ajeyo majje bio ca'yonaje jjepai ai yasijje, o shajja'ajjajji cuaa. Mepe ca'yo majje quea huiso poanaje, 7 jjepaime. Jamatii quea huiso nee nee dejja cuana bobia canaje, 4.000 dejja. ¹⁰ Majoya Jesosaa ojjaña cuana huoojea canaje oja equi cuana huasijje. Jesosa ca ca bishe ai yasijje nequisohuaquinaje o shajja'ajjajji cuana nijje. Besapoquinaje ojje, pea meshi yasijje Majadana meshi yasijje, pea bajjani Namanota meshi yasijje, ma Ena Ta'a Huoi bajjani yasijje.

Jodio etiya Jesosaa pana canijo huohui'ajja canaje

(Mateo 16.1-4; Noca 12.54-56)

¹¹ Majoya Paniseo cuana poeyanaje Jesosa que. Onijje mimicuiajejanobiajea sa poanijo jama anisho canaje ba'a: —Esohui huohuijji Jesosa, ¿A'a miya Eyacuiñajji huoojea'yo nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiya jayojja jama paname a'ajja' eyajo ecuanaja ebajji! —huohui nisho canaje.

Jamatii oya cuaa Jesosa Eyacuiñajji huoojea'yo pojjeama poso acanae pea Paniseo cuana: —Chojja, Jesosa Eyacuiñajji huoojea'yo pojjeama. Jamajjeya Eyacuiñajjiya jayojja jama mi pana cajo, pajea caje'yo cuaa.

¹² Paniseoja ejjashahuaba taiquijji Jesosaja eba poanaje. Jamajjeya quea yeno poanaje jama ba'a: —Chojja. ¿Apiojji miqianaya Eyacuiñajjiya pana cani ba jamaja sa poani? Miquianaaya Eyacuiñajjiya esohui cajaa añ. Jamajjeya miquea ba jjima ache shono ojaya ehoojea'yo ojjaña jaahuanajji poeyanaje. Jamajjeya Eyacuiñajjiya eya pea epana mee'yojji pojjeama miquea ebajji eya ojaya ehoojea'yo —Jesosaa acanae.

¹³ Paniseo cuana shajjama' poanijo, Jesosaa oya cuana jea cana'yonaje, jjabahuejjaqui ajjajojo. Besapoqui o'oyanaje ojje miji yasijje bishejje o shajja'ajjajji cuana nijje.

Paniseoja esohuitai pahui shejje meeji jayojja

(Mateo 16.5-12)

¹⁴ Majoya bae ojje miji yasijje besapoquije Jesosa shajja'ajjajji poani cuana jjashahuabaquinaje. Jama poanaje ba'a: —E'e de, ecuanaa bobi pajea'yonaje.

¹⁵ Majoya Jesosaa, Paniseoja ehuhui taijo jjashahuabaquianijo oya cuana huohui canaje: —¡Quea ja'a nee jjashahuabaquicue! Paniseoja, Enodeja epeejjija esohui pahui shejje meeji jayojjajo miya quea tai po chana'.

¹⁶ Oya cuana bobijo jjashahuabaquianijo Jesosaja esohui ejjashahuabaquimeejji onajaya quea quehua poanaje. Jamajjeya ojje mimimimianaje jama ba'a: —E'e pojja'a Jesosa jama poanaje ecuanaja bobi ye jjimajo.

¹⁷ Ojaya esohui Jesosaja eba poanaje. Jamajjeya oya cuana jama acanae ba'a: —¿Apiojji acuae jja nequiana ojje mimimimiani bobijo? ¿A'a jja eya miqianajaya ba jjima quea ca'a nee nee? ¹⁸ ¿A'a jja nequiana ejo jjashahuabaqui jjima tii? ¿A'a jja nequiaa pajea'yonaje so'o? ¹⁹ Eyaya me oejje pahui miji majje quea huiso dejja bobianaje, 5.000 dejja. Ijji'ijji ajeyo majje acuae jjaya ¿ache jjepai huiso chicha'yonaje pahui? ¿A'a ya pajea'yonaje? —Jesosaa acanae.

—Quea huiso nee, 12 jjepaime —poanaje.

²⁰ —E'e. Oya jayojjaya me oejje beca pahui, 7 pahui, miji majje quea huiso dejja bobianaje, 4.000 dejja. ¿Majoya ojjaña ijji'ijji ajeyo majje miqianaaya ache jjepai huiso pahui chicha'yonaje so'o?

—Quea huiso nee pea'ai, 7 jjepaime quea cuio chicha'yonaje ecuaaya —saja'ame acanae.

²¹ —E'e —Jesosaa poanaje—. ¿A'a jamatii miqianajaya ba jjima eya quea ca'a nee nee mi bobajji? ¿A'a mi jjabahuejjaqui jjima? —Jesosaa poanaje.

Betesaidajo nequi Jesosaa cojjama' jjacojjapojjaqui mee ca'yonaje

²² Majoya Jesosa o shajja'ajjajji cuana nijje Betesaida huasijje ba'eñaqui o'oyanaje, Jai Jaajji cuiñajji yasijje. Jomajo pea cuanaa cojjama' ye canaje Jesosa que. Jesosa huohui neinei canaje jama ba'a: —Jesosa, jiquio dejja cojjama'. ¡Che jja oma quea cojja ja'a po mee'yo-cue!

²³ Jesosaa cojjama' me iña majje me pejejea canaje cuiñajji esecue yasijje. Jomajo Jesosaa eme' cuicho majje cojja iñapepa canaje cuichohua. Oya napa'ajja canaje emeya pea'ai. Jama poanaje ba'a: —¿Achajja acuaeya miyaya baña so'o, cha? —Jesosaa poanaje.

²⁴ Bajea majje cojjama' jama poanaje ba'a: —Eyaya dejja cuana jeojeoqui baña, acui jayojja de, quea jama pishana, de —acanae.

²⁵ Majoya Jesosaa ma dejja cojja napa'ajja ca o'oyanaje emeya. Jesosaa cojja napa'ajja ca o'oyajje, cojjamaa jjeyahua nei ba neinei canaje. Quea cojja ja'a nee nee po'yonaje. ²⁶ Majoya Jesosaa oya huoojea canaje oja equi yasijje. Jama poanaje ba'a: —¡Epeejji, quea jaji nee poqui'ocue miquea equi yasijje! ¡A'a jjeya cuiñajji

yasijje poqui o'oyajji! ¡Eyaya miya quea cojja ja'a po mee'yonaje a'a jocuama huohuijji! —Jesosaa acanaje.

Penoja esohui quea pame Jesosajo

(Mateo 16.13-20; Noca 9.18-21)

²⁷ Majoya Jesosa o shajja'ajjajji cuana nijje Pinipo meshi yasijje poqui canaje. Sesanea huasijje poquijeya o shajja'ajjajji huohui'ajja canaje Jesosaa: —¿Dejja cuana acuae jja yajja poani ejo? —Jesosaa acanaje.

²⁸ —Miya Huani, ma ona besameejji poa, shequi o'oyanaje poso ca jja mi ca acani beca cuaa. Pea cuana aje jja poani miya Enia, Eyacuiñajjija esohui huohuijji yahuajo nei nequia poa. Pea poani ba'a miya pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjajji.

²⁹ —¿Miya acuae yajja poani ejo? ¿A'ya cuae iña? —Jesosa poanaje.

—Miya ca ca Eyacuiñajjija huoojea'yo ojjaña jaahuanajji Quito bajjani —Simohuiya Jesosa saja'a canaje.

³⁰ Jamajjeya Jesosaa oya cuana jama acanaje ba'a: —E'e, eya Eyacuiñajjija huoojea'yo ojjaña jaahuanajji. Jamatii ja'a jja oe jjeja huohuijji cuana! —Jesosa poanaje.

O mano'yojjijo Jesosa miminaje

(Mateo 16.21-28; Noca 9.22-27)

³¹ Majoya Jesosaa o shajja'ajjajji cuana huohui coo canaje ojaya emano'yojjijo: —Eya ojjañaja Edoe Mese quijje Jenosanena huasijje poquije. Jomajo Moisesija etehue'yo huohuijji cuaa, Jodio etii cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manoje'yo ohua me' caca mee cajje. Jamatii pea beca peejjima cahuime po majje mo shequi mee caje o'oya ecue Chiiya —acanaje.

³² Jamajjeya Jesosaa jama huohui neineime acajje Peno quea yeno nee poanaje. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese Jesosa, miya Eyacuiñajjija jaahuana caje'yo. Peaja aje mi oe ecuijji pojjeama, peaja equecua'yojji pojjeama jja mi, de.

³³ Jamajjeya aje jja oe Jesosaa ojjaña o shajja'ajjajji cuana cojja ba neinei majje jama Peno tecueame acanaje ba'a: —Peno, ja'a jamaya mimijji! Miya e dasiajji nisho epo jama mimiani. Miya Edosiquiana Satanasa jama mimiani. Jjashahuabaquiani quea tai, dejja jama; Eyacuiñajjija ejjashahuabaqui'yojji jama pojjeama —Jesosa poanaje.

³⁴ Jamajjeya Jesosaa ojjaña o shajja'ajjajji, ojjaña pea cuana jomajo nequi pea'ai iyaa canaje. Jama poanaje ba'a: —¡Ojjaña joya enijje e'e jojo nei jjapeequi'yo sa poani Eyacuiñajjija ejjashahuabaqui'yojji jama ba'ecue! E jayojjaya jja enijje capoquiahua, jamatii onaa napa cajje aje jja oe quea nee poaje'yo pojja'a.

³⁵ E'e, ojjaña joya Eyacuiñajjija ejjashahuabaqui'yojji jayojja jama ba'e'yo sa po ajja ba'e tiitii ajja enijje eyajo. Joya ecuea ejjashahuabaqui'yojji jayojja jama ba'e'yo sa

poani ca ca ba'e tiitijje'yo enijje eyajo. ³⁶ E'e pojja'a dejja cuaa quea huiso nee nee aquiana ojaya yajji chicha caje. Jamatii oya cuana cuaqui yasijje jeajea cajo ojjaña ojaya aquiana cuana edojjiji pojjeama. ¿A'a ojjaña ojaya aquiana cuana Eyacuiñajji yasijje quia cajo o cuaquijo ani cuayaqui mee caje'yo? ¿A'a Eyacuiñajjiya oya cuana onijje eyajo ba'e mee caje'yo ma aquiana quea huiso nee nee sosejje? Chojja. ³⁷ Eyacuiñajji cajaa amajje eyajo eba'ejji pojjeama. Chojja, ejjeshejji pojjeama nequianajaya, aquiana quea huiso sosejje pojjeama, bejjo sosejje pojjeama eba'e tiitii'yojji. ³⁸ E'e jojo nei jjeja ojjaña cuana Eyacuiñajji nijje jjapeequi ajja, ojjaña quea mimishi poani pea'ai. Ecuea esohuijo quea bicho poanijo jama acani cuaa ba'a: “Cho, eya Jesosa Quitoja epeejji pojjeama”. Jamajjeya eya ojjañaja Edoe Mese esohuidojojji pame cuana nijje poe o'oya majje ecue Chii jayojja quea nee nee ojjaña huoojea'yojji poaje'yo. Jamajjeya eyaya ecue Chii eyajo ani huohuije jama ba'a: “Cho, oya cuana ecuea epeejji pojjeama. Cajaa” eyaya aje —Jesosa poanaje—. E'e, jjeja ejo quea bicho poanijo quijje eya quea bicho poaje'yo ojo, de.

⁹ Majoya Jesosaa o shajja'ajjajji cuana jama acanaje ba'a: —E'e jojo nei beca cuaa jiquiojo nequiya jjaa mo ecojjaa ba caje ojjaña huoojeajji quea ca'a nee nee. Jamaya mo ba caje mano'yo jjimahuaa. Beca cuanaja jjaya mo ba jjima poaje ojjaña huoojeajji; manoje'yo —Jesosaa acanaje.

Jesosa quea cojja jiji poanaje oja Chii nijje mimianijo

(Mateo 17.1-13; Noca 9.28-36)

² Quijje pishana me oejje pea emejje oe cahuime po majje Jesosa poquinaje o shajja'ajjajji nijje, pea beca peejjima dejja nijje, Peno nijje, Satiaco, oja chahua Huani nijje pea'ai. Mahuiso dejja nijje poquinaje eyiyo huasijje quea huesha nee. Jocuama nequi oya Jesosa jjahuapaqui'yonaje. Jjahuapaqui majje quea cojja jiji nee poanaje eshequi jayojja poanaje, quea jeajahua nee nee. ³ Oja daqui quea oshe nee nee poanaje, quea jeajahua nee bo oshe jayojja. Daqui tajajji jiquio meshijo aniya daqui tajja oshe'yo ajja ojaya daqui jayojja. ⁴ Jamaya ojaya epeejjiya Jesosa ba canaje. Moisesi, Enia pea'ai ma yahuajo nei ba'ya poa Jesosa nijje mimimimi nequi ba canaje pea'ai. Miminequinaje Jesosa onaja mimishijo emano'yojji jjejojo. ⁵ Jamajjeya Peno jjashahuabaqui jjimajo Jesosa nijje jama poanaje: —E'e, Emeshi Mese Jesosa, jiquiojo ecuana canequiahua, quea pame nee. Pea beca peejjima equi sisi ecuaaya ca'iyahua miquea, Moisesija, Eniaja pea'ai eba'ejji.

⁶ Peno quea ajjajja jjejojo jama poanaje, jjashahuaba bamequi jjima jjejojo. E'e, ojjaña quea ajjajja jjejojo yajja mimime epojji. ⁷ Peno mimianijo tii bo quea oshe nee nee nequioquenaje. Queya canaje huoja. Shajja'ajja canaje Eyacuiñajji jama poani ba'a: —Jiquio ecuea Bacua Ejja quea jea nee nee. ¡Oya oe shajja'ajja cue!

⁸ O shajja'ajja majje quea mete nee nee poanaje Peno, Satiaco, Huani pea'ai. Majoya baja canaje Jesosa oe nei nequi; Enia, Moisesi pea'ai chama'.

⁹ Eyiyojo nequi jaoquequije'yo mimimimi jaoque'yonaje. Jesosaa ma ojjaña Edoe Meseya jama acanaje ba'a: —¡Ma miyaya eyiyojo banaje pea cuana a'a huohuijji jjeja! ¡Quijje eya emano'yo jaa shequi o'oyajo oe pea cuana huohuicue!

¹⁰ Oya cuanaa Jesosa shajja'ajja canaje. Huohui jjima nei nei poanaje. Jamatii ojee mimimiminaje jama ba'a: —¿Yajjaje shai oya Jesosa jama poanaje ba'a: “Eya emano'yo jaa shequije o'oya”? Maya ecuanaja quea quehua —poanaje o shajja'ajjajji cuana.

¹¹ Jamajjeya Jesosa huohui'ajja canaje: —Jesosa, Moisesija etehue'yo huohuijji poaniya jama acani ba'a: “Enia oe ebionei meshi yasijje capoe'yahua Eyacuiñajjija huoojea'yo ojjaña jaahuanajji poe jjimahuajo”. ¿Yajjaje acuae jamaya acani oya cuaa? —poanaje Huani, Satiaco, Peno pea'ai.

¹² Jesosaa jama acanaje ba'a: —E'e jojo nei Enia jayojja jama oe dejja ebionei epoejji ojjaña cuana ejo e'e jojo nei ejjashahuabaqui meesahuajji. E'e, Eyacuiñajjija esohui huohuijji yahuajo nei ba'eya jama ejo tehue ca poa pea'ai ba'a: “Ojjaña Edoe Mese quea nee nee po mee caje'yo cuaa. Jodio cuanaja oya ba jjima poaje. Pea poso acaje. Jamajjeya cuia caje'yo. Cajaa acaje'yo” jamaya yahuajo nei tehue ca poa ejo —Jesosa poanaje—. ¹³ E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poanaje. Jamajjeya cuia ca'yonaje. Jamaya yahuajo nei Eyacuiñajjija esohui huohuijji cuaa ojo tehue ca poa. Ma jayojja jama acanaje cuaa —jamaya Jesosaa Peno, Satiaco, Huani pea'ai acanaje eyiyojo nequi jaoqueje'yohua.

Esho'i niñepoquima'yo po mee ca'yonaje Jesosaa
(Mateo 17.14-21; Noca 9.37-43)

¹⁴ Eyiyojo nequi jaoque'yo majje Jesosa shajja'ajjajji yasijje poe'yonaje. Ba cañaquinaje quea huiso cuana ejjachichiqui nequica. Moisesija etehue'yo huohuijji cuaa Jesosa shajja'ajjajji cuana mimicuijjeanobiajea cani. ¹⁵ Ojjaña ejjachichiquinequi Jesosa ba majje quea quijijji jaji nee poanaje. Cuajicuajinaje Jesosa bihuiaa jama ba'a: —Jesosa, miya Eyacuiñajjija huoojea'yo ojjaña jaahuanajji.

¹⁶ Majoya Jesosaa huohui'ajja canaje: —¿Ajeo acuae quiana jjamicuijjea nobiajeaquiani? ¿Yajja poani so'o?

¹⁷ Oe dejja Jesosa que poeyanaje. Huohui canaje jama ba'a: —Emeshi Mese Jesosa, eyaya ecue bacua ejja yenaje mi que. Oya quea mano nee nee, quea niñe jjejojo mimi ajja pea'ai. ¹⁸ Eshahuaa ojo nequiya oya naba huapa mee cani, jjaami yayequi mee cani pea'ai. Niñepoqui jaabichajeaquiani meshi yasijje ese' ijjiyai cani pea'ai. Eyaya mi shajja'ajjajji cuana huasijje yenaje mi chamajo. Jamatii niñe poquijaje ajja —ejeajji poanaje.

¹⁹ Jesosaa ojjaña cuana jama acanaje ba'a: —¡De! ¿Ache shono acuae jja nequiana ejo jjashahuabaquije

e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baja'yo Eyacuiñajjija huoojea'yo ojjaña jaahuanajji quea ca'a nee nee? ¡Esho'i e que jjequicue! —Jesosa poanaje.

²⁰ Jamajjeya esho'i jjequi canaje Jesosa que. Jesosa ba majje eshahuaa esho'i janobajjima nei cacacaca mee canaje. Meshi yasijje jea majje oya jeacapoquipoquinaje. Naba huapanaje. ²¹ Jesosaa ejeajji huohui'ajja canaje: —¿Ache shequiaja huisome jama poanaje oya?

²² —Jesosa, oya esho'yahua jama po —poanaje ejeajji—. Eshahuaa oya dahuajea majamaja'ajja canaje cuajicuajinaje, ena huasijje hui'i mee'ajja ca'yonaje cuanaya, o mano mee'yojji nisho. Jamatii jecuanajo jjas-hahuabaquicue quea pame; ecuaa jaahuanacue! ¿A'a miyaya ecue bacua jjaajaqui meeje'yo pojja'a?

²³ Jesosaa ejeajji saja'a canaje: —A'a huohuijji jama ba'a: “¿A'a pojja'a miyaya oya jjaajaqui meeje'yo?” E'e jojo nei jjashahuabaquicue jama ba'a: “E'e jojo nei Jesosa quea ca'a nee nee; ojjaña acani. Ohuaya ecue bacua ejja jjaajaqui meeje'yo pea'ai”. Jamaya jjashahuabaquianijo e'e jojo nei eyaya miquea ejjashahuabaquiyoyji jayojja jama aje'yo. Miquea ebacua ejja jjaajaqui meeje'yo pea'ai —Jesosa poanaje.

²⁴ Jamajjeya jjeyahua nei ejeajji jama poanaje ba'a: —Esohui huohuijji Jesosa, eya mijo e'e jojo nei jjas-hahuabaquiani miya ejjaajaquimee'yojji. ¡Miyaya eya jjabahuejja neineiqui meesahuacue!

²⁵ Ojjaña cuana o que jjachicha cuajicuajiquiani ba majje Jesosaa o niñepoquimeejji poani huoojeacuayajea canaje: —¡Eshahua, o queba po meejji poani, mimi'ajja po mee'yojji poani pea'ai, cuayaqui'yocue oja yamijo nequi! ¡A'a dobiqiu o'oyajji! —Jesosa poanaje.

²⁶ Jesosaa huoojeajea cajeahua, eshahua siasia nananaje; esho'i jjequi'ihui mee majje cuayaqui'yonaje. Esho'i emano'yo jayojja jaa ba majje ojjaña jama poanaje ba'a: —Oya mano'yonaje, poquijeyonaje, de.

²⁷ Jesosaa me' iña cajje esho'i nequisohua'yonaje. Nequisohua majje quea aja nee po'yonaje.

²⁸ Quijje ojjaña cuana poqui majje Jesosa equi yasijje dobiquinaje o shajja'ajjajji cuana nijje. Oeya Jesosa huohui'ajja canaje: —Jesosa, ¿yajjajo acuae ecuaaya eshahua mi huoojeacuayajea'ajjaña?

²⁹ —E'e —Jesosa poanaje—, jiquio eshahua quea huoojeacuayajea camaja. Eyacuiñajji nijje mimi huicha'a huicha'a majje ojo jjashahuabaquiani ijjia'ijjia jji-ma po majje pea'ai ca ca oe huoojeacuayajea meeje'yo miyaya —Jesosa poanaje.

—Quijje eya manoje'yo —Jesosa poanaje
(Mateo 17.22-23; Noca 9.43-45)

³⁰ Oya cuana ma meshijo ani ojee poquinaje ojjaña Janinea meshi yasijje. Poquijeya Jesosaa o shajja'ajjajji ca ca oe sohuihuohui capoquinaje. Pea cuana sohuihuohui pajea canaje. ³¹ Jamajjeya Jesosaa o shajja'ajjajji cuana huohui canaje jama ba'a: —E'e, quijje eya iña meesahuaje onaja equecua'yojji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

³² O shajja'ajja majje quea yeno nee nee poanaje. Jamatii oya cuana quea mete poanaje ehuohui'ajjajji: —¿Yajjajo shai Jesosa mano'yome ca oya Eyacuiñajji huoojea'yo ojjaña jaahuanajji? —oya cuana poanaje.

¿A'ya ona huoojeajji jayojja nequije eyajo?

(Mateo 18.1-5; Noca 9.46-48)

³³ Majoya oya cuana Capenaoma huasijje poe'yonaje. Equi yasijje dobiq'ui'yo majje Jesosaa o shajja'ajjajji huohui'ajja canaje jama ba'a: —Esey a ejiojji poeje'yo ¿ajeo acuae nequiana jjamimicuijaje nobiajeaqui jebenaje so'o?

³⁴ Jamatii oya cuanaja Jesosa saja'a jjima. Quea bicho. Oya cuana poeje jjamimicuijaje nobiajeaqui jebenaje jama ba'a: —Jesosa quijje ona huoojea'yojji poaje, eseya o jayojjaya poaje onijje ona huoojea'yojji. ¿A'ya o pejeje nequije, joya oja quea jea nee neeya?

³⁵ Jamajjeya Jesosaa anioque majje o shajja'ajjajji 12 huisome iyaa canaje o que. Jama acanaje ba'a: —¡Bacue! Miya e jayojja ona huoojea'yojji po sa poanijo jama jjashahuabaquicue ba'a: “Ojjaña ecuea quea boti nee. Cajaanahua'yahua”. Jamaya poaje Eyacuiñajji miya ba caje quea pame nee ona huoojea'yojji epojji.

³⁶ Majoya Jesosaa oe esho'i nei iyaa majje ojjaña cojja nei nequia canaje. ³⁷ Bishami majje jama poanaje ba'a: —¡Bacue! Ojjaña joya enijje jjapeequianiya jiquio esho'i quea jea ajji poaniya, eya pea'ai quea jea acani. Oya jayojja ojjaña cuaa ecuea epeejji quea jea acani, ohuaya eya pea'ai quea jea acani. Jamajje ecue Chii, e huoojea'yojji quea jea acani pea'ai.

¿A'ya Jesosaja epeejji poani?

(Mateo 10.42; Noca 9.49-50)

³⁸ Jamajjeya Huaniya Jesosa huohui canaje jama ba'a: —Esohui huohuijji Jesosa, ecuaaya pea dejja banaje eshahua cuana huoojeacuayajea cani. Ma dejja poanaje jama ba'a: “Eyaya eshahua huoojeacuayajeaña Jesosa nijjeya, ojaya epeejji poaniya”. Ma dejja ese nijje poqui ajjajo, oya tecueanaje jama ba'a: “¿Apiojji? Chojja, miya ecuaa nijje poqui ajja; ¡a'a eshahua huoojeacuayajejji!” ecuaaya oya anaje —Huani poanaje.

³⁹ Jamajjeya Jesosa jama poanaje ba'a: —¡A'a oya tecueajji! Ohuaya enijjeya acani ma dejja ajjima acani. Jamajjeya, ohuaya eya niñeba jjima acaje. ⁴⁰ Ojjaña joya ese niñeba ajja esejaya epeejji nei poani. ⁴¹ E'e jojo nei ojjaña joya e shajja'ajjajji poani ba'e meesahua cani, ena quia cani pojja'a eya ojaya quea boti neejo, Eyacuiñajji quijje oya sosequia caje'yo oya quea pame nee poanijo —Jesosaa o shajja'ajjajji cuana huohui canaje—. ⁴² Ecuea epeejji eyacua esho'i nei jama. Joya o mimishi po meeji poani ca ca Eyacuiñajji quea nee nee po mee caje'yo, de, quea nee tii tii. ¡Jamajjeya quea mimishi epo mee ca cuahuaje oe mano'yocue! E'e, onaya mei enaajo yiipeca mee majje ¡bae quea doe yasijje jjajea'oqueajea meequi'yocue! ⁴³ ¡Jamajjeya a'a quea mimishi po meeji cuana! Jamajjeya miya emejo quea mimishi po sa po majje jeme' ejajasejjajea jayojja jama acue mimishi'ama epojji! Eme' chamajo

eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Miquea beca eme' yanijo pojja'a quea mimishi tii poani ca ca cuaqui yasijje poquije'yo. ⁴⁴ Quea tai nee nee, quea nee nee poaje'yo. Jomajo cuaqui jiji tiitii'yo; quijjo'yo ajja tii tii, de. Jamajjeya ¡mimishi pajea'yocue! ⁴⁵ Oya jayojjaya miya ejiojji quea mimishi po mee canijo, ejiojji ejajasejjajea jayojja jama acue! Ejiojji chamajo eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Miquea beca ejiojji yanijo pojja'a quea mimishi tii poani ca ca cuaqui yasijje poquiyajo quea tai nee nee, quea nee nee poaje'yo. ⁴⁶ Cuaqui jiji tiitii'yo; quijjo'yo ajja tii tii. Jama tii tii poaje'yo. ⁴⁷ Cuana ecojjajo jjabaqui majje miya quea mimishi poani pojja'a. ¡Jamajjeya ecojja ecajjajea jayojja jama acue! Cojjama', mimishi'ama miya eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Cojjajji quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. ¡Jamajjeya mimishi pajea'yocue! ⁴⁸ Cuaqui quijjo'yo ajja tii tii, de —Jesosaa poanaje.

⁴⁹ —Ojjaña ecuea epeejji poaniya eba'ejji quea camaja poaje onaa tecuea cajje. Jamaya ecuea epeejji quea pame, quea ca'a pocue jama ba'a: ⁵⁰ ¡Iquico ecua mei seseya, sane quea pame nee'ya bobi shicuijajo ihui'yo ajja jayojja jama ecuea epeejji quea pame nee ba'e'yanijo, pea cuana o jayojja jama ba'eje quea pame nee pea'ai. Jamatii sane sese'ama poajo, ¿a'a quea sese po meeje o'oya? Chojja, sese'amajo jeajea'aña seya. ¡Jamajjeya mei sese quea pame jama pocue, sane jama! ¡Pea cuana quea pame nee ba'e meesahuacue, ecue sohui jama! ¡Pea cuana nijje quea pame nee jjapeequicue! ¡Quea bei pocue pea'ai! —jamaya Jesosaa o shajja'ajjajji cuana huohui canaje.

Jesosaa esohui huohui canaje ehueijji

(Mateo 19.1-12; Noca 16.18)

10 Majoya esohui huohui majje Jesosa Capenaomajo ani po'oquequinaje Jodea meshi yasijje, Jodana cuei ojje miji yasijje. Jomajo quea huiso nee nee o que jjachichaqui o'oyanaje. Jesosaa ojjaña cuana sohuihuohui canaje, ohuaya ojjaña meshi yasijje esohui huohui majamaja canaje jayojjaya. ² Paniseo cuana ca ca o que poeyanaje jjadasiaquiya nisho. Jjashahuabaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje —poanaje.

Poe majje Jesosa huohui'ajja canaje cuaa jama ba'a: —Esohui huohuijji, ¿a'a cuae ehuanase huei cajji? ¿Yajjajo acuae ehuanase huei cajji so'o? ¿Achajja tehuemeya acuae oe Jodioja etiquianaa aca poa?

³ Saja'a canaje Jesosaa: —¿Yajja acuae Moisesija esohui etehue'yo poani so'o?

⁴ —Moisesiya jama tehueme aca poa ba'a: “Huei'yo majje yahuaya ehueijeajji papeni etehue'yo caquia cahua oja huanase que. Majoya cahuojea cahua” —poanaje Paniseo cuana.

⁵ —E'e —Jesosa poanaje—, etiquiana quea mimishi nee neeya jjejojya Moisesiya huei mee'ajja canaje. Quijje nei Moisesiya jamaya tehue ca poa; jamatii Eyacuiñajjiya jama pojjeama pana coo ca poa. ⁶ Yahuajo nei nei Eyacuiñajjiya pana coo ca poa yahue, epona pea'ai. ⁷ Huohui ca poa ohuaya: "Jamajjeya yahue cajja-ba'eshiñaquiahua ojaya ehuanase nijje eba'eji". ⁸ Oya cuana beca; jamatii oe nei jayojja Eyacuiñajjiya oya ba cani; becanejjiji pea'ai pojjeama; oe nei jayojjaya. Cuana Eyacuiñajjiya oe jayojja aca poa. ⁹ ¡Jamajjeya a'a oe jea meeji! ¡A'a hueiji nequiaa! ¡Jama tii tii oe nei oe acue! Jamaya Moisesiya yahuajo nei tehue ca poa pea'ai —Jesosaa acanaje.

¹⁰ Majoya o shajja'ajjaji cuana Jesosa nijje equi yasiije dobiqui majje ojaya esohuio huohui'ajja canaje. ¹¹ Jamajjeya Jesosaa oya cuana jama acanaje ba'a: —Eyaya miya huohuiaña e'e jojo nei ehuanase pea dejaja sii jjiima huei ca ajja. Dejja ehuanase hueiji epo pea epona ehuanayoyji quea mimishi nee, epona siiiji epo jama. Eyacuiñajjiya oya ba cani quea mimishi, pea cojjoji. ¹² Oya jayojja epona ojaya yahue ¡a'a huei meeji! Yahue huei'yo majje pea dejajo ejjahueaquiji quea mimishi nee poani, yahue siiiji epo jama. Eyacuiñajjiya oya ba cani quea mimishi, pea cojjoji —Jesosaa acanaje.

Esho'iquianajo Eyacuiñajji nijje miminaje Jesosa

(Mateo 19.13-15; Noca 18.15-17)

¹³ Majoya Jesosa que esho'i nei cuana jjequi canaje cuaa. Huohui canaje: —Jesosa, ¡iquio esho'i nei sapa napa'ajja majje Eyacuiñajji nijje mimique ojaya ejaahuanajji! —poanaje.

Jesosa shajja'ajjaji cuaa ca ca oya cuana tecuea canaje: —¡A'a jja oe Jesosa que jjequi majaji esho'iquiana! ¡Eshoi oe cahuohui cahua! —acanaje.

¹⁴ Ma ba majje Jesosa quea yeno nee poanaje. Etii cuana tecuea canaje jama ba'a: —Esho'iquiana e que capoe'yahua! ¡A'a quea huesha nequi meeji! E'e, ojjaña esho'iquiana Eyacuiñajji nijje japeequi sa poani. Jamaya ecuea epeeji esho'i jayojja eyaya jaahuana sa aña pea'ai. Jamajjeya e que poquije'yo; eya eyajo ojjaña huoojea'yoyji poaje. ¹⁵ Jamajjeya e'e jojo nei esho'i nei jayojja mi po'yajo ca ca enijje eba'e'yoyji pojjeama quijje eya ojjaña huoojea'yoyji poaje —Jesosa poanaje.

¹⁶ Majoya esho'i nei cuana bishami majje, sapa biasje eme' huana majje Jesosa Eyacuiñajji nijje miminaje ¡iquio esho'iquiana jaahuanajji.

Edejja sho'i pishana quea aquiana huiso

(Mateo 19.16-30; Noca 18.18-30)

¹⁷ Majoya Jesosa o shajja'ajjaji cuana nijje poqui o'oyanaje Jodea meshi yasijje. Oe dejja o que cuajicuijjebenaje. Ecui'oshajajo nequi oya Jesosa nijje jama poanaje ba'a: —Eshoi huohuiji, miya ca ca oe quea pame nee nee. Eya huohucue ¿achajja a mo eya poquije'yo eyahuasijje eba'e tiiti'yoyji Eyacuiñajji nijje? ¿Ae quea pame amajje eyahuasijje poqui ca'yoyji? —poanaje.

¹⁸ O jjabahuejjaquiji Jesosaa huohui canaje: —E'e, miyaya eya anaje jama ba'a: "Miya ca ca oe quea pame nee". Eyacuiñajji ca oe nei quea pame nee. Pea chama' o jayojja quea pame nee nee. ¡Jamajjeya eya shajja'ajja neineicue! ¹⁹ ¡Eyacuiñajji nijje ba'e tiiti'yo sa po majje ojaya etehue'yo jayojjaya jama oe ba'ecue tii tii! Ojaya esohi ma Moisesiya tehue ca poa miquea eba jama ba'a:

"¡A'a pea quecuajji!

¡A'a pea siiiji!

¡A'a sii pojji!

¡A'a sijje pojji!

¡A'a onaya dasajji!

¡Miquea chii, miquea enaese pea'ai oe shajja'ajjacue!"

—Jesosa poanaje.

²⁰ —E'e, eyaya jamaya aña, jama tii tii esho'yahuaa. ¿Pea acuae yajja po cajji eyajo eba'e tiiti'yoyji? —¡iquio dejja Jesosa huohui'ajja canaje.

²¹ Jesosaa oya ba neinei canaje, oya quea boti nee nee poanaje. Jamajjeya jama acanaje ba'a: —E'e, epeeji, miya quea pame nee nee Eyacuiñajji jayojja po sa po majje ¡poquicue; miquea aquiana cuana quiaquicue ejjesheji sosejje! ¡Majoya ejjesheji quia'yocue aema' cuana huasijje! ¡Majoya poecue enijje epo'yoyji! Jamajjeya eyajo Eyacuiñajjiya miya aquiana quea pame nee nee quea huiso nee quia caje'yo quijje.

²² Jesosaja esohi shajja'ajja majje ma dejja esho'i pishana quea yeno poanaje; ojaya aquiana quea huiso nee nee yani jojya quia sa po'yajo ajja. Jamajjeya poqui'yonaje quea aquiana yeno jjejojo.

²³ Jamajjeya Jesosaa ojjaña bajea majje o shajja'ajjaji cuana huohui canaje jama ba'a: —E'e, quea mimishiya jjejojya aquiana quea huiso, meshi quea quemo pojja'a nahue canijo beca cuana beshahua nei e que poqui ajja quijje, eya eyajo ojjaña huoojea'yoyji poaje'yo.

²⁴ O shajja'ajja majje jashahuaba neineiquinaje oya cuana. Ojee miminaje.

Jamajjeya Jesosaa jama acanaje ba'a: —Ecuea epeeji cuana, eyaya e'e jojo nei huohuiaña jama pea'ai ba'a:

²⁵ Ahuoja quii huejjajje ino jeanobiaña jama ¿a'a mapichi jeanobia cajji ahuoja quii huejjajje? Cho. Quea camaja coma. ¡iquio ecua mapichi ahuoja quii huejjajje jeanobia cajji jojjemo dejja quea aquiana huiso nee nee dobiqui'yome eyahuasijje.

²⁶ —¡De! Jamajjeya ¿a'ya shai eyahuasijje dobiqui mee caje'yo Eyacuiñajjiya? —oya cuana ojee mimiminaje.

²⁷ Cojja ba neinei canaje Jesosaa. Huohui ca o'oyanaje: —Dejaa jama amee ajja tii. Eyacuiñajjiya oe nei ojjaña acani. (Eyahuasijje dobi meequi cani joya quea aquiana huiso nee pea'ai) —Jesosaa acanaje.

²⁸ Jamajjeya Peno jashahuabaquinaje ma dejja quea aquiana huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yonaje minijje epoqui'yoyji. Jamajjeya ¿a'a cuec cuana eyahuasijje poquije'yo? ¿Ae acuae ecua quiaje so'o, de? —acanaje Penohua.

²⁹ —E'e jojo nei beca cuaa ecuea esohui jama asa poanijo aquiana cuana jiña cani. Ojaya equi, oja huapa pojjeama, oja chii, oja nae pojja'a, oja bacua cuana pojja'a jiña cani enijje japee neinei'quiyohua, ecuea esohui quea pame nee quea huesha huohuiya pea'ai. ³⁰ Jamajjeya e'e jojo nei Eyacuiñajjiya oya cuana quea huiso nee nee o jayojja quia caje'yo equi, huapa pojjeama jayojja, echii mese jayojja cuana, enaese jayojja cuana, ebacua cuana jayojja jama pea'ai. Mimishi cuaa ca ca oya cuana napa caje pea'ai. Jamatii quijje oya cuana quea bihui nee nee ba'e tiitii mee caje'yo pea'ai eyajo onijje. ³¹ Jamatii beca cuana jjeya ona huoojajji poani eyajo ona huoojajji pojjeama poaje'yo. Joya jjeya ona huoojajji pojjeama ca ca eyajo ona huoojajji nei nei poaje'yo e jayojja —Jesosaa Penó acanaje.

—Quijje eya manoje'yo —Jesosa po o'oyanaje
(Mateo 20.17-19; Noca 18.31-34)

³² Majoya Jenosanena huasijje poqui o'oyanaje. Jesosa ehui dojojji poquinaje. O shajja'ajjajji cuana, pea cuana o quishishijji poquiani pea'ai quea mete jjas-hahuabaquinaje jama ba'a: —Jenosanena huasijje poquiyajo, ¿yajja Jesosa acaje Jodio etii cuaa? ¿Quecua ca chana', de!

Jamajjeya Jesosaa o shajja'ajjajji cuana dojo canaje ejiojji sahua huasijje esohui huohuijji. Jama poanaje ba'a: ³³ —¿Shajja'ajja neineicue mo! Eya jiquio ojjañaja Edoe Mese. Eseyá Jenosanena huasijje poquije. Jomajo mo Jodio etii cuana iña meesahuaje equecua mee'yojji. E'e, Moisesija etehue'yo huohuijji, Eyacuiñajji nijje emimijji etii cuana pea'aiya eya iña mee caje. Taaa neineije cuana: “¿Oya quecuaeacue!” poaje. Jodio pojjeama cuana huasijje mo huoojajji caje equecua mee'yojji. ³⁴ Ejo soa neineije cuana; cuia caje'yo mo cuaa huaca jee ejeapashajjajja; acui ecueata'apeejo me cacajea majje mo ba'ehuanasohuajea caje'yo cuaa emano'yojji. Jamatii mo beca cahuime po majje Eyacuiñajjiya shequi mee caje'yo —Jesosaa huohui canaje.

Semeneoja bacua ejja Jesosa nijje miminaje o pejejo
enequi mee'yojji eyajo
(Mateo 20.20-28)

³⁵ Majoya Semeneoja bacua ejja Jacobo, Huani pea'ai Jesosa que poeyanaje. Jama poanaje ba'a: —Esohui huohuijji Jesosa, ¿che ecuanaja esohui mi nijje jama acue ecuanajo! —poanaje.

³⁶ Jesosa onijje jama poanaje ba'a: —Ecuea epeejji cuana, ¿ae sa poani miquianaya?

³⁷ —Jesosa, ecua mi pejejo canequi'yahua quijje miya ojjaña huoojajji quea ca'a nee nee poaje. Oe shani mijijje, pea ebianeí mijijje canequi'yahua minijje ona huoojajji epojji. ¡Jamaya oe acue! —poanaje Jacobo.

³⁸ —Chojja, miquianajaya ba jjiima eya quea nee nee po mee caje'yo cuaa. ¿A'a miquiana e jayojja quea nee nee po majje quea ca'a poaje'yo? Eya quecua caje'yo pea'ai cuaa. Enijje japee neinei'quianajo miquianaya

quecua caje'yo pea'ai pojja'a cuaa. ¿A'a jamatii miquianaya quea ca'a poaje'yo? —Jesosa poanaje.

³⁹ —E'e —saja'a canaje Jacobo, Huani pea'aiya—.

Quea ca'a poaje mi jayojja, jamatii quea nee nee po mee caje'yo, jamatii quecua caje'yo cuaa.

—E'e —Jesosa poanaje—, jamajjeya e'e jojo nei mi-quiana e jayojja quea nee nee po mee caje'yo cuaa; e jayojja quea ca'a nee nee poaje'yo onaa mano mee ca'yajje. ⁴⁰ Jamatii e ebianeí mijijje, e shani mijijje pea'ai eyajo eyaya miquianaya enequi mee'yojji pojjeama, enijje ona huoojajji poaje. Chojja, ecue Chii eyajo aniya yahuajo nei pea cuana babaca ca poa. Ohuaye nei nequia mee caje'yo e ebianeí mijijje, e shani mijijje pea'ai eyajo quijje, eya ojjaña huoojajji poaje —Jesosa poanaje.

⁴¹ Jesosa pejejo nequi sa pea'ai poanijo onijje ona huoojajji epojji, Jacobo, Huani nijje pea'ai quea quene poanaje pea shajja'ajjajji cuana, ome mijijje pea'ai. ⁴² Jamajjeya aje oe Jesosaa oya cuana iyaa canaje. Huohui canaje: —¿A'a onijje quea quene pojji! Mi-quianajaya eba dejja cuana, Eyacuiñajji epeejji pojjeama. Onajaya emeshi mese cuana, ona huoojajji cuana pea'aiya pea cuana huoojajji neinei cani; quea tecue nee nee poani, quea mase. ⁴³ ¿A'a jamaya pojji miquianaya, ecuea epeejji cuana! ¡E jayojjaya po sa poanijo pea cuana ba'e meesahuacue! ¡Jaahuanacue pea'ai! ⁴⁴ Joya ona huoojajji po sa poani ca ca echa-cojji sosema' jayojja capoahua. ⁴⁵ E'e, ¿e jayojja jama pocue! Eya ojjañaja Emeshi Mese nei. Jamatii eya ca ca iña ojjañaja Edoe Mese eyajo ani poeyanaje ojjaña ba'e meesahuaa; ojjañaja eya eba'e meesahuajji pojjeama. Ojjañaja mimishi sosequia'yojji mo manoje'yo, ojjaña cuaquí yasijje epoqui'yo poaje jjejojya —Jesosa poanaje.

Batimeo, Timoteoja bacua quea cojja ja'a po mee ca'-
yonaje
(Mateo 20.29-34; Noca 18.35-43)

⁴⁶ Jenosanena huasijje poquije Jesosa o shajja'ajjajji cuana nijje dobiquinanaje Jenico huasijje. Majoya quijje pishana poqui o'oyanaje ejiojji. Quea huiso nee nee poquinaje onijje cuana. Batimeohua, Timoteoja bacua ejjaa ejiojji sahuajje e'anioqueaniya shajja'ajja canaje Jesosa poeje. Oya cojjama'. ⁴⁷ Jamajjeya taaa neineinaje jama ba'a: —Jesosa, miya emeshi mese Dabija osecua, ¿ejo jashahuabaquicue quea yeno! —taanaje.

⁴⁸ —¿A'a oe taaa majajji! ¡Esohui oe ca'acue! —acana-je cuaa.

Jamatii taaa neineinaje cojjama': —Jesosa, miya Eyacuiñajji esohui jayojja jama poeyanaje, emeshi mese Dabija osecua. ¡Ejo jashahuabaquicue!

⁴⁹ Jamajjeya o shajja'ajja majje Jesosa nequiñaquina-je. Cojjama' iyaa mee canaje: —¿Oya cojjama' iyaacue! —poanaje.

Jamajjeya cojjama' iyaa canaje cuaa: —¿Cojjama', poecuajicue oe! Jesosaa miya iyaa cani. ¿Quea bihui nee oe pocue! —poanaje.

⁵⁰ Jamajjeya Batimeo nequisohua majje daqui nei jea canananaje, Jesosa que poquicuajinaje. ⁵¹ Poeyajo Jesosaa oya huohui'ajja canaje: —¿A'ya so'o, Batimeo? ¿Ae sa poani miya?

—Esohui huohuijji, ¡miyaya iña jjacobjabapojjaqui mee'yocue, ecuea ecojja quea ja'a epo'yojji! —poanaje Batimeo.

⁵² —E'e, Batimeo —Jesosa poanaje—, miyaya e'e jojo nei ejo jjashahuabaquinaje eyaya miya jjacobjaja'aqui meeje'yo. Jamajjeya ¡quea bihui nee pocue! Jjeyahua nei Eyacuiñajjiya miya quea cojja ja'a po mee caje'yo —Jesosa poanaje.

Jjeya nei oya jjacobjabapojjaqui'yonaje. Jesusajo quea bihui nee nee poanaje jjacobjaja'aqui mee ca'yajje. Jamajjeya Jesosa nijje poqui'yonaje, Batimeo.

Jesosa Jenosanena huasijje poquinaje

(Mateo 21.1-11; Huani 12.12-19)

11 Majoya Jesosa Jenosanena huasijje poquije pea cuiñajji nequiñaquinaje Mepajejo, ma Betania pejejo, acui yiyejo, Onimo eyiyo pejejo. Nequiñaquinaje majje o shajja'ajjaji becanajji pea'ai huoojea canaje Jesusaa jama ba'a: ² —¡Poquicue miya Mepaje yasijje! ¡Dobiqui majje miyaya mapichi sisija bacua esho'i ai ejeyo nequia nequi bañaquicue! Dejjaja o daasa biajje yahuajo e'anijji ajjima poa. ¡Ba majje pichocue; yecue e que! ³ Onaa: “¿Apiojji miyaya mapichi sisija bacua pichoña so'o?” acajje: “Ecuana Emeshi Mese sa poani. Ohuaya huacuaya huoojea caje o'oya jiquiacua” saja'ame acue. Jamajje: “E'e, ocuae dojo'ajja joya mapichija bacua” acaje dejjaa Mepajejo ba'eya —Jesosa poanaje.

⁴ Jamajjeya oya cuana Jesosa shajja'ajjaji poquinaje Mepaje yasijje. Mapichi sisija bacua ejeyo nequia nequi ba cañaquinaje equi secue pejejo. Ohuaya picho canaje. ⁵ Pea cuana jomajo nequi jama poanaje ba'a: —¿Ae poani miya? ¿Apiojji mapichija bacua pichoña so'o?

⁶ Jamajje Jesosa shajja'ajjaji cuana saja'a canaje: —Ecuea Emeshi Mese sa poani.

—E'e, ocuae dojo'ajja joya mapichija bacua —acana-je Mepajejo ba'e dejjaa.

⁷ Jamajjeya mapichi sisija bacua dojo canaje Jesosa que. Onajaya daqui ao cuana mapichi sisija edaasa biajje iya canaje Jesosa anisohuajji. Jesosa anisohuajinaje ma mapichi esho'i aija daasa biajje. Anio-quenaje. Ejiojji poquinaje. ⁸ Ojjaña cuana ejjachichiqui nequia cuana ojaya daqui ao cuana ejiojji jeapiihui canaje Jesosa jjayejjequiji. Pea cuana acui iña jajaseja canaje. Huana yiyoyiyo canaje ejiojji pea'ai quea huiso nee neeya. Jamaya yahuajo Jodio cuana emeshi mese ja'ajjequi canaje, cuiñajji yasijje poeyajo.

⁹ Ojjaña ehui dojojji poquiani, Jesosa quiquishijji pea'ai taaa capoquinaje quea bihui nee nee: —¡Mi poeyajo ecua quea bihui nee! Quea pame nee nee miya, Jesosa. ¡Eyacuiñajji eyajo aniya miya cahaahuana cahua!

¹⁰ E'e Jesosa, emeshi mese Dabi yahuajo ba'e miquea etiiquiana. Miya ojjañaja Emeshi Mese nei poeyanaje. ¡Eyacuiñajji mi jaahuanajji cabihuia cahua ojjaña! —taaame poa quea bihui nee nee jjejojo.

¹¹ Majoya Jesosa Jenosanena huasijje dobiquinaje ojjaña cuana nijje. Eyacuiñajji equi yasijje poquinaje. Dobiqui majje ohuaya bajea canaje ojjaña. Majoya siniajo oya Betania huasijje poquinaje cahuiya; ome miji pea beca, 12 huisome o shajja'ajjaji poani nijje poquinaje.

Acui etona jjajja jayojja iquena bajjani sajjai mee ca'yo-naje Jesusaa
(Mateo 21.18-19)

¹² Mecajjeahua oya cuana Betaniajo ani Jenosanena huasijje poe o'oyaje quea shoe poanaje Jesosa. ¹³ Ba canaje ejiojji sahuajo nequi acui etona jjajja jayojja. Acuijjajja ba'ajjaqui canaje. Chama' poanaje ejjajja. Eña oo pana nequi'yo, acuijjajja she pojjeama jiquio ba'ijo. ¹⁴ Jamajjeya Jesusaa huohui canaje: —¡Jamajje jamatii jjajjama' tii capo'yahua acui! Jamajjeya onajaya ejjajja e'ijjajji pojjeama tii.

Jesosa shajja'ajjaji cuana Jesusaja emimi shajja'ajja canaje pea'ai. Jesusaa jama acanaje ojjaña jjabahuejjaqui meeji jama ba'a: Jiquio acui jjajjama' joya Jesusaa tecuea canaje jayojja jama Eyacuiñajjiya Jodio cuana tecuea caje'yo jjashajja'ajjaqui aija joya.

Aquiana quiajji poani Eyacuiñajji equijo nequi cuana huoojeacuayajea canaje Jesusaa

(Mateo 21.12-17; Noca 19.45-48; Huani 2.13-22)

¹⁵ Majoya Jenosanena huasijje poe o'oya majje Jesosa ojaya epeeji cuana nijje Eyacuiñajji equi yasijje poqui o'oyanaje. Dobiquinaje. Ba cañaquinaje quea huiso enequi, Eyacuiñajji nijje mimiani pojjeama. Chojja.

Aquiana quia cana cuana. Jamajjeya Jesusaa aquiana quiajji poani Eyacuiñajji equijo nequi cuana huoojeacuayajea canaje; aquiana jjeshe poequi pea'ai huoojeacuayajea canaje. Aquiana cuana huoojeajea canaje; bejjo, pea bejjo sosejje quia cana cuana bejjo nequiji cuana jeapajjajea canaje; huia' quiajji pea'ai huia' nequiji cuana jeabichajea canaje. ¹⁶ Ojjaña joya aquiana abojji huohui canaje: —¡A'a jja oe aquiana yedobajji jiquiacua! Eyacuiñajji equi pejejo ojjaña jjachichiquiani esohui shajja'ajja —tecueame acanaje.

¹⁷ Jomajo Jesusaa jama acanaje pea'ai ba'a: —¡A'a Eyacuiñajji equijo aquiana quiajji! Eyacuiñajji esohui jama poani ba'a: “Ecuea equi ojjaña cuana ojjaña meshijo ba'e Eyacuiñajji nijje emimiji equi”. Miquianaaya ca ca siipojji nequiji jayojja amee aña Eyacuiñajji equi.

¹⁸ Ma shajja'ajja majje Eyacuiñajji nijje emimiji etii cuana, Moisesija etehue'yo huohuijji poani pea'ai Jesosa nijje quea quene poanaje; oya Eyacuiñajji huoojea'yo pojjeama posojo o quecua sa acanaje. Jamatii Jesosa iña jima poa, quea meteya jjejojo. Quea huiso cuana Jesusaja esohuijo quea bihui nee nee poanaje. Jamajjeya Jesosa ojjañaja quea nahue nee nee poanaje equecua'yojji.

¹⁹ Quijje siniajo Jesosa o shajja'ajjaji cuana nijje Jenosanena jo poqui o'oyanaje Betania huasijje cahuiya.

Acui etona jjaajja jayojja esajjai'yo ba canaje
(Mateo 21.20-22)

²⁰ Mecajjeahua nei Jenosanena huasijje poe o'oyanaje. Jesosa shajja'ajjajji poani cuaa ba canaje acui esajjai'yo, ma Jesosaa tecuea canaje acui. ²¹ Ba majje Penohua niñeba ca'yonaje. Jama poanaje ba'a: —¡Esohui huohuijji Jesosa, bacue! ¡Miya tecueajje jjeiya nei sajjai'yonaje acui!

²² —E'e —Jesosa poanaje—. ¡Miya Eyacuiñajji quea ja'a nee jjashahuabaquicue! A'a jjashahuabaquijji jama ba'a: “E'e pojja'a Eyacuiñajjiya eya shajja'ajja jjima”.

²³ Chojja, jjashahuabaquicue jama ba'a: “Eyacuiñajjiya e'e jojo nei nei ecuea ehuhui onijje jama acaje'yo”. Jamaya miya jjashahuabaquijja Eyacuiñajjiya miya saja'a caje'yo. E'e, Eyacuiñajjiya miya e jayojja jama ameesahua caje'yo pea'ai ma dejjaa ajjima acani —Jesosa poanaje—. ²⁵ Cuanaya miya Eyacuiñajji niije mimianijjo jiquiajja jjashahuabaquime pocue ba'a: “Onaya enijje mimijajinaje quea tai. Jamatii eya ojaya mimishijjo quene'ama” jamaya pocue —Jesosa poanaje—. Jamaya jjashahuabaquianijjo Eyacuiñajji miquea mimishijjo quene'ama poaje pea'ai. ²⁶ Pea nijje quea quene tii tii poanijjo ca ca Eyacuiñajjiya eseja Chiiya miquea mimishi ecuijea'yojji pojjeama —Jesosa poanaje.

Eyacuiñajji Jesosa huoojea'yojji poa
(Mateo 21.23-27; Noca 20.1-8)

²⁷ Majoya oya cuana Jenosanena huasijje poe o'oya majje Eyacuiñajjiya equi yasijje dobiqiu o'oyanaje. Jesosaa esohui huohui canijjo Jodio etii cuana, Eyacuiñajji nijje emimijji etii cuana, Moisesija etehue'yo huohuijji cuana pea'ai o que poeyanaje. ²⁸ Jesosa ojaya ba jjimajjo huohui'ajja canaje: —¿Aya miya huoojea canaje jiquiacua? ¿Apiojji acuaeya esohui huohuiaña so'o? ¿Apiojji acuaeya aquiana quiajji poani huoojeacuaya-jeanaje oma mecajje? —onijje mimijajinaje.

²⁹ Jesosaa oya cuana acanaje: —E'e, eyaya miya ebio nei huohui'ajjaje. ³⁰ ¿Aya Huani huoojea canaje enajje ona besa meeya? ¿A'a Eyacuiñajjiya? ¿A'a dejja cuaa pojja'a? ¡Huohuicue mo! Eyaya majoya huohuije e huoojea'yojji epo.

³¹ Shajja'ajja majje Jodio cuana ojee mimimiminaje: —¿Yajja saja'ame yajji esejaya? Quea mete ojjaña dejja cuanajo. Ojjaña ba cani Huani Eyacuiñajjiya huoojea canaje esohui huohuiya. Jamajjeya: “Dejja cuaa Huani huoojea canaje” eseya aje se cuia ca chana'. “Eyacuiñajjiya Huani huoojea canaje” eseya aje se oe jama acaje ba'a: “Jamajjeya ¿apiojji miyaya Huani shajja'ajja jjima aña?” Jesosaa acaje —jamaya Jodio cuana miminaje.

³³ Jamajjeya jjashahuabaqui majje Jesosa huohui canaje Jodio cuaa: —Cua'a, de. Ecuanaja ba jjima Huani huoojea'yojji epo —anisho canaje.

—Jamajjeya ecuea miya ehuhuijji pojjeama e huoojea'yojji epo —Jesosaa acanaje ma Jodio etii cuana.

Esohui ejjashahuabaquijji echacojji taijo
(Mateo 21.33-46; Noca 20.9-19)

12 Jesosaa ma Jodio etii cuana jama acanaje pea'ai ba'a: —¡Jiquio shajja'ajjacue esohui ejjashahuabaquijji! Jama poanaje ba'a: Oe dejjaa emeshi meseya que quea quemo nee neejo bana canaje jjonojjajja oo pana, uva. Que peeyi canaje meija peeyi. Majoya que yiyesamajo mei cueehue iñaca canaje jjonojjajja na quishipashajji. Majoya mei iyasohua ao'ao majje peehuana canaje. Iya canaje que jaahuanajji, quea huesha nee ojaya ebajji. Pea echacojji cuana iyaa canaje. Huohui canaje eque meseya: “¡Ecuea que jaahuana-cue! Jaahuana sosejje quiaje'yo oya jjonojjajja quea huiso nee” poanaje. Majoya eque mese quea huesha poquinaje. ² Quijje jjonojjajja jahuajo, eque meseya o chacojji huoojea canaje que jaahuanajji que jjonojjajja jjequiya. Que jaahuanajji bañaqui majje huohui canaje jama ba'a: “¡Che mo jjonojjajja joya eque meseja pa cadojo'yahua, de!” poanaje.

³ —Que jaahuanajji cuaa quea mimishi jjejojo, jjonojjajja, uva quia'yo jjima acanaje, joya eque meseja iyatepe mee. Jamajjeya o chacosahuajji poani iña canaje, cuia canaje. Huoojea ca'yonaje jamatii, emejjee tii.

⁴ Eque meseya pea huoojea ca o'oyanaje o chacosahuajji. Jamatii yahuajo jama acanaje que jaahuanajji cuaa. Sapa cuiahuejjajja'ajja canaje, quea mimishi acanaje pea'ai. ⁵ Quijje eque meseya pea huoojea, pea huoojea a'ajja canaje. Jamatii que jaahuanajjiya jjonojjajja quia sa po'yo ajjaa jjejojo oya cuana iña canaje, cuiajea canaje, pea quecua canaje, pea sapa jajahuejjajja canaje meiya. ⁶ Quijje yejje nei oja bacua ejja oe nei huoojea canaje que jaahuanajji baa: “¡E'e, oya cuana ecue bacua ejja shajja'ajja caje!” poanaje eque mese.

⁷ —Cho, oja bacua ejja poeje ba majje jama poanaje ba'a: “Joya eque meseja bacua ejja poeje. Jjonojjajja yiyequijje ojaya poaje, ejeajji mano'yajo. ¡Cua'a, ejaquecuaequi oe! Jamajjeya que esejaya poaje'yo, de” poanaje que jaahuanajji cuana.

⁸ —Jamajjeya aje oe ebacua ejja iña canaje, quecua-jea'yo majje jeajequi canaje quea huesha nee ma que jaahuanajji mimishi cuaa; eque mese boti'ama acanaje cuaa. Mahuiso esohui —Jesosa poanaje—. ⁹ Jamajjeya joya eque meseya poe o'oya majje ¿yajja acaje'yo acuae jiquio que jaahuanajji quea mimishi cuana? Oya quea quene nee poaje'yo. Ma que jaahuanajji cuana quecuaajea caje'yo, de. Que quia caje'yo pea cuana —Jesosaa acanaje.

¹⁰ —E'e —Jesosa poanaje pea'ai—, ¿a'a miquea eba Eyacuiñajjiya esohui etehue'yo yahuajo nei? Jama ejo poa ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee nequi mee ca poa.

¹¹ Jamajjeya ojjaña ojaya epeejji cuanaa Eyacuiñajji bihuia cani”.

Jamaya yahuajo nei aca poa ejo; eya ma eyamajjana equi iyajji jayoija jama quea ca'a nee nee nequi —Jesosaa acanaje.

¹² Jesosaja esohui shajja'ajja majje Jodio cuana quea quene nee poanaje: —¡De! Ecuanao oya mimiani, equi yamajjanajo pojjeama. Eseyá que jaahuanajji quea mimishi jama pea'ai ohuaya acani —poanaje Jodio cuana.

Jamajjeya Jesosa iña sa acanaje ejeanobiajeajji. Jama-tii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajji esohui huohuijji nei nei ba cani. Ojjaña cuanaja quea nahue nee nee Jesosa e'iñajji. Jamajjeya Jodio etii cuanaja Jesosa iña jjima, poquinaje.

Bejjo oe poiji quia cajji ba'e sosejje emeshi mese yasijje

(Mateo 2.15-22; Noca 20.20-26)

¹³ E'e, Jesosa mimije shajja'ajja majje Jodio edejja tii cuana quea quene nee poanaje. Jamajjeya Paniseo cuana, pea cuana Enodeja ehuhui'yo quea boti nee poanaje pea'ai huoojea canaje Jesosa que. Jama huohuime acanaje ba'a: —¡Poquicue Jesosa dasiaa! ¡Esohui quea camaja nee huohui'ajjaquicue, ojaya yajja saja'ame ya'yojji! Jamajje Moisesija etehue'yo jayoija jama mi saja'a cajo jeanobiajeaje'yo ecuaaya —poanaje Jodio etii cuana.

¹⁴ Jamajjeya Paniseo cuana poquinaje Enodeja epeejji cuana nijje Jesosa baa. Ba majje huohui'ajja nisho canaje jama ba'a: —Esohui huohuijji, miyaya e'e jojo nei huohuiaña Eyacuiñajji ejjashahuabaquijji. Miya edejja tii cuanao jjashahuabaqui ajja, emeshi mese cuanao pea'ai mete'ama. Jamajjeya quea ja'a nee huohuiaña. Jamajje mo che huohuicue: ¿A'a bejjo quia cajji Shomano meshi mese Sesa bajjani yasijje? ¿A'a cuayea seya sosequiaje so'o Sesaja meshijo ba'e sosejje; equiajji pojjeama pojjaja esejaya? —acanaje cuaa.

¹⁵ Ma Jodio cuanaja ejjashahuabaquijji quea ja'a pojjeama Jesosaja eba poanaje. Jamajjeya: —¡Miquiana ca mi ca oe e dasiajji nisho cuana, epeejji nisho quea tai nee nee! ¿Apiojji eya dasia sa aña? ¡Jamatii oe bejjo esodojjo jjequicue ecuea ebajji! —Jesosa poanaje.

¹⁶ Jjequi canaje cuaa. Esodojjo ba majje Jesosaa huohui'ajja canaje: —¿Ae ecajja'yo jiquio? ¿Ae bajjani etehue'yo?

—Emeshi mese ecajja'yo, Sesa —poanaje—. Ojaya bajjani etehue'yo yani pea'ai.

¹⁷ —E'e —poanaje Jesosa—. ¡Jamajjeya Sesaja bejjo quiaquicue ohua sa cajo! ¡Eyacuiñajji a'a pajea'yojji; oya bihuicue, shajja'ajjacue pea'ai!

Jesosaa shajja'ajja majje ojjaña cuana quea mete nee poanaje: —Quea jjashahuabaqui ja'a nee nee oya Jesosa. Jjadasia meequi ajja —poanaje.

Jamajjeya Jodio etii cuana poquinaje, Jesosa jea cana'yonaje.

¿A'a e'e jojo nei mano'yo majje eshe o'oya quijje poaje'yo?

(Mateo 22.23-33; Noca 20.27-40)

¹⁸ Ma pojjajo tii beca Sanoseo cuana poeyanaje Jesosaa baa. Sanoseo cuana aje oe jama poani ba'a: —Mano'yo majje jama tii tii eshequi o'oyajji pojjeama quijje.

Jesosaa ca ca jama po ajja. Jamajjeya Jesosa dasia sa acanaje jama anisho canaje ba'a: ¹⁹ —Esohui huohuijji, Moisesiya jama tehue ca poa yahuajo nei nei ba'a: “Dejja ejjahuanaqui bacuama' mano'yajo, oja chahuaa ehuanase equijjojea ani cahuana ca'yahua oja o'ija bacua jea jayoija jama epojji”. ¿A'a e'e? ²⁰ Jamajjeya jama poso ba'a: Quea huiso edoe mese, me oejje pea beca, nequinaje. Edoe mese ebionei jjahuanaquinaje eponajo. Mano'yonaje bacuama' tii. ²¹ Oja chahuaa ehuanase equijjojea ani huana ca'yonaje, bacuama' tii ani. Oya jayoija mano'yonaje bacuama' tii. Jamajjeya peaa echahua meseya huana ca o'oyanaje. Mano'yonaje bacuama' pea'ai. ²² Jamaya ojjaña edoe mese cuana manoje'yo'yonaje bacuama' tii. Quijje ehuanase pea'ai mano'yonaje. ²³ Jamajjeya eshe o'oya po majje eyajo, ¿ajea ehuanase epona poaje, ache edoe meseja? Ojjaña echahua mese jjahuea'ajja'yo epo —Sanoseo cuaa acanaje Jesosa dasiajji nisho.

²⁴ Jesosaa jama acanaje ba'a: —Chojja. Jamaya pojjeama. Miquea ba jjima Eyacuiñajji esohui; oya quea ca'a nee nee miquea ba jjima pea'ai. ²⁵ E'e, shequi o'oya majje jjahuanaqui'yo ajja. Esohuidojojji eyajo ani jama poaje. ²⁶ E'e, yahuajo nei nei Eyacuiñajji Moisesi tehue mee ca poa miquea ebajji e'e jojo nei emano'yo cuana eshe nequije o'oya eyajo. E'e, Moisesi acui quepe jijiqui pejje nequi, Eyacuiñajji oya huohui ca poa jama ba'a: “Eya ca ca iña Amajama jaahuanajji, Isaaca, Jacobo pea'ai jaahuanajji”. Jamaya yahuajo nei nei Eyacuiñajji aca poa. ²⁷ ¿A'a Eyacuiñajji emano'yo cuana meshijo emojea'yojaa jaahuana cani? Cho. Ojaya epeejji cuana eshe nequi, mano'yo majje poqui'yo cuana pea'ai jaahuana cani Eyacuiñajji, eshe o'oya epo'yo edojjoshahua jiquio ese mimianinaje. Jamajjeya e'e jojo nei emano'yo cuana shequije o'oya, de. Miquiana ca mi ca oe quea quehua jjashahuabaquiani —Jesosaa Sanoseo cuana acanaje.

¡Eyacuiñajji quea jea nee acue mi pejejo nequi cuana pea'ai!

(Mateo 22.34-40; Noca 10.25-28)

²⁸ Moisesija etehue'yo huohuijji jomajo nequi Jesosa shajja'ajja canaje quea jjashahuabaqui ja'a nee; Sanoseo cuana jjadasia meequi ajja. Jamajjeya Jesosa huohui'ajja canaje jama ba'a: —Esohui huohuijji, yahuajo Moisesiya tehue ca poa Eyacuiñajji esohui. ¿Ache esohui quea pame nee nee e'ajji?

²⁹ Jesosaa oya acanaje: —E'e, jiquio esohui quea pame nee jayoija jama acue ba'a:

“¡Isaeni cuana shajja'ajjacue! Eyacuiñajji ca ca oe Emeshi Mese nei. Oya oe nei enequi tii. Pea chama' Eyacuiñajji. ³⁰ Jamajjeya ¡Eyacuiñajji miquianajaya

Emeshi Mese quea jea nee nee acue! ¡E'e, miquea huapa pojjeama cuana quea jea nee acue! ¡Quea jea nee neeya oe acue Eyacuiñajji! ¡Jamajje ojo jashahuaba tiitiicue! ¡Oya shajja'ajja tiitiicue! ¡Ojaya epeeji quea ja'a nee nee acue pea'ai!"

³¹ Jiquio esohui quea pame nee. Pea oya jayojja quea pame nee jama ba'a:

“¡Miquea huapa pojjeama jama quea jea nee nee acue pea'ai!" Jamaya quea pame nee nee e'ajji —Jesosa poanaje—. Pea chama' esohui jiquio jayojja quea pame nee nee.

³² Jesosaja esohui shajja'ajja majjeya Moisesija etehue'yo huohuiiji onijje jama poanaje ba'a: —Esohui huohuiiji Jesosa, miquea esohui e'e jojo nei. E'e jojo nei Eyacuiñajji Emeshi Mese nei. Oya oe nei enequi tii, pea chama' Eyacuiñajji. ³³ Jamajjeya Eyacuiñajji Emeshi Mese nei quea jea nee nee ca'a cahua, ojo cajjas-hahuaba tiitiiquiahua, cashajja'ajja tiitii cahua, ojaya epeeji quea ja'a nee nee capoahua pea'ai ojjaña. Oya jayojja pea cuana quea jea nee nee ca'a cahua. Jamaya poanijo quea pame nee nee poani. Jodio etiiquiana cuana jayojja jama po majje ca ca quea pame pishana poani. E'e, etiiquiana cuaa ca ca huo cuana, pea aquiana pea'ai mei e'ya'yo biajje dahua caninaje Eyacuiñajji quea bei po meeji mimishijo —poanaje Moisesija etehue'yo huohuiiji.

³⁴ Ojaya esohui quea ja'a nee shajja'ajja majje Jesosaa oya huohui canaje jama ba'a: —E'e, miya behahua nei Eyacuiñajji sa neinei poani miquea Emeshi Mese nei epojji —acanjje.

Jesosa quea jashahuabaqui ja'a nee neejoj jadasia meequi ajja ba majje ojjaña Jodio etii cuana quea mete poanaje. Esohui quea camaja, yajja sohui esaja'ame yajjijoyo huohui'ajja pajea canaje o dasiajji nisho.

Jesosa Eyacuiñajji huojea'yo ojjaña jaahuanajji Quito

(Mateo 22.41-46; Noca 20.41-44)

³⁵ Jamajjeya ojjaña cuana ejjachichaqui nequi huohui'ajja canaje Jesosaa: —¿Yajja poani miquianaya Eyacuiñajji huojea'yo ojjaña jaahuanajji Quitojo? ¿Ache etiiquianaja osecua oya, ajea bacua? ¿Yajjajje acuae Moisesija etehue'yo huohuiiji cuaa huohui cani? Jama ba'a: “Quito emeshi mese Dabija osecua, ma yahuajo ba'ya poaja” acani cuaa —Jesosa poanaje—.

³⁶ Yahuajo nei Edojjoshahua Pameya emeshi mese Dabi tehue mee ca poa jama ba'a:

“Eyacuiñajjiya ecuea Emeshi Mese Quito jama aca poa: —¡Enijje anioquecue ebianeij mijiije, ojjaña cuana huojea'yojji! Eyaya mi quecuajji nisho epo cuana jeabichajea jeyojeyo'yo”.

Jamaya huohui ca poa yahuajo Dabiya ojo. ³⁷ E'e, Dabiya Eyacuiñajji huojea'yo Quito aca poa: “Ecuea Emeshi Mese nei”. Jamajjeya Quito Dabiya Emeshi Mese nei poani. Jamatii oya Dabiya osecua pea'ai —Jesosaa acanjje.

Ojjaña cuaa ejjachichaqui nequiya Jesosaja esohui shajja'ajja canaje. Quea bhui nee poanaje.

—¡A'a Jodioja esohui huohuiiji jama ba'ejji! —Jesosa poanaje

(Mateo 23.1-36; Noca 11.37-54, 20.45-47)

³⁸ Majoya Jesosaa ojjaña cuana huohui canaje jama ba'a: —¡Jodio esohui huohuiiji cuana jayojja jama a'a ba'ejji! Oya cuanaa daqui quea pame nee nee, quea ao nee huosho cani onajaya ebajji. Ejojijije poquiani ojjaña aquiana quia cani yasijje anicuaa; pea cuaa jama bihuia cani ba'a: “¡Esohui huohuiiji, miya quea pame nee nee!” Jamaya aje oe ojaya quea boti nee, jiquio Jodio etii cuanaja, esohui huohuiiji quea pame nee poso jbachaquiani —Jesosa poanaje—. ³⁹ Jodioja equi ejjachichaquijji ebionei anioque sa poani, Eyacuiñajji esohui huohuiiji pejejo, ojjaña nijje emimijji. “E'e, oya cuana Eyacuiñajji esohui huohuiiji nei jayojja quea pame nee” epo meeji acani. Ojee ijja'ijjianiyo emeshi mese pejejo anioqueani, ebionei e'ijja'ijjijji. ⁴⁰ Jamatii oya cuana aje oe siipojji; e'ahuemanoja equi cuana sii cani. Majoya Eyacuiñajji nijje mimi nishoani quea huiso nee. Jamajjeya Eyacuiñajjiya oya cuana cajaa acaje'yo. Quijje quea nee nee po mee caje'yo, quea nee tii tii poaje'yo. Pea cuana ca ca quea nee po mee caje'yo. Jamajjeya ja'a oya cuana jayojja jama ajji! —Jesosaa ojjaña cuana huohui canaje.

E'ahuemanohua ejjesheji quia canaje

(Noca 21.1-4)

⁴¹ Majoya Jesosa Eyacuiñajji equijo ejjesheji iyajji pejejo anioquenaje. Ba canaje dejjaa quea huiso poe majje ejjesheji iyanobia cani ma acui ecaca huasijje Eyacuiñajji yasijje equia'yojji. Joya quea aquiana huiso neeya iyanobia canaje quea huiso nee ejjesheji. ⁴² Majoya e'ahuemano aema' poeyanaje. Ojaya ca ca esodojjo beca iyanobia canaje, sosema' pishana. ⁴³ Jamatii oya ba majje Jesosaa o shajja'ajjajji cuana iyaa canaje. Jama poanaje ba'a: —¡Bacue! E'e jojo nei jiquio e'ahuemanohua quea huiso nee nee jayojja quia ca'yonaje. Pea cuaa oe pojji jayojja quia ca'yonaje. Jamaya Eyacuiñajjiya oya ba cani. ⁴⁴ E'e, pea cuana quea aquiana huiso nee nee. Oe pojji ojaya aquiana cuana quia canaje. E'ahuemano ca ca aema' nei nei. Ohuaya ojjaña ojaya ejjesheji quia canaje; bobi jjesheji yajji nisho quia canaje pea'ai —Jesosa poanaje.

Eyacuiñajjiya mei equi cajjajeajea caje'yo cuaa

(Mateo 24.1-2; Noca 21.5-6)

13 Majoya Jesosa Eyacuiñajji equijo ani poquianaje. Poquianijo, o shajja'ajjajji cuaa oya huohui canaje jama ba'a: —¡Bacue Eyacuiñajji equi! Quea quemmo, quea pame mei cuana —poanaje.

² —E'e, ¿a'a jiquio equi quea pame nee baña? E'e jojo nei quijje mei cuana cajjajeajea caje'yo cuaa. Chama'yo tii acaje'yo —Jesosa poanaje.

Jiquio ojjaña aquiana oe poaje'yo

(Mateo 24.3-28; Noca 21.7-19)

³ Majoya Jesosa poquinaje quea huesha pishana, enata'a ojje miji yasijje. Eyiyo Onimo acui yiye yasijje jaasohuaquinaje. Anioquenaje. Jamajje o shajja'ajjajji cuaa, Penohua, Anesiya, Huaniya, Jacobohua pea'ai oya huohui'ajja canaje jama ba'a: ⁴ —Jesosa, ¿ache shono acuae mei cuana cajjajeajea caje'yo cuaa so'o? ¿A'ya ba majje acuae ecuana jjabahuejjaquije so'o ojjaña jiquio meshi chama'yo tii epojji?

⁵ Jesosaa saja'a canaje: —¡Jashahuaba neineiquicue onajaya miya edasijji pojjeama! ⁶ Quea huiso siajje-pojji cuana poeje, ecuea ehoojea'yo pojjeama: “Eyacuiñajjiya eya huoojea canaje, eya ca ca iña ojjaña jaahuanajji” jamaya siajje poaje. Quea huiso dasia caje'yo. ⁷ “Ojjaña jjaquecuaquiani, ojjaña meshi yasijje pea'ai” huohui caje peaya pea'ai. ¡Jamatii a'a quea mete pojji! Jamaya poaje. Jamatii apoa pojjeama, oe po ajja jjima poaje so'o —Jesosa poanaje—. ⁸ E'e, jjaquecuaqui caje'yo cuana ojjaña meshi yasijje, ojjaña cuiñajji yasijje pea'ai. Quea huiso emanomeejjiya mano mee caje'yo; bobi yasijje po majje manoj'e'yo quea huiso; meshi huehuahuehuaje ojjaña meshi yasijje pea'ai —Jesosa poanaje—. E'e, jiquio ecua epona bacua neeani jama ebionei japashineijje neeani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

⁹ —Majoya esohui huohuijji nisho cuaa miquianaya iña majje jeanobiajea caje'yo. Cuiasejjajea caje equi ojee ejjachichaquijji pea'ai. Enijje jjapeequianijjo, pea cuaa miquianaya iña majje emeshi mese cuana huasijje dojo caje, ona huoojeajji cuana huasijje pea'ai. Jamaya poajo, ¡ecuea esohui huohuicue ojaya eshajja'ajjajji, emeshi mese cuana eshajja'ajjajji! ¹⁰ E'e jojo nei e poe o'oya jjimahuajo, ojjaña meshi cuana huasijje ecuea esohui quea pame nee cahuhuiqui cahua, ojjañaja eshajja'ajjajji. Majoya e poe o'oyajo, ojjaña oe poaje —Jesosa poanaje. ¹¹ Jamajjeya miquianaya iña cajo emeshi mese yasijje edojji, ja'a quea mete pojji! A'a jashahuabaquijji jama ba'a: “¿Ae shai eyaya emeshi mese huohuije?” Edojjoshahua Pameya miquianaya sohuihuohui meesahua caje. Jamajjeya Edojjoshahua Pame mijo yaniya ohuaya esohui huohui caje ecuea ejjashahuabaquijji. ¹² Majoya pea cuana boti'ama acaje'yo cuanaja. Jamajjeya e'o'i meseya oja chahua iña meesahua caje onaja equecua'yojji; ejeajjiya oja bacua iña meesahua caje onajaya equecua'yojji pea'ai. Es-ho'iquiana shajjama' po majje oja chii, ojaya enaese pea'ai iña meesahua caje onajaya equecua'yojji pea'ai. ¹³ Enijje jjapeequianijjo miquianaya boti'ama nei acaje ojjaña meshijo ba'eca cuaa. Jamatii e poe o'oya jjimahuajo, enijje jjapeequipajea'yo ajja tii ca ca Eyacuiñajji nijje ba'e titii meeje'yo, enijje pea'ai —Jesosa poanaje.

Aquiana quea tai nee ojjaña quea mete nee nee epo meeji

(Mateo 24.15-28; Noca 21.20-24, 17.22-24)

¹⁴ —Eyacuiñajjiya esohui huohuijjiya yahuajo nei nei jama aca poa ba'a:

“Quijje Eyacuiñajjiya equijo nequije aquiana quea tai nee nee, ojjaña quea mete nee nee epo meeji”.

Jamajjeya ma ba majje ma pojajjo tii ojjaña Jodio mes-hijo ba'eca capoquicuaajahua eyiyo cuana huasijje. (¡Jiquio esohuijjo jashahuabaquicue quea ja'a epojji!)

¹⁵ Joya equi huisa biajje chacochoacani ja'a equi yasijje dobiquinanajji aquiana cuana biohua edojji! ¹⁶ Joya quejo chacochoacani pea'ai ja'a equi yasijje poquinanajji daqui moojo! Eyiyo huasijje poquicuaaji ajjajo mano'yo chana'. ¹⁷ Epona cuana o'ejji, bacua sho'ijji pea'ai quea yeno poaje; quea camaja equehua poquicuaajji poaje. ¹⁸ Jamajjeya Eyacuiñajji nijje mimicue jama ba'a: “Eyacuiñajji, ¡eenajo pojjeama capoahua ecuanaja epoquijji eyiyo cuana huasijje!” acue —Jesosa poanaje—.

¹⁹ E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma pojja quea camaja cuanajo ca ca quea yeno nee poaje ojjaña cuana —Jesosa poanaje—. ²⁰ Eyacuiñajjiya oe pojji cahuijo quea camaja po mee caje'yo; quea cahui huiso epo'yo jojjemo, ojjaña cuana mano'yome. Ojaya epeeji jaahuana canijo, ojaya quea nahue nee emano jeyoje-yo'yojji, Eyacuiñajjiya oe pojji cahuijo quea camaja amee caje'yo, quea cahui huiso pojjeama —Jesosa poanaje.

²¹ —Ma pojja cuanajo a'a shajja'ajjajji ona siajje poajo jama ba'a: “¡Bacue oe, Eyacuiñajjiya huoojea'yo Quito jiquiacua poe'yonaje!” Jama poso, ja'a shajja'ajjajji! “¡Bacue oe, Quito jocuama pa poeyanaje!” jama onaa acajje ja'a shajja'ajjajji; a'a poquijji! ²² E'e, Eyacuiñajjiya huoojea'yo ojjaña jaahuanajji e jayojja nisho, Eyacuiñajjiya esohui huohuijji nisho pea'ai poeje quea huiso nee nee. Oya cuanaa ma pea dejjaa ajjima acani acaje'yo Eyacuiñajjiya epeeji cuana dasia'yojji nisho. Dasia caje'yo quea huiso nee; ecuea epeeji nei pea'ai beshahua nei eya pajea mee caje'yo o jayojja epojji; cho, jjadasia meequi ajja. ²³ Ecuea epeeji cuana, eyaya miya huohuinaje, quijje oya poeje ejjadasiaquijji. Jamajjeya ja'a oya cuana shajja'ajjajji! —Jesosa poanaje.

Jesosa ojjañaja Edoe Mese poeje o'oya

(Mateo 24.29-31; Noca 21.25-28)

²⁴ —E'e—Jesosa poanaje—, quijje quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. ²⁵ Majameta cuana jicajjaqui'yo majje jijioqueje'yo ojjaña pea'ai. Majameta nequijji cuana huehuahuehuaje'yo janobajjima nei pea'ai; yahuajo jayojja pojjeama poaje. ²⁶ Majoya ojjaña eya ba caje eyajo. Ba majje huohui caje jama ba'a: “¡Bacue! E'e jojo nei Jesosa ojjañaja Edoe Mese poeje'yo bo cuana biajje. Oya oe nei quea ca'a nee nee, quea jeajahua

nee nee pea'ai" acaje cuaa —Jesosa poanaje—. ²⁷ Ma-joya eyaya esohuidojojji cuana huoojeaje'yo biacua, macua huasijje pea'ai ojjaña meshi yasijje pea'ai ecuea epeeji cuana jjequiya —Jesosa poanaje.

Esohui acuijo, iquena bajjanijo, huohui canaje Jesusaa

(Mateo 24.32-35; Noca 21.29-33)

²⁸ Jesusaa huohui canaje pea jama ba'a: —E'e, eyaya miqianaya esohui ejjashahuabaquimeeji huohuije iquena acuijo. Eseja meshijo acui iña'vani ba majje eseya poani: "E'e nei, nayaya po'yonaje. Jjeya eshequiaja popajea'yonaje".

²⁹ —Ma jayojja jama eshequi, ba'i quea misi, majameta eyajo jjijijioqueani ba majje jjashahuabaquicue jama ba'a: "E'e, jjeya nei apoa poaje. Jjeyahua nei eseyaya Emeshi Mese nei Jesosa Quito poeje o'oya".

³⁰ —E'e jojo nei ojjaña ma pojja cuanajo ba'eca cuana mano jeyojeyo'yo jjimahuajo ojjaña apoa poaje'yo; eya ojjaña Emeshi Mese nequije'yo. ³¹ E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yojji pojjeama; e'e jojo nei eyaya jamaya aje'yo tii tii —Jesosa poanaje—. ³² ¿Ache shono shai jamaya poaje, ojjaña apoa poaje'yo? Deija cuanaja ba jjima; esohuidojojji cuanaja ba jjima pea'ai; ecuea ehuhuijji pojjeama. Ecue Chiija eba ojaye nei. Ohuaye nei huohui caje'yo ojjaña apoa epo'yojji —Jesosa poanaje.

³³ —Jamajjeya ijashahuabaqui tiitii anicue! Ache pojajo eya ojjaña Emeshi Mese nei poeje o'oya miquea eba pojjeama. ³⁴ Jiquio jama poaje ba'a: E'equi mese poqui jjimahuajo echacojji cuana iyaa canaje. Huoojea canaje jama ba'a: "¡Ecuea equi cuiñacue, miqianaaya! ¡Ecuea ehuhui mi yasijje jama chacocue pea'ai! Quijje eya poeje o'oya" e'equi mese poanaje —Jesosa poanaje—. ³⁵ Jamajjeya ijja'ishoa'ajjaqui ani tiitiicue! Eya miqianajaya e'equi mese jayojja; ache nei eshequi nequijo poeje o'oya miqianajaya ebajo ese. ¡Sinecua, mecashono, mecajjeahua cuana jja'ishoa'ajjaqui anicue! ³⁶ Apoa pojjeama, ecahuijaa ba majje tecueañaje poe majje —Jesosa poanaje—. ³⁷ Jamaya eyaya ojjaña ecuea epeeji cuana huohuiaña pea'ai: ¡Apoa epo anicue quiana! —jamaya Jesusaa sohuihuohui canaje Jenosanenajo, Onimo yiyejo.

Jodio etii cuana jjashahuaba taiquinaje Jesosa quecua'yojji

(Mateo 26.1-5; Noca 22.1-2; Huani 11.45-53)

14 E'e, ojjaña Jodio cuana ojee jjachichaqui o'oyanaje Jenosanena huasijje ojee ijja'ijjiaa, quea bihui nee epojji, yahuajo nei esohuidojojjiya Ejito meshijo Jodioja bacua cuana cuia'yo jjima aca poa niñeba'yojji. Beca bahuime ojee ijja jjimahuajo, noe, pahui eshejeemeejjima' ijja jjimahuajo, Eyacuiñajji nijje emimijji etii cuana, Moisesija etehue'yo huohuijji cuana pea'ai jjashahuabaquinaje Jesosa quecua'yojji. ² Ojee mimimiminaje jama ba'a: —¡Jesosa quehua neijje iñacue, ojjaña Jodio cuana jjachichaqui jjimahuajo! ¡Oya iñacue jjeyahua nei, de! Quijje pishana ojjaña ojee ij-

ja'ijjianijo, ecuanajaya Jesosa e'iñajji pojjeama. Chojja, ojjaña Jodio cuana quea quene nee nee ecuaña nijje po chana' —poanaje Jodio edejja tii cuana.

Eponaa Jesosa sapa sha canaje shiyeshiyeya

(Mateo 26.6-13; Huani 12.1-8)

³ Jesosa Betaniajo ani poquinaje Simonija equi yasijje. Poquinaje ijja'ijjiaa. Yahuajo nei Simoni quea mano nee nee batata epo'yo quea tai poa, ma deija cuaa jja-jea meequi'yo jjima acani. Jesusaa oya yahuajo jjajeaqui mee ca'yonaje batata epo'yo. Simonija equijo ojee ijja'ijjianijo, oe epona Jesosa que poeyanaje. Tahuoo quea nahue nee neejo shiyeshiye ye canaje. Tahuoo naba capa majje Jesosa huojja sha canaje shiyeshiye-ya, nardo bajjanija. ⁴ Ma ba majje beca cuana quea quene poanaje; epona tecuea canaje jama ba'a: —¿Apiojji acuae miyaya jiquio shiyeshiyeya Jesosa sapa quehua shaña so'o? ⁵ ¿Quea nahue nee nee eshojeajeajji, oe shequiaja echacome jama sosejjeme, de! ¿Sha jjima yajjiijo poso ca mi ca oe shiyeshiye dojo meenaje esodojjo quea huiso sosejje? E'e, aema' cuana huasijje esodojjo equiajji poso —epona acanaje cuaa.

⁶ Jesusaa ca ca oya shajja'ajja majje jama acanaje ba'a: —¿Apiojji acuaeya epona tecueaña so'o? ¡A'a oya tecueajji! E'e, eya ohuaya huojja sha canaje. Jamaya quea pame nee. ⁷ E'e, aema' cuana minijje po tiitiije'yo. ¡Oya cuana jaahuana'yocue quijje pea'ai! Eya ca ca enequi tiitiijji pojjeama minijje. ⁸ Epona e huojja sha jjimahuajo jjashahuabaquinaje jama ba'a: "E'e e, Jesosa manojeyo. Mano jjimahuajo, eyaya oya huojja shaña shiyeshiyeya; onaja mojea jjimahuaja shaña poanaje epona" —Jesosa acanaje.

⁹ —Jamajjeya quijje ojjaña meshijo ecuea esohui huohui majje jiquio eponajo huohui capoquipoquije pea'ai jama ba'a: "Oe eponaa Jesosa huojja sha canaje shiyeshiyeya, quea jea nee neejojo". Jiquio eponajo huohui tiitii caje, e'e jojo nei —jamaya Jesusaa acanaje.

Jodasaa onaya iña meesahua canaje Jesosa

(Mateo 26.14-16; Noca 22.3-6)

¹⁰ Yaninaje quea huiso Jesosa shajja'ajjajji cuana, 12. Oe nei Jodasa Isicaniote bajjani poquinaje Eyacuiñajji nijje emimijji etii cuana huasijje. Jama poanaje ba'a: —Eyaya miya Jesosa iña meesahua. ¿Ache sose huiso acuae mo ya oe sosequiaje so'o Jesosa iña meesahua sosejje? —poanaje Jodasa.

¹¹ Oya cuanaa Jodasa saja'a canaje quea bihui nee jama ba'a: —E'e, Jesosa iña meesahua sosejje miya sosequiaje'yo quea huiso —poanaje Jodio etii.

Jamajjeya Jodasa jjashahuaba neinei equi aninaje: —¿Achajja iña meeme aje so'o? Caba'ajjaquisahua —poanaje.

Jesosa o shajja'ajjajji cuana bobi ijja mee canaje

(Mateo 26.17-29; Noca 22.7-23; Huani 13.21-30; 1 Conitio 11.23-26)

¹² Jodio cuana quea bihui ojee ijja'ijjianinaje yohua shejo ba'a esohuidojojjiya yahuajo nei etiiquianaja ba-

cua cuana cuia'yo jjima ñajjajja na' esecuejo e'iñapepa ba majje. Jamajjeya ebionei epojjajo e'ijjia'ijjiajjijo, pahui quea ca'a ijia canijo, ñajjajja cuia cajjijo, Jesosa que poe majje o shajja'ajjajji cuaa huohui'ajja canaje jama ba'a: —Jesosa, ¿ache equijo acuae seya pahui eshejee meejjijo hua jjima ijiaje so'o? ¡Ecuana huoojeacue aquiana iyajeaa, mi ishoajji!

¹³ Jamajjeya Jesosaa beca shajja'ajjajji huoojea canaje: —¡Poquicue Jenosanena huasijje! ¡Jomajo ecuea epeeji baquicue ena abo cani! ¡Onijje poquicue! ¹⁴ Oya equi yasijje dobiqiyajo, ma equi mese nijje mimicue jama ba'a: “Ecuana sohui huohuijji jama poanaje ba'a: “Miquea equijo eyaya e shajja'ajjajji cuana nijjeya pahui ca'a ijiaje esohuidojojjiya etiikianaja bacua ejja cuana cuia'yo jjima poa shejo. ¿Ache equi quecuayijjijo ijiaje so'o?” jamaya acue —Jesosaa acanaje—. ¹⁵ Majoya equi meseya miya dojo caje eyahuasijje equi quecuayijji ai yasijje. Jomajo ojjaña aquiana apoa, ehuaa bamebame'yo. ¡Jomajo bobi iyacue esejaya ojee e'ijjajji! —Jesosa poanaje.

¹⁶ O shajja'ajjajji beca poquinaje Jenosanena huasijje. Jomajo Jesosaja esohui jayojja jama ojjaña ba cañaquinaje. Bobi iyajea canaje pahui ca'a ijiajji.

¹⁷ Majoya sinecua neiyo Jesosa o shajja'ajjajji cuana nijje, 12 huisome nijje ma equi yasijje poquinaje. Dobi-qui majje jaasohuaquinaje equi quecuayijji ai yasijje, equi jamacoo huasijje. Majoya ojjaña cuana anioque- naje bobi ijiajji pejejo ijia'ijjiaa. ¹⁸ Ojee ijia'ijjia anijo Jesosa jama poanaje ba'a: —E'e jojo nei jiquiojo aniya oe epeeji nisho enijje ijia'ijjia ani. Ohuaya onaya cuana eya iña meesahua caje'yo equecua'yojji.

¹⁹ Ma shajja'ajja majje ojjaña cuana quea yeno nee nee poanaje. Pea mimiajo, pea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei —jamaya ojjaña miminaje.

²⁰ Majoya Jesosa onijje jama poanaje ba'a: —E'e, mi- quianaya e shajja'ajjajjiya 12 huisome enijje yani; oe aje epeeji nisho, de. E'e, maaya pahui shapshipeshia- ni enijje; ohuaya eya onaya cuana iña meesahua caje'-yo onajaya equecua'yojji. ²¹ E'e, yahuajo nei Eyacuiñaj- jija esohui tehuejji cuaa esohui tehue ca poa jama ba'a:

“Quijje oe dejjaa Eyacuiñajjija huoojea'yo ojjaña jaahuanajji onaya cuana iña meesahua caje'yo eque- cua'yojji”.

Ma etehue'yo jama capohua. Jamatii ma dejja, e iña meesahuajji epo quijje quea yeno nee poaje'yo. Jjas- hahuabaquijje jama ba'a: “¿Apiojji shai eya ecue naeya mejo ca poa? Eya ca ca nequi sa po ajja. Ecuea ejjas- hahuaba taiquijjijo mano'yo sa poani” oya poaje. Quij- je oya quea nee nee po tiitijje'yo —Jesosa poanaje.

²² Majoya ojee ijia'ijjia anijo tii Jesosaa pahui ca'a jjeshe canaje. Eyacuiñajji bihuia majje, pahui mijisisi majje quia canaje o shajja'ajjajji cuana. Jama poanaje ba'a: —¡Ijjiacue! Jiquio ecuea eyami —poanaje.

²³ Pahui ijia majje caneco jjeshe canaje Jesosaa. Eya- cuiñajji bihuia majje quia canaje ojjaña o shajja'ajjajji cuana. ²⁴ —¡Ishicue! Jiquio ecuea ena'. Ecuea ena' cua-

yaquiajo, eya manaje'yo. Jamajoya eyaya ojjañaja mi- mishi cuana cuijeaje'yo enijje jjapeequiajo, Eyacuiñajji- ja esohui eyacua jayojja jama aje'yo. ²⁵ Jjeya eyaya ji- quio jjonojjajja na, uva na, e'ishi o'oyajji pojjeama mi- quiana nijje; eya manaje'yo. Quijje nei poe o'oya majje eyaya jiquio ishijje o'oya miquiana nijje. E'e, eya poe o'oyajo, ecue Chiiya eya ojjaña huoojea'yojji pomee ca- je'yo, ojjaña shajja'ajja caje —jamaya Jesosaa acana- je.

Penohua Jesosa ba jjima nisho acaje'yo pa

(Mateo 26.30-35; Noca 22.31-34; Huani 13.36-38)

²⁶ Majoya ojee sohuicuaya majje poquinaje eyiyo huasijje, Onimo jjajja meshi yasijje.

²⁷ Ejiojjijje poquije Jesosaa o shajja'ajjajji cuana aca- naje jama ba'a: —Jiquio mecajje ojjaña miquianaya enijje jjapeequipajeaje'yo. E'e, yahuajo Eyacuiñajjija esohui tehuejji cuaa ejo tehue ca poa jayojja jama poa- je jama ba'a:

“Quijje eyaya ñajjajja cuiñajji jaahuana neinei ajja. Ja- majjeya onaaya oya cuia caje'yo. Ñajjajja cuiñajji cha- majo, ñajjajja cuana jjajeaajajeaquinanaje'yo”. Jamaya yahuajo nei nei tehue ca poa ejo —Jesosaa acanaje—. E'e, eya ñajjajja cuiñajji jayojja jama poaje. Eya mano'yo majje ecuea epeeji cuana ñajjajja cuana jayojja jama poaje; jjajeaajaquinanaje'yo.

²⁸ —Jamatii Eyacuiñajjiya eya shequi mee ca o'oyajje eya poquije Janinea meshi yasijje. Jomajo aje mi poeya- jo ishoañaquije —Jesosa poanaje.

²⁹ Penohua Jesosa jama acanaje ba'a: —E'e pojja'a pea cuana minijje jjapee tiitiqui'yo ajja. Eya ca ca pea jayojja jama pojjeama. Eya jjapee tiitiquije'yo minijje —poanaje Peno.

³⁰ Jesosaa Peno jama acanaje ba'a: —Eyaya miya e'e jojo nei huohuiaña, Peno, jiquio mecajje tii cachina yahue beca taaame po jjimahuajo, pea beca peejjima huohui'ajjame acaje, miya ejo po huicha'a huicha'aje jama ba'a: “Chojja de, ecuea Jesosa ba jjima nei nei” miyaya saja'ame aje quea meteya jjejojo —Jesosaa acanaje.

³¹ Jamatii Penohua Jesosa acanaje: —Chojja, Jesosa. E'e pojja'a eya minijje jjapeequianijo, pea cuaa eya cuiajea caje'yo. ¡Jamatii ecuea ca mi ca epajea'yojji poj- jeama!

Oya jayojja pea cuaa acanaje pea'ai: —E'e, Jesosa, ecuanajaya ca mi ca epajea'yojji pojjeama tii, jamatii onaa cuiajea caje'yo pojja'a.

Quea yeno nee nee Jesosa oja Chii nijje miminaje Jete- semani quejo

(Mateo 26.36-46; Noca 22.39-46)

³² Majoya Jesosa o shajja'ajjajji cuana nijje Jetesemani que yasijje poquinaje. Jesosa onijje miminaje jama ba'a: —¡Anioquecue jiquiojo tii! Jocuama eya poquije ecue Chii nijje mimiya.

³³ Jamajjeya Jesosaa Peno, Huani, Satiaco pea'ai dojo canaje jocuama. Oya Jesosa jjashahuabaquinaje quea yeno nee nee. ³⁴ Jamajjeya ojaya epeeji nijje jama poa-

naje ba'a: —Quea yeno nee nee iña; manojeyo iña, de. ¡Anioquecue enijje; a'a cahuijji! —Jesosa poanaje.

³⁵ Majoya Jesosa cuama pishana poqui majje ecui'os-hajjajo nequinaje. Oja Chii nijje miminaje quea yeno nee jama ba'a: ³⁶ —Ecue Chii, miquea ejjashahuabaqui'yojji jayojja jama eyaya aje'yo. Miyaya eya huoojeanaje ojjaña mimishijo mano'yohua. Quea camaja nee nee ejo. ¿A'a ya iña miyaya che onaaya quecua mee'yo jjima aje'yo? ¿A'a ya iña che iña mee'yo jjima aje'yo? ¡Jamatii miquea ejjashahuabaqui'yojji jayojjaya jama acue! ¡Ecuea ejjashahuabaqui'yojji jayojja jama a'a ajji! —Jesosa jamaya miminaje oja Chii nijje.

³⁷ Majoya oya poqui o'oyanaje o shajja'ajjajji cuana huasijje. Ba cañaqui'yonaje ecahuijaa. Tecue'ama Peno nijje jama poanaje ba'a: —¿A'a mi cahuijaa? ¿A'a mi enijje cahui jjima che nequi jjima?

³⁸ Majoya Jesosaa ojjaña cuana acanaje: —¡A'a cahuijji! ¡Eyacuiñajji nijje mimi majamajacue! Jamajoya pea cuaa miya quea mimishi epo mee'yojji pojjeama. E'e, miqianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

³⁹ Majoya Jesosa poqui o'oyanaje jocuama pishana oja Chii nijje mimi o'oyaa. Yahuajo jayojja mimi o'oyame poanaje.

⁴⁰ Oja Chii nijje mimi o'oya majje Jesosa poqui o'oyanaje o shajja'ajjajji cuana huasijje. Ba caña o'oyanaje quea cojja jee mano poanajejojo cahui o'oyanaje. Jesosa ba majje oya cuana quea bicho poanaje onijje emimijji. ⁴¹ Jamajjeya oya cuana jea canana o'oyanaje, Jesosaa. Cuama pishana poqui o'oyanaje. Oja Chii nijje mimi o'oyanaje. Mimi o'oya majje poe o'oyanaje o shajja'ajjajji cuana que. Ishe'acanaje: —¿A'a miqianaya cahuijaa tii? ¿A'a mi jomishocajaa? Apoa aje, de. Jjeyahua nei eya, ojjaña Edoe Mese, mimishi cua iña meesahua caje'yo cuaa. ⁴² ¡Nequisohuacue! ¡Cua'a, jje-ya nei ecuea epeeji nisho poeje! ¡Joya aje Jodasa poeje ba'a! —Jesosa poanaje.

Jesosa iña canaje cuaa

(Mateo 26.47-56; Noca 22.47-53; Huani 18.2-11)

⁴³ Jesosa mimianijo tii, Jodasa o que poeyanaje. Oya aje oe Jesusaja epeeji pea'ai poanaje; pea 11 nijje nequinaje tii. Quea huiso nee nee dejja nijje Jodasa poeyanaje; yohuajji poeyanaje acuijji, baajji, mejeji pea'ai poeyanaje. Jodio etii cuaa, Jodioja esohui huohuijjiya, Eyacuiñajji nijje emimijji etiiya pea'ai ojjaña huoojea canaje Jesosa iña. ⁴⁴ Jodasaa, Jesosa e'iña meejiya, yahuajo jama huohuime acanaje ba'a: —¡Bacue oe! Eyaya oe dejja ba majje cuiapashi nishoje. ¡Majoya oe miqianaya iñacue; dojo'yocue! —Jodasaa yahuajo acanaje dejja cuana.

⁴⁵ Jamajjeya Jodasa Jesosa que jjanequichipiquinaje: —Jesosa, ¡a'a mi ecuea Emeshi Mese nei jiquio! —amajje cuiapashi nisho canaje.

⁴⁶ Ma ba majje pea dejja cuaa Jesosa que poe majje iña canaje edojjji. ⁴⁷ Jesosa iña cajo oja epeejiya onijje nequiya, Penohua, baa iña canaje. Onaja sapa jajapo-

jojeajji nisho shajja jajasejjajea ca'yonaje, Eyacuiñajji nijje emimijji etiiya echacojji poanija eshajja.

⁴⁸ Jesosaa ojjaña dejja ejjachichaqui'yo nequi huohui canaje: —¿Apiojji miya poeyanaje baajji, acuijji, mejeji e iña? ¿A'a cuae jja iña siipojji so'o? ⁴⁹ Ojjaña pojjaajo eya ojjaña cuana nijje nequinaje esohui huohuijji Eyacuiñajji equijo. Jamatii eya miqianajaya iña jjima poanaje. ¿Apiojji mecajje poeyanaje e iña? Jamatii jamaya nequiana poani. Miqianaya ca mi ca oe Eyacuiñajji esohui huohuijji etehue'yo yahuajo nei nei mijo jayojja jama quea tai aña.

⁵⁰ Majoya o shajja'ajjajji cuana mete majje cuajicuajinanaje; Jesosa jea canananaje.

⁵¹ Eya ca ca iña Macoso bajjani. Jesosa ocuenaje o pa-jea sa po'yo ajjaa jjejojo. Eya daquima' poanaje; oe daqui ao ejjacueabeboquijji poanaje. Majoya dejja mase cuaa eya iña'ajja canaje. ⁵² Ohua iña cajje eyaya daqui ao jeajeanananaje, cuajicuajipoquinaje daquima' quea mete jjejojo.

Jodio etiiya Jesosa niñeba canaje

(Mateo 26.57-68; Noca 22.54-55, 63-71; Huani 18.12-14, 19-24)

⁵³ Jamajjeya joya Jesosa iñajji cuaa oya dojo canaje Eyacuiñajji nijje emimijji etiiya equi yasijje, Caipaja equi yasijje. Jocuama ojjaña Jodio cuana jjachichaquinaje, Jodio etii cuana, Moisesija etehue'yo huohuijji poani pea'ai. ⁵⁴ Penohua ca ca equijje aca poquinaje Jesosa. Caipaja equi yasijje nequiñachichaquinaje. Dobiñachichaquinaje epeeyi dojjo huasijje. Jomajo Peno equi cuiñajji nijje cuaqui pejeje jayoqui nequinaje yajja Jesosa acaje cuaa ebajji.

⁵⁵ Eyacuiñajji nijje emimijji etii, ojjaña Jodio etii cuana, Jodio esohui huohuijji poani pea'aiya ojee mimimiminate Jesosajo, ojjaña ejjachichaqui nequiya, o quecua-jea'yo sa acani. Jamajjeya sa'ajja canaje dejja cuana Jesosa huohuijji nisho epo; Shomano meshi mese Pinato bajjani yasijje dojo majje Jesosa huohuijji nisho. Jamatii Jesosa huohuijji epo chama' poanaje. ⁵⁶ Quea huiso dejjaa siajje acanaje. Jamatii oe siajjejojji esohui pea siajjejojji esohui jama pojjeama Jesosa mano mee'-yojji. Chama' beca oya jayojja mimime epojji. ⁵⁷ Quijje yejje nei beca cuana poe majje Jesosa niñeba canaje jama ba'a: ⁵⁸ —Eyaya oya shajja'ajjanaje. Jama poanaje Jesosa ba'a: "¡Jiquio Eyacuiñajji equi jeabichajea cajo, eyaya pea equi iyaje'yo pea beca peejiima huohuime. Jiquio equi dejjaja iya poanaje; pea ca ca dejjaa pojjeama iya caje'yo" Jesosa poanaje —acanaje beca cuaa.

⁵⁹ Jamatii oya cuanaja esohui pea jayojja jama pojjeama poanaje.

⁶⁰ Majoya Eyacuiñajji nijje emimijji etii ojjaña cojja nei nequisohua majje Jesosa huohui'ajja canaje: —¿A'a pa miya jama poanaje ba'a? ¿Jesosa, a'a cuae miyaya sa-ja'aje'yo so'o?

⁶¹ Jamatii Jesosa mimishi'ama jjejojo mimipanajaji jjima poanaje. Jamajjeya Eyacuiñajji nijje emimijji etiiya oya huohui neinei canaje: —Jesosa, ¿a'a cuae mi Eyacuiñajji Bacua Ejja nei, oja huoojea'yo ojjaña jaahunajji? ¡Huohuicue mo!

⁶² Jamajjeya Jesusaa acanaje: —E'e, joya ecua miyaya añña jayojjaya eya, Eyacuiñajjija huoojea'yo ojjaña jaahuanajji. Cuanaya eyaya miya e'e nei huohuiaña: Quijje miyaya eya baje ecue Chii nijje ebianeijje ani. Oya quea ca'a nee nee enequi tii. Eya miqianaaya baje bo biajje poeje o'oya —Jesusa poanaje.

⁶³ Ma shajjajja majje Jodioja Eyacuiñajji nijje emimijji etii quea quene nee nee poanaje. Quea quene nee po majje ma dejja tiiya ojaya daqui, oja huosho ba'e isajea canaje. Jodio dejja jamaya oja daqui isajea cani quea quene po majje. Ojjaña cuana huohui canaje: —¡De! ¡A'a pea dejja iyaajji Jesusa huohuijji! Jamatii.

⁶⁴ Oya Jesusa miminaje jama ba'a: "Eya Eyacuiñajjija Bacua Ejja". Chojja. Sijjepojji. ¿A'a cuae nequiaa shajja'ajjanaje oja sohui? ¿Jamajje yajja acuae seya aje so'o, Jesusa, de? —acanaje Jodio etiiya.

—¡Oya oe manojea mee'yocue; quea tai ca esohui acani! —acanaje Jodio edejja tii cuaa, Jesusa Eyacuiñajjija Bacua Ejja pojjeama poajo.

⁶⁵ Majoya aje oe Jodio etiiya Jesusa cojja cuichojea ca poa. Cojja dodo majje ejjachichaquinequiya cuia canaje pea'ai emeya. Cuia majje huohui'ajja canaje: —¡Miyaya Eyacuiñajjija huoojea nei jjabajja majje jja ca oe huohui pocue! ¿Aya acue mi cuia cani so'o? ¡Jjashahua ba'ajjaqui! —acanaje equi cuiñajji cuaa.

Penohua sijje acanaje Jesusa oja ba jjima nisho

(Mateo 26.69-75; Noca 22.56-62; Huani 18.15-18, 25-27)

⁶⁶ Ojjaña cuaa Jesusa napa caqui Penohua ba canaje esecuejo nequiya. Oe epona echacojji ahuema' ani poeyanaje. ⁶⁷ Peno cuaquí pejeje jayoqui nequi ba canaje. Ba neinei majje huohui canaje jama ba'a: —E'e jojo nei miya Jesusa nijje aninaje, ma Nasanenajo ba'e nijje —poanaje epona.

⁶⁸ —¡Chojja, ecuea oya ba jjima! ¿Ajeo acuae mi mimiani? —Peno sijje poanaje.

Majoya Peno epeeyijo nequi cuayaqui'yonaje, quea mete jjejojo. Jjeyahua nei cachina yahua taaanaje.

⁶⁹ Peno esecuejo enequi'yojo, epona sho'iyaya echacojjiya oya ba ca o'oyanaje. Ojjaña cuana huohui canaje: —Oya ca ca oma Jesusa nijje aninaje e'e jojo nei —acanaje.

⁷⁰ —Chojja, ecuea oya ba jjima nei nei. Eya ojaya epeejji pojjeama —nisho po o'oyanaje quea mete jjejojo.

Quijje pishana beca cuana Peno que ojee nequi jja-nequichipiqui majje jama poanaje ba'a: —E'e jojo nei miya Jesusaja epeejji pea'ai; pea cuana nijje nequinaje. Jamaya miquea emimi, Janinea meshijo ba'e jayojja jama miya mimiani, de —poanaje.

⁷¹ Ojaya esohui shajja'ajja majje Peno quea mete nee poanaje; onijje mimipanajjanaje: —¡Sijje miya poani! Jiquio dejja ecuea ba jjima. Eya e'e jojo nei pojjeama poani jojjemo, Eyacuiñajjiya eya mano mee ca'yome —Peno poanaje. Jamatii oya sijje poanaje.

⁷² Peno jamaya poajo chachina yahue taaa o'oyanaje. Cachina taaajo Peno jjashahuabaqui'yonaje ma Jesusa yahua jojo huohui canaje jama ba'a: —Peno, cachina

yahue beca taaame poajo miyaya eya ba jjima nisho aje; pea beca peejjima huohuime aje'yo —yahua jojo jamaya Jesusa Peno acanaje. Ma shahuaba'yo majje Peno quea yeno nee nee poanaje. Pa neinei poqui'yonaje.

Emeshi mese Pinato huasijje Jesusa dojo canaje

(Mateo 27.1-2, 11-14; Noca 23.1-2; Huani 18.28-32)

15 Majoya mecajjeahua nei Eyacuiñajji nijje emimijji etii cuana, Jodioja edejja tii cuana, Moisesija etehue'yo huohuijji poani, pea Jodio etii ejjachichaqui nequi cuana pea'ai, 71 huisome jjachichaquinaje. Ojee jjachichaqui majje miminaje Jesusa quecua'yojji: —¿Achajja amajje acuae seya Jesusa quecua meeje'yo so'o? —acanaje oya cuaa.

Jamajjeya Jesusa me jeyo majje dojo canaje Shomano meshi mese Pinato bajjani yasijje. ² Jesusa ba majje Pinatohua huohui'ajja canaje jama ba'a: —¿A'ya cuae mi so'o? ¿A'a miya Jodioja Emeshi Mese nei poaje'yo?

—E'e, joya ecua miyaya añña jamaya epo'yojji eya —Jesusa saja'a canaje.

³ Eyacuiñajji nijje emimijji etii cuaa quea huiso sijje acanaje Pinato Jesusajo. Jamatii Jesusa saja'a jjima acanaje. ⁴ Jamajjeya Pinatohua oya huohui'ajja canaje: —¿Yajjajje acuae mi mi jjasaja'aquiani so'o? ¿A'a jje shajja'ajja jjima ojaya esohui mijo? Quea huiso nee miya niñeba cani Jodio etii cuaa.

⁵ Jesusa mimishi'ama. Jamajjeya sijjepojji cuana o niñebajji saja'a jjima acanaje. Jjasaja'aqui ajja nei nei ba majje Pinatohua niñeba ca'yonaje: —¿Yajjajje acuae Jesusa mi jjasaja'aquiani so'o, de? —poanaje Pinato.

⁶ Majoya Pinatohua niñeba ca'yonaje jama ba'a: —Jjeya nei Jodio cuana ojee ijji'ijjiani esohuidojojjiya yahua jojo nei ojaya etiiquianaja bacua cuana cuia'yo jjima shejo. Ojjaña shequiaja jiquio shejo eyaya oe Jodio dejja ejeanobiajaa huoojeacuayaje'yo, ma Jodio cuaa sa cani, Jodio quea bihui epojji. Jamajjeya jiquio shejo e'e pojja'a eyaya Jesusa pichojea meeje'yo, jje-yahua nei. ⁷ Pea yani, Mashama' bajjani, Shomano meshi mese quecua panajji epo. Oya dejja tai, ejeanobiajaa ona quecua'yojji cuana nijje. E'e pojja'a eyaya Mashama' huoojeacuayajea meeje'yo —jamaya Pinato jjashahuabaquinaje.

⁸ Jjeyahua nei Jodio dejja cuana Pinato que poeyanaje. Huohui canaje jama ba'a: —Emeshi mese Pinato, ijjeyahua nei huoojeacuayajea'yocue oe Jodio dejja, ecua quea bihui nee epojji! —poanaje.

⁹ Pinato jama poanaje ba'a: —E'e, jjeyahua nei eyaya pichojeaje'yo oe Jodio dejja. ¿Ache acuae jja oe pichojeaje'yo so'o? E'e pojja'a eyaya Jodio cuanaja Emeshi Mese nei Jesusa bajjani pichojeaje'yo. ¿A'a e'e? —poanaje Pinato.

¹⁰ Pinatoja eba poanaje Jodio etii quea quene nee poani pea cuaa Jesusa nijje jjaapeequi majje Jodio etiiquianaja esohui pajea cani. Jamajjeya Jesusa iña mee canaje equacuajje'yoyji, Jodio etiiquiaa. Jamajjeya Pinatohua Jesusa pichojea mee sa acanaje. ¹¹ Jamatii Eyacuiñajji nijje emimijji etiiya ojjaña Jodio ejjachichaqui

nequi taaa mee canaje: —¡Mashama' oe huojeacua-yajae'yocue! ¡Jesosa a'a pichojea'yojji! —taaame poanaje.

¹² —Jamajjeya ¿yajja acuae oe eyaya Jesosa Quito aje so'o, Jodio cuanaja Emeshi Mese nei ca pa coma? —Pinatohua huohui'ajja canaje.

¹³ Jama taaame poanaje ba'a: —¡Oya me cacajea meecue oe, acui ecueata'apeejo! ¡Acui cueata'apeejo ba'ehuanasohuajea meecue oe emano'yojji! —taaa neineinaje cuana.

¹⁴ —¿Yajjajo acuae oya quecuaje'yo so'o? Oya mimishi'ama. ¿Apiojji acuaeya jjaya quecua'yo sa aña Jesosa? —Pinatohua huohui'ajja canaje.

Jamatii taaa majamaja canaje Jodio cuana: —¡Jesosa oe me cacajea meecue oe; acui ecueata'apeejo ba'ehuanasohuajea meecue Jesosa, de! —jama taaameya poa Jodio etii cuana.

¹⁵ Jamajjeya Pinatohua ohua sa cajo Mashama' huojeacuayajae mee ca'yonaje. Jesosa ca ca huojea canaje cuiasejjajae majje me cacajea emano'yojji.

Sohuinano cuana soa neineinaje Jesosaja

(Mateo 27.27-31; Huani 19.2-3)

¹⁶ Jamajoya emeshi meseja sohuinano cuana Jesosa dojo canaje emeshi mese chachacoañani equi dojjo huasijje. Ojjaña sohuinano Jesosa que jjachichaquinaje. ¹⁷ Jesusaja daqui oshe huijijajae mee majje daqui huo'o nei huosho mee canaje emeshi mese nisho epojji. Acuisha sipi majje sapahuahuo iya canaje, emeshi mese jayojja nisho epojji. ¹⁸ Majoya ecui'oshajjajo nequinaje ojjaña, Jesosa bihuiajji nisho. Jama bihuia nishome acanaje ba'a: —¡Miya Jodioja emeshi mese quea ca'a nee! ¡Ba'e tiitii'yocue! —sajea nisho canaje cuana Jesosa. ¹⁹ Majoya oya sapa cuiape'ejea canaje acuiya. Cuia huicha'a huicha'a canaje. Jesosa cuichojea huicha'a huicha'a canaje oja yami yasijje. Ecui'oshajjajo nequiya bihuia nisho canaje cuana. ²⁰ Ojo soa neinei'yo majje daqui huo'o nei huijijajajae canaje; ojaya daqui quia ca o'oyanaje. Majoya Jesosa quea huesha dojo canaje me cacajea, ba'ehuanasohuajea pe'a'i, sohuinano cuana.

Jesosa acui ecueata'apeejo ba'ehuanasohuajea canaje

(Mateo 27.32-38; Noca 23.26-43; Huani 19.17-27)

²¹ Jenosanenajo aniya sohuinanohua Jesosa dojo caje, ba cajjequinaje pea dejja Simoni bajjani, Simoni Sine meshijo ba'e poe'yo; oya Anejanoja ejeajji, oja chahua Shopoja ejeajji. Jamajjeya sohuinano cuana Simoni acui ecueata'apee quea biquie dojo mee canaje Jesosa ba'ehuanasohuajejji. ²² Jamaya oya poquinaje eyiyo bajjani Jonijota eyiyo huasijje. Ese Ejjaja esohuijo Esapa Jjii anijji bajjani yasijje. ²³ Esapa Jjii anijji eyiyo huasijje jaasohuajajaje cuana. Bañaqui majje Jesosa ishi mee'ajja canaje cuana acuijajja na quea sese, pasejo 'ia jayojja. Ishi mee'ajja canaje quecua ca'yajje nee'ama epojji. Sio majje ishi jjima acanaje Jesosaa.

²⁴ Majoya me cacajea ca'yonaje; ba'ehuanasohuajea ca'yonaje daqui. Ba'ehuanasohuajeyo majje oja daqui

cuana chicha ca'yonaje sohuinano cuana. Iyachicha'yo majje, onaaya hue'e nisho majje daqui majjo ca'yonaje ojaya pojji epo'yojji.

²⁵ Eshequi poe pishanajo, onaaya Jesosa acui ecueata'apeejo ba'ehuanasohuajea canaje. ²⁶ Etehue'yo o ba'e sapa biaje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a: *OYA JESOSA JODIOJA EMESHI MESE EPO'YOJJI*

²⁷ Jesosa ba'e pejeje beca siipojji pea acui ecueata'apee cuanajo ba'e huanasohuajea pea'ai ca'yonaje, Jesusaja ebiane mijiije, pea shani mijiije. ²⁸ E'e, Eyacuiñajjija esohui huohuijijaja etehue'yo yahuajo nei nei jayojja jama, jamaya acanaje ba'a: "Ojjaña cuana jjas-hahuabaquije jamaya: —Oya dejja mimishi nijje nequinaje". Yahuajo nei nei jamaya poa.

²⁹ Pea dejja cuana ejiojji poquianiya Jesosa ba majje esapa jeacajjajaja canaje, soa huisahuisa nequinaje. Jama mimijajime poanaje ba'a: —¿A'a cuae oe miyaya Eyacuiñajjija mei equi ñajebichajae'yo majje pea equi iyaje o'oya so'o, pea beca peejjima cahuime? ¡Ba'ajja socue! ³⁰ Ache ba'ajja; miya Eyacuiñajjija Bacua Ejja nei jjabaqui majje ca oe ¡acui ecueata'apeejo ba'e nequioque'ajja'yo socue, emano'yojji pojjeama! —poanaje cuana.

³¹ Moisesija etehue'yo huohuijji, Eyacuiñajji nijje emijji etii pea'ai ojo soa neineinaje. Ojee mimiminaje jama ba'a: —¿A'a Jesosa ojjaña jaahuanajji epo'yojji? Chojja, ona nahuejji pojjeama. Oya ca ca oma nequioque'yo ajja, de —poanaje.

³² Jesosa niñeba canaje pea'ai: —¿A'a cuae jja oe miya Jodioja Emeshi Mese nei poaje'yo? ¡jjaba'ajjaqui socue! Miya Eyacuiñajjija huojea'yo ojjaña jaahuanajji jjabaqui majje ¡acui ecueata'apeejo ba'e ca oe nequioque'ajja'yo socue jjeyahua nei, ecuanaja ebajji! Ba majje ecuaaya: "Miya e'e jojo nei Eyacuiñajjija Bacua Ejja poanaje" aje'yo.

Siipojji cuana ma o pejeje eba'ehuanasohuajea ba'e-ya pea'ai Jesosa jamaya niñebame acanaje quea huiso nee.

Jesosa mano'yonaje

(Mateo 27.45-56; Noca 23.44-49; Huani 19.28-30)

³³ Majoya eshequi biacojjajja nequijo shequima' jayojja poanaje; quea misi nee poanaje ojjaña meshi yasijje. Quijje sinecua eshequi jjajeapaaqui'yo majje jiji o'oyanaje. ³⁴ Sinecua, quea misi poajo, Jesosa quea yeno neineiyo taaa neineinaje: —¿Eli, eli, lama sabactani? —taaame poanaje—; ecue Chii, ecue Chii, ¿yajjajo acuae mo ya jeana'yonaje so'o? —Jesosa poanaje Jodioja esohuijo.

³⁵ Shajja'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiquiana Enia iyaa cani pojja'a, ma yahuajo nei ba'ya poa Enia iyaa cani chi, de! —jama posoya acanaje cuana.

³⁶ Jamajjeya oe dejja poquicujajajaje acuijajja na sese jjequiya. Jjequi majje shajashaja iyanobia canaje ena ejjequi yasijje. Majoya bequibobo sajo quecuahuosho

majje Jesusaja enaba huasijje huoo canaje, ojaya e'is-hijji nisho: —¡Ishoa socue! ¡Enia pojja'a poeje o nahueya, o jjequioquea'yohua! —poanaje.

³⁷ Jamatii, taaa neinei o'oya majje Jesusa mano'yonaje. Chama'yo tii poanaje. ³⁸ Jesusa mano'yajo tii, Eya-cuiñajjija equijo daqui quea moo eba'ehuana ba'e Eya-cuiñajjiya eyajje jjaisajea meequi ca'yonaje; biacuajje ebionei jjaisajeaqui meecoo canaje.

³⁹ Ojjaña ba majje, Jesusa taaa neinei majje, mano'yonaje ba majje pea'ai sohuinano huoojeajji poani, ma Jesusa nahuejji poani quea mete nee poanaje: —¡E'e jojo nei de, oya Jesusa Eyacuiñajjija Bacua Ejja poanaje! —sohuinano poanaje.

⁴⁰ Quea huesha nequiya epona cuaa pea'ai Jesusa eba'ehuanasohuajea ba'e ba cani. Oya cuana yahuajo Jesusa nijje Janinea meshijo ania poa. Onijje Jenosane-na huasijje poeyanaje, oja bobi cuacua meesahuua. Oya cuana ma bajjani ba'a: Mania Madanena; Satiaco, oja chahua Jose pea'aia enaese Mania bajjani; Seme-neoja ehuanase Sanome bajjani pea'ai; pea epona cuana quea huiso pea'aiya ba canaje.

Jesosa mei jjani yasijje huananobia ca'yonaje

(Mateo 27.57-61; Noca 23.50-56; Huani 19.38-42)

⁴² Majoya sinenaje. Mecahuajje epojja ejomishocajji, quea bihui nee ojee e'ijjia'ijjiajji pea'ai. Jamajjeya acui ecueata'apeejo eba'ehuanasohua ba'e meemee ajja.

⁴³ Jamajjeya sinecua nei dejja Jose bajjani poeyanaje, pea Jose, Amatea meshijo ba'e. Oya Jodio etii ejjachi-chaqui nequi cuana nijje nequi. Oya ojjaña quea boti nee. Ohuaya Eyacuiñajji ojjaña huoojea'yojji poaje is-hoa'ajja cani. Oya Jesusaja epeeji pea'ai yahuajo. Jamajjeya oya mete'ama po majje Pinato huasijje poquinaje Jesusajo huohuiya. Poe'yo majje ohuaya Pinato huohui caña'yonaje: —Emeshi mese Pinato, Jesusa mano'yonaje. Eyaya oya jjequioqueaje'yo jjani yasijje ehuananobiaqui'yojji —poanaje Jose.

⁴⁴ Joseja esohui shajja'ajja majje Pinato jama poanaje ba'a: —¡De! ¿A'a oya Jesusa manocuaji'yonaje?

Jamajjeya Pinatohua sohuinano huoojeajji poani, ma Jesusa me cacajeajji epo iyaa canaje. O poeyajo huohui'ajja canaje jama ba'a: —¿A'a e'e jojo nei Jesusa manocuaji'yonaje? —poanaje.

⁴⁵ —E'e, oya mano'yonaje —poanaje.

Jamajjeya Pinatohua Jose huoojea canaje jama ba'a: —E'e, ¡Jesusa dojocue! ¡Mei jjani yasijje huananobia- quicue!

⁴⁶ Jamajjeya daqui oshe quea ao nee jjeshe majje Jose poquinaje Jesusa acui ecueata'apeejo emano'yo ba'e yasijje. Jesusa emano'yo ba'e jjequioquea ca'yonaje. Daqui oshe eyacua neijo bebo canaje. Dojo canaje mei jjani yasijje, ma oja jjeya nei tio huasijje. Huananobia ca'yonaje. Majoya mei quea quemo nee jeacaj-jajjajea canaje mei jjani naba capa'yojji. Jesusa mei jjani dojjojo jaa capa'yo majje poquinaje Jose pea cuana nijje. ⁴⁷ Mania Madanena, Joseja enaese Mania bajjani pea'ai mei jjani yasijje poeyanaje pea'ai. Jomajo Jesusa jjani yasijje ehuananobiajaa ba canaje, epona cuaa.

Jesosa shequi o'oyanaje

(Mateo 28.1-10; Noca 24.1-12; Huani 20.1-10)

16 Jodioja epojja ejomishocajji jjayejjequijajo, sinecua Mania Madanena, Jacoboja enaese Mania bajjaniya, Sanomeya pea'ai shiyeshiye iña jjeshe canaje Jesusa shicuijji nisho. ² Jamajjeya mecajjeahua nei jjaja'a'ajjaqui jjimahuajo ebionei epojjajo, nomico poj-jajo, oya cuana poquinaje jjani yasijje. ³ Bañaqui jjimahuajo mimimiminaje jama ba'a: —¿Aya shai mei quea quemo jeacajjajjajea caje'yo ese dobiqiiiji? Quea quemo nee nee mei.

⁴ Epona cuana jjani yasijje poe majje ba cañaquinaje jjani huejja ecapajea'yo nequi. ⁵ Jamajjeya jjani ai yasijje dobiquinaje. Dobiqii majje epona cuaa esho'i ai ba canaje. Oja daqui quea oshe nee nee, quea ao nee. Jesusaja equipajaajji biajje ani ba canaje esohuidojojji ebiane miijijje ani. Jjeya ca ca Jesusa chama'. Ba majje epona cuana quea mete poanaje.

⁶ Jamaya oya epona cuana nijje poanaje ba'a: —¡A'a quea mete pojji! Miya ecuea eba. E'e, miyaya Jesusa ma Nasanenajo ba'ya poa sa'ajja'yo poequei, ma acui ecueata'apeejo mano'yonaje. Chama' oya jjeya jiquiojo. Shequi o'oyanaje ca jja coma. ¡E'e, quia'o jiquio ba'ajjahua'yo socue! Jiquiojo jaanaje. ⁷ Jamajjeya ijje-yahua nei poquicuajicue oja epeeji huohuiya! ¡Jama huohuime acue ba'a: “Jesusa pa shequi'yonaje” acue! “Oya jjeya nei Janinea meshi yasijje poquije miqiana poqui jjimahuajo” o shajja'ajjajji cuana huohuiquicue. ¡Peno oe huohuiñaquicue Jesusaja esohui ma ohuaya huohui canaje oe a'a pajea'yojji! ¡Oya oe jocuama ba-quicue! —esohuidojojjiya epona cuana acanaje.

⁸ Jamajjeya epona cuana jjani esecue yasijje cuaya-qui'yo majje poquicuajicujajinaje. Quea mete neejo oya cuana piopionaje. Pea nijje mimi jjima Jesusajo. Cuajicujajinaje Jesusa shajja'ajjajji cuana esohuidojojjiya esohui huohuiya.

⁹ E'e, ebionei epojjajo, nomico pojajajo, Jesusa shequi o'oya majje, jjanequija'aqui'yo majje pea'ai, Mania Madanena ebionei oya ba ca'yonaje. Oya Maniaja yahuajo eshahua quea huiso dobiqiiyajo, Jesusaa eshahua cuana huoojeacuayajea ca'yonaje me oeje pea beca huismo. ¹⁰ Majoya Jesusa ba majje Maniaa o shajja'ajjajji cuana huasijje poquicuajinaje huohuiya. Jesusa emano'yo tii jaa posajo, oya cuana pa neinei aninaje quea yeno. ¹¹ Jamajjeya Maniyaa oya cuana huohui cañaquinaje Jesusa eshe o'oya: —Eyaya oya banaje e'e jojo nei —acanaje Maniaa.

Jamatii Maniaja esohui shajja'ajja majje oya cuana jama poanaje ba'a: —E'e pojja'a. Chojja, sijje miya poani, Mania —acanaje cuaa, Jesusa shequi o'oya ajja poso acanaje.

¹² Majoya Jesusaja epeeji becanejjijji pea'ai ejiojjijje poquijejo, Jesusa pea jayojjaya jjanequija'aquinaje onijje. Jesusa ba jjima poanaje cuanaja. ¹³ Quijje yejje nei oya e'e jojo nei Jesusa ba majje oya cuana poquinaje pea eshajja'ajjajji cuana huohuiya. Jamatii ojjaña jama poanaje ba'a: —E'e pojja'a, de. Chojja de, oya ma-

no'yo tii —ojjaña cuana poanaje, Jesosa shequi o'oya ajja poso acanaje.

Jesosa ba canaje o shajja'ajjaji cuaa

(Mateo 28.16-20; Noca 24.36-49; Huani 20.19-23; Hecho 1.6-8)

¹⁴ Quijje Jesosa shajja'ajjaji cuana 11 huisome oe equijo ojee ijja'ijja anijo Jesosa onijje jjanequija'aqui'yonaje. Oya cuana tecuea canaje jama ba'a: —¿Apiojji acuae quiana quea sapa ca'a poani? ¿Apiojji shajja'ajja jjima onajaya ehuhui'yo eya eshe o'oya ba majje? ¡Bacue eya e'e jojo nei eshequi'yo, jjabahuejjaquicue! —Jesosaa acanaje.

¹⁵ Majoya Jesosaa oya cuana jama acanaje ba'a: —¡Poquicue ojjaña cuana huasijje, ma ojjaña meshijo ba'e yasijje! ¡Ecuea esohui quea pame nee eba'e tiitii'yojjijo ba meequicue! ¡Enijje jjapeequi meequicue! ¡Enijje jjapeequiyajo enajo besa meecue! ¹⁶ Ojjaña joya enijje jjapeequiani Eyacuiñajjiya ba'e tiitii mee caje'yo. Enijje jjapeequiyajo, ¡ojjañaja ebajji onaaya oya cuana besa meequicue! Ojjaña joya enijje jjapeequi'yo ajja ca ca Eyacuiñajjiya quea nee nee po mee caje'yo, quea mimishi poanajejojo. Jamajjeya Eyacuiñajjiya oya cuanaja mimishi cuanajo quea yeno po mee caje'yo.

¹⁷ —Ecuea epeeji cuana eyaya ameeje'yo ma dejjaa ajjima acani. Oya cuana eyaya quea ca'a nee po mee-

je'yo, eshahua cuana dejjajo nequi huoojeacuayajea meeje'yo. Pea esohui ojaya cuanaja ba jjima mimi meeje pea'ai. ¹⁸ Peyo se najji ba jjima iña majje mano'yo jjima po meeje'yo eyaya. Ena pase nei nei pase'ama poso ishijea majje, mano'yo jjima po meeje eyaya. Ecuea epeeji neiya emano biajje eme huana majje jiquio quea aja poaje; eyaya jjaajaqui meeje'yo, huaquia meeje'yo pea'ai —Jesosaa o shajja'ajjaji cuana huohui canaje.

Jesosa jjequisohua ca'yonaje eyahuasijje

(Noca 24.50-53)

¹⁹ Majoya Emeshi Mese nei Jesosa pea cuana nijje mi-miajo, oja Chiiya, Eyacuiñajjiya jjequisohua ca'yonaje eyahuasijje. Jomajo oya Jesosa anioquenaje oja Chii ebianeijje mijijje onijje ojjaña huoojea'yojji epojji. ²⁰ Majoya o shajja'ajjaji cuaa Jesosaja esohui huohuiqui canaje ojjaña cuana huasijje. Ojaya esohui jayoija jama Emeshi Mese nei Jesosaa oya cuana ameesahua canaje ma dejjaa ajjima acani ojjañaja ebajji ojaya esohui cuana e'e nei nei. Jamaya ojjaña ba mee canaje Jesosaa oya cuana huoojea canaje ojaya esohui huohuiya.

Jesosaa eya Macoso bajjani jiquio esohui tehue mee canaje. Mahuiso. Apoa.

NOCA

¹ Eyaya mi que tehuenaje Teopino achajja Jesosa ebajji. Quea dejja huisohua Jesusaja ehuhui'yo cuanajo tehue sa aca cua, huohui mee sa aca cua pea'ai. ² Ojaya epeeji cuaa, ojaya esohui huohuijji cuaa, Jesosa ba neinei ca cua. Ohuaya ecuanaya huohui neinei ca cua. ³ Jamajjeya eyaya catehue'yahua onaa huohui ca'yoqui Jesusajo. Jjeya eyaya mi que tehuenaje, Teopino. Jiquio esohui e'e jojo nei Jesusajo. Eyaya shajja'ajja neineinaje onaa huohui ca'yoqui Jesusajo. Majoya jjashahuaba neineiquinaje jiquio etehuejji, jamajjeya e'e jojo nei jiquio esohui. ⁴ Tehuenaje eyaya miquea Jesosa eba neinei. Mi jjashahuaba neineiquijji eyaya tehuenaje, de. Jamajjeya jba neineicue jiquio esohui ecue tehue'yo!

Oe esohuidojojjiya Sacania huohui ca cua bacuajji cuajo, Huani ona besameeji epojji cuaje

⁵ Yahujajo pishana Jodioja emeshi mese nequia cua. Yohua bajjani cua ba'a: Enode. Ma eshequiajajo tiya aje ba'ya cua Eyacuiñajji nijje mimiani yohua bajjani ba'a: Sacania. Oya chacochoania cua Eyacuiñajji nijje emimijji cuana nijje, ma dejja yohua bajjani nijje ba'a: Abiase dejja cuana nijje. Oya cuana Eyacuiñajji nijje mimiania cua. Sacaniaja ehuanase yohua bajjani cua ba'a: Isameni. Isamenija etiiquiiana cuana Eyacuiñajji nijje mimiani pea'ai cua. Anoni dejja bajjani cua. ⁶ Sacania Eyacuiñajji epeeji nei nei cua, oja huanase o jayojja nei neiya cua. Oya cuaa shajja'ajja neinei ca cua Eyacuiñajji esohui. ⁷ Jamatii bacuama' cua; ojaya ehuanase jjamejoqui ajja neinei cua. Ehuanase epona tii cua; oya edejja tii pea'ai cua.

⁸ Pea pojajajo Sacania jjachichaquia cua Eyacuiñajji nijje emimijji cuana nijje. Pea cuaa oya jama aca cua ba'a: —Sacania, ijjea jiquio pojajajo Eyacuiñajji nijje mimicue! jJeyahua nei mee nei dobiquicue Eyacuiñajji equi yasijje, equi quecuayijji sisi yasijje! jDobiqui majje acui shaa dahua huichachajecue huichacha shiye epojji! jMa ojjaña aca cua jayojjaya oe acue!

Dobiqui majje Sacaniaa jamaya aca cua Eyacuiñajji equijo nequia. ¹⁰ Beca cuana aje oe esecuejo nequia cua Eyacuiñajji nijje emimijji pea'aiya. ¹¹ Sacaniaa aje oe acui shaa quea shiye dahua huichachajea canequia cua acui shaa edahuajejji biajje iya ani. Majoya aje oe Eyacuiñajji esohuidojojji jjanequija'aquia cua, edahuajejji ebañei mijijje nequia cua. ¹² Sacania esohuidojojji ba majje piopio neinei'ya cua esohuidojojji ba po jjima jjejojya. ¹³ Majoya aje oe esohuidojojji jama aca cua ba'a: —Sacania, ja'a piopiojji! Miya

Eyacuiñajji nijje mimi majamajanaje ebacua yajjijo. Jamajjeya miya Eyacuiñajjiya shajja'ajja canaje miquea esohui ebacua yajjijo. Miquea ehuanase aje oe jjamejoquije. Majoya jebacua cuayajo Huani bajjani acue!

¹⁴ Miya o cuayajo quea bihui nee nee cuaje. Pea dejja cuanaya quea bihui nee nee cuaje ebacua cuayajo.

¹⁵ Oya Eyacuiñajji epeeji nei nei cuaje, jamajjeya mi-quianaya quea bihui nee cuaje. Oya acuijjajja na sese ishi ajja cuaje, ecahuishi ishi ajja pea'ai cuaje. Edojjoshahua Bameya jaahuana caje'yo oya cuayajo. ¹⁶ Ohuaya Eyacuiñajji esohui huohui bame bame caje. Jamajjeya quea huiso Jodio cuaa shajja'ajja caje Eyacuiñajji esohui. Ohuaya jjapeequi mee caje'yo quea huiso Jodio dejja cuana Eyacuiñajji nijje. ¹⁷ Huaniya ebionei esohui huohui caje, majoya aje Quitohua, Eyacuiñajji huoojja'yohua esohui huohui caje. Huani Enia jayojja cuaje. Enia ma etiiquiiana cua; Eyacuiñajji esohui huohuijji nei nei cua. Huani Eyacuiñajji esohui huohui po nequije. Shajjama' cuana ohuaya sohuihuohui caje. Majoya shajjama' cuaa ojaya esohui shajja'ajja caje; jjapeequije Eyacuiñajji nijje. Ojaya esohui shajja'ajja majje Quitoja esohui shajja'ajja sa acaje.

¹⁸ Sacaniaa huohui'ajja ca cua esohuidojojji jama ba'a: —De, zachajja acuae po cajji so'o? Oya ca iña edejja tii nojinoji aña, ecuea ehuanase epona tii pea'ai.

¹⁹ Esohuidojojjiya jama tecueame aca cua ba'a: —Eya bajjani Jamieni, eya Eyacuiñajji esohuidojojji nei nei cueyanaje. Ohuaya eya huoojja canaje minijje mimiya. Ecuea esohui quea bame miyaya shajja'ajjanaje. ²⁰ Miya jjashajja'ajjaqui ajja cuanaje, jamajjeya miya mimi ajja cuaje. Huani cuayajo ca mi ca oe mimije'yo. Ma ecua miya eyaya huohuinaje jayojjaya cuaje miya —jamaaya cua esohuidojojji.

Majoya aje Sacania mimi ajja po mee ca'ya cua.

²¹ Pea cuaa esecuejo nequia ishoa'ajja ca nequia cua Sacania. Jama huohui'ajjame aca cua ba'a: —jYajjaje shai Sacania eyiyedojo tii nequi?

²² Majoya Sacania esecue yasijje cuaya'yo majje mimi'yo ajja cua. Eme nei ca ca oe huo canequia cua Sacaniaa. Sohujmajojo jama aca cuaa cua ba'a: —Ohuaya pojja'a ba canaje esohuidojojji nei eyiyedojo nequi, de.

²³ Sacania Eyacuiñajji equijo chacojeyo majje poquia cua oja equi yasijje. ²⁴ Quijje pishana Sacaniaa ehuanase bacua jea ca cua, o'eji po majje. Isameni me oejje ba'ime cuayaqui'yo jjima; ania cua oja equijo tii. Oya jjashahuabaquia cua jama ba'a: ²⁵ —Eyacuiñajjiya eya jjamejoqui meesahua canaje quea bihui epojji. Jje-

ya pea cuana mimijaji'yo ajja e bacuajjijo —jamaya Isameni cua.

Esohuidojojjiya Mania huohui ca cua quijje ojaya eba-cua ecuayajjijo

²⁶ Janinea meshijo oe epona ahuema'ani ania cua, Mania bajjani. Oya Nasanena cuiñajjijo ania cua. Isameni Maniaja enene mese cua. Isameni me oeje oe ba'ime o'ejji anijo Eyacuiñajjiya ma esohuidojojji huoojea ca o'oya cua Mania que. Mania jjahuaqui jjima cua; dejja ba po jjima ania cua. Oya ca jjahuaqui sa cua dejja yohua bajjanijo ba'a: Josejo. Joseja baba etiiquiana yohua bajjani cua ba'a: Dabi. Dabi Jodio dejjaja emeshi mese yahuajo nei nei cua. ²⁸ Esohuidojojji dobiquia cua Maniaja equi yasijje. Jama mimime cua onijje ba'a: —Mania, yani eya. Eya Eyacuiñajjiya huoojea canaje mi que mimiya. Miya ca ca oe ohuaya bacaca canaje ejjamejoquijji. Eyacuiñajji miquea Emeshi Mese nei, miya ohuaya jaahuana cani —jamaya cua esohuidojojji.

²⁹ Mania quea mete cuanaje esohuidojojjiya esohuijo. Majoya oya jama jjashahuabaquime cua ba'a: —¿Apiojji shai oya jama mimime cuani enijje?

³⁰ Esohuidojojjiya jama aca cua ba'a: —Mania, ja'a quea mete pojji! Eyacuiñajjiya miya quea jea nee acani. ³¹ Jjeyahua nei miya o'ejji anije, ebacuajje dejja cuaje. ¡Yohua bajjani acue ba'a: Jesosa! ³² Oya quea bame nee nee ba'ejje. Pea cuaa bajjani caje Eyacuiñajjiya Bacua Eja nei oya. Eyacuiñajjiya oya po mee caje'yo ojjañaja Emeshi Mese nei epojji; Dabi emeshi mese jayojja oya cuaje. Jodio dejjaja Emeshi Mese po tiitijje'yo —jamaya cua esohuidojojji. ³⁴ Maniaa esohuidojojji huohui'ajja ca cua jama ba'a: —¿Achajja jjamejoquime acuae po cajji so'o, ca dejja ba po jjima?

³⁵ Esohuidojojjiya jama aca cua ba'a: —Edojjoshahua Bame nei mi que cueje. Bo jayojja mi que anioqueje. Eyacuiñajjiya miquea ebacua ba'e mee caje. Jamajjeya miquea ebacua quea bame nee nee cuayaje oya Eyacuiñajjiya Bacua jjejojo. ³⁶ Ecuea esohui e'e jojo nei, mi que nene Isameni esho'yahua bacuama' tii cua. Jjeya ca ca oe jjamejoquinaje. Me oeje oe ba'ime ejjamejoqui ani. Jamajjeya ecuea esohui e'e jojo cuanaje. ³⁷ E'e, Eyacuiñajjiya camaja'ama po mee caje'yo ojjaña —jamaya esohuidojojji cua.

³⁸ Jamajjeya Mania jama cua ba'a: —Eya Eyacuiñajji nijje jjapee neinei qui sa cuani. Miquea esohui jayojja jama ca'a cahua Eyacuiñajjiya —jamaya cuanaje Mania.

Majoya esohuidojojji poqui'yonaje.

Mania poquia cua e'a'i meseja equi yasijje anicuaa

³⁹ Quijje pishana Mania poquia cua e'a'i meseja equi yasijje, Isamenija equi yasijje. Jodea meshi bajjani yasijje poquicuajinaje, eyiyojo ba'eca huasijje. ⁴⁰ Isamenija equi yasijje dobiqui majje Mania jama cua ba'a: —Eya mi que cueyanaje anicuaa.

⁴¹ O mimiajo Isamenija bacua teejo ba'e moquiquia cua. Isameni quea bihui cua; Edojjoshahua Bameya

mimi mee ca cua. ⁴² Jamajjeya Isameni jjanobajjima nei mimia cua Mania nijje jama ba'a: —Mania, miya Eyacuiñajjiya quea jea nee nee pea epona jayojja jama pojjeama. Jamajjeya miquea ebacua teejo ba'e ojaya quea jea nee nee pea'aiya. ⁴³ E'e, miya cueyanaje e que anicuaa, jamajjeya eya quea bihui nee cuani miya Eyacuiñajjiya Bacua ba'e meejojo. ⁴⁴ Mi ecue equi yasijje dobajjo ecuea ebacua moquiquinaje teejo ba'e. ⁴⁵ E'e, miyaya Eyacuiñajjiya esohui shajja'ajja neineinaje, jamajjeya jamaya acaje'yo —jama mimimeya Isameni cua.

⁴⁶ Majoya aje Mania jama mimime cua ba'a: —Jjeya eya quea bihui nee nee Eyacuiñajji nijje. ⁴⁷ Eyacuiñajji ecuea Emeshi Mese nei cuani. Ohuaya ecuea mimishi cuijea ca'yonaje. ⁴⁸ Jamatii eya epona, ahuema'ani. Eya ba'e sa cuani Eyacuiñajjiya yajjijo. ¿Yajjajo shai Eyacuiñajjiya eya bacaca canaje? Jamatii ojjaña cuana aje oe mimi tiitijje'yo ejo jama ba'a: “Mania quea bihui nee nee. Eyacuiñajjiya oya bacaca canaje”. ⁴⁹ Eyacuiñajji quea ca'a nee nee. Jamajjeya eya ohuaya quea bame acanaje. Oya mimishi'ama nei nei, quea bame nee nee ba'e. ⁵⁰ Eyacuiñajjiya ojaya epeejji cuana jaahuana cani. E'e, ojjaña joya onijje jjapeequiani Eyacuiñajjiya jaahuana cani etiiquiana yahuajo nei ba'ya cua, esho'iquiana jjeya nei ba'yani pea'ai. ⁵¹ Beca cuana onijje jjapeequi jjima ohuaya ca'a'ama po mee ca'yani. Dejja mimishi cuana ca'a'ama po mee ca'yani, emeshi mese mimishi cuana ohuaya ca'a'ama po mee ca'yani. Ojaya epeejji ca ca oe ohuaya quea ca'a po mee ca'yani.

⁵³ Ojjaña cuana oja esohuijo jjashajja'ajjaqui sa cuanijo ohuaya jjashajja'ajjaqui mee caje'yo. Beca cuana ca ca oja esohuijo jjashajja'ajjaqui sa po ajjajo ohuaya jjashajja'ajjaqui mee jjima acaje'yo; jeajea caje'yo cuaqui yasijje jjashajja'ajjaqui sa po ajjajojo. ⁵⁴ Eyacuiñajjiya Jodio dejja cuana jaahuana caje. Jamajjeya ohuaya oja Bacua Eja huoojea caje Jodio dejja jaahuanajji epojji. Ohuaya pajea'yo jjima acaje'yo. ⁵⁵ Jamaya ohuaya esejaya etiiquiana Amajama jaahuana ca cua. Oja bacua cuana pea'ai jaahuana ca cua. Oja osecua cuana jaahuana tiitii ca cua. Jjeya nei ohuaya eseya jaahuana cani pea'ai —jama bihuimeya Maniaa Eyacuiñajji aca cua.

⁵⁶ Majoya Mania pea beca peejjima ba'ime ania cua oja nene nijje. Majoya aje Mania poqui'ya cua oja equi yasijje.

Huani cuaya cua ona besameejji epojji

⁵⁷ Quijje Isamenija bacua cuaya cua; yahue cua.

⁵⁸ Ojaya huapa pojjeama cuana cueya cua oja bacua baa. Ojjaña Eyacuiñajji nijje quea bihui cua Isamenija ebacua cuayajo. ⁵⁹ Me oeje pea beca peejjima cahui-me po majje ojjaña cue o'oya cua ebacua bajjaniya; oja cuiishasha jehuissejjajee pea'ai. Ojjaña bajjani sa aca cua ejejajji bajjani. ⁶⁰ Isameniya ca jama aca cua ba'a: —Chojja, ¡yohua bajjani oe acue ba'a: Huani!

⁶¹ Pea cuaa jama aca cua ba'a: —¿Apiojji acuaeya ma bajjani aje? Chama' aje jja che pea bajjani Huani.

⁶² Jamajjeya aje jja oe ojjaña Sacania huohui'ajja ca cua: —¿Ae bajjani acuae jja cuaje so'o?

⁶³ Majoya Sacaniaa mimi ajja jjejojo jama tehueme aca cua ba'a: —¡Huani bajjani oe acue!

Ojjaña jama cua ba'a: —E'e, ¿apiojji shai?

⁶⁴ Majoya aje Sacania mimi mee ca o'oya cua Eyacuiñajjiya. Jamajjeya ohuaya Eyacuiñajji bihui ca o'oya cua. ⁶⁵ Ojjaña cuana ca jja ca jama cua ba'a: —De, Sacania mimi'ya, de.

Majoya ojjaña cuana poquia cua huohui pohua, ojjaña eyiyojo ba'eca cuana huohuiya. ⁶⁶ Ojjaña shajja'ajja majje huohui'ajja ca cua jama ba'a: —Eyacuiñajjiya jaahuana cani Sacaniaja bacua, Huani. Oya quea ca'a nee nee cuaje; Eyacuiñajjiya quea bame nee nee ba'e meesahua caje Huani.

Sacania sohuicuaya cua

⁶⁷ Sacania Edojjoshahua Bameya sohuicuaya mee ca cua. Jama sohuicuayame po mee ca cua ba'a: ⁶⁸ —Eseyaya oe Eyacuiñajji ejjabihuaqui, ojjaña. Oya esejaya Emeshi Mese nei, Jodio dejaja Emeshi Mese nei, de. Ohuaya esejaya mimishi cuana cuijea ca'vani. ⁶⁹ Ohuaya Quito huoojea caje ese que. Ma ehoojea'yo Quito quea sohui poja nee nee cuaje'yo. Quitohua eseya quea ca'a po mee caje'yo. Ojaya etiiquiana Dabi emeshi mese cua yahuajo nei iye ca'a ca'a cua, Quito ca ca oe ojjaña Emeshi Mese cuaje ese jaahuanajji. ⁷⁰ Jamaya yahuajo tehue ca cua Eyacuiñajji esohui huohuijji cuaa. Tehue majamaja ca cua Quitojo. ⁷¹ Jama tehue me aca cua ba'a:

“Yani dejja cuana ecuana nijje mimijaji neinei. Ecuana boti'ama cuani, cuijea sa acani. Jamajjeya aje oe ecuanaya Eyacuiñajjiya jaahuana cani”. Jamaya esohui etehue'yo cuana cua.

⁷² —Eyacuiñajji yahuajo mimia cua ecuanaja etiiquiana nijje, Amajama nijje jama ba'a: “Eyaya Quito huoojea'yo miquiana ojjaña jaahuanajji”. Jamaya aca cua ohuaya ojaya epajea'yojji pojjeamajojo. ⁷⁴ Jamajjeya eseyaya Eyacuiñajji ejjabihuaqui; Quitohua dejja mimishi cuanajo mete'ama po mee cani. Eseyaya jaahuana caje'yo. Quea bame ba'e mee caje'yo mimishi'ama epo'yojji —jama sohuicuayameya Sacania cua.

⁷⁶ Majoya Sacaniaa oja bacua jama aca cua ba'a: —Miya ecue bacua oe nei. Miya Eyacuiñajjiya esohui huohuijji cuaje'yo. Ohuaya miya huoojea caje ebionei. Huohucue jama ba'a: “¡Oya shajja'ajjacue! Oya Quito, Eyacuiñajjiya huoojea'yo ojjaña jaahuanajji cueje”.

⁷⁷ Huani, miyaya ojjaña cuana huohucue jiquio esohui jama ba'a: “Eyacuiñajjiya ojjaña cuanaja mimishi cuijea caje'yo onijje jjapeequianija”. ⁷⁸ Jamaya eseya Eyacuiñajjiya quea jea nee nee acaje'yo. ⁷⁹ Jamajjeya ecuana mete'ama cuaje onijje jjapeequi majje. Poquije eyahuasijje onijje eba'e tiitii'yojji. Ohuaya eseya quea bihui po mee caje'yo —jamaya Sacania cua.

⁸⁰ Majoya ebacua tii majje quea ca'a nee nee cua; Eyacuiñajjiya epeeji nei nei cua. Oya oe nei ba'ya cua quimajo. Majo tiya aje Huaniya esohui huohui ca cua Jodio dejja cuana huasijje.

Jesosa cuayanaje

(Mateo 1.18-25)

² Huani cuaya cua shejo emeshi mese yohua bajjani cua ba'a: Agosto Sesa. Emeshi meseya echacojji cuana huohui ca cua jama ba'a: —¡Sicoquicue ecue meshijo ba'e cuana! ¿Ache huiso ba'ajja'yo socue? ¡Huohucue ojjaña dejja cuana jama ba'a: “¡Poquicue mi cuayacua meshi yasijje mique bajjani tehueya; jamaya emeshi mese cuanaje!” acue! —jamaya Sesaa aca cua.

² Emeshi meseya Sesaa jama sico coome aca cua. Ma shejo tiya pea emeshi mese Sineño bajjani cua; ojaya meshi Sania bajjani cua. ³ Jamajjeya aje oe ojjaña poquia cua o cuaya cua meshi yasijje.

⁴ Jose, Maniaja ejajiba cua. Jose Nasanenajo ba'eja jajiba cua, Janinea meshijo. Oja etiiquiana Dabi cua, yahuajo Dabi ba'ya cua Benenajo, Jodea meshijo. Jamajjeya Jose poquia cua Benena huasijje emeshi meseja esohuijo oja bajjani tehue meeya. Jose, oja shiye nijje poquia cua. Quea huesha poquia cua. Mania ebacua cuayajea'yo pana nei poquia cua. ⁶ Majoya aje Benena bañaqui majje Maniaja bacua cuayañaquinaje. ⁷ Quea dejja huiso ania cua Benenajo jjabajjani tehue meequiya poqui. Jamajjeya chama' equi ejaachichajji cua. Jamajjeya aje oja bacua cuaya cua ana'ai jaajji equijo. Ojaya ebacua cojjasobo cuaya cua jomajo. Cuayajo ohuaya bebo ca cua daqui oshejo.

Ñajjaja jaahuanajji cuaa esohuidojojji ba ca cua

⁸ Ma mecajje aje Benenajo chipi nei pishana ñajjaja jaahuanajji cuana ñajjaja cuiña po añja cua. ⁹ Majoya aje esohuidojojji jjaja'aquia cua. Majoya aje oe o chipi nei jeajahuajahua ca cua esohuidojojjiya. Mete neinei'ya cua ñajjaja jaahuanajji cuana. ¹⁰ Esohuidojojji jama cua ba'a: —¡A'a quea mete pojji! Eyaya esohui quea bame nee huohuaña ojjaña dejja cuana quea bihui nee po meejji. ¹¹ Jjeya nei cuayanaje oe ebacua Dabija meshijo. Ma ebacua Eyacuiñajjiya huoojea'yo. Ohuaya miquianajaya mimishi cuijea caje'yo; yohua bajjani cuaje ba'a: Quito. ¹² ¡Miquianaya poquicue ebacua baa Benena huasijje! Jomajo aje ana'ai jaajji equijo ebebo jaa oja nae nijjeya, oja chii Jose nijjeya pea'ai —jamaya cua esohuidojojji.

¹³ Majoya aje quea huiso esohuidojojji cuana jjaja'aquia cua. Sohuicuayanaje ojjaña esohuidojojji cuana Eyacuiñajji bihuajji. Jama sohuicuayame cua ba'a:

¹⁴ “Eyacuiñajji quea ca'a nee nee. Eyajo ba'e, quea ao nee nee. Eyacuiñajjiya ojjaña ojaya epeeji cuana ojjaña meshijo ba'e quea bihui po mee caje”.

¹⁵ Majoya esohuidojojji ba'esohuaqui'ya cua eyahuasijje. Ñajjaja jaahuanajji cuana jama mimime cua ba'a: —De, cue'ajjaa Benena huasijje. Ma esohuidojojjiya huohui canaje jayojjaya aje seya aje.

¹⁶ Majoya poqui cuajicujia cua ebacua sa'ajjaa. Majoya ana'ai jaajji equijo jaa ba cañaquia cua ebacua, Mania, Jose pea'ai. ¹⁷ Majoya ba majje huohui'ajja cañaquia cua esohuidojojjiya esohuijo ebacujajo. Pea cua

na huasijje huohui ca cua pea'ai. ¹⁸ Beca cuana shajja'ajja majje jashahuabaquia cua ñajjajja jaahuanajji cuanaja esohuijo. Quea bame cua. ¹⁹ Mania jashahuabaquia cua pea'ai. Pajea'yo jjima aca cua ñajjajja jaahuanajji cuaa huohui canaje esohui. ²⁰ Majoya ñajjajja jaahuanajji cuana poqui'ya cua ñajjajja jaahuana'yohua. Poquije'yohua Eyacuiñajji bihuia nei nei ca poqui'ya cua. Esohui quea huiso sohuicuaya cua: —Esohuidojojji esohui e'e jojo nei —cuanaje.

Ebacua Jesosa dojobia cooqui ca cua Eyacuiñajji equi yasijje

²¹ Me oeije pea beca peejjima cahuime cuajo Jesosaja naeya oja chiiya pea'ai bajjani canaje Jesosa. Ma esohuidojojji esohui jayojja Mania jjamejoqui jji-mahuajo bajjani ca cua. Jesosaja cuiishasha Jehuisejja-jea ca cua pea'ai, ojjaña Jodioja ebacua jayojjaya jama aca cua.

²² Ba'i oe cuajo Mania Joseya pea'ai Jesosa dojo ca cua Eyacuiñajji equi yasijje Jenosanena huasijje. Mania Eyacuiñajji equi yasijje dobiqqui jjimahuaa Moisesija etehue'yo jayojja aca cua. Majoya Jesosa dojobiaqui canaje Eyacuiñajji equi yasijje huohuiya. ²³ Jamaya aca cua Moisesija etehue'yojo ba'a:

“¡Ebacua cojjasobo dejja huohucue Eyacuiñajji yasijje!
²⁴ ¡Becanejjiji pea'ai huia' quiacue Eyacuiñajji nijje mimiani yasijje equiyo jeyojeyo'yojji cuaqui pohui pojji epo'yojji! Jamaya miya ajo Eyacuiñajjiya mimishi cuijea caje'yo. ¡Jamaya Eyacuiñajji sosequiajji acue!”
Jamaya Moisesija etehue'yo cua.

²⁵ Oe Jodio etii Simeoni bajjani Jenosanenajo ba'ya cua. Oya Eyacuiñajji epeeji nei quea bame nee nee cua. Ohuaya Quito ishoa'ajja ca ania cua Eyacuiñajji huoojea'yo ojjaña jaahuanajji. Jamatii jashahuabaquiani Eyacuiñajji, jamajjeya Edojjoshahua Bame ojo nequia cua. ²⁶ Jamaya Edojjoshahua Bame onijje cua ba'a: —Miya emano'yojji pojjeama Eyacuiñajji huoojea'yo cue jjimahuajo.

²⁷ Jamajjeya Edojjoshahua Bameya Simeoni poqui mee ca cua Eyacuiñajji equi yasijje. Simeoniya Jose, Mania Jesosa bishamijji nequi ba ca cua Eyacuiñajji equijo. ²⁸ Simeoniya ebacua Jesosa aña majje ba ca cua. Eyacuiñajji bihuia ca cua Jesosa ohua ba mee caje. Jama cua ba'a: ²⁹ —E'e de, jjeya nei Eyacuiñajjiya huoojea canaje ma ohua huoojeapana ca cua; jamajjeya ohuaya eya ba mee canaje. Jjeya eya poquije'yo Eyacuiñajji yasijje quea jaji nee eba'e tiitii'yojji. ³¹ Ojjaña meshijo ba'e cuaa Jesosa ba caje, Eyacuiñajji huoojea'yo ojjañaja mimishi cuijea'yojji. ³² Jesosaa ojjaña dejja cuana quea jashahuabaqui ja'a nee po mee caje'yo Eyacuiñajji esohuijo. Jesosa Emeshi Mese nei epojjiyojo, Jodio dejja cuana quea bihui cuaje'yo —jamaya Simeoni cuanaje.

³³ Majoya Jesosaja chii, enaese pea'ai jashahuabaquia cua Simeonija esohuijo jama ba'a: —E'e de, Simeonija esohui quea bame nee nee Jesosajo.

³⁴ Majoya aje Simeoniya Mania, Jose pea'ai jama aca cua ba'a: —Miquianaya aje Eyacuiñajjiya quea bame

acaje'yo. Mique bacua quea ca'a po mee caje. Jaahuana caje'yo. Mania, miya Jesosaja enaese. Mique bacua Jodio cuana jashahuabaqui mee caje'yo Eyacuiñajji quea huiso nee. Beca dejja cuana jjapeequije'yo Eyacuiñajji nijje. Beca cuaa cajaa acaje, jjapeequi sa po ajja Eyacuiñajji nijje. ³⁵ Mimijajije Jesosa nijje cuana. Oya quecua caje'yo cuaa. Majoya aje oe miquianaya quea yeno cuaje ma cuanajoya —jamaya Simeoni cuanaje.

³⁶ Jomajo oe epona tii ania cua; Ana bajjani. Eyacuiñajji epeeji nei nei cua; Panoaneja bacua piona. Oja ya huapa pojjeama Asene bajjani cua. Yahuaajo oya jjahuiaquia cua. Oja yahue nijje ba'ya cua me oeije beca, 7 shequiajame. Majoya aje ojaya yahue mano'ya cua. ³⁷ Jamajjeya quea huiso nee nee shequiajame, 84 shequiajame ania cua. Etii nojinoji nei e'ahuemano'yo ania cua. Eyacuiñajji equijo jjeya ani, cuayaqui ajja neinei ania cua. Jamatii mimiania cua Eyacuiñajji nijje, bihuibihuia tiitiania cua ojjaña pojjaajo.

³⁸ Anaa ba ca cua Jesosa. Quea bihui nee cua. Jamajje dejja cuana nijje mimia cua joya Eyacuiñajji huoojea'yo ishoa'ajja po ani nijje jama ba'a: —¡E'e ee bacue jiquio ebacua, Jesosa Quito cuayanaje! Ohuaya quea bei ba'e mee caje'yo Jodio cuana. Ojjaña cuanaja Emeshi Mese nei cuaje'yo —jamaya Anaa aca cua cuana.

Jose poqui o'oya cua oja meshi yasijje Nasanena huasijje

³⁹ Ojjaña Moisesija etehue'yo acua ajeyo'yo majje Jose oja huanase nijje, Jesosa pea'ai nijje poquia cua. Ma o ebionei ba'ya cua meshi yasijje poqui o'oya cua, Nasanena huasijje. ⁴⁰ Jomajo Jesosa tiia cua; quea ca'a nee nee, quea jashahuabaqui ja'a nee cuanaje. Eyacuiñajjiya oya jaahuana ca cua; quea bei nee nee ojo cua.

Jesosaja etii shacuima' nequi epo oja naeya oja chiiya pea'ai dojo ca cua Eyacuiñajji equi yasijje

⁴¹ Jesosaja chii oja nae nijje poqui nequia cua Jenosanena huasijje pea Jodio cuana nijje ojjaña shequiajajo. Pascua pohua poquia cua Eyacuiñajji bihuiaa. Yahuaajo nei Jodio etiiqianaja bacua cuana esohuidojojjiya cuia'yo jjima aca cua shejo poquia cua ojjaña nijje ijja'ijjiaa. ⁴² Jesosaja etii shacuima' nequi po majje, 12 shequiajame po majje poqui pea'aiya cua. ⁴³ Oe semana Jenosanenajo ania ojjaña cuaa Eyacuiñajji bihuia ca ania cua. Majoya Pascua jjayejequiajo ojjaña cuana poqui ca'ya cua. Jesosa ca ca poqui'yo jjima cua. Jamatii ojaya enaeseja ba'yo jjima cua, oja chiiya pea'ai. Jesosa pea cuana nijje pojebe'yani poso aca cua. ⁴⁴ Majoya aje oe cahuime cuajo Jesosaja enaeseya niñeba ca'ya cua: —¿Aecue jiquio Jesosa so'o?

⁴⁵ —Chama' ca ca Jesosa. ¿Achacua shai poquinaje? —jamaya pea cuana cua.

Majoya aje huacuaya poqui o'oya cua Jenosanena huasijje Jesosa sa'ajja'yohua. ⁴⁶ Majoya pea beca peejjima cahuime epo ba ca'ya cua Jesosa Eyacuiñajji

equijo nequi. Jesosaa Eyacuiñajjija esohui huohuijji cuequi tii cuana huohui'ajja ca ania cua; Jesosa jjashajja'ajjaqui ania cua pea'ai. ⁴⁷ Ojjaña jjashahuaba neinei-quinaje Jesosaja esohuijo: —E'e de, Jesosa quea ja'a nee nee jjashahuabaquiani, de —pea cuana cua.

⁴⁸ Joseya Maniaa pea'ai Jesosa ba majje mimia ca cua jama ba'a: —¿A'a mi quioya Jesosa? ¿A'ya acuae mi po nequinaje so'o? Ecuanaajaya miya ba'yo jjima nei nei cuanaje. Jamajjeya eya mijo quea yeno nee nee cuanaje, Jesosa. Jamajjeya ecuanaya sa'ajjasa'ajja'yoquinaje.

⁴⁹ Jesosaa jama aca cua ba'a: —¿Apiojji acuae iña sa'ajja'yaña so'o? ¿A'a miquea ba jjima eya ecue Chiija equijo enequijji, Eyacuiñajjija equijo?

⁵⁰ Jose Mania pea'ai oja esohuijo jjabahuejjaqui jjima cua yajja cuani poso aca cua.

⁵¹ Majoya aje Jesosa oja chii nijje oja nae nijje Nasa-nena huasijje poqui o'oya cua, ma o ba'e yasijje. Jamatii Jesosaa shajja'ajja ca cua Jose, Mania pea'ai. Quea bihui ba'ya cua. Mania jjashahuabaquia cua Jesosaja esohuijo; pajea'yo jjima aca cua. ⁵² Jesosa tiya cua quea ca'a nee nee; quea ja'a nee nee cua. Eyacuiñajji quea bihui nee cua Jesosajo; dejja cuana quea bihui cua pea'ai.

Huaniya Eyacuiñajjija esohui huohui ca cua

(Mateo 3.1-12; Macoso 1.1-8; Huani 1.19-28)

3 Quijje nei mahuiso emeshi mese cuana cua ba'a: Shomano dejja cuanaja emeshi mese Timeneo bajjani. Quea huiso shequiajame, 15 shequiajame nequijo Jodea meshija emeshi mese Ponisio Pinato bajjani nequinaje. Janinea meshija emeshi mese Enode bajjani cua. Oja doe etii Penipe bajjani cua. Oya Itoneaja emeshi mese cua, Taconiteja emeshi mese pea'ai cua. Amininiaja emeshi mese Niania bajjani cua. ² Eyacuiñajji nijje mimiani etii Anasi bajjani cua. Pea ca Caipa bajjani cua.

Jiquio emeshi mese cuana nequijo tiya aje Huani Sacaniaja bacua eja nequia cua meshi quimajo. Onijje mimi majje Eyacuiñajjiya Huani huoojea ca cua esohui huohuijji epojji. ³ Jamajjeya Huani po'ayequeie nequia cua Eyacuiñajjija esohui huohuiya Jodana cueijje. Ohuaya pea cuana jama huohuime aca cua ba'a: —¡Jashahuabaquicue Eyacuiñajjijo; miquea mimishi pajea'yocue! ¡Miquea mimishijo quea yeno pocue! ¡A'a mimishi maja sa po'yoyji! Miya mimishi pajea'yajo, aje Eyacuiñajjiya miquea mimishi cuijea caje'yo. Eyaya miya besa meeje enajje pea cuanaja ebajji miya Eyacuiñajjija epeeji nei nei cuanajo.

⁴ Jamaya Isaiaa yahuajo nei Huanijo tehue ca cua. Isaia Eyacuiñajjija epeeji, esohui huohuijji cua. Oya etiiquiana nei nei cua. Jama tehuemeya aje yahuajo aca cua ba'a:

“Oe dejja quimajo nequi taaani jama ba'a: ¡Acua pocue! ¡Jashajja'ajjaquicue Eyacuiñajjija huoojea'yo ojjaña jaahuanajjijo!

⁵ Eyacuiñajjiya dejja quea mimishi cuana jeajea caje cuaqui yasijje jjashajja'ajjaqui ajjajojo. Ojjaña jaya Eyacuiñajjija esohui ojaya ehoojea'yo ojjaña jaahua-

najjijo shajja'ajja cani ca ca quea bame nee cuaje'yo. Joya ecua ejiojji quea bame aca yani jama jayojja dejja cuana quea bame acaje'yo. ⁶ Ojjaña meshijo nequica dejjaa shajja'ajja caje Eyacuiñajjija esohui. Joya onijje jjapeequije Eyacuiñajjiya mimishi cuijea caje'yo”. Jamaya cua Isaiaja etehue'yo Huanijo.

⁷ Majoya dejja quea huiso cueya cua Huani que mimishi pajea'yohua nisho, oja besa mee yohua nisho pea'aiya. Jamajjeya aje Huaniya jama tecueame aca cua ba'a: —Miquianaya quea tai cuani. Peyo jayojja cuani. Miquianaaya ca jja ca mimishi pajea nisho'yaña. Miquianaya jjashahuaba taiquiani jama ba'a: “Eyacuiñajjiya eya jeajea jjima acaje cuaqui yasijje Huanija enajje ebesea meejojo”. Jamatii miquianajaya ca jja ca oe mimishi pajea'yo jjima nei nei. ¡Ebionei oe shajja'ajjacue Eyacuiñajjija esohui; majoya miquianajaya mimishi pajea neinei'yocue! Majoya oe enajje eyaya besa meeje'yo Eyacuiñajjija epeeji nei epojji. ⁸ Miquianaya Eyacuiñajjija epeeji nei ba'yanijo, mimishi epo beca'yoyji pojjeama. ¡Jama jjashahuabaquimeya oe pocue enajje ebeseaqui cuahuajje! A'a mimijji jama ba'a:

“Ecuea etiiquiana Amajama cua. Oya Eyacuiñajjija epeeji nei cua, jamajjeya aje oe ecuanaya Eyacuiñajjija epeeji pea'ai cuani”. Cho, miquianaya ca ca jjapeequi jjima Eyacuiñajji nijje. Miquianaya quea mimishi, de. Eyacuiñajji ojaya epeeji quea huiso sa cuani jojemo Amajama jayojja epojji, ohuaya mei pana came. ⁹ Miquianaya joya acui jjajjama' jayojja cuani. Jiquio ecua acui jjajja'yo ajja jajajea ca'yoyji jayojja jama Eyacuiñajjiya dejja mimishi acaje'yo, jeajea caje'yo cuaqui yasijje. Jamaya aje miquianaya acaje'yo mimishi pajea'yo ajjajojo, onijje jjapeequi sa po ajjajojo. Beca cuana ca ca joya acui quea jjajja huiso jayojja cuani. Quea bame nee nee ba'yanij, Eyacuiñajji nijje jjapeequiani jjejojo. Quea bei ba'yanij pea cuana nijje, oya Eyacuiñajjiya quea jea nee nee acani jjejojo.

¹⁰ Majoya aje dejja cuana jama huohui'ajjame aca cua ba'a: —¿Yajja acuae oe po cajji so'o?

¹¹ Huani jama cua ba'a: —¡Joya miquea beca yanijo daqui quiacue daquima' cuana huasijje! ¡Miquea bobi yanijo ca bobima' cuana huasijje quiacue!

¹² Emeshi meseja bejjo chichajji cuani cuana jama huohui'ajjame aca cua ba'a: —Esohui huohuijji, ¿yajja acuae pajjaja po cajji so'o?

¹³ Huani jama cua ba'a: —¡A'a quea mimishi pojji! ¡A'a quea sose huiso ajji! ¡Joya emeshi meseja sosehui-so tiya jjeshecue! —jamaya cua Huani.

¹⁴ Majoya aje sohuinanohua jama huohui'ajjame aca cua ba'a: —¿Yajja acuae ecuanaya cuaje'yo so'o? Huani jama cua ba'a: —¡A'a miquianaaya dejja cuana iñajji bejjo esijji! ¡A'a pea cuana nijje sijje pojji bejjo esijji! ¡Miquianajaya bejjojo nei jjaja oe quea bihui pocue! —jamaya Huaniya sohuinano aca cua.

¹⁵ Dejja cuana Huani Eyacuiñajjija huoojea'yo ojjaña jaahuanajji poso aca cua oja esohui quea bame nee nee cua jojoya. ¹⁶ Huani ca ca Eyacuiñajjija huoojea'yo ojjaña jaahuanajji pojjeama cua. Oya jama cua ba'a: —Eyaya miquianaya enajje besa meeje'yo Eyacuiñajjija

epeeji jojoya. Eya ca ca Eyacuiñajjija huoojea'yo ojjaña jaahuanajji pojjeama. Oya ca ca Quito bajjani quijje pishana cueje. Ohuaya miquiana que Eyacuiñajjija Edojjoshahua Bame dobiqui mee caje'yo. Jamajjeya miya quea bame cuaje'yo. Mimishi cuana pajea sa po'yo ajjajo ca ca, jeajea caje'yo cuaqui yasijje. Jamaya Quito oe nei quea ca'a nequi. Eya ca ca iña quea ca'a pishana nequi. Jamajjeya eya ca iña onijje nequi sa po ajja miquiana ani cojja nei. Quea bicho eya, de. ¹⁷ Quito cueje ojaya epeeji nei chicha'yohua. Pea cuana ca ca cajaa ajea caje'yo. E'e, jiquio ecua seya anoso shaa jea majje equi yasijje iya'yaña jama ojaya epeeji cuana acaje'yo Quitohua. Jiquio ecua seya anoso cuiahuojo majje shaa jeajeaña jayojja jama Quitohua ojaya epeeji pojjeama cuana jeajea caje'yo cuaqui quijjo'yo ajja huasijje —jamaya Huaniya aca cua.

¹⁸ Huanija pea esohui jama cua ba'a ojjaña cuanajo: —Eyacuiñajji ojjaña nijje ijapeequi sa cuani, ijeya nei.

¹⁹ Ojaya pea esohui jama cua ba'a: —Esejaya emeshi mese, Enode bajjani quea mimishi nee nee cuanaje. Oja chahuaja, Penipeja huanase sii canaje oja huanase epo'yoyji. Ma epona Enodiasí bajjani cuanaje —jamaya cua Huani.

²⁰ Jamajjeya Enode ma esohui shajja'ajja majje quea queene nee nee cua. Iña mee ca cua Huani ejeanobia-jeajji, Enodeya quea mimishi nee neeya jjejojo.

Huaniya Jesosa enajje besa mee ca cua

(Mateo 3.13-17; Macoso 1.9-11)

²¹ Huani jeanobiajea jjimahua poquia cua dejja ojjaña cuana nijje Jodana cuei yasijje enajje besa meeya. Jesosa pea'ai poquia cua o que. Huaniya Jesosa besa mee ca'ya cua. Majoya Jesosa Eyacuiñajji nijje mimianijo, eyatahuatahua capajea ca cua. Edojjoshahua Bame huia' jama o sapa biajje cuabesa ba'ya cua. Japashineijje ba'eoquea cua. ²² Majoya esohui shajja'ajja ca cua ojjaña eyahuasijje. Eyacuiñajji Jesosa nijje jama mimime cua ba'a: —Miya ecue Bacua Ejja nei, Jesosa. Eyaya miya quea jea nee aña. Eya mijo quea bihui nee nee —jamaya cua Eyacuiñajji.

Jesosaja etiiquiana

(Mateo 1.1-17)

²³ Jesosa Jodio dejja nei cua. Jesosaa 30 shequiajame tii majje esohui huohui coo ca cua. ²⁴ Ojaya etiiquiana cuana yohua bajjani cua ba'a: Ebionei Jose nequia cua. Oya Jesosa tii meeji cua; Jesosaja chii jayojja cua. Jose ca Enija bacua ejja cua. Eni ca Mata'aja bacua ejja cua. Mata'a ca Nemija bacua ejja cua. Nemi ca Mequija bacua ejja cua. Mequi ca Janaja bacua ejja cua. Jana ca Joseja bacua ejja cua. Jose ca Matatija bacua ejja cua. ²⁵ Matati ca Amosoja bacua ejja cua. Amoso ca Nahuomaja bacua ejja cua. Nahuoma ca Esinija bacua ejja cua. Esini ca Naquiaja bacua ejja cua. ²⁶ Naquia ca Maataja bacua ejja cua. Maata ca Matatija bacua ejja cua. Matati ca Semeja bacua ejja cua. Seme ca Josequija bacua ejja cua. Josequi ca Jonaja bacua ejja cua. Jona ca Joanaja bacua ejja cua. ²⁷ Joana ca Shesaja bacua ej-

ja cua. Shesa ca Sonobabeja bacua ejja cua. Sonobabe ca Sanatija bacua ejja cua. Sanati ca Nenija bacua ejja cua. ²⁸ Neni ca Mequija bacua ejja cua. Mequi ca Adija bacua ejja cua. Adi ca Cosamaja bacua ejja cua. Cosama ca Emanamaja bacua ejja cua. Emanama ca Esheja bacua ejja cua. Eshe ca Jesosaja bacua ejja cua. ²⁹ Jesosa ca Enieseja bacua ejja cua. Eniese ca Jonimija bacua ejja cua. Jonimi ca Mata'aja bacua ejja cua. Mata'a ca Nemija bacua ejja cua. ³⁰ Nemi ca Simeonija bacua ejja cua. Simeoni ca Jodaja bacua ejja cua. Joda ca Joseja bacua ejja cua. Jose ca Jonamija bacua ejja cua. Jonami ca Eniaquimija bacua ejja cua. Eniaquimi ca Meneja bacua ejja cua. ³¹ Menea ca Menaja bacua ejja cua. Mena ca Matataja bacua ejja cua. Matata ca Nataja bacua ejja cua. Nata ca Dabija bacua ejja cua. ³² Dabi ca Isaija bacua ejja cua. Isai' ca Obedaja bacua ejja cua. Obeda ca Boosija bacua ejja cua. Boosi ca Sanaja bacua ejja cua. Sana ca Naasonija bacua ejja cua. Naasoni ca Aminidabija bacua ejja cua. ³³ Aminidabi ca Adimija bacua ejja cua. Adimi ca Ashinija bacua ejja cua. Ashini ca Eshaomija bacua ejja cua. Eshaomi ca Panesija bacua ejja cua. Panesi ca Jonaja bacua ejja cua. ³⁴ Jona ca Jacoboja bacua ejja cua. Jacobo ca Isaacaja bacua ejja cua. Isaaca ca Amajamaja bacua ejja cua. Amajama ca Taneja bacua ejja cua. Tane ca Nacionija bacua ejja cua. ³⁵ Naconi ca Senocaja bacua ejja cua. Senoca Shacaoja bacua ejja cua. Shacao ca Penecaja bacua ejja cua. Peneca ca Emeneja bacua ejja cua. Emene ca Sanaja bacua ejja cua. ³⁶ Sana ca Cainanija bacua ejja cua. Cainani ca Anajjadaja bacua ejja cua. Anajjada ca Semija bacua ejja cua. Semi ca Noeja bacua ejja cua. Noe ca Nemequeja bacua ejja cua. ³⁷ Nemeque ca Matosaneja bacua ejja cua. Matosane ca Enoqueja bacua ejja cua. Enoque ca Janedija bacua ejja cua. Janedi ca Majananeenija bacua ejja cua. Majananeeni ca Cainanija bacua ejja cua. ³⁸ Cainani ca Enosija bacua ejja cua. Enosi ca Setija bacua ejja cua. Seti ca Adanaja bacua ejja cua. Adana ca Eyacuiñajjija pana cua. Oya ebionei dejja cua.

Edosiquiana etiiya Jesosa quea mimishi po mee sa aca cua

(Mateo 4.1-11; Macoso 1.12-13)

4 Jesosa cueyanaje Jodana cuei yasijje Huanija besa meeya. Jomajo Edojjoshahua Bameya Jesosa dojo canaje quima huasijje. Majoya Edosiquiana etii Jesosa nijje miminaje oja emeshi mese nei epo'yoyji nisho.

² Jomajo nequia cua quea hiso nee cahuime, 40 cahuime ijija'ijija jjima cua. Majoya quea shoe nee nee jjabaquia cua. ³ Edosiquiana etiiya Jesosa jama huohuime aca cua ba'a: —Miya Eyacuiñajjija Bacua jjabaqui majje ca oe ijiquio mei pahui pojji acue! ¡Pahui pojji amajje ijjiacue!

⁴ Jesosa jama cua ba'a: —Chojja de, eya miquea esohui shajja'ajja sa po ajja. Bacue, Eyacuiñajjija etehue'yo jama cuani ba'a: “Dejja cuana bobijo ca'a po majje pojjeama ba'e tiitiije'yo. Ojjaña Eyacuiñajjija esohui jayojja jama añajo ca se ca oe quea bame nee ba'e tiitiije'yo” —jamaya Jesosa cua.

⁵ Majoya aje Edosiquiana ettiya Jesosa dojo ca cua eyiyo ao'ao huasijje. Majoya aje ba mee ca cua ojjaña meshi cuana; Jesosa cahuijo jayojja ba mee ca cua.

⁶ Edosiquiaa huohui ca o'oya cua jama ba'a: —Eyaya miya quiaje jiquio meshi cuana, miya emeshi mese po meeje'yo. Eyaya ojjaña aquiiana quiaje'yo. Ojjaña meshi cuana ecuea, jamajjeya eyaya quia sa cuanijo eyaya aje miquea yajji quiaje'yo. ⁷ ¡Miyaya eya bihuicue, shajja'ajjacue ecuea esohui! Majoya miya emeshi mese po meeje'yo eyaya —jama siajje ameya aca cua Edosiquiaa Jesosa.

⁸ Jesosa cua ba'a: —Chojja, ipoquicue quea huesha, Edosiquiana! Eyacuiñajjija etehue'yo jama cuani ba'a:

“¡Eyacuiñajji oe nei bihuicue; oya oe nei ojjaña EMeshi Mese nei nequi! ¡Ojaya ehuohui'yo jama oe acue!” —Jesosaa aca cua.

⁹ Majoya aje Edosiquiaa Jesosa dojo ca cua Jenosana huasijje. Nequia cañaquia cua Eyacuiñajjija equi biajje. Majoya Edosiquiaa Jesosa jama aca cua ba'a: —Miya Eyacuiñajjija Bacua Eja nei jjabacui majje iji- quiojo nequi tohuua'ajja'yo socue meshi yasijje! ¹⁰ Eyacuiñajjija etehue'yo jama cuani ba'a:

“Eyacuiñajjija huoojea caje esohuidojojji cuana mi jaahuanaa. ¹¹ Oquequajajo ohuaya emeya miya iñajjequi caje'yo. Jamajjeya miya ejjajojji quecuasajaquijji pojjeama meijo”.

Jamaya cuani, de —Edosiquiana cuanaje.

¹² Jesosaa jama aca cua ba'a: —Chojja, miya jjas- hahuaba taiquiani, de. Eyacuiñajjija pea etehue'yo jama cuani ba'a:

“A'a jamaya mimijji ba'a: ¿A'a Eyacuiñajjija oja esohui e'e jojo nei acaje'yo? ¿A'a eya jaahuana nei caje'yo? Ca- ba'ajjasahua. ¡A'a pojji!”

Jamaya yahuajo nei Moisesiya tehue ca cua —jamaya Jesosa cua.

¹³ Edosiquiana jjashahuabaqui jjima cua; pea esohui chama' cua Jesosa quea mimishi po meeji nisho. Jamajjeya Edosiquiana poquia cua. Majoya aje quijje cue o'oya cua o quea mimishi po mee'yohua nisho.

Jesosaa huohui coo ca cua Janinea meshi yasijje

(Mateo 4.12-17; Macoso 1.14-15)

¹⁴ Majoya Jesosa posohuaqui o'oya cua oja meshi yasijje, Janinea meshi yasijje. Edojjoshahua Bameya Jesosa quea ca'a po mee ca cua. Jomajo dejja cuana mimia cua Jesosajo, ojjaña meshi yasijje mimia cua. ¹⁵ Jamatii Jesosa po'ayequie nequia cua pea cuiñajji cuana huasijje Eyacuiñajjija esohui huohuiya Jodioja equi ejjachichaquijji cuana huasijje. Ojjaña dejja quea bihui cua onijje. Jama cuana cua ba'a: —E'e, ojaya esohui quea ja'a nee, quea bame nee nee.

Jesosa poquia cua Nasanena huasijje

(Mateo 13.53-58; Macoso 6.1-6)

¹⁶ Jesosa poquia cua Nasanena huasijje, oya tii'ya cua jomajo tii. Ojjaña epojja ejomishocajjijo Jesosa dobiqui majamajanaje Jodioja equi ejjachichaquijji yasijje

esohui huohuiya. Jamajjeya dobiqui majje oya nequi- sohua cua Eyacuiñajjija etehue'yo ajji. ¹⁷ Oe dejjaa, etehue'yo jaahuanaajjija Jesosa quia ca cua etehue'yo. Yahuajo Isaija etehue'yo cua. Isaija Eyacuiñajjija epeeji nei, etiquiana cua; Eyacuiñajjija esohui huohuijji cua. Jamajjeya ojaya etehue'yo e'e jojo nei cua. E'e de, Jesosaa she'a ca cua ma etehue'yo, jama ame aca cua jiquio esohui ba'a:

¹⁸ “Edojjoshahua Bameya eya jjashahuabaqui mee cani. Ohuaya eya huoojea canaje jama ba'a: —¡Huohuicue ecuea esohui bame dejja aema' cuana huasijje! ¡Huohuicue dejja ejeanobiajaa cuana huasijje ecuayaqui mee'yojji! ¡Huohuicue cojjama' cuana huasijje ejja- cojja ja'a meequi'yojji! ¡Huohuicue pea dejja quea yeno ba'e yasijje quea bihui eba'e meeji!”

¹⁹ Huohuicue jiquio esohui: EMeshi Mese neiya ojjaña cuana quea bihui ba'e mee sa acani”.

Jamaya Isaija tehue ca cua yahuajo nei.

²⁰ Majoya Jesosaa etehue'yo cami ca'yonaje; quia ca o'oya cua ma dejja huasijje. Jesosa anioquea cua huohui epojji. Ojjaña oya ba ca'ya cua; ishoa'ajja ca cua ojaya esohui ehuohuijji. ²¹ Ohuaya esohui huohui ca cua jama ba'a: —E'e, ma etehue'yo huohui cani ejo. Eya cue'yonaje ma dejja cuana huasijje esohui huohuiya. Eyaya miquianaya huohui'ajjaña jama ba'a: Eyacuiñajjija quea bihui ba'e mee caje'yo miquianaya —Jesosaa aca cua.

²² Ojjaña Jesosajo quea bame mimia cua. Jjashahuabaqui cua ojjaña ojaya esohuijo. Pea cuana ca ca Jesosajo jama cua ba'a: —Jesosaja esohui quea ja'a de, oya ca ca Joseja bacua nei, Eyacuiñajjija Bacua pojjeama —jamaya pea cuana cua Jesosa Eyacuiñajjija Bacua pojjeamajo poso.

²³ Jesosaa oya cuana tecuea ca cua jama ba'a: —Miquianaya jamaya cuaje miquianajaya ejjashahuabaquijji ba'a: “Ejjashicuiquijji, ¿yajjaje acuae jja miyaya mi jjashicui'ajjaquiani so'o?” ¿A'a nequiana jamaya pea'ai jjashahuabaquiani? Jama cuani ba'a: “Ecuanaaya miya shajja'ajjanaje, Jesosa. Miyaya jjaajaqui mee'- yonaje Capenaomajo ba'e cuana. ¿Yajjajo acuaeya oe miquea meshijo ba'e cuana jjaajaqui mee'yo jjima aña so'o?” ¿A'a nequiana jamaya jjashahuabaquime cuani? —Jesosa cua—. ²⁴ E'e jojo nei ecuea esohui, jamatii miquianaya Eyacuiñajjija esohui huohuijji mimianijo oja meshijo ojaya huapa pojjeama cuana ca ca jjashajja'ajjaqui sa po ajja.

²⁵ —Miquianajaya eba ma etiquiana Enia bajjani. Yahuajo nei ohuaya huohui ca cua Eyacuiñajjija esohui. Beshahua nei pea beca peejjima shequiajame ena po'yo jjima cua. Bobi tii jjima cua ena chamajojo. Ojjaña quea shoe nee nee cua. ²⁶ Yahuajo quea huiso Jodio e'ahuemano ania cua. Jamatii oya cuana ca ca jjashajja'ajjaqui sa po ajja Eniaja esohuijo, Eyacuiñajjija ehuohui'yojo. Jamajjeya Eyacuiñajjija Enia huoojea ca cua pea meshi yasijje Sinono meshi yasijje, Saneta cuiñajji yasijje, Sinono e'ahuemano que. Jomajo e'ahuemanohua shajja'ajja ca cua Eyacuiñajjija esohui. Jamajjeya Enia bobia ca cua.

²⁷ —Miquianajaya eba pea etiiquiana Eyacuiñajjija esohui huohuijji Eniseo bajjani ba'ya cua Enia nijje. Quea huiso Jodio dejja batata epo'yo jomajo ba'ya cua. Jamatii Eniseoja esohui shajja'ajja sa po ajja. Jamajjeya jjaajaqui mee'yo jjima aca cua Eyacuiñajjija. Pea meshijo ba'e Sinia meshijo oe dejja Naamani bajjani batata epo'yo nequia cua; oya shajja'ajja sa cua Eyacuiñajjija esohui. Jamajjeya oya poquia cua Eniseo que, Eniseoja jjaajaqui mee'yohua. Ohuaya shajja'ajja ca cua ojaya esohui. Jamajjeya jjaajaqui mee ca'ya cua Eyacuiñajjija. Jamaya miquianaya shajjama' cuani miquianajaya etiiquiana jayojja. Jjeya nei shajja'ajja sa po ajja Eyacuiñajjija esohui, jamajjeya jjaajaqui mee'yo jjima acaje Eyacuiñajjija —Jesosa cuanaje.

²⁸ Ojjaña cuana Jodioja equi ejjachichaquijjijo anica Jesosaja esohui shajja'ajja majje quenequene neinei'ya cua Jesosa nijje. ²⁹ Jesosa iña majje jeacuayajea ca cua esecue yasijje. Majoya poqui mee ca'ya cua eyiyo hui yasijje e'iñajeatohuaajea'yojji nisho. ³⁰ Jamatii Jesosa poquia cua, jJayejjequinana cua ona nequi yiyesamajjeya.

Oe dejjaja eshahua nequia cua

(Macoso 1.21-28)

³¹ Pea pojajajo Jesosa poquia cua Capenaoma huasijje, Janinea meshi yasijje. Ejomishocajji pojajajo oya dobiquia cua Jodioja equi ejjachichaquijji yasijje esohui huohuiya. ³² Ojjaña cuana jama aca cua ba'a: —De, Jesosaja esohui quea ja'a nee. E'e jojo nei pojja'a Eyacuiñajjija oya huoojja canaje, de.

Jamajjeya ojaya esohui shajja'ajja sa aca cua. ³³ Oe dejja eshahua nijje tii ania cua Eyacuiñajjija equijo. Eshahuaa oya taaa sajasaja mee ca cua Jesosa que jama ba'a: ³⁴ —E'e de, ¿apiojji shai miya ecuana que cueyanaje, Jesosa? Miya cueyanaje pojja'a ecuana cuayaqui mee'yohua. Ecuanaajaya miya eba, Jesosa. Miya Nasanenajo ba'e, miya Eyacuiñajjija Bacua, miya mimishi'ama, de —jamaya eshahua cua.

³⁵ Jesosaa eshahua tecueajea ca cua jama ba'a: —¡A'a mimijji; cuayaqui'yocue jiquio dejjajo nequi! —Jesosa cua.

Majoya eshahuaa ma dejja jeabichajea mee ca cua pea cuana pejjejo. Eshahua nee'ama nei nei cuayaqui'yome cua ma dejjaja eyamijo nequi. ³⁶ Ojjaña jjaajja-sohuaquia cua; mimia cua pea cuana nijje jama ba'a: —E'e de, Jesosa quea sohui poja nee nee; ojaya esohuijo eshahua cuayaqui'yonaje, de. ¿Yajjajje shai quea sohui poja nee nee? —jamaya cua ojjaña Jesosajo. ³⁷ Jamaya pea cuana huohui ca cua ojjaña cuiñajjijo ba'e yasijje.

Jesosaa boeca mee ca'ya cua Simohuija ano

(Mateo 8.14-15; Macoso 1.29-31)

³⁸ Majoya Jesosa cuayaquia cua Jodioja equi ejjachichaquijjijo ani. Cuayaqui majje poquia cua Simohuija equi yasijje. Dobiqiu majje ba ca cua Simohuija ano. Simohuija ano quea mano jaa, quea quiyo nee nee jaa ba ca cua. Simohuija Jesosa jama huohui'ajjame aca

cua ba'a: —Jesosa, ¿a'a miyaya boeca meeje'yo ecue ano, ecue huanaseja enaese?

³⁹ Jesosaa Simohuija ano jama aca cua ba'a: —E'e, jje-yahua nei mi quiyoquiyo pajejaje'yo —Jesosaa aca cua.

Majoya aje epona tii quiyoquiyo pajaja'ya cua. Boecanana'ya cua. Majoya boeca'yo majje anisohua'ya cua. Anisohua'yo majje bobi cuacua meesahua ca cua epona tiiya.

Jesosaa quea huiso emanojaa cuana jjaajaqui mee ca'ya cua

(Mateo 8.16-17; Macoso 1.32-34)

⁴⁰ Quijje pishana eshequi oquequijajo ojjaña emanojaa dojo ca cua Jesosa que jjaajaqui mee'yohua. Jesosaa emanojaa cuana emeya napa cajje jjaajaqui'ya cua. ⁴¹ Eshahua cuana pea'ai cuayaqui mee ca'ya cua. Cuayaqui'yo majje eshahua cuana taaa cua jama ba'a: —Jesosa, miya e'e jojo nei Eyacuiñajjija Bacua Ejja.

Jesosa jama cua ba'a: —¡A'a enijje jama mimijji! Mi-quea eba eya, Eyacuiñajjija huoojja'yo ojjaña jaahuanajji. Pea cuanaja eya ba jjima, de —jamaya Jesosa cua.

Jesosa po'ayeque nequia cua Eyacuiñajjija esohui huohuiya

(Macoso 1.35-39)

⁴² Jjapoajjaqui jeahuajo Jesosa oe nei poquia cua dejjama huasijje. Pea cuanaa sa'ajja ca nequia cua: —¿Aecue Jesosa?

Quijje pishana ca ca ba ca'ya cuana cua Jesosa. Mimia cua onijje jama ba'a: —Jesosa, ¡nequicue ecuanaja cuiñajjijo! ¡A'a poquijji pea cuiñajji yasijje!

⁴³ Jesosaa jama huohuime aca cua ba'a: —Chojja, jiquio cuiñajjijo eya nequi ajja. Eyaya Eyacuiñajjija esohui cahuohuiquiahua pea cuiñajjijo ba'e cuana huasijje. Jamajjeya aje oe eya ecue Chiiya huoojja canaje ojaya esohui bame bame huohuijji pea cuana huasijje. Eyaya iyaaje dejja cuana jama ba'a: “¡Jjashajja'ajja quicue oe! Eyacuiñajjija miya quea jea nee nee acani, oya miquea Emeshi Mese nei po sa cuani; mi jaahuanajji nei nei po sa cuani. Ohuaya miya ba'e bame mee sa acani. ¡Jamajjeya onijje jjapeequicue!” —jamaya Jesosa cua. ⁴⁴ Jamaya ohuaya esohui huohui ca ayequi nequia cua Jodioja equi ejjachichaquijji cuana huasijje, ojjaña meshi cuana huasijje.

Jesosaja epeejiya nahuoo cuiashaja ca cua quea huiso nee nee

(Mateo 4.18-22; Macoso 1.16-20)

5 Oe pojajajo Jesosa Jenesane bae sahua meshijajjijo ania cua. Pea cuana huasijje Eyacuiñajjija esohui huohui po ania cua. Quea huiso dejjaa ojaya esohui shajja'ajja sa aca cua. ² Quea dejja huisojojo shajja'ajja jjima aca cua pea dejja cuana. Jamajjeya Jesosaa pea e'anijji sa'ajja ca cua ojjañaja eshajja'ajjajji. Majoya becanejjijji bishe ai ba ca cua bae sahuajo ba'e. Ma bishe mese cuana nahuoo cuiashajajji shacua'yo po nequia cua. ³ Oe bishe mese Simohui bajjani cua. Jesosa ne-

quisohuaquia cua oja bishe yasijje. Jesosaa Simohui huohui'ajja ca cua jama ba'a: —¡Quecuayijeacue ena bae pishana huasijje ojjañaja ecuea esohui eshajja'aj-jajji!

—E'e —Simohui cua.

Majoya bishe quecuayijejea majje Jesosaa bishejo e'anioque aniya tii esohui huohui ca aña cua. ⁴Jesosaa esohui huohuijejo majje Simohui jama aca cua ba'a: —Simohui, ¡bishe yocue ena bae yiyesama huasijje! ¡Majoya jeacue nahuoo cuiashajaji!

⁵ Simohuiya jama aca cua ba'a: —Esohui huohuiji, ecuana mecalle poquinaje nahuoo cuiashajaa nisho. Chama' de, chama' nahuoo cuanaje. Eyaya ca ca shajja'ajja sa aña miquea esohui, jamajjeja eyaya jeaje ena huasijje nahuoo cuiashajaji —jamaya Simohui cua.

⁶ Majoya yo ca cua ena bae yiyesama huasijje nahuoo cuiashajaji. Jea ca cua nahuoo cuiashajaji; quea huiso nee nee nahuoo dobiquia cua. Quecuaisajja'ajja ca cua. ⁷ Majoya Simohuiya ojaya epeeji cuana iyaa ca cua: —¡De, yacua oe yecue bishe pea, che nahuoo jjequijeasohuahucue!

Majoya pea bishe ye ca cua; cuio ca cua beca bishe nahuoo. Beshahua nei bishe jaadobiquia cua. ⁸ Ma ba majjeja aje Simohui ecui'oshajjajo nequia cua Jেসসা পেজে; jama cua ba'a: —De, ecuea Emeshi Mese, e'e jojo nei miquea esohui, eya miquea esohuijo jashahuaba taiquinaje, de. ¡Quea huesha nequicue Jেসসা, eya quea mimishi cuanaje! —jamaya Simohui cuanaje.

⁹ Simohuiya epeeji cuana jjasasohuaquia cua nahuoo quea huiso ohua cuiashaja cajo. O jayojja jjasasoquime pea'aiya cua, de. ¹⁰ Semeneoja bacua cuana Satiaco, Huani, Simohuiya echacosahuajji cuani pea'aiya jjasasohuaquia cua.

Majoya Jেসসা Simohui jama aca cua ba'a: —¡A'a jjasasoquiji! Miquianaaya banaje ecuea esohui e'e jojo nei nahuoo cuiashajaji. Jjeyahua nei miquianaaya dejja quea huiso jjequije ecuea esohuijo ejjashajja'ajjaquiji, ecuea epeeji epoji —jamaya Jেসসা cua.

¹¹ Majoya cuaa bishe yo ca'ya cua etaja huasijje. Aquiana cuana jeana'yo majje poquia cua Jেসসা nijje.

Jেসসা দেজা জাজে মেকেই কা'য়া চা বাতাতা এপো'য়ো মা দেজা শিকুই জিমা আনি
(Mateo 8.1-4; Macoso 1.40-45)

¹² Oe pojajajo Jেসসা ania cua pea cuiñajji. Cue'ya cua oe dejja batata epo'yo. Ojjañaja oya boti'ama cua, o jayojja epo cuani jjejojo. Oya Jেসসা ba majje ecui'oshajjajo nequia cua o bihuijji. Jama huohui'ajjame aca cua ba'a: —Emeshi Mese nei, miya sa cuanijo, ¿a'a mo che miyaya jjaejaqui mee'yome so'o? —aca cua ohuaya.

¹³ Majoya Jেসসা napa'ajja ca cua emeya, quea jeajojo huohui ca cua: —E'e, eyaya miya jjaejaqui meeje'yo batata epo'yo. Quea boejea po meeje'yo.

Jjaejaqui mee'yo majje chama'yo cua ojaya batata epo'yo. Quea boejea ojaya ejee po'yonaje.

¹⁴ Majoya Jেসসা jama huohuime aca cua ba'a: —¡A'a oe pea cuana huohuiji! ¡Eyacuiñajji equi yasijje oe poquicue! ¡Jomajo huohuicue Eyacuiñajji esohui huohuiji: “Jjaejaqui'yonaje mo” acue! ¡Moisesija etehue'yo jama oe acue! ¡Quiaquicue beca huia', beca ijiacajji pea'ai, equiajji Eyacuiñajji bihuijji, miya ojaya ejjaejaqui mee'yohua jjejojo! Majoya esohui huohuiji cuana jjabahuejjaquije miquea batata epo'yo chama'yo cuanajejo. Majoya ojjaña jjabahuejjaquije miya quea bojea po'yonajejo —Jেসসা aca cua.

¹⁵ Jamatii quea huiso dejjaa shajja'ajja ca cua Jেসসা jjaejaqui mee ca'yanis batata epo'yo. Ohuaya jjaajaqui mee ca'yanis emanojaa cuana. Jamajjeja quea dejja huiso nee cueyanaje shajja'ajjaa, jjaajaqui'yohua pea'ai. ¹⁶ Jamatii Jেসসা poqui nequia cua dejjama huasijje Eyacuiñajji nijje mimiya.

Jেসসা জাজাচুই মেকেই কা'য়নে এ দেজা জে'অজাজা
(Mateo 9.1-8; Macoso 2.1-12)

¹⁷ Oe pojajajo Jেসসা poquinaje onaja equi yasijje esohui huohuiya. Paniseo dejja cuana, Moisesija etehue'yo huohuiji cuana pea'ai cueyanaje Eyacuiñajji esohui shajja'ajjaa. Quea dejja huiso pea meshijo ba'e cuana cueyanaje, Janinea meshijo ba'e cuana. Jodea meshijo ba'e cuana, Jenosanenajo ba'e cuana pea'ai cueyanaje. Jেসসা Eyacuiñajji nijjeja quea huiso emanojaa jjaajaqui mee ca'yonaje. ¹⁸ Jamajjeja pea dejjaa oe dejja jeo'ajjaa ye ca cua equi yasijje. Dojodobiaqui sa aca cua Jেসসা que. ¹⁹ Dobiqumi meeme ajja cuana cua quea dejja huisojojo. Jamajjeja aje dojosoehua ca'ya cua equi jamacoo huasijje. Huejja ca cua eyiyesama neiije. Jেসসা nequi cojja nei jea'oquea ca cua. ²⁰ Jেসসা ba ca cua dejja jeo'ajjaa ojaya epeeji pea'ai. Jjashahuabaquia cua jama ba'a: —E'e de, jiquio dejja cuanaja eba eyaya jjaajaqui meeje'yo emanojaa cuana.

Jamajjeja jeo'ajjaa huohui canaje jama ba'a: —E'e ecuea epeeji, jjeja miquea mimishi eyaya cuijeaje'yo.

²¹ Majoya Paniseo cuana, Moisesija etehue'yo huohuiji cuana pea'ai jashahuaba taiquia cua; Jেসসা Eyacuiñajji Bacua pojjeama poso aca cua. Jama cua ba'a: —Jেসসা quea tai cuani, de. Oya Eyacuiñajji jama cuani. Oe nei Eyacuiñajjiya mimishi cuijea caje'yo. Jেসসা ca ecuijea'yojji pojjeama —poso aca cua.

²² Jেসসাজা eba ojaya jashahuabaquiji cuana. Jamajjeja huohui ca cua jama ba'a: —Miquianaya jashahuaba taiquiani, de. ²³ ¿Ache esohui camaja'ama so'o? Jiquio pojja'a ba'a: “¡Eyaya miquea mimishi cuijeaje'yo!” Pea esohui pojja'a: “¡Nequisohucue, poqui'ajja so-cue!” ²⁴ E'e de, eyaya huohuije jiquio dejja jeo'ajjaa huasijje jama ba'a: “¡Nequisohucue; miquea equipajaajji bebo majje poqui'yocue miquea equi yasijje!”

Pea cuana huasijje Jেসসা jama cua ba'a: —¡Pea cuana shajja'ajjacue, ejjabahuejjaquiji! Eyaya ojjañaja Emeshi Mese nei cuani. Eyaya miquianajaya mimishi cuijea mee yaña ojjaña meshijo ba'eja —jamaya Jেসসা cua.

²⁵ Majoya aje dejja ejjachichaqui nequijo jeo'ajjajaa nequisohua'ya cua, poqui'ya cua oja equi yasijje. Oya quea bihui cua Eyacuiñajji nijje, Jesosa nijje pea'ai.

²⁶ Pea cuaa Eyacuiñajji bihuia ca cua jama ba'a: —E'e, eseyaya banaje jiquio dejja jeo'ajjajaa jjeja jeojeo'yo-qui, mimishi cuijea ca'yonaje pea'ai, de.

Ojjaña cuana Jesosa nijje quea bihui nee nee cuanaje jeo'ajjajaa jjaajaqui mee ca'yajo.

Jesosaa Nemi iyaa ca cua ojaya epeeji epojji

(Mateo 9.9-13; Macoso 2.13-17)

²⁷ Majoya Jesosa equijo ani cuayaquia cua. Poquijeya ohuaya ba canaje Nemi ona emeshi meseja esohuijo sosejjesheji cuani eba'eji sosejje. Oya equi sisi e'iyajo ani ejiojji cojja sahuajo. Oya siipojji, de, jamajjeya oya ojjañaja boti'ama. Jesosaa oya ba majje jama aca cua ba'a: —Nemi, ¡cue'ajja; ecuea epeeji po'yocue!

²⁸ Jamajjeya Nemi nequisohua cua; ojaya aquiana jeajeana majje poquia cua Jesosa nijje. ²⁹ Quijje pishana Nemiya iyaa ca cua ojaya epeeji cuana e'ijjia'ijjajji Jesosa nijje. Iyaa ca cua ona sosejjesheji cuana, pea dejja cuana pea'ai. ³⁰ Paniseo dejja cuana Moisesija etehue'yo huohuijji cuana pea'aija boti'ama cua ona sosejjesheji cuana. Jjashahuaba taiquia cua jama ba'a: —Quea mimishi Jesosa, o shajja'ajjajji cuana pea'ai. ¿Yajjajje acuae dejja mimishi cuana nijje ijjia'ijjiani? Quea mimishi epojji pojja'a.

³¹ Jesosaja eba ojaya ejjashahuabaquijji. Jamajjeya huohui ca cua jama ba'a: —¿A'a miqianajaya shajja'ajja jjiima jiquio esohui pojja'a? Jama ba'a: “Dejja quea aja eshicuijji bajji yasijje poqui sa po ajja. Emanojaa ca eshicuijji bajji yasijje poquiani”. Jamaya miqianaya joya mimishi'ama poso jjabaquiani. Jamajjeya miqianaya shajja'ajja sa po ajja ecuea esohui. Pea cuana ca quea mimishi nee neeya shajja'ajja cana ecuea esohui. Jamajjeya eya ijjia'ijjiani mimishi cuana nijje.

³² Eya cue'yonaje dejja mimishi iyaaa. Dejja mimishi'ama cuani poso iyaa sa po ajja iña. Dejja joya quea mimishi nee nee iyaaejje mimishi pajea mee'yojji.

Bobi ijjia jjiima yajjijo huohui'ajja canaje cuaa

(Mateo 9.14-17; Macoso 2.18-22)

³³ Paniseo cuaa Moisesija etehue'yo huohuijji cuaa Jesosa huohui'ajja ca cua jama ba'a: —Esejaya etiiquiana jamaya huohui cana ba'a: “¡A'a ijjia'ijjajji jiquio pojajajo! ¡A'a jjashahuabaquijji bobijo; jjashahuabaquicue Eyacuiñajji nei! ¡Mimicue onijje, quea yeno pocue!” jamaya esejaya etiiquiaa huohui cana. Huani shajja'ajjajji cuaa jamaya acani pea'ai. Jesosa, mi shajja'ajjajji cuana ca ca ijjia'ijjiani tii. ¿Yajjajje shai? Quea mimishi cuani pojja'a.

³⁴ Jesosaa jama aca cua ba'a: —E shajja'ajjajji cuana enijje ijjia'ijjiani. Ecuea eba nei nei Eyacuiñajji esohui e'e jojo nei. Ma esohui huohuijji cuanaja esohui ecuanajaya jjeyahua e'ajji pojjeama. Ejjahuanaquijji pojajajo ojjaña quea bihui cuani, ijjia'ijjiani, quea yeno pojjeama cuani. ³⁵ O huanajji epo mano'yajo ojjaña quea yeno cuaje. Ma pojajajo ijjia'ijjia sa po ajja cuaje. Jjas-

hahuabaquije'yo emano'yojo. Eya jiquio ecua yahue mano'yanu jayojja cuaje. Jjeja ecuanaya quea bihui cuani ijjia'ijjiani. Eya quijje pishana manoje'yo. Majoya ecuea epeeji cuana quea yeno cuaje; ma pojajajoya bobi ijjia jjiima acaje —jamaya Jesosa cua.

³⁶ Majoya ohuaya ojaya esohui huohui ca cua ejjashahuabaquijji jama ba'a: —Daqui eyacua isajea ca ajja daqui chii jaca'yojji. Chojja. Miquea daqui eyacua isajea'yo majje daqui chii jaca'yojji'yajo, daqui eyacua ehusho'yojji pojjeama. Daqui chii ejaca'yojji poqui ajja cuiñajji yasijje daqui chiiijji jjejojo.

³⁷ —Ecuea pea esohui jama cuani: Ijjiacajji jee eyacua monsa pojji acajji ena sese nequijaji. Ma ena seseya ejee eyacua shejee mee cana. Majoya oe huana cana cuaa pea ena sese ejee chiijo cuiapojjea caje'yo shejee majje. ³⁸ Jamajjeya huana cana cuaa ena sese monsa eyacuajo cuiapojjea jjiima yajji.

³⁹ —Jamaya ecue sohui eyacua cuani. ¡Miqianaya ecuea epeeji nei po sa cuanajo shajja'ajjacue ojjaña ecue sohui! Beca cuana shajja'ajja sa po ajja ecue sohui eyacuajojo. Jjashahuaba taiquiani, de. Etiiquiana esohui ejee echii jayojja. ¡Jamajjeya ecue sohui oe shajja'ajjacue! —jamaya Jesosa cua.

Jesosaa shajja'ajjajji cuaa anoso sejja ca cua ejomishocajji pojajajo

(Mateo 12.1-8; Macoso 2.23-28)

6 Oe ejomishocajji pojajajo Jesosa o shajja'ajjajji cuana nijje poquia cua anoso ai nequi yiyesamajje. O shajja'ajjajji cuaa emeya sejja ca cua anoso eshe tii e'ijjajji quea shoeya jjejojo. ² Majoya Paniseo cuaa Jesosa o shajja'ajjajji cuana ba ca cua. Jesosa nijje mimijajinaje jama ba'a: —¿Yajjajo acuaeya epojja ejomishocajji anoso sejja mee yaña so'o? Moisesija etehue'yo jamaya cuani ba'a: “¡A'a chacojji ejomishocajji pojajajo!”

³ Jesosaa jama aca cua ba'a: —Miya quea sohui tai cuanaje; Eyacuiñajji esohui nei pojjeama aña miqianaya. Miqianaya jjashahuaba taiquiani, de. ¿A'a miquea ba jjiima pojja'a ma etiiquiana, emeshi mese Dabi bajjani? Jama etehue'yo yani Dabijo ba'a: Oya Eyacuiñajji epeeji nei. Oe pojajajo oya oja epeeji cuana nijje poquije, ⁴ dobiquinana cua Eyacuiñajji equi yasijje bobi sa'ajjaa quea shoe nee neejojo. Ma equijo ani pahui ijjia ca'yonaje; quia ca'yonaje ojaya epeeji cuana huasijje pea'ai. Eyacuiñajji etehue'yo jama cuani ba'a: “¡Jiquio pahui Eyacuiñajji nijje mimianija e'ijjajji-me”. Jamatii Dabi ca mimishi'ama cuanaje. Oya poquianinaje Eyacuiñajji chacochocho neineiya. Jamaya aca cua Dabiya. ⁵ Ecuana Dabi jayojja cuani. Eya Eyacuiñajji chacochocho neineiiani. Jamajjeya ecuaaya jiquio anoso ai sejjaña ejomishocajji pojajajo —Jesosa cua.

Oe dejja meshahuama'yo epo Jesosaa jmeshahuanequi mee ca'ya cua

(Mateo 12.9-14; Macoso 3.1-6)

⁶ Pea ejomishocajji pojajajo Jesosa poquia cua Jodioja equi ejjachichaquijji yasijje esohui huohuiya. Oe dejja

meshahuama'yo epo ania cua jomajo. ⁷ Paniseo dejja cuana, Moisesija etehue'yo huohuijji cuana jjashahuaba taiquia cua Jesusajo jama ba'a: —Jesusa shajjama' jayojja ecuanaja esohuijo cuani. Ohuaya chaco caje ejomishicajji pojajajo pojja'a; jjameshahuanequi mee caje'yo dejja meshahuama'yo epo. Jesusa jamaya shajjama' cuajo ecuaaya oya iñaje'yo edojojji ejeadobia-jeajji.

⁸ Jesusaja onajaya ejjashahuaba taiquijji eba cua. Jamajjeya ohuaya ma dejja meshahuama'yo epo ani huohui ca cua jama ba'a: —Meshahuama'yo epo, ¡nequisohuacue ojjañaja ebajji! —Jesusaa aca cua.

Jamajjeya oya nequisohua cua. ⁹ Jesusaa huohui ca cua pea cuana jama ba'a: —Eyaya miquianaya huohui'ajjaje: ¿Ache quea bame epojji ejomishocajji pojajajo? Quea bame mi ba'e mee cajji chi. Quea tai mi ba'e mee cajji chi. Ba'e mee cajji mi chi. Quecua ca'yoyji mi chi.

¹⁰ Jamajjeya ohuaya pea cuana huasijje ba majje ma dejja huohui ca cua jama ba'a: —¡Eme jeapisa'ajja'yo-socue!

Majoya eme jeapisa ca'ya cua. ¹¹ Beca cuana quea quene nee nee cua. Jama mimimimia cua ba'a: —Jesusa shajjama' nei nei cuani ecue esohuijo. Ohuaya jja-meshahuanequi mee ca'yonaje ejomishocajji pojajajo. ¿Yajja acuae seya Jesusa aje jjeyahua nei e'iñajji? —jamaya cua Jodio dejja cuana Jesusa iñajji nisho.

Jesusaa chicha ca cua o shajja'ajjajji cuana 12 huisome
(Mateo 10.1-4; Macoso 3.13-19)

¹² Oe pojajajo Jesusa poquia cua eyiyo quibo huasijje mimiya Eyacuiñajji nijje. Ojjaña mecajje mimia cua onijje. ¹³ Eshequi jaasohuanijjo, jjachichaquia cua o shajja'ajjajji cuana nijje. ¹⁴ Oya cuana yohua bajjani cua ba'a: Simohui, quijje Jesusaa oya pea bajjani Peno aca'ya cua; Simohuija chahua yohua bajjani ba'a: Anesi; pea o shajja'ajjajji ca yohua bajjani cua ba'a: Jacobo, Huani, Penipe, Manotonome, ¹⁵ Mateo, Tomasi, Apeoja bacua bajjani Satiaco; Simoni, ojaya meshi quea boti nee nee cua, ¹⁶ Jacoboja bacua Jode bajjani. Pea dejja yohua bajjani cua ba'a: Jodasa Isicaniote, oya Jesusaja epeeji nisho cua. Mahuiso o shajja'ajjajji cuana e'e jo-jo nei cua.

Jesusaa quea dejja huiso huasijje Eyacuiñajjija esohui huohui ca cua
(Mateo 4.23-25)

¹⁷ Majoya Jesusa o shajja'ajjajji cuana nijje eyiyojo ani jaoque o'oya cua. Jaoque majje nequi'ya cua meshi bame bamejo esohui huohuiya. Quea huiso Jesusaja pea e shajja'ajjajji cuana jomajo ania cua. Quea dejja huiso cueya cua, Jodea meshijo ba'e cuana, Jenosane-najo ba'e cuana, Tinojo ba'e cuana, Sinonojo ba'e cuana pea'ai. Quea huesha ba'e cuana cueya cua Jesusa shajja'ajjaa. ¹⁸ Ojjaña shajja'ajja'yo sa aca cua, jjaajja-qui'yo sa cua pea'ai. Pea cuanajo nequi eshahua cua-yajji mee ca'ya cua Jesusaa. ¹⁹ Ojjaña Jesusa napa sa

aca cua pea jjaajjaqui mee'yoyjijojjo. Jesusaa emeya napa cajje jjaajjaqui ca'yonaje cuana.

Jesusaja esohuiya dejja cuana quea bihui po mee caje beca cuana ca quea yeno po mee caje
(Mateo 5.1-12)

²⁰ Majoya Jesusaa ba majje o shajja'ajjajji cuana huohui ca cua jama ba'a: —Beca cuana jjashahuaba-quiani jama ba'a: “E'e de, eya quea mimishi nee. Eyacuiñajjija ecuea mimishi cacuijea ca'yahua”. Jamaya jjashahuabaquianijjo Eyacuiñajjija oya ba'e tiitii mee caje'yo onijje eyajo. ¡Oya cuana quea bihui nee capo'yahua!

²¹ —Ojaya epeeji cuana Eyacuiñajjija esohui jayojja jama a sa neinei cuanijjo Eyacuiñajjija oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

—Oja epeeji cuanaja mimishijo pa neineianijjo Eyacuiñajjija quea bihui nee po mee caje'yo mimishi cui-jea ca'yajje.

²² —E'e, ¡miquianaya ecuea epeeji cuana, quea bihui nee nee pocue! Dejja cuana miqiana nijje mimijajje, miqianaya dejja cuaa cuia caje pea'ai, sijje minijje cuaje pea'ai. Jamatii, miqianaya ecuea epeeji cuanijjo, dejja cuaa mimishi po mee'yo sa acani. Eyacuiñajjija ca ca miqianaya quea bihui nee po mee caje'yo. ²³ Jamajjeya ijjeyahua nei quea bihui nee nee pocue! Eyacuiñajjija miqianaya eyajo quia caje'yo miqianajaya aquiana quea bame nee nee, quea huiso nee nee. E'e, Eyacuiñajjija esohui huohuijji yahuajo nei nei ba'ya cua jamaya aca cua mimishi cuaa; napa ca cua pea'ai. Jamajjeya ¡ona jayojja jama pocue, quea bei!

²⁴ —Joyaya nequiana oe quea aquiana huiso jjejojo, Eyacuiñajjijo jjashahuabaqui jjima. ¡Bacue! ¡Jjeya miqianaya quea bihui nee nee jjabaquicue! Majoya aje mi oe quijje quea yeno nee nee cuaje'yo cuaqui yasijje poqui'yo majje.

²⁵ —E'e de, ¡joyaya nequiana oe bobijo jjashahuaba-quiani jjejojo Eyacuiñajjijo jjashahuabaqui ajja bacue! ¡Jjeya miqianaya quea jeije jjejojo quea bei jjabaquicue! Majoya aje mi oe quijje quea shoe nee nee, quea yeno nee nee cuaje'yo. Bobima' nei cuaje cuaqui yasij-je poqui'yo majje.

—¡Joyaya mi oe quea bihui jjejojo soa ani jjabaquicue! Eyacuiñajjijo jjashahuabaqui ajja, quijje pa neinei-je'yo; quea yeno nee nee cuaje'yo cuaqui yasijje po-qui'yo majje.

²⁶ —¡A'a oe esohui huohuijji nisho pojji, dejja quea bihui epo meeji nisho pojji! Ma ecua esohui huohuijji nisho etiiquiaa quea bihui po mee ca cua jama. Jama po majjeya aje mi oe quijje cuaqui yasijje poqui'yo majje quea yeno nee nee cuaje'yo.

Quea boti nee a'yocue dejja cuana minijje quea quene cuani
(Mateo 5.38-48; 7.12)

²⁷ Jesusaa jama aca cua ba'a: —¡Jjashajja'ajjaquicue oe! ¡A'a oe ona boti'ama pojji! ²⁸ ¡Quea boti a'yocue

dejja minijje quea quene cuani! ¡Joya miquiana nijje mimijajianijo mimicue Eyacuiñajji nijje ojo! ²⁹ ¡Onaa shemo cuia cajje shemo mijipeajje cuia mee o'oyacue! ¡Onaa miquianajaya daqui jjequisejjajea cajo dojo mee'yocue miquianajaya pea daqui pea'ai! ³⁰ Onaa: "¡Aquiana che mo quiacue!" acajje, ¡quiacueya oe! Onaa miquianajaya aquiana sii cajo ja'a huohui'ajja'-yoyji! ³¹ Miquianaya mimiani pea cuana nijje jama ba'a: "¡Enijje quea bame nee po tiitii'yocue!" ¡Jamajjeya miquianaya pea cuana nijje quea bame nee po tiitii'yocue!

³² —Joya miquiana quea jea ajji cuani miquiaaya quea jea nee aña pea'ai; miquiana nijje quea quene cuani ca ca miquianajaya boti'ama. Dejja mimishi cuana aje oe jamaya cuani pea'ai. ¡A'a dejja mimishi jayojjaya pojji! ¡Ojjaña quea jea nee nee acue! ³³ Miquianaaya miquianajaya epeeji quea bame aña, pea cuana caya ca oe boti'ama aña. Dejja mimishi cuana aje oe jamaya acani pea'ai, de. ¡A'a dejja mimishi jayojja pojji; ojjaña quea bame acue! ³⁴ Miquianaaya joya jjaquiaqui'-yoyji yasijje quiaña. Joya jjaquiaqui'yo ajja huasijje quiajjima aña. Dejja mimishi cuana aje oe jamaya cuani pea'ai. ¡A'a dejja mimishi jayojja pojji! ¡A'a quea dejja tai pojji! ¡A'a quea nishelui pojji! ³⁵ ¡Miquianaaya miquianajaya epeeji pojjeama cuana quea jea nee a'yocue! Jamajjeya quea bame ba'eje'yo. ¡Pea cuana miquianajaya aquiana dojo sa cuanijo oe pojji cahuime dojo meecue! ¡Miquianaya a'a jjashahuabaquijji miquianajaya aquianajo, miquianajaya bejjojo! ¡Eyacuiñajji oje jashahuabaquicue! Majoya miquianaya ojaya epeeji nei cuaje'yo. Eyacuiñajjiya ojjaña cuanaya quea jea nee nee acani. Ojjaña dejja cuana, ojaya epeeji cuana, ojaya epeeji pojjeama cuanaya quea jea nee acani, de. ¡Jamaya oe pocue! ³⁶ E'e de, esejaya Chii eyajo quea bame nee ani, ojjaña cuana Eyacuiñajjiya quea jea nee nee acani. ¡Eyacuiñajji jayojjaya jama po tiitiicue!

¡A'a pea cuana niñebajji!

(Mateo 7.1-5)

³⁷ Jesosaa jama aca cua ba'a: —¡A'a pea niñebajji! Jamaya Eyacuiñajji boti'ama. Miquianaya pea cuana niñebajji cuanijo, Eyacuiñajjiya miquianaya tecuea caje'yo pea'ai. Miquianaya pea nijje jjabei'yoajo Eyacuiñajjiya miquianajaya mimishi cuijea caje'yo. ³⁸ Miquianaaya pea cuana huasijje quea huiso nee quiajo, jamaya quea huiso nee nee miquianaya Eyacuiñajjiya oya huisoajjaya quia caje'yo pea'ai. Quea huiso nee nee cuaje, de. Oe pojji quiajo ca ca miquianaya Eyacuiñajjiya oya huisoajjaya quia caje'yo —jamaya Jেসosa cua.

³⁹ Jesosaa pea esohui ejjashahuabaqui meejji jama aca cua ba'a: —E'e de, ¿a'a acuae oe cojjamaa pea cojjama' me pejejea majje dojo caje so'o? Cho, eme pejejeajji pojjeama, o pea'ai oquejeajji mei jjani yasijje, de. Cojjama' jayojja dejja mimishi pea dejja mimishiya dojo cajje cuaqui yasijje poquije'yo onijje tii. ¡A'a cojjama' jayojja pojji! ⁴⁰ Oe esohui huohuijji quea ja'a nee nee cuani. Ohua esohui huohui coo canijo, o shaj-

ja'ajjajji cuana quea ja'a pishana cuani. Jamatii ma eshajja'ajjajji quea ja'a cuaje ojaya esohui huohuijji shajja'ajja neinei majje. Jamajjeya jecuea esohui shajja'ajja neineicue quea ja'a epojji! Jamajjeya miquianaaya quea ja'a nee huohuije pea cuana huasijje.

⁴¹ —Jamajjeya jashahuaba bamebamequicue; a'a pea niñebajji! Jamatii miquianajaya epeeji cuana quea mimishi cuajo, niñebaña. ¡A'a jamaya pojji! ¡Miyaya ebionei miquea mimishi cuana pajea'yocue! ¡Majoya miyaya pea cuana mimishi pajea meesahua'yocue! ⁴² Oya jayojja yani miquea epeejiya ecojjajo shabo mimishi jayojja. Jamajjeya miya jashahuabaquiani miquea epeejiya ecojjajo nequi shabojo cuaya mee'yo sa aña jama ba'a: "Epeeji, shabo biso neiya mi cojja dobi canaje. Ache ba'ajja; cahuijia'ajja'yosahua". ¿A'a acuae jja oe miya jabaquiani acui cojjajji so'o? ¡Ebionei miquea cojjajo nequi acui huijia'yo socue! ¡Majoya miquea epeejiya shabo huijia'yocue! —jamaya Jেসosa cua.

¡Acui quea bame nee jayojja jama pocue!

(Mateo 7.17-20; 12.34-35)

⁴³ Jেসosaa jama aca cua ba'a: —Oe acui quea bame, ojaya ejjajja quea bame pea'ai. Pea acui quea tai, jamajjeya ojaya ejjajja quea tai cuani pea'ai. ⁴⁴ Oe acui ejjajja nei cuani, pea jjajjame pojjeama cuani. ⁴⁵ ¡Miquianaaya oe jashahuabaquicue, acui quea bame nee jayojja jama pocue! ¡Quea bame nee jashahuabaquicue Eyacuiñajji! Majoya miquianaya quea bame ba'eje'yo. ¡A'a jashahuaba taiquijji oe acui quea tai jayojja! Miquianaya jashahuaba taiquijja miquianajaya esohui quea tai cuaje'yo ma acuijjajja quea tai jayojjaya. ¡Jamatii jashahuabaquicue Eyacuiñajji, ojaya esohuijjo! ¡Quea bame ba'e tiitiicue pea dejja cuana nijje! —jamaya Jেসosa cua.

Oe dejja jashajja'ajja neinei quia cua pea jashajja'ajjaqui ajja cua

(Mateo 7.24-27)

⁴⁶ Jেসosaa pea esohui huohui ca cua jama ba'a: —Miquianaaya eya huohui nishoaña jama ba'a: "Emeshi Mese, eya shajja'ajja sa cuani miquea esohui". Cho, ecuea esohuijjo jashajja'ajjaqui sa po ajja miquianaya —Jেসosa cua—. ⁴⁷ Eyaya miquianaya huohuije beca dejjajo jama ba'a: Oe dejjaa equi iya bamebame canaje jayojja jama miquianaya jashajja'ajja neineiquiani ecue esohuijjo. Dejja equi iya canaje quea bame nee nee. ⁴⁸ Ohuaya tio canaje jjani emaco huasijje. Quea doe nee tio canaje. Majoya quea ca'a nee nee nequinaje equi yamajjana. Jama acanaje ojaya equi. Equi iya majje ena quea quemo cueyanaje, beni quea quemo cueyanaje pea'ai. Cui jayehuequi'yo jaaabichaquiyoyji equi cuanaje. Quea ca'a iyame joya mi jaabichaquiyonaje —Jেসosa cua—. Jamaya ecuea esohui shajja'ajja majje miquianaya quea ca'a cuaje ma equi jayojjaya.

⁴⁹ —Beca cuana jashajja'ajjaqui ajja ecuea esohuijjo jiquio ecua oe dejjaa iya tai canaje ojaya equi. Cui

sahuajo ba'e'yonaje. Ohuaya tio canaje jjani sisi; doe'ama. Ena quea quemo cuajo, beni quea quemo cuajo, cuei jjayehuequi'yajo ojaya equi jaabichacui'yonaje; ca'a'ama equi cuanaje, de. Jamaya miqianaya ca'a'ama cuaje, ecuea esohuijo jjashajja'ajjaqui ajjajo —jamaya Jesosa cua.

Jesosaa jjaajaqui mee ca ya'cua esohuinano meseja echacojji
(Mateo 8.5-13)

7 Jesosa dejja cuana nijje mimijeyo majje poquia cua Capenaoma cuiñajji yasijje. Oe Shomano esohuinano mese jomajo ba'ya cua. ² Ojo chacochoani emanojaa cua. Beshahua nei poquijeyoa cua, de. Ma ojo chacochoani quea bame chacocho ania cua. Jamajjeya esohuinano meseya huaquia mee'yo sa aca cua. ³ Ohuaya shajja'ajja ca cua Jesosa yani, Jesosaa pea cuana jjaajaqui mee ca'yani. Jamajjeya esohuinano mese jama jjashahuabaquime cua ba'a: —¿A'a Jesosaa ejo chacochoani jjaajaqui mee caje'yo? Caba'ajja.

Jamajjeya ohuaya huoojea ca cua Jodio etii cuana Jesosa huohui'ajjaa. Oya jama cua ba'a: —¡Poquicue; Jesosa huohui'ajjaquicue jiquiacua ecuejji! “¡Jjaajaqui meehua'yocue ejo chacochoani!” acue —jamaya cua esohuinano mese.

⁴ Majoya aje Jodio etii cuana poquia cua Jesosa huohui'ajjaa. Huohui'ajja cañaquia cua esohuinano meseja esohui jama ba'a: —Jesosa, esohuinano meseya ecuanami que huoojea canaje, jojo chacochoani jjaajaqui meequi'yocue pa! Esohuinano meseya aje oe quea bame nee nee nequi. ⁵ Jodio dejja cuana ohuaya quea bame nee ba'e meesahua cani. Ojaya ecuanaya quea boti nee nee, de. Ohuaya iya mee canaje equi ejjachaquiijji ecuanaja meshijo, de —jamaya cua Jodio etii cuana.

⁶ Majoya aje Jesosa jama cua ba'a: —E'e, cua'a.

Majoya aje poquia cua esohuinano meseja equi yasijje. Equi chipi nei cuajo esohuinano meseya huoojea ca cua ojaya epeeji cuana Jesosa huohuiya. Jama aca cua ba'a: —Jesosa, ja'a miya cuejji! Miquea esohui quea poja nee nee. Jamajjeya jejo chacochoani miya miquea esohuijo jjaajaqui mee'yocue! Eya esohuinano mese, jamajjeya miya pojja'a dobiqui sa po ajja ecuea equi yasijje. Eya jjashahuabaquiani miya pojja'a enijje mimi sa po ajja. ⁷ Jamajjeya eyaya ecuea epeeji huoojeanaje minijje mimiya. Jomajo mimicue miquea esohui nei jama ba'a: “¡Ojo chacochoani jjaajaqui'yocue!” Majoya jiquiojo ejo chacochoani jjaajaquije'yo. ⁸ Jamaya ecuea emeshi meseya huohui cajje eya poquije'yo. Ecuea sohuinano cuana eya huoojeajje poquije. Pea sohuinano eyaya iyaajje cueje. Ecuea echacojji eyaya chaco meeajje chaco caje, de. Jamaya miya huohuiajje ecuea echacojji jjaajaquije'yo —jamaya esohuinano mese huoojeameya aca cua Jesosa que.

Jamajjeya ma ohua huoojea ca cua poquia cua, huohui cañaquia cua Jesosa esohuinano meseja esohuijo.

⁹ Jesosaa shajja'ajja ca cua. Quea bihui cua esohuinano meseja esohuijo. Jesosaa huohui ca cua pea cuana onijje nequi, jama ba'a: —De, ma esohuinano meseja eba eyaya jiquiojo tii ojo chacochoani jjaajaqui meeje'yo ecuea esohuijo tiya. Jodio dejja cuana jjaashahuabaqui neinei jjima oya jayojja. Oya ca ca oe jjaapee neineiquinaje Eyacuiñajji nijje —jamaya Jesosa cua.

¹⁰ Majoya esohuinano meseja epeeji cuana poquia cua oja equi yasijje. Majoya aje dobiqui majje ejjaajaqui'yo ani ba cañaqui'ya cua, Jesosaja esohuijo jjaajaqui'yo ani: —¡E'e de, e'e jojo nei ojaya esohui quea poja nee nee, de! —jamaya cuana cua.

Jesosaa shequi mee ca'ya cua e'ahuemano'yoja eba-cua ejja emano'yojaa

¹¹ Quijje pishana Jesosa poquia cua Naini yasijje. O shajja'ajjaji cuana, pea cuana pea'ai poquia cua onijje. Quea huiso poquia cua, de. ¹² Jesosaa Naini yasijje poquijeya ba ca cua pea dejja cuana ebacua ejja emano'yojojo caje ohuajee. Enaese pa neinei poquia cua. Oya quea yeno nee nee cua oe nei nei oja bacuajojo, e'ahuemano'yo jjejojya. Quea dejja huiso nee onijje cueya cua ebacua ohuajee sahuua. ¹³ E'ahuemano'yohua Jesosa quea yeno po mee ca cua, de.

Jesosaa majoya oya jama aca cua ba'a: —¡A'a pajji!

Ohuaya shequi mee'yo sa aca cua oja bacua ejja.

¹⁴ Majoya aje Jesosa poquia cua ebacua ejja emano'yojaa huasijje. Majoya aje ma dejja cuana nequiñaquia cua Jesosa cueje ba majje. Jesosaa emano'yojaa napa ca cua. Majoya Jesosaa emano'yojaa jama mimiame aca cua ba'a: —Esho'i, ¡shequi'yocue jjeyahua nei!

¹⁵ Majoya aje ma emano'yojaa anisohua'ya cua. Mimi'ya cua, de. Jesosaa oya jama huohuime aca cua ba'a: —¡Poqui'yocue mique nae nijje!

¹⁶ Ojjaña aje majoya jama cua ba'a: —¡De, esho'i emano neinei'yojaa shequi'yonaje yaña, de! Eyacuiñajji oya shequi mee ca'yonaje, de. Ohuaya Jesosa huoojea canaje ecuanahuasijje. E'e, oya quea sohui poja nee nee, quea bihui nee nee po mee ca'yonaje ecuanaya. E'e de, e'e jojo nei Jesosa, oya cue'yonaje ecuanaba'e meesahuaa —jamaya ojjaña cuana cua.

¹⁷ Jodea meshijo ba'e cuana, quea huesha ba'e cuana, pea meshijo ba'e cuana pea'ai Jesosajo huohui cañaquia cuana cua.

Huaniya o shajja'ajjaji cuana Jesosa que huoojea ca cua
(Mateo 11.2-19)

¹⁸ Huani Eyacuiñajji esohui huohuijijojo ejeanobiajaa cua. Jamatii Huani ejeanobiajaa o shajja'ajjaji cuana Jesosaja esohui huohuiqui ca cua Huani que.

¹⁹ Huaniya ma esohui shajja'ajja majje beca o shajja'ajjaji cuana huoojea ca cua Jesosa huohui'ajjaa. Jama huohuime aca cua ba'a: —Huohui'ajjacue Jesosa jama ba'a: “Jesosa, Eyacuiñajji ojaña jaahuanajji huoojea caje'yo ecuanahuasijje. ¿A'a miya ma ecuanajaahua-

najji cuaniya? E'e pojja'a, pea pojja'a ecuaaya ishoa'aj-jaje" jamaya acue —Huaniya aca cua.

²⁰ Jamajjeya Huani shajja'ajjajji cuana poquia cua Jesosa huohui'ajjaa. Jesosa ba cañaquia cua emanojaa cuana jjaajaqui mee'yo cuequi. Eshahua cuana cuaya meequi'yo cuequi. Cojjama' cuana jjacojjaja'aqui mee'yo cuequi. Majoya oya cuaa huohui'ajja ca cua Huanija esohuijo.

²² Jesosaa jama saja'a ca cua ba'a: —E'e, ¡Huani oe huohuiquicue joya miqiaaaya shajja'ajjanaje, joya miqiaaaya banaje pea'ai! E'e, cojjama' cuana jjacojjaja'aqui mee'yonaje; jio'ajja cuana jeo mee'yonaje; dejja batata epo'yo cuana jjajaequi mee'yonaje; shajjaqueba jjashajja'aqui mee'yonaje; emano'yo cuana shequi mee'yonaje. Esohui quea bame nee huohuinaje ojjaña dejja quea yeno huasijje Eyacuiñajjija epeeji epo'yojji. ²³ Jamajjeya ¡huohuiquicue Huani que! Jama huohuiquime acue ba'a: ¡jjapee tiitiquicue Eyacuiñajjiji nijje, enijje pea'ai; quea ja'a nee ba'ecue! Jama miya ajje quea bihui po tiitiije'yo —jamaya Jesosa cua.

²⁴ Majoya aje Huani shajja'ajjajji cuana poqui o'oyanaje Huani que. Majoya o poqui'yaajo, Jesosa pea cuana nijje Huanijo mimia cua: —E'e de, yahuajo Huani quimajo aninaje. Miquianaya aje majoya o que poquinaje. ¿A'ya acuae jomajo banaje? ¿A'ya acuae miquianaya jjashahuabaquinaje Huanijo? ¿A'a jjashahuabaquinaje Huani esohui huohuijji quea ja'a pojjeama? Chojja.

²⁵ Miquianaaya ¿ae banaje Huani que poqui majje? ¿A'a dejjaja daqui quea nahue nee ehuosho ba'e banaje? Chojja, dejjaa daqui quea nahue nee huosho cani equi quea quemajo ba'eya. ²⁶ ¿Achajja acuae Huani ba'enaje? ¿A'a miya jjashahuabaquinaje Huani Eyacuiñajjija esohui huohuijji nei nei? E'e, de. Jamatii Eyacuiñajjija pea esohui huohuijji quea ja'a pishana huohui ca cua. Huaniya ca ca quea ja'a nee nee huohui canaje. ²⁷ Yahuajo nei Eyacuiñajjija esohui etehue'yo Huanijo jama cua ba'a:

"¡iquio dejja ecuea esohui huohuijji nei cuani. Jamaya eya sa cuani. Eyaya oya huoojeaje ebionei mi hui dojojji. Ohuaya dejja cuana huasijje huohui caje miquea ecuejji".

Jamaya yahuajo nei nei Eyacuiñajjija ojjaña ba mee canaje Huaniya e cue jjimahuajo, ejo jjabahuejjaqui mee ca'yonaje cuana. ²⁸ Ecuea pea ehuohui a'a pajea'yojji jama ba'a: Huani ma ona besameeji cua oe dejjaya quea bame nee nee pea cuana jayojja jama pojjeama. Jamatii quijje eya Emeshi Mese nei cuaje, ojjaña ecuea epeeji Huani jayojja jama cuaje'yo quea bame nee nee —jamaya Jesosa cua.

²⁹ Ojjaña dejja Huanija besamee Jesosaja esohui shajja'ajja majje quea bihui nee nee cua Eyacuiñajji nijje. Ojjaña dejja quea mimishi nee nee cuani cuaaya Eyacuiñajjija esohui shajja'ajja majje mimishi pajea ca'ya cua. Jamajjeya oya cuana Huanija ebesamee cua. ³⁰ Paniseo dejja cuaa Moisesija etehue'yo huohuijji cuaa pea'ai ca ca Huanija esohui shajja'ajja jjima aca cua. Eyacuiñajjijo quea bihui pojjeama cua, Eyacuiñajjija epeeji nei po sa po ajja jjejojo. Jamajjeya Huani que

enajje pohua poqui jjima cua, mimishi pajea'yo sa po ajja jjejojo.

³¹ Majoya aje Jesosa jama cua ba'a: —Dejja cuana mimishi pajea'yo sa po ajja ¿a'ya jayojja cuani? ³² Joya ecua esho'iquiana quebanei jayojja jama cuani. Esho'iquiana quebanei po majje joya pea que taaani jama cuaje pea nijje jjapeequi sa po ajja jjejojo. Jama jjamimihue'equime cuani ba'a: "Eyaya dehue miaña mi quea bihui epojji nisho. Jamatii miya quea bihui po sa po ajja. Majoya eya pa nishoani, emano'yojo pa ani jayojjaya mi quea bihui epojji nisho. Jamatii miya pa nisho ajja. Jamajjeya ecuea ba jjima eyaya miya achajja quea bihui po meeme aje. Miya niñepoqui jayojja cuani, jamajjeya quebanei po ajja" jamaya esho'iquiana quebanei cuani —Jesosa cua—. E'e de, jamaya dejja mimishi cuana jjeya cuani ma esho'iquiana jayojjaya.

³³ Yahuajo pishana Huani cue'yonaje. Eyacuiñajji nijje mimi tiitianijo bobi ijja ajja cuanaje. Acuijajja na sese ishi jjima aca cua. Ojjaña cuaa ca ca huohui canaje Huanijo jama ba'a: "Huani ca jja ca niñepoqui nei".

³⁴ Eya ca jja ca ijja'ijjiani dejja mimishi cuana nijje. Oya cuana nijje mimimiani. Jamatii beca cuana ejo siajje cuani jama ba'a: "¡Bacue ¡iquio dejja Jesosa! Dejja mimishi cuana nijje jjapeequiani; bejjo chichajji cuana nijje pea'ai jjapeequiani, de". Jamajjeya beca cuana ca ca jjapeequi sa po ajja enijje, Huani nijje pea'ai. Ecuea ba jjima achajja oya cuana eyaya quea bihui po meeme aje. Oya cuana esho'iquiana quebanei po ani jayojja cuani, de. Niñepoqui jayojja cuani. Oya cuana mimijajiani Huani nijje, enijje pea'ai. ³⁵ Eyacuiñajjija esohui e'e jojo nei. Jamaya ojjaña cuana oja esohuijo jjashajja'ajjaqui majje quea ja'a po mee caje —jamaya Jesosa cua.

Oe Paniseo dejjaja equi yasijje Jesosa anicuaa poquia cua

³⁶ Oe Paniseo dejja yohua bajjani cua ba'a: Simoni. Ohuaya Jesosa e'ijja'ijjajji iyaa ca cua. Jamajjeya oja equi yasijje poquia cua ijja'ijjiaa. ³⁷ Jesosa ijja'ijjia anijo oe epona dobiquia cua equi yasijjeya Jesosa baa. Ma epona quea mimishi ba'ya cua. Tahuoojo shiyeshiye ye ca cua, Jesosa ba majje. ³⁸ Ojaya mimishijo quea yeno nee nee cua. Pa neinei ania cua. Ecojja naa shacua ca aña cua Jesosaja ejiojji. Ojaya esao ao'aohua cui ca aña cua. Jesosa quea jeajojo jiojji tojjo ca cua. Jesosaja ejiojji tojjo majje shiyeshiyeya jiojji sha ca cua.

³⁹ Ma Simoniya epona ba ca cua; jjashahuaba taiquia cua jama ba'a: —Jesosa Eyacuiñajjija esohui huohuijji nei pojjeama pojja'a. Jamajjeya ¡iquio epona quea mimishi nee nee ohuaya mi huoojea cani. Eyacuiñajjija esohui huohuijji nei nijje mimishi cuana jjanequichipi-qui ajja —jamaya e'acaje'yo poso Simoniya aca cua.

⁴⁰ Jesosaja eba Simoniya ejjashahuaba taiquijji. Majoya jama huohuime Jesosaa aca cua ba'a: —Simoni, ecuea esohui mi que ehuohuijji yani.

—¡Ocue mo huohui'ajja socue! —Simoni cua.

⁴¹ Jamajjeya Jesosaa jama huohuime aca cua ba'a: —Oe dejja quea bejjo huiso nee ba'enaje. Majoya aje becanejjijji pea'ai dejja poquinaje o que bejjo sosema'

jjesheya, quiije esosequia'yojji nisho. Oe dejjaa iye huiso jjeshe canaje 500. Pea dejjaa ca jjeshe canaje ba'a oe pojji nei 50. ⁴² Ma dejja cuanaja oya sosequia'yo jji-ma tii cuanaje. Jamajjeya ma dejja quea bejjo huiso jja-peequi sa cuanaje bejjo jjeshejji cuanaje cuana niije. Jamajjeya ejjeshejji epo cuanaja ebajjani cuijea ca'yonaje jamatii bejjo sosequia'yo jjimajo tiya. Majoya oya cuana quea bihui po'yonaje bajjani cuijea ca'yajje. E'e, ¿ache dejja quea bihui nee nee cuanaje oja bejjo sosema'yo tiijojo? Ma dejja quea huiso, 500 sosequia jjima pojja'a. Pea dejja iye huiso, 50 sosequia jjima pojja'a —jamaya huohui'ajja ca cua Jesusaa.

⁴³ Simoni jama cua ba'a: —Ma dejja quea huiso bejjo quia canaje, 500.

Jesosaa jama aca cua ba'a: —E'e de, e'e jojo nei. ⁴⁴ Jamaya jiquio epona eya mimishi cuijea'yajje quea bihui nee cuani. Eya dobiquinaje miquea equi yasijje. Miya ca mi ca oe ecuea epeeji pojjeama cuanaje, Simoni. Jamatii beca cuana ceaniyo equi meseya ojaya epeeji cuana jiojji topo cani. Jamaya miquea ajjima. Ma eponaa ca ca ecuea ejiojji topo canaje oja ecojja naa. Oja sao ao'aohua cui ca'yonaje. ⁴⁵ E'e, miyaya ecuea epeeji pojjeama jjejojo mi shemo tojjonaje. Jiquio eponaa ca mo ca ejiojji tojjo tiitii canaje ojaya quea jea nee neejojjo. ⁴⁶ Miyaya eya sha jjima anaje shiyeshiyejo ejja-peequijji. Jiquio eponaa ca ca ecuea ejiojji sha canaje shiyeshiyeya ecuea epeeji nei sa cuaniya jjejojo. ⁴⁷ E'e, jamajjeya eyaya miya huohuaña jama ba'a: Ma epona jjapeequi sa cuanaje Eyacuiñajji niije. Jamajjeya aje oe ohuaya ecuea ejiojji topo canaje, quea shiye po mee canaje pea'ai. Ma epona quea mimishi nee nee cuanaje. Jamajjeya eyaya, Eyacuiñajjiya pea'ai oya mimishi cuijea'yonaje quea jea nee neejojjo —jamaya Jesusa cua.

⁴⁸ Majoya Jesusaa epona jama huohuime aca cua ba'a: —Miquea mimishi cuana eyaya cuijea'yonaje jje-ya nei.

⁴⁹ Pea dejja cuaa equijo ijia'ijia aniya Jesusajo jama huohuime aca cua ba'a: De, ¿a'ya acuae jja che mimishi cuijea'yojji pome so'o?

⁵⁰ Jesusaja eba cuanaje ma dejja cuana mimi ca'ani. Jamajjeya ohuaya epona huohui ca cua jama ba'a: —¡Miquea mimishi cuijea'yonaje, jamajjeya quea bame ba'e'yocue mimishi'ama! —jamaya Jesusa cua.

Epona cuaa Jesusa yohua sahua ca cua

8 Majoya aje Jesusa pea cuiñajji yasijje poquia cua Eyacuiñajjiya esohui huohuiya. O shajja'ajjajji nei cuana, 12 poquia cua onijje. ² Quea huiso epona cuana poquia cua Jesusa niije, ma ohuaya yahuajo jjaajaqui mee ca'yonaje, edosiquiana cuaya meequi ca'yonaje pea'ai. Oe epona Sosana bajjani; pea epona Mania Madanena bajjani cua. Maniaja 7 edosiquiana cuana Jesusaa cuaya meequi ca'ya cua. Pea epona Huana bajjani cua. Oya Cosaja ehuanase cua. Cosa emeshi meseja, Enode Antipaja echacojji cuana jaahunajji cua. Quea huiso epona cuaa bobi jjeshe ca cua oja bejjojo Jesusa bobiajji, o shajja'ajjajji cuani cuana bobiajji pea'ai.

Eso' jeaajajji

(Mateo 13.1-23; Macoso 4.1-20)

⁴ Quea dejja huiso nee nee poquia cua Jesusa shajja'ajjaa. Jjachichaquia cua Jesusa pejjejo. Jesusaa huohui ca cua jiquio esohui. Jama huohuime aca cua ba'a: ⁵ —Oe dejja poquinaje que yasijje eso' jeaajaa. Oe pojji eso' jeaaja canaje ejiojji yasijje. Cuichojsi cuaa ma eso' ijia ca'yonaje. ⁶ Pea eso' jeaaja canaje meshi mei biajje ani yasijje. Majoya aje jeaaja cajje pohua'ajja'yonaje. Majoya aje pohua'ajja'yo majje shocana'yonaje. ⁷ Pea eso' jeaaja cajje oquequinaje acuisha yiye yasijje. Majoya aje jeaaja cajje pohua'yonaje. Majoya aje pohua'yo majje acuishaa mano mee ca'yonaje. ⁸ Pea eso' ca ca meshi bame bame yasijje jeaaja canaje. Majoya aje jeaaja cajje tii'yonaje. Majoya aje tii'yo majje quea jjajja huiso nee nee cuanaje, de. E'e, mahuiso. ¡Shajja'ajjacue jiquio esohui; a'a shajjama' jayojja pojji! —jamaya Jesusa cua.

⁹ Quiije o shajja'ajjajji cuana poquia cua Jesusa huohua'ajjaa. Jama huohua'ajjame aca cua ba'a: —¿Yajajje ma esohui quea quehua cuanaje ecuanaja? —jamaya cua.

¹⁰ Jesusaa jama huohuime aca cua ba'a: —Miquianaya Eyacuiñajjiya ba meesahua caje ojaya esohui eya-cua. Beca cuana shajjama' cuani ca ca ohuaya eba meesahuajji pojjeama. Esohui eba meesahuajjiyo huohuaña beca cuana shajjama' cuaniyojo. ¹¹ Jamajjeya eyaya miquianaya huohuije quea ja'a epojji. Ma eso' Eyacuiñajjiya esohui jama cuani; meshi dejja jayojja cuani. ¹² Meshi ejiojji quea ca'a huasijje eso' oquequinaje, dejja shajjama' Eyacuiñajjiya esohui shajja'ajja sa po ajja jayojja. Eyacuiñajjiya esohui jjaja'aqui ajja quea sapa ca'a jjejojo. Cuichojsiya eso' ijia cani jayojja jama Edosiquiana etiiya Eyacuiñajjiya esohui pajea mee ca'yani, jjaja'aqui mee jjima acani. Jamajjeya ohuaya dejja jjapeequi mee jjima acani Eyacuiñajji niije. ¹³ Meshi mei biajje anijo eso' pohua'ajja'yani jama jayojjaya dejja cuaa Eyacuiñajjiya esohui shajja'ajja cani. Ebionei-ya aje ca Eyacuiñajji niije jjapee nishoquianiya. Majoya aje pea cuana onijje mimijajajo Eyacuiñajjiya esohui pajea ca'yani. Jjapeequi pajea'yani Eyacuiñajji niije.

¹⁴ Pea dejja meshi acuisha yiyejji jayojja jama. Eyacuiñajjiya esohui shajja'ajja cani. Ebionei-ya aje ca oe shajja'ajja caniya Eyacuiñajji niije jjapee nishoquiani. Majoya aje jjashahuabaqui'yani pea aquianajo quea mimishi epo'yojji. Jama jjashahuabaqui'yomeya cuani Eyacuiñajji epajea'yojji. Eyacuiñajjiya esohui ebajji nisho cuani. Ma eso' acuishaa mano mee ca'yani jayojjaya ejjashahuaba taiquijjiya aca'yani Eyacuiñajji niije epo pajea'yojji. ¹⁵ Pea dejja meshi quea bame nee nee jayojja cuani. Eyacuiñajjiya esohui shajja'ajja neinei cani. Shajja'ajja neinei majje Eyacuiñajjiya epeeji tii tii cuani. Ohuaya ojaya esohui ba neinei cani. Jjashahuaba bamebamequiani. Ma dejja cuana ecuea esohui ba neinei epojji —jamaya Jesusa cua.

Esohui ehuhui'yojji cuaquijijjo

(Macoso 4.21-25)

¹⁶ Jesusaa jiquio esohui jama huohuime aca cua ba'a: —¿A'a eseya eseya cuaquijijiya jeaja'a came eshajajo capa nequiya? Chojja. ¿A'a eseya ejaajji quimejjeje nequiya jeaja'a came? Chojja, de. ¿Eseya quea ja'a po mee sa añajo ca eyajo nequiasohuacue ojjaña quea ja'a epojji! ¹⁷ Jama jayojjaya Eyacuiñajjiya ojjaña ecuea esohui onaaya ba mee caje'yo quijje. Quea ja'a nee cuaje'yo. ¹⁸ Miya ecuea esohui shajja'ajja sa cuanijo Eyacuiñajjiya miya quea ja'a nee nee po mee caje. Be-ca cuana ecuea esohui shajja'ajja sa po ajjajo ohuaya quea ja'a po mee jjima acaje —jamaya Jesusa cua.

Jesosaja nae, oja chahua pea'ai

(Mateo 12.46-50; Macoso 3.31-35)

¹⁹ Majoya Jesusaja enaese cue'ya cua equi yasijje Jesusa ba'yohua. Ba'yo jjima cua ojaya, quea dejja huiso-jojo. ²⁰ Oe dejjaa Jesusa jama huohuime aca cua ba'a: —Mique naeya mi sa'ajja ca'yoqui mique chahua pea'ai.

²¹ Jamaya Jesusa cua ba'a: —E'e de, ojjaña nei neiya Eyacuiñajjiya esohui shajja'ajja neineiiji cuani ecue nae nei nei cuani, ecue chahua nei nei cuani, Eyacuiñajjiya epeejji nei nei cuanijojo —jamaya Jesusa cua.

Jesosaa beni nequioque meequi ca cua

(Mateo 8.23-27; Macoso 4.35-41)

²² Oe pojajajo Jesusaa o shajja'ajjajji cuana jama aca cua ba'a: —¿Cua'a; bae ojje miji yasijje besa poquicue!

²³ Jamajjeya bishe ai yasijje ojjaña ania cua. Jesusa onaa dojobesa cajje cahua cua. Majoya aje quea ichi po majje beni quea quemo nee nee cueya cua. Enashajohua bishe nanejea ca cua. ²⁴ Oe dejjaa majoya Jesusa jama ishe'ame aca cua ba'a: —Esohui huohuijji, ¡shequicue oe! Coya aje se hui'i'ya.

Majoya aje Jesusa shequijeanaa cua onaa ishe'a cajje. Majoya aje shequi majje mimia cua beni nijje, ena nijje pea'ai. Majoya aje o mimiajo beni nequioquequia cua enashajo pea'ai. Majoya aje enashajo po jjima jayojja po'ya cua. ²⁵ O shajja'ajjajji jama mimimeya cua ba'a: —De, Jesusa quea sohui poja nee nee, de. Miminaje beni nijje; beni po jjima jayojja po mee ca'yonaje, de.

Majoya aje Jesusaa jama aca cua ba'a: —¿Yajjajje acuae jja nequiana metenaje so'o, de? Jjashahuabaqui jjima pojja'a jja nequiana Eyacuiñajjiyo, de —Jesusa cua.

Dejjaja eyamijo nequi eshahua cuana Jesusaa cuaya meequi ca'ya cua

(Mateo 8.28-34; Macoso 5.1-20)

²⁶ Majoya oya cuana ba'eñaquia cua Jjanana meshi yasijje. Ba'eñaquia cua pea ojje miji yasijje, Janinea ba'e cojja nei besa poquia cua. ²⁷ Jesusa bishejo ani etaja huasijje nequisohuaquiajo, oe dejja cueya cua. Ma dejja quea shahua huiso jjejojo niñepoqui cua. Da-

quima' nei nei cua; quima' pea'ai. Oya emojeajaaca huasijje ba'ya cua. ²⁸ Jamatii oya quea tai po mee cana-je eshahuaa. Jamajjeya oya dejja cuaa jeyo ca cua cadena, poqui ajja epojji. Jamatii ca ca cadena jjasejja-jeaqui mee ca cua eshahuaa. Poqui mee ca'ya cua ma quima huasijje, de. Ma dejjaa Jesusa ba neinei ca cua. Majoya aje Jesusa nequi cojja nei ecui'oshajjajo nequioqueña cua. Majoya aje Jesusaa jama aca cua ba'a: —¡Eshahua cuana, cuayaqui'yocue!

Majoya ma dejja jama cua ba'a: —De, miya Jesusa, Eyacuiñajjiya Bacua Ejja e'e jojo nei. ¡A'a mo miyaya jina-
napajji so'o! —jamaya cua.

³⁰ Majoya Jesusa jama cua ba'a: —¿Ae bajjani acuae miya?

—Eya Quea Shahua Huiso bajjani —jamaya cua ma dejja quea shahua huiso jjejojo.

³¹ Eshahua cuaa Jesusa jama huohuime aca cua ba'a: —¡A'a ecuana huoojeajji cuaqui yasijje! ³² ¡Ecuana oe cuichi cuanaja yami yasijje dobiqumee'yocue!

—¡E'e ocuae dobi'ajjaqui socue! —jamaya aca cua Jesusaa.

³³ Majoya aje cuayaqui'ya cua dejjaja eshahua cuana, dobiqumee'ya cua cuichi cuana huasijje. Majoya aje cuichi cuana emacojo nequi cuajicuaaji jaoquequinana cua bae yasijje; hui'i'ya cua ojjaña. ³⁴ Cuichi hui'ije'yo ba majje cuichi jaahuanajji cuana poquia cua cuiñajji yasijje ojjaña huohuiya. Jama aca cua ba'a: —De, Jesusaa eshahua cuana cuaya mee canaje dejja niñepoqui meeji po nequinaje. Dobiqumee mee canaje ecuanaja cuichi yasijje, hui'i'yonaje ojjaña cuichi, de. Cuajicuajinanaje bae yasijje, hui'i'yonaje. ¡Chama'yo tii, de!

³⁵ Majoya ojjaña dejja cueya cua ae Jesusa po ani baa. Onaaya cue majje ba ca cua ma dejja niñepoqui cuanaje Jesusa pejejo ani. Ma daquima' cuanaje daquijji ani'yo ba ca'ya cua dejja cuaa; quea bei ani'yo ba ca'ya cua. Jesusa quea sohui poja nee neejo ojjaña quea mete po'ya cua. ³⁶ Ma niñepoqui bajji cuanajeya Jesusajo huohui ca nequi'ya cua pea meshijo ba'e yasijje jama ba'a: —Jesusaa eshahua cuana cuaya meequi ca'yonaje.

³⁷ Ojjaña cuana ma meshijo ba'e quea mete nee nee cua. Quea meteya jjejojo Jesusa huoojeajea ca'ya cua. Ma niñepoqui cuanajeya ca ca Jesusa jama huohua'ajjame aca cua ba'a: —Jesusa, eya minijje poqui sa cuani.

Jesosa jama cua ba'a: —Chojja, ¡miya poquicue mi-quea huapa pojjeama cuana huasijje! ¡Huohuiquicue ojjaña ma mi Eyacuiñajjiya jama acanaje! —jamaya Jesusa cua.

Majoya aje ma dejja poquia cua o ba'e yasijje huohuiya. Huohui ca'ya cua Jesusaa eshahua cuayaqui mee ca'ya cua.

Jainoja bacua piona emano'yojaa pea epona najji poani tii tii

(Mateo 9.18-26; Macoso 5.21-43)

⁴⁰ Majoya aje Jesusa besajebe'ya cua. Ba'eña'ya cua ojaya meshi yasijje. Ojjaña cuanaja Jesusa quea boti

nee cua. Isha'a'ajja ca nequia cuaa cua. ⁴¹ Oe dejja Jairo bajjani Jodioja ejjachichaquijji equi jaahuanajji cua Cesanenajo. Oya cueya cua Jesosa que. O cojja nei ecui'oshajjajo nequioqueña cua. Ohuaya Jesosa huohua'ajja ca cua ojaya equi yasijje epoquijji oja bacua piona jjaajaqui mee'yojji. Ojaya ebacua piona ahuema'ani quea mano nee nee cua. ⁴² Oja bacua piona oe nei cua, de. Majoya aje Jesosa onijje poquia cua. Beshahua nei poqui jjima cua quea dejja huisojojo. ⁴³ Oe pea epona quea mano dejja quea huiso yiyesa-majo nequi. Oya quea mano nee nee, ojaya ena' cua-yaqi nequia cua 12 shequiajame, de. Oya eshicuijji jjeshejji jjejojo bejjoma'yo cua. Eshicuijji quiajjija epona na' cuaya pajea meequi'yo jjima cua. ⁴⁴ Jesosa poqui-anijo ohuaya Jesusaja daqui cuesha iña ca cua. Ma da-qui cuesha iña cajje aje najji popajea mee ca'ya cua. ⁴⁵ Majoya aje Jesusaa jama aca cua ba'a: —¿Aya acuae mo iña canaje so'o?

O shajja'ajjajjiya, Penohua jama aca cua ba'a: —Cua'a, de. Quea dejja huisohua jjejojo mi, ¿aya shai mi iña canaje Jesosa? Napa jjima ca mi ca ecuanaja —jamaya Jesosa aca cua Penohua.

⁴⁶ Jesosa jama cua ba'a: —Cho, ecuea eba Eyacuiñajji-ya a'ya shai huaquia mee ca'yonaje e daqui iña cajo.

⁴⁷ Ma epona Jesusaja esohui shajja'ajja majje piopio cua. Ojjaña nequijo piopiojea cua. Ecui'oshajjajo nequioqueña cua Jesosa nequi yasijje. Ohuaya Jesosa jama huohuime aca cua ba'a: —E'e ee, Jesosa, eyaya nei miquea daqui cuesha iñanaje. Jjashahuabaqui majje che mi daqui iña majje ena' huosa mee'yojji. Jamajjeya che eyaya jamaya miya anaje —jamaya ma epona cua.

⁴⁸ Majoya Jesosa jama cua ba'a: —¡A'a quea mete pojji, she! Eyaya miya na' huosa mee'yonaje, miya jjas-hahuaba neineiquinajejojo. ¡Poquicue, quea bihui po'yocue!

⁴⁹ Jesosa epona nijje mimianijo tii Jainoja epeeji cueya cua Jairo que. Jama cua ba'a: —Jaino, miquea eba-cua piona mano'yonaje. Chama'yo tii, de. ¡A'a poqui meeji ma esohui huohuijji nei!

⁵⁰ Jesusaa ma esohui shajja'ajja majje jama huohuime aca cua ba'a: —¡A'a miya quea mete pojji! ¡Jjas-hahuaba neineiquicue oe Eyacuiñajji! Miquea bacua jjeya shequije'yo.

⁵¹ Majoya Jainoja equi yasijje poquiña cua. Jesusaa beca cuana dobiqii mee jjima aca cua equi yasijje. Peno, Satiaco, Huani ca ca oe dobiqii mee ca cua. Ma ebacuaaja chii enaese pea'ai dobiqii mee ca cua. Mahuiso dobiquia cua emano'yojaa baa.

⁵² Dobiqii majje oya cuaa ba ca cua ojjaña pa'ani quea yeno nee nee jjejojo, ebacua emano'yojaaajo. Jesusaa jama huohuime aca cua ba'a: —¡A'a pajji! Ma epona sho'i mano'yo jjima, ecahuijaa.

⁵³ Majoya ojjaña soa'ya cua. Ojjaña jama aca cua ba'a: —Chojja, mano neinei'yonaje jja coma, de —cua-na cua.

⁵⁴ Majoya aje Jesusaa epona sho'ija eme iña majje janobajjima nei mimia cua jama ba'a: —¡Esho'i, nequiso-huacue!

⁵⁵ Majoya aje shequi'ya cua, nequisohua'ya cua: —¡Quiacue oya bobi! —Jesosa cua.

⁵⁶ Ma esho'ija chii quea bihui po'ya cua oja nae pea'ai. Jesosa jama cua ba'a: —¡A'a huohuijji cuana jiquio eya mique bacua shequi mee'yonajejo! —jamaya Jesusaa aca cua.

Jesosaa o shajja'ajjajji cuana 12 huoojea ca cua esohui huohuiya

(Mateo 10.5-15; Macoso 6.7-13)

9 Jesosa jjachichaquia cua o shajja'ajjajji cuana nijje, 12 huisome nijje. Ohuaya jama huohuime aca cua ba'a: —Eyaya miquianaya huoojeaña pea cuana huasijje esohui huohuiya, pea cuana jjaajaqui mee'yohua, eshahua cuayaqui mee'yohua pea'ai. ¡Huohuicue jama pea cuana huasijje ba'a: “Eyacuiñajji ojjaña huoojeajji cuaje'yo” acue! ³ ¡Aema' oe poquicue! ¡A'a acui ejaquecuaca'aquijji dojojji; bashosoco pea'ai a'a dojojji! ¡A'a bobi, bejjo pea'ai dojojji! ¡Ma miquea eyamijo ba'e nei oe dojocue! ⁴ ¡Po'ayequi nequicue oe pea cuiñajji yasijje! ¡Miquianaya oe pea cuiñajji yasijje poqui majje miquianajaya epeeji epojji sa'ajjacue; ojaya equijo anicue! ⁵ Dejja cuaa pea cuiñajji ba'eya miquianajaya esohui cajaa acaje'yo pojja'a. ¡Huohuicue jja oe ma dejja cuana jama ba'a: “Quea mimishi mi coma” acue! “Eyacuiñajji jja miya ba cani. Ohuaya jja miya quea nee nee po mee caje'yo” acue. ¡Ma esohui jama huohui majjeya oe cuayaqui'yocue cuiñajji ani! ¡Majoya cuayaqui'yo majje miquianajaya ejiojjijo ani meshi pohui cuiayajajeanayocue oya cuana jjashajja'ajjaqui ajja cuanajejojo! ¡Jamajjeya oe pea cuiñajji yasijje poquicue! —jamaya Jesusaa aca cua.

⁶ Jamajje o shajja'ajjajji cuana po'ayequi nequia cua Jesusaja esohui huohuiya. Onaaya huohui ca cua Eyacuiñajji esohui; jjaajaqui mee ca'ya cua emanojaa cuana.

Jesosa emeshi meseya Enode Antipaa Huani poso aca cua

(Mateo 14.1-12; Macoso 6.14-29)

⁷ Emeshi meseya Enode Antipaa shajja'ajja ca cua peaja esohui Jesusajo. Pea cuaa Enode siajje aca cua jama ba'a: —Huani ca jja ca Jesusaya cuanaje. Huani ca jja ca shequi'yonaje —pea cuana cua. Enode quea ajjajja nee nee cua Jesosa Huani poso jojoya. ⁸ Pea cuaa Enode siajje aca cua jama ba'a: —Chojja, Jesosa ca jja ca Eniaya, ma etiiquiana shequi o'oyanajeya —posoya aca cua.

Pea cuana jama siajje pomeya cua: —Jesosa pojja'a pea etiiquiana shequi o'oyanaje.

⁹ Enode majoya jama cua ba'a: —Eyaya nei ca jjaja ca Huani sapasejjajeya meenaje, Huani mano neinei'yonaje, ecuea jjaja eba, de. ¿Ajeo shai jjaja ojjaña mimiani? Ache jja eyaya caba'ajja sahua Jesosa —jamaya Enode cua.

Jesosa 5.000 dejja cuana bobia ca cua

(Mateo 14.13-21; Macoso 6.30-44; Huani 6.1-14)

¹⁰ Quijje o shajja'ajjajji cuana esohui huohuiya poqui cue o'oya cua; Jesosa que huohui poña'ya cua. Majoya Jesosa shajja'ajja majje oya cuana poquia cua Betesaina huasijje. ¹¹ Jomajo o ba majje ojjaña jjachichaquia cua Jesosa que. Ojjaña quea bihui cua Jesosaa Eyacuiñajjija esohui huohui caquijo. Jesosaa jama aca cua ba'a: "Ojjaña joya mimishi pajea'yoyji cuani, onijje e'e nei jjapeequiani Eyacuiñajjiya jaahuana caje'yo". Ohuaya emanojaa cuana jjaajaqui mee ca'ya cua pea'ai.

¹² Jjasinecuaquijajo ojjaña quea shoe nee cua; ye jjima ojaya bobi cua. O shajja'ajjajji cuana Jesosa jama huohuime aca cua ba'a: —¡Huoojeacue ojjaña, bobi sa'ajjaa, ecahuijji sa'ajjaa pea'ai! Beshahua nei esejaya bobi jiquiojo chama' ba'a, de.

¹³ Jesosa jamaya cua: —Chojja, ¡miquianaaya oe bobi quiacue e'ijji! ¡jji!

Jamaya oya cuana cua: —De, oe pojji bobi yani. Beca nahuoo sisi yani, me oeje pahui yani. ¿A'a ecuanaya capoquiahua cuiñajji yasijje bobi jjequiya pojja'a, ojjaña dejjaja bobi jjequiya; quea bobi huiso epojji? ¹⁴ Yani quea dejja huiso nee nee, 5.000 yani, de.

Jesosaa jamaya aca cua ba'a: —Chojja, ¡a'a poquijji, ojjaña cuana anioque meecue, jjaanichichaqui meecue pea jjochojo, 50 anioque meecue!

¹⁵ Majoya aje o shajja'ajjajji cuana dejja cuana jama aca cua ba'a: —¡Anioquecue oe nequiana!

¹⁶ Majoya acua po majje Jesosaa ma pahui nahuoo pea'ai jjeshe ca cua oja emeya. Jjeshe majje eyahuasijje jjabajeasohuaquia cua Eyacuiñajji nijje emimijji.

Ohuaya Eyacuiñajji bihuia ca cua bobi e'ijji! Majoya Jesosaa miji sisisisi ca cua pahui, nahuoo pea'ai. Majoya ohuaya bobi quia ca cua o shajja'ajjajji cuana huasijje. Pea cuana huasijje quia ca cua o shajja'ajjajjiya.

¹⁷ Ijjia'ijjia majje ojjaña dejja cuana quea jejeje cua, de. Ojjaña dejja cuana jejejeajo iya ca'ya cua pea eshajajo tiya iya ca poqui'ya cua; 12 shajame bobi e'ijjiasejjaja ecuatajea cua.

Penohua Jesosa shahuaba ca'ya cua oya Quito

(Mateo 16.13-28; Macoso 8.27-9.1)

¹⁸ Oe pojajajo Jesosa oe nei mimia cua Eyacuiñajji nijje. O shajja'ajjajji cuana onijje nequia cua quea huesha pishana. Jesosaa oya cuana huohui'ajja ca cua: —¿Yajja mimime dejja cuana ejo cuani?

¹⁹ Jamajjeya o shajja'ajjajji cuana jama cua ba'a: —De, pea cuana ca jja ca mijo jama mimime cuani ba'a: Miya ca pajja mi ca pea dejja cuana Huani poso acani. Pea dejjaa ca pajja mi ca Enia poso acani, ma etiiquiana, de. Pea dejjaa ca pajja mi ca pea etiiquiana shequi o'oyanaje poso acani, de.

²⁰ —De, ¿miquianaaya yajja cuani so'o? —cua Jesosa.

Peno ca ca jama cua ba'a: —Miya ca ca Eyacuiñajjija Bacua Eja oe nei, oja huoojea'yo ojjaña jaahuanajji epojji. Ecuea Emeshi Mese nei nei, de. Miya Quito bajjani ecuea Emeshi Mese nei nei jjejojo.

²¹ Majoya Jesosaa Peno jama huohuime aca cua ba'a: —E'e de, e'e jojo nei. ¡A'a huohuijji pea cuana, ecuea bajjani Quito, miquea Emeshi Mese nei! ²² Eya Eyacuiñajjija huoojea'yo. Eya quea nee nee acaje'yo cuana. Beca cuana eya cajaa acaje'yo, Jodio etii cuana, Eyacuiñajji nijje mimiani etii cuana, Moisesija etehue'yo huohuijjiya pea'ai. Mano mee caje'yo eya, de. Eya mano'yo majje pea beca peejjima cahuime po majje shequije o'oya —jamaya Jesosa cua.

²³ Majoya aje o shajja'ajjajji cuana Jesosaa huohui ca cua jama ba'a: —Ojjaña ca jja ca enijje e'e jojo nei jja-peequi'yo sa cuani, oya Eyacuiñajjija esohui jayojja ca-ba'yahua. E'e, ¡e jayojjaya pocue; enijje poqui'yocue! Jamatii onaa napa cajje aje jja mi oe quea nee nee cuaje'yo. ²⁴ E'e, ojjaña cuana ecuea esohui shajja'ajja sa po ajjajo ba'e tiitii ajja enijje eyajo. Joya ecuea esohui shajja'ajjajji cuani ca ca ba'e tiitii'e'yo enijje eyajo. ²⁵ E'e pojja'a dejjaa quea huiso nee nee aquiana ojaya yajji chicha cani. Jamatii oya cuana caquij ya sijje jja ojaña ojaya aquiana cuana edojjiji pojjeama. ¿A'a ojjaña ojaya aquiana cuana quea bame cuaje oya cuaquij yasijje poqui majje? Chojja, de. ¿A'a aquiana sosesije cuayaqui mee caje'yo cuaquijo ani? Chojja, de. ²⁶ Oe dejja pojja'a: "Cajaa" cuani ejo, ecuea esohuijo pea'ai. Jamajjeya eyaya cue o'oya majje oya cajaa aje'yo pea'ai. E'e jojo nei eya ojjaña Edoe Mese cueje o'oya. Quea jeajahua nee nee, quea ca'a nee nee cueje'yo. Eya esohuidojojji quea huiso nee nijje cueje o'oya, de. ²⁷ E'e jojo nei miquianaaya jiquiojo nequia mano'yo jjimahuaa Eyacuiñajjija epeeji nei quea huiso nee nee baje —jamaya aca cua Jesosaa.

Jesosa quea cojja jiji cua

(Mateo 17.1-8; Macoso 9.2-8)

²⁸ Quijje, jiquio esohui huohui majje oe nomico ani'yo Jesosa poquia cua eyiyo huasijje. Peno, Satiaco, Huani pea'ai poquia cua onijje. Poquia cua Eyacuiñajji nijje mimia. ²⁹ Eyacuiñajji nijje mimi majje Jesosaja ecojja quea jiji nee nee cua eshequi jayojja. Ojaya daqui pea'ai quea oshe nee nee, quea siyo nee nee cua. ³⁰ Beca dejja emano'yo eyajje jjanequija'aqui'ya cua Jesosa nijje. Oya cuana mimia cua Jesosa nijje. Oe dejja Moisesi etiiquianaaya cua. Pea ca Enia etiiquiana cua, ma yahuajo nei nei ba'ya cua. ³¹ Quea bame nee nee quea jiji nee nee miminequia cua Jesosa, Enia, Moisesi pea'ai. Jesosa miminequia cua onaja mimishijo emano'yoyji jjejojo Jenosanenajo. Jama mimime cuana Jesosa. ³² Peno, Satiaco, Huani pea'ai quea cojja mano cua.

Majoya aje shequi nei'ya cua, ba ca cua Jesosa, Enia, Moisesi pea'ai; quea jiji nee nee nequi, de. ³³ Moisesi Enia mimijeyo majje poqui o'oya cua eyahuasijje. Poquije'yo ba majje Penohua Jesosa jama aca cua ba'a: —De, Esohui huohuijji, quea bame nee nee ecuanaya jiquiojo ani. Pea beca peejjima equi eja'iaqui, oe miquea, oe Moisesija, oe Enia —jamaya cua Peno jjasahuaba bamequi jjima jjejojo.

³⁴ Peno mimianijo tii bo oshe nee neeya oya cuana quehua ca cua. Bo ba majje quea mete nee nee po'ya

cua. ³⁵ Majoya Eyacuiñajjiya bo tejjeeya esohui huohui ca cua jama ba'a: —Jiquio Jesosa ecue Bacua Ejja, ecuea quea jea nee nee, eya ojo quea bhui nee nee. ¡Oya oe oe neiya shajja'ajjacue! —jamaya aca cua bo tejjee Eyacuiñajjiya.

³⁶ Ohuaya cuana ma esohui shajja'ajja majje ba ca'ya cua Jesosa oe nei nequi; pea cuana chama'. Penó, Huani, Satiaco pea'ai mimi'yo jjima nequia cua. Pea o shajja'ajjajji cuana huohui jjima aca cua. Quijje nei nei ca huohui ca cua, de.

Esho'i niñepoqui Jesosaa esahua huoojea ca'yajo niñepoqui pajea mee ca'ya cua
(Mateo 17.14-21; Macoso 9.14-29)

³⁷ Mecahuajje jjapojjaquiajo Jesosa eyiyojo nequi jaoque'ya cua. Quea dejja huiso nee neeya Jesosa ishoa'ajja ca nequia cua. ³⁸ Oe dejjaa janobajjima nei jama huohuime aca cua ba'a: —¡Esohui huohuijji, bahuacue ecue bacua! Ecuea ebacua oe nei, de. ³⁹ Eshahuaa napa cajje, taaani jeabichajea canaje meshi yasijje; huapani pea'ai. Eshahuaa manojea mee'yo sa acani. Jamatii oya cuani, de. ⁴⁰ Eyaya huohui'ajjanaje miquea eshajja'ajjajji cuana esahua cuayaqui mee'yojji. Eshahua cuaya meequi'yo jjima acanaje mi shajja'ajjajji cuaa —jamaya aca cua niñepoquija ejeajjiya.

⁴¹ Jesosaa ojjaña cuana jama aca cua ba'a: —De; ¿ache shono acuae jja nequiana ejo jjashahuabaquije e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baje'yo Eyacuiñajjiya huoojea'yo ojjaña jaahuanajji quea ca'a nee nee? —jama tecueameya Jesosaa aca cua.

Majoya ma dejja Jesosaa huohui ca cua jama ba'a: —¡Miquea ebacua jjequicue!

⁴² Majoya esho'i jjequi ca cua Jesosa que. Ye cajo eshahuaa esho'i jeabichajea ca cua; niñepoquia cua. Jesosaa esahua esho'ijo nequi cuaya meequi ca'ya cua. Esho'i niñepoqui pajea'ya cua. Majoya aje Jesosaa ejeajji nijje esho'i poqui mee ca'ya cua. ⁴³ Ojjaña ba majje jama aca cua ba'a: —De, quea sohui poja nee Jesosa cuanaje. Eyacuiñajjiya Jesosa quea sohui poja nee po mee canaje.

Jesosaa huohui ca o'oya cua o manojeyojo
(Mateo 17.22-23; Macoso 9.30-32)

Ma esho'i niñepoqui pajea mee'yo majje ojjaña bihuia ca cua Jesosa, Eyacuiñajji pea'ai. Ohua bihuia cajje Jesosaa o shajja'ajjajji cuana jama aca cua ba'a: ⁴⁴ —¡Shajja'ajjacue jiquio esohui! ¡A'a pajea'yojji! Quijje dejja cuaa eya iña caje emano mee'yojji —jamaya cua Jesosa.

⁴⁵ O shajja'ajjajji cuanaja ca quea quehua cua Jesosaja esohui. Eyacuiñajjiya quea quehua po mee ca'ya cua. Jamatii oya cuana quea mete cua ehuohui'ajjajji.

¿Ache dejja quea bame eyajo cuaje'yo?
(Mateo 18.1-5; Macoso 9.33-37)

⁴⁶ Jesosa shajja'ajjajji cuana jjaniñebaqui ania cua. Jama cua ba'a: —¿Ache oja eshajja'ajjajji acuae eyajo

quea bame nee nee nequije so'o? Eya nei emeshi mese cuaje eyajo, pojja'a, miya pojjeama.

Pea aje oe jama cua ba'a: —Chojja, eya, de.

⁴⁷ Jesosaa jama tecueame aca cua ba'a: —Miquianaya jjashahuaba taiquiani. ¡Shajja'ajjacue oe! ⁴⁸ ¡Bacue jiquio esho'i cuana, emeshi mese po sa po ajja! ¡A'a emeshi mese po sa pojji! ¡Jamaya miquianaya pocue esho'i jayojjaya! ¡Jjapeequicue jiquio ecua esho'i cuana jayojja oe pocue, dejja quea bame nee nee epojji! Miquianaya ecuea epeeji nijje jjapeequi majje miya ecuea epeeji cuani, Eyacuiñajjiya epeeji pea'ai. Jamajjeya miquianaya esho'i quea bame jayojja cuani, majoya miquianaya quea bame nee nee nequije'yo eyajo —Jesosaa cua.

Oe dejja Edosiquianaja epeeji pojjeama cuani jamajjeya oya Jesosaja epeeji nei cuani
(Macoso 9.38-40)

⁴⁹ Majoya Huaniya Jesosa jama aca cua ba'a: —Esohui huohuijji, ecuaa banaje oe dejja; ohuaya pea cuanaja esahua cuana cuaya meequi ca'yonaje miyaya jayojjaya. Miquea epeeji cuani pojja'a, oya ca ca cue ajja tii ecuaa nijje. Jamajjeya ecuaa oya jama huohuinaje ba'a: “¡A'a cuayaqui mee'yojji esahua; miya ecuaa nijje poqui ajja!”

⁵⁰ Jesosa jama cua ba'a: —Cho, ¡a'a jama pojji! Oya ecuea epeeji nei cuani. Oya Edosiquianaja epeeji pojjeama cuani, jamajjeya oya ecuea epeeji cuani. E'e, ma dejja quea bame cuani, oya quea tai pojjeama. Jamajjeya oya ecuanajaya epeeji cuani pea'ai —jamaya cua Jesosa.

Jesosaa Satiaco Huani pea'ai tecuea ca cua

⁵¹ Beshahua nei acua cua Jesosa emano'yojji, eyahuasijje epoqui'yojji pea'ai Eyacuiñajjiya esohui jayojja yajji. Jamajjeya jjashahuabaqui majje oya poquia cua Jenosanena huasijje o shajja'ajjajji cuana nijje. ⁵² Poquijeya Jesosaa beca o shajja'ajjajji cuana huoojea ca cua Samania meshi yasijje ecahuijji sa'ajjaa. ⁵³ Jomajo Samania dejja jama cua ba'a: —Chojja, ¡a'a miquianaya jiquiacua cuejji! Cajaa, miquianaya Jodio dejja joyoya, ecuanaja ca mi ca boti'ama Jodio dejja cuana Jenosanena huasijje poqui majamajjijjojo Eyacuiñajji bihuiaa.

⁵⁴ Majoya ma esohui shajja'ajja majje Satiaco, Huani pea'ai poquia cua Jesosa que huohui pohua. Oya cuana jama cua ba'a: —Jesosa, Emeshi Mese nei, ecuaaya cuaquí oque mee sa ña ma esohui quea tai miminaje yasijje. ¿A'a acuae quea bame jama epojji so'o, Jesosa?

⁵⁵ Jesosaa jama tecueame aca cua ba'a: —Chojja, ¡a'a miquianaya jama jjashahuabaquime pojji!

⁵⁶ Majoya aje poquia cua pea cuiñajji yasijje cahuiya.

Jesosa nijje jjapeequi majje quea camaja cuaje
(Mateo 8.19-22)

⁵⁷ Ejiojijje poquijeya, dejjaa Jesosa jama huohuime aca cua ba'a: —Jesosa, Emeshi Mese nei, eya minijje

jjapeequi sa cuani. Jamajjeya eya minijje e'e jojo nei po'ayequi sa cuani.

⁵⁸ Majoya aje Jesosa jama cua ba'a: —E'e pojja'a de, quea camaja cuaje. Eya ojjañaja Edoe Mese cuani. Jamatii ecuea equi chama' ejomishocajji. Samao ca ca jjanijo cahuijaa, cuichoiji cuana ejajo cahuiani. Eya ca ca iña quima' ecahuijji. Jamatii beca cuanaja equi quea nahue cuani e boti'amajojo —jamaya Jesosa cua.

⁵⁹ Pea pojjaajo pea dejja Jesusaa jama huohuime aca cua ba'a: —ijjeyahua nei enijje cuecue ecuea epeeji epojji!

Ma dejja jama cua ba'a: —Emeshi Mese, quijje pishana poquije minijje. Jjeya ecue chii etii nojinoji, manojje'-yo pojja'a. Eyaya camojea sahua mano'yajo.

⁶⁰ Jesosa jama cua ba'a: —Chojja, pea cuaa Eyacuiñajjija epeeji pojjeama cuaa oe cacuiña cahua. Ohuaya cuaa camojea cahua mano'yajo. ¡Cuecue jjeyahua nei; enijje ejjahuhuiquiqui Eyacuiñajjija esohui pea cuana huasijje!

⁶¹ Pea dejjaa Jesosa jama huohuime aca cua ba'a: —Emeshi Mese, eya po'ayequi sa cuani minijje. Ebio nei oe ecuea huapa pojjeama cuana cahuhuiquiqui'yo sahua jama ba'a: “Poquia iña Jesosa nijje”.

⁶² Jesosa jama cua ba'a: —Chojja, ijje ya nei cuecue enijje! ¡Miya enijje jjapeequi sa cuanijo cuecue jjeyahua nei enijje! Miya cue sa po ajjaaje miya bame'ama cuaje Eyacuiñajjija epeeji epojji.

Jesosa dejja quea huiso huoojea ca cua 72 huisome

10 Majoya Jesusaa dejja quea huiso jjequi tepe ca cua, 72 huisome. Ohuaya becamejjijji pea'ai huoojea ca cua ojjaña meshi cuana huasijje joya o poqui sa cuani yasijjeya. ² Ohuaya jama huohuime aca cua ba'a: —Dejja cuana anoso quejo jahua jayojja jama, quea huiso nee nee. Ojjaña cuana ecuea esohui shajja'ajja sa cuani, oe pojji ca ca Eyacuiñajjija esohui huohuijji yani. Jamajjeya ¡mimicue Eyacuiñajji nijje quea huiso esohui huohuijji epojji, quea huiso anoso sejja'yojji cuana jayojja epojji! ³ ¡Poquicue miqianaya ma dejja cuana quea mimishi nee nee nequi yasijje esohui huohuiya! Ma dejja cuanaya pojja'a mimijajije minijje; ba'ajja. ⁴ ¡A'a bashosoco dojojji; bejjo, ejiojji shejee pea'ai a'a dojojji! ¡A'a pea nijje mimipoquijji; quea cueiji pashi nee oe poquicue! Quea huiso Eyacuiñajjija esohui shajja'ajja sa cuani. ⁵ Equi yasijje dobiqui majje jja ca oe equi mese huohucue jama ba'a: “Eyacuiñajjija miya quea bei po mee caje”. ⁶ Ma equi mese quea bei po sa cuanijo, Eyacuiñajjija oya quea bei po mee caje. Pea equi meseya miya cajaa acanijo, Eyacuiñajjija oya quea bei pojjeama acaje. ⁷ ¡Miqianaja epeeji epojji sa'ajjacue; ojaya equijo tiya anicue! ¡Ojaya bobi ijji anicue ma cuiñajjijo ani majje! Equi meseya miya cabobia cahua Eyacuiñajjija esohui huohuiaña sosejje, ojaya echacojji jayojja cuani jojjo. ⁸ Pea cuiñajji yasijje poquijajo dejja cuaa miqianajaya esohui shajja'ajja sa cuanijo ohuaya miya bobia caje. ¡Jamajjeya ijjiacue onijje! ⁹ ¡Jjaajaqui mee'yocue emanoojaa cuana! ¡Huohucue oe oya Eyacuiñajjija esohui jama

ba'a: “Jjeya nei Eyacuiñajjija miya oja epeeji po mee sa acani” acue! ¹⁰ Pea cuiñajji yasijje poquijajo dejja cuana ca ca miquea esohui shajja'ajja sa po ajja pojja'a cuaje. ¡Ma dejjaya jja oe jama huohuime acue ba'a: ¹¹ “Miquianaaya cajaa aña Eyacuiñajjija esohui, jamajjeya ecuanaya pea dejja cuana huasijje poquije esohui huohuiya miqianaya shajjama' jojjo. Ecuana quea yeno cuani miquianaaya Eyacuiñajjija esohui cajaa anaje jojjo. E'e de, ohuaya miqianaya huoojea caje'-yo cuaqui yasijje. ¹² Yahuaajo Eyacuiñajjija Sonoma cuiñajjijo ba'e cuana aca cua jayojjaya miqianaya acaje'-yo, quea nee nee po mee caje'yo” jama huohuimeya acue! —jamaya Jesosa cua.

Beca cuiñajjijo ba'e cuana shajjama' cua

(Mateo 11.20-24)

¹³ Majoya aje Jesosa tecuetecuea cua dejja shajjama' cuana nijje. Jama huohuime aca cua ba'a: —Coya nequianaya quiyo'yo chana', Conasijo ba'e cuana, Betesainajo ba'e cuana pea'ai. Miquianaaya eya banaje, ecuea esohui shajja'ajjanaje pea'ai. Jamatii miqianaya ca mi ca oe shajjama' nei nei cuani, de. Yahuaajo Eyacuiñajjija Tinojo ba'e cuana Sinonojo ba'e cuana pea'ai quiyojea mee ca'ya cua quea mimishi nee nee-jojjo. Ojaya cuanaja ca ca eya shahuaba jjima nei nei cua, de. Ohuaya eya eshahuaba jjojemo ecuea esohui eshajja'ajja jjojemo quea yeno nee nee poqui'aye ojaya mimishijo. Conasijo ba'eja ca jjaja ca iña oe eshahuaba cuanaje, jamatii jjejojjo ca nequiana ca oe shajjama' nei nei cuanaje ecuea esohuijo, de. Betesainajo ba'e jayojja ca mi ca oe cuanaje. ¹⁴ Jamajjeya Eyacuiñajjija miqianaya huoojea caje'yo cuaqui yasijje, quea nee nee nee cuaje'yo miqianaya. ¹⁵ Capenaomajo ba'e cuana, miqianaya shajjama' neiya cuani pea'ai. Jamajjeya aje jja miqianaya quiyojea pea'aie'-yoya. Miquianaya jama jjashahuabaquiani ba'a: “Ecuana ca ca eyahuasijje poquije'yo”. Cho, miqianaya poquije cuaqui yasijje ecue sohuijo shajjama' cuanijojo —jamaya Jesosa cua.

¹⁶ Majoya aje Jesusaa o shajja'ajjiji cuana jama huohuime aca cua ba'a: —E'e de, miqianaya ecuea esohui huohuijji cuani. Miquianaaya ecuea esohui nei huohuiaña. Jamajjeya dejja cuaa miqianajaya esohui shajja'ajja canijo ecuea epeeji cuaje. Pea dejja cuana ca ca oe shajja'ajja sa po ajjaajo ecuea epeeji pojjeama cuaje, Eyacuiñajjija epeeji pojjeama pea'ai cuaje. E'e de, mahuiso ecuea esohui —jamaya aca cua Jesusaa. Majoya aje ma dejja cuana iye huiso huoojea ca cua esohui huohuiya.

Ma dejja cuana, 72 huisome cue o'oya cua Jesosa que

¹⁷ Majoya ma dejja cuana 72 huisome esohui huohui majje Jesosa que cue o'oya cua; quea bihui nee cua. Oya cuana jama cua ba'a: —Jesosa, ecuea Emeshi Mese nei, ecuanaya quea sohui poja nee cuanaje; mi jayojja cuanaje. Ecuaya miquea bajjanijo eshahua huoojeacuaya'yonaje.

¹⁸ Jesosa jama cua ba'a: —E'e de, ecuea eba. Eyaya Edosiquiana banaje oquequinaje eyajo nequi pojjeje jayojja, de. ¹⁹ Eyaya miqianaya quea ca'a po meenaje epoquijji. Peyohua, ajiya pea'ai ijia cajje miqianaya mano'yo jjima po meeje'yo eyaya. Edosiquiana miya quecua jjima ameeje'yo eyaya. ²⁰ Miquiaaya eshahua cuayaqui mee'yaña. ¡A'a quea bihui nee pojji miquianaya quea sohui poja nee cuani! ¡Miquianaya ca oe quea bihui pocue miqianajaya bajjani tehue canaje Eyacuiñajjiya eyajo edobiqui meeji! Miquianaya poquije eyahuasijje Eyacuiñajji nijje ba'e'yohua. ¡Jamajjeya ma esohuijaya quea bihui pocue! —jamaya Jesosa cua.

Jesosa quea bihui cua
(Mateo 11.25-27; 13.16-17)

²¹ Majoya aje Edojjoshahua Bameya Jesosa quea bihui po mee ca cua. Jesosaa Eyacuiñajji jama huohuime aca cua ba'a: —De, eya quea bihui nee cuani minijje. Eyacuiñajji, miya ecue Chii nei, miya Emeshi Mese nei cuani, ojjaña meshi cuanajo eyajo pea'ai, de. E'e, beca cuana jjashahuaba taiquiani jama ba'a: "Ecuea quea ja'a nee esohui, jamajjeya eya Eyacuiñajji esohui shajja'ajja sa po ajja". Miyaya, Eyacuiñajjiya, oya cuana ba meesahua ajja oya cuana jjashahuaba taiquianijojo. Pea cuana ca ca miquea esohuijo esho'iquiana jayojja jjabahuejjaqui sa cuani. Jamajjeya miyaya oya cuana quea ja'a po meeje'yo. E'e ecue Chii, miyaya jamaya aña miquea ejjashahuabaquijji jama —Jesosa cua.

²² Majoya Jesosaa pea cuana jama huohuime aca cua ba'a: —Eyacuiñajji ecue Chii e huoojea'yojji epo. Eya ojaya esohui huohuijji cuani. Ecue Chiiya eyajo anija ecuea ejjashahuabaquijji ojaya eba nei nei, ojaye nei. Ecue Chiiya ejjashahuabaquijji ecuea eba nei nei pea'ai, ecuea nei. Eyaya ecuea epeeji ba meesahuaña quea ja'a nee ecue Chiiya ejjashahuabaquijji —jamaya Jesosa cua.

²³ Majoya aje o shajja'ajjaji cuana Jesosaa jama huohuime aca cua ba'a: —¡Quea bihui pocue, miquianaaya Eyacuiñajjiya ejjashahuabaqui'yojji bañajo! ²⁴ E'e jojo nei eyaya miqianaya huohuiaña jama ba'a: Yahuajo quea huiso Eyacuiñajjiya esohui huohuijji cuana, emeshi mese cuana pea'ai Eyacuiñajjiya ejjashahuabaqui'yojji ba nei nei sa cua. Ecuea esohui shajja'ajja nei nei sa cua pea'ai. Jamatii onajaya eya ba jjima cua, shajja'ajja jjima cua ecuea esohui. E'e, oya cuana shajja'ajja sa cua jiquio miqianaaya jjeya shajja'ajjaña —jamaya Jesosa cua.

Esohui oe Samania dejja quea bame cuajo

²⁵ Oe Jodio dejja Moisesija etehue'yo huohuijji poquia cua Jesosa dasiaa nisho. Huohui'ajja ca cua jama ba'a: —Jesosa, miya esohui huohuijji cuani, ¿yajja acuae po cajji Eyacuiñajji nijje eba'e tiitii'yojji so'o?

²⁶ Jesosa jama cua ba'a: —¿A'ya acuae Moisesiya tehue ca cua? ¿A'a pojja'a miquea ma esohui ba jjima?

²⁷ —De, ecuea eba, eya Moisesija etehue'yo huohuijji nei nei cuani. Ojaya esohui jama cuani ba'a: "¡Miyaya

Eyacuiñajji quea jea nee nee acue! ¡Ojo nei oe jjashahuabaquicue; oya oe bihuicue ojjaña pojjaajo!" Pea etehue'yo jamaya cua ba'a: "Eseyajjaahuanacuiani. ¡Jama jaahuanameya oe acue mique doe cuana!" jama cua Moisesija etehue'yo yahuajo —jamaya cua ma esohui huohuijji.

²⁸ Jesosa jama cua ba'a: —E'e de, quea bame nee miquea esohui. ¡Ma esohui jayojjaya oe miyaya acue! Majoya aje miya Eyacuiñajji nijje eyajo ba'e tiitiije'yo.

²⁹ Ma esohui huohuijji Eyacuiñajji nijje, pea cuana nijje pea'ai quea bihui nisho cua. Ojaya pea cuana boti'ama cua. Jamajjeya ohuaya Jesosa edasia'yojji nisho jama huohui'ajjame aca cua ba'a: —¿A'ya acuae ecue doe cuana? —ojaya ba jjima nisho cua.

³⁰ Jamajjeya Jesosaa esohui jama huohuime aca cua ba'a: —Oe Jodio dejja ba'enaje Jenosanenajo, poquinaje ejiojjijje Jenico huasijje. Ejiojjijje poquianijo siipojji cuana nequinaje ejiojjijje sii epojji. Siipojji cuana dejja eshema' nei cuiahuejjajeame acanaje e'acuiana jjeshe'yojji. Ojaya daqui sii ca'yonaje, de. Siipojji cuana ma dejja jea cana'yonaje, beshahua nei emano'yo. ³¹ Majoya oe Jodio dejjaa, Eyacuiñajji nijje mimiani dejjaa ma dejja ecuiajeajjaaje yejje canananaje. Bajee canananajeya aje jja ca oe. Jjequi sohuasohua'yo ajja jjaja cua. Poquia jjaja oe cua. ³² Quijje pea Jodio dejjaa yejje canananaje bajea cananjeya aje jja ca oe pea'ai. Oya Eyacuiñajjiya equi jaahuanajji cua. Jjequi sohuasohua'yo ajja jjaja cuanaje. Poquia jjaja oe cua. ³³ Quijje aje jjaja oe Samania dejja cueyanaje. Samania cuanaja Jodio cuana boti'ama. Jamatii jiquio Samania dejjaa Jodio dejja ecuiajeajja ba canaje. ³⁴ Ohuaya ba majje shicui canaje. Majoya aje iyasohua ca'yonaje mona biajje, dojo canaje ejaachichajji equi yasijje. Majoya aje jaahuana canaje sosema' tii. ³⁵ Pea cahuijo Samania dejjaa bejjo quia canaje equi mese yasijje, o cahuinaje sosejje. Jama huohuime aca cua ba'a: "Eya poquije chacohua. Ma ecuiajeajja dejja ca anije, ¡miyaya oya jaahuana-cue! Ma'aje bejjo o jaahuana sosejje. Quijje eya cueje o'oya mi sosequia o'oyaa" jamaya cuanaje Samania dejja —Jesosa cua.

³⁶ Majoya Jesosaa Moisesija etehue'yo huohuijji jama huohuime aca cua ba'a: —Pea beca peejjima dejjaa ecuiajeajja dejja ba canananaje. ¿Ache dejja acuae oja doe jayojja cuanaje?

³⁷ —Ma o jjequisohua'yojji cuanaje, Samania dejja ojaya doe jayojja cuanaje —jamaya oya cua.

—E'e de, e'e jojo nei. ¡Miyaya jamaya acue, pea cuana jama jaahuana meeya acue, mique doe jayojja acue! —jamaya Jesosa cua.

Jesosa, Manta, Mania nijje pea'ai anicuanana cua

³⁸ Jesosa o shajja'ajjaji cuana nijje Jenosanena huasijje poquije Mantaja equi yasijje dobiquinana cua ijia'ijjiaa. ³⁹ Mantaja shehue, Mania Jesosaja esohui shajja'ajja sa cua. Jamajjeya Jesosa chipi nei ania cua oja esohui shajja'ajja neinei. ⁴⁰ Mantaja cuacuacuacuaquija jjejojo Jesosaja esohui shajja'ajja jjima cua. Oya quea quene cua oja shehue nijje. Mantaa Jesosa jama

huohuime aca cua ba'a: —Jesosa, eya ecue shehueja cuacuasahua jjima. ¡Huoojeacue oya e cuacuasahuaa!

⁴¹ Jesosa ca oe jama cua ba'a: —Chojja, Manta, mi-quea ecuacuajjijo ca ca miña jjashahuabaquiani. Jamajjeya miya ecue esohuijo jjashahuabaqui jjima cuani. ⁴² Mania ca ca oe quea bame cuani, ohuaya ecuea esohui shajja'ajja neinei cani. ¡Mique shehue jayojja jama pocue! —jamaya Jesosa cua.

¡Eyacuiñajji nijje jama mimime pocue!

(Mateo 6.9-15; 7.7-11)

11 Jesosa pea pojjaajo mimia cua Eyacuiñajji nijje. Majoya aje cojjacahuijeyo majje o shajja'ajjajjiya Jesosa jama huohui'ajjame aca cua ba'a: —Emeshi Mese nei, ¡huohucue iña miyaya achajja mimime acuae po caji so'o! Yahuaajo Huaniya ona besameejji cuanajeya o shajja'ajjajji cuana huohui ca cua achajja mimime epojji Eyacuiñajji nijje. ¡Jamaya huohucue ecuanaya!

² Majoya aje Jesosaa jama aca cua ba'a: —Jama mimi-meya oe pocue Eyacuiñajji nijje ba'a: Eyacuiñajji, miya ecue Chii nei nei. Miya oe nei nei ani, pea mi jayojja chama'. Ecuea eba nei nei miya mimishi'ama nei nei. Miya ojjaña cuanaja Emeshi Mese nei cuani; ojjaña jaahuanajji cuani. Jamajjeya ojjaña cajjapeequiahua minijje.

³ ¡Quiacue mo ecuea bobi eba'ejji!

⁴ ¡Ecuanaajaya mimishi cuana cuijea'yocue!

Eya quene'ama pea cuana nijje; jaya enijje quea mimishi cuani nijje.

Jamajjeya ecuea mimishi cuanajo ¡a'a quene pojji pea'ai!

¡A'a ecuaa quea mimishi po meejji! Acua. ¡Jamaya mimicue Eyacuiñajji nijje! —jamaya Jesosa cua.

⁵ Majoya Jesosaa o shajja'ajjajji cuana pea esohui ej-jashahuabaqui meejji jama huohuime aca cua ba'a: —Miquianaya pojja'a mee nei poquije miquea epeejjija equi yasijje mecashono nei. Miyaya huohuiñaquije jama ba'a: "Jjeya nei ecuea epeejjij cue'yonaje. ⁶ Chama' bobi ecuea equijo, oya ca ca quea shoe, de. ¡Che mo bobi quiacue ecuea epeejjij nijje ebobajji!" Jamaya cuaje miya pojja'a. ⁷ Majoya oya jamaya cuaje ba'a: "Chojja, de. Equiajji pojjeama mi, cahuijaa so'o ca ca iña, de. Ca'a'yonaje oya aña ecuea esecuejjani ca mi quiajji".

⁸ Miyaya huohui'ajja majamajjaje ca mi ca oe quia caje. Ojaya epeejjijojjo pojjeama ca mi ca oe quia cani miya mi cahuime yajje —jamaya Jesosa cua—. ⁹ E'e de, eyaya huohuinaje maya esohui miquea ebajji achajja mimime Eyacuiñajji nijje epojji. ¡Miquianaaya huohui majamajacue esecuejo nequia jayojjaa! Majoya Eyacuiñajjiya miquianaya quia caje. ¡A'a Eyacuiñajji nijje mimi pajea'yojji ohuaya miya saja'a caje'yo! ¹⁰ E'e, ojjaña cuaa Eyacuiñajji huohui'ajja canijo, Eyacuiñajjiya oya cuana quia caje'yo. Jamaya ma esohui epeejjijjo, de. Oya poquinaje bobi sa'ajjaa, huohui'ajja majamaja canequinaje. Majoya aje bobi quia canaje. Jamaya aje Eyacuiñajjiya acaje miquianaa huohui'ajja majamajjaje.

¹¹ Miquianaja bacuaa nahuoojo huohui'ajja cajje, ¿ae quiaje? Peyo pojja'a. Chojja, miquianajaya equiajji poj-

jeama peyo, de. ¹² Miquianaja bacuaa cachinajjajo huohui'ajja cajje, ¿ae quiaje? Aji pojja'a. Chojja, miquianajaya equiajji pojjeama, de. ¹³ Miquianaya quea mimishi ba'ani. Jamatii miquianaja bacua nijje quea bame cuani, Eyacuiñajji ca ca mimishi'ama nei nei cuani. Ohuaya quea bame nee nee quia cani miquiaa huohui'ajjajje. Ohuaya miquiana huasijje Edojjoshahua Bame nei huoojea caje miquiaa huohui'ajjajje —jamaya Jesosa cua.

Jesosa Edosiquiana etiiya quea sohui poja po mee cani

poso —aca cuaa cua

(Mateo 12.22-30; Macoso 3.20-27)

¹⁴ Oe dejja mimi'ajja nequia cua eshahua oja yamijo nequi jojo. Oya poquia cua Jesosa que. Jesusaa eshahua cuayaqui mee ca'ya cua. Ma dejja eshahua cuayaqui'yajo mimicoo'ya cua, de. Majoya aje ojjaña cuana jama cua ba'a: —De, Jesosa quea sohui poja nee nee yaña.

¹⁵ Pea dejja cuanaya jama siajje pomeya cua ba'a: —Edosiquiana etii nijjeya jjejojo, Jesusaa eshahua cuaya meequi ca'yonaje, Edosiquiana etii Meesemo nijjeya.

¹⁶ Pea cuana jjashahuaba taiquia cua Jesusaja epeejjij nisho epojji. Jesosa jama aca cuaa cua ba'a: —Ecuanaa ajjima aña Eyacuiñajjiya miya ca ca ameesahua caje pojja'a. ¡Jamajjeya amee'ajja socue oe! Majoya jama miya ajo, ecuanaa baje e'e jojo nei Eyacuiñajjiya miya huoojea canaje ecuaa huasijje. Majoya aje oe ecuanaya jjapeequije minijje —jamaya cuana cua Jesosa Eyacuiñajjiya huoojea'yo pojjeama posojo.

¹⁷ Jesusaja eba onajaya ejjashahuaba taiquijji. Jamajya aje Jesusaa jama tecueame oya cuana aca cua ba'a: —¡Jashajja'ajjaquicue oe! Joya emeshi mese ojo chacochoacoani cuaa shajja'ajja sa po ajjajo, ojee jja-quecuajji majje jjaquecua iyaiyaquije'yo dejja cuana ma meshijo ba'e; chama'yo tii cuaje'yo. Huapa pojjeama cuana nijje jjaquiaquaja chama' epeejjij cuana cuaje'yo. ¹⁸ Jamaya pea'ai Edosiquiana etiiya Satanasa pea eshahua ehoojeacuaya'yo jojjemo, dejja huoojea'yojji pojjeama po'yoquiaye. Chojja, jama pojjeama ca coma. ¹⁹ ¿A'aya eyaya Edosiquiana nijjeya niñe cuana, pea eshahua cuana pea'ai huoojeacuayajeaña poso aña? Jamajjeya miquea epeejjij cuanaa ¿ae nijje eshahua huoojeacuayajea caní? Eyacuiñajjiya asahua canijo, jamajjeya ojaya eba miquianaya ejo siajje cuani.

²⁰ E'e, Eyacuiñajji nijjeya eyaya eshahua huoojeacuayajea yaña. ¡Jamajjeya bacue eya e'e jojo nei Eyacuiñajji, Emeshi Mese oe nei jjeya cuani tii! ²¹ ¡Bacue! ¿A'a dejja quea ca'a neeja equi yasijje dobiquijji oja aquiana siiya o jeyo jjima nequijo? Chojja, o jeyo majje ojaya aquiana cuana sii caje cuaa. ²² Jiquio ecua e'aquiana mese ebio-nei jeyo cani jama amajje eyaya eshahua cuana jeacuayajeaña. ²³ Miquianaya shajja'ajja sa po ajja ecuea esohui, jamajjeya ecuea epeejjij nei pojjeama miquianaya cuani. Miquianaaya ecuea esohui pea cuana huasijje huohui sa po ajjajo, jamajjeya miquianaaya pea

cuana quea mimishi po mee sa aña, de —jamaya Jesosa cua.

Eshahua dejjaja yami yasijje cue o'oyani
(Mateo 12.43-45)

²⁴ Jesosaa esohui ejjashahuabaqui meeji huohui ca cua jama ba'a: —Eshahua dejjaja yamijo nequi cuaya-jeaqui'yo majje quea huesha poquinaje. Sa'ajja ca'yonaje pea enequi'yojji. Jamatii ba'yo jjima cuanaje. Eshahua po'ayequeiquinaje o nequiji sa'ajja'yohua. Jamajjeya oya jjashahuabaquinaje jama ba'a: “Eya poquije o'oya huacuaya ma e cuayaquinaje yasijjeya, ma ecuea equi jayojja huasijjeya”. ²⁵ Jamajjeya oya dejja huasijjeya cue o'oyanaje. Ojaya yami yasijje dobiqiu'yonaje Eyacuiñajjiya epeeji pojjeama jojoya, ojaya eyami equi ecuiashaba jayojja jama, ehua bamebame jayojja equi se ejjama'. ²⁶ Jamajjeya ma eshahua poquinaje pea eshahua cuana jjequiya onijje enequi'yojji ma dejjaja yamijo. Oya cuana quea mase nee nee cuanaje. Oe nei yahua ca ca quea mase pishana cuanaje. Majoya aje ojjaña dobiqiuajo ma dejja quea yeno nee nee cuanaje. Yahua oje eshahua nequiahua oje ca ca quea yeno pishana cuanaje.

¿Yajja acuae po cajji quea bihui epojji?

²⁷ Jesosa mimianijo oe epona ojjaña yiyesama neiqui sohuicuaya cua jama ba'a: —Jesosa, Eyacuiñajjiya miquea enaese quea bihui capo mee ca'yahua, ohuaya miya cuayajo tii mee canajejo.

²⁸ Majoya aje Jesosa jama cua ba'a: —E'e, quea bame pishana. Eyacuiñajjiya esohui shajja'ajja nei nei majje ca ca oe quea bihui nee nee capo'yahua. Joya Eyacuiñajji niije jjapeequi neinei majje quea bihui nee nee capo'yahua. ¡Jamaya pocue quea bihui nee nee epojji! —jamaya Jesosa cua.

Dejja mimishi cuaa Jesosa huohui'ajja ca cua
(Mateo 12.38-42; Macoso 8.12)

²⁹ Quea dejja huiso nee nee ejjachichaqui nequia cua Jesosa niije. Majoya Jesosaa esohui jama huohuime aca cua ba'a: —Miquiaaya Eyacuiñajjiya esohui cajaa anaje. Jamatii miquianaya ba o'oya sa cuani eyaya yahua oje anaje jayojja. Ecuea jamaya e'abeca'yojji pojjeama miquea ebajji eya Eyacuiñajjiya huoojea'yo. ¡Jashahuabaquicue yahua oje nei Eyacuiñajjiya Jjona jaahua na ca cua jai ai'ajja sei aijo ba'e! ³⁰ Jjona emano'yo jayojja cua. Majoya shequi o'oyanaje jayojja cua pea beca peejjima cahuime po majje jaiya ojja'ca'ya cua. Majoya dejja cuana Ninebe cuiñajjiyo ba'e yasijje poquia cua. Oya jjashahuabaqui'yo aña cua Jjona eshequi o'oya jayojjajo. Jjashahuaba bame nequia cua e'e jojo nei Eyacuiñajjiya Jjona huoojea ca cua oja esohui huohuiya. Eya Jjona jayojjaya cuaje, eya mano'yo majje mei jjanijo jaa shequije o'oya pea beca peejjima cahuime po majje, miquiana jjashahuabaquiji Eyacuiñajjiya eya huoojea canaje miquiana huasijje. ³¹ E'e, yahua oje Ninebejo ba'e cuaa Jjonaja esohui shajja'ajja majje mi-

mishi pajea ca'ya cua. Jjapeequia cua Eyacuiñajji niije. Jjona esohui quea bame huohui ca cua. Jjeya eyaya miquianaya huohui bamebame yaña, de. Jamatii miquianaya ecuea esohui shajja'ajja sa po ajja. Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya.

—E'e, jamaya yahua oje cua ba'a: Eeno cuejijje emeshi mese pona cua. Oya quea huesha nee nee cueya cua Sanomoja esohui shajja'ajja. Sanomo quea jjas-hahuabaqui ja'a pishana cua. Eya ca iña quea jjas-hahuabaqui ja'a nee nee cuani. Jamatii miquianaya ecuea esohui shajja'ajja sa po'yo ajja. ¿Yajjajo acuae miquianaya ma epona jayojja mi po'ajjani so'o? Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya, de —jamaya Jesosa cua.

Esohui ecojja cuaquijji jayojjajo
(Mateo 5.15; 6.22-23)

³³ Jesosa jama cua ba'a: —¿A'a miquianaya cuaquijji dedo majje capanequiaña eshajaa? Chojja. ¿A'a miquianaya enequia quehua nequia jeaja'a came? Chojja. E'e, eyajo nequia jeaja'a cani. ³⁴ Miquianajaya ecojja cuaquijji jama, de. Miquianajaya ecojja quea ja'a cuanijo miquianaya poqui bameje. Miquianajaya ecojja ja'a'ama cuanijo epoqui bameji pojjeama. Jamaya miquianajaya ejjashahuabaquijjiya quea ja'a cuanijo, ba'e bameje. Miquianaya jjashahuaba taiquianijo, miquianaya cuaquijji enequia quehua jayojja cuaje. ³⁵ ¡Jamajjeya ma cuaquijji eyajo nequiasohua nequi jayojja jama jjashahuaba bamebamequimeya oe pocue! —jamaya Jesosa cua.

Jesosaa Paniseo dejja cuana Moisesija etehue'yo huohuiji tecuea ca cua

(Mateo 23.1-36; Macoso 12.38-40; Noca 20.45-47)

³⁷ Jesosa mimipajea'yajo oe Paniseo dejjaa Jesosa iyaa ca cua ijja'ijja oja equi yasijje. Jesosa dobiqiu majje e'anijjiyo anioquea cua. Oya jjametopo neineiqui jjima cua, Jodio etiiquiaa acani jayojja ajjima aca cua.

³⁸ Jamajjeya Paniseo dejjaa Jesosa ba majje jjashahuaba taiquia cua jama ba'a: —E'e de, Jesosa quea tai cuani, eme topo neinei ajja, etiiquiaa jayojja jama ajjima acani, de.

³⁹ Jesosaja eba onajaya ejjashahuabaquijji; jamajjeya jama tecueame aca cua ba'a: —De, miquianaya, Paniseo dejja cuana jamatii esohui huohuiji nisho cuani, quea tai, de. Miquianaya joya caneco yiye topo jjimajo jayojja cuani. Jamaya miquianaaya dejja cuana jjas-hahuabaqui meeña, miquianaya Eyacuiñajjiya epeeji cuani poso acani dejja cuaa. Miquianaya ca mi ca ojaya epeeji pojjeama, ojaya miquianaya eba, de. Ojjaña miquianaya quea bame cuani poso acani. Miquianaya ca ca quea tai nee nee cuani; jjashahuaba quehuaquiani, de. ⁴⁰ Miquianaya Eyacuiñajjiyo jjashahuaba nishoquiani, ojaya epeeji nisho cuani. Jamajjeya beca cuaa miquianaya quea bame ba'e poso acani. Eyacuiñajjiya miquianaya quea bame nee jjashahuabaqui mee sa

acani. Jamajjeya jja oe ;onijje jjapeequicue e'e jojo nei epojji! Majoya aje miqianaya quea bame cuaje'yo.

⁴² —E'e de, miqianaya Paniseo dejja cuana jjas-hahuaba taiquiani, de. ¡A'a quea dejja tai pojji! Shajja'ajjaña ajeya ca oe Eyacuiñajjija esohui, ojjaña ojaya esohui aje jje oe shajja'ajja jjima cuani, e'e nei. ¡Miqianaaya ojjaña Eyacuiñajjija esohui shajja'ajja jeyojeyocue! ¡Huapa pojjeama cuana quea jea acue, Eyacuiñajjiya ojjaña cuana quea jea acani jayojja oe acue! E'e de, ¡a'a pajea'yojji quea jea ajji! Jamajjeya miqianaya quea bame cuaje.

⁴³ —E'e de, miqianaya ca jja ca oe quea tai cuani, Paniseo dejja cuana. Jamatii miqianajaya equi ejjachichaquijji e'anijji quea bame sa'ajjaña. Pea nijjeya aje jja mi ca oe quea bame jayojjaya cuani, majoya aje jja mi oe pea cuaa quea bame poso acani. Miqianaya ca jja mi ca sjajjepojji, de. E'e, ejiojijje pea'ai miqianaya po'ayequequijjo dejja cuanaja esohui shajja'ajja sa cuani jama ba'a: "Paniseo dejja cuana ca jja ca quea bame nee nee, de". Ma esohui ca jja ca e'e jojo nei pojjeama acani.

⁴⁴ —E'e miqianaya quea tai po majamajani. Miqianaya dejja equehua mojea'yojaa jayojja, ma onajaya ba jjimajojo quishi cani jayojjaya cuani. Pea cuana jjas-hahuabaquiani ma meshi joya quea bame poso acani. Jamaya miqiana ma emojea'yojaa jama cuani. Pea cuana jjashahuabaquiani miqiana quea bame, onajaya miqianaya ba jjima quea tai nee nee cuani. Miqianaya jjashahuabatai tiitiquiani; quea bame pojjeama cuani —jamaya Jesosa cua.

⁴⁵ Oe Moisesija etehue'yo huohuijji cuani jama cua ba'a: —Jesosa, miya pojja'a ecuana nijjeya pea'ai tecuetecueani.

⁴⁶ Jesosaa oya jama huohuime aca cua ba'a: —E'e jojo nei eyaya miqianaya tecueña. Miqianaya Moisesija etehue'yo huohuijji nisho cuani pea'ai, de. Miqianaaya pea cuana huasijje esohui quea camaja huohui nishoña. Jamatii miqianaya ma esohui jayojja ba'e ajja; ona asahua ajja.

⁴⁷ —E'e, miqianaya quea tai nee nee cuani, miqianaja etiiquiana jayojja, de. Miqianaja etiiquiaa Eyacuiñajjija esohui huohuijji quecua ca'ya cua jjashajja'ajjaqui ajjaa jjejojo. Jamatii miqianaaya cuia'asha poquia tiitiaña etiiquiaa quecua ca'ya cua shahuaba poquia tiitijji, equecua'yo sajaa quea pame epojji epajea'yo cuani jjejojo. Jamajjeya miqianajaya etiiquiana jayojja jama jjashahuabaquime cuani. ⁴⁹ E'e, Eyacuiñajjija eba, jamajjeya ohuaya jama huohuime aca cua yahuaajo ba'a: "Eyaya ecuea esohui huohuijji cuana, e shajja'ajjajji cuana huoojeaje pea cuana huasijje. Ecuea ehoojea'yo cuana beca cuaa quecua caje'yo nei nei. Beca ca mimi panajajje onijje" jamaya Eyacuiñajji cua. ⁵⁰ E'e, miqianajaya etiiquiana huasijje huoojea ca cua Eyacuiñajjija huoojea'yo cuana. E'e, yahuaajo miqianajaya etiiquiaa quecua ca'ya cua Eyacuiñajjija huoojea'yo cuana, de. Yahuaajo Eyacuiñajjija esohuijje tehue ca cua Abenijo. Miqianajaya etiiquiaa Cainiya Abeni cuiahuejjajea ca'ya cua. Majoya oya jayojjaya quea hui-

so cuiahuejjajea ca'ya cua Eyacuiñajjija esohui huohuijji cuana. Quijje yejje nei Eyacuiñajjija etehue'yojo tehue ca cua ojaya pea esohui huohuijji, Sacaniajo. Oya Eyacuiñajji nijje mimiani cuiahuejjajea ca'ya cua cuaa Eyacuiñajjija equijo, aquiana dahuajeajji pejejo, de. Jamajjeya eyaya miya e'e jojo nei huohuiaña jama ba'a: Jjeya nei Eyacuiñajjiya miqianaya quea nee nee po mee caje'yo ojjaña etiiquianaja mimishi cuanajo, miqianaya etiiquiana jayojja cuani jojoya. ⁵² E'e jojo nei miqianaya, Moisesija etehue'yo huohuijji cuana quea tai nee cuani. Jamatii miqianaya ca mi ca oe esohui huohuijji nisho, sjajjepojji. E'e, miqianaya Eyacuiñajji nijje jjapeequi ajja nei. Pea cuana Eyacuiñajji nijje jjapeequi sa cuani, miqianaaya jjapeequi pajea meeyaña, de. Jamajjeya miqianaya quea nee nee po mee caje'yo quijje, de, quea nee tii tii cuaje'yo —jamaya Jesosa cua.

⁵³ Jesosa mimipajea'yajo Paniseo dejja cuana, Moisesija etehue'yo huohuijji cuana quea quene nee nee cua Jesosaja esohuijjo. Oya cuana jjashahuaba taiquia cua. Ohuaya cuana Jesosa huohui'ajja neinei ca cua esohui quea tai ojaya yajji nisho, ejjajejanobiaquijji yajji edojjijji nisho.

Jesosaa esohui huohui ca cua ona jjashahuaba taiquianijjo

(Mateo 10.26-27)

12 Quea dejja huiso nee nee ejjachichaqui nequia cua Jesosa shajja'ajjajji. Jjiojji quishi canequia cuaa cua quea dejja huisohua jjejojo. Jesosaa o shajja'ajjajji cuana jama huohuime aca cua ba'a: —Paniseo dejja cuana jjashahuabatai majamajaquiani. Jamajjeya aje esohui huohuijji nisho cuani, Eyacuiñajjija epeejji nisho cuani, de. Coya mi o jayojja po chana'. ² Eyacuiñajjiya oya cuana ba cani ojaya epeejji nisho cuani. Ojaya ojjaña eba o jjashahuabaquiyojji cuani cuana. Eyacuiñajjija eba ojjaña, de. Jamajjeya joya Eyacuiñajjiya quea ja'a po mee caje huiso tiya, quehua'ama cuaje'yo tii ojjaña ebaajji.

¡A'a quea mete pojji dejja cuanajo!

(Mateo 10.28-31)

⁴ E'e ecuea epeejji nei, ¡a'a quea mete pojji ojjaña cuanajo, esahua cuanajo pea'ai! Oya cuaa miqianaaya quecua caje'yo pojja'a. Jamatii miqianajaya edojjoshahua mano jjima cuaje. ⁵ ¡Miqianaya jja oe jjas-hahuabaquicue Eyacuiñajjijo, de! Shajjama' cuajo ohuaya miqianaya mano mee'yo majje cuaqui yasijje jeajea caje'yo miquea edojjoshahua.

⁶ —E'e de, quea anohuii huiso nee nee yani. Anohuii beshahua nei sosema' quea huisojojo. Eyacuiñajjiya oya cuana pajea'yo jjima acani. Ojaya eba ojjaña.

⁷ Ohuaya anohuii jaahuana cani, jamajjeya ohuaya miqianaya jaahuana neinei cani pea'aiya, de. Ojaya esico miqianajaya ehoojjaña. Jamajjeya ¡a'a pajea'yojji miqianaya ohuaya nahue cani! Anohuii ohuaya nahue cani pishana —jamaya Jesosa cua.

¡A'a quea bicho pojji Jesosa niije jjapeequi majje!

(Mateo 10.32-33; 12.32; 10.19-20)

⁸ Jesosa jama cua ba'a: —Ecuea epeeji cuaa ejo huohui cani jama ba'a: “E'e, eya ca iña bicho'ama Jesosajo. Eya ojaya epeeji nei nei, e'e jojo nei”. Jamajjeya eyaya Eyacuiñajjija esohuidojojji cuana o que huohuije jama ba'a: “E'e, oya cuana ecuea epeeji nei, e'e jojo nei”. ⁹ Pea cuana ca jja ca quea bicho cuani ejo. Jamajjeya oya cuaa huohui caje jama ba'a: “Cho, eya Jesosaja epeeji pojjeama”. Jamajjeya eyaya Eyacuiñajjija esohuidojojji cuana huohuije jama ba'a: “Cho, oya cuana ecuea epeeji pojjeama, cajaa” eyaya aje —Jesosa jamaya cua—. ¹⁰ Beca cuaa eya niñeba cani; Eyacuiñajjiya maya mimishi cuijea sa acani. Peaa pojja'a Edojjoshahua Bame niñeba cani, Eyacuiñajjija ca ca maya emimishi cuijea'yojji pojjeama. Ma mimishi ani tiitiije'yo.

¹¹ —Pea cuaa miqianaya dojo caje esohuinano mese ani yasijje, Jodio dejja etii ani yasijje ecuea epeejijojjo. Miqianaya pojja'a quea mete nee nee cuaje. Miqianaya jama jjashahuabaquije pojja'a ba'a: “¿Achajja shai huohuime acajji? ¿Achajja shai saja'ame aje?” ¡A'a jamaya jjashahuabaquijji! ¡Mete'ama nei onijje mimi-cue! ¹² Edojjoshahua Bameya miqianaya mimi bame meesahua caje esohuinano mese nijje. Quea bame cuaje miqianaya —jamaya Jesosa cua.

¡A'a bejjojo jjashahuaba majamajaquijji!

¹³ Oe dejjaa Jesosa jama huohuime aca cua ba'a: —Esohui huohuijji, ecuanaja chii mano'yonaje. Ecue o'ija che eya bejjo esejja quia'yo jjima ecue chiija quijjojea. Jamajjeya jama huohui'ajjame acue ecue o'i ba'a: “Che pa ¡chahua bejjo esejja quia'yocue!” acue —jamaya cuanaje oja chahua bejjo sa cuanijo.

¹⁴ Jesosaa jama huohuime aca cua ba'a: —Chojja de, ¿yajjajo acuae moya jama huohui'ajjame aña? Eya ca iña mique chiija quijjojea bejjo quia'yohua cue pojjeama. Maya ecuea echacojji pojjeama, de. ¹⁵ Ojjaña dejja manoje'yo quea bejjo huiso cuana, aema' cuana pea'ai. Miquea aquianaa miquea bejjohua miya ba'e meesahua jjima acaje'yo, de. Jamajjeya ¡a'a aquiana bejjo pea'ai sa majamajjji! —jamaya Jesosa cua.

¹⁶ Majoya Jesosaa jiquio esohui ebajji huohui ca cua jama ba'a: —Oe dejja quea bejjo huiso nee ba'enaje. Anoso que quea huiso nee nee cuanaje. Sejjajeyo'yo majje quea huiso nee nee cuanaje. ¹⁷ Oya jama jjashahuabaquinaje ba'a: “De, eya quea bihui nee, quea bejjo huiso nee nee cuaje. ¿Achejo shai eyaya anoso quea huiso nequijje? ¹⁸ Eyaya pojja'a cajiñajjeyo'yo anoso nequijji, equi quea quemo nee nee iyaje'yo anoso quea huiso nee nee nequijji, de. ¹⁹ Majoya anoso iyajeyo'yo majje eya quea bihui cuaje, ecuea bejjo quea huiso nee nee cuaje. Quea shequija huiso nee nee eya chacocho'yo jjima cuaje quea huiso jjejojo. Eyaya bobi quea huiso nee nee ijjiñajjeya quea bihui epojji' jamaya cuanaje ma dejja. ²⁰ Majoya aje Eyacuiñajjiya ma mecajje huohui canaje jama ba'a: “De, miya ca ca niñepoqui cuanaje. Miya jjeya nei manoje'yo. ¿Aja

acuae cuaje'yo miquea aquiana jiquio miya jaahuaña? Poquijeyo'yo miya jiquio mecajje. Chama'yo tii cuaje. Miquea aquiana, anoso, bejjo pea'ai dojo'yo jjima cuaje. Miya aema' poquijeyo'yo cuajji yasijje enijje jjapeequi jjima jjejojo” cuanaje Eyacuiñajji. Majoya aje mano'yonaje ma dejja; chama'yo tii cuanaje —jamaya Jesosa cua—. ²¹ E'e de, ma dejja jayojjaya miqianaya cuaje miya bejjojo jjashahuaba majamajaquianijo. Oe dejja jjashahuaba majamajaquiani ojaya bejjojo Eyacuiñajji-jo oya jjashahuabaqui jjima cuani —jamaya Jesosa cua.

Eyacuiñajjiya ojaya epeeji cuana jaahuana cani

(Mateo 6.25-34)

²² Majoya Jesosaa o shajja'ajjaji cuana jama huohuime aca cua ba'a: —E'e jojo nei eyaya miqianaya huohuaña: ¡A'a quea yeno jjashahuaba tiitiiquijji miqianajaya eba'ejjijo! Jama ba'a: “E'e pojja'a eya bobimajo manoje'yo; bobi yasijje cuaje'yo. Ecuea daqui pojja'a huiñaje'yo, daquima' nei nei eya cuaje'yo”. ¡A'a jamaya jjashahuaba tiitiiquijji! ²³ E'e de, cuicho'ji cuana ca ca quea jaji nee ba'e. Oya cuana ca ca chacochocho aña, bobi chicha ajja equi yasijje quijje e'ijji'yojji. Eseja Chiiya jja oya cuana jaahuana cani, de. Miqianaya ca ca oe ohuaya jaahuana neinei cani. ¡Jama jjashahuabaquimeya jja oe pocue ca quea bame eba'ejji, daquijo, bobijo! ²⁵ ¿A'a miya quea ao cuaje'yo jjashahuabaquime cuani? Chojja, jamatiiya cuaje'yo. ²⁶ Jamajjeya oe ¡a'a aquianajo jjashahuaba tiitiiquijji! —Jesosa cua—. ¿Apiojji miqianaya jjashahuaba tiitiiquiani miqianajaya daquijo? ²⁷ ¡Bacue shasha tiiani! Shasha cuana chacochocho ajja; oja daqui cuana soco ajja. Jamatii quea bame nee nee nequiani. Jamaya Eyacuiñajjiya shasha pohua mee cani. Jodioja emeshi mese yahuajo nei nequia cua Sanomo bajjani. Ohuaya daqui quea nahue nee nee huosho ca cua. Jamatii oja daqui quea bame pishana cua, shasha ca ca oe quea bame nee nee cuani. ²⁸ E'e, Eyacuiñajjiya shasha cuana pohua mee cani quea bame nee. Jjeya shasha cuana enequi; mecahuajje yaa'yani, joca'yani; dahua'jea cani cuaa pojja'a, chama'yo tii cuani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miqianaya ba'e meesahua caje'yo quea bame nee nee. Miqianaya ojaya quea boti nee nee cuani. Miqianaya jjashahuaba taiquiani jama ba'a: “E'e pojja'a eseya jaahuana jjima Eyacuiñajjiya”. Cho, ¡a'a jamaya jjashahuabaquijji! —jamaya Jesosa cua.

²⁹ —E'e, a'a jama pea'ai jjashahuabaquime pojji ba'a: “¿A'ya shai che ijjiñajjeya? ¿A'ya shai che ishije; chama ena? ¿A'ya shai che ecuaa huoshoje?” ³⁰ Ojjaña cuana Eyacuiñajjiya epeeji pojjeama cuana aquianajo jjashahuabaquiani tii tii. Eyacuiñajjiyo jjashahuabaquijji ajja. E'e jojo nei esejjaya Chii eyajo ani miqianajaya aquianajo, eba'ejjijo jjashahuabaquiani. Ojaya eba ojjaña, de. Jamajjeya ohuaya miya jaahuana cani. ³¹ ¡A'a pea cuana jayojja pojji! ¡Jashahuabaquicue oe Eyacuiñajjiyo! ¡Onijje oe jjapee tiitiiquicue! ¡Ojaya esohuijo jjashajja'ajja tiitiiquicue! Jamaya jjashahuabaquianijo ohuaya miqia-

na huasijje aquiana eba'e meeji quia caje'yo —jamaya Jesosa cua.

Jesosaa eseya ojo chacochoani quijje eyajo quea huiso sosequia caje'yo
(Mateo 6.19-21)

³² —E'e ecuea epeeji cuana, ja'a quea mete pojji Eyacuifajji nijje jjapeequi majje! Ohuaya miqianaya quea bihui po mee caje. Ohuaya miqianaya ba'e tiitii mee caje'yo eyajo. ³³ Quiacue miqianaaya aquiana aema' cuana huasijje! Miqianaaya quia jjima ajje miqianajaya aquiana sii ca chana'; nojjo ca'yo majje huiñaje'yo. ijjea Eyacuifajji chacocho neineicue! E'e jojo nei ohuaya quijje miqianaya sosequia caje'yo quea huiso nee nee eyajo. Miqianajaya esijji pojjeama, miqianajaya epo'yo tii tii. ³⁴ E'e jojo nei miqianajaya aquiana equijo jaahuanaña, jamatii jjashahuabaquiani miqianajaya equijo. Miqianajaya aquiana ca ca eyajo jaahuanaña, jamatii jjashahuabaquiani eyajo eba'e'yojji —jamaya Jesosa cua.

¡Acua epo oe anicue!

³⁵ Jesosaa jama huohuime aca cua ba'a: —Shajja'ajja-cue jiquio esohui ehuhui'yojo: Oe emeshi mese poquinaje cuiñajji yasijje. Ojo chacochoani cuaa emeshi mese ishoa'ajja canaje. Echacojji ba jjima ache shono shai ojaya emeshi mese cueje o'oya. Jamajjeya daqui bame huosho canaje, cuaquijji jjiinequinaje pea'ai. Cahui jjima cuanaje ishoa'ishoanequi jjejojo. Emeshi mese cue'yajo, ojo chacochoani cuaa dobi-qui mee ca'yonaje ojaya equi yasijje. Emeshi mese quea bihui cuanaje ohua ishoa'ajja ca'aninaje jjejojo. ³⁷ Jamajjeya ojjaña ojee anioquenaje e'ijjia'ijjiajji. Majoya aje ojee ijja'ijjia majje ojaya echacojji cuana quea bihui nee nee cuanaje. ³⁸ Jamaya oya cuana quea bame cuanaje ishoa'ajja neinei canequinajejo. Mecajje, mecashono, epojjajo pea'ai ishoa'ajja canequinaje, de. ¡Jamaya miqianaya pocue! ¡Ejo jja'ishoa'ajjaqui anicue! ³⁹ E'e, jiquio jama cuaje ba'a: Equi meseya siipojji ache shono cueje poso acani. Ojaya eba jojjemo, ohuaya ishoa'ajja ca anime equi jaahuanajjiya. ⁴⁰ Eya miqianajaya Edoe Mese, ¿ache nei eshequi nequijo eya miqiana que cueje o'oya ebajo ese? ¡Jamajjeya jja'ishoa'ajjaqui anicue! —jamaya Jesosa cua.

Ojo chacochoani quea bame nee nee cua
(Mateo 24.45-51)

⁴¹ Penohua Jesosa jama huohui'ajjame aca cua ba'a: —Esohui huohuijji, ¿a'a jiquio esohui ecuanajaye nei ebajji? Ojjañaja ebajji pojja'a ca coma.

⁴² Jesosa jama cua ba'a: —Eyaya huohuinaje jiquio esohui onaa shajja'ajja caje huiso tiija ejjashahuabaquijji. Shajja'ajjacue jama ba'a: Oe emeshi mese poquinaje pea cuiñajji yasijje. Poqui jjimahuaa ojo chacochoani huohui canaje pea ojaya echacojji bobiajji. Ojo chacochoaniya emeshi meseja sohui shajja'ajja nei canaje. ⁴³ Emeshi mese cue'yo majje quea bihui cuana-

je ojo chacochoani quea bame nee nee chacocho-najejojo. Jamajjeya emeshi meseya oya jama huohui-me acanaje ba'a: “¡Miyaya jjea ojjaña ecuea aquiana cuana jaahuacue, miyaya ecuea esohui shajja'ajja nei-neinajejojo!” Jamajjeya ojo chacochoani quea bihui cuanaje. ⁴⁵ Pea ojo chacochoani jjashahuabaqui jji-ma cuanaje. Jama jjashahuaba taiquime cuanaje ba'a: “Ecuea emeshi mese quijje nei cueje'yo, jamajjeya eya pea echacojji cuana huasijje bobi quia sa po ajja. Poquije ca iña ishi'ishiya”. Majoya oya ojaya pea echacojji cuana nijje jacua majamajaqui nequinaje, huoo majamanequi jjejojo. Oya chacocho jjima cuanaje.

⁴⁶ Majoya aje oe ojaya emeshi mese cue'yonaje. Emeshi meseya ba caña'yonaje ojo chacochoani ehoojja. Majoya aje quea quene nee nee poña'yo majje quecua caña'yonaje shajjama'jojo. Ohuaya jeajea canaje quea huesha. Jamaya Eyacuifajjiya ojjaña mimishi cuana acaje'yo, huoojeajea caje'yo cuaqui yasijje —jamaya Jesosa cua.

⁴⁷ —E'e de, echacomeejji eba emeshi meseja esohui, oya ca ca shajjama' nei nei cuanaje. Jamajjeya aje oe emeshi meseya echacomeejji cuia caña'yonaje.

⁴⁸ Pea echacomeejji ca ca ba jjima nei emeshi meseja esohui cuanaje. Jamajjeya emeshi meseya echacomeejji oe pojji cuia meeme acanaje oja ba jjimajojo. Jamaya Eyacuifajjiya esohui eba nei nei epo cjjashajja'ajjaquiahua ojaya epeeji nei nei epojji. Shajjama' jjojya ca Eyacuifajjiya cuaqui yasijje jeajea caje'yo —jamaya aca cua Jesosaa.

Beca cuana Jesosaja epeeji nei cuaje beca cuaa ca ca cajaa acaje
(Mateo 10.34-36)

⁴⁹ Jamaya Jesosa cua ba'a: —Eya cueyanaje ojjaña nijje jjapeequiya, beca cuana jjapeequiye enijje, beca cuana ca ca enijje ejjapeequijji pojjeama. Jama huoojeameya eya acanaje Eyacuifajjiya. ⁵⁰ Eya quea nee nee cuaje'yo, mano mee caje'yo cuaa. Eya manocuai'yo sa cuani ojjañaja mimishi cuana cuijea'yojji sosejje. Quea camaja eya cuaje'yo, de. Mano'yo majje ca eya camajama cuaje'yo. ⁵¹ ¡A'a jjashahuabaquijji eya cueyanaje ojjaña cuana ojjaña meshijo ojee quea bei ba'e mee'yohua! Chojja, de. Pea cuana quea mase cuaje ecuea epeeji cuana nijje. ⁵² E'e, jamaya cuaje. Oe equijo ba'e beca cuana ecuea epeeji nei, beca cuana ca ca ecuea epeeji pojjeama, Eyacuifajjiya epeeji nijje ba'e sa po ajja oya. ⁵³ Ebacua ejja esohui ba epo ejeajji nijje ba'e sa po ajja ohua quea mimishi e'aca cuani jjejojo. Enaeseya oja bacua piona tecuea cani, ecuea epeejjiyojo. Jamajjeya oja bacua piona onijje ba'e sa po ajja. Yano mese osecuajana nijje mimijajani o esohui ba epo jjojya. Jamajjeya osecuajana onijje ba'e sa po ajja. E'e, jamaya miqianajaya equijo cuaje —jamaya Jesosaa aca cua.

Ojjañaja eba ena cuaje jamatii Jesosa ba jjiima cua
(Mateo 16.1-4)

⁵⁴ Majoya Jesosa jama cua ba'a: —Mecajjeahua quea ichi nee nequijo, miqianaya jama cuani ba'a: "E'e de, quea ichi nequi, ena cuaje, de". E'e jojo nei ena cuani. ⁵⁵ E'e de, jamaya pea'ai miqianaya cuani ba'a: "E'e de, eeno jjayejequijajo quiyo dobi'yani". E'e jojo nei quiyo dobi'yani. ⁵⁶ Miqianajaya eba ena cuanijo, quiyo dobi yanijo pea'ai. Jamatii beshahua nei miqianaya ca jja ca oe jjashahuabaqui jjiima e cueyanajejo. ¡Miqianaya jja oe jjashahuabaquicue Eyacuiñajji esohuijo! Jamajjeya eya miqianaaya baje —jamaya Jesosa cua.

Pea esohui ejjashahuabaqui ja'ajji
(Mateo 5.25-26)

⁵⁷ —¿A'a miqianajaya eba quea bame eba'ejji? E'e pojja'a, jamajjeya jjashahuabaquicue jiquio esohuijo jama ba'a: ⁵⁸ Miqiana nijje oe dejja quea quene nee nee cuajo miqianajaya aquiana sosequia jjimajojo, ohuaya miqianaya dojo caje sohuinano huasijje. Jamajjeya ¡dojo jjimahuaa aquiana miqianaaya sosequia'yocue! Miqiaa mi sosequia'yajje ohuaya miqianaya dojo caje sohuinano huasijje ejeadobia meeji. Majoya miqianaya sohuinanohua jeadobia caje. ⁵⁹ E'e jojo nei ejeadobia tii jaaje. Ejeacuaya'yojji pojjeama miqiaa mi sosequiajje. Miqianaya sosequiajeyo'yajje ca mi ca oe jeacuaya caje'yo. ¡Jiquio jayojjaya oe pocue! Jamajjeya ijjea Eyacuiñajji nijje jjapeequicue miqianaya mano'yo jjimahua, cuaqui yasijje jea jjimahua pea'ai! Jamajjeya miya cuaqui yasijje ejeadobiajji pojjeama —jamaya Jesosa cua.

¡jjapeequicue Eyacuiñajji nijje!

13 Majoya pea cuana poquia cua Jesosa baa. Beca cuaa jama huohui'ajjame aca cua ba'a: —De, jje-ya nei Pinatohua, emeshi meseya Jodio dejja cuana quecua mee ca'yonaje. Ma dejja cuana Janinea meshijo ba'e poquinaje Jenosanena huasijje Eyacuiñajji bihuiaa. Eyacuiñajji equi yasijje dobiqumi majje ijjiacajji ehuone' cuana quecua canaje edahuajji. Eyacuiñajji equijo nequi sohuinano cuaa dobiqumi majje quecuajea ca'yonaje. Hua canaje quecua'yo cuanaja ena' ijjiacajji enajo, de. Quea mimishi nee nee cuanaje emeshi mese Pinato, de. ¿A'a ma Jodio dejja cuana quecua ca'yonaje quea mimishijojo? —jamaya poso aca cua.

² Jesosa jama cua ba'a: —Chojja, de. Miqianaya jjashahuaba taiquiani. Jodio dejja cuana quea mimishi cuani quecua'yo jjiima. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? ³ Jamajjeya miqianaya mano'yo majje pea'ai Eyacuiñajji nijje jjapeequi jjiima jjejojo cuaqui yasijje poquije'yo. ⁴ E'e, Sinoe cuiñajji pea dejja cuana mano'yonaje. Equi quea ao nee nee iya canaje meshi edahua ca'a. Meshi ca'a jjaajajaequi'yo majje dejja cuiamo'ijea ca'yonaje meshiya. Quea huiso nee nee, 18 dejja cuana mano'yonaje, de. ¿A'a oya cuana quea

mimishi nee neejo mano'yonaje poso aña? Chojja, de. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? Quea mimishi nee nee cuani; oya cuana eshe, de, mano'yo jjiima. ⁵ Eyaya huohuije o'oya, miqianaya Eyacuiñajji nijje jjapeequi jjiima po majje cuaqui yasijje poquije'yo, de —jamaya Jesosa cua.

Esohui acui jjajjama' cuajo

⁶ Jesosaa jiquio ehuohui'yo jama huohuime aca cua ba'a: —Oe dejja acuijjajja banajji epo poquinaje que yasijje. Acui tii majje jjajjama' cuanaje, de. ⁷ Ma dejjaa ojaya echacojji jama huohuime acanaje ba'a: "De, pea beca peejjima shequiajame ca cuanaje ma acui. Jjajja ajja cuanaje. ¡Jajajea'yocue; pea acui bana'yocue!" ⁸ Ojaya echacojji jama huohuime acanaje ba'a: "Emeshi mese, ¡ishoa'ajjacue oe eshequiajame! Eyaya jaahuana neineije so'o. Meshi tio majje ana'aia see meshi tejee huanaje so'o. ⁹ Acui eya jaahuana neineiajje quea jjajja huiso nee nee cuaje pojja'a. Jjajjama' po o'oyajo oe cajajajea'yahua" jamaya ojaya echacojji cuanaje —jamaya Jesosa cua—. E'e, ma acui jjajjama' jayojja oe dejja jjapeequi jjiima Eyacuiñajji nijje. Ma echacojji jajja meesahua cani jama jayojja eyaya aña, dejja cuana jjapeequi meesahuaña Eyacuiñajji nijje —jamaya Jesosa cua.

Jesosaa oe epona mo'aa jjapiqui meequi ca'ya cua

¹⁰ Ejomishocajji pojjaajo Jesosa poquia cua Jodioja ejja-chichaquijji equi yasijje esohui huohuiya. ¹¹ Oe epona mo'aa ania cua jomajo. Edosiquianaja jjamo'aaqui mee'yo cua yahuajo. Quea huiso nee nee, 18 eshequiajame epona ejjamo'aaqui'yo ania cua. ¹² Jesosaa oya ba majje jama huohui'ajjame aca cua ba'a: —¡Epona, cuecue! Eyaya miya jjadaasapiqui meeje'yo.

¹³ Majoya Jesosa que cueajo Jesosaa emeya napa cajje epi nei nequi'ya cua. Ma epona Eyacuiñajji bihuia ca cua. ¹⁴ Jesosaa ma epona jjadaasapi meequi ca'ya cua ejomishocajji pojjaajo. Majoya aje Jodioja ejjachichaquijji equi jaahuanajji Jesosa nijje quenequenea cua. Dejja cuana jama huohuime aca cua ba'a: —Me oeije oe cahuime echacojji yani. ¡Ma pojja cuanajo cuecue ejjaajaqui'yojji! ¡A'a ejomishocajji pojjaajo Jesosaja jjaajaqui mee'yohua cuejji!

¹⁵ Jesosaa ma esohui shajja'ajja majje jama tecueame aca cua ba'a: —Chojja, ¡a'a jamaya mimijji! Miqianaya jama cuanaje ba'a: "¡A'a chacojji ejomishocajji pojjaajo!" Miqianaya ca ca jiquio pojjaajo chacochoqui. Miquea ana'ai ejomishocajji pojjaajo ijji'a'ijji mee aña. Miyaya miquea ana'ai ejeyo nequi pichojeaña ena ishi meequijji. ¹⁶ E'e, jiquio epona mi jayojja, oe Jodio epona. Quea huiso nee nee, 18 eshequiajame Edosiquianaa jjamo'aaqui mee ca'ya cua, de. ¿Yajjajo acuaeya mi cuayajea mee'ajjaqui'yaña so'o ejomishocajji pojjaajo? ¿A'a mi o jjapiqui mee'yo ajja jjejojo jama cuani? ¿A'a miya jjashahuaba taiquiani jjejojo jama cuani? —jamaya cua Jesosa.

¹⁷ Jesús aja esohui shajja'ajja majje o ñiñebajji cuana quea bicho po'ya cua. Beca cuana ca quea bihui cua Jesús aja nijje, ma epona jhapiqui mee ca'yaajo. E'e de, Eyacuiñajjiya Jesús aja quea sohui poja po mee ca'ya cua.

Esohui acui so' che biso neijo motasa sojo

(Mateo 13.31-32; Macoso 4.30-32)

¹⁸ Majoya Jesús aja jama huohuime aca cua ba'a: —Ebionei Eyacuiñajji oe pojji dejjaja Emeshi Mese nei cuaje, quijje ca ca Eyacuiñajji ojjañaja Emeshi Mese nei cuaje, oya quea epeeji huiso cuaje. ¹⁹ E'e, oe motasa so' biso nei tii majje acui quea quemo jayojja cuani, huapeje cui quemajja. Cuichojji motasa acuijo jaani. Ma eso' biso nei jayojjaya Eyacuiñajji epeeji cuani oe pojji jayojjaya cuani ebionei. Majoya quea huiso nee nee ojaya epeeji cuaje motasa acui jayojjaya —jamaya Jesús aja cua.

Esohui ehuohui'yojji pahui shejee meejiji

(Mateo 13.33)

²⁰ Pea esohui ehuohui'yo Jesús aja jama huohuime aca cua ba'a: —Eyacuiñajji ojjañaja Emeshi Mese nei cuaje pahui shejee yani jayojjaya. Jamaya oe epona pahui dahuaaje cuanaje. Oe pojji nei eshejee meejiji iya canaje. Majoya aja ohuaya jeahuahuo canaje quea huiso pohuipohui pahui yajji. Majoya aja ojjaña shejee'yonaje pohuipohui. Majoya aja quea huiso pahui cuanaje. Jamaya Eyacuiñajji epeeji pahui shejee meejiji jayojjaya cuani. Ebionei oe pojji epeeji cuana cuani, majoya aja pea cuana jashahuabaqui mee cani Eyacuiñajji epeeji epojji. Quea huiso nee nee po mee cani —jamaya Jesús aja cua.

Esohui ehuohui'yojji esecuejjani biso neijo

(Mateo 7.13-14, 21-23)

²² Majoya aja Jenosanena huasijje poquije, Jesús aja pea cuiñajji cuana huasijje dobiqui poquia cua sohui huohuiya. ²³ Jesús aja aniñajji jjimahuajo pea cuiñajji ba'eya oya jama huohui'ajjame aca cua ba'a: —¿A'oa oe pojji Eyacuiñajji epeeji cuana poquije'yo eyahuasijje onijje ba'e'yohua?

Jesús aja majoya jama cua ba'a: ²⁴ —E'e de, yani oe esecuejjani biso nei edobiquijji eyahuasijje. Jaja japeequi sa cuani enijje ma esecuejjani biso neijje dobiqui majje poquije eyahuasijje. Beca cuana ca ca poqui aja eyahuasijje, enijje japeequi aja jjejojo. ²⁵ E'e, eya oe equi mese jayojja. Equi mese esecuejjani ca'a ca'yonaje, beca cuana edobiqui cuajeje. Majoya esecuejo tii nequijeaje. Oya cuana jama po'ajja nequinaje ba'a: “Equi mese, ¡ca'apejocue ecua edobiquijji!” Equi mese jama cuanaje ba'a: “Chojja, ecuea miquianaya ba jjiima, de”. ²⁶ Majoya oya cuana jama po'ajja nequinaje ba'a: “De, ecuanajaya miya eba, minijje ijia'ijjianaje. Miyaya esohui huohuinaje ecuanaja meshijo”. ²⁷ Majoya aja oya jama cuanaje ba'a: “Chojja, ecuea miquianaya ba jjiima. ¡Poquicue quea huesha, quea mimishi nee nee mi ca cuanaje! Miquianaya ecuea epeeji cuana pojjeamajojo, dobiqui mee jjiima añá”.

²⁸ E'e de, miquianaya ma dejja cuana esecuejo nequi tii tii jayojja cuani. Miquianaya dobiqui sajo pa neineije'yo; miquianaya quea yeno nee nee cuaje'yo. Jamaya aja nequiana esecuejo nequi cuaje ba'a: “Ecuea etii-quiana ca dobiquia cua, e'e jojo nei oya cuana Eyacuiñajji epeeji cua. Oya bajjani cua ba'a: Amajama, Isaaca, Jacobo, Eyacuiñajji esohui huohuijji nei cuana pea'ai. Jjeya Eyacuiñajji nijje nequi. Ecua capoqui'yahua eyahuasijje”. Cho, miquianaya poqui aja; quea yeno nee nee cuaje'yo. Shajja'ajja sa po aja cuanaje ecuea esohui, Eyacuiñajji esohui pea'ai. ²⁹ Ojjaña dejja joya enijje japeequi jjiima dobiqui aja tii eyahuasijje. Ojjaña meshijo ba'e Eyacuiñajji nijje japeequiani eyahuasijje poquije'yo. Jomajo onijje ijia'ijjiaje quea bihui epojji. ³⁰ E'e, jashahuabaquicue jiquio esohui jama ba'a: Beca cuana jjeya ona huoojea'yojji cuani eyajo ona huoojea'yojji pojjeama cuaje'yo. Jaja jjeya ona huoojea'yojji pojjeama ca ca eyajo ona huoojea'yojji nei nei cuaje'yo e jayojja —jamaya Jesús aja cua.

Jesosa quea yeno cua Jenosanenajo ba'eca cuanajo

(Mateo 23.37-39)

³¹ Majoya aja Paniseo dejja cuana Jesús aja quea cueya cua onijje mimiya. Majoya aja oya cuana jama cua ba'a: —¡Poquicuaquicue oe, miya emeshi meseya, Enodeya, quecua sa acani!

³² Majoya aja Jesús aja jama aca cua ba'a: —Cho, ¡mi-quianaya jja ca oe poquicuaquicue emeshi mese yasijje, Enode yasijje; oya dejja quea mese nee nee! Jjeya jiquio pojjaajo, mecahuaje pea'ai eyaya eshahua quea mese cuayaqui mee'yaña, emano cuana jaa jjaajaqui mee'yaña. Ma mecahuaje acua cuaje'yo ecuea echa-cojji; ¡jamaya Enode aquicue! ³³ E'e jjeya ca iña poquije'yo Jenosanena huasijje. Jomajo eya manoje'yo ma ecua Eyacuiñajji esohui huohuijji cuana mano ca'ya cua huasijjeja.

³⁴ Majoya Jesús aja quea yeno nee nee cua Jenosanenajo ba'e cuanajo. Oya jama cua ba'a: —Jodio cuana Jenosanenajo ba'e, miquianaya ecuea quea jea nee nee. Jamajjeja eya miquianajo quea yeno cuani. E'e, mi-quianaaya aja oe Eyacuiñajji esohui huohuijji que-cua'ya cua; ojaya huoojea'yo cuana jahuejjajaja'ya cua meya pea'ai. ¡Bacue! Oe cachina enaeseja ebacua ejaahuanajji huojje cani. Jaja jayojjaya eyaya miquianaya iyaa sa neineiaña e que ejaahuanajji. Jamatii mi-quianaya enijje japeequi sa po aja. ³⁵ Jamajjeja eya quea yeno nee nee miquianajo cuani. Mi-quianaaya Eyacuiñajji eya pea'ai cajaa anaje. Jamajjeja ohuaya jaahuana aja miquianajaya cuiñajji Jenosanena. Jamatii mi-quianaaya nei jaahuanaje; ba'ajja, quea camaja cuaje. Mi-quianaaya eya cajaa anaje, jamajjeja eba be-ca'yojji pojjeama mo nequianajaya. Mi-quianaaya eya cue o'oyajo jama aja ba'a: “Miya Eyacuiñajji huoojea'yo ojjaña jaahuanajji. Eyacuiñajji miya cajahuana cahua quea bame” jamaya miquianaya cuaje quijje —jamaya Jesús aja cua Jenosanenajo ba'e cuana nijje.

Jesosaa oe dejja eshejee tii tii nequi shacuashacua mee ca'ya cua

14 Oe ejomishocajji pojjaajo Paniseo dejja etiiya Jesosa iyaa ca cua ijia'ijjiaa. Jamajjeya Jesosa poquia cua oja equi yasijje. Pea Paniseo dejja cuana Moisesija etehue'yo huohuijji cuana pea'ai poquia cua oja equi yasijje ijia'ijjiaa. Oya cuana Jesosajo jama jashahuaba taiquime cua ba'a: —Jesosaa pojja'a oe jjaajaqui mee caje'yo ejomishocajji pojjaajo; ba'ajja.

²Jesosa pejejo oe dejja quea mano nee, eshejee tii tii nequia cua. ³Jesosaa oya cuana jama huohui'ajjame aca cua ba'a: —¿A'a ya che jjaajaqui mee'yome jiquio ejomishocajji pojjaajo? E'e pojja'a, chojja pojja'a. ¿A'ya acuae miquianaya jashahuabaquiani so'o?

⁴Oya cuana mimi jjima nequia cua Jesosa bahuejjajji nisho. Majoya aje Jesosaa ma dejja eshejee tii nequi napa ca cua emeya. Ma dejja shacuashacua mee ca'ya cua. Jesosaa oya jama huohuime aca cua ba'a: —¡Poquicue miquea equi yasijje!

⁵Majoya Jesosaa Paniseo dejja cuana jama huohuime aca cua ba'a: —Miquianaya chacochoani ejomishocajji pojjaajo. Bacue miquea ebacua, ana'ai pojja'a ejomishocajji pojjaajo jjani quea doe yasijje oquequiajo, miquianaaya jjequisohuae'yo. Jamaya miya chacochoani ¿a'a e'e? E'e jojo nei. Jama jayojjaya shacuashacua mee'yomeya eyaya anaje —jamaya Jesosa cua.

⁶Paniseo dejja cuana jashahuabaquiequi jjejojo, mimi jjima nequia cua.

E'ijia'ijjiajji equi yasijje iyaa ca cua

⁷Majoya Jesosaa Paniseo dejja cuana nijje ijia'ijjiaa cueaniya ba ca cua Paniseo dejja cuana e'anijji bame bame sa'ajja cuequi. Ba majje jama huohuime aca cua ba'a: ⁸—Oe equi meseya miquianaya pojja'a iyaa caje ijia'ijjiaa. ¡A'a e'anijji quea bame sa'ajjajji! ⁹Equi meseja epeeji nei cueje, ca'ani'yahua ma e'anijji bame bamejo o pejejo. Jamaya miquianaya nijje mimije ba'a: “¡Nequisohuacue miya; poquicue pea e'anijji yasijje! Ecuea epeeji ca jiquiojo ca'ani'yahua”. Quijjejjenei nequi e'anijji anioque'yo majje quea bicho miya cuaje ojjaña ba caje'yo jjejojo. ¹⁰E'e de, jamajjeya miquianaya iyaa cajje ijia'ijjiaa, ¡anioquecue pea cuana nijje quiijjejjenei nequi e'anijji! Majoya ma equi mese cueje mi que pojja'a, jama huohuime acaje ba'a: “¡Miya cuecue e'anijji bame yasijje e pejejo!” Majoya pea cuaa ba caje miya anijji bamejo ani. Jamajjeya miquianaya quea bihui nee cuaje. ¹¹Jamaya cuaje miquianaya. Eyacuiñajjija eba ojjaña jama cuani. Miquianaya jama jashahuaba taiquime cuani ba'a: “Eya che oe ese ejja quea bame nee nee cuani”. Cho, Eyacuiñajjija eba miya. Miquianaya jja oe jashahuaba bamebamequicue jama ba'a: “Eya ca iña pea cuana ba'e meesahua sa cuani oya cuana quea bame epojji”. Majoya aje Eyacuiñajjija miquianaya quea bame ba'e meesahua caje. Majoya miquianaya dejja quea bame nee nee cuaje —jamaya Jesosa cua.

¹²Majoya Jesosaa Paniseo dejja etii jama huohuime aca cua ba'a: —Jamatii miquea bobi quea huiso anijo, miquea huapa pojjeama, miquea epeeji nei pea'ai miyaya iyaaña ijia'ijjiaa. ¹³Jamajjeya miya ohuaya iyaa caje esosejjea. ¡A'a jama amajamajjii! ¡Iyaacue aema' cuana, jeo'ajja cuana, poquideja cuana, cojjama' cuana iyaacue bobi ijiaa pea'ai! ¹⁴Ohuaya nequiana ca ca sosequia jjima miya acaje. Majoya miyaya ma jayojja ajo Eyacuiñajjija miya quea bihui nee po mee caje. Quijje miya eyajo ba'eje'yo Eyacuiñajji nijje. Majoya aje Eyacuiñajjija miya eyajo sosequia caje'yo quea huiso nee —jamaya aca cua Jesosaa.

Esohui ehuohui'yo ojee e'ijia'ijjiajji

(Mateo 22.1-10)

¹⁵Oe dejjaa Jesosaja esohui shajja'ajja majje Jesosa jama huohuime aca cua ba'a: —Ojjaña quea bihui cuaje eyajo ojee ijia'ijjiani Eyacuiñajji nijje oja epeeji cuana nijje pea'ai.

¹⁶Jesosaa jama huohuime aca cua ba'a: —E'e jojo nei, ca joya eyahuasijje poquije'yo quea bihui nee cuaje. Jiquio esohui ehuohui'yojo ca jama jashahuabaquime pocue ba'a: Oe emeshi meseja bobi quea huiso aninaje. Iyaa canaje dejja cuana quea huiso nee nee.

¹⁷Bobi acua cuajo, huoojea canaje ojaya echacojji ona iyaaa. Iyaa canaje ojaya epeeji cuana. ¹⁸Oe epeeji jama cuanaje ba'a: “De, eya poqui sa po ajja, jjeja jjeshe-naje meshi, eya poquije ca iña meshi baa”. ¹⁹Pea epeeji jama cuanaje ba'a: “De, eya poqui sa po ajja pea'ai, eyaya jjeshe-naje me oeje huisome ana'ai acuijo she'anayijaca. Poquije ca iña ana'ai jaahuanaa”.

²⁰Pea epeeji jama cuanaje ba'a: “De, poqui sa po ajja ca iña; oya ca iña jjeja nei jahuanaquiaña”. ²¹Echacojjiya oja meshi mese yasijje cue'yo majje huohui canaje ojjaña esohui ma cue ajja cuanaje cuanaja. Majoya emeshi mese huohui cajje quea quene nee cuanaje. Huoojea ca o'oyanaje ojaya echacojji pea iyaaa. Jama cuanaje ba'a: “¡Ijjequicue jjeyahua nei pea cuana! ¡Iyaaquicue aema' cuana, jeo'ajja cuana, poquideja cuana, cojjama' cuana pea'ai ecuea equi yasijje bobi ijiaa”.

²²Majoya echacojji poquinaje pea jjequiya. Jjequi majje echacojjiya emeshi mese jama huohuime acanaje ba'a: “Emeshi mese, eyaya pea cuana jjequinaje, e'anijji cuiñajeyo jjima cuanaje. Quea dejja huiso cue jjima, de”. ²³Jamajjeya emeshi mese jama cuanaje o'oya ba'a: “¡Poqui o'oyacue quea huesha nee nee; pea cuana ba'e yasijje iyaaquicue! ¡Cue meecue pea cuana: “Ecuea e'anijji cuiñajeyo jjima” acue! Ecuea equi cuio mee sa aña dejjaa. ²⁴Ecue epeeji cuana ca ca eyaya ebionei iyaa'ajjanaje, jamatii enijje ijia'ijjia jjima cuani” jamaya cuanaje emeshi mese —jamaya aca cua Jesosaa. Jamaya Eyacuiñajjija dejja cuana quea huiso nee nee iyaa'ajja cani, jamatii oe pojji poquiani onijje ijia'ijjiaa.

Quea camaja Jesosaja epeeji epojji
(Mateo 10.37-38)

²⁵ Ojjaña Jesosa equijje aca poquia cua. Majoya Jesosa jjabajeaqui'ya cua. Ohuaya jama huohuime aca cua ba'a: ²⁶ —¡Miquianaya enijje jjapee neineiqui sa cuani, eya oe quea jea nee nee acue! ¡Miquea huapa pojjea ma oe pojji quea jea acue! Miquea enaese, mique chii cuana, mique huanase cuana, mique bacua cuana, mique doe, mique jjo'i jama, ¡quea jea nee ameya mo oe acue! ²⁷ Miquianaya enijje jjapeequiajo pea cuana miquiana nijje mimijajije. E'e, jiquio ecua acui ecueata'apee quea camaja e'abojji jama jayojja enijje jjapeequiajo quea camaja cuaje. E'e de, pea cuaa miquianaya cuia sa acaje, quecua sa acaje pojja'a enijje jjapeepajeaqui'yo ajjajojo. Miquianaya ecuea epeeji nei po tiitianiyo jamajjeya e'e jojo nei miquianaya ecuea epeeji nei nei cuani. ²⁸ ¡Ejo jashahuaba neineiquicue enijje jjapeequi jjimahua, quea camaja epo cuahuajje! Miya quea nee, quea yeno pojja'a cuaje enijje jjapeequi majje. E'e jojo nei oe dejja equi iya jjimahuajo jashahuabaquiiani ma equi e'iyajji nishojo. ²⁹ Majoya ohuaya cajaa acanaje mi iya majje. Beca cuaa niñeba canaje jama ba'a: ³⁰ “E'e de, ma dejjaa iya'ajja canaje, jashahuaba neineiqui jjima jjejojo mi iyajeyo canaje”. E'e, jamaya enijje jjapeequi jjimahuajo jashahuaba neineiquicue ejjapee tiitiquijji enijje!

³¹ —E'e de, oe emeshi meseya pea emeshi mese nijje jjaquecuaqui mee sa acanaje. Ebionei ohuaya sico canaje ojaya sohuinano cuana. Ojaya yani 10 mil sohuinano cuana, quea huiso pishana. Pea emeshi meseja ca ca sohuinano 20 mil cuanaje, quea huiso nee nee, de. Jamajjeya ma emeshi mese oe pojji pishana sohuinano jjaquecuaqui mee jjimahua jashahuaba neineiquinaje. ³² Oya jama cuanaje ba'a: “De, quea camaja, ecuea oe pojji sohuinano yani”. Jamajjeya emeshi meseya pea emeshi mese yasijje oe sohuinano huohui pohua huoojea canaje jjaquecuaqui mee sa po ajjaa jjejojo. Onijje jjapeequi sa cuanaje.

³³ E'e, jamaya miquianaya jjapeequi sa cuani enijje pojja'a. ¡jashahuaba neineiquicue ejo jjapeequi jjimahua! Quea camaja cuaje enijje jjapeequi majje —jamaya Jesosa cua.

Ehuohui'yo sanejo
(Mateo 5.13; Macoso 9.50)

³⁴ Jesosaa pea esohui jama huohuime aca cua ba'a: —Sane quea bame nee nee. Jamatii sane sese'ama cua jjemo jeajea cajji. ³⁵ ¿Achacua jeajea cajji? Quea huesha nee nee. E'e, quea huesha jea jjima ca ca meshi quea tai sane tejee cuaje, saneya acui tii mee jjima acaje. Jamaya miquianaya enijje jjapeequiani, majoya jjapeepajeaqui'yo pojja'a. Miquianaaya eya pajea'yo majje eyaya miquianaya jeajea'yo quea huesha nee nee sa ne jayojjaya. Jamajjeya jashahuaba neineiquicue enijje jjapeequi jjimahua! —jamaya Jesosaa aca cua.

Ehuohui'yo ñajjajja epoquiquehua ba'yojji
(Mateo 18.10-14)

15 Dejja cuana emeshi meseja bejjo jjesheji cuani poquia cua Jesosa que oja esohui shajja'ajjaa. Oya cuana jamatii quea mimishi nee nee cua. Pea dejja cuana quea mimishi nee nee poqui pea'aiya cua Jesosaja esohui shajja'ajjaa. ² Paniseo dejja cuana, Moisesija etehue'yo huohuiji cuana jjaniñebaqui aña cua pea cuana nijje jama Jesosajo po aña cua ba'a: —De, Jesosa jjapeequiani dejja quea mimishi nee nee cuana nijje, ijia'ijia ani ona nijje, de.

³ Ma esohui shajja'ajja majje Jesosaa esohui ejjashabaqui meeji jama aca cua ba'a: ⁴ —Oe dejja yaninaje, ojaya ñajjajja cuana quea huiso nee, 100 huisome. Oe ñajjajja poquiquehuanaje. Dejja poquinaje ñajjajja sa'ajja'yohua. Pea ñajjajja 99 huisome ojee ijia'ijiaqui jea canananaje. Sa'ajja neinei ca'yoquinaje, de. ⁵ Majoya aje ba'yo majje abo ca'yonaje. Abo majje dojo ca'yonaje o nequijji yasijje, quea jaji nee nee po'yonaje.

⁶ Ñajjajja meseya ojaya epeeji jama huohuime acanaje ba'a: “Ba'yonaje eyaya ecuea oe ñajjajja, de. Jjeya nei enequi'yo, e'e de, jjeya eseya quea bihui epo'yo”.

⁷ —E'e, ñajjajja epoquiquehua oe dejja quea mimishi nee nee jama jayojja cuani. Eyacuiñajji ma ñajjajja mese jayojja cuani. Jamatii Eyacuiñajjiya dejja mimishi cuana sa cani ojaya epeeji epojji. Ohuaya dojo sa cuani ma dejja eyahuasijje. Eyacuiñajji quea bihui cuaje oe dejja mimishiya ojaya mimishi pajea ca'yajo, Eyacuiñajji nijje jjapeequiajo. Ojjaña eyajo ba'eca cuana quea bihui cuaje'yo ma dejja mimishi Eyacuiñajji nijje jjapeequiajo —jamaya Jesosa cua.

Esohui ehuohui'yo eponaa bejjo ba ca'ya cuaje

⁸ Jesosaa pea esohui jama huohuime aca cua ba'a: —Oe eponaja bejjo ome miji pea'ai aninaje. Oe bejjo oquequehuaajeaquinaje meshi yasijje equi yiyedojojo tiya. Jamatii sa'ajja neinei ca'yoquinaje eponaa. Cuaquijjiya bejjo jeaja'a'ajja ca'yonequinaje. Majoya aje cuiashaba'ajja ca'yonaje. Majoya aje cuiashaba'yo majje ba ca'yonaje bejjo. ⁹ Majoya aje quea bihui po'yonaje bejjo ba majje ojaya epeeji cuana huohui ca'yonaje jama ba'a: “E'e ee, eseya jjeya quea bihui epo'yo. Eya-ya ba'yonaje bejjo ma oquequehuaajeaqui cuanaje” epona cuanaje. ¹⁰ E'e, ma bejjo oe dejja jayojja cuani. Oya quea mimishi nee nee jjapeequi sa cuani Eyacuiñajji nijje; ojaya mimishi pajea'yo sa cuani. Jiquio ecua epona bejjo ba majje quea bihui nee nee cuani jayojja Eyacuiñajji quea bihui cuani dejja mimishi onijje jjapeequiajo. Eyacuiñajjiya esohuidojojji cuana eyajo ba'e quea bihui nee nee cuaje oe dejja Eyacuiñajji nijje jjapeequiajo —jamaya Jesosa cua.

Esohui ehuohui'yo oja chiiya oja bacua nijje jjabeiqui'ya cuaje

¹¹ Pea esohui Jesosaa jama huohuime aca cua ba'a: —Oe emeshi meseja becanejjijji pea'ai ebacua eja ne-

quinaje. ¹² Ebacua ejja shacuima' nequi epohua oja chii jama huohui'ajjame acanaje ba'a: "Ecue chii, ¡bejjo mo quia'yocue ecuea yajji; miya mano'yo jjimahua oe mo quia'yocue!" Jamajjeya oja chii jama cuanaje ba'a: "E'e ma'aje". Ma echahua mesejame oja iya poquia quia ca'yonaje echahua mese que. ¹³ Majoya aje quijje pis-hana echahua meseya ojaya aquiana, meshi pea'ai quia canaje bejjo sosejje. Ma bejjo sosejje poquinaje pea meshi yasijje quea huesha nee nee. Jomajo quea mimishi nee nee ba'enaje, de. Ohuaya bejjo quia jeyo-yeyo ca'yonaje huoo majamajajjiya jjejojo. ¹⁴ Chama'yo tii ojaya bejjo po'yonaje, quea shoe nee nee po'yonaje pea'ai. Ma meshijo bobi chama'yo tii cuanaje ejjeshejji, de. ¹⁵ Ohuaya oe dejjaja echacojji sa'ajja canaje. Oe dejjaa oya huoojaja canaje cuichi nequi yasijje cuichi cuiñajji epojji. Majoya ohuaya cuichi cuiñajji canaje. Chama'yo tii ojaya bobi po'yonaje, de. ¹⁶ Jamajjeya aje chachija bobi ijji sa cuanaje quea shoe nee nee jjejojo, bobi peaja quia jjiima nei nei cuanaje jjejojo.

¹⁷ —Majoya aje jama jashahuaba neinei'quiyome cuanaje ba'a: "E'e de, ecue chiija echacojji jomajo yani, bobi quea huiso yani jomajo, de. ¿Yajjaje shai eya jiquiojo quea shoe nee nee po'yo ani, de? ¹⁸ Eya capo-qui'yahua ecue chiija equi yasijje. Eyaya oja jama huohuiñajji'quiyome aje ba'a: —Ecue chii, eya quea mimishi cuanaje minijje, Eyacuñajji nijje pea'ai —eyaya añajji'quiyome ecue chii. ¹⁹ Ecue chii enijje quea quene cuaje eya quea mimishi cuanajejojo. Ohuaya eya oja bacua pojjeama jayojja acaje. Jamajjeya mo eya ojaya echacojji capo'yahua. Eya quea shoe nee nee, aema' pea'ai. Quea yeno nee nee eya cuani ecue mimishijo. E'e de, jjeja nei eya poquije'yo ecue chiija equi yasijje" jamaya jashahuabaquinaje ma ebacua ejja.

²⁰ —Majoya aje poqui o'oyanaje oja chiija equi yasijje. Majoya oja chiiya oja bacua ejja ejiojjiije quea huesha cueje'yo ba canaje. Jama cuanaje ba'a: "Ecue bacua ejja pojja'a joma cueje'yo". Oya majoya quea jaji nee nee po'yonaje oja bacua ejiojjiije cueje'yo ba majje. Majoya aje oja bacua que poquinaje; emeya cuiapashi cajje-qui'yonaje; shemo tojjo cajjequi'yonaje quea jeajojo.

²¹ —Majoya aje ebacua ejjaa oja chii jama huohuime acanaje ba'a: "Miya ecue chii nei nei, eya quea mimishi nee nee cuanaje minijje, Eyacuñajji nijje pea'ai, de. Mi-yaya pojja'a eya niñebaña, jamajjeya pojja'a eya miquea echacojji capo'yahua miquea ebacua pojjeama jayojja".

²² —Oja chii jama cuanaje ba'a: "Chojja, miya ecuea ebacua ejja nei, echacojji pojjeama". Oja chiiya echacojji cuana jama huohuime acanaje ba'a: "¡Yecue ecue bacua ejjaja daqui eyacua nei nei, oe emehua pea'ai, ejiojji shejee pea'aiya oe yecue! ²³ ¡Quecuacue oe ana'ai esei esejaya ojee e'ijji! Jjeja eseya ojee ijji'ijjijaje ecue bacua ejja cue'yonajejo. ²⁴ Eya jjeja quea bihui ecue bacua ejjajo; oya emano'yo jayojja cuanaje, chama'yo tii, jjeja ca cue'yonaje ecue bacua ejja, eshe de. Oya ca ca ecuaquisho'yo cuanaje, jiquio pojja'o ca eyaya ba'yonaje ecue bacua ejja". Majoya aje bobi acua amajje ojjaña ijji'ijjianaje.

²⁵ —Edoe mese chacochocho aninaje quejo; oja ba jji-ma echahua mese cue'yonaje. Quijje oya cue'yonaje oja equi yasijje. Shajja'ajja caña'yonaje quea shajjaquijjo cuani ojjaña ijji'ijjiani ojee. ²⁶ Ohuaya oe esho'i huohui'ajja canaje: "¿A'ya acuae po ca ani so'o?" ²⁷ Jama esho'ia acanaje ba'a: "Mique chahua cue'yonaje quea aja nee nee, de. Mique chii quea bihui po'yonaje, de. Jamajjeya ojjaña ijji'ijji mee cani ojee quea bihui'yohua jjejojo".

²⁸ —Majoya aje oja doe quea quene nee nee cuanaje, pea cuana nijje ijji'ijji sa po ajja cuanaje. Majoya oja chii cuayaquinaje edoe mese jjequidobiasa nisho. Dobi-qui ajja cuanaje oja bacua ejja equenequene neinei'yo jjejojo. ²⁹ Majoya edoe mese oja chii nijje miminaje: "Eya chacochocho nei'yonaje ee nei, de. Quea shequiaja huiso nee nee. Eya mimishi'ama nei cuanaje minijje; jamatii eyaya miquea esohui shajja'ajjanaje, de. Miya-ya che ecue chivo sho'i cuia jjiima anaje ecuea epeeji nijje ojee e'ijji. Miquea quea nahue cuanaje ejo, de. ³⁰ Mique bacua ejja sho'i shajjama' cue'yajo ca jjaya ca oe che ana'ai quecu'yonaje. Oya quea mimishi nee nee cuanaje; pea epona cuana nijje jacojjojeaqui nequi'yonaje miquea bejjo sosejje, de" jama cuanaje edoe mese.

³¹ —Majoya oja chii jama cuanaje ba'a: "Miya ecue bacua ejja quea bame nee, miya eyaya jaahuana neineiaña. Ojjaña aquiana ecuea, miquea epo'yojji. ³² Mique chahua cue'yajo ecuanaya quea bihui po'yonaje. Oya ca ca emano'yo jayojja cuanaje. Oya cue'yonaje jjeja, eshe de. Oya ecuaquisho'yo jayojja cuanaje; jjeja nei ca ca eyaya oja ba'yonaje" jamaya oja chiiya oja bacua ejja etii acanaje. E'e de, mahuiso —jamaya Jesosa cua. Jamaya Eyacuñajjiya quea jea ameya acaje dejja mimishi cuaa oja mimishi pajea ca'yajo, onijje jja-peequiajo pea'ai.

Esohui ehuohui'yo echacomeejji jjadasiaquia cuajo

16 Jesusaa o shajja'ajjaji cuana jama huohuime aca cua ba'a: —Oe emeshi mese quea bejjo huiso nee aninaje. Ohuaya shajja'ajja canaje ojaya echacomeejjiya sii cani ojaya aquiana. ² Jamajjeya huohui'ajja canaje ojaya echacomeejji jama ba'a: "Pea cuaa eya huohui canaje miya siipojji cuani. ¿A'a cuae jja miya siipojji nei so'o? ¡Huohui po'ajja socue! Jamajjeya miya ecuea echacomeejji nei pojjeama. ¡Yecue ma papenijo etehue'yo jaa ebajjani cuana!

³ —Majoya aje echacomeejji jashahuabaquinaje jama ba'a: "De, chama'yo tii ca ecua echacojji cuaje'yo, ecuea emeshi meseya eya cajaa aca'yonaje, de. Eya jjeja quea aa mano echacochochojji, de. Eya ca iña eme huo sa po ajja quea bicho jjejojo. ⁴ E'e de, jjeja nei ca iña jashahuabaquinaje pea dejja cuanaja sosequia'yo jjimajo. Eyaya oe pojji sosejjesheje'yo. Majoya eya ecuea emeshi meseya huoojaja cajo pea cuaa ba'e meesahua caje, enijje quea bihui cuaje. E'e de, eyaya tehueje o'oya ojjaña echacojji cuanaja emeshi mese sosequia jjiima; oe pojji aje'yo" jamaya echacomeejji jashahuabaquinaje. ⁵ Jamajjeya ohuaya pea dejja cua-

na iyaa canaje emimijji, ache huiso onajaya sosequia'-yo jjiima ebajji. Ohuaya jama huohui'ajjame acanaje ba'a: ¿Ache sose huiso acuae miquea sosequia'yo jjiima so'o? ⁶ Oe dejjaa jama saja'ame acanaje ba'a: "Ecuea sosequia'yo jjiima mahuiso ba'a: ecuea esei 100 natame, quea huiso nee nee eyaya jshenaje, de". Majoya echacomeeji jama cuanaje ba'a: "E'e de, e'e jojo nei miquea papeni yani ecue tehue. Jjeya ca ca miquea sosequia'yo jjiima nequi 50 natame, jamaya eyaya tehueje o'oya pea papenijo oe pojji esosequia'yojji". ⁷ Majoya ohuaya pea dejja acanaje jama ba'a: "¿Ache huiso acuae miquea sosequia'yo jjiima so'o?" Oya jama cuanaje ba'a: "Quea huiso nee nee, 100 natame anoso ai, de". Echacomeeji jama cuanaje ba'a: "E'e de, jjeya ca ca papenijo tehueje o'oya 80 natame esosequia'yojji" jamaya cuanaje echacomeeji dejja cuana nijje, onijje quea bei epojji.

⁸ —E'e de, quijje pishana emeshi meseya ojaya echacomeeji ae po ani shai ba canaje. Ba majje jama cuanaje ba'a: "E'e de, ohuaya eya dasia canaje. Jamatii oya jjashahuaba neinei'yonaje. Oya quea epeeji huiso nee nee po sa cuanaje o ba'e meesahuajji epojji". Mahuisoya jiquio esohui —Jesosa cua—. ⁹ ¡Miquianaya ca ca jjashahuaba neinei'quicue quea bame epojji pea cuana nijje! Jamajjeya miya Eyacuiñajjiya ba'e meesahua caje. Majoya miquianaya mano'yajo, ohuaya dobiqui mee caje'yo eyahuasijje eba'e tiitii'yojji.

¹⁰ —Miquianaaya jjeya oe pojji aquiana jaahuana neineaña, miquianaya quea bame po majje quijje eyajo miquianaya quea huiso jaahuana neinei'yo. Miquianaya oe pojji jjadasiaquiani quijje miquianaya jjadasiaquijji nei nei cuaje. ¹¹ Miquianaya oe pojji aquiana jiquiojo jaahuana jjima aña, Eyacuiñajjiya miquianaya aquiana quia jjima acaje'yo eyajo. ¹² E'e de, miquianaya pea cuanaja aquiana jaahuana jjima añajo Eyacuiñajjiya miquianajaya aquiana quia jjima acaje'yo eyajo —jamaya Jesosa cua.

¹³ —E'e de, ¡miquianaya jja ca oe Eyacuiñajjiyo jjashahuaba majamajaquicue! ¡Oe nei neijo oe jjashahuabaquicue, aquianajo pojjeama! Jamaya oe Eyacuiñajji nijje jjapeequi sa cuanijo, ¡a'a aquianajo jjashahuabaqui majamajaji! —jamaya cua Jesosa.

¹⁴ Paniseo dejja cuana ma esohui shajja'ajja majje mimijajia cua Jesosa nijje bejjo quea huiso sa cuanijo. ¹⁵ Jamajjeya aje Jesosaa jama tecueame aca cua ba'a: —Miquianaya jjashahuaba taiquiani miquianaya oe dejjaya quea bame ba'yani poso cuani. Dejja cuaa ca ca oe miquianaya quea bame poso acani. Miquianaaya dejja cuana dasiaña. Miquianaaya ca ca oe Eyacuiñajji dasia jjima aña, ojaya miquianaya eba nei nei, de. Miquianaya jama cuani boti'ama. E'e, joya miquianaaya quea bame poso aña Eyacuiñajjiya boti'ama —jamaya Jesosa cua.

Eyacuiñajjiya esohui ma ani tiitii'yome cuaje

¹⁶ —Yahuajo nei nei Eyacuiñajjiya esohui huohuiji cuaa huohui ca cua Moisesija etehue'yojo. Jama cua ba'a: "Quijje Eyacuiñajjiya huoojea'yo ojjaña jaahuanajji

Emeshi Mese oe nei cueje". Jjeya nei ca ca Huaniya enajo ona besameeji cuanaje huohui canaje Eyacuiñajjiya pea esohui jama ba'a: "Qito ojjaña Emeshi Mese cueje jjeya nei". Jamajjeya quea huiso nee nee dejja cuana jjapeequi sa cuani Eyacuiñajji nijje. ¹⁷ Jamatii Eyacuiñajjiya esohui e'e jojo nei cuani, quea bame cuani. Quijje ojjaña meshi cuana majameta cuana chama'yo tii cuaje, de. Eyacuiñajjiya esohui ca ca ma ani tiitii'yome cuaje —jamaya Jesosa cua.

Esohui ejjahueiquijjiyo (Mateo 19.1-12; Macoso 10.1-12)

¹⁸ Jesosaa esohui jama huohuime aca cua ba'a: —Oe dejjaya ehuanase huei cuani pea ehuanayojji jamaya pea cojjojji cuani. Oe dejja oe epona ehuei huana'yo majje pea cojjojji cuani pea'ai. Epona yahue hueijji cuani pea cojjojji pea'ai cuani. Jamajjeya dejja cuaa ¡a'a ehuanase hueijji, eponaa pea'ai a'a miquea yahue hueijji! —jamaya Jesosa cua.

Ehuohui'yo oe dejja quea aquiana huiso nee neejo Nasanojo pea'ai

¹⁹ Jesosaa pea esohui jama huohuime aca cua ba'a: —Oe dejja quea bejjo huiso nee nee cuanaje. Ojaya daqui quea bame nee; quea nahue nee nee oja jsheshe huosho caninaje. Bobi quea huiso aninaje ojaya equijjo; ¡jjia'ijja majamajanaje. ²⁰ Pea dejja ca aema' cuanaje Nasano bajjani. Oya chiji nei nei po'yonaje; oya quea mano cuanaje. Jamatii Nasano dejja quea bejjo huisoja esecuejani pejejo aniñaquinequinaje. ²¹ Jamatii ojaya chiji iñahuehuaa sio canaje. Oya jama po'ajja aninaje ba'a: "¡Chemo bobi quiacue joya miquea ¡jjia shaa ani!" jamaya Nasano po'ajja aninaje. ²² Nasano Eyacuiñajjiya epeeji cuanaje, jamajjeya mano'yo majje Eyacuiñajji ani yasijje poqui'yonaje. Nasano ani'yonaje Amajama pejejo, Jodioja etiiquiana pejejo. Majoya aje ma dejja quea aquiana huiso mano'yonaje pea'ai. Ohuajea canaje cuaa. ²³ Oya Eyacuiñajjiya epeeji pojjeama, jamajjeya emano'yo ojjaña eshahuaja epeeji cuana poqui caquijje poquinaje cuaqui yasijje. Jomajo oya quea nee nee po'yoqui. Jomajo ohuaya Nasano, Amajama pea'ai ba canaje eyajo quea huesha nee nee. ²⁴ Oya jama taaame cuanaje ba'a: "Amajama ecuea etiiquiana, ¡che oe ejo jjashahuabaquicue! Eya quea quiyo nee nee po'yoqui jiquiojo, de. ¡Che jjo yana chopeshihuacue! ¡Huoojeacue Nasano ecue yana chopeshiya eya quea naba taja nee nee acue!" jamaya ma dejja quea aquiana huiso cuaquijo nequi cuanaje Amajama nijje. Nasano ca oe poqui jjima cuanaje.

²⁵ —Amajamaa eyajo jama huohuime acanaje ba'a: "De, miyaya pajea'yonaje pojja'a. Miya esheahua quea aquiana huiso ba'enaje meshijo. Jamatii Eyacuiñajji nijje jjapeequi jjima cuanaje. Nasano ca ca aema' quea mano po'yonaje pea'ai. Oya ca ca Eyacuiñajjiya epeeji cuanaje. Jamajjeya Eyacuiñajjiya oya quea jaji nee nequi mee ca'yani. Miya ca mi ca oe quea yeno nequi'yo, quea quiyo nequi'yo. ²⁶ Eyacuiñajjiya miya cue mee jjima acani ecuaana nequi yasijje ojaya epeeji pojjeama

cuanajejojo. Ecuana mi que poqui mee jjima acani pea'ai" jamaya cuanaje Amajama.

²⁷ —Ma dejjaya cuaqui dojjojo nequi jama taaame po nequinaje ba'a: "¡Che jjo oe ecue huapa pojjeama meshijo ba'e jjashahuabaqui meecue Eyacuiñajji! ¡Huoojeacue Nasano ecue chiija equi yasijje huohuiya!

²⁸ ¡Ecue chahua me oeije huiso tiya jjashahuabaqui meecue Eyacuiñajji acue! Eyacuiñajji nijje cajjapeequiahua cuaqui yasijje mi cueje'yo acue".

²⁹ —Majoya aje Amajama jama huohuime aca o'oyanaje ba'a: "Yani aje jja ca Eyacuiñajji esohui etehue'yo, Moisesiya tehue ca cua yahuajo nei nei. Pea cuaa tehue ca cua pea'ai yahuajo nei nei, de. Ma esohui oya cuaa cashajja'ajja cahua. Esohui shajja'ajja majje poqui'yo ajja cuaqui yasijje, mi jayojja epo'yojji pojjeama" jamaya cuanaje Amajama.

³⁰ —Majoya aje ma dejja cuaquijo nequi jama cua ba'a: "Chojja de, oya cuana jjashajja'ajjaqui ajja. Ma esohui etehue'yojo jjashahuabaqui ajja. ¡Huoojeacue oe emano'yojaa shequi o'oya esohui huohuiya! Majoya quea bame cuaje, de. Onaaya emano'yojaa shequi o'oyajo ba majje jjashahuaba neineiquije Eyacuiñajji esohuijo. Jjapeequije'yo Eyacuiñajji nijje, de" cuanaje ma dejja cuaquijo nequi.

³¹ —Majoya aje Amajama jama cuanaje ba'a: "Chojja de, jjashajja'ajjaqui ajja Moisesiya etehue'yojo, Eyacuiñajji esohuijo, jamaya ohuaya shajja'ajja jjima acaje emano'yojaa shequi o'oya ca Eyacuiñajji epeeji epoji. Chojja, eyaya oya emano'yojaa huoojea'yojji pojjeama esohui huohuiya" jamaya cuanaje Amajama eyajo nequi. E'e de, mahuiso —jamaya Jesosa cua.

Quea mimishi mi po o'oya chana'

(Mateo 18.6-7, 21-22; Macoso 9.42)

17 Jesosaa o shajja'ajjaji cuana jama huohuime aca cua ba'a: —Jamatii pea cuaa ecuea epeeji eyacua quea mimishi po mee o'oya sa acani. Jamaya o cuajo Eyacuiñajji quea quene nee nee cuaje onijje. Ohuaya oya jeajea caje'yo cuaqui yasijje, de. ² Jamajjeya ¡ecuea epeeji quea mimishi epo mee cuahuaje oe mano'yocue! E'e, jonaaya mei enaajo yipeca mee majje bae quea doe yasijje jjajeaquejea meequi'yocue! Jamajjeya ¡a'a quea mimishi po mee'yojji cuana!

³ —E'e de, coya mi quea mimishi po o'oya chana'. Mi quea epeeji quea mimishi po o'oyajo, ca oe jama huohuiquime acue ba'a: "Miya quea mimishi cuanaje. ¡A'a quea mimishi po o'oyajji!" Majoya oya pojja'a jama cuaje ba'a: "E'e de, eya quea mimishi cuanaje, jjeya ca ca eya quea mimishi epo'yojji pojjeama minijje". Jamajjeya ¡miquianaaya ma mimishijo a'a jjashahuaba majamajajji! ¡Jjapeequi o'oyacue onijje! ⁴ E'e pojja'a ca ca oya mimijaji majamajaje minijje, majoya oya quea yeno nee nee cuaje ojaya mimishijo. Jamajjeya ¡jamatii miquianaya oja mimishijo a'a jjashahuaba majamajajji! ¡Jjabeiqui o'oyacue onijje! —jamaya Jesosa cua.

Jesosaa o shajja'ajjaji cuana jjabahuejjaqui mee ca cua

⁵ O shajja'ajjaji cuaa Jesosa jama huohuime aca cua ba'a: —¡Ecuanaaya jjabahuejjaqui mee neineicue mijo e'e jojo nei ejjashahuabaquiji, mi jayojja eba'ejji!

⁶ Jesosa jama cua ba'a: —De, miquianajaya eya eba, eya miquea epeeji nei cuani. Eyaya miquianaya jjabahuejjaqui meenaje yahuajo. Miquianaya pojja'a ca mi ca oe jjashajja'ajjaqui pishananaje. Miquianaya ejo e'e jojo nei jjashahuabaqui pishana majje Eyacuiñajjiya miquianaya amee caje'yo ojjaña eyaya aña jayojja jama, ma dejjaa ajjima acani amee caje'yo pea'ai. E'e, miquianaaya acui jama yajjemo ba'a: ¡Acui, nequisohuacue; ena huasijje poquicue! Majoya acui nequisohua majje ena huasijje poqui'yome. Jamajjeya ¡miquianaya ejo e'e jojo nei jjashahuabaquicue! —jamaya Jesosa cua.

Oe echacojji emeshi meshija esohuijo cajjashajja'ajjaquiahua

⁷ Jesosaa pea esohui jama huohuime aca cua ba'a: —Oe echacojji chacojeyo majje cue'yonaje oja emeshi meseja equi yasijje. Jamatii hueahueanaje, oya ¡jjia'¡jjia sa cuanaje, jomishoca'yo sa cuanaje. Oya jomishoca'yo jjima cuanaje; ¡jjia'¡jjia jjima pea'ai cuanaje. Ma emeshi meseja oya jama huohuime acanaje ba'a: "¡Besaquicue, pea daqui huoshocue, ecuea bobi cuacua-cue! ¡Majoya ecuea bobi yecue! ¡Eya ¡jjiajeyoajo majoya miquea ya'yojjiya cuacua'yocue!" ⁹ ¿A'a ma emeshi meseja oja echacojji huohui caje oya quea bame cuanaje? Chojja, ma echacojjiya jamatii shajja'ajja cani emeshi meseja esohui. ¹⁰ Jamaya miquianaya Eyacuiñajji esohui shajja'ajja majje ¡a'a miquianaya quea bame cuani poso jjabaquiji! ¡A'a jamaya jjashahuabaquiji nequiana! ¡Jamatii miquianaya jjashajja'ajjaquicue oja esohuijo, ma echacojjiya jamatii shajja'ajja canequinaje, emeshi meseja esohui jayojja jama acanaje! —jamaya Jesosa cua.

Jesosaa jjajeaqui mee ca'ya cua ome miji pea'ai dejja batata epo'yo

¹¹ Majoya Jesosaa Jenosanena huasijje poquijeya Jani-nea meshi yejje ca cua. Samania meshi sahuajje ¡jjajejjequia cua. ¹² Majoya aje oe cuiñajji yasijje Jesosa dobi-qui ¡jjimahuajo, dejja batata epo'yo ome miji pea'ai mi mi sa cua Jesosa nijje. Jamatii nequinaje quea cuiñajji huesha pishana onaja jeajea batata epo'yojojo. Jamajjeya oya cuana nequia cua quea huesha. ¹³ Onaaya Jesosa jama taaame aca cua ba'a: —Jesosa, miya ecuanaja Emeshi Mese, ¡ecuanaya che batata epo'yo ¡jjajeaqui mee'yocue!

¹⁴ Jesosaa oya cuana bajea majje jama huohuime aca cua ba'a: —Eyaya miquiana ¡jjajeaqui meeje'yo, ¡poquicue Eyacuiñajji equi yasijje! Jama huohuime acue esohui huohuiji ba'a: "De, bacue, yahuajo pishana ecuana batata epo'yo cua, ¡jjeya ca ecuana quea yami bame nee nee'yo".

Majoya aje Jesusaa oya cuana jjajeaqui mee ca'ya cua. Majoya aje oya cuana poquije jJayamibamequi'ya cua, quea bihui nee nee cua. ¹⁵ Oe dejja ca ca jjas-hahuabaquia cua Jesusa bihuiajji ojaya eyami ejjajeaqui mee'yojojo. Majoya aje quea bihui po'yo majje jjanoljaquia cua; Jesusa que cue o'oya cua. Jjanobajjima nei Eyacuiñajji bihuia ca cua. ¹⁶ Ecuí'oshajjajo nequia cua Jesusa cojja nei; oya jama cua ba'a: —E'de, Jesusa, miyaya eya jjajeaqui mee'yonaje, eya quea yami bame po mee'yonaje. Miya quea sohui poja nee nee —jama-ya ma batata epo'yo cua. Oya Samania dejja cua, Samania meshijo ba'e, Jodio dejja pojjeama.

¹⁷ Majoya aje Jesusaa ona nijje nequi jama huohuime aca cua ba'a: —¿A'a cuae ome miji pea'ai jjajeaqui mee'yonaje? ¿Aecue beca cuana so'o? Oe nei ca ca oe cue'yonaje e bihuiaa, Eyacuiñajji bihuiaa pea'ai. ¹⁸ Ma dejja Jodio dejja pojjeama, Samania meshijo ba'e; behahua nei Eyacuiñajji ojaya ba jjima. Jodio dejja cuana Eyacuiñajji epeeji nisho. Oya cuana quea yami bame nee po'yo sa cuanaje Eyacuiñajji bihuiajji pojjeama.

¹⁹ Majoya Jesusaa ma dejja jama aca cua ba'a: —¿Nequisohuacue; poquicue! Miyaya eya quea yami bame epo'yojji huohui'ajjanaje. Miya ejo e'e jojo nei jjas-hahuabaquinaje ecuea ejjajeaqui mee'yojji. Jamajjeya eyaya miya jjajeaqui mee'yonaje. E'e jojo nei miya jja-peequinaje Eyacuiñajji nijje.

Achajja Jesusa Emeshi Mese nei epojji cueje

(Mateo 24.23-28, 36-41)

²⁰ Paniseo dejja cuaa Jesusa jama huohui'ajjame aca cua ba'a: —¿Ache shono Eyacuiñajjija huoojea'yo ecuea Emeshi Mese nei epojji cueje? ¿A'a ohuaya ojjaña emeshi mese cuana jeajea caje'yo?

Jesosa jama cua ba'a: —Chojja, ma jayojja pojjeama, de. Ojaya emeshi mese cuana ejeabichajeajji pojjeama. ²¹ Pea cuana pojja'a jama mimime cuaje ba'a: “Eyacuiñajjija huoojea'yo cueyanaje pea meshi yasijje”. Sijje ca cuani, Eyacuiñajjija huoojea'yo yani jjeyahua nei, jaahuana cani ojaya epeeji cuana ojjaña Eyacuiñajji nijje jjapeequiajo. Oya Emeshi Mese cuani, de.

²² Majoya Jesusa o shajja'ajjajji cuana nijje jama mimime cua ba'a: —Ecuea epeeji nei, jjeya Jodio dejja cuaa eya quecua sa acani. Majoya aje eyahuasijje eya poquije'yo. Jiquio tii eya miqiana nijje nequi ajja. Miqianaaya ca ca eya nequi mee sa aje'yo minijje. Cho, nequi ajja. Beca cuaa miqianaya jama acaje ba'a: “Cue'yonaje aje Jesusa jiquiacua”. Pea ca jama cuaje ba'a: “Jesusa yani jomajo”. ¿A'a eya sa'ajjajji onaa sijje acajje! Eya jocuama poqui jjima. E cue o'oyajo pojjeje jayojja cuaje, jeaja'ajeaje ojjaña meshi cuana. Majoya aje ojjaña meshijo ba'e cuaa eya ba neinei caje'yo. Eya meshi yasijje cueje o'oya ojjañaja Doe Mese epojji. ²⁶ Yahuajo Noe ba'ya cua. Oya dobiqii jjimahuajo bishe ai yasijje, pea dejja quea mimishi nee nee cua, jjas-hajja'ajjaqui sa po ajja Eyacuiñajjija esohuijo. Jamatii oya cuana ijja'ijja ania cua; ishi'ishi nequia cua; jjahuanaqui nequia cua. Majoya aje Noe dobiquia cua bishe ai yasijje. Ma dejja cuana ca ca jamatii jjashahua-

baqui sa po ajja Eyacuiñajjijo. Oya cuana jama jjas-hahuabaquime pojea'ajja aña cua ba'a: “Eyacuiñajjija eseya hui'i mee'yo jjima acaje”. Cho, majoya aje Eyacuiñajjija ena quea quemo huoojea ca'ya cua; hui'i mee ca'ya cua ojjaña dejja cuana, de. Ma jayojjaya e cueyajo, dejja cuana jama cuaje. Quea mimishi tii tii po nequije.

²⁸ —E'e de, jamaya yahuajo Noti ba'ya cua tii. Dejja cuana quea mimishi nee nee cua. Jamatii ijja'ijja ania cua, ishi'ishi nequia cua, jjeshejjeshe nequia cuanaya cua, quiaquia nequia cuanaya cua, banabana nequia cuanaya cua, equi iya cuanaya po nequia cua. E'e de, Eyacuiñajjijo jjashahuabaqui sa po ajja nei nei cua.

²⁹ Ma pojjaajo Noti Sonoma cuiñajjijo ba'e cuayaquiajo Eyacuiñajjija ena cuani jayojja cuajji oque mee ca cua Sonomajo. Ojjaña quiyo jeyojeyo'ya cua; chama'yo tii cuanaje.

³⁰ —Jamaya ojjaña cuana Eyacuiñajjijo jjashahuabaqui jjima anijo, eya cueje o'oya. ³¹ Jamajjeya miqianaya pojja'a quejo chachacoqui e cue o'oyanijo, ja'a miqianajaya equi yasijje poquijji aquiana jjequi'yohua! ¿A'a jjashahuabaquijji miqianajaya aquiana cuanajo! ³² ¿A'a pajea'yojji Notija ehuanase oja aquianajo jjashahuabaquia cua! Jamajjeya oya sane pojji po mee ca'ya cua Eyacuiñajjija ojaya aquianajo jjashahuabaquiqui jojoya. Chama'yo tii oya po'ya cua. ³³ Jamaya miqianajaya aquianajo jjashahuabaqui majamaja anijo miqianaya Eyacuiñajjijo jjashahuabaqui jjima cuaje, de. Jamajjeya miqianaya chama'yo tii cuaje'yo. E'e de, miqianaya ca ca jjashahuabaqui majamaja ani Eyacuiñajjijo ojaya epeeji cuaje; ba'e tiitiije'yo onijje.

³⁴ —E cue o'oyajo becanejjiji pea'ai cahuijaa, oe dojosohuaqui caje'yo, pea ca jeajea canaje'yo. ³⁵ Beca epona quecuapasha cuequi oe dojosohuaqui caje'yo, pea jeajea canaje'yo. ³⁶ Beca dejja quejo chachacoqui nequi oe dojosohuaqui caje'yo, pea ca jeajea canaje'yo Eyacuiñajjija esohuidojojjiya —jamaya Jesusa cua.

³⁷ Jesusa o shajja'ajjajji jama huohui'ajjame aca cua ba'a: —¿Achacua acuae maya cuaje so'o, Jesusa?

Jesosa jama cua ba'a: —Miqianaya eya baje joya ecua be'o e'ihui yasijje oqueani jama —jamaya Jesusa cua.

Jesosaja esohui ehuhui'yo oe epona e'ahuemanojo

18 Jesusa o shajja'ajjajji cuana huohui ca cua emimi majamajajji Eyacuiñajji nijje. Ohuaya jama huohuime aca cua ba'a: ² —Oe cuiñajjijo oe sohuinano aninaje. Oya jjapeequi sa po ajja pea dejja nijje, Eyacuiñajji nijje pea'ai. ³ Oya cuiñajjijo tiya oe e'ahuemano aninaje. Ma e'ahuemanoja aquiana peaa sii ca'yonaje. Jamajjeya oya poqui majamajanaje sohuinano huasijje. Jamajjeya ohuaya jama huohui'ajjame acanaje ba'a: “¿Che iña yohua sahuacue ma aquiana onaa sii ca'yonajejo!” Poqui majamajanaje sohuinano huasijje huohui'ajjaa. ⁴ Jamatii sohuinanohua saja'a jjima acanaje, de. E'ahuemano pajepajea'yo ajja nei nei cuanaje huohui epo tiitiinequijji jjejojo. Sohuinano jama jjas-hahuabaquime cuanaje ba'a: “E'e de, ma e'ahuemano

pajeapajea'yo ajja nei nei, cue majamajani ca coma. Ojaya esohui shajja'ajja sa po ajja nei nei ca iña. ⁵ Eya-ya aje ca oya yohua sahuajeya ma ca oe oya cue'yo jji-ma tii epojji". ⁶ Jamajojoya aje oe yohua sahua canaje —jamaya Jesosa cua.

—Sohuinano yohua sahua sa po ajja cuanaje. Jamatii ohua huohui'ajja majamaja cajje, ohuaya epona yohua sahua canaje. ⁷ E'e de, Eyacuiñajjiya sohuinano jayoija pojjeama. Jamatii oya shajja'ajja sa cuani miquianajaya emimi. Majoya ohuaya miquianaya yohua sahua bamebame caje. Miquianaya ojjaña pojjaño mimi tiitiiani-jo, ohuaya miya shajja'ajja caje'yo. ⁸ Ohuaya miya yohua sahua caje'yo. E'e jojo nei ecuea esohui. Jamatii e cue o'oyajo, ¿ae cuaje dejja cuana? ¿A'a oya cuana mimi majamaja nequije Eyacuiñajji nijje? E'e pojja'a. ¿A'a jjapeequi tiitiinequije Eyacuiñajji nijje? E'e pojja'a, ba'ajja —jamaya Jesosa cua.

Ehuohui'yo beca dejjajo oe quea bame pea bame'ama cuani

⁹ Jesosaa pea dejja cuana huohui ca cua ejjabahuejja-qui meejjijo. Ma dejja cuana jjashahuaba taiquia cua jama ba'a: —Ecuana ya ca quea bame nee cuani, beca cuana ca ca bame'ama ba'ani.

Jamajjeya ma dejja cuana Jesosaa jama huohuime aca cua ba'a: ¹⁰ —Yaninaje beca dejja. Oe dejja Moisesija etehue'yo huohuijji nisho cua, oya Paniseo dejja cuanaje. Pea dejja emeshi meseja bejjo chichajji cuanaje. Oya cuana poquinaje Eyacuiñajji equi yasijje bihuiaa, mimiya Eyacuiñajji nijje. ¹¹ Paniseo dejja dobi-qui majje nequinaquinaje ojjaña ebañji. Oya jjabajea-sohuaqui majje Eyacuiñajji nijje mimi nishonaje ojjaña-ja eshajja'ajjaji jama ba'a: "E'e de, yani eya jiquiojo, eya quea bame nee nee cuani. Eya mimishi'ama nei, siipojji pojjeama, eya pea cojjoji pojjeama, beca cuana ca quea mimishi nee cuani. ¹² E'e de, eya miquea esohui shajja'ajja majje quea bame cuani; miquea esohui jayoija ba'ani. Ecuea 10 bejjo yanijo, eyaya mi yasijje oe quiaña. Jamatii eyaya aña; quea bejjo huiso nee nee eyaya quiaña mi yasijje, Eyacuiñajji. Eya ma dejja bejjo chichajji jomajo nequi jayoija pojjeama, eya ca mimishi'ama nei, oya ca ca quea mimishi nee nee, de. E'e de, mahuiso Eyacuiñajji ecuea esohui" jama mimi nisho nequinaquinaje onaja ebañji Paniseo dejja.

¹³ —Majoya ca ma dejja bejjo chichajji cuani jjashahuabaqui majje miminaje Eyacuiñajji nijje. Oya quea yeno cuanaje ojaya mimishijo. Ohuaya Eyacuiñajji mimishi cuana cuijea mee'yo sa acanaje. Jamajjeya jama mimime cuanaje ba'a: "E'e de Eyacuiñajji, eya yani, eya quea mimishi nee nee cuanaje. Jjeya eya quea mimishi po maja sa po'yo ajja. ¡jjapeequi sa cuani minijje, jamajjeya cuijea'yocue ecuea mimishi cuana! E'e de, mahuiso ecuea esohui, Eyacuiñajji, acua" jamaya cuanaje ma dejja.

—Eyacuiñajji nijje mimijeyo majje Paniseo dejja, bejjo chichajji cuani pea'ai poquinaje. ¹⁴ Paniseo dejjaja mimishi cuana cuijea'yo jjima cuanaje quea bame nisho ba'ejajajo. Eyacuiñajjiya bejjo chichajji cuanija mimishi

cuijea ca'yonaje, o quea mimishi po maja sa po ajjajo-jo. E'e de, miquianaya Paniseo dejja jayoija po chana'. ¡Miquianaya ca oe pea dejja jayoijaya pocue! Majoya aje mi jjapee tiitiquije'yo Eyacuiñajji nijje —jamaya Jesosa cua.

Esohui Jesosaa esho'iquiana ohua quea jea nee nee aca cuajo

(Mateo 19.13-15; Macoso 10.13-16)

¹⁵ Dejja cuana esho'i cuana dojo ca cua Jesosa que. Jama huohuime aca cua ba'a: —Jesosa, ¡miyaya ecuanajaya ebacua cuana napacue emeya! ¡Miyaya Eyacuiñajji huohucue ecuanaja bacua jaahuanajji! —jamaya cua ejeajji cuana, enaese cuana pea'ai.

Jesosaa shajja'ajjaji cuana quea quene cuanaje ma dejja cuana nijje. Jama cua ba'a: —¡A'a ye majamajaji miquianaja bacua Jesosa que! —jamaya cua o shajja'ajjaji cuana.

¹⁶ Jesosaa ca ejeajji cuana enaese cuana pea'ai jama huohuime aca cua ba'a: —¡Yacua oe miquianajaya bacua cuana yecue! Eyacuiñajjiya quea jea nee nee ebacua cuana, ecuea pea'ai. Oya cuana quea bame cuani, ojaya epeeji nei cuani. Jamajjeya ¡ebacua cuana a'a poqui meeji! ¡Ebacua cuana e que cacue'yahua, de!

¹⁷ ¡Miquianaya Eyacuiñajjiyo jjashahuaba cuajiquicue jiquio ecua esho'iquiana cuani jama! Jamajje e que poquije'yo eya eyajo ojjaña huoojea'yojji cuaje —jamaya Jesosa cua.

Oe dejja quea aquiana huiso Jesosa nijje mimia cua

(Mateo 19.16-30; Macoso 10.17-31)

¹⁸ Pea pojjaño oe dejja quea aquiana huiso poquia cua Jesosa huohui'ajja. Oya jama cua ba'a: —Jesosa, miya quea bame cuani, ¿achajja acuae po cajji Eyacuiñajji nijje eba'e tiitii'yojji so'o?

¹⁹ Jesosa jama cua ba'a: —¿Yajjajo acuae moya quea bame aña so'o? Oe neiya ca jja ca oe Eyacuiñajji quea bame nee cuani. ²⁰ Miquea eba ojaya esohui. Jamajjeya miya ba'e tii tii sa cuani onijje, jama shajja'ajjame ojaya esohui acue ba'a:

¡A'a pea cojjoji pojji!

¡A'a dejja quecuajji!

¡A'a sii pojji; a'a sijje pojji!

¡Miquea chii, miquea enaese pea'ai shajja'ajjacue!

—jamaya Jesosa cua.

²¹ Ma dejja quea aquiana huiso jama cua ba'a: —E'e de, jamaya eyaya anaje esho'yahuaa, jama tii tii sohuaqui ca ca iña. Eya oe dejja quea bame nee, de.

²² Jesosaa ojaya esohui shajja'ajja majje jama huohuime aca cua ba'a: —A'yo sahua oe pea yohua'ajja jjima so'o. ¡Ojjaña miquea aquiana cuana quia jeyojeyo'yocue! ¡Aquiana quiajeyo'yo majje miquea aquiana sosejje jjeshenaje bejjo quiacue joya aema' cuana huasijje! Majoya miya Eyacuiñajji nijje jjashahuaba neineiquire, ohuaya miya ba'e tiitii mee caje'yo eyajo. Miyaya bejjo aema' cuana huasijje quiajeyo'yo majje majoya miquea aquiana cuanajo jjashahuabaqui'yo ajja cuaje, Eyacuiñajjiyo ca ca jjashahuabaquije. Majoya eyahuasij-

je poqui'yo majje aquiána quea bame nee nee cuaje miquea epojji. E'e, ¡jamaya acue majoya cue o'oyacue enijje ¡japeequiya! —jamaya Jesosa cua.

²³ Ma esohui shajja'ajja majje deija quea aquiána hui-so quea yeno po'ya cua. Oya quia sa po'yo ajja cua quea bejjo huiso ¡jejojo, quea aquiána huiso nee nee ¡jejojo. Poqui'ya cua; aquiána quia'yo ¡jima aca cua. ¡japeequi ¡jima Eyacuiñajji nijje, de. ²⁴ Jesosa quea yeno cua ma deija quea aquiána huiso poquije ba majje; ¡ama cua ba'a: —Oe deija quea bejjo huiso anijo, quea camaja ejjapeequijji Eyacuiñajji nijje. ¡amatii ¡jashahua-baquiani ojaya aquiánajo; Eyacuiñajji ca ca ¡jas-hahuabaqui ajja. ²⁵ Oya cameno, mona ai'ai ¡ama, ¡jaye¡jequi ¡jima cuaje ahuoja quii hue¡jajje ¡jayojja. ¡ama-ya deija quea aquiána huiso beshahua nei poqui ¡jima eyahuasijje cuaje —jamaya Jesosa cua.

²⁶ Pea cuaa ojaya esohui shajja'ajja majje Jesosa ¡ama huohui'ajjame aca cua ba'a: —O¡jaña cuana quea bejjo huiso sa cuani, de. ¿Ae shai che poquije'yo eyahuasijje Eyacuiñajji nijje ba'e'yohua?

²⁷ —E'e de, oe de¡jaa oya eyahuasijje epoqui meejji pojjeama. Eyacuiñajjiya ca mi ca oe poqui mee ¡aje'yo eyahuasijje onijje eba'e tiitii'yojji —jamaya Jesosa cua.

²⁸ Majoya ¡aje Peno ¡ama cua ba'a: —De, ecuaa poqui sa cuani eyahuasijje, ¡e¡eana'yonaje ecuea aquiána ¡jiqui meshijo minijje epoqui'yojji.

²⁹ Jesosa ¡ama cua ba'a: —E'e, ecuea eba. Miquianaaya ojjaña aquiána cuana ¡e¡eana'yonaje epoquijji enijje. ¡amajjeya miquianaya mano'yajo, Eyacuiñajjiya miquianaya poqui mee ¡aje'yo eyahuasijje onijje eba'e tiitii'yojji. E'e de, miquianaaya equi ¡e¡eana'yonaje, ¡amajjeya Eyacuiñajjiya miquianaya sosequia ¡aje quea huiso nee nee. Quijje miquianaya mano'yajo Eyacuiñajjiya quea huiso nee nee eyajo quia ¡aje'yo. Miquianaaya ¡e¡eana'yonaje miquianajaya huanase, eba-cua, miquianajaya o'i, miquianajaya chii pea'ai. Eyacuiñajjiya miquianaya huapa pojjeama ¡ayojja quiamé ¡aje mi ¡aahuanajji. Eyajo pea'ai miquianaya ¡ama quiamé ¡aje quea huiso nee nee. ¡amaya ¡aje ohuaya ¡oya ojaya aquiána ¡eana'yojji cuani enijje chaco-chacohua —jamaya Jesosa cua.

Jesosaa huohui ca o'oya cua o mano'yojji

(Mateo 20.17-19; Macoso 10.32-34)

³¹ Jesosaa oja 12 shajja'ajjajji nei cuana ¡jachichacui mee ca'ya cua. Ohuaya ¡ama huohuime aca cua ba'a: —E'e de, ¡jeya eseya poquije ¡enosanena huasijje. Miquianajaya eba Eyacuiñajjiya esohui ¡ahuajo nei nei pea cuaa ejo tehue ca cua. ¡oya ecua onaja tehue ¡aa ¡amaya eya ¡aje'yo cuaa. Eya mano mee ¡aje'yo ojja-ñaja Edoe Mese cuanijjo. ¡amajjeya eya ¡enosanena huasijje poqui majje manoje'yo. ³² Eya pea cuaa ¡ña majje dojo ¡aje ¡odio pojjeama huasijje. Oya cuanaja ba ¡jima Eyacuiñajji, de. Oya cuana mimijajije enijje; ejo soaje; cojja cuichojea ¡aje cuaa mo. ³³ Cuia ¡aje mo eméya cuaa, de. Majoya ¡aje mo mano mee ¡aje'yo pea'ai cuaa. Eya mano neineje'yo. Majoya pea beca

peejjima ¡ahuime po majje, eya ca ¡ña shequije o'oya, de —jamaya Jesosa cua.

³⁴ O shajja'ajjajji cuana ca ca ¡jashahuabaqui ¡jima cua Jesosaja esohuijo. Oya cuana ba ¡jima, ¡ajjajo ohua o mano'yojji huohui cani poso ¡jabaquia cua.

Jesosaa cojjama' quea cojja ¡a'a po mee ca'ya cua

(Mateo 20.29-34; Macoso 10.46-52)

³⁵ Jesosa ¡enico cuiñajji chipi nei poquia cua. Oe deija cojjama' chemo po ¡ña cua e¡iojji cojja sahuajo. ³⁶ Cojjamaa shajja'ajja ca cua deija quea huiso cueje, ¡amajjeya huohui'ajja ca cua: —¿A'ya mi so'o?

³⁷ Pea cuana ¡ama cua ba'a: —Jesosa ¡equio cueje, de.

³⁸ Majoya ¡aje ¡ama taaame cua ba'a: —Jesosa, miya Eyacuiñajjiya huoojea'yo cuani. Miya ma etiiquiána emeshi mese, Dabi ¡ayojja cuani. Eya ca ¡ña oe che cojjama', de. ¡Che ¡ña ¡jacojjaja'aquí mee'yocue!

³⁹ Ehui dojoi pea cuana poquije ¡ama cua ba'a: —De, ¡quea shajjaquijjo ¡ajjaja coma a'a taaajji!

Oya ca ca taa o'oya cua; ¡ama cua ba'a: —Jesosa, ¡che ¡ña yohua sahuacue, miya Eyacuiñajjiya huoojea'yo!

⁴⁰ Jesosa poquije tii nequiñaquia cua. Majoya ¡aje oya ¡ama cua ba'a: —¡Cojjama' e que ¡jequicue!

Yechipi ¡ajo Jesosaa cojjama' ¡ama huohui'ajjame aca cua ba'a: ⁴¹ —¿Apiojji eya miyaya taaña, cojjama'?

—Jesosa, miya ecuea Emeshi Mese nei, mi que e ¡jacojjaja'aquí mee'yojji mi taaanaje —jamaya cua cojjama'.

⁴² —E'e de, ¡jeya miya quea cojja ¡a'a po'yocue! Eya miya ¡jabapojjaquí mee'yonaje ejo e'e jojo nei ¡jas-hahuaba bamebamequinajejo —jamaya Jesosa cua.

⁴³ Majoya ¡aje quea cojja ¡a'a nee nee po'ya cua. Oya Jesosa nijje poquia cua. Oya ¡ama cua ba'a: —E'e de, Eyacuiñajji quea bame nee nee, de. Jesosaa ecuea ecojja quea ¡a'a po mee ca'yonaje, de.

Pea cuaa ma ba majjeya Eyacuiñajji bihuia ca cua.

Jesosaa Saqueo ba ca cua

19 Jesosaa ¡enico yeje canana cua; quea deija hui-so ¡jachichacui cua Jesosa bajji. ² Oe deija Saqueo bajjani cua. Ojjañaja eba Saqueo quea bejjo huiso nee nee cua. Oya bejjo chichajji cua emeshi meseja ¡ajji. Oya ca ¡jadasiaquijji cua. ³ Ohuaya ca ca Jesosa ba sa aca cua. ¡amajjeya Saqueo poquia cua Jesosa baa pea cuana ejjachichacui nequi ¡asijje. Quea chi'aa ¡je-jojya ca ca oe ojaya beshahua nei Jesosa ba ¡jima cua. ⁴ ¡amajjeya Saqueo cuajicuaji poquia cua, e¡iojji cojja sahuajo nequi acui ¡asijje sohuaquiñaquia cua. ⁵ Jesosa ¡jayeje'ajjaquia cua acui aa biaje Saqueo anijje. Majoya ¡aje ohuaya bajeasohua majje ¡ama aca cua ba'a: —Saqueo, ¡oque'yocue! ¡jeyahua nei ¡ña poquije mi-quea equi ¡asijje aniya!

⁶ Majoya ¡aje oya nequique'ya cua. Majoya ¡aje nequique'yo majje poquia cua ojaya equi ¡asijje Jesosa nijje. Oya quea bihui cua. ⁷ Pea cuaa ca ca niñeba ca cua Jesosa poquije ba majje; ¡ama mimijajime cua

ba'a: —De, Jesosa Saqueo nije poquinaje anicuaa, Saqueo quea mimishi nee nee, de.

⁸ Majoya aje dobiquia cua Jesosa Saqueoja equi yasijje. Quijje pishana ijia'ijiajeyo majje Saqueo nequisohua'ya cua. Ohuaya Jesosa jama huohuime aca cua ba'a: —E'e de, jjeyahua eyaya aema' cuana huasijje bejjo quiaje esejja. Eya siipojji nei cuanaje, de. Jjeya ca iña siipo sa po'yo ajja. Jamaya eyaya aje ba'a: Eyaya oe bejjo siinaje, eyaya quiaje'yo ebeca pee pea'ai bejjo. Eya mimishi po sa po'yo ajja. E'e jojo nei ecuea esohui jjeja. Sijje pojjeama cuani —jamaya Saqueo cua.

⁹ Jesosaa oya jama huohuime aca cua ba'a: —E'e de, miya Jodio dejja nei, jamatii miya Eyacuiñajji nije jja-peequi jjima cuanaje. Jjeya ca ca miya e'e jojo nei jja-peequi sa cuani Eyacuiñajji nije. ¹⁰ E'e, eya cueyanaje ojjaña jjapeequi meeya Eyacuiñajji nije. Eyaya mi jayojja pea cuana ba sa aña —jamaya Jesosa cua.

Esohui ehuohui'yo bejjojo

(Mateo 25.14-30)

¹¹ Jesosaja esohui shajja'ajja majje pea cuaa jama aca cua ba'a: —Jesosa, Jenosanena huasijje poqui majje miya ojjañaja Emeshi Mese cuaje, jjeya nei pojja'a. Ecuana jamajjeya mijo quea bihui nee nee cuaje'yo —jamaya poso aca cua dejja cuaa.

¹² Jamajjeya Jesosaa oe esohui ejjashahuaba quimeejjijo jama huohuime aca cua ba'a: —Oe dejja emeshi mese epo'yojji pea meshi yasijje poquinaje. Majoya oya emeshi mese epojji bajjani ca'yajje huacuaya cue'yonaje o nequinaje meshi yasijje. ¹³ Poqui jji-mahuaa ohuaya iyaa canaje ojaya ome miji pea'ai echacojji cuana bejjo equiajji. Ojjaña oe ebashosocojo bejjo quea huiso quia canaje. Jama huohuime acanaje ba'a: “E'e de, jiquio bejjo eyaya miquianaya quiaña, aquiana jjeshejji. ¡Esose quea huisojo bejjo jjahuisoqui meecue! Eya cue'yo majje quea huiso bejjo bañaje'yo. Eya majoya quea bihui cuaje” jamaya cua ma emeshi mese poqui jjimahua.

¹⁴ —Majoya aje emeshi mese poquinaje pea meshi yasijje emeshi mese epojji ohua bajjani ca'yajje. Oja meshijo nequi dejja cuanaja boti'ama cua. Jamajjeya dejja cuaa oe dejja huohui pohua ma meshi yasijje huoojja ca cua. Jama huohuime aca cua ba'a: “Ecuana jaya ma dejja emeshi mese cuajo boti'ama cuaje”.

¹⁵ —Oya ca ca bajjani ca'yajje emeshi mese cuanaje. Jamajjeya ma dejja huacuaya cue o'oya cua oja meshi yasijje. Cue o'oya majje iyaa mee ca cua ojaya echacojji cuana ehuohui'ajjaji, ache huiso bejjo chicha canaje ebajji. ¹⁶ Ebionei oe echacojji poquinaje o que. Jama cua ba'a: “Emeshi mese, miquea bejjo quea huiso nee nee chichanaje. Miyaya eya oe bashosoco bejjo quianaje, jjeya ca ca yani ome miji pea'ai bashosocome bejjo. Eyaya chaco neineinaje, de”. ¹⁷ Emeshi meseya jama acanaje ba'a: “E'e de, miya oe echacojji quea bame nee cuanaje. Jjeyahua nei miya emeshi mese jayojja aje, ¡ome miji pea'ai cuiñajji jaahuanacue, miyaya quea bame cuanajeya jjejojo!”

¹⁸ —Pea echacojji poquinaje emeshi mese que. Jama huohuime acanaje ba'a: “Emeshi mese, miyaya bejjo oe bashosoco quianaje. Jjeya ca ca eyaya iyehuiso chichanaje me oejje bashosocome bejjo. E'e de, eyaya chaco neineinaje pea'ai”. ¹⁹ Jamajjeya emeshi mese jama cuanaje ba'a: “E'e de, miya quea bame cuanaje. Miyaya emeshi mese jayojja aje, ¡me oejje cuiñajji jaahuanacue!”

²⁰ —Pea echacojji poquinaje o que. Oya jama cuanaje ba'a: “Emeshi mese, ma'aje miquea oe bashosoco bejjo. Quia jjimajje bejjo cuanaje. Eja sisijo bebo majje jaahuana neineinaje. ²¹ E'e de, miya etecueaje poso ca ca mi quianaje. Ecuea miya eba dejja quenequene cuajiji nei nei. Quea dejja taija jjejojo miquea aquiana quea huiso yani. Jamajjeya eya quea mete cuanaje miquea huiso quiajji. Jamajjeya jaahuananaje miquea bejjo nei”. ²² Majoya aje emeshi meseya oya tecuea canaje. Oya jama cuanaje ba'a: “Sijje miya, de. Miquea ejjashahuaba taiquijji jayojja jama eyaya miya aje. Miya shajjama' cuanaje; jjahuisoqui mee jjimaya ecua bejjo anaje. ²³ ¡Bacue, ecue bejjo oya huiso tii miyaya jaahuananaje! ¿Apiojji miyaya bejjo ejjeshejji jaajji equi yasijje mi iyaquinaje, ejjahuisoquiijji? Miyaya chachaco jjima cuanaje, de”.

²⁴ —Emeshi mese oya cuana jomajo nequi jama huohuime acanaje ba'a: “E'e de, ijjequisejajea'yocue ecue quia bejjo ma echacojji shajjama' cuanaje! ¡Quia'yocue ma ebionei echacojji cuanaje yasijje, ma quea huiso bejjo chichajji cuanaje yasijje!” jamaya emeshi meseya acanaje.

²⁵ —Oya cuana jama cuanaje ba'a: “Emeshi mese, miquea ebionei echacojji ca ca quea bejjo huiso cuani. Yani ojaya ome miji pea'ai huisome, de”. ²⁶ Majoya aje emeshi meseya jama acanaje ba'a: “¡Shajja'ajjacue ecuea esohui e'e jojo nei! Oe dejja chachaco ani quea bame, shajja'ajja cani ecuea esohui, eyaya quiaje quea huiso nee nee. Oe dejja ca ca chachaco ajja, shajjama' cuani, eyaya quia jjima aje. Iñaje'yo ojjaña ojaya aquiana o shajjama' jojya. ²⁷ E'e de, pea dejja cuanaja eya boti'ama. Oya cuana eya emeshi mese epojji sa po ajja ca ca oya. ¡Ma dejja cuana yecue eque! E cojja nei nequia majje ¡quecuajeacue ojjañaja ebajji!” cuanaje ma emeshi mese, de —jamaya aca cua Jesosaa.

Oya huohui ca cua ma esohui ojjañaja ebajji eseya cachacocho'ayahua Jesosaja yajjijo quea bame nee, eseya cajjashajja'ajjaqui'ayahua ojaya esohuijo pea'ai. Eseyaya quea huiso onijje cajjapeequi mee'ayahua. Majoya Jesosa cue o'oya majje ojaya epeeji quea huiso cuaje. Majoya oya jama cuaje ba'a: “Miquianaya quea bame cuanaje; jjapeequi meenaje quea huiso nee ecuea epeeji epojji. ¡Jamajjeya poquicue enijje eyahuasijje! Beca cuana ca ca jeajeaje cuacui yasijje shajjama-jojo, de”.

Jesosa nequiñaquia cua Jenosanenajo

(Mateo 21.1-11; Macoso 11.1-11; Huani 12.12-19)

²⁸ Majoya Jesosa mimijeyo majje poquia cua Jenosanaena huasijje. ²⁹ Poquijeya ba cañaquia cua beca cuiñajji Mepaje, Betania pea'ai. Ma cuiñajji cuana chipi neiyo eyiyo nequi yohua bajjani ba'a: Onimo. Majoya Jesusaa becanejijji pea'ai o shajja'ajjajji cuana huoojea ca cua. Jesusaa oya cuana jama huohuime aca cua ba'a: ³⁰ —¡Poquicue jocuama ma cuiñajjijo chipi nei! ¡Bañaqui majje bacue mapichi esho'i ai ejeyonequia nequi! ¡Ba majjeya oe pichocue! ¡Picho majje yecue! ¡Joya onaja e'anisohuaquijji ajjima nei nei oe yecue!

³¹ Onaa: “¿Apiojji acuae ecuea mapichi pichojeaña so'o?” acajje, oe jama huohuime acue ba'a: “¡Mapichi jjequicue!” Jesosa cuanaje. Oya pa mapichi sa cuani, de, acue.

³² Majoya aje oya cuana poquia cua; bacañaquia cua mapichi. Majoya aje bañaqui majje pichojea ca cua ma ecua Jesusaa huohui ca cua jama pichojeameya aca cua. ³³ Majoya aje emapichi mese cuaa ba ca cua, mapichi picho cuequi. Majoya aje ba majje emapichi meseya Jesusaja eshajja'ajjajji cuana jama huohui'ajjame aca cua ba'a: —¿Apiojji acuaeya ecua mapichi pichojeaña so'o?

³⁴ Oya cuana jama cua ba'a: —Jesusaa sa canijojo ca ca ecuaaya pichojeaña.

³⁵ Majoya aje dojo ca cua Jesosa que. Daqui iya ca cua mapichija edaasa biajje. Majoya Jesosa anisohuaquia cua mapichija edaasa biajje; poquia cua Jenosanaena huasijje. ³⁶ Jesosa poquianijo jjachichaquia cua ojjaña dejja cuana ejiojji sahuajo. Onaaya daqui ao jjequi jeapiihui ca cua ejiojji Jesosa ja'ajjequijji. Emeshi mese jama ja'ajjequimeya acaninaje cuaa ohua ba cahuaaje. ³⁷ Eyiyo Onimojo ani jaaoque majje ojjaña Jesusaja epeeji cuana quea bihui nee nee cua. Sohucuaña cua jama ba'a: ³⁸ —Eyacuiñajji, miya quea bame nee nee. Miyaya Jesosa huoojeanaje ecuea Emeshi Mese epojji jjeya nei. Ecuana quea bihui nee nee. Ojjaña meshijo ba'e cuana, eyajo ba'e cuana pea'ai quea bei cuani —jama sohucuaayameya cua cuana.

³⁹ Majoya Paniseo dejja cuaa quea dejja huiso pejeje nequiya sohucuaayaqui shajja'ajja majje quea quene nee nee cua. Jamajjeya oya cuaa Jesusa jama huohui'ajjame aca cua ba'a: —Jesusa, ¡miquea epeeji cuana huohucue: “¡A'a sohucuaayajji!” acue! —jamaya cua Paniseo dejja cuana.

⁴⁰ Majoya aje Jesusaa jama saja'ame aca cua ba'a: —Chojja de, eyaya ecuea epeeji cuana: “¡A'a sohucuaayajji!” ajo, mei sohucuaayaje, de. Ojjaña jja ca oe jjeya cabihuia cahua Eyacuiñajji —jamaya Jesosa cua.

⁴¹ Quijje pishana Jenosanena bañaqui majje Jesosa pa neineiya cua Jenosanenajo ba'e cuana ojaya esohuijo shajjamajojo. ⁴² Oya jama mimimeya cua ba'a: —Eya quea yeno nee nee jiquio cuiñajjijo ba'eca cuanajo, oya cuana quea mimishi nee nee jojoya. Oya cuana mimishi cuana pajea'yo sa po ajja nei nei, de. Jamajjeya aje jja oe quea nee nee cuaje'yo, ecuea epeeji

po sa po ajja cuanajejojo. ⁴³ Sohuanano cuana cueje o quecua'yohua. Sohuanano cuana jjanequitoquije'yo jiquio cuiñajjijo. Majoya oya cuana cuayaqui ajja nei nei cuaje. ⁴⁴ Majoya aje oya cuana quecua jeyojeyo caje'yo, chama'yo tii acaje'yo. Equi cuana dahuajea jeyojeyo caje'yo chama'yo epo'yojji. Jamaya cuaje oya cuana ecuea esohuijo shajjama' cuanajejojo, eya Eyacuiñajjija huoojea'yo ojjaña jaahuanajji cajaa acanajejojo —jamaya cua Jesosa Jenosanenajo ba'e cuana nijje.

Eyacuiñajjija equi aquiana quiajji pojjeama coma ca equi Eyacuiñajji nijje emimijji

(Mateo 21.12-17; Macoso 11.15-19; Huani 2.13-22)

⁴⁵ Majoya Jesosa dobiquia cua Eyacuiñajjija equi yasijje. Dobiqui majje Jesusaa beca cuana aquiana quia cuequi ba ca cua. Ma ba majjeya quea quene nee nee cua. Majoya aje Jesusaa ma aquiana quia cuequi jeacuayajea ca cua. ⁴⁶ Ohuaya jama tecueame aca cua ba'a: —Eyacuiñajjija etehue'yo jama cuani ba'a: “Eyacuiñajjija equi onijje emimijji”. Aquiana quiajji pojjeama, ona siajje ajji pojjeama pea'ai —jama tecuetecueameya Jesosa cua.

⁴⁷ Ojjaña pojjaajo Jesusaa esohui huohui ca nequia cua Eyacuiñajjija equijo. Jamatii Eyacuiñajji nijje mimiani etii cuaa, Moisesija etehue'yo huohuijji cuaa, emeshi meseya pea'aiya Jesosa sa'ajja ca cua equecua'yojji.

⁴⁸ Jamajjeya esohui huohuijji cuana jama jjashahuabaquimeya cua ba'a: —Quea camaja ca e'iñajji Jesosa equecua'yojji, oya quea epeeji huiso nee nee añña. Shajja'ajja neinei cani ojaya esohui cuaa, de.

¿Aya acuae Jesosa huoojea ca cua esohui huohuiya?

(Mateo 21.23-27; Macoso 11.27-33)

20 Oe pojjaajo Jesusaa esohui huohui ca cua Eyacuiñajjija equijo. Jesosa que cueya cua Eyacuiñajji nijje mimiani etii cuana, Moisesija etehue'yo huohuijji etii cuana Jodio etiiquiana pea'ai. ² Oya cuaa Jesosa jama huohui'ajjame aca cua ba'a: —¿Aya acuae mi huoojea canaje esohui huohuiya so'o? —jamaya aca cuaa cua.

³ Jesosa jama cua ba'a: —Eyaya pea'ai miqianaya huohui'ajjaje. ⁴ ¿Aya acuae Huani ma ona besameejji cuanaje huoojea canaje so'o? ¿A'a Eyacuiñajjiya pojja'a? ¿A'a dejja cuaa pojja'a? ¡Huohui'ajja socue mo! Majoya eyaya miqianaya huohuije ajea huoojea acuae eya.

⁵ Oya cuana mimipanajajia cua. Majoya aje jama aca cua ba'a: —¿Yajja saja'ame seya aje so'o? Eseyaya quea mete ojjaña dejja cuanajo, de. Eseyaya saja'ajje jama cuaje ba'a: “Eyacuiñajjiya Huani huoojea canaje”. Majoya pojja'a Jesusaa jama saja'ame acaje ba'a: “¿Yajjaajo miqiaaya cajaa Huaniya esohui anaje so'o?” ⁶ Eseyaya jama dije ba'a: “Dejja cuaa Huani huoojea canaje”. Ojjaña dejja cuaa se jaja ca'yo chana' meiya, ojjaña dejja jjashahuabaquiani Eyacuiñajjiya Huani huoojea canajejojo.

⁷ Jamajjeya jjashahuabaqui majje Jodio cuaa Jesosa jama saja'ame aca cua ba'a: —Cua'a de. Ecuana jaya ba

jjima nei. ¿Aya shai Huani huoojea canaje? —anisho ca cua quea meteya jjejojo.

⁸ Majoya Jesosa jama cua ba'a: —E'e de, jamajjeya ecuea miqianaya ehuhuijji pojjeama e huoojeajji epo —jamaya Jesosaa Jodio dejja cuana aca cua.

Pea esohui ehuhui'yo ejjashahuabaquijji jjonojjajja quejo

(Mateo 21.33-44; Macoso 12.1-11)

⁹ Jesosaa dejja cuana jama huohuime aca cua ba'a: —¡Iiquio ejjashahuabaqui'yojji shajja'ajjacue! Oe eque meseya jjonojjajja bana canaje. Ojaya que quea que-mo nee nee cuanaje; oopana jono bana canaje. Ma jono yohua bajjani cuanaje ba'a: uva. Ma jono cuana bana majje ohuaya echacojji cuana cuiña mee canaje. Ohuaya ejjajja cuiñajji cuana jama huohuime aca cua ba'a: "Jjonojjajja jahuaeyajo miqianajaya yajji esejja acue. Pea esejja ca ca ecuea cuaje". Majoya ojaya que cuiña mee majje quea huesha poquinaje quijje nei nei cue'yohua. ¹⁰ Quijje jjonojjajja jahuaajo ohuaya ma pea meshijo ba'e ojaya pea echacojji huoojea canaje jjonojjajja cuiñajji cuana huasijje. Ma echacojji jjonojjajja cuiñajji cuana huasijje poqui majje jama huohui'ajjame acañaquinaje ba'a: "Eya eque meseya miqiana que huoojea canaje jjonojjajja esejja jgehua'yohua. ¿Ache acuae pa eque meseja iya tepe mee?" Majoya ejjajja cuiñajji cuana quea dejja ta jjejojo quea quene cuanaje eque meseja huoojeajji nijje. Jama cuanaje ba'a: "Cho, quia sa po ajja iña. Chama' ca jjaja ca oja, ecuea ca jjaja ca oe". Majoya ejjajja cuiñajji cuana echacojji cuiajea canaje. Cuiajea majje huoojeajea ca'yonaje eque mese yasijje; jamatii poqui'yonaje. ¹¹ Majoya eque meseya pea echacojji huoojea ca o'oyanaje huacuayaya. Huohui'ajja cañaquí o'oyanaje jama ba'a: "¿Ache acuae eque meseja jjonojjajja so'o?" Majoya quia sa po ajjaa jjejojo cuiajea ca o'oyanaje. Poqui o'oyanaje jamatiiya, de. ¹² Eque meseya pea echacojji huoojea ca o'oyanaje huacuayaya. E'e de, ma pea poqui majje jama huohui'ajjame acañaquí o'oyanaje ba'a: "¿Ache acuae pajjaja eque meseja jjonojjajja so'o? Eyaya cadojo'yahua o que". Majoya jjonojjajja cuiñajji cuana quene-quene neineinaje onijje. Quecuajea'ajja canaje jjonojjajja cuiñajji cuana. Poqui'yonaje echacojji jamatii eque mese yasijje.

¹³ —Majoya eque mese jjashahuabaqui'yonaje oja quejo. Oya jama cuanaje ba'a: "¿Yajja acuae eyaya aje'-yo so'o? Ecue bacua ejja pojja'a cahuojeahua. E'e, oya poqui majje ma jjonojjajja cuiñajji cuana oya ba caje. O ba majje pojja'a jjashajja'ajjaquije. Ba'ajja". Majoya aje oja bacua ejja huoojea canaje jjonojjajja cuiñajji cuana huasijje. Jjonojjajja jjequi'yohua nisho huoojea'ajja canaje. ¹⁴ Majoya aje onaaya ebacua ba canaje. Jama cuanaje ba'a: "Bacue, eque meseja ebacua ejja cueyanaje, de. Cua'a ejjaquecuajeaqui oe eque mesena'yojji" jama jjashahuaba taiquimeya cuanaje cuana. ¹⁵ Jamajjeya jjonojjajja cuiñajji cuana eque meseja bacua ejja que-cua ca'yonaje. Majoya aje quea huesha nee nee jeajea canaje —jamaya Jesosa cua—. ¿Yajja acuae eque me-

seya acaje'yo jjonojjajja cuiñajji cuana? ¹⁶ Eque mese poquije jjonojjajja cuiñajji cuana quecuajea oja bacua ejja quecu'a'yo epo jojoya. Majoya aje pea dejja que cuiña meequi caje'yo —jamaya Jesosa cua.

Dejja cuana jama cua ba'a: —De, jjonojjajja cuiñajji cuana quea mimishi nee nee, de. Chama' ca jjaja ca dejja cuajjama mimishi.

¹⁷ Jesosaa cojja ba oneone ca cua ma dejja cuana. Majoya aje oya jama cua ba'a: —E'e de, yani jjaja, de. ¿A'a jjaja miqianajaya ba jjima Eyacuiñajjija etehue'yo pojja'a? Ba jjima pojja'a jjajajje, jamajjeya aje mi eyaya jama huohuime aje ba'a: Jamatii dejja cuana oe equi iyajji, equi yamajjana quea ca'a nee nee sa'ajja cani. Beca cuana jeajea cani acui ca'a quea bame pojjeama posojojo. Pea dejjaja eba nei nei acui yamajjana equi iyajji. Jama cuaje ma acui ca'ajo ba'a: "¡Iiquio aje jja oe acui quea ca'a nee nee ba'a, de. Jamajjeya aje jja oe eyaya dojoye'yo quea bame nee nee jojoya". Jamaya Eyacuiñajjija eya babaca canaje Emeshi Mese nei quea bame nee nee epojji acui quea bame jayojja. ¹⁸ E'e de, miqianaaya ca ca eya cajaa aje, ma acui cajaa onaa acanaje jayojja. Ojjaña joya eya Emeshi Mese epojji ca-jaa acajo Eyacuiñajjija jeajea caje'yo cuaqui yasijje —jamaya Jesosa cua.

¹⁹ Jesosaja esohui shajja'ajja majje Eyacuiñajji nijje mimiani etii cuana, Moisesija etehue'yo huohuijji cuana pea'ai quea quene nee nee cua. Oya cuana jjaja'aquei majje jama mimimime ojee cua ba'a: —¡De! A'a jja ca eseya jama acani, de. Oya mimiani eseya jjonojjajja cuiñajji cuana jayojja, de. Pea cuana Jesosa cajaa acanaje jayojja eseyaya cajaa aje pea'ai pa —jamaya ma Jodio dejja cuana cua.

Jamajjeya Jodio dejja cuana Jesosa iña sa aca cua ejea-nobaijji nisho. Ojaya epeejji cuana quea huisojojo, Jesosa mi iña ca cuana cua. Jama cua ba'a: —De, eseya o iñajo dejja cuana quea quene nee nee cuaje ese nijje —jamaya cua Jodio dejja cuana; Jesosa iña jjima cua.

Esohui ehuhui'yo emeshi mese yasijje bejjo quiajjijo

(Mateo 22.15-22; Macoso 12.13-17)

²⁰ Majoya Eyacuiñajjija esohui huohuijji cuana pea dejja cuana Jesosa iñajji nisho bejjo quia ca cua. Ma dejja cuana poquia cua Jesosa baa; dejja quea bame nisho cua. Huohui'ajja ca cua Jesosa ojaya yajja saja'ame ya'-yojji nisho. Jamajjeya Moisesija etehue'yo jayojja jama mi saja'a cajo dojo ca quiaye sohuinano huasijje jeano-biaa. ²¹ Ma dejja quea bame nisho cuana Jesosa jama huohui'ajjame aca cua ba'a: —Jesosa, ecuanaja eba miyaya e'e jojo nei huohuiaña Eyacuiñajjija esohui nei. Miyaya baña dejja cuana oya jayojjaya cuani. ²² ¡Jamajjeya mo oe che huohucue! ¿A'a jamajjeya Eyacuiñajjija epeejji cuana bejjo quia cajji emeshi meseja yajji? Quia ca ajja pojja'a.

²³ Jesosaja eba cuanaje Jodio cuanaja ejjashahuabaquijji. Jamajjeya ohuaya jama huohui'ajjame aca cua ba'a: —¿Apiojji acuae nequiaa iña dasia sa aña so'o? Miquianaya ca ca ecuea epeejji nisho cuani, de. ²⁴ ¡Jje-

quicue bejjo esodojjo ebajji, emeshi meseja epana'yojji!

Majoya oya cuaa oe bejjo jjequi ca cua. Jjequi cajo, Jesosaa jama huohui'ajjame aca cua ba'a: —¿Bejjo ae ecajja'yo ani? ¿Ae bajjani tehueme'ya bejjo? —jamaya Jesosa cua.

—Emeshi mese oja cajja'yo, Sesa bajjani.

²⁵ Majoya aje Jesosa jama cua ba'a: —Jamajjeya ¡Sesaja bejjo quiaquicue ohua sa cajo! ¡Eyacuiñajji a'a pa-jea'yojji; oya bihuiaque; shajja'ajjacue pea'ai!

²⁶ Ma epeeji nisho cuana quea mete nee nee cua Jesosaja ojaya ejjashahuabaquijji ebajojo. Jamajjeya jama cuana cua ba'a: —Quea jjashahuabaqui ja'a nee oya, Jesosa. Jjadasia meequi ajja, de —jamaya cua ma epeeji nisho cuana. Jamajjeya mimi o'oya sa po ajja Jesosa nijje. Jamajjeya Jesosa iña jjima cuanaja cua.

Mano'yo majje eshequi o'oyajji

(Mateo 22.23-33; Macoso 12.18-27)

²⁷ Ma pojajajo tii Sanoseo dejja cuana poquia cua Jesosa huohui'ajjaa. Sanoseo dejja cuana jamatii jjashahuabaquia cua pea cuana mano'yo majje eshequi o'oyajji pojjeama.

Jesosaja ca ca jama sohui huohuime ajjima cua. Jamajjeya Sanoseo dejja cuaa oya edasajji nisho aca cua. Majoya aje jama huohui'ajjame aca cuaa cua ba'a: ²⁸ —Esohui huohuijji, Moisesiya jama tehueme aca cua yahuajo nei nei ba'a:

“Oe dejja jjahuanaquinaje. Majoya aje mano'ya cua bacuamahua. Ojaya ehuanase quijjojea ca cua. Ahuema' ani'ya cua jjamejoqui jjimahua quijjojea. Majoya aje ahuemano'yajo oja chahuaa cahuana ca'yahua, oja doeja bacua jea jayojja nei epojji”.

²⁹ Jamajjeya jama cuaje pojja'a ba'a: Oe dejja quea doe huijo cua, me oeje pea becanejjijji pea'ai nequia cua. Ma dejjaa epona huana ca cua. Majoya mano'ya cua; bacuamahua quijjojea ca cua. ³⁰ Ma dejjaja quijjojea ani echahua meseya huana ca o'oyanaje. Bacua jea jjimahua quijjojea ca o'oyanaje. ³¹ Majoya pea echahua meseya huana ca o'oyanaje. Majoya pea echahua meseya huana'ajja ca poquiapoquia cua. ³² Majoya aje oya epona mano'yonaje yahueja quijjojea ani tiya. Jjamejoqui ajja cuanaje, bacuama' nei nei tii pona cuanaje, de. ³³ Jamajjeya miquea esohui jama cuani eyajo shequi o'oya majje ¿ajea ehuanase jiquio cuaje eyajo; ache oja doeja? O huanacoojji epoja pojja'a, pea echahua meseja pojja'a; oja chahua cuana ahua'ajja'yo epo —jamaya cua Sanoseo dejja cuana.

³⁴ Jesosaa jama aca cua ba'a: —De, miquianajaya ba jjima. Jiquio meshijo dejja cuana jjahuanaquiani; epona cuana jjahuiaquiani. ³⁵ Jamajjeya jiquio meshijo Eyacuiñajji epeeji mano'yo majje eyahuasijje poquije'yo. Ejjahuanaqui'yojji pojjeama cuaje'yo eyajo; epona cuana pea'ai ejjahuaqui'yojji pojjeama cuaje'yo eyajo. Jjamejoqui ajja pea'ai cuaje'yo eyajo. ³⁶ Mano'yo ajja cuaje jomajo; esohuidojojji jayojja jama cuaje'yo. Eyajo ojjaña Eyacuiñajji ebacua cuaje'yo, eshequi'yo jjejojo.

³⁷ ¿A'a miquea ba jjima dejja cuana ojjaña mano'yo

majje shequije o'oya? Jamajjeya Eyacuiñajji yahuajo nei esohui tehue mee ca cua miquiana jjabahuejjaquijji. Moisesiya tehue ca cua yahuajo nei nei ma acui jiji-qui ba majje. Eyacuiñajji mimia cua onijje jama ba'a:

“Eyaya miquea etiiquiana cuana jaahuanaña, Amajama, Isaaca, Jacobo pea'ai ecuea epeejiyojo. Oya cuana enijje enequi tii tii”.

³⁸ Eyacuiñajji emano'yo cuana meshijo e'ohuajeejaa jaahuanaajji pojjeama cuani. Eshe nequi cuana, emano'yo shequi'yo cuana pea'ai eyajo ohuaya jaahuana cani ojaya epeejiyojo —jamaya aca cua Jesosaa.

³⁹ Pea Moisesija etehue'yo huohuijji cuaa jama huohuime aca cua ba'a: —E'e de, quea ja'a nee nee miquea esohui, Jesosa. Quea bame nee nee, de.

⁴⁰ Majoya huohui'ajja beca'yo jjima tii aca cuaa cua quea meteya jjejojo, jjadasia meequi ajjajojo.

¿Aya Jesosa huoojea ca cua dejja jaahuanaajji pojji?

(Mateo 22.41-46; Macoso 12.35-37)

⁴¹ Jesosaa oya cuana jama aca cua ba'a: —Miquiana-ya jama jjashahuaba taiquime cuani ba'a: “Jesosa Dabija osecua poso nequiaa ña. Jamajjeya oya Eyacuiñajji Bacua pojjeama poso nequiaa ña” jamaya jjashahuaba taiquimeya nequiana cuani. Dabi emeshi mese yahuajo nei nei ba'ya cua. Eya ojaya eba nei nei, de. Ojaya eya eba dejjaja bacua ejja pojjeama, Eyacuiñajji-ja Bacua Ejja. ⁴² Jamajjeya ohuaya esohuicuayajji tehue ca cua Salmojo; jama cua ba'a:

“Eyacuiñajji ecuea Emeshi Mese Quito jama huohuime acanaje ba'a: —¡Enijje anioquecue ebañei mihijje ojjaña Emeshi Mese epojji!

⁴³ Eyaya mi quecua'yojji epo jeabichajea jeyojeyo'yo. Majoya aje miyaya oya cuana jeajeaje'yo cuaqui yasijje cajaanajo —jamaya aca cua Eyacuiñajjiya”.

Jamaya Dabiya ejo tehue ca cua yahuajo nei nei. ⁴⁴ Jamajjeya Dabiya Quito oja Emeshi Mesejo bajjani ca cua. Jamajjeya Quito Dabiya osecua cua, ojaya Emeshi Mese nei. Eya jja iña iquio Quito, de, dejjaja bacua pojjeama; Eyacuiñajji Bacua Ejja, jamajjeya eya ojjaña Emeshi Mese nei —jamaya Jesosa cua.

Jesosaa Moisesija etehue'yo huohuijji cuana tecueajea ca cua

(Mateo 23.1-36; Macoso 12.38-40; Noca 11.37-54)

⁴⁵ Ojjaña Jesosaja esohui shajja'ajja canijo, Jesosaa o shajja'ajjajji cuana jama aca cua ba'a: —Coya mi oe Moisesija etehue'yo huohuijji jayojja po chana'. Oya cuana po'ayequeequi daqui aojji ojjaña quea bame ebajji nishoya. Oya cuana quea bihui cuani shajja'ajja majje ojjaña esohui jama cuani ba'a: “Ma esohui huohuijji quea bame cuani, oja daqui quea bame, oja esohui quea ja'a nee” jamaya shajja'ajja saya cuani ma esohui huohuijji cuana. ¡E'e jojo nei pojjeama! Jodioja equi ejjachichajji yasijje dobiqum majje ebionei anioque sa cuani Eyacuiñajji esohui huohuijji pejejo. E'ijjia-ij-jiyojji pea'ai anioque sa cuani equi mese pejejo. Beca cuaa quea bame poso acani. ⁴⁷ E'ahuemanoja aquiana sii cani o chaco sahuajji nisho po majje. Majoya oya

cuana mimi nisho ani Eyacuiñajji nijje. Oya quea mimi nisho nee nee. Eyacuiñajjiya oya cuana jeajea caje'yo cuaqui yasijje, onijje mimi nishojjijojo —jamaya cuana Jesosaa aca cua.

E'ahuemano aemaa bejjo quia ca cua Eyacuiñajjiya equijo
(Macoso 12.41-44)

21 Eyacuiñajjiya equijo, Jesosaa dejja cuana quea aquiana huiso nequi ba ca cua. Ma dejja cuaa bejjo iya ca cua ejjeshejji iyajji yasijje. ² Majoya e'ahuemano aema' nei neiya bejjo iya ca cua. Becanejijji pea'ai bejjo ojaya cua, oe pojji nei nei cua, de. Chama'yo cua ojaya bejjo ohua iya cajje bejjo iyajji yasijje. ³ Majoya Jesosa jama cua ba'a: —E'e, jiquio e'ahuemano quea bame cuanaje. Ohuaya ojjaña tii bejjo iya ca'yonaje. Jamajjeya Eyacuiñajji quea bihui cuanaje onijje. ⁴ Quea aquiana huiso nee nee cuaa ca ca oja quiabishi iya canaje. Quea bame pojjeama ca ca oya cuana. Ma e'ahuemanohua iya canaje ojaya bejjo bobi jjeshejji nisho, de. Chama'yo ojaya bejjo po'yonaje. Jamajjeya quea aquiana huiso nee nee cuana quea bame pojjeama cuanaje —jamaya Jesosa cua.

Pea cuaa Eyacuiñajjiya equi cajjajeajea mee caje'yo
(Mateo 24.1-2; Macoso 13.1-2)

⁵ Beca cuana mimia cua Eyacuiñajjiya equijo jama ba'a: —iDe, bacue mei quea bame, aquiana quea bame ani Eyacuiñajjiya equijo! Aquiana quea bame sosema' quia Eyacuiñajjiya equi quea bame epojji.

Majoya aje Jesosaa jama aca cua ba'a: ⁶ —E'e de, quijje pishana jiquio equi, aquiana pea'ai chama'yo tii acaje'yo, de. Ma mei bame cuana pea biajje e'iya sohua'yojji pojjeama. Pea cuaa ma equi cajjajeajea caje'yo —jamaya cua Jesosa Eyacuiñajjiya equijo.

Dejja cuana quea mase nee cuaje quijje
(Mateo 24.3-28; Macoso 13.3-23)

⁷ Majoya o shajja'ajjajji cuaa jama huohui'ajjame aca cua ba'a: —Jesosaa ecuea esohui huohuijji, ¿ache shono acuae shai pea cuaa Eyacuiñajjiya equi mei cuana cajjajeajea mee caje'yo? ¿Yajja acuae acaje so'o?

⁸ Jesosa jama cua ba'a: —Ma Eyacuiñajjiya equi quea bame cajjajeajea'yo jjimahuajo, jamaya cuaje ba'a: Quea huiso nee nee cueje e bajjani nisho po majje. Jama mimi nishome cuaje ba'a: “Eya Jesosa Quito bajjani, de”. Pea jama cuaje ba'a: “Eya jjeyahua nei cue o'oyanaje, eya Quito, Eyacuiñajjiya huoojea'yo”. ¡A'a ojaya esohui shajja'ajjajji! Siajje ca cuaje. ⁹ Miquiaaya shajja'ajjaje pea meshijo ba'e cuana jjaquecuaqueiquei pea meshijo ba'e cuana nijje. ¡A'a miqianaya quea mete pojji! Jamatii acua pojjeama oe po ajja jjima cuaje so'o —Jesosaa cua—. ¹⁰ Dejja cuana jjaquecuaqueije'yo ojjaña meshijo ba'e cuana, cuiñajjiyo ba'e cuana pea'ai.

¹¹ Quea huiso emano meejiya mano mee caje'yo. Ojjaña quea mete nee nee cuaje, de. Bobima' cuaje, mano'yo quea dejja huiso cuana bobimajo. Meshi huehuahuehuaje ojjaña meshi yasijje pea'ai, de. Ojja-

ña quea mete nee nee cuaje'yo eyatahuatahua huehuahuehuajo meshi huehuahuehuajo pea'ai, de —jamaya Jesosa cua.

¹² —Jiquio jama po jjimahuajo beca cuaa miqianaya quea nee po mee caje'yo ecuea epeeji cuanijojo. Oya cuanaja boti'ama nee nee cuaje, de. Miquianaya iña majje dojo caje jeanobiajeaa Jodioja equi ejjachichiquijji cuana huasijje. Dojo caje miqianaya emeshi mese nequi cojja nei yasijje. Majoya ohuaya jama huohui'ajjame acaje ba'a: “¿A'a miqianaya Jesosaa epeeji nei?” E'e jojo neiyojo, miqianaya jeanobiajea caje. ¹³ Jama po majjeya ¡a'a quea mete pojji! Miquianaya ejo huohuije ma emeshi mese yasijje. Jamajjeya quea huiso emeshi mese cuaa shajja'ajja caje ecuea esohui Eyacuiñajjiya esohui pea'ai —jamaya Jesosa cua—. ¹⁴ E'e, ¡a'a quea mete pojji ache esohui miquianaaya huohuije'yo! ¹⁵ Eyaya nei miqianaya quea ja'a nee po meeje. Eyaya esohui huohui sahuaje ehuohuijji ejo. Ma pojajjo pea cuanaja miya esaja'ajji pojjeama miqianajaya esohui quea ja'ajojo. Miquianajaya esohui e'e jojo nei cuaje, de. ¹⁶ Miquianajaya huapa pojjeama cuaa, miqianajaya epeeji cuaa pea'aiya dojo caje ejjajeantobijaequijji equi yasijje miqianaya ecuea epeejiyojo. Ohuaya miqianaya quecua mee caje'yo, de. ¹⁷ Ojjaña miqianaya cajaa acaje'yo ecuea epeeji cuanijojo. ¹⁸ Onaa cajaa acaje a'a jjashahuaba taiquijji jama ba'a: “Eyacuiñajjiya ecuana pajea ca'yonaje, de”. Cho, Eyacuiñajjiya miqianaya pajea'yo jjima acaje'yo. Ohuaya ca ca miqianaya jaahuana caje'yo ojaya epeeji cuanijojo. ¹⁹ Ojjaña jiquio jayojja cuajo, ¡a'a miqianaaya eya pajea'yojji! Miquianaya jjapeequipajea'yo ajjajo Eyacuiñajjiya miqianaya ba'e tiitii mee caje'yo eyajo.

²⁰ —Miquianaaya sohuinano cuana Jenosanenajo ejjanequitoqui'yo nequi ba majje miqianajaya eba ma cuiñajjiyo ani cajjajeajea cuajicuajji caje'yo. ²¹ Ojjaña Jodea meshijo ba'e cuana capoqui'yahua eyiyo huasijje. Ojjaña Jenosanenajo ba'e cuana cacuayaqui'yahua. Quea huesha ba'e cuana, ¡a'a cue'yoquijji Jenosanena huasijje! Capoqui'yahua quea huesha nee, ma sohuinano cuaa equecua ca cuaje jjejojo. ²² E'e de, jamaya quea nee nee cuaje, Eyacuiñajjiya esohui yahuajo tehue ca cua jama jayojjaya cuaje. ²³ Epona cuana o'ejji, bacua sho'ijji pea'ai quea yeno nee nee cuaje; quea camaja epoquicuajji cuaje, de. Eyacuiñajjiya quea nee nee nee po mee caje Jenosanenajo ba'e cuana.

²⁴ Sohuinanohua beca Jodio dejja cuana yacua caje'yo. Beca cuana ca ca iña majje jeyo caje. Jeyo majje dojo caje pea meshi quea huesha nee yasijje. Quea yeno nee nee cuaje, de. Sohuinano cuaa, Jodio dejja pojjeama cuaa Jenosanenajo equi ani cajjajeajea'yo majje pea equi iya caje'yo eba'e'yojji. Majotiiya oya cuana ba'e'yo jiquio ecua Eyacuiñajjiya ba'e mee caje'yo. Ma shonoya aje oya cuana poquije'yo —jamaya Jesosa cua.

¿Achajja acuae cuaje Jesosa cue o'oyajo?

(Mateo 24.29-35, 42-44; Macoso 13.24-37)

²⁵ Majoya aje Jesosaa jama aca cua cuana ba'a: —E cue o'oya jjimahuajo ojña quea mete cuaje eshequi, ba'i pea'ai quea apo cuajo. Jiji'yo ajja cuaje, de. Maja-meta cuana jjacajjaqui'yo majje jijijioqueje. Ba majje deja cuana quea mete nee nee cuaje; piopio caje'yo, de. Ena cuana quea shajjaqui'yo cuaje enashajo quea quemoo nee neejojo. ²⁶ Mete caje'yo majameta huehuahuehuajo. Deja cuana shacamano caje'yo mete'yo majje. Oya cuaa jama huohui'ajjame acaje ba'a: “¿Yajja shai cuani so'o?” ²⁷ Ojña cuaa eya ba caje. Eya ojña Edoe Mese cuani cueje'yo bo biajje. Quea ca'a nee nee; quea sohui poja nee nee cuaje, de. E'e, quea bame cuaje ma pojajoya. ²⁸ ¡Miquianaaya jiquio ba majje nequisohuacue! ¡Jabajeasohuacue! Eya cueje o'oya miquiana dojohua eyahuasijje eba'e'yojji tii tii. Jamajjeya ¡quea bihui pocue! —jamaya Jesosa cua.

²⁹ Jesosaa pea esohui jama huohuime aca cua cuana ba'a: —E'e de, ¡bacue ma acui, iquena bajjani! ¡Ojña acui cuana bacue! ³⁰ Eseyaya meshijo acui iña yani ba majje eseya jama cuani ba'a: “E'e jojo nei nayaja po'yonaje”. ³¹ ¡Jiquio ecua acui iña yani ba majje acuijjajajo jjashahuabaqui'yo jayoja jama eyatahuatahua huehuahuehuani ba majje bacue eya cueje o'oya!

³² E'e jojo nei ojña ma pojja cuanajo ba'e cuana mano jeyojeyo'yo jjimahuajo ojña acua cuaje'yo eya ojña Emeshi Mese oe nequije'yo. ³³ Eyatahuatahua, meshi pea'ai chama'yo cuaje'yo. Ecuea esohui ca ca ma ani tiitiime cuaje'yo.

³⁴ —¡Ishoa'ajja anicue iña oe nequia! ¡A'a jjashahua ba majamajaqui'yo miquianajaya eba'e'jji! ¡Miquianaaya oe che jjashahuabaquicue e ecue o'oyajji!

³⁵ Ibia ijjiameeji eshe'a'ani jjacamicuajiqui'yo jayoja jama cuacuajimeya eya cuaje. E'e, ojña eya ba jjima cuacuajije. ³⁶ Jamajjeya oe ¡shajja'ajjacue ecuea esohui! ¡A'a pajea'yojji, quea camaja cuaje, de! Ojña cuana quea mete nee nee, quea nee nee pea'ai cuaje, de. Jamajjeya ¡jja'ishoa'ajja aniqui tiitiicue! ¡Miquianaaya ecuea epeeji po tiitiicue! ¡Eyacuiñajji niije mimiani tiitiicue quea ca'a epojji! Eya cue o'oyajo miquianaaya ecoja nei nequiñajje. Eya miquianajaya Edoe Mese cuaje, jamajje miquianaaya quea bihui cuaje, mete'ama cuaje —jamaya Jesosa cua.

³⁷ Ojña pojajo Jesosaa esohui huohui canequia cua Eyacuiñajji equijo. Mecajje poqui nequia cua eyiyo Onimo huasijje cahuiya. ³⁸ Mecajjeahua Jesosa cue o'oya nequia cua Eyacuiñajji equi yasijje. Ojña deja cue nequia cua oja esohui shajja'ajjaa.

Jodio deja etii cuana jjashahuabaquia cua Jesosa quecua'yojji

(Mateo 26.1-5, 14-16; Macoso 14.1-2, 10-11; Huani 11.45-53)

22 Majoya aje quijje pishana ojña Jodio deja cuana jjachichaquia cua Jenosanena huasijje ejjashahuabaquijji yahuajo nei esohuidojojjiya cuia jjima oja bacua cuana aca cuajo. Ijja'ijja ca cua ojee pahui

hua jjimajo, Jodio etiiquiana jayojjaya. ² Ma epojja cue jjimahuajo, Eyacuiñajji niije mimiani etii cuana, Moisesija etehue'yo huohuiji etii cuana pea'ai jjashahuaba taiqui nequia cua jama ba'a: —¿Achajja iñame shai seya Jesosa aje? Eseyaya jjeya Jesosa iñajo ojña ejjachichaquí nequia cuana quea quene cuaje ese niije —jamaya cua quea mete jjejojo Jesosaja epeeji cuanajo. Jamatii ca ca iña mee sa aca cua Jesosa equecua'yojji.

³ Jodasa Jesosa shajja'ajjaji nisho cua. Ojaya pea bajjani cua ba'a: Isicaniote. Beca cuanaja Jesosa iña jjimajo, Edosiquiaa Jodasa jjashahuaba taiqui mee ca cua Jesosa iña meesahuajji. ⁴ Jamajjeya Jodasa poquia cua Eyacuiñajji niije mimiani etii cuana que, Eyacuiñajji equi jaahuanajji cuana pea'ai ani yasijje huohui pohua. Jama huohuiñajje aca cua ba'a: —Ecuea eba Jesosa ma o oe nei poquiani yasijje. Eyaya miquianaaya huohuije'yo.

⁵ Majoya oya cuana quea bihui cua Jodasaja esohui shajja'ajja majje. Jamajjeya jama cua ba'a: —E'e de, ecuana miyaya ba meecue ma Jesosa oe nei poquiani yasijje. Majoya aje ecuaaya miya sosequiaje, de.

⁶ —E'e de, eyaya aje mi iñasahua meeje'yo —Jodasa cua. Majoya ohuaya sa'ajja ca cua e'iña mee'yojji Jesosa dejjama huasijje poqui.

Jesosaa o shajja'ajjaji cuana niije bobi ijja ca cua

(Mateo 26.17-29; Macoso 14.12-25; Huani 13.21-30; 1 Conitio 11.23-26)

⁷ Majoya ma epojajo Jodio cuana ijja'ijjianiyo Eyacuiñajji niije mimianiya oe ñajjaja yahue sho'i quea bame nee nee quecua ca'ya cua Eyacuiñajji bihuiajji. Jodio deja cuaa pahui hua jjima ijja ca ania cua. ⁸ Jamajjeya aje Jesosaa Peno, Huani pea'ai huoojea ca cua oe equi yasijje bobi jjequia.

⁹ O shajja'ajjaji cuaa jama huohui'ajjame aca cua ba'a: —Jesosa, ¿ache equijo acuae seya pahui hua jjima ijja so'o?

¹⁰ Jesosa jama cua ba'a: —¡Jenosanena huasijje oe poquicue! Majoya aje miquiaaya baje oe deja meshimisijo ena dojo caje. ¡O ba majje o cuaje jja nei nei poquicue o dobiquije'yo huasijjeya! ¹¹ Majoya ma equi mese jama huohui'ajjame acue ba'a: “Ecuea esohui huohuiji jama cuanaje ba'a: —¿Ache equacuayijji acuae ecua ijja'ijja e shajja'ajjaji cuana niije so'o? Ecuana ijja sa cuani pahui hua jjima, Eyacuiñajji bihuiajji”. ¹² Majoya aje mi huohui caje equi meseya equacuayijji quea quemoo. ¡Majoya aquiana iyajeacue; bobi cuacuacue! —jamaya Jesosa cua.

¹³ Majoya aje oya cuana poquia cua; ba ca cua Jesosa jama esohui jayojjaya. Majoya iya ca cua.

¹⁴ Majoya siñajo Jesosa o shajja'ajjaji cuana cueya cua ma equi yasijje. Dobiqumajje anioquea cua e'ijja'ijjaji.

¹⁵ Majoya Jesosa jama cua ba'a: —Eya miquiana niije oe yeje nei ijja'ijjae'yo, onaa e quecua ca'yo cuahuaje. ¹⁶ E'e de, eya e'ijja'ijja beca'yojji pojjeama miquiana niije mano'yo majje. Jamajjeya quijje eyaya cue o'o-

ya majje jiquio pahui ijjiaje o'oya ojjaña cuanaja Emeshi Mese neiya jjejojo —jamaya Jesosa cua.

¹⁷ Majoya ohuaya caneco jjeshe ca cua. Emejo ifñanequia majje mimia cua Eyacuiñajji nijje. Majoya aje ohuaya o shajja'ajjajji cuana aca cua jama ba'a:

—Ma'aje, jiquio jjonojjajja na ishucue; ishijeyocue oe!

¹⁸ E'e de, eyaya ishi beca'yo jjiima jjonojjajja na aje, Ecue Chiiya eya ojjaña huoojea'yojji po mee caje'yo; ojjaña eya shajja'ajja caje'yo —jamaya Jesosa cua.

¹⁹ Majoya aje pahui jjeshe ca cua. Pahui jjeshe majje oya mimia cua Eyacuiñajji nijje. Mimi majje pahui miji ca cua. Majoya aje miji majje quia ca cuana cua. Jama huohuime aca cua ba'a: —Jiquio pahui ecuea eyami.

Jjeya nei pishana eya manojeyo, Eyacuiñajji esohui jayojja cuaje miquianaya mimishi cuijea'yojji. ¡Jamajjeya miquianaaya jiquio pahui ijjiacue; jamatii apoquia-poquiacue! Jiquiajja ijjia majje ¡miquianaya jjashahuabaquicue e mano'ya cuajo!

²⁰ Majoya ijjia'ijjajeyo majje Jesosaa caneco jjeshe ca o'oya cua. Jjeshe majje jama huohuime aca cua ba'a: —Jiquio jjonojjajja na ecuea ena', de. Ecuea ena' cua yaquiyajo eya manojeyo. Jamajjeya Eyacuiñajjiya cuijea caje'yo tii ojjañaja mimishi cuana. Eyacuiñajjiya esohui eyacua quia caje'yo ba'a: “Ojaya epeeji cuanaja mimishi cuana cuijea mee caje'yo tii ecuea ena' cuaya-quijeya”.

²¹ Majoya aje Jesosa jama cua ba'a: —Yani oe ese nijje e shajja'ajjajji nisho cuani; ijjia'ijjiani ese nijje, de. Maaya eya sohuinano cuana ifña mee caje'yo. ²² Eya manojeyo, Eyacuiñajjiya esohui jama cuanaje joyoya. E'e de, ma e shajja'ajjajji nisho Eyacuiñajjiya quea nee nee po mee caje'yo. Ohuaya ma e shajja'ajjajji jeajea caje'yo cuaqui yasijje e ohua sohuinano cuana ifña mee caje'yojojo —jamaya aca cua Jesosaa.

²³ Majoya aje o shajja'ajjajji cuana mimia cua jama ba'a: —De, ¿aya shai jama acaje? —jama mimime o shajja'ajjajji cuana cua.

¿Ache o shajja'ajjajji quea bame nee nee cuaje eyajo?

²⁴ O shajja'ajjajji cuana mimipanajaji nequia cua. Oya cuana jama cua ba'a: —¿Ache o shajja'ajjajji quea bame nee nee cuaje eyajo?

²⁵ Jesosaa jama huohuime aca cua ba'a: —Miquianaya mimiani ecuea epeeji pojjeama jayojja, de. ¡A'a jama jjashahuabaquijji! Jamatii miquianajaya eba emeshi mese cuana quea mase cuani ojaya echacojji cuana nijje. Jamatii ma echacojji cuaa shajja'ajja cani ojaya emeshi meseja esohui jayojja oya quea mase cuanijojjo. Ojaya echacojji cuana quea bihui nisho cuani. ²⁶ ¡Miquianaya ma emeshi mese jayojja jama a'a pojji! ¡Eyojo emeshi mese jayojja quea bame nee nequi sa cuanijojjo pea cuana jjeya nei ba'e meesahuacue! ¿Ache shai quea bame nee nee so'o? Emeshi mese, ojaya echacojji pojja'a. Emeshi mese, de. Jamaya Eyacuiñajjiya epeeji pojjeama jjashahuabaquiani. Ecuea epeeji cuana ca e jayojja caba'yahua. Eyaya miquianaya ba'e bame meesahuaña. Eya mase'ama cuani miquiana nijje; miquia-

na chacosahuajji cuani eya, de. ¡Jamaya pocue e jayojjaya! Majoya quea bame cuaje —jamaya Jesosa cua.

²⁸ Majoya Jesosaa o shajja'ajjajji cuana jama huohuime aca cua ba'a: —Miquianaya jamatii po'ayequequinaje enijje. Jjapeequi tiitiinequinaje enijje, jamatii beca cuaa eseya cajaa acanaje. ²⁹ Jamajojoya aje oe miquianaya Eyacuiñajjiya quea bame quia cani, e ohua acanaje jayojjaya. E'e, ohuaya eya ojjaña dejja cuanaja Emeshi Mese nei po mee ca'yonaje; jamaya eyaya miquianaya Jodio dejja cuanaja emeshi mese jayojja po mee'yo eyajo. Jomajo eseya ba'e tiitiije'yo; quea bihui cuaje —jamaya aca cua Jesosaa o shajja'ajjajji cuana.

Jesosaa Peno nijje mimia cua

(Mateo 26.31-35; Macoso 14.27-31; Huani 13.36-38)

³¹ Majoya Jesosa mimia cua Peno nijje. Penoja pea bajjani cua ba'a: Simohui. Jama Jesosa cua ba'a: —Simohui, shajja'ajjacue jiquio esohui ba'a: Edosiquiaa miquianaya eya pajea mee'yo sa acani. Ohuaya miquianaya mimishi po mee'yo sa acani. ³² Simohui, eya miminaje mijo Eyacuiñajji nijje. Miyaya eya cajaa jayojja aje. Majoya miya enijje jjapeequi neineiye o'oya. Jamajjeya enijje jjapeequi o'oya majje ¡pea e shajja'ajjajji cuana jjapee tiitiqui meesahuacue enijje!

³³ Simohui jama cua ba'a: —Ecuea Emeshi Mese nei, Jesosa, eya aje minijje tiya poquije mi jeanobia caje yasijje mi jayojja pea'ai mano'yome po'yohua. Ecuea aje mi epajea'yojji pojjeama.

³⁴ Jesosaa Peno jama aca cua ba'a: —Peno, mecahuajje cachina yahue taaa jjimahuaajo, miya jama siajje pome cuaje ba'a: “Chojja, ecuea Jesosa ba jjiima”. Pea beca peejjima siajje ameya aje miyaya —jamaya Jesosa cua.

Beshahua nei acua Jesosa e'ifñajji

³⁵ Majoya aje Jesosaa o shajja'ajjajji cuana jama huohui'ajjame aca cua ba'a: —Yahuajo pishana eyaya miquianaya huoojeanaje esohui huohuiya. Eyaya miquianaya huoojeanaje aema' jamatii bejjoma', bashosocoma', miquea ejiojjiyo nei nequi dojonaje. Eyaya miquianaya jaahuanajje. ¿A'a miquianaya quea shoe cuanaje? Chojja.

Oya cuana jama cua ba'a: —E'e jojo nei, jaahuana neinajeya aje jja ca miyaya ecua, de.

³⁶ Majoya aje Jesosa jama cua ba'a: —E'e de, jjeya ca ca beca cuaa eya quecua caje'yo. Eya miquiana nijje nequi tii ajja jiquio meshijo, eya mano'yo majje. ¡Jamajjeya ca oe miquea bejjo dojocue; miquea bashosocojo biyocuatateacue quea huesha epoquijji! ¡Jjequicue miquea equecuajji! Chamajo jjeshecue miquea daqui moo soseje. ³⁷ E'e de, yahuajo Eyacuiñajjiya etehue'yo ejo jama cua ba'a: “Dejja mase cuanaja boti'ama Eyacuiñajjiya huoojea'yo cuaje. Dejja mimishi jayojja acaje'yo. Jamajjeya quecua caje'yo cuaa” jamaya acaje jje-yahua nei, de —jamaya Jesosa cua.

³⁸ O shajja'ajjajji cuana jama cua ba'a: —Bacue, yani ecuanaja beca equecuajji. Ecuaana sohuinano cuana quecuaje'yo, de.

Jesosa jama cua ba'a: —Miquianajaya ba jjima ecuea esohui, de. Mahuiso ecuea esohui —jamaya Jesosa cua.

Jetesemani quejo Jesosa mimia cua Eyacuiñajji nijje
(Mateo 26.36-46; Macoso 14.32-42)

³⁹ Majoya Jesosa poquia cua Onimo eyiyo huasijje mi-miya oja Chii nijje. Cuamaya oya poqui majamaja nequia cua mimiya Eyacuiñajji nijje. Onijje o shajja'ajjajji cuana poquia cua pea'ai. ⁴⁰ Majoya aje Jesusaa jama aca cua ba'a: —¡Mimi majamajacue oe Eyacuiñajji nijje mimishi'ama epojji!

⁴¹ Majoya Jesosa poquia cua quea huesha pishana mimiya Eyacuiñajji nijje oe nei. Majoya oya ecui'oshajjajo nequi majje mimia cua jama ba'a: ⁴² —E'e de, Eyacuiñajji, eya beshahua nei poqui sa po ajja acui ecueata'apee yasijje. Eya quea mete nee nee ojjañaja mimishi cuanajo, de. Ecue Chii, ecuea eba miyaya eya acui ecueata'apee yasijje poqui mee sa ña emano'yojji ojjañaja mimishijo. Jamajjeya ¡quea ca'a po meecue eya miquea ejjashahuabaqui'yojji jayojja jama e'ajji! —jama mimimeya Jesosa cua.

⁴³ Jesosa quea mano jjabaquia cua emano'yojji jjejojo. Majoya mimi o'oya cua oja Chii nijje jjanobajjima nei. O janobajjima nei mimianijo, shishi majje ena' jayojja oquequia cua meshi yasijje, de. Majoya aje esohuidojojji eyajje nequioquea cua Jesosa mete'ama po meeya. Ohuaya majoya Jesosa quea nee ca'a po mee ca cua; jama cua ba'a: —¡Mique Chiija esohui jayojja jama acue! —jamaya aca cua.

⁴⁵ Majoya Jesosa oja Chii nijje mimipajea'yo majje oya poquia cua o shajja'ajjajji cuana huasijje. Ba ca cua oya cuana ecahuijaa quea yeno nee nee jjejojo, de.

⁴⁶ Ohuaya oya cuana jama aca cua ba'a: —¿Apiojji acuae miquianaya ecahuijaa so'o? ¡Anisohuacue jja oe; mimi majamajacue miquianaya Eyacuiñajji nijje! Jamajoya pea cuaa quea mimishi epo mee'yojji pojjeama —jamaya Jesosa cua.

Jesosa iña ca cuaa cua

(Mateo 26.47-56; Macoso 14.43-50; Huani 18.2-11)

⁴⁷ Jesosa mimianijo tii Jodio etii cuana, sohuinano cuana, Eyacuiñajji nijje mimiani etii cuana pea'ai cueya cua. Jodasa, Jesosa shajja'ajjajji nisho cueya cua o que. Oya ehui dojojji nei cueya cua. O e'iñajji jjanequichipiquia cua Jesosa nequi yasijje. Jjanequichipiqui majje shemo tojjo nisho ca cua. ⁴⁸ Majoya aje Jesusaa jama aca cua ba'a: —Jodasa, miyaya eya shemo tojjo nisho majje sohuinano cuana iña mee'yonaje. ¿Yajjajo Jodasa? —jamaya Jesosa cua.

⁴⁹ Majoya o shajja'ajjajji cuaa ba majje Jesosa jama huohui'ajjame aca cua ba'a: —Jesusa, ¿a'a ecuaaya sohuinano cuana jajajeaje?

⁵⁰ Majoya aje oe oja eshajja'ajjajjiya dejja esapa jajojojajji nisho eshajja jajasejjajea ca cua ebañei shajjajje. Eyacuiñajji nijje mimiani etiija echacojji cuanija eshajja, de.

⁵¹ —Chojja, ¡a'a jja oe jajajji! —Jesosa cua.

Majoya Jesusaa ma dejjaja eshajja ejajasejjajea eme-ya nequia ca'ya cua. Shajja jaja jjima jayojja shajja pana'yome aca cua. ⁵² Majoya Jesusaa dejja cuana jama huohui'ajjame aca cua ba'a: —¿Apiojji miquianaya cueyanaje baajji, acuijji e'iña? ¿A'a cuae jja iña siipojji so'o? ⁵³ E'e de, ojjaña pojajajo eya esohui huohui po nequinaje Eyacuiñajji equijo. Miquianajaya eya iña jjima cuanaje ma equijo quea meteya jjejojo dejja cuanajo. Jjeya ca ca Edosiquiaa miquianaya iña mee canaje jiquio quejo dejjamajo.

Peno Jesusaja epeeji nisho jayojja cua

(Mateo 26.57-58, 69-75; Macoso 14.53-54, 66-72; Huani 18.12-18, 25-27)

⁵⁴ Majoya sohuinano cuaa Jesosa iña'yo majje dojo ca cua Eyacuiñajji nijje mimiani etiija equi yasijje. Penohua ca ca quea huesha pishana quiquishi ca poquia cua. ⁵⁵ Majoya pea sohuinano cuaa cuaqui dahuahuojje ca cua equi epeeji dojojjo. Majoya anioquea cua cuaqui pejejo ejjajoquijji. Peno pea'ai anioquea cua ona nijje yajja Jesosa ona acaje ebajji. ⁵⁶ Echacojji ahuema'aniya Peno jayoquiani ba majje cojja ba nei ca cua. Ba majje pea cuana jama huohuime aca cua ba'a: —E'e, joya Jesusaja epeeji ani ba'a —jamaya cua ahuema'ani.

⁵⁷ Peno jama cua ba'a: —Ecuea Jesosa ba jjima nei nei.

⁵⁸ Quijje pishana pea dejjaa Peno ba ca o'oya cua. Jama cua ba'a: —Miya jja Jesusaja epeeji, o shajja'ajjajji cuani.

—Chojja, ecuea Jesosa ba jjima nei nei —jamaya aca cua Penohua.

⁵⁹ Majoya quijje pishana peaa oya ba ca o'oya cua: —E'e, oya jja Jesusaja epeeji nei nei. Oya jja Janinea meshijo ba'e Jesosa jayojjaya.

⁶⁰ Majoya aje Peno jama cua ba'a: —Chojja de, ¿ajje ajja mi ca mimiani so'o?

Peno miminequijo tii, oe cachina yahue taaa cua.

⁶¹ Ma cachina taaajo Jesosa jjanequijea pajjaquia cua Peno bajji. Majoya aje Peno jashahuabaquia cua Jesusaja ehuhuijo jama ba'a: “Cachina yahue taaa jji-mahuajo, pea beca peejjima sijje ameya aje miyaya, eya ba jjima nisho aje”. ⁶² Majoya Peno cuayaquia cua. Pa neinei'ya cua Jesosa ba jjima nisho epo jjejojo; quea yeno nee nee'ya cua.

Jesosa Jodio dejja cuaa niñeba ca cua

(Mateo 26.67-68; Macoso 14.65)

⁶³ Sohuinano cuaa Jesosa jaahuana ca nequia cua, cuaya meequi'yo jjima yajji. Majoya Jesosa niñeba ca cuaa cua, majoya Jesosa cuia ca cua. ⁶⁴ Majoya cuia majje cojja japa ca cua. Cojja japa majje shemo cuiasejjajea ca cua. Shemo cuiasejjajea majje ohuaya cuaa Jesosa jama huohui'ajjame aca cua ba'a: —¿Aya acuae mi cuia canaje so'o? ¡Jashahuaba'ajjaqui!

⁶⁵ Majoya sohuinano cuaa Jesosa niñebajea neinei ca'ya cua, mimijaji neinei'ya cua onijje.

Pea cuaa Jesosa dojo ca cua Jodio etii cuana huasijje huohui'ajjaa

(Mateo 26.59-66; Macoso 14.55-64; Huani 18.19-24)

⁶⁶ Jjapojaquiajo Jodio etii cuana jjachichaquia cua. Ojjaña Jodio etii, Eyacuiñajji nijje mimiani etii, Moisesija etehue'yo huohuijji etii cuana, ojjaña ojee mimia cua Jesusajo. Majoya sohuinano cuaa Jesosa dojo ca cua Jodio etii cuana huasijje. Majoya aje etii cuaa Jesosa jama huohui'ajjame aca cua ba'a: ⁶⁷ —¡Huohuicue ecuanaya miquea ebajjani! ¿A'a miquea ebajjani Quito, Eya-cuiñajjija huoojea'yo, pojja'a?

Jesosaa jama saja'ame aca cua ba'a: —Eya “e'e” cuajo miquianaya jjashajja'ajjaqui ajja, de. ⁶⁸ Miquianaya eyaya huohui'ajjajje saja'a jjima aje'yo eya. Jamaya eya saja'ajje miquianajaya eya epichojea'yojji pojjeama. ⁶⁹ E'e, eya poquije'yo jjeya nei pishana eyahuasijje Eya-cuiñajji nijje ebañeijje ani'yohua. Jomajo ecue Chii quea sohui poja nee nee enequi tii tii —jamaya Jesosa cua.

⁷⁰ Majoya aje Jesosa ojjaña jama huohui'ajjame aca cua ba'a: —¿A'a miya Eyacuiñajjija Bacua Ejja nei so'o?

Jesosaa jama saja'ame aca cua ba'a: —E'e jojo nei miquiaaya esohui ejo aña.

⁷¹ Majoya aje oya cuana jama mimijajime cua ba'a: —¡De, pea dejja a'a iyaajji Jesosa huohuijji! Ecuana jjeya nei shajja'ajjanaje ojaya esohui. Ohuaya Eyacuiñajji niñeba canaje Eyacuiñajjija Bacua Ejjaa miame —jama mimijajimeya cua Jesosa nijje.

Jesosa emeshi mese Pinato huasijje dojo ca cua

(Mateo 27.1-2, 11-14; Macoso 15.1-5; Huani 18.28-38)

23 Majoya ojjaña nequisohua majje poquia cua emeshi mese Pinato huasijje Jesosa dojhua. Pinato esohuinano mese cua, ojjaña emeshi mese cuanaja emeshi mese pea'ai cua. ² Jesosa dojo majje Pinato cojja nei nequia ca cua Jodio etii cuaa. Onaaya Jesosa jama niñebame aca cua ba'a: —Ecuaa jiquio dejja banaje. Mimitecuetecuequi ecuanaja meshijo. Oya jama cuanaje ba'a: “¡A'a bejjo quiajji emeshi mese sosequiajji!” Oya pa Eyacuiñajjija huoojea'yo cuani; oya pa Jodioja emishi mese posa cuani, de —jamaya oya cuana siajje cua Jesusajo.

³ Majoya Pinatohua Jesosa jama huohui'ajjame aca cua ba'a: —¿A'a miya Jodioja emeshi mese cuani?

Jesosaa jama saja'ame aca cua ba'a: —Miyaya huohuiaña jayojjaya cuani eya.

⁴ Majoya Pinatohua etii cuana jama huohuime aca cua ba'a: —De, jiquio dejja jjashahuaba taiqui ajja, capichojea'yahua jja, de.

⁵ Oya cuana quea que nee nee cua. Mimia cua janobajjima nei nei. Jama tecuetecueme cua ba'a: —Oya ca ca jjashahuaba taiquinaje, de. Ohuaya esohui huohui ca ayequeiquinaje ojjaña cuiñajji yasijje. Ebio-nei Janinea meshijo hohui canaje, jjeya Jodea meshijo huohui canaje jiquio cuiñajji cuana huasijje, jjeya nei pea'asi, de. Ojjaña quea que nee nee, quea shajja-

quijjo nee nee ohuaya po mee canaje cuana —jama siajje ameya aca cua Jodio etii cuaa.

Jesosa dojo ca cua pea emeshi mese que, Enode que

⁶ Pinatohua ona shajja'ajja majje jama huohui'ajjame aca cua ba'a: —¿A'a jiquio dejja Janinea ba'e?

⁷ —E'e —oya cuana cua.

Pinatohua ma shajja'ajja majje Jesosa huoojea ca cua Enode que, Janinea ameshi mese que. Enode Jenosenajo ania cua anicuaa poqui. Jamajjeya Pinatohua Jesosa, Jodio etii cuana pea'ai huoojea ca cua Enode que.

⁸ Enode Jesosa ba majje jama cua ba'a: —E'e de, jjeya nei eyaya baña jiquio dejja Jesosa. Eyaya oya ba sa anaje ojaya esohui eshajja'ajjajji; emano'yo cuana eshequi mee caje'yo ba sa anaje pea'ai —jamaya cua Enode. Oya ca ca Jesusaja epeeji po sa po ajja nei.

⁹ Majoya Enodeya huohui'ajja majamaja ca nequia cua. Jesusaja oya Enode sohui saja'a jjima cua. ¹⁰ Jodio etii cuaa Jesosa niñeba neinei ca aña cua. ¹¹ Majoya Enodeya, oja sohuinano cuaa Jesosa hue'e ca cua esoadojji. Daqui quea sose huiso emeshi meseja jayojja Jesosa huosho mee ca cua emeshi mese nisho yajji. Majoya aje daqui huosho mee majje bihuia nisho ca cua. Majoya aje Jesosa huoojea ca o'oya cua cuaa Pinato que. ¹² Ma pojjaajo Jesosa nijje mimijaji majje Enode Pinato nijje jjapeequinaje. Yahuaajo Pinato Enodeja epeeji pojjeama cua.

Jesosa Pinatohua mano mee ca'ya cua

(Mateo 27.15-26; Macoso 15.6-15; Huani 18.39-19.16)

¹³ Majoya aje Pinato jjachichaquia cua Jodio etii cuana nijje, Jenosanena emeshi mese cuana nijje, pea dejja cuana nijje pea'ai. ¹⁴ Jama huohuime aca cua ba'a: —Miquianaya ¿apojji Jesosa yenaje so'o? Miquianaya jama cuanaje ba'a: “Ohuaya ojjaña dejja cuana quea que ne, quea shajjaquijjo po mee cani” poso anaje. Cho oya ca ca quea mimishi pojjeama cuani. E que miquiaaya yajo aje jja, eyaya Jesosa huohui'ajjanaje. Jjeya nei ecuea eba Jesosa, oya jjashahuaba taiqui ajja. Oya quea mimishi pojjeama. Joya ecua miquiaaya huohui yaña jama pojjeama. ¹⁵ Enode jama cuanaje ba'a: “Oya ca jja ca quea mimishi pojjeama, de”. Jamajjeya ohuaya Jesosa huoojea ca o'oyanaje e que. ¡Bacue! Eyaya Jesosa mano mee'yo jjima aje, capichojea'yahua jja Jesosa, de. ¹⁶ Jamajjeya eyaya oya cuia meeje. Majoya aje cuia mee majje pichojea meeje'yo —jamaya cua Pinato.

¹⁷ Ojjaña eshequiaja Pascuajo Pinatohua oe ejeano-bia nequi huoojeacuaya ca'yaninaje, Jodio cuana quea bei epojji. Jamajjeya Pinato jama cua ba'a: —Jesosa eyaya huoojeacuaya meejo'yo jiquio shejo.

¹⁸ Ma esohui shajja'ajja majje ojjaña Jodio cuana que nequene neinei'ya cua; taaa cua jama ba'a: —Chojja, ¡Mashama ca oe huoojeacuaya'yocue! ¡Quecua mee'yocue Jesosa!

¹⁹ Mashama jeanobia ca cua yahuaajo pishana, oya quea mase nee nee cua. Oya Shomano emeshi mese

quecuapanajji epo; ona quecuayoyji epo pea'ai. Oya quea mimishi nee nee cua.

²⁰ Pinatohua ca ca Jesosa huoojeacuaya'yo sa aca cua, jamajjeya jama mimome po o'oya cua ba'a: —Cho, Jesosa ca ca oe huoojeacuaya mee'yo sa aña.

²¹ Ojaya esohui shajja'ajja majje ojjaña cuana jano-bajjima nei nei jama taaame cua ba'a: —Chojja de, jjesosa ca ca oe quecuame'yocue jjeja nei! ¡Acui ecueata'apeejo oe ba'ehuanasohuajecue!

²² Pinatohua jama huohuime aca o'oya cua ba'a: —¿Apiojji shai miquianaaya oya mano mee'yo sa aña so'o? Oya ca jja ca quea mimishi pojjeama cuani. Eyaya oya cuia neinei mee'yo majje huoojeacuaya meeje'yo. ²³ Majoya aje ojjaña cuana taaa o'oya cua jama ba'a: —¡Ba'ehuanasohuajecue oe acui ecueata'apeejo Jesosa!

Ojjaña cuana taaa majamaja cua. Quenequene neineiua cua Pinato nijje. ²⁴ Jamajjeya pinato jama jjas-hahuabaquime cua ba'a: —E'e de, eyaya Jesosa caquecua meeje'yahua, dejja cuana enijje quea quene cuequijo. Eyaya ca oe Mashama cahuoojeacuaya mee'yahua.

²⁵ Majoya aje pinatohua ma ecua ojjaña taanaje jama jayojjaya aca cua. Jamajjeya ohuaya Mashama huoojeacuaya mee'ca'ya cua; Jesosa ca ca oe huoojea ca cua acui ecueata'apeejo eme' cacajeajji emano'yoyji.

Jesosa ba'ehuanasohuajea ca cua acui ecueata'apeejo
(Mateo 27.32-44; Macoso 15.21-32; Huani 19.17-27)

²⁶ Majoya sohuinano cuaa Jesosa acui ecueata'apeejo dojo mee ca cua o ba'ehuanasohuajejji. Jesosa saja ca cua acui quea biquieya jjejojo. Jamajjeya sohuinano cuaa oe dejja ma acui dojo mee ca cua. Oya Simoni bajjani cua; Sinene meshijo ba'e cue cua. Jamajjeya Simoniya Jesosa quiquishijji dojo ca cua acui ecueata'apee abojji. ²⁷ Ojjaña dejja cuana epona cuana pea'ai pa poquia cua Jesosajo quea yeno jjejojo. ²⁸ Jesosaa epona cuana ba majje jama aca cua ba'a: —Jenosanenajo ba'e epona cuana, ja'a oe ejo pajji! ¡Miquianaja pa sa cuanijo pacue miquianajo miquianaja bacuajo pea'ai! ²⁹ Quijje pishana quea camaja cuaje miquianajo. Miquianaaya jama huohuije ba'a: "Oe epona bacuama' camaja'ama ba'yani". Sohuinano cuana cueje jiquio cuiñajji yasijje miquiana quecuaa, chama'yo tii cuaje miquianajaya bobi. Jamajjeya miquianajaya ebacua yanijo quea yeno nee nee cuaje. Ebacua cuana pa neinei-je'yo bobimajo. ³⁰ Dejja cuana quea yeno nee nee cuaje pea'ai. Jya ecua atii mano'yo sa cuani jama miquianaya cuaje. Majoya miquianaya jjashahuabaquije jama ba'a: "Eyiyoy, ¡ecua biajje oe jaabicha cuajicue ecua cuia cuaji'yoyji" jamaya miquianaya cuaje. E'e epona cuana, miquianaya ani sa po ajja cuaje quea camaja ba'e jjejojo. Jamajjeya ma pojjaajo quea nee nee cuaje. ³¹ Jjeya nei sohuinano cuaa eya quecuacaje'yo. Maya ca ca oe quea tai pishana. Quijje ojjaña sohuinano cuaa miquianaya quecuajeyoyaje'yo, maya quea tai nee nee cuaje'yo. Jamajjeya ja'a pajji ejo; miquianajoya jja oe pa neineicue! —jamaya Jesosaa aca cua.

³² Majoya sohuinano cuaa beca siipojji dojo ca cua Jesosa nijje eba'ehuanasohuajejji. ³³ Majoya oya cuana poquia cua eyiyoy Sapa Jjii bajjani yasijje. Bañaquei majje Jesosaja eme' caca ca cua acui ecueata'apeejo; ejiojijje pea'ai caca ca cua. Cacajeyoy majje nequiasohuajea ca cua. Ma becanejijji pea'ai siipojji pea acui ecueata'apee cuanajo nequiasohuajea ca cua Jesosa pejejejo oe ebañei mijijje, pea shani mijijje. ³⁴ Acui ecueata'apeejo ba'ehuanasohuajea cajje Jesosa mimia cua Eyacuiñajji nijje ojjaña nequijo jama ba'a: —Ecue Chii, ecue Chii jiquio dejja cuanaja ba jjima e'e jojo nei eya miquea Ebacua Ejja cuani. Jamajjeya jiquio mimishi cuijea'yocue!

Majoya aje sohuinano cuaa Jesosaja daqui huijiajje'yo majje hue'e ca cua oja daqui ya'yoyjiya. ³⁵ Ojjaña dejjaa Jesosa ba ca nequia cua, Jodio etii cuaa pea'ai. Niñeba ca cua Jesosa jama ba'a: —Dee, ¿a'a Jesosa ojjaña jaahuanajji pojjeama cuanaje? Oya ona nahuejji pojjeama. Jamajjeya mi nequioque'yani acui ecueata'apeejo ba'e. Oya Eyacuiñajji Bacua Ejja jjabajji majje jja ca oe jjeyahua neiya canequioque'yahua —jama niñebameya Jodio etii cuaa aca cua.

³⁶ Sohuinano cuana mimijajja cua pea'ai. Jesosa majoya quia'ajja ca cua jjonojajja na sese e'ishijji nisho.

³⁷ Jama mimijajime cua ba'a: —¡Miya Jodioja emeshi mese nei jjabajji majje mee nei nequioque'yocue acui ecueata'apeejo ba'e jjeyahua nei!

³⁸ Jesosa ba'e sapa biajje oja bajjani etehue'yo caca ca cua jama ba'a:

Oya Jesosa, Jodioja emeshi mese epo'yoyji

³⁹ Oe siipojji pea acui ecueata'apeejo ba'e mimijajja cua Jesosa nijje jama ba'a: —¡A'a cuae miya Eyacuiñajji Bacua Ejja nei jjabajjaqui socue! ¡Ache oe nequioque'ajjaqui'yo socue; ecuanaya pea'ai pajjaja oe che nequioque meequi'yoque!

⁴⁰ Pea siipojjiya pea acui ecueata'apeejo ba'eya ca ca ma esohui shajja'ajja majje tanacua ca cua jama ba'a: —¡A'a jjashahuaba taiquijji, de! ¿A'a miya Eyacuiñajji jjashahuabaqui ajja nei nei? Jjeya se manoye'yo. ⁴¹ Eseyaya mano mee ca'yani sohuinano cuaa quea mimishi nee neejojo. Jesosa ca ca mimishi'ama, de.

⁴² Majoya aje ohuaya Jesosa jama aca cua ba'a: —Jesosa, ¡miya eyahuasijje poqui'yo majje ejo che jjas-hahuaba bamequicue!

⁴³ Majoya Jesosaa jama aca cua ba'a: —E'e, jiquio pojjaajo miya enijje eyahuasijje ba'esohuajije'yo manoye'yo majje.

Jesosa manoye'yo

(Mateo 27.45-46; Macoso 15.33-41; Huani 19.28-30)

⁴⁴ Majoya esheque biacojajja nequijo, shequima'po mee ca'ya cua. Quea apo nee nee po mee ca'ya cua ojjaña meshi yasijje. Quijje nei jjabajjaqui mee ca'ya cua eshequi ejjanequijeapaquijo. ⁴⁵ Eshequi quea apo nee nee po'yajo, Eyacuiñajji equijo ba'ehuana ba'e daqui moo nei jja'isajeaquia cua eyiyesama neijje. ⁴⁶ Majoya aje Jesosa jjanobajjima nei taaa cua jama ba'a: —Ecue

Chii, ecue Chii eyaya mi que ecue dojjoshahua huoo-
jeaje'yo. Jjeyahua mo poquijeyoje.

Jama po majjeya poquijeya cua.

⁴⁷ Sohuinano huoojeajji cuani meseya Jesosa mano'-
yajo, ba ca cua. Majoya jama cua ba'a: —E'e de, e'e jo-
jo nei Jesosa mimishi'ama nei nei cuanaje; oya Eyacui-
ñajjija Bacua Ejja cuanaje, de.

⁴⁸ Ojjaña dejja o ba cuequi poqui'ya cua. Ese'o cuia-
queyajea ca poqui'ya cua quea yeno nee neeya jjejojo
sapa cuana cuiapashijea ca poquia cua. ⁴⁹ Ojjaña Jeso-
saja epeeji cuana ca ca quea huesha nequia cua. Epo-
na cuaa pea'ai quea huesha aniya ba ca cua Jesosa
onaa cuia ca'yoqui acui ecueata'apeejo ba'e. Ma epo-
na cuana yahuajo nei jjapeequia cua Jesosa nijje, Jani-
nea meshijo ba'e.

Jesosa mei jjani yasijje huananobia ca cua

(Mateo 27.57-61; Macoso 15.42-47; Huani 19.38-42)

⁵⁰ Oe dejja Jose bajjani quea aquiana huiso cua. Oya
pea Jose, Amatea cuiñajjijo ba'e. Oya jjapee tiitiquia
cua Jesosa nijje. Oya Jodio etii cua. Jesosa mano'yo jji-
mahuajo, oya Jodio etti cuana nijje jjachichaquia cua.
Ohuaya beca etii cuana jama huohuime aca cua ba'a:
—Chojja de, eya ca iña Jesosa mano mee sa po'yo ajja.

⁵² Jamajjeya Jesosa mano'yajo Jose poquia cua Pinato
que Jesosa epoquijeyo ba'e huohui'ajjaa; jama aca cua
ba'a: —E'e de, ¡Jesosa mo quia'yoque! Oya ca ca mano
neinei'yonaje. Eyaya oya dojje'yo ecuea mei jjani ya-
sijje ehuananobiaqui'yojji.

⁵³ Majoya aje ohuaya Jesosa mano'yo ba'e jjequio-
quea ca'ya cua acui ecueata'apeejo ba'e. Jjequioquea'yo
majje bebo ca'ya cua daqui oshe quea bojea nee nee-
ya. Bebo majje mei jjani ai yasijje huananobiaa dojo ca
cua mano'yo tii cuanaja ejaajji ajjima huasijje. ⁵⁴ Sine-
cua nei, ejomishocajji epojja po jjimahuajo Jesosa hua-
nanobiaa dojo ca cua Joseya.

⁵⁵ Janinea meshijo ba'e epona cuana Jose quishishi
poquia cua mei jjani yasijje Jesosa emano'yo baa. Jeso-
sa mei jjanijo huana ca cua Joseya. Epona cuaa Jesosa
emano nei'yojaa baqui ca cua shiyeshiyejo eshaquijji
nisho. Majoya Joseya mei quea quemu jeacajjaja ca
cua mei jjani naba capa'yojji. ⁵⁶ Majoya epona cuaa Jeso-
sa jjanijo ehuananobia jaa ba majje shiyeshiyejo
shaqui jjima aca cua. Jamajjeya poqui'ya cua ocuayaya
equi yasijjeya. Majoya acui shiye pohuipohui shiyeshi-
ye acua aca cua Jesosaja eyami shaquijji nisho. Shaqui
jjima aca cua ejomishocajji pojja joyaya. Jamatii Jodio
dejja cuana ma pojajjaya chacochocho ajja cua.

Jesosa shequi'ya cua

(Mateo 28.1-10; Macoso 16.1-8; Huani 20.1-10)

24 Mecajjeahua nei nei nomico pojajjo, epona cua-
na poqui o'oya cua Jesosa ba o'oyaa. Shiyeshiye
acua'ya dojo ca cua jjani jaa huasijje, Jesosaja eyami
shaa nisho ihui jjima epojji. ² Epona cuaa ba cañaquia
cua mei jjani eca'apejo'yo cua. ³ Oya cuana dobiquia
cua ma mei jjani dojjo huasijje Jesosa baa nisho. Dobi-
qui majje Jesosa chama' ba ca'ya cua. ⁴ Majoya quea

mete nee nee po'ya cua Jesosa chama' ba majje. Ma
mete'yoquiya aje eponaa beca esohuidojojji dejja ja-
yoyja ba ca cua o pejejejo nequi. Ojaya daqui quea oshe
nee nee, quea siyo nee nee cua. ⁵ Epona cuana quea
mete nee nee cua; ecojja cahui cua quea cojja sajaja
jjejojo. Majoya aje esohuidojojjiya jama huohuime aca
cua ba'a: —¿Yajjajo acuaeya miqianaya sa'ajjaña Jeso-
sa jiquiojo so'o? ¿A'a emano'yo poso? Chojja, oya she-
qui'yonaje. ¡Chama'yo ca jja ca jiquiojo! ¡Oya ca jja ca
eshe nequi'yo! ⁶ ¿A'a jja miqianaaya Jesosaja esohui
pajea'yonaje ma ohua yahuajo huohui ca cua Janinea
meshijo nequiahuaa? ⁷ Jesosa yahuajo pishana, mano'-
yo jjimahua, jama cua ba'a: “Mimishi cuaa eya mano
mee caje'yo acui ecueata'apeejo. Pea beca peejjima
cahuime po majje shequije'yo” jamaya cua Jesosa ma-
no'yo jjimahua. Jamajjeya ja'a quea mete pojji! —jama-
ya aca cua esohuidojojjiya.

⁸ Ma esohui shajja'ajja majje epona cuaa Jesosaja
esohui shahuaba ca'ya cua. ⁹ Majoya aje poqui cuaji-
cuaji'ya cua pea cuana huohui'yohua. Huohui caña-
quia cua o shajja'ajjaji cuana, ojjaña cuana pea'ai Jeso-
sa shequi'yonajejo. ¹⁰ Mania Madanena, pea Mania Ja-
coboja nae, Huana, pea epona cuana pea'ai poquia
cua huohui po'yohua. ¹¹ O shajja'ajjaji cuaa epona
cuana ohua huohui cajje, jama aca cua ba'a: —Epona
cuana, siajje mi ca cuani Jesosa eshequi'yojo miamie.
Miqianajaya esohui shajja'ajja sa po ajja ca iña —ja-
maya cuaa aca cua.

¹² Peno ca ca quea cuejipashi nei poquia cua mei jja-
ni yasijje ba'ajja'yohua. Bañaqui majje mei jjani ye'e'aj-
ja cañaquia cua ma Jesosa jaa cuajo. Ba ca cua o be-
bojji oe ani, oja jeajeana'yo jja oe ania cua.

—De, chama'yo Jesosa yaña, de —jamaya Peno cua.
Jamaya po majje poqui o'oya cua equi yasijje. Poquia-
nijo oya jjashahuabaquia cua Jesosajo. Ojaya ba jjima;
jamajjeya jama cua ba'a: ¿Yajja shai po'yonaje Jesosa?
—jamaya cua Peno.

Becanejjijji pea'ai o shajja'ajjajiya Jesosa ba ca cua Emao jiojjije poquijeya

(Macoso 16.12-13)

¹³ Oya pojajjo tii, becanejjijji pea'ai o shajja'ajjaji cua-
na poquia cua Emao cuiñajji yasijje. Quea huesha pis-
hana cua Jenosanena ebañaquijji. ¹⁴ Jesosa emano'yo
niñeba ca poquia cua. ¹⁵ O mimi poquijejo Jesosa jjane-
quichipiquia cua onijje. Jjanequichipiqui majje onijje
poquia cua. ¹⁶ Jesosa ba majje ba tai ca'yonaje, pea
dejja posoya aca cuaa cua. ¹⁷ Majoya aje Jesosaa jama
huohui'ajjame aca cua ba'a: —¿A'ya cuae nequiaa ca
niñeba poquiaje so'o?

¹⁸ Majoya Quiopasiya jama saja'ame aca cua ba'a:
—¿A'a miquea eba ma onaa acanaje Jenosanenajo?

¹⁹ Majoya aje jjaja Jesosa jama cua ba'a: —¡Huohui'aj-
ja socue mo yajja acuae mi cuanaje!

Oya jama aca cuaa cua ba'a: —Jesosa Nasanenajo
ba'e. Oya quea sohui poja nee nee cuanaje. Ohuaya
Eyacuiñajjija esohui huohui canaje, de. Ojjaña dejja
jjashahuabaquinaje ojaya esohuijo. ²⁰ Majoya Jodio etii

cuaa, emeshi mese cuaa, Jesosa iña mee ca'yonaje, acui ecueata'apeejo quecua mee ca'yonaje. ²¹ Ecuana jjashahuabaquinaje Jesosa Jodio dejja cuanaja emeshi mese epojjijo Eyacuiñajjija huoojea'yo pea'aio. Oya ca ca chama'yo tii po'yonaje, de. Pea beca peejjima cahui-me oya emano'yojaa. ²² Jiquio pojjajo mecajjeahua nei nei epona cuana poquinaje mei jjani yasijje Jesosa shaa nisho. Jjajjasoaquinaje Jesosa chama'yojojo. ²³ Jesosa emano'yojaa ba'yo jjima cuanaje, jamajjeya cue o'oyanaje huohui po'yohua. Majoya aje pa ponaa ohuaya esohuidojojji ani ba canaje jjani dojjojo ani. Jama huohuimeya aje pa pona majoya acanaje ba'a: "Jesosa ca ca emano'yo tii pojjeama jaa, shequi'yonaje ca coma" jamaya pa pona acanaje. ²⁴ Majoya epona cuaa huohui cajje poquinaje beca cuana mei jjani yasijje. Mei jjani bañiqui majje chama' Jesosa ba canaje. Ma ecua epona cuaa esohui acanaje jayojjaya cuanaje. Onajaya Jesosa eshequi'yo ba'yo jjima tii cuanaje, de —jamaya mimia cua o shajja'ajjajji cuana.

²⁵ Majoya aje Jesosaa jama huohuime aca cua ba'a: —Miquianaya jjashahuabaqui ajja Eyacuiñajjija esohui-jo. ²⁶ ¿A'a miquianajaya ba jjima Eyacuiñajjija huoojea'yo ebionei camanoqui'yahua? Majoya shequi'yo majje, eyahuasijje poqui majje Eyacuiñajji ebañeijje anioqueje'yo tii tii ojjañaja Emeshi Mese epo'yojji tii tii. Jamaya yahuajo tehue ca cua Eyacuiñajjija esohuijo. ¿A'a miquiaaya pajea'yonaje pojjaja? —jamaya Jesosaa aca cuana cua.

²⁷ Majoya poquijeya Jesosaa oya cuana huohui ca poquia cua ojjaña Eyacuiñajjija esohui ojo. Ohuaya huohui coo ca cua Moisesija ojo oja tehue majoya pea esohui huohuijji cuanaja ojo oja tehue huohui ca cua.

²⁸ Majoya Emao ba cañaquia cua. Majoya aje bañiqui majje Jesosa ca jjayeje'ajjaquinana cua. ²⁹ Majoya aje o shajja'ajjajji cuaa Jesosa jama aca cua ba'a: —Siña coma, jjaapoquia coma. ¡Ecuana nijje oe cahui chichacue! —jamaya cuaa aca cua.

Majoya Jesosa onijje dobiquia cua oe equi yasijje. ³⁰ Majoya aje anioquea cua e'ijjia'ijjajji. Majoya aje anioque majje Jesosaa pahui jjeshe ca cua. Pahui jjeshe majje Eyacuiñajji nijje mimia cua. Eyacuiñajji nijje mimi majje pahui miji ca cua. Majoya aje miji majje quia ca cuana cua. ³¹ Pahui quia cajje Jesosa bahuejja ca'ya cuaa cua. Jama cua ba'a: —E'e de, a'a jja mi Jesosa, de. E'e jojo nei miya shequi'yonaje, de —jamaya o shajja'ajjajji cuaa aca cua.

Majoya aje Jesosa jjachamaqui'ya cua, de. ³² Majoya aje cuana jama mimime po ania cua ba'a: —E'e de, e'e jojo nei mi eyaya anaje yaña, de. Ecuea equijjiji peyaanaje o shajja'ajja majje. Quea bihui nee eseya cuanaje Eyacuiñajjija esohui shajja'ajja majje.

³³ Majoya aje o shajja'ajjajji cuana ocuayaya cue'ya cua Jenosanena huasijjeya mecajje tiiya. Bañiqui majje ba ca cua pea Jesosaja shajja'ajjajji cuana, 11 ejjachichaqui ani pea epeejji cuana nijje. ³⁴ Pea cuaa majoya jama aca jjequia cua ba'a: —E'e jojo nei, de. Jesosa shequi'yonaje. Simohuija eba nei nei oya cuanaje.

³⁵ Majoya aje Emao huasijje poqui cuaa jama huohuime aca cua ba'a: —Ecuana poquianijo Emao huasijje, oe dejja poquinaje ecuaa nijje. Oya miminaje ecuaa nijje, de. Majoya ecuaa ijja'ijjianaje ojee. Ohua pahui miji cajo ecuaaya oya bahuejjanaje Jesosa cuanaje, de. Oya ca ca shequi'yonaje, e'e jojo nei, de.

Jesosa ba ca cua o shajja'ajjajji cuaa
(Mateo 28.16-20; Macoso 16.14-18; Huani 20.19-23)

³⁶ Jesosa jjapanaquia cua ona mimiani yiyesamajo. Jesosa jama cua ba'a: —¡Yani eya, de! ¡Quea bei oe po-cue nequiana!

³⁷ Jesosa ba majje quea mete nee nee cua o shajja'ajjajji cuana eshahuajo poso. ³⁸ Jesosa majoya jama cua ba'a: —¿Yajjaje acuae nequiana quea mete cuani so'o? ¿Apiojji miquianaya jjashahuaba quehuaquiani? ³⁹ ¡Bacue mo oe! Ecuea eme jjoto huejja namoja quecua huejja yani, ejiojji pea'ai, de. Eyami nei jja iña iquio, eshahua pojjeama. Eshahua ca jja ca yamima', sama' pea'ai, de. ¡Napa'ajja socue mo, ecuea eyami; ba nei-nei'ajja socue mo!

⁴⁰ Majoya Jesosaa ojaya eme ja'a ca cua, ejiojji pea'ai.

⁴¹ Onaaya ca Jesosa pojjeama poso aca cua quea bihui jjejojo. Jjashahuabajeaqui jjima cua. Jamajjeya Jesosaa oya cuana huohui'ajja ca cua ejjashahuaba meequijji jama ba'a: —¡Bacue eya, eyami nei; che mo bobi quia-cue nequiaa! Eya ca ca eshahua pojjeama, eshahua cuana ca ca ijja'ijjia ajja.

⁴² Majoya aje onaaya Jesosa nahuoo cuaquijo dahua quia ca cua. ⁴³ Jesosaa nahuoo ijja ca cua, ona cojja nei aniya. ⁴⁴ Majoya ohuaya jama aca cua ba'a: —Eyaya mano'yo jjimahuaa miquianaya huohuinaje pea cuaa eya quecua mee caje'yo. Majoya eya shequije o'oya. Jamaya Moisesija etehue'yojo, cua, Salmo etehue'yojo pea'ai huohui ca cua ejo. Ojjaña Eyacuiñajjija esohui huohuijji cuaa ejo tehue ca cua pea'ai —jamaya Jesosa cua.

⁴⁵ Majoya Jesosaa huohui ca cua Eyacuiñajjija etehue'yo ona jjabahuejjaquijji. ⁴⁶ Ohuaya jama aca cua ba'a: —Jama tehume'ya cua ba'a: "Eyacuiñajjija huoojea'yo ojjaña jaahuanajji manoje'yo. Mano'yo majje shequije'yo pea beca peejjima cahuime po majje. ⁴⁷ Ojjaña cuaa ojjaña meshi yasijje cahuohui ca'yahua Eyacuiñajjija esohui, ojaya epeejji epojji. Ebionei Jenosanenajo cahuohui coo ca'yahua. Eyacuiñajji nijje cajjapeequi'yahua, mimishi cuana capajea ca'yahua. Majoya pea cuiñajji cuana huasijje capoquiahua ojaya esohui huohuiya". ⁴⁸ Jjeya nei miquianaaya eya banaje, shajja'ajjanaje jiquio esohui. Jamajjeya ja'a pajea'yojji; huohui tiiticue! ⁴⁹ ¡Bacue oe, eyaya Edojjoshahua Bame huoojeaje miquiana huasijje, miquiana quea bame ba'e meejji! Ecue Chiya yahuajo huohui canajeya jjejojo Edojjoshahua Bame huoojeaje'yo eyaya. Jamajjeya jiquiojo tii anicue! ¡Jenosanenajo tii ishoa'ajjacue Edojjoshahua Bame nei cueje eyajo ani! Ohuaya miquiana-ya quea jjashahuabaqui ja'a po mee caje'yo —jamaya Jesosa cua.

Jesosa poqui'ya cua eyahuasijje

(Macoso 16.19-20)

⁵⁰ Majoya aje Jesusaa o shajja'ajjajjii cuana dojo ca cua Betania huasijje. Bañaqui majje Jesusaa eme jea-sohua ca cua, jama mimime cua ba'a: —¡Enijje jjapee neineiquicue! ¡Jashahuabaquicue Eyacuiñajjijo miqianaya quea ca'a epojji!

⁵¹ Majoya aje Jesosa eyahuasijje poqui'ya cua. ⁵² Oya cuana Jesusajo quea bihui nee nee po'ya cua. Majoya aje huacuayaya cue'ya cua Jenosanena huasijje quea bihui nee nee. ⁵³ Majoya aje poqui majamaja nequia cua Eyacuiñajjija equi yasijje Eyacuiñajji bihuiaa.

E'e de, acua. Eyaya, Nocaa tehuejeyonaje. Mahuiso-ya.

HUANI

Eseya Eyacuiñajji ba meeya Jesosa Quito meshi yasijje poeyanaje ese jayojja yamijji

1 Yahuaajo nei nei meshi, aquiana cuana, dejja pea'ai pana jjimahuaajo, Jesosa Quito yaña tiya poa Eyacuiñajji nijje. E'e, oya Eyacuiñajji nei neiya e'e jojo nei poa. ² E'e, oya Eyacuiñajji nijje yaña poa yahuaajo nei nei meshi cuana, ojjaña aquiana cuana pana jjimahuaajo. ³ Eyacuiñajjiya oya pana mee ca'ya poa aquiana, meshi cuanaya, dejja, epona pea'ai, ojjaña pana ca'ya poa Jesosa Quitohua. Ojjaña aquiana pana jjima jjemo, chama' pome. ⁴ E'e, oya, Jesosa Quito, yaña tiitiia poa. Ohuaya eseya Eyacuiñajji ba mee cani. Jamajjeya ohuaya ba'e tiitii mee cani eseya cuana. Eyacuiñajji quea ja'a jjashahuabaqui mee cani pea'ai. ⁵ Jamatii mecajje quea apo nee neejo cuaquijjiya jeaja'a cani. Jiquio ecua cuaquijji mecajje jijinequiani jama jayojja Jesosa dejja mimishi cuana quea ja'a nee jjashahuabaqui mee cani. Eshahuaa Jesosa Quito eseja jaahuana pajea mee sa acani. Chojja. Ohuaya ojaya epeeji cuana jaahuana tiitii cani. E'e, oya cuaquijji quiijjo'yo ajja jama.

Huani, Sacaniaja bacua ejja

⁶ Oe dejja Jodea meshijo ba'e Huani bajjani Eyacuiñajjiya huoojea canaje Jesosa Quitojo huohuiya. ⁷ Eyacuiñajjiya Huani jama acanaje ba'a: —¡Poquicue miya! Ojjaña huohuiquicue jama ba'a: “Eyacuiñajjiya huoojea'yo ma cuaquijji quiijjo'yo ajja jayojja poeyani ojjaña cuana quea ja'a jjashahuabaqui meeya. Jamajjeya ¡onijje jjapeequicue!”

Jamajjeya Eyacuiñajjiya Huani huoojea canaje.

⁸ Oya Huani ma cuaquijji jayojja jama pojjeama; oya ca ca oma oe poquinaje Jesosa Quitojo huohuiya, ma cuaquijji jayojjajo huohuiya.

⁹ Eyacuiñajjiya Jesosa huoojea canaje meshi yasijje. Ohuaya ojjaña cuana quea ja'a jjashahuabaqui mee caje Eyacuiñajji. ¹⁰ E'e, oya ma cuaquijji jayojjaya poeyanaje dejja cuana nijje ba'eya. Yahuaajo ohuaya meshi cuana, dejja cuana pea'ai pana ca'ya poa. Jamatii oya dejja cuanaja ba jjima ojjaña cuana pana'oyji epo. ¹¹ E'e, oya poeyanaje Jodea meshi yasijje, ojaya huapa pojjeama cuana huasijje. Jamatii oya cajaa acanaje beca cuaa: —¡Chojja, oya Eyacuiñajji bameejji pojjeama! —poso beca cuaa acanaje.

¹² Beca cuaa ca ca Jesosa Quitoja esohui shajja'ajja canaje. Ojo jama acanaje ba'a: —E'e jojo nei oya Eyacuiñajji ese bameejji poani —acanaje beca cuaa.

Jamaya jjashahuabaquianijo, Jesosaa oya cuana Eyacuiñajji bacua cuana po mee canaje jama ba'a:

¹³ Yahuaajo eseja ejeajjiya eseja jea ca poa; eseja enaeseja eseja mejo ca poa. Jamajjeya eseja cuayani ese ejjaja bacua, Eyacuiñajji bacua pojjeama. Eyacuiñajjiya ca ca eseja oja bacua a sa acanijo ohuaya ohuaye nei eseja oja bacua po mee cani.

Esohui quea bihui nee Jesosa Quitojo

¹⁴ Jamajjeya oya Eyacuiñajji ese ba meeya poeyanaje yamijji, ese cuana nijje ba'eya. Ecuanaa oya banaje quea ca'a nee nee. Oja Chiiya oya, oja Bacua Ejja oe nei quea ca'a nee huoojea canaje meshi yasijje ese cuana jaahuana tiitijji. Ohuaya ojjaña Eyacuiñajji esohui e'e nei huohui canaje ojjaña huasijje pea'ai.

¹⁵ Huaniya ojo huohui canaje. Majoya oya ba majje taaanaje jama ba'a: —¡Bacue! Jjeya nei pea dejja quea pame nee poeje. Yahuaajo nei nei e cuaya jjimahuaajo oya yaña tiitiia poa Eyacuiñajji nijje. Jamajjeya oya quea ca'a nee nee; eya quea ca'a pishana —poanaje Huani.

¹⁶ E'e, eseja shajjama' poani. Jamatii ohuaya ojjaña cuana quea jea nee nee atiitii cani quea pame nee nee. ¹⁷ Yahuaajo nei nei esohui huohuijji Moisesiya esohui Eyacuiñajjiya ehuhui'yo cuana tehue majje ba mee ca'ya poa. Jesosa Quitohua, ma Eyacuiñajjiya huoojea'yo ojjaña jaahuanajjiya ca ca ojjaña cuana ba mee canaje Eyacuiñajjiya eseja cuana quea jea nee nee acani, ojaya esohui e'e nei ba mee cani pea'ai.

¹⁸ Eyacuiñajji Echii Ai jjacojja ba meequi ajja tii. Jamatii oja Bacua Ejja oe nei Eyacuiñajji nei pea'ai, Eyacuiñajji nijje nequi, oja Chii nijje tii. Ohuaya eseja Eyacuiñajji ba mee cani, oja Chii.

Huaniya, ma ona besameejji poaniya huohui canaje Jesosa Quitojo

(Mateo 3.11-12; Macoso 1.7-8; Noca 3.15-17)

Huaniya, ma ona besameejji poaniya Betania cuiñajji, Jodana cuei ojje mijijje nequi, ojjaña cuana Eyacuiñajji besa mee canaje. ¹⁹ Jamajjeya Jenosanena cuiñajji ba'eya Jodio dejja etii cuaa Huani que huoojea canaje Eyacuiñajji nijje emimijji cuana, Eyacuiñajjiya equi jaahuanajji cuana pea'ai. Huani ba majje huohui'ajja canaje: —¿A'ya cuae mi so'o? ¿A'a miya Eyacuiñajjiya huoojea'yo ojjaña jaahuanajji?

²⁰ —Chojja —saja'ame acanaje Huaniya—, chojja, eya Eyacuiñajjiya huoojea'yo ojjaña jaahuanajji pojjeama. Eya ca ca iña Quito pojjeama —poanaje.

²¹ —Jamajjeya ¿a'ya cuae mi oe so'o? —huohui'ajja canaje—. ¿A'a miya Enia, Eyacuiñajjija esohui huohuijji yahuajo ba'ya poa?

—Chojja —saja'ame acanaje Huaniya—. Eya Enia pojjeama.

Jamajjeya huohui'ajja ca o'oyanaje cuaa jama ba'a: —E'e. Yahuajo Moisesiya huohui ca poa Eyacuiñajjija pea esohui huohuijji nei poeje. ¿A'a miya ma esohui huohuijji neiya?

—Chojja —Huaniya acanaje.

²² Jamajjeya Jodio cuaa Huani huohui'ajja ca o'oyanaje: —¿A'ya cuae mi oe? ¿A'ya cuae mi poani so'o, de? ¡Huohuicue mo oe! Jodio etii cuaa ecuana huoojea canaje mi baa. ¿Yajja huohuiñaqui'yome acuae oe aje o que poqui o'oya majje so'o?

²³ Jamajjeya Huaniya saja'a canaje jama ba'a: —Yahuajo nei nei Eyacuiñajjija esohui huohuijjiya Isaiaa ejo huohui ca poa jama ba'a:

“Quijje esohui huohuijji poeje esohui huohuiya. Meshi quimajo huohui huicha'a huicha'a caje jama ba'a: “Emeshi mese nei poeje. ¡Jamajjeya oe apoa pocuajicue! ¡Jamajje o poeyajo, ojaya esohui quea ja'a nee shajja'ajja neinei'yocue!”

Jamaya aca'ya poa Isaiaa yahuajo —Huani poanaje.

²⁴ Jamajjeya ma Jodio dejja cuanaa Huani huohui'ajja ca o'oyanaje: —¿A'a e'e jojo nei miya Eyacuiñajjija huoojea'yo ojjaña jaahuanajji pojjeama? ¿A'a cuae mi Enia pojjeama, ma Eyacuiñajjija esohui huohuijji yahuajo ba'ya poa pojjeama so'o? ¿A'a cuae mi Eyacuiñajjija pea esohui huohuijji nei, ma ecuanaja etiiquiaa ishoa'ajja caninaje pojjeama so'o? ¿Achajjajo acuaeya oe miyaya ecuana, Jodio cuana, besa meeña Eyacuiñajjijo so'o? —poanaje cuana.

²⁵ Huaniya jama acanaje ba'a: —Eyaya miqianaya Eyacuiñajjijo besa meeña cuei enajo. Pea dejja jiquio tiijo nequi. Jjeya oya miqianajaya ba jjima. ²⁷ Oya quijje pishana miqianajaya eba poaje Eyacuiñajjija huoojea'yo ojjaña jaahuanajji. Oya ca ca oe nei quea ca'a nee nee nequi. Eya ca iña quea ca'a nee pishana. Jamajjeya aje oe eya Jesosa Quito cojja neijo nequi sa poajja. Eya quea bicho, de.

²⁸ Jamaya poanaje Huani Betaniajo, Jodana cuei ojje mijijje nequi, ojjaña cuana Eyacuiñajjijo besa mee canijo.

Jesosa Quito Eyacuiñajjija huoojea'yo ojjaña cuanaja mimishijo mano'yohua

²⁹ Majoya mecahuajje Huaniya ojjaña huasijje esohui huohui ca o'oyanajo, Jesosa o que poeyanaje. Huaniya Jesosa ba majje ojjaña cuana huohui neinei canaje jama ba'a: —¡Bacue oe, oya poeyani Jesosa, Eyacuiñajjija huoojea'yo! Oya manaje'yo ojjaña cuanaja mimishi cuijea'yoyji. E'e, Eyacuiñajji nijje emimijji cuaa ñajjaja cuia majje Eyacuiñajji yasijje dahua cani oya mimishi cuanajo quene'ama epo meeji. Ñajjaja jayojja jama poaje'yo Jesosa; manaje'yo ojjaña cuanaja mimishi cuijea neinei'yoyji —Huani poanaje—. ³⁰ E'e, yahuajo pishana eyaya miqianaya huohuinaje ojo jama ba'a: Jje-

ya nei pea dejja quea pame nee nee poeje. Yahuajo nei nei e cuaya jjimahuajo oya yaña tiiya poa Eyacuiñajji nijje. Jamajjeya oya quea ca'a nee nee; eya quea ca'a pishana —Huani poanaje.

³¹ —E'e, yahuajo oya ecuea ba jjima poa. Jamatii Eyacuiñajjija e huoojea jjimahuajo huohui canaje jama ba'a: “¡Dejja cuana besa meecue enaje ejo! Besa meeñaajo, miyaya baje oe dejja. Ecuea Edojjoshahua Pame huia' jama ma dejja sapa biajje cuabesa ba'eje; jjapashineijje ba'eoqueje'yo. Maya ecuea ecue Bacua Ejjja, ecue huoojea'yo. Ohuaya ojjaña miqiana que Edojjoshahua Pame dobiqui mee caje'yo, miqiana quea ja'a nee nee ejjashahuabaqui meeji” eya acanaje Eyacuiñajjija —Huani poanaje.

—E'e, eyaya e'e jojo nei banaje jama ba'a: Eya Jesosa besa meeñaajo, eyatahuatahua jjaca'apejoquinaje. Eyacuiñajjija Edojjoshahua Pame huia' jama o sapa biajje cuabesa ba'enaje. Jjapashineijje ba'eoquenaje. Jamajjeya jjeya oya ecuea eba nei nei, Jesosa. Yahuajo miqianajaya oya ba jjima. Jamajjeya eya poeyanaje ojjaña Eyacuiñajjijo besa meeya. Miquianaya oya Eyacuiñajjija huoojea'yo ojjaña jaahuanajji ba meeya eya poeyanaje pea'ai. ³⁴ Jamajjeya eyaya miqianaya huohui neineiaña: E'e jojo nei nei eyaya oya banaje. Jesosa ca ca oe e'e jojo nei Eyacuiñajjija Bacua Ejjja oe nei —poanaje Huani Jodio cuana nijje.

Jesosaa iyaa canaje beca dejja onijje e'ani tiitijji, o shajja'ajjaji

³⁵ Majoya mecahuajje Huaniya, ma ona besameeji poaniya jomajo, Jodana cuei sahuajo nequiya esohui huohui canaje oja epeeji nijje, becanejjijji pea'ai nijje.

³⁶ Jesosa jjayejjequiani ba majje Huaniya oja epeeji cuana huohui canaje jama ba'a: —¡Bacue Jesosa! Oya Eyacuiñajjija huoojea'yo. Oya manaje'yo ojjaña cuanaja mimishi cuijea'yoyji.

³⁷ Huanija esohui Jesosajo shajja'ajja majje oja epeeji becanejjijji pea'ai Jesosa nijje poquinaje. ³⁸ Jesosaa ejiojjijje poquijeya Huanija beca epeeji o quiquishijji poquije bajea canaje. Ba majje huohui'ajja canaje: —Epeeji cuana, ¿ajeo miya enijje poeyani?

—Esohui huohuijji —saja'a canaje—, ecuana poeyanaje mi baa; mi shajja'ajja sa poani. ¿Achejo ba'e miya? —poanaje.

³⁹ —E'e —Jesosa poanaje—, ¡ocue poe'ajja! ¡Cua'a, enijje po'yocue!

Jamajjeya Jesosa nijje poquinaje equi yasijje, o ba'e yasijje. Onijje aninaje ma pojajajo, eshequi oquequijajo; o shajja'ajjaji po'yonaje oya cuana, ma bajjani ba'a: Anesi oja epeeji nijje pea'ai. ⁴⁰ E'e, Anesi pea dejja nijje Huanija ehuhui shajja'ajja majje Jesosa nijje poquinaje. Anesi ca ca Simohuija echahua mese, ma quijje bajjani canaje Penoja echahua mese. ⁴¹ Jamajjeya mecajeahua nei Anesiya oja o'i sa'ajja canaje. Ba majje huohui canaje: —O'i, eyaya Eyacuiñajjija huoojea'yo ese jaahuanajji banaje, Jesosa Quito.

⁴² Majoya Anesiya oja o'i Simohui bajjani Jesosa que dojo canaje. Simohui ba majje Jesosaa huohui'ajja ca-

naje jama ba'a: —Epeeji, miya ecuea eba. Miya Huani-ja bacua ejja, Simohui bajjani. Eyaya miya bajjaniye'yo ecuea esohuijo Sepa bajjani —poanaje. Jienoja esohuijo Peno bajjani canaje, Ese Ejjaja esohuijo Mei bajjani.

Jesosaa iya canaje pea cuana onijje e'ani tiitiijji, o shajja'ajjaji

⁴³ Majoya mecahuajje, mecajjeahua nei Jesosa poquinaje Janinea meshi yasijje, Jodana cuei ojje miji yasijje. Poqui jeahuua Penipe ba canaje. Ba majje iyaa canaje: —Penipe, ꞑocue poe'ajja, enijje po'yocue; ecuea epeeji po'yocue! —Jesosaa acanaje; o que poquiajo ojaya epeeji pojji aca'yonaje.

⁴⁴ Penipe, Peno, Anesi pea'ai ca ca oe Betesaida cuiñajji ba'e. ⁴⁵ Jamajjeya Penipeya oja epeeji Natanaeni sa'ajjaqui canaje. Ba majje huohui canaje: —Ecuea epeeji, ecuanaa Eyacuiñajji huojea'yo ese jaahuanajji banaje. Ojo Eyacuiñajji esohui huohuijji yahuajo nei nei ba'ya poaa, Moisesiya pea'aya tehue ca poa, ma ojjaña Jodio cuaa ishoo'ajja caniya. Oya Jesosa bajjani, Joseja bacua ejja, ma Nasanena cuiñajji ba'enaje. Eyaya maya banaje, de —poanaje Penipe.

⁴⁶ —¿A'a oya Nasanenajo ba'enaje? Jomajo pa jjaja chama' dejja quea pame —poanaje Natanaeni.

—Chojja —poanaje Penipe—, ꞑoecue, oya bahua-cue!

⁴⁷ Jamajjeya oya cuana poquinaje Jesosa baa. Majoya Natanaeni poeje ba majje Jesosa onijje miminaje jama ba'a: —E'e Natanaeni, miya Jodio e'e jojo nei. Eyacuiñajji shajja'ajjaji poani. Miya ca ca oe sijje po ajja nei nei pea'ai.

⁴⁸ Ma shajja'ajja majje Natanaeni jama poanaje ba'a: —¿A'a eya miquea eba? ¿Ache shono acuaeya miyaya eya banaje so'o? —poanaje.

—Natanaeni, miya ecuea eba yahuajo. Penipeja iyaa jjimahuajo, iquena acui yajjanajo ani eyaya miquea ejjashahuabaquijji banaje —Jesosaa poanaje.

⁴⁹ Jamajjeya Natanaeniya acanaje: —Esohui huohuijji, e'e jojo nei miya Eyacuiñajji Bacua Ejja oe nei poani tii. E'e, ꞑmiya Jodio cuanaja Emeshi Mese nei!

⁵⁰ Jesosaa oya huohui canaje: —Eyaya miya huohuinaje jama ba'a: “Eyaya miya banaje iquena acui yajjanajo ani”. Jamajjeya ecuea esohui shajja'ajja majje miya jjashahuabaquinaje jama ba'a: “E'e jojo nei miya Eyacuiñajji Bacua Ejja”. Jamajjeya miyaya baje Eyacuiñajjiya eya ma dejjaja ba jjima amee caje'yo. Cuanaya Eyacuiñajji esohuidojojji cuana nequioqueje e jaahuanaa, ojjaña Edoe Mese jaahuanaa. Jamaya miyaya baje'yo, Natanaeni, enijje jjapeequianiyo —Jesosaa poanaje.

Oe dejja jjahuanaquinaje Cana cuiñajji

2 Majoya beca cahuime po majje oe dejja jjahuanaquinaje Canajo, Janinea meshijo. Ejjahuanaquijji quea huiso cuana iyaa canaje ojee ijja'ijjiaa. Jesosaja enaese Mania iyaa canaje pea'ai. ² Jesosa o shajja'ajjaji cuana nijje poeyanaje pea'ai jjahuanaquije baa, ojee ij-

ja'ijjiaa pea'ai. ³ Ojee ijja'ijjiaa anijo, acuijjajja na ishijeyo canaje cuaa. Jamajjeya Jesosaja enaese onijje miminaje jama ba'a: —Jesosa, bacue, acuijjajja na ishijeyo canaje cuaa. Oe poanaje. ¿Ae e'ishi'yojji?

⁴ —Ecue nae, ¿yajjajo acuae moya huohui'ajjaña acuijjajja najo? ¡Ishoa socue oe! Quijje pishana eyaya oya cuana asahuaje —Jesosaa poanaje.

⁵ Jamajjeya ojaya enaeseya echacojji cuana huohui canaje jama ba'a: —¡Jesosaja esohui jayojjaya nequiaa oe acue! —poanaje Mania.

⁶ Jomajo me oeje oe, 6 meshimisi ena nequijji quea quemo nee nee, quea ao nee nee yani, 60 litros shojji. Ma meshimisijo ena nequia cani eme shacua huicha'a huicha'ajji. Jamaya oya cuaa acanaje ijja'ijjiaa jjimahuajo. ⁷ Jamajjeya Jesosaa echacojji cuana jama acanaje ba'a: —¡Ena shocue meshimisi ai cuana huasijje! —poanaje.

Echacojji cuana: —E'e —poanaje.

Meshimisi ai cuana huasijje ena sho canaje. Cuatajea mee canaje. ⁸ Jamajjeya cuatajea cajo, Jesosaa echacojji cuana jama acanaje ba'a: —E'e. ¡Jjeya oe pojji dojocue equi mese yasijje!

Jamajjeya oe pojji dojo canaje e'ishi mee'ajjaji. ⁹ Ma ena ishi'ajja canaje equi meseya. Jamatii ojaya ba jjima jiquio eteohuejjajo nequi ena Jesosaa acuijjajja na pojji acanaje. Echacojji cuanaja eba ojaye nei Jesosaa eteohuejjajo nequi ena acuijjajja na pojji aca'ya poa; pea cuanaja ba jjima. ¹⁰ Jamajjeya equi meseya ishi majje joya ejjahuanaquijji iyaa canaje. Huohui canaje jama ba'a: —Epeeji, jiquio acuijjajja na quea pame nee nee. Pea cuaa acuijjajja na quea pame, quea biquia nee ishi mee cani ebionei. Majoya ojjaña jeje majje acuijjajja na quea biquia pishana quia cani. Miyaya ca ca oe acuijjajja na quea biquia nee, quea pame nee nee quijje nei ishi meeña —poanaje e'equi mese.

¹¹ Jamaya acanaje Jesosaa Janinea meshijo, Canajo. Jamaya ohuaya ma dejjaa ajjima acani acoo canaje. Ba majje ojjaña cuana jama poanaje ba'a: —E'e jojo nei Jesosa quea ca'a nee nee. Ohuaya ojjaña acani, ma dejjaa ajjima acani pea'ai.

O shajja'ajjaji cuana pea'ai jama poanaje ba'a: —E'e jojo nei Jesosa Eyacuiñajji huojea'yo ojjaña jaahuanajji, Quito.

¹² Majoya Jesosa Capenaoma huasijje poquinaje. Oja nae, oja chahua cuana, ojaya epeeji cuana pea'ai onijje poquinaje. Jomajo aninaje cuana oe pojji cahuime.

Eyacuiñajji equi yasijje poqui majje Jesosaa aquiana quijji cuana huoejacuayajja canaje

(Mateo 21.12-13; Macoso 11.15-18; Noca 19.45-46)

¹³ Quijje pishana ojjaña Jodio cuana Jenosanena huasijje poquinaje quea bihui nee ojee ijja'ijjiaa ma shejo ba'a esohuidojojji cuaa yahuajo Ejito meshijo Jodioja ebacua cuana cuia'yo jjima shejo. Ma epajea'yojji pojjeamajo jjachichuquinaje. Jamajjeya Jesosa pea'ai poquinaje Jenosanena huasijje. Poe majje Eyacuiñajji equi yasijje poquinaje. ¹⁴ Dobiqumajje Jesosaa ba canaje quea huiso dejja cuaa aquiana quia cani; ana'ai

yahue cuana, ñajjajja cuana, huia' cuana pea'ai quia cani. Bejjo pea bejjo sosejje quia caqui ba canaje pea'ai. ¹⁵ Ba majje Jesosaa jono ecuiasejjajjajji iña canaje. Dejja aquiana quiajji cuana, ñajjajja cuana, ana'ai cuana pea'ai cuahuoojeacuayajea canaje esecue yasijje, ojjaña. ¹⁶ Bejjo pea bejjo sosejje quiajji cuanaja bejjo nequijji cuana jeapajjajea canaje; bejjo jjahuojjojeajeaqui canaje. Huia' quiajji cuana Jesosaa huohui canaje jama ba'a: —Jiquio equi ca ca ecue Chii nijje emimijji. Aquiana quiajji pojjeama equi. ¡Miquea aquiana cuana dojo'yocue esecue yasijje! ¡A'a jja oe Eyacuiñajjijja equi aquiana quiajji equi jayojja jama ajji! —Jesosa poanaje.

¹⁷ Ma ba majje ecua, Jesosaja epeeji cuana, ojee jjashahuabaquinaje jama ba'a: —E'e, Eyacuiñajjijja esohui huohuijijya yahuajo nei nei tehue ca poa jama ba'a:

“Ecue chii, eya jjashahuaba neinei quiani miquea equi jaahuanajji. Jamajjeya mimishi cuaa eya niñeba cani”. Jama tehuemeya aca poa yahuajo nei. Oya cuaa Jesosajo tehue ca poa, de —poanaje Jesosaja epeeji cuana.

¹⁸ Jamajjeya Jodio cuana Jesosaa nijje quea quene poanaje, oya Eyacuiñajjijja huoojea'yo pojjeama posojo onijje mimijajinaje jama ba'a: —¿Aya acuae mi huoojea canaje ecua Eyacuiñajjijja equijo anijo huoojeacuayajea? ¿A'a cuae miya Eyacuiñajjijja huoojea'yo nei? ¡Caba'ajja sahua! ¡Ma dejjaa ajjima acani a'ajja socue ecuanaja ebajji, Eyacuiñajjijya e'e jojo nei miya a'a huoojea canaje ebajji!

¹⁹ Jesosaa oya cuana saja'a canaje: —¡Bacue! Miquiana jiquio equi jeabichajea'yajo eyaya jiquio equi iyaje o'oya pea beca peejjima cahuime.

²⁰ —Chojja, de —Jodio cuana poanaje—. Quea huiso nee nee, 46 shequiajame jiquio equi iya canaje cuaa. ¿Achajja acuae equi jeabichajea majje miyaya iyaje o'oya pea beca peejjima cahuime? ¡Chojja, de! —poanaje.

²¹ Jamatii Jesosaa Eyacuiñajjijja equijo pojjeama miminaje; ojaya eyamijo jjashahuabaquiani. ²² E'e, quijje Jodio cuaa Jesosaa quecua'yo majje, Eyacuiñajjijya oya shequi mee caje o'oya pea beca peejjima cahuimejo. Jamajje quijje Jesosaa shequi o'oyajo, ecua o shajja'ajjajji cuana jiquio esohuijo jjashahuabaquije. Jama poaje ba'a: —E'e de, Eyacuiñajjijja esohui e'e nei; Jesosaja ehuhui pea'ai e'e nei —poaje quijje.

²³ Jamajjeya Jenosanena huasijje Jodio cuana ojee jja-chichaquinaje. Quea bhui nee ijja'ijjianaje esohuidojojijya yahuajo nei Jodioja ebacua cuana cuia'yo jjima shejo, ma pajea'yo jjima yajji. Jesosaa pea'ai Jenosanenajo aninaje. Jomajo Jesosaa quea huiso ma dejjaa ajjima acani acanaje. Ba majje quea huiso cuana poanaje: —¡E'e jojo nei Jesosaa Eyacuiñajjijja huoojea'yo ojjaña jaahuanajji! —poanaje cuana.

²⁴ Jamatii Jesosaja eba nei nei ojjaña dejja cuanaja ejjashahuabaquijji. Quea tai, epeeji e'e jojo nei pojjeama beca cuana. Jamajjeya ohuaya ojjaña quea ja'a nee huohui jjima jama ba'a: —E'e jojo nei eya ca iña jiquio Eyacuiñajjijja Bacua Eja —jamaya huohui jjima so'o Jesosaja.

Jesosa miminaje Nicodemo nijje

3 Majoya oe dejja Jesosaa que poeyanaje, oya Nicodemo bajjani. Oya Jodio etii cuana nijje pea Jodio cuana huoojeajji poani, Paniseo dejja cuana jama jjashahuabaquime poani. ² Oya, Nicodemo Jesosaa que poeyanaje mecajje quehuajje. Jama acanaje ba'a: —Esohui huohuijji, Eyacuiñajjijya miya ameesahua cani ma dejjaa ajjima acani. Jamajjeya ecuanaja eba Eyacuiñajjijya miya huoojea canaje ecua sohuihuohuiya.

³ Jesosaa oya huohui canaje Eyacuiñajji nijje eba'e tiitii'yojji; jama poanaje ba'a: —Nicodemo, eyaya miya e'e jojo nei huohuiaña: ¡Bacue! Jiquio ecua epona jamejoqui majje bacua cuayani jayojja jama Eyacuiñajjijya miya cacuaya mee ca o'oyahua jiquio ecua esho'i cuayani jama. Jamajjeya Eyacuiñajjijya miya ebacua sho'i jayojja jama acaje'yo, miya ba'e tiitii mee caje'yo onijje, ojjañaja Emeshi Mese nei nijje —Jesosaa poanaje.

⁴ —Chojja de, ¿a'a cuae se dejja etii cuaya o'oyame so'o? —Nicodemohua acanaje—. ¿A'a cuae eseja enaeseja yone yasijje ba'edobiqui o'oya majje ebacua jama cuaya o'oyame so'o? Chojja, de —acanaje Nicodemohua.

⁵ Jamajjeya Jesosaa oya huohui ca o'oyanaje: —Nicodemo, e'e jojo nei ecua ehuhui jama ba'a: Jiquio ecua ebacua esho'i cuayani jama Eyacuiñajjijya miya cacuaya mee ca o'oyahua. Jaja Eyacuiñajji shajja'ajjajji poani enajo besa mee majje, Eyacuiñajjijja Edojjoshahua Pameya oya quea pame jjashahuaba tiitiiqui mee majje pea'ai miya pea jjashahuabaquime poaje'yo. Oya Eyacuiñajji nijje ba'e tiitii'yo. Jamaya po ajjajo ca ca Eyacuiñajji nijje eba'e tiitii'yoji pojjeama eyajo.

⁶ E'e Nicodemo, ojjaña cuana enaeseja mejo bacua cuayani yahueja jea, oja chii jayojja yamijji. Jaja Eyacuiñajjijja Edojjoshahua Pameya pea jjashahuabaquime po mee ca'yani ca ca Eyacuiñajjijja Edojjoshahua Pame onijje nequi —Jesosaa poanaje—. ⁷ Eyaya miya huohuinaje e'e jojo nei ebacua esho'i cuayani jama Eyacuiñajjijya miya cacuaya mee ca o'oyahua. Jamatii a'a jama jjashahuabaquijji ba'a: “Chojja de, ¿yajja epojji?” ⁸ Miya-beni shajja'ajjaña; beni baña pea'ai acui iña dojo cani. Jamatii ache huesha beni poani miquea ba jjima; achacua poquije miquea ba jjima pea'ai. Jiquio ecua beni achacua poquije ba jjima jayojja jama miquea ba jjima pea'ai ache shono, achejo pojja'a Eyacuiñajjijja Edojjoshahua Pameya dejja pea jjashahuabaquime po mee ca'yani. Jamaya miquea eba pojjeama. E'e, Eyacuiñajjijya miya cacuaya mee ca o'oyahua ebacua esho'i cuayani jayojja jama —Jesosaa poanaje.

⁹ —E'e pojja'a. ¿Achajja acuae ebacua esho'i cuayani jayojja jama epojji so'o? —huohui'ajja canaje Nicodemohua.

¹⁰ —Nicodemo, miya Jodio esohui huohuijji; Eyacuiñajjijja esohui yahuajo nei etehue'yo huohuijji. Jamajjeya ¿yajjajo miquea ba jjima ebacua esho'i cuayani jayojja jama epojji eba'e'jji pea ba'eme epo'yojji? —Jesosaa poanaje.

¹¹ —Eyaya, Huaniya ma ona besameeji poaniya pea'ai miya e'e jojo nei huohuiaña jama ba'a: Ma ecuanaja eba poa huohuiaña pea ba'eme epo'yojji; ma ecuaa yahuajo banaje pea'ai huohuiaña. Jamatii miya, pea Jodio esohui huohuiji cuana pea'ai ecuanaja esohui jama poani ba'a: “Chojja, siajje oya cuana poani”. E'e, miqianaaya ecuaa siajjepojji poso aña —Jesosa poanaje—. ¹² E'e, eyaya miya huohuiaña eba cua esho'i cuayani jayojja jama Eyacuiñajji Edojjos-hahua Pameya miya pea jashahuabaquime po mee caje'yo, Eyacuiñajji niije eba'e tiitii'yojji. Jamatii ecuea esohui quea quehua miquea. Jamajjeya eyaya miya Eyacuiñajji ejjashahuabaqui'yoyji eyajo huohuiajo, ¿a'a ecuea esohui quea ja'a poaje miquea? Chojja, quea quehua poaje pea'ai. ¹³ ¡Shajja'ajjacue ecuea esohui, Nicodemo! Deja cuana eyahuasijje dobiqui'yo majje meshi yasijje epoe o'oyajji pojjeama ojjaña eyajo ba'e huohuiya, Eyacuiñajji ejjashahuabaqui'yoyji pea'ai epoe o'oyajji pojjeama huohuiya. Eya ma ojjaña Edoe Mese eyajo ba'e'yonaje. Eya eyajo ba'e poeyanaje meshi yasijje. Jamajjeya eyaye nei baña ojjaña eyajo, Eyacuiñajji ejjashahuabaqui'yo ecuea eba pea'ai —Jesosa poanaje—. ¹⁴ Cuanaya eya, Eyacuiñajji huoojea'yo ojjaña jaahuanajji ba'ehuanasohuajea caje'yo cuaa. E'e, yahuajo nei nei meshi jabojo Moisesiya baa peyo jayojja acui ajo ba'ehuanasohua ca poa ojjaña ebaaji; ojjaña joya peyoja ijia baa peyo jayojja ba cajo, Eyacuiñajji huaquia mee ca'ya poa. Jiquio ecua Moisesiya baa peyo jayojja ba'ehuanasohua ca poa jayojja jamaya quijje eya ba'ehuanasohuajea caje'yo cuaa acui ecueata'apeejo ojjaña mimishijo mano'yohua, mimishi cuijea'yoyji sosejje. ¹⁵ Jamajjeya Eyacuiñajjiya ojjaña ba'e tiitii mee caje'yo onijje, ca ejo jama jashahuabaquiajo ba'a: “E'e jojo nei ohuaya ecuea mimishi cuijea neinei caje'yo”. E'e, enijje japeequiajo, Eyacuiñajji quea nee nee epo mee'yoyji pojjeama cuaquijo —Jesosa poanaje.

¹⁶ —E'e Nicodemo —Jesosa poanaje pea'ai—, Eyacuiñajjiya ojjaña cuana ojjaña meshijo ba'e quea jea nee nee acani. Jamajjeya eya, oja Bacua Ejja oe nei huoojea canaje ojjaña mimishijo mano'yohua. Jamajjeya ojjaña joya e'e jojo nei enijje japeequiani Eyacuiñajjiya ba'e tiitii mee caje'yo onijje eyajo; quea nee nee epo tiitii mee'yoyji pojjeama. ¹⁷ Ecue Chijja eya huoojea jima ojjaña tecuea. Ecuea ejjashahuabaqui'yoyji jama pojjeama ba'a: “Ojjaña cuana quea mimishi nee poanajo, quea nee nee po meeje'yo; quea nee tii tii”. Chojja, Eyacuiñajjiya eya, oja Bacua Ejja oe nei onijje eyajo ba'ya poa meshi yasijje huoojea ca poa. Ojjaña mimishi cuijea'yo majje enijje ba'e tiitii meeje'yo —Jesosa poanaje—. ¹⁸ Jamajjeya ojjaña joya e'e jojo nei enijje japeequiani Eyacuiñajjiya huohui caje jama ba'a: “Miquianaya ecue Bacua Ejja epeeji e'e jojo nei poanajo, mimishi cuijeaje'yo. Quea nee nee epo mee'yoyji pojjeama cuaquijo” Eyacuiñajjiya acaje —Jesosa poanaje—. Pea cuana enijje japeequi ajjajo ca ca Eyacuiñajjiya yahuajo jama acaje ba'a: “Miquianaya ecue Bacua Ejja oe nei niije japeequi ajjajo cajaa aje'yo, mimishi

cuana cuijea'yo jima aje'yo. Jamajjeya quea nee tii tii poaje'yo” Eyacuiñajjiya acaje —Jesosa poanaje—. ¹⁹ E'e, Eyacuiñajjiya eya, oja Bacua Ejja huoojea canaje esohui e'e nei huohuiya, ojjaña cuana quea jashahuabaqui ja'a nee po meeje'yo. E'e, eya cuaquijji jayojja jama poanajo ojjaña quea jashahuabaqui ja'a po meeje'yo. Jamatii quea huiso cuana ecuea esohui shajja'ajja sa po ajja, mimishi cuana ojaya quea boti nee jojo. Quea mimishi nee ba'e, de. Jamajjeya Eyacuiñajjiya oya cuana cajaa acaje'yo. Quea nee tii tii poaje'yo cuaquijo.

²⁰ Quea mimishi ba'eja boti'ama Eyacuiñajjiya esohui e'e nei; cajaa acani quea mimishi ba'yaniya jjejojo. Jamajjeya enijje japeequi ajja. Quea mete jashahuabaquiani jama ba'a: “¡Jesosa mo tecuea caje ecue mimishijo!” ²¹ Ojjaña joya quea pame nee ba'eya ca ca Eyacuiñajjiya esohui quea boti nee acani. Enijje japeequianajo, eyaya oya cuana quea jashahuabaqui ja'a po meeje'yo. Jamajjeya oya cuana jama poani ba'a: “E'e, Eyacuiñajjiya eya quea pame ba'e meesahua cani ojaya esohui jayojja” poani —Jesosa Nicodemo niije mimipajeana.

Huaniya ma ona besameeji poaniya Jesosajo huohui ca o'oyanaje

²² Majoya Jesosa Jenosanenajo ani poquinaje o shajja'ajjaji cuana niije Jodea meshi yasijje, pea cuiñajji cuana huasijje. Jomajo nequi cuana Jesosaa sohuihuohui canananaje. O shajja'ajjajiya deija cuana besa mee canananaje Eyacuiñajjiyo. ²³ Huaniya jomajo deija besa mee canaje pea'ai Enoni cuiñajjiyo, Sanima cuiñajji pejejo pea'ai ena quea doejo. Ojjaña pojajo quea huiso deija cuana, ponaña pea'ai Huani que poquinaje. Eyacuiñajjiyo enajo besa mee canaje. ²⁴ E'e, ma pojajo emeshi mese Enodeja Huani jeanobia jima poanaje. ²⁵ Jamajjeya oe Jodio dejjaa Huanija epeeji cuana mimicuijje canaje. Jama poanaje ba'a: —¿Ache dejjaa acuae mi Eyacuiñajjiyo enajo besa mee majje eseya e'e jojo nei quea bojea po mee caje'yo so'o? ¿A'a Huaniya pojja'a? ¿A'a cuae peaa besa mee cajji, Jesosa shajja'ajjajiya pojja'a besa mee cajji? —Jodio poanaje.

²⁶ Jamajjeya Huani que poquinaje ojaya epeeji cuana, huohui'ajjaa jama ba'a: —Esohui huohuiji, ma deija joya yahuajo minijje nequinaje cuei ojje mijijje, ma ojo miyaya jama huohuinaje ba'a: “Oya Eyacuiñajjiya huoojea'yo ojjaña jaahuanajji”, maaya jjeja o shajja'ajjaji niije onaya besa mee cani; ojjaña cuana aje oe jjeja o que poquiani. Jesosa quea huiso nee nee Eyacuiñajjiyo besa mee cani. ¿Apiojji shai? —poanaje Huanija epeeji cuana.

²⁷ Huaniya oja epeeji cuana saja'a canaje: —¡A'a quea yeno pojji! Jamaya Eyacuiñajjiya oya pea cuana besa mee cani. Yahuajo quea huiso deija e que poeyanaje; Eyacuiñajjiya oya cuana huoojea canaje. Jjeja ca ca ojjaña cuana Jesosa que poquiani; Eyacuiñajjiya oya cuana huoojea cani. ²⁸ Miquiaaya ecue sohui yahuajo shajja'ajjanaje. Jama poanaje ba'a: “Eya Eyacuiñajjiya huoojea'yo ojjaña jaahuanajji pojjeama. Eyacuiñajjiya

eya huoojea canaje ebionei Jesusajo huohuiya". ²⁹ E'e —Huani poanaje—, Jesusajo jama jashahuabaquicue ba'a: Ejjahuanaquijji, epona yahueja ehuanase poaje'yo. Jamatii yahueja epeejiya poe majje jahuanaquiequi ba cani. Yahue ojaya ehuanase nijje mimiani shajja'ajja majje quea bihui nee poani ojaya epeeji. Jiquio ecua yahueja epeeji o ba majje quea bihui nee poani jayojja jama eya Eyacuiñajji huoojea'yo ojjaña jaahuanajji Jesusa bajjani ba coo majje quea bihui nee nee poani; eya Jesusaja epeeji. ³⁰ ¡Ojjaña cuaa oya cashajja'ajja tiitii cahua! Quijje ca ca ojjaña cuana e que poepaje'yo. Jamatii capoahua —poanaje Huani, ma ona besameeji poani.

³¹ ¡Bacue! Eyacuiñajji huoojea'yo ojjaña jaahuanajji eyajo tii ania poa, meshi yasijje poeyanaje. Jamajjeya oya ojjaña huoojea'yojji poani tii; ohuaya e'e jojo nei Eyacuiñajji ejjashahuabaquijji ba mee cani. Huani ca ca jiquiojo anija mejo, dejjaja jea. Jamajjeya aje oe dejja, oja chii jayojjaya. Dejja jama mimiani. Jamajjeya Eyacuiñajji esohui oe pojji ba mee cani, Huaniya.

³² Eyacuiñajji huoojea'yo ojjaña jaahuanajji ca ca Eyacuiñajji nijje eyajo ania poa. Jamajjeya ohuaya jama huohui cani ba'a: "Eyacuiñajji ejjashahuabaquijji ecuea eba nei nei. Maya eyaya miya huohuiña". Jamatii ojaya esohui shajja'ajja sa po ajja beca cuana. ³³ Ojjaña joya e'e jojo nei oya shajja'ajja sa poani ca ca jama poani ba'a: "Eyacuiñajji esohui e'e nei; ¡Cashajja'ajja'yahua!" ³⁴ E'e, Eyacuiñajji huoojea'yo ojjaña jaahuanajji, Jesusaa Eyacuiñajji esohui huohui cani e'e jojo nei. Eyacuiñajji Edojjoshahua Pameya oya huohui meesahua cani; quea ja'a nee ameesahua cani tii tii. ³⁵ Eyacuiñajji oja Bacua Ejja quea jea nee nee acani tii. Jamajjeya oya jama poani Jesusa nijje: —Miya ecuea ecue Bacua Ejja quea jea nee nee. ¡Jamajjeya ojjaña huoojea'yojji pocue tii, meshijo, eyajo pea'ai! —poani Eyacuiñajji.

³⁶ Jamajjeya ojjaña joya e'e jojo nei Jesusa nijje jjapeequiani, Eyacuiñajji Bacua Ejja shajja'ajja cani pea'ai onijje ba'e tiitii mee caje'yo eyajo. Ojjaña joya o shajja'ajja sa po ajja ca ca onijje eba'e mee'yojji pojjeama. Eyacuiñajjiya oya cuana cajaa acaje'yo; quea nee nee poaje'yo tii cuaquijo.

Epona Samania meshijo ba'e jjapeequinaje Jesusa nijje

4 Jamajje Jesusa Jodea meshijo ani quea huiso dejja cuana o shajja'ajjaa poeyanaje, Eyacuiñajji besa meeya pea'ai. Jesusa nijje jjapeequinaje quea huiso nee nee. Majoya aje oe onaaya Jodio esohui huohuiji cuana, Paniseo cuana pea'ai huohui canaje jama ba'a: —Jesusaja epeeji cuana quea huiso nee nee; Huaniya epeeji ca ca oe pojji —jamaya poanaje pea cuana.

Ma shajja'ajja majje Paniseo cuana quea quene poanaje Jesusa nijje. Jjashahuabaquinaje jama ba'a: —Ecuana quea huiso epeeji sa poani Jesusaja epeeji huisoajja —poanaje. ² (Jamatii Jesusa shajja'ajjaji cuaa Eyacuiñajji enajo besa mee canaje cuana, Jesusa que poeyajo. Jesusaja ca ca pea cuana Eyacuiñajji besa mee jjima.) ³ Jamajjeya Paniseo cuana onijje quea que-

ne ba majje Jesusa Jodea meshijo ani poqui o'oyanaje Janinea meshi yasijje, ecuaa nijje poquinaje.

⁴ Janinea meshi yasijje ejiojji poquije Samania meshijo aniñajji pejeje Jesusa jomishoca aninaje ena eteohuejja quea doe pejeje. Jomajo yahuajo nei nei Jodio etiquianaa Jacobohua ma meshijo que quia ca poa oja bacua ejja Jose. ⁵ Ma quejo yahuajo nei nei Jacobohua teo mee ca poa ena eteohuejja quea doe nee nee. Jamajjeya Jesusa ma ena eteohuejja huasijje poeyanaje eshequi biacojjaji nequijo. Jesusa hueahuea majje anioquenaje ma ena eteohuejja pejeje ejomishocajji. ⁷ Anioque majje Jesusaa ecuaa acanaje jama ba'a: —¡Poquicue miqianaya Sica huasijje bobi jjesheya!

Ecuana poquiajo oe Samania epona poeyanaje ena eteohuejja huasijje ena jjequisohuaa jonojo. Jesusaa oya huohui canaje jama ba'a: —Epona, ¡che mo ena quiacue e'ishijji! —poanaje.

⁹ Jodio cuanaja Samania cuana boti'ama nei. Samania cuana nijje mimi ajja, ojee ijji'ijji ajja pea'ai Jodio pojjeama jjejojo. Jamajjeya ohuaya Jesusa saja'a canaje: —Miya Jodio dejja; eya ca ca Samania pona. Jamajjeya ¿apiojji miya enijje mimiani enajo, ena quiajji? —poanaje Samania pona.

¹⁰ —E'e —Jesusa poanaje—, eya miquea ba jjima. Eyacuiñajji ejjashahuabaqui'yojji quea pame nee miquea ba jjima pea'ai. Maya miquea eba jojjemo miya enijje jama mimime pome ba'a: "¡Che mo oe ena quiacue e'ishijji!" Miya jama enijje emimi jojjemo eyaya miya quiame ena naba taja'ama epo'yojji tii tii —Jesusa poanaje.

¹¹ —E'e pojja'a —epona poanaje—, ena eteohuejja quea doe nee nee nequi. Miquea chama' ena ejjequisohuajji. Jamajje ¿achejo acuae ena nequi, ma ena ishi majje eya quea naba taja po maja ajja epojji? ¹² Eseyaya etiquianaa Jacobohua jiquio ena teohuejja mee ca poa yahuajo nei. Ohuaya oja bacua cuana, oja ñajjaji cuana, pea huo cuana pea'aiya ishi mee majamaja ca poa jiquio ena. Majoya ojjaña ecuaaya jiquio ena ishi majamajña. ¿A'a cuae miquea pea ena eba? ¿Achejo nequi pea ena quea pame nee nee? Jacoboja ba jjima poa. Miya pojja'a quea jashahuabaqui ja'a nee nee. ¿A'a Jacobo quea jashahuabaqui ja'a pishana? —huohui'ajja canaje eponaa.

¹³ —Epona —Jesusaa huohui canaje—, ojjaña miqianaya jiquiacua poeyani ena ishiya. Jamatii ishi majje quea naba taja po o'oyani. ¹⁴ Eyaya pea ena quiaje ojjaña e'ishijji. Ma ena ishi majje quea naba taja po o'oya ajja. E'e, jjanijo ena oshe quea pame nee cuayani, huosa'yo ajja. Jiquio jayojjaya eyaya quiaje'yo. Jamajjeya eyaya miya ba'e tiitii meeje'yo —Jesusa poanaje.

¹⁵ —¡Che iña maya pea ena quiacue e'ishijji! —Samania pona Jesusa acanaje—. Jamajjeya eya quea naba taja po ajja o'oya poaje. Jamajjeya eya jiquio ena eteohuejja huasijje epoe o'oyajji pojjeama ena jjehuua —poanaje.

¹⁶ —E'e, ¡poquicue! ¡Miqueahue jjequicue! —Jesosa poanaje ma epona nijje.

¹⁷ —Chama' ecueahue —saja'ame acanaje eponaa.

—E'e jojo nei jjeya miquea yahue chama' —Jesosa poanaje—. ¹⁸ Ecuea eba jama ba'a: Yahuaajo miquea yahue cuana me oeije huisome poa, ojjaña jja miquea yahue ehuei poanaje. Jjeya miya pea dejjajo ba'e, miquea yahue pojjeamajo. Jamajjeya miya e'e jojo nei poani: "Chama ecueahue" —Jesosaa acanaje Samania pona.

¹⁹ —E'e jojo nei ojjaña miquea eba. Jamajjeya ecuea eba miya Eyacuiñajji esohui huohuijji e'e jojo nei.

²⁰ Ecuanaja etiiquiana Eyacuiñajji bihuia ca poa jiquio Samania meshijo, eyiyo biajje. Miquianaya, Jodio cuana ca ca jama poani ba'a: "Jenosanenajo ca ca oeya Eyacuiñajji bihuiajji, pea eyiyojo pojjeama" miquianaya poani —poanaje Samania pona.

²¹ —¡Shajja'ajjacue mo, epona! —Jesosaa oya acanaje—. Quijje pishana miquianaaya Eyacuiñajji, esejaya Chii bihuiaje, ojjaña. Jiquio eyiyo huasijje poe jjimaa, Jenosana huasijje poqui jjimaa pea'ai oya bihuiaje.

²² Jjeya ojaya esohui jayojja jama pojjeama aje oe miquianaaya, Samania cuaa Eyacuiñajji bihuiaña. Oya miquianajaya ba jjima. Ecuanaa ca ca Eyacuiñajji bihuiaña ojaya esohui jayojja. Eya oja huoojea'yo ojjaña mimishi cuijea'yojji Jodio dejja. Jamajjeya Eyacuiñajji ecuanaja eba, Jodio cuanaja. ²³ Jamajjeya jjeya nei ojjaña esejaya Chii, Eyacuiñajji bihuiaje e'e jojo nei, ojo quea ja'a nee jjashahuabaquije. E'e, Eyacuiñajji jama poani ba'a: "Jamaya eya cabihuia cahua ojjaña. Jamaya ecuea quea boti nee" poani. ²⁴ Eyacuiñajji yani tii tii eshe. Jamatii oya jjaba meequi ajja ecojjaa. Jamajjeya o bihuiajji epohua Eyacuiñajji cabihuia cahua e'e jojo nei, ojaya esohui jayojja jama quea ja'a nee ojo jjashahuabaquiani —Jesosaa acanaje.

²⁵ —E'e —poanaje epona—, ecuea eba quijje Eyacuiñajji huoojea'yo ojjaña jaahuanajji poeje. Oya Quito bajjani poaje. Poe majje ohuaya ecua quea ja'a nee ba mee caje Eyacuiñajji esohui.

²⁶ —Eya ca ca iña jiquio Eyacuiñajji huoojea'yoya Quito bajjani. Jjeya nei miya Quito nijje mimiani —Jesosaa acanaje.

²⁷ Majoya Jesosa shajja'ajjajji cuana bobi jjeshe majje poe o'oyanaje Jesosa que. Jesosa ba caña'yonaje Samania pona nijje mimiani. Ba majje jjashahuabaquinaje jama ba'a: —¿Apiojji shai Jesosa epona nijje mimiani? —Jamatii huohui'ajja jjima: —Epona, ¿ajeo miya poeyanaje? —ajjima: —¿Jesosa, ajeo miya Samania epona nijje mimiani? —Jamaya ecua mimi jjima Jesosa nijje poanaje.

²⁸ Majoya ena jjequijji ohua acani jea canananaje eponaa, poquicujinaje Sica huasijje huohui pohua.

²⁹ Ojjaña cuana huohui cañaquinaje jama ba'a: —¡Poe-cuajicue oe! Oe dejja ena eteohuejja pejejo ani; ohuaya ojjaña ecuea eba'ejji huohui ca'yonaje. ¿A'a oya pojja'a Eyacuiñajji huoojea'yo ojjaña jaahuanajji? ¡Poe'ajja! ¡Ejjaba'ajjaquiqui! —poanaje epona.

³⁰ Eponaa huohui cajje ojjaña Sicajo ba'e poqui canaje Jesosa baa.

³¹ Ojjaña cuana poe jjimahuajo, ecuana, o shajja'ajjajji Jesosa nijje jama poanaje ba'a: —Esohui huohuijji, ¡bobi oe ijja socue!

³² Jamatii Jesosaa jama acanaje ba'a: —Ecuea pea bobi yani ecuea e'ijjajji, ma miquea ba jjima.

³³ Jamajjeya ecua ojee miminaje: —¿A'a pojjeama oya pea cuaa bobia canaje? —poanaje.

³⁴ Jesosa ecuanaja esohui shajja'ajja majje jama poanaje ba'a: —Bobi ijja majje miquianaya quea bei poani. Ecue Chiiya eya huoojea canaje ojjaña jaahuanajji; ojjaña ojaya esohui ajejo'yo majje eya quea bei poaje, bobi ijja majje jayojjaya —Jesosa poanaje—. ³⁵ Miquianaya jama poani ba'a: "Quijje anoso sejjaje'yo, ebeca pee pea'ai ba'ime po majje. Eyaya ca ca miquianaya huohuiaña jama ba'a: ¡Bacue! Jomajo quea huiso dejja cuana poani. Anoso eja hua jayojjaya jama oya cuana poani. E'e, oya cuana Eyacuiñajji jjashahuabaquiani. Onijje jjapeequi'yo sa poani. ¡Jamajjeya enijje jjapeequi meesahuacue! ³⁶ E'e, echacojji anoso quecuajji, anoso sejjajji pea'ai eque meseya sosequia cajji. Jamajje ojjaña quea bihui nee poaje'yo —Jesosa poanaje—. Oya jayojjaya Eyacuiñajji acaje ojaya echacojji cuana. Joya esohui huohuicoojji cuana sosequia caje; joya pea cuana enijje jjapeequi meesahuajji poani pea'ai sosequia caje. Enijje jjapeequiajo ba'e tiiti meeje'yo enijje eyajo. Jamajjeya ojjaña cuana quea bihui nee nee poaje'yo.

³⁷ E'e, yahuaajo jama poanaje cuana ba'a: "Oe echacojji-ya eso' quecua majje quijje pea echacojjiya chicha caje'yo". Jjeya jamaya e'e jojo nei poani. ³⁸ Jjeya eyaya miya huoojeaña anoso chichajji jama, ojjaña cuana enijje jjapeequi meesahuua. Yahuaajo Eyacuiñajji esohui huohuijjiya oya cuana esohui ba mee canaje. Jamatii ojjaña cuana jjabahuejjaqui jjima. Jjeya miquianaaya esohui huohui o'oyajo, oya cuana ecuea epeejji e'e jojo nei poaje'yo —Jesosa poanaje ecua nijje, o shajja'ajjajji cuana nijje.

³⁹ Majoya quea huiso nee nee Samania cuana poeyanaje Jesosa que. Oya cuana Samania eponaja esohuijjo jjashahuabaquiani. Ohuaya jama acanaje ba'a: —Jiquio dejjaa ojjaña ecuea eba'ejji huohui ca'yonaje. E'e jojo nei jiquio dejja Eyacuiñajji huoojea'yo ojjaña jaahuanajji, Quito bajjani —epona poanaje.

⁴⁰ Jamajjeya Jesosa que poe majje Samania dejja cuana jama poanaje ba'a: —Esohui huohuijji, ¡ecuana nijje che anicue!

—E'e, anije ecua —Jesosa poanaje.

Jamajje aninaje. Beca cahuime sohuihuohui canaje.

⁴¹ Jamajjeya Jesosaja esohui shajja'ajja majje ojjaña cuaa jama acanaje ba'a: —¡E'e jojo nei oya Quito! —poanaje.

⁴² Epona nijje jama poanaje: —Yahuaajo miquea esohuijjo ecua beshahua nei jjashahuabaquinaje oya e'e jojo nei Quito. Jjeya ca ca oja sohui shajja'ajja majje ecuanaja eba nei nei Jesosa e'e jojo nei Eyacuiñajji huoojea'yo ojjaña jaahuanajji; mimishi cuijea ca'yajje

aje se ba'e tiitii mee caje'yo eyajo —poanaje Samania dejja cuana.

Jesosaa jjaajaqui mee ca'yonaje onaja bacua ejja beshahua nei poqui jeyoani

⁴³ Jamajjeya Samania meshijo beca cahuime ani majje Jesosa poqui o'oyanaje Janinea meshi yasijje, Cana huasijje. ⁴⁴ Yahujajo Jesosaa ecuaana, o shajja'ajjajji cuana jama acanaje ba'a: —E'e jojo nei pea cuaa Eyacuiñajjija esohui huohuijji shajja'ajja cani. Jamatii ojaya cuiñajjijo ojaya huapa pojjeama cuana ca ca oe jjashajja'ajjaqui sa po'yo ajja.

Jamajjeya Jesosa jjeja Nasanena huasijje, ma o esho'yahua ba'ya poa huasijje dobiqúi jjiima. ⁴⁵ Jamatii Janinea meshijo ejiojjijje poquianijo, Janinea dejja cuana oya ba majje jama poanaje ba'a: —Esohui huohuijji, mi poe'yajo ecuaana quea bihui nee nee. Yahujajo ecuaana miya banaje Jenosanena huasijje poqui. E'e, esohuidojojji cuaa yahujajo Jodioja ebacua cuana cuia'yo jjiima shejo, Jenosanena huasijje ojee ijia'ijjiaa poqui ecuaaya miya banaje. Miyaya quea huiso cuana jjaajaqui mee'yonaje, ma dejjaa ajjima acani anaje quea huiso pea'ai. E'e, miya Eyacuiñajjija esohui huohuijji nei nei —poanaje cuana.

⁴⁶ Jamajjeya Jesosa poqui o'oyanaje Cana huasijje, ma ohua yahujajo ejjahuanajjijjo ena acuijjajja na pojji aca'ya poa huasijje. Canajo Jesosa aninaje ecuaana nijje, o shajja'ajjajji cuana nijje. Jamajjeya oe emeshi mese neija dejja huooejasahuajjiya Jesosajo shajja'ajja canaje: —Jesosa Jodea meshijo yahujajo ani Janinea meshi yasijje poe'yonaje. Canajo jjeja nequi.

⁴⁷ Oja bacua ejja quea mano nee nee jaa quea huesha pishana, Capenaomajo jaa. Jamajjeya maya shajja'ajja majje Jesosa que poquicuaajicuaajinaje. Jama acanaje ba'a: —Jesosa, ¡poecuajicue Capenaoma huasijje! ¡Ecue bacua ejja jjaajaqui mee'yocue! Quea mano nee nee jaa, beshahua nei poquijeyo jaa —poanaje.

⁴⁸ Jesosa ojjaña cuana nijje jama poanaje ba'a: —Miquiana cuana Janinea meshijo ba'e beshahua nei jjashajja'ajjaqui ajja. Eyaya ma dejjaa ajjima acani mi amajamajajo, miquianaya jjashahuabaqui ajja jama ba'a: “E'e jojo nei Jesosa Eyacuiñajjija huoojea'yo ojjaña jaahuanajji” —Jesosa poanaje.

⁴⁹ —Esohui huohuijji Jesosa, jamatii —ejeajji poanaje—. ¡Poecuajicue oe, ecue bacua ejja epoquijeyo cuahuajo!

⁵⁰ —Epeejji, ¡quea bihui poquicue miquea equi yasijje! Eyaya mique bacua ejja jjaajaqui mee'yonaje; apoa poanaje —Jesosaa emanojaja ejeajji acanaje.

Jesosaja esohui shajja'ajja majje ebacuaaja ejeajji quea bihui nee poquinaje jjashahuabaquiani jama ba'a: —E'e jojo nei Jesosa quea sohui poja nee nee; ecue bacua ejja jjaajaqui mee ca'yonaje.

⁵¹ Ojaya equi yasijje poquianijo, oja chacojji cuana poeyanaje. O ba majje taaanaje: —¡Miquea ebacua ejja boeca'yonaje! Quea pame nee jjeja ani'yo. Huaquia'yonaaje —poanaje.

⁵² —E'e —ejeajji poanaje—, jamaya quea pame nee. ¿Ache nei eshequi nequijo acuae apoa poanaje so'o?

—Yahujajo apoa poanaje, omamecayje tii, eshequi ejjajeapaaquijo oya boeca'yonaje —poanaje echacojji cuana.

⁵³ —E'e nei —ejeajji jjashahuabaquinaje—, omamecayje tii eshequi ejjajeapaaquijo Jesosaa eya huohui canaje jama ba'a: “Miquea ebacua ejja jjaajaqui'yonaje; apoa poanaje” —ejeajji poanaje.

Jamajje equi yasijje dobiqúi majje ojaya huapa pojjeama cuana nijje jama poanaje ba'a: —E'e, Jesosaa ecue bacua ejja jjaajaqui mee ca'yonaje, boeca mee ca'yonaje. ¡Oya ca ca oe Eyacuiñajjija huoojea'yo ojjaña jaahuanajji! —poanaje ebacuaaja ejeajji.

Jamajjeya ojjaña jama poanaje ba'a: —E'e jojo nei oya Jesosa.

⁵⁴ Jamaya Janinea meshi yasijje poe o'oya majje Jesosaa Cana cuiñajjijo pea dejjaja ba jjiima aca o'oyanaje.

Jesosaa dejja jeo'ajja Metena ena sahuajo jaa jeo mee ca'yonaje

5 Majoya quijje ojjaña Jodio dejja cuana poqui o'oyanaje Jenosanena huasijje ojee ijia'ijjiaa Eyacuiñajji bihuiaa. Jamajjeya ecuanaya Jesosa nijje, o shajja'ajjajji cuana nijje pea'ai Jenosanena huasijje poqui o'oyanaje. ² Jenosanena cuiñajji mei jiyoyo Ñajjajja Dobiqúijji esecue yani. Ma esecue pejejo yani ena, bae sisi jama, ebesajji, Emeo esohuijo Metena ena bajjani. Ena sahuajo yani me oeje equi sisi. ³ Jomajo quea huiso emano cuana jaanaje: cojjama' cuana, jeo'ajja cuana, jiojjijajja cuana pea'ai. Ohuaya esohuidojojji isho'a'ajja cani; jama jjashahuabaquime poani ba'a: —E'e, Eyacuiñajjija esohuidojojjiya ena cajeaquejjo cahua. Jamajjeya eya ena huasijje nequidobiquiajo, jjaajaqui mee caje'yo.

⁴ E'e, Jodio cuaa jama acanaje ba'a: —Esohuidojojjiya quijje nei poe huicha'anijo ena jeaquejjo mee cani. Ena jeaquejjo cajo, ojjaña emano cuana ena huasijje canequidobi cuajiquiahua. Joya ebionei besaje'yo ca ca jjaajaqui mee caje'yo, huaquia mee caje'yo pea'ai Eyacuiñajjiya —poanaje Jodio cuana.

⁵ Jamajjeya oe dejja jomajo jeo'ajja jaanaje. Quea shequiaja huiso nee nee jaa poa, 38 shequiajame. ⁶ Jesosaa poe majje ba canaje dejja emanojaa jeo'ajja. Jesosaja eba ma dejja quea shequiaja huiso nee nee jaa poa. Jamajje oya huohui'ajja canaje: —¿A'a miya jjaajaqui'yo sa poani? ¿A'a miya jeo sa poani? —Jesosa poanaje.

⁷ —E'e —emanojaa saja'a canaje—, jamatii chama' pea dejja e dojojji ena jeaquejjo poani yasijje e besa mee'yojji. Jamajjeya eya ebionei ebesa'yojji pojjeama. Eya jipashineijje poquianijo, pea ebionei besacuajiquije —poanaje emanojaa, jeo'ajja.

⁸ Jesosaa oya jama acanaje ba'a: —Epeejji, ¡nequisohua'yocue oe! ¡Jeocue! ¡Miquea equi yasijje equipajaajji bebo majje dojo'yocue!

⁹ Jjeja nei jeo'ajja jeocuaji'yonaje. Jamajje nequisohua'yonaaje; oja equi yasijje equipajaajji bebo majje do-

jo ca'yonaje; jeopoqui'yonaje. Jesusaa oya jeo mee ca'yonaje Jodioja epojja ejomishocajjijo. ¹⁰ Jamajjeya ma dejjaa equipajaajji dojo cani ba majje Jodio cuana quea tecue onijje poanaje: —¡De! ¿Apiojji acuae miyaya equipajaajji dojoaña so'o? ¡Jjeya epojja ejomishocajji, de! ¡Aquiana Jjeya dojoca ajja! Jamaya esaja esohui huohuijji cuaa huohui cani —poanaje.

¹¹ Ma dejja ejeo'yohua saja'a canaje jama ba'a: —Jamatii. Oe dejjaa eya jeo mee'yo majje jama acanaje ba'a: “¡Poquicue miya; miquea equipajaajji bebo majje dojocue!” poanaje.

¹² —E'e pojja'a —Jodio cuana poanaje—. “¡Miquea equipajaajji dojocue!” poanaje. ¿Ae bajjaniya acuae maya miya huohui canaje so'o? —huohui'ajja canaje.

¹³ —Cua'a, de —saja'ame acanaje—. Ache dejjaa shai eya jeo mee ca'yonaje. E jeo mee'yo majje oya pea dejja quea huiso nijje poquinaje —poanaje. (E'e, dejja quea huiso nee nee jomajo ani.)

¹⁴ Quijje pishana Jesusaa ma dejja oja jeo mee'yo ba ca'yonaje Eyacuiñajjija equijo. Jama huohuime acanaje ba'a: —E'e epeeji, Jjeya miya quea pame nee nequi'yo, quea aja nee nequi. Jamajjeya ja'a quea mimishi po o'oyajji! Quea mimishi po o'oya majje mi quea mano nee nee po o'oya chana', quea tai nee nee; yahuajo jeo ajja, quea nee pishana poanaje —Jesusaa acanaje.

¹⁵ Jesosa shajja'ajja majje poqui'yonaje Jodio cuana huasijje. Huohuiqui canaje jama ba'a: —E'e, Jesosa bajjaniya eya jeo mee ca'yonaje —poanaje.

¹⁶ Jamajjeya jeo'ajja poanajeya huohui cajje Jodio cuaa Jesosa niñeba canaje; quecua'yo sa acanaje pea'ai, Jesusaa jeo'ajja cuana jeo mee ca'yonaje epojja ejomishocajjijo.

¹⁷ —Ecue Chiiya quea pame nee acani tii tii epojja ejomishocajjijo pea'ai —Jesusaa oya cuana saja'a canaje—. Jamajjeya eyaya pea'ai ecue Chiiya jayojjaya jama quea pame aña ojjaña pojjaajo.

¹⁸ Jamajjeya Jodio etii cuaa Jesosa quecua sa neinei acanaje. Jama huohui canaje ba'a: —Esejaya etiiquiaa yahuajo esohui tehue ca poa jama ba'a: “¡Epojja ejomishocajjijo a'a chacojji!” aca poa.

Jodio cuaa Jesosa niñeba canaje jama pea'ai ba'a: —Oya, Jesosa etiiquianaja etehue'yo jama po ajja —poanaje.

Yahuajo Jesosa Jodio nijje jama poanaje pea'ai ba'a: —Eyacuiñajji ecue Chii, de.

—Chojja, de, Jesosa sijje poani —niñebame acanaje Jodio cuaa Jesosa.

Jodio cuaa jama acanaje pea'ai ba'a: —Jesusa sijje poani jama ba'a: “Eya Eyacuiñajji jayojjaya poani” sijje, de —jamaya Jodio cuaa acanaje.

¡Eyacuiñajjija Bacua Ejja Jesosa quea ca'a nee eba'e tii tii mee'yojji!

¹⁹ Jamajjeya Jesusaa ma Jodio etii cuana huohui canaje jama ba'a: —Eyaya miquianaya e'e jojo nei huohuiaña jama ba'a: Eyacuiñajjija eya, oja Bacua Ejja oe nei huoojea canaje; eyaya ojaya esohui jayojja jama aña. Eyaya huohuiaña ecue Chiija ejjashahuabaquijji, ecuea

ejjashahuabaquijji pojjeama. Ojjaña ecue Chiiya acani ecuea eba. Jamaya ca ca eyaya aña pea'ai. E'e, ojjaña ecue Chiiya acani eyaya aña pea'ai, eya oja Bacua Ejja jjejojya. ²⁰ Eya ecue Chiiya quea jea nee nee. Jamajjeya eya ba mee cani ojjaña joya ohua amee sa acani huiso tii. Eyaya ma dejjaa ajjima acani aña ba majje miquianaya jama poaje ba'a: “E'e nei, yahuajo jamaya ajjima cuanaja poa. Chama' pea Jesosa jayojja” poaje miquianaya. ²¹ Jamaya ecue Chiiya eya amee caje'yo ba'a: Ecue Chiiya emano'yojaa shequi mee ca o'yani jayojja jama eyaya ba'e meeje o'oya, ojjaña ecue babaca'yo cuana pea'ai —Jesusa poanaje—. ²² Ecue Chiija huohuijji pojjeama joya ojaya epeeji pojjeama, joya quea nee nee poaje'yo tii cuaquijo. Joya ojaya epeeji poani ba'e tiitii mee caje'yo onijje huohuijji pojjeama pea'ai. Chojja, ohuaya jama huohuime acanaje ba'a: “Ecue Bacua Ejja cahuohui caha ecuea ejjashahuabaquiyoyji”. ²³ Jamajjeya ojjaña joya ecue Chii shajja'ajjaji poaniya eya oja Bacua Ejja shajja'ajja caje'yo pea'ai. Ojjaña joya eya Eyacuiñajjija Bacua Ejja shajja'ajja sa po'yo ajja Eyacuiñajji, e huoojea'yoyji shajja'ajja sa po'yo ajja pea'ai —Jesusa poanaje.

²⁴ —E'e jojo nei nei ecuea huohui minijje jama ba'a —Jesusa poanaje—. Ojjaña joya ecue sohui shajja'ajja cani, e huoojea'yoyjija sohui e'e jojo nei shajja'ajjaji poani pea'ai ba'e tiitii meeje'yo enijje eyajo; cuaqui yasijje epoqui'yoyji pojjeama. Chojja, oya cuana yahuajo eshahuaja epeeji poanajejo cuaqui yasijje poqui'yo quiaje. Jjeya ca ca ba'e tiitii meeje'yo enijje, ecuea epeeji jojya. ²⁵ ¡Shajja'ajjacue mo! —Jesusa poanaje—. E'e jojo nei ojjaña shajjama' poani Eyacuiñajjija ba cani emano'yo jayojja, epoquijeyo'yo jayojja. Jamatii huohui'yo ejo, Eyacuiñajjija Ebacua Ejjaajo shajja'ajja caje'yo. Ecuea esohui jayojja jama e'e jojo nei atitii cajo, eyaya ba'e tiitii meeje'yo enijje eyajo. ²⁶ E'e, Eyacuiñajji ecue Chii yani tii tii, eshe. Jamajjeya ohuaya eya, oja Bacua Ejja huoojea canaje ojjaña joya onijje jjapeequiani ba'e tiitii mee'yohua. ²⁷ Cuanaya eya ojjañaja Edoe Mese poanijo Eyacuiñajjija eya huoojea canaje jama ba'a: “¡Miyaya huohucue joya minijje jjapeequiani ba'e tiitii meeje'yo minijje! ¡Huohucue pea'ai joya miquea epeeji pojjeamajo quea nee tii tii poaje'yo cuaquijo!” jamaya Eyacuiñajjija eya acanaje —Jesusa poanaje—. ²⁸ E'e, e'e jojo nei quijje ojjaña yahuajo emano'yo cuana iyaa majje eyaya oya cuana shequi meeje o'oya —Jesusa poanaje—. Ecuea esohuijo ja'a jjashahuabaquijji jama ba'a: “¿Yajja yajji? ¿Achajja shai ohuaya emano'yo cuana shequi mee caje o'oya?” a'a jamaya pojji! ²⁹ E'e jojo nei oya cuana eshe o'oya po mee majje ojjaña ecuea epeeji eyaya ba'e tiitii meeje'yo enijje. Ojjaña shajjama' cuana ca ca shequi o'oya majje quea nee nee poaje'yo tii tii cuaquijo. ³⁰ E'e, Eyacuiñajjija eya huoojea canaje ojjaña huasijje huohuiya jama ba'a: “Joya ecuea epeeji cuana poani eyaya ba'e tiitii meeje'yo enijje. Beca cuana ca ca ecuea epeeji pojjeamajo quea nee nee poaje'yo tii tii”. Eyacuiñajjija e huoojea majje jama acanaje ba'a: “¡Ojjaña ecuea ejjashahuabaquijji ojjaña cuana huohuiquicue!” acanaje.

Eyaya ojaya esohui jayojja jama aña, ecuea ejjas-hahuabaqui'yojjijo pojjeama. Jamajoya eyaya Eyacuiñajjija ejjashahuabaqui'yojji jayojja jama aña jo ecuea esohui ojjaña e'e jojo nei —Jesosa poanaje.

Jesosa Eyacuiñajjija huoojea'yo ojjaña jaahuanajji, oja Bacua Ejja

³¹ Majoya Jesosaa Jodio cuana huohui canaje jama ba'a: —Miquianaya ejo jjashahuaba quehuaquiani jama ba'a: "Jiquio dejjaa jama huohui cani ba'a: —Eya ca iña iquio Eyacuiñajjija huoojea'yo ojjaña jaahuanajji —acani, de. Jamatii ohuaye neiya jama huohui canijo oya ecuanaja eshajja'ajjaji pojjeama" jjashahuaba quehuaquiani miquianaya —Jesosa poanaje—. Jamatii ecuea esohui e'e jojo nei. ³² Eya ee nei pojjeama; eya ecue Chii nijje. Ohuaya ojjaña ba mee cani eya oja huoojea'yo. Ecuea eba ojaya esohui ejo e'e jojo nei. ³³ Yahuajo miquianaaya pea cuana huoojeana je Huani que e huohui'ajjaa. Huaniya miquianaya e'e nei huohui canaje jama ba'a: "Jesosa e'e jojo nei Eyacuiñajjija huoojea'yo ojjaña jaahuanajji, oja Bacua Ejja oe nei" acanaje Huaniya, ma ona besameeji poaniya —Jesosa poanaje.

³⁴ —Eyacuiñajjija Huani huoojea canaje ejo huohuiya. Eyaya miquianaya huohui o'oyaña ma Huaniya ejo huohui canaje. Jamatii miquianajaya ejjashahuabaqui'yojji ejo quea ja'a pojjeamajajo eyaya miquianaya huohui o'oyaña. Miquianaaya Huaniya esohui ejo eshajja'ajja jojjemo eyaya miquianajaya mimishi cuijea'yome —Jesosa poanaje.

³⁵ —Cuaquijiji mecalle jijianiya quea ja'a ojjaña ba mee cani jayojja jama Huani poa. Ohuaya miquianaya quea ja'a nee ba mee canaje Eyacuiñajjija esohui ejo, ma yahuajo miquea ba jjima poa. Ebionei miquianajaya oja sohui ejo quea boti nee poanaje; jamatii quijje shajja'ajja sa po'yo ajja poanaje. ³⁶ E'e —Jesosa poanaje—, Huaniya ejo huohui canaje. Jamatii oya dejja. Pea yani, ecue Chii. Ecue Chiiya miquianaya ba mee cani eya oja huoojea'yo. E'e, ecue Chiiya eya ameesahua cani ma dejjaa ajjima acani. Ma ajeyo'yo majje miquianaya ba meeje e'e jojo nei eya Eyacuiñajjija huoojea'yo ojjaña jaahuanajji. ³⁷ Ecue Chiiya miquianaya ba mee cani jama ba'a: Ohuaya e'e jojo nei eya huoojea canaje. Jamatii miquianajaya oya ba jjima ecojjaja. Miquianajaya aje oe oja mimi shajja'ajja jjima pea'ai. ³⁸ Ojaya esohui miquianajaya shajja'ajja jjima. Eya oja huoojea'yo. Jamajjeya miquianaya ecue sohui shajja'ajja sa po'yo ajja pea'ai —Jesosa poanaje—. ³⁹ Eyacuiñajjija esohui yahuajo etehue'yo miquianaaya ba huicha'a huicha'aña, ba majamaja majje miquianaya eba'e tiitije poso jjabaquiani. Ma esohui etehue'yo yahuajo ejo tehue ca poa. ⁴⁰ Eyaya ca ca oe eyaye nei miya ba'e tiitii meeje'yo; jamatii miquianaya enijje jjapeequi sa po ajja —Jesosaa Jodio cuana acanaje.

⁴¹ —Eya dejja mimishi jama jjashahuabaqui ajja jama ba'a: "Ojjaña dejja cuaa jamatii eya shajja'ajja caje'yo" po ajja eya —Jesosa poanaje—. ⁴² Chojja, ecuea eba miquianajaya Eyacuiñajji quea jea nee pojjeama.

⁴³ Eyacuiñajjija, ecue Chiiya eya huoojea canaje. Jamatii miquianaya e shajja'ajja sa po ajja. Pea dejjaa Eyacuiñajjija huoojea'yo nishohua huohui cani jama ba'a: "Eya quea pame nee". Ojaya esohui ca ca miquianaaya shajja'ajjaje; siajjepojji nijje miquianaya jjapeequije.

⁴⁴ Eyacuiñajji oe nei enequi tii tii. Jamatii miquianaaya ojaya esohui jayojja jama a sa po'yo ajja, jama jjashahuabaquime po ajja ba'a: "Eyacuiñajjija ejo jama cahuohui cahua ba'a: —E'e, miya ecuea epeeji quea pame nee —cahuohui cahua". Chojja. Jamaya miquianaya jjashahuabaqui ajja —Jesosa poanaje—. Miquianaya jjashahuaba tiitiquiani jama ba'a: "Pea dejja cuana ejo jama camimiquiahua ba'a: —E'e, miya ca ca oe quea pame nee nee —capohua onaya". Jamajjeya miquianaya enijje jama po ajja ba'a: "Jesosa, miya Quito, Eyacuiñajjija huoojea ojjaña jaahuanajji" enijje po ajja. Jamaya huohui sa po ajja miquianaya —Jesosa poanaje.

⁴⁵ —iA'a eya ecue Chii ehuohuije poso pojji jama ba'a: "Oya cuana e shajja'ajja sa po'yo ajja; quea mimishi nee nee" a'a eya ehuohuije poso pojji nequiana! —Jesosa poanaje—. Chojja, ecuea miquianaya ehuohuiji pojjeama. Miquianaya Moisesija etehue'yojjo jjashahuabaquiani; jamatii ojaya esohui etehue'yo ajjimajo, Eyacuiñajjija miquianaya jama acaje ba'a: "¿Apiojji acuae quiana Moisesija etehue'yojo shajjama poani? Miquianaya quea mimishi nee nee" quijje Eyacuiñajjija nequiana acaje'yo —Jesosa poanaje.

⁴⁶ —E'e, Moisesiya ejo tehue ca poa. Jamajjeya miquianaaya oja tehue e'e jojo nei eshajja'ajja jojjemo enijje jjapeequi'yome. ⁴⁷ Jamatii miquianaaya Moisesija esohui eshajja'ajja jojjemo, ojaya ehuohui etehue'yo eba pea'ai jojjemo ecuea esohui shajja'ajja'yome pea'ai —Jesosa poanaje.

Jesosaa bobia canaje quea huiso nee nee dejja, 5.000 dejja

(Mateo 14.13-21; Macoso 6.30-44; Noca 9.10-17)

6 Majoya Jodio dejja cuana nijje mimi majje, quijje Jesosa o shajja'ajjaji nijje, ecuaña nijje Jenosane-najo ani poquinaje Janinea bae yasijje, pea bajjani Timentia bae yasijje. Bishe aijo ojje miji yasijje besapoqui o'oyanaje. ² Ba'eñaqui majje eyiyo huasijje jaasohuaquinaje. Anioquenaje. Yahuajo Jesosaa quea huiso acanaje ma dejjaa ajjima acani; quea huiso emano cuana jjaajaqui mee ca'yonaje, jjajeaqui mee ca'yonaje pea'ai. Jamajjeya o ba majje quea huiso nee nee poqui canaje jocuama, Jesosa baa. ⁴ Jamaya poanaje Jodio cuana Jenosanena huasijje poqui o'oyani ojee ijia'ijia'yohua esohui dojojjiya Jodioja ebacua yahuajo cuia'yo jjima shejo. Ma epajea'yojji pojjeama jjachichaquinaje. ⁵ Jamajjeya Jesosaa bajea canaje quea huiso nee nee poeje. Ba majje ohuaya Penipe huohui'ajja canaje: —Penipe, ¿achacua acuae seya che bobi jjesheje so'o dejja cuana quea huiso bobiajji? —Jesosaa acanaje, Penipeya yajja huohui'ajjame acaje ejjabaquijji. Jamatii Jesosaja eba poa Eyacuiñajjija, oja Chiiya bobi pana caje'yo dejja cuana bobiajji.

⁷ Penipeya saja'a canaje jama ba'a: —¿Yajja yajji? ¿Ajeo ebobiajji? Oya cuana quea huiso nee nee aña, de. 200 esodojjo quea nahue ecuanaja yani jojjemo maya oe pojji bobi jjesheme ojjaña cuanaja ijiajji —poanaje Penipe.

⁸ Majoya aje oe o shajja'ajjajji Anesi, Simohui Penoja chahua jama poanaje ba'a: ⁹ —Oe esho'ia ye canaje me oeje pahui, beca nahuoo sisi pea'ai. Jamatii maya oe pojji nei nei, de; dejja cuana quea huiso nee nee ani jeje jjima poaje —poanaje Anesi.

¹⁰ Majoya Jesosaa jama acanaje ba'a: —iOjjaña cuana jama acue ba'a: “iOjjaña anioquecue sipone biajje!” acue! —Jesosaa acanaje.

Jamajje quea huiso sipone yanijo, ojjaña cuana anioque mee canaje sipone biajje. Quea huiso nee nee poanaje, 5.000 dejja; epona, esho'i cuana pea'ai sico jjima. ¹¹ Majoya Jesosaa pahui me oeje huiso jjeshe majje Eyacuiñajji bihuia canaje. Eyacuiñajji niije bobijo mimi majje pahui tepe canaje; ecuana, o shajja'ajjajji cuana quia mee canaje dejja cuana e'anioquiani yasijje. Jamaya acanaje nahuoo sisi pea'ai. Quia ca poquije quea huiso nee nee jjapanaqui poquipoquinaje bobi, de. Jamajjeya ojjaña cuaa ijia neinei canaje. ¹² Ojjaña jejeajo, Jesosaa ecuana huohui canaje: —iChichacue bobi ojjañaja ijiajje! iA'a jeana'yojji!

¹³ Jamajjeya ecuanaja chicha'yonaje pahui ojjañaja ijiajje. Jjepai ai yasijje iya'yonaje. Quea huiso poanaje, 12 jjepaime. Jamatii yahuajo me oeje, 5 pahui poanaje. E'e, Eyacuiñajjiya jjapanaqui mee capoquipoquinaje quea huiso bobi, de. ¹⁴ E'e, Jesosaa ma dejjaja ba jjima acanaje; 5.000 dejja cuana bobia canaje. Ma ba majje dejja quea huiso cuana ojee miminaje jama ba'a: —E'e jojo nei Jesosa Eyacuiñajjiya huoojea'yo ojjaña jaahuanajji. Yahuajo Eyacuiñajjiya ojo huohui mee ca poa jama ba'a: “Quiije eyaya miquiana huasijje huoojeaje Quito, ojjaña jaahuanajji”. iCua'a, oya esejaya emeshi mese epojji ejjanequi meequi! —dejja cuana poanaje.

¹⁵ Onajaya ejjashahuabaquiji ba majje Jesosaa ojjaña dejja cuana huoojea canaje equi cuana huasijje. Majoya oya quehua poquinaje. Eyiyo huasijje oe nei jaasohuaqui o'oyanaje oja Chii niije mimiya.

Jesosaa bae ena biajje poquinaje

(Mateo 14.22-27; Macoso 6.45-52)

¹⁶ E'e, sinecua, eyiyo huasijje poqui jjimahuaajo Jesosaa ecuana, o shajja'ajjajji cuana huoojea canaje: —iBae oje miji yasijje bishe aijo besapoquicue! Quiije eya poquije miquiana que —Jesosaa poanaje.

¹⁷ Jamajjeya bishe ai yasijje ani majje ecuaa yonaje. Besapoqui'ajjanaje oje miji yasijje epoquiji, Capenaoma huasijje. Mecajje quea apo nee poanaje. Jamatii Jesosaa ecuana huasijje poe jjima poanaje. ¹⁸ Beni quea quemo nee nee poeyanaje. Enashajo quea quemo anicuayanaje. ¹⁹ Quea huesha nee yo'ajjanaje enabae yiyesama neijo. Jomajo ecuaaya banaje Jesosa. Eyiyoje ena biajje jeojejebeje banaje. Jesosa ba majje ecuana quea ajjajja nee nee poanaje, oya eshahua poso anaje.

²⁰ Jamajjeya Jesosaa ecuana niije jama poanaje ba'a:

—iA'a quea mete pojji! Eya ca ca iña iquio, eshahua pojjeama —poanaje.

²¹ Jesosa shajja'ajja majje quea jaji nee po'yonaje ecuana. Bishe ai yasijje ani mee'yonaje. Jesosa ani'ya-jo, bishe ai bae oje miji yasijje ba'eñaquinaje, Capenaoma huasijje. Jomajo cahuinaje ecuana.

Ojjaña cuaa Jesosaa sa'ajja canaje

²² Mecahuajje ojjaña cuana, ma Jesosaa bobia canaje cuana jjachichacui o'oyanaje bae sahua huasijje. Jama ojee miminaje ba'a: —iAchejo shai Jesosa? Oe bishe ejaanaje, de. Jamatii Jesosa o shajja'ajjajji cuana niije besapoqui jjima, de, yaninaje eyiyojo tii —dejja cuaa acanaje. Ojjañaja ba jjima poanaje Jesosa ena biajje jeojeopoquije.

²³ Majoya pea bishe cuana Timenia cuiñajji ani poeyanaje. Ba'eñaquinaje bae sahuajo, jomajo yahuajo Jesosaa Eyacuiñajji bihuia majje quea huiso cuana bobia canaje. ²⁴ Jamajjeya ojjaña cuana Jesosa, o shajja'ajjajji cuana pea'ai chama' ba majje bishe cuana huasijje anisohuaquinaje. Capenaoma huasijje besapoquinaje Jesosa sa'ajja'yohua.

Jesosaa esohui huohui canaje pea cahuajo, eba'e tiitii mee'yojji

²⁵ Oje miji yasijje ba'eñaqui majje oya cuaa Jesosa ba canaje. Ba majje huohui'ajja canaje: —Esohui huohuijji, ¿ache shono acuae mi jiquiacua poeyanaje so'o ba'a? —poanaje.

²⁶ Jesosaa oya cuana saja'a canaje quea yeno jama ba'a: —Miquianaya ejo jjashahuabaqui ajja jama ba'a: “E'e, Jesosa ma dejjaja ba jjima acanaje; jamajjeya oya e'e jojo nei Eyacuiñajjiya huoojea'yo ojjaña jaahuanajji”. Chojja, miquianaya jama ejjashahuaba meequiji pojjeama. Bobijo ca ca miquianaaya eya sa'ajjaña, bobi quea huiso ijia majje quea jeje poanajeya jjejojo.

²⁷ iA'a jjashahuaba tiitiquiji bobijo, eba'ejjijo! Maya jje-ya nei oe poani. Sho caje o'oya. iEcua esohuijo ca ca jjashahuabaquicue oe! —Jesosaa poanaje—. Maya e'e jojo nei shajja'ajjajo, eyaya miya ba'e tiitii meeje'yo eniije eyajo. Ecua esohui pea bobi jayojja, eba'e tiitii mee'yojji. E'e, eyaya ojjañaja Edoe Meseya ma pea bobi eba'e tiitii mee'yojji quiaje miquianaya, eya Eyacuiñajjiya huoojea'yohua jjejojo. Eyacuiñajjiya ecue Chiya eya ma dejjaja ba jjima amee cani; pahui jjapana meequi canaje miquiana bobiajji. Jamajjeya miquea eba eya oja huoojea'yo ojjaña jaahuanajji —Jesosaa poanaje.

²⁸ Majoya aje dejja cuaa Jesosa huohui'ajja canaje jama ba'a: —iAchajja acuae ecuaa Eyacuiñajjiya esohui jayojjaya aje'yo so'o? ¿Jamajjeya oya ecuana niije quea bihui nee poaje'yo?

²⁹ Jesosaa oya cuana saja'a canaje jama ba'a: —E'e jojo nei jama acue ejo ba'a: “E'e Jesosa, miya Eyacuiñajjiya huoojea'yo ojjaña jaahuanajji” jamaya acue. Jamajjeya Eyacuiñajji quea bihui nee poaje'yo miquiana-jo —Jesosaa poanaje.

³⁰ —E'e pojja'a —Jodio cuaa huohui canaje—. Jamajjeya ¡miyaya Eyacuiñajjiya jayojja jama acue dejjaa ajjima acani! Jamajjeya ecuanaja eba poaje miya e'e jojo nei Eyacuiñajjiya huoojea'yo ojjaña jaahuanajji. ¿Ae poaje miya? ¡Eyacuiñajji jayojja jama acue, Moisesiya aca poa jama oe acue! ³¹ E'e, yahuajo nei meshi jabojo Eyacuiñajjiya esohui huohuijjiya Moisesiya esejaya etiiquiana bobi pahui jayojja quia ca poa ojjaña pojja. Yahuajo nei Eyacuiñajjiya Moisesi tehue mee ca poa jama ba'a: "Eyacuiñajjiya Moisesiya bobi pahui sisi jayojja eyajo oque mee ca poa meshi yasijje etiiquianaja e'ijjajji" jamaya tehue ca poa —Jodio cuana poanaje.

³² —Eyaya miya e'e nei huohuiaña —Jesosaa acanaje—, Moisesiya pojjeama etiiquiana quia canaje bobi. Ma eyajo aniya tii bobi oque mee canaje ecue Chiiya. Ohuaya jjeya miqianaya quia cani pea bobi ma eyajo ani meshi yasijje poeyanaje. ³³ E'e, jjeya nei Eyacuiñajjiya bobi eyajo aninaje ohuaya huoojea cani ojjaña ba'e tiitii mee'yojji —Jesosa poanaje.

³⁴ —E'e, emeshi mese, ¡che ecuaña jiquio bobi quia cue ojjaña pojja! —poanaje oya cuana.

³⁵ —Eya ca ca iña jiquio bobi jayojja tiya Eyacuiñajjiya huoojea'yo —Jesosa poanaje—, Eyacuiñajjiya huoojea'yo ojjaña jaahuanajji, ojjaña ba'e tiitii mee'yojji pea'ai. Jamaya eya poani. Bobi ijja majje miya quea yeno poaje o'oya, quea shoe po o'oya majje. Quea naba taja pea'ai poaje o'oya. Enijje ejjapeequi jemo, e eshajja'ajja jojjemo pea'ai miqiana quea bihui tii po'yome, quea jette tii jayojja nequi mee'yome —Jesosa poanaje—. ³⁶ Eyaya miqianaya huohuiaña jama ba'a: Mi quiaaya ecuea ma dejjaa ajjima acani quea huiso cuana banaje, pahui ecue pana ijjanajejo pea'ai. Jamatii jjashahuabaquiani jama ba'a: "Chojja, Jesosa Eyacuiñajjiya huoojea'yo ojjaña jaahuanajji pojjeama, ojjaña ba'e tiitii mee'yojji pojjeama pea'ai" jamaya jjashahuabaquiani miqianaya, eya Quito pojjeama poso añña —Jesosa poanaje—. ³⁷ Ojjaña joya ecue Chiiya ejo e'e nei jjashahuabaqui meesahua cani e que poeje'yo, enijje jjapeequije'yo tii. E que poeyajo, ecuea miqianaya cajaa yajji pojjeama. ³⁸ E'e, eya eyajo ani ecue Chiiya meshi yasijje huoojea canaje. Jamajjeya eyaya ojaya ejjashahuabaqui'yojji jayojja jama añña, ecuea ejjashahuabaqui'yojji jama pojjeama —Jesosa poanaje—. ³⁹ Ecue Chiiya eya niñeshe'a ca poa jama ba'a: "Ojjaña joya eyaya minijje jjapeequi meesahuaña equiyo'yojji pojjeama. ¡Ojjaña oe ba'e tiitii mee'yocue minijje! Quijje miya poe o'oya majje joya emano'yo cuana oe shequi mee o'oyacue, eba'e tiitii'yojji" jama eya niñeshe'amaya ecue Chiiya aca poa —Jesosa poanaje—.

⁴⁰ E'e, ecue Chii jama sa poani ba'a: Ojjaña joya eya Eyacuiñajjiya Bacua ba majje, enijje jjapeequiajo, eyaya oya ba'e tiitii meeje'yo enijje eyajo; joya emano'yo cuana jaa pea'ai shequi meeje o'oya quijje poe o'oya majje —Jesosa poanaje.

⁴¹ Majoya Jodio cuaa Jesusajo niñeba canaje. E'e, Jesusaa yahuajo jama acanaje ba'a: —Eya Eyacuiñajjiya huoojea'yo ojjaña jaahuanajji eyajo yahuajo ania poa. Ohuaya eya huoojea canaje meshi yasijje —acanaje

yahuajo. ⁴² Jamajjeya Jodio cuaa Jesosa Joseja bacua ejja poso acanaje: —¡De! Oya Joseja bacua ejja pojja'a jja coma. Oja chii, ojaya enaese pea'ai ecuanaja eba. ¿Yajjajje oya jama poani ba'a: "Eya yahuajo eyajo ania poa; eyajo ani meshi yasijje huoojea canaje ecue Chiiya"? ¿Yajjajje shai jama poanaje oya?

Jodio cuana quea sapa ca'a jjejojo, Jesosa Joseja jeajo poso ojaya esohui shajja'ajja sa po'yo ajja.

⁴³ —¡A'a eya niñebajji! —Jesosa poanaje—. ⁴⁴ Beca cuana jamatii enijje ejjapeequi'yojji pojjeama. Ecue Chiiya eya huoojea canaje. Joya ohuaya beca cuana ejo e'e jojo nei jjashahuabaqui meesahua cani enijje ejjapeequijji; oya cuana ca ca oe eyaya ba'e tiitii meeje'yo enijje poe o'oya majje. ⁴⁵ E'e, Eyacuiñajjiya esohui huohuijji cuana yahuajo nei ba'eya jama tehume aca poa ba'a:

"Eyacuiñajjiya ojjaña dejja cuana, epona cuana pea'ai oja sohui ba meesahua caje'yo".

Jamaya tehume aca poa. Jamajjeya ojjaña joya ecue Chii shajja'ajjajji poaniya, oja sohui jama acaje'yo. Jamaya amajje enijje jjapeequije'yo pea'ai —Jesosa poanaje.

⁴⁶ —Jamatii ojjaña cuanaja Eyacuiñajji ba jjima ecojja. Eya Eyacuiñajji nijje, ecue Chii nijje ania poa. Jamajjeya eyaya, eyaye nei, oya baña ecojja —Jesosa poanaje—. ⁴⁷ E'e jojo nei ojjaña joya ecue Chiiya enijje jjapeequi meesahua cani eyaya ba'e tiitii meeje'yo enijje. ⁴⁸ Miquiaaya bobi ijjaña eba'ejji. Jamajjeya eya bobi jayojjaya. Eyaya ecuea epeeji cuana ba'e tiitii meeje'yo. ⁴⁹ ¡Bacue! Yahuajo nei meshi jabojo Moisesiya miqianajaya etiiquiana bobi pahui sisi jayojja quia ca poa ojjaña pojja; jamatii mano'ya poa ojjaña etiiquiana. ⁵⁰ Eya miqiana nijje mimiani pea bobijo, ma Eyacuiñajji eyajo ania huoojea canaje meshi yasijje. Maya ijja majje ca ca mano'yo ajja tii tii poaje'yo. ⁵¹ Eya ca ca iña pahui jayojjaya, Eyacuiñajjiya huoojea'yo. E'e, eya yahuajo eyajo ani meshi yasijje poeyanaje dejja cuana ba'e tiitii mee'yohua. Jamajjeya jiquio ecua bobi ijja majje miqianaya ba'yani jayojja jama eyaya dejja cuana ba'e tiitii meeje'yo. Ojjaña joya enijje e'e jojo nei jjapeequiani ba'e tiitije'yo enijje eyajo. Eyaya ojjaña cuana enijje ba'e tiitii mee'yo sa añña. Jamajjeya eya manaje'yo ojjaña mimishi cuijea mee'yojji. Jamajjeya eyami ma pea pahui jayojja jama poani —Jesosa poanaje.

⁵² —¡Chojja, de! —Jodio cuana ojee jjamimicuijaja nobiajajaquinaje—. ¿Yajja yajji ohuaya aje oe oja yami quia caje'yo bobi jayojja ecuanaja e'ijjajji, de? —poanaje.

⁵³ —Eyaya miya e'e jojo nei huohuiaña —Jesosa poanaje—. ¡Shajja'ajjacue! Miquiaaya ecue sohui mi shajja'ajjajo, enijje mi jjapeequiajo pea'ai, enijje eba'e tiitii mee'yojji pojjeama. Ecue sohui shajja'ajjajja, ecue yami ijjaña jama jayojja poani; enijje jjapeequianijo, ecuea ena' ishiana jama jayojja poani pea'ai. ¡Jamaya pocue, ecuea epeeji poanijo! ⁵⁴ Jamajjeya ecue sohui shajja'ajjajji cuana, ecuea epeeji nei nei cuana eyaya ba'e tiitii meejaña; poe o'oya majje joya emano'yo cua-

na jaa pea'ai shequi meeje o'oya. ⁵⁵ —¡Bacue! —Jesosa poanaje—. Miquiaaya bobi iijiaña quea bihui nee eba'ejji. Jamaya eya manoje'yo miquiana quea bihui nee eba'e tiitii mee'yojji. Miquiaaya ena oshe ishiaña naba taja'ama epojji. Jamaya ecuea ena' cuayaquije'yo miquiana quea boejea po meeji, cuaqui yasijje epojji pojeama, enijje jjapee neineiquianijo —Jesosa poanaje.

⁵⁶ —E'e —Jesosa poanaje—, jiquio ecua miquianaya quea jeje po majje quea bei nee poani jama jayojja eya miquiana cuanajo mano'yajo, miquianaya quea bei nee poaje'yo. Ecuea ecue ena' cuayaquije'yo miquianaya mimishi cuijea'yojji, miquiana quea bei nee po mee'yojji. Jiquio ecua ena' ishi majje quea bei poani jayojja jama quea bei nee poaje enijje jjapeequi majje. Jamajjeya joya e shajja'ajja neineiiji poani enijje jjapeequiani; eya onijje jjapeequiani pea'ai. ⁵⁷ E'e, Eyacuiñajji enequi tii eshe, ecue Chii e huoojeajji epo. Eya ecue Chiiya ejjashahuabaqui'yojji jayojja jama poanijo, ohuaya eya ba'e tiitii mee cani. Jamajjeya ojjaña joya enijje e'e jojo nei jjapeequiani eyaya ba'e tiitii meeje'yo enijje —Jesosa poanaje—. ⁵⁸ Etiqiana yahuajo nei nei bobi Moisesija quia iijia majje jamatii mano'ya poa. Eya ca ca iña jiquio pea pahui jayojja; eya eyajo ania poa, ecue Chiiya meshi yasijje huoojea canaje. Jamajjeya ojjaña joya enijje e'e jojo nei jjapeequiani eyaya ba'e tiitii meeje'yo enijje eyajo —jamaya Jesusaa Jodio cuana sohuihuohui canaje Capenaomajo, Jodioja equi ojee ejjachichaquijji.

Jesosa huohui ca o'oyanaje esohui eba'e tiitii'yojji

⁶⁰ Jesusaja esohui Capenaomajo shajja'ajja majje quea huiso dejja cuana ojee jjaniñebaquinaje jama ba'a: —¡De! Jesusaja esohui quea tai nee nee, de; shajja'ajja maja sa po'yo ajja iña, ohua oja eyami e'ijjia mee ca —poanaje Jodio cuana.

⁶¹ Onajaya ejjashahuabaquijji Jesusaja eba poanaje. Jamajjeya quea huiso cuana oja esohuijo jjaniñebaquinanijo, Jesusaa huohui canaje jama ba'a: —Ecuea esohuijo ¿a'a miquiana quea tai jjashahuabaquiani? ¿A'a mi enijje jjapeequi pajeaje'yo? ⁶² Quijje eya ojjaña ja Edoe Mese, ma yahuajo eyajo ania poa, jjequisohua caje o'oya iña eyahuasijje; jiquio meshijo enequi tiijji pojeama iña. Jamajjeya aje mi oe ¿yajja jjashahuabaqui'yome acuae mi poaje'yo e jjequisohua ca'yajo? —Jesosa poanaje—. ⁶³ Eyacuiñajjija Edojjoshahua Pameya pea ejjashahuabaquijji ba mee cani yahuajo jama pojeama. Miquianaya ca ca jjashahuabaquiani bobijo, jiquio meshijo eba'ejji. Jamajjeya miya ba'e tiitii mee ajja enijje. Eyaya ca ca huohuiaña Eyacuiñajjija ejjashahuabaquijji. Maaya miquianaya ba'e tiitii mee caje'yo, Eyacuiñajjija esohuijo jjashajja'ajjaquinanijo. ⁶⁴ Jamatii miquianaya quea huiso ejo jama poani ba'a: “Mi shajja'ajja sa po'yo ajja iña; minijje jjapeequi sa po'yo ajja iña” miquianaya poani —Jesosa poanaje.

E'e, yahuajo nei Jesusaja eba poa jama ba'a: “Quijje ecuea epeeji nishohua pea cuana eya iña meeshahua caje'yo onaja equecua'yojji. Quijje quea huiso cuana

enijje jjapeequi ajja poaje”. Jamaya Jesusaja eba. ⁶⁵ Jamajjeya Jesusa jama poanaje pea'ai ba'a: —Jamajjeya eyaya miquianaya yahuajo huohuinaje jama ba'a: “Beca cuana jamatii enijje ejjapeequi'yojji pojeama. Beca cuana joya ecue Chiiya ejo e'e jojo nei jjashahuabaqui mee cani ca ca oe enijje jjapeequije'yo” eyaya yahuajo miquianaya anaje —Jesosa poanaje.

⁶⁶ Majoya ma esohui shajja'ajja majje quea huiso dejja cuana Jesusa nijje poqui pajea'yonaje, o shajja'ajjaji nisho cuana. ⁶⁷ Jamajjeya Jesusaa ecua, o shajja'ajjaji nei, 12 cuana huohui'ajja canaje: —¿Ae poaje miquianaya? ¿A'a miya pea'ai enijje jjapeequi sa po'yo ajja poaje? —Jesosa poanaje.

⁶⁸ —Ecuea Emeshi Mese —Simohui Penohua Jesusa saja'a canaje—, chama' pea mi jayojja. Miyaya ca ca oe esohui e'e jojo nei huohuiaña. Mi shajja'ajjaji caya ca oe ba'e tiitii meeje'yo minijje tii. ⁶⁹ Ecuana minijje e'e jojo nei jjapeequinaje. Ecuana eba miya e'e jojo nei oya Eyacuiñajjija huoojea'yo ojjaña jaahuanajji quea pame nee nee —poanaje Peno.

⁷⁰ —E'e —Jesosa poanaje—. Eyaya miquianaya, 12 cuana babaca'yo majje iyaanaje; jamatii oe dejja minijje nequi ecuea epeeji nisho; oya eshahua epeeji poani —Jesosa poanaje.

⁷¹ Jesusa jjashahuabaquiani Jodasajo, ma Simohui Isicanioteja bacua ejjajo. E'e, Jodasa Jesusa shajja'ajjaji 12 cuana nijje nequinaje. Jamatii quijje Jodasaa Jodio etii cuana Jesusa iña meeshahua canaje bejjo sosejje, onaja quecua'yojji.

Jesosa echahua mese cuana o shajja'ajjaji pojeama poanaje

7 Majoya Jesusaa esohui huohui canananaje Janinea meshijo, Jodea meshijo pojeama. Jodea meshijo Jodio etii cuana equecua ca poaje jjejojya mi poqui o'oyanaje.

² Quijje pishana ojjaña Jodio dejja cuana Jenosanena huasijje poqui o'oyanaje equi sisi iyaa, ojee quea bihui nee iijia'ijjiaa bobi cuana chichajji shejo. ³ Jamajjeya Jesusaja echahua mese cuana onijje jama poanaje ba'a: —¡A'a jja oe jiquiojo Janinea meshijo tii ani tiitijji! ¡Ecuana nijje Jodea meshi yasijje poqui o'oyacue! ¡Jocuama aje oe miyaya ma dejjaa ajjima acani aquicue, ojjaña mi shajja'ajjaji cuanaja ebajji! ⁴ ¡A'a quehuajje ajji cuiñajji sisijo! Jamaya po ajja cuana. ¡Jenosanenajo aquicue oe, ojjaña ebajji! E'e, jjeja jomajo ojjaña dejja cuana jjachichaquiani —poanaje.

⁵ Jamaya huohui canaje oja chahua cuana, Jesusa ba'yo jjimahuaajo, oya Eyacuiñajjija huoojea'yo ojjaña jaahuanajji pojeama poso acanaje. ⁶ Jamajjeya Jesusaa oja chahua cuana huohui canaje jama ba'a: —Chojja, eya Jenosanena huasijje poqui o'oya jjima so'o. Eya jjeja miquiana nijje epoqui jojjemo ojjaña cuana eya shajja'ajja jjima acame. Jamatii, ¡miquianaya poqui'yo sa po majje poqui'yocue! Jomajo dejja cuana mijo jjashahuabaqui ajja. ⁷ Miquianaya ojjaña dejja jayojja jama jjashahuabaquinanijo, mi quecua sa po ajja cuana. Eyaya ca ca onaya jama anaje ba'a: “Miquianaya ojjaña

quea mimishi poanijo, Eyacuiñajjija esohui jama po ajja" poanaje. Jamajjeya ojjaña ejo quea quene poani; quecua sa acani. ⁸ ¡Jamajjeya miquianaya jjeya Jenosanena huasijje poquicue quea cahui huiso ojee ijia'ijjiaa! Eya ca ca iña jjeya epou'yojji pojjeama. E'e, jjeya nei miqiana nijke poqui'yajo eya shajja'ajja jjima acame cuaa —Jesosa poanaje.

⁹ Jamaya huohui majje Jesosa Janinea meshijo aninaje so'o.

Jesosa Jenosanena huasijje poquinaje bobi chichajji shejo

¹⁰ Jamatii oja chahua cuana Jenosanena huasijje poqui'yajo, quijje pishana Jesosa pea'ai poquinaje. Ojjaña pea Jodio dejja cuana nijke pojjeama poquinaje; quehuajje Jenosanena huasijje poquinaje oe nei.

¹¹ Ojee ijia'ijjiaa jjachichaqui majje Jodio etii cuana Jesosaja epoe'yojji ishoa canaje quea quene. Huohui'ajja huicha'a huicha'a canaje jama ba'a: —¿Aecue Jesosa? ¿A'a cuae oya poeyanaje so'o? —acanaje.

¹² Ojjaña cuana echicha'yo pea echicha'yo cuana nijke jjapashineijje maimai aninaje Jesosajo jama ba'a: —Oya quea pame nee nee Jesosa. Siajpeojji pojjeama —beca cuana poanaje.

—Chojja —pea poanaje—, ojjaña cuana se ca dasia cani Jesosaa. E'e, oya Jesosa siajje poani jama ba'a: “Eya ca ca iña Eyacuiñajjija huoojea'yo ojjaña jaahunajji” poani —pea Jodio cuaa acanaje, Jesosaja esohui shajja'ajja sa po ajja jjejojo. ¹³ Jamatii Jodio etii cuanajo quea mete jjejojo jaya Jesosa shajja'ajjaji epo mi mimi neineinaje; jjapashineijje ojo maimainaje. ¹⁴ Jenosanenajo Jodio cuana ojee ijia'ijjiani quea bihui nee quea huiso cahuime, 7 cahuime. Ojee ijia'ijjiani quijje pishana beca cahuime po majje Jesosa Eyacuiñajjija equi yasijje poquinaje. Equi shashajo ojjaña cuana sohuihuohui canaje. ¹⁵ Jesosaja esohui shajja'ajja majje Jodio etii cuana jama poanaje ba'a: —¡De! Ojaya eba quea huiso. ¿Achajja shai? Chama' ojaya esohui huohuijji poanaje. Esho'yahua oya dobiqiu jjiima de, esohui baa.

¹⁶ Jesosaa oya cuana saja'a canaje jama ba'a: —Eyaya huohuiaña miqianaya ecuea esohui pojjeama. Eyacuiñajjiya eya huoojea canaje. Ohuaya eya huohui meesahua cani ojaya ejjashahuabaquijji. ¹⁷ Ojjaña jaya Eyacuiñajjija ejjashahuabaquijji jayojja jama ba'e'yo sa poaniya ba caje e'e jojo nei eyaya huohuiaña Eyacuiñajjija ejjashahuabaquijji, ecuea ejjashahuabaquijji pojjeama. ¹⁸ Jaja beca cuaa ojaya ejjashahuabaquijji huohui cani aje oe pea cuana quea bihui po meeji jama ba'a: “Oya esohui huohuijji nei; jaya shajja'ajjacue!” Jamaya amee sa acani, pea esohui huohuijji cuaa. Pea jayojja jama pojjeama eya. Eyaya ca ca pea cuana bihuia mee sa aña ca ca, ecue Chii, e huoojea'yojji epo oja sohui e'e nei huohuiañajo. Jamajjeya eya edasijji pojjeama. ¹⁹ ¡Bacue! Yahuajo nei Moisesiya miqianajaya etiiquiana cuana huasijje quia ca'ya poa Eyacuiñajjija esohui etehue'yo, miqianajaya ebajji. Jamatii ma esohui etehue'yo jama ba'e ajja miqianaya. Moisesija

etehue'yo jayojja jama eba'e'yo jojjemo e quecua'yo sa po ajja pome —Jesosa poanaje.

²⁰ Ojjaña Jodio cuaa echicha'yo nequiya huohui canaje jama ba'a: —¿Aya acuae mi quecua'yo sa acani so'o? ¡Chojja, de, miya niñepoquiani pojja'a jja mi coma! Mi quecua sa po'yo ajja ecuanaya —siajje poanaje cuana.

²¹ Jesosaa oya cuana saja'a canaje jama ba'a: —Yahuajo eyaya ma dejjaa ajjima acani anaje miquea epojja ejomishocajji; oe dejja jeo'ajja poa. Eyaya oya jeo mee'yonaje. Jamajjeya miqianaya ejo jama poanaje ba'a: “Ohuaya aje oe epojja ejomishocajji acani; equipajajji dojo mee cani pea'ai. Jamaya quea tai. Jamaya pojjeama etiiquianaja ehuhui'yo” miqianaya poanaje. ²² ¡Bacue! Yahuajo nei nei ba'e etiiquiana aca poa jayojja jama Moisesiya huohui ca poa jama ba'a: “¡Mique bacua huo'o nei, eshoi nei cuihasha biso nei jehusejjajecue!” aca poa. Jamajjeya miqiaaya ebaña 8 cahuime poajo cuihasha biso nei jehusejjajecueña, jamatii epojja ejomishocajji jaya. ²³ Jamajjeya Moisesija etehue'yo jama poanajo miqianajaya ebacua cuihasha biso nei jehusejjajecueña epojja ejomishocajji. E'e, miqianaaya pea'ai epojja ejomishocajji chacoaña. Jamajjeya japijji acuae quiana enijje quea que nee nee poani so'o dejja jeo'ajja jeo mee'yonaje epojja ejomishocajji? ²⁴ ¡A'a nequiaa eya niñepoqui poso ajji! Quea ja'a nee nee jjashahuabaqui majje miquea ehuhui ejo e'e jojo nei poaje, quea pame —Jesosa poanaje Eyacuiñajjija equi pejejo nequiya sohuihuohui canijo.

Jesosa e'e jojo nei Eyacuiñajjija huoojea'yo ojjaña jaahunajji

²⁵ Majoya quea huiso dejja cuana Jenosanenajo ba'e-ca ojee miminaje jama ba'a: —Jodio etii cuaa jiquio dejja quecua sa acani. ¿A'a e'e? ²⁶ ¡Bacue oe! Jjeya ohuaya ojjaña cuana sohuihuohui caqui. Jamatii oya iña jjima, mimi pajea mee jjima pea'ai, de. ¿E'e pojja'a etii cuana jjashahuabaquiani che jama ba'a: “E'e pojja'a oya Jesosa e'e jojo nei Eyacuiñajjija huoojea'yo ojjaña jaahunajji”. E'e pojja'a, de. ²⁷ ¡De! Ecuanaja eba jiquio dejjaja ba'e'ji; Quito poeyajo ca ca ojaya eba'e'ji ba jjima poaje cuanaja —poanaje cuana, Jesosa Nasanenajo cuaya poso aca poa.

²⁸ Majoya Jesosaa Eyacuiñajjija equi pejejo sohuihuohui huicha'a huicha'a canijo, oya cuana janobajjima nei saja'a canaje: —E'e, eya miqiaaya eba poso aña. Ecuea eba'e'ji miqiaaya eba pea'ai poso aña. Eya miqiana que jamatii poe jjima. Chojja, ecue Chiiya eya huoojea canaje. Ojaya esohui e'e nei. Oya miqianajaya ba jjima, de. ²⁹ Eya onijje ania poa; ohuaya eya huoojea canaje. Jamajjeya oya ecuea eba nei —Jesosa poanaje.

³⁰ Ma shajja'ajja majje Jodio etii cuana oya Jesosa Eyacuiñajjija Bacua Ejja pojjeama poso acanijo quea quene nee nee poanaje, iña sa acanaje. Jamatii iña jjima, jjeya iña mee jjima acanaje. ³¹ Quea huiso dejja ejjachichaqui nequi'yo cuana jjashahuabaquiani jama

ba'a: —Jesosa e'e jojo nei Eyacuiñajjija huoojea'yo ojjaña jaahuana'yojji.

Jama poanaje pea'ai ba'a: —E'e nei Jesosa Eyacuiñajjija huoojea'yo ojjaña jaahuanajji. Chama' pea dejja Jesosa jayojja epoe o'oyajji; ma dejjaa ajjima acani quea huiso acanaje ohuaye nei —poanaje cuana.

Paniseo cuaa sohuinano huoojea canaje Jesosa iña nisho

³² Paniseohua shajja'ajja canaje quea huiso dejja cuana jama poani ba'a: "Jesosa Eyacuiñajjija huoojea'yo ojjaña jaahuanajji". Ma shajja'ajja majje Paniseo etii cuaa, Eyacuiñajji nijje emimijji etii cuaa pea'ai Jodio sohuinano cuana huoojea canaje jama ba'a: —¡Jesosa iñaquicue ejeanobiajji! —acanaje. Ma Jodio sohuinano Eyacuiñajjija equi cuiñajji poani.

³³ Majoya Jesusaa jama sohuihuoime acanaje ba'a: —Eya minijje nequi tiitii ajja. Ecue Chiiya eya huoojea ca poa. Quijje pishana eya poquije o'oya o que. ³⁴ Majoya eya sa'ajjaje'yo; jamatii eya miqianajaya eba'yojji pojjeama. Poqui meeme ajja enijje e ba'e yasijje —Jesosa poanaje.

³⁵ —¿Achacua shai oya poquije'yo, jocuama ecuana epoqui'yojji pojjeama pojja'a? ¿A'a oya pojja'a poquije Jieno dejja cuana huasijje, Jodio cuana Jieno nijje ba'e cuana jjabaechejjequiani yasijje poquije pojja'a, ojaya esohui huohuiya? —Jodio cuana ojee mimimiminaje Jesosajo.

³⁶ —¿Ajeo shai Jesosa jama jjashahuabaquiani? —poanaje Jodio cuana—. "Miquiaaya eya sa'ajjaje'yo; jamatii miqianajaya eya eba'yojji pojjeama. Poqui meeme ajja ma e ba'e yasijje enijje" Jesosa poanaje, de —Jodio cuana poanaje.

³⁷ Jenosanenajo Jodio cuana ojee ijia'ijjianaje quea huiso cahuime, 7 cahuime bobi chichajji shejo. Ma pojja cuanajo quea bihui nee poanaje, yahuajo ijia'ijjia jji-mahuajo quea bihui pishana poa. Beshahua nei ijia-pajja ca'yanijo, quea bihui nee nee poa. Jamajjeya beshahua nei ojee ijia'ijjia pajea'yanijo Eyacuiñajjija equi pejeje Jesosa que jjachichaqui o'oyanaje. Jesosa taanaje ojjaña huasijje jama ba'a: —¡Ojjaña miqianaya quea naba taja jayojja poanijo, poecue e que, ecuea e'ishijji ishiya! Enijje jjapeequi sa neinei poanijo quea naba taja jayojja jama poani; jamajjeya eyaya miqianaya ba'e tiitii meeje'yo ecuea esohui e'e jojo nei shajja'ajjañajo. ³⁸ Jiquio ecua ena eteohuejja cuayani tii tii jayojjaya, ojjaña ishi majje naba taja'ama poani jayojja jama ojjaña joya enijje jjapeequiani eyaya ba'e tiitii meeje'yo. Majoya oya cuaa pea cuana enijje jjapeequi meesahua caje'yo pea'ai —Jesosa poanaje.

³⁹ Jesosa jjashahuabaquiani jama ba'a: —Edojjoshahua Pame poeje'yo. Dobiquije'yo ecuea epeeji cuana huasijje. Enijje jjapeequi meesahua caje'yo quea pame nee; jiquio ecua ena caneco cuatajea cani jama jayojja quea cuata poaje Edojjoshahua Pame dobiquajo.

Jesosa jamaya poanaje Edojjoshahua Pame ojaya epeeji cuana huasijje dobiqui jjimahuajo. Quijje Jesosa

emano'yojaa shequi o'oya majje eyahuasijje jjequisohua ca'yajo, ohuaya Edojjoshahua Pame huoojea caje ojaya epeeji cuana huasijje.

⁴⁰ Jesosaja esohui shajja'ajja majje quea huiso cuana jama poanaje ba'a: —E'e jojo nei Jesosa Eyacuiñajjija esohui huohuijji nei. Yahuajo nei Moisesiya tehue ca poa jama ba'a: "Oya poeje Eyacuiñajjija huoojea'yo ojjaña jaahuanajji poe jjimahuajo" tehue ca poa —poanaje cuana; Jesosa esohui huohuijji poso acanaje, Eyacuiñajjija huoojea'yo ojjaña jaahuanajji pojjeama poso acanaje beca cuaa.

⁴¹ Pea cuana ca ca jama poanaje ba'a: —Chojja. ¡Oya ca ca oe Eyacuiñajjija huoojea'yo ojjaña jaahuanajji e'e jojo nei, de!

Jamatii pea cuana poanaje: —Chojja, Jesosa Janinea meshijo ba'e. Eyacuiñajjija huoojea'yo ojjaña jaahuanajji ca ca Janinea meshijo pojjeama cuayaje —acanaje cuaa, Jesosa Janinea meshijo Nasanenajo cuaya poso.

⁴² —Eyacuiñajjija esohui etehue'yo yahuajo jama poani ba'a: "Dabi emeshi mese yahuajo ba'ya poa Eyacuiñajjija huoojea'yo ojjaña jaahuanajji emeshi mese ojaya osecua poaje. Jamajjeya Dabija meshijo cuayaje, Benenajo, Jodea meshijo" —poanaje beca cuana.

⁴³ Jamaya ojjaña Jodio dejja cuaa mimicuijjeanobia canaje Jesosajo. ⁴⁴ Beca cuaa Jesosa iña mee sa acanaje; jamatii jja'iña meequi jjima poanaje.

⁴⁵ Jamajjeya sohuinano cuana, Eyacuiñajjija equi cuiñajji, ma Paniseohua yahuajo huoojea canaje Jesosa iña nisho Jesosa esohui huohui poequi baqui majje huacuaya poqui'yonaje Eyacuiñajji nijje emimijji etii yasijje, Paniseo cuana pea'ai yasijje. Poeyajo, Sohuinano cuana tecuea canaje Jodio cuaa: —¿Apiojji acuae quianaja Jesosa iña jjima so'o? Ye jjima, de —poanaje.

⁴⁶ —Chama' pea dejja Jesosa jayojja jama mimime. Pea dejja o jayojja mimi jjima; ojaya esohui quea pame nee nee, de —sohuinanohua saja'ame acanaje.

⁴⁷ —¡De! Ohuaya aje mi oe dasia canaje pea'ai —sohuinano tecueame acanaje Paniseo cuaa—. ⁴⁸ ¿A'a Jodio etii cuana, ecuana pea'ai onijje jjapeequiani? ¿A'a oya shajja'ajjaña pea'ai ecuaa? Chojja, de —Paniseo cuaa acanaje—. ⁴⁹ Ojjaña jiquio dejja echicha'yo nequi ca ca Moisesija etehue'yo ba jjimajo, oya cuana Eyacuiñajjiya quea nee nee po mee caje'yo cuaquijo —acanaje Paniseo cuaa, jjashahuaba taiquianiya jjejojo.

⁵⁰ Nicodemo, ma yahuajo Jesosa nijje miminaje mecajje Paniseo cuana nijje pea'ai nequinaje. Jamajjeya ohuaya pea Paniseo cuana jama huohui'ajjame acanaje ba'a: ⁵¹ —¡Bacue! Moisesija esohui etehue'yo yahuajo jiquio jama poanaje ba'a: "¡Oe dejja niñeba jji-mahuajo, oya iyaacue! Ohuaya huohui cajje, majoya miqianaaya baje'yo oya quea mimishi pojja'a, oya mimishi'ama pojja'a". ¿A'a e'e? —poanaje Nicodemo.

⁵² Paniseo cuaa jja oya saja'a canaje. Quea mimi tecue poanaje jama ba'a: —¿A'a miya pea'ai Janinea dejja, Janinea meshijo ba'e pea'ai? ¡Eyacuiñajjija esohui ba neineicue! Chama' poaje Eyacuiñajjija esohui huohuijji Janinea meshijo ba'ecaja, pa —poanaje Paniseo cuana.

⁵³ Majoya, siniajo ijia'ijia pajea majje ojjaña cuana poquinaje equi cuana huasijje cahuiya.

8 Jesosa ca ca eyiyo bajjani Onimo eyiyo huasijje poquinaje. Jomajo aninaje jiquio mecajje.

Jodio cuaa epona quea mimishi Jesosa que ye canaje

² Mecajjeahua Jesosa poe o'oyanaje Eyacuiñajjija equi yasijje. Quea huiso nee nee cuana o que jjachichaqui o'oyanaje. Eyacuiñajjija equi pejejejo anioque majje Jesusaa sohuihuohui ca o'oyanaje ojjaña cuana huasijje. ³ Majoya Paniseo cuaa, Moisesija etehue'yo huohuijji cuaa pea'ai epona quea mimishi ye canaje. Pea cuaa oya ba canaje pea dejja oja yahue pojjeama nijje jaa, pa. Jamajjeya Paniseo cuaa huohui canaje epona jama ba'a: —¡Jesosa nequi cojja nei nequicue!

⁴ Majoya Paniseo cuaa Jesosa huohui canaje jama ba'a: —Esohui huohuijji, jiquio epona quea mimishi nee poanaje. Pea dejja oja yahue pojjeama nijje jaanaje —acanaje cuaa—. ⁵ Moisesiya yahuajo nei jama tehueme aca poa ba'a: “¡Epona pea dejja oja yahue pojjeama nijje jaajo, jajahuejjajeacue meiya!” tehueme aca poa yahuajo nei. Jamajjeya, Jesosa, ¿yajja acuae miyaya epona aje so'o? —poanaje Paniseo cuana Moisesija etehue'yo jayojja ohua mi saja'a cajje Jesosa e'iña'yojji nisho jjashahuabaquinaje. ⁶ E'e, jjashahuabaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuanaja jama poaje: “Oya Jesosa ca ca oma sijjepojji; Moisesija esohui jayojja jama po ajja”.

Jamatii Jesusaa oya cuana saja'a jjima acanaje. Meshi pohuijo tehue canaje eme sisiya. ⁷ Paniseo cuaa epona huohui majamaja'ajja canaje. Jamajjeya Jesusaa Paniseo cuana cojja ba jeyojeyo neinei majje saja'a canaje jama ba'a: —¡Miquianaaya joya mimishi'ama nei neiya ebionei mei jea coocue, jajahuejjajeacue pona! —poanaje.

⁸ Mimi majje Jesusaa meshi pohuijo tehue ca o'oyanaje. ⁹ Jesusaja esohui shajja'ajja majje Jodio dejja cuana oe cuayaqui, oe cuayaqui'yonaje esecue yasijje. Ebionei edejja tii ehui dojojji cuayaqui'ya poa; o quishishijji joya etii pishana cuayaquinaje pea'ai. Quea bicho ojjaña poanaje quea mimishi jjejojo. Epona jeana ca'yonaje Jesosa cojja neijo nequi. ¹⁰ Jamajjeya Jesusaa nequisohua majje bajea canaje epona nequi; chama' Jodio etii cuana. Epona nijje jama poanaje ba'a: —Epona, ¿ae acuae ma mi tecueajji epo? ¿A'a mi mique mimishijo jajahuejjajeajja ca'yonaje cuaa? —ba majje acanaje Jesusaa.

¹¹ —Esohui huohuijji, jaja'yo jjima mo Jodio etii cuanaja. Poquinaje oya cuana ojjaña —poanaje epona.

—E'e epona, ecuea miya ejajahuejjajeajji pojjeama pea'ai. ¡Poquicue miya; mimishi pajea'yocue! —Jesosa poanaje epona nijje.

Majoya epona poquinaje quea bihui nee.

Jesosaa ojjaña cuana Eyacuiñajji ba mee cajje

¹² Majoya epona nijje mimi majje Jesusaa sohuihuohui ca o'oyanaje ojjaña ejjachichaqui anica huasijje. Jama poanaje ba'a: —Jamatii quea apo nee neeya, cuaquijjiya jeaja'a cani mecajje. Oya jayojjaya eya poani. Eyaya dejja cuana jamatii quea mimishi nee nee poa quea ja'a nee jjashahuabaqui meeaña Eyacuiñajjijo. Ojjaña joya ejo e'e jojo nei jjashahuabaquiani aje oe quea mimishi, quea apo pea'ai ba'e maja ajja. Eyaya oya cuana ba'e tiitii meeje'yo enijje —Jesosa poanaje.

¹³ Jamajjeya pea Paniseo cuana Jesosa nijje mimijajinaje jama ba'a: —¡De! Miyaya neiya huohuiaña jama ba'a: “Eyaya dejja cuana ba'e tiitii meeje'yo” poani. Miyaya nei jama huohuiañajo, ecuanaja miya eshajja'ajjaji pojjeama. Chojja, de. Moisesiya yahuajo nei jama huohui ca poa ba'a: “¡A'a oe dejjaja ehuhui shajja'ajjaji! ¡Becanejjijji pea'aiya huohui canijo oe shajja'ajjacue!” poa —poanaje Paniseo cuana.

¹⁴ Jesusaa oya cuana acanaje jama ba'a: —E'e, eya neiya poanaje eyaya ecuea epeeji cuana ba'e tiitii meeaña. Jamaya e'e jojo nei eyaya aña. Ecuea eba ecue Chii e huoojeajji epo. ¿Achacua eya poquije o'oya? Ecuea eba, de. Jamatii miquianajaya maya ba jjima. Jamajjeya ¡ecuea ehuhui ejo shajja'ajjacue! ¡Jamatii eyaye nei huohuiañajo shajja'ajjacue! ¹⁵ Dejja mimishi cuanaja ejjashahuabaquijji jama miquianaya ejo jjashahuabaquiani, quea quehua. Eya ca ca mi jayojja jama pojjeama. ¹⁶ Jamatii eyaya dejja cuanaja eba'ejji huohuiañajo, ecuea ehuhui'yo e'e nei poani. E'e, ecue Chiiya eya huoojea canaje. Ojaya ehuhui jayojja jama eyaya aña, ecuea ejjashahuabaquijjijo pojjeama. Eya ecue Chii nijje beca. Jamajjeya ecuanaja ehuhui'yo dejja cuanajo e'e nei nei poani. ¹⁷ Miquianajaya etiiquianaja Moisesija etehue'yo jama yahuajo poa ba'a: “Becanejjijji pea'aiya oya jayojjaya huohui cajo ¡shajja'ajjacue, miquianaaya!” jamaya tehue ca poa. ¹⁸ Eyaya miya huohuiaña jama ba'a: Eyaya Eyacuiñajjija huoojea'yo ojjaña jaahuanajjiya ecuea epeeji cuana ba'e tiitii meeje'yo. Ecue Chiiya pea'ai jama miya ba meesahua cani ba'a: “Jesosa ecue huoojea'yo” ecue Chii poani —Jesosa poanaje.

¹⁹ Jamajjeya Paniseo cuaa Jesosa huohui'ajja canaje jama ba'a: —¿Achejo acuae mique Chii ani so'o?

Jesosaa saja'a canaje jama ba'a: —Miquianajaya eya ba'yo jjima; ecue Chii miquianajaya ba'yo jjima pea'ai. E'e, eya miquianajaya eba jojjemo ecue Chii pea'ai bame.

²⁰ Jamaya Jesusaa sohuihuohui canaje Eyacuiñajjija equi pejejejo nequiya, Jodio etii cuana ojee chacochoani pejejejo. Jamatii Jodio etii cuana Jesusaja esohui shajja'ajja majje iña jjima poanaje jja'iña meequi ajjajojo.

Jesosaa Jodio shajjama' cuana tecuea canaje

²¹ Majoya Jesosaa ojjaña cuana huohui canaje jama ba'a: —Eya minijje nequi tii ajja; quijje pishana eya poquije o'oya. Quijje miqianaaya eya sa'ajja neineiye'yo miquea mimishi cuijea'yojji, mi jaahuanajji pea'ai. Jamatii miqianaya quea mimishi tii manojeyojo, quea nee nee poaje'yo cuaquijo. Ma e poqui yani yasijje miqianaya epoquijji pojjeama —Jesosa poanaje.

²² Jamajjeya Jodio etii cuana ojee huohui'ajja canaje jama ba'a: —¿Yajjajje oya poquije? ¿A'a oya jjayacuaqui'yo majje mano'yo sa poani pojja'a? ¿A'a jamajjeya ohuaya jama acanaje ba'a: “Ma e poqui yani yasijje miqianaya epoquijji pojjeama?” —acanaje Jodio etii cuana.

²³ Jesosa jama poanaje ba'a: —Miqianaya meshijo ba'e. Jamajjeya Edosiquiana jayojja jjashahuabaquime poani, quea tai. Eya ca ca iña eyajo ba'e, Eyacuiñajji jayojja jama eya jjashahuabaquiani. ²⁴ Jamajjeya eyaya miya huohuinaje jama ba'a: “Miqianaya quea mimishi tii manojeyojo, quea nee nee tii poaje'yo cuaquijo”. Eyaya miqianaya huohuinaje eya Eyacuiñajjija huoojea'yo ojjaña jaahuanajji. Jamatii miqianaya jjashajja'ajjaqui ajja. Jamajjeya miqianaya e'e jojo nei manojeyojo mimishi cuijea'yo jjima tii. Quea nee nee poaje'yo tii tii cuaquijo —Jesosa poanaje.

²⁵ —E'e pojja'a —Jodio etii cuana poanaje. ¿Aya acuae mi huoojea canaje so'o ecuanaya que? ¿Ajeo miya poeyanaje jiquiacua? —Jodio cuana poanaje.

—¡De! Aje jja mi huohui huicha'a huicha'a'ajjanaje yahuajo ehuohui coojji —Jesosa poanaje—. ²⁶ Miqianaya ecuea eba quea jjashahuabaqui tai, quea mimishi poani —Jesosaa Jodio cuana acanaje—. Jamajjeya eyaya miqianaya tecueaña. Miqianaaya niñebaña ecuea ehuohui'yojo. Jamatii ecue Chiiya eya huoojea canaje; ojaya eba ojjaña; ojaya esohui e'e nei. Maya eyaya ojjaña cuana huasijje huohuiaña —Jesosa poanaje.

²⁷ Jesosaja esohui oja Chiijo Jodio etii cuana ba sa po ajja. Oya cuana jjashahuabaquiani quea tai jama ba'a: —Chojja, Jesosa Eyacuiñajjija huoojea'yo pojjeama —poso acanaje Jodio etii cuana.

²⁸ Jamajjeya Jesosaa huohui canaje jama ba'a: —¡Bacue! Quijje eya, ojjaña Edoe Mese miqianaaya ba'ehuanasohuajeaje'yo acui ecueata'apeejo. Majoya miqianajaya eba poaje jama ba'a: “Jesosa e'e jojo nei Eyacuiñajjija huoojea'yo ojjaña jaahuanajji”. E'e, ojaya esohui eyaya huohuiaña, ecue Chiija. Ecuea ejjashahuabaqui'yoyji ca ca eyaya huohui jjima aña. ²⁹ Ecue Chiiya eya huoojea canaje. Eyaya oya quea bihui po mee sa aña tii. Jamajjeya oya enijje yani tii tii, ohuaya eya jeanana'yo ajja —Jesosa poanaje.

³⁰ Quea huiso Jodio cuana Jesosa shajja'ajja majje jama poanaje ba'a: —E'e jojo nei nei Jesosa Eyacuiñajjija huoojea'yo ojjaña jaahuanajji. Oja sohui e'e jojo nei —poanaje.

Eyacuiñajjija bacua cuana eshahuaa napa ajja

³¹ Jamajjeya quea huiso Jodio cuana Jesosa nijje jja-peequinaje. Oya cuana Jesosaa jama acanaje ba'a: —E'e, ecuea esohui jama ba'anyi tiijo miqianaya e shajja'ajjajji e'e jojo nei poani. ³² Jama poanijo ecuea esohui miqianajaya quea ja'a nee poaje'yo. Ecuea esohui e'e jojo nei poani, siajje pojjeama. Jamajjeya ecuea esohui ba neineiyajo, miqianajaya mimishi cuana pajea meeje'yo, Edosiquianaja yajjijo chaco meepajeaje'yo pea'ai —Jesosa poanaje.

³³ Majoya pea Jodio cuana Jesosa nijje jjapeequi ajjajo quea tecue jama poanaje ba'a: —Chojja. Amajama ecuanaja etiiquiana, de. Jamajjeya pea cuanaja ecuanaya huoojea'yoyji pojjeama peaja yajjijo chacochochagua sosema' —siajje poanaje oya cuana—. ¿Yajjajje miya jama poanaje ba'a: “Eyaya miqianaya chacochochochagua meeje'yo peaja yajjijo?” —poanaje Jodio cuana.

³⁴ Jesosaa oya saja'a canaje: —E'e jojo nei ojjaña joya quea mimishi poani ca ca o huoojea'yoyji Edosiquiana bajjani jayojja jama poani tii, quea mimishi. Ojaya yajjijo chacochochagua meeme ajja jama jayojjaya aña miqianaya, miqianajaya mimishi pajea'yo ajjajo. ³⁵ ¡Bacue! Echacojji ba'e tiitii ajja echacojji meseja equijo. Oja bacua ca ca oe onijje ba'e tiitijje'yo. Miqiana huoojea'yoyji Edosiquiana bajjani quea mimishi; ojaya yajjijo miqianaya sosema' chacochochoani. Jamajjeya miqianaya ba'e tiitii mee ajja Eyacuiñajji nijje. E shajja'ajjajji poani ca ca Eyacuiñajji nijje ba'e tiitijje'yo oja bacua jjejojya. ³⁶ Jamajjeya eyaya, Eyacuiñajjija Bacua Ejjaa miqianaya mimishi pajea meesahuaje'yo. Jamajjeya miqianaya e'e jojo nei Edosiquianaja huoojea'yo pojjeama poaje'yo. ³⁷ E'e, ecuea eba Amajama miqianajaya etiiquiana poa. Jamatii miqianaya ecuea esohui shajja'ajja sa po'yo ajja nei nei. Jamajjeya miqianaaya eya quecua sa aña. ³⁸ Miqianaaya mi huoojeajji jayojja jama atitiiña quea tai. Oya Edosiquiana huoojeajji poani, Satanasa bajjaniya. Eyaya ca ca huohuiaña ojjaña ecue Chiija ejjashahuabaquijji quea pame —Jesosa poanaje.

³⁹ —Chojja —Jodio cuana po nishonaje—, Amajama ecuanaja etiiquiana. Ohuaya jayojja jama aña ecuanaya quea pame —poanaje.

—Chojja —Jesosaa Jodio etii cuana saja'ame acanaje—. Amajama quea pame, miqianajaya etiiquiana mese poa; jamatii miqianaya o jayojja quea pame po'yo ajja. ¿Yajjajo acuae miqianaya o jayojja mi po'yaní? ⁴⁰ Eyaya Eyacuiñajjija esohui e'e nei huohuinajejo, miqianaya shajja'ajja sa po ajja. Jamajjeya eya miqianaaya quecua sa aña. Amajama ca ca jama po'yo ajja; quea pame nee oya. ⁴¹ Miqianaaya aje oe mi huoojeajjija ehuohui quea tai jayojja jama atitiiña, Edosiquianaja ehuohui jama —Jesosa poanaje.

Jamatii Jodio etii cuana quenequenaje. Jama poanaje ba'a: —Chojja, Eyacuiñajji e'e jojo nei ecuanaja Chii. Ecuanaya ojaya ebacua cuana quea pame poani, de —poanaje Jodio etii cuana.

⁴² Jেসোসা oya cuana huohui canaje jama ba'a: —Eya Eyacuiñajji nijje ani poeyanaje jiquiacua, jiquio meshi yasijje. Eyacuiñajji miquianaja Chii pojjeamajo eya miquianaaya boti'ama aña. E'e, Eyacuiñajjiya eya huoojea canaje; eya jamatii poe'yo jjima. Chojja, ohuaya eya huoojea canaje. ⁴³ ¿Apiojji acuae miquianaya ejo jjabahuejjaqui jjima? Miya ca mi ca oe e shajja'ajja sa po'yo ajja tii nequi. ⁴⁴ E'e, Edosiquiana huoojeajji poani mi huoojeajji poani; ojaya ejjashahuabaquijji jama atiitii'yo sa poani miquianaya. Yahuajo nei nei oya ona quecua coo'yojji poa. Eyacuiñajjiya esohui e'e nei jayojja jama ojaya ajjima pea'ai poa; esohui ojaya boti'ama nei nei poa. Oya siajje poani tii tii, siajjepojji nei nei. Oya ca ca oma siajje po coonaje; siajjepojji cuana huoojeajji poani. Ojjaña siajjepojji cuana ojaya epeeji cuana, Edosiquianaja epeeji. ⁴⁵ Eyaya miquianaya Eyacuiñajjiya esohui e'e nei huohuiaña. Jamatii miquianaaya eya shajja'ajja jjima aña. Edosiquiana jayojja miquianaya jjashahuabaquiani. ⁴⁶ Miquianaya ejo jama po ajja ba'a: "Jesosa quea mimishi". Chojja de. Jamajjeya eya esohui e'e nei huohuiaña, ¿apiojji acuae ecue huohui shajja'ajja jjima tii aña so'o? —Jesosa poanaje—. ⁴⁷ ¡Bacue! Ojjaña Eyacuiñajjiya epeejiya oja sohui shajja'ajja cani tii. Miquianaya ca ca Eyacuiñajjiya epeeji pojjeama jjejojo ojaya esohui shajja'ajja sa po'yo ajja tii —Jesosa poanaje.

⁴⁸ Majoya Jodio etii cuaa quenequene majje jama acanaje ba'a: —¡Miya ca mi ca oe Samania dejja tai, niñepoqui!

⁴⁹ —Chojja —Jesosa acanaje—, eya niñepoqui pojjeama. Ecue huohui ecue Chiijo e'e nei. Eyaya oya bihuiaña quea ja'a nee. Miquianaaya ca ca eya niñebaña —Jesosa Jodio etii cuana acanaje—. ⁵⁰ Eya onaya ejo mimi mee sa po'yo ajja jama ba'a: "Jesosa quea pame nee, ¡oya bihuiañe!" Chojja, eyaya dejja jamaya epo mee'yojji pojjeama ejo. Ecue Chii ca ca ejo jjashahuabaquiani quea pame nee; e'e jojo nei ejo huohui cani ohuaya —Jesosa poanaje—. ⁵¹ Eyaya miquianaya e'e jojo nei huohuiaña jama ba'a: Ojjaña joya e shajja'ajja neineiiji poani ba'e tiitii meeje'yo, oya cuana ca ca emano'yojjiyo mete'ama poaje'yo pea'ai —Jesosa poanaje.

⁵² Maya shajja'ajja majje Jodio cuaa Jesosa jama acanaje ba'a: —Miquea ehuohui emano'yojjiyo ecuanaja eba miya e'e jojo nei niñepoqui poani eshahuaa napa canijo. ¡Bacue! Yahuajo ecuanaja etiiquiana Amajama mano'ya poa. Eyacuiñajjiya esohui huohuijji cuana yahuajo ba'e mano'ya poa pea'ai. Jamatii jjeya miyaya huohuiaña jama ba'a: "Ecue esohui jayojja jama ba'-yanijo emano'yojji pojjeama miquianaya cuana poaje". ¡Dee! ⁵³ Ecuanaja etiiquiana Amajama quea pame nee, quea ca'a nee poa; jamatii oya mano'ya poa. ¿A'a miyaya ma Amajamaja ajjima aje'yo? Jesosa, ¿a'a miyaya emano'yo cuana shequi meeje'yo? Eyacuiñajjiya esohui huohuijji cuana yahuajo nei ba'e poquijeyo'ya poa pea'ai, de. ¿A'a miya pea dejja jayojja jama pojjeama? ¿A'a miyaya ojjaña baña quea ja'a nee? Chojja, siajje

miya poani —Jodio cuana mimijaji majamajanaje Jesosa nijje.

⁵⁴ Jamajjeyaya Jesosa ojjaña cuana huohui canaje jama ba'a: —Eya onaya ejo mimi mee sa po'yo ajja jama ba'a: "Jesosa quea pame nee, ¡oya bihuiañe!" Chojja de, Eyacuiñajjiya, ecue Chiya ca ca oe eya quea jea acani. Jamaya eyaya saña. E'e, ecue Chiya ejo jama huohui cani ba'a: "¡Jiquio ecuea Ebacua Ejja quea pame nee nee, quea ca'a nee nee; ¡oya shajja'ajjacue!" poani ecue Chii. Ecue Chiijo miquianaya jama siajje poani ba'a: "Ecuana Eyacuiñajjiya epeeji, oya ecuanaja eba". ⁵⁵ Chojja de. Oya miquianajaya ba jjima, de. Miquianaaya siajje poani. Eya ca ca siajje po ajja. Oya ecuea eba nei nei; eya siajjepojji pojjeama. Eyaya oya baña; ojaya esohui shajja'ajjaña; ojaya esohui jayojja jama poani tii tii. ⁵⁶ Yahuajo nei miquianajaya etiiquiana Amajama quea bihui nee nee jjashahuabaquinaje ecuea epoe'yojjiyo quijje nei. E'e, Eyacuiñajjiya yahuajo Amajama ba mee ca poa jama ba'a: Eya, Eyacuiñajjiya huoojea'yo ojjaña jaahuanajji quijje meshi yasijje poeje'yo. Ma ba majje quea bihui nee nee Amajama poa —Jesosa poanaje.

⁵⁷ Majoya Jodio cuaa Jesosa jama acanaje ba'a: —Chojja de, miya siajje poani, de. Miya esho'i, 50 cui'ao sheme po jjima miya de. Amajama ca ca yahuajo nei nei ba'ya poa. Oya miquea ba jjima, de —poanaje Jodio cuana.

⁵⁸ —¡Shajja'ajjacue! —Jesosa saja'a canaje—. Eyaya miya e'e jojo nei huohuiaña: Amajama cuaya jjimahuaajo tii eya yaña tiia poa. Eya ca iña Eyacuiñajji nei —Jesosa poanaje.

⁵⁹ Ma shajja'ajja majje Jesosa siajje poani poso Jodio cuaa mei iña canaje o jajahuejjajeajji nisho. Jamatii Jesosa chama' poanaje. Jesosa quea huiso dejja tejje nequijje quehua cuayaquinaje Eyacuiñajjiya equi esecue jjani yasijje. Poquinaje.

Cojjama' cuaya jjabapojjaqui mee canaje Jesosaa

9 Quijje pea pojjaajo, ejomishocajji pojjaajo Jesosa ecuanaja nijje, o shajja'ajjaji cuana nijje ejiojjiye poquijeya ohuaya ba canaje oe dejja cojjama' cuaya. ² Ba majje ecuanaja Jesosa huohui'ajjanaje jama ba'a: —Esohui huohuijji, ¿yajjajje acuae jiquio cojjama' cuayanaje so'o? ¿A'a ojaya mimishijo pojja'a? ¿A'a oja chiija, oja naeja mimishijo pojja'a? —poanaje.

³ —Chojja —Jesosa ecuanaja saja'a canaje—, oya cojjama' cuaya poa ojaya mimishijo pojjeama, oja chii, oja nae cuanaja mimishijo pojjeama pea'ai. Oya jamatii cojjama' cuaya mee ca poa. Jamajjeya eyaya oya jjabapojjaqui meeje'yo. Ba majje ojjaña cuaa bihuia caje: "E'e, Eyacuiñajjiya Jesosa jjabapojjaqui mee canaje cojjama'; quea ca'a nee oya, quea pame nee nee" acaje —Jesosa poanaje—. ⁴ Eyacuiñajjiya eya huoojea canaje o chacojji. Jamajjeya jjeya eya miquiana nijje nequianiyo Eyacuiñajjiyo chacoaña. Quijje eya miquiana nijje nequi ajja jiquiojo. Eyacuiñajjiyo chaco majamaja majje eya manoje'yo. ⁵ Meshijo nequiya eyaya ojjaña cuana Eyacuiñajjiya esohui ba meeña. Eya cuaquijji jayojja

jama poani. Jiquio ecua cuaquijijya jeaja'a canijo dejja cuana poquiquehua ajja mecalle quea apojo jama jayojja eyaya ojjaña cuana Eyacuiñajjijo quea ja'a jjas-hahuabaqui meeaña.

⁶Jamaya mimi majje Jiosaa cuichojea canaje meshi pohui yasijje. Cojjamaja ecojja iñapepa canaje meshi choeya. ⁷Majoya cojjama' huohui canaje: —¡Poquicue miya; ecojja shacuaquicue ena eteohuejja huasijje, Sinoe' bajjani yasijje! —poanaje. (Ma ena eteohuejja Ese Ejjaja esohuijo: Eyacuiñajjija huoojea'yo ena bajjani.)

Jamajjeya cojjama' poquinaje ena eteohuejja huasijje ecojja shacuaa. Ecojja shacua majje jjabapojjaquinaje. Equi yasijje poe o'oyanaje cojjajji. ⁸Jamajjeya dejja cuaa o pejejo ba'ecaa, pea cuaa yahuajo oya meme ani ba canajeya pea'ai oya cojjajji ba ca'yonaje. Ba'yo majje ojee mimimiminaje jama ba'a: —Jiquio dejja yahuajo cojjama' e'anioque ani meme ani eseyaya banaje. ¿A'a e'e? —poanaje.

—E'e, oyaya jja coma —beca cuana poanaje.

—Chojja, pea coma; cojjama' jayojja coma —pea cuana poanaje.

⁹Oya yahuajo cojjama' jama poanaje ba'a: —E'e, eya iquio ma yahuajo cojjama' cuaya poaya. Jjeya eya cojjajji —cojjama' poanaje.

¹⁰—E'e nei. ¿Yajjajje acuae mi cojjajji'yo? ¿Yajja acuae mi po'yonaje? Jjeya miya cojjajji'yo —jama huohui'ajja neineimeya acanaje cuaa.

¹¹Ohuaya saja'a canaje: —Jiosaa bajjaniya mo cuichojea canaje meshi pohui tejje. Ecuea ecojja iñapepa canaje meshi choeya. Majoya eya huoojea canaje Sinoe' ena eteohuejja huasijje ecojja shacuaa. Jamajjeya eya poquinaje. Ecojja shacuaqui majje eya jjabapojjaquinaje —acanaje.

¹²—¿A'a e'e? —ojjaña cuana poanaje—. ¿Achacua acuae ani oya Jiosaa jjeya so'o? —poanaje.

—Cua'a de, ecuea oya ba jjima ecojjaja —poanaje.

Paniseo cuaa dejja yahuajo cojjama' cuaya ba canaje

¹³Jamajjeya pea mecahuajje o pejejo ba'e cuaa ma dejja yahuajo cojjama' cuaya poa jjequi canaje Paniseo cuanaja ebajji. ¹⁴Jiosaa meshi pohui ecuchojea ecojja huasijje iñapepa cajje jjabapojjaqui mee canaje epojja ejomishocajjijo. ¹⁵Jamajjeya Paniseo cuaa ma ba majje huohui'ajja ca o'oyanaje jama ba'a: —¿Yajjajje acuae mi cojjajji'yo? ¿Yajja acuae mi poanaje so'o? —poanaje Paniseo cuana.

—Jiosaa ecuea ecojja iñapepa canaje meshi choeya. Majoya ecojja shacuaqui majje eya jjabapojjaquinaje —poanaje ma dejja.

¹⁶Jamatii beca Paniseo cuaa huohui canaje jama ba'a: —Ma dejja Jiosaa bajjaniya ca ca oe epojja ejomishocajjijo chaco cani, de —poanaje Paniseo cuana. Jamajjeya Jiosaa Eyacuiñajjija huoojea'yo pojjeama po-so jjashahuabaquime poanaje.

Pea Paniseohua jama acanaje ba'a: —Chojja de, ohuaya cojjama' cuaya jjabapojjaqui mee canaje, pa. Jamaya pea cuana poanaje. Jamajjeya oya mimishi'a-

ma. Dejja mimishiya jamaya po meemee'yo ajja —poanaje.

Jamajjeya Jiosajo ojee jjamimicuijjea nobiajeaquinaje Paniseo cuana. ¹⁷Jamajjeya oya cuaa ma dejja yahuajo cojjama' cuaya huohui'ajja ca o'oyanaje:

—¿Yajja acuae mijo poanaje Jiosaa so'o? Jiosaa miya jjabapojjaqui mee canaje, pa cuana poani. Jamajjeya ¿Yajja acuae miya poani Jiosajo so'o? ¿A'ya cuae oya? —poanaje Paniseo cuana.

—Jiosaa Eyacuiñajjija esohui huohuijji e'e jojo nei —saja'ame acanaje cojjama' cuayaa.

¹⁸Jamatii Jodio etii cuana jjashahuabaqui sa po'yo ajja jama ba'a: —Oya cojjama' cuaya poa, jjabapojjaqui mee canaje Jiosaa.

¹⁹Jamajjeya oja chii, ojaya enaese pea'ai iyaa canaje. Poeyajo, huohui'ajja canaje: —¿A'a jiquio miquea eba-cua eja cojjama' cuaya poa? ¿Yajjajje acuae oya jjeya cojjajji? ¡Huohuicue ecua! —poanaje.

²⁰Echii mese jama poanaje ba'a: —E'e, jiquio ecuanaja ebacua eja. Yahuajo oya cuaya poa cojjama' nei.

²¹¿Yajjajje shai oya cojjajji'yo jjeya? Ecuanajya ba jjima. ¿Aya acuae oya jjabapojjaqui mee canaje so'o? Ecuanaja ba jjima. ¿Apiojji acuae iñaya nequiaa huohui'ajjaña? Oya oe huohui'ajja socue; oya etii, esho'i pojjeama. ¡Ohuaya oe huohui cacue! —poanaje echii mese, enaese pea'ai.

²²Jamaya poanaje oya cuana, Jodio etii cuanajo quea mete jjejojya. E'e, Jodio etii yahuajo jama poanaje ba'a: “Jiosaa Eyacuiñajjija huoojea'yo ojjaña jaahuanajji, ja'a jama huohuime ajji! Jama mimime poajo jja oe ecuaaya miqianaya Jodioja equi ojee ejjachichaquijjijo esecue yasijje huoojeacuayaje'yo” poanaje Jodio etii cuana. ²³Quea mete poanaje oja chii, ojaya enaese cuana pea'ai. Jamajjeya oja chiiya, ojaya enaese Jodio etii cuana huohui canaje jama ba'a: —¡Oya oe huohui'ajjacue! Oya esho'i pojjeama, etii nojinoji.

²⁴Jamajjeya Jodio etii cuaa ma dejja cojjama' cuaya poa iyaa ca o'oyanaje ehuohuijji jama ba'a: —¡Bacue! Ecuanaja eba jiquio dejja Jiosaa quea mimishi. Jamajjeya Eyacuiñajji oe nei bihuicue jama ba'a: “Eyacuiñajji quea pame nee nee; jamajjeya eya ohuaya jjabapojjaqui mee canaje ohuaye nei” —Jodio etii cuaa acanaje.

²⁵Cojjama' cuayaa saja'a canaje jama ba'a: —Miquianaya: “Jiosaa quea mimishi” poani. Oya quea mimishi poani jjojemo eya jjabapojjaqui ajja tii pome. Ecuea eba nei nei eya cojjama' cuaya poa; eya jjeya cojjajji'yo, oja jjabapojjaqui mee'yo —poanaje cojjama'.

²⁶Majoya oya huohui'ajja ca o'oyanaje Jodio etii cuaa jama ba'a: —¿Yajja acuae mijo poanaje Jiosaa? ¿Yajja acuae mi cojja aca'yonaje so'o? —poanaje cuana.

²⁷—E'e, eyaya miqianaya yahuajo huohuinaje Jiosaa. Jamatii miqianaya jjashajja'ajjaqui ajja —oya poanaje—. ¿Apiojji acuaeya shajja'ajja o'oya sa aña so'o? ¿E'e pojja'a miqianaya o shajja'ajjajji poaje'yo? —poanaje cojjama' cuaya etii cuana nijje.

²⁸Majoya Jodio etii cuana onijje mimijajinaje jama ba'a: —Miya ca mi ca oe Jiosaja epeejji. Ecua ca ca oe Moisesija esohui shajja'ajjajji poani. ²⁹Ecuanaja eba

e'e jojo nei Eyacuiñajji yahuajo nei Moisesi nijje mimia poa. ¿Jesosa shai ajea huoojea jiquiacua? Cua'a de. Ba jjima ecuanaja —mimitecuetecueame poanaje Jodio etii.

³⁰ —E'e pojja'a, de, —cojjama' cuayaa oya cuana acanaje—; ¿apiojji shai oya miqianajaya eba pojjeama so'o de? ¿A'a miqianajaya ba jjima Jesosa huoojeajji epo? ¡Bacue oe! Eya ohuaya jjabapojjaqui mee canaje.

³¹ Eyacuiñajjiya ca ca dejja quea mimishija esohui eshajja'ajjajji pojjeama onijje mimianijo. Ohuaya dejja quea pameja esohui shajja'ajja cani, oja sohui jayojja jama poanijo. ³² Yahuajo nei, jjeya nei pea'ai chama' pea dejja Jesosa jayojja. E'e, eya yahuajo cojjama' cuaya poa. Jjeya eya ohuaya cojjajji po mee canaje. Yahuajo nei nei meshi pana cajeahuajo chama' dejja poa Jesosa jayojja. Jjeya nei pea'ai chama' pea dejja Jesosa jama. Pea cuaa ohuaya jayojja jama a'ajja. ³³ Jesosa Eyacuiñajjiya huoojea jjima poa jjojemo ohuaya ma dejjaa ajjima acani ajjima aca quiaye, eya jamatii anijea quia-ye —poanaje cojjama' Jodio etii cuana nijje.

³⁴ Oja sohui quea pame shajja'ajja sa po ajjajojo Jodio etii cuana quea quene nee nee poanaje. Tecuea canaje jama ba'a: —¡De! Miya quea mimishi nee nee jjejojo cojjama' cuaya poa; miya Eyacuiñajjiya cajaa. ¿A'a ecuaaya miya shajja'ajjaje? Chojja. ¡Poquicue miya! ¡A'a jiquicua poe o'oyajji! ¡Ecuanaja ojee ejjachichaquijji equi yasijje a'a poe o'oya tiitiijji! —jamaya Jodio etii cuaa oya huoojeacuayajea canaje.

Joya Eyacuiñajji ba po jjima cuana cojjama' jayojja

³⁵ Majoya pea cuaa Jesosa huohuiqui canaje jama ba'a: —Jodio etii cuaa cojjama' cajaa acanaje; Jodioja equi ojee ejjachichaquijji esecue yasijje huoojeacuayajea canaje, pa —poanaje.

Jamajjeya Jesosaa oya sa'ajja canaje. Ba'yo majje huohui'ajja canaje jama ba'a: —¿A'a miquea eba Eyacuiñajjiya Bacua Ejja, Eyacuiñajjiya huoojea'yo ojjaña jaahuanajji? —acanae.

³⁶ —Esohui huohuijji, oya ecuea ba jjima. ¡Oya mo ba meecue! Onijje iña jjapeequi'yo sa poani —poanaje.

³⁷ —Eya jja iña iquio, de —Jesosa poanaje—, ma Eyacuiñajjiya huoojea'yo ojjaña jaahuanajji poani. Miya jje-yahua nei Eyacuiñajjiya Bacua Ejja nijje mimiani. Eya jja iña iquio, de —Jesosaa acanaje.

³⁸ Majoya ohuaya Jesosa bihuia canaje ecui'oshajjajo nequi majje. Jama poanaje ba'a: —Ecuea Emeshi Mese, ¡eya miquea epeeji nei nei! —poanaje dejja cojjama' oja jjabapojjaqui mee'yo.

³⁹ —E'e nei —Jesosa poanaje—, ecue Chiya eya meshi yasijje huoojea canaje; huohui canaje jama ba'a: “¡Baquicue! ¿Achajja shai ojjaña cuana jjashahuabaquiani mijo? ¡Ba'ajjaqui socue!” Eyacuiñajjiya aca poa eya. Jiquio ecua cojjama' jjabapojjaqui mee'yaña jayojjaya eyaya ojjaña joya yahuajo Eyacuiñajjiya esohui ba po jjima ba meesahuaje'yo. Ojjaña joya Eyacuiñajjiya esohui ba nisho epo ecuea Eyacuiñajjiya esohui eba meeji pojjeama. Jamajjeya oya cuana cojjama' jayojja tii poaje —Jesosa poanaje.

⁴⁰ Paniseo cuana jomajo nequi Jesosaja esohui shajja'ajja majje jama onijje poanaje ba'a: —¿A'a miya jjabahuabaquiani ecuanajo; Eyacuiñajjiya esohui eba pojjeama ecuanajaya, jamajjeya cojjama' jayojja poani? —poanaje Jodio etii cuana.

⁴¹ —E'e —Jesosaa saja'a canaje—, miqianajaya Eyacuiñajjiya esohui ba jjima nei nei jjojemo eyaya miqianaya ba mee'yome. Cojjama' jjabapojjaqui meenaje jama eyaya miqianaya amee'yome. E'e, eyaya miqianaya Eyacuiñajjiya esohui ba mee'yome quea ja'a nee. Jamatii miqianaaya Eyacuiñajjiya esohui ba neinei nishoñaajo, Eyacuiñajjiya miqianaya tecuea caje'yo; quea nee nee po mee caje'yo cuaquijo —Jesosa poanaje.

Ñajjajja cuiñajji jayojja jama Jesosa ojaya epeeji jaahuanajji

10 Majoya Jesosa ojjaña nijje jama poanaje pea'ai ba'a: —Ecuea esohui ejjashahuabaqui meeji ñajjajja cuiñajji jama ba'a: Ñajjajja jaahuanajjiya ñajjajja cuana jiyajo cahui mee cani, ijjiacajji mase cuaa e'ijjia ca poajeje. Ejaahuanajji jiyo esecue jjanijo jaani, esecue jiani queya cani. Siipojji cuana ca ca ñajjajja jiyoyje nequisohua majje quehua dobiqiani. Oya cuana siipojji jjejojo esecueje dobiqui ajja. ² Ñajjajja jaahuanajji ca ca esecueje dobiqiani, de. ³ Jiyo esecue cuiñajjiya esecue ca'apejo cani ñajjajja cuiñajji dobiquijji. Dobiqumajje ejaahuanajjiya ojaya ñajjajja iyaa cani. Iyaa cajje o que poeyani. Ñajjajja jaahuanajji ehui dojji poquiani esecue yasijje. ⁴ Cuayaqui majje ñajjajja cuana o quiquishijji poquiani. E'e, ejaahuanajjiya esohui ojaya ñajjajja eba, eshajja'ajjajji. Jamajjeya o quiquishijji poquiani. ⁵ Peaa iyaa cajje ñajjajja shajja'ajja jjima acani; poe ajja. Jamajjeya oya ñajjajja poqui ajja pea nijje; ba jjimajo cuajicuaquiquehuajeenanani —Jesosa poanaje.

⁶ Jesosaja sohui ejjashahuabaqui meeji ohuaya huohui canaje Jodio cuana huasijje. Jamatii ojaya, Jodio cuanaja quea quehua; jama acanaje ba'a: —¿Ajeo acuae ca oya mimiani ecuaa nijje? —poanaje.

⁷ Jamajjeya Jesosaa oya cuana huohui ca o'oyanaje: —¡Bacue, oe! Eya, Jesosa esecue jiani jayojja jama poani. Ecuea epeeji dobiqumeesahuaña. ⁸ Ojjaña ejaahuanajji nisho cuana ca ca sii sa poani. Jiquio ecua ñajjajja peaja esohui ba jjimajo pea nijje poquiquehua ajja jama jayojja ecuea epeeji nei nei esohui huohuijji nishojo jjashajja'ajjaqui ajja —Jesosa poanaje—. ⁹ E'e, eya esecue jiani jayojja poani; ojjaña eya shajja'ajja canijo, enijje jjapeequianijo pea'ai, eyaya oya cuana ba'e tiiti meeje'yo enijje. Jiquio ecua ñajjajja jaahuanajjiya ojaya ñajjajja esecueje dojocuyaqui cani bobi ijja, jiyo huasijje jaahuana cani pea'ai jayojja jama eyaya ecuea epeeji ba'e meesahuaña quea pame nee, Eyacuiñajjiya esohui jama —Jesosa poanaje—.

¹⁰ Siipojji poeyani ñajjajja siya, cuaquisho meeya pea'ai, quecuua pea'ai. Jamaya esohui huohuijji nisho cuana siaje poani, sii cani, ecuea epeeji cuana poquiquehua mee cani eshahua nijje, de. Eya ca ca poeyana-

je quea ja'a nee nee ba'e meeya, pea ejjashahuaba-quijjijo ba'e meeya.

¹¹ —E'e, eya ñajjajja cuiñajji quea pame nee jayojja jama poani. Ñajjajja cuiñajjiya ojaya ñajjajja nahue nei-nei cani ijjiacajji maseya e'ljia ca poaje jjejojo. Oya jayojja eya manojeyo ecuea epeeji cuana ba'e tiitii mee'yojji. ¹² Echacojji ca ca eñajjajja mese pojjeama jjejojo ijjiacajji mase ba majje cuajicuajinanani; ñajjajja jeajea cananani. Jamajje ijjiacajji maseya ñajjajja cuana ijjia cani; poquiquehuajeana meee cani pea'ai. ¹³ Ñajjajja cuana ojaya nahue'ama. Echacojji cuajicuajjeananani, ojaya pojjeamajojo mi nahue cani —Jesosa poanaje.

¹⁴ —Eya ca ca ñajjajja cuiñajji quea pame nee jayojja jama poani. Ecue Chiiya eya quea jea nee acani; oya ecuea quea jea nee pea'ai. Oya jayojjaya eyaya ecuea epeeji cuana quea jea nee nee añá; eya ecuea epeeji-ja quea jea nee pea'ai. ¹⁵ Jamajjeya eyaya oya cuana nahue neineaña, ecuea epeeji cuana. Jamajjeya ojaya mimishi cuijea'yojji eya manojeyo ona ba'e tiitii mee'yojji —Jesosa poanaje—. ¹⁶ Pea cuana yani pea'ai, Jodio cuana pojjeama. Ohuaya pea'ai ecuea esohui shajja'ajja caje'yo. Ecuea epeeji poaje'yo pea'ai. Eyaya oya cuana jjapeequi meesahuaje'yo pea'ai. Jamajjeya ojjaña cuana ojee cajjapeequiahua; eya ca ca oe o jaahuanajji poaje'yo —Jesosa poanaje.

¹⁷ —Ecue Chiiya eya huoojea canaje ojjaña jaahuanaa. Jamajjeya ecuea epeeji ba'e tiitii mee'yojji eya manojeyo, ona nahuejo. E'e, e quecua'yojji yani. Jamatii eya quecua ca'yajje shequije o'oya mo. Jamajjeya eya ecue Chiiya quea jea nee nee. ¹⁸ Eya quea ca'a nee nee poani. Jamajjeya ecuea epeeji mano'yo sa po'yo ajja jojjemo pea cuaa eya equecua'yojji pojjeama pome. Jamatii eya manojeyo jama poani ba'a: "E'e, ecuea epeeji mimishi cuijea'yojji mano'yo sa poanijo eya manojeyo". Mano'yo majje eya shequije o'oya. Ecue Chiiya eya jamaya huoojeame aca poa —Jesosa poanaje Jodio cuana nijje.

¹⁹ Jesosaja esohui shajja'ajja majje Jodio cuana ojee jjamimicuaiea nobiajeaquinae jama ba'a: ²⁰ —¡Oya Jesosa niñepoqui, de! ¡Oya quea jjashahuabaqui tai mimime poani! ¡A'a oya shajja'ajjajji! —poanaje beca cuana.

²¹ —Chojja, de oya niñepoqui pojjeama. Esohui quea pame nee nee huohui cani. Ohuaya ca ca oe cojjama'cuaya jjabapojjaqui mee ca'yonaje. Jamaya po ajja niñepoqui cuana —poanaje pea cuana.

Jodio cuana ojee jjachichaqui'yajo, Jesosaa huohui ca o'oyanaje jama ba'a: —Eya Eyacuiñajji Bacua Ejja e'e jojo nei

²² Quijje eeno shejo ojjaña Jodio cuana Jenosanena huasijje ojee jjachichaqui o'oyanaje. Quea bihui nee poanaje ma shejo. E'e, ma shejo yahuajo nei Eyacuiñajji equi pea iya ca o'oya poa quea bame nee. Jamajjeya ma shejaya ma shahuaba tiitii capoquiani Eyacuiñajji bihuia capoqui tiitiani. Cuaquijji sisi dedo cani quea cahui huiso. ²³ Ma shejo Jesosa Eyacuiñajji equi

yasijje poqui o'oyanaje. ²⁴ Equi quibojo jeojeonequinae. Jodio dejja cuana o que jjachichaquinae. Jama huohui'ajjame acanaje ba'a: —Jesosa, ¿apiojji miyaya ecuana huohui jjima? ¿A'a miya Eyacuiñajji huoojea'yo ojjaña jaahuanajji? ¡Ecuana e'e nei huohucue quea ja'a nee! —poanaje Jodio cuana.

²⁵ Jesosaa oya cuana jama acanaje ba'a: —E'e, eyaya miqianaya huohui huicha'a huicha'anaje yahuajo. Jamatii jjashajja'ajjaqui ajja. Ecue Chiiya eya ma dejjaa ajjima acani ameesahua cani miqianajaya ebajji nisho eya oja huoojea'yo ojjaña jaahuanajji. ²⁶ Jamatii miqianaya jjashajja'ajjaqui sa po ajja ecuea epeeji pojjeama jjejojoya. Jamaya eyaya miqianaya huohuinaje ba'a: "Ejaahuanajji emimi ojaya ñajjajja eba; jamajjeya onijje poquiani". ²⁷ Jama jayojjaya ecuea epeeji cuaa ecue sohui shajja'ajja cani, enijje poquiani tii pea'aiya. E'e, ecuea epeeji cuana ecuea eba. ²⁸ Eyaya oya cuana ba'e tiitii meeaña. Jamajjeya oya cuana quea nee nee epo mee'yojji pojjeama cuaquijo, Eyacuiñajjiya. Eyaya ecuea epeeji cuana jaahuanajja oya cuaa oya ecuaquisho meeji pojjeama eshahua nijje.

²⁹ Ecue Chiiya, Eyacuiñajjiya ecuea epeeji cuana enijje jjapee meequi cani. Oya oe nei quea ca'a nee nee; pea cuana ca'a'ama. Ohuaya oya cuana jaahua canijo cuaquisho meeme ajja eshahua nijje. ³⁰ E'e jojo nei eya ecue Chii jayojjaya poani tii —Jesosa poanaje.

³¹ Ma shajja'ajja majje Jodio etii cuaa mei iña ca o'oyanaje Jesosa jajahuejjajjea nisho. ³² Jamajjeya Jesosaa oya cuana acanaje: —Ecue Chiiya eya quea pame nee ma dejjaa ajjima acani amee cani. Jamajjeya ¿apiojji acuae iña jajahuejjajjea sa añá so'o meiya? —huohui'ajjame acanaje Jesosaa.

³³ —Chojja, mi jajahuejjajjea sa po ajja ca ca ecuana miyaya ma dejjaa ajjima acani quea pame añajo. Miya sijje poanijo ca mi ca oe jajahuejjajjeame. Miya aje mi dejja; jamajjeya ¿apiojji acuae oe miyaya jama huohui-me añá ba'a: "Eya Eyacuiñajji jayojja tiiya" poani? —Jodio etii cuaa Jesosa Eyacuiñajji Bacua pojjeama poso tii acanaje.

³⁴ Majoya Jesosaa oya cuana jama acanaje ba'a: —Miqianajaya eba Eyacuiñajjiya yahuajo nei nei tehue mee ca poa Jodio jaahuanajji cuanajo jama ba'a: "Miqianaya Eyacuiñajji jayojja poani". Jama tehuemeya aca poa yahuajo. ³⁵ Jamajjeya ¡Eyacuiñajji etehue'yo e'e nei shajja'ajja tiitiihue! Ma etehue'yojo ohuaya huohui ca poa Jodio esohui huohuiji Eyacuiñajji jayojjaya poa. ³⁶ Jamajjeya eya ca ca oe ecue Chiiya babaca ca poa ojjaña jaahuanajji; eya eyajo ani huoojea ca poa meshi yasijje. Jamatii: "Eya Eyacuiñajji Bacua Ejja" anajejo, miqianaaya eya tecueaña. Jama poani ba'a: "Miya sijje poani Eyacuiñajji jayojja miame" poani miqianaya. ¿Apiojji jamaya poani? —Jesosa poanaje—.

³⁷ ¡Bacue! Eyaya ecue Chiiya acani jayojja a'ajja jojjemo ¡a'a eya shajja'ajjame so'o! ³⁸ Miqianaya ecue esohui shajja'ajja sa po ajja; jamatii ecue Chiiya acani jayojja quea pame nee eya añajo, jjashahuabaquicue jama ba'a: "Jesosa Eyacuiñajji huoojea'yo poani". ¡Jamajjeya jjabahuejjajjaquicue e'e jojo nei eya ecue Chii jayojja-

ya, de; oya e jayojjaya pea'ai poani! —Jesosa poanaje.

³⁹ Jamatii Jodio cuaa Jesosa siajje poani poso acanaje. Jamajjeya ojee jama poanaje ba'a: —¡Cua'a, oya ejja'i-ñaquiqui ejeanobiajji! —taaame poanaje.

Jamatii Jesosa quea huiso nee nee dejja nequi tejjee quehuajje poquinaje, jja'iña meequi jjima.

⁴⁰ Majoya Jesosa poqui o'oyanaje cuei Jodana ojje miji yasijje, ma yahuajo Huaniya ona besa mee ca poa huasijje.

⁴¹ Jomajo o anijo quea huiso dejja cuana o baa poeyanaje. Jjachichaqui majje jama ojee miminaje ba'a: —E'e, yahuajo Huaniya ajjima aca poa ma dejjaa ajjima acani; jamatii ojjaña ojaya ehuhui'yo Jesusajo e'e nei poanaje —acanjaje cuaa.

⁴² Jamajjeya ojjaña jomajo Jesusajo jama poanaje ba'a: —E'e jojo nei Jesosa Eyacuiñajjija huoojea'yo ojjaña jaahuanajji.

Nasano mano'yonaje

11 Pea cuiñajjijo Betania bajjanijo

Jesosaja epeeji cuana ba'enaje: Nasano, oja jjo'i cuana Manta, Mania pea'ai. Maniaa Jesosa ojaya quea jea neejo quijje oya jiojji sha canaje shiyeshiyeya. Sha majje ejiojji cui ca'yonaje ojaya esaohua, Maniaa. Jesosa Jodana cuei ojje mijijje anijo, Maniaja eno mese Nasano quea mano nee nee poanaje. ³ Jamajjeya ejjo'i mese cuaa pea huoojea canaje Jesosa que: —Nasano quea mano jaa. Jesosa ba majje jama huohuime acue ba'a: “Emeshi Mese Jesosa, miquea epeeji Nasano quea mano nee nee jaa, poquijeyoje pojja'a” acue.

⁴ Jamajjeya ma dejja poquinaje Jesosa que. Huohui cañaquinaje. Nasanojo shajja'ajja majje Jesosa jama poanaje ba'a: —E'e, oya mano'yo majje jamatii emano'yo tii tii pojjeama poaje. E'e, quijje ojo ojjaña cuaa Eyacuiñajji bihuia caje'yo; ejo pea'ai jama huohuime acaje cuaa ba'a: “E'e, miya Eyacuiñajjija Bacua Ejja quea pame nee nee, quea ca'a nee pea'ai; ojjaña miya aña” acaje cuaa —Jesosa poanaje.

⁵ Jesusaja quea jea nee nee Manta, Mania pea'ai, oja jjo'i jayojja, oja o'i jayojja Nasano poani pea'ai. ⁶ Jamatii Nasano quea mano nee nee jaa ba majje Jesosa jomajo tii aninaje becanejjijji pea'ai cahuime, poqui jjima poanaje.

⁷ Majoya ecuana huohui canaje Jesusaa: —Cua'a, jjo-dea meshi yasijje epoqui o'oya! —poanaje.

⁸ —Chojja, Jesosa —saja'ame anaje ecuaaya—, yahuajo pishana Jodio cuaa jomajo ba'eya miya jahuejjajea sa acanaje meiya. ¿A'a jamatii miya poqui o'oya sa poani jocuama? —anaje.

⁹ —E'e —Jesosa poanaje—, eya poquijje. ¡Bacue! ¿A'a eshequi jaasohua jjimahuajo ejiojjijje poquijje? Quea apo. Eshequiya jeaja'a canijo ejjaquecuasajaquijji pojjeama ejiojjijjo. E'e, eshequiya jeaja'a canijo, ejiojji baje quea ja'a nee. ¹⁰ Mecajje quea misi poanijo ca ca dejja oque chana' ejiojjijje poquianijo. Oya jayojja eyaya ecue Chii nijje chacoañajo, ohuaya eya jaahuana cani, onaya eya quecua'yo jjima amee cani. Ojaya eba nei epojsa e mano'yojjijjo.

¹¹ Jamaya ecuana huohui majje Jesusaa jama acanjaje ba'a: —Eseja epeeji Nasano cahui'yonaje. Jamatii eya poquijje o ishe'a'yohua.

¹² Jesosa jamaya poanijo, Nasano mano'yo jjima poso ecuaa jama anaje ba'a: —Jesosa, Nasano cacahui-quiahua. Cahui majje oya jjaajaquijje'yo.

¹³ Jesusaja eba Nasano emano'yo, epoquijeyo'yo jaa. Ecuana ca ca jjashahuabaquiani jama ba'a: “Nasano jamatii cahuijaa” poso anaje ecuaaya. E'e, Jesusaja esohui ecuanaja quea quehua poanaje.

¹⁴ Jamajjeya Jesusaa huohui ca o'oyanaje jama ba'a: —Epeeji cuana, Nasano epoquijeyo. Chama'yo tii jaa.

¹⁵ Eya Nasano nijje ani jjima poanajejojo oya mano'yonaje. Jamatii jamaya miqianajo quea pame nee poaje'yo. E'e, eyaya Nasano shequi meeje o'oya ba majje miqianaya jjabahuejjaquijje'yo eya e'e jojo nei Eyacuiñajjija huoojea'yo ojjaña jaahuanajji. ¡Cua'a, Nasano ejjaba'ajjaquiqui! —Jesosa poanaje.

¹⁶ Jesosa shajja'ajjajji Tomasi, ma Becajaa bajjani miminaje pea shajja'ajjajji cuana nijje, ecuana nijje jama ba'a: —¡Cua'a, Jesosa nijje epoqui! Jodio etii cuaa o cuia ca'yajo ecuana ojee Jesosa nijje tii manoje'yo pea'ai.

Jesosaa Manta, Mania pea'ai yeno'ama po mee sa acani

¹⁷ Quijje Jesosa poeyanaje Nasanoja equi yasijje. Ba caña'yonaje Nasano epoquijeyo'yo poanaje. E'e, ebeca pee pea'ai cahuime yahuajo oya ehuananobia jaanaje mei jjani yasijje, enaba capa jaanaje.

¹⁸ Betania cuiñajji Jenosanena chipi nei ani. ¹⁹ Jamajjeya quea huiso Jodio cuana poeyanaje Manta, oja shehue Mania pa sahuua, oja noo Nasano emano'yojo.

²⁰ Jamajjeya Jesosa ejiojjijje poeyani shajja'ajja majje Manta cuayaquinaje Jesosa baa. Mania ca ca equijo aninaje, poqui jjima ca oma poanaje. ²¹ Jamajjeya Mantaa Jesosa ba majje huohui cañaquinaje jama ba'a: —Jesosa, ecue noo mano'yo jjimahuajo, miya jiquiacua epoe jojjemo oya mano'yo jjima poquiaye. ²² Jamatii ecuea eba jjeya nei pea'ai miya Eyacuiñajji nijje mimianijo, ohuaya miquea esohui jama acaje'yo —poanaje Manta.

²³ —Manta, mique noo shequijje o'oya, she —poanaje Jesosa.

²⁴ —E'e —Manta poanaje—, jamaya ecuea eba oya shequijje o'oya quijje nei, Eyacuiñajjiya ojjaña emano'yo cuana shequi mee ca o'oyajo, meshi oe poajo.

²⁵ Jesosa poanaje: —Manta, eya ca ca iña ojjaña shequimee'yojji nei. Eyaya oya shequi meeje o'oya Eyacuiñajji nijje eba'e tiitii'yojji. Jamajjeya ojjaña joya e'e jojo nei enijje jjaapeequiani ba'e tiitii'yo eyajo. Eyaya oya cuana ba'e tiitii meeje'yo jamatii yahuajo emano'yo cuana. ²⁶ Ojjaña ecuea epeeji jjeya nei eshe nequi pea'ai eyaya ba'e tiitii meeje'yo, mete'ama poaje'yo emano'yojji. ¿A'a jamaya miyaya baña? —Jesosa poanaje.

²⁷ —E'e Jesosa, ecuea eba miya Eyacuiñajjija huoojea'yo ojjaña jaahuanajji, Eyacuiñajjija Bacua Ejja. Mi-

quea epoe'yojjijo yahuajo nei Eyacuiñajjija esohui huohuijjiya tehue ca poa —Manta poanaje.

²⁸ Majoya Manta poqui o'oyanaje Mania que. Ba majje oya quehuaje huohui canaje jama ba'a: —Mania, Jesosa poeyanaje. Ohuaya miya iyaa cani —poanaje.

²⁹ Mantaja esohui shajja'ajja majje Mania nequiso-huanaje. Poquicuajinaje Jesosa baa. ³⁰ Jesosa Betania huasijje dobiqii jjima; ohuaya Mania ishoa ca aninaje jomajo, ma o Manta nijje mimimimi aninajejo tiya.

³¹ Jodio cuaa Mania nijje equijo pa aniya oya ba canaje poquicuajije. Jamajje onijje poquinaje; jama poanaje ba'a: —Mania papoquinaje oja noo ehuananobiajaa huasijje quea yeno nee nee jjejojo.

³² Maniaa poe majje Jesosa ba cañanaje. Ecu'i'oshajja-jo nequiya huohui canaje: —Jesosa, miya jiquiacua epoe pojje mo ecue noo mano'yo jjima poquiaye —Mania poanaje.

³³ Jesosaa Mania pa'ani ba majje, Jodio cuana Mania nijje pani ba majje pea'ai quea yeno poanaje. Quea yeno jjashahuabaquinaje Jesosa onajo. Jamajjeya huohui'ajja canaje jama ba'a: ³⁴ —¿Achacua acuae nequia Nasano huananobianaje so'o, she? —Jesosaa acanaje.

—Esohui huohuijji, ¡poecue; bahuacue! —poanaje cuana.

³⁵ Jesosa cojjana cuayaquinaje onajo quea yeno po majje. Poquinaje onijje.

³⁶ Jamajjeya Jodio cuana jama poanaje ba'a: —¡Bacue! Jesosa pea'ai pani. Nasano ojaya quea yeno nee nee ojaya epeejjijojo, de —poanaje Jodio cuana.

³⁷ —E'e pojja'a —beca cuana poanaje—. Yahuajo Jesosa dejja cojjama' cuaya jjabapojjaqui mee ca poa. ¿Apiojji shai oya yahuajo poecuaji jjima Nasano jjaajaqui mee'yohua? Jamajjeya oya mano'yo jjima poquiaye.

³⁸ Onajaya esohuijo Jesosa quea yeno nee nee poquinaje jjani ai yasijje. Mei copo enequi jjani secue capajji.

³⁹ Jamajjeya Jesosaa jama acanaje ba'a: —¡Esecue jjani capajji'ya mei jeacajjajjajea'yocue! —poanaje.

—Chojja, ecuea Emeshi Mese —Nasanoja jjo'i Manta poanaje—. Oya yahuajo huananobia canaje, ebeca pee pea'ai cahuime. Jjeya quea ihui nee nee —Manta poanaje.

⁴⁰ —Manta, eyaya miya huohuinaje: Eya Eyacuiñajjija huoojea'yo ojjaña jaahuanajji ba majje miya jjabahuejjaquije'yo Eyacuiñajji quea ca'a nee nee, quea pame nee nee; ohuaya eya ojjaña amee cani ma dejjaa ajjima nei nei acani pea'ai —Jesosa poanaje.

⁴¹ Majoya secue jjani capajji'ya mei jeacajjajjajea canaje cuaa. Jesosa eyahuasijje jjabajeasohuaquinaje Eyacuiñajji nijje emimijji. Nasanoja jama miminaje ba'a: —Ecue Chii, eyaya miya bihuiaña. Ecuea esohui miyaya shajja'ajjaña Nasano shequi mee'yojji. ⁴² Ecuea eba miyaya eya shajja'ajja neineaña minijje mimianijo. Jamaya eya poani, ojjaña jiquiojo nequi jjabahuejjaquijji miyaya e'e jojo nei eya huoojeanaje. E'e ecue Chii, apoa —Jesosa poanaje.

⁴³ Eyacuiñajji nijje mimi majje Jesosa taaanaje jama ba'a: —Nasano, ¡shequi'yocue, oe; cuaya'yocue! —poanaje.

⁴⁴ Jamajjeya Nasano shequi'yo majje cuaya'yonaje. Oya daqui osheja bebo tii, oja ejiojji, oja eme cuana pea'ai. Oja sapa ebebo pea'ai poanaje pea daqui osheja.

Jamajjeya Jesosaa huohui canaje jama ba'a: —E'e, ¡oya ebebojji'ya pichojeajea'yocue! ¡Daqui oshe huijjia-jea'yocue! Oya capoqui'yahua equi yasijje —poanaje.

Jamajjeya Nasano poqui'yonaje.

⁴⁵ Jamajjeya quea huiso Jodio cuaa Mania baa poeya ba canaje Jesosaa Nasano emano'yojaa shequi mee ca'yonaje. Ba majje Jesosajo jama poanaje ba'a: —E'e jojo nei oya Eyacuiñajjija huoojea'yo ojjaña jaahuanajji; ¡onijje ejjapeequi'yojji!

⁴⁶ Beca cuana ca ca Jenosanena huasijje poqui o'oyanaje Paniseo cuana huohuiya: —Jesosaa Nasano emano'yojaa shequi mee ca'yonaje, de —poanaje cuana.

⁴⁷ Jamajjeya Eyacuiñajji nijje emimijji etii cuaa, Paniseo cuaa pea'aiya ojjaña Jodio etii ojee iyaa canaje Jesosajo emimimimijji.

—¿Yajja acuae seya Jesosa aje so'o, de? Ohuaya ma dejjaa ba jjima acani quea huiso. ¡Cua'a ejja'iñaquiqui oya! ¡Oya esohui ejjahuhui pajea meequi! Ojjaña aje oe onijje jjapeequije'yo, de. Majoya Shomano meshi mese cuana ojo quea mete poaje, ejjajjequiquije poso. Jamajjeya ese nijje jjacuaqui majje jeabichajea caje'yo. Jiquio Eyacuiñajjija equi jajacajjajea caje'yo pea'ai, Shomano cuaa —poanaje Jodio etii cuana.

⁴⁹ Ma shequiajajo dejja Caipa bajjani Eyacuiñajji nijje emimijji etii poanaje Jodioja. Ohuaya pea cuana huohui canaje jama ba'a: —Ae po cajji Jesosajo ecuea ohuejaya eba. ¿A'a miquea ba jjima? ⁵⁰ ¡Eya shajja'ajja-cue! E'e, Shomano cuaa Jesosajo quea mete po majje eseya quecua jeyojeyo ca'yo chana'. Jamajjeya oe dejja, Jesosa camanoqui'yahua ojjaña cuanajo. Jamaya esejaya quea pame poaje'yo. Jamajjeya ojjaña cuana mano jeyojeyo'yo ajja poaje —poanaje Caipa.

Jamatii ohuaya ojaya ejjashahuabaquijjijo pojjeama huohui canaje. ⁵¹ Oya, Caipa Eyacuiñajji nijje emimijji etii ma shequiajajo. Jamajjeya Eyacuiñajjiya oya huohui meesahua canaje Jesosajo jama ba'a: —Jesosa quijje pishana ojjaña Jodio cuanajo manojeyo'yo.

⁵² E'e, ojjaña quea huesha ba'e cuanajo pea'ai, joya Eyacuiñajjija epeejji quijje poaje ojjaña meshijo ba'e cuanajo pea'ai manojeyo'yo Jesosa. Jamajjeya ojjaña meshijo ba'eca cuana ojee jjapeequi mee caje'yo, Eyacuiñajji bihuiajji cuana.

⁵³ Jamajjeya Caipaja esohui shajja'ajja majje Jodio etii cuana ojee jjashahuabaquinaje Jesosa quecuajji: —¡Jesosa ejjaquecuaqui'yo! —poanaje.

⁵⁴ Jamajjeya majoya Jesosa po'ayequi jjima poanaje Jodioja meshijo Jodio cuana nijje. Oya quehuaje poquinaje Epaini cuiñajji sisi yasijje, quima' meshi pejeje. Jomajo ba'enaje o shajja'ajjajji cuana nijje.

⁵⁵ Quijje pishana ojjaña Jodio dejja cuana ojjaña meshijo ba'e poqui o'oyanaje Jenosanena huasijje. Jamajje-

ya ma shejo ba'a: Esohuidojojji cuaa yahuajo nei nei Ejito meshijo Jodioja bacua cuana cuia'yo jjiima shejo Jenosanena huasijje jjachichaqui canaje. Majoya Jodio etiiquianaja ehuohui'yo jayojja jama quea huišo besa majamaja canaje cuana ojee quea bihui nee ijia'ijia jji-mahuajo. ⁵⁶Jenosanena huasijje poe majje ojjaña Jodio cuaa Jesosa sa'ajja canaje. Eyacuiñajji equijo jjachichaqui majje ojee mimimiminaje Jesusajo: —¿Ae jjas-hahuabaquiani miqianaya? ¿A'a Jesosa poeje jiquia-cua Jenosanena huasijje ojee ijia'ijiaa? ¿A'a poe ajja pojja'a? —poanaje.

⁵⁷Jamaya miminaje Jodio etiija esohuijo. Paniseo cuaa, Eyacuiñajji nijje emimijji etii cuaa pea'aiya jama huoojea canaje ba'a: —Jesosa ba majje jecuaa huohuicuaihuacue e'iña meeji! —acanaje etii cuaa—. Miquiaa mi huohuajje quea quene nee nee poaje ecuan a.

Maniaa Jesusaja ejiojji shacua canaje shiyeshiyeya
(Mateo 26.6-13; Macoso 14.3-9; Noca 7.36-50)

12 Majoya Jesosa Epainijo nequi Betania huasijje poeyanaje me oeje o cahuime Jodio cuana ojee ijia'ijia jjimahuajo. Jomajo ba'enaje Nasano, ma ohua emano'yojaa shequi mee ca'yonaje. ²Jomajo Mantaa Jesusajo quea bihui poanijo bobi quea huišo cuacua mee canaje. Quea huišo iyaa canaje Jesosa nijje e'ijia'ijiajji. Nasano pea'ai onijje ijia'ijianaje. ³Majoya Jesosa ojaya quea jea neejo Maniaa shiyeshiyeya quea nahue nee neeya Jesusaja ejiojji sha canaje. Quea huišo sha canaje, oe tahuoo shiyeshiye oe acanaje. Sha majje Jesusaja ejiojji cui ca'yonaje oja esao aohua, Maniaa. Equi quea shiye nee nee poanaje shiyeshiyeya sha cajje.

⁴Jamajjeya Jesosa shajja'ajjajji Jodasa Isicanioteya, ma quijje Jesosa iña meesahua'yojji epojjiya Mania ba canaje. Ba majje Jodasa quea tecue jama poanaje ba'a: ⁵—¿Dee! ¿Apiojji acuaeya shiyeshiyeya shanaje so'o? Ma shiyeshiye quea nahue nee nee baña cuaa, shequiaya oe chaco majje sose huišoajja jiquio shiyeshiye, de. Quea huišo bejjo sosejje oya equia jojjemo bejjo quea huišo iña caquiaye, majoya bejjo sosejje cuana jja oe aema' cuana bobia quiayeya —poanaje Jodasa.

⁶Jamatii oya Jodasa aemajo pojjeama jjashahuabaquinaje. Chojja, oya ca ca oma siipojji. Ojjaña Jesosa shajja'ajjajji cuanaja ejjeshejji cuiña nisho cani bashosoco sisijo. Ma sii poquiame beca cuana bejjo, Jodasaa acanaje.

⁷Jesosaa Jodasa tecuea canaje jama ba'a: —Jodasa, ja'a jiquio epona tecueajji! Ojaya eba eya quijje pishana manojeyo. Jamajjeya eya sha canaje shiyeshiyeya, e mano'yojji jjojya. ⁸E'e, eya miquiana nijje e'ani titiijji pojjeama. Aema' cuana ca ca miquiana nijje yani tii tii, de.

⁹Quea huišo Jodio cuaa shajja'ajja canaje Jesosa Betania huasijje poe'yonaje. Quea huišo cuana poeyanaje Jesosa baa, Nasano pea'ai baa. Onajaya eba Jesusaa Nasano shequi mee ca'yonaje. Jamajjeya Nasano ba sa poanaje pea'ai. ¹⁰Nasano shequi mee ca'yonajejo

quea huišo nee nee huohui canaje jama ba'a: —¿E'e jjo nei Jesosa Eyacuiñajji huoojea'yo ojjaña jaahuanajji!

E'e, Nasano shequi mee ca'yonajejo Jodio etii cuanaja esohui shajja'ajja pajea canaje cuaa.

Jamajjeya Eyacuiñajji nijje emimijji etii cuana jjas-hahuabaquinaje jama ba'a: —¿De, Nasano pea'ai ca-quecuajea'yahua Jesosa nijje tii!

Jesosa Jenosanena huasijje dobiquinaje mapichi sisija edaasa biajje

(Mateo 21.1-11; Macoso 11.1-11; Noca 19.28-40)

¹²Jamajjeya mecajjeahua ojjaña Jodio cuaa ma ojee ijia'ijiaa poe'ya shajja'ajja canaje jama ba'a: —Jesosa ejiojji poeyani Jenosanena huasijje.

¹³Jamajjeya ojjaña cuana jememe iña jaja majje poquinaje Jesosa baa. Poquijeya jememe iña cuana jeasohua canaje. Jamaya Jodio cuaa acanaje pea bihuajji, emeshi mese ja'ajjequijji cuiñajji yasijje. Jesosa bihuia canaje pea'ai. Taaanaje jama ba'a: —Jesosa, ¡miya ojjaña jaahuanajji poeyanaje! ¡Eyacuiñajjiya miya huoojea canaje! ¡Ohuaya miya cajaahuana cahua! E'e de, miya ecuanajaya, Isaeni cuanajaya Emeshi Mese oe nei —taaame poanaje ojjaña cuana.

¹⁴Jesosa mapichi sisi ba majje o daasa biajje anisohuquinaje. E'e, Jesusajo Eyacuiñajji esohui yahuajo nei etehue'yo jayojja jama poanaje jama ba'a:

¹⁵“Ojjaña Jenosanenajo ba'e cuana huohucue jama ba'a: —¿Quea bei pocue! ¡Bacue oe! Miquiana huoojea'yojji nei poeyani. Oya quea bei nee. Jamajjeya mapichi sisija edaasa biajje poeyani —huohucue cuana”. aya yahuajo tehue ca poa Jesusajo.

¹⁶Ma etehue'yojo jjashahuabaqui jjimahuua ecuaaya jama anaje ba'a: —¿Yajjaje shai quea huišo nee nee jjachichaquiani Jesosa que, o bihuiaa so'o?

Quijje ca ca Eyacuiñajjiya Jesosa emano'yojaa shequi mee caje o'oya; majoya ecuaana niñebaje'yo jama ba'a: —E'e de, esohui huohuijji cuana yahuajo ba'eja etehue'yo jama acanaje Jesusajo —quijje jamaya niñebaje'yo ecuaana Jesosa shequi o'oyajo.

¹⁷Yahuajo Jesusaa Nasano shequi mee ca'yajo, quea huišo dejja cuaa ba ca poa Jesosa. Ma dejja cuaa ojjaña huasijje huohui huicha'a huicha'a ca poquia poa jama ba'a: —Nasano mano'yo majje jjanijo ehuananobia jaanaje. Jesusaa iyaa cajje oya shequi o'oyanaje, de —acanaje cuaa Jesusajo.

¹⁸Jamajjeya Jesusaa acani ma dejja ajjima acanijo quea huišo cuana poquinaje o baa, ejiojji poeje baa.

¹⁹Jamajjeya Jesosa poeyanaje Jenosanena huasijje. Majoya Paniseo cuana quea quene ojee mimimiminaje jama ba'a: —¿Bacue! Ecuanaaya pea dejja cuana Jesosa nijje jjapeequi pajea mee ajja. Chojja, de. ¡Bacue oe! Ojjaña tii Jesosa nijje jjapeequiani. Ecuana esohui shajja'ajja sa po'yo ajja. Jesosa iña meesahua ajja pea'ai, de —poanaje Paniseo cuana.

Jesosaa huohui canaje ojaya epoqui'yojji eyahuasijje e'ani'yojji

²⁰ Beca Jodio cuana quea huesha Jienu meshijo ba'e pea'ai ma shejo poeyanaje Jenosanena huasijje ojjaña nijje ijia'ijiaa, Eyacuiñajji bihuiaa. ²¹ Oya cuana poeyanaje Penipe que, ma Betesaidajo ba'e que. Onijje jama poanaje ba'a: —Penipe, ecuanaya Jesosa ba sa neinei poani —poanaje.

²² Jamajjeya Penipe ojaya epeeji Anesi que poqui majje pea cuanaja esohui huohui canaje. Majoya ojje poquinaje Jesosa huohuiya.

²³ Shajja'ajja majje Jesosaa oya cuana jama acanaje ojjañaja eshajja'ajjajji ba'a: —E'e, eyaya Eyacuiñajjija esohui oe a'yonaje. Apo a'yonaje. Jjeya nei eya, ojjañaja Edoe Mese manojeyo. Eyacuiñajjiya eya manoya'yo dojosohuaqui caje'yo eyahuasijje. Onijje quea ca'a nee nee ani mee caje'yo. ²⁴ Eyaya e'e jojo nei huohuianña jama ba'a: Eso' quecua majje pohuani. Jamajjeya jjajja majje quea huiso eso' poaje'yo. Eso' quecua jjima ani jipapaqui ajja. Jiquio ecua eso' quecua cajje quijje jjajjani jayojja jama poaje ejo. Onaa quecua cajje eya manojeyo ojjañaja mimishi cuijea'yojji sosejje. Jamajjeya eyaya quea huiso ba'e tiitii meeje'yo enijje eyajo.

²⁵ Jamaya pea'ai joya enijje jjapeequiani dejja mimishi cuaa quecua caje'yo pojja'a. Jamatii enijje jjapeequiani jo, manoya'yo majje eyajo ba'eje'yo tii tii quea pame nee. Quea mete nee nee jjejojo enijje jjapeequi'yo ajjajo ca ca manoya'yo majje cuaqui yasijje dobiquire'yo tii tii, quea nee nee poaje'yo. ²⁶ Ojjaña joya enijje chaco sa poaniya jeya cashajja'ajja cahua! Ecuea echacojji cuana quijje enijje ba'e tiitii'yo. Ecue Chiiya oya cuana jama huohuime acaje ba'a: “E'e, jamaya. Miya Jesosaja echacojji quea pame nee” acaje Eyacuiñajjiya —Jesosaa poanaje—. ²⁷ Jjeya eya quea yeno. ¿Ajeo mimi cajji ecue Chii nijje so'o? ¿A'a jama mimi cajji pojja'a ba'a: “Ecue Chii, ja'a dejja cuana eya napa meeji! ¿A'a eya quea nee nee po meeji!” Chojja. Jamaya eya mimi ajja ecue Chii nijje. Ohuaya eya huoojea canaje ojjaña cuanaja mimishijo manoyohua. ²⁸ Jamajjeya eya jama poaje ba'a: “Ecue Chii, ojjaña cuana mijo quea bihui po mee-cue!” —Jesosaa acanaje.

Majoya Eyacuiñajji eyajo ani miminaje jama ba'a: —Eyaya miya amee'yonaje ma dejjaa ajjima acani. Jamajjeya quea huisohua eya bihuia ca'yonaje. Jjeya ojjaña eya jjabihuia meequire o'oya —poanaje Eyacuiñajji eyajo ani.

²⁹ Ojjaña Jesosa que ejjachichiqui'yo nequi cuaa shajja'ajja canaje Eyacuiñajji eyajo janobajjima nei miani. Jamajjeya oya cuana miminaje jama ba'a: —¡De! Cueji pojja'a poanaje.

Beca cuaa jama acanaje ba'a: —¡Chojja! Eshuidojojji eyajo Jesosa nijje miminaje —poanaje cuana.

³⁰ Jesosa ojjaña nijje miminaje jama ba'a: —Ecue Chii eyajo miminaje miquiana jjabahuejja meequire'yo jama ba'a: Ohuaya eya shajja'ajja canaje onijje mimianijo —Jesosaa poanaje—. ³¹ Jjeya Eyacuiñajjiya ojjaña joya enijje jjapeequi ajja quea nee nee po mee caje'yo. Eya-

ya ojjaña jeabichajeaje'yo; Edosiquiana nei Satanasa bajjani, ma ojjaña dejja mimishi huoojeajji poani jeabichajeaje'yo. Quijje oya cuaqui yasijje dobiquire'yo tii tii. ³² Cuanaya eya ojjañaja Edoe Mese acui ecueata'apeejo ba'ehuanasohuajea cajo, quea huiso nee nee ojjaña meshijo ba'e enijje jjapeequi meeje'yo —Jesosaa acanaje.

³³ Jamaya Jesosaa ojjaña ba mee canaje oya acui ecueata'apeejo manojeyo. ³⁴ Jodio cuana jomajo ejjachichiqui nequiya huohui canaje jama ba'a: —Ecuana esohui huohuijji cuana jama poani ba'a: “Eyacuiñajjija huoojea'yo ojjaña jaahuanajji Quito bajjani ba'e tiitii'yo. Manoya'yo ajja poaje”. Jamajjeya ¿apiojji miyaya huohuinaje ojjañaja Edoe Mese manojeyo acui ecueata'apeejo ba'ehuanasohuajea cajje? ¿A'a miya Eyacuiñajjija huoojea'yo? ¿A'a miya ojjañaja Edoe Mese ma Quito bajjaniya? —onaaya huohui'ajja canaje.

³⁵ Jesosaa oya cuana saja'a canaje jama ba'a: —Eyaya miquiana huasijje esohui huohuije oe pojji cahuime. Ecuea esohui cuaquijji sisi jayojja. Jjeya nei ecuea esohui jayojja jama acue! Jamajjeya miya poquiquehua ajja. Pea cuana ecuea esohui shajja'ajja sa po ajjajo poquiquehua tiitii'yo. Jiquio ecua mecalle quea misijo cuaquisho chana' epoquijji jayojja jama ojjaña joya ecue sohui jayojja jama a'ajja, quea mimishi ba'yani. ³⁶ E'e, ecue sohui cuaquijji quea ja'a jayojja jama. Jamajjeya eya minijje nequijo, jecuea esohui jayojja jama acue! Jamaya miquianaya ecuea epeeji quea ja'a nee poaje'yo. Poquiquehua ajja dejja mimishi jayojja jama epojji pojjeama —poanaje Jesosa.

Majoya esohui huohui majje Jesosa poquinaje. Jja'a-niquehuaquinaje.

Jodio cuana Jesosa nijje jjapeequi ajja tii

³⁷ E'e, Jesosaa quea huiso ma dejjaa ajjima acani acanaje. Ojjaña ba canaje. Jamatii Jodio cuaa huohui canaje jama ba'a: —Chojja, Jesosa Eyacuiñajjija huoojea'yo ojjaña jaahuanajji pojjeama —poanaje jjashajja'ajjaqui ajja jjejojo.

³⁸ Yahuajo nei Eyacuiñajjija esohui huohuijji Isaia bajjaniya tehue ca poa Jodio cuanajo jama ba'a:

“Eyacuiñajji, Jodio cuana ecuanaja esohui shajja'ajja sa po'yo ajja. Miyaya ma dejjaja ba jjima aña. Ba huicha'a huicha'a majje jamatii oya cuana jjashahuabaqui sa po ajja”.

³⁹ Jamajoya Isaiaa yahuajo nei nei oya cuanajo tehue ca poa jama pea'ai ba'a:

⁴⁰ “Jodio cuana cojjama' jayojja jama poanijo, miyaya ma dejjaja ba jjima aña ba majje jjabahuejjaqui mee jji-ma mijo. Quea sapa ca'a jjejojo miquea ejjashahuabaquijji jjabahuejjaqui mee jjima. Jamajjeya minijje jjapeequi ajjajo Jodio cuanaja mimishi cuana cuijea'yojji pojjeama”.

Jamaya Isaiaa yahuajo tehue ca poa Jodio cuanajo.

⁴¹ E'e, Eyacuiñajjija yahuajo nei nei Isaia Jesosa ba mee majje ojo tehue mee ca poa jama ba'a: “Oya quea ca'a nee nee poani. Oya Eyacuiñajjija huoojea'yo ojjaña jaahuanajji”.

⁴² Jamatii quea huiso Jodio etii cuaa quehuajje Jesosa-jo jama acanaje ba'a: —E'e jojo nei oya Jesosa Eyacuiñajjiya huoojea'yo ojjaña jaahuanajji —quehuajje poanaje Jodio etii cuana, Paniseo cuana yajjajo.

E'e, Paniseo cuana yahuajo jama poanaje ba'a: —Jesosa niije jjapeequiajo aje oe ecuanaja equi ojee ejjachichaquijji yasijje edobiqui meeji pojjeama; ¡huoojea-cuayajeaje'yo mi! —poanaje Paniseo cuana.

Jamajjeya beca Jodio etii cuana quea ajjajja poanaje ehoojeacuayajea ca poanijje. ⁴³ E'e, Jodio cuana jashahuabaqui ajja Eyacuiñajji quea bei epo mee'yojji. Chojja, oya cuana aje oe jashahuabaquinaje pea Jodio cuana quea bei epo mee'yojji onijje.

Jesosaa quijje ojjaña huohui caje'yo joya ojaya epeeji nei

⁴⁴ Jamajjeya Jesosaa ojjaña ejjachichaqui nequi janobajjima nei, quea ja'a nee huohui canaje jama pea'ai ba'a: —Ecue Chiiya, Eyacuiñajjiya eya huoojea canaje. Jamajjeya ojjaña joya enijje e'e jojo nei jjapeequiani ecue Chii niije pea'ai jjapeequiani. ⁴⁵ Beca cuana mimiani jama ba'a: "E'e, Jesosa Eyacuiñajjiya huoojea'yo ojjaña jaahuanajji". Joya e bajji poaniya Eyacuiñajji ba cani pea'ai, eya ecue Chii jayojjaya poani tii. ⁴⁶ ¡Bacue! Cuaquijjiya jeaja'a canijo, dejja cuana poquiquehua ajja mecajje quea apojo. Eyaya cuaquijji jayojja jamaa ojjaña quea ja'a jjashahuabaqui meesahuaña. Jamajjeya ojjaña joya enijje jjapeequiani mimishi cuana pajea meeje'yo. Jamajjeya Eyacuiñajjiya eya huoojea canaje ojjaña cuana mimishi pajea mee'yohua. ⁴⁷ Ecuea esohui shajja'ajja majje beca cuana jamaya ba'e sa po'yo ajja. Jamatii eyaya oya cuana tecuea jjima aña. Eya ca iña poeyanaje ojjaña meshijo ba'eca cuanaja mimishi cuijea'yohua, enijje ba'e tiitii mee'yohua; quea mimishi nee poanijo, quea nee nee po mee sa po'yo ajja. Ecuea ejjashahuabaqui'yojji jama pojjeama ba'a: "Ojjaña quea mimishi nee poani quea nee nee po meeje'yo". Chojja, eya ca iña poeyanaje ojjaña meshijo ba'eca cuanaja mimishi cuijea'yohua, enijje eba'e tiitii'yojji. ⁴⁸ Ojjaña joya e cajaa ajji epo quijje quea nee nee poaje'yo cuaquijo ecue huohui jayojja jama ajjima-jojo. Jjeya nei eyaya esohui huohuiaña. Quijje eya poe o'oya majje ojjaña shajjama' cuana niije mimije jama ba'a: "Ecuea esohui shajja'ajja jjimajo miqianaya ca-jaa aje'yo". ⁴⁹ E'e, ecue Chiiya, e huoojea'yojji poaniya eya huohui meesahua cani ojaya ejjashahuabaqui'yojji. ⁵⁰ Ecuea eba ojjaña joya ojaya esohui jama poani Eyacuiñajjiya pea jjashahuabaquime po mee caje'yo. Ba'e tiitii mee caje'yo onijje pea'ai. Jamajjeya, e'e nei ojjaña Eyacuiñajjiya huohui canajeya eyaya huohuiaña —Jesosa poanaje e.

Jesosaja epeeji cuanaa ojaya pea epeeji cuana ca-jaahuana cahua, caba'e meesahua cahua

13 E'e, Jodio cuana ojee jjachichaqui o'oyanaje Jenosanena huasijje ojee ijia'ijjiaa quea bihui nee epojji, eniñeba'yojji esohuidojojjiya yahuajo nei Ejito

meshijo Jodioja bacua cuana cuia'yo jjima epajea'yojji pojjeama. Jamajjeya oe cahuime ojee ijia'ijjiaa jjimahua-jo, Jesosa jjashahuabaquinaje jama ba'a: —E'e, jiquio shejo eya poquije o'oya eyahuasijje ecue Chii que. Eya ca iña nequi ajja jiquio meshijo.

Jesosaa ojaya epeeji cuana jiquio meshijo ba'e quea jea nee nee acanaje. ¡Quea jea nee nee Jesusaja ojaya epeeji cuana! Poqui jjimahuaa ohuaya oya cuana jjabahuejjaqui mee canaje.

² Edosiquiana neiya Jodasa Isicaniote, Simonija bacua eja quea tai jjashahuabaqui mee canaje. Jamajjeya Jodasa jjashahuabaquinaje Jesosa iña meesahuajji, onajaya equecua'yojji. Jamatii Jesusaja eba poanaje jama ba'a: Eyacuiñajjiya, oja Chiiya oya eyajo ani huoojea ca poa meshi yasijje. Jamajjeya oya oja Chii que poquije o'oya. Oja Chiiya oya ojjaña huoojea'yojji po mee ca poa pea'ai. Jamajjeya sinecua ecuana niije, o shajja'ajjajji cuana niije ojee ijia'ijjianiyo Jesosa nequiso-huanaje. Oja daqui ao huijiajea majje pea daqui ejjacomayijji quijji ai jayojjajo jjajeyoca'aquinaje. Ma daqui jjajeyoca'aqui majje ohuaya ena sho canaje tepe ai jayoyja huasijje. ⁵ Majoya ecuana jiojji topo canaje. Topo majje jiojji cui ca'yonaje ma daquiya, ejjacomayijji quijji ai jayojjaa, Jesosaa. Jamaya poanaje ecuana jjabahuejja meequijji jama ba'a: Pea cuana quea jea nee aña, ¡ba'e meesahuacue! Jama jjashahuabaquime epo meeji jiojji topo canaje. ⁶ Jamajjeya quijje Jesosaa Peno jiojji topo'ajja ca poa.

—Jesosa, miya ecuea Emeshi Mese nei. ¿A'a jjaya iña jiojji topoje pea'ai? —Peno poanaje.

⁷ Jamajjeya Jesosaa oya saja'a canaje jama ba'a: —E'e, Peno, jjeya miya jjashahuabaquiani: "¿Yajjajo shai Jesosaa ecuana jiojji topo cani so'o?" miquea ba jjima; yajjajo eya jama aña poso jjabaquiani. Jamatii quijje pishana miquea eba poaje —Jesosa poanaje.

⁸ —Chojja, Jesosa, miquea eya ejiojji topojji pojjeama, de, miya ecuea Emeshi Mese nei poanijo —Peno poanaje.

Jamajjeya Jesosaa oya acanaje: —Peno, miya ecuea epeeji nei pojjeama poaje, ca eyaya miquea ejiojji mi topoajo —Jesosaa oya acanaje.

⁹ —¿A'a e'e? Jamajjeya ¡ecuea ejiojji topocue, ecuea eme' cuana, ecuea ecojja pea'ai, ojjaña topocue! —poanaje Peno, Jesosa niije jjapee neineiqui sa poanijo.

¹⁰ —Peno, miqianaya besanaje. Jamajjeya miya quea boejea. Jamatii jjeya ejiojji nei catopoahua. Jamajjeya miqianajaya mimishi cuijea'yo majje quea boejea a'yonaje. Oe nei nei yani quea boejea pojjeama —Jesosa poanaje.

¹¹ Oya jjashahuabaquiani Jodasajo. Ojaya eba Jodasa o iña meeji epojji. Jamajjeya: "Oe nei yani quea boejea pojjeama" Jesosa poanaje.

¹² Majoya ecuana jiojji topo majje Jesosaa oja daqui ao huosho ca o'oyanaje. Anioque o'oyanaje ecuana niije. Jama poanaje ba'a: —¿A'a miquea eba yajjajo miqianaya eyaya jiojji toponaje? ¿A'a jjabahuejjaqui jji-ma pojjaja'a? ¹³ ¡Bacue! Miquianaaya eya jama aña ba'a:

“Miya ecuea esohui huohuijji”, “Ecuea Emeshi Mese” aña. E'e, jamaya miqianaya quea pame aña. Eya ca ca iña jiquio, miqianajaya esohui huohuijji, miqianajaya Emeshi Mese pea'ai. ¹⁴ E'e, ¡bacue! Eyaya miquea esohui huohuijjiya, miquea Emeshi Meseya miqianaya jiojji toponaje. Jamajjeya ¡e jayojja jama pocue! ¡Pea cuana jiojji topojji jayojja jama pocue! ¹⁵ E'e, eyaya miqianaya ¡jabbahuejjaqui meeaña: ¡Eyaya miqianaya anaje jayojjaya pea cuana acue! ¹⁶ Eyaya e'e jojo nei miqianaya ba meeaña jama ba'a: ¿A'a echacojjiya oja-ya echacomeejji huoojea cani? Chojja. Emeshi meseya ca ca oe echacojji huoojea cani. Eya quea ca'a nee nee; miya ecuea echacojji quea ca'a pishana. Jamajjeya ¡ecue sohui jayojja jama acue! E'e, ¡pea cuana ba'e meesahuacue oe! ¹⁷ Jjeya ecuea esohuijo ¡jabbahuejja-quinaje. Jamajjeya miya quea bihui nee poaje'yo ca ecue sohui jayojja jama ba'yajo —Jesosa poanaje.

Jesosa huohui canaje Jodasa o iña meeji epojji

¹⁸ Majoya Jesosa jama acanaje ba'a: —Jamatii eya oj-jaña miqianajo pojjeama mimiani. Miqianaya ecuea ehabaca; ecuea eba ojjaña. Oe dejja ese nijje nequi ecuea epeeji nisho; Eyacuiñajjija esohui etehue'yo ojo yahuajo nei jama poa ba'a:

“Oya enijje ijia'ijia anije. Jamatii aje oe ecuea epeeji nisho oya poaje, e quecua mee'yojji epojji”.

Ecuea eba jiquio etehue'yo jamaya poaje e'e jojo nei.

¹⁹ E'e, eyaya miqianaya ¡jeyahua nei huohuiaña jama po ¡jimahuajo. Jamajjeya quijje pea cuaa eya quecua cajo miqianaya jama ejo ¡jashahuabaquije ba'a: “E'e jojo nei oya Jesosa Eyacuiñajjija huoojea'yo ojjaña jaahuanajji. Jamajjeya ohuaya eseya huohui canaje yahuajo” jamaya poaje miqianaya quijje. ²⁰ E'e jojo nei —Jesosa poanaje pea'ai—, ojjaña joya ecuea echacojji nijje ¡japeequiani ecuea esohui huohuijji poanijo, enijje ¡japeequiani pea'ai. Eyacuiñajji e huoojea'yojji poanijo, ojjaña joya enijje ¡japeequiani Eyacuiñajjija epeeji poani pea'ai oya cuana.

Jesosa miminaje Jodasajo

(Mateo 26.20-25; Macoso 14.17-21; Noca 22.21-23)

²¹ Majoya Jesosa quea yeno nee nee poanaje Jodasa-ja ejjashahuabaquijji quea tai ba majje. O shajja'ajjajji cuana jama huohuime acanaje ba'a: —Eyaya miqianaya e'e jojo nei huohuiaña. Oe dejja jiquiojo enijje ij-ji'a'ijia ani e iña meesahuajji epojji onajaya equecua'-yojji —Jesosa poanaje.

²² Jamajjeya o shajja'ajjajji cuana quea metejo pea nijje ecapashe nei jama poanaje ba'a: —De, ¿ache shai o iña meesahuajji poaje so'o? —jjashahuabaquime poanaje.

²³ Eya jiquio esohui tehuejji, Huani bajjani Jesosa pejejo aninaje, eya ojaya quea jea nee nee. ²⁴ Jamajjeya Penohua eya Jesosa huohui'ajja mee canaje: —¿Ache shai o iña meesahuajji poaje?

²⁵ Majoya eyaya ecapashe nei Jesosa huohui'ajjanaje jama ba'a: —Jesosa, ¿aya acuae mi quecua mee'yo sa acani so'o?

²⁶ Jesosaa acanaje: —Pahui noe najo peshepeshe mee majje eyaya maya quiaje, ma e iña meeji epojji.

Majoya Jesosaa pahui noe najo peshepeshe mee majje quia canaje Jodasa, Simonija bacua ejja: —Ma'a-je, Jodasa —poanaje.

—Ocuae, Jesosa —acanaje Jodasaa.

²⁷ Pahui ijia anijo Edosiquiana neiya Jodasa quea tai ¡jashahuabaqui mee canaje jama ba'a: “¡Onaya eyaya Jesosa iña meesahuaje!”

Majoya aje Jesosaa jama acanaje ba'a: —¡Poquicue, Jodasa! ¡Miquea ejjashahuabaqui'yojji jayojja jama acuaicue ¡jeyahua nei! —Jesosa poanaje.

²⁸ Pea shajja'ajjajji cuana jama poanaje ba'a: —¿Yajja poanaje Jesosa? ¿Ajeo Jesosaa Jodasa huoojea canaje so'o? ²⁹ Jodasaa bashosoco sisi esejaya ejjesheji biojji dojo canaje. E'e pojja'a huoojea canaje bobi ¡jequiya, quijje ojee e'ijiajji pojja'a —poanaje.

Beca eshajja'ajjajji cuana jama poanaje ba'a: —E'e pojja'a Jesosaa Jodasa huoojea canaje bejjo quiaa ae-ma' cuana huasijje —poso acanaje cuaa.

³⁰ E'e, Jesosaa huoojea caje Jodasa pahui ijia majje poquinaje esecue yasijje. ¡Jasinecuaquiajo poquinaje.

Jesosaja esohui eyacua

³¹ Majoya Jodasa poqui'yajo, Jesosa ecuana nijje jama poanaje ba'a: —Eya ojjaña Edoe Mese. Eyacuiñajjiya ¡jeyahua nei ojjaña ba mee caje eya quea ca'a nee nee poani. Ma ba cajo, eyaya ojjaña ¡jabbahuejjaqui meeje Eyacuiñajji quea ca'a nee nee, quea pame nee nee.

³² E'e, Eyacuiñajjiya eya ma dejja ajjima acani amee canajejo ojjaña ¡jabbahuejjaqui meenaje oya quea ca'a nee nee. Jamajjeya Eyacuiñajjiya ¡jeyahua nei ojjaña ¡jabbahuejjaqui mee caje eya quea pame nee nee poani. E'e, Eyacuiñajjiya eya shequi mee'yo majje ¡jequisohua caje'yo eyahuasijje —Jesosa poanaje.

³³ Majoya Jesosaa ecuana huohui canaje jama ba'a: —¡Miqianaya ecue bacua cuana jayojja, shajja'ajjacue mo! Eya minijje nequije oe pojji cahuime. E poqui'yajo, miqianaya eya sa'ajjaje'yo. Jamatii ¡jeya nei poqui meeme ajja e poquiani yasijje. Jamaya yahuajo eyaya pea Jodio cuana huohuinaje pea'ai. ³⁴ Jamajjeya esohui eyacua eyaya huohuiaña jama ba'a: ¡Pea cuana quea jea nee nee atitiicue! ¡Eyaya miqianaya quea jea nee nee aña jayojja jamaya pea cuana quea jea nee nee acue! ³⁵ Pea cuana quea jea nee nee aña, onaya miqianajo jama poaje ba'a: “E'e jojo nei miqianaya Jesosaja epeeji poani” —Jesosa poanaje.

³⁶ Peno Simohuiya Jesosa huohui'ajja canaje jama ba'a: —Emeshi Mese Jesosa, ¿achacua acuae shai mi poquije'yo? —acanaje.

—Peno, ¡jeyahua nei miya epoquijji pojjeama e nequi yasijje. Quijje poe meeje e ani yasijje —Jesosa poanaje.

³⁷ Penohua huohui'ajja canaje: —¿Yajjajo acuae ¡jeya eya minijje mi poqui meeaña? Miya ecuea quea jea nee nee eyaya jaahuanaje'yo. Manojeyo mi jaahuanajji.

³⁸ Jesosaa quea yenuhua Peno jama acanaje ba'a: —¿A'a miya manojeyo e jaahuanajji? Chojja Peno, e'e

jojo nei jiquio mecajje cachina yahue taaa jjimahuajo, miya ejo jama po huicha'a huicha'aje ba'a: "¡Chojja, Jesosa ecuea ba jjima nei nei!" miya quea mete po majje pea beca peejjima huohuimeya aje —Jesosa po anaj e.

Jesosaa ojaya epeeji quea bihui nee po mee canaje

14 Jesosaja esohui shajja'ajja majje ecuana quea yeno, quea mete poanaje. Jamajje Jesosa ecuana nijje miminaje jama ba'a: —¡A'a quea mete pojji! ¡jiquio jama jjashahuabaquicue ba'a: "Eyacuiñajjiya eya jaahuana caje'yo tii" pocue! ¡Ejo jama jjashahuabaquicue pea'ai ba'a: "Jesosaa eya jaahuana cani tii" pocue! ² Ecue Chii Eyacuiñajji eyajo ani. Jocuama ojaya eba'ejji quea huiso nee yani. Ecuea esohui e'e jojo nei, siajje pojjeama. Eya poquije ecue Chii que miqianajaya eba'ejji iyaa, apoa yajji. ³ E'e, eyaya miqianajaya eba'ejji iyaje. Jamajjeya e'e jojo nei eya poeje o'oya. Poe o'oya majje eyaya miqianaya dojoje enijje eba'e tiitii'yojji. ⁴ Miqianajaya eya eba ecue Chii que poquije. Miqianajaya eba pea'ai ecue Chii que epoquijji —Jesosa poanaje.

⁵ Majoya Tomasi Jesosa nijje jama poanaje ba'a: —Jesosa, ¿achacua miya poquije'yo? Joya mi poquije yasijje ecuanajaya ejiojji ba jjima, de. Jamajjeya ecuanaja eba pojjeama ejiojji ma mi poquiani yasijje epoquijji —acanaje Tomasiya.

⁶ —Tomasi, ojjaña ecue sohui e'e jojo nei. Eya ejiojji eyahuasijje epoquijji jayojja. E'e, ecuea esohui jayojja jama poanajo, miya ecue Chii ba'yani yasijje poqui meeje'yo. Ojjaña enijje jjapeequiani eyaya ba'e tiitii meeje'yo ecue Chii nijje tii. Ojjaña joya enijje jjapeequi ajja ca ca ecue Chii nijje eba'e tiitii'yojji pojjeama. ⁷ Eya miqianajaya eba jojjemo miqianaaya ecue Chii bame pea'ai poaje. Jjeya nei oya miqianajaya eba poaje. Jamajjeya eya ecue Chii yasijje poqui'yajo, oya quea ca'a nee nee ani miqianaaya baje —Jesosa poanaje.

⁸ Majoya Penipe jama poanaje ba'a: —Jesosa, ¿eseja Chii ai ecuanaya ba meecue! Jamajjeya ecuana quea bihui nee nee poaje'yo —poanaje Penipe.

⁹ Jesosaa Penipe acanaje: —Penipe, ¿a'a miqianaya jjabahuejjaqui jjima? Eya miqiana nijje ba'enaje quea shequiaja huiso. ¿A'a jjeya miqianajaya eya ba jjima? ¡Bacue oe! E ba majje esejaya Chii eyajo miqianajaya eba pea'ai. Jamajjeya ¿apiojji acuae miya jama poani so'o ba'a: "¡Esejaya Chii ai ecuanaya ba mee socue!" poani miya? —Jesosa poanaje—. ¹⁰ E'e jojo nei eya ecue Chii jayojjaya, de. Oya e jayojjaya pea'ai. ¿A'a miqianaya jamaya jjashahuabaqui jjima? Ecue Chii nijjeya eyaya ohuaya jayojja aña, ma dejjaa ajjima acani aña. Ecue Chiiija ejjashahuabqui'yojji eyaya huohuiaña pea'ai, ecuea ejjashahuabaqui'yojji pojjeama. ¹¹ E'e jojo nei eya ecue Chii jayojjaya, de. Oya e jayojjaya pea'ai. ¡Jamaya jjashahuabaquicue, oe! Ecuea esohuijo miqianaya jjabahuejjaqui jjima, ¡jamajjeya jjashahuabaquicue eyaya ma dejjaa ajjima aña! ¡Jama acue ba'a: "E'e, Jesosa Eyacuiñajji jayojjaya" acue miyaya! —Jesosa poanaje—. ¹² Eyaya huohuiaña e'e jojo nei jama ba'a: Ojjaña enijje e'e jojo nei jjapeequianiya eyaya

aña jayojja jama acaje'yo. Eyaya quea huiso pishana jjapeequi mee'yonaje Eyacuiñajji nijje. Eya ecue Chii que poqui'yajo, ecuea epeeji cuaa quea huiso nee nee pea cuana jjapeequi meesahua caje'yo onijje, Eyacuiñajji nijje. ¹³ Jiquio ecua miqianaya enijje mimijea jamaya eyaya aje'yo, ca ejo jama jjashahuabaquianajo ba'a: "E'e jojo nei Jesosaa ma ecua eya onijje mimiani jamaya acaje'yo". Jamajjeya ba majje ojjaña ecue Chii bihuia caje jama ba'a: "Eyacuiñajji, ecuanaja Chii ai, miya quea ca'a nee nee eyajo ani". ¹⁴ Enijje mimicue jama ba'a: "¡Jesosa, jiquio ecua eya mimiani minijje jamaya miyaya acue!" Jamajjeya miya enijje poanajo eyaya joya ecua miya enijje mimiani jamaya aje'yo —Jesosaa ecuana huohui canaje.

Jesosaa huohui canaje Edojjoshahua Pameja epoejji

¹⁵ Majoya Jesosaa ecuana, o shajja'ajjajji cuana huohui canaje jama ba'a: —Eya miqianajaya quea jea nee poanajo, ¿ecuea esohui jayojja jama acue! ¹⁶ Jamajjeya eya esejaya Chii nijje mimijea jama ba'a: "Ecue Chii, ¡Edojjoshahua Pame huoojeacue ecuea epeeji cuana jjabahuejjaqui mee'yohua! Oya ecuea epeeji cuana nijje ani tiitije'yo". ¹⁷ E'e, Edojjoshahua Pameya miqianaya esohui e'e neijo jjashahuabaqui mee caje'yo. Ecuea epeeji pojjeama ca ca Edojjoshahua Pame nijje ejjapeequi meeji pojjeama. Oya miqianajaya eba. Pea cuanaja oya ba jjima. Oya miqiana nijje enequi tii tii. Miqiana que dobiquire'yo, Edojjoshahua Pame —Jesosa poanaje.

¹⁸ —Ecuea epeeji, eya poquije'yo, miqianaya jeana'je'yo jiquiojo tii. Jamatii ecuea miqianaya jaahuana jjiima jayojja jeana'yome ajjima. Chojja. Eya miqiana huasijje huoojeaje'yo Edojjoshahua Pame miqiana nijje jjapeequi tiitiiya, miqiana jaahuana tiitii'yojji. ¹⁹ Quijje pishana ecuea epeeji pojjeama cuaa eya ba maja ajja. Miqianaaya ca ca eya baje o'oya. Eya ba'e tiitije'yo, miqianaya pea'ai ba'e tiitije'yo —Jesosa poanaje—. ²⁰ Edojjoshahua Pame poeyajo, miqianaya jjabahuejjaquije jama ba'a: Eya ecue Chii jayojjaya tii poani. Eya miqiana nijje nequi, miqianaya enijje nequi pea'ai —Jesosa poanaje—. ²¹ Ojjaña joya quea e jea nee nee poani ecuea esohui shajja'ajja majje jamaya poani. Eya ojaya quea jea nee nee poanajo, oya ecue Chiiija quea jea nee nee pea'ai, ecuea quea jea nee nee pea'ai. Eyaya oya ba meeje jama ba'a: Eya e'e jojo nei onijje ani tii tii —Jesosa poanaje.

²² Majoya pea Jodasa, ma Jodasa Isicaniote pojjeama, Jesosa nijje jama poanaje ba'a: —¿Yajjajo acuae mi-quea epeeji pojjeama mi jjaba meemajaquije so'o? Ecuanaa ca ca miya baje o'oya —huohui'ajja canaje pea Jodasaa.

²³ Jesosaa oya jama acanaje ba'a: —Ojjaña joya quea e jea nee poaniya ecuea esohui jayojja jama acaje'yo tii. Jamajjeya ecue Chiiya oya cuana quea jea nee acaje'yo. Eya, ecue Chii pea'ai onijje jjapeequije'yo.

²⁴ Pea cuana ca ca ecuea esohui shajja'ajja sa po ajja, e boti'ama jjejojo. Miqianaaya shajja'ajjaña. Ecue Chiiya eya huoojea canaje. Ojaya ejjashahuabaquijji eyaya

miquianaya huohuiaña, ecuea ejjashahuabaquijji pojjeama. ²⁵ Jamaya eyaya huohuiaña, miquiana nijje nequiya. ²⁶ Ecue Chiija eba miquianaya ecuea epeeji poani. Jamajjeya ohuaya Edojjoshahua Pame huoojea caje miquiana huasijje, miquiana jaahuanaa, miquiana enijje ejjapeequijji pea'ai. Poe majje ohuaya miquianaya ba meesahua caje'yo Eyacuiñajjiija ejjashahuabaquijji cuana. Ojjaña ecuea esohuijo ohuaya miquianaya jjashahuabaqui mee caje'yo tii tii pea'ai —Jesosa poanaje.

²⁷ —Eya quea bei nee nee. Eyaya miquianaya quea bei po meeaña —Jesosa poanaje—. ¡Jamajjeya quea bei pocue, e jayojja! ¡Mete'ama, yeno'ama pea'ai pocue! Ecuea epeeji pojjeama cuanaja aje oe miquianaya quea bei nee epo mee'yojji pojjeama, de. ²⁸ Eyaya huohuinaje jama ba'a: Eya ecue Chii que poquijje'yo. Poqui majje quijje eya poeje o'oya miquiana que. E'e, eyaya miquianaya huohuinaje jama ba'a: Eya poquijje'yo ecue Chii que. Ecue Chiiya eyajo aniya ma dejjaja ba jjima quea huiso nee nee acani. Eyaya jiquiojo ma dejjaa ajjima acani oe pojji aña —Jesosa poanaje—. Jamajjeya miquianaya quea e jea nee poanijo, ¡quea bihui nee pocue ejo, eya ecue Chii que poquianijo pea'ai! ²⁹ E'e, eyaya miquianaya jjeyahua nei huohuiaña, eya ecue Chii que poqui jjimahuaajo. Jamajjeya e poqui'yajo miquianaya jama poaje ba'a: "E'e jojo nei Jesusaa poqui jjimahuaa eseya huohui canaje. Oya Eyacuiñajjiija Bacua Ejja poeje o'oya" aje quiana oe poaje —Jesosa poanaje—. ³⁰ Eya miquiana nijje jjeya nei mimi majajaja ajja. Edosiquiana nei poeyani e napaa. E'e, Edosiquiana nei, ma ojjaña meshijo dejja mimishi huoojea'yoyji poani e napaa poeje. Ojaya eya ejeabichajeajji pojjeama. ³¹ Jamatii eya quea nee nee poaje. Quea nee nee poaniya ojjaña ba meeje jama ba'a: "Jesusaja oja Chii quea jea nee nee. Oja Chiija ehuohui jayojja jama poani pea'ai" acaje cuaa. Mahuiso —Jesosa poanaje—. E'e. ¡Jjeya nequisohuacue! ¡Cua'a, esecue yasijje cuayaquicue! —Jesosa poanaje.

Jamajjeya equi quecuayijji eyajo ani ijji'ijji ani cua-yaquinaje esecue yasijje acui yiye yasijje epoquijji.

Esohui eba meesahuajji uvajo bashococo ai jayojjayajo

15 Majoya ejjojijje poquijjeya Jesusaa ecuana huohui canaje: —Eyaya esohui mi ba meesahuajji huohuije uvajo, bashococo ai jayojjajo. Eya bashococo ai emaijje quea pame jayojja jama poani. Ecue Chii bashococo ai cuiñajji jayojja jama. ² Bashococo ai cuiñajjiya yaa sisi nojinoji'yajo tetojea ca'yani jjajaja ajjajojo. Eña ba chii tetojea ca'yani pea'ai, jjono quea jjajaja huiso epojji. Jiquio ecua jjono bashococo ai cuiñajjiya yaa enojinoji tetojea ca'yani jayojja jama ecue Chiiya ecuea epeeji nisho cuana cajaa acani. Jiquio ecua eña ba chii tetojea ca'yani jayojja jama epeeji e'e jojo nei cuana mimishi pajea mee caní, quea pame nee nee epojji. ³ Ecuea esohui shajja'ajjanajejo miquianaya quea ja'a poanaje. Jamajjeya miquianaya bashococo ai jjono quea pame jayojja jama poanaje. ⁴ ¡Enijje jjapee tiitiiquicue! Jamajjeya eya miquiana nijje jjapee tiitiiquijje'yo. Jamajjeya miquianaya ma dejjaa ajjima acani

ameeje'yo. ¿A'a jjono emaijje jjasejjaqui majje jjajjaje so'o? Chojja. Jamaya miquianaya enijje jjapee pajeaqui'yo majje quea pame po ajja. Emaijje jjasejjaqui'yo jjima jjono jjajjani —Jesosa poanaje.

⁵ Eya jjono emaijje quea pame nee jayojja. Miquianaya jjono emaijo pohuani jayojja. Jjono emaijje jjasejjaqui'yo majje nojinojje. Joca'yajo chicha'yo majje dahuajea ca'yani cuaa. Oya jayojjaya ojjaña enijje jjapee pajeaqui'yani cajaa acani. Joya enijje jjapee tiitiiquiani ca ca eya jjapee tiitiiquijje'yo onijje pea'ai. Jamajjeya oya cuana ma dejjaa ajjima acani quea huiso ameeje'yo. ⁷ E'e, miquianaya enijje jjapee tiitiiquianijo, ecue sohui jayojja jama atiitiañaajo pea'ai, Eyacuiñajjiya joya ecua miquianaaya huohuinaje jamaya acaje onijje mimiyajo. ⁸ Miquianaya ma dejjaa ajjima amee caní ba majje pea cuaa huohui caje jama ba'a: "E'e, Eyacuiñajji quea ca'a nee. Jiquio dejja cuana e'e jojo nei Jesosa shajja'ajjaji cuana" acaje cuaa.

⁹ —Ecue Chiiya eya quea jea nee nee acani jayojja jama miya ecuea quea jea nee nee. Jamajjeya jeya miquianaaya quea jea nee nee pea'ai acue! ¹⁰ E'e, eya ecue Chiiya quea jea nee nee poani, eyaya ojaya esohui jayojja jama atiitiañaajo. Jamaya ecuea esohui jayojja jama poanijojo, miquianaya ecuea quea jea nee nee poani pea'ai —Jesosa poanaje.

¹¹ —Eyaya jiquio esohui huohuiaña miquiana quea bihui po meeji. E'e, eyaya miquianaya quea bihui nee nee po mee sa aña. ¹² Eyaya miquianaya huohuina'yaña jama ba'a: ¡Pea cuana quea jea nee nee acue! ¡jiquio ecua eyaya miquianaya quea jea nee nee aña jamaya acue cuana! ¹³ Ojaya epeeji quea jea nee nee acani oe dejja manojje'yo ojaya epeeji nahuejo. Jamajjeya ¡ojaya oja epeeji quea jea nee nee poanijo nahue caní! ¹⁴ Miquianaya ecuea quea jea nee nee; ecuea esohui jayojja jama poanijo ecuea epeeji e'e jojo nei poani. Jamajjeya eya miquiana nahuejo manojje'yo.

¹⁵ Echacojjiya ba jjima ojaya echacomeejjiija ejjashahuabaqui'yoyji. Ojaya epeeji ca ca ba mee caní. Jamajjeya jjeya eya jama po ajja ba'a: "Miquianaya ecuea echacojji poani". Chojja. Jjeya eya jama poani ba'a: "Miquianaya ecuea epeeji poani". E'e, ojjaña joya ecue Chiiya huohui canaje eyaya miquianaya ba meenaje ecuea epeeji poanijojo —Jesosa poanaje—. ¹⁶ ¡Bacue, oe! Eya miquianajaya ebabaca pojjeama. Eyaya ca ca miquianaya babaca'yonaje ecuea epeeji epojji. Eyaya miquiana huoojeaña ecue Chii nijje quea pame nee chachhua. Jamajjeya ¡pea cuana enijje jjapeequi meesahuacue! Jamajjeya enijje jjapeequianijo miquianaya cojjacahuianijo. Eyacuiñajji nijje emimijji ohuaya miquianaya saja'a acaje —Jesosa poanaje—. ¹⁷ Jamajjeya eyaya miquianaya huohuina'yaña jama ba'a: ¡Pea cuana quea jea nee nee acue! —Jesosa poanaje.

Eshahuaja epeeji cuanaja boti'ama nei nei poaje miquianaya

¹⁸ —¡A'a quea yeno pojji dejja mimishi cuana miquiana nijje quea quene poanijo! Dejja mimishi cuana miquiana nijje quea quene nee nee po jjimahuaajo enijje

quea quene nee nee poanaje. ¹⁹ Miquianaya dejja mimishi jayojja ba'e jojjemo ojaya quea jea pome miya ojaya pea epeeji quea jea jayojja. Jjeyahua nei miquianaya ona jayojja pojjeama, eyaya miquianaya babaca'yonaajejo. Jamajjeya miquiana nijje quea quene nee nee poani dejja mimishi cuana. ²⁰ ¿A'a ecuea ehuhui'yo baña? Jama ba'a: Echacomeeji quea sohui ca'a; echacoji ca ca ca'a'ama. Jamajjeya eya napa caje cuaa jayojja jama miquiana napa caje pea'ai. Ecuea esohui shajja'ajja canajejo, miquianajaya esohui shajja'ajja caje'yo pea'ai, onaaya. ²¹ E'e, e acaje'yo jayojja jama miquianaya acaje'yo cuaa enijje jjapeequianijo. E'e, oya cuaa jamaya acaje'yo, Eyacuiñajji, e huoojea'yojji epo ba jjimajojo. ²² E meshi yasijje, dejja mimishi cuana huasijje poe jjima jojjemo, esohui huohui jjima jojjemo pea'ai Eyacuiñajjiya shajjama' cuana quea nee nee po mee'yo ajja acame. Jamatii jjeya eyaya ojjaña huasijje esohui e'e nei huohuinajejo, jama po mee ajja ba'a: "Ecuea mimishi chama'. Ecuea shajja'ajja jjima". Chojja. Oya cuana quea mimishi tii —Jesosa poanaje—. ²³ Joya e boti'ama ajji poaniya ecue Chii boti'ama pea'ai acani. ²⁴ Eyaya dejja mimishi nijje nequiya ma dejjaa ajjima acani a'yonaje. Ma dejjaa ajjima acani ecuea ajjima jojjemo Eyacuiñajjiya oya cuana tecuea jjima acame. E'e, onaaya ba canaje eyaya ma dejjaa ajjima acani aña. Jamatii eya ecue Chii pea'ai boti'ama nei nei onajaya. ²⁵ Yahuajo nei nei Eyacuiñajjiya esohui huohuijjiya esohui tehue ca poa ejo jama ba'a: "Eya quea pame nee poani. Jamatii dejja mimishi cuanaja eya boti'ama nei nei" —Jesosa poanaje—. Jjeya jamaya dejja mimishi cuana poanaje enijje, esohui huohuijjiya etehue'yo jama —Jesosa poanaje.

²⁶ —Miquianaya enijje aninaje ma eya dejja cuana huasijje esohui huohui coonajejo. Jamajjeya miquianaaya esohui e'e jojo nei ejo huohuicue ojjaña cuana huasijje! —Jesosa poanaje—. E poqui'yajo Edojjoshahua Pame poeje miquiana quea bihui nee po mee'yohua. Jjeya oya ecue Chii nijje yani. Eyaya oya huoojeaje miquiana que miquiana jaahuanaa. Ohuaya Eyacuiñajjiya esohui e'e jojo nei ejo miquianaya ba meesahua caje'yo. Jamajjeya miquianaya jjashahuabaquije ejo —Jesosa poanaje.

16 —Eyaya miquianaya jamaya huohuiaña jjeya. Jamajjeya ecuea esohuijo quijje miquianaya enijje ejjapee pajequi'yojji pojjeama onaa napa caje. ² Jodio cuana miquiana nijje quea quene poaje. Jamajjeya quijje, Jodioja equi ojee ejjachichaquijji yasijje dobiqiyajo miquianaya huoojeacuaya caje'yo esecue yasijje Jodio cuaa. E'e, quijje miquianaya quecua'yo majje oya cuana jjashahuaba quehuaquije jama ba'a: "Ecuaaya oya cuana quecua'yonaje. Jamaya Eyacuiñajjiya quea boti" jama posoya acaje cuaa.

³ —Jamaya acaje cuaa Eyacuiñajji ba jjimajojo, eya pea'ai ba jjimajojo. ⁴ Jjeya eyaya miquianaya huohuiaña. Jamajjeya quijje onaa napa caje miquianaya jama poaje ba'a: "Jesosaja esohui yahuajo jayojja jama jjeyahua nei acani cuaa. Ecuana napa cani, onaaya" jamaya poaje —Jesosa poanaje—. Yahuajo miquiana nij-

je mimi coo majje eyaya miquianaya huohui jjima. Miquiana nijje enequiya jjejojo mi huohuinaje —Jesosa poanaje.

Edojjoshahua Pame poeje

⁵ —Yahuajo eya eyajo ani ecue Chiya huoojea ca poa jiquiacua. Jjeyahua nei eya o que poquije o'oya. Jamatii eya miquianajaya huohui'ajja jjima jama ba'a: "¿Achacua miya poquije'yo?" ajjima. ⁶ Eyaya miquianaya huohuinaje jama ba'a: "Eya poquije'yo". Jamajjeya miquianaya quea yeno nee poani. ⁷ Jamatii eyaya miquianaya e'e jojo nei huohuiña: Poqui'yo majje eyaya miquianaya quea bihui nee po meeje'yo. E'e, ecue Chii que poqui'yo majje eyaya Edojjoshahua Pame huoojeaje miquiana que. E poqui'yo ajja jojjemo ca ca oya poe jjima pome. ⁸ Ecuea epeeji pojjeamaja ejjashahuabaquiji quea quehua. Jamajjeya poe majje Edojjoshahua Pameya oya cuana jjabahuejjaqui mee caje. Oya cuana quea mimishi poani, quea mimijjequije poani. Edojjoshahua Pameya oya cuana quea ja'a nee ba mee caje'yo pea'ai. Eyacuiñajjiya ojjaña joya quea mimishi poani tii quea nee nee po mee caje'yo tii tii pea'ai. Jamaya ojjaña ba mee caje'yo, Edojjoshahua Pameya.

⁹ E'e, Edojjoshahua Pameya ojjaña jjabahuejjaqui mee caje jama ba'a: Enijje jjapeequi sa po'yo ajja jjojya aje oe ojjaña quea mimishi poani. ¹⁰ Ecue Chiya eya shequi o'oya mee majje o que jjequisohua ca'yajo, Edojjoshahua Pameya ojjaña ba mee caje eya quea pame nee nee. Jamajjeya eyaya ojjaña quea ja'a nee ba'e meeje'yo. Jjeyahua nei ojjaña ecuea epeeji pojjeamaja eba majaji pojjeama tii. ¹¹ Dejja mimishi huoojeajjiyo, Edosiquianajo Eyacuiñajji miminaje jama ba'a: "Eyaya Edosiquiana nei quea nee nee po meeje'yo tii tii. Jamajjeya ojjaña quea mimishi poani quea nee nee po meeje'yo pea'ai". Jamaya Edojjoshahua Pameya ojjaña jjashahuabaqui mee caje, poe majje —Jesosa poanaje.

¹² —Ecuea pea ejjashahuabaquiji yani quea huiso, miquianaya huohui jjima ecuea. Jamatii jjeya miquianajo quea quehua poaje; jamajjeya jjeyahua eba meeji pojjeama. ¹³ Jamajjeya Edojjoshahua Pameya poe majje miquianaya ojjaña esohui e'e nei ba meesahua caje'yo ejo. Ojaya ejjashahuabaquiji pojjeama ohuaya miquianaya ba meesahua caje'yo. Chojja, ecue Chiya esohui ba meesahua caje'yo. Edojjoshahua Pameya miquianaya ba meesahua caje'yo ojjaña ma Eyacuiñajjiya quijje acaje. ¹⁴ Jamajjeya ecuea esohui ba meesahua cajo, miquianaaya eya bihuiaje'yo jama ba'a: "E'e de, Jesosa quea pame nee nee, quea ca'a nee nee poani" miquianaya poaje. ¹⁵ Ecuea ejjashahuabaquiji ecue Chiya ejjashahuabaquiji jayojjaya tii tii poani. Jamajjeya eyaya huohuiaña jama ba'a: Ecuea esohui ba meesahua caje'yo Edojjoshahua Pameya —Jesosa poanaje.

Jesosa mano'yo majje shequije o'oya

¹⁶ —E'e, jjeya nei eya miqianajaya ba jjima poaje. Majoya quijje pishana baje o'oya. Majoya ecue Chiiya eya jjequisohua caje'yo o que —Jesosa poanaje.

¹⁷ Jamajjeya ecuana, Jesosa shajja'ajjajji cuana ojee mimimiminaje jama ba'a: —¿Yajjajje shai Jesosa jama poani ba'a: "Jjeya nei miqianajaya eya ba jjima poaje. Majoya quijje pishana baje o'oya. Majoya ecue Chiiya eya jjequisohua caje'yo o que" poani? —poanaje ecuana. ¹⁸ Ojee mimi majamajanaje jama ba'a: —¿Ajeo oya mimiani jama ba'a: "Jjeya nei?" Ecuana quea quehua ojaya esohui —poanaje ecuana.

¹⁹ Ecuana ejjashahuabaquijji Jesosaja eba poanaje. Jamajjeya ohuaya ecuana huohui'ajja canaje: —Eya jama poanaje ba'a: "Jjeya nei miqianajaya eya ba jjima poaje. Majoya quijje pishana baje o'oya" poanaje. Jamajjeya: "¿Ajeo shai oya Jesosa mimiani so'o?" miqianaya huohui'ajjaña. ¿A'a e'e? ²⁰ E'e jojo nei jjeya nei miqianaya quea yeno nee nee poaje. Ecuea epeeji pojjeama ca ca quea bihui nee nee poaje. E'e, miqianaya pa neineiye. Jamatii quijje pishana quea bihui nee nee poaje o'oya, miqianaya. ²¹ E'e, epona bacua nee majje quea yeno poani, quea bacua nee nee jjejojo. Jamatii bacua cuaya majje quea bihui nee poani. Ebacua ba majje enaese jjashahuabaqui maja ajja ebacua nee jo. ²² Jiquio ecua bacua nee majje epona quea yeno nee poani jayojja jama miya jjeya quea yeno nee nee poaje'yo. Jamatii eya ba o'oya majje quea bihui nee nee poaje'yo. Quea bihui nee nee epo pajea mee'yojji pojjeama cuanaja mi —Jesosa poanaje.

²³ —Jamajjeya eya ecue Chii que poqui'yajo, miqianajaya e huohui'ajja majajji pojjeama; enijje mimi ajja aquiana sa poanijo pea'ai. E'e jojo nei, ecue Chii nijje mimianijo, jaquiana sa poanijo oya huohucue! Ohuaya miya shajja'ajja caje. Miqianaya enijje jjapeequianijo quia caje joya miquia saña —Jesosa poanaje.

²⁴ —Yahuajo miqianajaya jamaya ajjima. Ma miquia saña ecue Chii huohui jjima enijje jjapeequianijo. Jamajjeya ¡Eyacuiñajji nijje mimicue! Joya ecua miqianaya oya huohuiaña jamaya ohuaya acaje, ecuea epeeji poanijo. Ohuaya joya miquia huohui'ajjajeya quia caje. Jamajjeya miqianaya quea bihui nee po tiitiije'yo, e'e jojo nei —Jesosa poanaje.

²⁵ —Jjeya eyaya miqianaya ecuea ejjashahuabaquijjijo sohuihuohuinaje, esohui ebamee sahuajjijo ca ca oe huohuinaje. Quijje ca ca eyaya miqianaya ecue Chiijo huohui neineiye esohui quea ja'a neejo, esohui eba meesahuajjijo pojjeama —Jesosa poanaje—. ²⁶ E'e, quijje pishana eya ecue Chii que poqui o'oyajo, miqianaya ecue Chii nijje mimije, enijje pojjeama. ¡Aquiana sa poanijo ca oe oya huohucue! Ecuea epeeji poanijojo ohuaya miqianaya shajja'ajja caje —Jesosa poanaje—. ²⁷ E'e, miqianaya ecue Chiija quea jea nee nee, eya miqianaja quea jea nee poanijojo, miqiana ejo quea ja'a jjashahuabaquianijo pea'ai. E'e, miqianajaya ejjashahuabaquijji ejo jama ba'a: "Eyacuiñajjiya Jesosa huoojea canaje e'e jojo nei". ²⁸ E'e jojo

nei eya eyajo ani ecue Chiiya huoojea canaje meshi yasijje. Jjeyahua nei eya meshijo nequi jjima poaje. O que poquije o'oya —Jesosa poanaje.

²⁹ Jamajjeya ecuana jama poanaje ba'a: —E'e Jesosa, jjeya miyaya quea ja'a nee huohuiaña, esohui eba meesahuajjijo pojjeama. Maya ecuana quea quehua poanaje. ³⁰ Ecuana eba miyaya ojjaña baña e'e jojo nei. Minijje mimi jjimahuajo, ecuana ejjashahuabaqui'yojji miquea eba. Jamajjeya jjeya ecuana jama poani ba'a: E'e jojo nei oya Jesosa Eyacuiñajjiya huoojea'yo —poanaje ecuana.

³¹ Majoya Jesosaa ecuana jama acanaje ba'a: —E'e, Eyacuiñajjiya, ecue Chiiya eya huoojea canaje. ¿A'a jjeya jamaya miqianajaya eba e'e jojo nei? —Jesosa poanaje—. ³² ¡Bacue! Jjeya nei miqianaaya eya quea mete po majje jeananaje'yo. Poquicuaquijje miqianajaya equi yasijje. Jamatii eya ee nei enequijji pojjeama. Choyo, ecue Chii enijje enequi tii —Jesosa poanaje—. ³³ Eyaya jamaya huohuiaña. Jamajjeya miqianaya ecuea epeeji nei poanijo quea bei poaje'yo, mete'ama. Jiquicua ba'yanijo, onaa napa caje quea nee poaje. ¡Jamatii yeno'ama pocue! E'e, Edosiquiana nei, ojjaña joya ecuea epeeji pojjeama pea'ai eyaya jeabichajeya'yonaje. Oya cuana quea nee nee po meeje'yo tii —Jesosa poanaje.

Jesosa miminaje oja Chii nijje ojaya epeeji cuanajo

17 Majoya ecuana nijje, o shajja'ajjajji nijje mimi majje Jesosa oja Chii nijje miminaje. Eyahuasiijje jjabajeasohuaqui majje jama poanaje ba'a: —Ecue Chii, jjeya nei eya manoje'yo. ¡Miquea ejjashahuabaqui'yojji ejo yahuajo, e huoojeanajejo jama acue jjeya, miyaya! ¡Ojjaña ba meecue eya miquea Ebacua Eija quea ca'a nee nee! Jamajjeya ba majje ojjaña miya bihuia caje. ² E'e, miyaya eya ojjaña Emeshi Mese nei po mee'yonaje, ojjaña huoojeajji. Jamajjeya ojjaña joya miya enijje jjapeequi meesahuaña ba'e tiiti meeje'yo, eyaya. ³ Ecue Chii, miya ca ca oe Eyacuiñajji nei e'e jojo nei. Pea chama'. Eya mique huoojea'yo ojjaña jaahunajji, Jesosa Quito bajjani. Ojjaña minijje jjapeequianijo, enijje jjapeequianijo pea'ai, ba'e tiitiije'yo eyajo. ⁴ Eyaya ojjaña cuana ba meenaje miya quea ca'a nee nee poani. E'e ecue Chii, miyaya eya huoojeanaje miquea echacojji. Ojjaña miquea huohui eyaya ajeyoje'yo'yonaje. Apoa anaje. ⁵ Ecue Chii, yahuajo nei nei meshi pana jjimahuajo, eya minijje quea ca'a nee neequia poa. Jamajjeya jjeya eya mi que poquije'yo; ¡quea ca'a nee nee nequi mee'yocue mo, minijje ojjaña huoojeajji! —jamaya Jesosa miminaje oja Chii nijje.

⁶ —Ecue Chii, eya minijje mimiani e shajja'ajjajji cuanajo. Oya cuana yahuajo miquea epeeji pojjeama poa. Miyaya oya cuana enijje jjapeequi meesahuanaje. Jamajjeya eyaya oya cuana mijo jjabahuejjaqui meenaje. Miquea esohui jayojja jama acanaje. Jjashajja'ajjaquinaje. ⁷ Jamajjeya jjeya ojjaña eba ojjaña joya miya e ameesahuanaje eyaya aña. ⁸ Ecue Chii, miyaya eya huoojeanaje miquea esohui huohuiya esejaya epeeji cuana huasijje. Miquea esohuijo oya cuana jjashahuabaquinaje. Shajja'ajja majje jama acani ba'a: "E'e, Jeso-

sa yahuajo Eyacuiñajji nijje nequi tiitiia poa. Eyacuiñajjiya oya huoojea canaje" poani —Jesosa poanaje.

⁹—Ecue Chii, eya minijje mimiani esejaya epeeji jaahuanajji. Ecuea epeeji pojjeamajo, eshahuaja epeejiyo eya mimi ajja. Miyaya esejaya epeeji cuana enijje jjapeequi meesahuanaje. Jamajjeya eya minijje mimiani esejaya epeeji cuanajo, ecuea epeeji miquea epeeji pea'ai poani jojoya. ¹⁰ E'e, ojjaña joya enijje jjapeequiani miquea epeeji poani pea'ai. Ojjaña joya minijje jjapeequiani ecuea epeeji poani pea'ai. Ojjaña eya bihuia cani jama ba'a: "E'e, Jesosa Eyacuiñajji huoojea'yo". ¹¹ Ecue Chii, miya quea pame nee nee, quea ca'a nee nee. Jjeya eya mi que poquije'yo, meshijo enequi majajji pojjeama. Eseyaya epeeji cuana ca ca jiquiojo nequije. ¡Oya cuana mimishi'ama po meesahuacue! ¡Miquea esohui jayojja jama atiitii meecue! Jamajjeya jajaña ojee jjashahuabaqui meecue quea ja'a nee! ¡Eya mi jayojjaya jama ojee jjashahuabaquiiani! ¡Jamaya oya cuana ojee jjashahuabaqui meecue! ¹² Onijje nequiya eyaya ojjaña joya miya enijje jjapeequi meesahuanaje jaahuanaje mijo. Jamajjeya Edosiquiana nei oya cuana dasia mee jjima anaje, mi quea ca'a nee nee poanijojo. Ojjaña eshahua nijje poquiquehua mee jjima anaje pea'ai. Oe nei enijje jjapee pa-jeaqui'yonaje, poquiquehuanaje. E'e, yahuajo nei esohui huohuijjiya ojo tehue ca poa jama ba'a: "Oya epeeji nisho po majje quea nee nee poaje'yo cuaquijo" ojo tehue ca poa yahuajo nei nei —jamaya Jesosa miminaje Jodasajo.

¹³—Ecue Chii, jjeya eya mi que poquije o'oya. Jiquiojo aniya eyaya ecuea epeeji cuana huohuiaña jama ba'a: "Ecue Chii que eya poquije o'oya". Ma esohuijo oya cuana quea bihui nee nee poaje. E'e, jeya quea bihui nee nee poani jayojja jama capohua oya cuana!

¹⁴ Eyaya ecuea epeeji miquea esohui huohuiañaajo, onaaya shajja'ajja canaje. Ecuea epeeji pojjeama cuanaja ecuea epeeji cuana boti'ama. Eya oya cuanaja boti'ama pea'ai, o jayojja po ajjajojo. ¹⁵ Ecue Chii, ecuea emimi minijje ecuea epeeji cuanajo jama ba'a: ¡A'a jjeya nei oya cuana dojosohuacuijji mi que! Chojja, oya cuana ca ca jiquiojo ba'yanijo ¡jaahuanacue quea pame nee! ¡A'a Edosiquiana neiya oya cuana dasia meeji! ¹⁶ Eyaya miquea epeeji pojjeama cuanaja ejjashahuabaqui jayojja jama jjashahuabaqui ajja. Ecuea epeeji cuana e jayojja jama poani, pea cuanaja ejjashahuabaqui jayojja jama pojjeama pea'ai. ¹⁷ Jamajjeya miquea esohui e'e nei. ¡Esohui jayojja jama poanijo, esejaya epeeji cuana quea ja'a nee nee ba'e meesahuacue, miquea ejjashahuabaqui jayojjaya! ¹⁸ Ecue Chii, miyaya eya huoojeanaje ojjaña cuana huasijje miquea esohui huohuiya. Jamaya eyaya ecuea epeeji huoojeaña pea'ai esohui e'e nei huohuiya ojjaña huasijje. ¹⁹ Miquea ejjashahuabaqui ejo jayojja jama aña eyaya, oya cuana ecuea quea jea nee nee poanijo. E'e, jamaya eyaya aña oya cuana miquea ejjashahuabaqui jayojja jama epo meesahuajji. Jamaya onaaya acaje'yo miquea esohui bajji poaniya jjejojo —Jesosa poanaje.

Jesosa ojjaña joya ojaya epeeji quijje poajejo miminaje oja Chii nijje

²⁰—Ecue Chii, eya minijje mimiani jiquio epeeji cuanajo —Jesosa poanaje—. Oya cuaa miquea esohui huohui caje pea cuana huasijje. Shajja'ajja majje pea cuana esejaya epeeji poaje'yo pea'ai. Ojjañaajo eya minijje mimiani, ojjaña jaahuanajji. ²¹ ¡Ojjaña ecuea epeeji cuana jjashahuabaqui meecue miquea ejjashahuabaqui jayojja, ecuea epeeji pojjeamaja ejjashahuabaqui jama pojjeama! Ecue Chii, eya mi jayojjaya poani. Miya e jayojjaya poani. ¡Eseyaya epeeji cuana ese jayojjaya amecue pea'ai! Jamajjeya ojjaña ba caje miya e huoojeajji epo. ²² E'e, miyaya eya huoojeanaje miyaya jayojja yajji. Jamaya eyaya oya cuana huoojeaña ese jayojja epojji pea'ai. Jamajjeya oya cuana ese jayojjaya jama ameeña, ojjaña. ²³ E'e ecue Chii, eya ona nijje jjapeequiani. Miya enijje jjapeequiani pea'ai. Jamajjeya oya cuana cajjashahuabaquiahua ese jayojja, ojjaña. Jamajjeya esejaya epeeji pojjeama cajjabahuejaquiahua esejo jama ba'a: Miyaya eya huoojea'yonaje. Miyaya eya quea jea nee nee aña jayojjaya esejaya epeeji cuana quea jea nee nee aña pea'ai —Jesosa poanaje.

²⁴—Ecue Chii, yahuajo nei nei, meshi pana jjimahuaajo tii, eya miquea quea jea nee nee poa; minijje ojjaña huoojea'yo jji poa. Jamajjeya ojjaña ecuea epeeji, ma miyaya enijje jjapeequi mee'yonaje ¡enijje ba'e tiitii mee'yocue eyajo! Jomajo oya cuaa ba caje'yo tii tii miyaya eya ojjaña huoojeajji po mee tiitiña —Jesosa poanaje.

²⁵—Ecue Chii, miya quea pame nee nee, quea ja'a nee nee nequi. Eseyaya epeeji pojjeama cuanaja aje oe miya ba jjima. Eyaya ca ca miya baña. Eseyaya epeeji cuanaja eba eya mique huoojea'yo. ²⁶ Eyaya oya cuana miya ba meesahua'yonaje. Jamaya po tiitiije'yo. Jamajjeya miyaya eya quea jea nee nee aña jayojjaya jama pea cuana onaaya quea jea nee nee acaje. Eyaya oya cuana esejaya esohui jayojja jama atiitii meesahuaje'yo pea'ai —Jesosa poanaje oja Chii nijje. Mahuiso oja-ya emimi oja C hii ni jje.

Pea cuaa Jesosa iña ca'yonaje

(Mateo 26.47-56; Macoso 14.43-50; Noca 22.47-53)

18 Majoya oja Chii nijje mimi majje Jesosa ecuana nijje poquinaje. Eta'a nama' Senono bajjani ojje miji yasijje poqui majje onimo acui yiye yasijje poquinaje. ² Yahuajo Jesosa ma acui yiye yasijje poqui majjanaje ecuana nijje. Jamajjeya jiquio acui yiye Jodasaja eba neinei poanaje, ma Jesosa iña meesahuajji epojjija eba neinei poanaje. ³ Jamajjeya mecajje onimo yiye yasijje Jodasa poeyanaje Jesosa que, sohuinano cuana nijje. Jodio etii cuaa, Paniseo cuaa pea'ai sohuinano cuana, Eyacuiñajji equi cuiñajji cuana pea'ai huoojea canaje Jodasa nijje, Jesosa iña. Ojjaña poeyanaje baajji, cuaquijijji pea'ai.

⁴ Jesusaja ojjañaja ejjashahuabaqui cuana ojaya eba poanaje. Jamatii oya cuana que poqui majje

huohui'ajja canaje jama ba'a: —¿Ajeo a nequiana ca poeyanaje? ¿Ae sa'ajja'yohua?

⁵ —Jesosa ma Nasanenajo ba'enaje sa'ajjaña ecuaa-ya —poanaje cuana.

—E'e, eya jiquio Jesosa bajjani —Jesosa poanaje.

Jodasa aje oe sohuinano cuana nijje nequinaje, Jesosa iña meeya poe. ⁶ Jesosaja esohui shajja'ajja majje sohuinano cuana, Eyacuiñajji equi cuiñajji cuana pea'ai edasajje tii jaabichaquinaje, oquequinaje mes-hi yasijje mete majje. ⁷ Jamajjeya Jesosaa oya cuana huohui'ajja ca o'oyanaje: —¿Ae sa'ajjaña?

—Ecuuaa Jesosa sa'ajjaña, ma Nasanenajo ba'enaje —poanaje.

⁸ —E'e, eya jiquio Jesosa bajjani —Jesosa poanaje—. Miquianaaya eya oe nei sa'ajjañajo, jecuea epeeji enijje nequi capoquiahua! —Jesosa jamaya poanaje ojaya epeeji cuana nahueji.

⁹ E'e, yahuajo Jesosa oja Chii nijje jama poanaje ba'a: "Ojjaña joya miya enijje jjapeequi meesahuanaje eyaya jaahuanaje" jamaya poanaje Jesosa oja Chii nijje yahuajo.

¹⁰ Eyacuiñajji nijje emimijji etijja echacojji Manico bajjani sohuinano nijje nequinaje. Majoya Simohui Penohua baa iña majje Manico shajja jajasejjajea ca'yonaje; esapa jajapojoejajji nisho acanaje. Eshajja ebiane mijijje jajasejjajea ca'yonaje, Manicoja.

¹¹ —Peno, ¡miqua baa jja oe ejee yasijje nequia'yocue! ¡Ecue Chijja ejjashahuabaquijji ejo jayojja jama capohua eya, jamatii quea nee nee poaje! —Jesosa poanaje.

Jesosa iña majje dojo canaje Anasi que

(Mateo 26.57-58; Macoso 14.53-54; Noca 22.54)

¹² Majoya esohuinano huooejajjiya ojaya sohuinano cuana nijjeya, Jodio etii cuanaja huoojaja'yo sohuinano cuana nijjeya pea'aiya Jesosa iña ca'yonaje. Me jeyo majje dojo canaje. ¹³ Anasija equi yasijje ebionei dojo canaje, ma Caipaja babaja equi yasijje. ¹⁴ Caipa aje oe ma shequiajaji Eyacuiñajji nijje emimijji etii poanaje. Ohuaya yahuajo pishana Jodio etii cuana huohui canaje jama ba'a: —¡Oe dejja camanoqui'yahua ojjaña cuanajo! Jamaya quea pame nee poaje'yo esejo —poanaje.

Peno sijje poanaje Jesosajo

(Mateo 26.69-70; Macoso 14.66-68; Noca 22.55-57)

¹⁵ Jesosa dojo canaje cuaa, Peno enijje quea huesha pishana ocuenaje achajja Jesosa onaa acaje baa. Eya jiquio esohui tehueji Huani bajjani. Eya Anasija eba. Jamajjeya eya dobiqii mee canaje ojaya equi yasijje, ma ojjaña Eyacuiñajji nijje emimijji cuana ojee mimiani yasijje. ¹⁶ Peno ca ca esecuejo nequinaje, dobiqii mee jji-ma jjejojo. Jamajjeya eya Anasija eba neineijo cuayaqui o'oyanaje. Esecue jaahuanajji nijje epona nijje e mi-miajo, ohuaya Peno dobiqii mee canaje. ¹⁷ Ma eponaa esecue jaahuanajjiya Peno huohui'ajja canaje: —¿A'a miya pea'ai Jesosa nijje poani, o shajja'ajjajji?

—Chojja. Jesosa shajja'ajjajji pojjeama ca ca iña —sijje poanaje Peno quea mete jjejojo.

¹⁸ Quea huoejo echacojji cuana, esohuinano mese cuana pea'ai cuaqui peje nei yasijje poeyanaje. Cuaqui pejejo jjayoqui nequinaje. Jamajjeya Peno jjanequichipiqui majje cuaquijo ejjajoquijji nequinaje ona nijje.

Anasiya Jesosa huohui'ajja canaje ojaya esohuijo

(Mateo 26.59-66; Macoso 14.55-64; Noca 22.66-71)

¹⁹ Majoya Anasiya Jesosa huohui'ajja canaje ojaya esohuijo, o shajja'ajjajji cuana pea'aijo.

²⁰ Jesosaa saja'a canaje: —Eyaya esohui huohuinaje ojjaña cuana huasijje. Esohui huohuinaje Eyacuiñajji equijo, equi ojee ejjachichaquijji pea'ai ojjaña Jodio cuanaja eshajja'ajjajji. Quehuajje esohui huohui jji-ma.

²¹ Jamajjeya ¿apiojji acuae jja oe miyaya eya huohui'ajjaña ecuea ehuhui cuanajo so'o? Ojjaña eya shajja'ajja canaje. ¡Jamajjeya oya cuana huohui'ajja socue! —Jesosa poanaje.

²² Jesosa shajja'ajja majje sohuinanohua oya shemo cuiasejjajea canaje emeya. Huohui canaje: —¡A'a jama-ya mimijji Eyacuiñajji nijje emimijji etii nijje! —tecuea canaje.

²³ —¿A'a jjaya eya esohui quea tai aña? ¡Eyaya esohui quea tai añajoya jja ca iña oe huohucue! Ecuea sijje ajjima cuana. Jamajjeya ¿apiojji acuae iña emeya cuiaña? —Jesosa poanaje.

²⁴ Majoya Anasiya Jesosa huoojaja canaje Caipaja equi yasijje. Eme jeyo tii, pichojea jji-ma. Ma Caipa ca ca oe Eyacuiñajji nijje emimijji etii ma shequiajajo poa.

Peno sijje po o'oyanaje

(Mateo 26.71-75; Macoso 14.69-72; Noca 22.58-62)

²⁵ Peno aje oe cuaqui pejejo tii nequinaje ejjajoquijji. Jamajjeya pea cuaa oya huohui canaje: —E'e, miya e'e jojo nei Jesosa shajja'ajjajji poani pea'ai —poanaje.

—Chojja. Eya ojaya epeeji pojjeama —Peno sijje poanaje.

²⁶ Jamajjeya Peno nijje nequinaje Eyacuiñajji nijje emimijji echacojji Manicoja huapa pojjeama, ma Penohua shajja jajasejjajea canaje huapa pojjeama. Ohuaya Peno jama acanaje ba'a: —Eyaya miya banaje Jesosa nijje Onimo yijejo, de —poanaje.

²⁷ —Chojja, de, Jesosa ecuea ba jji-ma —nisho po o'oyanaje quea mete jjejojo. Peno mimianijo tii cachina yahue taaanaje. E'e, ma ecua Jesosaa oya huohui canaje jamaya Penohua acanaje.

Shomano emeshi mese Pinato bajjani yasijje Jesosa dojo canaje cuaa

(Mateo 27.1-2, 11-14; Macoso 15.1-5; Noca 23.1-5)

²⁸ Majoya mecajjeahua nei onaaya Caipaja equijo nequi Jesosa huoojaja canaje Shomano emeshi mese Pinato bajjani yasijje. Jomajo Pinatohua ojjaña huoojaja cana equi yasijje Jesosa dojobiaqui canaje sohuinano cuaa. Pinato ca ca Jodio pojjeama, Shomano dejja. Jamajjeya Jodio etii cuana ojaya equi yasijje dobiqii sa po ajja. E'e, Jodioja etiiquianaja etehue'yo jama poani

ba'a: "Jodio pojjeamaja equi yasijje dobiQUIIAJO, esohui-
dojjiya Jodioja bacua cuana cuia ajja shejo ojee ijia
meemee ajja pea Jodio cuana nijje Eyacuiñajji bihui-
ajji".²⁹ Jamajjeya Pinato Jesosa ba majje esecue yasijje
cuayaquinaje Jodio etii nijje mimiya. Cuayaqui majje
huohui'ajja canaje Pinatohua: —¿Ajeo shai miqiana-
ya jiquio dejja tecueaña so'o? ¿Yajja acuae oya poana-
je? ¡Huohucue mo!

³⁰ —Oya aje oe quea tai pojjeama jojjemo ye jjima
pome mi que —Jodio etii cuana Jesosajo siajje poanaje.

³¹ —¡Miquianaaya jja oe oya dojo'yocue! ¡Miquea etii-
quianaja etehue'yo jayojja jama oya acue! —Pinato
poanaje.

—Chojja Pinato, Shomano emeshi mese neiya Sesaa
ecuaa dejja mimishi caca mee'yo jjima acani acui
ecueata'apeejo. ¡Miquea esohuijo oe mano mee'yo-
cue! —poanaje Jodio etii cuana.

³² E'e, jamaya Jodio etii cuaa acanaje ma ecua Jeso-
saa huohui canaje jayojjaya yajji. E'e, yahuaajo Jesosa
jama poanaje ba'a: "Quijje eya ba'ehuanasohuajea ca-
je'yo cuaa acui ecueata'apeejo" poanaje.

³³ Majoya Pinato equi yasijje dobiQUII o'oyanaje Jeso-
sa nijje mimiya. Sohuinano huohui canaje: —¡Jesosa e
que jjequicue!

Sohuinano cuaa Jesosa jjequi cajo, Pinatohua
huohui'ajja canaje: —Jesosa, ¿a'a miya e'e jojo nei Jo-
dioja Emeshi Mese? ¡Huohucue mo oe! —poanaje.

³⁴ —Pinato, ¿a'a miya jamatii jashahuabaquiani eya
Emeshi Mese poani? ¿A'a pea cuaa miya ejo jamaya
huohui canaje pojja'a? —Jesosa poanaje.

³⁵ —Eya ca ca iña Jodio pojjeama. Jamajjeya miya
ecuea eba pojjeama, de. Miya Jodio. Jodio etii cuaa, Jo-
dio Eyacuiñajji nijje emimijji etii cuaaya miya iña majje
jjequi canaje e que. Jamajjeya ¡huohucue mo! ¿Ae poa-
naje miya? ¿Yajjaje acuae minijje quea quene nee nee
poani cuana? —Pinatohua huohui'ajja canaje.

³⁶ Jesosaa oya saja'a canaje jama ba'a: —E'e, eya
Emeshi Mese. Jamatii pea emeshi mese jama pojjeama
eya. Jiquio meshi cuanajo dejja cuana huoojea'yojji
pojjeama. Eya jiquiojo emeshi mese poani jojjemo
ecuea echacojjiya Jodio etii nijje jjaquecuaquime, Jodio
etii cuaa e iña mee cajo —Jesosa poanaje.

³⁷ —Jamajjeya miya emeshi mese poani, Jesosa. ¿A'a
e'e? —Pinato poanaje.

—E'e, eya Emeshi Mese poani, miyaya eya e'e jojo
nei aña —Jesosa poanaje—. Eya eyajo ani meshi yasijje
poeyanaje. Cuayanaje ojjaña cuana Eyacuiñajjija
esohui e'e nei ba meeya. Ojjaña joya esohui e'e nei ja-
yoyja jama a sa poaniya ecuea esohui shajja'ajja cani
—Jesosa poanaje.

³⁸ —¡Dee! Esohui e'e nei chama' pojja'a —Pinato poa-
naje. Majoya oya esecue yasijje cuayaqui o'oyanaje Jo-
dio etii cuana nijje mimi o'oyaa. Jama poanaje ba'a:
—Eyaya Jesosaja esohui shajja'ajjanaje. Oya ca ca quea
tai pojjeama, mimishi'ama, de —Pinato poanaje—.

³⁹ Jamajjeya jjeya miqianaya ojee ijia'ijjiaje esohuido-
jojjiya yahuaajo nei etiiquianaja ebacua cuana cuia'yo
jjima aca'ya poa shejo. Ojjaña shequiaja jiquio shejo

eyaya oe Jodio dejja ejeanobiajaa huoojeacuayajea'ya-
ña miqianaya quea bihui nee epojji. Jamajjeya ¿e'e
pojja'a eyaya Jodio cuanaja Emeshi Mese Jesosa bajjani
pichojea'yajo, Jodio cuana quea bihui nee nee poaje?
—Pinato poanaje.

⁴⁰ Jodio etii cuaa Pinato saja'a canaje quea tecueya:
—¡Chojja! ¡A'a jja oe Jesosa pichojea'yojji! ¡Mashama'
jja oe pichojea'yocue! —janobajjima nei taaanaje Jodio
etii cuana. Mashama' aje oe siipojji quea mas e poan
aje.

Jesosa mano'yo sa poanaje acui ecueata'apeejo

(Mateo 27.15-31; Macoso 15.6-20; Noca 23.13-25)

19 Jamajjeya Pinatohua sohuinano cuana huoojea
canaje Jesosa cuiasejjajee, jjonohua.² Majoya
Jesosa cuiasejjajee majje sohuinano cuaa sapahuahuo
nisho acuisa sipi majje oja sapajo iñape'ejea canaje.
E'e, Jesosa emeshi mese nisho poso acanijo ojo soa
neineinaje. Oja daqui huijiajaja mee majje daqui huo'o
quea ao, emeshi meseja daqui jayojja huosho mee ca-
naje.³ Majoya aje oe oya bihuia nisho canaje: —Miya
Jodio cuanaja emeshi mese quea pame nee —nisho
amajje oya shemo cuiasejjajee canaje emeya. Jamaya
ahuicha'a huicha'a canaje sohuinano cuaa.

⁴ Majoya Pinatohua Jesosa pichojea sa acanaje; ese-
cucue yasijje cuayaqui o'oyanaje Jodio etii cuana nijje mi-
miya. Jama poanaje ba'a: —¡Bacue! Jesosa nijje mimi
majje eyaya baña oya mimishi'ama nei nei. Eyaya oya
ejeanobia meejji pojjeama. Jamajjeya jjeya eyaya mi-
quianaya ba meeaña oya Jesosa mimishi'ama nei nei
—Pinato poanaje.

Jamajjeya Jesosa esecue yasijje cuayanaje.⁵ Ojjaña
oya ba canaje sapahuahuo nisho acuisa e'iñape'ejea,
daqui huo'o quea ao ehuosho ba'e pea'ai.

—Jiquio aje ca Jesosa ba'a. ¿Apiojji onijje quea quene
nee nee poani? —Pinato poanaje.

⁶ Jamatii Jesosa ba majje Jodio sohuinano cuana, joya
Eyacuiñajji nijje mimiani cuana pea'ai taaanaje jama
ba'a: —¡Oya acui ecueata'apeejo ba'ehuanasohuajea-
cucue! E'e, ¡acui ecueata'apeejo ba'ehuanasohuajea-
cucue ca coma! —ojjaña janobajjima nei taaanaje.

—¡Miquiaaya jja oe oya dojo'yo majje acui ecueata'a-
peejo ba'ehuanasohuajea-cucue! Eyaya ca ca oya baña
mimishi'ama nei nei —Pinato poanaje.

⁷ Jodio etii cuaa Pinato saja'a canaje jama ba'a: —Je-
sosa jama poanaje ba'a: "Eya Eyacuiñajjija Bacua Ejja".
¡Jamajjeya oya cacuiajea'yahua! Jamaya ecuanaja etii-
quianaja etehue'yo poani —jamaya poanaje jiquio Jo-
dio etii cuaa; Jesosa Eyacuiñajjija Bacua Ejja pojjeama
poso acanaje.

⁸ Jamajjeya "Jesosa Eyacuiñajjija Bacua Ejja" Jodio etii
cuaa acajo, shajja'ajja majje Pinato quea mete nee nee
poanaje.⁹ Equi yasijje dobiQUII o'oya majje Jesosa
huohui'ajja ca o'oyanaje Pinatohua jama ba'a: —Jeso-
sa, ¿achejo ani acuae miya poeyanaje so'o? —poanaje.

Jamatii oya Jesosaa saja'a jjima acanaje. Mimi jjima.
¹⁰ Jesosaja oya saja'a jjimajojo Shomano emeshi mese
Pinatohua oya huohui canaje: —¡Dee! Miya enijje mimi

ajja. ¡Bacue! Ecuea esohuijo pea cuaa miya pichojea caje pojja'a; ecuea esohuijo pea cuaa miya acui ecueata'apeejo me cacajea caje pojja'a. ¿A'a miquea ba jjima eya Jodio huoojea'yojji poani jiquiojo? —Pinato poanaje.

¹¹ Majoya Jesosa onijje miminaje jama ba'a: —Eyacuiñajjiya miya ejo huohui mee cani. Miyaya miyaye nei jamatii ejo huohui mee ajja. Jamajjeya joya e iña meejji epo cuana quea quea mimishi nee nee poani. Miya o jayojja quea mimishi nee nee pojjeama —Jesosa poanaje.

¹² Jamajjeya Pinatohua Jesosa pichojea sa neinei acanaje. Jamatii jiquio Jodio etii cuana taaa majamajanaje. Janobajjima nei poanaje: —¡A'a oya pichojea'yojji! Oya miya pichojea'yojo aje oe miya Shomano huoojea'yojji nei Sesa bajjanija epeeji pojjeama poaje, de. Ojjaña joya emeshi mese nei po sa poani ca ca Sesa jeacuaya-jeajji epo, de —poanaje.

¹³ Majoya Jodio cuanaja esohui shajja'ajja majje Jesosa Pinatohua dojo capoquinaje ma ohua ona huoojea cani yasijje. Jomajo anioquenaje yohua bajjanijo ba'a: Mei E'iya nequijo, Jodioja esohuijo ca ca Jabata bajjanijo. ¹⁴ Jomajo ojjaña Jodio cuana cojja nei anioque majje Jodio etii cuaa huohui canaje: —¡Bacue oe Jesosa, mi-quianajaya Emeshi Mese! —Pinato poanaje.

Ojjaña jiquio Jodio etii cuana taaa neineinaje. ¹⁵ Jama poanaje ba'a: —Chojja, de. ¡Oya quecua'yocue! ¡Acui ecueata'apeejo ba'ehuanasohuajecue!

—¿A'a eya mi-quianajaya Emeshi Mese nei me caca meeña acui ecueata'apeejo emano'yojji? —Pinatohua acanaje.

—Ecuanaja emeshi mese yani, oya Shomano emeshi mese Sesa bajjani. Pea chama' —taaame acanaje Eyacuiñajji nijje emimijji etii cuaa.

¹⁶ Jamajjeya aje oe Jodio cuaa a sa acani jayojja jama Pinatohua amee canaje. Jesosa dojo mee canaje me caca meeya acui ecueata'apeejo eba'ehuanasohuajejaji. Jamaya poanaje epojja ejomishocajji eshequi biacojjajja nequijo, Jodio cuaa bobi chicha cani pojajjo, yahuajo nei esohuidojojjiya Jodio etiiquianaja bacua cuana cuia'yo jjima aca poa shejo. E'e, Jodio cuaa Jesosa manocuaij mee'yo sa acanaje emojea'yojji ojee ij-ji'ijjia jjimahuajo.

Jesosa acui ecueata'apeejo ba'ehuanasohuajea canaje cuaa

(Mateo 27.32-44; Macoso 15.21-32; Noca 23.26-43)

¹⁷ Jamajjeya Pinatohua Jesosa Jodio etii cuana huasijje quia ca'yonaje. Sohuinanohua Jesosa iña majje acui ecueata'apee quea biquie nee bao mee majje dojo mee canaje. Dojo mee canaje eyiyo sisi yasijje, Sapa Jjii anijji bajjani meshi yasijje, Jodioja esohuijo ca ca Jonijota eyiyo huasijje. ¹⁸ Sapa Jjii bajjani eyiyo huasijje jaasohuaqui majje majo tii acui ecueata'apeejo Jesosa me cacajea canaje sohuianano cuaa. Me caca majje ba'ehuanasohuajea canaje. Beca dejja mimishi pea acui ecueata'apee cuanajo me jeyo canaje pea'ai. Ba'ehuanasohuajea canaje Jesosa pejejo, oe shanijje,

pea ebianeijje. Jesosa ca ca eyiyesamaneijje ba'ehuanasohuajea canaje.

¹⁹ Pinatohua acuijo esohui tehue mee canaje Jesosajo. Etehue'yo acui ecueata'apeejo Jesosa ba'e sapa biacua caca mee canaje. Etehue'yo jama ba'a: *OYA JESOSA NASANENAJO BA'E JODIOJA EMESHI MESE NEI*

²⁰ Jonijota ma Sapa Jjii eyiyo bajjani Jenosanena pejjejo nequi. Huesha'ama. Jamajjeya Jodio cuaa quea huishohua Pinatoja etehue'yo ba canaje. Ma etehue'yo Jodioja esohuijo tehue mee canaje, Shomano dejjaja esohuijo pea'ai, Jienoja esohuijo pea'ai tehue mee canaje, Pinatohua. ²¹ Jamajjeya Jodioja Eyacuiñajji nijje emimijji etii cuana Pinatoja etehue'yo Jesosajo ba majje Pinato que poqui o'oyanaje. Huohui cañaquinaje jama ba'a: —¿Apiojji acuae miyaya tehue meenaje Jesosajo maya? Chojja, a'a jama tehuejji ba'a: “Jesosa Jodio cuanaja Emeshi Mese nei”. Jama tehueme acue ba'a: “Oya aje ca jja oe jama pojea'ajja nequinaje ba'a: —Eya Jodio cuanaja Emeshi Mese —poso poanaje”. Oya Jesosa ecuanaja Emeshi Mese nei pojjeama, de —Jodio etii cuana poanaje.

²² —Chojja. Jamatii. Apoa ecuea etehue mee'yo —Pinatohua oya cuana acanaje.

²³ Majoya Jesosa ba'ehuanasohuajeyo'yo majje ebeca pee pea'ai sohuinano cuaa oja daqui cuana chicha ca'yonaje. Iyachicha'yo majje peaa jjeshe'yo, peaa jjeshe'yo acanaje cuaa. ²⁴ Majoya oja daqui nei esipi bame iña canaje. Esipi aajo, esoco pojjeamajo jama poanaje ba'a: —¡A'a isajeajji! —poanaje.

Jamajjeya sohuinano cuaa quebanei po majje daqui nei majjo ca'yonaje ojaya pojji epo'yojji. E'e, joya ecua Eyacuiñajji esohui huohuijjiya yahuajo nei nei tehue ca poa jayojja jama acanaje sohuinano cuaa. Ma etehue'yo jama poa ba'a:

“Ecuea daqui iña caje. Ojjaña jjeshe caje pea jayojja. Ecuea daqui ao iña majje, quebanei po majje daqui majjo caje'yo ojaya epo'yojji”.

Yahuajo nei nei tehue ca poa. Jamaya Jesosaja daqui acanaje, sohuinano cuaa.

²⁵ Jesosa acui ecueata'apeejo ba'e pejejo nequinaje ojaya enaese Mania oja shehue nijje, Queopaja ehuanase Mania bajjani nijje, pea Mania Madanena cuiñajji-jo ba'e nijje pea'ai. ²⁶ Jamajjeya Jesosaa enaese ba canaje enijje nequi. Eya aje oe Huani bajjani, Jesosaja quea jea nee nee. Jamajjeya Jesosa ojaya enaese nijje jama poanaje ba'a: —Ecue nae, Huani miquea ebacua ejja jayojja poaje'yo, mi jaahuanajji.

²⁷ Majoya eya acanaje: —Huani, ecue nae miquea enaese poaje. ¡Oya jaahuanacue! —Jesosaa acanaje.

Jamajjeya eyaya Jesosaja enaese Mania ecuea equi yasijje dojo'yonaje enijje eba'e'yojji.

Jesosa mano'yonaje

(Mateo 27.45-56; Macoso 15.33-42; Noca 23.44-49)

²⁸ Jesosaja eba poanaje ojaya ojjaña oja Chiija esohui jayojja ajeyo canaje. Apoa poanaje. Jamajjeya Eyacuiñajji esohui yahuajo nei nei jayojja jama poanajo Je-

sosa taaanaje jama ba'a: —Eya quea naba taja nee nee.

²⁹ Jomajo oe meshimisijo nequinaje acuijjajja na sese. Jamajjeya shajashaja iyanobia canaje ena eijequi yasijje. Majoya bequiobo sajo quecuahuosho majje Jesosaja enaba huasijje huo canaje ojaya e'ishijji. ³⁰ Jjequibibi majje ishi canaje, Jesosaa. Ishi majje jama poanaje ba'a: —Apoa. Ojjaña Eyacuiñajjija ehuohui'yo jayojja jama eyaya ajeyo'yonaje —poanaje. Jama mimime po majje Jesosa mano'yonaje, poquijeyo'yonaje.

Jesosa mape quecua canaje sohuinano cuaa

³¹ Majoya Jodio etii cuana Pinato que poqui o'oyanaje. Ba majje jama poanaje ba'a: —Emeshi mese Pinato, ¡dejja cuana eba'ehuanasohua ba'eja equise sa' cuasajajea meecue! Jamajjeya mano cuajije. Mano'yajo ijjequioquea meecue meshi yasijje emojeajji! —Jodio etii cuana poanaje.

Jamaya jjashahuabaquime poanaje ba'a: —Mecahuajje epojja ejomishocajji, ojee e'ijjia'ijjijai quea bihui nee pea'ai. Jamajjeya jaya cuana jjeya nei camano mee cahua! ¡A'a mecahuajje ba'e meeji acui ecueata'apeejo! —jjashahuabaquinaje Jodio etii cuana.

³² Jamajjeya Pinatohua sohuinano cuana huoojea canaje. Poe majje sohuinano cuaa dejja mimishi cuana quise sa' cuasajajea canaje, ma Jesosa pejeje acui ecueata'apee cuanajo ba'e. ³³ Majoya Jesosa ba canaje emano'yo. Jamajjeya oya quise sa' cuasajajea jjima acanaje. ³⁴ Jamatii oe sohuinanohua Jesosa emapejje quecua canaje emeje aohua. Quecua cajje ena huo'o, ena oshe tejee pea'ai cuayaquinaje. ³⁵ Eyaya, Huani bajjaniya, banaje ecuea ecojjaa. Jamaya poanaje ba'a: Sohuinano cuaa Jesosa ba'ehuanasohuajea majje oya emano'yo ba'e quecua canaje pea'ai. Oya quise sa' cuasajaja jjima acanaje. Jjeya eyaya jamaya tehueña. Jamajjeya ojjaña cuana ba meeje ecuea ehuohui Jesosajo e'e jojo nei. Eya siajjepojji pojjeama. ³⁶ E'e, Eyacuiñajjija esohui etehue'yo yahuajo nei Jesosajo jama poanaje ba'a: “Ojaya esa' cuana pea cuanaja ecuiasajaj'yojji pojjeama”. Ma ecua Eyacuiñajjija esohui tehue mee ca'ya poa jamaya Jesosa acanaje cuaa.

³⁷ Pea Jodio etiiquianaja etehue'yo yahuajo nei jama poa ba'a: “Oya quecua cajo, ojjaña cuaa oya ba caje'yo ecojjaa”. Jamaya tehue ca'ya poa yahuajo nei nei Jesosajo.

Jesosa mei jjani ai yasijje huananobia canaje

(Mateo 27.57-61; Macoso 15.42-47; Noca 23.50-56)

³⁸ Majoya Jesosa mano'yo majje ojaya epeeji Jose bajjani poeyanaje, pea Jose, Amatea meshijo ba'e. Oya Jodio cuanajo quea meteje quehuajje jjapeequi'yonaje Jesosa nijje yahuajo. Poe majje Jose Pinato huasijje poquinaje. Pinato ba majje huohui'ajja canaje Joseya: —Emeshi mese Pinato, Jesosa mano'yonaje. ¡Eyaya oya jjani yasijje cadojo'yahua ehuananobia'yojji! —poanaje.

—E'e, ¡dojocue! Eyaya sohuinano cuana jamaya huohuime aje —huoojea canaje Pinatohua.

Jamajoya Jesosaja epeeji cuaa oya emano'yo acui ecueata'apeejo ba'e jjequioquea'yo majje dojo canaje jjani yasijje huananobiaa. ³⁹ Nicodemo, ma yahuajo Jesosa nijje miminaje mecajje, Jose nijje poquinaje Jesosadojohua. Nicodemohua shiyeshiye pohuipohui, acui shiye saja pohui quea shiye quea nahue pea'ai dojo canaje Jesosa shicuijji. Quea huiso nee nee dojo canaje 50 quinome. ⁴⁰ Jamajjeya Jesosa dojo majje shiyeshiye pohuipohuiya shicui canaje. Majoya daqui oshe eyacua neijo bebo canaje. E'e, jamaya Jodio cuaa acani emano'yo cuana ehuananobiajji mei jjani yasijje. ⁴¹ Jamajjeya Jesosa eyiyo Sapa Jjii bajjanijo acui ecueata'apeejo eba'ehuanasohua ba'e jjequioquea'yo majje shiyeshiye shicui canaje. Shicui majje dojo canaje que quea chipi nee yasijje, mei jjani jjeya nei teo huasijje. ⁴² Ma mei jjani quea chipi nee poanajo, ojaya epeeji cuaa Jesosa jomajo huananobia ca'yonaje sinecua nei. Jodio cuanaja epojja ejomishocajji poanajo Jesosa huananobia cuaji canaje. Mei copo quea quemohua esecue jjani jaja ca'ajeana'yo majje p oqui'y onaje.

Jesosa shequi o'oyanaje

(Mateo 28.1-10; Macoso 16.1-8; Noca 24.1-12)

20 Majoya mecajjeahua nei nei jjaja'a'ajjaqui jji-mahuajo ebionei jjapojjaquajajo, nomico pojajajo Mania, pea Mania Madanenajo ba'e poquinaje mei jjani yasijje. Ba cañaquinaje mei copo quea quemo jjani capajji'ya ejeacajjajajea. ² Ba majje Mania cuajicuaajipoquinaje Simohui Peno huohuiya, e huohuiya pea'ai. E'e, eya Jesosaja epeeji, ojaya quea jea nee nee. Jamajjeya poe majje Maniaa huohui cañaquinaje jama ba'a: —Jesosa dojo canaje cuaa. Jesosa aje oe mei jjanijo chama' nei nei. ¿Achacua shai dojo canaje cuaa? Ecuea ba jjima —poanaje Mania, jjashahuabaqui jjima.

³ Jamajjeya Peno enijje poquicuaajinaje mei jjani yasijje. ⁴ Ecua ojee cuajicuaajinaje. Eyaya cuajicuaajineinei majje ebionei mei jjani bañaquinaje. Peno ca ca quijje pishana poeyanaje. ⁵ Poe majje, eya jjacueanohuequi majje ye'e'ajjanaje. Daqui oshe banaje e'iyacoca'yo ani. ⁶ Majoya Simohui Peno e quiquishijji poeyanaje. Oya mei jjani ai yasijje dobiquinaje. Daqui oshe ba canaje meijo e'iyacoca'yo ani. ⁷ Pea daqui oshe Jesosa sapa bebajji'ya o sapa jaanajejo tii e'iyacoca'yo ani ba canaje pea'ai. ⁸ E'e, eya ebionei mei jjani yasijje poeyanaje. Jamatii Peno dobiqiyajo, eya dobiquinaje pea'ai. Banaje e'e jojo nei Jesosa chama'. Daqui e'iyacoca'yo ani ba majje eya jjashahuabaquinaje jama ba'a: —¡E'e de! E'e jojo nei Jesosa emano'yo tii jaa shequi'yonaje. Ma ecua yahuajo ohuaya huohui canaje jamaya oya po'yonaje.

⁹ Eyacuiñajjija esohui etehue'yo Jesosajo jama poa ba'a: “Quito mano'yo majje shequije'yo”. Jamatii yahuajo ma etehue'yo ecuanaja quea quehua poanaje.

¹⁰ Majoya jjani aijo Jesosa chama' ba majje eya Peno nijje equi yasijje poqui o'oyanaje.

Mania Madanena Jesosa ba ca o'oyanaje

(Mateo 28.9-10; Macoso 16.9-11)

¹¹ E'e, eya, Huani, Peno nijje equi yasijje poqui o'oyanaje. Jamatii Mania equi yasijje poqui'yo jjima. Mei jjan pejeje pa aninaje. Oya pea'ai jjacueanohuequinaje eye'e'ajjajji. ¹² Ba canaje beca esohuidojojji. Ojaya daqui quea oshe nee nee, bo oshe nee nee jayojja poanaje. Shequi o'oya jjimahuajo Jesosa mei jjani dojjojo jaanaje pea mei biajje. Jjeya ca ca beca esohuidojojji cuana anioquenaje Jesosa jaanaje mei biajje. Jesosa sapa jaanajejo oe esohuidojojji aninaje. O jiojji jaanajejo pea aninaje. ¹³ Esohuidojojji cuaa Mania jama acanaje ba'a: —Epona, ¿yajjajje acuae mi pani so'o?

—Ecuea Emeshi Mese Jesosa dojocuayaqui canaje cuaa. ¿Achacua shai dojo canaje? Ecuea ba jjima —Mania poanaje.

¹⁴ Jamaya mimi majje Maniaa Jesosa bajea canaje. Jamatii oya Jesosa eque mese poso acanaje, Jesosa pojjeama poso acanaje.

¹⁵ Jamajjeya Jesosaa oya jama acanaje ba'a: —Epona, ¿apiojji acuae mi pani? ¿A'ya cuae miyaya sa'ajjaña so'o? —Jesosa poanaje.

—¿A'a miya eque mese? ¿A'a miyaya oya dojonaje pojja'a? ¿Che mo oe huohuicue achacua oya dojonaje! Eyaya oya dojje'yo shiyeshiye shicuiya —Mania poanaje.

¹⁶ —¡Mania! —Jesosa poanaje.

Jesosa mimije shajja'ajja majje Maniaa oya ba canaje Jesosa. Jamajjeya Maniaa oya jama acanaje ba'a: —¡Ecuea esohui huohuijji miya! —poanaje Mania, Jodioja esohuijo—. ¡Raboni! —poanaje.

¹⁷ —Mania, ¡a'a eya iña neineiiji! ¡Eya capoquiahua ecue Chii ani yasijje! ¡Jjeya poquicue; ecuea epeeji cuana huohuicue miyaya! Jama oe acue ba'a: "Jesosa jama poanaje ba'a: —Jjeya eya poquije'yo ecue Chii eyajo ani yasijje, mique Chii eyajo ani yasijje pea'ai. E'e, eya poquije'yo Eyacuiñajji ani yasijje. Oya Eyacuiñajji miqianajaya Chii pea'ai" jamaya aquicue ecuea epeeji cuana —Jesosa poanaje.

¹⁸ Majoya Mania Madanena poquinaje Jesusaja epeeji cuana ani yasijje. Ecuana nijje jama poanaje ba'a: —¡Shajja'ajjacue oe! Eyaya Jesosa ba'yonaje; e'e jojo nei eshe ca coma.

Jamaya huohui majje Mania Madanena ma Jesusaa huohui canajeya ecua huohui canaje.

Jesosa ojaya epeeji cuana huasijje poe'yonaje

(Mateo 28.16-20; Macoso 16.14-18; Noca 24.36-49)

¹⁹ Quijje nomico pojjajo sinecuajo ecua Jesosaja epeeji ojee aninaje equijo. Jodio yajjajo esecue eca'a nequinaje. Jamatii Jesosa equijo ecua nijje jjaja'aqui'yonaje. Ecuana nijje miminaje jama ba'a: —¡Quea bei nee pocue miqianaya! —poanaje.

²⁰ Majoya Jesusaa ecua ba mee canaje onaja quecuahuejjaje oja eme jjoto, ojaya emape onaja quecuapea'ai ba mee canaje. Jesosa ba majje ecua quea bihui nee nee poanaje. ²¹ Jesusaa ecua huohui ca

o'oyanaje jama ba'a: —¡Quea bei nee nee pocue! Yahuaajo ecue Chiiya eya huoojea canaje ojaya echacojji. Jamaya jjeya eyaya miqianaya huoojeaña ecuea esohui huohuiya —Jesosa poanaje.

²² Majoya Jesusaa ecua huasijje sipojea majje huohui canaje jama ba'a: —¡Edojjoshahua Pame miqiana huasijje cadobiquiahua! ²³ E'e, ¡miqianaya ecuea esohui huohuijji pocue! Jamajjeya ojjaña joya oja mimishi pajea sa poani miqianaaya huohuicue ejo jama ba'a: "E'e, Eyacuiñajjiya miquea mimishi cuijea ca'yonaje". Mimishi pajea sa po ajjajo ca ca huohuicue jama ba'a: "Eyacuiñajjiya miquea mimishi cuijea'yojji pojjeama" —Jesosa poanaje.

Jesosa Tomasi nijje miminaje

²⁴ Jesosa ecua nijje, o shajja'ajjajji cuana nijje jjaaja'acui'yonajejo, Tomasi, Beca Jaa bajjani chama' poanaje. ²⁵ Jamajjeya ecuaaya Tomasi huohui majamajana jama ba'a: —E'e jojo nei ecuaaya Jesosa ba'yonaje. ¡Eshe ca coma! —ecuaana anaje.

Jamatii Tomasiya saja'a canaje jama ba'a: —E'e pojja'a. Chojja, de. Equecuahuejja ojaya eme jjoto huejja cuana ba majje, napa'ajja majje, ojaya emapejje esi' napa'ajja majje pea'ai ecuea eba poaje Jesosa e'e jojo nei eshe —poanaje Tomasi; Jesosa shequi'yo ajja poso acanaje.

²⁶ Quijje me oejje pea beca cahuime, 7 po majje ecua ma equijo ojee ani o'oyanaje Tomasi nijje pea'ai. Esecue eca'a nequinaje pea'ai. Jamatii Jesosa ecua nijje jjaja'acui o'oyanaje. Ecuana nijje mimi o'oyanaje jama ba'a: —¡Quea bei nee nee pocue! —poanaje.

²⁷ Majoya ohuaya Tomasi huohui canaje: —Tomasi, ¡ecuea eme bacue! ¡Eme jjoto equecuahuejja napa'ajjacue eme sisiya! ¡Emapejje esi' pea'ai napa'ajjacue! ¡Bacue eya eshequi'yo e'e jojo nei! ¡A'a eya edojjoshahua poso ajji! —Jesosa poanaje.

²⁸ —Jesosa, miya ecuea Emeshi Mese nei, Eyacuiñajji —Tomasiya oya bihuia canaje.

²⁹ —Tomasi, miya e ba majje jjabahuejjaquinaje eya e'e jojo nei eshequi'yo. Pea cuanaja ba jjima ecuea eme jjoto huejja, emape si' pea'ai. Jamatii oya cuana jjabahuejjaquije ejo, eya eshequi'yo. Jamajjeya jaya cuana e'e jojo nei quea bihui nee capoahua! —Jesosa poanaje.

¡Huanija etehue'yojo jjabahuejjaquicue!

³⁰ Jesusaa quea huiso pea ma dejjaa ajjima acani acanaje. Maya ecuaana, o shajja'ajjajji cuaa banaje. Jamatii eyaya, Huani bajjaniya maya tehue jjima jiquio etehue'yojo. ³¹ Jiquio ecuea etehue'yo eyaya tehuenaje miqiana jjabahuejjaquijji. Jamajjeya jiquio etehue'yo ba majje miqianaya jjabahuejjaquije Jesosa e'e jojo nei Eyacuiñajjiya huoojea'yo ojjaña jaahuanajji. Oya Eyacuiñajjiya Bacua Eja nei. E'e, miqianaya majoya e'e jojo nei jjabahuejjaquijajo, Jesusaa miqianaya ba'e tiiti mee caje'yo onijje e eyajo.

Jesosa ba ca o'oyanaje ojaya epeeji cuaa me oeije beca huisomeya

21 Quijje ecuana Janinea bae yasijje poqui o'oyanaje. Jomajo Jesosa ecuana nijje, ojaya epeeji cuana nijje jjaja'aqui o'oyanaje. Jama poanaje ba'a: ² Simohui Peno, Tomasi Beca Jaa bajjani nijje, Natanaeni ma Canajo, Janinea meshijo ba'e nijje, ecuanaya Semeneoja bacua ejja eya, ecue o'i Jacobo nijje, pea beca dejja nijje pea'ai bae sahuajo aninaje. Mahuisoya ecuana ojee aninaje. ³ Peno ecuana nijje jama poanaje ba'a: —Eya ca iña poquije'yo nahuoo cuiashajaa.

—E'e, ecuana minijje poquije'yo —saja'ame anaje ecuaa.

Jamajjeya ecuana poqui'yonaje bae sahuajje. Bishe ai yasijje aninaje. Mecajje ecuaana nahuoo cuiashaja'ajja nequinaje tii tii. Jamatii mecajjeahua jjaja'aqui jji-mahuajo nahuoo cuiashaja jjima; chama' poanaje.

⁴ Mecajjeahua nei Jesosa bae sahuajo nequinaje. Jamatii ecuanaja bishejo nequija oya ba jjima poanaje Jesosa. ⁵ Jesosa ecuana huasijje taaanaje jama ba'a: —Epeeji cuana, ¿a'a nahuoo cuiashajanaje miquianaaya? —huohui'ajja acanaje.

—¡Chojja, chama'! —saja'ame ecuaa anaje.

⁶ —¡Eshajajji jeacue ena huasijje pea mijijje, bishe ebianeij mijijje! Jomajo ani nahuoo cuana —Jesosa poanaje.

Jamajjeya ecuaaya eshajajji ebianeij mijijje jea majje quea huiso nahuoo cuiashajanaje. Quea biquie nee neejo nahuoo cuana jjequisohua jjima anaje bishe yasijje. ⁷ Jamajjeya eya Peno nijje jama poanaje ba'a: —Peno, maya Jesosa nequi, e'e nei —eya poanaje.

E shajja'ajja majje Simohui Penohua oja daqui huosho ca'yonaje. (E'e, chacochoanijo oja daqui ao huijjijajea canaje.) Daqui ao huosho'yo majje tohuaanaje ena huasijje Jesosa que besapoquiya. ⁸ Eyaya ca ca pea cuana nijje bishe yonaje meshijaji sahua huasijje. Nahuoo dojobesanaje eshajajjijo, enajo ba'e. Meshijaji huesha'ama, iye huesha nei, beshahua nei quea huesha 100 metros huesha nei. ⁹ Ba'eñaqui majje ecuaana banaje Jesosaja nahuoo jiñaqui cuaquijo. Pahui yani equemijji pea'ai. ¹⁰ Majoya Jesosa ecuana nijje jama poanaje ba'a: —¡Nahuoo cuana miquianaja cuiashaja'yo jja oe jjequicue edahuajji!

¹¹ Jamajjeya Simohui Peno bishe yasijje ani o'oya majje nahuoo cuiashajajji meshijaji yasijje jjequisohua sahua canaje. Majoya pejo majje nahuoo banaje quea huiso nee nee, 153 huisome. Ojjaña quea quemo nee, de. Quea biquie nee. Jamatii eshajajji quecuasejjajea jjima poanaje.

¹² Majoya Jesosaa ecuana jama acanaje ba'a: —E'e, ¡poecue! ¡Nahuoo ijjiahuacue! —poanaje.

—¡Ocuae! ¡Ca'ijjiyahua! —ecuana poanaje. Ecuanaja eba oya Jesosa. Jamajjeya oya huohui'ajja jjima jama ba'a: —¿Ae bajjani acuae mi so'o? —ajjima ecuanajaya.

¹³ Majoya Jesosaa pahui cuaqui pejejo ani jjeshe majje ecuana quia ca'yonaje e'ijjiijaji, nahuoo pea'ai.

¹⁴ E'e, Jesosa mano'yo majje shequi o'oyanaje. Oya ecuana huasijje poe'yonaje. Jjeya pea beca peejjima jjaja'aqui'yome po'yonaje.

Jesosa miminaje Peno nijje

¹⁵ Majoya ecuana ijji'ijji majje Jesosa miminaje Peno nijje. Jama poanaje ba'a: —Peno, Huanija bacua ejja, ¿a'a miyaya eya quea jea nee nee aña? ¿A'a jiquio pea cuanaja eya quea jea pishana, miquea eya quea jea nee nee? —Jesosaa oya huohui'ajja canaje.

—E'e Emeshi Mese, eyaya miya quea jea nee nee aña. Jamaya miquea eba —Peno poanaje.

—Jamajjeya ¡ecuea epeeji enijje jjeya nei jjapeequiani huasijje ecuea esohui huohuicue! Oya cuana ñajjajjaja ebacua cuana jayojja jama; jamatii ani poqui-quehua chana'.

¹⁶ Majoya Jesosaa oya huohui'ajja ca o'oyanaje jama ba'a: —Simohui, Huanija bacua ejja, ¿a'a miyaya eya quea jea nee nee aña? —poanaje.

—E'e, Emeshi Mese, eyaya miya quea jea nee nee aña. Jamaya miquea eba —Peno po o'oyanaje.

—Jamajjeya ¡ecuea epeeji enijje jjeya nei jjapeequiani jaahuanacue! Oya cuana ñajjajjaja ebacua jayojja jama; ca'a'ama —Jesosa poanaje.

¹⁷ Jesosaa pea beca peejjima huohui'ajjame acanaje Peno jama ba'a: —Simohui, Huanija bacua ejja, ¿a'a miyaya eya quea jea nee nee aña? —po majamajanaje.

Peno quea yeno poanaje Jesosaja pea beca peejjima huohui'ajjame acajje. Jamajjeya Penohua Jesosa saja'a canaje jama ba'a: —Emeshi Mese, miquea eba ojjaña. Jamajjeya miquea eba eyaya miya quea jea nee nee aña —Peno poanaje.

—¡Ecuea epeeji jjeya nei enijje jjapeequiani jaahuanacue! —Jesosaa oya aca o'oyanaje—. ¹⁸ Peno, e'e jojo nei eyaya miya huohuiaña jama poaje ba'a: Miya esho'yahuajo miquea daqui huosho majje cua mi poqui sa poani yasijje miya poquinaje. Quijje ca ca miya tii'yajo, me jeyo majje dojo caje cuaa. Ojaya ejjashahua-baqui'yojji jayojja jama miya acaje'yo cuaa —jamaya Jesosa poanaje.

¹⁹ Ojaya ehuhuijo Peno ba mee canaje quijje nei oya manoje'yo eme jeyo. Cuanaya quijje nei Peno mano'yajo, ojjaña ba mee caje'yo Eyacuiñajji quea pame nee nee quea ca'a nee nee poani tii tii. Majoya Jesosaa Peno huohui canaje jama ba'a: —Peno, ¡enijje jjapee neineiquicue! —Jesosa poanaje.

²⁰ Majoya Penohua bajea canaje. Eya, Huani ba canaje o quiquishi poeyani. Yahuajo eya Jesosa pejejo ijji'ijjianaje, eya ojaya quea jea nee neejo. Ijji'ijjianijo eyaya Jesosa huohui'ajjanaje jama ba'a: "Jesosa, ¿a'ya cuae mi iña meesahuajji epojji?" eyaya anaje. ²¹ Penohua e ba majje Jesosa huohui'ajja canaje: —¿Jesosa, yajja acuae Huani acaje cuaa so'o? —poanaje Peno.

²² Jesosaa Peno saja'a canaje jama ba'a: —Peno, ¿apiojji shai miyaya Huanijo huohui'ajjaña so'o? E'e pojja'a eyaya Huani ecuea epoe o'oyajjijo ba'e mee sa aña. Jamatii. ¡Miya jja oe enijje jjapee neineiquicue! —Jesosa poanaje.

²³ Jesusaja esohui shajja'ajja majje ojjaña Jesusaja epeeji cuana huasijje huohuiqui canaje cuaa jama ba'a: —Huani ca pa jjaja ca oe mano'yo ajja poaje, de —poso acanaje cuaa.

Jamatii Jesusaja huohui jjima jama ba'a: “Huani emano'yojji pojjeama”. Chojja. Ohuaya jama huohui canaje ejo ba'a: “Peno, ¿apiojji acuae miyaya Huanijo huohui'ajjaña so'o? E'e pojja'a eyaya Huani ba'e mee sa aña ecuea epoe o'oyajjijo, jamatii. ¡A'a peajo jjas-hahuaba majaquijji! ¡Enijje oe jjapee neineiquicue, miya!” poanaje Jesusa Peno nijje.

²⁴ Eya aje oe Huani bajjani Jesusa shajja'ajjajji poani. Ojjaña ecuea etehue'yo Jesusajo e'e jojo nei. Eyaya aje jja oe banaje ojjaña Jesusaa acaninaje cuana. Jamajjeya miquianajaya eba ecuea esohui Jesusajo e'e jojo nei.

²⁵ Jesusaa pea ma dejjaa ajjima acani quea huiso nee nee acaninaje cuana. Ojjaña ohuaya acaninaje cuana etehue poquia jojjemo quea huiso nee nee pome. Chama' pome papeni etehue'yo huanajji ojjaña meshijo, ca ojjaña Jesusaja esohui etehue poquia jojjemo.

Mahuiso ecuea esohui etehue'yo. Eyaya Huani bajjaniya esohui tehuejyonaje. Apoa.

HECHO

¡Ishoacue Edojjoshahua Pameja epoejji! —Jesosa poanaje

1 Ecuea epeeji Teopino, eyaya, Noca bajjaniya jiquio esohui tehueaña miquea ebajji. Yahuajo eyaya miya huohuinaje Jesusajo ma ohua acanaje oja Chii-ja jjequisohua'yo jjimahuaa. Ojaya ehuhui cuanajo pea'ai eyaya tehuenaje. Maya eyaya mi que tehuenaje ecuea ebionei esohui etehue'yojo. ² E'e, eyahuasijje sohuaqui'yo jjimahuaa Jesusaa Edojjoshahua Pame nijeya o shajja'ajjajji cuana sohuihuohui canaje. Ma dejja cuana oja babaca'yo, oja huoojea'yo cuana ojaya esohui huohuijji epojji. ³ E'e, Jesosa yahuajo quea nee nee poanaje. Mano'yonaje. Mano'yo majje shequi o'oyanaje. Shequi o'oya majje oya poe o'oyanaje o shajja'ajjajji cuana huasijje. Quea huiso ma dejjaa ajjima acani acanaje Jesusaa quea ja'a nee nee, ojjaña ebajji oya e'e jojo nei eshe o'oya. Jesusaa oya cuana ba mee canaje Eyacuiñajji eyajo ojjaña huoojeajji poani. Shequi o'oya majje Jesosa oya cuana nijje nequi o'oyanaje quea huiso cahuime, 40 cahuime. ⁴ Ijja'ijjia aniya ohuaya oya cuana huohui canaje jama ba'a: —Jenosanena cuiñajji esecue yasijje a'a cuayaquijji! Eyacuiñajji-ya ojaya esohui jayojja jama acaje'yo; ojaya Edojjoshahua Pame huoojea caje miquiana que dobiquiya. ¡Ishoacue Edojjoshahua Pame! Yahuajo eyaya miquianaya jamaya huohuinaje —Jesosa poanaje—. ⁵ E'e, Huaniya yahuajo pishana quea huiso cuana enajo besa mee canaje Eyacuiñajji. Quijje pishana ca ca Edojjoshahua Pame miquiana que dobiquije'yo —Jesosa poanaje.

Jesosa Eyacuiñajjiya eyahuasijje jjequisohua ca'yonaje

⁶ E'e, o shajja'ajjajji cuaa onijje nequi o'oya majje Jesosa huohui'ajja canaje jama ba'a: —Emeshi Mese Jesosa, ¿a'a jjeyahua nei miya Isaeni cuanaja Emeshi Mese poaje'yo jiquio meshijo? —acanaje cuaa.

⁷ Jesusaa oya cuana saja'a canaje: —Cua'a, Eyacuiñajji eba ojaye nei, esejaya Chii eyajo anija ojaya eba. Ache shono, ache ba'ijo shai miquianajaya ba jjima. ⁸ Jamatii, Edojjoshahua Pame miquiana que dobiqui majje ohuaya miquianaya sohuihuohui meesahua caje quea ja'a nee. Miquianaya ecuea esohui huohuijji poaje'yo. ¡Jenosanenajo, Jodio meshijo, Samania meshijo, ojjaña meshi quea huesha nee yasijje pea'ai ecuea esohui huohuiquicue! —Jesosa poanaje.

⁹ Jamaya huohui canijo tii, onaaya ba neinei caqui tii, Eyacuiñajjiya Jesosa jjequisohua ca'yonaje eyahuasijje.

Bo dojjo huasijje dobiqui'yajo, oja epeeji cuaa oya ba pajea ca'yonaje. ¹⁰ Jesosa ba'esohuaquianijo, ojaya epeejiya eyahuasijje ba neinei caquijo tii, Eyacuiñajjiya esohuidojojji cuana becaniejji pea'ai jjanequipanaquinaje ona nijje. Ojaya daqui quea oshe nee nee poanaje. ¹¹ Oya jama poanaje ba'a: —Miquianaaya, Janinea meshijo ba'e cuaa, ¡shajja'ajjacue mo! Miquianaaya Jesosa banaje ba'esohuaquije'yo eyahuasijje. Qui'ajjaya oya poeje o'oya quijje, e'e jojo nei —esohuidojojji poanaje.

Matia babaca canaje cuaa Jesusaja huoojea'yo esohui huohuijji epojji Jodasa jjoco cuiña'yojji epojji

¹² Jjeyahua nei Jesusaja epeeji cuana acuijajja yiyejo, Onimo jjajja yiyejo nequi Jenosanena huasijje poqui o'oyanaje; huesha'ama poanaje, beshahua nei beca mil metros. ¹³ Oya cuanaja ojaya equi yahuajo aninaje yasijje dobiqui o'oyanaje. Ejamacoo equecuayijji ai yasijje dobiqui o'oyanaje mahuiso ba'a: Peno, Jacobo, Huani, Anesi, Penipe, Tomasi, Batanomee, Mateo, Simoni Senote, Apeoja bacua eja Satiaco, oja chahua Jode bajjani pea'ai; mahuiso. ¹⁴ Oya cuana epona cuana nijje, Jesusaja enaese Mania pea'ai, Jesusaja echahua mese cuana pea'ai Eyacuiñajji nijje mimi majamajanaje, ojjaña.

¹⁵ Quijje pishana ojjaña jjachichaquinaje quea huiso nee; beshahua nei 120 huisome yaninaje. Majoya Peno nequisohuanaje emimijji. ¹⁶ Jama poanaje ba'a: —Ecuea epeeji cuana, Eyacuiñajjiya esohui yahuajo nei etehue'yo jayojja jama jjeyahua nei apoa poanaje. Edojjoshahua Pameya yahuajo Dabi huohui meesahua canaje Jodasajo, ma Jesosa iñameejji poanaje onajaya equecuayojji. ¹⁷ Yahuajo Jodasa ecuana nijje nequinaje. Jesusaa oya babaca canaje. Jamatii oya esohui huohuijji nisho poanaje. ¹⁸ Jodio etii cuaa aje oe Jodasa ejjeshejji quia canaje Jesosa iña meesahua sosejje. Ma Jesosa sosejje quia bejjo meshi jjeshejji acanaje cuaa. Quijje Jodasa acui aajo jjanaaninequiaqui majje tohuanaanaje mishi yasijje; oquequinaje janobajjima nei. Jjajjono sejjaqui majje jjasapa cuiapojjeaquiñaquinaje. Jjamajji cuiapojjeaquiñaquinaje. See ai cuayaquinananaje pea'ai. ¹⁹ Ojjaña Jenosanenajo ba'eja Jodasa eba poanaje jomajo mano'yonaje. Jamajjeya oya cuaa ma meshi bajjani canaje Asedama meshi ojaya esohuijo. Ese Eja esohuijo Ena' Cuayaquinaje Meshi bajjani acanaje cuaa. ²⁰ E'e, yahuajo nei Dabiya esohuicuyajji-jo Salmojo jama tehueme aca poa ba'a: “Ojaya equi cajiña ca'yahua tii. ¡A'a equi cuiña mee'yojji!” Jama

yahuajo nei tehue ca poa ojo pea'ai ba'a: "Eyaya oya cajaa anaje. Jamajjeya peaa ecuea esohui cahuohui cahua" jamaya yahuajo nei tehue ca poa Jodasajo.

²¹ —Jamajjeya Jodasa chamajo pea dejja ejjababacaqui ecuana nijje esohui huohuijji. Ejjababacaqui joya Jesusaja esohui shajja'ajjajji epo nei, ma Jesusaa dejjaa ajjima acani ba epo nei, joya ese nijje Jesusaja epeeji poanaje. ²² E'e, joya yahuajo Jesosa Huaniya enajo besa mee caqui ba epo ejjababacaqui; joya Jesosa nijje tii jjapeequinequinaje, eyahuasijje sohuaquije'yo ba epo. Jamajjeya ma dejjaa ecuana nijjeya Jesosa shequi'yonaje cahuohui cahua —Peno poanaje.

²³ Jamajjeya ojjaña cuaa becanejijji pea'ai dejja baba-ca ca'yonaje. Matia, pea Jose Basaba, ojaya pea bajjani Josoto. ²⁴ Babaca majje oya cuana Emeshi Mese nei nijje eyajo ani nijje miminaje jama ba'a: —Emeshi Mese nei, miquea eba ojjañaja ejjashahuabaquijji cuana. ¡Ecuana ba meesahuacue ache edejja miquea ebabaca miquea ehoojea'yo epojji! E'e, Jodasa miquea esohui pajea'yo majje mano'yonaje; cuaqui yasijje poqui'yonaje. Jamajjeya Jodasa chamajo peaa miquea esohui cahuohui cahua —jamaya Eyacuiñajji nijje miminaje cuana.

²⁶ Majoya oya cuana quebanei jayojja poanaje ache dejja esohui huohuijji nequije ebajji. Babaca canaje Matia esohui huohuijji poaje. Jamajjeya Matia pea 11 huisome nijje nequi'yonaje Jesusaja huoojea'yo esohui huohuijji epojji.

Edojjoshahua Pame Jesusaja epeeji cuana huasijje poeyanaje

2 Bobi chichajji shejo, Petecote pojjajo bobi chichajje yoyojja bihui nene ojee ijja'ijjia aninaje. Ma pojjajo Jesosa shajja'ajjajji cuana, oja huoojea'yo esohui huohuijji cuana pea'ai, pea epeeji cuana nijje ojee jjachichaquinaje oe equijo. ² Jjeyahua nei Edojjoshahua Pame beni quea quemo jjaqueyaquiani jayojja eyajo shajja'ajja canaje ojjaña. Edojjoshahua Pame equi yasijje dobiquinaje. ³ Majoya cuaqui jijji sisi jayojja ojjañaja esapa biajje nequinaje. Oe cuaqui jijji sisi oe epeeji esapa biajje jijinequinaje. Jamaya ojjaña poanaje. ⁴ Edojjoshahua Pame ojjaña cuana huasijje dobiqui'yonaje. Majoya jjeya nei oya cuana pea mimi'yome poanaje. E'e, Edojjoshahua Pameya oya cuana pea mimime po meesahua ca'yonaje.

⁵ Quea huiso Jodio cuaa ojjaña meshijo ba'yan cuaa Jenosanenajo ba'ecaa Eyacuiñajjija esohui yahuajo nei jayojja bihuiameya acani. ⁶ Jamajjeya beni quea quemo eyajo poeyani jayojja shajja'ajja majje ojjaña cuajicuajije benaje Jesusaja epeeji cuana huasijje. Jesusaja epeeji cuana pea mimi'yome mimiani shajja'ajja majje Jesusaja epeeji pojjeama quea mete nee jama poanaje ba'a: —¿Yajjajje shai Jesusaja epeeji cuana pea mimi'yome poani so'o, de? ¿Yajjajje shai joya esejaya esohuijji mimiani, de?

⁷ Jamajjeya quea mete poanaje. Huohui'ajja canaje jama ba'a: —E'e, ojjaña jiquio dejja cuana Janinea meshijo ba'e. ⁸ ¿Yajjajo shai jiquio pea esohuijji mimi cani

so'o? ¿Ma ecua eseyaya esho'yahuaa shajja'ajjanaje jayojjaya seya jjeya shajja'ajjaña cuana? ⁹ E'e, jiquiojo yani dejja cuana quea huiso meshijo ba'e: Dejja cuana Patia meshijo ba'e, Madia meshijo ba'e, Enami meshijo ba'e, Mesopotamia meshijo ba'e, Jodea meshijo ba'e, Capanosia meshijo ba'e, Ponito meshijo ba'e, Asia meshijo ba'e pea'ai yani. ¹⁰ Pea cuana Pichia meshijo ba'e, Panipinia meshijo ba'e, Ejito meshijo ba'e, Apica meshijo ba'e, Sinene meshi oje mijijje ba'e pea'ai yani. E'e, Jodio dejja cuana, Jodioja epeeji cuana Shoma meshijo ba'e cuana yani. Maaya Jodio pojjeama cuaa Jodioja ehuhui'yo Eyacuiñajjijo shajja'ajja cani.

¹¹ Beca cuana Queta meshijo ba'e, Anamia meshijo ba'e yani pea'ai. Jamatii ojjaña eseyaya esejaya esohuijji Eyacuiñajjija ma dejjaja ba jjima acanaje cuana quea pame nee shajja'ajjaña, ma Jesusaja epeeji cuaa huohui canijo —poanaje ojjaña.

¹² Jamajjeya quea mete po majje pea cuana nijje mimiminaje jama ba'a: —¿Yajja shai poani?

¹³ Pea cuana ca ca Jesusaja epeeji cuanajo soa nei-neinaje. Jama poanaje ba'a: —Chojja, de. Oya cuana jja ca quea huiso ishi'ishinaje. Huooqui —poso acanaje cuaa.

Penohua esohui huohui canaje

¹⁴ Majoya Penohua pea Jesusaja huoojea'yo esohui huohuijji cuana nijje, 11 huisome nijje ojee nequisohua majje janobajjima nei sohuihuohui canaje jama ba'a: —Dejja cuana Jodio meshijo ba'eya, ojjaña Jenosanenajo ba'eya pea'ai, ijje yahua nei mo nequiaa shajja'ajjacue! Eya Jodio pea'ai. Jamajjeya eyaya miya jjabahuejjaqui meje'yo. ¹⁵ ¿A'aya ecuana ehoo poso añaa? Jjeya mecajjeahua nei ishi'ishi ajja cuana. ¹⁶ Chojja. Jamajjeya ¡shajja'ajjacue! Yahuajo nei nei Eyacuiñajjija esohui huohuijji Joeni bajjani jama poa ba'a:

¹⁷ "Eyacuiñajji jama poani ba'a: Quijje jiquio meshi beshahua nei apoa poajo, eyaya Edojjoshahua Pame huoojeaje'yo ojjaña huasijje. Edojjoshahua Pameya esho'i, epona sho'i cuana pea'ai huohui meesahua caje ma eyaya quijje nei aje. Ohuaya dejja etii pishana cuana jjacahuibaqui mee caje. Edejja tii cuaa cahuiba majje huohui caje pea'ai. ¹⁸ E'e, eyaya Edojjoshahua Pame huoojeaje'yo ecuea echacojji cuana que, epona, dejja cuana que pea'ai. Edojjoshahua Pameya ecuea esohui huohui meesahua caje pea cuana huasijje. ¹⁹ Quijje eyaya ma dejjaa ajjima acani añaa eyajo ba majje dejja cuana quea mete poaje. Jiquio meshijo ma dejjaa ajjima acani eyaya aje pea'ai ojjañaja ebajji eya quea ca'a nee nee. E'e, quea huo'o nee ena' jayojja poaje eyajo, meshijo pea'ai. Cuaqui quea quemo poaje. Huichacha quea quemo nee, quea moo nee nee poaje. ²⁰ Eshequi quea apo nee poaje. Ba'i quea huo'o nee ena' jayojja poaje. Majoya Emeshi Mese nei poeje o'oya. Ma pojjajo ojjaña ba caje Emeshi Mese nei quea ca'a nee nee, quea pame nee nee poani.

²¹ Jamajjeya ojjaña Emeshi Mese nei nijje camimiahua jama ba'a: —Emeshi Mese nei, jeya jaahuanacue! ¡Ecuana mimishi cuijea'yocue! —jamaya onijje mimi'ya-

jo, ohuaya oya cuana jaahuana caje'yo; ba'e tiitii mee caje'yo eyajo, cuaqui yasijje huoojea'yo jjima acaje pea'ai".

Jamaya yahuajo nei nei Joeniya tehue ca poa Eyacuiñajjiya esohui —Peno poanaje.

²² Majoya Peno jama poanaje ba'a: —Dejja cuana Isaeni meshijo ba'e, ¡shajja'ajja neineicue mo! Jesosa ma Nasanenajo ba'ya poa miquiana nijje nequinaje. Eyacuiñajjiya Jesosaa ma dejjaa ajjima acani ameesahua canaje quea huiso nee nee. Jamaya miquianajaya eba —Penohua acanaje—. ²³ Jamatii Jesosa iña majje miquianaaya oya ona huasijje quianaje. E'e, miquianaaya Jesosa quia'yonaje dejja mase yasijje, acui ecueata'apeejo emano mee'yojji. Jamatii yahuajo nei jamaya Eyacuiñajjiya ejjashahuabaqui'yojji poa. ²⁴ Jamajjeya Eyacuiñajjiya Jesosa shequi mee ca o'oyanaje. E'e, Jesosa jjanijo ehuananobia jaa tiitii ajja poa; emano'yo tii po mee'yo jjima acanaje. ²⁵ Yahuajo emeshi mese Dabiya Jesosajo huohui ca poa jama ba'a:

“Ecuea Emeshi Mese nei enijje ani tiitii'ya poa. Ohuaya eya jaahuana tiitii canijo, eya mete'ama poaje'yo.

²⁶ Jamajjeya eyaya quea jaji neeya Eyacuiñajji bihuiaña. Eya jjanijo ehuananobia jaa shequi o'oya, yamiña. Ihui'yo ajja poaje. Jamaya ecuea eba. ²⁷ Miyaya eya jeana'yo ajja pea emano'yo cuana nijje. Jamajjeya eya mete'ama. Eya miquea quea boti nee. Jamajjeya eya meshijo ihui'yo ajja poaje'yo. ²⁸ Miyaya eya ba'e meeje o'oya quea pame nee. Minijje nequi tiitii meeje'yo. Quea bihui nee eya poani”.

Jamaya yahuajo nei Dabiya huohui ca poa Jesosaja esohui —Peno poanaje.

²⁹ Penohua huohui canaje jama pea'ai ba'a: —Epeeji cuana, e'e jojo nei esejaya etiiquiana Dabi yahuajo nei mano'ya poa. Jjeya oya ehuananobia jaa jjanijo. Jamaya esejaya eba. ³⁰ Dabi ca ca Eyacuiñajjiya esohui huohuijji poa. Eyacuiñajjiya oya huohui ca poa jama ba'a: “E'e jojo nei miquea osecua quijje nei cuayaje eyaya Emeshi Mese nei po meeje'yo”.

³¹ E'e, yahuajo nei Dabiya eba poa quijje nei Jesosa, Eyacuiñajjiya huoojea'yo ojjaña jaahuanajji shequi o'oya. Jamajjeya Dabiya huohui ca poa jama ba'a: “Miyaya oya jeana'yo ajja pea emano'yo cuana nijje. Oya meshijo ihui'yo ajja poaje'yo” jamaya Dabi yahuajo nei poa.

³² Penohua ojjaña cuana huohui ca o'oyanaje: —E'e jojo nei Eyacuiñajjiya Jesosa shequi mee ca'yonaje; ecuaaaya Jesosa ba o'oyanaje, eshe, de. ³³ Eyacuiñajjiya Jesosa nequi tiitii mee ca'yonaje eyajo onijje, o ebiane mijiije ojjaña huoojea'yojji. Eyacuiñajjiya esohui yahuajo jayojja jama Edojjoshahua Pame Jesosa que dobiqiu'yonaje. Jesosaa ma Edojjoshahua Pame jje-yahua nei huoojea canaje ecuaa que dobiqiu'ya. Jiquia aje jja oya nequiaa banaje. Ojaya epoe'yo miyaya shajja'ajjanaje pea'ai. ³⁴ ¡Bacue, Dabi ca ca oma sohuaqui jjima eyahuasijje yamiña! Ohuaya huohui ca poa jama ba'a:

“Eyacuiñajjiya ecuea Emeshi Mese nei huohui canaje jama ba'a: ¡E pejeje anioquecue, ebiane mijiije, enijje ojjaña huoojea'yojji!

³⁵ ¡Jjeyahua nei ojjaña jaya minijje jjapeequi ajja eyaya miya huoojea meeje'yo!”

Jamaya Dabiya tehue ca poa Jesosajo yahuajo.

³⁶ Penohua jama acanaje pea'ai ba'a: —Isaeni dejja cuana, ¡shajja'ajja neineicue! Miquianaaya ca ca oe Jesosa acui ecueata'apeejo ba'ehuanasohuajeanaje; mano mee'yonaje. Eyacuiñajjiya ca ca Jesosa ojjaña jaya Emeshi Mese nei po mee ca'yonaje. Ohuaya Jesosa Quito ojjaña jaahuana huoojea ca'yonaje pea'ai —acanaje Penohua.

³⁷ Ma shajja'ajja majje ojjaña jomajo nequica quea yeno nee nee poanaje. Jamajjeya Peno nijje, ojjaña Jesosaja huoojea'yo esohui huohuijji cuana nijje jama poanaje ba'a: —Epeeji cuana, ¿yajja acue poaje? Eseja iña mee'yo, eseja quecua mee'yo ca jja ca oe, de.

³⁸ Penohua saja'a canaje jama ba'a: —¡Miquianajaya mimishi cuana pajea'yocue! ¡Jesosa nijje jjapeequicue! Majoya Eyacuiñajjiya esohui huohuijjiya miquianajaya besa mee caje Jesosa Quitojo. Jamajjeya ojjaña ba caje miquianajaya Jesosaja epeeji poani. E'e, Jesosa Quitoja miquianajaya mimishi cuana cujea caje'yo. Ohuaya miquiana que Edojjoshahua Pame huoojea caje'yo pea'ai. ³⁹ E'e, Eyacuiñajji Edojjoshahua Pame huoojea sa poani miquiana que, miquea ebacua cuana que pea'ai, ojaya epeeji cuana ojjaña meshijo ba'eca huasijje pea'ai, ojjaña Eyacuiñajjiya ebabaca huasijje pea'ai —Penohua acanaje.

⁴⁰ Penohua quea huiso pea esohui huohui canaje. Jama acanaje ba'a: —¡Dejja quea mimishi jama a'a pojji! ¡Oya cuana nijje a'a jjapeequijji! Eyacuiñajjiya mimishi cuana quea nee nee po mee caje'yo, quea nee tii tii.

⁴¹ Quea huiso cuana Penoja esohui shajja'ajja majje Jesosa nijje jjapeequinaje. Jamajjeya Penohua oya cuana besa mee canaje Eyacuiñajji enajo. E'e, ma pojja tii quea huiso nee nee Jesosaja epeeji po'yonaje, 3.000 huisome. ⁴² Jamajjeya oya cuaa Jesosaja huoojea'yo esohui huohuijji cuanaja esohui shajja'ajja canaje; jamaya acanaje pea'ai. Ojee jjapeequinaje pea'ai. Ojee Jesosaja bobi ijja canaje pea'ai. Eyacuiñajji nijje mimi majamajanaje, ojjaña.

Jesosaja epeeji cuana jamaya ba'e coa poa

⁴³ Edojjoshahua Pameya Jesosaja huoojea'yo esohui huohuijji cuana ma dejjaa ajjima acani ameesahua canaje quea huiso. Jamajjeya ojjaña cuana jama poanaje ba'a: —E'e de, jiquio esohui huohuijji cuaa ma dejjaa ajjima acani quea huiso nee nee acanaje —poanaje cuana.

⁴⁴ Jesosaja epeeji cuana ca ca huapa pojjeama cuana jayojja jama poanaje. Ojjaña dejja tai'ama, nishehui'ama pea'ai poanaje. ⁴⁵ E'e, ojaya cuanaja aquiana cuana chicha majje quia canaje Jesosaja epeeji jaahuanajji cuana huasijje. Majoya oya cuaa quia canaje ojjaña Jesosaja epeeji cuana huasijje. Jaja aema' poani quea huiso quia canaje; jaja aquianajji ca ca oe pojji quia ca-

naje. Jamaya ojjaña huasijje quia ca poquinaje. Jamajyeya ojjañaja aquiana peaja huisoajjaya poanaje. ⁴⁶ Ojjaña pojajajo ojjaña Jesosaja epeeji cuaa Eyacuiñajjija equi epeeji yasijje jjachichaqui majje esohui huohui canaje. Jesosaja bobi ijia canaje peaja equi cuana huasijje. Pea equi cuanajo anica ojee ijia'ijia ca ani ojjaña quea bihui nee nee jjapeequinaje. ⁴⁷ Ojee Eyacuiñajji bihuia majamaja canaje ojjaña pojajajo. Pea cuana Jesosaja epeeji cuana nijje quea bei poanaje. Eyacuiñajjija ojjaña pojajajo pea cuana Jesosa nijje jjapeequi meesahua ca'yonaje. Jamajyeya Jesosaja epeeji cuana quea huiso nee nee poanaje.

Jiojjijajja jjajiojji jeapiihuiqui'yonaje

3 Majoya eshequi jjajeapaaquiajo Peno, Huani nijje poquinaje Eyacuiñajjija equi yasijje Eyacuiñajji nijje mimiya. Jamaya ojjaña pojajajo Jodio dejja cuana Eyacuiñajji nijje mimi aninaje eshequi jjajeapaaquiajo. ² Odejja ejiojji cojjasahuajo aninaje meme aninaje, jiojjijajja. Oya jamatii cuaya jiojjijajja tii. Jamajyeya ojjaña pojajajo pea cuaa oya dojo canaje Eyacuiñajjija equi yasijje, Esecue jjani Bame Bame bajjani yasijje. Jomajo ohuaya eme' huo ca aninaje bobijo, ejjeshejijo pea'ai. Oya jjashahuabaquinaje jama ba'a: —E'e pojja'a dejja cuaa Esecue Bame yasijje poe majje eya aquiana quia caje sosema'.

³ Jamajyeya Peno, Huani nijje Eyacuiñajjija equi yasijje dobiquiajo, jiojjijajjaa o que eme' huo canaje. ⁴ Jamajyeya Penohua Huaniya pea'ai jiojjijajja ba canaje. Jama acanaje ba'a: —¡Ecuana bacue!

⁵ Aquiana sosema' sa poanaje. Jamajyeya Peno bajea-sohua canaje, jiojjijajjaa. ⁶ Jamatii Peno jama poa ba'a: —Ecuea epeeji, ecuea aquiana chama'. Ecuea ejjeshejji pea'ai chama'. Eya Jesosaja epeeji; joya ecue ani aje mi quiaje jama ba'a: Jesosa Quitohua ma Nasanenajo ba'ya poaa miya jeo meesahua caje'yo. Jamajyeya ¡nequisohuacue! ¡Jeocue oe! —acanaje Penohua.

⁷ Penohua jiojjijajja ebianeijje meje iña majje nequisohua mee canaje. Jjeyahua nei ojaya ejiojji quea pame poanaje, quibojjisha quea pame poanaje pea'ai. ⁸ Jamajyeya oya jjeyahua nei nequisohua majje jeonaje. Peno nijje, Huani nijje pea'ai Eyacuiñajjija equi yasijje dobiquinaje, equecuayijji yasijje ma Sanomoja equi bajjani yasijje. Oya quea jaji nee jeonaje. Tohuaa-tohuaa poanaje. Eyacuiñajji bihuia canaje pea'ai. Ojjaña equijo nequiya oya ba canaje tohuani, Eyacuiñajji bihuia poequi pea'ai. ¹⁰ Jiojjijajja yahuajo ojjañaja eba. Eyacuiñajjija equi pejejo ani tiitiinaje, Esecue Bamejo. Aquianajo meme ania poa. Ojjaña quea bihui poanaje jiojjijajja jeoje'yo ba majje: —E'e de, oya jiojjijajja jeonaje jjeya nei —poanaje.

Penohua esohui huohui canaje Eyacuiñajjija equijo

¹¹ Majoya ma jiojjijajja poanaje Peno nijje, Huani pea'ai nijje po'yonaje, bihuiabihuia'yo nequinaje. Eyacuiñajjija equijo equecuayijji bajjani Sanomoja equijo quea huiso cuana jjachichaqui canaje o baa. Ojjaña

quea bihui poanaje Penojo, Huanijo pea'ai. Jama poanaje ba'a: —¡Dee! Penohua, Huaniya pea'ai oya jiojjijajja jeo mee canaje. Quea ca'a nee nee oya, de, Eyacuiñajjija ma dejjaa ajjima acani —poanaje ojjaña.

¹² Ojjaña jjachichaquije ba majje, ojjañaja esohui shajja'ajja majje pea'ai Penohua huohui canaje jama ba'a: —Dejja cuana Isaeni meshijo ba'e, ¡shajja'ajjacue mo! ¿Apiojji acuae ecuanaja esohuijo miqianaya quea ajjajja poani so'o? ¿Apiojji acuae jjashahuabaquiani jama ba'a: “Peno, Huani pea'ai Eyacuiñajjija epeeji quea ca'a nee nee poani. Jamajyeya jiojjijajja cuaya ohuaya jeo mee canaje” poani nequiana so'o, de? —poanaje Peno—. ¹³ Chojja, ecuaaya pojjeamaa jiojjijajja jeo meenaje. ¡Bacue! Eyacuiñajjija Amajama, Isaaca, Jacobo, eseja pea etiquiana cuana pea'ai jaahuana ca poa. Jjeyahua nei ma Eyacuiñajjija ojaya Bacua Ejja Jesosa o pejejo anioque mee ca'yonaje ojjaña huoojea'yojji. Miquianaaya ca mi ca Jesosa quianaje emeshi mese Pinatoja, equecua mee'yojji. Pinatohua Jesosa pichoje sa acajo, equecua mee'yojji. Pinatohua Jesosa pichoje sa acajo, miquianaaya quea quene taaanaje jama ba'a: “Jesosaa me' cacacue! ¡Acui ecueata'apeejo ba'ehuana-sohuajecue!” anaje nequiaa. ¹⁴ Eyacuiñajjija Jesosa quea boti nee nee. E'e, Jesosa quea pame nee nee, mimishi'ama nei. Jamatii miquianaaya oya cajaa anaje jama ba'a: “¡A'a Jesosa pichojeajji!” taaajebenaje quianaaya: “¡Mashama' oe pichojea'yocue!” anaje quianaaya. Mashama' aje oe ona quecua'yojji epo, de. ¹⁵ Miquianaaya ca ca oe Jesosa mano mee'yonaje, ma ojjaña ba'e tiitii mee'yojji epo. Eyacuiñajjija ca ca Jesosa shequi mee ca o'oyanaje. Jamaya ecuanajaya eba. E'e, Jesosa shequi o'oyanaje ecuaaya banaje. ¹⁶ E'e, Jesosa quea ca'a nee nee nequi. Ohuaya ca ca oe jiojjijajja jeo mee canaje. Ecuana Jesosaja epeeji. Ojo jjashahuabaquiani jama ba'a: “E'e jojo nei Jesosaa jiojjijajja jeo mee caje” jamaya Jesosajo e'e jojo nei jjashahuabaquianajo, ohuaya quea ja'a nee po mee canaje jiquio dejja. Maya miquianaaya jjeya nei baña —Peno poanaje.

¹⁷ —Epeeji cuana, ecuea eba miquianaaya, Jodio etii cuana nijyeya oya ba jjimajojo Jesosa quianaje onaja equecua'yojji. ¹⁸ Yahuajo nei nei Eyacuiñajjija ojaya esohui huohuiji cuana tehue mee ca poa Jesosa Quitotoja jama ba'a: “Quijje nei ecue huoojea'yo ojjaña jaahuanajji quea nee nee po mee caje'yo cuaa”.

Ma etehue'yo yahuajo nei jayojja jama jjeya miquianaaya anaje —Penohua acanaje—. ¹⁹ ¡Jamajyeya Eyacuiñajjija esohui jayojja jama acue! ¡Miquianajaya mimishi pajea'yocue! ¡Jesosaa nijje jjapeequicue! E'e, Eyacuiñajjija ojaya esohui yahuajo nei jayojja jama huoojea ca'yonaje ojjaña jaahuanajji Jesosa Quito ese jaahuanaa. Jamajyeya ohuaya esejaya mimishi cuana cuieja caje'yo; ese nijje quea bei poaje'yo. ²¹ Jjeya Jesosa eyajo nequi oja Chii nijje. Jomajo oya ani'yo; ojjaña Eyacuiñajjija esohui jayojja jama apoa poajo oya Jesosa poeje o'oya. E'e, Eyacuiñajjija yahuajo nei nei ojaya esohui huohuiji cuana huohui mee ca poa jama ba'a: “Quijje ojjaña Eyacuiñajjija esohui ma ohua yahuajo nei huohui ca poa apoa poajo, Eyacuiñajjija huoojea'yo

ojjaña jaahuanajji poeje o'oya ojjaña aquiana jiquio meshijo eyacua po mee'yohua".

²² E'e —Penohua acanaje—, Eyacuiñajjiya esohui huohuijji Moisesi yahuajo jama poa ba'a:

“¡Bacue! Eyacuiñajjiya eya huoojea canaje ojaya esohui huohuiya. Quijje ohuaya pea esohui huohuijji e jayojja miquiana que huoojea caje, miquiana nijje meshijo ba'e. ¡Ojjaña ojaya esohui jayojja jama acue!

²³ Ojjaña joya ojaya esohui jayojja jama po ajja aje oe Eyacuiñajjiya cajaa acaje'yo; quea nee nee po mee caje'yo”.

Jamaya yahuajo nei Moisesiya tehue ca poa Eyacuiñajjiya esohui —Penohua acanaje.

²⁴ —E'e, yahuajo nei nei Eyacuiñajjiya esohui huohuijjiya Samoeni bajjaniya esohui quea pame nee huohui ca poa Jesusajo, Eyacuiñajjiya huoojea'yo ojjaña jaahuanajjiyo. Majoya ojjaña Eyacuiñajjiya esohui huohuijji cuana Samoeniya esohui jayojja jama huohui ca poquiapoquia poa quea huohui neeya. ²⁵ Eseyá Eyacuiñajjiya esohui huohuijji yahuajo nei ba'e cuanaja osecua cuana, etiquianaja osecua cuana poanijojo Eyacuiñajjiya esohui yahuajo esejaya etiquiana cuana nijje jayojja jama ohuaya eseyá acaje jjeya nei pea'ai. E'e, yahuajo nei Eyacuiñajjiya Amajama huohui ca poa esejaya etiquiana jama ba'a: “Quijje nei miquea osecuajo ojjaña cuana ojjaña meshijo ba'e quea bhui nee nee poaje” ²⁶ Peno poanaje: —E'e Eyacuiñajjiya oja Bacua Eja oe nei Jesusa ese yasijje, Jodio cuana huasijje huoojea canaje ebionei, esejaya mimishi cuana pajea meesahuaa. Jamajjeya eseyá quea ja'a nee po mee caje'yo —Penohua acanaje Huani nijjeya.

Penó, Huani pea'ai iña canaje Jodio etii cuaa

4 Majoya Penohua, Huani nijjeya ojjaña cuana huasijje Jesusaja esohui huohui canijo, Eyacuiñajji nijje emimijji cuana, Eyacuiñajjiya equi cuiñajji etii pea'ai, Sanoseo cuana nijje poeyanaje. ² Penoja esohui shajja'ajja majje jiquio Jodio etii cuana quea quene nee nee poanaje Penohua Jesusa shequi o'oyanaje huohuime acajje. ³ Jamajjeya Peno, Huani pea'ai iña majje dojo canaje etecueajji. Siniajo mi tecuea canaje. Jeanobiajea canaje mecahuajje emimijji. ⁴ Jamatii quea huiso dejja cuana, ponaña pea'ai Penoja esohui Jesusajo shajja'ajja majje Jesusa nijje jjapeequinaje, me oejje mil huisome, 5.000 huisome.

⁵ Mecajjeahua emeshi mese cuana, Jodio dejja etii cuana Moisesija tehue'yo huohuijji nijje ojee poanaje Jenosanenajo. ⁶ Eyacuiñajji nijje emimijji etii Anasi bajjani, oja huapa pojjeama cuana Caipa, Huani, Anejano pea'ai ojee poanaje. ⁷ Jodio dejja etiiya Peno, Huani, jiojjiijajja pea'ai iyaa canaje etecueajji. Poeyajo, Peno tecuea canaje jama ba'a: —¿Anijje acuae nequiaa jiojjiijajja jjajiojji jeapiihuiqui meenaje so'o?

⁸ Edojjoshahua Pameya oya huohuisahua canijo, Penohua jama acanaje ba'a: —Emeshi mese cuana, dejja etii cuana pea'ai, e'e ecuaaya jiojjiijajja jeo meesahuanaje. ⁹ Jamajjeya miquianaaya ecuaana huohui'ajjaña jama ba'a: “¿Anijje acuae jiojjiijajja jeo mee'yonaje?” ¹⁰ Ja-

majjeya jiojjaña dejja cuana Isaeni meshijo ba'eya, ishajja'ajjacue mo! Miquiaaya ca ca oe Jesusa Quito, ma Nasanenajo ba'ya poa acui ecueata'apeejo ba'ehuanasohuajeanaje; mano mee'yonaje. Jamatii Eyacuiñajjiya Jesusa Quito shequi mee ca o'oyanaje. Ohuaya, Jesusa Quitohua jiojjiijajja jeo mee canaje. ¡Bacue quea pame nee oya nequi! —Penohua acanaje—. ¹¹ E'e, yahuajo nei Eyacuiñajjiya esohui huohuijji cuaa Jesusajo tehue ca poa jama ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee aca poa. Jamajoya ojjaña ojaya epeejji cuaa Eyacuiñajji bihuia cani”.

Jesosa Quito ma eyamajjana equi iyajji jayojja. Miquianaya Jesusa sa po'yo ajja poanaje. Jamatii jjeyahua nei oya Jesusa quea pame nee nee, quea ca'a nee nee nequi. ¹² Jesosa Quitohua ohuaya nei mimishi cuana cuijea'yo majje ba'e tiitii mee caje'yo se. E'e, Eyacuiñajjiya oya huoojea ca'yonaje ese nahuejji, ese cuaqui yasijje epoqui'yo poaje jjejojo. Pea chama' ese jaahuanajji —acanaje Penohua.

¹³ Ma Jodio etii cuaa Penoja esohui, Huanija esohui pea'ai shajja'ajja majje jama acanaje ba'a: —¡De! Oya cuana bicho'ama mimiani ecuaana nijje. ¿Yajjajje shai? Yahuajo ebiojo ba'e'ya poa oya cuana. Esohui etehue'yo quea huiso ojaya ba jjima yahuajo poa. Jamatii quea ja'a nee esohui huohui cani. E'e de, Jesusa nijje nequi tiitinaje. Ohuaya pojja'a quea huiso ba mee canaje —acanaje etii cuaa Penoja, Huanijo pea'ai.

¹⁴ Jamajjeya Jodio etii cuaa Peno Jesusajo mimipajea mee'yo sa acani. Jamatii joya jiojjiijajja Peno nijje, Huani pea'ai nijje nequi quea pame nee. Jamajoyaya mi tecuea canaje. ¹⁵ Jamajjeya Peno, Huani, jiojjiijajja pea'ai esecue yasijje, equi quibo huasijje huoojeacuayajea canaje. O huoojeacuayajea majje mimimiminaje. ¹⁶ Jama poanaje ba'a: —¿Ae acuae acajji so'o? Jesusaja esohui pajea'yo ajja. Ojjaña Jenosanenajo ba'eya ba canaje Penohua ma dejjaa ajjima acani acanaje; jiojjiijajja jeo mee canaje. Jamajjeya ecuaaya yajja siajje ame yajji Peno jama ba'a: “Chojja Penoja, Huanija pea'ai jiojjiijajja jeo mee'yo jjima” jama siajje pomeya jjapo meequi ajja, de. ¹⁷ Jamajjeya Peno, Huani pea'ai ejjatecuaequi jama ba'a: “¡A'a huohui'yojji Jesusajo!” jamaya ejjahuohuiqui: “¡A'a ojjaña cuana Jesusa shequi'yonaje mimime pojji! ¡A'a Jesusaa jiojjiijajja jeo mee canaje mimime pojji pea'ai!” —poanaje Jodio etii cuana.

¹⁸ Majoya oya cuaa Peno, Huani iyaa ca o'oyanaje. Poe majje huohui canaje jama ba'a: —¡Bacue! ¡A'a jja oe Jesusajo mimi o'oyajji! Chojja. ¡A'a Jesusaa eshe o'oyaa jiojjiijajja jeo mee canaje a'a huohui majajji! —huohuime acanaje Jodio etii cuaa.

¹⁹ Jamatii Penohua, Huaniya pea'ai mete'ama saja'a canaje jama ba'a: —¡Jashahuabaquicue so'o! ¿A'a ecuaaya miquianajaya esohui jayojja jama aje? Cho. Eyacuiñajjiya esohui jayojja jama pojjeama. Miquianaaya ecuaana Jesusaja esohui huohui mee jjima aña. Eyacuiñajjiya ca ca ecuaana huoojea canaje Jesusajo huohuiya. ²⁰ ¡Bacue! Ecuaaya Jesusa banaje eshe o'oya.

Eyacuiñajjija esohui ecuaaya shajja'ajjanaje onijje. ¡Ma-ya ecuaaya cahuohuiahua!

²¹ Jamatii Jodio etii cuaa Peno, Huani pea'ai cuia sa acanaje. Jamatii cuia jjima poanaje quea meteya jjejojo. Ojjaña cuaa Eyacuiñajji bihuia canaje Jiojjijajja jeo mee canajejo; Peno, Huani pea'ai ojjañaja quea nahue ecua mee'yojji poanaje. Jamajjeya mi cuia canaje. Tecuea canaje ca ca oe; majoya tecuea majje huoojea canaje Huani, Peno pea'ai.

²² E'e, Jiojjijajja jeonaje etii nei, peaja ojiojji miji pea'ai huiso shequiajame, 40 shequiajame poanaje. Eyacuiñajjiya Peno, Huani pea'ai oya jeo meesahua ca'yonaje.

Ojjaña Eyacuiñajji nijje miminaje esohui mete'ama ehuhui meesahuajji

²³ Jamajjeya Jodio dejja etiiya oya huoojea cajje Peno, Huani nijje poqui'yonaje ojaya epeeji cuana que. Ma Jodio etii cuaa tecuea canaje, Eyacuiñajji nijje emimijji mese cuanajo pea'ai huohui cañaquinaje. ²⁴ Ma shajja'ajja majje ojjaña cuaa ojee Eyacuiñajji bihuia canaje. Onijje miminaje jama ba'a: —Eyacuiñajji, ecuanaja Chii ai, miya quea pame nee nee. Miyaya ojjaña eyajo pana'ya poa, meshi cuana pana'ya poa, bae cuana pana'ya poa pea'ai. Ojjaña aquiana cuana eyajo, meshijo, enajo pea'ai ojjaña mique pana'yo. ²⁵ Yahujajo nei nei miyaya ecuanaja etiiquiana que, miquea epeeji emeshi mese Dabi que huoojea'ya poa Edojjoshahua Pame. Edojjoshahua Pameya Dabi huohui meesahua ca poa jama ba'a:

“Joya, ojjaña cuana quea shajjaquijjo, Eyacuiñajji nijje mimipanajjiani. Oya cuana quea tai jjashahuabaquiani Eyacuiñajji jeabichajeajji nisho. ²⁶ Emeshi mese cuana dejja huoojeajji poani nijje jjachichaquiani; ojee nequianiya Eyacuiñajjija huoojea'yo ojjaña jaahuanajji jeabichajea'yojji nisho”.

²⁷ —E'e Eyacuiñajji, miyaya miquea Ebaqua Ejja quea pame nee Jesosa huoojeanaje ojjaña jaahuanajji epojji. Jiquio cuiñajjijo ba'eca cuana quea huiso quea mase Jesosa quecua sa poanaje. Jodioja emeshi mese quea mase Enode, Shomano emeshi mese Ponosio Pinato nijje jjachichaquinaje Jodio pojjeama cuana nijje, Isae ni dejja cuana nijje pea'ai. Ojee jjashahuabaquinaje Jesosa quecua'yojji. ²⁸ E'e Eyacuiñajji, miya yahujajo nei nei Jesosajo jjashahuabaquia poa jama ba'a: “Eyaya Jesosa huoojeaje dejja cuana huasijje. Jamatii onaaya oya iña caje equecua'yojji”. Miquea ejjashahuabaqui'yojji yahujajo jayojja jama jjeyahua nei dejja quea mase cuaa acanaje. ²⁹ Eyacuiñajji, miya ecuanaja Emeshi Mese nei eyajo ba'e. Miquea eba jjeyahua nei emeshi mese cuana quea mase ecuaa nijje mimijajiani Jesosaja esohui ecuaaya ehuhui poaje jjejojo. Jamajjeya ecuaa miquea epeeji poanajo, esohui Jesosajo huohui meesahuacue mete'ama! ³⁰ ¡Mique Bacua Ejja Jesosa nijje jjapeequianiya pea cuana huaquia meesahuacue! ¡Ma dejjaa ajjima acani ameesahuacue, Eyacuiñajji! —jamaya miminaje Eyacuiñajji nijje ojjaña.

³¹ Eyacuiñajji nijje mimipajea'yajo, Eyacuiñajjiya ma equi jeahuehuahuehua mee canaje. Edojjoshahua Pameya ojjaña huasijje dobiqum majje Eyacuiñajjija esohui huohui mee canaje mete'ama.

Jesosaja epeeji cuana huapa pojjeama jayojja ba'ya poa.

³² Jomajo ojjaña Jesosaja epeeji cuana ojee jjapeequinaje quea bei. Oya cuana aquiana nahue'ama poanaje. Bobi nahue'ama poanaje. Nishehui'ama, dejja tai'ama ojjaña poanaje. Ojjaña Jesosaja epeeji cuana ba'e meesahua canaje. Ojjaña aquiana cuana ojjañaja poanaje. ³³ Jamajjeya Eyacuiñajjija huoojea'yo esohui huohuijji cuaa janobajjima nei esohui huohui canequinaje mete'ama. Jama huohuime acanaje ba'a: —Esejaya Emeshi Mese nei Jesosa Quito shequi o'oyanaje e'e jojo nei —acanaje.

Jamajjeya Eyacuiñajjiya oya cuana jaahuana neinei canaje; quea bei nee po mee canaje.

³⁴ E'e, jamajjeya Jesosaja epeeji cuaa meshi, equi cuana, aquiana pojja'a quia majje, ejjeshejji jjeshe majje quia canaje Jesosaja epeeji jaahuanajji yasijje. Majoya ohuaya ma ejjeshejji quia canaje Jesosaja epeeji aema' cuana huasijje, aema' pishana huasijje pea'ai. Jamajjeya oya huisoajjaya aquiana ojjañaja poanaje.

³⁶ Majoya oe Nemita Jose bajjani ma yahujajo Chipe meshijo ba'e poenequinaje, Jesosaja epeeji. Oya Benabe bajjani aca'yonaje, Ese Ejjaja esohuijo Ona Quea Bei pomeejji bajjani aca'yonaje Jesosaja huoojea'yo esohui huohuijjiya. ³⁷ Ma Benabeya que jjinipea quia canaje ejjeshejji sosejje. Majoya ohuaya ejjeshejji ye ca'yonaje Jesosaja huoojea'yo esohui huohuijji Jesosaja epeeji aema' cuana huasijje equiajji. Jamajjeya ojjaña quea bihui nee Benabe nijje poanaje.

Anania oja huanase Sapina pea'ai siajjepojji poanaje

5 Majoya Ananiaa ojaya ehuanase Sapina nijjeya que jjinipea quia ca'yonaje ejjeshejji sosejje. Bejjo iñatepe majje equijo iyaquehua canaje. Quea bejjo jea poanaje. ² Jamajjeya Ananiaa oe pojji bejjo quia ca'yonaje Jesosaja huoojea'yo esohui huohuijji yasijje. Oja huanaseja eba poanaje. Jamatii siajje poanaje jama ba'a: —Ma'aje bejjo, Peno, ojjaña tii que sosejje ecue jjeshe —anisho canaje Ananiaa; ona quea bihui pojji nisho siajje poanaje.

³ Edojjoshahua Pameya Peno huohui meesahua canaje jama ba'a: —Anania, ¿apiojji acuae mi Edosiquiana jama siajje poani? ¿Apiojji acuae Edojjoshahua Pame siajje aña so'o? Miquea ojjaña ejjeshejji que jjinipea sosejje quia'yo jjima; miquea equijo huanaquehuanaje. ⁴ ¡Bacue, Anania! Que jjinipea quia jjimahuajo miquea tii poanaje. Quia'yo majje ejjeshejji miquea tii poanaje. Jamajjeya ¿apiojji acuae mi siajje poani ojjaña bejjo miquea que sosejje quia'yaña nisho poani? Miyaya ecuanaya pojjeama dasiaña; miyaya Eyacuiñajji dasia sa aña, de —poanaje Peno.

⁵ Penoja esohui shajja'ajja majje Anania bichaquinanaje; poquijeyonanaje. Chama'yo tii poanaje. Anania mano'yonaje ba majje ojjaña quea mete nee nee poanaje. ⁶ Majoya dejja etii pishana cuaa Anania daqui oshejo bebo majje dojo canaje mojeaa.

⁷ Quijje pishana eshequi jaasohua pishanajo, Anania-ja ehuanase Sapina poeyanaje Peno que. Oja ba jjima ojahue mano'ya poa. ⁸ Penohua oya huohui'ajja canaje jama ba'a: —Sapina, ¿ache sose huiso que jjinipea quinaje miquiaaya?

Oya epona siajje poanaje pea'ai: —E'e Peno, ma sose huiso tii quianaje ecuaaya —poanaje epona.

⁹ Majoya Penohua epona tecuea canaje: —¿Apiojji miya miqueahue jayojja jama siajje poani? ¿Apiojji miyaya Edojjoshahua Pame dasia sa aña pea'ai? ¡Bacue! Miqueahue mojejji epo poe'yonaje. Ohuaya miya mojea pea'ai caje'yo —acanjje Penohua.

¹⁰ Siajjepojji jjejojo jjeyahua nei epona mano bicha-jeaquinanaje Peno pejejejo tii. Jamajjeya dejja etii pishanaa ma Anania mojea'yojji epohua Peno que poe o'oya majje epona emano'yoojaa ba cañaquinaje. Epona dojo canaje mojeaa, ojahue pejejejo.

¹¹ Ma ba majje ojjaña Jesosaja epeeji cuana quea mete nee poanaje Eyacuiñajji dasiajji nisho. Ojjaña pea cuana ma shajja'ajja majje quea mete nee nee poanaje pea'ai.

Jesosaja huoojea'yo cuaa acanjje quea huiso ma dej- jaa ajjima acani

¹² Majoya Eyacuiñajjiya Jesosaja huoojea'yo esohui huohuijji cuana ma dejjaa ajjima acani ameesahua canaje quea huiso nee ojjaña cuanajo. Ojjaña Jesosaja epeeji cuana jjachichaqui nequinaje Eyacuiñajji equi yasijje, equi equecuayijji Sanomoja equi bajjani yasijje Eyacuiñajji bihuiaa. ¹³ Pea cuana Jesosaja epeeji cuana nijje quea bei nee poanaje jama ba'a: —Jesosaja epeeji cuana quea pame nee —poanaje. Onijje mimijaji ajja nei poanaje, quea mete.

Jesosaja epeeji cuana nijje jjachichaqui jjima poanaje Jesosaja epeeji pojjeama. ¹⁴ Ojjaña pojjaajo quea huiso nee Jesosa nijje jjapeequinaje dejja cuana, epona pea'ai. ¹⁵ Jesosaja huoojea'yo esohui huohuijji cuaa ma dejjaa ajjima acani acanjje: emanojaaca cuana huaquia meesahua ca'yonaje, jjajeequi meesahua ca'yonaje. Jamajjeya ojjaña emanojaa cuana ejiojji cojja sahuajje dojo canaje cuaa, equipajaaajji jaa. Ejiojji sahuajo huana yiyoyiyo canaje. Jama poanaje ba'a: —Peno ejiojji poquijjeya oja yajjanaa emanojaa cuana biajje yejje cananaje pojja'a, jjaajaquije'yo pojja'a —poanaje cuana.

¹⁶ Quea huiso dejja cuana cuiñajji sisi cuanajo ba'e, Jenosanena chipi neejo ba'e poeyanaje Jenosanena huasijje. Emanojaa cuana ye canaje quea huiso nee nee; niñepoqui cuana eshahuaajo niñepoquiani cuana ye canaje pea'ai. Ojjaña cuana huaquia'yonaje, jjaaja-qui'yonaje, niñepoqui pajee'yonaje pea'ai. Jesosaja epeeji cuaa jjaaja meesahuaqui ca'yonaje.

Jesosaja epeeji jeanobia canaje cuaa Jesosaja esohui huohuijji

¹⁷ Majoya Eyacuiñajji nijje emimijji etii, Jodio dejja etii cuana, Sanoseo cuana pea'ai quea quene poanaje Jesosaja huoojea'yo esohui huohuijji cuana nijje. Mimi-miminaje jama ba'a: —¡Dee! “¡A'a Jesosajo huohui majjji!” aje oma a'ajjanaje yahuaajo. Jamatii esohui huohuijji ajja. Ecuana shajja'ajja jjima acani. Ojjaña cuana Jesosa nijje jjapeequi mee cani, ecuanaja esohui pajee mee cani —poanaje Jodio etii cuana.

¹⁸ Jamajjeya Jodio etii cuaa Jesosaja huoojea'yo esohui huohuijji cuana iña canaje. Dojo canaje ejjajeanobiaquijji equi yasijje, dejja mimishi cuana nijje pea'aiya. ¹⁹ Jamatii mecashono Eyacuiñajji esohuido-jojji poeyanaje ejjajeanobiaquijji equi yasijje. Esecue jjani ca'apejo cañanaje. Jesosaja huoojea'yo esohui huohuijji cuana dojocuayaqui ca'yonaje esecue yasijje. Huohui canaje jama ba'a: ²⁰ —¡Poqui o'oyacue Eyacuiñajji equi yasijje! ¡Ojjaña cuana huohuiquicue Jesosaja esohui onijje eba'e quea pame neejo, ma Jesosaa huohui canaje shequi o'oya majje! —poanaje esohuido-jojji.

²¹ Jamajjeya mecajjeahua oya cuana poqui o'oyanaje Eyacuiñajji equi yasijje. Jesosaja esohui huohui ca o'oyanaje ojjañaja eshajja'ajjaji.

Ohua esohui huohui canijo tii, Eyacuiñajji nijje emimijji etii cuana, ojjaña Jodio etii cuana pea'ai jjachichaquinaje pea equijo. Jjachichaqui majje sohuinano cuana huoojea canaje equi ejjajeanobiaquijji yasijje Jesosaja huoojea'yo esohui huohuijji jjequiya nisho. ²² Jamatii sohuinano cuana equi ejjajeanobiaquijji yasijje poqui majje ba cañaquinaje Jesosaja huoojea'yo esohui huohuijji chama'. Ba'ajja cañaquinaje; sa'ajja cañaquinaje. Chama' equi ejjajeanobiaquijji. Jamajjeya esohuinano mese cuana poqui o'oyanaje Jodio etii cuana huohui'yohua. ²³ Jama poanaje ba'a: —Esecue jaahuanajji poani nequinaje esecue jjani pejejejo. Esecue jjani eca'a tii nequinaje. Jamatii esecue jjani ca'apejo'yo majje chama' ba canaje Jesosaja epeeji cuana.

²⁴ Eyacuiñajji equi jaahuanajji, Eyacuiñajji nijje emimijji mese cuana pea'ai ma esohui shajja'ajja majje quea mete poanaje: —¿Yajja po majje shai cuayaqui'yonaje, de? ¿Achacua shai poqui'yonaje ma dejja cuana? —poanaje.

²⁵ Majoya pea dejja poeyanaje. Jama huohuime acanjje ba'a: —Dejja cuana ma miquianaja jeanobia'ajja poanaje jjeja nei Eyacuiñajji equijo nequi o'oya, Jesosaja esohui huohui o'oya ca ca poequi ojjaña cuanaja eshajja'ajjaji.

²⁶ Jamajjeya sohuinano huoojeajji poani echaco-sahuajji nijje poquinaje Jesosaja esohui huohuijji cuana jjequi o'oyaa. Jamajjeya quea huiso cuanaja Jesosaja esohui huohuijji cuana quea jea nee poanaje, quea nahue nee poanaje etecueajji. Tecuea jjima nei jjequime acanjje. E'e, dejja mase quea mete jama poanaje ba'a: —E sapa jajahuejjajee ca meiya —poanaje.

²⁷ Jamajjeya jjequi majje nequi mee canaje Jodio etii cuana ani cojja nei. Majoya Jodio etii cuaa jama tecueame acanaje ba'a: ²⁸ —Peno, “¡a'a Jesusajo huohui majajji!” aje mi yahuajo a'ajjanaje. Jamajjeya ¿apiojji acuae Jesusajo huohuipajea'yo jjima aña ojjaña dejja cuana huasijje, ojjaña Jenosanenajo ba'e yasiije so'o? Miquianaaya ca ca oe ecuanaya niñebaña jama ba'a: “Jodio etii cuana ca ca oe Jesosa quecua'yojji epo, quea mimishi jjejojo”. ¿Apiojji acuaeya jama sohuihuoime aña tii so'o? —poanaje Jodio etii cuana.

²⁹ Jesusaja huoojea'yo esohui huohuijji cuaa, Penohua pea'ai jama saja'ame acanaje ba'a: —Ecuaya Eyacuiñajji esohui jayojja nei nei aje'yo, miquianaja sohui jama pojjeama. ³⁰ E'e, yahuajo esejaya etiiquiana cuana Eyacuiñajji nijje jjapeequi'yonaje. Miquianaaya ca ca oe Jesosa acui ecueata'apeejo ba'ehuanasohuae meenaje emano'yojji. Jamatii Eyacuiñajjiya oya shequi mee ca o'oyanaje. ³¹ E'e, Eyacuiñajjiya Jesusa ojjaña jaahuanajji, mimishi cuijea'yojji pea'ai po mee ca'yonaje. Ojaya ebiane mimiji nequi mee ca'yonaje eyajo ojjaña huoojea'yojji epojji. Jamajjeya Jesusa Jodio cuanaja mimishi cuana cuijea ca'yani. Mimishi cuana pajea meesahua ca'yani pea'ai onijje jjapeequianajo. ³² Jamaya ecuanajaya eba. Edojjoshahua Pameja eba pea'ai. Eyacuiñajjiya Edojjoshahua Pame huoojea cani ojaya epeeji cuana que dobiquiya, ojaya ehuohui'yo jayojja jama acanajo —Penohua acanaje.

³³ Penoja esohui shajja'ajja majje Jodio etii cuana quea quene nee nee poanaje. Ojjaña Jesusaja huoojea'yo esohui huohuijji quecua sa acanaje. ³⁴ Jamatii oe dejja ona nijje nequi Jjamani bajjani nequisohuanaje emimijji. Oya Paniseo dejja pea'ai, Moisesija etehue'yo huohuijji, dejja etii quea pame. Jamajjeya ojjaña oya shajja'ajja canaje. Jamajjeya Jjamani jama poanaje ba'a: —¡Iiquio dejja, Jesusaja esohui huohuijji dojqcuayaquicue esecue yasiije! —poanaje. Ojaya esohui shajja'ajja mee sa po ajja.

³⁵ Majoya cuayaquinaje. Jjamaniya sohuihuohui canaje jama ba'a: —Isaeni dejja etii cuana, ma dejja cuana quecua jjimahuaa, ¡ecue sohui shajja'ajja neineicue!

³⁶ ¡Niñeba'yocue! Yahuajo pishana oe dejja Teodasi bajjani emeshi mese jayojja quea ca'a po'ajjanaje. Huohui canaje jama ba'a: “Eya quea pame nee, quea ca'a nee nee. Quea huiso nee nee ecuea eba. ¡Eya shajja'ajja-cue!”

Jamajjeya quea huiso nee nee, beshahua nei 400 huisome dejja cuana onijje jjapeequi'yonaje. Jamatii peaa Todasi quecua ca'yonaje. Todasi quecua ca'yajo, ojaya epeeji cuana ojaya esohui pajea ca'yonaje. ³⁷ Quijje pishana pea shequiajajo, emeshi meseya ojjaña cuana bajjani cuana tehue mee canaje esicojji. Ma shequiajajo pea dejja Jodasa bajjani emeshi mese jayojja po'ajjanaje. Jodasaja esohui shajja'ajja canaje quea huiso dejja cuaa. Jodasa nijjeya emeshi mese jeabichajea'yo sa acanaje. Jamatii Jodasa quecua ca'yajo, ojaya epeeji cuaa oja sohui pajea ca'yonaje. Poqui'yonaje. ³⁸ Jamajjeya ¡a'a Jesusaja epeeji cuana napajji! ¡A'a iña majajji! Eyacuiñajjiya oya cuana huohui meesahua ajjajo, quijje

ojjaña Jesusaja esohui pajea caje'yo pea'ai. ³⁹ Eyacuiñajjiya ca ca oya cuana huohui meesahua cani pojja'a. Jamajjeya ohuaya esohui mi huohuipajea cani. E'e, eseyaya Eyacuiñajji niñeba chana' pojja'a. Jama a sa po'yo ajja eseya —acanaje Jjamaniya.

⁴⁰ Ojjaña Jodio etii cuaa oja sohui shajja'ajja canaje. Jamaya acanaje. Jamajjeya Jesusaja huoojea'yo esohui huohuijji cuana iyaa canaje. Cuiasejjaje canaje acui sisiya. Tecuea ca o'oyanaje jama ba'a: —¡A'a jja oe Jesusajo huohui majajji! —jamaya amajje oya cuana huoojeacuayaje ca'yonaje.

⁴¹ Jamajjeya Jodio etii cuana jeana'yo majje Jesusaja huoojea'yo esohui huohuijji cuana poquinaje. Eyacuiñajji bihuia canaje jama ba'a: —E'e Eyacuiñajji, ecua Jesusa nijje jjapeequianajo, Jodio etii cuaa Jesusa aca poa jayojja ecua acani pea'ai. Jamaya capoahua —miminaje ojjaña.

⁴² Jamajjeya ojjaña pojjaajo Eyacuiñajjiya equijo, pea equi cuanajo pea'ai oya cuana huohuihuohui pajea'yo ajja poanaje esohui quea pame nee Jesusajo. Jama huohuime acaninaje ba'a: —Jesusa Quito Eyacuiñajjiya huoojea'yo ojjaña jaahuanajji e'e jojo nei.

Me oeije beca, 7 dejja babaca ca poa Jesusaja epeeji aema' jaahuanajji

6 Jamajjeya Jesusaja epeeji cuana quea huiso nee nee poanaje. Majoya pea cuana nijje quea bei pojjeama poanaje. Jomajo ani Jodio cuana Jieno meshijo ba'yahua mimijajinaje pea Jodio cuana nijje, Emeoja esohuijji mimiani cuana nijje. Jama poanaje ba'a: —Ojjaña pojjaajo bobi quiañajo miquianaaya quiaña quea huiso aquiana miquea e'ahuemano cuana. Ecuana e'ahuemano huasijje ca ca oe poiji quiaña, de —poanaje Jodio cuana ma Jieno meshijo ba'yahua.

² Jamajjeya ma shajja'ajja majje Jesusaja huoojea'yo esohui huohuijji cuaa ma ome miji beca, 12 huisomeya ojjaña Jesusaja epeeji cuana iyaa canaje. Quea huiso ojee poeyajo, huohui canaje jama ba'a: —Epeeji cuana, ¡bacue! Ecuaya Eyacuiñajjiya esohui cahuohuiyahua. Ojjaña pojjaajo bobi equiajji pojjeama ona huasijje. ³ Jamajjeya ¡miquianaaya me oeije beca, 7 dejja quea pame cuana babacacue bobi quiajji! E'e, ¡joya Edojjoshahua Pame shajja'ajja cani, quea jjashahuabaqui ja'a nee nee poani babacacue! Majoya ecuaaya ma dejja cuana huoojeaje bobi quiajji, pea aquiana cuana pea'ai quiajji ojjaña huasijje, e'ahuemano cuana huasijje pea'ai. ⁴ Jamajjeya ecuanaya Eyacuiñajji nijje mimi majamajaje, ojaya esohui huohui tiitiije pea'ai.

⁵ ¡Iiquio ehuohui'yo jayojja jama a sa poanaje ojjaña Jesusaja epeeji cuana. Jamajjeya Estema babaca canaje Jesusaja epeeji e'ahuemano jaahuanajji. Ohuaya, Estemaa Edojjoshahua Pame shajja'ajja neinei canaje. Eyacuiñajjiya esohui jayojja jama atitii canaje pea'ai. Majoya pea dejja cuana babaca canaje pea'ai: Penipe, Pocono, Nicaino, Timono, Pamenase, Niconasi pea'ai. Oya Niconasi Jodio pojjeama; oya yahuajo Atioquia Eyacuiñajji bihuia ca poa, jjeja ca ca Jesusa nijje jjapee-

quiiani. ⁶ Majoya jiquio 7 epeeji cuana babaca majje Jesusaja huoojea'yo esohui huohuijji cuana huasijje jjequi canaje cuaa. Poeyajo ma dejja cuana sapa biajje Jesusaja huoojea'yo esohui huohuijji cuaa eme' huana canaje. Eyacuiñajji nijje miminaje onajo, o chaco mee-sahuajji. Jamajjeya ojjañaja eba poanaje ma dejja cuana e'ahuemano cuana huasijje aquiiana quiajji epojji.

⁷ Majoya Jenosnenajo quea huiso nee neeya Eyacuiñajjija esohui shajja'ajja canaje. Quea huiso nee nee Jesusa nijje jjepeequinaje. E'e, Jodio etii cuana, Eyacuiñajji nijje emimijji cuana pea'ai Jesusaja epeeji poanaje, ojaya esohui jayojja jama acanaje.

Estema iña majje tecuea canaje Jodio etii cuaa

⁸ Estema Eyacuiñajjija quea jea nee neejo oya quea ca'a nee po mee canaje; quea huiso ma dejjaa ajjima acani ameesahua canaje ojjaña cuanajo. Jamaya ojjaña ba mee canaje oya Jesusaja epeeji nei. ⁹ Jamatii pea Jodio cuana Sinene cuiñajjijo ba'e, Anejanía cuiñajjijo ba'e, Sinisia meshijo ba'e, pea cuana Asia meshijo ba'e pea'aiya Estema emimicuiajejanobiajeajji nisho acanaje. E'e, Jodio cuaa equi bajjani Echacojji epichojea'yoja equi ojee e'anijjijo jjachichaquiiani cuaa Estema emimicuiajejanobiajeajji nisho acanaje. ¹⁰ Edojjoshahua Pameya ca ca Estema quea jjashahuabaqui ja'a nee po mee canaje; oya mimi meesahua canaje pea'ai. Jamajjeya ma Jodio cuana Estema nijje jjamicuiajejanobiajea pajeaquinaje, yajja saja'ame yajji. ¹¹ Oya cuana Estema nijje quea quene nee poanaje. Jamajjeya quecua'yo sa acanaje. Siajjejojji cuana bejjo quia canaje Estema siajje ajji. Jama siajje ame aje acanaje ba'a: —Ecuaya Estema shajja'ajjanaje. Ohuaya ca jja ca oe Eyacuiñajji niñeba cani quea tai. Eseyaya etiiquiiana Moisesi niñeba cani pea'ai —poanaje ma siajjejojji cuana, bejjo sosejje.

¹² Jamajjeya ma shajja'ajja majje ojjaña Jodio cuana Estema nijje quea quene nee nee poanaje. E'e, Jodio etii cuana, Moisesija etehue'yo huohuijji cuana pea'ai quea quene nee poanaje Estema nijje. Jamajjeya Estema que cuajicuaajjibenaje; iña canaje. Dojo canaje Jodio etii cuana ojee ani yasijje. O cojja nei nequi mee canaje. ¹³ Majoya pea siajjejojji cuana jjequi canaje Estemajo siajje ajji. Jama siajje pome poanaje ba'a: —Estemaya ca ca Moisesija etehue'yojo quea tai mimiani, Eyacuiñajjija equijo pea'ai. ¹⁴ E'e, ecuaaya oya shajja'ajjanaje; jama poanaje Estema ba'a: "Jesusaa ma Nasanenajo ba'yahuuaa jiquio equi, Eyacuiñajjija equi jeabichajea caje'yo. Jesusaa eseya Moisesija etehue'yo pajea mee caje'yo ojaya ehuohui'yo jayojja jama eba'ejji" —jama siajje pomeya poanaje Estemajo.

¹⁵ Majoya ojjaña Jodio etii cuaa jomajo aniya Estema ba neinei canaje. Ba canaje ojaya ecojja esohuidojojji jayojja cojjame, quea cojja bei nee nee, quea cojja ja'a nee nee.

Estemaa sohuihuohui canaje Jodio etii cuanaja eshajja'ajjaji nisho

⁷ Majoya Eyacuiñajji nijje emimijji etiiya Estema huohui'ajja canaje jama ba'a: —¿A'a jiquio esohui e'e nei? ¿A'a cuae miyaya jamaya aña?

² Estemaa saja'a canaje jama ba'a: —Ecuaya epeeji cuana, dejja etii cuana pea'ai, ¡shajja'ajjacue mo! Yahuajo nei nei Eyacuiñajji quea pame nee esejaya etiiquiiana Amajama que jjanequipanaquia poa. Jamaya poa Amajama Mesopotamia meshijo ba'yahua, Janani meshi yasijje poe jjimahuajo. ³ Eyacuiñajjija Amajama huohui ca poa jama ba'a: "¡Mesopotamia meshijo a'a ba'e majajji! ¡Jiña'yocue oe! ¡Pea meshi yasijje poquicue! ¡Miquea huapa pojjeama cuana jiña'yocue! Eyaya miya pea meshi ba meeje. Jomajo miya ba'e meeje'yo" aca poa Eyacuiñajjija.

⁴ —Jamajjeya Amajamaa Canea meshijo ba'e poquia poa Janani meshi yasijje. Jomajo nequia poa. Oja chii mano'ya poa. Oja chii mano'yajo, Eyacuiñajjija Amajama huoojea ca'ya poa jiquio meshi yasijje, ma ese jje-yahua nei ba'yani yasijje. ⁵ Jamatii Eyacuiñajjija oya jiquio meshi quia jjima poa ojaya epojji. Que biso nei ojaya nahue mee jjima poa. Eyacuiñajjija oya huohui ca poa jama ba'a: "Amajama, jiquio meshi miquea poaje'yo quijje; mique osecua cuanaja quijje nei poaje'yo pea'ai" oya aca poa Eyacuiñajjija, jamatii Amajama edejja tii nojinoji poa, bacuama' tii poa.

⁶ —E'e, Eyacuiñajjija Amajama huohui ca poa jama ba'a: "E'e jojo nei miquea osecua cuana jiquio meshijo ba'eje'yo quijje nei. Jamatii jjeja jiquio meshi onajaya. Jamajjeya miquea osecua cuana jiquio meshijo nequi poqui caje quea huesha nee pea meshi yasijje. Joma meshijo ba'e dejja cuaa miquea osecua cuana quea huiso napa caje. Chaco tiitii mee caje'yo sosema' quea huiso nee nee shequajame, 400 shequajame. ⁷ Quea mase poaje miquea osecua cuana nijje. Majoya eyaya ma dejja quea mase cuana tecueaje'yo, quea nee nee po meeje'yo pea'ai. Jamajjeya miquea osecua cuana ma meshijo ba'e poqui mee caje'yo jiquio meshi yasijje epoe o'oyajji. Jiquio meshijo tii eya bihuia caje o'oya cuaa. Ecue sohui jayojja jama ba'e caje cuana pea'ai". Jamaya yahuajo nei nei Eyacuiñajjija Amajama aca poa.

⁸ —Majoya Eyacuiñajjija pea esohui huohui ca poa ojjaña ba meeji oya e'e jojo nei Amajama nijje miminaje. Jama poa ba'a: "Amajama, jehusejjajecue cuiishasha biso nei miquea, mique bacua cuanaja, ojjañaja. Jamajjeya ojjaña cuaa ba caje eya e'e jojo nei minijje miminaje, miya, mique osecua quea huiso nee nee cuana jiquio meshi quiaña miquea epo'yojji tii tii" aca poa.

—Jamajjeya Amajamaa Eyacuiñajji shajja'ajja ca poa. Quijje oja bacua Isaaca cuaya poa. Ebacua jjeja cuaya me oeje pea beca peejjima cahuime poajo, Amajamaa oya cuiishasha biso nei jehusejjajecua ca poa. Majoya tii majje Isaacaja bacua Jacobo cuaya poa. Isaacaa oya cuiishasha biso nei jehusejjajecua ca poa. Quijje tii majje

Jacoboja bacua cuana cuaya poa quea huiso nee; 12 huisome dejja poa, epona oe nei poa. Jacobohua oya jayojjaya aca poa, ejeajjiya aca poa jayojjaya. Jacoboja bacua ejja cuana tiinaje ojjaña Isaeni cuanaja etiiquiiana, esejaya, de. ⁹ Ma edoe mese cuana aje echahua mesejo quea quene nee poa, Josejo. Quia ca'ya poa dejja cuana Ejito meshijo ba'e yasijje ejjeshejji sosejje. Echacojji sosema' Jose poa. Jamatii Eyacuiñajjiya Jose pajeya'yo jjiima poa; jaahuana ca poa. ¹⁰ E'e, jamatii pea cuaa oya quea mimishi acanaje, Eyacuiñajjiya Jose jaahuana ca poa. Ejito emeshi mese Panaohua Jose quea jea nee aca poa. Jamajjeya Panaohua Jose ojjaña huoojea'yojji po mee ca poa Ejito meshijo. Panaoja equi jaahuanajji po mee ca poa Jose. ¹¹ Majoya bobi chama' poa Ejito meshijo, Canaani meshijo, ojjaña meshijo pea'ai. Bobimajo quea huiso bobi yasijje po'ya poa. Esejaya etiiquiiana cuana pea'ai bobima' poa.

¹² Majoya Jacobohua jiquio meshijo ba'eya shajja'ajja canaje bobi quea huiso Ejito meshijo yani, Ejito emeshi meseja. Jamajjeya ohuaya esejaya etiiquiiana, oja bacua cuana huoojea ca poa Ejito meshi yasijje bobi jjequiya. ¹³ Quijje poqui o'oyanaje Ejito meshi yasijje bobi jjequi o'oyaa. Poqui o'oyajo Joseya oja doe cuana huohui ca poa: "Eya ca ca iña mique chahua Jose" aca poa.

—Joseya oja o'i cuana dojo ca poa emeshi mese Panao que, ojaya ebajji. ¹⁴ Majoya Joseya oja o'i cuana huoojea ca poa oja chii jjequiya, Jacobo jjequiya. Ojjaña oja huapa pojjeama cuana quea huiso nee nee jjequi ca poa Ejito meshi yasijje, 75 huisome. ¹⁵ Jamajjeya Jacobo ojjaña oja bacua cuana nijje, oja osecua cuana nijje pea'ai poquia poa Ejito meshi yasijje. Jomajo, Ejito meshijo oya mano'ya poa. Jomajo esejaya etiiquiiana cuana quea huiso nee mano'ya poa. ¹⁶ Jacobo, oja bacua beca cuana pea'ai mano'yajo esa' cuana ye ca'ya poa cuaa jiquio meshi yasijje, Siqueme cuiñajji yasijje ohuajeya'yohua. Mei jjani yasijje huananobiajea ca'ya poa, ma yahuaajo Amajamaa jjeshe ca poa Jamonoja meshi, mei jjani ehuananobiajea'yojji, bejjo sosejje —Estemaa acanaje.

¹⁷ —E'e, ma Eyacuiñajjiya yahuaajo nei Amajama huohui ca poa jayojja jama ohuaya aca poa. Isaeni dejja cuana Ejito meshijo ba'e jipapaqui'ya poa; quea huiso nee nee po'ya poa. ¹⁸ Majoya Ejito meshi mese mano poqui'yani poa. Majoya pea cuaya majje oya jayojja poa. Quijje pea dejja Ejito emeshi mese poa, pea Panao. Jose ojaya ba jjiima poa yahuaajo nei mano'yojojo. ¹⁹ Ma emeshi mese eyacua quea mase poa esejaya etiiquiiana nijje. Oya cuana quea mimishi aca poa. Quea yeno nee nee po mee ca poa. E'e, ebacua cuana jeajea mee ca poa emanojeajji —Estemaa acanaje.

²⁰ —Majoya etiiquiianaja bacua Moisesi bajjani cuaya poa. Oya quea bacua bame nee nee poa, pea ebacua cuana quea bame pishana poa. Oja enaeseya oya quehuajje nei jaahuana ca poa oja equijo. Quehuajje tii mee ca poa pea beca peejjima ba'ime. ²¹ Majoya emano'yojji nisho enaeseya Moisesi esecue yasijje dojocuya'ajjaqui ca poa. Jamatii Emeshi mese Panaoja bacuaseya Moisesi ba ca poa. Jjeshe ca poa. Dojo ca

poa tii meeya. Ojaya ebacua poa Moisesi, Panaoja bacuaseja. ²² Jamajjeya Moisesi ojjaña Ejito cuanaja esohui ba mee ca poa Ejito esohui huohuijji cuaa. Jamajjeya Moisesiya Ejito etii cuaa jayojja jama aca poa; quea ja'a nee esohui huohui ca poa pea'ai —Estemaa acanaje.

²³ —Majoya Moisesi peaja ejiojji miji pea'ai shequiajame tii majje, 40 shequiajame po majje jama poa ba'a: "Ecuea huapa pojjeama cuana cabaquiahua, Isaeni cuana". ²⁴ Moisesiya ba cañaquia poa oe Ejito dejjaa Isaeni dejja cuiasejjajea caqui. Ba majje, quenequene majje Moisesiya ma Ejito dejja cuiajea ca poa. Mano'ya poa. ²⁵ E'e, Moisesi jjashahuabaquia poa jama ba'a: "Ecuea huapa pojjeama cuanaja eba Eyacuiñajjiya eya huoojea canaje ona jaahuanaa, eseja meshi yasijje dojohua, echacojji sosema' pojjeama epojji" poanaje Moisesi.

—Jamatii ojaya huapa pojjeama cuanaja Moisesi ba jjiima Eyacuiñajjiya huoojea'yo. ²⁶ E'e, mecajjeahua Moisesi poe o'oyanaje ojaya huapa pojjeama cuana baa. Beca cuana jjacuiaquiani ba majje Moisesiya oya cuana quea bei po mee sa aca poa. Jamajjeya huohui ca poa jama ba'a: "Epeeji cuana, miqianaya huapa pojjeama cuana. ¿Apiojji acuae huapa pojjeama nijje jjacuiaquiani so'o? Jamaya quea tai".

²⁷ —Jamatii oe Jodiohua ma ojaya huapa pojjeama cuiajji nishohua Moisesi iñajjeanajea ca poa; shajja'ajja sa po'yo ajja poa. Jama aca poa ba'a: "¿Aya shai miya ecuana huoojeajji po mee ca'yonaje so'o? ²⁸ ¿A'a eya cuiaje'yo pea'ai? Ecuea eba miyaya oma mecajje Ejito dejja cuia'yonaje.

²⁹ —Ma shajja'ajja majje Moisesi quea mete poa: "Ojjañaja eba eyaya Ejito dejja cuia'yonaje. Ejito emeshi meseya eya cuia ca chana". Jamajjeya quehua poquia poa pea meshi yasijje, Madiani meshi yasijje. Jomajo oya ba'ya poa oja huapa pojjeama cuana nijje. Jomajo ba'e eponajo jjahuanaquia poa. Jomajo oja bacua ejja cuaya poa beca. ³⁰ Jomajo oya ba'ya poa peaja ejiojji miji pea'ai shequiaja huisome, 40 shequiaja. Majoya oya meshi jabojo, Sinai eyiyo pejeje poquianijo, ñajjajja jaahuana poequijo Eyacuiñajji o que poquia poa. Acui tii'ajja jiji mee ca poa. Jamatii ma acui quiyo'yo ajja poa. Eyacuiñajji ma acui jijiqui yiyesamajo jjanequipanaquia poa. ³¹ Jamajjeya Moisesi acui jijiqui ba majje quea mete poa. Jjanequichipiquia poa acui jijiqui baa. Eyacuiñajji acui jijiqui yiyesamajo nequi onijje mimia poa. ³² Jama aca poa ba'a: "Moisesi, eya Eyacuiñajji. Mi-quea etiiquiiana enijje jjapeequia poa, Amajama, Isaaca, Jacobo pea'ai".

—Jamajje Moisesi piopionaje quea mete jjejojo. Acui jijiqui ba maja sa po'yo ajja poa. ³³ Majoya Eyacuiñajjiya oya jama aca poa ba'a: "Moisesi, jiquio meshijo tii eya enequijo, miquea ejiojji shejee huujiajeacue enijje emimijji! ³⁴ Eyaya ecuea epeeji cuana baña Ejito meshijo ba'e. Jomajo Ejito dejja cuaa ecuea epeeji cuana janobajjima nei napa cani eyaya baña pea'ai. Oya cuana quea yeno nee nee pa neineiiani eyaya shajja'ajjaña. Jamajjeya eyaya oya cuana nahueje'yo, oya cuana do-

joje'yo sosema' echaco majajji pojjeama. ¡Poquicue, Moisesi! Eyaya miya huoojeaje o'oya Ejito meshi yasijje" aca poa Eyacuiñajjiya —Estema poanaje.

³⁵ —¡Bacue! Yahuajo nei nei Moisesija huapa pojjeama cuaa oya cajaa aca poa. Shajja'ajja sa po'yo ajja poa: "¿Aya shai miya ecuana huoojea'yoyji po mee canaje so'o?" aca poa cuaa.

—Jamatii Ejito dejja cuanajo sosema' echaco majajji pojjeama joyaya, Eyacuiñajjiya Moisesi huoojea ca poa ojaya epeeji cuana jaahuanajji epojji. Eyacuiñajjiya Moisesi oya cuana dojo meesahua ca poa Ejito dejja cuanajo sosema' echaco majajji pojjeama. E'e, Eyacuiñajji jjanequipanaquia poa acui jijiquijo Moisesija ebajji. ³⁶ Jamajjeya Moisesiya Jodio cuana, Eyacuiñajjiya epeeji cuana Ejito meshijo ba'e dojocuayaqui ca'ya poa pea meshi yasijje epoqui'yoyji. Eyacuiñajjiya Moisesi Ejito meshijo quea huiso ma dejjaa ajjima acani ameesahua ca poa. Ojaya epeeji cuana Ejito meshijo ba'e dojocuaya meesahuaqui ca poa pea meshi yasijje epoqui'yoyji, jiquio meshi yasijje. Bae ena huo'o ojje miji yasijje poqui meesahua ca poa. Bae ena nequiashiña mee ca poa. Majoya ojjaña poquia poa ojje miji yasijje. Meshi quea jabojo, quimajo ba'e meesahua ca poa quea shequiaja huiso nee, peaja ejiojji miji pea'ai shequiajame, 40 shequiajame. ³⁷ Ohuaya, Moisesiya Isaeni dejja cuana jama aca poa ba'a:

"¡Bacue! Eyacuiñajjiya eya huoojea canaje ojaya esohui huohuiya. Quijje ohuaya pea esohui huohuiji e jayojja miquiana que huoojea caje, miquiana nijje meshijo ba'e tii. Ojjaña joya ojaya esohui jayojja jama po ajja aje oe Eyacuiñajjiya cajaa acaje'yo; quea nee nee po mee caje'yo tii".

Jamaya Moisesiya aca poa yahuajo nei nei.

³⁸ —E'e, Moisesi Isaeni cuana nijje poquianijo meshi quea jabo neejo, meshi quimajo oya cuana nijje poquia poa Sinai eyiyo huasijje. Jomajo Sinai eyiyo biajje Eyacuiñajji mimia poa Moisesi nijje. Ma esohui shajja'ajja majje Moisesiya Isaeni cuana huasijje huohui ca poa, esejaya etiiquiana huasijje, esohui eba'e tiitii mee'yoyji. Ma esohui Moisesiya tehue ca poa esejaya ebajji pea'ai.

³⁹ —Jamatii esejaya etiiquiana Moisesija esohui shajja'ajja sa po'yo ajja poa. Oya cuaa ca ca Moisesi niñeba ca poa. Ejito meshi yasijje poqui o'oya sa poa quea mimishi jjejojo. ⁴⁰ Moisesi eyiyo biajje Eyacuiñajji nijje mianinajo, etiiquiana aje oe Anoni jama aca poa ba'a: "Anoni, Eyacuiñajji nisho acue ecuanaja ebihuiajji, ecuana hui dojaji epojji, ejiojji jaahuanajji. Moisesiya eseya Ejito meshijo ba'e jjequi canaje jiquio meshi tai yasijje; quea jabojo manojeyo. Jjeya Moisesi chama'. ¿Achacua shai oya poquinaje? Ecuanaja ba jjima" poa esejaya etiiquiana cuana —Estemaa aca poa.

⁴¹ —Jamajjeya etiiquiana cuaa eyacuiñajji nisho pana ca poa ana'aia bacua nisho, mei huo'o. Aquiana cuana dahua ca poa ma eyacuiñajji nisho bihuijji. Ojee ijji'ajja poa. Quea bihui nee jayojja poa oja panaa shajja'ajja cani poso. ⁴² Etiiquiana cuaa Eyacuiñajji pojjeama bihuia ca poa, oja pana, majameta cuana bihuia sa

aca poa. Jamajjeya shajjama' jjejojya Eyacuiñajji esejaya etiiquiana nijje jjapeepajeaquia poa. E'e, jama poanaje ba'a: "Oya cuana quea jjashahuabaqui tai poani joyaya eyaya oya cuana jaahuana maja ajja poaje'yo, ecuea esohui eba nisho jjejojo". E'e, ma etiiquiana quea mimishijo yahuajo nei nei Eyacuiñajji esohui huohuijji cuaa tehue ca poa jama ba'a:

"Isaeni dejja cuana, e bihuijji pojjeama miquianaaya huo quea huiso quecuanaje quea huiso shequiajame, 40 shequiajame meshi jabojo, dejjama' meshijo.

Aquiana cuana dahuanaje pea'ai e bihuijji pojjeama.

⁴³ Chojja. Miquianaaya ca ca oe daqui equi sisi yayji dojo tiitii nequinaje eyacuiñajji nisho Monoca bihuijji.

Ma daqui equijo nequianaje eyacuiñajji nisho Monoca bajjani. Majameta Sepani bajjani aje oe bihuia tiitinaje pea'ai. E'e, majameta miquianajaya eyacuiñajji nisho poanaje. Miquianaaya aje oe epana'yo cuana bihuia aninaje pea'ai. Eya bihuia jjima miquianajaya. Jamaya quea tai. Jamajjeya eyaya pea dejja cuaa miquianaya iña meesahuae quea huesha nee nee edojo'yoyji pea meshi yasijje, Babinonia meshi yasijje dojo meeje. Jomajo quea yeno po meeje ejjabahuejjaquijji, enijje e'e jojo nei ejjapeequijji".

Jamaya yahuajo nei nei tehue ca poa esejaya etiiquiana huasijje —Estemaa acanaje—. ⁴⁴ E'e, esejaya etiiquiana Eyacuiñajji daqui equijo Eyacuiñajji nijje mianinaje. Ma daqui equi huacuaya huacuaya quea huesha nee dojo canequinaje meshi jabojo. E'e, Moisesi Eyacuiñajjiya huohui ca poa: "¡Daqui equi iyacue enijje emimijji! Jama iyame acue ba'a" aca poa. E'e, Moisesi daqui equi cahui ba mee ca poa. Eyacuiñajji esohui jayojja neiya daqui equi iya ca poa, Moisesiya.

⁴⁵ Majoya Moisesi mano'yajo, esejaya etiiquiana yahuajo nei nei ba'eya Josoe nijjeya ma daqui equi meshi jabojo dojo majamaja canequia poa jiquio meshijo eba'e'yoyji. Jodio pojjeama cuaa ca ca jiquio Jodioja meshi eba'e'yoyji aca poa. Jamajjeya Eyacuiñajjiya Josoe huoojea meesahua ca poa Jodio pojjeama cuana; mete mee ca poa. Enejaya etiiquiana cuana jiquio meshi yasijje ba'e mee ca poa. E'e, ma daqui equi nequia poa jiquio meshijo, Jodioja meshijo. Jamaya nequi tiitia poa esejaya etiiquiana Dabi ba'e jjimahuajo.

⁴⁶ —Emeshi mese Dabi quea pame nee nee, Eyacuiñajji quea boti nee nee poa. Jaahuana ca'ya poa pea'ai. Jamajjeya Dabiya Eyacuiñajji equi iya sa aca poa daqui equi pojjeama, mei equi quea bame iya sa aca poa Eyacuiñajji bihuijji. Ojjaña Jacoboja osecua cuana Eyacuiñajji bihuia mee sa aca poa mei equi eyacuajo. Jamatii Dabi mei equi iya mee jjima poa Eyacuiñajji. ⁴⁷ Dabiya bacua ejjaa Sanomo bajjaniya ca ca mei equi quea bame nee iya ca poa Eyacuiñajji bihuijji.

⁴⁸ —Eyacuiñajji quea pame, quea ca'a nee nee ca ca equi cuanajo ba'e ajja, dejjaja equijo. E'e, yahuajo nei Eyacuiñajji esohui huohuijji cuaa oja sohui tehue ca'ya poa jama ba'a:

⁴⁹ "Eya Eyacuiñajji, eyajo ojjaña huoojea'yoyji poani. Ojjaña meshi cuanajo pea'ai eya Emeshi Mese nei poa-

ni. Ojjaña ecuea aquiana. Jamajjeya ¿yajja acuaeya equi iyaje so'o e ba'ejji? ¿A'a cuae eya equijo jomishocaje? Eya hueahuea ajja. ⁵⁰ E'e, yahuajo eyaya ojjaña aquiana cuana pana poa".

Jamaya yahuajo nei tehue ca poa Eyacuiñajjija esohui —Estemaa acanaje.

⁵¹ —Miquianaya ca ca oe quea sapa ca'a, jashahua-baqui ajja. Edojjoshahua Pameja ehuhui'yo a'ajja tii. Miquianajaya etiiquiana cuana quea mimishi nee jayojja jama poani. ⁵² E'e, etiiquiaa aje oe yahuajo ojjaña Eyacuiñajjija esohui huohuijji cuana quea mimishi aca'ya poa. E'e, yahuajo nei Eyacuiñajjija esohui huohuijji cuaa huohui ca poa Jesosajo jama ba'a: "Quiije Eyacuiñajjija huoojea'yo ojjaña jaahuanajji poeje. Oya quea pame nee nee, mimishi'ama nei nei poaje" aca poa cuaa. Jamatii miquianajaya etiiquiaa ma esohui huohuijji cuana quecua ca'ya poa. Oya jayojja jjeya miquianaaya Jesosa iña meesahanaje onaja quecua'yojji. ⁵³ Yahuajo Eyacuiñajjija esohuidojojjiya quea huiso nee neeya ba canaje Eyacuiñajjija sohuihuohui caqui miquianajaya etiiquiana huasijje. Majoya etiiquiaa ma esohui miquiana huasijje huohui ca poa. Jamatii ma esohui jayojja jama ba'e sa po'yo aja miquianaya —Estemaa acanaje.

Estema sapa jajahuejjajea ca'yonaje cuaa

⁵⁴ Estemaja esohui shajja'ajja majje quea quene nee poanaje Jodio dejja cuana. Ese' ijjiyai canaje quea maseya jjejojo. ⁵⁵ Jamatii Edojjoshahua Pameya Estemajo nequiya oya eyahuasijje ba meesahua canaje jjeyahua nei. Eyajo ba mee canaje Eyacuiñajji quea jeajahua nee nee, quea ca'a nee nee. Jesosa ba mee canaje pea'ai, Eyacuiñajji pejejo. ⁵⁶ Jamajjeya Estema jama poanaje ba'a: —¡Bacue! Eyaya esecue eca'apejo nequi baña eyajo. Ojjañaja Edoe Mese Jesosa baña Eyacuiñajji ebianeijje nequi ojjaña huoojea'yojji —Estema poanaje.

⁵⁷ Jodio dejja cuana ma shajja'ajja majje quea quene nee nee poanaje. Estemaja esohui Jesosajo eshajja'ajja poaje jjejojo eme sisiya eshajja huejja noco canaje. Taaa majje ojjaña cuajicuaajjebenaje Estema que. ⁵⁸ Estema iña canaje, cuiñajji esecue yasijje dojocuayaqui canaje. Mei jjeshe majje Estema sapa jajahuejjajea canaje meiya. Dejja cuaa ma Estema jajahuejjajejji epo cuaa ojaya daqui nei cuana huijjijajea canaje; Sanoni quia canaje ejaahuanajji.

⁵⁹ Onaaya Estema sapa jajahuejja canijo tii, Estema Jesosa nijje miminaje jama ba'a: —Jesosa, ecuea Emeshi Mese nei, ¡ecuea edojjoshahua jjequisohuacue eyahuasijje!

⁶⁰ Ecui'oshajjajo nequi majje Jesosa nijje mimi neineinaje jama ba'a: —Emeshi Mese nei, ¡jiquio dejja cuana quea mimishi poanija mimishi cuijea'yocue! —jamaya mimi majje Estema mano'yonaje. Chama'yo tii poanaje.

Pabohua Jesosaja epeejji cuana napa canaje

8 Pea cuaa Estema sapa jajahuejjajea canij ba majje Sanoni jashahuabaquinaje jama ba'a: —E'e jama-ya, casapa jajahuejjajea cahua, de —poanaje, Estema Jesosajo siajje poani posojo jamaya poanaje Sanoni.

Majoya ma pojajajo tii Jesosaja epeejji pojjeama cuaa Jesosaja epeejji cuana janobajjima nei napa canaje Jenosanenajo ba'eca cuaa. Jamajjeya beshahua nei ojjaña Jesosaja epeejji cuana poquinaje pea cuiñajji cuana Jodio meshi yasijje; Samania meshi yasijje pea'ai poquinaje. Jesosaja huoojea'yo esohui huohuijji cuana ca ca oe poqui jjima poanaje; Jenosanenajo nequinaje tii.

² Jamajjeya dejja quea pame nee cuaa, Jesosaja epeejji cuaa Estema dojo canaje mojea'yohua. Pa nei-nei'yonaje ojo pea'ai.

³ Sanoniya ca ca quea tai aca'yonaje Jesosaja epeejji cuana. Napa huicha'a huicha'a ca'yonaje ojjaña equijo ba'e. Dejja cuana, ponaña pea'ai iña majje dojo canaje equi ejjajeanobiaquijji yasijje jeanobiaa. Dejja mimishi cuana nijje ejeanobia jaanaje.

Penipeya esohui huohuiqui canaje Samania meshijo

⁴ Jesosaja epeejji cuana ojjaña meshi cuana huasijje poquinaje. Esohui huohui capoquinaje Jesosaja. ⁵ Penipe ca ca poquinaje Samania meshi yasijje. Jomajo Jesosa Quitojo huohui canaje ojjaña cuana huasijje: —Jesosa Eyacuiñajjija huoojea'yo ojjaña jaahuanajji, de —Penipeya acanaje.

⁶ Ojjaña cuaa Penipeya esohui shajja'ajja canaje. Penipeya ma dejjaa ajjima acani ba majje ojjaña ojaya esohui shajja'ajja neinei canaje. ⁷ E'e, eshahua cuana dejjajo nequi taaa neinei majje cuayaqui'yonaje ma Penipeya huoojeacuayajea canaje. Jeo'ajja cuana ohuaya jeo mee canaje. Jiojjijajja jajajojji jeapiihui meequi ca'yonaje pea'ai Eyacuiñajji nijjeya. ⁸ Jamajjeya ojjaña cuana Samania meshijo ba'eca quea bihui nee nee poanaje.

⁹ Samania meshijo ba'enaje eyamiquecua Simoni bajjani. Edosiquiaa oya ma dejjaa ajjima acani ameesahua canaje quea huiso shequiajame. Jamajjeya quea huiso cuana Samania meshijo ba'eca quea mete nee poanaje Simonijo. Simoniya huohui canaje jama ba'a: —Eya ca iña quea ca'a nee nee. Ojjaña ecuea eba, de.

¹⁰ Jamajjeya ojjaña cuaa ojaya esohui shajja'ajja neinei canaje, emeshi mese cuaa, echacojji cuaa, dejja tii cuaa, esho'iquiana cuaa pea'ai. Ojo jama huohuime acanaje cuaa ba'a: —Jiquio dejja, Simoni Eyacuiñajjiya ameesahua canij —poso acanaje cuaa—, ma dejjaa ajjima acani quea huiso nee.

¹¹ E'e de, quea huiso shequiajame ohuaya ma dejjaa ajjima acani acajo, quea huiso ojo quea mete poanaje. Oja sohui shajja'ajja canaje ojjaña.

¹² Jamatii Penipeya esohui quea pame nee Jesosa Quitojo huohui canaje jama ba'a: —Jesosa Quito Eyacuiñajji nijje eyajo nequi, ojjaña huoojea'yojji poani.

Onijje jjapeequi'yajo ohuaya miya ba'e tiitii mee caje'yo onijje eyajo —acanjaje Penipeya.

Quea huiso nee nee dejja, ponaña pea'ai Penipeja esohui Jesusajo shajja'ajja majje Jesosa nijje jjapeequinaje. Jamajjeya Penipeya oya cuana Eyacuiñajjijo besa mee canaje enajo.

¹³ Majoya Simoniya pea'ai Penipeja esohui shajja'ajja canaje. Jesosa nijje jjapeequinaje. Penipeya oya Eyacuiñajjijo besa mee canaje pea'ai. Majoya oya Simoni Penipe nijje po'ayequi nequinaje. Penipeja esohui shajja'ajja huicha'a huicha'a canaje. Eyacuiñajjija Penipe ma dejjaa ajjima acani ameesahua canaje. Jamajjeya ma ba majje Simoni jjabab'one neineiquinaje.

¹⁴ Majoya Jesusaja huoojea'yo esohui huohuijji cuaa Jenosanenajo nequiya onaja esohui shajja'ajja canaje. Jama acanjaje cuaa ba'a: —Quea huiso nee Samania meshijo ba'eya Eyacuiñajjija esohui shajja'ajja canaje. Jesosa nijje jjapeequinaje quea huiso nee nee, de —acanjaje cuaa.

Jamajjeya ma shajja'ajja majje Jesusaja epeeji etii cuaa Peno, Huani pea'ai Samania meshi yasijje huoojea canaje Jesusaja epeeji eyacua cuana baa. ¹⁵ Samania huasijje poqui majje Peno, Huani pea'aiya Jesusaja epeeji cuana huasijje Eyacuiñajji nijje miminaje jama ba'a: —Eyacuiñajji, ¡Edojjoshahua Pame huoojeacue jiquio miquea epeeji cuana huasijje dobiqiyai!

¹⁶ E'e, yahuajo Edojjoshahua Pameja Samania meshijo ba'e cuana huasijje dobiqii jjiima. Oya cuana ca ca oe Emeshi Mese nei Jesosa nijje jjapeequi'yajo pea cuaa oya cuana Eyacuiñajjijo besa mee canaje enajo.

¹⁷ Jamajjeya Penohua, Huaniya pea'ai poe majje ma epeeji cuana sapa biajje eme' huana canaje. Peno Eyacuiñajji nijje mimiajo Edojjoshahua Pame ona que dobiqiyonaje.

¹⁸ Simoniya ba canequinaje Jesusaja huoojea'yo esohui huohuijjiya Jesusaja epeeji cuanaja sapa biajje eme' huana cajo, Edojjoshahua Pame ona huasijje dobiquinaje. Ba majje Simoni jashahuaba taiquinaje jama ba'a: —Eyaya Edojjoshahua jjesheje bejjo sosejje.

¹⁹ Jamajjeya ohuaya Peno, Huani pea'ai jama acanjaje ba'a: —Mi jayojja jama a sa aña eyaya. Jamajjeya eyaya dejja cuanaja sapa biajje eme' huana majje Edojjoshahua Pame dobiqii meeje'yo pea'ai. ¡Che mo eya jama a'yocue miyaya bejjo sosejje! —acanjaje Simoniya.

²⁰ Ma shajja'ajja majje Penohua oya tecuea canaje jama ba'a: —Simoni, miya jashahuaba taiquianijojo Eyacuiñajjiya miya mano mee ca chana'. Miquea ejjeshejji pea'ai chama'yo tii po mee ca chana'. Miya jashahuaba taiquiani; Eyacuiñajjiya Edojjoshahua Pame huoojea caje'yo ejjeshejji sosejje poso miyaya aña. ²¹ Chojja, Simoni. Miyaya Edojjoshahua Pame bejjo sosejje ejjeshejji pojjeama. Eyacuiñajjija eba miya quea tai jashahuabaquiani, quea mimishi. Jamajjeya ecuaa nijje echacojji pojjeama Eyacuiñajjijo. ²² Jamajjeya ¡miquea ejjashahuabaquijji pajea'yocue! ¡Eyacuiñajji nijje e'e jojo nei mimicue! “¡Eyacuiñajji, enijje a'a quea quene pojji!” acue. “¡Ecuea mimishi, ecuea ejjashahuaba taiquijji

pajea meesahua'yocue!” acue. ²³ E'e Simoni, ecuea eba miquea ejjashahuabaquijji quea tai. Ecuaaya Edosiquiana nijjeya ma dejjaa ajjima acani anaje poso aña miyaya. Jama a sa aña pea'ai, de. Miquea mimishi cuana pajea meeme'yo ajja pea'ai. Quea nee nee poaje miya, Simoni —Peno poanaje.

²⁴ Peno shajja'ajja majje Simoni quea mete nee nee poanaje. Jamajjeya jama acanjaje ba'a: —Peno, Huani pea'ai, ¡Eyacuiñajji nijje mimicue ejo! Jamajjeya Eyacuiñajjiya ecuea mimishi cuana cuijea caje'yo. Miquea esohui jayojja jama pojjeama ohuaya eya acaje'yo —poanaje.

²⁵ Majoya Penohua, Huaniya pea'ai Emeshi Mese nei Jesusaja esohui huohui majamaja canaje quea huiso cuana huasijje. Majoya oya cuana poqui o'oyanaje Jenosanena huasijje. Poquije ojjaña cuiñajji cuana huasijje dobiqipoquinaje. Ojjaña Samania meshijo ba'eca cuana huasijje Jesusaja esohui quea pame nee huohui capoquinaje. Majoya esohui huohui majje Jenosanena huasijje poqui o'oyanaje.

Penipeya Etiopia dejja huasijje Jesusaja esohui huohuiqui canaje

²⁶ Majoya oe esohuidojojjiya miminaje Penipe nijje. Jama poanaje ba'a: —Penipe, ¡poquicue miya eeno poeji miji jaa ejiojjiije, ma Yasa cuiñajji yasijje quea huesha nee nee epoquijji, ma ejiojjiije Jenosanenajo ba'e cuana poquiani Yasa cuiñajji yasijje, meshi jabo yejje majje!

²⁷ Majoya Penipe poquinaje. Poquijeya dejja Etiopia meshijo ba'e ebiñajja cajja'yo ba canananaje. Oya Etiopia dejja etii, emeshi mese epona Canase bajjanijo chacochoacani, aquiana quea nahue, bejjo cuana jaahuanajji. Oya yahuajo poquinaje Jenosanena huasijje Eyacuiñajji bihuiaa. ²⁸ Jjeya ca ca oja meshi yasijje poqui o'oyani, ejiojjiije. Mapichiya oya dojo cani aquiana dojojji biajje ani. Poquijeya esohui ba capoquinaje, ma yahuajo nei Eyacuiñajjija esohui huohuijji Isaiaa tehue ca poa ba capoquinaje. ²⁹ Jamajjeya Edojjoshahua Pame Penipe nijje miminaje jama ba'a: —¡Aquiana dojojji yasijje poquicue miya, Etiopia dejja etii yasijje!

³⁰ Jamajjeya Penipe poquicujinaje ma dejja que. Shajja'ajja cañaquinaje ohuaya esohui acani. Shajja'ajja majje huohui'ajja canaje jama ba'a: —¿A'a ma esohui miquea eba? ¿A'a miquea quea ja'a nee? —Penipeya acanjaje.

³¹ Etiopia dejjaa Penipe saja'a canaje jama ba'a: —Chojja. Ecuea ba jjiima. Ecuea quea quehua. ¿Yajjajo ebajji ca huohui jjiima, de? ¡E'e pojja'a miyaya eya ba meesahuacue jiquio esohui!

Jamajjeya ohuaya Penipe iyaa canaje. Anioque mee canaje o pejeje, aquiana dojojji biajje. ³² Majoya Eyacuiñajjija esohui ba canaje ma Isaiaa yahuajo tehue ca poa Jesusajo, Eyacuiñajjija huoojea'yo ojjaña jaahuanajji jama ba'a:

“Ñajjajja dojo cani quecua'yohua jayojja jama onaaya oya iña caje equecua'yojji. Ñajjajja ña dede canijo,

quea nee po majje ñajjajja siasia ajja jama jayojja oya mimipanajea ajja poaje onaa oya napa canijo.

³³ Oya mimishi'ama. Jamatii oya quea mimishi acaje cuaa. Oya siajje acaje cuaa jama ba'a: —Oya quea mimishi —acaje. Ojo siajje poaje. Quea mimishi nee nee de, oya acaje onijje nequi cuaa; oya quecua caje'yo pea'ai. Chama'yo tii acaje'yo".

Jamaya yahuajo Isaiaa tehue ca poa Jesusajo.

³⁴ Ba majje Etiopia dejjaa Penipe huohui'ajja canaje jama ba'a: —¿Ache dejjajo acuae huohui canaje Isaiaa? ¡Huohuicue mo oe! E'e pojja'a ohuaya pea dejjajo huohui ca poa. E'e pojja'a huohui ca poa ojaya emanoyojjijo —acanjaje Etiopia dejjaa.

³⁵ —E'e —Penipeya acanjaje. Majoya ohuaya Eyacuiñajjija esohui etehue'yo huohui capoquinaje quea huiso. Esohui quea pame nee Jesusajo huohui canaje.

³⁶ Majoya oya cuana poquianijjo, ena huasijje poeyanaje. Jamajjeya ma Etiopia dejja jama poanjaje ba'a: —¡Bacue, ena ani ba'a! Eya pea'ai Jesosa nijje jjapeequije. Jamajjeya ¡besa meecue mo Eyacuiñajjijo jjeja nei!

³⁷ Penipeya saja'a canaje jama ba'a: —E'e, miya Jesusaja epeeji e'e jojo nei poanijjo, eyaya miya besa meeje Eyacuiñajjijo —acanjaje.

—E'e jojo nei Jesosa Quito Eyacuiñajjija Bacua Ejja, Eyacuiñajjija huoojea'yo ojjaña jaahuanajji. E'e de, jamaya eyaya baña —Etiopia dejjaa acanjaje.

³⁸ Jamajjeya ohuaya echacojji acanjaje jama ba'a: —¡Mapichi cuana nequiñaqui meecue!

Mapichi nequiñaqui majje Penipe Etiopia dejja nijje ena huasijje poquinaje. Etiopia dejja besa mee canaje Eyacuiñajjijo. ³⁹ Majoya Penipeya Etiopia dejja besa mee'yo majje, jjequicuaya'yo majje Edojjoshahua Pameya Penipe dojo canaje pea meshi yasijje. Etiopia dejjaja Penipe ba o'oya jjima poanjaje. Jamatii oja meshi yasijje poqui'yonaje quea bihui nee nee; Jesosa nijje jjapeequi'yonaje.

⁴⁰ Jjeyahua nei Edojjoshahua Pameya Penipe dojo canaje quea huesha nee esohui quea pame Jesusajo huohuiya. Asota cuiñajji yasijje anioqueñaquinaje. Majoya Asoto cuiñajjijo ani poqui majje quea huiso cuiñajji yasijje poquijeya Eyacuiñajjija esohui huohui cananaje. Quea huesha esohui huohuiqui canaje Sesanea cuiñajji yasijje, Penipeya.

Sanoni Jesosa Quito nijje jjapeequi'yonaje

9 Penipeya quea huesha sohuihuohui canijo, Sanoniya Emeshi Mese nei Jesusaja epeeji cuana niñeba majamaja canaje. Quecua sa acanjaje. Jamajjeya oya poquinaje joya Eyacuiñajji nijje mimiani etii yasijje.

² Poe majje Sanoni onijje jama poanjaje ba'a: —¡Esohui tehuecue ojjaña Jodio cuana Damasico cuiñajjijo ba'e yasijje, ojjaña Jodio cuanaja ebajji, equi ojee ejjachichacuijijjo anija ebajji! ¡Jama acue ba'a: "¡Sanoni ojjaña Jesusaja epeeji poani cuana iña meecue! ¡Jeyo majje dojo meecue Jenosanena huasijje jeanobiaa, dejja, ponapaña pea'ai!" acue! —poanjaje Sanoni Jodio etii nijje.

—E'e —poanjaje Jodio dejja—, jamaya ejja'aqui.

³ Majoya Sanoni poquinaje Damasico huasijje Jesusaja epeeji cuana iña nisho. Ejiojijje poquije Damasico chipi nee yasijje nequiñaquinaje. Eyajo ejijijjiya quea ja'a neeya jeaja'a canaje Sanoni. Quea jeajahua nee nee poanjaje. ⁴ Jamajjeya Sanoni meshi yasijje oquenaje. Shajja'ajja canaje pea eyajo onijje mimiani jama ba'a: —¡Sanoni, Sanoni! ¿Apiojji acuaeya miyaya eya napaña so'o?

⁵ —¿Ae bajjani miya? —Sanoni poanjaje.

—Eya Jesosa. Miyaya aje oe eya napaña —acanjaje Jesusaa eyajo—. ⁶ ¡Nequisohuacue miya! ¡Poquicue Damasico huasijje! Jomajo peaa miya huohui caje miquea echacojji ma miyaya ejo quijje aje —Jesusa poanjaje.

⁷ Pea cuana Sanoni nijje poquiani nequiñaquinaje. Pea eyajo mimiani shajja'ajja canaje. Esohui ca ca oe shajja'ajja jjima. Oya cuanaja ba jjima eyajo mimiani. Jamajjeya quea mete nee poanjaje. Mimimimi ajja poanjaje.

⁸ Majoya Sanoni nequisohuanaje. Jjabapojja'ajjaqui'yonaje. Cojjama', de. Pea cuaa oya mepejejea canaje Damasico huasijje. ⁹ Jomajo oya nequinaje pea beca peejjima cahuime cojjama'. Eyacuiñajji nijje mimi tiitianijjo ijija'ijja jjima poanjaje Sanoni.

¹⁰ Jesusaja epeeji Anania bajjani Damasicojo ba'enaje. Ma mecajje Eyacuiñajjiya Anania jjacahuiba meequi canaje Emeshi Mese nei Jesusaa oya jama iyaame acanjaje ba'a: —¡Anania, shajja'ajjacue mo!

—¿Yajja? Jesosa, miya ecuea Emeshi Mese nei. Eyaya miya shajja'ajjaña —Anania poanjaje.

¹¹ Emeshi Mese neiya oya huohui canaje jama ba'a: —Anania, ¡poquicue ejiojji yasijje bajjani Ejiojji Epii Nei! ¡Jonasaja equi yasijje poquicue! Dobiqui majje Jonasa huohui'ajjacue jama ba'a: "¿Achejo jaa Sanoni, ma yahuajo Tanaso cuiñajjijo ba'ya poa? Eya onijje mimije" acue, Anania. ¹² E'e, jjeyahua nei Sanoni enijje mimiani. Eyaya Sanoni jjacahuibaqui meenaje pea'ai jama ba'a: Miya o que poanjaje. Oja sapa biajje eme' huananaje. Jamajjeya oya quea cojja ja'a po'yonaje —Jesusaa acanjaje. Jamaya Anania jjacahuibaqui mee canaje.

¹³ Majoya Anania Jesosa nijje jama poanjaje ba'a:

—Emeshi Mese nei Jesosa, ecuea eba Sanoniya miquea epeeji cuana Jenosanenajo ba'e napa canaje quea huiso nee. Jamaya ojjaña eya huohui canaje.

¹⁴ Oya jiquiacua poeyanaje ojjaña miquea epeeji cuana iña Jenosanena huasijje ejeanobiajeaquijji. Jodio etiiya oya huoojea canaje, Jodio Eyacuiñajji nijje emimijji etiiya. Eya quea mete Sanonijjo, de —Anania poanjaje.

¹⁵ Majoya Jesusaa Anania huoojea canaje jama ba'a: —¡Poquicue miya, Sanoni que! Oya eyaya babacanjaje ecuea esohui huohuijji epo'yojji. Ecuea esohui ohuaya huohui caje Jodio pojjeama cuana huasijje, emeshi mese cuana huasijje, ojjaña pea Jodio dejja cuana ojjaña meshijo ba'e yasijje pea'ai. ¹⁶ Ecuea esohui huohuijji oja onaaya oya quea huiso napa caje'yo. Quea nee nee poaje oya. Jamaya eyaya oya ba meeje —acanjaje Jesusaa. Jamaya Anania jjacahuibaquinaje.

¹⁷ Majoya ecahuijaa shequi'yo majje Anania poquina-
je Jonasaja equi yasijje, Sanoni jaa huasijje poquinaje.
Sanonija sapa biajje eme' huana canaje Ananiaa. Jama
acanaje ba'a: —Epeeji Sanoni, esejaya Emeshi Mese
nei Jesusaa eya huoojea canaje mi que. E'e, miyaya
ejiojijje poejeja Jesosa banaje eyajo. Maaya eya huoo-
jea canaje mi quea cojja ja'a po mee'yohua. Jesusaa
Edojjoshahua Pame mi yasijje dobiqúi mee caje'yo
pea'ai —acanaje Ananiaa.

¹⁸ Anania onijje mimianijo tii, oja sapa biajje eme
huana cajo, aquiana esope jayojja Sanonija ecojjajo
ani, ma o quea cojja misi po meeji poani oquequinaje.
Jamajjeya quea cojja ja'a nee po o'oyanaje Sanoni. Ja-
majjeya nequisohua'yajo, Ananiaa Sanoni Eyacuiñajji
besa mee canaje Eyacuiñajji nijje epo'yojji. ¹⁹ Majoya ij-
jia'ijjia majje Sanoni quea ca'a po'yonaje.

Sanoniya Jesusaja esohui huohui canaje Damascicojo

Oe pojji cahuime Sanoni Jesusaja epeeji cuana nijje
nequinaje Damascicojo. ²⁰ Jodio cuanaja equi ojee ejja-
chichaquijji yasijje poquinaje Jesusaja esohui huohui-
ya. Jama huohuime acanaje ba'a: —Jesosa Eyacuiñajjija
Bacua Ejja e'e jojo nei —Sanoniya acanaje.

²¹ Jodio dejja cuana ma equijo ani oja esohui shaj-
ja'ajja majje quea mete nee nee poanaje. Jama
huohuime acanaje ba'a: —¿Apiojji acuae jiquio Sanoni
mimiani Jesusajo? Jenosanenajo ohuaya quea huiso
cuana cuia canaje Jesosa nijje mimianijjo. Oya jiquia-
cua poeyanaje Jesusaja epeeji cuana iña. Eyacuiñajji
nijje emimijji etii cuana huasijje dojo sa acanaje, Jen-
sanena huasijje. Jjeya ca ca Sanoni Jesusajo mimi maja-
majani. ¿Yajjajo shai ohuaya Jesusaja esohui huohui
cani?

²² Jamatii Sanoniya Jodio cuana Damascicojo ba'e
sohuihuohui neinei canaje. Jama atiitii canaje ba'a:
—Jesosa e'e jojo nei Eyacuiñajjija huoojea'yo ojjaña
jaahuanajji, Quito —Sanoniya acanaje.

Sanoniya quea ja'a nee nee huohui canaje Jesusajo.
Jamatii Jodio cuana onijje jjamimicuijjeanobiqui nequi-
naje quea huiso. Quea quene nee poanaje: —¿Yajja
acuae seya aje so'o? Jesusaja esohui huohuipajea'yo
ajja. ¡Ejjacuijjeaqui'yo Sanoni! —poanaje cuana.

²³ Jamajjeya quijje pishana Jodio etii quea quene nee
nee po majje jjachichaquinaje. Ojee mimimiminaje Sa-
noni cuia'yoyji. ²⁴ Pea cuaa ca ca Sanoni huohui canaje
jama ba'a: —Jodio dejja cuaa miya quecua sa acani. Oj-
jaña pojjaajo, mecajje pea'ai ohuaya cuiñajji esecue jja-
ni pejejejo miya ishoa'ajja ca ani ecua'yoyji —acanaje.

²⁵ Jamajjeya oe mecajje oja epeeji cuaa Sanoni
quehua poqui mee ca'yonaje. E'e, cuiñajji mei jiyo
ao'ao biajje oya cuana jaasohuaquinaje. Jomajo Sanoni
jjepai aijo jjabioquinaje. Majoya oja epeeji cuaa oya
jjapashineijje jeaoquea ca'yonaje meshi yasijje, cuiñajji
secue yasijje. Majoya Sanoni Jenosanena huasijje po-
qui'yonaje.

²⁶ Jamajjeya Jenosanena huasijje poqui'yo majje Sa-
noni Jesusaja epeeji cuana nijje jjapeequi sa poanaje.
Jamatii Sanoni Jesusaja epeeji pojjeama poso acanaje

cuaa. Ojo quea mete nee nee poanaje: “Eya iña ca cha-
na'” poanaje cuana. ²⁷ Majoya Jesusaja epeejiya Bena-
beya Sanoni dojo canaje Jesusaja huoojea'yo esohui
huohuijji cuana huasijje. Oya cuana huohui canaje ja-
ma ba'a: —Epeeji cuana, ja'a quea mete pojji Sanoni-
jo! E'e, jiquio Sanoniya ejiojijje poquijeya Emeshi Mese
nei Jesosa ba canaje. Jesosa onijje miminaje pea'ai.
Majoya ohuaya Jesusaja esohui huohui neinei canaje
Damasicojo nequiya —acanaje Benabeya.

²⁸ Jamajjeya Sanoni Jesusaja huoojea'yo esohui
huohuijji cuana nijje ba'enaje. Ohuaya onijjeya Jenosa-
nenajo mete'ama huohui mee canananaje Jesusaja
esohui. ²⁹ Jomajo yaninaje Jodio cuana Jienoja esohuijo
mimiani. Sanoni ona nijje mimiquinaje quea huiso. Je-
sosaja esohui huohui canaje. Maaya mimicuijjeano-
biajea sa acanaje Sanoni. Sanoni nijje quea quene nee
nee po majje oya cuijjea sa acanaje Jesusaja esohui
huohui cajo. ³⁰ Maya ba majje Sanonija epeeji cuaa
oya dojo canaje Sesanea cuiñajji yasijje. Majoya oya
huoojea canaje quea huesha nee, oja cuiñajji yasijje,
Tanaso huasijje bishejo.

³¹ Majoya Jodea meshijo, Janinea meshijo, Samania
meshijo pea'ai pea cuana Jesusaja epeeji cuana nijje
quea bei poanaje. Napa pajea canaje. Jamajjeya quea
huiso nee nee Jesosa nijje jjapeequi'yonaje. Edojjos-
hahua Pameya oya cuana ba'e meesahua canaje. Ojja-
ña cuana Emeshi Mese Jesusaja esohui jayojja jama
ba'enaje quea ja'a nee nee.

Peno poquinaje Nida cuiñajji yasijje, Jope cuiñajji yasij- je pea'ai

³² Majoya Peno ojjaña cuiñajji yasijje poquinaje Jeso-
saja epeeji cuana baa. Nida huasijje poquinaje Jesosa-
ja epeeji cuana nijje jjapeequiya, esohui huohuiya
pea'ai. ³³ Jomajo Penohua pea dejja ba canaje, Eneasi
bajjani. Eneasi aje oe jeo'ajja. Oya eja jaanaje me oej-
je pea beca peejjima shequijame, 8 shequijame.

³⁴ Jamajjeya oya ba majje Penohua huohui canaje jama
ba'a: —Eneasi, Jesusaa miya jeo mee caje'yo. ¡Nequiso-
huacue! ¡Miquea ejaajji bebocue!

Jjeyahua nei Eneasi nequisohuanaje. Quea ja'a nee
nee poanaje, de. ³⁵ Ojjaña cuaa Nidajo ba'eya, Sa-
nohujo ba'eya pea'ai Eneasi ba canaje jeojeo'yonaje.
Jamajjeya quea huiso nee Jesosa nijje jjapeequi'yonaje.

Tabita mano'yo majje shequi o'oyanaje

³⁶ Jope cuiñajjijo epona tii Tabita bajjani ba'ya poa,
Ese Ejja esohuijo ca ca oya Docuei bajjani. Oya Jesusaja
epeeji nei. Tabitaa quea pame nee atiitii canaje. Aema'
cuana ba'e meesahua canaje pea'ai. ³⁷ Tabita aje quea
mano poanaje. Mano'yonaje. Epeeji cuaa oya shacua
ca'yonaje. Majoya jaahuana canaje eyajo jaa equecua-
yijji yasijje. ³⁸ Jope, Nida quea chipi nee, huesha'ama.
Jamajjeya Jesusaja epeeji cuana Jopejo ba'eya shaj-
ja'ajja canaje Peno Nidajo nequi. Jamajjeya beca dejja
huoojea canaje Peno que. Jama huohuime acanaje
ba'a: —Peno, ¡poecujicue ecuaña nijje Jope yasijje!

³⁹ Jamajjeya shajja'ajja majje Penohua ojaya aquiana bio canaje. Ona niije poquinaje Jope yasiije. Jope yasiije poe'yajo ojjaña cuana niije oya sohuaquinaje eya equecuayijji yasiije Tabita baa. Ojjaña e'ahuemano cuua pa neinei niya Peno ocuee canaje. Tabitaja soco ba mee canaje. Ojo jama huohuime acanaje ba'a: —¡Bacue, Peno! Eshe anijo Tabitaa ecuanaja daqui eyami, daqui nei pea'ai quea huiso soco canaje. ¡Bacue ojaya esipi'yo ecuanajaya pea'ai! —acanjaya cuua.

⁴⁰ Majoya Penohua ojjaña cuana huoojeacuayajaya canaje esecue yasiije. Ecui'oshajjajo nequi majje Eyacuiñajji niije miminaje. Eyacuiñajji niije mimi majje epona emano'yojaa niije miminaje jama ba'a: —¡Tabita, shequi'yocue! ¡Nequisohua'yocue miya!

Shequi'yo majje Tabita jjabapojjaqui'yonaje. Peno ba majje anisohuanaje. ⁴¹ Majoya Penohua Tabita me iña majje nequisohua meesahua ca'yonaje. Tabita nequisohua meesahua'yo majje Penohua Jesusaja epeeji cuana, e'ahuemano cuana pea'ai esecue nequi iyaa canaje Tabita bajji. Jama acanaje ba'a: —¡Dobicue! ¡Miquea epeeji Docuei bahuacue! Shequi'yonaje, Jesusaa oya shequi mee ca'yonaje.

⁴² Ma shajja'ajja majje quea huiso nee Jopejo ba'e Jesusa niije jjapeequi'yonaje. ⁴³ Jamajjeya Peno Jopejo nequinaje quea cahui huiso. Deija Simono bajjani niije ba'enaje, ijjiacajji jee chacojji niije.

Penohua Jodio pojjeama huasijje esohui huohui canaje, Conenio huasijje

10 E'e Teopino, eyaya, Nocaa jiquio pea esohui tehueaña miquea ebajji. Esohui e'e nei Jesusaja epeeji cuanajo tehueaña jama ba'a: Oe deija Conenio bajjani Sesanea cuiñajji ba'enaje. Oya Jodio pojjeama, Shomano deija, quea huiso nee sohuanano huoojeajji poani, ma bajjani ba'a: Itaniano sohuanano cuana. ² Jamatii Conenio quea pame nee. Ojaya huapa pojjeama cuana niije Eyacuiñajji esohui jayojja jama ba'e sa poani. E'e, ohuaya aema' cuana ba'e meesahua canaje; quea huiso aquiana quia canaje sosema'. Eyacuiñajji niije mimi majamajanaje pea'ai. ³ Oe pojajajo eshequi jjanequijeapaaquiao Eyacuiñajji Conenio jjacahuibaqui mee canaje jama ba'a: Cahuiba canaje Eyacuiñajji esohuidojojji o que poe majje onijje miminaje jama ba'a: —¡Conenio, shajja'ajjacue mo!

⁴ Esohuidojojji ba majje Conenio quea ajjajja nee jama poanaje ba'a: —¿Yajja? ¿Ae sa poani miya? ¡Huohuicue mo!

Esohuidojojjiya oya jama acanaje ba'a: —Eyacuiñajjiya miquea emimi cuana onijje shajja'ajja canaje. Miya aema' cuana huasijje aquiana quiaña sosema' ojaya eba pea'ai. Jamajjeya minijje quea bhui nee poani. ⁵ Jamajjeya ijjeya nei beca deija huoojeacue Jope yasiije! Jomajo oe deija Simohui Peno bajjani enequi. ¡Peno jjequi meecue! ⁶ Oya Peno Simonoja equijo ba'yani, ijjiacajji jee chacojji poanija equijo. Ojaya equi bae ai sahuajo ani —acanjaya Eyacuiñajji esohuidojojjiya. Jamaya Conenio jjacahuibaquinaje.

⁷ Majoya esohuidojojji poqui'yonaje. Conenio shequi'yonaje. Shequi'yo majje ojaya echacosahuajji beca iyaa canaje. Oe Sohuanano ojaya epeeji quea pame nee iyaa canaje, ma Eyacuiñajji niije mimiani pea'ai. ⁸ Eyacuiñajji esohuidojojji esohui onijje Conenihua huohui canaje. Majoya oya cuana huoojea canaje Jope yasiije.

Penohua cahuiba canaje

⁹ Jamajjeya Conenioja epeeji cuana Jope yasiije poquinaje. Pea pojajajo eshequi biacojjajja nequijo Jope ba cañaquinaje quea chipi nee.

Peno ca ca Jopejo Simonoja equijo nequi equi jama-coo huasijje jaasohuaquinaje Eyacuiñajji niije mimiya. ¹⁰ Eshequi biacojjajja nequijo Peno quea shoe nee poanaje. Bobi ijji sa poanaje. Onaa Penoja bobi cuacua canijo, Penohua ishoa'ajja ca aninaje bobi. Majoya equi jamacoojo jaa cahuinaje. Eyacuiñajjiya oya jjacahuibaqui mee canaje jama ba'a: ¹¹ Esecue quea quemmo jayojja ba canaje eyajo. Esecue eca'apejo nequi. Aquiana equipajajji quea quemmo jayojja ba canaje, jja-pashineijje jeaocuea canaje o que, jono eyichijjo jayojjajo. ¹² Ma equipajajji ojjaña ijjiacajji cuana, peyo cuana, ojjaña cuichoiji cuana pea'ai ba canaje, eshe, de. Jamaya jjacahuibaqui mee canaje pea'ai ba'a: ¹³ Eyajo Jesusa Peno niije miminaje jama ba'a: —Peno, ¡nequisohuacue! ¡Ijjiacajji cuana, peyo cuana, cuichoiji cuana pea'ai quecuacue e'ijjiacajji! —poanaje.

¹⁴ Penohua ca ca jama acanaje ba'a: —Emeshi Mese Jesusa, chojja. Eya ijji sa po'yo ajja ma aquiana cuana. Peajja, de. Yahuajo ecuanaja etiquiana cuanaja esohui jayojja jama poanijo ma aquiana cuana ecuea ijji jima. Eya coma ijji sa po'yo ajja nei nei —poanaje Peno.

¹⁵ Eyajo Jesusaa Peno huohui ca o'oyanaje jama ba'a: —Eyacuiñajjiya ojjaña bobi quea pame po mee ca'yonaje. Jamajjeya ja'a jama pojji ba'a: “Jiquio bobi peajja, coma ijji ajja ca iña” a'a pojji, Peno! —Jesusa poanaje.

¹⁶ Jamaya Jesusaa Peno pea beca peejjima huohui'yo me acanaje, oya jayojja huohui'ajja o'oyame acanaje Peno ecahuia. Majoya equipajajji jjequisohua ca'yonaje eyahuasijje.

Jamaya jjacahuibaquime meeya Peno Jesusaa acanaje ejjabahuejjaqui meejji jama ba'a: Jodio pojjeama cuana Jodio cuana jayojjaya Eyacuiñajji quea jea nee. Oya cuana pea'ai Jesusa niije jjapeequi meesahua caje'yo, mimishi cujea caje'yo pea'ai.

¹⁷ Jamajjeya shequi'yo majje Peno jashahuabaqui aninaje jama ba'a: —¿Ajeo shai iña Jesusaa jjacahuibaqui mee canaje? ¿Ae shai ohuaya eya ba mee sa acani?

Peno jamaya jashahuabaquianijo, Conenioja echa-cojji cuana poeyanaje Jope yasiije. Simonoja equi sa'ajja canaje. ¹⁸ Ba majje esecue yasiije poeyanaje. Secuejo nequi taaanaje jama ba'a: —¿A'a Simohui Peno yani jiquiojo?

¹⁹ Peno ma ohua cahuiba canajejo jashahuabaquianijo, Edojjoshahua Pameya oya huoojea canaje jama ba'a: —Peno, ¡shajja'ajjacue! Pea beca peejjima deija

poeyanaje mi baa. ¡Jamajjeya nequisohuacue; jaaoquequicue; oya cuana baquicue esecue jjanijo nequi! ¡Onijje poquicue, Peno! ¡A'a quea mete pojji! Eyaya oya cuana huoojeanaje mi dojhua.

²¹ Jamajjeya Peno jaaoquequinaje ma dejja cuana baa. Huohui'ajja cañaquinaje jama ba'a: —E'e. ¿A'a miyaya eya sa'ajjaña? Quioya ña. ¿Apiojji acuaeya ña sa'ajjaña? ¿Ajeo acuae mi poeyanaje so'o?

²² Onaaya Peno huohui canaje jama ba'a: —Coneniohua, ma sohuinano cuana huoojeajji poaniya Sesaneajo ba'eya ecuana huoojea canaje. Ohuaya quea pame nee acani, Eyacuiñajjija esohui jayojja jama acani. Oya ojjaña Jodio cuanaja quea boti nee. Eyacuiñajjija esohuidojojji onijje miminaje jama ba'a: “¡Dejja cuana huoojeacue Jope yasijje Peno jjequiya! ¡Peno miquea equi yasijje jjequicue! ¡Penoja esohui shajja'ajja neineicue miquianaaya o poeyajo!” poanaje esohuidojojji —Conenioja epeejiya Peno acanaje.

²³ Jamajjeya Penohua oya cuana iyaa canaje esecuejo nequi: —E'e, ¡dobicue! ¡Iiquiacua cahuicue ecuana nijje! —poanaje. Jomajo oya cahui oe poanaje.

Peno Conenioja equi yasijje poquinaje esohui huohuiya

Mecajjeahua nei shequi majje Peno poquinaje Conenioja epeeji cuana nijje Sesanea huasijje. Pea Jesusaja epeeji Jopejo ba'e poquinaje pea'ai. ²⁴ Sesaneajo ca ca Coneniohua oya cuana ishoa'ajja ca aninaje. Ojjaña ojaya huapa pojjeama cuana, ojaya epeeji cuana pea'ai iyaa canaje ojaya equi yasijje Peno ishoa'ajjaji. Jamajjeya beca cahuime po majje Penohua Sesanea ba cañaquinaje. ²⁵ Conenioja equi yasijje poeyajo, Conenio equijo ani cuayaquinaje o baa. Ecui'oshajjajo nequi majje Peno bihuia canaje, ohuaya. ²⁶ Penohua ca ca oya jama acanaje ba'a: —¡Dee! ¡Nequisohuacue oe, miya! Eya aje dejja pea'aiya, mi jayojjaya. ¡A'a jja oe eya bihuiajji! —Peno poanaje.

²⁷ Conenio nijje mimimimiqui tii Peno dobiquinaje equi yiyedojo huasijje. Eyiye dojjojo quea huiso ejjachichaqui nequi ba cañaquinaje. ²⁸ Majoya ojjaña ba majje Penohua huohui canaje jama ba'a: —¡Bacue! Yahuajo Jodio cuaa huohui ca poa jama ba'a: “Jodio cuana, ¡a'a dobiquijji Jodio pojjeamaja equi yasijje! ¡A'a ona nijje ijjiia'ijji!” Jamaya yahuajo nei Jodio cuana poa. Maya miquianajaya eba. Jamatii Eyacuiñajjija eya ba mee canaje jama ba'a: “¡A'a Jodio pojjeama quea tai poso ajji!” Jamaya eya acanaje Eyacuiñajjija —Peno poanaje.

²⁹ —Jamajjeya miquianaaya eya iyaanajejo eya quea bihui nee poeyanaje miquiana baa. E'e. Jamajjeya ¿ae sa poani miya? ¿Apiojji acuae ña iyaanaje so'o? —Peno poanaje.

³⁰ Coneniohua Peno jama acanaje ba'a: —Peno, yahuajo Eyacuiñajjija esohuidojojji enijje miminaje. E'e, ebeca pee pea'ai cahuime yahuajo eshequi oya jayojja nequijo eya Eyacuiñajji nijje mimi nequinaje tii tii equijo. Eshequi jjanequieapaaquianijo oe dejja jjanequipaquinaje. Oja daqui quea jeajahua nee nee poanaje.

³¹ Oya enijje miminaje: “Conenio, Eyacuiñajjija miquea emimi shajja'ajja canaje. Miya aema' cuana bobiaña ba canaje pea'ai. Miya ojaya quea boti nee. ³² Jamajjeya ¡beca dejja huoojeacue Jope yasijje! ¡Dejja Simohui Peno bajjani iyaa meecue! Oya Peno pea dejja bajjani Simono nijje nequi, ijjiacajji jee chacojji poani nijje nequi, bae ai sahuajo ba'e nijje nequi” Jamaya eya acanaje esohuidojojjiya. ³³ Jamajjeya ma shajja'ajja majje jjeyahua nei eyaya beca dejja huoojeanaje mi jjequiya. Mi poeyajo eya quea bihui nee poanaje. Eyacuiñajjija eba ecuana quea huiso jjachichaquinaje miquea esohui shajja'ajjaa. E'e, ecuaaya Eyacuiñajjija esohui shajja'ajja sa ña. Jamajjeya ¡ojjaña Eyacuiñajjija esohui ecuana huohuicue jjeya nei, ma ohua mi huohui canaje ecuana huohuijji! —Conenio poanaje.

Penohua esohui huohui canaje Conenioja equijo

³⁴ Jamajjeya Penohua huohui canaje jama ba'a: —E'e de. Jjeya ecuea eba Eyacuiñajjija ojjaña cuana quea jea nee acani. Jodio pojjeama Jodio cuana jayojjaya jama acani e'e jojo nei, Eyacuiñajjija. ³⁵ E'e, ojjaña joya quea pame ba'yani, Eyacuiñajjija esohui jayojja jama poani pea'ai ohuaya jaahuana cani, ojjaña cuana ojjaña meshijo ba'e, ojjaña pea mimime poani pea'ai —Penohua acanaje.

³⁶ —Conenio, miquea eba Eyacuiñajjija Isaeni dejja cuana huasijje ojaya esohui quea pame nee Jesusa Quitoja huohui ca poa jama ba'a: “Emeshi Mese nei Jesusa Quito nijje jjapeequianijo, Eyacuiñajji ojjaña nijje quea bei poaje'yo, mimishi cuijea'yo majje”. Jamaya aca poa cuaa yahuajo nei —Peno poanaje—. ³⁷ E'e Conenio, miquea eba pea'ai Huaniya, ma Eyacuiñajjijo ebesameejji poaniya huohui canaje jama ba'a: “¡Miquea mimishi pajea'yocue! ¡Eyacuiñajjijo besacue!” acanaje Huaniya. Ohuaya Jesusa besa mee canaje pea'ai. Majoya Jesusaa Janinea meshijo, ojjaña cuiñajji Jodioja meshijo sohuihuohui canaje; quea pame nee acanaje pea'ai. ³⁸ Jama poanaje ba'a: Eyacuiñajjija Jesusa Nasanenajo ba'e que Edojjoshahua Pame huoojea canaje, dobiqui mee ca'yonaje. Jesusa quea ca'a nee nee po mee canaje. Ma dejjaa ajjima acani quea huiso nee quea pame nee nee ameesahua canaje. Jesusaa poquijeya quea huiso nee nee emanojaa cuana huaquia mee ca'yonaje. Eshahua cuana dejjajo nequi huoojeacuayajea mee ca'yonaje Jesusaa Eyacuiñajji nijjeya —Penohua acanaje—. ³⁹ E'e Conenio, Jesusaa quea pame nee acani ecuaaya, ojaya epeeji cuaa banaje. Onijje poquinaje ojjaña Jodio meshi yasijje, Jenosanena huasijje pea'ai. Jamatii pea cuaa Jesusa quea mimishi aca'yonaje. Acui ecueata'apeejo ba'ehuanasohuajea ca'yonaje emano'yojji. ⁴⁰ Jamatii Jesusa mano'yajo, pea beca peejjima cahuime epo jaa Eyacuiñajjija oya shequi mee ca o'oyanaje. Majoya Eyacuiñajjija oya ecuana huasijje huoojea ca o'oyanaje. E'e, ecuaaya oya banaje eshe o'oya. ⁴¹ Ojjaña dejja cuanaja oya ba o'oya jjima. Ecuanaaya, ma Eyacuiñajjija yahuajo babaca ca poaa oja esohui huohuijji poaniya ca ca oe ecuanaaya Jesusa ba o'oyanaje. Shequi o'oya majje

oya ecuana nijje ijjia'ijjianaje, ena ishi canaje pea'ai.
⁴² Majoya ohuaya ecuana huoojea canaje ojaya esohui huohuiya ojjaña cuana huasijje. Jama huohuime aña ba'a: "Quijje Eyacuiñajjiya Jesosa huoojea caje o'oya. Jesosaa poe o'oya majje ojjaña sosequia caje'yo ma eseya mano'yo jjimahua aninaje poa sosejje. E'e, ojjaña eshe nequi cuana, ojjaña yahuajo nei mano'yo pea'ai ohuaya sosequia caje'yo ma eseya mano'yo jjimahua aninaje poa sosejje. Ojjaña joya quea pame ba'ya poa quea bihui nee ba'e tiitii mee caje'yo eyajo onijje. Mimishi cuana ca ca quea nee nee po mee caje'yo tii tii. ⁴³ E'e Conenio, yahuajo nei nei Jesosa poe jjimahuajo Eyacuiñajjiya esohui huohuijji cuaa Jesosajo huohui ca poa jama ba'a:

"Oya quea pame nee nee, quea ca'a nee nee poanijo, ojjaña joya onijje jjapeequiani Eyacuiñajjiya mimishi cuijea caje'yo. Jamajjeya oya cuana cuaqui yasijje poqui'yo ajja mano'yo majje".
 Jamaya yahuajo nei Jesosajo tehue ca poa cuaa —jamaya Penohua esohui huohui canaje. Ojjaña cuaa Conenioja equijo nequiya shajja'ajja canaje.

Edojjoshahua Pame Jodio pojjeama huasijje dobiqiu'yonaje

⁴⁴ Penohua sohuihuohui canijo tii, Edojjoshahua Pame Conenio que, ojaya epeeji cuana que pea'ai dobiqiu'yonaje, ma Penohua sohuihuohui cani yasijje.

⁴⁵ E'e, Eyacuiñajjiya Edojjoshahua Pame huoojea ca'yonaje Jodio pojjeama cuana huasijje. Ma ba majje Jodio cuana Peno nijje nequi jjajjasoquinaje: —E'e de, Eyacuiñajjiya Edojjoshahua Pame huoojea ca'yonaje Jodio pojjeama huasijje pea'ai —poanaje Jodio cuana ma Peno nijje poquinaje.

⁴⁶ E'e, Jodio cuaa Conenio shajja'ajja canaje Eyacuiñajji bihuia cani, de, pea mimi'yome poanaje pea'ai.

⁴⁷ Jamajjeya Penohua jama acanaje ba'a: —Yahuajo Eyacuiñajjiya Edojjoshahua Pame ecuana huasijje huoojea canaje jayojja jama jjeya ohuaya Edojjoshahua Pame jiquio dejja cuana huasijje huoojea canaje pea'ai. Jamajjeya ecuanaaya oya cuana Eyacuiñajjiyo cabeza mee'yahua ena huasijje, ¿a'a e'e? —Penohua acanaje.

⁴⁸ Jamajjeya Penohua pea cuana huoojea canaje Jesosa Quitoja epeeji ma jjeya nei onijje jjapeequinaje besa meeya Eyacuiñajjiyo. Majoya Conenio, oja epeeji cuana pea'ai miminaje Peno nijje. Jama poanaje ba'a: —Peno, ¡che ecuana nijje nequicue, esohui ba meesahuacue! —acanaje.

Jamajjeya Peno onijje nequinaje. Majoya quijje pishana Peno poqui'yonaje Jenosanena huasijje.

Penohua Jesusaja epeeji cuana Jenosanenajo ba'e huohui canaje Coneniojo, Jodio pojjeamajo

11 Jamajjeya Jesusaja huoojea'yo esohui huohuijji cuaa, ojjaña Jesusaja epeeji cuaa Jodea meshijo ba'eya pea'ai shajja'ajja canaje Coneniojo. Ojjaña jama acanaje ba'a: —Jodio pojjeama cuaa pea'ai Eyacui-

ñajjiya esohui shajja'ajja ca'yonaje; jamaya aca'yonaje quea bihui nee, de —acanaje cuaa.

² Jamajjeya Peno Jenosanena huasijje poqui o'oyajo, beca Jodio cuana onijje mimijajinaje jama ba'a: —Peno, ¿apiojji miya Jodio pojjeama cuanaja equi yasijje dobiquinaje so'o? E'e, miya ca ca oe Jodio pojjeama cuana nijje ijjia'ijjianaje pea'ai. ¿Apiojji? Jamaya pojjeama esejaya etiquianaja esohui. Oya cuanaja cuiishasha biso nei ejuhisejjajea'yo pojjeamajo oya peajja, de —poanaje Jodio cuana.

⁴ Jamajjeya Penohua oya cuana huohui canaje ojjaña joya Eyacuiñajjiya Jodio pojjeama cuanajo acanaje. ⁵ Jama acanaje ba'a: —Ecuea epeeji cuana, eya Jopejo nequi Eyacuiñajji nijje mimi aninaje. Eyacuiñajjiya eya jjacahuibaqui mee canaje jama ba'a: Ijjiacajji cuana aquiana cuana quibi jayojjajo iya majje jeaoquea canaje e que, jjonajo. ⁶ Ma quibi dojjojo eyaya banaje ojjaña ijjiacajji cuana, peyo cuana, ojjaña cuichoiji cuana pea'ai. ⁷ Eya jjacahuibaqui mee canaje jama ba'a: Eyajo Jesosa enijje miminaje jama ba'a: "Peno, ¡nequisohuacue! ¡Ijjiacajji cuana, peyo cuana, cuichoiji cuana pea'ai quecuacue e'ijji!!" acanaje. ⁸ Jamatii eyaya saja'anaje jama ba'a: "Jesosa, chojja, eya ijjia sa po ajja ma aquiana cuana. Peajja, de. Yahuajo ecuana etiquiana cuanaja esohui jayojja jama poanijo ma aquiana cuana ecuea ijjia jjima" eya poanaje. ⁹ Majoya Jesosa enijje mimi o'oyanaje: "Eyacuiñajjiya ojjaña aquiana cuana quea pame nee po mee ca'yonaje. Jamajjeya ¡a'a miya jama pojji ba'a: —¡Iquio aquiana cuana peajja, coma ijjia ajja ca iña! —a'a pojji, Peno!" acanaje Jesosaa eya ecahuijja. ¹⁰ Jamaya eya huohui huicha'a huicha'a canaje, pea beca peejjima huohuime acanaje. Majoya ojjaña jjequisohua ca'yonaje eyahuasijje.

¹¹ —Majoya pea beca peejjima dejja ecuea equi yasijje poeyanaje. Oya cuana Sesaneajo ba'e o chacomeejjiya huoojea canaje e dojhua. ¹² Edojjoshahua Pame enijje miminaje jama ba'a: "¡Ona nijje poquicue mette'ama!" Jamajjeya eya poquinaje Sesanea huasijje. Jiquio Jesusaja epeeji me oeje oe huisome enijje nequi poquinaje pea'ai enijje. Ecuana Conenioja equi yasijje dobiquinaje. ¹³ Majoya Conenihua ecuana huohui canaje jama ba'a: "Eyacuiñajjiya esohuidojojji ecuea equijo jjanequipanaquinaje. Enijje miminaje. Jama poanaje ba'a: —¡Beca dejja huoojeacue Jope yasijje Simohui Peno jjequiya! ¹⁴ Ohuaya miqianaya sohuihuohui caje. ¡Ojaya esohui jama acue! Jamajjeya Eyacuiñajjiya miqianajaya mimishi cuana cuijea caje'yo; onijje ba'e tiitii mee caje'yo eyajo miya, miquea huapa pojjeama cuana pea'ai —eya acanaje esohuidojojjiya" jamaya Conenihua eya huohui canaje —Peno poanaje—.

¹⁵ Eya Conenio sohuihuohui'anijo tii Edojjoshahua Pame ojjaña cuana huasijje dobiqiu'yonaje. E'e, ma ecua eseya yahuajo acanaje jayojja jama oya cuana aca'yonaje. ¹⁶ Majoya eyaya niñeba'yonaje esejaya Emeshi Mese nei Jesusaja esohui yahuajo jama ba'a: "Ena huasijje ca ca oe Huaniya miqianaya besa mee canaje Eyacuiñajjiyo. Quijje ca ca eyaya miqiana que Edojjoshahua Pame dobiqiu'yo Eyacuiñajji nijje epo'-

yojji tii tii" poanaje Jesosa yahuajo —Penohua acanaje—. ¹⁷ E'e, Jesosa Quito nijje jjapeequianijo, Eyacuiñajjiya Edojjoshahua Pame huoojea canaje ese que. Oya jayojjaya jjeya Jesosa Quito nijje jjapeequianijo, Eyacuiñajjiya Jodio pojjeama cuana huasijje Edojjoshahua Pame huoojea ca'yonaje pea'ai. Eyacuiñajjiya quea pame nee nee acani tii tii. Jamajjeya eya ca iña Eyacuiñajji huoojea'yojji pojjeama. Eyaya oya huohui'yo ajja jama ba'a: "¡A'a Jodio pojjeama huasijje Edojjoshahua Pame huoojea'yojji!" Chojja, jamaya eyaya Eyacuiñajji huohui ajja, de. Eya Eyacuiñajjiya echacojji, de, ojaya esohui jayojja jama aña eyaya —Peno poanaje.

¹⁸ Jamajjeya Penoja esohui shajja'ajja majje Jodio cuana Peno nijje mimijaji pajea'yonaje; Eyacuiñajji bihuia ca'yonaje jama ba'a: —E'e, jamajjeya Eyacuiñajjiya Jodio pojjeama cuana mimishi pajea meesahua cani. Jesosa nijje jjapeequi meesahua cani pea'ai. Jodio pojjeama cuanaja mimishi cuana cuijea'yo majje oya cuana ba'e tiitii mee caje'yo eyajo onijje pea'ai —poanaje ojjaña cuana.

Jesosaja epeeji cuana Atioquia cuiñajji ba'e

¹⁹ E'e, yahuajo Jodio etii cuaa Jesosaja epeeji Estema sapa jajahuejjajea'yo majje ojjaña Jesosaja epeeji cuana napa majamaja canaje pea'ai. Jamajjeya ojjaña Jesosaja epeeji cuana quea huiiso meshi yasijje quehua poquinaje quea mete jjejojo. Beca cuana quea huesha nee poquinaje Penisia meshi yasijje, Atioquia cuiñajji yasijje pea'ai. Pea cuana Chipe nasi yasijje besapoquinaje bishejo. Poquijeya Eyacuiñajjiya esohui huohui capoquinaje Jodio cuana huasijje. Jodio pojjeama cuana huasijje ca ca Jesosaja esohui huohui jjima acapoquinaje. ²⁰ Majoya Jesosaja epeeji Chipe nasijo ba'e, Sine ne meshijo ba'e pea'ai poquinaje Atioquia cuiñajji yasijje. Jomajo ohuaya Jodio pojjeama cuana huasijje pea'ai Eyacuiñajjiya esohui quea pame nee Jesosajo huohui canaje. ²¹ Emeshi Mese nei Jesosaa oya cuana esohui huohui meesahua canaje. Jamajjeya quea huiiso cuana Jesosaja esohui shajja'ajja majje onijje jjapeequi'yonaje, quea huiiso nee nee. ²² Ma shajja'ajja majje Jesosaja epeeji Jenosanenajo ba'eya Jesosaja epeeji etii Benabe bajjani huoojea canaje Atioquia huasijje Jesosaja epeeji cuana baa. ²³ Atioquia huasijje poe majje Benabeya ba cañaquinaje Eyacuiñajjiya Jodio pojjeama quea jea nee acanaje e'e jojo nei. Jamajjeya Benabe quea bihui nee poanaje. Jesosaja epeeji eyacua cuana jama huohuime acanaje ba'a: —E'e, jamaya. ¡Eyacuiñajjiya esohui jayojja jama atitiicue! ¡A'a oya pajea'yojji! ¡Onijje jjapee tiitiicue!

²⁴ Benabe Jesosaja epeeji quea pame nee. Edojjoshahua Pameja ejjashahuabaquijji jayojja jama acanaje tii. Jesosaja esohui jayojja jama atitii canaje. Jamajjeya quea huiiso cuana Emeshi Mese nei Jesosaja epeeji poanaje Benabeja esohui shajja'ajja majje.

²⁵ Majoya Benabe poqui'yonaje Tanaso cuiñajji yasijje Sanoni sa'ajja'yohua. ²⁶ Ba majje ohuaya Sanoni jjequi canaje Atioquia huasijje onijje esohui huohuijji. Jomajo Atioquiajo oya cuana nequi'yonaje Jesosaja epeeji

cuana nijje oe shequiajame. Quea huiiso nee nee Jesosaja esohui huohui majamaja canaje jomajo. Majoya Atioquiajo pea cuaa Jesosaja epeeji cuana bajjani canaje Quitoja epeeji, Quitiano cuana bajjani acanaje.

²⁷ Majoya pea Jesosaja esohui huohuijji cuana Jenosanenajo ba'e poquinaje Atioquia huasijje. ²⁸ Majoya ojjaña Jesosaja esohui shajja'ajja jjaachichaquinaje. Oe esohui huohuijji Ajamo bajjani nequisohuanaje. Eyacuiñajjiya Edojjoshahua Pameya oya huohui meesahua canaje. Jamajjeya Ajamohua huohui canaje jama ba'a: —Quijje pishana ojjaña meshijo ojjaña cuana quea shoe nee nee poaje'yo. Bobi chama' poaje'yo —jamaya ojjaña acanaje, Ajamohua. (Quijje pishana pea shequiaja po majje e'e jojo nei jamaya poanaje. Bobi chama' poanaje. Quea huiiso nee quea shoe nee nee poanaje Shomano dejja Canio bajjani emeshi mese nequi-jo.)

²⁹ Jamajjeya Ajamoja esohui shajja'ajja majje Jesosaja epeeji cuaa huohui canaje jama ba'a: —E'e, euaaya Jesosaja epeeji cuana huasijje Jodea meshijo ba'e yasijje bejjo huoojeaje o ba'esahuajji —poanaje.

Jamajjeya aquiana cuana, bejjo pea'ai chicha canaje. Beca cuaa oe pojji quia canaje. Pea cuaa joya quea aquiana huiiso neeya quea huiiso bejjo quia canaje.

³⁰ Jamajjeya quijje quea huiiso bejjo chicha majje huoojea canaje Benabe nijje, Sanoni pea'ai nijje. E'e, ohuaya bejjo dojo canaje Eyacuiñajjiya epeeji etii yasijje equia'yojji ojjaña Jesosaja epeeji cuana huasijje.

Jacobo jaja ca'yonaje

12 Ecuca epeeji Teopino, eyaya, Nocaa pea esohui tehueña Jesosaja epeeji cuanajo jama ba'a: Pea Enode emeshi mese nequinaje. Ohuaya Jesosaja epeeji cuana napa ca'yonaje quea huiiso. ² Huanija echahua mese Jacobo sapa jajasejjajea mee ca'yonaje baa aiya, de Enodeya. ³ Jodio etii cuana quea bihui nee poanaje Jacobo quecua ca'yajo. Ma ba majjeya Enodeya huohui cajo Peno iña canaje pea'ai. Dojo canaje jeanobiaa, quijje equecua'yojji. Jamaya poanaje ojjaña Jodio cuana jjaachichaquinaje pahui shejee mee jjima e'ijjiyajji, quea bihui epojji. ⁴ E'e, ma shejo Enodeya Peno equi ejjajeannobiaquijji yasijje jeanobia canaje. Sohuinano quea huiisohua Peno jaahuana mee canaje. Enodeya Peno jaja mee sa acanaje quijje, ojjaña Jodio cuana pahui shejee jjima ijjiya majje. ⁵ Jamajjeya Sohuinano cuaa Peno jaahuana neinei canaje ejeyo'yo jaa. Jamatii Jesosaja epeeji cuana Eyacuiñajji nijje mimi tiitiinaje Penajo: —Eyacuiñajji, ¡Peno jaahuanacue! ¡A'a quecua mee'yojji! —amajamaja canaje epojjajo, mecajje pea'ai.

Peno ejeanobia jaa esecue yasijje dojocuayaqui ca'yonaje esohuidojojji

⁶ Majoya Enodeya Peno ejjequicuayaqui'yojji nisho acanaje mecahuajje ejajajea'yojji nisho. Peno ca ca cahuijaanaje beca sohuinano yiyesama neijo. Baa jjo- noja jeyo jaanaje. Pea sohuinano cuaa ejjajeannobia-

quijji esecuejo nequiya oya jaahuana neinei'ajja canaje. ⁷ Mecashono Eyacuiñajji esohuidojojji poquinaje Peno que. Ma equecuayijji jeaja'a cañaquinaje. Ohuaya Peno cuiapashi cañaquinaje eshequijji. Jama acanaje ba'a: —¡Peno, shequicue! ¡Nequisohua cuajicue, miya!

Jamajjeya baa jjono emejo ba'e jjapichoqui mee ca'yonaje, oquequi mee ca'yonaje meshi yasijje. ⁸ Majoya esohuidojojjiya Peno jama acanaje ba'a: —¡Daqui huoshocue! ¡Ejiojji shejee huoshocue pea'ai! —jamaya Peno acanaje esohuidojojjiya. Jamaya poanaje Peno. Majoya ohuaya Peno huohui ca o'oyanaje: —¡Miquea equipajaajji bebocue! ¡E quishishijji poecue! —poanaje.

⁹ Jamajjeya Peno Eyacuiñajji esohuidojojji quishishi poquinaje. Jamatii jjacahuibaquiani poso Peno poanaje ba'a: —E'e de, eya jjacahuibaquiani. E'e pojja'a esohuidojojji chama', de —Peno poanaje.

¹⁰ Jamatii Penohua esohuidojojji quishishijji cuayaquijjeya ebionei sohuinano epi nequi yejje canananaje. Jamatii ojaya Peno, esohuidojojji pea'ai ba jjima poanaje. Mama pishana nequi pea ba canana o'oyanaje sohuinano. Yejje canana o'oyanaje. Ba jjima poanaje Peno, esohuidojojji pea'ai sohuinanoja. Poquinaje baa cui esecue quea quemo huasijje. O poe'yajo jamatii jja-ca'apejoquinaje. Esecue jjani yasijje cuayaqui'yonaje. Cuama pishana dojo majje esohuidojojjiya Peno jea cana'yonaje, ejiojji. ¹¹ Majoya Peno jjashahuabaquinaje: ¿A'a mo eshe, a'a mo jjacahuibaquiani pojjeama, de? Jjeya ecuea eba Emeshi Mese nei Jesusaa huoojea canaje ojaya esohuidojojji e dojocuayaqui'yohua. Mecahuajje Enodeya eya jaja ca'yo queaye poanaje. Jodio dejja cuaa e quecuayojji nisho ishoa'ajja canaje pea'ai —Peno poanaje.

¹² Majoya ma shahuaba majje Peno poqui'yonaje Maniaja equi yasijje, Huani Macosoja enaeseja equi yasijje. Joma equijo quea huiso Jesusaja epeeji cuana jja-chichaqui majje mimi aninaje Eyacuiñajji nijje, Peno jaahuana meejji. ¹³ Penohua esecue jjani cuiaqueya cañaquinaje, epeeji esecue jjani. Oe epona ahuema' ani Shona bajjani poeyanaje aya esecue jjani cuiaqueya cani baa. ¹⁴ Ohuaya Penoja esohui shajja'ajja canaje. Jjashahuabaquinaje: —E'e ee, Peno cuayaqui'yonaje.

Bihui majje esecue jjani pajea canananaje. Peno esecuejo tii nequi jea canananaje epona sho'iya, de. Cuajicujinanaje equijo ani cuana huohuiya. ¹⁵ Jamatii equijo ani cuaa Shona jama saja'ame acanaje ba'a: —Chojja, Shona. ¿A'a jja mi niñepoquiani?

—E'e jojo nei ca ca iña poani —poanaje Shona.

Jamajjeya ojjaña jama saja'ame acanaje ba'a: —E'e pojja'a esohuidojojji Peno jaahuanajji ca ca coma poeyanaje.

¹⁶ Penohua ca ca esecue cuiaqueya canequinaje, iyaa'iyaa nequinaje. Equijo nequi cuaa esecue ca'apejo'yo majje ba canaje Peno nequi. Quea bihui nee nee po'yo majje soa neinei'yonaje. ¹⁷ Jamajjeya Penohua eme' sisi ecuasajo huana canaje: —¡A'a pa jjaja oe mijji! —poanaje.

Ojjaña mimima'yo nequi ca'yonaje. Majoya Penohua oya cuana huohui canaje: —Emeshi Mese neiya Jesusaa eya ejeanobia jaa esecue yasijje jjequiquiaya meequi ca'yonaje esohuidojojjiya.

Majoya huohui canaje pea'ai Penohua: —¡Ojjaña Jesusaja epeeji cuana huohuicue! ¡Satiaco Apeoja bacua ejja pea'ai huohuicue!

Majoya Peno quehua poquicuajinaje pea meshi yasijje. ¹⁸ Mecajjeahua sohuinano cuaa chama' Peno ba canaje ejjajejanobiaquijji. Ejjoco oe jaa ba canaje. Chama'. Ba majje oya cuana quea mete nee nee po'yonaje. Miminaanaa nequi'yonaje. ¹⁹ Emeshi Mese Enodeya pea huoojea canaje Peno jjequiya nisho ejajajea'yojji nisho. Peno chama' ba majje Enode quea mase nee nee poanaje. Sohuinano cuana ma Peno jaahuanajji cuana 'ya canaje. Huohui'ajja canaje: —¿A'a mi oe cahuijaanaje? —cahuijaa poso Enodeya acanaje.

Majoya Enodeya huoojea canaje ma sohuinano cuana quecuajea'yohua. Chama'yo tii acanaje.

Majoya Enode Jodea meshijo nequi Sesanea huasijje poquinaje. Jomajo nequi tiiti'yonaje.

Enode, Jesusaja epeeji cuia'yojji epo mano'yonaje

²⁰ Majoya emeshi mese Enode quea quene nee nee poanaje Tino cuiñajji ba'e cuana nijje, Sinono cuiñajji ba'e cuana nijje pea'ai. Jamajjeya oya cuana Enode nijje jjapeequi o'oya sa poanaje. Ojee poquinaje Enode baa. Ebionei Basito ba cañaquinaje, Enodeja echacojji, oja aquiana cuana jaahuanajji. Bejjo quia cajje Basito quea bihui poanaje ona nijje. Majoya pea bejjo sosejje Basito Enode nijje miminaje: —Dejja cuana Tinojo ba'e, Sinonojo ba'e pea'ai minijje jjapeequi o'oya sa poani. ¡Che oe onijje mimicue! —acanaje Basitohua.

Tinojo, Sinono meshijo pea'ai chama' bobi. Jamajjeya Enodeja bobi sa poanaje quea huiso. Jamajjeya Enode quea bihui po mee sa acanaje onijje.

²¹ Majoya Enodeya ojjaña dejja cuana iyaa canaje oja sohui shajja'ajjaji. Ojjaña nijje mimi jjimahuajo Enodeya daqui quea nahue nee huosho canaje, emeshi meseja ehuoshojji. Ojaya e'anioquejji quea quemojo anioquenaje. Majoya Enodeya ojjaña cuana quea huiso huohui canaje. ²² Ojjaña jomajo nequi oja sohui shajja'ajja majje oya bihuia canaje jama ba'a: —Emeshi mese Enode, miya Eyacuiñajji. Miya dejja jayojja jama mimime pojjeama poani —jamajjeya Enode bihuia canaje ojjaña.

—E'e, jamaya —Enode poanaje, de.

²³ Jamajjeya jjeyahua nei Eyacuiñajji esohuidojojjiya Enode quea mano nee nee po mee caje'yo pea cuana Eyacuiñajji bihuia mee jjima joyaya, jama ajjima joyaya Enodeja ba'a: —¡Eyacuiñajjiya oe bihuicue! ¡A'a eya bihuiajji! —po jjima joyaya oya sosohua ijji ca'yajje quea mano nee po'yonaje. Mano'yonaje Enode, de.

²⁴ Majoya Jesusaja epeeji cuaa esohui quea pame nee Jesusaja huohui canaje quea huiso meshi yasijje. Quea huiso cuaa shajja'ajja canaje. Jesusa nijje jjapeequinaje quea bihui nee.

²⁵ Majoya Benabe, Sanoni pea'ai Jenosanena huasijje poeyanaje. Jesosaja epeeji cuana Jenosanenajo ba'e cuana bejjo quia canaje, ma Jesosaja epeeji cuana Atioquiajo ba'eya huoojea canaje. Bejjo quia'yo majje Benabe Sanoni nijje huacuaya poqui o'oyanaje Atioquia huasijje. Ohuaya Huani Macoso dojo canaje onijje.

Benabe, Sanoni pea'ai huoojea canaje pea meshi cuana huasijje Jesosaja esohui huohuiya

13 Jesosaja epeeji cuana quea huiso nee nee poanaje Atioquiajo. Jomajo Eyacuiñajjija esohui huohuiji, Eyacuiñajjija esohui ba meesahuajji pea'ai yaninaje: Benabe, Sanoni, Simoni Ese Ejjaja esohuijo Dejjaja Tehue bajjani, Nosio ma Sinene cuiñajjijo ba'ya poa, emeshi mese Enodeja edoe mese Manaeni pea'ai. Mahuiso. ² Oya cuana Eyacuiñajji bihuia po'aninaje. Eyacuiñajji bihuia canijo bobi ijjia ajja aninaje. Jama poanijo Edojjoshahua Pameya oya cuana huohui canaje jama ba'a: —Eyaya Benabe, Sanoni pea'ai babacanaje ecuea esohui huohuiji epojji. Jamajjeya ioya cuana huoojeacue ecue esohui huohuiya!

³ Majoya oya cuanaa ijjia'ijjia ajja po majje, Eyacuiñajji nijje mimi majje pea'ai eme' huana canaje Sanoni sapa biajje, Benabe sapa biajje pea'ai. Jama acanaje ba'a: —Ecuaya miqianaya huoojeaña pea meshi cuana huasijje Eyacuiñajjija esohui huohuiya —acanaje.

Chipe nasijo Jesosaja esohui huohui canaje

⁴ Majoya Edojjoshahua Pameya Benabe, Sanoni pea'ai huoojea canaje esohui huohuiya. Senesia huasijje poqui majje bishe ai yasijje nequisohuaquinaje Chipe nasi ai yasijje ebesapoquijji. ⁵ Majoya oya cuana Sanamina cuiñajji yasijje ba'eñaquinaje Chipe nasi yasijje. Eyacuiñajjija esohui huohui canananaje Jodio cuana huasijje, Jodioja equi ojee ejjachichaquijji cuanajo nequiya. Huani Macosohua oya cuana chacosahua canaje.

⁶ Majoya Chipe nasi ojje miji yasijje poquinaje ejjojijje Paposa cuiñajji yasijje. Jomajo Jodio dejjaja ba canaje Banajesosa bajjani. Oya Eyacuiñajjija esohui huohuiji nisho, eyamiquecua poanaje oya. Jamajjeya Enimase bajjani acanaje cuaa. ⁷ Oya emeshi mese Senio Paono nijje jjapeequinaje. Emeshi mese Senio Paono quea jjashahuabaqui ja'a nee nee, quea huiso nee ojaya eba. Oya Eyacuiñajjija sohui shajja'ajja sa poanaje. Jamajjeya Benabe Sanoni pea'ai iyaa canaje. ⁸ Jamatii eyamiquecua jjamimicuijje nobiajeaquinaje Sanoni nijje, Benabe nijje pea'ai. Emeshi mese Senio Paono Eyacuiñajjija esohui shajja'ajja mee jjima canaje: —iA'a shajja'ajjaji Pabaja esohui Jesosajo! Dasia cani mi coma —eyamiquecua acanaje.

⁹ Pea esohuijo Sanonija bajjani Pabo. Edojjoshahua Pame onijje nequi titiinaje. Jamajjeya Pabohua metama eyamiquecua cojja ba neinei canaje. ¹⁰ Jama tecueame acanaje ba'a: —Eyamiquecua, miya ca mi ca oe edosiquianaja bacua. Ojjaña quea pame nee ba'e

miquea boti'ama. iA'a mimisho'i pojji Jesosajo miya! Ejjadasiaquijji miya de, quea mimishi. Eyacuiñajjija esohui quea quehua po mee sa aña tii miyaya —Pabohua acanaje—. ¹¹ Jamajjeya jjeyahua nei Eyacuiñajjija miya cojjama' po mee caje'yo quea huiso cahuime —Pabohua acanaje.

Jjeyahua nei eyamiquecua cojjama' poaje'yo. Quea cojja misi nee nee. Taaanaje jama ba'a: —Cojjama' mo po mee ca'yonaje Jesosaa. iEmejo mo che dojocue quiaa! iMe pejjejeacue mo oe! —poanaje eyamiquecua.

¹² Ma ba majje emeshi mese Senio Paono quea mete poanaje. Jesosaja esohui shajja'ajja canaje. Jesosa nijje jjapeequi'yonaje, emeshi mese Senio Paono, de.

Pabohua Benabe nijjeya Atioquia huasijje Pisinia meshi yasijje esohui huohuiqui canaje

¹³ Majoya Pabo ojaya epeeji cuana nijje bishe ai yasijje nequisohuaqui o'oyanaje. Panipinia meshi yasijje besapoquinaje, Pene cuiñajji yasijje. Ba'eñaqui majje Huani Macosohua Pabo, Benabe pea'ai jiña ca'yonaje. Poqui'yonaje Jenosanena huasijje oe nei.

¹⁴ Majoya Pabo Benabe nijje poquinaje Atioquia huasijje, pea Atioquia Pisinia meshijo nequi. Epojja ejomishocajjijo Jodioja equi ojee ejjachichaquijji yasijje poquinaje. Dobiqiu majje anioquenaje. ¹⁵ Jodioja equi ojee ejjachichaquijji mese cuaa Moisesija esohui etehue'yo huohui canaje. Eyacuiñajjija esohui huohuijijja esohui yahuajo nei nei etehue'yo huohui canaje pea'ai. Majoya oya cuaa Pabo, Benabe pea'ai huohui'ajja canaje jama ba'a: —Epeeji cuana, e'e pojja'a miquea esohui yani ojjaña quea pame nee eba'e meesahuajji. iJjeyahua nei huohuicue! —acanaje.

¹⁶ Jamajjeya Pabohua nequisohua majje eme' jeasohua canaje. Jama acanaje ba'a: —Jodio cuana, Jodio pojjeama cuana pea'ai miqianaya Eyacuiñajjija esohui shajja'ajjaji poani. iJamajjeya shajja'ajjacue mo!

¹⁷ Yahuajo nei Eyacuiñajjija esejaya etiiquiana babaca ca poa ojaya epeeji epojji. Majoya Ejito meshijo ba'e oya cuana jaahuana ca poa. Quea huiso, quea ca'a pea'ai po mee ca'ya poa. Oya cuana Ejito meshijo ba'e dojocuyaqui ca poa pea meshi yasijje epou'yojji. Quea huiso ma dejjaja ba jjima aca poa. ¹⁸ Meshi jabojo, dejjamajo Eyacuiñajjija oya cuana jaahuana ca poa quea huiso shequiajame, 40 shequiajame. Oya cuana quea mimishi, shajjama' poa. Jamatii ojaya oya cuana cajaa ajjima poa. ¹⁹ Majoya ohuaya pea emeshi mese cuana me oeje beca huisome, 7 huisome, pea emimi'yo cuana Canaani meshijo ba'e jeabichajea ca'ya poa. E'e, Eyacuiñajjija ojjaña ma dejjaja pea esohuijo mimiani cuana chama'yo tii po mee ca'ya poa quea mimishijojo. Jiquio Canaani meshi Eyacuiñajjija quia ca poa esejaya etiiquiana cuana ba'ejji. ²⁰ Canaani meshijo esejaya etiiquiana cuana ba'ya poa quea huiso nee nee shequiajame, 450 shequiajame. Majoya Eyacuiñajjija Jodio dejjaja huoojeajji pea nequi mee, pea nequi mee aca poquia poa Jodio cuana quea pame nee ba'e mee'yojji. Jamaya poanaje Eyacuiñajjija esohui huohuiji Samoeni

ba'e jjimahuajo. Majoya Samoeni mano'yajo, chama' pea Jodio dejja huoojeajji poa. ²¹ Majoya esejaya etiiquiana cuana emeshi mese sa poa. Eyacuiñajji nijje mi mi ca poa jama ba'a: "¡Emeshi mese nequi meecue ecuanajaya!" aca poa.

—Jamajjeya aje Eyacuiñajjiya Sisija bacua ejja Sao nequi mee ca poa Jodioja emeshi mese. Saoja etiiquiana Bejami' bajjani poa. Sao quea huiso shequiajame nequia poa Jodio cuanaja emeshi mese, 40 shequiajame. ²² Majoya emeshi mese Sao quea mimishi po majje mano'ya poa. Majoya Eyacuiñajjiya Dabi emeshi mese po mee ca'ya poa. Dabijo mimia poa jama ba'a:

"Tsaija bacua Dabi ecuea eba. Oya quea pame nee nee. Ecuea ehuhui'yo jayojja jama acani. Ecuea ejjas-hahuabaqui'yojji jayojja jama jjashahuabaquiiani pea'ai, Dabi".

Jamaya yahuajo nei nei Dabijo mimia poa.

²³ —Dabi Jesusaja etiiquiana poa. Yahuajo Eyacuiñajjiya Jesusajo huohui ca poa jama ba'a:

"Eyaya ojjaña jaahuanajji Quito huoojeaje. Ohuaya Isaeni cuanaja mimishi cuijea'yo majje ba'e tiitii mee caje'yo eyajo onijje".

Jamaya huohuime aca poa Eyacuiñajjiya Jesusajo.

²⁴ —Jesusa poe jjimahuajo Huaniya ma ona besameejji poaniya ojjaña cuana huohui canaje jama ba'a: "¡Miquea mimishi cuana pajea'yocue! ¡Eyacuiñajji o besacue, enajo!" jamaya Huaniya ojjaña Jodio cuana huohui canaje. ²⁵ E'e, Huaniya echaco Eyacuiñajjiyo behahua nei apoa po majje ohuaya huohui canaje jama ba'a: "¿Achajja miya jjashahuabaquiiani? ¿Ae acuae jja iña? Eya ca jja ca iña Eyacuiñajjiya huoojea'yo ojjaña jaahuanajji Quito pojjeama. Oya quijje pishana poeje. Oya ca ca oe quea ca'a nee nee, quea pame nee nee. Eya ca iña quea pame pishana. Jamajjeya aje oe eya Jesusa Quito cojja nei nequi sa po ajja, quea bicho, de" acanaje Huaniya.

²⁶ —Ecuea epeeji cuana, etiiquiana Amajamaja ose-cua cuana, ¡shajja'ajjacue mo! ¡Eyacuiñajjiya epeeji cuana Jodio pojjeama cuana, shajja'ajjacue mo pea'ai! Eyacuiñajjiya jiquio esohui huohui canaje esejaya eshajja'ajjaji jama ba'a: Eyacuiñajjiya Jesusa huoojea canaje ese jaahuanaa, esejaja mimishi cuijea'yohua pea'ai.

²⁷ Jamatii dejja cuana Jenosanenajo ba'ejja, Jodio etii cuanaja pea'ai ba jjima Jesusa Eyacuiñajjiya huoojea'yo ojjaña jaahuanajji. Oya cuanaa Eyacuiñajjiya esohui huohuijjiya esohui shajja'ajja canaje ojjaña ejomishocajji pojajajo; ma esohui Jodio cuanaja quea quehua. Jamatii Jesusa quecua ca'yonaje; ma esohui yahuajo nei nei etehue'yo jayojja jama acanaje Jodio cuaa. ²⁸ Jesusa mimishi'ama nei nei ba canaje Jodio cuaa. Jamajjeya ¿yajjajo shai quecua mee ca'yonaje oya? Jamatii oya cuaa emeshi mese Pinato jama acanaje ba'a: "¡Jesusa acui ecueata'apeejo ba'ehuanasohuajecue emano'yojji!" taaa neineime ponaje.

²⁹ —Ojjaña Eyacuiñajjiya esohui yahuajo nei nei etehue'yo jayojja jama aca poa Jesusa, Jodio etii cuaa. Majoya Jesusa acui ecueata'apeejo ba'e jjequioquea'yo majje ojaya epeeji cuaa oya mei jjani ai yasijje huana-

nobiaqui canaje. ³⁰ Jamatii Eyacuiñajjiya oya shequi mee ca o'oyanaje. ³¹ Mano'yo jjimahuaya Jesusa Janinea meshijo nequi Jenosanena huasijje poquinaje oja epeeji cuana nijje. Quijje shequi o'oya majje Jesusa oja epeeji cuana nijje jjapeequi o'oyanaje quea huiso cahuime. Ojaya epeeji cuana jjeyahua nei Jesusajo mimiani. Ojjaña Jodio cuana huohui cani jama ba'a: "Jesusa shequi o'oyanaje" acani. ³² Jjeyahua nei ecuanaa Eyacuiñajjiya esohui quea pame nee miquiana huasijje huohuije jama ba'a: ³³ Eseyaja etiiquiana nijje Eyacuiñajji yahuajo nei mimia poa. Eseyaja ma etiiquianaja osecuaya. Jamajjeya Eyacuiñajjiya esohui esejaya etiiquiana huasijje jayojja jama jjeyahua nei ohuaya acani esejajo. Ojaya esohui jayojja jama ohuaya Jesusa shequi mee ca o'oyanaje. Yahuajo nei nei Dabiya Eyacuiñajjiya esohui Jesusajo tehue ca poa jama ba'a: "Miya ecue Bacua Ejja. Maya eyaya ojjaña ba mee aña" jamaya yahuajo nei nei Dabiya Eyacuiñajjiya esohui Jesusajo tehue ca poa esohuicuayajjiyo, Salmojo —Pabohua acanaje.

³⁴ —Eyacuiñajjiya Jesusa shequi mee ca o'oyanaje emano beca'yojji pojjeama, e'ihui'yojji pojjeama. Eyacuiñajjiya yahuajo nei jama aca poa Jesusa ba'a:

"Ecuea esohui quea pame nee Dabi nijje jayojja jama eyaya miya aje'yo. E'e, eyaya miya quea pame nee nee aje'yo".

³⁵ Pea esohui cuayajjiyo Dabiya tehue ca poa jama ba'a:

"Miyaya eya, mique Bacua Ejja oe nei quea pame nee jaahuanañajo, eya e'ihui'yojji pojjeama tii tii poaje'yo". Jamaya yahuajo nei Eyacuiñajjiya tehue mee ca poa Jesusajo.

³⁶ —Yahuajo Eyacuiñajjiya esejaya etiiquiana Dabi emeshi mese po mee ca poa. Jamatii dejja tii majje Dabi mano'ya poa. Oya etiiquiana nijje emano'yo jaa. Oya ihui'ya poa pea'ai. ³⁷ Jesusa Quito ca ca ihui'yo jji ma poanaje. Eyacuiñajjiya oya emano'yo jaa shequi mee ca o'oyanaje. ³⁸ Ecuea epeeji cuana, eyaya miquianaya huohuiaña Jesusajo. Oya Jesusa eshe o'oya. Jamajjeya ohuaya mimishi cuana pajea meesahua caje'yo miquianajaya. Mimishi cuijea caje'yo pea'ai.

³⁹ Moisesija etehue'yo jayojja jama añajo pojjeama mimishi cuana cuijea ca'yani Eyacuiñajjiya. Jesusa eshe o'oya, de. Onijje jjapeequianijjo ca ca oe ohuaya miquianaya mimishi cuana cuijea ca'yani. Majoya Eyacuiñajjiya miquianaya ba cani emimishi cuijea'yo. ⁴⁰ ¡Jamajjeya Eyacuiñajjiya esohui ba neineicue! miya ojaya etecuea'yojji pojjeama. E'e, yahuajo nei Eyacuiñajjiya esohui tehue mee ca poa jama ba'a:

⁴¹ "¡Shajja'ajjacue mo! Eya miquianaaya niñebaña. ¡Quea mete pocue! Eyaya miya chama'yo tii po meeje'yo. Eyaya ma dejjaa ajjima acani aje'yo miquianajaya ebajji. Jamatii ba majje miquianaya jjashahuabaqui ajja. Onaa huohui cajo, miquianajaya shajja'ajja jjima poaje".

Jamaya yahuajo nei Eyacuiñajji poa —jamaya Pabohua esohui huohui canaje Atioquiajo, Jodioja equi ojee ejja chichaquijjiyo.

⁴² Majoya esohui huohui majje Pabo, Benabe nijje esecue yasijje cuayaquinaje. Majoya beca cuana onijje miminaje jama ba'a: —Pabo, miquea esohui ecuana shajja'ajja sa o'oya poani. ¡Pea ejomishocajji pojajajo poe o'oyacue miquianaya!

⁴³ Jodioja equi ojee ejjachichaquijji nequi esecue yasijje cuayaqui majje quea huiso Jodio cuana, Jodio pojjeama cuana ma Jodioja esohui jayojja jama Eyacuiñajji bihuia cani pea'ai Pabo nijje jjapeequinaje, Benabe nijje pea'ai. Jamajjeya Pabo, Benabe pea'ai ona nijje jama poanaje ba'a: —¡Jesosa nijje jjapee neineiquicue! ¡Eya-cuiñajji esohui a'a pajea'yojji pea'ai! Ohuaya miya jaahuana tiitii cani.

⁴⁴ Majoya pea epojja ejomishocajji beshahua nei ojjaña cuana ma cuiñajji ba'eca jjachichaquinaje Eyacuiñajji esohui shajja'ajjaa, Emeshi Mese neija esohui. ⁴⁵ E'e, quea huiso nee nee poeyanaje Pabojja esohui shajja'ajjaa. Ma ba majje Jodio etii cuana quea quene poanaje. Jamajjeya Pabohua esohui huohui canijo mimicuijjeanobiajea canaje cuaa Pabo. Oya cuana Jesosajo mimisho'i poanaje pea'ai. ⁴⁶ Jamajjeya Pabohua, Benabeya pea'ai mete'ama Jodio etii cuana tecuea canaje jama ba'a: —¡Bacue! Eyacuiñajji ecuana huoojea canaje Jodio cuana huasijje ebionei Jesosaja esohui huohui coohua, eba'e tiitii mee'yojji onijje. Miquianaya ca ca oe jjashajja'ajjaqui sa po ajja. Shajja'ajja sa po'yo ajjajo cuaqui yasijje poquije'yo, eyahuasijje eba'e tiitii'yojji pojjeama, miquianaya. Jamajjeya ecuana poquije Jodio pojjeama cuana sohuihuohuiya. ⁴⁷ E'e, Emeshi Mese neiya, Eyacuiñajji ecuana huohui canaje jama ba'a:

“Eyaya miya huoojeaje Jodio pojjeama cuana huasijje. ¡Ecuea esohui quea ja'a nee ba meecue! ¡Ojjaña cuana ojjaña meshijo ba'eca cuana enijje jjapeequi meesahuacue! Eyaya ojjañaja mimishi cuana cuijeaje'yo, enijje eyajo eba'e'yojji”. Jamaya yahuajo Eyacuiñajji ecuana nijje poanaje —Pabohua acanaje.

⁴⁸ Pabojja esohui shajja'ajja majje Jodio pojjeama cuana quea bihui nee nee poanaje. Oya cuaa Eyacuiñajji bihuia canaje ojaya esohui quea pame nee Jesosajo ba mee canajejojo. Ojjaña joya Eyacuiñajji babaca canaje onijje eba'e tiitii'yojji Jesosa nijje jjapeequi'yonaje, coya oja babaca'yo huiso tiya.

⁴⁹ Majoya ojjaña Atioquia chipi neijo ba'eya Jesosaja esohui shajja'ajja canaje. ⁵⁰ Jamatii Jodio etii cuaa epona cuana quea quene po mee canaje Pabo nijje. Ma epona cuanaja yahuajo nei Eyacuiñajji quea jea nee poanaje. Oya cuana Jodio etii cuanaja Atioquiajo ba'e cuanaja ehuanase cuana poanaje. Jodio etii cuaa jama acanaje ba'a: —¡A'a shajja'ajjaji Jesosaja esohui!

Jodio etii cuaa ojjaña quea quene nee nee po mee ca'yonaje Pabo nijje, Benabe nijje pea'ai. Iña majje oya cuaa Pabo Benabe pea'ai huoojea ca'yonaje. ⁵¹ Majoya Pabohua Benabeya pea'ai ma shajjama' cuana tecueajea majje jiñajea ca'yonaje. Ojjaña ma cuiñajji ba'e ba mee canaje oya cuana shajjama' poanaje, quea mi-

mishi. Majoya Pabo Benabe nijje poquinaje ejiojjijje pea cuiñajji yasijje, Iconio huasijje.

⁵² Edojjoshahua Pame o que dobiq'iyajo, ojjaña Jesosaja epeeji Atioquiajo ba'eca cuana quea bihui nee nee poanaje.

Iconio huasijje esohui huohui canaje Pabohua, Benabeya pea'ai

14 Majoya Pabo, Benabe nijje Iconio huasijje ba'eñajjaquinaje. Atioquiajo acanaje jayojja jama aca o'oyanaje Iconiojo pea'ai. E'e, Jodioja equi ojee ejjachichaquijji yasijje dobiquinaje. Eyacuiñajji esohui quea pame nee Jesosajo huohui canaje quea ja'a nee. Jamajjeya quea huiso Jodio cuana, Jodio pojjeama pea'ai Jesosa nijje jjapeequinaje. ² Jamatii beca Jodio cuana shajja'ajja sa po'yo ajja poanaje. Maaya Jodio pojjeama cuana jama acanaje ba'a: —¡A'a jjapeequijji Jesosaja epeeji cuana nijje! ¡A'a Jesosaja esohui shajja'ajjaji! —jama niñebameya acanaje Pabo cuaa.

Jamajjeya quea huiso cuana Jesosaja epeeji cuana nijje jjapeequi'yo ajja poanaje. ³ Jamatii Pabo, Benabe nijje quea cahui huiso Iconiojo nequinaje. Mete'ama Jesosajo huohui majamaja canaje, Emeshi Mese neijo jama ba'a: —Emeshi Mese neiya Jesosaa eseya quea jea nee acani, eseya jaahuana cani pea'ai —poanaje.

Jesosaa Pabo, Benabe pea'ai ma dejjaa ajjima acani ameesahua canaje. Ma ba majjeya ojjaña ba canaje Pabojja esohui Jesosajo e'e nei, Benabeja pea'ai. ⁴ Jamajjeya Iconiojo quea huiso cuana shajja'ajja sa poanaje Jesosaja huoojea'yo cuanaja esohui. Pea cuana ca ca Jodioja esohui jayojja jama a sa poanaje. Shajja'ajja sa po'yo ajja poanaje Jesosaja esohui.

⁵ Majoya beca Jodio pojjeama Jodio cuana nijje, ojaya emeshi mese cuana nijje jjachichaqui majje mimimiminate. Jama poanaje ba'a: —¡Cua'a! ¡Pabo, Benabe pea'ai ejjacuijjeaquiqui, ejjasapa jahuejjajeaquiqui oe meiya! —poanaje.

⁶ Jamatii Pabohua, Benabeya pea'ai maya shajja'ajja canaje. Shajja'ajja majje quehua poquinaje Nicaonia meshi yasijje. Debe cuiñajji yasijje, Nisata cuiñajji yasijje pea'ai esohui quea pame nee Jesosajo huohui capoquinaje ba'e chejje cuana huasijje, cuiñajji sisi cuana huasijje pea'ai.

Nisatajo Pabo iña canaje cuaa

⁸ Nisata cuiñajji deaja jiojjijajja ba'e'yonaje, jeo ajja. Oya jamatii cuaya, jiojjijajja tii. ⁹ Pabohua esohui huohui canijo, jiojjijajja shajja'ajja neinei ca'aninaje. Majoya Pabohua jiojjijajja ba neinei canaje. Jjashahua baquinaje jama ba'a: —¡Jiojjijajja Jesosajo quea pame jjashahuabaquiani jama ba'a: “Jesosaa eya jeo mee ca'je'yo”. Jamajjeya eyaya oya jjajiojji jeapiihuiqui meeje'yo —Pabo poanaje.

¹⁰ Jamajjeya Pabohua oya jama acanaje ba'a: —¡Jiojjijajja, ¡nequisohuacue! ¡Jeocue! —acanaje.

Jiojjijajja nequisohua cuajinaje. Jejeonaje. E'e, jiojjijajja jjajiojji jeapiihuiquinaje. ¹¹ Ma ba majjeya quea

huiso cuaa Pabo bihuia canaje. Onajaya emimijo, Ni-caoniaja esohuio jama poanaje ba'a: —E'e de. ¡Bacue Pabo, Benabe pea'ai! Eyacuiñajji cuana ecuana que jaoque'yonaje dejja jayojja, de —acanaaje. Pabo, Benabe pea'ai eyacuiñajji poso acanaaje cuaa.

¹² Jamajjeya Benabe eyacuiñajji nisho bajjani acanaaje Jopite bajjani. Pabo mimi huicha'a huicha'anijo, oya pea eyacuiñajji nisho bajjani acanaaje Meconio bajjani.

¹³ Epana'yo huohuijji, epana'yo jaahuanajji ma epana'yo Jopite nequijji equijo nequinaje Nisata pejeje.

Ohuaya ana'ai yahue cuana, eshasha quea huiso cuana pea'ai jjequi canaje cuiñajji esecue yasijje, Pabo que. Ohuaya pea cuana nijjeya ana'ai cuana, eshasha cuana pea'ai dahuajea sa acanaaje Pabo bihuiajji, Benabe pea'ai bihuiajji; eyacuiñajji poso bihuia sa acanaaje.

¹⁴ Benabe, Pabo pea'ai ma ba majje quea mete poanaje. Poquicuajinaje dejja cuana jjachichaquiani yasijje.

¹⁵ Jama taaame poanaje ba'a: —¿Apiojji acuaeya mi-quianaaya jama aña so'o? Ecuana aje dejja cuana mi-quiana jayojjaya. ¡A'a ecuana bihuiajji! Ecuanaa esohui quea pame Jesusajo huohuiaña. Jamajjeya ja'a eyacuiñajji nisho cuana bihuia majajji! ¡Pajea'yocue! Eyacuiñajji oe nei e'e jojo nei eshe tii nequi. ¡Oya oe nei bihuiaque! Ohuaya eyatahuatahua pana ca'ya poa.

Meshi cuana, bae cuana pea'ai pana ca'ya poa. Ojjaña aquiana meshijo, eyajo, enajo pea'ai pana ca'ya poa ohuaya, Eyacuiñajjiya. ¹⁶ Yahuajo nei nei ojjaña cuaa ojjaña meshijo ba'eya quea mimishi nee aca poa. Jamatii Eyacuiñajjiya oya cuana mimishi cuana pajea mee'yo jjima poa. ¹⁷ Jamatii Eyacuiñajjiya yahuajo ojjaña cuana quea pame aca poa. Ojjaña ba mee ca poa oya eshe nequi. Jjeya ohuaya mi-quianaya quea pame nee acani pea'ai. Nayaja po mee ca'yani, eshequiaja po mee ca'yani, bobi tii mee ca'yani pea'ai. Jamaya ohuaya mi-quianaya quea bihui nee ba'e meesahua cani pea'ai —Pabohua acanaaje.

¹⁸ Jamaya Pabohua, Benabeya pea'ai huohui canaje. Jamatii ma dejja cuaa beshahua nei oya bihuia canaje. Ana'ai beshahua nei dahuajea canaje o bihuiajji. Dahuajea jjima; beshahua nei, de.

¹⁹ Majoya Jodio cuana Atioquiajo ba'e, Iconiojo ba'e pea'ai poeyanaje Nisata huasijje. Oya cuaa Nisata dejja cuana siajje acanaaje Pabojo. Siajje acajje quea quene nee nee poanaje Pabo nijje. Majoya oya cuaa Pabo iña canaje; sapa jaja canaje meiya, dojocuayaqui canaje cuiñajji esecue yasijje. Pabo emano'yo poso jeajea canaje cuaa jomajo tii. ²⁰ Jamatii quiije pishana Jesusaja epeeji cuana poeyanaje Pabo baa. Ojjaña o que jjachichaquiajo, Pabo shequi'yonaje. Shequi'yo majje huacuaya Nisata huasijje poe o'oyanaje. Majoya mecajjeahua nei oya Benabe nijje poquinaje pea cuiñajji yasijje, Debe yasijje.

Pabo, Benabe nijje huacuaya poqui o'oyanaje, Atioquia huasijje

²¹ Debe yasijje poqui majje Pabohua, Benabeya pea'ai Eyacuiñajjiya esohui quea pame nee Jesusajo huohui cañaquinaje. Quea huiso cuaa shajja'ajja cana-

je. Jesusa nijje jjapeequinaje. Majoya, Pabo Benabe nijje huacuaya poqui o'oyanaje Nisata huasijje. Iconio huasijje pea'ai poqui o'oyanaje. Majoya Pisinia meshi yasijje Atioquia huasijje poqui o'oyanaje ojjaña Jesusaja epeeji eyacua cuana baa. ²² E'e, Pabohua, Benabeya pea'ai Jesusaja epeeji cuana ma cuiñajji cuanajo ba'eca cuana esohui huohui ca o'oyanaje jama ba'a: —¡Jesusa nijje jjapee neineiquicue! ¡A'a oya pajea'yojji! Eyajo Eyacuiñajji ojjaña huoojeajji poani. Esey a onijje ba'e tiitii sa poanijo, onaaya, mimishi cuaa eseya napa caje quea huiso. Quea camaja esejo poaje. Quea nee poaje pea'ai —Pabohua acanaaje.

²³ Majoya Pabohua, Benabeya pea'ai ma cuiñajji cuanajo Jesusaja epeeji quea pame babaca canaje Jesusaja epeeji cuana jaahuanajji epojji. Majoya ijjia'ijjia jjima nequi Eyacuiñajji nijje mimi majamajanaje Jesusaja epeeji jaahuanajji cuanajo jama ba'a: —Emeshi Mese nei Jesusa, miya quea pame nee nee. Jiquio dejja cuana miquea epeeji nei cuana ecuanaaya babacanaje miquea epeeji cuana jaahuanajji epojji. Jamajjeya jaya cuana miquea epeeji cuana jaahuana meesahuacue quea pame nee! —poanaje.

²⁴ Jamajjeya Pabohua, Benabeya pea'ai Pisinia meshijo esohui huohuinana o'oya majje Panipinia meshi yasijje poqui o'oyanaje. ²⁵ Majoya Eyacuiñajjiya esohui quea pame nee Jesusajo huohui canana o'oyanaje Pene cuiñajji yasijje. Majoya oya cuana poquinaje Atania cuiñajji yasijje. ²⁶ Jomajo Ataniajo bishe ai yasijje nequi-sohuaquinaje. Besapoqui o'oyanaje Atioquia huasijje. Jomajo yahuajo pishana Jesusaja epeeji cuana Eyacuiñajji nijje mimi majje oya cuana huoojea canaje esohui huohuiya. Eyacuiñajji nijje miminaje pea'ai o jaahuanajji, esohui quea pame Jesusajo huohui canijo.

²⁷ Jamajjeya Atioquia huasijje poe'yo majje Pabohua, Benabeya pea'ai ojjaña Jesusaja epeeji cuana iyaa canaje. Jjachichaqui'yajo Pabohua, Benabeya pea'ai quio o poquinaje huohui canaje. Majoya jama acanaaje ba'a: —Ojaya esohui quea pame nee Jesusajo huohuinanañaajo, Eyacuiñajjiya ecuana quea pame nee acanaaje. Eyacuiñajjiya quea huiso Jodio pojjeama cuana oja sohui ba meesahua canaje pea'ai —jamaya acanaaje Pabohua, Benabeya pea'ai.

²⁸ Oya cuana Atioquiajo nequi'yonaje Jesusaja epeeji cuana nijje quea huiso cahuime.

Jesusaja epeeji cuana ojee miminaje Jenosanenajo

15 Majoya beca dejja cuana poeyanaje Atioquia huasijje. Oya cuana Jodio dejja, Jodea meshijo ba'e. Jamajjeya poe majje ohuaya Jesusa Quitoja epeeji cuana jama sohuihuoime acanaaje ba'a: —¡Etiiquiana Moisesija esohui etehue'yo jayojja jama acue! ¡Cuiishasha biso nei jehusejjajeacue! Jamaya ajjimajo Eyacuiñajjiya miya emimishi cuijea'yojji pojjeama —acanaaje.

² Shajja'ajja majje Pabo, Benabe pea'ai jjamicuajjea nobiajeaquinaje janobajjima nei, ma Jodio dejja cuana nijje quea huiso miminaje pea'ai. Majoya Jesusaja epeeji cuaa jama acanaaje ba'a: —Benabe, Pabo,

pea Jesusaja epeeji cuana nijje capoquiahua Jenosanena huasijje. Jomajo Jesusaja huoojea'yo cuana nijje, Jesusaja epeeji etii cuana nijje pea'ai camimiahua Moisesija etehue'yojo, Jesusaja esohuijo pea'ai —poanaje.

³ Majoya Jesusaja epeeji cuaa Atioquiajo ba'eya oya cuana huoojea canaje. Jenosanena huasijje poquijeya oya cuana Penisia meshijo, Samania meshijo pea'ai cuiñajji cuana yejje ca poquipoquinaje. Jesusaja epeeji cuana sohuihuohui capoquinaje jama ba'a: —Jodio pojjeama quea huiiso cuana Jesusa nijje jjapeequiani —poanaje.

Ma esohui shajja'ajja majje ojjaña Jesusaja epeeji cuana quea bihui nee nee poanaje.

⁴ Majoya oya cuana Jenosanena huasijje poe'yonaje. Jomajo ojjaña Jesusaja huoojea'yo cuana, Jesusaja epeeji etii cuana pea'ai quea bihui nee miminaje Pabo nijje, Benabe nijje pea'ai. Majoya Pabohua, Benabeya pea'ai huohui canaje ojjaña Eyacuiñajjiya oya cuana ameesahua canaje Jodio pojjeama cuanajo, pea meshi cuana huasijje.

⁵ Jamatii beca Paniseo cuana ma Moisesija etehue'yo jaahunajji poani nequisohua majje jama poanaje ba'a: —Chojja. ¡Jodio pojjeama cuana Jesusa nijje jjapeequi majje cuiishasha biso nei cajehusejjajea cahua! Ojjaña Moisesija etehue'yo cuana jayojja jama ca'ca cahua pea'ai —poanaje Paniseo cuana, Jesusaja epeeji cuana.

⁶ Jamajjeya Jesusaja huoojea'yo, Jesusaja epeeji etii cuana pea'ai jjachichaquinaje Paniseoja esohuijo mimiya. ⁷ Ma esohuijo quea huiiso mimimiminaje. Ojjaña cuana mimi'yajo, Penohua nequisohua majje ojjaña jama acanaje ba'a: —Epeeji cuana, yahuajo Eyacuiñajjiya eya huoojea canaje esohui quea pame nee Jesusajo huohuiya Jodio pojjeama cuana huasijje. Shajja'ajja cajo, Eyacuiñajjiya oya cuana Jesusa nijje jjapeequi meesahua canaje. Edojjoshahua Pame huoojea canaje ona huasijje dobiquiya. Jamaya miquijanajaya eba. ⁸ Eyacuiñajjiya eba ojjañaja ejjashahuabaquijji. Ohuaya Jodio pojjeama cuana quea pame nee acanaje. E'e, yahuajo Eyacuiñajjiya eseya, Jodio cuana, quea pame aca poa jayojja jama jjeya ohuaya oya cuana acanaje pea'ai.

E'e, Jodio pojjeama cuana quea pea'ai ohuaya Edojjoshahua Pame huoojea canaje ona huasijje dobiquiya.

⁹ E'e, Eyacuiñajji jjashahuabaquinaje jama ba'a: "Jodio pojjeama cuana Jodio cuana jayojjaya" poanaje. Jamajjeya Jesusa nijje jjapeequianijo, ohuaya Jodio pojjeama cuanaja mimishi cuana cuijea ca'yonaje pea'ai. ¹⁰ ¿Yajjajo acuae mi Eyacuiñajji jayojja jjashahuabaquime mi poani so'o? Miquianaaya jama aña ba'a: "Jesusaja epeeji cuaa Moisesija etehue'yo jayojja jama ca'ca cahua". Chojja, quea camaja ca coma, de. Eseyaya etiiquiana cuanaja, esejaya pea'ai Moisesija esohui etehue'yo cuana jayojja jama a'yo jjima poanaje. Quea camaja. ¹¹ ¡Chojja! Eseyaya ca ca Jesusaja esohui jayojja jama aña. Jamajjeya Emeshi Mese neiya Jesusaa eseya quea jea nee acani. Onijje jjapeequianijo, esejaya mimishi cuana cuijea'yo majje onijje ba'e tiitii mee caje'yo eyajo. Oya jayojjaya ohuaya acani Jodio pojjeama

cuanajo, Jesusa nijje jjapeequianijo pea'ai —Penohua acanaje.

¹² Peno mimi'yajo ojjaña cuana mimi'yo ajja poanaje. Shajja'ajja canaje. Majoya Pabohua, Benabeya pea'ai huohui canaje jama ba'a: —Jodio pojjeama huasijje ojaya esohui huohuiqui'yajo, Eyacuiñajjiya ecuana ma dejjaa ajjima acani ameesahua canaje quea huiiso —acanaje. Majoya Pabohua, Benabeya pea'ai huohui canaje quea huiiso.

¹³ Majoya Pabo, Benabe pea'ai mimi pajea'yajo Satiaco jama poanaje ba'a: —Epeeji cuana, ¡shajja'ajjacue mo! ¹⁴ Penohua jjeyahua nei eseya huohui canaje Eyacuiñajjiya Jodio pojjeama cuana quea jea nee acanaje pea'ai. Jamajjeya oya cuana Jesusa nijje jjapeequi meesahua ca'yonaje. Jamaya poanaje Peno. ¹⁵ E'e, jamaya Eyacuiñajjiya esohui huohuijjiya yahuajo nei nei huohui ca poa pea'ai. Jama tehueme aca poa ba'a:

¹⁶ "Quijje eyaya Dabija osecua Emeshi Mese nei po meeje'yo. Equi e bihuiajji epajea'yo poa. Poe majje eyaya oya cuana bihuia meesahuaje o'oya. ¹⁷ Jamajjeya pea cuana, Jodio pojjeama cuana, ojjaña meshijo ba'eca enijje jjapeequi sa poaje. Eya ojjañaja Emeshi Mese nei quea pame nee poaje'yo. ¹⁸ Jamaya Emeshi Mese nei quea pame neeya huohui ca poa yahuajo nei. Ma esohui yahuajo ohuaya pea cuana ba meesahua ca poa".

Jamaya yahuajo nei Eyacuiñajjiya esohui poa.

¹⁹ —Jamajjeya eya jjashahuabaquiani jama ba'a: Jodio pojjeama cuana Jesusa nijje jjapeequianijo ¡a'a Moisesija etehue'yo jayojja jama ameejji! Chojja, maya quea camaja nee nee. ²⁰ Jamajjeya Jodio pojjeama cuana huasijje esohui tehuecue jama ba'a: "Jesusaja epeeji cuana, ¡noe eyacuiñajji nisho bihuiajji onaja dahua a'a ¡ijji! ¡A'a pea cojjojji pojji pea'ai! ¡Noe na' cuaya meequi ¡jjima a'a ¡ijji! ¡¡jjiacajji na' a'a ishijji! Jamaya miqiaa ajo Jodio cuana miqiana nijje quea quene nee nee poaje". ¡Jamaya tehuecue Jesusaja epeeji eyacuaja ebajji! —Satiacohua acanaje—. ²¹ E'e ojjaña cuiñajji Jodio dejja cuanaja esohui huohuijji cuaa Moisesija etehue'yo huohui cani Jodioja equi ejjachichaquijji. Yahuajo nei huohui ca poa. Jjeya nei huohui cani pea'ai ojjaña epojja ejomishocajji. Jamajjeya ¡a'a Moisesija etehue'yo jayojja jama ameejji! —acanaje Satiacohua.

Jesusaja epeeji etii cuaa esohui tehue canaje Jodio pojjeama cuanaja ebajji, Jesusaja epeeji eyacua cuanaja

²² Majoya Jesusaja huoojea'yo cuaa, esohui huohuijji cuaa, Jesusaja epeeji etii cuaa, ojjaña Jesusaja epeeji cuana jomajo nequiya pea'ai Pabo nijje, Benabe nijje huoojea sa acanaje becanejjijji pea'ai epeeji cuana Atioquia huasijje. Jamajjeya huoojea canaje Basabaja bacua ejja Joda. Onijje huoojea canaje pea dejja Sinasi bajjani. Oya cuana Jesusaja epeeji cuanaja huoojea'yo poanaje, quea pame nee nee. ²³ Sinasi nijje, Joda nijje pea'ai esohui etehue'yo huoojea canaje Jesusaja epeeji cuanaja ebajji. Ma esohui etehue'yo jama poanaje ba'a:

“Epeeji cuana Atioquiajo ba'e, Sinia meshijo ba'e, Sinisia meshijo ba'e pea'ai, ecuaaya, Jesusaja huoojea'yo cuaa esohui huohuijiya, Jesusaja epeeji etii cuaa pea'ai jiquio esohui etehue'yo huoojeaña miqiana huasijje, Jesusaja epeeji cuana Jodio pojjeama cuana huasijje. E'e, ecuaaya quea bihui nee tehuenaje miqiana huasijje. ²⁴ ¿Achajja a quiana ani, ecuanaja epeeji cuana? ¡Bacue! Miqiana huasijje beca dejja jiquiojo nequi tii cuaa Moisesija esohui huohui canaje. Moisesija esohui jayojja jama miqianaya ba'e meeme ajja. Quea camaja, de. Jamajjeya miqianaya quea yeno poanaje. Ecuanaja ma dejja cuana huoojea jjima miqiana que esohui huohuiya. ¡A'a shajja'ajjajji cuana! ²⁵ Miqianaya quea yeno poanaje. Jamajjeya ecuaa jiquiojo tii quea huiso nee ojee jjashahuabaqui majje jama poanaje ba'a: Ecuaaya miqiana que pea dejja cuana huoojeaña Benabe nijje, Pabo nijje pea'ai. E'e, Pabo, Benabe pea'ai ecuanaja epeeji cuana.

²⁶ Oya cuana Emeshi Mese nei Jesosa Quitojo chacoconaje mete'ama. Onaaya oya cuana beshahua nei jajahuejjajja ca'yonaje, Jesosa nijje jjapeequianijojjo.

²⁷ Jamajjeya ecuaaya dejja quea pame becanejjijji pea'ai huoojeaña miqiana que, Joda, Sinasi pea'ai. Oya cuaa ecuanaja etehue'yo huohui caje'yo miqianaja eshajja'ajjajji. ²⁸ E'e, Edojjoshahua Pameya ecuaa jjashahuabaqui mee cani jama ba'a: Ecuaaya miqianaya huohui ajja Moisesija esohui etehue'yo jayojja jama yajji. Chojja, jamaya miqianaaya ameeme ajja. Quea camaja. Jiquio jama acue miqianaaya ba'a:

²⁹ ¡Noe ma eyacuiñajji nisho bihuijji onaja dahua a'a ijjiajji! ¡A'a pea cojjojji pojji! ¡Noe na' cuaya meequi jjiima a'a ijjiajji! ¡Ijjiacajji na' a'a ishijji pea'ai! Jamaya miqiaa ajo Jodio cuana miqiana nijje quea quene nee poaje. Mahuiso ecuanaja esohui etehue'yo miqiana que. Jamajjeya jamaya añajo miqianaya quea pame nee ba'eje. Apoa.”

Jamaya Jesusaja huoojea'yo esohui huohuiji cuaa, Jesusaja epeeji etii cuaa pea'ai tehue canaje Jesusaja epeeji eyacua cuanaja ebajji.

³⁰ Jamajjeya Pabo, Benabe nijje, becanejjijji pea'ai dejja nijje poqui o'oyanaje Atioquia huasijje. Jomajo nequiñaqui majje ojjaña Jesusaja epeeji iyaa canaje. Ojee jjachichaqui'yajo, etehue'yo ba mee canaje. ³¹ Ma esohui etehue'yo ba majje ojjaña Jesusaja epeeji eyacua cuana quea bihui nee nee poanaje.

³² Joda, Sinasi pea'ai Jesusaja esohui huohuiji poanaje. Jamajjeya oya cuaa Jesusaja epeeji cuana sohuihuohui canaje quea huiso nee. Quea huiso Jesosa nijje jjapeequi meesahua canaje quea ja'a nee.

³³ Quea cahui huiso Atioquiajo esohui huohui canaje. Majoya Jesusaja epeeji cuaa Atioquiajo ba'eya oya cuana huoojea ca'yonaje Jenosanena huasijje, Jesusaja huoojea'yo esohui huohuiji cuana huasijje. Quea bei nee poqui'yonaje. ³⁴ Sinasi ca ca nequinaje Atioquiajo tii. Poqui sa po'yo ajja poanaje. ³⁵ Pabo, Benabe pea'ai Atioquiajo nequinaje. Quea huiso pea cuana nijjeya Emeshi Mese nei Jesusaja esohui huohui tiitii canaje.

Ojjaña Jesusaja epeeji eyacua cuana esohui ba neinei meesahua canaje.

Pabo Benabe nijje poqui pajea'yonaje

³⁶ Majoya Pabo Benabe nijje jama poanaje ba'a: —Cua'a, Jesusaja epeeji cuana ojjaña cuiñajji yasijje ej-jabaquiqui o'oya, ma yahuajo eseya Jesusaja esohui huohuiquinaje yasijje. E'e pojja'a esejaya esohui pajea ca'yonaje. E'e pojja'a pajea'yo jjima; ba'ajja —poanaje Pabo.

³⁷ —E'e —poanaje Benabe—. Jamaya quea pame. Huani Macoso ese nijje ejjadojoqui pea'ai, ma yahuajo ese nijje poqui'ajjanaje.

³⁸ —Chojja —acanaje Pabohua—. Yahuajo Panipinia meshijo Huani Macosohua eseya jiña ca'yonaje. Chacochaco jjima ese nijje. Huacuaya poqui'yonaje Jenosana huasijje. Eya o dojo sa po'yo ajja.

³⁹ Jamajjeya Pabo, Benabe nijje jjamimicuijje nobiajequinaje. Ojee poqui pajeanaje. Majoya Benabe besapoquinaje Chipe nasi ai yasijje. Huani Macoso dojo canaje onijje echacojji. ⁴⁰ Pabohua ca ca Sinasi babaca canaje onijje epoquijji Jesusaja esohui huohuisahuajji. Jamajjeya Jesusaja epeeji cuana ojee Eyacuiñajji nijje miminaje Pabojjo, Sinasijo pea'ai jama ba'a: —Eyacuiñajji, ¡Pabo, Sinasi pea'ai poqui meesahuacue miquea esohui huohuiya! ¡Oya cuana jaahuanacue! —poanaje.

⁴¹ Majoya Pabo Sinasi nijje poqui o'oyanaje Sinia meshi yasijje, Sinisia meshi yasijje pea'ai. Jesusaja esohui huohui capoqui o'oyanaje. Ojjaña Jesusaja epeeji cuana Jesosa nijje jjapeequi meesahua canaje quea ja'a nee.

Timoteo poquinaje Pabo nijje, Sinasi pea'a nijje

16 Majoya Pabo Sinasi nijje poqui o'oyanaje Debe yasijje, Nisata huasijje pea'ai. Jomajo ohuaya Jesusaja epeeji shacuima' nequi ba canaje Timoteo bajjani. Timoteoja enaese Jodio pona poanaje, Jesusaja epeeji pea'ai. Ojaya ejeajji ca ca Jieno dejja poanaje.

² Ojjaña Jesusaja epeeji cuaa Nisatajo ba'eya, Iconiojo ba'eya pea'ai Timoteojo quea bihui nee huohui canaje jama ba'a: —Timoteo quea pame nee, Jesusaja epeeji quea ca'a nee oya, de —poanaje.

³ Jamajjeya Pabohua Timoteo dojo sa acanaje onijje esohui huohuiya. Quea huiso Jodio cuana ma meshijo ba'enaje; ojjañaja eba Timoteoja ejeajji Jodio pojjeama, Jieno dejja. Jamajjeya ebacua ejja Timoteo Jieno cuana jayojja jama tii'yonaje; Moisesija etehue'yo jayojja jama cuiishasha biso nei jehuissejjajja jjima poanaje. Jamajjeya Jodio cuana tecue'ama onijje epojji Pabohua Timoteo cuiishasha biso nei jehuissejjajja mee canaje.

⁴ Majoya oya cuana poquinaje ojjaña cuiñajji cuana huasijje. Ojjaña Jesusaja epeeji cuana huohui capoquinaje esohui etehue'yo ma Jesusaja huoojea'yo esohui huohuiji cuaa, Jesusaja epeeji etii cuaa Jenosanenajo tehue canaje. Ojjaña ma etehue'yo ba mee canaje: —E'e, ¡ma etehue'yo jayojja jama acue miqianaaya! —acanaje Pabohua, Sinasiya pea'ai. ⁵ Jamajjeya Jesosa-

ja epeeji cuana Jesusaja esohui jayojja jama ba'e meesahua canaje. Yahuaajo oya cuana quea ja'a pishana ba'enaje. Jjeyahua nei ca ca Jesusaja epeeji quea ja'a nee ba'enaje Jesusajo. Quea huiso cuana Jesusa nijje jjapeequi poquipoquinaje pea'ai.

Pabo jjacahuibaquinaje Eyacuiñajji onijje miminaje

⁶ Jamatii Edojjoshahua Pameya oya cuana Asia meshi yasijje poqui mee jjima acanaje. Jomajo esohui huohui mee jjima acanaje. Jamajjeya oya cuana Pichia meshi yasijje poquinaje, Janata meshi yasijje pea'ai poquinaje. ⁷ Majoya oya cuana poeyanaje Misia meshi yasijje. Jomajo oya cuana jjashahuabaquinaje Bitinia meshi yasijje epoquijji. Jamatii Edojjoshahua Pameya oya cuana ma meshi yasijje poqui mee jjima acanaje. ⁸ Jamajjeya oya cuana Misia meshije jjayejjequinaje. Toasa cuiñajji yasijje poquinaje, bae ai sahua huasijje. ⁹ Jomajo Eyacuiñajjiya Pabo jjacahuibaqui mee canaje jama ba'a: Jjacahuibaquianijo Pabohua oe dejja cahuiba canaje Masenonia meshijo ba'e. Oya Pabo nijje miminaje jama ba'a: —Pabo, ¡poecue Masenonia meshi yasijje, ecuanaja meshi yasijje! ¡Ecuana Jesusaja esohui huohuihuacue! —jamaya acanaje Masenonia dejjaa.

Majoya Pabo shequi'yonaje. ¹⁰ Jamajjeya shequi'yo majje Pabo Masenonia meshi yasijje ecuana nijje besapoqui sa poanaje. Jama jjashahuabaquime poanaje ba'a: —Eyacuiñajjiya eseya huoojea cani Masenonia meshi yasijje esohui quea pame nee Jesusajo huohuiya, ojjaña Masenonia meshijo ba'e sohuihuohuiya.

Jamajjeya ecuana aquiana cuana chicha majje besapoquinaje.

Pabo, Sinasi pea'ai Pinipo cuiñajji yasijje besapoquinaje

¹¹ E'e Teopino, eyaya, Nocaa pea esohui Jesusaja epeeji cuanaja, ma eyaya banaje eyaya tehueaña miquea ebajji jama ba'a: Majoya Toasa huasijje poe majje ecuana bishe ai yasijje nequisohuaquinaje. Besapoquinaje Samatasia nasi yasijje. Majoya pea mecahuajje besapoquinaje Neaponi cuiñajji yasijje, bishe aijo.

¹² Majoya Neaponijo nequi ecuana poquinaje quea huesha nee, Pinipo cuiñajji yasijje ejiojjijje Masenonia meshi ebio dojjojo. Pinipojo Shomano dejja cuana ba'yani quea quemo cuiñajjiyo. Jamajjeya quea huiso dejja Pinipo huasijje poeyani anicuaa. Jamajjeya ecuana Pinipojo nequinaje quea cahui huiso. ¹³ Majoya Jodioja epojja ejomishocajjiyo ecuana cuiñajji esecue yasijje poquinaje cuei sahua huasijje. Jama jjashahuabaquime poanaje ba'a: —Jomajo Jodio cuana Eyacuiñajji nijje mimiani ba'ajja.

Jomajo quea huiso epona ejjachichaqui ani banaje. Jamajjeya Pabo, ojaya epeeji cuana pea'ai anioquenaje. Esohui huohui canaje epona cuanaja eshajja'ajjajji. ¹⁴ Oe eponaa Ninia bajjaniana quea ja'a nee shajja'ajja canaje. Oya Tiatina pona, Tiatina cuiñajjiyo ba'e, daqui huo'o quiajji pea'ai, daqui huo'o quea pame nee nee quiajji. Oya Ninia Eyacuiñajjiya epeeji yahuaajo poanaje.

Jamajjeya Emeshi Mese neiya oya shajja'ajja meesahua canaje Pabojja esohui quea pame nee Jesusaja. ¹⁵ Jamajjeya Ninia, oja huapa pojjeama cuana pea'ai Jesusa nijje jjapeequi'yonaje. Onaaya oya Eyacuiñajjiyo besa mee canaje enajo. Majoya Niniaa Pabo jama acanaje ba'a: —Miquea eba eya Emeshi Mese nei Jesusaja epeeji nei, ojaya esohui jayojja jama aña. Jamajjeya ¡ecuea equijo ba'ecue! —poanaje Ninia.

Jamajjeya ecuana Niniaa ja'a cajjequinaje ojaya equijo eba'ejji.

Pabo, Sinasi pea'ai jeanobiajea canaje cuaa

¹⁶ Quijje ecuana poqui o'oyanaje cuei yasijje Eyacuiñajji nijje mimiya. Poquijjeya ecuaaya banaje oe epona ahuema' ani. Ohuaya chaco cani sosema' niñepoqui yayjejojo. Jamajjeya eshahuaa esapajo nequiya epona huohui meesahua canaje ohuaye nei ma quijje onaa acaje. Maya huohui capoquinaje quea huiso bejjo sosejje. O chacomeejji poaniya quea huiso bejjo jjeshe canaje epona niñepoquiya huohui cani sosejje. ¹⁷ Ma epona niñepoqui Pabo quishishijji poquinaje. Taaa poquinaje jama ba'a: —Jiquio dejja cuana Eyacuiñajji quea ca'a neeja echacojji poani. Onaaya miqianaya huohui cani esohui quea pame nee Jesusajo, ma ohuaya mimishi cuana cuijea'yo majje miqianaya ba'e tiitii mee caje'yo eyajo —jama taaa nishomeya poanaje ecuana quishishijji poquije.

¹⁸ Jama taaa majamaja nishomeya epona popoquinaje quea huiso cahuijo. Quijje Pabo quea quene po majje, jjanojjaquicuaji majje eshahua eponajo nequi huoojeacuayajea ca'yonaje jama ba'a: —¡Eshahua eponajo nequi cuayaqui'yocue! ¡A'a dobiqui o'oyajji! Jesusa Quito nijjeya eyaya miya huoojeacuayajea'yaña —Pabohua acanaje.

Jjeyahua nei eshahua eponaja yamijo nequi cuayaqui'yonaje.

¹⁹ Ma ba majje eponaja echacomeejji poani quea quene nee nee poanaje Pabo nijje, Sinasi nijje pea'ai. Jama poanaje ba'a: —¡De! Jjeya epona shahuama'yo. Jamajjeya ojaya ba'yo jjima poaje ojaye nei ma onaa quijje nei acaje. Onajaya ecuana esosequia'yoyji pojjeama ma ma eponaa huohui cani sosejje —poanaje epona chacomeejji poani.

Jamajjeya epona chacomeejji poaniya Pabo, Sinasi pea'ai iña canaje. Dojo canaje ojjaña aquiana quiajji equi yasijje. Jomajo Pinipo emeshi mese nijje miminaje, etii cuana nijje. ²⁰ Shomano emeshi mese huohui'ajja cañaquinaje jama ba'a: —¡Bacue! Jiquio Jodio dejja cuaa, Pabohua, Sinasiya pea'ai ojjaña cuana ecuanaja cuiñajjiyo ba'e quea quene nee nee po mee cani. ²¹ E'e, oya cuaa pea ejjashahuabaqui'yoyji huohui canaje. Pea eba'ejjijjo huohui canaje. Jamaya pojjeama ecuanaja emeshi meseja esohui. Jamaya pojjeama Shomano dejja cuanaja esohui pea'ai. Ecuana Shomano dejja cuana, jamajjeya Pabojja esohui jayojja jama yayji, ¿yajja e'ajji?

²² Majoya ojjaña dejja cuana cuajicuaji jebejenaje Pabo que. Quea quene nee ojjaña poanaje Pabo nijje, Si-

nasi pea'ai nijje. Emeshi mese cuana pea'ai quea que-
ne po majje Paboja daqui Sinasija daqui pea'ai oja
ehuosho ba'e iña'isajea canaje. Huohui canaje jama
ba'a: —¡Pabo, Sinasi pea'ai cuiasejja neineicue acui si-
siya! ¡Majoya oe jeanobiajhea meequicue ejjajeano-
biquijji equi yasijje! —acanjje Pinipo emeshi mese cuaa.

²³ Jamajjeya Pabo, Sinasi pea'ai janobajjima nei cui-
sejja huicha'a huicha'a canaje cuaa. Majoya oya cuana
dojo canaje ejjajeano-biquijji equi yasijje jeanobiajhea.
Ejjajeano-biquijji equi cuiñajji jama acanjje ba'a: —¡I-
quio dejja cuana jaahuana neineicue! ¡A'a cuayaqui
mee'yojji! Poquiquehuajo aje mi oe cuiajea caje'yo
emeshi mese cuaa —acanjje.

²⁴ Jamajjeya ejjajeano-biquijji equi cuiñajjiya ma
esohui shajja'ajja majje quea mete poanjje. Pabo, Si-
nasi pea'ai ejjajeano-biquijji equi dojjo nei yasijje jea-
nobiajhea canaje; quibo jeyochicha canaje acui tejje.

²⁵ Jamatii mecashono Pabo, Sinasi pea'ai Eyacuiñajji
nijje mimi jaanaje. Sohuicuaya jaanaje pea'ai. Ojjaña
cuaa ejeanobia jaa shajja'ajja canaje sohuicuaya jaa.

²⁶ Majoya meshi huehuahuehuanaje janobajjima nei.
Mei jiyu cuana huehuahuehua neineinaje pea'ai. Ese-
cue cuana jamatii nequi jjaca'apejojeaquinaje. Ojjaña
dejja cuana ejeanobia jaa jjapichojeaqui'yonaje baa
jjono cuana, de. ²⁷ Oja ejeanobia cuiña po'ani aje oe
shequi'yonaje. Shequi'yo majje ba canaje ojjaña ese-
cue cuana ejjaca'apejoqui'yo nequi. Ojjaña dejja ejeyo-
jaa poqui'yonajejo poso metejjanaje. Baa iña canaje
ejjaacuaqui'yojji nisho. ²⁸ Jamatii Pabo jama taaame
poanjje ba'a: —¡A'a oe jjaacuaqui'yojji! Ecuana yani oj-
jaña tii; poqui'yo jjima —Pabo poanjje.

²⁹ Paboja esohui shajja'ajja majje equi ejjanobiaquijji
cuiñajji taaanjje jama ba'a: —¡Cuaquijji oe yecue!
—poanjje.

Cuaquijji iña majje ejjajeano-biquijji dojjo huasijje
cuajicuajipoquinaje Pabo baa. Pabo ba majje ecui'os-
hajjajo nequinaje. Quea mete jjejojo piopionequinaje.
Ojaya eba Pabo, Sinasi pea'ai Eyacuiñajji epeeji cua-
na. Jamajjeya oya cuanajo quea mete nee poanjje.

³⁰ Majoya ohuaya Pabo, Sinasi pea'ai ejjajeano-biquijji
dojjojo nequi dojocuayaqui ca'yanaje. Oja equi yasijje
dojo canaje. Huohui'ajja cañaquinaje jama ba'a:
—Epeeji cuana, ¿yaya acuae ecuea mimishi cuana cui-
jea caje'yo so'o? ¿Yajja po majje acuae mo poquije'yo
eyahuasijje? ¿Yajja acuae po cajji cuaqui yasijje poqui'-
yo jjima epojji? —acanjje ejjajeano-biquijji cuiñajji
poaniya.

³¹ —E'e —Pabo poanjje—, Emeshi Mese nei quea pa-
me Jesosa Eyacuiñajji huoojea'yo ojjaña jaahuanajji.
¡Onijje mimicue, onijje jjapee neineiquicue! ¡Ojaya
esohui jayojja jama ba'ecue! Jamajjeya ohuaya miquea
mimishi cuana cuijea caje'yo. Ojjaña miquea huapa
pojjeama cuaa miquea equijo ba'eya jamaya ca'a
cahua pea'ai. Jamajjeya mimishi cuijea'yo majje Jeso-
saa miquianaya ba'e tiitii mee caje'yo eyajo onijje
—Pabohua acanjje.

³² Majoya Pabohua, Sinasi nijjeya esohui quea pame
nee Jesusajo, Emeshi Mese neijo huohui canaje ojjaña

ma equijo ba'eca cuanaja eshajja'ajjajji. ³³ Shajja'ajja
majje ejjajeano-biquijji cuiñajjiya ecua sii Paboja
edaasa, Sinasija edaasa pea'ai shacua canaje. Shacua
majje shicui canaje mechashono nei. Majoya oya, ojja-
ña ojaya huapa pojjeama cuana nijje pea'ai Jesosa nijje
jjapeequinaje. Majoya oya, ojaya huapa pojjeama cua-
na pea'ai Eyacuiñajji besa mee canaje enajo. ³⁴ Mayo-
ya ohuaya Pabo, Sinasi pea'ai oja equi yasijje dojodo-
biqui majje oya cuana bobia canaje. Oya, ojaya huapa
pojjeama cuana pea'ai quea bihui nee nee poanjje Je-
sosa nijje jjapeequi majje, Eyacuiñajji nijje pea'ai.

³⁵ Majoya mecajjeahua nei Shomano emeshi mese
cuaa sohuinano cuana huoojea canaje ejjajeano-bia-
quijji equi yasijje jama huohuime yajji ba'a: —¡Pabo, Si-
nasi pea'ai pichojea'yocue!

³⁶ Jamajjeya ejjajeano-biquijji cuiñajjiya Pabo huohui
canaje jama ba'a: —Pabo, Shomano emeshi mese
cuaa miquianaya pichojea mee ca'yonaje. ¡Jjeyahua
nei esecue yasijje cuayaqui'yocue! ¡Quea bei nee po-
quicue, Pabo, Sinasi! —acanjje ejjajeano-biquijji cui-
ñajjiya.

³⁷ —Chojja —Pabo poanjje—. Ecuana mimishi'ama.
Jamatii Pinipo emeshi meseya ecuaña iña mee canaje.
Jeanobiajhea mee canaje pea'ai. Ojjaña ba caquinaje
ona janobajjima nei cuiasejja caqui. Ecuana ca ca
Shomano dejja pea'ai. Jamajjeya jjeyahua nei ecuaña
quehuajje nei huoojea sa acani. Chojja, de. Oya cuana
capoe'yahua, oya tii. Shomano emeshi meseya ecuaña
capichojea ca'yahua, ecuaña cadojocuayaqui ca'yahua
esecue yasijje ojjañaja ebajji —Pabo poanjje.

³⁸ Jamajjeya sohuinano cuana poquinaje. Shomano
emeshi mese cuana huohui cañaquinaje Paboja
esohui. Shajja'ajja majje Shomano emeshi mese cuana
quea mete nee nee poanjje: —E'e de, Pabo, Sinasi
pea'ai Shomano dejja cuana, de. Jamaya ecuanaja ba
jjima. Shomano emeshi mese etiiya ecuaña tecuea ca
chana' —poanjje Pinipo emeshi mese cuana.

³⁹ Jamajjeya Pinipo emeshi mese cuana ma Pabo
cuiasejja meeji epo poquinaje Pabo baa, Sinasi baa
pea'ai. Quea bei nee nee huohui canaje jama ba'a:
—Pabo, Sinasi, ecuaña quea yeno nee nee miquiana
cuiasejja mee epojjiyojo. ¡A'a che ecuaña nijje quea
quene nee pojji! ¡Jjeya quea bei cuayaqui'yocue! ¡A'a ji-
quio cuiñajji esohui huohui o'oyajji! —acanjje Pinipo
emeshi mese cuaa.

Majoya oya cuaa Pabo, Sinasi pea'ai pichojea ca'yo-
naje. Jama acanjje ba'a: —E'e pojja'a miya pea meshi
yasijje poquije esohui huohuiya —jama amajjeya
huoojea canaje quea beiya.

⁴⁰ Jamajjeya Pabo, Sinasi pea'ai ejjajeano-biquijji
equijo nequi poqui o'oyanaje Niniaja equi yasijje. Ojja-
ña Jesusaja epeeji cuana ba o'oya majje ojjaña nijje
miminaje; poquinaje. —E'e, poquia iña. ¡Jesosa nijje
quea pame nee jjapeequicue mete'ama! —Pabo poa-
naje, Sinasi pea'ai.

Pabo Tesanonica cuiñajji yasijje poquinaje

17 Jamajjeya Pabo, Sinasi pea'ai Pinipojo ani poquinaje Tesanonica cuiñajji yasijje. Poquijeya Apiponi cuiñajji yejje canananaje, majoya Apononia pea'ai yejje canananaje. Tesanonica huasijje poqui majje aniñaquinaje. Jomajo Jodioja equi ojee ejjachichaquijji yani. ² Ma equi yasijje Pabo poquinaje Sinasi nijje. Ojjaña ejomishocajji pojjaajo Jesusaja esohui huohui huicha'a huicha'a canaje. Jodio cuana nijje jja-mimicuijjea nobiajeaquinaje pea'ai. Beshahua nei oe ba'ime Eyacuiñajji esohui huohuijji yahuajo nei ba'ea esohuijjo ohuaya Tesanonica dejja cuana jjabahuejjaqui mee canaje. Jama acanaje ba'a: —Eyacuiñajji huoojea'yo ojjaña jaahuanajji esejo quea nee poanaje. Mano'yonaje eseja mimishi cuijea'yojji. Mano'yo majje shequi o'oyanaje. Eyacuiñajji huoojea'yo ojjaña jaahuanajji, Jesusajo, eyaya huohuiaña miqianajaya eshajja'ajajji —Pabohua acanaje.

⁴ Pabojja esohui shajja'ajja canaje quea huiso Jodio cuaa. Jjapeequi'yonaje Jesosa nijje. Pabo nijje, Sinasi nijje pea'ai jjapeequinaje. Quea huiso Jieno cuana ma yahuajo nei Eyacuiñajji epeeji epo cuana Pabo nijje jjapeequinaje, Sinasi nijje pea'ai. Etii cuanaja ehuanase cuana Jesosa nijje jjapeequi'yonaje pea'ai. ⁵ Jamajjeya quea huiso nee Pabo nijje jjapeequiani ba majje Jodio etii cuana quea quene poanaje. Quea huiso dejja mimishi cuana iyaa canaje. Quea huiso jjachichaqui mee canaje. Ojjaña quea quene, quea shajjaquijjo nee nee po mee canaje. Majoya ojjaña cuana Jasonija equi yasijje cuajicujjebenaje Pabo, Sinasi pea'ai cuiaa nisho. ⁶ E'e, oya cuaa Pabo, Sinasi pea'ai sa'ajja canaje. Chama' ba majje equi mese Jasoni bajjani iña canaje. Jesosaja epeeji cuana iña canaje pea'ai. Dojo canaje dejja etii cuana huasijje tecueaa. Janobajjima nei taaa majamajanaje jama ba'a: —Pabohua, Sinasiya pea'ai quea huiso cuana pea esohui huohui canaje. Oya cuana jiquiacua poeyanaje pea'ai esohui huohuiya. ⁷ Jasoniya ca ca oma oya cuana oja equijo ba'e mee canaje. Oya cuana ecuanaja emeshi mese etiija, Sesa bajjanija esohui shajja'ajja sa po'yo ajja. Oya cuaa ca ca huohui canaje pea emeshi mese nei yani, Jesosa bajjani —jama siajje ameya acanaje Jodio cuaa Tesanonica ba'e cuaa.

⁸ Ojjaña Tesanonica ba'e, cuiñajji mese cuana pea'ai quea mete nee nee poanaje ma esohui shajja'ajja majje. ⁹ Jamajjeya Tesanonica mese cuaa Jasoni, oja epeeji cuana pea'ai tecuea canaje jama ba'a: —iPabo, Jesusaja epeeji cuana pea'ai a'a miquea equi yasijje dobi mee o'oyajji! iHuoojeacue oe!

Majoya Jasoni, ojaya epeeji cuana pea'ai bejjo sose quia mee canaje ejeacuaya'yojji. Ma sosequia majje Jasoni ojaya epeeji cuana nijje poqui'yonaje.

Pabo, Sinasi pea'ai Benea meshi yasijje poquinaje

¹⁰ Jamajjeya ma mecajje tii Tesanonica ba'ecaa, Jesosaja epeeji cuaa Pabo, Sinasi pea'ai huoojea canaje

Benea meshi yasijje. Benea cuiñajji yasijje poqui majje Pabo, oja epeeji cuana nijje poquinaje Jodioja equi ejjachichaquijji yasijje. Esohui huohui ca o'oyanaje. ¹¹ Jodio cuana Beneajo ba'e quea pame nee, Jodio cuana Tesanonica ba'e jayojja jama pojjeama. Oya cuaa ca ca oe Pabojja esohui quea bihui nee nee shajja'ajja canaje, Sinasi esohui pea'ai. Majoya Eyacuiñajji esohui yahuajo nei tehue ba neinei canaje. Jama poanaje ba'a: —E'e, Pabojja esohui e'e nei. Jamaya Eyacuiñajji esohui yahuajo nei tehue poani e'e jojo nei —poanaje cuana.

¹² Jamajjeya quea huiso nei Beneajo ba'eca Jesosa nijje jjapeequi'yonaje. Quea huiso Jieno cuana jomajo ba'e pea'ai Jesusaja epeeji cuana poanaje. Jieno epona cuana quea huiso pea'ai Jesosa nijje jjapeequi'yonaje, epona quea pame nee cuana, etii cuanaja ehuanase cuana.

¹³ Amatii Jodio dejja cuana Tesanonica ba'e onaaya huohui canaje jama ba'a: —Pabohua Jesusaja esohui huohui cani Beneajo pea'ai.

Ma shajja'ajja majje oya cuana poeyanaje Benea huasijje; Pabo ocuena canaje ecuijji nisho. ¹⁴ Ma ba majje ca ca Jesusaja epeeji cuaa Beneajo ba'eya Pabo quehuadojo canaje bae ai yasijje. Sinasi ca ca Beneajo tii nequi'yonaje Timoteo nijje. ¹⁵ Jamajjeya Jesusaja epeeji cuaa Pabo dojo canaje, Atena cuiñajji yasijje besapoquinaje. Majoya Pabohua oya cuana huohui canaje jama ba'a: —iEcua epeeji Sinasi, Timoteo pea'ai huoojeacue jiquiacua jjeyahua nei! Oya poeyajo eyaya ishoaje jiquiojo —Pabo poanaje.

—E'e, huohuiñaquije'yo aje ecuaaya. Poqui'ya iña —amajje oya cuana poqui o'oyanaje Benea huasijje.

Atenajo Pabohua esohui huohuiqui canaje

¹⁶ Jamajjeya Pabohua Atenajo aniya ojaya epeeji ishoa'ajja canaje, Sinasi, Timoteo pea'ai. Atenajo aniya Pabohua ba canaje quea huiso nee nee eyacuiñajji nisho, epana'yo cuana bihuia cani. E'e, ojjaña ma cuiñajji ba'eca cuaa pea epana'yo bihuia caqui ba majje Pabo quea quene nee nee poanaje. ¹⁷ Jamajjeya Jodioja equi ejjachichaquijji yasijje Pabohua esohui huohui huicha'a huicha'a canaje. Quea huiso miminaje Jodio cuana nijje, Jodio pojjeama nijje pea'ai joya Eyacuiñajji esohui bajji cuana nijje. Ojjaña pojjaajo aquiana quiajji equi yasijje poqui majje Pabohua esohui huohui canaje ojjaña cuana huasijje. ¹⁸ Majoya pea cuana Epico-neoja esohui shajja'ajjajji, Esitoicoja esohui huohuijji pea'ai onijje miminaje quea huiso. Jjamimicuijjea nobiajeaquinaje. Pabo nijje mimi majje beca cuana jama poanaje ba'a: —Jiquio dejjaa Pabo bajjanija pea esohui huohui cani, de. ¿Ajeo shai oya mimiani so'o? Ecuanaajaya Pabojja esohui shajja'ajja jjima. Quea quehua, de.

Pea cuaa ca ca jama acanaje ba'a: —Ohuaya pea eyacuiñajji cuanajo huohui cani pojja'a, ma eyacuiñajji ecuanaja ba jjimajo —acanaje cuaa.

Pabohua Jesusajo huohui canaje jama ba'a: —Eyacuiñajji Jesosa emano'yojaa shequi mee ca o'oyanaje.

Jamajjeya ohuaya dejja cuana shequi mee caje'yo —Pabohua acanaje.

Ma esohui Atena cuanaja quea quehua, yahuajo shajja'ajja jjimajojo. ¹⁹ Jamajjeya ohuaya Pabo dojo canaje Aneopaco eyiyo huasijje esohui huohui meeya. E'e, ma eyiyo huasijje ojjaña cuana jjachichaquinaje ojjaña huohui caje esohui shajja'ajjaa. Jamajjeya Pabo poeyajo, jama acanaje cuaa ba'a: —E'e, ecuana mi-quea esohui shajja'ajja sa poani. ²⁰ Ma ehuohui'yo eyacua pojja'a. ¡Ojjaña huasijje huohui neineicue! —acanjaje cuaa—. E'e, qui'ajjaya ecuanaja esohui ba jjima yahuajo. ¡Ba meecue mo oe! —poanaje.

²¹ (E'e, ojjaña Atenajo ba'eca cuana, ojjaña joya Atena huasijje poeyani anicuaa pea'aiya ehuohui'yo eyacua shajja'ajja sa acanaje ojjaña pojjaajo. Esohui eyacua huohui canequinaje quea huiso neeya. Jamatii mimiminequinaje ojjaña cuana, chacochocho jjima poanaje.)

²² Jamajjeya Pabohua Aneopaco eyiyojo nequiya ojjaña huohui canaje jama ba'a: —Dejja cuana Atenajo ba'e cuaa, ¡shajja'ajjacue jiquio eya huohuije, miqianaaya! Miquianaya quea huiso nee jjashahuabaquiani eyacuiñajji cuanajo. Jamaya ecuea eba. ²³ E'e, eya po'ayequequinaje. Eyaya banaje quea huiso epana'yo cuana, ma miqianaa bihuiaña. Majoya eyaya banaje pea'ai mei e'iyasohua ao ani pea'ai eyacuiñajji bihuiajji; ma miqianaaya “Bajjani ba jjima” tehuenaje. Miquianaaya maya Eyacuiñajji bihuiaña, jamatii miquianajaya oya ba jjima. Ma Eyacuiñajji neiyo eyaya esohui huohuiaña miquianajaya ebajji. ²⁴ E'e, yahuajo nei nei Eyacuiñajjiya jiquio meshi pana ca poa. Ojjaña aquiana cuana oja pana pea'ai, de, ojjaña tii. Oya ca ca oe Emeshi Mese nei, ojjaña huoojea'yojji, ojjaña eyajo ani, ojjaña meshi cuanajo nequi huoojea'yojji pea'ai. Jamajjeya Eyacuiñajji equijo ba'e ajja, eseja iya equijo ba'e ajja oya. ²⁵ Eseyaya oya jaahuana ajja, de; oya esejaya eba'esahuajji pojjeama pea'ai. Chojja, ohuaya ca ca oe eseya ojjaña cuana eshe po mee ca'yani; ba'e meesahua cani. Ojjaña aquiana cuana, bobi pea'ai ohuaya quia cani eseya. ²⁶ Yahuajo nei nei Eyacuiñajjiya oe dejja pana ca poa. Ma dejja ojjaña jeajji poa; ojjaña cuana ojjaña meshi cuanajo ba'eca cuanaja baba. Tehue-tehue cuanaja baba, pea dejja cuanaja baba, ojjaña ese ejja cuanaja baba pea'ai poanaje Adana. Eyacuiñajjiya ojjaña cuana jjaba'echejjequi mee ca poa ojjaña meshi cuana huasijje. E'e, yahuajo nei Eyacuiñajjiya huohui ca poa jama ba'a: “Ma dejja cuana ba'e caje ma meshijo, pea jomajo. Ma shequiaja huisome tii pea meshi cuanajo ba'e caje cuana” aca poa Eyacuiñajjiya. ²⁷ Jamaya Eyacuiñajjiya amee canaje ojjaña cuana ojo ejjashahuabaquijji, onijje ejjapeequijji. Jamaya Eyacuiñajjiya eseya sa cani ojaya epeeji pojji. Jamatii oya huesha'ama, quea chipi nee ani tii tii, ojjaña ese chipi nei ani. ²⁸ E'e, yahuajo miquianajaya esohui tehuejjiya tehue ca poa jama ba'a:

“Eyacuiñajji yanijo eseya eshe nequi. Ohuaya eseya ba'e meesahua cani, chaco meesahua cani pea'ai. Oja

pana jjima jjemo eseya chama' pome. Ojjaña eseya Eyacuiñajjiya bacua cuana, oja pana pea'ai”.

Jamaya yahuajo nei tehue ca poa —Pabo poanaje.

²⁹ —Jamajjeya eseya oja bacua cuana poaniya, oja pana poaniya ¿apiojji acuae oya miqianaaya ba jjima aña so'o? ¿Apiojji acuae Eyacuiñajji mei huo'o epana'yo, mei oshe epana'yo, mei ca'a epana'yo jayojja jama poso aña so'o miqianaaya? Chojja, Eyacuiñajji miquianajaya epana'yo jayojja jama pojjeama. ¡Meshi epana'yo nequi jayojja jama poso a'a ajji, de! ³⁰ Yahuajo nei dejja cuanaja Eyacuiñajji ba jjima poa. Jamatii Eyacuiñajjiya oya cuana napa jeyojeyo jjima poa oja mimishi cuanajo. Jjeya ca ca ohuaya ojjaña cuana huohui canaje jama ba'a: “¡Miquea mimishi cuana pajea'yo-cue! ¡Enijje jjapeequicue! ³¹ E'e, quijje eyaya ecue huoojea'yo ojjaña jaahuanajji Jesosa huoojeaje. Ojjaña ojaya eba quea ja'a nee. Jamajjeya ohuaya ojjaña sosequia caje ma oya cuaa acanaje sosejje. Joya quea pame nee ba'enaje ohuaya quea bihui nee ba'e tiitii mee caje'yo. Mimishi cuana ca ca oe quea nee nee tii tii poajje'yo” aca poa Eyacuiñajjiya —Pabo poanaje.

—Jamajjeya Jesosa mano'yajo Eyacuiñajjiya oya shequi mee ca o'oyanaje. Jamaya ohuaya ojjaña cuana ba mee canaje jiquio esohui Jesosajo e'e nei —Pabo poanaje.

³² Eyacuiñajjiya dejja cuana shequi mee ca o'oyanaje Pabo poajo shajja'ajja majje quea huiso dejja cuana soa neineinaje shajja'ajja sa po ajja jjejojo. Pea cuaa ca ca Pabo huohui canaje jama ba'a: —Quijje ecuaaya mi-quea esohui shajja'ajjaje o'oya —acanjaje cuaa.

³³ Majoya Pabo esohui huohuina'yo majje poqui'yonaje. ³⁴ Beca cuana Pabo nijje poquinaje. Ojaya esohui shajja'ajja majje Jesosa nijje jjapeequi'yonaje. E'e, Aneopaco meshi cuiñajji Dionisio bajjani, oe epona Damanisi bajjani, pea cuana pea'ai Jesosa nijje jjapeequi'yonaje.

Pabo Conitio huasijje poquinaje

18 Majoya Pabo Atenajo nequi poquinaje Conitio cuiñajji yasijje ejiojjijje. ² Conitiojo ohuaya Jodio dejja Aquina bajjani ba canaje. Aquina aje Jodio dejja, Ponito meshijo cuaya. Yahuajo Ponito meshijo ba'e oya poquinaje Itania meshi yasijje. Shoma cuiñajjiyo ba'enaje. Majoya Itania meshi meseya Canio bajjaniya ojjaña Jodio cuana Shomajo ba'e huoojea canaje pea cuiñajji cuana huasijje: —Jodio cuana, Shomajo ¡a'a ba'ejji! ¡Poquicue miquianaya ojjaña! —acanjaje Shoma meshi mese Caniohua.

Jamajjeya Aquina oja huanase Pisina nijje poeyanaje Conitio huasijje ba'eya. Jamajjeya Pabo Conitio huasijje poe majje poquinaje Aquina baa. ³ Pabo daqui moo equi socojji poanaje; Aquina pea'ai daqui moo equi socojji. Jamajjeya Pabohua Aquina nijjeya daqui equi cuana soco canaje ojaya equijo, Aquinaja equijo. ⁴ Ojjaña epojja ejomishocajjiyo Pabo Jodioja equi ejjachichajji yasijje poquinaje esohui huohuiya. Eyacuiñajjiya esohui Jesosajo huohui canaje Jodio cuana huasijje, Jodio pojjeama cuana huasijje pea'ai. Jama acanaje ba'a:

—Jesosa Eyacuiñajjija huoojea'yo ojjaña jaahuanajji e' jojo nei —Pabohua acanaje.

⁵ Majoya Paboya epeeji Sinasi, Timoteo nijje Masenonia meshijo nequi Benea cuiñajjijo esohui huohui ponequinaje, poeyanaje Conitio huasijje Pabo baa. Timoteo, Sinasi pea'ai poeyajo, Pabohua Eyacuiñajjija esohui Jesusajo huohui majamaja canaje Jodio oo pana huasijje: —Jodio cuana, ¡bacue! Jesosa e'e jojo nei Eyacuiñajjija huoojea'yo ojjaña jaahuanajji —Pabohua huohui tiitii canaje.

⁶ Jamatii Jodio dejja cuana Pabo nijje jjamimicuiajea nobiajeaquinaje ma esohuijo. Pabo nijje mimijajinaje pea'ai. Jamajjeya quea tecue po majje Pabohua oja daqui ao jjequi'yajaja canaje. Jamaya ohuaya ojjaña ba mee canaje ma Jodio dejja cuana quea mimishi nee nee, shajjama' nei nei. Majoya Pabohua jama acanaje ba'a: —Shajjama' nei nei ca mi coma. ¡Shajjama' poanijo Eyacuiñajjija miqúanaya canapa cahua! Eyaya miqúanaya ojjaña Eyacuiñajjija esohui e'e nei Jesusajo huohuinaje. Jamajjeya mi jjashajja'ajjaquajajo eyaya miqúanaya jeajejanaje'yo. Jjeyahua nei eya poquije'yo Jodio pojjeama cuana sohuihuohuiya —Pabohua acanaje.

⁷ Jamajjeya Jodioja equijo nequi cuayaqui'yo majje Pabo poquinaje Tito Jositoja equi yasijje. Tito Eyacuiñajjija epeeji Jodio pojjeama. Ojaya equi Jodioja equi ojee ejjachichaquijji pejejo nequi che chipi nei. ⁸ Jodioja equi ejjachichaquijji cuiñajji Quisipo ca ca Emeshi Mese nei Jesosa nijje jjapeequi'yonaje. Oja huapa pojjeama cuana oja equijo ba'e cuana pea'ai Jesosa nijje jjapeequi'yonaje. Quea huiso cuana Conitioja ba'e pea'ai Paboya esohui shajja'ajja majje Jesosa nijje jjapeequi'yonaje. Jamajjeya pea cuaa oya cuana besa mee canaje Eyacuiñajjijo enajo.

⁹ Majoya oe mecajje Pabo cahuijaajo, Emeshi Mese neiya Jesusaa oya jjacahuibaqui mee canaje jama ba'a: —Pabo, ¡a'a quea mete pojji! ¡Ecuea esohui a'a huohui pajea'yojji! ¡Huohui tiitiicue! ¹⁰ Eya minijje nequianijo, pea cuaa miya enapajji pojjeama. Esapa jajahuejjajeajji pojjeama. E'e, ¡iquio cuiñajjijo ecuea epeeji quea huiso yani —jamaya Jesusaa Pabo jjacahuibaqui mee canaje.

¹¹ Jamajjeya Pabo Conitioja nequinaje; beshahua nei becanejjijji pea'ai daqui sheme epo nequinaje. Eyacuiñajjija esohui Jesusajo huohui canaje quea huiso cuana jomajo ba'eja eshajja'ajjajji.

¹² Majoya dejja Canio bajjani Acaya meshi mese poanaje, Shomano emeshi meseja echacojji. Ma pojajajo Jodio cuana quea huiso mimijaji sa poanaje Pabo nijje. Jjachichaqui majje Pabo iña canaje; dojo canaje emeshi mese Canioja equi yasijje Canioja enapa meeji nisho. Esohui huohuijijjojo Pabo niñeba canaje cuaa jama ba'a: ¹³ —¡iquio dejjaja Pabo bajjanija esohui eyacua. Ecuanaja etiiquiana Moisesija esohui jayojja jama pojjeama ohuaya ojjaña cuana Eyacuiñajji bihuia mee sa acani. Moisesija esohui pajea mee sa acani pea'ai —acanaje Jodio etii cuaa.

¹⁴ Pabohua beshahua nei saja'a canijo emeshi mese Caniohua Jodio cuana tecuea canaje jama ba'a: —Jodio cuana, ¡shajja'ajjacue mo! ¡iquio dejja Pabo quea mimishi poani jojjemo eyaya miqúanaya shajja'ajja'yo-me. ¹⁵ Jamatii oya mimishi ajjima'; eya onijje quea que ne pojjeama. Miqúanaya ca ca oe quea quene poani oja esohuijo. Miquea etiiquianaja esohui cuanao ca ca oe miqúanaya mimipanajjiani onijje. Jamajjeya ¡poquicue! Eyaya ehuhuijji pojjeama Paboya. Miquea esohui o tecueajji shajja'ajja sa po'yo ajja. ¡Miqúanajaja eyajashahuabaqui'yojji jayojja jama acue Paboya! —acanaje emeshi mese Caniohua.

¹⁶ Caniohua quea tecue nee po majje Jodio cuana huoojeacuayajea ca'yonaje esecue yasijje. ¹⁷ Esecue yasijje cuayaqui'yajo Jodio pojjeama Jodioja equi ejjachichaquijji cuiñajji Sosekene iña canaje. Cuiasejja neinei canaje Canio cojja nei. Jamatii emeshi mese Canio mimijajiqui baja sa po ajja poanaje: —Jamatii —poanaje oya.

Pabo Antioquia huasijje poqui o'oyanaje

¹⁸ Jamajjeya Pabo oja epeeji cuana nijje Conitioja esohui huohui ponequinaje quea cahui huiso nee. Majoya ohuaya Aquina nijjeya, Pisina pea'ai nijjeya ojjaña Jesusaja epeeji cuana Conitioja ba'e jña ca'yonaje: —Poquia iña —amajje oya cuana poquinaje bae sahua huasijje. Ebishe mese sosequia canaje Sinia meshi yasijje ebesapoqui'yojji, quea huesha nee. Bishe ai yasijje ani jjimahuaa Pabohua ehujja dedejea mee canaje. E'e, ohuaya yahuajo huohui canaje jama ba'a: —Eyaya esapa dedepojjijeaje ojjaña ebaaji eyaya ma ecua eya yahuajo Eyacuiñajji nijje miminaje jayojja jama ajeyo'yonaje —Pabohua acanaje. Jamaya yahuajo nei Jodio cuaa acaninaje.

¹⁹ Majoya Pabo, Aquina nijje, Pisina pea'ai nijje Epeso cuiñajji yasijje besapoquinaje bishejje. Paboya epeeji cuana Aquina, Pisina pea'ai nequinaje Epesojo. Pabo Jodioja equi ejjachichaquijji yasijje poqui majje dobiquinaje Jodio dejja cuana esohui quea pame nee Jesusajo huohuiya. ²⁰ Shajja'ajja majje Jodio cuana onijje jama poanaje ba'a: —Pabo, ¡iquiojo ecua nijje nequicue! ¡Ecuana sohuihuohucue quea cahui huiso nee! —poanaje ma Jodio cuana.

Jamatii Pabo nequi jjima poanaje. ²¹ Poqui jjimahuaa oya cuana huohui canaje jama ba'a: —Eyacuiñajjija huoojea cajje eya poeje o'oya miqúanaya baa. Quijje poeje o'oya —acanaje Pabohua.

Majoya bishe ai yasijje ani o'oya majje Pabo Epesojo esohui huohui poequi besapoquinaje Jodea meshi yasijje.

²² Sesanea huasijje ba'eñaqui majje Pabo etaja huasijje nequisohuaquinaje. Majoya poquinaje Jenosana huasijje. Jenosana bañaqui majje Jesusaja epeeji cuana ba canaje. Pabohua oya cuana huohui canaje quea bei neeya: —E'e, ¿achajja a nequiana ani so'o? —poanaje Pabo.

Majoya ma ba majje oya Jenosanenajje jjayejequinanaje. Poqui'yonaje Atioquia huasijje ejiojjijje. ²³ Quea

cahui huiso nequinaje Atioquiajo. Majoya oya poqui o'oyanaje Janata meshi yasijje, Pichia meshi yasijje pea'ai. Ma meshi cuanajo Jesusaja epeeji cuana esohui huohui o'oya majje ojjaña quea ja'a nee jjapeequi meesahua canaje Jesusa nijje.

Aponohua esohui huohui canaje Epesojo

²⁴ Pea Jodio dejja Apono bajjani poeyanaje Epeso cuiñajji yasijje. Yahuajo Apono Anejanía cuiñajjijo ba'e. Oya esohui huohuijji quea pame nee; Eyacuiñajjija esohui etehue'yo ojaya eba nei nei. ²⁵ Yahuajo onaaya oya huohui canaje esohui quea pame nee Emeshi Mese neijo, Jesusajo. Majoya ohuaya bicho'ama esohui huohui canaje e'e jojo nei Jesusajo. Jamatii Huanija, ma ona besameejji poanija esohui ca ca oe ojaya eba, Aponoja. ²⁶ Ohuaya esohui huohui canaje Jodioja equi ejjachichaquijjijo quea huiso nee. Oja esohui shajja'ajja majje Paboja epeeji Aquinaa, oja huanaseya pea'ai Apono dojo canaje equi yasijje. Majoya ohuaya Apono ojjaña Eyacuiñajjija esohui Jesusaja epoe'yojijjo huohui canaje. Yahuajo Aponoja ba jjima poanaje ojjaña Jesusaja esohui. ²⁷ Quijje pishana Apono Acaya meshi yasijje poqui sa poanaje. Jesusaja epeeji cuaa Atioquiajo ba'eya oya poqui meesahua canaje. Esohui quea pame nee ojo tehue canaje Jesusaja epeeji cuana Acaya meshijo ba'eja ebajji. Majoya Acaya meshi yasijje poqui majje Aponohua Jesusaja epeeji cuana Jesusaja esohuijjo jshahuabaqui mee canaje. Ojjaña joya Eyacuiñajjiya Jesusa nijje jjapeequi meesahua canajeya, ojaya quea jea nee neeya shajja'ajja canaje. ²⁸ Jamajjeya pea cuaa ba canijo, Aponohua quea ja'a nee Jodio dejja cuana huohui canaje Jesusajo. Apono quea mimi ja'a nee poanaje. Jamajjeya ohuaya Jodio cuana mimicuijjeanobiajea ca'yonaje. Aponohua Eyacuiñajjija etehue'yo huohui neinei majje ojjaña ba mee canaje Jesusa e'e jojo nei Eyacuiñajjija huoojea'yo ojjaña jaahuanajji poani.

Pabo Epeso huasijje poqui o'oyanaje

19 Apono Conitiojo nequijo Pabo eyiyo huasijje poquinaje, pea cuiñajji cuana huasijje. Esohui huohui capoquinaje. Majoya oya Epeso huasijje poqui o'oyanaje. Epesojo Pabohua Jesusaja epeeji cuana majjeya nei onijje jjapeequinaje ba cañaquinaje. ² Ba majje Pabohua oya cuana huohui'ajja canaje jama ba'a: —Epeeji cuana, ¿a'a Edojjoshahua Pame miquiana que dobiqiu'yonaje Jesusa nijje jjapeequianijjo?

—Chojja —saja'ame acanaje cuaa—, onajaya ecuana huohui jjima Edojjoshahua Pamejo.

³ Jamajjeya Pabohua huohui'ajja ca o'oyanaje: —E'e. ¿Ajea huohui jayojja jama po majje onaaya miquiana-ya Eyacuiñajjijo besa mee canaje enajo?

Onaaya jama acanaje ba'a: —Huanija esohuijjo onaaya ecuana Eyacuiñajjijo besa mee canaje —acanaje cuaa.

⁴ Majoya Pabohua jama acanaje ba'a: —Yahuajo mimishi cuana pajea ca'yajo, Huanija pea cuana Eyacui-

ñajjijo besa mee canaje enajo. Jamaya ohuaya acanaje ojjaña ebajji enajo ebesa cuaa mimishi pajea ca'yonaje. Huanija ojjaña cuana huohui canaje jama ba'a: “Quijje eya esohui huohuijeyo'yajo, pea dejja poeje. Oya Eyacuiñajjija huoojea'yo ojjaña jaahuanajji, Jesusa. ¡Onijje jjapeequicue!” jamaya Huanija huohui canaje Jesusajo —Pabohua acanaje.

⁵ Paboja esohui shajja'ajja canaje dejja cuaa. Shajja'ajja majje peaa oya cuana Eyacuiñajjijo besa mee canaje enajo Jesusa nijje jjapeequianijjo. ⁶ Majoya Pabohua onaja esapa biajje eme huana majje Eyacuiñajji nijje miminaje Edojjoshahua Pame ojjaña que edobiqiuji. Dobiqiu majje Edojjoshahua Pameya oya cuana pea esohui mimi mee canaje. Eyacuiñajjija esohui huohui mee canaje pea'ai. ⁷ Ma dejja cuana, Jesusaja epeeji cuana, ma jjeya nei onijje jjapeequinaje ome miji becanejjijji pea'ai huisome poanaje, 12 huisome.

⁸ Majoya Pabo poquinaje Jodio cuanaja equi ejjachichaquijji yasijje. Dobiqiu majje ohuaya Eyacuiñajjija esohui quea pame nee Jesusajo huohui canaje quea ja'a nee, mete'ama. Pea beca peejiima ba'ime ohuaya huohui huicha'a huicha'a canaje jama ba'a: —Eyacuiñajjija huoojea'yo ojjaña jaahuanajji poeyanaje. Oya, Jesusa ojjaña huoojea'yojji quijje poaje Eyacuiñajji nijje.

⁹ Quea huiso Jodio cuana quea sapa ca'a poanaje; shajja'ajja sa po'yo ajja. Oya cuana quea mimishi poanaje. Jesusa niñeba canaje ojjaña dejja cuana ma equijo nequija eshajja'ajjajji. Jamajjeya Pabohua ma dejja cuana jeajeana'yo majje Jesusaja epeeji cuana dojo canaje pea equi yasijje, esohui huohuijji Tinano bajjanija equi yasijje. Jomajo oya cuana sohuihuohui neinei canaje ojjaña pojjajo, Pabohua. ¹⁰ Jamaya Pabo poanaje becanejjijji pea'ai shequiajame. Jamajjeya quea huiso cuaa Asia meshijo ba'eya Emeshi Mese nei Jesusaja esohui shajja'ajja canaje. Quea huiso Jodio cuaa, quea huiso Jodio pojjeamaa cuaa pea'ai shajja'ajja canaje.

Esemaja ebacua ejja cuana eshahua huoojeacuayajeajji nisho poanaje

¹¹ Eyacuiñajjiya ohuaye nei ma dejja cuanaja ba jjima Pabo ameesahua canaje quea huiso. ¹² E'e, Pabo emanoojaa cuana huaquia meesahua ca'yonaje, jjaajaqui meesahua ca'yonaje. Eshahua dejjajo nequi huoojeacuayajea mee ca'yonaje pea'ai. E'e, pea cuaa Paboja eja sisi cuana, pañoeno dojo canaje emanoojaa cuana huasijje. Maya emanoojaa cuana biajje huana canaje cuaa ehuaquia mee'yojji. Quea aja nee po'yonaje ojjaña cuana. Eshahua cuana, o niñepoqui meeji poani pea'ai Jesusaa Pabo huoojeacuayajea mee canaje Paboja eja sisi niñepoqui biajje iya cajo. ¹³ Jamajjeya Jodio cuaa pea'ai poquinananiya eshahua cuana dejja niñepoqui meeji poani ecuaya mee'yojji nisho acanaje. Oya cuana ca ca Jesusa nijje jjapeequi jjima. Jamajjeya eshahua cuana ohuaya jama huohuime acanaje ba'a: —Eshahua cuana, ecuanaaya Pabo jayojja jama miya huohuiaña. Emeshi Mese neiya Jesusaa miquianaya

huoojeacuayajea mee cani. ¡Jyehua nei cuayaqui'yo-cue! —acanae Jodio cuaa.

¹⁴ E'e, Jodio Eyacuiñajji niije emimijji etii Esema bajjanija bacua ejja cuaa, me oeije beca cuaa eshahua cuana jamaya ehoojeacuayajea meeji nisho acanae.

¹⁵ Eshahuaa ca ca Esemaja bacua ejja cuana jama acanae ba'a: —Jesosa ecuea eba quea ca'a nee nee, Jesosaja epeeji Pabo ecuea eba pea'ai. Ecuea miya eba ca'a'ama, jamatii —acanae eshahuaa.

¹⁶ Majoya jiquio eshahuaa dejja niñepoqui Esemaja bacua ejja cuana iña mee canaje, cuiajeabichajea mee ca'yonaje, onajaya daqui isajea ca'yonaje pea'ai. Jamajjeya Esemaja bacua ejja cuana esecue yasijje cuayakinanaje daquima', quea nee pea'ai.

¹⁷ Ma shajja'ajja majje ojjaña Jodio cuana, Jodio pojjeama cuana pea'ai Epesojo ba'e quea ajajja nee nee poanaje jama ba'a: —E'e, ee. Jesosaa ohuaye nei eshahua cuana huoojeacuayajea cani. Oya quea ca'a nee nee poani. Ohuaya ojaya epeeji nei Pabo eshahua cuana huoojeacuayajea meesahua cani —jamaya Emeshi Mese nei Jesosa bihuia canaje quea huiso cuaa.

¹⁸ Majoya Jesosaja epeeji cuana quea bicho nee poanaje oja mimishi cuanajo, eshahua cuana niije jjapeequianijo pea'ai. Jesosaja epeeji cuana jjachichaqui'yo majje mimishi cuana huohui canaje; quea bicho poanaje ojjaña: —¡Ecuana mimishi cuana pajea meesahua'yocue! —acanae cuaa.

¹⁹ Joya yahuajo edasijji poanajeya, eyamiquecua cuaa pea'aiya ojaya esohui etehue'yo ejjadasiaquiiji cuana, eshahua niije acanijo pea'ai chicha'yo majje dahujajea ca'yonaje. Ojjaña pea cuaa ba canaje. Ma papeni etehue'yo cuana quea nahue nee nee, quea sose huiso nee nee poanaje. (E'e, quea sose huiso nee, quea huiso nee nee huaca soseije jayojja poanaje, 100 huaca yahue soseije jayojja poanaje.) ²⁰ E'e, quea huiso cuaa, quea huiso meshijo ba'eca cuaa Eyacuiñajji esohui Jesosajo shajja'ajja canaje. Quea huiso nee Emeshi Mese nei Jesosaja epeeji poanaje.

Epesojo ba'e cuana Pabo niije quea quene poanaje

²¹ Majoya Pabohua jjashahuabaqui majje jama poanaje ba'a: —E'e, Masenonia meshi yasijje eya poquije o'oya, Acaya meshi yasijje pea'ai ojjaña Jesosaja epeeji cuana baa. Majoya eya Jenosanena huasijje poqui o'oya sa poani pea'ai. Jenosanena huasijje poqui majje eya poqui sa poani Shoma cuiñajji yasijje pea'ai, e'e jo-jo nei —Pabo poanaje.

²² Jamajjeya Pabohua ojaya echacosahuajji cuana Timoteo, Enasato pea'ai huoojea canaje Masenonia meshi yasijje. Pabo ca ca nequinaje Epesojo, Asia meshijo. ²³ Pabo oe nei nequijo oja huohui'yo Jesosajo quea huiso cuana Epesojo ba'e quea quene nee nee poanaje onijje. ²⁴ E'e, jama poanaje ba'a: oe dejja Demetio bajjani mei oshe pana neiji Epesojo ba'enaje. Ohuaya o chacosahuajji cuana nijjeya quea huiso epa-na'yo sisi cuana Diana nisho bajjani ne canaje. Maya Epesojo ba'e cuaa bihuia canaje, eyacuiñajji poso aca-

naje cuaa. Demetiohua, o chacosahuajji cuaa pea'ai Diana nisho quea huiso ne canaje. Ne majje quea huiso ejjesheji jjeshe canaje Diana nisho soseije. ²⁵ Jamajjeya Demetiohua o chacosahuajji cuana iyaa canaje o que. Pea cuana o jayojja jama epa-na'yo neiji epo iyaa canaje pea ai. Jjachichaquiyo Demetiohua oya cuana huohui canaje jama ba'a: —Epeeji cuana, ¡shajja'ajja-cue mo! Ecuanaaya epa-na'yo sisi ne majje quea huiso beijo jjesheaña epa-na'yo cuana soseije. Jamaya mi-quianajaya eba. ²⁶ Miquea eba Pabaja esohui pea'ai. Ohuaya jama acani ba'a: "Epa-na'yo cuana dejjaja pana, Eyacuiñajji pojjeama. ¡A'a epa-na'yo cuana bihuiajji! ¡Eyacuiñajji oe nei bihuia-cue!" Pabohua acani. Pabaja esohui shajja'ajja majje quea huiso cuana Epesojo ba'e, Asia meshijo ba'e pea'ai epa-na'yo cuana jjeshe maja sa po'yo ajja poanaje. ²⁷ E'e pojja'a ojjaña eseja nejo mimijaji caje. Epa-na'yo cuana bihuia pajea caje'yo pojja'a. Epa-na'yo quea quemo nee Diana bajjani bihuia pajea caje'yo, oja equi yasijje poqui pajejaje. Jjeya ojjaña cuaa pea'ai epa-na'yo Diana bihuia cani, eyacuiñajji poso acani Diana —jamaya huohui canaje Demetiohua. Jamatii ojaya esohui sijje, de.

²⁸ Demetioja esohui shajja'ajja majje ojjaña cuana quea quene nee nee poanaje. Jama taaame poanaje ba'a: —Diana eyacuiñajji jayojja quea pame nee. Epesojo enequi oya —jamaya taaa neinei nequinaje ojjaña.

²⁹ Jamajjeya ojjaña cuana Epesojo ba'e cuajicuaijjebe-naje taaquii baa. Ojjaña quea shajjaquiijo nee nee, quea mase nee nee poanaje. Pabaja epeeji iña majje dojocuajjija ca'yonaje equi esohui huohui cani yasijje. Ma epeeji cuana Jayo bajjani, pea Anitaco. Oya cuana Masenonia meshijo ba'e. ³⁰ Shajja'ajja majje Pabo poqui sa poanaje dejja quea quene yasijje mimiya. Jesosaja epeeji cuaa ca ca oya nahue canaje. Jama poanaje ba'a: —Chojja, Pabo, ¡a'a poquijji jocuama! Miya shajja'ajja jjima acaje cuaa. Cuia ca chana' cuaa mi —acanae.

³¹ Pea cuana emeshi meseja meshi cuiñasahuajji cuana Asia meshijo ba'e Pabaja epeeji cuana poanaje. Ohuaya esohui tehue majje huoojea canaje Pabo que jama ba'a: —¡A'a poquijji miya esohui huohui cani yasijje! —jamaya tehue canaje Pabaja epejiya, emeshi meseja echacoji cuaa.

³² Dejja cuana ma equijo ejjachichaqui nequi quea shajjaquiijo nee nee taaa canaje. Quea huiso cuana oe esohui taaa canaje. Pea cuana ca ca pea esohui taaa canaje. Quea huiso cuana jamatii jjachichaquinaje. Jama poanaje ba'a: —¿Ajeo acuae ojjaña taaani? ¿Ajeo jjachichaquinaje eseya so'o? —acanae.

³³ Majoya Jodio cuaa Anejano huoojea canaje; ojjaña ejjatanacuaquiiji ehui dojiji nequinaje. Onaa Anejano taaa canaje; huohui canaje ojjaña ehuhuiiji. Jamajjeya Anejanohua tanacua canaje; eme' jeasohua majje jama acanae ba'a: —¡Quea bei pocue! ¡jayo, Anitaco pea'ai jja oe pichojea'yocue jja oe, de! ¡A'a jja cuiajji! —acanae Anejanohua.

³⁴ Jamatii oya Jodio pea'ai ba majje ojjaña cuana taaa o'oyanaje. Taaa tiiti nequinaje jama ba'a: —¡Diana eyacuiñajji jayojja quea pame nee Epesojo nequi. ¡Oya bihuiaque! —Jodio cuana epana'yo bihuia ajja neinei jjejojo jamaya taaa canaje Epeso dejja cuana.

³⁵ Quijje nei Epeso cuiñajji meseya ojjaña tanacua canaje. Majoya jama acanaje ba'a: —Dejja cuana Epesojo ba'e, ¡shajja'ajjacue mo! Ojjaña cuanaja eba eseyaya Epesojo ba'eya epana'yo Dianaja equi quea quemojjaahuanaña. Ojjañaja eba yahuajo nei oe mei eyajo nequi oquea poa jiquio meshi yasijje. Ma mei ecuanajaya eyacuiñajji Diana pojji aca poa, ma mei eyajje oque.

³⁶ Jamajjeya ¡a'a quea quene pojji, quea shajjaquijjo a'a pojji! ¡A'a quea mimishi pojji! ³⁷ E'e, miqianaaya jiquio dejja cuana iñanaje; jiquiacua jjequinaje. ¿Apiojji acuaeya jiquiacua yenaje so'o? ¿A'a cuae jja oe siipojji so'o? Chojja, oya cuanaja aquiana Dianaja equijo sii jjiima. Epana'yo Dianajo jjanifebaqui jjiima pea'ai. ³⁸ Jamajjeya Demetiohua, o chacosahuajji cuaa pea'ai jiquio dejja cuana niñeba sa acanajo, emeshi mese yasijje cadojo cahua. Emeshi mese chaco canijo cahuohuiqui cahua. Majo tii cajjanifebaquiahua cuana. ³⁹ Jamajjeya miqianaya jiquio dejja cuana nijje mimi o'oya sa poanajo ¡emeshi meseja equi yasijje mimiqui o'oyacue quijje! ¡Emeshi meseja esohui jayojja jama pocue! ¡A'a quea shajjaquijjo pojji! ¡A'a quea quene nee pojji!

⁴⁰ E'e, onaaya Shomano emeshi mese etii huohui ca chana'. Onaa oya huohui cajo, emeshi mese etii ecuanaja quea quene po chana': "¿Apiojji quea shajjaquijjo poani so'o? ¿Apiojji ecua esohui jayojja jama ajjima', e que poe jjimaa?" ohuaya eseya aca chana'. Jamaya Shomano emeshi meseja acajo, ¿yajja sohui saja'ame aje so'o? —acanaje Epeso cuiñajji meseya.

⁴¹ Jamajjeya jama huohui majje ohuaya ojjaña huojja canaje equi cuana huasijje. Majoya dejja e'iña nequi pichojea ca'yonaje.

Pabo poqui o'oyanaje Masenonia meshi yasijje, Acaya meshi pea'ai yasijje

20 Majoya ojjaña cuana equi yasijje poqui'yo majje, quea shajjaquijjo popajea'yo majje Pabohua Jesusaja epeeji cuana iyaa canaje. Poeyanaje. Pabohua oya cuana quea bei huohui canaje jama ba'a: —E'e, eya poquije o'oya Masenonia meshi yasijje esohui huohui o'oyaa. Jamatii Jesosa miqiana nijje nequi, miqiana jaahuanajji. ¡A'a quea mete pojji! Poquia iña —amajje Pabo poqui o'oyanaje Masenonia meshi yasijje.

² Masenonia meshijo poquijeya quea huiso esohui Jesusajo huohui canananaje ojjaña Jesusaja epeeji cuana huasijje. Ojjaña quea bihui nee po meesahua canaje. Jomajo esohui huohui'yo majje Pabo Acaya meshi yasijje poqui o'oyanaje. ³ Acaya meshijo oya nequinaje pea beca peejjima ba'ime. Majoya oya jjashahuabaquinaje Sinia meshi yasijje ebesapoquijji bishe aijo. Sinia meshi yasijje ebesapoquijji nisho poaniya Pabohua shajja'ajja canaje Jodio dejja cuaa oya ishoa'ajja cani equecua'yojji. Jamajjeya huacuaya poqui o'oyanaje

Masenonia meshi yasijje, ejiojjiije. ⁴ Jesusaja epeeji quea huiso cuana Pabo nijje poquinaje. Oya cuana ma bajjani ba'a: Pisisija bacua ejja Sopatene, ma Beneajo ba'e, Anitaco, Seconino pea'ai, ma Tesanonicajo ba'e; pea Jayo ma Debejo ba'e; pea Timoteo; pea Tiquico, Topimo pea'ai ma Asia meshijo ba'e. Mahuiso poquinaje Pabo nijje Masenonia meshi yasijje. ⁵ Majoya beca cuana besapoquinaje Toasa huasijje. Toasajo onaaya Pabo, ecuanaya pea'ai ishoa canaje. ⁶ Ecuanaja Pabo nijje ejiojjiije poqui o'oyanaje Pinipo cuiñajji yasijje. Pinipojo nequinaje. Majoya Jodio cuana jjachichaquei majje ojee ijia'ijianaje quea bihui nee epojji. Pahui shejje mee jjiima ijianaje ecuaaya. Ojee pahui ca'a ijia majje ecuanaja Pinipojo ani bishe ai yasijje ani'yo majje besapoquinaje. Me oejje cahuime po majje ecuanaja ba'eñajquinaje Toasajo. Toasajo nequinaje me oejje becanejijji pea'ai cahuime, 7 cahuime.

Toasajo nequiya Pabohua esho'i shequi mee ca'yonaje

⁷ Ebionei epojja ejomishocajji, nomicojo, sinecua Pabo Jesusaja epeeji cuana nijje jjachichaqueinaje Jesusaja bobi ijiajji. Mecajjeahua nei poqui sa poanaje. Pabo quea huiso sohuihuohui poequi tii jjamecashonquinaje. ⁸ Ecuanaja jjachichaqueinaje equi ejama coo eya equecuayijji. Quea misi nee poanajo, cuaquijji quea huiso cuana dedonaje ecuaaya. ⁹ Jomajo oe esho'i Eotico bajjani equi jiyo huejjajo anioquenaje. Pabohua esohui huohui majamaja caquijo, esho'i quea cojja cahui nee nee poanaje. Jiyo huejjajo cahui'yo majje quea ao oquequi'yonaje meshi yasijje. Oya baqui majje: —E'e, ee, mano'yonaje chahua, chama'yo tii —taanaje.

Onaaya oya dojo canaje equi yiye dojjo huasijje emanoyojaa. ¹⁰ Jamajjeya Pabo jaaoquequinaje esho'i baa. Esho'i huojje canaje Pabohua. Jama acanaje ba'a: —¡A'a quea yeno pojji! ¡Oya eshe, emanoyojjeama! —Pabohua acanaje.

¹¹ Majoya Pabo jaasohuaqui o'oyanaje equecuayijji yasijje. Ojjaña ecuaaya Emeshi Mese nei Jesusaja bobi ojee ijianaje. Majoya Pabo pea cuana nijje mimi o'oyanaje. Jamatii esohui huohui poequi tii jjaopojjaquinaje. Mecajjeahua nei eshequi jaasohua pishanajo Pabo poquinaje.

¹² Majoya esho'ija epeeji cuaa oya dojo canaje equi yasijje. Oya eshe o'oyajo, quea aja nee neejo ojjaña quea bihui nee poanaje.

Pabo besapoquinaje Mineto huasijje

¹³ Majoya Pabohua ecuanaja huojja canaje Asoni cuiñajji yasijje: —E'e, ¡miqianaya bishe oe dojo huioque Asoni yasijje! ¡Jomajo ishoañaquicue iña! Eya jjeya nei poquije ejiojjiije Asoni yasijje. Majoya mo bishe yasijje aniquije —poanaje.

¹⁴ Jamajjeya Pabo Jesusaja epeeji cuana nijje ejiojjiije poquinaje Asoni yasijje. Nequiñaqui majje oya bishe ai yasijje aninaje ecuanaja nijje. Majoya ecuanaja poquinaje Mitinene cuiñajji yasijje cahuia. ¹⁵ Mitinenejo cahui

majje mecajjeahua nei ecuana bishejje besapoqui o'oyanaje. Oe cahuime po majje ecuana ba'eñaquinaje Quio nasi chipi nei yasijje. Jomajo cahuiñaquinaje Samosi nasijo. Pea cahuijo ba'eñaquinaje Mineto huasijje. ¹⁶ Majoya Pabohua Epeso yejje canaje, Asia meshijo quea cahui huiso nequi sa po ajja poanaje. Oya poquicuaajicuaji sa poanaje Jenosanena huasijje. Ba'eñaqui sa poanaje Jodioja bobi chichajji shejo, Petecote shejo. Ojjaña Jodio cuana ma pojja cuanajo quea bihui nee ojee ijia'ijiani ojjaña bobi chicha'yo majje. Ma pojjaoya Pabohua Jenosanenajo Eyacuiñajji bihui sa acanaje.

Pabohua pea esohui esohui huohuijji Epesojo ba'e huohui canequinaje.

¹⁷ Jamajjeya Minetojo ba'eñaqui majje Pabohua Jesosaja esohui huohuijji cuana Epesojo ba'e iyaa canaje. ¹⁸ Poeyajo Pabohua oya cuana jama huohuime acanaje ba'a: —Epeeji cuana, eya Asia meshi yasijje poeyajo, miqianaaya eya banaje quea pame nee chacochnaje; ecuea esohui miqianaaya shajja'ajjanaje pea'ai. ¹⁹ Miquea eba eya Emeshi Mese nei Jesosa Quitoja echacojji poani. Jesosajo eya miminaje quea pame nee. Eya quea miminaja pojjeama. Miquea eba eya pa neineinaje Jesosaja epeeji quea mimishi ba'yanijo. Miquea eba pea'ai Jodio etii cuaa eya quecua sa acanijo ejo quea camaja poanaje. ²⁰ E'e, eyaya ojjaña Jesosaja esohui mete'ama huohui majamajanaje equi cuana huasijje, ojjaña jjachichaquiajo pea'ai. Ojjaña ba meesahuanaje. Maya miquea eba. ²¹ E'e, eyaya ojjaña huasijje esohui huohui neineinaje Jodio cuana, Jodio pojjeama cuana huasijje pea'ai. Ojjaña jama anaje ba'a: “¡Miquea mimishi cuana pajea'yocue! ¡Eyacuiñajji esohui shajja'ajjacue! ¡Jesosa nijje jjapeequicue e'e jojo nei! Oya Emeshi Mese nei!” eyaya anaje. ²² Jjeyahua eya Edojjoshahua Pameya huoojea caje Jenosanena huasijje. ¿Yajja shai Jodio cuaa eya acaje so'o? Ecuea ba jjima. ²³ Jamatii Edojjoshahua Pameya eya ba mee cani jama ba'a: “Pea cuaa miya iña caje o'oya. Ejjajeanobiaquijji yasijje miya jeanobia caje'yo. Mijo quea camaja poaje. Miya quea nee nee poaje” jamaya ojjaña cuiñajji yasijje poqui majanijo Edojjoshahua Pameya eya ba mee cani —Pabohua acanaje—. ²⁴ E'e, onaaya eya sapa jajahuejajea ca chana'. Jamatii eya mete'ama. Emeshi Mese nei, Jesosa e huoojea'yojji poani. Ojjaña ojaya ehuohui jayojja jama eya a sa poani. Ohuaya eya huoojea canaje esohui quea pame nee Jesosaja huohuiya jama ba'a: “Eyacuiñajjiya ojjaña cuana quea jea nee acani. Ojjaña Jesosaja epeeji cuanaja mimishi cuana cuijea ca'yani. Oya cuana ba'e tiitii mee caje'yo eyajo. Pabo, ¡jamaya huohuime acue!” eya acanaje Jesosaa. ²⁵ Jamajjeya eyaya ojjaña miqianaya huohuinananaje Jesosajo: “Jesosa Eyacuiñajji nijje ojjaña huoojeajji oe nei poaje'yo” eyaya anaje. Jjeyahua nei ca ca eya poquije'yo. Ecuea eba miqianajaya eya eba o'oyajji pojjeama. ²⁶ Jamajjeya jjeyahua nei eyaya miqianaya e'e jojo nei huohuinaña jama ba'a: E'e pojja'a beca cuana miqiana nijje nequi shajja'ajja sa po'yo ajjajo cuaqui yasijje poquije'yo; cuaquijo nequi tiitije'yo mano'yo majje. Jamatii eyaya

esohui huohuinaje ojjaña cuana huasijje. Onaya mimi-mimi mee ajja jama ba'a: “Ecuea Jesosaja esohui shajja'ajja jjima poanaje. Paboya eya huohui jjima”. Chojja, ehuohui poanaje.

²⁷ —E'e, eyaya ojjaña Eyacuiñajji esohui huohui neineinaje miqianajaya eshajja'ajjajji. ²⁸ Jamajjeya imiqianaya oe jjajaahuaquicue! ¡Jesosaja epeeji cuana jaahuanacue quea pame nee pea'ai! E'e, Edojjoshahua Pameya mi huoojeajji poaniya miqianaya Jesosaja epeeji jaahuanajji po mee canaje. Jamajjeya ¡oya cuana jaahuana neineicue! Eyacuiñajjiya oja Bacua Ejja oe nei huoojea canaje oja epeeji epojjiijo mano'yohua. Eyacuiñajjiya ojaya epeeji cuanaja mimishi cuijea ca'yonaje. Jesosaja epeeji cuanaja mimishi cuana cuijea ca'yajje oja bacua cuana po mee canaje, Eyacuiñajjiya. ²⁹ Jamatii ecuea eba eya poqui'yajo beca cuana, eshahua epeeji cuana quea mimishi poaje. Jesosaja epeeji cuana poquiquehua mee sa acaje. Jesosaja esohui pajea mee sa acaje pea'ai. E'e, ¡jiquio ecua ibia quea maseya ñajjajja poquiquehua jeejanana mee cani, chama'yo tii po mee cani jayojja jama eshahua epeeji cuaa Jesosaja epeeji cuana aca chana'. ³⁰ Jjeya beca cuana miqiana nijje nequi minijje jjapee nishoquije. Quijje ohuaya Jesosaja epeeji cuana sijje acaje; Eyacuiñajjiya esohui e'e nei huohui ajja. Jesosaja epeeji cuana oe pojji poquiquehua ma sijjepojji cuana nijje. ³¹ Jamajjeya ¡jjashahuabaquicue oe! ¡Ecuea esohui a'a pajea'yojji miqianaaya! E'e, pea beca peejjima shequajame eyaya miqianaya esohui huohui neineinaje epojjajo, mecajje pea'ai huohui majamajanaje eyaya. Huohupoquia majje eyaya niñeshe'apoquiana. Miqianajo eya quea yeno popoquinaje —Pabo poanaje.

³² —Jjeya eya poquije'yo. Eyacuiñajji nijje miqianajo mimije jama ba'a: “Eyacuiñajji, ¡Jesosaja epeeji cuana jaahuanacue! ¡Miquea esohui a'a pajea mee'yojji! Miquea esohuijo oya cuana miquea epeeji quea ja'a nee poaje'yo. Jamajjeya miquea epeeji quea ca'a nee poaje. ¡Oya cuana quea pame nee acue! Jamaya miyaya aña ojjaña Jesosaja epeeji cuanajo. Eyajo minijje ba'e tiitii meeje'yo pea'ai. Jamaya ecuea eba”. E'e, jamaya eya Eyacuiñajji nijje mimiani miqianajo.

³³ —E'e, miqianajaya eba pea'ai onajaya daqui cuana, onajaya bejjo pea'ai ecuea jea ba jjima. ³⁴ Chojja, ecuea bobijo, ojjaña ecuea eba'ejjiijo pea'ai eya chacochnaje. Ecuea epeeji cuana enijje poquiani eyaya bobianaje pea'ai. Maya miqianajaya eba. ³⁵ ¡Jamaya eyaya miqianaya ba meenaje ojjaña quea pame nee chacocue! ¡Aema' ba'e meesahuacue pea'ai! Jamajjeya ¡jamaya acue miqianaaya! ¡Emeshi Mese nei Jesosaja esohui pea'ai a'a pajea'yojji! Jama ba'a: “Pea cuana aquiana quiaña quea bihui poaje. Joya miya aquiana quiaña quea bihui pishana poaje” jamaya Jesosa poanaje —Pabohua acanaje.

³⁶ Majoya Pabo, ojaya epeeji cuana pea'ai Eyacuiñajji nijje ojee miminaje ecui'oshajjajo nequi majje. ³⁷ Paboya epou'yojjiijo ojjaña ojaya epeeji cuana pa canaje. Pabo cuiapashi ca'yonaje, poquije'yo ba canaje.

³⁸ Quea yeno poanaje Paboya esohuijo: —E'e de, ecuanaja Pabo eba o'oyajji pojjeama pa jiquio meshijo —oya cuana poanaje.

Jamajjeya ojaya epeeji cuana quea yeno poanaje. Ojjaña cuana onijje bishe yasijje poquinaje. Besapoquije'yo ba canequinaje.

Pabo Jenosanena huasijje poqui o'oyanaje

21 Jamajjeya bishe ai yasijje ani majje ecuanaja epeeji cuana jeana'yonaje. Epi nei besapoquina-
je Cosi nasi yasijje cahuiya. Mecajjeahua nei besapo-
qui'yonaje Shona nasi yasijje. Majoya besapoquinaje
Patana cuiñajji yasijje. ² Patanajo ecuaaya pea bishe ai
sa'ajjanaje Penisia meshi yasijje ebesapoquijji. Bishe ai
jaa ba majje ecuanaja nequisohuaquinaje bishejo anina-
je. Majoya besapoqui o'oyanaje. ³ Besapoquijjeya, Chi-
pe nasi chipi nei besapoquijjeya meshi banaje. Chipe
nasi ai ebiane mijiye yejenaje Sinia meshi yasijje be-
sapoquijjeya. Tino cuiñajji bañaqui majje ba'eñaquina-
nanaje. Ebishe ai meseya aquiana quea huiso nee bis-
hejo ani jeasohuaqui canaje etaja huasijje. Pabo ecua-
na nijje etaja huasijje nequisohuaquinaje. ⁴ Tino huasij-
je poquinaje Jesusaja epeeji cuana baa. Ba majje ona
nijje nequinaje me oeje becanejjiji pea'ai cahuime, ⁷
cahuime. Edojjoshahua Pameya oya cuana Pabo
huohui meesahua canaje jama ba'a: —¡Jenosanena
huasijje poquiajo Jodio cuaa miya iña ca chana! Jamaj-
jeya ¡a'a jocuama poquijji, Pabo! —acanjje cuaa.

⁵ Jamatii bishe ai apoa poajo Pabo ecuanaja nijje po-
quinaje bishe yasijje. Jesusaja epeeji cuana, yahue
cuana, ehuanase cuana, esho'iquiana pea'aiya bishe ai
yasijje poquinaje ecuanaja nijje Pabo poquije'yo baa.
Meshijajji, bae sahuajo Eyacuiñajji nijje ojee miminaje
ecui'oshajjajo nequi majje. ⁶ Majoya ecuanaja: —E'e, be-
sapoquia iña —amajje bishe aijo ani o'oyanaje ebesa-
poquijji Ojjaña Jesusaja epeeji cuaa Pabo poquije'yo
ba canequinaje. Majoya oya cuana equi cuana huasijje
poqui o'oyanaje.

⁷ Jamajjeya Tino cuiñajji jeana'yo majje ecuanaja besa-
poquinaje Tonemaina cuiñajji yasijje. Ba'eñaqui majje
Jesusaja epeeji cuana jomajo ba'e baquinaje. Ojjaña
nijje miminaje quea bihui nee. Ona nijje nequinaje oe
cahuime. ⁸ Majoya mecajjeahua nei ecuanaja poqui o'o-
yanaje bishe yasijje. Besapoqui o'oyanaje Sesanea
huasijje. Ba'eñaqui majje esohui huohuijji Penipe baj-
janija equi yasijje jaasohuaquinaje; onijje ba'enaje.
Oya Penipe yahuajo nei Jesusaja epeeji cuaa Jenosa-
nenajo ba'eya babaca canaje me oeje becanejjiji
pea'ai, ⁷ pea cuana nijje Eyacuiñajjija echacojji epojji,
e'ahuemano bobi quiajji. ⁹ Penipeja ebaca pee pea'ai
ebacuase ahuemani, bii ani oja equijo ba'e. Oya cuana
Eyacuiñajjija esohui huohuijji pea'ai poanaje. ¹⁰ Pa-
bo, Penipeja equijo oe pojji cahuime nequiyajo, Eyacui-
ñajjija esohui huohuijji poeyanaje Acabo bajjani, ma Jo-
dea meshijo ba'e. ¹¹ Pabo que poe majje Acabohua Pa-
boja ejjacomayijji quijji jjeshe majje jjaiojji jeyoqui'yo-
naje, eme' cuana pea'ai. Majoya Pabo huohui canaje
jama ba'a: —Edojjoshahua Pame enijje jama poanaje

ba'a: “Jiquio ejjacomayijji quijji mese Jenosanena hua-
sijje poqui'yajo jamaya Jodio cuaa oya jeyo caje'yo. Je-
yo majje oya quia caje Jodio pojjeama huasijje; quea
nee nee poaje” poanaje —Acabohua acanjje.

¹² Acabohua esohui shajja'ajja majje ecuaaya, pea
epeeji cuaa jomajo ba'eya pea'ai Pabo pa'aniya tii
huohuinaje jama ba'a: —Pabo ¡a'a oe poqui'yojji Jenosa-
nenaja huasijje! Jodio cuaa miya iña ca chana' —poa-
naje.

¹³ Jamatii Pabohua ecuanaja jama acanjje ba'a:
—¿Apiojji acuae quiana pani so'o? ¡A'a eya quea yeno
po meejji! Jodio cuaa Jenosanenajo ba'eya jeyo cajje
mo mete'ama poaje. Emeshi Mese nei Jesosa nijje jja-
peequianijjo onaa quecua ca'yajje, jamatii eya me-
te'ama —Pabohua acanjje.

¹⁴ E'e, ecuaaya Pabo nahue'ajjanaje: —¡A'a poqui o'o-
yajji! —amajamaja'ajjanaje.

Jamatii Pabo jama poanaje ba'a: —Chojja, eya jocua-
ma capoquiahua. Jamaya yahuajo Edojjoshahua Pame-
ya eya acanjje.

Jamajjeya ecuanaja jama poanaje ba'a: —E'e Pabo,
¡Eyacuiñajjija ejjashahuabaquijji jayojja jama acue!
—ecuanaja poanaje.

¹⁵ Jamajjeya quea cahui huiso pishana Penipeja equi-
jo ani majje ecuanaja aquiana cuana bio majje:
—Epeeji cuana, poqui'ya iña —po majje ecuanaja Jenosa-
nenaja huasijje poqui'yonaje ejiojji. ¹⁶ Jesusaja
epeeji cuana Sesaneajo ba'e ecuanaja nijje poquinaje.
Jenosanenajo nequiñaqui'yajo ohuaya ecuanaja dojo ca-
naje Masonija equi yasijje ba'eya. Yahuajo Masoni Chi-
pe nasijo ba'enaje. Oya Jesusaja epeeji poanaje
yahuajo nei.

Pabo poquinaje Satiaco baa o'oya

¹⁷ Ecuanaja Jenosanena huasijje poe'yajo, Jesusaja
epeeji cuana ecuanaja ba majje quea bihui nee poanaje.

¹⁸ Mecahuajje Pabo ecuanaja nijje poquinaje Satiaco
baa. Jomajo ojjaña Jesusaja epeeji etii cuana, esohui
huohuijji cuana pea'ai jjachichaquinaje. ¹⁹ Pabo ojjaña
nijje esohui quea bei nee miminaje. Ohua chaco cana-
jejo huohui canaje jama ba'a: —Eyacuiñajjija eya
esohui quea pame nee Jesusajo Jodio pojjeama cuana
huasijje huohui meesahua canaje. Eyacuiñajjija ohua-
ye nei ma dejjaa ajjima acani eya ameesahua canaje
Jesusaja esohui huohuiañajo —Pabohua acanjje.

²⁰ Jesusaja epeeji etii cuaa Paboya esohui shajja'ajja
majje Eyacuiñajji bihuia canaje. Pabo jama acanjje
ba'a: —Jamaya quea pame nee, epeeji. ¡Bacue! Jje-
yahua nei quea huiso nee nee, quea huiso mil Jodio
cuana Jesosa nijje jjapeequiani. Jamatii Jodio cuaa ojja-
ña Jesusaja epeeji cuana huohui cani jama ba'a: “Mois-
sesija etehue'yo jayojja jama acue!” acani. ²¹ Pea cuaa
oya cuana quea huiso sijje acani mijo. Jama acani
ba'a: “Pabohua Jodio cuana Jodio pojjeamaja meshijo
ba'e huohui cani jama ba'a: —¡Moisesija etehue'yo ja-
yoyja jama a'a ajji! ¡Jodio cuanaja etiquianaja ehuhui'-
yo jayoyja jama a'a pojji! ¡Miquianajaya bacua a'a cuiis-
hasha jehusejjajea meejji pea'ai! —acani Pabohua”. Ja-

maya onaaya mijo siajje acani, Pabo. Jamajjeya Jodio cuana jiquiojo ba'e minijje quea quene. ²² E'e jojo nei onaaya oya cuana huohui caje jama ba'a: "Pabo pa jja-ja poe'yonaje Jenosanena huasijje". Jamaya acajoya oj-jaña cuana jjachichaquije. Majoya ¿yajja shai miya acaje, de? ²³ Jamajjeya jecuanaja esohui jayojja jama acue, Pabo! —poanaje Satiaco—. Jiquiojo yani ebeca pee pea'ai Jodio dejja Eyacuiñajji nijje miminaje. Ma ecua oya yahuajo Eyacuiñajji nijje miminaje jama amajje huojjaña dedejea mee caje. ²⁴ Jamajjeya ;onijje poquicue Eyacuiñajji equi quea quemo huasijje! ¡Esejaya etiiquiiana Moisesija etehue'yo jayojja jama acue quea boejea'yo jayojja epojji, ona nijje! ¡Ojjaña huoja dedejea jjimahuajo sosequiacue! ¡Miyaya onajaya huo cuana jjeshecue! ¡Jjeshe majje dahua meecue Eyacuiñajji bihuiajji! Jamajjeya ojjaña Jodio dejja cuaa ba caje miya pea Jodio cuana jayojja jama poani. Moisesija etehue'yo jayojja jama poani pea'ai. ¡Jamaya ojjaña ba meecue pea cuaa mijo siajje acanaje! —poanaje—. ²⁵ ¡Jodio pojjeama Jesosaja epeeji poani ca ca Moisesija etehue'yo jayojja jama a'a ameeji! Chojja. Yahuajo eseyaya Jodio pojjeama huasijje esohui tehuenaje jama ba'a: "¡Noe ma onaa dahua canaje eyacuiñajji nisho bihuiajji'ya a'a ijiajji! ¡Noe na' cuaya meequi jjima a'a ijiajji! ¡Ijjiacajji na' a'a ishijji pea'ai! ¡A'a pea cojjojji pojji!" Jamaya yahuajo eseyaya Jodio pojjeama cuana huasijje tehuenaje, mahuiso —jamaya acanaje Satiacohua.

²⁶ Jamajjeya mecajjeahua nei Pabohua ma Jodio dejja cuana nijje poquinaje Eyacuiñajji equi quea quemo huasijje. Ejiojji cuana, eme cuana pea'ai topo neinei canaje. Majoya oya cuana Eyacuiñajji equi quea quemo huasijje dobiquinaje. Eyacuiñajji nijje emimijji huohui canaje jama ba'a: —Oe pojji cahui po majje, ecua quea boejea nee nee po majje eyaya huo jjesheje ecuea, ecue epeeji cuanaja pea'ai. Jiquiacua yeje, dahua meeje Eyacuiñajji bihuiajji —Pabo poanaje.

Pabo iña canaje cuaa Eyacuiñajji equi nequi

²⁷ Me oeje becanajji pea'ai, 7 cahui po majje Pabo oja epeeji cuana nijje poqui o'yanaje Eyacuiñajji equi quea quemo huasijje. Moisesija etehue'yo jayojja jama ponequinaje. Pabo Eyacuiñajji equi nequi Jodio dejja cuaa Asia meshijo ba'eya oya ba canaje. Oya cuana Pabo nijje quea quene nee poanaje. Ojjaña cuana Pabo nijje quea quene nee po mee canaje. Pabo iña mee canaje cuaa. ²⁸ Oya cuana taaanaje. Jama siajje pome poanaje Pabojo ba'a: —Isaeni dejja cuana, ¡poe-cue! ¡Jiquio dejja mo iñasahua meecue! Ohuaya ojjaña meshi yasijje poquijeya huohui canananaje jama ba'a: "¡A'a Moisesija etehue'yo jama pojji!" Ohuaya Eyacuiñajji equi niñeba cani. Isaeni cuana niñeba cani pea'ai. Jjeyahua nei ohuaya Jodio dejja pojjeama dojobiaqui canaje Eyacuiñajji equi yasijje. Jamaya ohuaya jiquio equi quea jehue jayojja po mee cani —jamaya Pabojo siajje poanaje Jodio cuana. Jama mimize po majjeya Pabo iña canaje.

²⁹ E'e, yahuajo onaaya Topimo ba canaje Pabo nijje Jenosanenajo nequi. Topimo aje oe Jodio pojjeama, Epesojo ba'e. Oya Eyacuiñajji equi quea quemo huasijje dobiqui jjima. Jamatii Jodio cuaa Pabohua Jodio pojjeama Topimo bajjani Eyacuiñajji equi quea quemo huasijje dojobiaqui canaje poso acanaje. Jamajjeya quea quene nee nee poanaje. ³⁰ Jamajjeya quea huiso Jodio cuana Jenosanenajo ba'e cuajicuajjebenaje Pabo que. Miminaanaa majje Pabo iña canaje. Dojobiaqui canaje Eyacuiñajji equi secue jjani yasijje. Pabo dojobiaqui cajo, esecue ca'a canaje. ³¹ Oya cuana quea quene nee nee, quea mase nee nee poanaje. Pabo sapa jahuejjaje sa acanaje meiya. Onaaya ca ca Shomano emeshi meseja sohuinano huoojeajji poani que cuajicuajipoquinaje; huohuiqui canaje jama ba'a: —¡Bacue oe! Ojjaña Jenosanenajo ba'eca quea shajjaquijjo nee nee poani, cuajicuaji canaje jja-chichaquiequi baa —poanaje.

³² Jamajjeya sohuinano huoojeajjiya pea sohuinano huoojeajji cuana, sohuinano cuana pea'ai iyaa majje dojobiaqui canaje Jodio cuana quea quene jjachichaquiequi yasijje baa. Sohuinano cuana, sohuinano huoojeajji nijje poeje ba majje Jodio cuaa Pabo cuia paje canaje. ³³ Sohuinano huoojeajjiya Pabo que poe majje oya iña mee canaje. Jeyo mee canaje baa jjono becaa. Majoya Jodio cuana huohui'ajja canaje: —¿Ae bajjani oya? ¿Yajja acuae jja so'o? ¿Yajjajo acuae jjaya cuiaña?

³⁴ Beca Jodio cuaa oe esohui huohui canaje. Pea cuaa pea esohui huohui canaje. Ojjaña quea shajjaquijjo poanajo, sohuinano huoojeajjiya shajja'ajja meeme ajja ae shai Pabohua acanaje. Jamajjeya ohuaya sohuinano cuana huoojea canaje Pabo dojobiaqui sohuinano cuanaja equi quea quemo huasijje. ³⁵ Sohuinano equi ejiojji ejaasohuaquijji yasijje poeyajo, Jodio cuaa Pabo iña sa acanaje. Jamajjeya sohuinano cuaa oya jjequisohua majje dojobiaqui equi yasijje. ³⁶ Jodio cuana sohuinano huoojeajji quiquishijji poeje taaajebenaje jama ba'a: —¡Quecuajeacue oe! ¡Quecuajeacue oe! ¡Camanoyahua oya! —taaame pojebenaje.

Pabohua Jodio equenequene cuana saja'a canaje

³⁷ Sohuinano cuaa oya equi quea quemo huasijje beshahua nei ohua dojobiaqui caniya Pabohua sohuinano huoojeajji jama acanaje ba'a: —Eya minijje mimi sa poani.

Ohuaya Pabo saja'a canaje jama ba'a: —¿A'a miquea Jieno cuanaja esohui eba? ³⁸ Jamajjeya miya Ejito dejja quea mimishi pojjeama, ma yahuajo emeshi mese quecuapanajji epo pojjeama. Ohuaya quea huiso nee nee, ebeca pee pea'ai mil dejja emeje dojobiaqui cuana quehua dojobiaqui canaje meshi quima huasijje. Ojo onaya ojjaña quea mete poanaje. ¿A'a miya oya pojjeama? —acanaje sohuinano huoojeajjiya.

³⁹ Pabohua jama acanaje ba'a: —Chojja. Eya Jodio, Sinisia meshijo ba'e. Eya Tanasojo cuaya. Jomajo tiinaje. Ma cuiñajji quea quemo, ojjaña eba. ¡Che mo jjeya

eya mimi meecue Jodio cuana nijje! —Pabohua acanaje.

⁴⁰ Jamajjeya sohuinano huoojeajjiya Pabo saja'a canaje jama ba'a: —¡E'e, mimicue! —acanaje.

Majoya Pabo nequinaje ejiojji ejaasohuaquijjijo. Eme jeasohua canaje. Ojjaña cuana tanacua canaje. Tanacua'yo majje Pabo miminaje Jodio cuana nijje ojaya esohuijo, Emeoja esohuijo.

22 Pabohua jama acanaje ba'a: —Ecuea epeeji cuana, etii cuana pea'ai, ¡shajja'ajjacue mo! Eya-ya miqianaya huohuije —acanaje.

² Pabo onajaya esohuijo, Emeoja esohuijo mimiani shajja'ajja majje ojjaña Jodio cuaa jecaje canaje. Jamajjeya Pabo miminaje jama ba'a: ³ —Eya Jodio miqiana jayojjaya. Tanasojo eya cuayanaje, Sinisia meshijo. Majoya Jenosanena huasijje poeyanaje esohui huohuijji Jananie bajjanija esohui baa. Ohuaya eya sohuihuohui canaje. Jiquiojo eya tiinaje. Jamanieya Eyacuiñajji esohui esejaya etiiquianaja eya sohuihuohui canaje. Eya Eyacuiñajji epeeji poanaje. Joya ecua miqianaya jjeja bihuiaña jayojja jama eyaya Eyacuiñajji bihuianaje. ⁴ E'e, yahuajo eyaya Jesosaja epeeji cuana iñanaje Jesosaja esohui ehuohui ca poani jjejojo. Ejjajeano-biaquijji yasijje jeanobiajeanaje dejja cuana, epona cuana pea'ai. Oya cuana mano mee'yo sa anaje eyaya.

⁵ Jodio etii cuanaja, joya Eyacuiñajji nijje miminequianija eba ecuea esohui e'e nei. E'e, ohuaya eya esohui etehue'yo quia canaje Jodio dejja Damasicojo ba'e yasijje equajji jama ba'a: “¡Pabo Jesosaja epeeji cuana iña meesahuacue! ¡jeyo meesahuacue cadenaaa Jenosanena huasijje edojjji, ejeanobiajeajji Jesosaja esohui huohuijjiyo!” jamaya Jodio etiiya tehue canaje —Pabo poanaje.

⁶ —Majoya Damasico chipi nei nequiñaquei majje eshequi biacojjajja nequijo eyajo ejijijji quea ja'a neeya eya jeaja'a canaje. ⁷ Eya quea ajjajja jjejojo oquequinaje meshi yasijje. Majoya eyaya shajja'ajjanaje eyajo enijje mimije jama ba'a: “Sanoni, Sanoni, ¿apiojji acuae miyaya eya napaña so'o?” eyajo aniya eya acanaje.

⁸ “¿Ae bajjani miya?” eyaya anaje. “Eya Jesosa, ma Nasanenajo ba'enaje. Miyaya aje oe eya napaña” acanaje Jesosaa eyajo aniya.

⁹ —Dejja cuaa enijje poquianiya ejeajijjji quea ja'a nee ba canaje. Onajaya ca ca Jesosaja esohui enijje shajja'ajja jjima, ojaya quea quehua. ¹⁰ Majoya eyaya huohui'ajjanaje: “Emeshi Mese nei, ¿ae sa poani miya?” Ohuaya eya saja'a canaje jama ba'a: “¡Nequisohuacue! ¡Damasico huasijje poquicue! Jomajo peaa miya huohui caje miquea echacojji ma miyaya ejo quijje aje. ¡Ma esohui jayojja jama acue ejo!” eya acanaje.

¹¹ —Majoya eya nequisohua'yonaje; cojjama'. Jesosaa jeaja'a cajje cojja quijjo'yonaje. Jamajjeya ecuea epeeji cuaa eya mepejjejea canaje Damasico huasijje.

¹² —Jomajo oe dejja Anania ba'enaje. Ohuaya Moisesija etehue'yo jayojja jama atitiitii canaje. Oya ojjaña Jodio cuanaja quea boti nee poanaje, Damasicojo ba'eja.

¹³ Ohuaya e jaa huasijje poe majje eya huohui canaje jama ba'a: “Ecuea epeeji Sanoni, ¡quea cojja ja'a po

o'oyacue!” Ohua huohui cajje jjeyahua nei eya quea cojja ja'a po o'oyanaje. Anania banaje eyaya. ¹⁴ Majoya ohuaya eya jama acanaje ba'a: “E'e, Eyacuiñajji esejaya etiiquianaa bihuia ca poa. Ohuaya miya babaca ca poa oja huoojea'yo ojjaña jaahuanajji quea pame nee nee baa. Jjeyahua nei miyaya oya, Jesosa shajja'ajjanaje; minijje miminaje. Eyacuiñajjiya miya ba mee caje ojaya ejjashahuabaqui'yojji pea'ai. ¹⁵ Ma miya jjeja banaje, ma miya shajja'ajjanaje pea'ai miya huohui meesahua caje Eyacuiñajjiya ojjaña cuana ojjaña meshijo ba'e yasijje. ¹⁶ Jamajjeya ja'a ishoa majajji! ¡Jjeya nei Eyacuiñajji nijje mimicue miquea mimishijo! ¡Jesosaja nijje jjapeequi'yocue! Ohuaya miquea mimishi cuana cuijea caje'yo. Majoya eyaya miya besa meeje Eyacuiñajjiyo” eya acanaje Ananiaa.

¹⁷ —Majoya eya poe o'oyanaje Jenosanena huasijje. Poe majje eya poquinaje Eyacuiñajji equi quea quemmo huasijje onijje mimiya. Eyacuiñajji nijje mimianijo, Jesosaa eya jicahuibaqui mee canaje. ¹⁸ Ohuaya eya jama huohuime acanaje ba'a: “¡Jenosanena esecue yasijje poquicue jjeyahua nei! Jiquiojo ba'e cuaa miquea esohui ejo shajja'ajja jjima acaje” eya acanaje. ¹⁹ “Jesosaja” eyaya oya saja'anaje, “miquea eba yahuajo eyaya Jodio cuanaja equi ejjachichaquijji yasijje dobiqui majje, miquea epeeji iña majje jeyonaje baa jjonohua. Cuiasejjajejanaje. ²⁰ Yahuajo pea cuaa miquea esohui huohuijji Estema sapa jajahuejjajea canajejo, eyaya chipi nei nequiya banequinaje. E'e, oya cuana Estema nijje quea mase poanijo eya quea bihui nee poanaje pea'ai. Dejja cuaa oya sapa jajahuejjajea canijo, eyaya onajaya daqui ao jaahuananaje, Estema sapa jajahuejjajeajji epo cuanaja daqui” jama saja'ameya eyaya Jesosaja anaje. ²¹ Majoya Jesosaa eya huoojea canaje jama ba'a: “¡Poquicue, Pabo! Eyaya miya huoojeaje quea huesha nee Jodio pojjeama cuana huasijje esohui huohuiya ejo” eya acanaje Jesosaa —Pabo poanaje.

Sohuinano huoojeajjiya Pabo nahue canaje

²² Jodio cuaa Paboya esohui shajja'ajja canaje. Ojaya esohui Jodio pojjeamajo oya cuana shajja'ajja sa po ajja. Quea quene nee poanaje. Janobajjima nei taaa o'oyanaje jama ba'a: —¡Oya dojo'yocue! ¡Oya quecuajeacue oe! ¡Oya quea taijo quecuajeacue! —taaame poanaje Jodio cuana.

²³ Jodio cuaa quea queneya jjejojo daqui jeasohuajea canaje eyahuasijje. Meshi pohui jeasohuajea canaje pea'ai. Taaa neineinaje. ²⁴ Jamajjeya sohuinano huoojeajjiya sohuinano cuana huoojea canaje jama ba'a: —¡Pabo eyiye dojjo huasijje dojocue! ¡Oya janobajjima nei cuiacue! ¡Achajja oya ba'e ba'ajja socue! ¡Yajjajo Jodio cuaa oya niñeba cani ba'ajja socue! ¿Ajeo quea quene nee nee taaani? ¡Ba'ajja socue! —acanaje sohuinano huoojeajjiya.

E'e, oya jjashahuabaquinaje jama ba'a: —Pabo siajje poani. Eya cuiajje oya siajje popajeaje —poso acanaje sohuinano huoojeajjiya.

²⁵ Jamajjeya sohuinano cuaa Pabo jeyo canaje ecuiasejjajeajji. Jeyo cajo Pabohua sohuinano huoojeajji

quea chipi nee nequi jama acanaje ba'a: —Eya miquea ba jjima. Eya Shomano dejja pea'ai. Jamajjeya emeshi meseya miqúanaya eya cuia mee ajja quea mimishi po jjimajojo, achajja eya ba'e ba jjimajojo. Jamaya emeshi meseja esohui —Pabohua acanaje.

²⁶ Ma shajja'ajja majje ma sohuinano huoojeajji quea mete poanaje. Poquicuajinaje sohuinano huoojeajji etii huohuiya. Jama huohuíñaquime acanaje ba'a: —¡Bacue! ¿Apiojji acuae miyaya jiquio dejja Pabo napa meeaña so'o? Oya ca jja ca oma Shomano dejja, de —acanaje.

²⁷ Jamajjeya sohuinano huoojeajji etiiya ma shajja'ajja majje metenaje, Pabo que poquicuajinaje. Oya huohui'ajja canaje jama ba'a: —¿A'a miya Shomano dejja e'e jojo nei? ¡Huohuicue mo oe!

—E'e —Pabohua oya saja'a canaje—, eya Shomano dejja, de.

²⁸ Majoya sohuinano huoojeajji etiiya jama acanaje ba'a: —E'e pojja'a, de. ¡Bacue! Eyaya quea huiso bejjo quia majje Shomano dejja po'yonaje. Sosequianaje quea huiso nee nee, de —acanaje ohuaya; oja chii Shomano dejja pojjeamajojo oya pea.

Jamajjeya Pabohua jama acanaje ba'a: —Ecuea ca ca ecue chii Shomano dejja poanaje. Jamajjeya eya ca ca Shomano dejja cuayanaje —acanaje Pabohua.

²⁹ E'e de, sohuinano cuaa beshahua nei Pabo cuiasejja canaje. Ma shajja'ajja majje ca ca ohuaya Pabo pichojea ca'yonaje. Oya Pabo Shomano dejja ba majje sohuinano huoojeajji quea mete nee poanaje ecuijji. Jamajjeya ojaya esohuijo pea cuaa Pabo jeyo canaje baa jjonohua. Jamaya Shomano dejja ameemee ajja achajja oya ba'e ba jjimahuajo.

Pabo Jodio etii cuana nijje mimi o'oyanaje

³⁰ Majoya mecajjeahua sohuinano huoojeajji ba sa poanaje jama ba'a: —¿Ajeo shai Pabo nijje Jodio cuana quea quene nee nee poanaje?

Jamajjeya mecajjeahua ohuaya Pabo pichojea mee canaje ma ejeanobiajaa ejeyo nequi. Majoya ohuaya Jodio cuana Moisesija esohui etehue'yo huohuijji poani, Eyacuíñajji nijje emimijji cuana pea'ai iyaa canaje. Jjachichaquí'yajo, sohuinano huoojeajji etiiya Pabo dojo canaje esecue yasijje Jodio cuana nijje mimiya. Pabo mete'ama nequinaje. Dejja cuana cojja ba canaje mete'amaa jjejojo.

23 Pabohua Jodio etii quea huiso cuana cojja ba majje jama acanaje ba'a: —Epeeji cuana, ¡shajja'ajjacue mo! Eyacuíñajji eba eya mimishi'ama ba'e naje yahuajo, jjeja pea'ai. Jamajjeya eya bicho'ama.

² Ma shajja'ajja majje Eyacuíñajji nijje mimiani etiiya Ananiaa pea Pabo chipi nei nequi jama acanaje ba'a: —¡Joya Pabo naba cuiasejjajeacue miyaya!

³ Jamajjeya Pabo onijje jama poanaje ba'a: —Eyacuíñajjiya miya cuia caje pea'ai. Miya ejjadasiaquijji. ¿Apiojji acuae miya Moisesija etehue'yo jayojja jama po ajja? Miyaya eya pea cuia meeaña. Jamaya pojjeama Moisesija etehue'yo —Pabo poanaje.

⁴ Pea Pabo chipi nei nequiya oya jama acanaje ba'a: —¡A'a jja oe Eyacuíñajji nijje mimiani etii nijje mimijajji, de!

⁵ Pabohua majoya ojjaña saja'a canaje jama ba'a: —Epeeji cuana, ecuea ba jjima oya Eyacuíñajji nijje mimiani etii. E'e, Eyacuíñajji esohui etehue'yo jama poani ba'a: “¡Miquea emeshi mese nijje a'a mimijajji!” —Pabohua acanaje.

⁶ Paboya eba quea huiso Jodio cuana jomajo nequi Sanoseo cuana poanaje. Pea cuana ca ca Paniseo cuana. Jamajjeya Pabohua etii cuana jama acanaje ba'a: —Epeeji cuana, eya Paniseo. Ecue chii Paniseo poa. Paniseoja esohui jayojja jama eyaya huohuíña jama ba'a: “Quijje Eyacuíñajjiya emano'yo cuana shequi mee caje o'oya. Ojjaña cuana eshe o'oya poaje”. Jama ehohui poaje jjejojo eya pea cuaa iña canaje —Pabohua acanaje.

⁷ Paboya esohui shajja'ajja majje Paniseo cuana jjamicuiajeanobiajea neineiquinaje Sanoseo cuana nijje.

⁸ Paniseo jayojja jama pojjeama Sanoseo cuana aje oe jama poani ba'a: “Dejja cuana mano'yo majje eshequi o'oyajji pojjeama tii. Chama' Eyacuíñajji esohuidojojji cuana”. Oya cuana poani: “Eshahua cuana chama' pea'ai” jamaya Sanoseo cuaa huohui cani. Paniseo cuaa ca ca jama acani ba'a: “E'e jojo nei ojjaña eseya shequi mee caje o'oya. Eyacuíñajji esohuidojojji cuana enequi, de. Eshahua cuana enequi pea'ai” jamaya e'e jojo nei huohui cani Paniseo cuaa. ⁹ Jamajjeya Jodio etii cuaa quea shajjaquijjo nee nee mimicuijeanobiajea canaje. Majoya Moisesija etehue'yo huohuijji cuaa, Paniseo cuaa nequisohua majje jama taaame acanaje ba'a: —Jiquio dejja Pabo mimishi'ama. E'e pojja'a Eyacuíñajji esohuidojojji onijje miminaje e'e jojo nei. ¡A'a oya napajji! —taaame poanaje.

¹⁰ Majoya ojjaña Jodio etii cuana janobajjima nei jja-mimicuijea nobiajeaquianijo, esohuinano mese quea mete poanaje. Pabo nahue canaje; sohuinano cuana huoojea canaje Pabo dojhua sohuinano cuanaja equi quea quemo huasijje: —E'e de, Jodio cuaa Pabo jahuejjajea ca chana', de, meiya —sohuinano cuana poanaje.

¹¹ Mecajje Emeshi Mese nei Jesosa eyajo nequi nequioquenaje Pabo que. Oya miminaje Pabo nijje jama ba'a: —Pabo, ¡a'a quea mete pojji! Jenosanenajo miya ecuea esohui huohuijji poanaje. Quijje miyaya ecuea esohui huohuiquije quea huesha nee, Shoma cuiñajji yasijje —acanaje Jesosaa.

Jodio cuana ojee jjashahuabaquinaje Pabo quecuajji

¹² Majoya mecajjeahua nei Jodio dejja cuana jjachichaquinaje. Ojee jjashahuabaquinaje Pabo quecuajji. Quea huiso cuaa jama acanaje ba'a: —E'e jojo nei Pabo cuiajea jjimahuajo ecuaaya ena e'ishijji pojjeama, bobi cuana e'ijjiyajji pojjeama, Pabo cuiajea'yo majje ecuaana ijji'ijji'aje'yo. Sijje poani jjemoya aje ca iña oe Eyacuíñajjiya ecuaana mano mee ca'yome —acanaje cuaa jjashahuaba taiqui majje.

¹³ E'e, quea huiso nee nee deja cuaa jamaya acanaje, 40 huisomeya. E'e pojja'a pea cuaa jamaya acanaje pea'ai, ecuea ba jjima. ¹⁴ Majoya Eyacuiñajji nijje miani etii que, Jodio etii cuana que pea'ai poqui majje huohui cañaquinaje jama ba'a: —E'e, ecuaaya ena ishi jjimahuaajo, ijjia'ijjia jjimahuaajo pea'ai Pabo cuiajea nei-neije'yo. Pabo cuiajea jjima yayji jojjemo aje ca iña oe Eyacuiñajjiya mano mee ca'yomeya. ¹⁵ Jamajjeya imiquianaaya, etii cuaa pea'ai esohuinano mese dasiacue! Jama nisho acue ba'a: “¡Pabo jjequi o'oyacue! Ecuaaya oya ba o'oya sa aña, oja sohui eshajja'ajjajji” nisho acue. Majoya oya jjequi cajo, ecuaaya Pabo cuiajeaje, sapa jajahuejjajeaje meiya jiquiacua poe jjimahua —acanaje deja mimishi cuaa.

¹⁶ Paboya jjo'yaseja ebacua ejjaa, oja boeya ca ca shajja'ajja canaje Jodio cuaa Pabo sapa jajahuejjajeaje caje'yo. Jamajjeya Paboya boeya sohuinano cuanaja equi quea quemo huasijje dobiqui majje Pabo huohui-qui canaje Jodio cuanaja esohui. ¹⁷ Majoya Pabohua sohuinano huoojeajji iyaa majje huohui canaje jama ba'a: —¡jiquio esho'i ecue boe dojocue sohuinano etii que! Oya esho'i onijje mimi sa poani.

¹⁸ Majoya sohuinano huoojeajjiya esho'i dojo canaje esohuinano mese que. Poe majje jama acanaje ba'a: —Pabohua eya iyaa canaje. Ohuaya jiquio esho'i huoojea canaje mi que. Oya minijje mimi sa poani.

¹⁹ Esohuinano meseya esho'i mepejjejea canaje deja chama huasijje. Majoya oya jjapashineijje huohui'ajja canaje jama ba'a: —E'e, ¿ae shai miyaya eya huohui sa aña? —acanaje.

²⁰ Esho'iyá jama acanaje ba'a: —Jodio deja cuana ojee miminequinaje. Mecahuajje pa miya dasia caje pa. Miya pa jama anisho caje ba'a: “¡Pabo jjequi o'oyacue Jodio etii cuana huasijje! Ecuaaya oya ba o'oya sa aña” jamaya miya sijaaje acaje pa. ²¹ Jamajjeya ¡a'a oya cuana shajja'ajjajji! Quea huiso nee nee, 40 huisome eija'aniquehuaqui ani ejiojji sahuajo Pabo cuiajea'-yojji. E'e, oya jama poanaje ba'a: “Ena ishi jjima amajje ijjia'ijjia jjima po majje pea'ai ecuaaya Pabo cuiajeaje'-yo. ¡Pabo cuiajea jjima yayji jojjemo Eyacuiñajjiya ecua-na napa ca'yome!” jama mimimeya poanaje. Jjeya nei miya isho'ajja cani cuaa. Jama poani ba'a: “E'e, jje-yahua nei esohuinano meseya Pabo jjequi caje ba'ajja” poani oya cuana —jamaya esho'i poanaje.

²² Majoya esohuinano mese jama poanaje ba'a: —E'e, jamajjeya ecuea eba pea cuaa eya edasiajji nisho acaje ma e miya huohuinaje. ¡A'a oe huohuijji cuana!

Jamaya huohui majje ohuaya esho'i quehuajje huoojea canaje equi yasijje.

Pabo huoojea canaje Shomano emeshi meseja huoojea Peni ani yasijje

²³ Majoya esohuinano meseya iyaa canaje beca sohuinano huoojeajji. Poeyajo jama huohuime acanaje ba'a: —¡Miquea aquiana cuana, sohuinano cuanaja aquiana pea'ai chichacue epoquijji! ¡Mecajje quea misi nee poajo, poquicue Sesanea cuiñajji yasijje! ¡Quea huiso nee nee, 200 huisome sohuinano cuana ejiojji

dojocue! ¡Pea sohuinano quea huiso nee mejeji dojocue pea'ai! ¡Pea sohuinano cuana mapichi aija edaasa biajje ani dojocue minijje pea'ai, 70 huisome! ²⁴ ¡Pabo dojocue pea'ai pea mapichi aija edaasa biajje ani! ¡Oya Pabo dojocue emeshi meseja huoojea que, Peni que! ¡Pabo jaahuana neineicue! ¡A'a Jodio cuana oya napa meejji! —acanaje esohuinano meseya, Canio Nisia baj-janiya.

²⁵ Majoya esohuinano meseya esohui tehue canaje Penija ebajji jama ba'a:

²⁶ “Emeshi meseja meshi cuiñajji Peni: Ecuea epeeji Peni, mijo eya quea bihui nee. Eyaya, Canio Nisiaa jiquio esohui tehuenaje miquea ebajji jiquio dejajo, Pabobo. Jama poa ba'a: ²⁷ Jodio cuaa jiquio deja Pabo baj-jani iña canaje. Beshahua nei oya cuiajea ca'yonaje cuaa. Oya Shomano deja ba majje eyaya oya nahuenaje; sohuinano cuana huoojeanje o nahuejji. ²⁸ Eya ba sa poanaje apiojji Jodio cuana onijje quea quene nee nee poanaje. Jamajjeya eyaya oya dojonaje Jodio etii cuana que. ²⁹ Jodio etii cuanaja esohui shajja'ajja majje eyaya banaje Pabo mimishi'ama, de. Mimishi po jjimajo Jodio cuana oya sapa jajahuejjajeaje mee jjima anaje meiya; jeyo mee jjima anaje ejeanobiaejaji. Oya Shomano deja. Paboya ehuohuijo ca ca oe Jodio cuana onijje quea quene nee nee poanaje. Onijje mimijajina-je Jodio cuanaja etiquianaja ehuohui'yojo, ma ohua huohui canijo. ³⁰ Majoya Jodio cuaa eya dasia majje Pabo quehuajje sapa jajahuejjajeaje sa acanaje. Ma ba majje eyaya oya huoojeanje mi que. Jodio deja cuana, Pabo huohuijji epo, eyaya huoojeaje mi que pea'ai. ¡Miyaya oe huohui neineicue ache acue oe quea mimishi poani! Mahuiso ecuea esohui, epeeji Peni. Eyaya, Canio Nisiaa ecue sohui tehuenaje miquea ebajji. Apoa”.

Jamaya tehue canaje. ³¹ Tehue majje esohuinano meseya Caniohua oja tehue huoojea canaje emeshi mese Peni que.

Jamajjeya sohuinano cuaa Canioja ehuohui'yo jayojja jama acanaje; Pabo dojo canaje mecajje Atipati cuiñajji yasijje cahuiya. ³² Majoya mecajjeahua nei sohuinano mapichima' huacuaya poe o'oyanaje Jenosanena huasijje, sohuinano cuanaja equi quea quemo huasijje. Joya mapichijjiya ca ca oe Pabo dojo canaje Sesanea huasijje. ³³ Sesanea huasijje poe majje Shomano emeshi meseja huoojeaja equi yasijje, Penija equi yasijje nequiquinaje. Majoya sohuinano cuaa Pabo quia canaje Peni que. Esohuinano mese Canioja esohui etehue'-yo pea'ai quia canaje. Majoya oya cuana poqui'yonaje.

³⁴ Canioja esohui etehue'yo ba neinei majje Peniya Pabo huohui'ajja canaje jama ba'a: —Pabo, ¿ache meshijo ami ba'e, ache mijijje?

—Eya ca iña Sinisia meshijo ba'e —saja'ame acanaje Pabohua.

³⁵ —E'e. Jamajjeya Jodio cuana ma mi huohuijji epo poeyajo, eyaya miquea esohui shajja'ajjaje —poanaje Peni.

Majoya Peniya pea sohuinano cuana iyaa canaje. Poeyajo jama huohuime acanaje ba'a: —¡Bacue! Jiquio

dejja Pabo bajjani. ¡Oya emeshi mese Enodeja equi quea quemo neejo jaahuana neineicue! ¡Nahuecue oe! —acanjaje.

Jodio cuaa emeshi mese Peni siajje acanjaje Pabojo

24 Majoya me oejje cahuime po majje Jodio Eyacuiñajji nijje mimiani etii Anania poquinaje Sesanea huasijje Pabo niñebaa, Pabo huohuiya. Jodio etii quea huiso pishana Anania nijje poquinaje. Pea dejja, emeshi meseja etehue bajji poani Tetono bajjani onijje poquinaje pea'ai. Sesaneajo nequiñaqui majje oya cuana emeshi meseja huoojea Peni ba cañaquinaje. Majoya oya cuana Pabojo mimimiminaje. ² Majoya Peniya Pabo iyaa canaje. Poeyajo Tetonohua huohui canaje jama ba'a: —Emeshi mese Peni, miya quea ca'a, quea pame nee, ecuea epeeji pea'ai. Miya ecuaña huoojeajji quea pame nee. Quea huiso shequiaja miquea esohuijo ojjaña quea bei po meenaje jiquio meshijo. Quea huiso dejja mimishi miyaya jjabahuejjaqui meenaje. Jamajjeya ecuaña jiquio meshijo quea pame nee ba'yani. ³ E'e, miyaya quea pame añajo, ecuaña quea bihui nee poani, ojjaña cuiñajji ba'eca cuana pea'ai. Miya ecuanaja quea boti nee. ⁴ Miquea pea echacojji quea huiso yanijo eyaya oe pojji esohui huohuije. Jamajjeya ¡ecuea esohui che shajja'ajja socue! —poanjaje Tetono—. ⁵ Jiquio dejja Pabo quea mimishi nee po tiitiiani. Jodio cuana ojjaña meshijo ba'e quea quene nee nee po mee cani. Ohuaya Jesusaja ma Nasanenajo ba'ya poaja esohui huohui majamaja cani. E'e, oya Jesusaja epeeji cuana huoojeajji poani. ⁶ Ohuaya ca ca Eyacuiñajji equi quea quemo quea jehue jayojja acanajo, ecuaña oya iñanaje. Jodio cuanaja etiiquianaja tehue jayojja jama oya amee sa anaje; ohua huohui tai canajo oya sapa jajahuejjajja sa anaje. ⁷ Jamatii esohuinano mese Canio Nisia cuajicuaajjebenaje Pabo nahueya; Pabo dojo canananaje. Oya quea quene nee nee poanjaje ecuaña nijje, de. ⁸ Majoya Canio Nisia ecuaña mi que huoojea canaje Pabo huohuiya. E'e, Pabo nijje mimi majje miyaya baje ecuanaja esohui e'e nei —acanjaje Tetonohua.

⁹ Majoya pea Jodio dejja cuaa Peni siajje aca o'oyanaje Pabojo jama ba'a: —E'e jojo nei Tetonoja esohui Pabojo e'e nei. Pabo quea mimishi nee nee poanjaje —Peni acanjaje cuaa.

Pabohua emeshi mese Peni huohui ca'yonaje ojaya eba'ejjijo

¹⁰ Majoya Peniya Pabo jama acanjaje ba'a: —E'e pojja'a. ¿Pabo, yajjajje acuae minijje quea quene poani cuana so'o? ¡Huohuicue mo oe!

Jamajjeya Pabohua jama acanjaje ba'a: —Emeshi mese Peni, ecuea eba miya jiquio meshijo ona huoojeajji poani quea shequiaja huiso. Jamajjeya ojjaña miquea eba. Jamajjeya ecuea eba'ejjijo eyaya mete'ama huohuije. ¹¹ Miquea eba ecuea esohui e'e nei. Jjeya nei eya Jenosanena huasijje nequiñaqui o'oyanaje Eyacuiñajji bihuiaa ome miji pea'ai beca cahuime poanjaje.

¹² Jodio dejja cuaa eya ba canaje Eyacuiñajji equijo nequi. Eya ca ca iña dejja nijje jjamimicuijaje nobiajeaqui ajja. Ecuea Jodio cuana quea quene po mee jjima Jodioja equi ejjachichaquijji ani, ejiojji cuanajo nequi pea'ai, equi cuanajo ani pea'ai. Jama ajjima Jenosanenajo ecuea cuana. ¹³ Ojjaña eba Jodio cuana ejo siajje poani. Eya mimishi'ama. ¹⁴ Jodio cuanaja etiiquiaa cuaa Eyacuiñajji bihuia ca poa. Eyaya Eyacuiñajji bihuiaña pea'ai. Jamatii eyaya Jesusaja esohui jayojja jama añajo pea'ai. Jiquio Jodio cuana ca ca siajje poani jama ba'a: “Jesusaja esohui etiiquianaja esohui jama pojjeama” jama poso acani. Chojja, ecuanaja etiiquiana Moisesija etehue'yo jayojja jama añajo; Eyacuiñajji esohui huohuiji yahuaajo nei ba'e cuanaja esohui etehue'yo jayojja jama añajo pea'ai eyaya. Ohuaya jayojjaya eyaya jama huohuime añajo ba'a: ¹⁵ Ojjaña eseya mano'yajo quijje Eyacuiñajji shequi mee caje o'oya; mimishi cuana, dejja quea pame poani cuana pea'ai eshe poaje o'oya. Ecuea eba, jiquio Jodio cuanaja eba pea'ai Eyacuiñajji jamaya acaje'yo. ¹⁶ Jamajjeya eya quea pame nee ba'e sa tii poani. Eyacuiñajji eba eya mimishi'ama. Jiquio Jodio cuanaja eba pea'ai eya bicho'ama, mimishi'ama —Pabo poanjaje.

¹⁷ —Eya pea meshi cuana huasijje poquinaje esohui huohuiya. Quea huiso shequiaja po majje jjeya eya quea huesha nequi Jenosanena huasijje poe o'oyanaje. E'e, Jesusaja epeeji cuana pea meshijo ba'eca cuaa ejjesheji huoojea canaje Jodio aema' cuana bobiaa. E'e, eyaya maya ejjesheji ye majje Jodio cuana quianaje. Eyaya huo dahua meenaje pea'ai Eyacuiñajji bihuiajji. ¹⁸ Jamajjeya eya Eyacuiñajji equi quea quemo huasijje poquinaje. Jomajo nequiya eyaya eme shacua neineinaje quea boejea jayojja epojji. Jamaya poanijo, Jodio cuaa Asia meshijo ba'e cuaa eya ba canaje Eyacuiñajji equijo oe nei nequi. Quea huiso dejja cuana enijje nequi jjima poanjaje. Quea shajjaquijjo pojjeama eya poanjaje. ¹⁹ Ma Jodio cuana Asia meshijo ba'e poe jjima jiquiacua. E huohui sa poanijo oya cuana capoe'yahua minijje mimiya. ²⁰ Esohuinano meseya Canio Nisia eya nequi mee canaje Jodio etii cuana cojja nei. Jiquio Jodio cuaa ecuea esohui Jodio etii nijje shajja'ajja canaje pea'ai. Jodio etiiya eya quea mimishi eba jojjemo jjeyahua nei huohui ca'yome ecue mimishi.

²¹ E'e, jomajo eyaya etii cuana huohuinaje jama ba'a: “Quijje Eyacuiñajji emano'yo cuana shequi mee caje o'oya. Ojjaña eseya shequi mee caje o'oya. Eya jamaya ehuhui poaje jjejojo pea cuaa eya iña canaje” jamaya eyaya etii anaje. E'e, ma esohuijo jiquio Jodio cuaa eya niñeba cani, huohui cani pea'ai. Mahuiso ecuea esohui, emeshi mese Peni. Apoa —Pabohua acanjaje.

²² Emeshi mese Penija eba Jesusaja epeeji cuanaja ehuhui'yo. Jamajjeya ohuaya jama acanjaje ba'a: —E'e, quijje esohuinano mese Canio Nisia poe'yajo eyaya huohuije ecuea ejjashahuabaquijji Pabojo. Mahuiso. Apoa —poanjaje Peni.

Majoya Jodio cuana esecue yasijje huoojeacuayajja majje Peniya sohuinano huoojeajji huohui canaje jama ba'a: ²³ —¡Sohuinano cuana huoojeacue Pabo nijje!

¡Oya jaahuana neineicue! ¡Ojaya epeeji cuaa aquiana, bobi pea'ai o que caye cahua! ¡O que ca'anicuahua pea'ai! —acanjaje emeshi meseya Peniya.

**Pabohua Peni, oya huanase Nosiya pea'ai
sohuihuoime acanjaje**

²⁴ Majoya quijje pishana Peni oja huanase nijje, Nosiya nijje poe o'oyanaje Pabo baa. Nosiya aje oe Jodio epona poanjaje. Jamajjeya ohuaya Pabo iyaa mee majje jama acanjaje ba'a: —Pabo, ¡Jesosa Quitoja esohui mo huohucue Jesosa Quito nijje jjapeequianijo! Eyaya shajja'ajja sa aña.

²⁵ Jamajjeya Pabohua Jesusaja esohui huohui canaje jama ba'a: —¡Eyacuiñajji esohui jayojja jama ba'ecue quea pame nee! ¡Jjashahuabaquicue! ¡A'a quea mimishi tii pojji! Quijje poe o'oya majje Jesusaa ojjaña cuana sosequia caje'yo, ma eseya eshe nequiahuaa anequinaje sosejje. Mimishi cuana quea nee nee po tiitii mee caje'yo, quea mimishi ba'enaje sosejje. Ojaya epeeji quea pame cuana ca ca ohuaya quea bihui nee ba'e tiitii mee caje'yo onijje eyajo Eyacuiñajji —jama huohuimeya Pabohua acanjaje cuana.

Paboya esohui shajja'ajja majje Peni quea mete nee nee poanjaje. Jama acanjaje ba'a: —E'e, mahuisoya jje-ya. Quijje eyaya miya iyaaje o'oya, ecuea pea echacojji chama' poajo.

²⁶ Peni jjashahuaba taiquinaje jama ba'a: —Eyaya Pabo iyaaje o'oya enijje emimijji. E'e pojja'ahua ohuaya eya sosequia caje o pichojea mee'yo sosejje.

²⁷ Jamatii Pabo emeshi mese Enodeja ejjajejanobiaquijji equijo nequinaje beca shequijame. Majoya Shomano emeshi meseya pea dejja Posio Pesito bajjani huoojea canaje meshi cuiñasahuajji epojji. Oya Pesito emeshi mese Enodeja equijo ba'enaje. Jamajjeya Peni oja huanase Nosiya nijje poquinaje. Jamatii Penija Jodio etii cuana onijje quea bihui nee epojji Pabo pichojea mee'yo jjima poanjaje. Jamatii ejjajejanobiaquijji nequi tii Pabo jiña ca'yonaje.

Pabohua emeshi mese eyacua Pesito sohuihuohui canaje

25 Jamajjeya Shomano emeshi cuiñasahuajji eyacua Pesito Sesanea cuiñajji nequinaje. Pea beca peejjima cahuime po majje oya poquinaje Jenosane-na huasijje. ² Jomajo Eyacuiñajji nijje mimiani etii cuaa, Jodio etii cuaa pea'ai Pabo niñeba canaje emeshi cuiñasahuajji Pesitoja eshajja'ajjajji. ³ Pesito nijje mimi huicha'a huicha'anaje jama ba'a: —Emeshi mese Pesito, ¡che oe Pabo huoojeacue Jenosanena huasijje ecua-na nijje mimiya! —nisho acanjaje Jodio cuaa. Oya cuana aje oe jjashahuaba taiquinaje Pabo cuiñajje'yojji ejjojji-je poquianijo.

⁴ Pesitohua Jodio cuana saja'ahua canaje jama ba'a: —Chojja. Pabo jiquiacua epoejji pojjeama. Eyaya oya cuiñaña Sesaneajo mei equi ejjajejanobiaquijji. Quijje pishana eya poquije o'oya Sesanea huasijje. ⁵ ¡Paboyo mimi sa poanijo miqianajaya etii cuana huoojeacue

enijje Sesanea huasijje! Jocuama ohuaya Paboya mimishi cahuohui cahua. E'e pojja'ahua oya mimishi'ama, caba'ajja —poanjaje Pesito.

⁶ Majoya Pesito nequinaje Jodio cuana nijje Jenosane-najo me oeje pea beca peejjima, 8 cahuime. Majoya oya poqui o'oyanaje Sesanea huasijje. Oe cahuime po majje oya anioquenaje pea equijo, etii ojee chacocho-coani equijo. Majoya ohuaya pea dejja huoojea canaje Pabo jjequiya. ⁷ Pabo poe'yajo Jodio etii cuana ma Jenosanenajo ba'e cuana o que jjanequichipiquinaje; oya panajajinaje. Paboyo quea huiso sijje poanjaje, de.

⁸ Majoya Pabohua huohui canaje jama ba'a: —Eya quea mimishi pojjeama poani. Jodio etiiquiana cuanaja esohui etehue'yo pajea'yo jjima ecuea. Eyacuiñajji equi quea jehue jayojja po mee jjima. Shomano emeshi mese ecuea niñeba jjima pea'ai —poanjaje.

⁹ Majoya Pesitohua Jodio cuana quea bihui nee po mee sa acanijo huohui'ajja canaje jama ba'a: —Pabo, ¿a'a miya Jenosanena huasijje poqui sa poani? Jomajo Jodio etii cuanaja esohui mijo eyaya shajja'ajjaje, mi-quea esohui shajja'ajjaje pea'ai. Ojjaña shajja'ajja maj-je eyaya mijo jjashahuabaqui majje huohuije ecuea ej-jashahuabaquijji —poanjaje Pesito.

¹⁰ —Chojja —saja'ame acanjaje Pabohua—, eya jiquiojo tii yani, Shomano etii equijo. ¡Jiquio Shomano etiiya, miyaya pea'ai onaja esohui ejo shajja'ajja majje huohucue miquea ejjashahuabaquijji! Eya Shomano dejja. Jamajjeya Jodio cuanaja eya ecuiñajje'yojji pojjeama. Ecuea Jodio cuana quea mimishi ajjima, de. Jamaya miquea eba. ¹¹ Ecuea emeshi meseja etehue'yo jama ajjima jojjemo, mimishi ya pea'ai jojjemo eya mano mee'yomeya. Ecuea mimishi ajjima jjojya ca ca miyaya e equia meeji pojjeama mimishi cuanaja ecuiñajje'yojji. Jamaya emeshi mese etii esohui poani. Eya ca ca iña Shomano emeshi mese etii nijje mimi sa poani, Sesa nijje. Ecue sohui shajja'ajja majje ohuaya cahuohui cahua ojaya ejjashahuabaquijji ejo —Pabohua acanjaje.

¹² Majoya Pesito o chacosahuajji nijje ojee mimi majje Pabo huohui canaje jama ba'a: —E'e, eyaya miquea esohui jayojja jama aje: Miya huoojeaje Shomano emeshi mese etii yasijje, Sesa que. Miya shajja'ajja majje ohuaya huohui caje ojaya ejjashahuabaquijji mijo —jamaya po majje Pesitohua ojjaña huoojeacuaya ca'yonaje.

Pabo miminaje Jodio meshi mese Anipa nijje Anipaja jjo'yase Menise nijje pea'ai

¹³ Quijje pishana Jodioja emeshi mese etii Enodeja osecua Anipa bajjani oja jjo'yase Menise nijje poeyanaje Sesanea huasijje Pesito baa, emeshi cuiñasahuajji eyacua baa. Pesito nijje quea bihui nee mimimiminaje jama ba'a: —E'e Pesito, miya emeshi cuiñasahuajji eyacua Sesaneajo. Jamaya quea pame nee. ¡Quea bihui nee pocue! —ohuaya Pesito acanjaje.

¹⁴ Majoya Anipa Pesito nijje nequinaje oe pojji cahuime. Pesitohua Anipa huohui canaje Paboyo jama ba'a: —Emeshi mese Anipa, yahuajo e poe jjimahuajo pea emeshi cuiñasahuajji Peniya Jodio dejja Pabo bajjani

jiña canaje ejjajeañobiacuijijio jaa, jiquio ejjajeañobiacuijijio jaa. ¹⁵ Eya Jenosanena huasijje poquiyajo, Jodio Eyacuiñajji nijje mimiani etii cuaa, Jodio etii cuaa pea'ai Pabo niñeba neinei canaje. Jama amajamaja canaje ba'a: "¡Pabo quea mimishi nee nee po tiitiiani! ¡Oya oe cuiajea'yocue!" acanaje cuaa. ¹⁶ Eyaya Jodio cuana jama anaje ba'a: "Ecuana ca ca pea, Shomano dejja cuana. Miquianajaya ehuhui ca ca oe shajja'ajja majje eyaya oya equiajji pojjeama miquea ecua'yoyji. Chojja. Pabohua miquiana cojja nei nequi majje cahuohui cahua pea'ai. E'e, Shomano emeshi meseja etehue'yo jama ba'a: "Dejjaa peaja ehuhui ojo shajja'ajja majje ohuaya cahuohui pea'ai cahua, ona cojja nei nequiya". E'e pojja'a miquianaya Pabojo siajje poani" jamaya eya poanaje. ¹⁷ Jamajjeya Jodio etii cuana jiquiacua poe majje, oe cahuime po majje eya anioquenaje etii cuana nijje. Majoya eyaya Pabo iyaa meenaje huohui pohua. ¹⁸ Majoya Pabo poeyajo Jodio etii cuana nequinaje huohui epojji. Jamatii oya cuanaja Pabo quea mimishi nei poanaje huohui jijima. Ecuea ejjashahuabaquijji jama huohui jijima, Jodio etii cuanaja. ¹⁹ Jodio etiiquianaja etehue'yojo ca ca janabajjima nei Pabo mimicuiajeañobiajea canaje. Jesosajo, ma yahuajo mano'ya poajo pea'ai mimicuiajeañobiajea canaje. Pabohua pa huohui canaje Jেসosa shequi o'oya poa. ²⁰ Ma esohui Jেসosajo ecuea ba jijima. Jiquiojo ba meeme ajja. Jamajjeya eyaya Pabo huohui'ajjanaje jama ba'a: "Pabo, ¿a'a miya Jenosanena huasijje poqui sa poani? Jomajo eyaya huohuije ecuea ejjashahuabaquijji mijo, Jodio etii cuana shajja'ajja majje" eyaya a'ajjanaje. ²¹ Jamatii Pabo Jenosanena huasijje poqui sa po ajja. Ohuaya eya huohui canaje jama ba'a: "Eya ca iña emeshi mese etii nijje mimi sa poani, Sesa nijje. Ohuaya ecuea esohui shajja'ajja majje cahuohui cahua ojaya ejjashahuabaquijji ejo" jamaya eya acanaje. Jamajjeya eya jama poanaje ba'a: "E'e, quijje eyaya miya huoojeaje emeshi mese etii que, Sesa huasijje" eyaya oya anaje —jamaya Pesitohua Jodio emeshi mese Anipa acanaje.

²² Majoya Anipaa jama acanaje ba'a: —E'e Pesito, eya Pabo shajja'ajja sa poani.

—E'e, emeshi mese —poanaje Pesito—, ¡mecahuajje miyaya Pabo shajja'ajjacue!

²³ Jamajjeya mecajjeahua Anipa oja jjo'yase Menise nijje poeyanaje daqui quea nahue nee nee, emeshi meseja daqui huosho majje. Ojjaña cuaa oya cuana bihuia canaje, quea shajjaquijjo sajeame acanaje. Equi quea quemo huasijje, ma etii cuana chacochoacani yasijje dobiquinaje Pabo shajja'ajjaa. Sohuinano huoojeajji, etii cuana, Sesanea cuiñajji mese nijje ma equi yasijje dobiquinaje pea'ai. Ojjaña anioque majje Pesitohua pea dejja huoojea canaje Pabo iyaa. ²⁴ Pabo poe'yajo Pesito jama poanaje ba'a: —Emeshi mese Anipa, ojjaña etii jiquiojo nequi pea'ai, ¡shajja'ajjacue mo! Ojjaña Jodio cuaa jiquio cuiñajji ba'eya, Jenosanenajo ba'eya pea'ai jiquio dejja Pabo niñeba cani. Oya cuana taaa majamajani jama ba'a: "¡Pabo cuiajea'yocue! Oya quea mimishi nee nee po tiitiiani". ²⁵ Jamatii Pabo shajja'ajja majje eyaya banaje oya mimishi'a-

ma. Jamajjeya eyaya pea cuana oya cuia mee jijima anaje. ¿Yajjajo jja ecua'yoyji? Oya mimishi'ama. Majoya Pabohua eya jama acanaje ba'a: "Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijji ejo" jamaya Pabohua eya acanaje.

—Jamajjeya eyaya oya huoojeaje Shomano emeshi mese etii yasijje huohuiya. ²⁶ Jamatii oya mimishi po jijimajo, ¿yajja tehueme shai eyaya Shomano emeshi meseja ebajji aje? Jamajjeya eyaya oya ye meenaje miquiana que. ¡Oya shajja'ajja majje eya huohuicue miquea ejjashahuabaquijji ojo! Emeshi mese Anipa, Jodio cuanaja ehuhui'yo miquea eba nei nei. Jamajjeya miquea ehuhui'yo Pabojo eyaya tehueje Shomano emeshi mese etii yasijje, ojaya ebajji. ²⁷ Eya ca iña jashahuabaquiani jama ba'a: Ecuea Pabo huoojeajji pojjeama ojaya mimishi cuana tehue'yo jijimajo. Chojja, jama po ajja ca iña —poanaje Pesito.

Pabo emeshi mese Anipa nijje miminaje

26 Majoya Anipa Pabo nijje miminaje jama ba'a: —E'e Pabo, ¡mimicue! ¡Miquea mimishi chamajo ecuanaya huohuicue ecuanaja ebajji! —acanaje Anipaa.

Jamajjeya Pabohua eme jeasohua majje ojaya eba'ejjijo huohui canaje jama ba'a: ² —Emeshi mese Anipa, ojjaña miquea eba. Jodio etii cuanaja esohui ejo miyaya shajja'ajjanaje. Jamajjeya ecue sohui shajja'ajjañajo, eya quea bihui nee. ³ E'e, Jodio etiiquianaja etehue'yo, ehuhui'yo cuana pea'ai miquea eba, ojjaña. Miquea eba pea'ai jjeyahua nei Jodio cuana jjamimicuiajeañobiajeaquiani esohui quea pame nee Jেসosajo. Jamajjeya ¡ecuea esohui quea bei shajja'ajja socue! ⁴ Ecuea eba'ejji eya esho'yahua ojjaña Jodio cuanaja eba. E'e, ecuea cuiñajji ba'yahua, Jenosanenajo ba'e pea'ai eya ojjaña Jodio cuanaja eba. ⁵ Yahuajo eya Paniseo jayojja ba'enaje e'e jojo nei. Jamaya ojjañaja eba. Jamaya cahuohui cahua, ca ohuaya huohui'yo sa amajje —Pabo poanaje.

⁶ —Yahuajo nei nei Eyacuiñajjiya esejaya etiiquiana huohui ca poa jama ba'a: "Ojjaña emano'yooja cuana eyaya shequi meeje o'oya quijje" poa. Jamaya eseya sa poani. Ma esohui huohuiañajo, Jodio etii cuaa eya iña canaje. Jiquiacua eya jjequi canaje cuaa minijje emimijji.

⁷ —Ecuana, Jodio cuanaja 12 etiiquiaa maya ehuhui'yo shajja'ajja ca poa yahuajo nei nei. "E'e jojo nei ojjaña eseya mano'yo majje shequije o'oya. Jamaya amee caje o'oya Eyacuiñajjiya" Jodio etiiquiaa aca poa. Jamajjeya ecuaaya, Jodio cuaa Eyacuiñajji bihuia tiitiiaña ojjaña pojja, mecajje pea'ai. Jamatii eyaya maya huohuiñajo Jodio cuaa aje oe eya niñeba cani jjeja, tecuea cani pea'ai. ⁸ Emeshi mese Anipa, miya Jodio dejja pea'ai. ¿Apiojji acuae miquianaaya, Jodio cuaa jjabahuejjaqui ajja Eyacuiñajjiya emano'yo cuana shequi mee caje o'oya? —Pabohua acanaje.

⁹ —E'e Anipa, yahuajo nei eyaya pea'ai Jেসosaja epeejji cuana napa majamajanaje quea huiso, ma Na-

sanenajo ba'ya poaja epeeji cuana. Eya jashahuaba taiquinaje jama ba'a: "Jesosaja epeeji napajji cuana quea pame poani".¹⁰ Jamajjeya eyaya Jesosaja epeeji Jenosanenajo ba'e napanaje quea huiso. E'e, Eycuiñajji nijje mimiani etii cuaa eya esohui etehue'yo quia canaje Jesosaja epeeji cuana jeanobiajea meeji. Majoya eyaya Jesosaja epeeji cuana iñanaje, jeanobiajeanaje ejjajeantobiquijji yasijje pea'ai. Onaaya Jesosaja epeeji cuiajea canajejo, eyaya jama anaje ba'a: "E'e, ¡cuiajea'yocue!" anaje eyaya.¹¹ E'e, yahuajo eya poqui majamanaje ojjaña Jodioja equi ejjachichaquijji cuana huasijje Jesosaja epeeji cuana cuiajeaa, Jesosa nijje ejjapeequi pajea'yojji nisho. Eya quea quene nee nee ona nijje po majje poquinaje pea cuiñajji cuana huasijje, pea meshi yasijje Jesosaja epeeji cuana napaa.

¹² —Majoya Eyacuiñajji nijje mimiani etii cuaa eya huoojea canaje Damasco huasijje Jesosaja epeeji napaa. Eya quia canaje esohui etehue'yo jama ba'a: "Pabo Jesosaja epeeji cuana iña meesahuacue". Majoya eya poquinaje Damasco huasijje.¹³ Emeshi mese Anipa, Damasco huasijje ejjiojijje poquijeya, eshequi biacojjajja nequijo eyaya eyajo banaje ejeajijijji quea jiji nee nee, eshequi jayojja jama pojjeama, quea jiji ja'a nee nee. Dejjja cuana enijje poquiani jeaja'a neinei canaje pea'ai.¹⁴ Jamajjeya ecuana meshi yasijje oquequinaje quea mete nee nee jjejojo. Majoya eyaya pea eyajo enijje mimiani shajja'ajjanaje. Enijje miminaje Emeo esohuijo jama ba'a: "Sanoni, Sanoni, ¿apiojji acuae miyaya eya napaña? Quea bicho nee nee poaje ecuea epeeji cuana napa majje. ¡A'a quea sapa ca'a pojji!" poanaje.¹⁵ Majoya eyaya jama anaje ba'a: "Emeshi Mese, ¿ae bajjani acuae miya?" Jesosaa eyajo aniya eya jama saja'ame acanaje ba'a: "Eya Jesosa. Miyaya eya napaña, ecuea epeeji cuana pea'ai."¹⁶ ¡Jamajjeya nequisohuacue jjeyahua nei! Eya mi que jjanequipanaquinaje mi jjabahuejjaqui meeji. Miya enijje chacochoaje, ecuea esohui jjeyahua nei miyaya shajja'ajjanaje, eya banaje pea'ai. Quijje pishana eyaya miya quea huiso ba meeje ejo. Maya miyaya huohuije ojjaña huasijje.¹⁷ Jodio cuaa napa cajo eyaya miya jaahuanaje. Eyaya miya huoojeaje Jodio pojjeama cuana huasijje. Onaa mi napa cajo, eya mi jaahuanajji poaje.¹⁸ E'e, eyaya miya Jodio pojjeama cuana huasijje huoojeaje. ¡Miyaya oya cuana ecuea ejjiojji ba meecue eyahuasijje epoqui'yojji! ¡Miyaya oya cuana enijje jjapeequi meesahuacue quea ja'a nee nee eba'ejji, Edosiquiana nijje, Satanasa nijje epoqui majajji pojjeama! ¡Maya oya cuana pajea mee'yocue Eyacuiñajji esohui jayojja jama eba'ejji! ¡Enijje jjapeequi meesahuacue! Jamajjeya eyaya ojaya mimishi cuana cuijeaje'yo. Oya cuana ba'e tiitii meeje'yo eyajo ojjaña ecuea epeeji cuana nijje pea'ai" jamaya Jesosaa eya huohui canaje —Pabo poanaje.

¹⁹ —Emeshi mese Anipa, eyaya Jesosaja esohui shajja'ajjanaje. Ohua huohui canaje jayojjaya eyaya anaje.²⁰ Ebionei eyaya Jesosaja esohui quea pame nee huohuinaje Damascojo ba'eca cuanaja eshajja'ajjajji. Majoya Jenosanena huasijje poe o'oya majje eyaya ojja-

ña cuana sohuihuohuinaje. Majoya eya poquinaje ojjaña cuiñajji yasijje Jodea meshijo. Esohui quea pame nee Jesosajo huohui poquianaje. Jodio pojjeama cuana pea'ai eyaya sohuihuohui poquianaje jama ba'a: "¡Miquea mimishi cuana pajea'yocue! ¡Jesosa nijje jjapeequicue! ¡Quea pame nee ba'ecue! Jamaya onaaya ba caje miya e'e jojo nei Jesosaja epeeji poani, eshahuaja pojjeama" jamaya eyaya ojjaña cuana huohui poquianaje —Pabo poanaje—.²¹ Eya jamaya ehuhui poaje jjejojo Jodio etii cuaa eya iña canaje Eyacuiñajji equi quea quemojo nequi. Eya cuiajea'yo sa acanaje cuaa.²² Jamatii Eyacuiñajjiya eya jaahuana canaje. Jamajjeya ojjaña pojjaajo yahuajo, jjeja pea'ai eyaya ojjaña huasijje esohui quea pame nee Jesosajo huohui tiitiaña. E'e, ojjaña emeshi mese cuana huasijje, ojjaña etii cuana huasijje, ojjaña pea cuana huasijje pea'ai eyaya esohui huohuiaña pea'ai. Emeshi mese Anipa, yahuajo nei Moisesiya, Eyacuiñajjiya pea esohui huohuijjiya yahuajo nei ba'e cuaa pea'ai esohui huohui ca poa jayojja jama eyaya esohui huohuiaña jama ba'a:²³ "Eyacuiñajjiya huoojea'yo ojjaña jaahuanajji Quito quea mimishi acaje'yo cuaa. Oya quea nee nee po mee caje'yo, ba'ehuanasohuajja caje'yo emano'yojji. Jamatii oya emano'yojja Eyacuiñajjiya oya shequi mee caje'yo, oja Chiiya. Ojaya ebionei eyami eyacua poaje'yo. Ohuaya Jodio cuana huasijje, Jodio pojjeama cuana huasijje pea'ai esohui huohui caje: Mimishi cuana cuijea mee'yo majje ba'e tiitii mee caje'yo onijje eyajo" jamaya pea'ai eyaya huohuiaña, de —jamaya Pabohua emeshi mese Anipa, ojjaña cuana onijje ani pea'ai huohui canaje.

²⁴ Pabohua jamaya huohui cajo, Pesitohua oya jama acanaje ba'a: —Pabo, quea huiso esohui etehue'yo ba majamaja majje eniñepoqui'yo jayojja jama poani miya —acanaje Pesitohua.

²⁵ —Chojja emeshi mese Pesito, eya quea jashahuabaqui quehua poani pojjeama, eniñepoqui jayojja pojjeama poani. Ecuea esohui e'e jojo nei, quea ja'a nee pea'ai.²⁶ Jamaya emeshi meseja Anipaja eba. E'e emeshi mese Anipa, ojjaña Jodio cuanaja esohui etehue'yo miquea eba. Jamajjeya eya minijje mimiani bicho'ama. Ecuea esohui, Jodio etii cuanaja esohui pea'ai quehuajje huohui jjiima. Jamajjeya ojjaña ma esohui cuanajo miya quea ja'a nee jashahuabaquinaje —Pabo poanaje—.²⁷ Ecuea emeshi mese Anipa, ¿a'a miyaya Eyacuiñajjiya esohui huohuijjiya esohui cuana shajja'ajjaña? Ecuea eba miya; ¡iquio esohui miyaya quea ja'a nee shajja'ajjaña —Pabohua Anipa acanaje.

²⁸ Majoya emeshi mese Anipaa Pabo jama acanaje ba'a: —Pabo, miquea emimi oe pojji poanaje. Jamatii miyaya eya Jesosaja epeeji po mee sa aña jjeja nei —poanaje Anipa.

²⁹ —E'e emeshi mese Anipa, eya miquianajo mimiani Eyacuiñajji nijje, miquiana Jesosaja epeeji epojji jje-yahua nei, quijje pishana pojja'a. E'e, ojjaña miquiana-ya jiquiojo nequi Jesosaja epeeji eyaya po mee sa aña e jayojja epojji, jamatii jiquio ecua eya baa jjonojji jama epojji pojjeama miquianaya —Pabohua acanaje.

³⁰ Majoya emeshi mese Anipa nequisohua majje oja-ya emeshi cuiñasahuajji Pesito nijje, Pesitoja jjo'yase Menise nijje, ojjaña etii onijje ani pea'ai poquinaje pea equecuayijji yasijje Pabojo mimiya. ³¹ Pea equecuayijji yasijje anioque majje ojee mimimiminaje; jama poanaje ba'a: —Jiquio dejja Pabo quea mimishi pojjeama. Jamajjeya oya ecuiajea'yojji pojjeama, ejeanobiajea'yojji pojjeama tii. ³² Anipaa Pesito huohui canaje jama ba'a: —Pabo emeshi mese Sesa nijje mimi sa po'yo ajja joj-jemo ecuaaya oya pichojea'yome. Jamatii ohuaya yahuajo huohui canaje jama ba'a: “Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijji ejo”. Jamaya poanajejo ecuanajaya oya epichojea'yojji pojjeama —poanaje Anipa.

Pabo besapoquinaje Shoma huasijje, Itania meshi yasijje

27 Ecuea epeeji Teopino, eyaya Nocaa jiquio bana-je ecuea ecojjaa. E'e, eya Pabo nijje poquinaje. Jamajjeya jecuea tehue ba neineicue! Jama poanaje ba'a: Emeshi mese Anipa pea cuana nijje mimi majje jama huohui canaje ba'a: —E'e, jjeyahua nei ecuaaya Pabo huoojeaje Itania meshi yasijje Shomano emeshi mese etii baa, Sesa baa —acanaje.

Jamajjeya jama amajje ohuaya Pabo, pea cuana eme jeyo'yo pea'ai quia canaje sohuinano huoojeajji Joño bajjani yasijje, Itania meshi yasijje edojjii. Joño Shomano dejja cuanaja meshijo ba'e, Itania meshijo. Oya emeshi mese etijja sohuinano cuana huoojeajji poanaje, Sesaja. ² Majoya Joñohua Pabo, pea cuana pea'ai ani mee canaje bishe ai yasijje ecuaana nijje. Ma bishe ai mese Anamitio cuiñajji ba'e poqui sa poanaje pea cuiñajji cuana huasijje, Asia meshi yasijje. Ojjaña apoa poajo, ebishe mese besapoquinaje. Ecuaana Anitaco nijje besapoquinaje Pabo nijje. Anitaco yahuajo Tesanonica cuiñajji ba'enaje, Masenonia meshijo. Oya Pabo chacosahuajji poanaje. ³ Majoya quea huesha nee besapoqui majje ecuaana Sinono cuiñajji yasijje ba'eñaquinaje. Ba'eñaqui majje Joñohua Pabo quea pame nee acanaje; oya poqui mee canaje ecuaana nijje Jesosaja epeeji cuana baa, bobi ijijaa, aquiana chichaa pea'ai ebesapoquijji. ⁴ Majoya bishe aijo ani o'oya majje ecuaana Sinonojo ba'e besapoqui o'oyanaje. Beni quea quemohua bishe hui cuiasehuijea cajje enashajohua nane canaje. Jamajjeya ebishe mese besapoquinaje Chipe nasi yasijje. Chipe nasi shanijje, beni chama huasijje besapoquinaje, enashajo ai chama huasijje. ⁵ Majoya Chipe nasi yejje majje ecuaana bae ojje miji yasijje, ena poeji miji yasijje besapoquinaje, Sinisia meshi chipi nei, Panipinia meshi pea'ai yejjenaje quea chipi nee. Majoya besapoquinaje Nisia meshi yasijje. Miña cuiñajji yasijje ba'eñaquinaje.

⁶ Miña cuiñajji ba'eñaqui majje ecuanaja aquiana cuana jeasohuaquinaje etaja huasijje. Majoya Joñohua pea bishe ai sa'ajja canaje Itania meshi yasijje ebesapoquijji. Bishe ai Anejanía cuiñajji ba'e Itania meshi yasijje besapoquiani ba majje Joñohua ojjaña dejja

cuana eme jeyo'yo ma bishe aijo ani mee canaje. Majoya ecuaana besapoquinaje. ⁷ Jamatii quea cahui huiso ecuaana jipashineijje besapoquinaje. Beni pajijjiya enashajo quea 'aa nee nee aniya bishe ai nane canaje, hui cuiajjoti canaje pea'ai. Ebesapoquijji quea camaja poanajejo, quijje pishana ecuaana poeyanaje Nido cuiñajji yasijje. Beni quea quemojjo bishe beni poeji miji yasijje besapoqui meeme ajja poanaje. Jamajjeya beniya ecuaana dojea canaje eno poeji miji yasijje. Nasi quea quemo Queta nasi bajjani yasijje dojea canaje. Queta nasi shanijje, benima huasijje besapoquinaje. Nasi huijje jjayejequinaje Sanomo meshi bajjani huijje. Majoya beniya ecuaana dojea canaje Queta nasi pea miji yasijje. ⁸ Nasi sahuajje quea besapoqui camaja poanaje. Jamajjeya ecuaana Enashajoma' cuiñajji yasijje ba'eñaquinaje, Nasea cuiñajji chipi nei.

⁹ Ebesapoqui'yo quea cahui huiso nee nee poanaje. Jamajjeya jjuhuee she poanaje. Jjuhuee shejo quea beni quemojjo, enashajo quea quemo nee nee poanajo bishe hui'i'yo chana'. Jamajjeya Pabohua ojjaña cuana bishejo nequi jama acanaje ba'a: ¹⁰ —Epeeji cuana, ishajja'ajjacue mo! Ecuea eba ecuaana jjeyahua nei besapoquijjo quea camaja nee nee poaje. Bishe hui'ije'yo, aquiana cuana bishejo ani hui'ije'yo pea'ai. Eseyá pea'ai hui'i'yo chana' —Pabohua acanaje.

¹¹ Jamatii sohuinano huoojeajji Joñoja Pabo shajja'ajja jjiima. Ebishe meseja esohui, bishe huijeajji esohui pea'ai ca ca shajja'ajja canaje. Onaaya huohui canaje jama ba'a: —Ecuaana jjeyahua nei bishe aijo besapoquije. Ehui'i'yojji pojjeama, de. ¹² Enashajoma' cuiñajji quea tai poaje eno shejo. Jiquiojo ba'e mee ajja; quea huee nee nee poaje —acanaje cuaa.

Jamajjeya beshahua nei ojjaña dejja cuana jomajo nequi sa po'yo ajja poanaje. Besapoqui sa poanaje quea huesha Penise cuiñajji yasijje. Jama poanaje ba'a: —E'e pojjá'a eseyá dojo caje Penise yasijje, beni chama pishana huasijje. Jomajo nequije eno shejo —poanaje cuana.

Enashajoma' cuiñajji beni poeji mijijje nequi; Penise ca ca pea ojje mijijje nequi.

Benipajji quea quemohua bishe nane canaje

¹³ Jamajjeya beni biso nei eno po'yajo, dejja cuana ma bishejo nequi quea bihui nee jama poanaje ba'a: —E'e, jjeya quea pame nee ebesapoquijji beni sisijo. Cua'a, ebesapoqui —poanaje ojjaña.

Jamajjeya bishe picho canaje, besapoquinaje Queta nasi sahuajje quea chipi nee. ¹⁴ Jamatii quijje pishana beni quea quemo nee ena poeji mijijje poeyanaje.

¹⁵ Benipajjiya janobajjima nei bishe nane canaje. Beniya bishe huijea canaje. Ebishe meseja beni poejeje bishe poqui meeme ajja poanaje. Quea camaja nee neejojjo ojjaña hueahueanaje. Jamajjeya beniya bishe jamatii dojo canaje. ¹⁶ Caona nasi sisi chipi nei yasijje bishe dojo canaje beniya. Caona nasi shanijje jjayejequianijo beni nequioque pishanaquinaje. Jamajjeya bishe sisi quea pame jeyojaca'ajja canaje bishe ai pejjejo. Quea camaja poanaje bishe ejejojacajji beni yejje.

¹⁷ Jamajjeya bishe sisi bishe ai biajje jjequisohua majje jeyo canaje. Bishe ai jeyo ca'a canaje pea'ai jiono quea quemohua. Ebishe ai meseya jama acanaje ba'a: —Beniya bishe ai dojo ca chana' meshijaji yasijje, Sinite meshijaji quea chipi nee yasijje. Daqui quea quemo equecuquini eyajo ba'eya beniya bishe dojocuai ca chana' —acanaje.

Jamajjeya ma daqui cuana bebo ca'yonaje cuaa beni quea quemajo. Majoya bishe jamatii dojo canaje beniya. ¹⁸ Beni quea quemajo po tiitianijo mecajjeahua ecuaaya aquiana cuana bishejo ani jeoqueajeanaje ena huasijje, bishe quea peja epojji nisho. ¹⁹ Pea pojja-jo aquiana cuana quea biquie, bishe chacojji cuana jeoqueajeanaje ena huasijje pea'ai. Jiono cuana quea quemajo quea huiso pea'ai jeoqueajeanaje ena huasijje bishe quea peja epojji nisho. ²⁰ Quea huiso cahuime benipajji po tiiti nequinaje. Quea misi nee poanaje. Eshequi chama' poanaje, majameta cuana pea'ai. Ojjaña cuana quea mete nee jashahuabaquinaje jama ba'a: —E'e de, hui'ije'yo se, de.

²¹ Quea mete jjejojya ojjaña cuana ijija'ijija jjima nequinaje quea huiso cahuime. Majoya Pabo ojjaña cojja nei nequinaje. Huohui canaje jama ba'a: —Epeeji cuana, yahuajo eseya Queta nasijo nequi eyaya miqianaya huohui'ajjanaje eseya poqui majje hui'i'yo chana'. Jamatii miqianaya jashajja'ajjaqui sa po ajja poanaje. Yahuajo ecuea esohui miqiaaya eshajja'ajjanaje jojjemo aquiana quea huiso ena huasijje jeoqueajea'yo jjima poquiaye. Jiquio bishe pea'ai hui'i'yo jjima pome. ²² Jamatii ja'a quea mete pojji! Ecuea eba jama ba'a: Jiquio bishe hui'ije'yo. Jamatii eseya hui'i'yo ajja poaje. ²³ E'e, eya Eyacuiñajjiya epeeji, ojaya esohui huohuiji. Eyacuiñajjiya eya jaahuana cani. Mecajje ojaya esohui dojojji huoojja canaje enijje mimiya. ²⁴ Jama poanaje ba'a: "Pabo, ja'a quea mete pojji! Eyacuiñajjiya miya huoojja caje Shomano emeshi mese yasijje esohui huohuiya. Jamajjeya Eyacuiñajjiya miya jaahuana caje, miya quea pame nee acaje. Jamajjeya ojjaña cuana minijje besapoquiani pea'ai ohuaya jaahuana caje'yo, ehui'i'yojji pojjeama" eya acanaje esohuidojojjiya.

²⁵ ¡Jamajjeya quea bihui nee pocue! Eyacuiñajjiya esohui jayojja jama ohuaya acaje e'e jojo nei. Jamaya ecuea eba. ²⁶ Jamatii beniya bishe dojo caje nasi yasijje; cuiayijejea caje. Jaañaqui majje cuiapojjea caje meshijajjo enashajo quea quemohua —Pabohua acanaje.

²⁷ Majoya quea cahui huiso nee nee, 14 cahuime bishe jamatii dojo canaje beniya. Bishe dojo canaje bae sahua huasijje, Adia ena huasijje. Mecashono bishe chacojji cuaa jama acanaje ba'a: —E'e pojja'a eseya meshi chipi nei dojo cani beniya.

²⁸ Majoya ohuaya aquiana quea biquie jeyo canaje quea jiono aajo. Jeoquea canaje ena huasijje. Ipia'ajja canaje ache doe ebajji. Jiono quea aajo ba canaje ena quea doe nee nee, 36 metro doeme. Majoya quijje pishana ipia'ajja ca o'oyanaje. Ba canaje ena quea doe pishana, 26 metro doemeya. ²⁹ Jamajjeya quea ajja nee nee poanaje jama ba'a: —Beniya bishe dojo caje,

cuiayijejea capoquije bajjoo ani yasijje. Bishe jjacuia-pojjeaqueiñaquije nei nei, de, bajjoojo pojja'a, de —taaame poanaje.

Jamajjeya bishe chacojji cuaa ebeca pee pea'ai ejjashehuaquiji iyanobia canaje ena huasijje beniya edojo capoani jjejojo. Jeyo ca'a majje epojja ishoo'ajja po ba'enaje quea mete nee nee. ³⁰ Bishe chacojji poani aje oe jashahuaba taiquinaje ebesapoquiji etaja huasijje, enequisohuaquiji nisho epoquiquehuajji. Mecashono bishe sisi ecapashineijje jeoqueajea canaje ena huasijje. Sijje poanaje jama ba'a: —Ecuana poquije bishe hui jeyohua. E'e, bishe hui ejjashehuaquiji ena huasijje jeoqueajea poquije ecuaana —jama sijje pomeya poanaje.

³¹ Pabohua ca ca sohuinano cuana, sohuinano huoojajji Joño pea'ai huohui canaje jama ba'a: —Chojja. Bishe chacojji cuana bishe aijo mi nequijajo Eyacuiñajjiya eseya ejaahuanajji pojjeama —acanaje.

³² Jamajjeya Paboya sohui shajja'ajja canaje sohuinano cuaa. Jiono cuana bishe sisi ejeyojji'ya jajasejjajea canaje. Jajasejjajea cajje bishe sisi jamatii dojojja canaje se'ejjama'.

³³ Beshahua nei japojojjaquianijo, Pabohua ojjaña ecuaana bobi ijija mee canaje. Huohui canaje jama ba'a: —Miqianaya quea huiso nee nee cahuime, 14 cahuime ijija'ijija jjima nequi, cahui jjima nei nequi beni yajjajo, enashajo yajjajo, ehui'ije'yo poso jjejojo. ³⁴ Jamajjeya ijija'ijija socue! ¡Bobi ijjiacue! O'o mi oe shocuishocui besapoquiji. Hui'i'yo ajja se poaje bishe hui'i'yajo. Ojjaña eseya jamatii quea pame poaje —Pabohua acanaje.

³⁵ Jamaya huohui majje Pabohua pahui iñanequia majje bihuia canaje Eyacuiñajji ojjaña ecuanaja ebajji. Pahui mijjisi majje ijija canequinaje. ³⁶ Pabo ba majje ecuaana quea bihui nee poanaje. Jamajjeya bobi ijija pea'ainaje ecuaaya. ³⁷ E'e, eseya jiquio bishejo ani deaja mahuiso ba'a: quea huiso nee nee, 276 huisome se poanaje. ³⁸ Jamajjeya aje oe ojjaña cuana jeje canaje. Jeje majje quea huiso anoso ai, pahui pohui pea'ai jeoqueajea canaje ena huasijje bishe quea peja epojji, eba'ecuaya'yojji pea'ai.

Bishe ai hui'i'yonaje

³⁹ Japojojjaquijajo mecajjeahua nei bishe chacojji cuaa meshi quea chipi nee ani ba canaje. Onaja ma meshi ba jjima, ache meshi shai. Huesha'ama meshijaji enashajoma' pishana, quea coe pishana ba canaje. Jamajjeya echacojji cuana poqui sa poanaje bae sahua huasijje, ena coe yasijje bishe ba'ehuanañaquiya nisho. Jomajo enashajo quea quemajo pishana yani. ⁴⁰ Majoya ejjashehuaquiji cuana jajasejjajea canaje, dojojja canaje, ejehuijeje bishe quii ca'ajji ejeyo ba'e jiono jajasejja acanaje bishe epii nei edojo cajji. Majoya daqui quea quemajo quecuquini majje nequiasohua canaje, beniya bishe huijje dojobesa canaje meshijaji yasijje. ⁴¹ E'e, beniya bishe ai hui dojobesa canaje. Meshijaji biajje huanasohuajea capoquinaje. Bishe jaañaquinaje. Bis-

he chacojji cuaa bishe meshijajijo hui jaañaquiajo quecuayijeja'ajja ca'yo nequinaje. Enashajo quea quemohua, quea cuejipashi neeya bishe quiiije nane amajje bishe cuiapojojea canaje. ⁴² Sohuinano cuana jama poanaje ba'a: —Bishe hui'l'yajo, dejja cuana ejeyo nequi meshi yasijje shocuishocui majje poquiquehua chana'. Jamajjeya eseyaya ojjaña joya eme ejeyo ani quecuajea jeyojeyo'yo —poanaje sohuinano.

⁴³ Jamatii sohuinano huoojeajjiya Joñohua Pabonahue sa acanijo huohui canaje jama ba'a: —Dejja cuana eme jeyo ani ¡a'a quecuayojji! ¡Pichojeayocue oe! ¡Joya shocuishocuiani tohuua meecue ena huasijje! ¡Meshi yasijje cashocuishocui besapoquiahua! ⁴⁴ ¡Pea cuana joya shocuishocui ajja ca ca huepee biajje, bishe ecuiapojojea biajje cuanaya cabesapoquiahua meshi yasijje! —acanjaje Joñohua.

Jamajjeya ojjaña cuana meshi yasijje besapoquinaje. Hui'l'yo jjima nei nei cuana. Nequisohuaquinaje etaja huasijje, ojjaña ecuanaya.

Pabo Manita nasijo nequinaje

28 Jamajjeya ojjaña ecuanaya meshi yasijje besapoqui'yonaje. Etaja huasijje nequisohuaqui majje dejja cuana jomajo ba'e ecuaaya banaje. Ohuaya ecuanahuhui canaje: —Jiquio meshi Manita nasi bajjani. Quea quemonasi —acanjaje.

² Ese ejja cuana jomajo ba'e mase'ama, quea pame nee nee. Miminaje ojjaña cuana nijje. Enapajji quea huoejo cuaqui quea huiso chicha majje dahuahuojje canaje. Jama acanjaje ba'a: —¡Poecue cuaqui yasijje; ojjaña nequiana jjayoquihuacue! ¡Quea pame nee ecuananijje ba'ecue! —acanjaje.

³ Majoya Pabohua acui sisi cuana chicha canaje cuaqui. Ma acui sisi cuana cuaqui quea jiji nee, quea quiyo nee yasijje jeajea canijo, peyo se najjiya Pabo me ijji neinei ca'yonaje. ⁴ Nasi aijo ba'e dejja cuaa peyohua me ijji caje Pabo ba canaje. Jamajjeya oya cuana ojee mimiminaje jama ba'a: —E'e jojo nei jiquio dejja pea quecuajji. Jamajjeya oja mimishijo peyohua oya ijji canaje. Oya hui'l'yo jjima bae aijo. Jamatii jjeyahua nei oya manojeyo oja mimishijo —jama posoya acanjaje cuaa.

⁵ Jamatii Pabohua peyo jeajea canaje cuaqui yasijje. Nee'ama, mano jjima oya poanaje, shejee jjima pea'ai.

⁶ Ojjaña cuaa Pabo ba neinei ca aninaje. Jjashahuabaquinaje jama ba'a: —Jjeyahua nei oya shejeeje ba'ajja. Jjeya nei pojja'a oya manojeyo —poanaje.

Chojja, Pabo manojeyo nei nei poanaje. Quijje pishana Pabo quea ja'a nee nee, quea mano pojjeama ba majje ma dejja cuaa oya jama acanjaje ba'a: —Oya emano'yojji pojjeama —cuana poanaje.

Jamajjeya onaaya huohui canaje jama ba'a: —Oya dejja pojjeama. Oya pea eyacuiñajji dejja jayojja poeyanaje, de —poso acanjaje cuaa ojjaña.

⁷ Manito nasi emeshi mese Pomino bajjani poanaje. Ojaya que cuana huesha'ama nequi. Ohuaya ecuanaiyaa canaje ojaya equi cuana huasijje. Ecuana nijje miminaje quea pame nee nee. Ojaya equi cuanao ecua-

na ba'e mee canaje pea beca peejjima cahuime, Pominohua. ⁸ Emeshi mese Pominoja chii ca ca quea manonee jaa, seeseejo; quea quiyo nee nee pea'ai. Jamajjeya Pabo oja equi quecuayijji yasijje dobiquinaje o baa, emanojaa baa. Ba majje Pabohua ma emanojaa eyami biajje ojaya eme huana canaje Eyacuiñajji nijje emimijji o jjaajaqui mee'yojji. Quea pame nee, quea ajanee Pominoja ejeajji po'yonaje. ⁹ Jamajjeya Pominoja chii huaquia'yonaje ba majje ojjaña emanojaa cuana nasi aijo ba'e poeyanaje Pabo que. Jesosaa Pabo ojjaña huaquia meesahua ca'yonaje. ¹⁰ Majoya ma dejja cuana quea bihui nee nee poanaje. Aquiana quea huiso ecuanaquia canaje sosema'. Quijje ecuanapea bishe ai yasijje anisohuaqui'yonaje. Majoya nasi aijo ba'e cuaa quea huiso pea aquiana cuana eba'ejji ecuanaquia canaje sosema'.

Pabo Shoma cuiñajji yasijje besapoquinaje

¹¹ Jamajjeya ecuananasi Manita nasijo ba'enaje pea beca peejjima ba'ime, 3 ba'ime. Majoya ecuaaya pea bishe ai banaje eyacuiñajji beca jaa bajjani, Casito Pono bajjani. Ma bishe ai Anejanía cuiñajji jaa poe majje eeno shejo Manita nasijo aniñaquinaje; majoya besapoquinaje Shoma meshi yasijje eba'eñaquijji. Jamajjeya sohuinano huoojeajji Joñohua ecuanama bishe aijo ani mee canaje. ¹² Majoya besapoqui'yo majje ecuanapea nasi yasijje poeyanaje, Sinacosa cuiñajji yasijje ba'eñaquinaje. Jomajo ecuananequinaje pea beca peejjima cahuime. ¹³ Majoya Sinacosajo ani ecuanabesapoqui o'oyanaje. Itania meshi yasijje poeyanaje. Shejio cuiñajji yasijje ba'eñaquinaje. Majoya mecajeahua eeno beni sisi poanaje. Jamajjeya beniya bishe dojo canaje quea pame nee. Beca cahuime po majje ecuanapoteoni cuiñajji yasijje ba'eñaquinaje, Itania meshi yasijje. ¹⁴ Poteoni cuiñajji Jesosaja epeeji quea huiso cuana ba'enaje. Ohuaya ecuanaiyaa canaje oja equi yasijje e'anijji. Jamajjeya ecuanama cuiñajji nequinaje me oeje beca cahuime, 7 cahuime Jesosajaepeeji cuana nijje. Majoya ecuanapoquinaje Shomacuiñajji quea quemohuasijje ejiojjije. ¹⁵ Jesosajaepeeji cuaa Shomajo ba'eya shajja'ajja canaje Pabopoeyani. Jamajjeya oya cuana Pabo ishoa sa po ajja Shomajo. Poeyanaje Apio cuiñajji yasijje, pea cuiñajji yasijje yohua bajjani yasijje ba'a: Pea Beca Peejjima Equi cuana huasijje pea'ai Pabo baa. Jamajjeya Jesosajaepeeji cuana jomajo tii ba majje Pabo quea bihui nee nee poanaje. Eyacuiñajji bihuia canaje, Pabohua.

Pabo Shomajo ba'enaje

¹⁶ Majoya ecuanashomahuasijje poquinaje. Shomajonequiñajji majje sohuinano huoojeajji Joñohua Pabohuhui canaje jama ba'a: —Pabo, ¡miya mee nei ba'ecue jiquio equiojo! —acanjaje.

Jamajjeya oeso huinano Pabojahuanajji nequinaje ma equijo pea'aiya.

¹⁷ Majoya pea beca peejjima cahuime po majje Pabohua Jodio etii cuana iyaa canaje. Ojee jjachichaquia-

jo Pabohua oya cuana huohui canaje jama ba'a: —Epeeji cuana, ishajja'ajjacue mo oe! Ecuea Jodio cuana quea mimishi ajjima poanaje. Eseyaya etiiquiana cuanaja esohui pajea'yo jjima ecuea pea'ai. Jamatii eya Jenosanenajo nequi Jodio etii cuaa eya iña canaje. Eya quia canaje Shomano deija cuana huasijje. ¹⁸ Shomano etii cuaa eya huohui'ajja canaje. Jamatii ecuea esohui shajja'ajja majje onaaya eya ba canaje quea mimishi pojjeamajojo ecuiajea'yojji pojjeama onajaya, ejeano-biajea'yojji tii pojjeama pea'ai. Onaaya eya pichojea sa acanaje. ¹⁹ Jamatii Shomano cuaa eya pichojea sa acanajo, Jodio etii cuana quea mase nee, quea quene nee nee poanaje. Jamajjeya eyaya jama anaje ba'a: "Shomano emeshi mese etii nijje, Sesa nijje eya mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijji ejo" eyaya anaje. Jamatii ecuea Jodio cuana niñeba jjima poanaje, o niñeba sa po ajja eya. Chojja, Jodio cuana ecuea huapa pojjeama cuana. ²⁰ Jamajjeya eya miqiana nijje mimi sa poani. E'e, ojjaña Isaeni cuaa ishoa'ajja canaje Eyacuiñajjija huoojea'yo ojjaña jaahuanajji Quito. Quitohua ojjaña cuana ba'e mee caje o'oya eyajo onijje. Eyaya ojo huohuiañajo, Jodio etii cuaa eya jeyo mee canaje baa jjonohua. ¡Bacue jiquio baa jjonon ba'a! —Pabohua acanaje.

²¹ Jodio cuaa Pabo saja'a canaje jama ba'a: —Pabo, Jodio cuana Jodea meshijo ba'eja ecuanaja huasijje esohui etehue'yo mijo huoojea jjima. Ecuanaja epeeji Jodea meshijo ba'eja poe jjima mi huohuijji pea'ai. Oya cuana poe jjima mi niñebajji epo pea'ai. ²² E'e, ecuanajaya miquea esohui shajja'ajja sa poani. Ecuanajaya eba ojjaña meshijo pea cuaa Jesusaja epeeji cuana niñeba cani. Jamajjeya shajja'ajja neinei sa poani ecuanajaya —acanjaya Jodio cuaa. ²³ Majoya Pabo huohui canaje jama ba'a: —E'e, ecuanajaya epeeji cuana huohui majje ojjaña poeje miquea esohui shajja'ajjaa.

Jamajjeya quijje pishana pea pojjaajo quea huiso Jodio cuana mecayjeahua poeyanaje Pabo shajja'ajjaa. Pabohua esohui huohui canaje quea huiso nee nee. Mecanajje oya mimi tiitii nequinaje Eyacuiñajji ojjaña huoojeajji poajejojo. Jodio cuana ba mee sa acanaje Jesosa Eyacuiñajjija huoojea'yo ojjaña jaahuanajji, Quito. Pabohua Moisesija etehue'yo cuanajo, Eyacuiñajjija esohui huohuijji yahuaajo nei ba'eja esohui etehue'yo pea'aijo Jodio cuana ba mee sa acanaje Jesosa e'e jojo nei Eyacuiñajjija huoojea'yo ojjaña jaahuanajji, Quito.

²⁴ Quea huiso Jodio cuaa ojaya esohui shajja'ajja majje

huohui canaje jama ba'a: —E'e de, ojaya esohui e'e nei —acanjaya.

Pea cuana ca ca ojaya esohui shajja'ajja sa po maja ajja. Jesosa Eyacuiñajjija huoojea'yo ojjaña jaahuanajji pojjeamajo poso quea quene nee poanaje cuana Pabohua jama huohuime acajje. ²⁵ Jamajjeya ojee cuana anica jjamimicuiajea nobiajeaqui poquinaje. Ojjaña cuayaquianajo Pabohua jama acanjaya ba'a: —Edojjos-hahua Pameya Eyacuiñajjija esohui huohuijji Isaia yahuaajo nei nei esohui huohui meesahua canaje miqianajaya etiiquiana cuana huasijje. E'e, imiqianajaya quea sapa ca'a poanajo shajja'ajjacue ojaya esohui etehue'yo! Jama aca poa Isaia yahuaajo nei ba'a:

²⁶ "Jodio cuana huasijje poqui'yo majje huohuicue jama ba'a: —Shajja'ajja majamaja majje jamatii ecuea esohui quea quehua poaje miqianajaya. Ba majamaja majje jamatii jjabahuejjaqui ajja poaje. ²⁷ Jiquio Jodio cuana quea jjabahuejjaqui quehua poani tii tii. Quea sapa ca'a. Jjabahuejjaqui sa po'yo ajja. Ba sa po'yo ajja pea'ai. Ba sa po'yo jjojemo ohuaya ba ca'yome. Jjabahuejjaqui sa po'yo jjojemo jjabahuejjaqui'yo. Quea jjabahuejjaqui ja'a po sa po'yo jjojemo quea jjabahuejjaqui ja'a po'yome. Jamajjeya oya cuana ecuea epeeji cuana po'yome. Eyaya ojaya mimishi cuana cuijea'yme pea'ai".

Jamajjeya Eyacuiñajjija Isaia huohui mee ca poa.

²⁸ Majoya Pabohua jama acanjaya ba'a: —Jamajjeya ¡bacue! Eyacuiñajjija ojjaña jaahuanajji Jesosa huoojea canaje mano'yohua, mimishi cuana cuijea'yojji, mimishi sosequia'yojji pea'ai. Ohuaya ojjaña ojaya epeeji cuana ba'e tiitii mee caje'yo onijje eyajo. Jodio cuana shajjama' poanajo, Eyacuiñajjija eya huoojea canaje Jodio pojjeama cuana huasijje ojaya esohui huohuiya. Jodio pojjeama cuaa ca ca shajja'ajja caje, de —Pabohua acanjaya.

²⁹ Majoya Pabohua esohui huohuijeyo cajo, Jodio cuaa oya jiñajaya ca'yonaje. Majoya oya cuana janobajjima nei ojee jjamimicuiajea nobiajeaquinaje.

³⁰ Jamajjeya beca shequijame Pabo oe nei ba'enaje oe equijo, ejjeshejji sosejje. Ojjaña cuana o que poeyajo, ojjaña cuana nijje quea bihui nee miminaje, quea bei nee poanaje. ³¹ Ohuaya huohui canaje Jesosa ojjaña huoojeajji poaje. Emeshi Mese nei Jesosa Quitojo huohui majamaja canaje mete'ama. Pea cuanajaya oya huohui pajea mee jjima poanaje, jamatii oya sohui-nano cuanajaya nahue poanaje. Jamajjeya poanaje.

Oeya ecuea esohui. Eya Noca bajjani esohui tehuejji. Apoa.

SHOMANO

Pabohua esohui tehue canaje Jesosaja epeeji cuana Shoma cuiñajjiyo ba'e yasijje

1 Eya Pabo bajjani. Jesosaja epeeji cuana, eyaya jiquio esohui tehueña miquiana huasijje Shoma cuiñajjiyo ba'eca huasijje. Eya ca ca iña Jesosa Quitoja huoojea'yo ojaya esohui huohuijji. Eyacuiñajjiya eya babaca canaje ojaya esohui huohuijji epojji. Ohuaya eya huoojea canaje quea huiso meshi yasijje ojaya esohui quea pame nee Jesosajo huohuiya.

2 Yahuajo nei nei Eyacuiñajjiya ma esohui quea pame Jesosajo ojaya etehue'yojo tehue mee ca poa ojjañaja ebajji. Ojaya esohui huohuijji yahuajo nei ba'e ma esohui huohui neinei mee ca poa pea'ai. **3** Jamaya Eyacuiñajjiya eseya ba mee cani oja Bacua Ejja oe nei Jesosa ese jayojjaya yamijji poeyanaje. Cuayanaje Maniaja bacua. Jodio cuanaja emeshi mese quea pame nee Dabi bajjani ojaya etiquiana, huapa pojjeama yahuajo ba'ya poa. **4** Oya Jesosa Quito ese jayojjaya yamijji poanaje. Oya Eyacuiñajji nei pea'ai, oja Chii jayojja nei nei, mimishi'ama nei nei. Oya mano'ya poa. Jamatii Eyacuiñajjiya quea ca'a nee neeya oya emano'yojaa shequi mee ca o'oyanaje. Jamaya ohuaya ojjaña ba mee canaje Jesosa e'e jojo nei oja Bacua Ejja, esejaya Emeshi Mese nei. **5** Eya Jesosaja epeeji poanijo Eyacuiñajjiya eya ojjaña meshi yasijje huoojea canaje jama ba'a: —¡Poquicue miya ojjaña Jodio pojjeama cuana huasijje! ¡Ecuea esohui ba meequicue Jesosajo! ¡Onijje jja-peequi meesahuacue! Jamajjeya onaaya Jesosa bihuia tiitii caje'yo —jamaya Eyacuiñajjiya eya huoojea canaje quea pame nee.

6 E'e ecuea epeeji cuana Shomajo ba'e, Eyacuiñajjiya miquianaya babaca canaje pea cuana nijje Jesosa Quitoja epeeji epojji. **7** Jamajjeya eyaya miquiana que jiquio esohui tehueña. Miquianaya Eyacuiñajjiya quea jea nee nee. Ohuaya miquianaya babaca canaje ojaya epeeji nei epojji. ¡Eyacuiñajjiya esejaya Chii aiya, Jesosa Quitohua esejaya Emeshi Mese neiya miquianaya cajaanahua cahua; quea bei nee caba'e meesahua cahua pea'ai!

Pabo ojaya epeeji cuana Shomajo ba'ejo Eyacuiñajji nijje mimiani

8 Ecuea epeeji cuana Shomajo ba'e, ojjaña meshijo ba'e cuana miquianajo mimiani quea bei Jesosaja esohui jayojja jama ba'yanijo. Ma shajja'ajja majje eyaya Jesosa esejaya Chii ai pea'ai bihuiaña jama ba'a: —Eyacuiñajji, miya quea pame nee. Ojjañaja eba miya-

ya miquea epeeji cuana Shomajo ba'e jaahuanaña —eya poani.

9 Eyaya e'e jojo nei Eyacuiñajjiya esohui quea pame nee oja Bacua Jesosajo huohui tiitiaña quea bihui nee. Ojaya eba eya onijje mimi majamajani miquianajo.

10 Eya jama poani ba'a: —Eyacuiñajji, yahuajo eya poqui sa poanaje Shoma huasijje Jesosaja epeeji cuana baa. Jamatii poqui mee jjima eya miquea. Eyacuiñajji, ¿a'a jjeya eya Shoma huasijje huoojea sa aña miyaya? —eya jamaya Eyacuiñajji nijje mimi majamajani.

11 E'e, eya miquiana ba neinei sa poani Jesosaja epeeji quea ca'a nee epo meesahua'yojji. Edojjos-hahua Pameya eya ba mee canaje Eyacuiñajjiya esohui eyacua quea pame. Ma esohui eyacua shajja'ajja majje miquianaya Jesosaja epeeji quea ca'a nee poaje. **12** Miquianaaya eya baje Jesosaja epeeji quea ja'a nee poani. Cuanaya miquianaya Shomajo ba'e Jesosaja epeeji quea ja'a nee baje eyaya. Jamajjeya Eyacuiñajjiya eseya ojaya epeeji cuana quea ja'a nee po meesahua caje'yo.

13 Ecuea epeeji cuana, ¡bacue jiquio esohui! Yahuajo eya poqui sa neinei poanaje miquiana baa. Jamatii eya poqui mee jjima, de. E'e, eyaya Jodio pojjeama cuana pea meshi cuanajo ba'e jjapeequi meesahuanaje Jesosa nijje. Jamaya eyaya miquianaya Jesosa nijje jjapeequi meesahua sa aña pea'ai. **14** Eyacuiñajjiya eya huoojea canaje ojaya esohui huohuiya ojjaña cuana huasijje jama ba'a: Ojjaña joya esejaya esohuijo mimiani yasijje, ojjaña pea esohuijo mimiani yasijje pea'ai, ojjaña joya papeni ba po jjima huasijje, joya papeni ba epo cuana huasijje pea'ai, ojjaña huasijje. **15** Jamajjeya eyaya miquiana Shomajo ba'e yasijje Eyacuiñajjiya esohui huohui sa aña.

Jesosaja nijje jjapee neineiquianijo mimishi cuijea ca'ya-ni Eyacuiñajjiya

16 ¡Bacue! E'e jojo nei ojjaña joya Jesosa nijje jjapee neineiquiani Eyacuiñajjiya mimishi cuana cuijea neinei caje'yo, joya ojaya esohui shajja'ajja majje e'e jojo nei acani. Jamaya ecuea eba. Jamajjeya eyaya bicho'ama ma esohui huohui majamajaña ojjaña cuana huasijje. E'e, Jodio cuaa ma esohui shajja'ajja majje, Jodio pojjeama cuaa shajja'ajja canaje pea'ai. **17** Eyacuiñajjiya esohui quea pame Jesosajo shajja'ajja majje eseyaya Eyacuiñajjiya ejjashahuabaquijji baña jama ba'a: —Ojjaña Jesosaja epeeji nei nei eyaya mimishi cuana cuijeaje'yo e'e jojo nei epojji. Jesosaja epeeji pojjeamajja mimishi ecuijea'yojji pojjeama —Eyacuiñajji poani.

Ojjaña Jodio cuana, Jodio pojjeama pea'ai quea mimishi poani

¹⁸ ¡Bacue ecuea esohui ojjañaja mimishi cuanajo! Eyacuiñajji eyajo ba'e quea quene nee nee poaje ojjaña coya mimishi po majamajani nijje. Quea nee nee acaje'yo. Oya cuana aje oe jama poani ba'a: Quea mimishi poani tii, Eyacuiñajji bihuia ajja, mimishi pajea sa po'yo ajja. Eyacuiñajji esohui shajja'ajja sa po ajja, pea cuana esohui shajja'ajja mee ajja pea'ai shajjama' cuana nijje ejjapeequijji jjejojo. ¹⁹ E'e, Eyacuiñajjiya ojjaña ba mee ca poa oya quea pame nee, quea ca'a nee enequi tii tii. Jamajjeya ¡Eyacuiñajji ojjaña caba cahua, de! ²⁰ E'e, oya ca ca oe Eyacuiñajji nei quea ca'a nee nee enequi tii tii. Ohuaya ca ca oe ojjaña pana ca'ya poa. Jamajjeya ojaya epana'yo ba majje ¡joya e'e jojo nei Eyacuiñajji bacue, ojjaña! Jamatii beca cuana sijje poani jama ba'a: —Eseyaya Eyacuiñajji ebajji pojjeama, jjabaa meequi ajja, de. ¿Yajja bame yajji eyami ebajji jojo? —poani. ¡A'a jama sijje pomeya pojji!

²¹ E'e de, yahuajo nei ojjañaja eba Eyacuiñajji yani. Jamatii onajaya Eyacuiñajji bihuia jjima jama ba'a: —Eyacuiñajji, miya oe nei quea ca'a nee nee enequi tii tii —jamaya ajjima—. Jamaya Eyacuiñajji, miya quea pame nee nee —ajjima. Oya cuana jamaya jjashahuabaqui jjima, de.

Jamajjeya oya cuana quea quehua jjashahuabaquiiani, quea mimishi. Jiquio ecua mecajje quea misi poquiiani jayojja jama oya cuana quea mimishi ba'yani, Eyacuiñajji ba pojjiima'. ²² Ojjaña ba epo poso jjabaquiani. Chojja, ba jjima nei nei quianaja. Quea mimishi nee nee jjashahuabaquiiani, ojjaña de. ²³ Onaaya aje oe Eyacuiñajji nisho bihuia cani; dejja nisho, cuichoiji nisho, aquiana nisho, peyo nisho pea'ai ne cani ebihuiajji. Eyacuiñajji nei ca ca bihuia jjima, de. Eyacuiñajji ca ca oe enequi tii tii quea pame nee nee.

²⁴ Jamajjeya oya cuana quea mimishi ca'a nee nee; jjashajja'ajjaqui ajja joya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya quea mimishi caba'yahua jamatii. Eyaya oya cuana mimishi pajea meesahua maja ajja —Eyacuiñajji poani.

Jamajjeya cajaa a'yo majje ojjaña ojaya ejjashahuabaquiiji tai jayojja jama ca'atiitii cahua cuaa. Pea cuana nijje aje oe quea mimishi nee capoahua. ²⁵ ¡Bacue! Eyacuiñajji e'e jojo nei oe nei yani. Ohuaya ojjaña pana ca'ya poa. ¡Ojjaña oya cabihuia tiitii cahua! Jamatii joya quea mimishi neeya Eyacuiñajji bihuia pajea cani eyacuiñajji nisho bihuiajji. E'e, oya cuana quea jjashahuabaqui quehua poani, de. ²⁶ Jamajjeya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya jamatii quea mimishi canequiahua bicho'ama. Ecuea oya emimishi pajea meesahua'yojji pojjeama —Eyacuiñajji poani.

E'e, quea mimishi nee nee ba'yani bicho'ama. Eyacuiñajjiya esohui jama ba'e ajja. Epona cuana aje oe pea epona nijje quea mimishi nee poani, ojahue nisho acani, jjaso cojjoquiiani. Pea cojjojji pea'ai poani. ²⁷ Dej-

ja cuana pea'ai aje jjaja oe jamaya quea mimishi epona jayojjaya po pea'ai yani. Ehuanase jea majje epona nijje pojjeama jaani, pea dejja nijje quea mimishi ba'yani. Onijje dejja nijje jjaseehuejja cojjoquiiani. Jamajjeya jjashajja'ajjaqui ajja joya Eyacuiñajjiya oya cuana cajaa acani. Ca'a'ama poani, quea jjashahuabaqui tai poani pea'ai.

²⁸ Eyacuiñajjiya epana'yo ojaya eba. Jamatii oya cuana jama poani ba'a: —E'e pojja'a Eyacuiñajji e'e jojo nei yani. Jamatii ¿apiojji acuae oya shajja'ajja cajji so'o? Cajaa —oya cuana poani.

Jamajjeya Eyacuiñajjiya oya cuana jama acani ba'a: —Oya cuana ca ca oe quea jjashahuabaqui tai po tiitiani; quea mimishi ba'yani tii bicho'ama jjejojo. Jamatii quea tai caba'yahua —Eyacuiñajji poani.

²⁹ Jamajjeya ojjaña cuana quea mimishi nee nee poani tii tii. E'e, quea mimishi ba'yani, quea dejja tai, quea nishehui, onaja aquiana jea ba cani, pea cuana boti'ama nei nei poani, ona mimishi po meeji pea'ai poani.

³⁰ Pea quecuajji poani, jjamimicuijja nobiajeaquiiji poani, jjadasiaquiiji poani, ojaya epeeji iñameeji poani equecua mee'yojji, mimijajji poani, pea cuana maimajji, Eyacuiñajji cajaa acani, pea cuana jeabichajjeajji poani, pea nijje mimi ajja pea'ai. Oya mimiani ojaya ejjashahuabaquiiji poa cuana quea bihui po meeji nisho, jjashahuaba tiitiquiani mimishi ya'yojji. Oja chii, oja nae shajja'ajja sa po ajja pea'ai. ³¹ Jjashahuabaqui ajja, mimishi cuana quea pame poso acani, ojaya ehuhui jama a'ajja pea'ai. Huapa pojjeama cuana boti'ama acani, pea cuana quea nee po mee sa acani; pea quea nee, quea yeno po mee majje yeno'ama poani. ³² Dejja quea mimishija eba Eyacuiñajjiya esohui etehue'yo e'e nei jama poani ba'a: “Ojjaña joya quea mimishi poani quea nee nee poaje'yo. Mano'yo majje cuaqui yasijje poquije'yo. Enijje eyajo enequi'yojji pojjeama tii tii” Eyacuiñajji poani.

Maya ojjaña mimishi cuanaja eba. Jamatii shajjama' poani tii tii. Pea cuana aje oe quea mimishi po mee cani jama ba'a: —E'e, ocuee. ¡Jamaya a'ajja! —bihuia nisho cani.

Eyacuiñajjiya ca ca oeyaya huohui caje joya mimishi'amajo, joya quea mimishijo pea'ai

2 Ecuea epeeji cuana, ¿a'a miqianaya jjashahuabaquiiani miya ca ca oe quea pame, ma dejja mimishi cuana jama pojjeama? ¡A'a pea cuana jama ajji ba'a: —Oya cuana quea mimishi nee poani. ¡Quea nee nee capo mee cahua Eyacuiñajjiya! —a'a jamaya mimijji!

¡Dee! Miquianaaya beca cuaa ona jayojja jama quea mimishi aña pea'ai. Jamajjeya Eyacuiñajjiya miqianaya quea nee nee po mee caje'yo ona jayojjaya. ² Ecuanaja eba Eyacuiñajjiya ejjashahuabaquiiji e'e nei, ojjaña ojaya eba. Jamajjeya ojjaña joya quea mimishi ba'yani ohuaya quea nee nee po mee caje'yo, Jodio cuana, Jodio pojjeama cuana pea'ai, ojjaña nei nei. ³ Miya quea mimishi poanijo ¡a'a jjashahuabaquiiji jama ba'a: —Eyacuiñajjiya pea cuana quea nee nee po mee caje'-

yo shajjama' poani jojoya. Eya ca iña cho, quea nee epo meeji pojjeama —a'a jamaya pojji!

¡Dee! Miya quea mimishi poani ona jayojja. Jamajjeya Eyacuiñajjiya miya quea nee nee po mee caje'yo ona nijje. Miya ojaya eba, de, ejjanequiquehuaquijji pojjeama miya. ⁴ E'e pojja'a miya quea quehua jjashahuabaquiani jama ba'a: —Eyacuiñajji ojjaña nijje quea pame nee poani. Quenequene cuaji ajja. Joya ojaya esohui jama ba'e ajja jamatii quea nee nee epo meeji pojjeama. Jamajjeya eya quea mimishi po tiitianijo, jamatii ojaya eya etecueajji pojjeama —poso jjabaquiani miya.

Chojja. Miya aje oe jjashahuabaquiani quea quehua nee. ¿A'a miquea ba jjima? Eyacuiñajji ojjaña nijje quea pame poani, ishoa cani emimishi pajea meesahua'yojji. ⁵ Jamajjeya miya quea mimishi nee nee jjejojo, shajjama' poani tiitijjo, Eyacuiñajjiya miya quea nee nee po mee caje'yo. E'e, quijje ohuaya ojjaña shajjama' poani tecuea neinei caje'yo. ⁶ E'e jojo nei Eyacuiñajjiya ojjaña eseya sosequia caje'yo ma eseya aninaje sosejje. Ojaya epeeji quea pame quea bihui nee po mee caje'yo. Shajjama' cuana ca ca quea nee nee po mee caje'yo ma o quea mimishi ponequinaje sosejje. ⁷ Jamajjeya beca cuana Eyacuiñajjiya esohui jama quea pame nee poani Jesusaja ejjashahuabaquijji jayojja epojji, o jayojja jama epojji, onijje eba'e tiitii'yojji. Eyacuiñajji quea bihui nee po mee sa acani. Jamajjeya Eyacuiñajjiya oya cuana bihuia caje jama ba'a: —E'e, miquianaya ecuea epeeji quea pame nee. Jamajjeya miquianaya enijje ba'e tiitije'yo eyajo.

⁸ Pea cuana ca ca Eyacuiñajjiya esohui e'e nei jama ba'e sa po'yo ajja. Cajaa acani. Shajjama' poani. Jamajjeya Eyacuiñajji onijje quea quene tii tii poaje'yo. Quea nee nee po mee caje'yo. ⁹ E'e, Jodio cuana, Jodio pojjeama cuana pea'ai Eyacuiñajjiya ojjaña quea yeno nee, quea nee nee po mee caje'yo shajjamajojo. ¹⁰ Joya ojaya esohui jayojja jama quea pame poani ca ca Eyacuiñajjiya huohui caje jama ba'a: —E'e jamaya, miya quea pame poani. ¡Jamajjeya quea pame, quea bei ba'ecue! ¡Enijje ba'e tiitiecue eyajo! ¡Enijje ojjaña huojajji pocue! —oya cuana acaje.

E'e, Jodio cuana jamaya acaje Eyacuiñajjiya, Jodio pojjeama cuana pea'ai. ¹¹ Ojjañajo Eyacuiñajji e'e jojo nei jjashahuabaquiani. Eseyaya eba'ejjijjo jjashahuabaquiani esosequia'yojji.

Eyacuiñajjiya ehuohui shajjama' cuanajo e'e nei

¹² Jodio pojjeama cuanaja ba jjima poa Eyacuiñajjiya esohui ma Moisesiya tehue ca poa. Jamatii oya cuana quea nee nee po mee caje'yo Eyacuiñajjiya quea mimishi ba'yanijo.

Jodio cuana ca ca Moisesija etehue'yo ba canaje. Jamajjeya shajjama' poanijo, Eyacuiñajjiya oya cuana tecuea caje jama ba'a: —Miquianaya ca mi ca shajjama'. Moisesija etehue'yo bajji poani, jamatii jamaya a'ajja. Jamajjeya ma etehue'yojo tehue ca poa jayojja jama miquianaya quea nee nee poaje'yo —Eyacuiñajji poani.

¹³ Moisesija etehue'yo Eyacuiñajjiya esohui ba majje jamatii Jodio cuana shajjama' poani. Jamajjeya ojaya mimishi cuana ecuijea'yojji pojjeama. Ojaya esohui jama acani ca ca oe Eyacuiñajjiya mimishi cuana cuijea caje'yo Jodio cuanaja. ¹⁴ Jodio pojjeama cuanaja ba jjima Eyacuiñajjiya esohui Moisesija etehue'yo. Jamatii oya cuana ma esohui jayojja jama ba'yani beca cuana. E'e, quea ja'a nee jjashahuabaquiani. Jamaya ojaya eba quea pame eba'ejji. Ojaya eba eba'ejji quea tai pea'ai. E'e, Moisesija etehue'yo Jodio pojjeama cuanaja ba jjima nei. ¹⁵ Jamatii, Eyacuiñajjiya oya cuana ba meesahua cani ojaya ejjashahuabaquijji'yojji. Jamajjeya oya cuana oja mimishijo jama poani ba'a: —Chojja, jamaya Eyacuiñajjiya boti'ama. Eya shajjama' jayojja poani.

Joya quea pame ba'yani jama poani ba'a: —E'e, jamaya quea pame eba'ejji. Jamaya Eyacuiñajjiya quea boti nee —oya cuana poani.

¹⁶ E'e, Eyacuiñajjiya eba ojjañajo ejjashahuabaquijji cuana. Jamajjeya quijje ohuaya e'e jojo nei huohui caje'yo ojjañajo eba'ejjijjo. Ohuaya Jesosa huoojea caje jama ba'a: —Jesosa, ¡oya cuana sosequiacue ma ohua meshijo ba'yahuaa acanaje sosejje! —Eyacuiñajjiya acaje'yo.

Jamaya eyaya, Pabohua huohuaña ojjaña esohui quea pame nee Jesusajo.

Jodio cuana Moisesija etehue'yo ba majje jamatii shajjama' poani

¹⁷ Jodio cuana, miquianaya mimi huicha'a huicha'ani jama ba'a: —Ecuana ca ca oe Jodio cuana, Eyacuiñajjiya babaca ojaya nei epojji. Ohuaya ecuaña ojaya esohui ba mee ca poa Moisesija etehue'yo. Jamajjeya ohuaya ecuaña ba cani mimishi'ama —miquianaya poani—.

¹⁸ E'e, ecuaña baña Eyacuiñajjiya esohui Moisesija etehue'yo. Jamajjeya ecuanajaya eba Eyacuiñajjiya ejjashahuabaquijji'yojji. Jamajjeya ecuaña ba'yani quea pame nee, mimishi'ama —miquianaya poani.

¹⁹ Jamajjeya miquianaya jama poani pea'ai ba'a: —Jodio pojjeama cuana, Eyacuiñajjiya esohui ecuanajaya eba nei nei Jodioja jjejojo. ¡Ecuana jayojjaya oe pocue! —miquianaaya aña—. Ecuaña Eyacuiñajjiya esohui baña Jodiohua jjejojo. Jamajjeya ecuanaya cuaquijji jayojja jama poani. Jiquio ecua mecaje quea misijo cuaquijjiya ejiojji ba mee cani jayojja jama ecuaña joya Eyacuiñajji ba pojji'ama cuana quea ja'a nee ba'e meesahuaña. ²⁰ E'e, joya Eyacuiñajji ba pojji'ama cuana, Eyacuiñajji oe pojji ba epo pea'ai ecuaña esohui ba meesahuaña. Eyacuiñajjiya ecuaña ojaya esohui etehue'yo ba mee ca poa. Ma esohui e'e jojo nei —jamaya miquianaaya aña.

²¹ Miquianaaya pea cuana esohui huohui huicha'a huicha'aña. Jamatii miquea ehuohui jayojja jama ba'e ajja miquianaya. E'e, jama huohuime aña ba'a: —¡A'a jja oe sii pojji!

Jamajjeya ¿apiojji acuae jja oe miya sii poani? ²² —¡A'a pea cojjojji! —huohui aña miyaya.

Jamajjeya ¿apiojji acuae jja oe miya pea cojjoji poani so'o?

—¡A'a eyacuiñajji nisho bihuiajji oe! —huohuime aña.

¿Apiojji acuae jja nequiaa oe Eyacuiñajji bihuia nis-hoaña quea aquiana jeaa jjejojo?

²³ Miquianaya mimi huicha'a huicha'ani Moisesija etehue'yojo: —Ecuana ca jja ca oe Eyacuiñajjiya ojaya esohui etehue'yo ba mee ca poa —ca jja nequiana ca oe poani.

Jamajjeya apiojji shai miquianaya onijje jjapee nisho-quiani, ojaya esohui jayojja jama ba'e tiitii ajja. ²⁴ E'e, yahuajo nei Eyacuiñajjiya etehue'yo jama poa ba'a:

“Jodio cuana, miquianaya ca jja ca oe shajjama' ba'ya-ni. Mi ba majje Jodio pojjeama cuaa Eyacuiñajji cajaa acani”.

Jamaya Eyacuiñajjiya esohui yahuajo nei etehue'yo poa.

Cuiishasha biso nei jehusejjajea majje pojjeama eseya Eyacuiñajjiya epeeji nei poani

²⁵ Jodio cuana, yahuajo nei esejaya etiiquianaa Moisesiya Eyacuiñajjiya esohui tehue ca poa jama ba'a:

—¡Mique bacuaja cuiishasha biso nei jehusejjajea cue!

Jamaya eseyaya aña, Eyacuiñajjiya esohui yahuajo nei jayojjaya aña. Jamajjeya Eyacuiñajjiya etehue'yo jayojja jama quea pame nee ba'yanijo cuiishasha ejehusejjajea'yo quea pame. Jamaya ojjaña ba meeña eseya, Jodio cuana Eyacuiñajjiya babaca'yo o peeji epojji. Jamatii Eyacuiñajjiya esohui etehue'yo jayojja jama ba'e ajja ca ca ¿apiojji acuae cuiishasha biso nei jehusejjajeaña so'o? Jamatii Eyacuiñajjiya miquianaya ba cani Jodio pojjeama jayojjaya quea mimishi pea'aiya. ²⁶ Jodio pojjeama ca ca cuiishasha jehusejjajea ajja. Jamaya po ajja oya cuana. Jamatii beca cuana Eyacuiñajjiya esohui etehue'yo quea ja'a nee jayojja jama ba'yani. Jamajjeya Eyacuiñajjiya oya cuana ba cani Jodio jayojjaya, ojaya ehabaca'yo, jamatii cuiishasha jehusejjajea jjima.

²⁷ Jodio cuana, miquianajaya eba Eyacuiñajjiya esohui. Cuiishasha jehusejjajeaña pea'ai. Jamatii aje oe Eyacuiñajjiya esohui etehue'yo jayojja jama ba'e ajja. Jamajjeya Eyacuiñajjiya miquianaya ba cani shajjama'. Jodio pojjeama ca ca cuiishasha jehusejjajea ajja. Jamatii Eyacuiñajjiya esohui jayojja jama ba'yanijo, ohuaya oya cuana ba cani mimishi'ama, quea pame. ²⁸ E'e, eseya Eyacuiñajjiya esohui jayojja jama ba'yanijo ojaya epeeji nei poani, cuiishasha jehusejjajea majje pojjeama. ¿A'a miquianaaya cuiishasha jehusejjajeaña? ¿A'a mimishi pajea'yonaje pea'ai? ²⁹ Eyacuiñajjiya esohui jayojja jama añajo ca ca miquianaya ojaya epeeji nei poani. Beca cuanaja cuiishasha jehusejjajea jjima; jamatii Edojjashahua Pameya pea jjashahuabaquime po mee ca'yani Jesusaja epeeji nei epojji. Jamajjeya miquianaya Jesusaja epeeji e'e jojo nei poani. Pea cuaa pojja'a miquianaya Jesusaja epeeji pojjeama poso acani, miquea cuiishasha jehusejjajea jjimajojo. Jamatii Eyacuiñajjiya eba miquianaya ojaya epeeji nei poani.

Jamajjeya ojjaña joya Eyacuiñajjiya esohui jayojja jama ba'yani ojaya epeeji nei poani, Jodio cuana, Jodio

pojjeama cuana pea'ai, ecuiishasha jehusejjajea'yo cuana, ecuiishasha jehusejjajea'yo pojjeama cuana pea'ai.

Eyacuiñajji e'e jojo nei, quea ja'a nee nee poani

³ Jodio cuana, ¿a'a miquianaya jjashahuabaquiani? Jama ba'a: —Eyacuiñajjiya Jodio pojjeama cuana ojaya epeeji nei po mee cani ecuana jayojjaya. Jamajjeya ¿apiojji acuae etiiquianaja ehuhui'yo jayojja jama cuiishasha jehusejjajeaña? ¿A'a Jodio pojjeama epojji quea pame nee nee, Jodio epojji quea pame pishana? —miquianaya pojja'a jamaya poani.

² Quea pame nee Jodio epojji. ¡Bacue! Eyacuiñajjiya eseya Jodio cuana yahuajo nei nei ojaya esohui etehue'yo ba mee ca poa, ba majje pea cuana huasijje ehuhui'yojji pea'ai. ³ E'e, Eyacuiñajjiya esejaya etiiquiana Amajama bajjani huohui ca poa jama ba'a: —Eyaya mique osecua cuana quijje nei nei ba'eje quea pame nee nee aje'yo; ecuea esohui quea pame jayojja jama aje'yo —Eyacuiñajji poa.

—Esejaya etiiquiana Eyacuiñajjiya esohuijo shajjama' poajo, ¿a'a Eyacuiñajjiya ojaya esohui pajea caje'yo pojja'a? ¿A'a jamaya yajji pojjeama pojja'a? —miquianaya poani pojja'a.

⁴ ¡Chojja de! Deja cuana sijje poani, ojjaña. Eyacuiñajji ca ca sijje po ajja nei nei. Ma ecua ohua huohui canaje jayojjaya ohuaya acaje'yo. Ojaya esohui yahuajo nei etehue'yo jama poa ba'a:

“Eyacuiñajji, miyaya ca ca oe esohui e'e nei huohuiana tii tii. Miquea ejjashahuabaqui'yojji ba majje ojjaña ba caje miya e'e jojo nei poani, sijje po ajja nei nei”. Jamaya Eyacuiñajjiya esohui yahuajo nei tehue ca poa.

⁵ Jodio cuana, miquianaya jjashahuabaquiani quea quehua, de; jamaya poso nequiana jjabaquiani ba'a: —Ecuana quea mimishi poanijo, ojjaña Eyacuiñajji bihuia caje jama ba'a: “Eyacuiñajji oe nei quea ja'a nee poani, oe nei quea pame”. Jamajjeya ¿apiojji shai Eyacuiñajjiya ecuana quea nee nee po mee caje'yo quea mimishi poanijo? —jamaya miquianaya Eyacuiñajji ba po jjima jayojja jama jjashahuabaquiani, quea quehua.

⁶ Chojja Jodio cuana, jamaya pojjeama. Jamaya e'e nei poa jojjemo Eyacuiñajjiya mimishi cuana tecuea jji-ma aca'yome. Eyacuiñajjiya e'e nei nei acani tii tii. E'e jojo nei ojjaña shajjama' cuana ohuaya quea nee nee po mee caje'yo mimishi poani sosejje. ⁷ Jamatii miquianaya quea quehua jjashahuabaquiani jama pea'ai ba'a: —E sijje poanijo pea cuaa Eyacuiñajji bihuia cani jama ba'a: “Eyacuiñajji oe nei sijje po ajja nei nei” acaje cuaa. Jamajjeya ¿apiojji shai Eyacuiñajjiya eya quea nee nee po mee caje'yo sijje poanijo? —miquianaya aje jja oe jamaya poani.

⁸ Cho, jamaya pojjeama. Jamaya e'e nei poa jojjemo, ca ca e sijje poanijo pea cuaa Eyacuiñajji bihuia cani ecuana sijjepojji pome. E'e, beca cuaa aje oe eya niñeba cani jama ba'a: —Pabohua aje jja oe jamaya huohui cani ba'a: “¡Quea mimishi oe pocue pea cuana quea pame nee eba'e meesahuajji!” —onaaya jama eya niñebameya acani. Cho, eya jamaya po ajja. ¡Jama-

ya niñeba canijo, Eyacuiñajjiya oya cuana quea nee nee capo mee cahua, de!

Eyacuiñajjiya ojjaña cuana ba cani shajjama' jayojja

⁹ Jodio pojjeama cuana shajjama' nei nei poani. ¿A'a Jodio cuana shajjama' pishana? Chojja, Jodio cuana Jodio pojjeama cuana jayojjaya jama poani. Ojjaña shajjama' nei nei pea'ai poani. ¹⁰ Eyacuiñajjiya esohui yahuajo nei nei Dabiya tehue ca poa jama ba'a:

“Ecuea esohui jayojja jama a'ajja ojjaña cuana. Chama' joya quea pame poani. ¹¹ Ecuea esohui e'e nei ba sa po ajjajo ojaya ba jjiima ecuea ejjashahuabaqui'yojji. Oya cuana e ba sa po'yo ajja pea'ai. ¹² Chojja, oya cuana eshahua nijje poani, enijje jjapeequi ajja quea mimishi jjejojo. Shajjama' jjejojo quea pame po ajja ojjaña cuana. ¹³ Ojjaña esohui quea tai nee nee acani. Quea tai nee nee ojjañaja esohui, aquiana quea ihui jayojja. Ojjaña sijjepojji pea'ai, sijje popajea'yo ajja pea'ai. Ojjaña mimijajji poani pea'ai. Quea tai nee nee ojjaña poani. Jiquio ecua peyo se naa quea nee nee po mee cani jayojja jama ojjaña cuana onaya quea yeno po mee cani. ¹⁴ Ojjaña quea tecue nee nee poani, panajajiani pea'ai. ¹⁵ Oya cuana quenequene cuaji majje jjaquecuacuani. ¹⁶ Oya cuana aje oe ona quea mimishi pomeejji poani; ojjaña quea yeno nee nee po mee cani. ¹⁷ Ojjaña quea bei ba'e ajja tii tii. ¹⁸ Ejo jjashahuabaqui ajja tii tii, jjashajja'ajjaqui ajja pea'ai”.

Jamaya Eyacuiñajjiya yahuajo nei tehue mee ca poa.

¹⁹ Jamatii esejaya eba Jodio cuana jama sijje poani ba'a: —Eyacuiñajjiya esohui Moisesija etehue'yo jayojja jama ecuanaaya aña.

Jamatii Eyacuiñajjiya Jodio cuana jama acani ba'a: —Miquianaya aje oe ecuea esohui ba majje jama a'ajja. Shajja huejjama' jayojja miquianaya poani.

Jamajjeya Eyacuiñajjiya ojjaña cuana quea nee nee po mee caje'yo; Jodio cuana, Jodio pojjeama cuana pea'ai quea jeca poaje'yo, quea mete poaje'yo shajjama' poani jjejojo.

²⁰ E'e, Eyacuiñajjiya esohui Moisesija etehue'yo ba majje ojjaña cuana jama poaje ba'a: —E'e, eya shajjama' jayojja jama poani —ojjaña poaje.

Jamajjeya Eyacuiñajji ojjaña nijje mimi ajja jama ba'a: —Miquianaaya ecuea esohui etehue'yo jayojja jama e'e jojo nei aña. Jamajjeya miya quea pame nee nee —jamaya mimi ajja Eyacuiñajji. Chojja, ojjaña shajjama' poani, ojjaña tii.

Jesosa nijje e'e jojo nei jjapeequianijo Eyacuiñajjiya esejaya mimishi cuijea caje'yo

²¹ Yahuajo nei nei Eyacuiñajjiya esohui huohuijjiya, Moisesiya pea'ai jama sohuihuohuime aca poa ba'a: “Ojjaña joya e'e jojo nei onijje jjapeequiani Eyacuiñajjiya quea boejea po mee caje'yo” yahuajo jama huohuimeya aca poa. Jamatii ojjaña jjashahuabaquinaje Eyacuiñajjiya ojjañaja mimishi cuijea caje'yo Moisesija esohui etehue'yo jayojja jama añajo poso. ²² E'e, Eyacuiñajjiya esejaya mimishi cuana cuijea cani jama

huohuime amajje ba'a: —Ecuea eba Jesosa Quitohua ecuea mimishi cuijea caje'yo. Eya onijje jjapeequije'yo.

E'e, Jodio cuana Jodio pojjeama jayojjaya jama acaje'yo Eyacuiñajjiya. ²³ Ojjaña cuana ojjaña meshijo ba'e quea mimishi nee poani. Jamajjeya Eyacuiñajji ojjaña cuana nijje quea bihui pojjeama, o jayojja jama po ajjajojo. ²⁴ Jamatii Eyacuiñajji quea pame nee nee. Ojjaña quea jea nee acanijo ojjaña shajjama' cuanaja mimishi cuijea'yo majje ojjaña ba cani mimishi'ama. Jamaya Eyacuiñajjiya acani Jesosa Quito ojjaña cuanaja mimishi cuijea'yojji sosejje mano'yonajejo. ²⁵ E'e, Jesosa Quito esejaya mimishijo mano'yonaje; ojaya ena' cuayaquinaje. Jamajjeya ojjaña eseya jama mimianijo ba'a: —Jesosa Quito mano'yonaje ecuea mimishijo —jamaya poanijo, Eyacuiñajjiya esejaya mimishi cuijea'yo majje eseya ba cani mimishi'ama.

E'e, Eyacuiñajjiya Jesosa ba ca poa ñajjaja equecu'yo jayojja, ma ona mimishi cuana nijje quea bei nee epojji. Eyacuiñajjiya oya Jesosa Quito mano mee ca'ya poajo, ojjaña ba mee cani oya e'e jojo nei quea pame poani. Eyacuiñajji jama poani ba'a: —Mimishi cuana sosequia'yojji oe dejja camanoqui'yahua.

Yahuajo nei nei Jesosa mano'yo jjimahuajo ojjaña cuana shajjama' poa. Jamatii Eyacuiñajjiya ishoa canaje; mimishi cuijea'yo jjiima acanaje Jesosa mano'yo jjimahuajo. Jamajjeya Jesosa mano'yo jjimahuajo, dejja mimishi cuana jjashahuaba quehuaqui canaje jama ba'a: —Eyacuiñajjiya pajea ca'yonaje ecuanajaya mimishi cuana jamatii pojja'a —poanaje.

Jjeja ca ca Jesosa Quito mano'yonaje mimishi cuijea'yojji sosejje. Jamajjeya Jesosa mano'yajo, Eyacuiñajjiya ojjaña ba mee cani ohuaya jamatii pojjeama etiquiañaja mimishi pajea ca'yonaje. ²⁶ Jjeja pea'ai Eyacuiñajjiya esejaya mimishi cuana cuijea ca'yani Jesosa nijje jjapeequianijo. Jamajjeya ohuaya ojjaña ba mee cani oya quea pame nee nee poanijo Jesusaja epeejji cuanaja mimishi cuana cuijea ca'yani. Eyacuiñajji jama poani ba'a: —Jesosa miquea mimishijo mano'yonajejo, eyaya miquianaya baña mimishi'ama —Eyacuiñajji poani.

Jesosa nijje jjapeequianijo ca ca oe Eyacuiñajjiya eseya ba cani emimishi cuijea'yo

²⁷ Eseyaya jama po ajja ba'a: —Eyaya ca eya Moisesija etehueya jayojja jama añajo, Eyacuiñajjiya eya mimishi cuijea ca'yonaje —eseya jamaya po ca ajja nei nei. ²⁸ Jamajjeya esejaya eba jama ba'a: Jesusaja epeejji nei poanijo ca ca oe Eyacuiñajjiya eseya ba cani emimishi cuijea'yo, quea pame. Jamajjeya Moisesija etehue'yo jayojja jama ba'yanijo pojjeama mimishi cuijea ca'yani Eyacuiñajjiya. Chojja, shajjama' ojjaña poani; chama' joya Moisesija etehue'yo jayojja jama ba'yani tii.

²⁹ Jodio cuana, eyaya miquianaya huohui'ajjaña jama ba'a: —¿A'a Eyacuiñajjiya Jodio cuanaja mimishi cuijea cani, Jodio pojjeama cuanaja mimishi cuijea sa po ajja pojja'a?

Chojja. Jamaya pojjeama. Eyacuiñajjiya ojjañaja mimishi cuijea cani Jesosa nijje jjapeequianijo. ³⁰ Ohuaya

ojjaña acani oya jayojjaya Jodio cuana, Jodio pojjeama cuana pea'ai. Jamajjeya Jesosa nijje japeequianijo, Eyacuiñajjiya eseya ba cani emimishi cuijea'yo, Jodio pojjeama cuana pea'ai, de. ³¹ Jamajjeya eseya, Jodio cuana Jesosa nijje japeequianijo, ¿a'a Eyacuiñajjiya esohui etehue'yo jayojja jama ca'apajea'yahua? Chojja de. Jesosaja epeeji poanijo ca ca eseyaya ojaya esohui jayojja jama ejja'aqui o quea bihui nee epo meeji.

Onijje japeequianijojo Eyacuiñajjiya Amajamaja mimishi cuijea ca'yonaje

4 ¡Jashahuabaquicue Amajamajo, esejaya etiiquianajo, ma ojjaña Jodio cuanaja etiiquianajo! ¿Yajjajo shai Eyacuiñajjiya oya huohui ca poa so'o? Jama ba'a: —Amajama, eyaya miya baña emimishi cuijea'yo, ecuea epeeji nei.

¿A'a Eyacuiñajjiya jamaya aca poa Amajama ojaya esohui etehue'yo jayojja jama ba'ya poajo? ² Chojja. Eyacuiñajjiya Amajamaja mimishi cuijea ca'ya poa ojaya esohui etehue'yo jayojja jama ba'ya poajo poso miqiaaya aña. Chojja. Eyacuiñajjiya Amajama jama aca poa ojaya esohui etehue'yo joyajja jama ba'ya poa pojemo Amajama jama mimime poquiaye ba'a: —Eya ca ca iña quea pame nee, de. Ojjaña Eyacuiñajjiya esohui etehue'yo jayojja aña, ohuaya ecue mimishi cuijea ca'yonaje —Amajama jama mimimeya poquiaye.

¡Dee! Beca cuana jamaya jashahuaba quehuaquiani. Eyacuiñajji ca ca jamaya jashahuabaqui ajja. ³ Ojaya esohui yahuajo etehue'yo jama poa ba'a: —Amajama Eyacuiñajji nijje japeequia poa. Jamajjeya Eyacuiñajjiya oya jama aca poa ba'a: “Amajama, eyaya miya baña emimishi cuijea'yo” aca poa —jamaya esohui yahuajo nei etehue'yo poa, Eyacuiñajjiya.

⁴ ¡Bacue! Deja chacochochojo, casosequia cahua echacomeejiya. Echacomeejiya sosequia cani jamatii pojjeama, chaco soseje, de. ⁵ Eyacuiñajjiya ca ca esejaya mimishi cuana cuijea cani etehue'yo jayojja jama ba'yanijo soseje pojjeama. Chojja. Jesosa nijje japeequianijo, ohuaya eseya ba cani emimishi cuijea'yo jamatii. E'e, oya shajjama' nei nei cuana ba cani mimishi'ama pea'ai Jesosa nijje mimi jeahuajo, onijje japeequi jeahuajo pea'ai. ⁶ Maya esejaya etiiquiana Dabi bajjanija eba poa. Jamajjeya jama jashahuabaquimeya poa ba'a: “Eyacuiñajjiya eseya ba cani emimishi cuijea'yo. Ojaya esohui etehue'yo jayojja jama ba'yani soseje pojjeama Eyacuiñajjiya eseya ba cani emimishi cuijea'yo. Quea bihui nee capoahua mimishi cuijea ca'yajje”. ⁷ Jamaya Dabiya yahuajo nei tehue ca poa ba'a:

“Eyacuiñajjiya oja mimishi cuijea cajo, quea bihui nee capoahua ojjaña shajjama' cuana. Quea boejea'yo po mee canijo, quea bihui nee nee capoahua. ⁸ Shajjama' cuana quea bihui nee capo'yahua Eyacuiñajjiya oya shajjama' pojjeama ba canijo, de”. Jamaya esejaya etiiquiaa Dabiya tehue ca poa yahuajo nei.

⁹ ¿A'a ohuaya maya tehue ca poa Jodio ca ca oe mimishi jamatii cuijea cajo quea bihui poaje? Chojja. Jodio pojjeama pea'ai quea bihui poaje mimishi jamatii

cuijea ca'yajje. E'e, Eyacuiñajjiya esohui etehue'yo jama poa pea'ai ba'a: “Onijje japeequianijo, Eyacuiñajjiya Amajama ba ca poa emimishi cuijea'yo” anaje. (Amajama ba'eya poa Moisesi cuaya jjimahuajo.) ¹⁰ ¿Ache shono acuae Eyacuiñajjiya Amajama ba ca poa emimishi cuijea'yo? ¿A'a cuiishasha biso nei jehusejjajea cajo pojja'a? ¿A'a jehusejjajea jjimahuajo pojja'a oya emimishi cuijea'yo ba ca poa, Eyacuiñajjiya? ¹¹ Cuiishasha jehusejjajea jjimahuajo ca jja ca oe Eyacuiñajjiya Amajama ba ca poa emimishi cuijea'yo. Jamajjeya ¿yajjajo shai jehusejjajea mee ca poa? Jama ba'a: Quijje Amajamaa jamaya aca poa onajaya ebajji oya Eyacuiñajji nijje japeequianijo ca ca oe ohuaya oya emimishi cuijea'yo ba ca'ya poa, cuiishasha jehusejjajea jjimahuajo. Jamajjeya oya jayojjaya Jodio cuana, Jodio pojjeama cuana pea'ai Jesosa nijje japeequianijojo Eyacuiñajjiya eseya ba cani quea boejea'yo, cuiishasha jehusejjajea'yo pojjeamajo, de. Jamajjeya Amajama Jodio pojjeama cuanaja etiiquiana jayojja jama esejaya pea'ai, ca Jesosaja epeeji poanija. ¹² Oya Amajama esejaya, Jodio cuanaja etiiquiana poa. Jamajjeya Amajama jayojja jama cuiishasha jehusejjajeaña eseyaya, Jodio cuaaya. Amajama Eyacuiñajji nijje japeequia poa cuiishasha jehusejjajea jjimahuajo. Jamajjeya Jodio cuana jjeya Amajamaja osecua nei poani Jesosa nijje japeequiani joyaya, cuiishasha jehusejjajea majje pojjeama.

Eyacuiñajjiya ojaya esohui jayojja jama acaje'yo esejo, onijje japeequiajo

¹³ E'e, yahuajo nei onijje japeequianijo Eyacuiñajjiya Amajama ba ca poa mimishi'ama. Ojaya ehuohui'yo jayojja jama poa jjimahuajo ca ca Eyacuiñajjiya Amajama mimishi cuijea ca'ya poa. Jamajjeya Eyacuiñajjiya Amajama huohui ca poa jama ba'a: “Amajama, eyaya miya, mique osecua cuana pea'ai emeshi mese po meeña ojjaña meshi yasijje” Eyacuiñajjiya jamaya aca poa Amajama onijje japeequianijojo. ¹⁴ Jamajjeya ojjaña Moisesija etehue'yo ajji poani oe nei eyajo eba'e tiitii mee'yojji jojjemo eseya Jesosaja epeeji cuana eyajo ba'e tiitii'yo jjima pome, Eyacuiñajjiya ma Amajama nijje ohua huohui ca poa jama e'ajji pojjeama pome pea'ai. ¹⁵ E'e, Moisesija etehue'yo jama a'ajjajo, Eyacuiñajjiya quea nee nee po mee caje'yo shajjama' cuana. Jamatii Eyacuiñajjiya esohui ba mee jjima jojjemo shajjama' cuana chama' pome. Chama' joya esohui etehue'yo jayojja jama ba'yani.

¹⁶ Jamajjeya Eyacuiñajjiya quea pame huohui ca poa ojjaña onijje japeequianijo. Eseya ojaya quea jea nee nee. Oya sijje po ajja nei nei pea'ai. Jamajjeya ma ohua Amajama nijje huohui ca poa jayojja jama ohuaya acaje'yo e'e jojo nei Amajamaja osecua cuana nijje. E'e, ohuaya jamaya acaje ojjaña ese nijje, Jesosa nijje japeequianijo; Jodio cuana nijje, Jodio pojjeama cuana nijje pea'ai. E'e, Jesosa nijje japeequianijo eseya Amajama jayojja, Eyacuiñajjiya epeeji nei nei ma ecua Amajama poa jamaya eseya. Jamaya Eyacuiñajjiya ojjaña eseya ba cani Amajamaja osecua cuana. ¹⁷ Eyacuiñajjiya

esohui ma ohua Amajama huohui ca poa ohuaya yahuajo nei tehue mee ca poa jama ba'a: "Amajama, eyaya miya ojjaña deija cuanaja, pea jaajijia esohui mianija etiiquiiana po meeje'yo, ojjaña etiiquiiana". Jamaya Eyacuiñajjiya yahuajo nei tehue mee ca poa ojjaña ojaya epeeji cuanaja. Jamajjeya onijje jjapeequianijo, Eyacuiñajjiya eseya Amajamaja osecua cuana po mee cani. E'e, ohuaya quea ca'a nee nee, ojjaña acani. Emanoy'yo cuana shequi mee ca'yani; ojjaña aquiana ma yahuajo chama' poa ohuaya pana cani, Eyacuiñajjiya.

¹⁸ Jamajjeya Amajama tii nojinoji'ya poa bacuama' tii. Jamatii Eyacuiñajjiya oya huohui ca poa jama ba'a: "Amajama, miquea osecua cuana quea huiso nee nee poaje. Emeshi mese cuana poaje'yo ojjaña meshi cuana huasijje" jamaya Eyacuiñajji poa. Jamajjeya Amajama jjashahuabaquinaje jama ba'a: —E'e de, eya etii nei nei. Jamatii Eyacuiñajjiya eya e'e nei huohui cani. Jamaya ca'a cahua ohuaya. Eya quea osecua huiso nee nee poaje.

E'e jojo nei jamaya acanaje Eyacuiñajjiya, ma ecua ohuaya huohui canaje jamaya acanaje. Amajama quea osecua huiso nee nee po mee canaje, majameta huiso ajja sico meeme ajja, quea huiso nee nee. ¹⁹ Eyacuiñajjiya esohui shajja'ajja majje Amajama jjashahuabaquinaje poa jama ba'a: —Eya etii nei nei, 100 shequiame etii. Ecuea ehuanase pea'ai etii nei, bacuama' pea'ai. Jamatii esho'yahua jjamejoqui jjima poanaje. Jamatii Eyacuiñajjiya ma ecua eya huohui canaje jamaya ohuaya ca'a cahua. Ecuea ebacua e'e jojo nei cuayaje, deija —Amajama poanaje. ²⁰ Jama po majamajanequinaje tii tii ba'a: —Eyacuiñajjiya eya e'e nei huohui canaje. Ohuaya eya jamaya amee caje. Oya ca ca oe siaje po ajja nei nei —jamaya mimi majamajanequinaje Amajama Eyacuiñajjiya epeeji quea ca'a nee nee poanaje. Bihua ca poa jama ba'a: —E'e Eyacuiñajji, jamaya. Miyaya eya quea pame nee añña tii. ²¹ E'e, miyaya quea ca'a nee nee poanijo, miquea ehuhui'yo jayojja jama aje'yo e'e jojo nei.

²² Amajama jamaya jjashahuabaquinanijo, Eyacuiñajjiya oya huohui ca'ya poa: "Amajama, miya enijje jjapeequianijo, eyaya miya baña mimishi'ama. Miquea mimishi cuijea'yo" Eyacuiñajjiya oya aca poa.

²³ E'e, Eyacuiñajjiya huohui ca poa Amajamaja ebajji jama ba'a: "Enijje jjapeequianijo eyaya miya baña mimishi'ama" Eyacuiñajji poanaje. ²⁴ Eyacuiñajjiya jama tehueme aca poa esejaya ebajji ohuaya Amajama mimishi cuijea ca'ya poa onijje jjapeequianijo. Jamajjeya esejaya eba Amajama jayojjaya onijje jjapeequiajo, Eyacuiñajjiya eseya jama acaje pea'ai ba'a: "Eyaya miya baña mimishi'ama pea'ai" Eyacuiñajjiya eseya acaje, de. Oya ca ca oe quea ca'a nee nee, ojjaña ohuaya acani; Jesosa esejaya Emeshi Mese nei emano'yooja shequi mee ca o'oyanaje. ²⁵ E'e, ojjaña quea mimishi poanijo, Eyacuiñajjiya Jesosa huoojea canaje emano'yooji esejaya mimishi sosequia'yooji. Majoya Eyacuiñajjiya oya shequi mee ca o'oyanaje. Shequi o'oya majje Jesosa jama poanaje ba'a: —Ecue Chii, ¡bacue! Ecuea

epeeji cuanaja mimishi cuijea'yooji soseje eya mano'yonaje. Oya cuana jjeya mimishi'ama enijje jjapeequianijo —oya Jesosaa acanaje.

Eyacuiñajjiya eseya mimishi'ama ba cani

⁵ E'e, Jesosa nijje jjapeequianijo, Eyacuiñajjiya eseya ba cani emimishi cuijea'yo. Jamajjeya Jesosa nijje, Emeshi Mese nei nijje jjapeequianijo, ohuaya Eyacuiñajji quea bei po mee cani ese nijje. Yahuajo ca ca quea mimishi poanijo, ese nijje quea quene nee poanaje. ² Jesosa nijje jjapeequi majje eseya Eyacuiñajji nijje mete'ama mimiani. Eseya jama poani ba'a: —Jesosa ecuanajo mano'yonajejo, ecua Eyacuiñajji mete'ama; oya ecua nijje quea bei nee po mee canaje Jesosaa. Cuanaya ecua quea bihui nee jjashahuabaquinaje quea ja'a nee jama ba'a: "Eyacuiñajjiya e'e jojo nei ecua ba'e tiiti mee caje'yo onijje eyajo" —jamaya eseya poani.

³ Jesosa nijje jjapeequianijo, pea cuaa eseya napa cani. Quea camaja poani. Jamatii eseya quea bihui nee poani, yeno'ama. Deija mimishiya napa cajje eseya Jesosaja epeeji quea ca'a nee poaje'yo. ⁴ Eseya quea bihui nee Jesosa nijje jjapeequi pajea'yo ajja jamatii onaa napa cajo, Eyacuiñajjiya eseya huohui cani jama ba'a: —E'e, jamaya miya quea pame nee poani.

Eyacuiñajjiya eseya quea pame ba canijo, eseya jama poani pea'ai ba'a: —E'e jojo nei Eyacuiñajjiya eseya onijje ba'e tiiti mee caje'yo eyajo.

⁵ E'e, esejaya eba Eyacuiñajjiya ojaya ehuhui jayojjaya acaje'yo. Ohuaya Edojjoshahua Pame huoojea canaje ese ba meeji jama ba'a: —E'e jojo nei Eyacuiñajjiya oja sohui jayojjaya acaje'yo; miquianaya onijje ba'e tiiti mee caje'yo. Miquianaya ojaya quea jea nee nee —jamaya eseya Edojjoshahua Pameya jjashahuabaqui mee cani.

⁶ E'e, Jesosa mano'yo jjimahuajo eseyaya Eyacuiñajji quene'ama epo meeji pojjeama ese nijje, ¿achajja shai quene'ama epo mee'yooji? Yahuajo Eyacuiñajji jjashahuabaquinaje jama ba'a: —Eyaya ma eshequiatajo, ma pojja Jesosa huoojeaje'yo shajjama' cuanajo mano'yohua. Ecuea eba epojja Jesosa manoj'e'yo —jamaya Eyacuiñajji poanaje.

Jamajjeya ma pojja tii Jesosa mano'yonaje eseya mimishi cuijea'yooji soseje. ⁷ ¡Bacue! Beshahua nei eseya mano'yo sa po ajja pea mano'yo jjima epojji. E'e pojja'a oya quea pame nee nee ba'yanijo, ojo beca cuana mano'yome. ⁸ Jamatii eseya Eyacuiñajjiya quea jea nee nee poanijo ohuaya jama acanaje ba'a: Ecua quea mimishi poanijo tii oya, Jesosa mano'yonaje eseya mimishi cuijea'yooji soseje. ⁹ E'e, Jesosa esejajo mano'yonaje eseya quea mimishi poanijo tii. Ojaya ena' cuayaquinaje eseya mimishi cuijea'yooji. Jamajjeya eseya mimishi cuijea'yo majje Eyacuiñajjiya eseya ba cani mimishi'ama. E'e jojo nei. Jjeya ca ca oya ese nijje quene'ama; cuaqui yasijje ehoojeajji pojjeama, de. ¹⁰ E'e, yahuajo ese nijje Eyacuiñajji quea quene nee poa. Ese shajjama' poanijo tii Jesosa eseya mimishi cuijea'yooji soseje mano'yajo, Eyacuiñajji ese nijje quea quene po-

pajeana. Jamajjeya Eyacuiñajji ese nijje quea bei poanijo, eseyaya baña jama ba'a: Jesosa shequi mee ca o'oyanajejo, e'e jojo nei Eyacuiñajjiya eseya ba'e tiitii mee caje'yo onijje pea'ai. ¹¹ E'e, Jesosaa, Emeshi Mese neiya esejaya mimishi cuijea ca'yonajejo, Eyacuiñajji quea bei nee ese nijje, epeeji nei po mee cani. Jamajjeya eseya quea bihui nee jama poani ba'a: —Eyacuiñajji, miya quea pame nee; ecuana quea jea nee nee poani.

Yahuajo eseya Adana jayojja ba'ya poa; jjeja ca ca eseya Jesosa jayojja ba'yani

¹² ¡Bacue! Yahuajo nei nei Adana ba'ya poa. Oya ojjaña ejeajji poa. Oya Adana ebionei shajjama' poa. Jamajjeya esejaya ejeajji Adana shajjama' poajo, Eyacuiñajjiya ojjaña ba cani shajjama' nei nei, Adana jayojjaya: “Miya shajjama' poanijo, manojeyo ojjaña” Eyacuiñajjiya Adana huohui ca poa. Jamajjeya Adana mano'yonaje. O jayojjaya ojjaña mano'yani. Ojjaña shajjama' poani cuana, de. ¹³ E'e, Adana ebionei shajjama' poa. Moisesiya Eyacuiñajjiya esohui tehue jjimahuajo, jama ojaña po poquia poa, quea mimishi. Yahuajo Moisesiya esohui tehue jjimahuajo, Eyacuiñajji etiiquiana nijje jama mimi jjima ba'a: —Ecue sohui jama ba'e ajja jo miquianaya shajjama' —jamaya Eyacuiñajji etiiquiana nijje mimi jjima yahuajo, maya tehue jjima poa Eyacuiñajjiya esohui.

¹⁴ E'e, Adana shajjama' po majje, Moisesiya esohui tehue jjimahuajo aje oe ojjaña mano poquipoqui'ya poa quea tai ba'yanijo. Onajaya Eyacuiñajjiya esohui shajja'ajja jjimajo Adana jayojja jama pojjeama. Adana ca ca Eyacuiñajjiya esohui shajja'ajja majje shajjamaa jjejojo acuijajja ijja ca poa, de. Eyacuiñajjiya Adana ebionei pana ca poa. Quijje ohuaya oja Bacua Jesosa huoojea canaje. ¹⁵ ¿Ae poanaje Adana? ¿A'a Adanaa jayojja jama acanaje Jesosaa? Chojja, quea pame nee nee eseya acanaje, Jesosaa. Shajjamaa jjejojo Adanaa ca pa jjaja ca oe ojjaña cuana shajjama' po mee ca poa. Jamajjeya ojjaña mano jeyojeyo mee ca'ya poa. Mano'yo majje cuaqui yasijje poqui ca'ya poa. Jjeja Jesosa Quitojo eseya ba'e tiitii mee caje'yo Eyacuiñajjiya. E'e, eseya Eyacuiñajjiya quea jea nee poanijo Jesosa Quito huoojea canaje ese que. Oya Jesosa ese jayojjaya yamijji poeyanaje eseya mimishijo mano'yohua mimishi cuijea'yojji.

¹⁶ E'e, Eyacuiñajjiya eseya quea jea acanijo Jesosa huoojea canaje mano'yohua eseya mimishi cuijea'yojji sosejje. Jamajjeya eseya quea mimishi po huicha'a huicha'a majje, jamatii Eyacuiñajjiya eseya huohui cani jama ba'a: —Eyaya miya baña emimishi cuijea'yo.

Adana ca ca shajjama' po cooa poajo, Eyacuiñajjiya oya huohui ca'ya poa jama ba'a: “Adana, miya ca mi ca oe shajjama'. Jamajjeya miya manojeyo; quea nee nee poaje'yo. Mique osecua cuana pea'ai mi jayojjaya mano'yomeya poaje; jama mano'yomeya popoquije'yo mique osecua cuana” poanaje. ¹⁷ E'e, oe dejja quea mimishi po cooa poajo, Eyacuiñajjiya ojjaña mano mee ca'yani; quea nee nee po mee ca poqui'yani. Jesosa

Quitohua ca ca eseya quea pame nee acanaje. Eyacuiñajjiya ojjaña quea jea nee nee poanijo oja Bacua Jesosa huoojea canaje ese jayojjaya yamijji. Jesosa ojjaña cuanajo mano'yonaje mimishi cuijea'yojji sosejje. Ohuaya eseya ba'e tiitii mee caje'yo onijje. Jesosa nijje ona huoojea'yojji po mee caje'yo, Eyacuiñajjiya.

¹⁸ E'e, Adana shajjama' poa. Oya shajjama' poajo, Eyacuiñajjiya ojjaña ba cani shajjama'. Ojjaña quea nee nee po mee caje'yo. Jesosa Quitohua ca ca quea pame acanaje esejo; ese mimishi cuijea'yojji mano'yonaje. Jamajjeya Jesosa nijje jjapee neineiquianijo, Eyacuiñajjiya esejaya mimishi cuijea majje mimishi'ama ba cani. Mimishi cuijea'yo majje eseya ba'e tiitii mee cani onijje eyajo. ¹⁹ Jama ba'a: Oe dejja, Adana shajjama' poa. Jamajjeya ojjaña o jayojja jama shajjama' poani. Pea dejjaa, Jesosaa ca ca oja Chijja, Eyacuiñajjiya esohui jayojja jama aca poa. Jamajjeya eseyaya, ojaya epeeji cuaa Jesosaa jayojjaya aña; Eyacuiñajjiya esohui shajja'ajjaña. Jamajjeya Eyacuiñajjiya eseya ba cani mimishi'ama.

²⁰ Adana shajjama' poajojo quijje nei nei Eyacuiñajjiya Moisesi tehue mee ca poa ojaya esohui. Ojaya esohui tehue mee ca'ya poa ojjaña ebajji oya cuana Eyacuiñajjiya esohui jayojja jama a'ajja tii. Jamatii esohui ba majje ojjaña quea mimishi tii tii poani. Eyacuiñajji ca ca quea pame po tiitiani ojjaña nijje. Quea mimishi tii poanijo aje oe jamatii ohuaya eseya quea jea nee nee acani tii. ²¹ Yahuajo esohui etehue'yo ba majje jamatii etiiquiana cuana mimishi pajea sa po'yo ajja poa. Jamajjeya oya cuana mano'yo majje cuaqui yasijje poqui'yonaje. Eyacuiñajjiya ca ca eseya shajjama' poani tii quea jea nee acanaje. Eseyaya Emeshi Mese nei Jesosa Quito huoojea canaje ese mimishi cuijea'yohua ese ba'e tiitii mee'yojji.

¡Mimishi pajea'yocue; Jesosa nijje jjapeequicue!

6 Eyacuiñajjiya eseya quea jea nee acani; jamatii quea mimishi poanijo beca cuana jamaya poani pojja'a ba'a: —¡Dee! Jamajjeya eya quea mimishi ca-poahua tii. Jamaya Eyacuiñajjiya eseya caba mee cahua eseya ohua quea jea nee acani jamatii —jamaya pojja'a beca cuana poani.

² ¡Chojja! ¡A'a oe jamaya pojji! Jiquio ecua ese ejja mano'yo majje shajoshajo'yo ajja jama jayojjaya eseya Jesosa nijje jjapeequi majje mimishi sa po maja'yo ajja. Cajaa seya aña. ³ E'e, eseya Jesosajo besa majje, ohuaya eseya ba cani ojaya epeeji mimishi po maja sa po'yo ajja. ¿A'a miquea maya ba jjima?

—E'e, eya Jesosa nijje jjapeequiani —eseyaya jamaya huohui majje, onaaya eseya Eyacuiñajjiyo besa mee cani. Jamajjeya jiquio ecua emano'yo cuana shajoshajo'yo ajja jayojja jama eseya mimishi po maja sa po'yo ajja Jesosa nijje jjapeequianijo. ¿A'a miquea maya ba jima? ⁴ Jesosa mano'yonaje. Mano'yo majje mei jjani ai yasijje huananobia ca'yonaje. Eyacuiñajji quea ca'a nee nee. Jesosa shequi mee ca'yonaje jama jayojjaya ohuaya eseya pea jjashahuabaquime po mee ca'yani Jesosa nijje jjapeequianijo. Jesosa nijje jjapeequiajo pea'ai

onaaya eseya enajo besa mee cani Eyacuiñajji. Jamajjeya Jesusaa eseya ba cani o jayojja e'e jojo nei, yahuaajo jama pojjeama. Pea jashahuabaquime poani, de; mimishi po maja sa po'yo ajja.

⁵ Jamajjeya eseya jama poani ba'a: —Jesusa Quito acui ecueata'apeejo mano'yonaje eseya mimishi cuijea'yojji. Jamajjeya eseya onijje japeequi majje mimishi pajea neinei sa poani. Eyacuiñajjiya Jesusa shequi mee ca o'yanaje; ba'e mee ca o'yanaje. O jayojja jashahuabaqui meeme po mee ca'yani. ⁶ Jamaya esejaya eba ba'a: Jesusa Quito acui ecueata'apeejo mano'yonaje eseya ojaya epeeji quea ca'a nee epo meeji, mimishi pajea neinei meesahua'yojji. Eseyaya eba'e yahuaajo, ejjashahuabaquiji yahuaajo jayojja jama pajea mee ca'yonaje, eyacua po mee canaje. Yahuaajo jama poanaje ba'a: Jiquio ecua sosema' chacochoani echacomeejiya yayiji chacochocho pajea mee jima acani jayojja jama yahuaajo eseya mimishi pajea'yo jima poanaje. ⁷ Jama ba'a: Ese ejjaa mano'yo majje mimishi amaja ajja. Oya jayojjaya eshahuaaja epeeji emano'yo jayojja jama Jesusaa eseya po mee cani ojaya epeeji nei epoji.

⁸ Jamajjeya onijje japeequi majje Jesusa Quito mano'yonaje jayojja jama ecua eshahuaaja epeeji poanijo emano'yo jayojja poanaje; Jesusa shequi'yonaje jayojjaya eseya o jayojja ba'yani, yahuaajo jama pojjeama. E'e jojo nei eseya onijje ba'e tiitije'yo eyajo; o jayojjaya pea'ai poaje'yo. ⁹ E'e, Jesusa emano'yojaa Eyacuiñajjiya oya shequi mee ca o'yanaje. Eshe nequi'yo, emano beca'yojji pojjeama. Pea cuua oya mano mee'yo jima acaje'yo. ¹⁰ Oya mano'yonaje; oe nei mano'yome poanaje esejaya mimishi cuijea'yojji. Oya Jesusa mano beca'yo ajja. Jjeya oya eshe'yo; Eyacuiñajjiya ejjashahuabaquiji jayojja jama atiitii cani. ¹¹ Jamajjeya ojjaña Jesusa epeeji cuana, jashahuabaquicue jama ba'a: —Eya mimishi pajea neinei'yo sa poani —pocue!

E'e, jiquio ecua emano'yo cuana shajshajo'yo ajja jayojja jama Jesusa epeeji cuana mimishi po maja sa po'yo ajja. Pea jashahuabaquime po'yani, de. Jjeya Jesusa nijje japee neineiquianijo eseyaya o jayojjaa Eyacuiñajjiya ejjashahuabaquiji jayojja jama atiitiaña.

¹² Jamajjeya eshahuaa miqianaya shajjama' po mee sa acanijo, ja'a shajjama' pojji! Chojja. ¡Ejjashahuabaquiji yahuaajo quea tai, quea mimishi jayojja jama a'a pojji! ¹³ Eshahuaa miqianaya quea mimishi o jayojja jama po mee sa acani. ¡A'a jashajja'ajjaquiji! Eyacuiñajjiya ca ca miya quea pame, o jayojja jama po mee sa acani. ¡Oya shajja'ajjacue! Ohuaya miya pea jashahuabaquime po mee ca'yani. Jamajjeya ¡ba'ecue oja ya ejjashahuabaquiji quea pame nee jayojja jama!

¹⁴ E'e, Eyacuiñajjiya huohui canaje jama ba'a: —¡Mimishi pajea neinei'yocue!

Jamatii ojaya esohui etehue'yo shajja'ajja majje mimishi pajea meeme'yo ajja. Eyacuiñajjiya ca ca oe eseya quea jea nee acani; mimishi pajea meesahua ca'yani. Jamajjeya jeshahuaa miya shajjama' po mee sa acanijo a'a jashajja'ajjaquiji! Jjeya oya, eshahua ese

huoojea'yojji pojjeama, de. Eyacuiñajji ca ca esejaya Emeshi Mese nei, ese huoojea'yojji poani.

Eyacuiñajjiya echacoji quea pame

¹⁵ Jamajjeya jjeya Eyacuiñajjiya eseya napa ajja esohui etehue'yo jayojja jama ajjimajo. Chojja, Eyacuiñajjiya eseya quea jea nee acanijo esejaya mimishi cuijea ca'yani. Huohui jima jama ba'a: —Esohui etehue'yo jayojja jama ba'yanijo, eyaya miqianajaya mimishi cuijea'je'yo —jamaya jjeya huohui jima Eyacuiñajjiya.

Jamajjeya ¿ae jashahuabaquiani eseya? ¿A'a quea mimishi capoahua? ¹⁶ Chojja de. ¡Bacue! Jiquio ecua echacomeeji nijje poquiao, ohua mee'ajja cajje miya chacochocho majje miya ojaya echacoji poani, oya mi huoojeaji poani jama jayojjaya eshahuaaja esohui jayojja jama añajo miya ojaya epeeji poani, oya mi huoojeaji poani. Miya jamaya po majje quea nee nee poaje'yo quijje cuaquijo. ¡Eyacuiñajji mi huoojeaji poanijo ojaya esohui shajja'ajjacue! Ohuaya miya quea bojea ba'e mee caje. Majoya miya ba'e tiitii mee caje'yo eyajo, Eyacuiñajjiya. ¹⁷ Jamajjeya eyaya Eyacuiñajji bihuiaña ohuaya miqianaya eshahuaajo nahue canijo. E'e, yahuaajo eshahua mi huoojeaji poanijo shajjama' poanaje. Jjeya ca ca ecua esohui shajja'ajja majje Eyacuiñajjiya esohui e'e nei jayojja jama añajo quea bihui nee. ¹⁸ Jamajjeya Eyacuiñajjiya miquea eshahua poqui mee ca'yonaje, mi huoojeaji pojjeama po mee ca'yonaje. Jjeya Eyacuiñajji mi huoojeaji poani. O jayojja ba'e mee ca'yani. Jamajjeya miyaya ojaya esohui jayojjaya jama añajo quea bihui nee. ¹⁹ Miquea eba neineiji eyaya quea ja'a esohui huohuaña jama ba'a: Yahuaajo eshahua mi huoojeaji poanaje, miyaya o jayojjaa ojjaña mimishi a sa anaje, quea ja'a jashahuabaqui sa po ajja poanaje. ¡Jjeya ca ca Eyacuiñajji mi huoojeaji nei nei a'yocue! ¡Oya ejjashahuabaquiyoyji jayojja jama atiitiecue quea pame nee eba'e'yojji!

²⁰ Yahuaajo aje oe eshahua mi huoojeaji poanijo, miqianaya quea pame po sa po'yo ajja nei nei poanaje. ²¹ Eshahua jayojja jama quea mimishi ba'enajejo ¿a'a quea bei po tiitii mee canaje? Cho. Jjeya ma ecua ese ba'enaje jamajo eseya quea bicho nee nee poani. Jamaya eba'e tiitii jjemmo Eyacuiñajjiya eseya cuaqui yasijje huoojea ca'yoquiaye. ²² E'e, yahuaajo eshahua mi huoojeaji poanaje. Eyacuiñajjiya miquea eshahua poqui mee ca'yonaje. Jjeya ca ca Eyacuiñajji mi huoojeaji poani. Oya shajja'ajjañajo, ohuaya miya quea bojea'yo po mee cani; ba'e tiitii mee caje'yo eyajo. ²³ Eyacuiñajjiya shajjama' cuana huoojea caje'yo cuaqui yasijje eshahua nijje quea mimishi poanaje soseje. Pea ca ca jama ba'a: Eseyaya jamatii quea pame ba'e meeme ajja. Emeshi Mese nei Jesusa Quito nijje japeequianijo, Eyacuiñajjiya eseya o jayojja jashahuaba meequi ca'yani; eseya ba'e tiitii mee caje'yo eyajo onijje. E'e de, eseyaya jamatii quea pame nee ba'e neinei ajja.

Esohui eba meesahuajji epona ahuejji

7 Ecuea epeeji cuana, Eyacuiñajji esohui etehue'yo miqianajaya eba. Jamajjeya jama baña ba'a: Esey eshe nequijo ca ca oe esohui etehue'yo jayojja jama caba'yahua tii, mano'yo majje pojjeama. ² Mi-quiana ba meesahuajji eyaya jama huohuiaña ba'a: Eyacuiñajji jama huohui canaje ba'a: —Ehuanase ojaya yahue nijje caba'yahua tii tii. ¡Yahue mano'yo jji-majo, pea nijje a'a jjahueaqui mee'yojji! ¡O mano'yaajo ca ca peajo cajjahueaqui'yahua! ³ Ojaya yahue mano'yo jjima eshe nequi tiijo, peajo jjahueaqui nisho'yanijo, oya ehuanase pea cojjoji poani. Ojaya yahue mano'yo majje ca ca oya e'ahuemano. Oya ahuea' jayojja peajo cajjahueaqui'yahua. Jjahueaqui o'oya majje pea cojjoji jayojja jama pojjeama —jamaya huohui canaje yahuajo nei Eyacuiñajjiya.

⁴ Jamajje ecuea epeeji cuana, miqianajaya eba nei-neijji eyaya jamaya huohuiaña. Jesosa nijje jjapeequianijo epona e'ahuemano jjahueaqui jayojja jama poani. E'e, yahuajo Jesosa ba jjimahuajo eseya quea quehua jjashahuabaquinaje jama ba'a: —Eyacuiñajji esohui etehue'yo jayojjaya jama atitiñaajo, ohuaya eseya ba'e tiitii mee caje'yo onijje eyajo —jamaya eseya po'ajjanaje.

Jjeya ca ca Jesosa esejaya mimishi cuijea'yojji sosejje mano'yonajejo yahuajo jama jjashahuabaqui ajja, de. Jjeya ca ca pea jjashahuabaquime poani. Jiquio ecua oja yahue mano'yo majje ehuanase peajo jjahueaqui'yani jayojja jama jjeya eseya Jesosa nijje jjapeequi'yani. Eyacuiñajjiya Jesosa emano'yojaa shequi mee ca o'oyanaje jayojja jama eseya pea jjashahuabaquime po mee ca'yani. Jamajjeya eseya jjashahuabaqui quea pame nee eba'ejji, Eyacuiñajji quea bihui nee epo meeji.

⁵ Yahuajo Jesusaja epeeji po jjimahuajo eseya ba'enaje esejaya ejjashahuabaquiji quea tai jayojjaya. Eyacuiñajji esohui etehue'yo ba majje shajjama' po sa nei-nei poanaje jama ba'a: “¡A'a pea siijji!” ba majjeya eseya pea sii sa nei-nei poanaje. Jamaya eseyaya Eyacuiñajji quea quene po meenaje. Jamajjeya Eyacuiñajji nijje eba'e'yojji tii tii pojjeama. ⁶ Yahuajo aje oe eseya mimishi pajea meeme ajja. Jiquio ecua Eyacuiñajji esohui shajja'ajja majje jamatii ameeme ajja. Jjeya ca ca Jesosa esejaya mimishi sosejje mano'yonajejo, eseya pea jjashahuabaquime poani. Eseyaya baña esohui etehue jayojja jama añajo pojjeama Eyacuiñajjiya eseya quea pame ba'e tiitii mee caje'yo. Jesosa nijje jjapeequianijo ca ca eseya pea jjashahuabaquime poani. Edojjoshahua Pameya eseya quea pame nee ba'e meesahua canijo, Eyacuiñajji quea bihui nee po mee sa aña.

Eyacuiñajji esohui ba nei-nei majje esejaya eba poa eseya shajjama' nei poani

⁷ Eyacuiñajji esohui etehue'yo ba majje ca ca esejaya eba poa eseya shajjama' poani. Jamatii beca cuana

jama poani pojja'a ba'a: —¿A'a esohui etehue'yo jayojja jama e'a'yojji pojjeama?

Chojja, quea pame nee. Etehue'yo ba jjima jojjemo esejaya Eyacuiñajji quea quene poani ba jjima pome. E'e, Eyacuiñajji esohui etehue'yo jama poani ba'a: “¡A'a oe onajaya aquiana jea bajji!” poani. Jamatii Eyacuiñajji esohui ba jjima jojjemo onajaya aquiana jea bañaajo Eyacuiñajji enijje quea quene poani ecuea ba jjima pome. ⁸ Ma ba majje ca ca eshahuaa eya onajaya aquiana jea ba nei-nei mee canaje quea huiso nee. Yahuajo esohui ba jjimajo ca ca ecuea ba jjima poanaje eya shajjama' poani onajaya aquiana jea ba majje. ⁹ Yahuajo esohui etehue'yo ba jjimajo eya shajjama' pojjeama poso jbaquinaje. Quijje Eyacuiñajji esohui etehue'yo ba majje ca ca eyaya banaje jama ba'a: —E'e, eya ca iña shajjama' nei nei poani, de. Eyacuiñajjiya eya quea nee nee po mee caje'yo, de —eya poanaje.

¹⁰ Jamajjeya Eyacuiñajji esohui jama eba'e tiitii jojjemo eseya Eyacuiñajji nijje ba'e tiitii mee'yome. Eyaya ojaya esohui jama ajjima tiitiijo ca ca eya Eyacuiñajjiya quea nee nee po mee caje'yo. ¹¹ Eyaya Eyacuiñajji esohui etehue'yo jayojja jama a'ajja'yonaje. Chojja, ameeme ajja, de, quea mimishi nee nee. Jamajjeya esohui jayojja jama atitii jjimajo aje oe Eyacuiñajji enijje quea quene nee nee poaje, eya quea nee nee po mee caje'yo tii tii. ¹² Jamatii Eyacuiñajji esohui etehue'yo quea pame nee e'e jojo nei, Eyacuiñajji ejjashahuabaquiji ese quea bihui ba'e meesahuajji. ¹³ Jamajjeya Eyacuiñajji esohui quea pame ba nei-nei'yo majje, ¿a'a Eyacuiñajjiya eya quea nee nee po mee caje'yo? Chojja, jamaya pojjeama. Eyacuiñajjiya ojaya esohui tehue mee ca poa ojjañaja ebajji shajjama' nei nei quea tai nee nee poani cuana jjabahuejjaquiji Eyacuiñajjiya quea nee nee po mee caje'yo. Jamajjeya esohui ba jjimajo eya shajjama' pojjeama poso jbaquinaje; ba majje ca ca jamatii eya mimishi po majajja sa nei-nei poanaje. Eyacuiñajji quea quene po meenaje enijje. Quea pame po sa poani, jamatii quea pame po ajja. Mimishi boti'ama; jamatii jamaya eyaya aña. ¹⁴ Eseyaya eba Eyacuiñajji esohui quea pame nee nee. Eya ca ca pame'ama, shajjama' pea'ai, de. Jamajjeya eya jamatii quea pame ba'e meeme ajja ojaya esohui jayojja. Jiquio ecua echacojji ojaya echacomeejji esohui jayojja chaco sa po ajja, jamatii jamaya chaco caje jama jayojjaya eya quea mimishi po sa po'yo ajja, jamatii quea mimishi poani. ¹⁵ Eyacuiñajji esohui jayojja jama a'ajja majje eya jjashahuabaqui jama ba'a: —¡Dee! ¿Apiojji shai eya quea pame nee po ajja? E'e de, eya quea pame po nishoani.

Eya quea mimishi po majje jjashahuabaqui jama ba'a: —¡Dee! ¿Apiojji shai eya quea mimishi poanaje? Jamaya eya po sa po'yo ajja —jamaya eya jjashahuabaqui.

¹⁶ E'e de, ecuea eba Eyacuiñajji esohui quea ja'a nee. Jamajjeya eya quea yeno poani ma esohui jayojja jama mi amajje. ¹⁷ Jjeya ca ca ecuea pea jjashahuabaquime quea ja'a poanijo ma ecua eya yahuajo ba'yani-

naje jama po sa po'yo ajja. Jamatii ecuea ejjashahua-baqui'yojji quea mimishi; e poaninaje yahuajo pajea-pajea'yo ajja. E'e de, ecuea ejjashahuabaquiiji quea mimishi yani, de. Cajaa.

¹⁸ Ecuea eba jama ba'a: Quea mimishi jjejojo eya jamatii quea ja'a nee jjashahuabaqui ajja tii tii. Eya quea ja'a nee po sa po'yo majje jamaya eyaya ameeeme ajja, de. Quea mimishi nee nee iña, de. ¹⁹ E'e de, eya quea pame nee po sa poani. Jamatii quea pame, quea ja'a po'ajjani. Mimishi po sa po'yo ajja, de. Jamatii quea mimishi poani. ²⁰ Mimishi amajje eya quea yeno poani. Mimishi a sa po'yo ajja. Jamajjeya mimishi a'yo majje ecuea eba ecuea eba'ejji ma ecua eya yahuajo ba'yaninaje jama eyaya atiitiaña.

²¹ E'e, eya quea pame nee Jesosa jayojja ba'e sa poani nei nei. Jamatii eya ca'a'amajo quea pame atiitii ajja. Ecuea ejjashahuabaquiiji quea mimishi yani, ma e yahuajo ba'yaninaje quea tai poaninaje. Maya eya pajepajea'yo ajja. ²² E'e de, Eyacuiñajji esohui ecuea quea jea nee nee. Maya eyaya a sa aña. ²³ Jamatii ecuea ejjashahuabaquiiji jjeja jiquio jama ba'a:

—Quea pame nee a sa aña Eyacuiñajji esohui jayojja-ya —eya poani. Jamatii jamaya eyaya ameeeme ajja. Ecuea ejjashahuabaquiiji yahuajo jayojja jama aña, quea mimishi. E'e de, eya quea mimishi nee nee; mimishi cuana pajea'yo ajja. Eya jama poani ba'a: Onajaya esohui quea mimishi jayojja jama eyaya aña tii tii.

²⁴ E'e, eya quea yeno poani mimishi amajje. ¿Aya acuae eya mimishi pajea neinei meesahua caje'yo so'o?

²⁵ Eseyaya Emeshi Mese nei Jesosa Quito quea ca'a nee nee poani. Jamajjeya ohuaya eya mimishi pajea meesahua caje'yo, e'e jojo nei. Jamajjeya eyaya Eyacuiñajji bihuiaña jama ba'a: —Ecue Chii, miyaya eya jaahuanaña quea pame nee nee.

E'e, Eyacuiñajji esohui jayojja jama a sa aña. Jamatii eyaya jamaya pojjeama atiitiaña. Jesosa Quito ca ca quea ca'a nee nee poani. Ohuaya eya mimishi pajea meesahua ca'yani. Jamajjeya Eyacuiñajji esohui jayojja jama eyaya aña.

Edojjoshahua Pameya eseya ba'e mee cani Jesosa jayojja, yahuajo jama pojjeama

8 Jjeja Jesosa Quito nije jjapeequianijo, Eyacuiñajji-ya eseya huohui cani jama ba'a: —Eyaya jja miquianaya emimishi cuijea'yo baña. Jesosa Quito mique mimishi cuijea'yojji poanaje. Quea boejea poanijo, miquianaya ecuea etecueajji pojjeama —Eyacuiñajji poani.

² Yahuajo Jesosa Quitoja epeeji pojjeama poanaje. Yahuajo eseya quea mimishi po tiitianijo cuacui yasijje edobiquiiji nisho poanaje. Jjeja ca ca Jesosa Quitoja epeeji poanijo, Edojjoshahua Pameya eseya ba'e mee cani o jayojja, mimishi'ama. ³ E'e, eseya quea mimishi poaniya jjejojo Eyacuiñajji esohui jayojja jama ameeeme ajja. Jamajjeya Eyacuiñajji eseya quea boejea pojjeama ba cani. Chojja. Eseyaya quea mimishi nee nee poanaje. Jamajjeya Eyacuiñajji Jesosa, oja Bacua Eja oe nei huoojea canaje jiquio meshi yasijje. Oya, Jesosa

yamijji dejja jayojja poanaje. E'e, Jesosa eseya jayojjaya yamijji poa, jamatii oya mimishi'ama tii. E'e, Jesosa mano'yanaje eseyaya mimishi cuijea'yojji, eseyaya mimishi sosequia'yojji pea'ai. Jesosaa eseyaya mimishi pajea meesahua ca'yanijo, Eyacuiñajji eseya quea bei poani. ⁴ Jamaya acanaje Eyacuiñajji eseya ojaya esohui etehue'yo quea ja'a nee jayojja jama ameeeya, ojaya ejjashahuabaquiiji quea ja'a nee jayojja jama epo meeji pea'ai. Jjeja Edojjoshahua Pameya eseya ba'e mee cani Eyacuiñajji esohui jayojjaya. Jjeja eseya Jesosa jayojja ba'yani, pea jjashahuabaquime poani, yahuajo jayojja jama pojjeama. Yahuajo quea mimishi poanaje, jjeja ca chojja. ⁵ Beca cuana quea mimishi ba'e sa poani, yahuajo ba'enaje jama. Ojaya ejjashahuabaquiiji quea mimishi jama atiitii cani. Mimishi pajea sa po'yo ajja tii. Pea cuacui ca ca Edojjoshahua Pame shajja'ajja cani. Ojaya ejjashahuabaquiiji quea pame jayojja jama jjashahuabaquime poani pea'ai. E'e, Edojjoshahua Pameya Jesosaja epeeji cuana jjashahuabaqui meesahua cani o jayojjaya. ⁶ Ojjaña quea mimishi ba'yanija ejjashahuabaquiiji quea mimishi jama atiitii cani. Mimishi cuana pajea sa po'yo ajja nei nei. Jamajjeya cuacui yasijje poquije'yo. Quea nee nee poaje'yo. Edojjoshahua Pameya eseya Eyacuiñajji ejjashahuabaquiiji jayojja jama po meesahua cani. Jamajjeya eseya ba'e tiitii mee caje'yo eyajo Jesosa nije quea bei nee nee. ⁷ Ojjaña quea mimishi, quea mimijjequieja jjashahuabaquiiani Eyacuiñajji epeeji pojjeama. Shajjama' cuana, de. Oya cuana Eyacuiñajji esohui jayojja jama a'ajja tii. Mimishi pajea'yo ajja tii tii. ⁸ E'e, quea mimishi, quea mimijjequieja poanijo, Eyacuiñajji onijje quea bei pojjeama poani.

⁹ Jesosa Quitoja epeeji Shoma cuiñajji ba'e, miquianaya yahuajo quea mimishi poa. Jjeja ca chojja. Edojjoshahua Pameya miquianaya ba'e meesahua cani quea pame nee nee, yahuajo jama pojjeama. E'e, Edojjoshahua Pame Jesosaja epeeji cuana huasijje edobiquinequi. O miquiana que dobiqui jjeja jjeemo miquianaya Jesosaja epeeji pojjeama pome, miquianajaya mimishi cuijea'yo jjeja pome. ¹⁰ E'e jojo nei Jesosa Quito miquiana nije nequi tiitianiani. Ohuaya miquianajaya edojjoshahua ba'e tiitii mee caje'yo miquea mimishi cuijea'yojojo. E'e, miquianaya mano'yo majje eyami ihuije'yo quea mimishi poa jjejojo. ¹¹ Jamatii Eyacuiñajji quea ca'a nee nee poani; ohuaya Jesosa emano'yojaa shequi mee ca o'oyanaje. Jamajjeya Jesosaja epeeji poanijo, ohuaya miquianaya ba'e mee caje o'oya eyami eyacua nei. Emano beca'yojji pojjeama. Jama-ya poaje Edojjoshahua Pame miquiana huasijje dobiqui majje.

¹² Jamajjeya ecuea epeeji cuana, miquianaya Jesosaja epeeji poanijo, pea jjashahuabaquime poanijo Eyacuiñajji esohui jayojja jama acue! Yahuajo jayojja jama a'a po o'oyajji! ¹³ E'e, quea mimishi po tiitianijo, Eyacuiñajji eseya quea nee nee po mee caje'yo. Edojjoshahua Pameya ca ca ojjaña eseya mimishi pajea meesahua caje'yo. Jamajjeya mimishi pajea'yo epo Eyacuiñajji eseya ba'e tiitii mee caje'yo onijje eyajo.

¹⁴ Ojjaña joya Edojjoshahua Pame jayojja jama jjas-hahuabaquime poani Eyacuiñajjiya bacua cuana poani.
¹⁵ Yahuajo, Jesosaja epeeji po jjimahuajo eseya quea mete ba'enaje. Eshahua jayojja jama jjas-hahuabaquime eseya poanaje. Jjeya ca ca Edojjoshahua Pameya eseya Eyacuiñajjiya bacua po mee cani. Ohuaya eseya mimi meesahua cani Eyacuiñajji jama ba'a: —Eyacuiñajji, miya ecue Chii e'e jojo nei.

¹⁶ E'e, jjeya Eyacuiñajjiya ba cani eseya oja bacua poani. Edojjoshahua Pameya eseya ba mee cani jama ba'a: —Miquianaya Eyacuiñajjiya bacua cuana poani.

¹⁷ Jamajjeya Eyacuiñajjiya bacua cuana poanijojo ojjaña ojaya aquiana esejaya poaje; eseya ohuaya quia caje'yo. E'e, ojaya esohui yahuajo jayojja jama acaje'yo ese niije jama ba'a: Ojjaña aquiana Eyacuiñajjiya quia ca'yonaje Jesosa Quito que. Maya aquiana esejaya poaje'yo pea'ai Jesosa Quito niije jjapeequianijo. Oniije jjapeequianijo, pea cuaa eseya napa caje, quea nee nee po mee caje'yo. Jamatii. Ecuana quea nee poani Jesosa jayojja. Jamajjeya Eyacuiñajjiya eseya ba'e tiitii mee caje'yo Jesosa niije quea ja'a nee eyajo. Oniije ona huoojeajji po mee caje'yo.

Quiije eseya quea pame nee anije'yo eyajo Jesosa niije

¹⁸ Jjeya eseya jiquiojo tii quea yeno poani, quea nee poani Jesosa niije jjapeequianijo. Jamatii ja'a quea yeno pojji! Quea pame nee nee eseya ba'e tiitii'yo Jesosa niije eyajo.

¹⁹ Adana, esejaya ejeajji quea mimishi poa. Adana quea mimishi poanijo, Eyacuiñajjiya ojjaña ojaya epa-na'yo cajaa acanaje beshahua nei. Eseya Eyacuiñajjiya bacua cuana quea ja'a nee, quea ca'a nee Jesosa niije poanijo, ojjaña aquiana cajaa ya'yoyji pojjeama po mee caje'yo Eyacuiñajjiya. ²⁰ E'e, yahuajo nei Eyacuiñajjiya ojjaña quea pame nee pana ca'ya poa. Adana quea mimishi poajo ca ca Eyacuiñajjiya ojjaña cajaa aca poa. Quiije ojjaña aquiana cajaa ya'yoyji pojjeama poaje'yo. Ma Eyacuiñajjiya ebionei pana ca poa jayojja ishoa ca ani, ojjaña. ²¹ E'e, jjeya ojjaña aquiana mano'yani, ihui'yani pea'ai. Quiije, Jesosa poe o'oyajo ca ca ojjaña aquiana cuana quea pame nee nee poaje o'oya. Adana quea mimishi po jjimahuajo jama jayojjaya poaje o'oya. Eyacuiñajjiya bacua cuana, ma Jesosa niije jjapeequiani quea pame nee nee poaje'yo Jesosa poe o'oyajo. Ma shejo ojjaña aquiana ojjaña Eyacuiñajjiya pana'yo quea pame nee nee poaje o'oya. ²² Adana quea mimishi poa joya ojjaña aquiana quea nee, quea tai, quea camaja nee poa. Jjeya nei pea'ai jamaya poani, jiquio jama ba'a: Jesosa poe o'oya jjimahuajo ojjaña Eyacuiñajjiya pana quea yeno, quea nee nee poani, jiquio ecua epona bacua cuayani jama jayojja quea nee nee poani bacua cuaya jjimahuajo. ²³ Edojjoshahua Pame dobiqui'yonaje ese que, Jesosaja epeeji cuana huasijje. Jamatii eseya pea'ai quea nee, quea mano, quea shoe pea'ai poani. Edojjoshahua Pameya eseya ba meesahua cani jama ba'a: Jesosaa poe o'oya majje eseya quea pame nee po mee caje'yo eyacua. Eyacua po'yo majje mano'yo ajja, nee'ama ba'e tiitii'yo eyajo

pea'ai. Eyacuiñajjiya esohui ma ecua ohua yahuajo huohui canaje jayojja jama ohuaya eseya, ojaya bacua cuana acaje'yo Jesosa poe o'oyajo. Jamajjeya eseyaya ishoaña Jesosaja epoe o'oyajji. Eba'eji eyacua quea pame nee nee esejaya poaje, de. ²⁴ Jama poaje ba'a: Eyacuiñajjiya eseya mimishi cuijea'yo majje ba'e tiitii mee cani. Eseyaya eyami eyacua amee caje'yo pea'ai, Jesosa poe o'oyajo. Jamajjeya eseyaya ishoaña ojaya epoe o'oyajji. Jjashahuabaquiani quijje eyacua epojji. ²⁵ Jamajjeya ishoaña tii tii Jesosa ache shono poeje o'oya ebajji. Eyami eyacua yajji eseyaya ishoaña quea bihui nee nee.

²⁶ Cuanaya eseya ca ca ca'a'ama poanijo, Edojjoshahua Pameya quea ja'a nee ba'e meesahua cani. Eba'eji quea camajajo Eyacuiñajji niije emimijji esejaya ba jjima. ¿Yajja mimime epojji? Jamajjeya Edojjoshahua Pame esejo mimi neineiyan Eyacuiñajji niije; eseya mimi meesahua cani Eyacuiñajji niije pea'ai. ²⁷ E'e, ojjaña esejaya ejjashahuabaqui'yoyji mimi meeme ajja quea ja'a nee Eyacuiñajji niije. Jamatii Edojjoshahua Pameya eseya jjas-hahuabaqui meesahua canijo, ojjaña esejaya ejjashahuabaqui Eyacuiñajjiya eba nei nei poani. E'e, Edojjoshahua Pame jama poani ba'a: —Eyacuiñajji, Jesosaja epeeji cuana huohui'ajja cani ma oya cuana sa poanijo. Jamajjeya jamaya acue! ¡Miquea ejjashahuabaqui'yo quea pame nee jayojja jama acue Jesosaja epeeji cuana! —jamaya esejo mimiani Eyacuiñajji niije Edojjoshahua Pame.

Eyacuiñajjiya eseya Jesosa jayojja jama ba'e meesahua cani

²⁸ E'e, jjeya quea camaja Jesosa niije ejjapeequijji. Jamatii Eyacuiñajjiya eseya babaca canaje ojaya epeeji epojji. Jamajjeya ohuaya eseya jaahuana cani tii tii. Jamaya acani esejaya oya quea jea nee poanijo. ²⁹ E'e, yahuajo nei ese pana jjimahuajo Eyacuiñajji esejo jjas-hahuabaquinaje jama ba'a: —Ecua eba a'ya cuae ecua epeeji poaje quijje nei nei. Eyaya oya cuana ecua Ebacua Ejja Jesosa jayojja jama ba'e meesahuaje quea pame nee —jamaya poanaje Eyacuiñajji.

Jamajjeya eseya Jesosa jayojja jama poanijo, oya esejaya Edoe Mese poaje, eseya Noo. ³⁰ E'e, yahuajo nei ese cuaya jjimahuajo Eyacuiñajjiya babaca ca poa ojaya epeeji epojji. Babaca majje eseya mimishi cuijea ca'yonaje. Mimishi cuijea'yo majje eseya ba cani mimishi'ama. Ba'e tiitii mee cani quea ja'a nee, quea ca'a nee Jesosa niije eyajo, Eyacuiñajjiya.

Quea pame nee nee Eyacuiñajjiya eseya acani

³¹ E'e, eseya Jesosa niije ba'e tiitii'yo quea ja'a nee o jayojjaya. Quea pame nee nee poaje'yo esejaya eba'ejji. Eyacuiñajjiya eseya jaahuana tiitii cani. Oya oe nei quea ca'a nee nee poani tii. Jamajjeya eseya onaa napa canijo, jamatii Jesosaja eseya epajea'yoyji pojjeama.

³² Eyacuiñajjiya eseya quea jea nee nee acanijo ohuaya huoojea canaje ojaya Ebacua Ejja Jesosa esejo mano'yohua ese mimishi cuijea'yoyji. Jamajjeya eseyaya jama

baña ba'a: Eyacuiñajjiya eseya quea jea nee nee atiitii caje'yo; eseya jaahuana tiitii caje'yo pea'ai. Ohuaya eseya jjapeequi meesahua caje'yo quea ja'a nee Jesosa nijje. ³³ Eyacuiñajjiya eseya babaca canaje ojaya epeeji epojji. Jamajjeya pea cuana esejo emimijajijji pojjeama Eyacuiñajji nijje jama ba'a: —Miquea epeeji quea tai. ¡Cajaa acue!

Chojja. Jamaya emimijajijji pojjeama esejo. Eyacuiñajjiya eseya emimishi cuijea'yo ba cani. ³⁴ Jesosa Quito mano'yonaje eseja mimishi cuijea'yojji. Emano'yojaa Eyacuiñajjiya oya shequi mee ca o'yanaje, nequi mee ca'yonaje o pejjejo eyajo ojjaña huoojeajji. Jomajo oya Jesosa Quito esejo mimiani jama ba'a: —Ecuea epeeji cuana quea bojea poani, emimishi cuijea'yo —Jesosa poani.

Jamajjeya pea ese nijje emimijajijji pojjeama jama ba'a: —Miquianaya shajjama' nei nei poanijo quea nee nee poaje —jama mimijajimeya epojji pojjeama ese nijje, Jesosaja epeeji cuana nijje.

³⁵ Eseyá Jesosa Quitoja quea jea nee nee poani e'e jojo nei. Jamajjeya pea cuaa eseya napa caje Jesosa nijje jjapeequianijo; jiquio jama poaje ba'a: Eba'ejji quea camaja poaje. Quea nee, quea mete poaje. Eshahuaja epeeji cuaa quea mimishiya eseya napa caje Jesosaja esohui huohuijji poanijojo. Quea shoe nee poaje pojja'a. Quima', aema' poaje pojja'a. Pea cuaa esejaya aquiana sii caje ojjaña pojja'a. Jesosa nijje chacochoanijo, pea cuaa eseya quecua caje'yo pojja'a. Jamatii esejaya eba e'e jojo nei Jesosa Quitoja eseya quea jea nee nee, epajea'yojji pojjeama. Ohuaya eseya jaahuana cani. ³⁶ Beca cuana yahuajo nei quea mase poa. Jamajjeya ohuaya Jesosaja epeeji cuana quecua ca'ya poa. Jjeya beca cuaa quea mase poaniya eseya quecua sa acani Jesosaja epeeji poanijojo. Yahuajo nei nei Eyacuiñajjiya epeejiya esohui tehue ca poa. Eyacuiñajjiya esohui etehue'yo jama poani ba'a:

“Eyacuiñajji, ecuana minijje jjapeequianijo pea cuana jjashahuaba majamajaquiani jama ba'a: —Cacuijaja'yahua —poani. Jiquio ecua ñajajja iña majje quecua cani jayojja jama onaaya ecuana acani”.

Jamaya yahuajo nei nei Eyacuiñajjiya epeejiya tehue ca poa.

³⁷ Dejja mimishi cuana quea huiso nequijo quea camaja nee Jesosa nijje ejjapeequijji. Jamatii pea cuaa eseya ejjapeequi pajea mee'yojji pojjeama Jesosa nijje. Chojja. Eseyá Jesosaja quea jea nee poanijo eseya ojaya epeeji poani. Ohuaya eseya jaahuana cani. ³⁸ Cuanaya esejaya eba e'e jojo nei Jesosa Quitoja, Emeshi Mese neija epeeji poanijo, Eyacuiñajjiya quea jea nee nee poani eseya. E'e, jiquiojo ba'e, mano'yo majje pea'ai eseya Eyacuiñajjiya quea jea nee. Epajea'yojji pojjeama tii tii. Esohuidojojji cuaa, eshahua cuaa pea'ai Eyacuiñajji ese pajea mee'yojji pojjeama. Ojjaña jjeya nei aniya, ojjaña quiije nei poajeya pea'ai Eyacuiñajji ese pajea mee'yojji pojjeama tii. Ojjaña quea taiya quea mimishiya pea'ai Eyacuiñajji ese pajea mee'yojji pojjeama tii. Eseyá ojaya quea jea nee nee poaje'yo tii tii. ³⁹ Jesosa Quitoja epeeji poanijo, ojjaña

quea ca'a eyajo nequiya, ojjaña quea ca'a meshijo nequiya, ojjaña Eyacuiñajjiya panaa pea'ai Eyacuiñajji eseya epajea mee'yojji pojjeama. Eseyá ojaya quea jea tii tii poaje'yo.

Yahuajo nei Eyacuiñajjiya Isaeni cuana babaca ca poa ojaya epeeji nei epojji

⁹ Eyaya, Pabohua miquiana que, Jodio cuana huasijje tehueña, ma Shoma cuiñajjiyo ba'e yasijje. Eya Jesosa Quitoja epeeji poanijo ecuea esohui e'e nei poani. E'e, Edojjoshahua Pameya eya jjashahuabaqui meesahua cani quea ja'a nee. ² Eya Jodio dejja pea'ai. Jamajjeya eya quea yeno po tiitiani Jodio cuanajo, Jesosa nijje jjapeequi sa po ajjajo. ³ Jodio cuana Jesosaja epeeji epojji eyaya sa neineiaña. Jjashahuabaquiani Jodio cuanajo, ecue huapa pojjeama cuanajo jama ba'a: —Eyacuiñajjiya eya cajaa ca'a cahua Jodio cuana cuacui yasijje poqui'yo jjima epojji. Jamaya Eyacuiñajjiya ya'yo jojjemo eya quea bihui nee pome —eya poani.

⁴ Yahuajo Eyacuiñajjiya Jodio cuana babaca ca poa ojaya epeeji cuana epojji. Oja bacua cuana po mee ca'ya poa. Eyacuiñajji Jodio cuana nijje nequinajejo, onajaya eba poa Eyacuiñajji ojjaña huoojea'yojji quea ca'a nee poani tii tii. Jodio cuana nijje mimi majamajana jama ba'a: “Enijje jjapeequianijo miquianajaya ebacua cuana quea huiso nee poaje. Jiquio meshi eyaya quiaje miquianajaya enequijji, miquianajaya osecua cuana nequijji” Eyacuiñajji poanaje. Quiije Eyacuiñajjiya Moisesi tehue mee ca poa ojaya esohui Jodio cuana quea ja'a nee ba'e meesahuajji. Etiiquiana nijje miminaje jama ba'a: “Miquianaya e'e jojo nei e bihuajji poajo, eya miquiana nijje mimije” Eyacuiñajji poanaje. Cuanaya Eyacuiñajjiya huohui canaje jama ba'a: “Mique osecua nei quiije poeje; ohuaya miquianaya ba'e tiitii mee caje'yo onijje” Eyacuiñajjiya jamaya Jodio etiiquiana aca poa.

⁵ E'e, Jodio cuanaja etiiquiana ma bajjani poa ba'a: Amajama, Amajamaja bacua ejja Isaaca, Isaacaja bacua ejja Jacobo, ma quiije Isaeni bajjani aca poa, Isaenija bacua ejja cuana 12 huisome poa, Jodio cuanaja etiiquiana poa. Jesosa Quito cuaya poa dejja jayojja, yamijji, Jodio ponaja mejo poa. Etiiquianaja osecua poa Jesosa, esejaya etiiquianaja osecua. Jjeya oya ojjaña huoojeajji poani. Jamajjeya jaya ejjabihuiaqui tii tii!

⁶ Jodio cuana oe pojji cuana Jesosaja epeeji poanaje. Jamajjeya oe pojji cuanaja mimishi ecuijea'yo poanaje, Jodio cuanaja. Jamatii esejaya eba Eyacuiñajjiya ojaya ehuhui'yo ma etiiquiana cuana nijje ohua huohui ca poa jayojjaya acani Jesosaja epeeji cuana nijje. Jesosaja epeeji cuana ca ca oe Isaeni dejja e'e jojo nei poani, Eyacuiñajjiya babaca. ⁷ Pea cuana ca ca, mimishi cuana ca ca Eyacuiñajjiya Isaenija osecua nisho ba cani. Amajamaja osecua cuana Eyacuiñajjiya babaca'yo beca cuana poanaje. Yahuajo nei nei Eyacuiñajji Amajama nijje mimia poa jama ba'a: “Amajama, Sanaja mejo miquea ebacua Isaaca bajjani poaje. Ojaya osecua cuana quea huiso nee nee poaje. Oya cuana ca ca mique osecua cuana e'e jojo nei poaje”. Jamaya Eyacuiñajjiya aca

poa. ⁸ Ma esohui ba majje esejaya eba poa ojjaña Amajamaja osecua cuana Eyacuiñajjiya babaca jeyo jjima poa ojaya epeeji epojji. Amajamaja pea ebacua cuana cuaya poa. Jamatii Eyacuiñajji onajaya osecua cuanajo mimi jjima jama ba'a: "Miquianajaya osecua cuana ecuea ehabaca ecuea epeeji epojji" jamaya ajjima onaya. Chojja. Oe ebacuajo huohui ca poa Eyacuiñajjiya. Amajamaja ebacua Isaaca bajjanijo ca ca oe jamaya huohui ca poa. Isaaca cuaya jjimahuajo jamaya huohui ca poa Eyacuiñajjiya. ⁹ Jama aca poa ba'a: "Amajama, miquea ehuanase etii, bacuama". Jamatii quijje oya o'ejji poaje. Ecuea eba ache shono miquea ebacua cuayaje, dejja shoi. Apoa poajo eyaya miquea ebacua cuaya meeje". Jamaya Eyacuiñajjiya aca poa.

¹⁰ Eyaya, Pabohua miquianaya pea esohui huohuije Isaacaja bacua cuanajo. Jamajjeya miquianaya ba meeje ojjaña Amajamaja osecua cuana Eyacuiñajjiya baba-cajeyo jjima ojaya epeeji nei epojji. Oe nei babaca ca poa; etiiquiana Isaaca ojaya ebabaca poa. Isaacaja ehuanase Shemeca bajjani poa, oja mejo ebacua becajaa poa, dejja pea'ai. ¹¹ E'e, Shemecaja ebacua becajaa cuaya poa. Ma ebacua cuana cuaya jjimahuajo, mimishi ajjimahuajo pea'ai, Eyacuiñajjiya huohui ca poa oe ebacua ojaya ebabaca'yo ojaya epeeji nei epojji, pea cho. Jamajjeya ojjaña ba mee ca poa ohuaya babaca cani coya ohua quea jea ba caje. ¹² Ba majje pojjeama Eyacuiñajjiya ojaya epeeji epojji babaca cani. Joya ohuaya sa caniya babaca cani. Jamajjeya huohui ca poa enaese Shemeca bajjani ojaya ebacua becajaa jama ba'a: "Mique bacuaa Esao bajjaninya cashajja'ajja cahua oja chahuaja esohui, Jacoboja" Eyacuiñajjiya aca poa Shemeca. ¹³ Eyacuiñajjiya esohui huohuiji yahuajo ojaya esohui tehue mee ca'ya poa jama ba'a: "Ecuea Jacobo quea jea nee nee. Esao ca ca cajaa anaje" Eyacuiñajjiya aca poa.

¹⁴ —¿Apiojji shai Eyacuiñajjiya ebionei cuaya cajaa aca'yonaje, ebacua quijje cuaya babaca ca poa? ¿Apiojji shai? Jamaya eseyaya ajjima aña. Jamaya quea pame pojjeama —beca cuana poani.

Chojja. Eyacuiñajjiya quea pame nee nee tii acani.

¹⁵ Ohuaya Moisesi huohui ca poa jama ba'a: "Eya beca cuana nijje quea bei poani. Beca cuana eyaya jaahuanaña. Cua eya quea jea aña eyaya babacaña" Eyacuiñajjiya aca poa. ¹⁶ Eseyaya eba'ejji pojjeamajo, esejaya ejjashahuabaquijji pojjeamajo pea'ai ese nijje quea bei poani Eyacuiñajji. Chojja, ojaya quea jea nee nee poanijo ohuaya eseya jaahuana cani, ese nijje quea bei poani pea'ai. ¹⁷ Cuanaya yahuajo nei Ejito emeshi mese Panao bajjanijo Eyacuiñajjiya esohui etehue'yo jama poa ba'a:

"Panao, eyaya miya nequi meeaña Ejito emeshi mese epojji. Eyaya ma dejja cuanaja ba jjima aña mi quea mete po meeji ejo. Jamaya ojjaña cuana ojjaña meshijo ba'e ba meeje eya e'e nei quea ca'a nee nee poani tii".

Jamaya Panao Eyacuiñajjiya aca poa. ¹⁸ E'e, Eyacuiñajji beca cuana nijje quea bei poani. Ojaya mimishi cuana cuijea cani. Pea cuana nijje ca ca chojja, quea bei poj-

jeama po tiitiani shajjamajojo. Mimishi pajea mee'yo jjima tii tii acani Eyacuiñajjiya.

¹⁹ Jamajjeya beca cuaa huohui'ajja cani jama ba'a: —Eyacuiñajjiya ecua mimishi pajea meesahua ajja. Jamajjeya ¿apiojji ohuaya tecuea cani ecua quea mimishi poanijo? Ojaya ejjashahuabaquijji jayojja jama acani ohuaya, de —beca cuana poani.

²⁰ Eyaya miquianaya saja'aña jama ba'a: ¡A'a Eyacuiñajji niñebajji! Miquianajaya Eyacuiñajji emimicuijjea-nobiajjea pojeama. Jama ba'a: Meshimisi iñacajjiya meshimisi pana majje iñaca cani shajjajji acani. ¿A'a meshimisiya tecuea caje meshimisi iñacajji jama ba'a: —¿Apiojji acuaeya miyaya eya jamaya anaje so'o? —a'a jamaya meshimisiya acani?

Cho, jamaya po ajja meshimisi. ²¹ Meshimisi iñacajjiya meshi iña majje ojaya ejjashahuabaquijji jayojja jama acani. E'e pojja'a meshimisi quea bame nee nee asa acani, yiye bame nee nee a sa acani pojja'a. Ojaya ejjashahuabaquijji jayojja jama pana'yome acani. ²² Jamaya Eyacuiñajjiya acani pea'ai, ojaya ejjashahuabaquijji jayojja jama acani. Beca cuana quea mimishi po tiitiani, Eyacuiñajjiya oya cuana quea nee nee po mee sa acani. Jamajjeya ojjaña ba mee caje Eyacuiñajji quea ca'a nee nee poani. Jamatii oya jjea nei quea tecue nee pocuaji ajja shajjama' nijje. Chojja, quijje nei quea nee nee po mee caje'yo. Ishoa cani. E'e pojja'a shajjama' cuana Jesusaja epeeji poaje ba'ajja'. Jamajjeya Eyacuiñajjiya oya cuana quea nee nee epo meeji pojeama. ²³ Ese beca cuana nijje ca ca Eyacuiñajji quea bei poani. Jamaya acani eseya ojaya quea jea nee nee poanijo. E'e, Eyacuiñajji quea ca'a nee nee poani; eseya jjapeequi meesahua cani Jesosa nijje. Jamajjeya ohuaya eseya quea ja'a, quea pame nee nee ba'e mee sa acani eyajo Jesosa nijje. ²⁴ E'e, Eyacuiñajjiya eseya beca cuana, Jodio cuana, Jodio pojeama cuana pea'ai babaca canaje ojaya epeeji epojji. Ojaya ejjashahuabaquijji jayojja jama acani, Eyacuiñajjiya. ²⁵ Jamajjeya yahuajo nei ojaya esohui huohuiji Osea bajjani tehue mee ca poa jama ba'a:

"Yahuajo nei Jodio pojeama ecuea ebabaca pojeama ecuea epeeji epojji. Jjea ca ca oya cuana ecuea ebabaca ecuea epeeji epojji. Yahuajo oya cuana ecuea quea jea nee pojeama. Jjea ca ca oya cuana ecuea quea jea nee nee poani. ²⁶ Jodio pojeama quea mimishi poanajejo, pea cuaa huohui ca poa jama ba'a: —Miquianaya Eyacuiñajjiya epeeji pojeama —poanaje. Jjea ca ca onaaya huohui caje jama ba'a: —Miquianaya Eyacuiñajjiya ebacua cuana poanaje".

Jamaya yahuajo Eyacuiñajjiya tehue mee ca poa.

²⁷ Cuanaya yahuajo nei Eyacuiñajjiya esohui huohuiji Isaiaa esohui tehue ca poa Jodio cuanajo jama ba'a:

"Etiiquiana Isaeni bajjanija osecua cuana quea huiso nee nee poaje. Meshijaji sope huisoajja poaje, sicosico meeme ajja quea huiso nee nee. Jamatii oe pojji cuanaja mimishi ecuijea'yo poaje. Eyacuiñajjiya oe pojji ba'e tiitii mee caje'yo onijje quea ja'a nee.

²⁸ Ohuaya ojaya esohui jayojja jama acaje'yo. Ojjaña shajjama' cuana quea nee nee po mee jeyojeyo caje'yo

onijje jjapeequi sa po'yo ajjajojo. E'e jojo nei jamaya Eyacuiñajjiya acuaji caje".
Jamaya aca poa Isaiaa. ²⁹ Ohuaya pea esohui tehue ca poa jama ba'a:
"Yahuajo Eyacuiñajjiya quiyo jeyojeyo mee ca'ya poa ojjaña quea mimijjequijea, ojjaña quea mimishi Sono-ma cuiñajjiyo ba'e, ojjaña Comosha cuiñajjiyo ba'e pea'ai. Oya jayojja beshahua nei Isaeni cuana chama'yo tii popoquia poa shajjama' poanijojo. Eyacuiñajjiya oe pojji Isaenija osecua cuana jaahuana ca poa".
Jamaya aca poa Isaiaa.

Jodio cuana Jesosa nijje jjapeequi jjima; Eyacuiñajjiya oya cuana ba jjima emimishi cuijea'yo

³⁰ ¡Jamajjeya bacue jiquio! Eyacuiñajjiya quea huiso Jodio pojjeama ba caje mimishi'ama. Jodio cuana ca ca oe pojji ba caje mimishi'ama. Yahuajo Jodio pojjeama cuana jjashahuabaqui jjima poanaje jama ba'a:
—¿Achajja shai ecuana ba'eje Eyacuiñajjiya esohui jayojja jama so'o? Jamajjeya ohuaya ecuana ba caje mimishi'ama —jamaya jjashahuabaqui jjima Jodio pojjeama poanaje.

Jamatii Jesosa nijje jjapeequianijo, Eyacuiñajjiya oya cuana ba cani mimishi'ama. ³¹ Jodio cuana ca ca Eyacuiñajjiya babaca ca poa onijje ejjapeequijji. Jamatii oya cuana jjashahuaba quehuaquinaje jama ba'a:
—Ecuana ojjaña Eyacuiñajjiya esohui cuana jayojja jama atiitiañaajo, ohuaya ecuana ba caje mimishi'ama —Jodio cuana poanaje.

Cho. Eyacuiñajjiya Jodio cuana ba ca poa quea mimishi ojaya esohui cuana jayojja jama mi atiitii cajo. ³² ¿Yajjaje? ¡Bacue! Eyacuiñajjiya Jodio cuana ba cani mimishi'ama ca ca Jesosaja epeeji poanijo. Jamatii onaaya aje oe Jesosa cajaa acanaje. Jama poa cuana ba'a: —Ecuaya esohui etehue'yo jayojja jama atiitiaña. Jamajjeya Eyacuiñajjiya ecuana mimishi'ama ba caje —oya cuana poa. Chojja de, ajjima ojaya, de.

³³ E'e, yahuajo Isaiaa Eyacuiñajjiya esohui tehue ca'ya poa jama ba'a:

"Eyaya huoojeaje mimishi cuijeajji Isaeni cuana huasijje. Jamatii Isaeni cuana jjashahuaba quehuaquijje; mimishi cuijeajji cajaa acaje'yo. Beca cuana onijje jjapeequiajo ca ca quea bihui nee nee poaje'yo".
Jamaya aca poa Isaiaa Isaeni cuanaajo, Jodio cuanaajo.

10 Miquianaya Jodio cuana Shomajo ba'e Jesosaja epeeji poanijo ecuea epeeji poani pea'ai. Eya, Pabo Jodio pea'ai. Eya ojjaña Jodio cuanaajo mimi tiitiaani Eyacuiñajji nijje jama ba'a: —Eyacuiñajji, ¡Jodio cuana jjapeequi meesahuacue Jesosa nijje! Jamajjeya oya cuana cuaqui yasijje epoqui'yojji pojjeama —jamaya eyaya atiitiaña.

² Ecuea eba ojjaña Jodio cuana Eyacuiñajjiya epeeji po sa poani. Jamatii onajaya ejjashahuabaquijji quea quehua poanijo Eyacuiñajji nijje jjapeequi meeme ajja. ³ Jesosa nijje jjapeequiajo, Eyacuiñajjiya Jodio cuana mimishi'ama ba caje, ma yahuajo shajjama' poa. Jamaya beshahua nei ojjaña Jodio cuanaajo eba pojjeama. Jesosa cajaa acanaje. Ojaya ejjashahuabaquijji quea

quehua jama ba'a: —Quea pame poanijo, Eyacuiñajjiya ecuana ba caje mimishi'ama —jamaya poso jjabaquinaje.

Cho, Eyacuiñajjiya ojjaña ba cani mimishi'ama Jesosa nijje jjapeequianijo, quea pame ba'yanijo pojjeama. ⁴ E'e, Jesosa Quito mano'yonaje esejo. Jamajjeya ojjaña onijje jjapeequiani Eyacuiñajjiya ba cani mimishi'ama. Jamatii beshahua nei ojjaña Jodio cuana jjashahuaba quehuaquiani jama ba'a: —Moisesija etehue'yo jayojja jama atiitiañaajo, Eyacuiñajjiya ecuana ba caje mimishi'ama —jama posoya acani Jodio cuana.

Eyacuiñajjiya ojjaña jama mimishi cuijea'yo sa acani

⁵ Yahuajo nei Moisesiya Eyacuiñajjiya esohui tehue ca poa jama ba'a:

"Eyacuiñajjiya eseya ba caje mimishi'ama ojaya esohui atiitiañaajo. Jamajjeya ¡ojaya esohui jayojjaya oe atiitiicue!"

Jamaya esohui tehue ca'ya poa Jodio cuanaajo yajji.

⁶ ¡A'a jjashahuaba quehuaquijji jama ba'a: —Eyacuiñajjiya ecuana ba cani mimishi'ama oja esohui etehue'yo jayojja jama aña tiitiiyo —a'a jamaya jjabaquijji! Chojja, Jesosa nijje e'e jojo nei jjapeequianijo, Eyacuiñajjiya eseya ba cani mimishi'ama.

Eyacuiñajjiya Moisesi esohui jama tehue meeme aca poa ba'a:

"A'a jjashahuabaquijji jama ba'a: —E'e pojja'ba beca cuana eyahuasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama".

Jama tehuemeya aca poa Moisesiya.

¡Jamajjeya ¡jamaya a'a jjashahuaba quehuaquijji! Jesosa poeyanaje ese que; mano'yonaje Eyacuiñajjiya ese mimishi'ama ebajji. ⁷ Moisesiya pea esohui tehue ca poa jama ba'a:

"¡A'a jjashahuaba quehuaquijji jama ba'a: —Beca cuana emano'yo huasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama —jamaya a'a jjashahuabaquijji!"
Jamaya Moisesiya tehue ca poa.

E'e, jamaya quea jjashahuabaqui quehua. Jesosa shequi o'oyanaje ese mimishi cuijea'yojji epoqui. ⁸ Jamajjeya Eyacuiñajjiya Moisesi esohui jama tehue meeme aca poa ba'a:

"Eyacuiñajjiya miquianaya ba caje mimishi'ama eba'e tiitii'yojji. Quea camaja nee nee pojjeama. Eyacuiñajji miquianaya mimishi'ama ebajji mimi huicha'a huicha'anaje. Miquianaaya shajja'ajja majamajanaje. Majoya jjashahuabaqui majamajanaje miquianaya".
Jamaya aca poa Moisesiya. Maya ecuaaya huohuiaña miquianajaya eshajja'ajajji, Jesosa nijje ejjapeequijji.

⁹ E'e jojo nei ejjahuhuiqui jiquio jama ba'a: —Jesosa ecuea Emeshi Mese nei poani —ejja'aqui. E'e jojo nei ejjashahuabaqui jama ba'a: —Ecuea eba Eyacuiñajjiya Jesosa shequi mee ca o'oyanaje —jamaya poanijo Jesosaa eseya ba'e tiitii mee caje'yo eyajo onijje.

¹⁰ Jesusajo e'e jojo nei jashahuabaquianijo, Eyacuiñajjiya eseya ba cani mimishi'ama. Eseyaya e'e jojo nei huohuiaña: —Eya Jesusaja epeeji.

Jamajjeya Jesusaa eseya onijje ba'e tiitii mee caje'yo.

¹¹ Yahuajo nei nei Isaiaa esohui tehue ca poa jama ba'a:

“Ojjaña joya jjeya nei Eyacuiñajjiya huoojea'yo ojjaña jaahuanajji nijje jjapeequiani Eyacuiñajjiya ba cani mimishi'ama e'e jojo nei”.

Jamaya Isaiaa aca poa.

¹² E'e, Jesosa esejaya Emeshi Mese nei oe nei, ojjaña-ja; Jodio cuanaja, Jodio pojjeama cuanaja pea'ai. E'e, Jodio cuana Jodio pojjeama jayojja nei pea'ai. Onijje mimianijo, Jesusaa eseya jaahuana cani quea pame nee. ¹³ E'e, eseya beca cuana mimije Jesosa nijje jama ba'a: —Jesosa, ecuea Emeshi Mese nei, jecuea mimishi cuana cuijea'yocue! —Jamaya mimianijo, Jesusaa eseya cuana cuijea'yo majje ba'e tiitii mee caje'yo eyajo.

¹⁴ Pea cuanaja Jesosa ba jjima, onijje mimi jjima; emimishi cuijea'yojji pojjeama. Shajja'ajja jjima Jesosa mano'yonaje ojjaña mimishi cuijea'yojji. Jesusaja esohui huohuijji poqui jjima ona huasijje esohui quea pame Jesusajo huohuiya. ¿Achajja shai oya cuana Jesusaja epeeji poaje so'o? ¹⁵ Eyacuiñajjiya ojaya esohui huohuijji pea cuana huasijje huoojea jjimajo, oya cuana Jesusajo eshajja'ajjajji pojjeama. Yahuajo nei Eyacuiñajjiya esohui huohuijji Isaiaa esohui tehue ca poa jama ba'a:

“Eyacuiñajjiya esohui huohuijji poeyajo esohui quea pame huohuiya, ecuana quea bihui nee nee poaje. E'e jojo nei jamaya poaje”.

Jamaya esohui tehue ca poa.

¹⁶ E'e, Eyacuiñajjiya esohui huohuijji poquinaje Isaeni cuana huasijje. Huohui ca'ya poa ojaya esohui quea pame nee. Jamatii Isaeni cuana aje oe shajja'ajja sa po'yo ajja poa. Isaiaa yahuajo nei esohui tehue ca poa Isaeni cuanajo jama ba'a: “Emeshi mese, oe pojji Isaeni cuana ecuanajaya esohui shajja'ajja canaje” jamaya Isaiaa aca poa.

¹⁷ Eyacuiñajjiya ojaya esohui huohuijji huoojea cani esohui quea pame nee Jesusajo huohuiya. Jamajjeya ma esohui quea pame nee shajja'ajja majje Jesosa nijje jjapeequije'yo. ¹⁸ Jamatii beca cuana jashahuabaquiani jama ba'a: —E'e pojja'a Isaeni cuanaja shajja'ajja jjima esohui quea pame Jesusajo. Jamajjeya Jesosa nijje jjapeequi jjima poanaje.

Chojja. Shajja'ajja canaje. Jamatii shajjama' jayojja poanaje. Yahuajo Eyacuiñajjiya esohui quea pame Jesusajo tehue mee ca poa jama ba'a:

“Ojjaña meshijo ba'e yasijje Eyacuiñajjiya esohui huohuijji cuana esohui quea pame huohui mee canaje”.

Jamaya yahuajo nei aca poa Dabiya.

¹⁹ Beca cuana jashahuaba quehuaquiani jama ba'a: —E'e pojja'a Isaeni cuanaja Eyacuiñajjiya esohui quea pame shajja'ajja jjima. Jamajjeya mi jjapeequinaje Eyacuiñajji nijje —jamaya beca cuana poani.

Cho. Onaaya shajja'ajja canaje. Yahuajo nei Moisesiya Eyacuiñajjiya esohui tehue ca poa jama ba'a:

“Isaeni cuana, miqianaya ebionei ecuea ebabaca coo, eyaya babaca coonaje ecuea epeeji epojji. Miquiaaya ca mo ca oe cajaa anaje. Jamatii eyaya pea cuana babacaje'yo ecuea epeeji nei epojji. Jamajjeya miqianaya quea quene poaje ona nijje, Isaeni pojjeama cuana nijje. Jashahuabaquije jama ba'a: —Isaeni pojjeama cuana quea pame pojjeama. Ecuana ca ca quea pame nee. Eyacuiñajji e'e jojo nei onajaya ba jjima. Ecuana jaya ca ca oya eba. ¿Apiojji shai Eyacuiñajjiya babaca cani Isaeni pojjeama cuana? Oya cuana cajaa —jamaya miqianaya poaje”.

Jamaya Moisesiya aca poa Isaeni cuana. ²⁰ Majoya Isaiaa Eyacuiñajjiya esohui quea ja'a nee tehue ca poa jama ba'a:

“Pea cuanaja eya ba jjima. Eyaya oya cuana jjapeequi meesahuaje'yo enijje. Oya cuana mimi jjima enijje oya mimishi cuijea'yojji. Jamatii oya cuana ecuea esohui ba meesahuaje'yo”.

Jamaya Isaiaa tehue mee ca poa yahuajo nei nei. ²¹ Eyacuiñajjiya Isaiaa pea esohui tehue mee ca poa Isaeni cuanaja jama ba'a:

“Eyaya Isaeni cuana iyaa majamajanaje enijje ejjapeequijji. Jamatii ecuea esohui etehue'yo jayojja jama a sa po'yo ajja tii tii. Shajjama' ojjaña cuana, quea mimishi nee nee”.

Jama tecueameya Isaiaa Isaeni cuana aca poa.

Eyacuiñajjiya Jodio cuana cajaa ajjima

11 Beca Jodio cuana jashahuabaquiani jama ba'a: —Ecuana Isaeni cuana. Eyacuiñajjiya babaca. Jamatii jjeya Eyacuiñajjiya ecuana cajaa acanaje —beca cuana jamaya poani.

Chojja de. ¡Bacue! Eya Isaeni dejja, Jodio dejja. Eya Eyacuiñajjiya cajaa ajjima. Amajama ecuea etiquiana poa. Bejami Amajamaja osecua. Eya Bejamija osecua. ² E'e, Eyacuiñajjiya Jodio cuana babaca coo ca poa ojaya epeeji epojji. Yahuajo nei Eyacuiñajjiya esohui huohuijji Enia bajjanija esohui etehue'yo miqianajaya eba. Enia Jodio cuanajo quea quene mimia poa Eyacuiñajji nijje jama ba'a:

³ “Eyacuiñajji, Emeshi Mese nei, ¡bacue pea Isaeni cuana! Ohuaya aje oe cuajaya ca'yonaje miquea esohui huohuijji cuana. Mei e'iya ani ñajaeoqueajea ca'yonaje, ma aquiana dahuaaji acani cuana mi quea bei ecuana nijje epojji ñajaeoqueajea ca'yonaje. Eya ee nei yani miquea epeeji. Eya cuajaya sa acani pea'ai Isaeni cuana”.

Jamaya aca poa Enia.

⁴ Eyacuiñajjiya Enia saja'a ca poa jama ba'a:

“Chojja. Quea huiso nee nee Isaeni cuana ecuea epeeji yani. E'e, 7.000 huismo Isaeni cuana eyacuiñajji nisho Baani bajjani bihuajji pojjeama. Quea huiso Isaeni cuana ecuea esohui jayojja jama ba'yaní”.

Jama saja'ameya Eyacuiñajjiya aca poa Enia.

⁵ Jjeya nei cuanaya beca Jodio cuana Eyacuiñajjiya esohui jayojja jama acani. Eyacuiñajjiya oya cuana ba-

Baca canaje ojaya epeeji epojji. Oja mimishijo jjas-hahuabaqui tiitii ajja. Eyacuiñajjiya oya cuana quea jea nee acani. Jamajjeya oya quea bei nee poani ona nijje, Eyacuiñajji. ⁶ E'e, Eyacuiñajjiya Jodio cuana quea jea nee acanijo oya cuana babaca canaje ojaya epeeji epojji. Quea bei Jodio cuana nijje poanaje. Onaja mimishi cuanajo jashahuaba tiitiiqui ajja. Jodio cuana ojaya quea jea nee poanaje babaca ca'ya poa. Babaca'yo jjima ojaya esohui jayojja jama atiitii canajejojo.

⁷ E'e, beca Jodio cuana Eyacuiñajjiya epeeji pojjeama poanaje. Quea huiso Eyacuiñajjiya esohui jayojja jama anisho canaje. Jamajjeya Eyacuiñajjiya oya cuana ba canaje quea mimishi. E'e, Eyacuiñajjiya Jodio cuana babaca canaje ojaya epeeji epojji. Beca cuana e'e nei poanaje. Jamatii pea cuana quea mimishi nee nee poanaje. ⁸ Yahujajo nei nei Moisesiya Eyacuiñajjiya esohui tehue ca poa jama ba'a:

“Jamajjeya Eyacuiñajjiya shajjama' cuana quea jjas-hahuabaqui ja'a epo meeji pojjeama. Eyacuiñajjiya etehue'yo e'e nei ba majje jamatii ojaya quea quehua poa. Esohui e'e nei shajja'ajja majje jamatii quea quehua poa pea'ai. E'e, jamaya Isaeni cuana jjeya pea'ai shajjama' po tiitiani”.

Jamaya Moisesiya tehue ca poa.

⁹ Yahujajo nei nei emeshi meseya Dabiya Jodio shajjama' cuana tecuea ca poa jama ba'a:

“Eseyaya etiiquianaya esohui jayojja jama atiitiaña mi-quianaaya. Poquiquehuaje'yo, de, edasia'yo poaje'yo, de, quea mimishi nee nee. Jamajjeya Eyacuiñajjiya mi-quianaya quea nee nee capo mee cahua. ¹⁰ Cojjamaja ejiojji ba jjima jayojja jama mi-quianajaya ba jjima capoahua tii tii Eyacuiñajjiya ejjashahuabaqui'yojji. Cuana aquiana quea biquie abo tiitii cani jayojja jama capoahua mi-quianajaya mimishi; epajea'yojji pojjeama tii tii capoahua”.

Jamaya Dabiya tehue ca poa yahujajo nei nei Jodio cuana.

Eyacuiñajjiya Jodio cuana iyaa cani tii ojaya epeeji epojji

¹¹ E'e pojja'a beca cuana jama jashahuabaquime poani ba'a: —¿A'a Jesosa cajaa acanajejo, Eyacuiñajjiya Jodio cuana cajaa acaje'yo tii?

Chojja, jamaya pojjeama. Ecuana, Jodio cuana quea mimishi nee nee poanijo, Eyacuiñajjiya esohui a'ajjajo, ohuaya Jodio pojjeama cuana jjapeequi meesahua cani Jesosa nijje. Onajaya mimishi cuana cuijea ca'yani. Eyacuiñajji jashahuabaquiani jama ba'a: —E'e, Jodio pojjeama cuana Jesosa nijje jjapeequi meesahuaña ba majje e'e pojja'a Jodio cuana Jesosa nijje jjapeequije'yo pea'ai enijje eba'e tiitii'yojji —jamaya Eyacuiñajji jashahuabaquiani.

¹² Jodio cuana aje oe jashajja'ajjaqui ajja. Jamajjeya Eyacuiñajjiya Jodio pojjeama cuana Jesosa nijje jjapeequi meesahua ca'yonaje. Eyacuiñajjiya Jodio pojjeama cuana quea pame acanaje Jodio cuana Jesosa nijje jjapeequi jjima joya. Jodio cuana Jesosa nijje jjapee nei-

neiquiajo ca ca Eyacuiñajjiya quea pame nee nee acaje'yo ojjaña.

¹³ Jodio pojjeama cuana Shomajo ba'e, Eyacuiñajjiya eya huoojea canaje mi-quiana que ojaya esohui huohuiya. Eyaya esohui huohuiaña tii tii mi-quianaya Jesosaja epeeji epo meesahuaaji. ¹⁴ Jamajjeya ma ba majjeya Jodio cuana pojja'a Jesosaja epeeji po sa poaje'yo pea'ai. ¹⁵ E'e, Jodio cuana Jesosa cajaa aca poajo, Eyacuiñajjiya Jodio pojjeama onijje jjapeequi meesahua canaje. Jamaya quea pame nee. Jamatii quijje Jodio cuana Jesosa nijje jjapeequi meesahua caje'yo pea'ai. E'e, jjeya Jodio emano'yo jayojjaya poani shajjama' jjejojo. Jesosa nijje jjapeequi'yo majje ca ca eshequi'yo jayojja poaje'yo, de, quea pame nee nee. ¹⁶ E'e, jjeya oe pojji Jodio cuana Jesosaja epeeji nei poani. Jamajjeya quijje Eyacuiñajjiya quea huiso Jodio cuana ojaya epeeji nei po mee caje'yo. Jama ba'a: Acui esajja quea pame nee nee poajo, quijje tii majje ejajja quea pame nee poaje pea'ai. Oya jayojjaya Amajama Eyacuiñajjiya ehabaca poa. Jamajjeya oja osecua cuana Eyacuiñajjiya ehabaca poaje pea'ai.

¹⁷ Jashahuabaquie jama ba'a: E'acui meseya acui aa enojinoji cobojea majje ejee cojjajji iyanobia cani etii'yojji. Acui sajja quea pamejo pea acui jee cojjajji e'iyanyobia pohuaje'yo. Oya jayojjaya beca Jodio cuana Jesosa cajaa acanajejo quea tai poa, acui aa enojinoji jayojja. Pea ejee cojjajji iyanobia majje pohua'yani jama Jodio pojjeama Jesosaja epeeji cuana poaje. Jiquio ecua ecui-cojjone sajjajji jayojja eseya quea pame ba'e mee cani. ¹⁸ Jamajjeya Jodio pojjeama cuana, ja'a jashahuabaquiji mi-quianaya quea pame nee, Jodio cuana quea pame pishana! Chojja. Eyacuiñajji mi-quianajaya eba poanaje Jodioja ehuhuijo. Mi-quianajaya ehuhuijo pojjeama ca ca Eyacuiñajji Jodio cuana eba poa.

¹⁹ E'e pojja'a mi-quianaya jashahuabaquiani jama ba'a: —Jesosaja cajaa aca poajo Jodio cuana acui aa ecobojjea'yo jayojja jama poanaje. Eseyaya, Jodio pojjeama ca ca Jesosaja epeeji poanijo ecui-cojjonejo pea ecojja posho e'iyanyobia'yo quea pame pohua'yani jayojja jama —mi-quianaya poani.

²⁰ E'e, jamaya poanaje. Jesosa cajaa amajje Jodio cuana acui aa ecobojjea'yo jayojja jama poanaje. Eyacuiñajjiya oya cuana cajaa aca poa. Mi-quianaya ca ca oe Jesosa nijje jjapeequi'yajo, Eyacuiñajjiya ba cani mimishi'ama. E'e, jjeya Eyacuiñajjiya mi-quianaya babaca canaje. Jamatii ja'a jashahuabaquiji mi-quianaya quea pame nee Jodio cuana quea pame pishana! Chojja. ¡Mi-quianaya quea ja'a nee Jesosa nijje jjapee tiitiiquie!

²¹ ¡Bacue oe! Eyacuiñajjiya Jodio cuana babaca coo ca poa ojaya epeeji epojji. Majoya Jodio cuana jashajja'ajjaqui sa po ajjajo, ohuaya mi-quianaya babaca canaje, Jodio pojjeama cuana. Jiquio ecua acui aa nojinoji jehusejjajea'yo majje eyacua iyanobia ca'yani jama jayojja Eyacuiñajjiya Jodio shajjama' cuana cajaa ajea'yo majje mi-quianaya babaca canaje. Jamajjeya ja'a shajjama' pojji! Eyacuiñajjiya mi-quianaya cajaa aca chana'.

²² E'e, Eyacuiñajjiya ojjaña quea jea nee nee acani.

Shajjama' cuana ca ca tecuea neinei caje'yo, de. E'e, oj-
jaña joya shajjama' poani ohuaya quea nee nee po
mee caje'yo. Miquianaya ca ca ohuaya quea pame nee
nee acani ojaya quea jea nee neejoj. Ohuaya miquia-
naya quea jea nee acaje'yo tii tii, ca jjashajja'ajja tiitii-
quiao. Shajjama' poajo ca ca ohuaya miquianaya quea
nee nee po mee caje'yo pea'ai, de. ²³ E'e, Jodio cuana
pea'ai Jesosa nijje jjapeequiajo Eyacuiñajjiya ojaya
epeeji nei po mee caje o'oya, yahuajo nei nei jayojja-
ya. E'e nei, jiquio ecua acui aa ejehusejjajea'yo iyanob-
ia ca o'oyani jama jayojja Eyacuiñajjiya oya cuana
acaje'yo; ojaya epeeji nei po mee caje o'oya. ²⁴ Miquia-
naya ca ca Jodio pojjeama cuana yahuajo nei Eyacui-
ñajjiya ehabaca pojjeama poa. Jamajjeya miquianaya
pea acui aa jayojja, ebiojo nequi acui aa jayojja. Jamatii
jiquio ecua ebiojo nequi acui aa acui bame bame yasij-
je iyanobia cano jayojja jama Eyacuiñajjiya miquianaya
babaca canaje ojaya epeeji nei epojji. Jamajjeya Eya-
cuiñajjiya miquianaya acanaje jayojja jama ohuaya Jo-
dio cuana acaje'yo. E'e, ecuea etiiquiana Eyacuiñajjiya
babaca coo ca poa. Jamajjeya jiquio ecua acui eban-
a'yo acui aa ejehusejjajea'yo oya tii acuijo iyanobia caje
o'oya jayojja jama Eyacuiñajjiya Jodio cuana acaje'yo.
Jesosa nijje jjapeequiajo Eyacuiñajjiya huohui caje ja-
ma ba'a: —E'e Jodio cuana, jjeya miquianaya ecuea
epeeji nei po o'oyanaje, ojjaña —acaje Eyacuiñajjiya.

Jodio cuana Jesosaja epeeji quijje poaje'yo

²⁵ Ecuea epeeji cuana, eyaya miya huohuije ma Eya-
cuiñajjiya quijje acaje Jodio cuanajo, ma yahuajo ojja-
ña ba jjima poa. Jamajjeya ecuea esohui ba majje mi-
quianaya ejjashahuabaquijji pojjeama jama ba'a:
—Ecuana nei ca ca oe Eyacuiñajjiya ehabaca ojaya
epeeji nei epojji —a'a oe miquianaya poji.

Chojja. Jjeya Jodio cuana Emeshi Mese nei Jesosa cajaa
acani beshahua nei ojjaña. Jamaya epo'yojji tii pojjea-
ma. ¿Ache Jodio pojjeama cuana Jesosaja epeeji poa-
je? Eyacuiñajjiya eba. Mahuiso jjapeequiajo, Jodio cua-
na jjapeequije o'oya Jesosa nijje. ²⁶ Jamajjeya quea hui-
so nee nee Jodio cuana eyajo ba'e tiitii mee caje'yo Je-
sosa nijje jjapeequiajo. E'e, yahuajo nei Eyacuiñajjiya
Isaia tehue mee ca poa Isaeni cuanajo, ma Jacoboja
osecua cuanajo jama ba'a:

“Eyacuiñajjiya huoojea'yo ojjaña jaahuanajji poeje.
Oya Jodio dejja poaje. Oya Jacoboja osecua cuana mi-
mishi pajea meesahua'yojji poaje'yo. ²⁷ Ma ecua eyaya
Jodio etiiquiana huohuinaje jamaya eyaya aje'yo; ojja-
ña mimishi cuijea neineije'yo”.

Jamaya yahuajo nei nei Eyacuiñajjiya aca poa.
²⁸ Jamatii jjeya Eyacuiñajjiya Jodio cuana ba cano ojaya
epeeji pojjeama Jesosa cajaa ajji poajojo. Jamajjeya Jo-
dio cuana ma esohui cajaa acajo, Eyacuiñajjiya esohui
quea pame nee Jesosajo miquianaya shajja'ajja mee
canaje, Jodio pojjeama cuana. Jamatii Eyacuiñajjiya Jo-
dio cuana cajaa tiitii ajjima, de. Yahuajo nei ecua
ojaya ehabaca poa. Ohuaya ecuanaja etiiquiana
huohui ca poa jama ba'a: “Miya, miquea osecua cuana
pea'ai ecuea epeeji nei cuana poaje'yo tii tii” jamaya

ohuaya Amajama, Jacobo, Isaaca pea'ai huohui ca poa.
²⁹ E'e jojo nei Eyacuiñajjiya ojaya esohui jayojja jama
acaje'yo, epajea'yojji pojjeama tii tii. Babaca'yo majje
cajaa ya'yojji pojjeama tii. ³⁰ Jamajjeya jjeya Jodio cuana
Jesosa nijje jjapeequi sa po'yo ajja joya Eyacuiñajjiya
miquianaya, Jodio pojjeama cuana quea bei nee acani.
Miquianaja mimishijo jjashahuaba tiitiqui ajja, jamatii
yahuajo shajjama' nei poa. ³¹ Eyacuiñajjiya quijje Jodio
cuana jama acaje'yo ba'a: Jjeya ohuaya miquianaya
quea bei acani; miquea mimishijo jjashahuabaqui ajja.
Oya jayojjaya quijje ohuaya Jodio cuana acaje'yo, ja-
matii jjeya shajjama' nei poani. ³² Jamajjeya Eyacuiñajji-
ya ojjaña cuana ba cano shajjama' nei nei. Jesosa nijje
jjapeequiao ca ca ojjaña mimishijo jjashahuaba tiitii-
qui ajja poaje. Quea bei ojjaña cuana nijje poaje'yo
Eyacuiñajji.

Eyacuiñajji bihuia cano Pabohua

³³ Quea pame nee nee Eyacuiñajjiya eseya acani. Oj-
jaña eseya ojaya eba nei nei; oya esejaya mimishi cui-
jea'yojji. E'e jojo nei ojjaña ojaya eba nei nei. Quea ja'a
nee nee ojaya ejjashahuabaquijji. Quea pame nee nee
ohuaya acani ojjaña. ³⁴ Yahuajo nei Eyacuiñajjiya Isaia
tehue mee ca poa jama ba'a:

“¿Ajea eba nei nei Eyacuiñajjiya ejjashahuabaquijji?
¿A'ya shai o ba meesahuajji? Chama' nei nei. Oya oe
nei quea jjashahuabaqui ja'a nee nee. ³⁵ ¿Aya acuae jja
mi oe che quia cano aquiana Eyacuiñajjiya? Ojjaña
aquiana cuana ojaya, de”.

Jamaya Eyacuiñajjiya esohui Isaiaa yahuajo nei tehue
ca poa.

³⁶ E'e, Eyacuiñajjiya ojjaña aquiana pana ca'ya poa.
Ojjaña ojaya aquiana. Quea sohui poja nee neeya jjejo-
jo ohuaya ojjaña quea pame amee cano. Jamajjeya ojja-
ña ba cano oya quea ja'a nee, quea pame nee nee
pea'ai: —Eyacuiñajji, miya quea pame nee. Pea chama'
mi jayojjaya —jamaya jaya ejjabihuia tiitiqui! ¡Jamaya
ejja'aqui!

¡Jesosaja epeeji poanijo ojaya esohui jayojja acue!

12 Jamajjeya ecuea epeeji cuana, ¡shajja'ajjacue
mo! Eyacuiñajji ese nijje quea bei poani, mimis-
hijo jjashahuaba tiitiqui ajja. Jamajjeya jayojja epeeji
nei nei ba'ecue! ¡Eyacuiñajji bihuiaque jama ba'a:
—Eyacuiñajji, eya miquea nei nei. Miquea ejjashaha-
baqui'yojji jayojja jama eyaya aje'yo —jamaya pocue!
E'e, ¡Jesosaja jayojja jama ba'e tiitiqui quea pame nee!
Eyacuiñajji bihuiaque jama ba'a: —Eyacuiñajji, miya
quea pame nee nee.

² ¡A'a Eyacuiñajjiya epeeji pojjeama jayojja poji! ¡Eya-
cuiñajjiya eseya ojaya esohui jayojja jama capo mee
cahua! Cajjashahuabaqui mee cahua o jayojja. Majoya
ojaya ejjashahuabaquijji eseya ba mee caje'yo. Ma ese
ohua amee caje'yo ojo ohuaya eseya ba mee caje'yo.
Ojaya ejjashahuabaquijji quea pame nee nee, quea
ja'a nee nee enequi tiitijji pea'ai.

³ Eyacuiñajjiya eya huoojea canaje ojaya esohui huohuiya. Jamajjeya eyaya miquianaya ba meesahuaña quea pame nee eba'ejji. E'e, Eyacuiñajjiya eseya ba'e meesahua cani ojaya epeeji epojji. Jamajjeya ja'a jjashahuabaquijji jama ba'a: —Eya quea pame nee nee —a'a jamaya pojji! Chojja, ¡quea bei nee jjashahuabaquicue! ¡Jama acue ba'a: —Eyacuiñajjiya eya chaco meesahua cani jayojja jama eyaya onijje chacoje —jamaya pocue!

⁴ ¡Bacue! Eseyaya eyami oe. Jamatii esejaya eyamijo yani eme', ejiojji, ecojja, equise pea'ai. Eme' ca ca ecojja jama pojjeama; pea. Jamatii ojee chaco cani oe eyamiya. ⁵ Oya jayojjaya eseya Jesusaja epeeji cuana quea huiso nee. Oe epeeji pea jayojja chacochocho aija. Jamatii eseyaya ojee chacoña Jesosa nijje. ⁶ Jesosa nijje jjapeequianiyo, Eyacuiñajjiya eseya chaco meesahua cani quea pame ojaya echacojjijo. E'e, ohuaya beca cuana chaco meesahua cani oe echacojjijo. Pea epeeji chaco meesahua cani pea echacojjijo, de. Jamajjeya ¡ohuaya chaco mee cani jayojja jama ejja'aqui! Jamajjeya ¡quea ja'a nee ejjasohuihuohuiqui, ohua huohui mee cani jayojja jama ejja'aqui! ⁷ Beca cuana ca ca ona ba'e meesahuajji po mee cani ohuaya. Jamajjeya ¡quea bihui nee ojjaña caba'e meesahua cahua! Jesusaja epeeji sohui bameejji ohuaya po mee canijo, ¡ojjaña esohui caba meesahua cahua, huea'ama capoahua! ⁸ Ona jjabahuejjaquijji po mee canijo, pea epeeji cajjabahuejjaqui mee cahua quea ja'a nee: —Eyacuiñajjiya miya quea bihui po mee caje mimishi'ama ba'yanijo —cahuohui cahua cuana.

Eyacuiñajjiya Jesusaja epeeji beca cuana quea aquiana huiso po meesahua cani pea'ai. Jamajjeya quea bihui nee capoahua, nishehui'ama, dejja tai'ama. Beca cuana pea epeeji jaahuanajji po mee cani. Jamajjeya e'e jojo nei quea ja'a nee nee cajjashahuabaquiahua. Pea epeeji ca ca aema' cuana, emanojaa cuana jaahuanajji po mee cani. Jamajjeya quea jea nee ca-jaahuana cahua Jesusaja epeeji cuana.

¡Jesusaja epeejiya pea epeeji cuana quea jea nee acue!

⁹ ¡E'e jojo nei ojjaña cuana quea jea nee nee acue! Jamajjeya ja'a pea cuana quea tai ajji! Chojja, ¡ojjaña cuana quea pame nee nee acue! ¹⁰ E'e, ¡ojjaña Jesusaja epeeji quea jea nee acue! ¡Miquea huapa pojjeama jayojja jama quea jea nee neeya acue! ¹¹ Jamajjeya ¡quea ja'a chacocue huea'ama! ¡Jesusajo, Emeshi Mese neijo quea bihui nee acue ojaya yajjijo! ¹² Eyacuiñajjiya esohui ese nijje jayojja jama ohuaya acaje'yo e'e jojo nei. ¡Jamajjeya quea bei pocue! Quea yeno dejja mimishiya mimia cajje ja'a oe Jesosa pajea'yojji quea yeno po majje! ¡Eyacuiñajji nijje mimi tiiticue jama ba'a: —Eyacuiñajji, ¡eya jaahuanacue! ¡Eya ba'e meesahuacue quea ja'a nee! —jamaya pocue Eyacuiñajji nijje!

¹³ ¡Jesusaja epeeji aema' poanijo eba'e meesahuajji quiacue! Pea cuana miquea cuiñajjiyo nequiñaqu'i'yajo, ¡yaaacue bobi ijiajji, ecahuajji pea'ai! ¹⁴ Jesusaja epeeji,

dejja mimishiya miya mimia cajje ja'a panajajji! ¡Eyacuiñajji nijje mimicue jama ba'a: —Ecue Chii, ¡e cuiajji epo mique Bacua Ejja Jesosa nijje jjapeequi meesahuacue! —acue!

¹⁵ ¡Joya quea bihui nee poani onijje quea bihui pocue! Quea yeno poanijo, pa'anijo ca ca ¡onijje mimicue; yeno'ama tii tii po meecue! ¹⁶ ¡Mi jayojjaya Jesusaja epeeji cuana quea pame nee ba'e meesahuacue! ¡A'a jama jjashahuabaquijji ba'a: —Onajaya aquiana quea pame nee nee. Eya o jayojjaya poaje —a'a jama jjashahuabaquimeya pojji!

¡Aema' cuana a'a cajaa ajji! Chojja, ¡jjapeequicue onijje! ¡A'a jjashahuabaquijji miya quea pame nee nee, pea cuana quea pame pishana! ¹⁷ Onaa miya quea mimishi acajje ja'a onijje quea mimishi pojji! ¡Quea pame nee po tiiticue ojjaña eba'ji miya e'e jojo nei Jesusaja epeeji poani! ¹⁸ Quea camaja eba'ejji pojja'a. Jamatii ¡ojjaña nijje quea bei nee ba'ecue! ¹⁹ Onaa napa cajje ja'a jjashahuabaquijji jama ba'a: —Ohua e acanaje jayojjaya eyaya oya aje, de —a'a jamaya pojji!

Chojja. Eyacuiñajjiya casosequia ca'yahua. Jamaya Eyacuiñajjiya esohui etehue'yo poa ba'a: “Ecue epeeji napajji poani eyaya eyaye nei sosequia-je'yo; quea nee nee po meeje'yo. Eyaya, Emeshi Mese neiya jamaya huohuiaña”.

Yahuajo nei jamaya Eyacuiñajjiya tehue mee ca poa.

²⁰ Pea tehue mee ca poa jama ba'a:

“Mi napajji poani cuana quea shoe poajo, ¡bobiacue oe! ¡Quea naba taja poajo, ena quiacue! Miya jamaya ajje oya quea bicho nee nee poaje. Miya napa pajea caje'yo pojja'a, miquea epeeji poaje”.

Jamaya yahuajo tehue ca poa Eyacuiñajjiya esohui.

²¹ ¡A'a jjashahuabaquijji jama ba'a: —Ojjaña joya ecuana nijje quea mimishi poani eya o jayojjaya poaje pea'ai, de —a'a jamaya pojji!

Chojja. Miya napa cajje ¡jamatii oya cuana quea pame nee acue!

Jesosaja epeeji cuaa emeshi mese cuana cashajja'ajja cahua

13 Emeshi meseya huoojea canijo, ¡jjashajja'ajja- quicue! Emeshi mese cuana Eyacuiñajjiya huoojea canaje ojjaña cuana quea ja'a ba'e meesahuaa. Jamajjeya emeshi mese cuana Eyacuiñajjiya quea ca'a po mee cani ese huoojeajji. ² Jamajjeya jjashajja'ajjaqui ajjajo ca mi ca oe Eyacuiñajjiya miquianaya ba cani shajjama' ojaya ehoojea'yoja esohui shajja'ajja sa po ajjajo. Shajjama' cuana aje oe quea nee po mee caje'yo. ³ Eyacuiñajjiya emeshi mese cuana huoojea jjima quea pame ba'yani cuana quea mete po meeya. Quea mimishi ba'yani cuana ca ca quea mete capo mee cahua. ¿A'a miya emeshi mese cuanajo mete'ama ba'e sa poani? ¡Quea pame acue, ojaya esohui jayojja! Jamajjeya oya minijje quea bihui nee poaje pojja'a: —E'e, ¡jamaya quea pame nee acue! —oya poaje.

⁴ E'e, Eyacuiñajjiya emeshi mese cuana huoojea canaje ese quea ja'a ba'e meesahuaa. Jamajjeya ¡quea mimishi po majje quea mete pocue ojo! Ohuaya miya

jjabahuejjaqui mee caje. Jamaya Eyacuiñajjiya oya cuana huoojea cani shajjama' cuana jjabahuejjaqui meeji. ⁵Jamajjeya jemeshi mese cuana shajja'ajjacue mete'a-ma eba'eji, Jesosaja epeeji quea pame nee epoji pea'ai! ⁶Jamaya pea'ai oya cuana sosequiacue! Ojjaña quea pame ba'e mee cani soseje emeshi mese sosequia cani cuaa, Eyacuiñajjiya huoojea. ⁷Jamajjeya: —Sosequiacue mo! —ohua acajje ¡jamaya quiacue emeshi meseja eba'e meeji ohua chaco cani soseje, mahuiso tiya! ¡Miya jaahuana canijo, miquea meshi cuiña canijo pea'ai, sosequiacue! ¡E'e, emeshi mese cuana shajja'ajjacue! ¡Oya cuana sosequiacue pea'ai! ¡Jama acue pea'ai ba'a: —Emeshi mese, miya quea pame nee ecuana ba'e meesahuaña —acue! Jamaya quea pame nee.

¡Jesosaja epeeji cuana quea jea acue; pea cuana nijje quea bei pocue!

⁸Jamajjeya ¡aquiana jjeshe majje sosequiacue! E'e, ¡miyaya yahuajo huohui'yonaje jayojjaya sosequiacue! Eyacuiñajjiya eseya quea jea nee nee acani. Jamajjeya ¡pea cuana quea jea nee acue, ojjaña! Pea cuana quea jea nee añajo Eyacuiñajjiya esohui jayojja aña. ⁹E'e, Eyacuiñajjiya esohui Moisesiya tehue ca poa jama ba'a: "¡A'a onajaya ehuanase jea bajji! ¡A'a pea quecuajji! ¡A'a sii pojji! ¡A'a onajaya aquiana jea bajji!" Quijje Eyacuiñajjiya huohui canaje jama ba'a: "¡Minijje ba'e quea jea nee acue! ¡Miya quea pame ba'yani jayojja jama ba'e meesahuacue!" Jamajjeya ¡pea cuana quea jea nee añajo ba'e meesahuacue! ¡Ojjaña Eyacuiñajjiya esohui jayojjaya jama acue! ¹⁰E'e, onaya miquea quea jea nee poanijo oya cuana quea yeno, quea nee po mee sa po'yo ajja. Jamajjeya onaya quea jea nee poanijo ojjaña Eyacuiñajjiya esohui jayojjaya aña.

¹¹E'e, ¡jamaya Eyacuiñajjiya esohui jayojja jama acue! ¡Bacue ¡iquio! Jesosa esejaya Emeshi Mese nei jjeja nei pojja'a poeje o'oya. Jamajjeya ¡quea ja'a nee ba'ecue Eyacuiñajjiya esohui jayojja! ¡A'a quea huea pojji! ¡Ojaya esohui bacue! Yahuajo pishana eseya Jesosaja epeeji poanaje. Ohuaya esejaya mimishi cuijea ca'yonaje. Poe o'oya majje eseya ba'e tiitii mee caje'yo eyajo onijje, Jesosaa. ¹²Jjeja eseya ¡iquiojo ba'yani quea camaja poani, mecajje quea misi quea poqui camaja jayojja. Jesosa poe o'oyajo ca ca quea pame nee nee poaje'yo. Epojja jayojja jama poaje'yo. Ojaya epoe o'oyajji beshahua nei apoa. Jjapojjaqui majje ja'a'aja'a'a poani jayojja poaje. Jamajjeya ¡a'a quea mimishi pojji! ¡Pea jjasahuabaquime po'yocue! ¡Jesosaa eseya ba'e meesahua canijo, ojjaña mimishi pajea neinei'yocue! ¹³E'e, ¡quea ja'a nee nee ba'ecue bicho'ama epoji onaa ba canijo! Jamajjeya ¡a'a huoojji! ¡A'a ona ishi'ishiqui yasijje poquijji! ¡A'a pea epona cuana jea bajji! Epona, ¡a'a onaja yahue, shacuima' nequi cuana pea'ai siijji! ¡A'a quea mimishi ba'eji! ¡A'a quea quene pojji! ¡A'a jjamicuiajea nobiajeaquijji pea'ai! ¹⁴Chojja. ¡Jesosaja nijje mimicue ojaya ejjashahuabaquijji jayojja jama eba'e meesahuajji! Jamajjeya miquea ejjashahuabaquijji

yahuajo nei jayojja jama eshahuaja miya eba'e mee'yoyji pojjeama.

¡A'a Jesosaja epeeji cuana nijje mimijajji!

14 Jesosaja epeeji cuana, miqianaaya pojja'a Eyacuiñajjiya esohui quea ja'a nee baña. Jesosaja epeeji beca cuana ca ca quea jashahuabaqui ja'a pishana. ¡Jamatii onijje jjapeequicue quea bei! ¡A'a mimicuijeanobiajeajji ojaya esohui quea quehuajo! ²E'e, miqianaaya beca cuana jashahuabaquiani jama ba'a: —Ojjaña noe cuana ca'ijjiahua, jamatii onaaya ba'ehuana canaje ecuiquiaja e'ijjiajji nisho. Ecuaya ijja'yajo Eyacuiñajji ecuaña nijje quea quene pojjeama poaje —jamaya beca cuana poani. Jamajjeya noe ijjaña, ojjaña.

Beca cuana ca ca jama poani ba'a: —Chojja, ¡noe ma onaaya ecuiquiaja e'ijjia'yoyji nisho ba'ehuana canaje a'a ijjaajji! Ma eseya ijjaajo Eyacuiñajji quea quene poaje ese nijje —jama posoya acani. Jamajjeya acuijja cuana, bobi ebana'yo pea'ai ijja cani; noe ijja'yo jjima acani quea meteya jjejojo.

³Noe ijjaajji cuana, ¡a'a jama pojji pea cuana nijje ba'a: —¿Apiojji acuae miqianaaya acuijja, ebana'yo oopana ijjaña, noe ijja ajja so'o? Chojja. ¡A'a quea mete pojji! —a'a jamaya ajji!

Oya jayojja noe ijja ajja cuana, ¡a'a pea cuana nijje jama pojji ba'a: —Miqianaaya aje oe noe ijjaña. ¿Apiojji? Eyacuiñajji quea quene po chana', de —a'a jamaya ajji!

¡Bacue! Eyacuiñajjiya noe ijjaajji cuana pea'ai ojaya bacua cuana po mee canaje. Jamajjeya ¡a'a jamaya pea cuana nijje mimijji! ⁴E'e, miqianaaya noe ijja ajja jjejojo mimimimiani. Eyaya miqianaaya huohuaña jama ba'a: Eyacuiñajji ona huoojeajji poani, miqianaaya pojjeama. Jamajjeya ¡a'a mimijajji! Eyacuiñajji ona huoojeajji poanijo ohuaya ohuaye nei jama acaje ba'a: —E'e, miqianaaya quea pame nee ba'yani —Eyacuiñajjiya acaje.

Quea ja'a ba'e ajjajo ca ca: —Chojja, ¡a'a jamaya ajji! Quea tai —Eyacuiñajjiya acaje. Eyacuiñajji ese huoojeajji quea ca'a poanijo, ohuaya eseya quea ca'a po mee cani ojaya ejjashahuabaquijji jayojja jama eba'eji.

⁵Cuanaya beca cuana jama poani ba'a: —Beca epojja cuana Eyacuiñajji bihuajji. ¡Ma epojja cuanajo a'a chacojji!

Pea cuana ca ca jama poani ba'a: —Ojjaña epojja oya jayojjaya, pea epojja jayojjaya. ¡Eyacuiñajji bihuacue ojjaña pojja! —oya cuana poani.

Jamajjeya ¡a'a pea nijje mimijji ache epojjajo chaco cajji! ¡Miquea ejjashahuabaqui'yoyji epojja cuanajo jayojja jama acue! Pea cuana ojaya ejjashahuabaquijji jayojja jama ca'a cahua pea'ai epojja cuanajo. ⁶E'e, Emeshi Mese neija esohui jayojja jama ba'e sa poani miqianaaya, ojjaña. Beca cuana quea huiso epojja cuanajo chacochocho ajja Eyacuiñajji bihuia poani jjejojo. Pea cuana ca ca oe pea epojjajo jayojjaya jama acani, oya jayojjaya. Noe ijjaajji cuaa esejaya Emeshi Mese nei bihuia cani. Ijja'ijja jjimahua Eyacuiñajji nijje mimiani

jama ba'a: —Eyacuiñajji, ecue Chii ai, eyaya miya bihuiaña noejo.

Noe ijia pojjima' cuaa esejaya Emeshi Mese nei bihuia cani pea'ai jama ba'a: —Eyacuiñajji, ecue Chii ai, eyaya miya bihuiaña jiquio bobijo, acuijjajajo, eso' cuanajo, ebano'yojo cuanaya. E'e, miyaya ojjaña tii meesahua'yonaje —jamaya acani ohuaya.

⁷Jamajjeya ja'a esejaya eba'ejjijo, eseya sañaño jashahuaba tiitiiquijji! Esey eshe nequijo ca ca Jesusaja esohui jayojja jama caba'yahua. Mano'yajo pea'ai eseya Jesusaa jaahuana caje'yo. Esey ojaya tii poaje'yo. ⁸E'e, eshe nequiya eseyaya Emeshi Mese nei Jesusaja esohui jayojja aña. Mano'yo majje onijje ba'e tiitii'e'yo. Jamajjeya eshe nequi, mano'yajo pea'ai ohuaya eseya jaahuana cani; ese huoojeajji poani tii oya. ⁹Jesosa mano'yo majje shequi o'yanaje ese jaahuanajji epojji. Jamajjeya eshe nequi, mano'yajo pea'ai oya, Jesosa esejaya Emeshi Mese nei poani tii. ¹⁰Jesosaja epeeji poani ojjaña eseya. Jamajjeya zapiojji acuaeya Jesusaja epeeji quea ja'a nee nijje jjamimicuijaja nobiajeaquiani so'o? Cuanaya epeeji quea ja'a nee poaniya, zapiojji miqianaya Jesusaja epeeji cuana niñebaña so'o? Oya Jesusaja epeeji pea'ai. ¡A'a pajea'yojji quijje eseya ojjaña nequije Eyacuiñajji nequi cojja nei! Ohuaya huohui caje jama ba'a: —E'e jamaya, miyaya quea pame anaje —acaje'yo. Quea pame pojjeama añaño ca ca pea nijje jama poaje ba'a: —Chojja, miya quea mimishi poanaje —acaje'yo Eyacuiñajjiya.

¹¹Eyacuiñajji esohui etehue'yo jama poani ba'a: “Eya Eyacuiñajji eshe tii tii nequi. Jamajjeya e'e jojo nei ojjaña e cojja nei nequi majje, ecui'oshajjajo nequioque majje eya bihuia caje jama ba'a: —Miya ca ca oe Eyacuiñajji quea ca'a nee, quea pame nee enequi tii —ojjaña poaje”. Jamaya esohui etehue'yo poani. ¹²Jamajjeya e'e jojo nei o cojja nei nequijajo, Eyacuiñajjiya eseya ojjaña huohui'ajja caje esejaya eba'e'yojji. Quea ja'a ba'enajeya eseyaya oya saja'aje'yo quea bihui. Quea ja'a pojjeama ba'enajeya ca ca quea mete saja'aje'yo.

¡Ona quea mimishi po meeji a'a pojji!

¹³E'e, Eyacuiñajji quea pame nee chacoñaño jayaya pea epeeji cuana a'a niñebajji! Chojja, jama acue ba'a: —Jesusaja epeeji quea jashahuabaqui ja'a po jjima ecue eba'eji ba majje quea mimishi po chana'. Jamajjeya eyaya maya e'amajaji pojjeama oya quea mimishi, quea mete nee epo meeji pojjeama —jamaya pocue!

¹⁴Eseyaya Emeshi Mese neiya eya ba meesahua canaje jama ba'a: Noe ma onaja ba'ehuanacui ecuiquiaja e'ijjiaji nisho eseya ijiajo, Eyacuiñajji ese nijje quea quene pojjeama poani. Pea bobi eseya ijiajo, jamaya pea'ai poani. Jamatii Jesusaja epeeji beca cuana quea jashahuabaqui ja'a pishana jama poani ba'a: —Ma noe, bobi pea'ai eseya ijiajo, Eyacuiñajji quea quene poaje ese nijje —jama posoya acanijo, ohuaya maya ijia jjima ca'a cahua. E'e, jamaya jashahuabaquianijo ijia majje oya quea mimishi poani.

¹⁵Miquianaya, noe ijiaji cuana, ijashahuabaquicue Jesusaja pea epeeji cuanajo, ma acuijjajja oopana ijiajji! Jamajjeya miya noe ijiaji ba majje ohuaya ijia pea'ai ca chana', mi jayojjaya poaje. Jamatii oya cuana quea mete jashahuabaquije jama ba'a: —¡Dee! Eyaya eshahua bobi ijianaje. Eyacuiñajji enijje quea quene poaje —jamaya jashahuabaqui majje Jesusaja epeeji quea mimishi po chana'.

Jamajjeya jama acue ba'a: ¡Jesusaja pea epeeji cuana quea jea acue! Oya ca'a'ama; quea mimishi po o'oya mee chana'. Jesosa onajo mano'yonaje pea'ai. Jamajjeya jaya cuana jaahuanacue! ¹⁶Miquianaya jashahuabaquiani pojja'a jama ba'a: —Eyaya jamaya aña, quea ja'a nee aña.

Jesosaja epeeji quea ja'a pojjeama jashahuabaquiani mi ba majje jama poani ba'a: —Chojja, jamaya quea mimishi, quea tai —poso acani.

Jamajjeya ohua jamaya huohui canijo, ja'a oe jamaya amajaji, jamatii miqianaya quea ja'a jashahuabaquiani! ¹⁷Bobijo, e'ishijji pea'año jashahuabaquianijo pojjeama eseya Eyacuiñajji yasijje, ojjaña huoojea'yojji poani yasijje poquije'yo. Chojja. Quea ja'a nee, quea bihui nee, quea bei nee pea'ai caba'yahua Edojoshahua Pameya eseya ba'e meesahua canijo. ¹⁸E'e, jamaya Jesosa Quito nijje ba'yanijo Eyacuiñajjiya eseya huohui caje jama ba'a: —E'e, jamaya quea pame.

Cuanaya ojjaña mijo huohui caje jama ba'a: —Oya Jesosa Quitoja epeeji quea ja'a nee nee poani —acaje.

¹⁹Jamajjeya jashahuaba tiitiiquicue ojjaña Jesusaja epeeji cuana nijje quea bei nee eba'eji! ¡Pea Jesusaja epeeji cuana quea ja'a po meesahuacue pea'ai! ²⁰¡A'a noe ijiaji ecuiquiaja e'ijjiaji nisho onaja ba'ehua ba'e! Quea mete oya cuana poaje. Eyacuiñajji onijje quea quene poani posojo ma bobijo onaya quea mete poanijo, ja'a ijia majaji! Jamatii Eyacuiñajji pana ojjaña bobi quea pame. Jamatii ma bobi miya ijiajo onaya quea mete po mee chana', quea mimishi po o'oya mee chana'. ²¹E'e, e'e pojja'a Jesusaja pea epeeji quea mimishi poaje miyaya ma bobi ijiaña, acuijjajja na biso nei pojja'a ishiana ba majje. E'e pojja'a mi ba majjeya ohuaya quea mimishi acaje o'oya. Jamajjeya ja'a jamaya amajaji! Oya quea mimishi po o'oya chana'. ²²Jamajjeya ja'a Jesusaja pea epeeji cuana nijje jjamimicuijaja nobiajeaquijji bobi cuanajo, eba'e meeji cuanajo pea'ai! ¡Jashahuaba neinei qui majje quea pame nee nee acue! ¡Jesusaja epeeji cuana quea pame meesahuacue pea'ai! Jamaya poanijo ojjaña Jesusaja epeeji quea bihui nee capoahua. Jesusaja epeeji quea mimishi po mee cani o ba majje ca ca cajshahuabaquiahua jama ba'a: —Chojja, eya ona mimishi pomeejji poani. Jamaya eya quea tai poani.

²³E'e pojja'a Jesusaja epeeji jashahuabaquiani jama ba'a: —E'e pojja'a jiquio bobi eya ijiañaño, Eyacuiñajji enijje quea quene poaje —poani. Jamajjeya jamatii ijia cajo, Eyacuiñajji onijje quea quene poaje.

E'e, jashahuaba neinei quicue Eyacuiñajji esohui jayojja jama yayji! Eba'e quea mimishi miquea eba. Ja-

majjeya ja'a jamaya ajji! ¡E'e jojo nei quea pame nee pocue!

¡Jesosaja epeeji cuana quea jjashahuabaqui ja'a ejjapo meequi!

15 E'e, ecua quea jjashahuabaqui ja'a, Eyacuiñajji esohui ba neineiaña. Beca cuana cho, quea jjashahuabaqui ja'a pishana. Ona nijje ja'a quea quene pojji! ¡A'a jjashahuabaqui jama ba'a: —Eyaya ca eya ojjaña bobi ijji, jamatii onaaya eya quea mimishi poani poso acani —a'a jamaya pojji!

² Chojja, ¡Jesosaja epeeji ca'a'ama nijje a'a jjamimicuaiea nobiajeaqui bobi! ¡Oya cuana quea bei po meesahuacue miquea ojjaña bobi ijji jjimahuajo! E'e, ¡Jesosa nijje jjapee neinei sahuameequicue! ³ Jamajjeya ¡Jesosa jama ba'ecue, miquea ejjashahuabaqui jayojja jama pojjeama! Ohuaya oja chii jama acanaje ba'a: —Ecuea ejjashahuabaqui jayojja jama a sa po ajja. Chojja ecue chii, eyaya miquea ejjashahuabaqui ojo jama a sa ñña.

Yahuajo nei onaaya Jesosaja esohui tehue ca poa jama ba'a:

“Ecue Chii, eya miquea ejjashahuabaqui jayojja jama poanijo, dejja cuaa miya niñeba cani, eya pea'ai niñeba cani quea tai nee”.

Jamaya esohui yahuajo nei etehue'yo poa.

⁴ Eyacuiñajji ojjaña ojaya esohui yahuajo tehue mee ca poa eseya ojaya epeeji quea ja'a epo meesahuajji. Ma esohui etehue'yojo eseyaya baña onaa napa cajje ona nijje mimijaji ajja, eseya. Ma esohuijo pea'ai eseyaya baña Jesosa nijje jjapee neinei quianijo quijje ba'e tiitiije'yo onijje eyajo. ⁵ E'e, Eyacuiñajji eseya ba'e meesahua cani ojaya epeeji nei. Onaa napa cajje jjapeequi pajea'yo ajja. Jamajjeya eya onijje miani miqianajo jama ba'a: —Ecue Chii, ¡miquea epeeji cuana Shomajo ba'e ojee jjapeequi meesahuacue; Jesosaja esohui jama ameesahuacue! —eya poani.

⁶ Jesosa nijje ojee jjapeequianijo miqianaaya ojee Eyacuiñajji bihuiaña sohuicuayanajo, esejaya Emeshi Mese nei Jesosa Quitoja Chii miqianaaya bihuiaña jama ba'a: —Eyacuiñajji, miya ca ca oe quea pame nee, quea ca'a nee. Pea chama' mi jayojja —jamaya miqianaya poaje'yo tii tii.

¡Pea cuana nijje quea ja'a jjapeequicue!

⁷ Jamajjeya ¡Jesosa Quitohua miqianaya quea jea acani jayojja jama ojaya epeeji cuana quea jea nee acue! Jamajjeya pea cuaa jama acaje ba'a: —E'e, Eyacuiñajji quea pame nee. Ojaya epeeji cuaa onaya quea jea nee acani.

⁸ Yahuajo nei Eyacuiñajji ecuanaja etiiquiana huohui ca poa jama ba'a: “Eyaya miqiana huasijje huoojeaje ojjaña jaahuanajji” poa. Jamajjeya Jesosa Quito huoojea nei canaje ojaya yahuajo ehuoojeapana poa joya. Jamajjeya eseya ba mee canaje Eyacuiñajji ohua aca poa esohui jayojjaya e'e jojo nei acani.

⁹ Oya Jesosa poeyanaje Jodio pojjeama cuana Eyacui-

ñajji bihuia meeya pea'ai, jama po meeya pea'ai ba'a: “Eyacuiñajji, miya quea pame nee nee, quea ca'a nee nee. Ecuanaja mimishi cuanajo jjashahuaba tiitiqui ajja. Cuijea'yo majje quea bei ecuaa nijje poani”. Yahuajo nei Eyacuiñajji Dabi tehue mee ca poa oja sohui jama ba'a:

“Jamajjeya eyaya Jodio pojjeama cuana nijjeya miya bihuiaje. Sohuicuaya majje miya bihuiaje”. Jamaya yahuajo nei nei poa. ¹⁰ Yahuajo nei tehue mee ca poa jama pea'ai ba'a:

“Jodio pojjeama cuana, ¡Jodio cuana nijjeya Eyacuiñajji bihuiaje! ¡Quea bihui nee nee pocue!”

¹¹ Jamaya tehue mee ca poa pea'ai ba'a:

“Jodio pojjeama cuana, ¡Eyacuiñajji bihuiaje! E'e, ¡ojjaña cuaa Eyacuiñajji bihuiaje, sohuicuayacue jama ba'a: —Eyacuiñajji, miya quea pame nee —jamaya acue!”

Jamaya aca poa. ¹² Eyacuiñajji Isaia tehue mee ca poa jama ba'a:

“Quijje nei nei Isaija osecua cuayaje. Oya ona huoojea'yojji poaje'yo. Ohuaya Jodio pojjeama pea'ai mimishi cuijea'yo majje ba mee caje'yo, onijje ba'e tiitii mee caje'yo”.

E'e, jamaya yahuajo nei Isaia tehue mee ca poa Jesosajo. ¹³ Jamajjeya Eyacuiñajji eseya ba meesahua cani jama ba'a: Quijje ohuaya eseya ba'e tiitii mee caje'yo eyajo onijje. Eya Eyacuiñajji nijje mimi majamajani miqianajo jama ba'a: —Eyacuiñajji, ¡miquea epeeji cuana Shomajo ba'e quea bihui nee po meecue! ¡Minijje jjapeequianijo quea ja'a nee jjashahuabaqui meesahuacue! —eyaya ñña.

Edojjoshahua Pame miqiana nijje nequi. Oya quea ca'a nee nee. Miya ba meesahua cani miqiana quijje Eyacuiñajji nijje ba'e tiitiije'yo eyajo.

Pabohua Shomano cuana Jodio pojjeama cuana baqui sa acani

¹⁴ E'e ecuea epeeji cuana, eya ca ca iña miqianajo jjashahuabaqui jama ba'a: Miqianaya Jesosaja epeeji quea pame nee. Miqianajaya eba nei nei Eyacuiñajji esohui e'e nei Jesosajo. Ma esohui huohui huicha'a huicha'ña. Pea cuana quea ja'a nee jjapeequi meesahuaña Jesosa nijje, miqianaaya. ¹⁵ Jamatii Eyacuiñajji eya huohui canaje jayojja jama eyaya miqiana huasijje oja sohui tehuenaje. Beca ejjashahuabaqui quea ja'a nee nee tehuenaje mi jjabahuejjaqui meeji, miqianajaya epajea'yojji pojjeama. ¹⁶ E'e, Eyacuiñajji eya huoojea canaje Jodio pojjeama huasijje ojaya esohui huohuiya, Jesosajo ehuohuiji. Jiquio ecua yahuajo nei Eyacuiñajji nijje emimijji Jodio huasijje Eyacuiñajji esohui aca poa jayojja jama eyaya ojaya esohui Jesosajo cahuohuahua miqiana que, Jodio pojjeama huasijje Jesosa nijje ejjapeequi meesahuajji. Jesosa nijje jjapeequianijo, Eyacuiñajji miqiana nijje quea bihui nee poani, Edojjoshahua Pameya pea jjashahuabaquime po mee ca'yanijo.

¹⁷ Jamajjeya eya quea bihui nee poani. Jesosa Quitohua eya Jodio pojjeama cuana huasijje Eyacuiñajji

esohui huohui meesahua cajje ojaya epeeji cuana poanaje. ¹⁸ Jiquio ca ca oe eyaya miqianaya quea bihui huohuiaña jama ba'a: Jesosa Quitohua Jodio pojjeama quea pame ba'e meesahua cani Eyacuiñajjija esohui jama ojaya epeeji nei epojji. Ohuaya jamaya acanaje eya ojaya esohui huohuijji poanijojo. E'e, Jesosaa eya ameesahua canaje, huohui meesahua canaje pea'ai jama ba'a: ¹⁹ Eya Edojjoshahua Pameya ma dejjaa ajjima acani ameesahua canaje. Jamaya eya esohui huohui meesahua canaje quea ja'a nee Jenosanena huasijje, quea huesha nee pea'ai, johuaam Ininico huasijje pea'ai eyaya ojjaña Eyacuiñajjija esohui quea pame nee Jesusajo huohui neinei poquia poa. ²⁰ Jamaya eyaya esohui huohui sa aña pea cuana huasijje, onaja sohuihuohuiqui jjima huasijje. E'e, jiquio esohui quea pame Jesusajo shajja'ajja jjima cuana huasijje eyaya ma esohui huohui sa aña. ²¹ E'e, yahuajo nei Eyacuiñajjija esohui etehue'yo jama aca poa ba'a: "Ojjañaja yahuajo shajja'ajja jjimaa Eyacuiñajjija huoojea'yo ojjaña jaahuanajjijo shajja'ajja caje. Ojjaña jaya o ba pojjimaa oya ba caje". E'e, jamaya eyaya a sa aña, Eyacuiñajjija esohui etehue'yo yahuajo jama.

Pabo Shoma huasijje poqui sa poani Jesusaja epeeji cuana baa

²² Yahuajo eya quea huiso poqui sa poa Shoma huasijje miqiana baa. Jjeya pea'ai eya poqui sa poani. Quea huiso pea cuana huasijje esohui huohui poequi jjejojo mi poquinaje. ²³ Jjeya ca ca eya apoa. Ojjaña cuiñajji yasijje jiquiojo esohui huohuijeyonaje. Jamajjeya ma ecua eya yahuajo jjashahuabaquinaje jamaya eyaya jjeyahua nei aje. ²⁴ Eya poqui sa poani España meshi yasijje esohui huohuiya. Jamajjeya España meshi yasijje poquijeya eyaya miqianaya bananaje. Shomajo anije beca cahume pojja'a. Quea bihui nee nee eya poaje miqiana nijje nequinana majje. Miqiana nijje mimi majje eya poquije España meshi yasijje. E'e pojja'a miqianaaya eya aquiana quiaje epoqui meesahuajji pojja'a. ²⁵ Miqiana huasijje poqui jjimahua eya poquije so'o Jenosanena huasijje Jesusaja epeeji aema huasijje ejjeshejji quiaa, Jodio cuana huasijje. ²⁶ Ma ejjeshejji Jesusaja epeeji cuana Masenonia meshi ba'eya, Asia meshi ba'eya pea'aiya chicha canaje Jesusaja epeeji aema' ba'e meesahuajji. Jamaya oya cuana a sa poanaje. Oya Jodio pojjeama poani. ²⁷ Jamatii quea bihui nee quia canaje. E'e, ohuaya ejjeshejji caquia cahua Jesusaja epeeji Jodio cuana ba'e meesahuajji. E'e, Eyacuiñajjiya Jodio cuana iyaa coo ca poa ojaya epeeji epojji. Majoya Jodio cuana Eyacuiñajjija esohui quea pame nee Jesusajo Jodio pojjeama cuana huohui cajje Jesosa nijje jjapeequinaje. Jamajjeya Jodio pojjeama cuana Jodio cuana huasijje eba'e meejji cahuojea cahua, Jesusaja epeeji cuana. ²⁸ Jamajjeya Jenosanena huasijje poqui majje, ma ejjeshejji quia majje eya poquije España meshi yasijje. Poquijeya eyaya miqianaya bananaje. ²⁹ Miqianaya banana majje

quea bihui nee nee poaje. Ojee jjapeequianijo, Jesosaja esohuijjo eseya quea bihui nee poaje'yo.

³⁰ Epeeji cuana, esejaya Emeshi Mese nei Jesosa nijje jjapeequianijo, Edojjoshahua Pameya eya miqianajaya quea jea ameesahua canijo, ¡Eyacuiñajji nijje mimi-cue ejo! ¡Jama acue ba'a: —Eyacuiñajji, Pabo miquea esohui huohui canijo quea camaja nee nee. ¡Oya jaahuana neineicue! ³¹ Jamajjeya ¡Jesusaja epeeji pojjeama cuana Jenosanenajo ba'eya oya enapajji pojjeama! ¡Miquea epeeji jomajo ba'e quea bihui nee ejjeshejji jjeshe meesahuacue ma Pabohua ye cani! —jama oe miqianaaya acue Eyacuiñajji nijje mimi majje!

³² E'e pojja'a Eyacuiñajjiya eya miqiana que huoojea caje. Ohuaya eseya quea bihui nee jjapeequi meesahua caje quea pame nee.

³³ Eyacuiñajjiya eseya quea bei ba'e meesahua cani. ¡Ohuaya miqianaya cajaanahua cahua! ¡Jamaya ca-pohua!

Pabohua Jesusaja epeeji cuana huasijje tehue canaje quea bihui o pojji

16 Ecuana epeeji epona Peme bajjani Jesosa nijje chacochoacoani Senesea cuiñajjijo. Oya Jesusaja epeeji quea pame nee. Jesusaja pea epeeji cuana jaahuana cani. ² Miqiana que poquiyajo, ¡oya huohui-cue jama ba'a: —Mi poeyajo ecua quea bihui nee —acue!

Ohuaya eya ba'e meesahua cani, pea Jesusaja epeeji cuana pea'ai ba'e meesahua cani quea huiso nee. Jamajjeya miqianaya Jesusaja epeeji poani pea'aijo ¡oya ja'ajjequicue! ¡Oya aquiana quiacue eba'ejji! ³ Pisinapea'ai, oja yahue Aquiana pea'ai miqiana nijje ba'e. Oya huohui'ajjacue jama ba'a: —¿Achajja acuae quiana so'o? —ecuea ebajji.

Oya cuana enijje chacochoaconaje. Jesusaja esohui huohui sahua canaje. ⁴ E'e, eyaya Jesusaja esohui huohuiañajo, pea cuana cuia'ajja canaje. Pisinapea'ai ca ca e nahuejo beshahua nei cuia canaje cuana. Jamajjeya eyaya, Pabohua Jesusaja epeeji Jodio pojjeama cuana nijjeya oya huohuiaña jama ba'a: —E'e, jamaya miqianaya quea pame nee nee poanaje —ecuaaya anaje.

⁵ Ojjaña Jesusaja epeeji cuana ma Pisinaja equijo jjachichaquiani eyaya huohui'ajjaña jama ba'a: —¿Achajja acuae quiana ani so'o? —ecuanaja ebajji.

Jamaya acue pea'ai ecuea epeeji Epeneto bajjani. Asia meshi ba'ya poa oya. Ecuea esohui Jesusajo shajja'ajja majje oya ebionei Jesusaja epeeji poanaje jomajo Asia meshi ba'yahua. ⁶ Mania pea'ai quea huiso chacochoaconaje miqiana nijje. ¡Oya ecuea esohui huohuicue quea bihui nee o pojji! ⁷ ¡Oya jayojjaya mimicue Anidónico nijje, Jonia pea'ai nijje! Oya Jodio cuana, ecuea huapa pojjeama cuana. Oya enijje ejeanobia jaanaje. Jesusaja epeeji quea pame nee oya poa, Jesusaja huoojea'yo esohui huohuijji. E Jesosa nijje jjapeequi jjimahua oya cuana jjapeequia poa. ⁸ ¡Oya jayojjaya mimicue Amepia nijje pea'ai! Oya Emeshi Mese nei Jesusaja epeeji nei. Jamajjeya:

—¿Achajja ami ani so'o, ecuea epeeji? —acue oya, ecuea ebajji.

⁹ ¡Oya jayojja mimicue Omano nijje, ma ecuana nijje Jesosa Quito nijje chacochoaconaje! ¡Etaqui pea'ai, ¹⁰ Apene pea'ai jama acue! Oya Emeshi Mese nei nijje chacochoaconaje quea nee poanaje quea huiso. Ecuanaja eba oya Jesosaja epeeji quea ca'a nee. ¡Ojjaña Anisitomoja huapa pojjeama cuana ecuea esohui huohucue pea'ai quea bihui nee o pojji! ¹¹ ¡Jodio dejja Jenonio bajjani jama acue! Oya huapa pojjeama pea'ai poani. ¡Oya Nasiso, Nasisoja huapa pojjeama ecuea esohui huohucue pea'ai, Jesosa nijje jjapeequianijo! ¹² ¡Tipena, Tiposa oya jayojjaya huohucue! Ma epona cuana Emeshi Mese neijo, Jesosajo quea huiso chacochoaconaje. Epona Pesina bajjani pea'ai Emeshi Mese neijo janobajjima nei chacochoaconaje. ¡Oya pea'ai ecuea esohui huohucue, ecuea epeeji nei oya! ¹³ ¡Jamaya mimicue Shopo nijje, ojaya enaese nijje pea'ai! Ojjaña eba Jesosaa, Emeshi Mese neiya Shopo baba-ca canaje ojaya esohui huohuijji. Ojaya enaeseya eya jaahuana canaje ecuea enaeseya jayojjaya. ¹⁴ Jamajjeya oya jayojjaya huohucue ejo Jesosaja pea epeeji cuana nijje pea'ai, ma bajjani cuana nijje ba'a: Asinisito, Peconete, Jemesi, Patomasi, Jemase pea'ai. ¡Ojjaña Jesosaja epeeji onijje nequica pea'ai jamaya acue! ¹⁵ ¡Ecuea esohui quea bihui nee o pojji huohucue Pinonoco, Jofña, Neneo, oja jjo'i pea'ai, Onipa pea'ai ojjaña Jesosaja epeeji cuana onijje nequica pea'ai huohucue!

¹⁶ E'e, miqianaya jjachichaqui majje ¡pea cuana nijje quea bihui nee mimicue jama ba'a: —¿Achajja ami ani so'o, epeeji? —acue!

E'e, ojjaña Jesosaja epeeji cuaa jiquiojo enijje nequiya miqianaya Shomajo ba'e quea bihui nee acani jama ba'a: —¿Achajja acuae quiana ani so'o? —acani ojaya ebajji.

Mahuiso.

Pabohua pea esohui quea ja'a nee eba'e meeji huohui cani

¹⁷ Ecuea epeeji cuana, eyaya miqiana cuana pea esohui tehueña jama ba'a: Beca cuaa miqiana nijje nequiya Jesosaja epeeji cuana pea epeeji cuana nijje jjamimicuaiea nobiajea meeji cani. Pea esohui e'e nei pojjeama Jesosa Quitojo huohui cani pea'ai, ecuanaja esohui jayojja jama pojjeama. Ecuaaya ca ca e'e nei esohui huohuiaña. ¡A'a oya cuana shajja'ajjajji! ¡A'a jja oe onijje jjapeequijji! ¹⁸ Ma siajjepojji cuana esejaya Emeshi Mese neijo Jesosajo chaco ajja. Chojja. Oya cuana esohui huohuijji nisho. Ojaya ejjashahuabaquijji quea quehua jayojja jama acani. Mimiani esohui quea pame jayojja. Jamatii quea tai. Siajje poani. Jama poani ba'a: —E'e, eya miqianajaya epeeji; miqianaya quea pame nee nee ecuea epeeji —anisho cani. Jamaya Jesosaja epeeji quea jjashahuabaqui ja'a pishana dasia cani.

¹⁹ Ojjaña Jesosaja epeeji cuaa shajja'ajja canaje miqianaya Shomajo ba'e Eyacuiñajji esohui jayojjaya

ba'ani. Jamajjeya eya miqianajo quea bihui nee. ¡Quea ja'a nee jjashahuabaquicue quea pame nee eba'ejji! ¡Ma esohui huohuijji nishoja esohui e'e nei pojjeama a'a shajja'ajjajji! ¡A'a jamaya pojji! ²⁰ E'e, Eyacuiñajji eseya quea bei ba'e meesahua cani, quea ja'a jjashahuabaqui meesahua cani jjeya nei. Ohuaya miqianaya Edosiquianaja epeeji mimicuaieanobiajea meesahua caje'yo. Miqianaya ojaya edasia'yojji pojjeama. E'e, ¡Jesosa Quitohua esejaya Emeshi Mese neiya miqianaya cajaanahua cahua!

²¹ Timoteo enijje chacochoaconi Jesosa Quito nijje. Ohuaya pea'ai miqianaya jama huohui'ajjame acani ba'a: —¿Achajja acuae quiana ani so'o? —acani.

Ecuea huapa pojjeama Jodio dejja cuana Nosio, Jasoni, Sosipate pea'aiya jama huohui'ajjame acani ba'a: —¿Achajja acuae quiana ani so'o? —acani pea'ai.

²² Cayo pea'ai oya jayojjaya miqiana nijje mimiani. Eya oja equijo ba'e. Ojaya equijo Jesosaja epeeji cuana ojee jjachichaquiani Eyacuiñajji esohui baa. Enasitohua, pea epeeji Cuanito bajjaninya pea'aiya huohui'ajja mee cani jama ba'a: —Epeeji cuana, ¿achajja acuae quiana ani so'o? —acani. Oya Enasito ejjesheji cuiñajji poani, ma Conitio dejja etiiya chicha mee cani ejjesheji.

Eya ca iña Jesosaja epeeji Tesio bajjani. Eyaya Paboya esohui miqiana que tehueña ojo. Eyaya miqianaya huohuiaña jama ba'a: —Miqianaya Jesosa Quitoja epeeji, esejaya Emeshi Mese neija epeeji poanijo, ohuaya miqianaya quea pame nee cajaanahua cahua. E'e, jamaya capoahua —jamaya Pabohua eya tehue mee cani.

Eyacuiñajji bihuia cani Pabohua

²⁵ Eyacuiñajji ejjabihuaqui jama ba'a: —Eyacuiñajji, miya quea pame nee, quea ca'a nee nee. Miquea esohui jayojja jama ba'e meeña ecuanaya. Eyacuiñajji, miyaya eya huohui meesahuaña esohui quea pame nee Jesosa Quitojo. Ba meesahuaña Jesosa Quito ca ca oe mimishi cuijea'yoyji poani ojjaña. Maya yahuajo ecuanaja etiiquianaja ba jjima poa. ²⁶ Jodio esohui huohuijji yahuajo nei ba'ya poaa Jesosajo huohui ca poa quea ja'a pishana, ojaya ba jjima pishana. Jjeya ca ca ma esohui e'e nei miyaya ba meesahuaña quea ja'a nee.

—E'e Eyacuiñajji, miya ba'e tiitiani. Miya ca ca oya ojjaña cuana ojjaña meshijo ba'e ba meesahuaña esohui e'e nei Jesosaja. Ma esohui quea pame jayojja jama amesahuaña pea'ai. Jamaya ojjaña eba poaje.

²⁷ —E'e Eyacuiñajji, miya oe nei Eyacuiñajji, pea chama'. Ojjaña ca ca oe miquea eba, miquea nei. Ecuaña Jesosaja epeeji poanijo ecuanajaya eba miya quea pame nee nee, quea ca'a nee poani tii tii. Jamaya capoahua —jamaya ejjabihuaqui Eyacuiñajji.

Eya Pabo bajjani. Mahuiso ecuea esohui miqiana Shoma cuiñajji ba'e yasijje tehue meeña. Apoa.

1 CONITIO

Pabohua tehue canaje Jesusaja epeeji cuana Conitojo ba'e yasijje

1 Jesusaja epeeji cuana, eya Pabo, Jesusa Quitoja huoojea'yo ojaya esohui huohuijji. Jamaya Eyacuiñajjiya a sa acani. Jesusaja epeeji Sotene enijje nequi. ² Eyaya tehueaña miqiana huasijje, Jesusaja epeeji cuana Conito cuiñajjiyo ba'eca huasijje, ojjaña meshijo ba'eca huasijje pea'ai tehueaña. E'e, yahuajo Eyacuiñajjiya miqianaya ojjaña babaca canaje Jesusaja epeeji e'e jojo nei epo'yojji, quea pame nee. Jamajjeya miqianaya ojjaña cuana jama poani ba'a: —Jesusa, ¡e jaahuanajji pocue! —jamaya poani esejaya Emeshi Mese nei Jesusa Quito nijje, ojjaña esejaya Emeshi Mese nei nijje. ³ ¡Eseyaya Emeshi Mese nei Jesusa Quitohua, Eyacuiñajjiya esejaya Chiya pea'ai miqianaya ca-jaahuana cahua, quea bei caba'e mee cahua pea'ai!

Pabohua Eyacuiñajji bihuia canaje

⁴ Eya Eyacuiñajji nijje mimiani miqianajo quea huiso nee jama ba'a: —Eyacuiñajji, miya quea pame nee nee. Jesusa Quitoja epeeji ojjaña cuana jaahuanaña quea pame nee nee —eya poani.

⁵ E'e epeeji cuana, miqianaya Jesusa Quitoja epeeji poanijo, ohuaya miqianaya quea pame nee amee-sahua cani tii, quea huiso nee. Jamajjeya miqianaya ojaya ejjashahuabaquijji ba meesahua canaje quea ja'a nee. Ojaya esohui ba meesahua canaje, huohui meesahua canaje pea'ai. ⁶ Esohui quea pame nee Jesusa Quitoja eyaya miqianaya huohui huicha'a huicha'anaje yahuajo. Jamajjeya ojaya esohui jayojja jama miqianaaya atiitiaña. ⁷ Jamajjeya esejaya Emeshi Mese nei Jesusa Quitoja epoe o'oyajjiyo ishoañajo, o jayojjaya jama Edojjoshahua Pameya miqianaya amee-sahua cani quea huiso. ⁸ E'e, Edojjoshahua Pameya miqianaya Jesusa jayojja jama amee canijo, Jesusa nijje jjapeequi pajea'yo ajja. Jamajjeya esejaya Emeshi Mese nei poe o'oyajo, Eyacuiñajjiya miqianaya ba caje mimishi'ama. ⁹ E'e, Eyacuiñajjiya miqianaya babaca canaje ojaya Ebacua Ejja nijje, Jesusa Quito nijje ejjapeequijji tii, esejaya Emeshi Mese nei nijje. Eyacuiñajjiya ojaya esohui jayojja jama acaje'yo nei nei, e'e jojo nei; miqianaya Jesusaja epeeji quea ca'a nee po mee caje'yo tii tii.

Ojaya epeeji cuana ojee cajjapeequi'yahua Jesusa nijje

¹⁰ Ecuea epeeji cuana, Jesusa Quitoja epeeji Coeja huapa pojjeama poeyanaje e que. Enijje miminaje mi-

quianajo jama ba'a: —Pabo, Jesusa Quitoja epeeji cuana Conitojo ba'e jjamimicuijjea nobiajeaquiani quea huiso nee —poanaje.

Epeeji cuana, ¿apiojji acuae nequiana jjamimicuijjea nobiajeaquiani so'o? Jamaya miqianaya quea tai poani.

Jamajjeya ¡shajja'ajjacue mo! Eseyaya Emeshi Mese neiya Jesusa Quitohua eya huoojea canaje ojaya esohui huohuiya. Jamajjeya eyaya miqianaya huohuaña jama ba'a: Ojjaña miqianaya Jesusa Quitoja epeeji poanijo ¡ojjaña ojaya ejjashahuabaquijji jayojja jama jjashahuabaquicue! ¡A'a jjamimicuijjea nobiajeaquijji! ¡A'a peapea ejjashahuabaquijji ajji! E'e, ¡ojee jjapeequicue quea bei nee Jesusa nijje! ¹² Miqianaya aje oe beca cuana jama poani ba'a: —Eya ca iña Pabo shajja'ajjajji poani.

Pea ca jama poani ba'a: —Eya ca iña Apono shajja'ajjajji.

Pea ca jama poani ba'a: —Eya ca iña Peno shajja'ajjajji.

Pea ca jama poani ba'a: —Eya ca iña Jesusa Quito shajja'ajjajji poani —nequiana poani, de.

¹³ ¿Apiojji acuae nequiana jamaya jjamimicuijjea nobiajeaquime poani so'o? ¿A'a Jesusa ojjañaja mimishi cuijea'yojji pojjeama? ¿A'a ojjaña jaahuanajji pojjeama? E'e, oya ojjaña ojaya epeeji cuanaja mimishi cuijea'yojji, ese jaahuanajji oe nei poani tii tii. Eya pojjeama miqianaja mimishijo manoj'e'yo. Jesusa Quito ca ca oe miqianajo mano'yonaje acui ecueata'apeejo miqianajaya mimishi cuijea'yojji. Onaaya miqianaya besa mee canaje Jesusa nijje jjapeequianijo, enijje jjapeequianijo pojjeama. ¹⁴ Jamajjeya eya, Pabo quea bihui poani ecuea miqianaya besa mee jjimajo. Jesusaja epeeji cuana oe pojji eyaya besa meenaje Quipo, Mayo pea'ai. ¹⁵ E'e, eyaya oe pojji besa meenajejo, ejjami-micuijjea nobiajeaquijji pojjeama pea cuana nijje jama ba'a: —Pabohua ecua besa mee canaje o shajja'ajjajji epojji —e'ajji pojjeama.

E'e, eyaya miqianaya besa meenaje ecuea epeeji epojji pojjeama.

¹⁶ E'e pojja'a eyaya Etepana, ojaya huapa pojjeama cuana pea'ai besa meenaje. Oe pojji pea cuana besa meenaje pea'ai pojja'a. Cua'a de, pajea'yonaje eyaya.

¹⁷ Jesusa Quitoja eya huoojea jjima ojaya epeeji cuana besa meeya. Chojja, ohuaya eya huoojea canaje ojaya esohui quea pame nee huohuiya jama ba'a: —Ecuea esohui quea pame nee huohuiañajo, ¡eya acui ecueata'apeejo mano'yonajejo oe huohucue! ¡A'a dejjaja ejjashahuabaquijji jayojja jama huohuijji, ma ojaya ejjas-

hahuabaquijji quea ja'a poso acanija! Jamaya ehuhui'yo jojjemo, miya quea sohui ja'a jojjemo ojjaña mi bihuiajji pome. Jamajjeya jamaya ehuhui pojje-mo Eyacuiñajji bihuia jjima acame. "Jesosa Quito acui ecueata'apeejo mano'yonaje ecuanaja mimishi cuijea'-yojji" ajjima acame onaaya —jamaya Jesosaa eya huohui cani.

Eyacuiñajji ejjashahuabaquijji esejaya ejjashahuabaquijji jayojja jama pojjeama

¹⁸ Eyacuiñajji esohui quea pame nee Jesosajo, oya mano'yonaje esejaya mimishijo shajja'ajja majje shaj-jama' cuana jama poanaje ba'a: —Cajaa Jesosaja esohui, ma oya ojjañaja mimishi cuijea'yojji poani; acui ecueata'apeejo mano'yonaje cajaa pea'ai —poanaje. Maya Eyacuiñajjiya quijje quea nee nee po mee caje'-yo.

Eseyá, Jesosaja epeeji cuana ca ca Eyacuiñajjiya ba'e tiitii mee caje'yo. E'e, oja sohui shajja'ajja majje eseya jama poani ba'a: —Eyacuiñajji quea ca'a nee neeya eseya ba'e tiitii mee caje'yo onijje; oja Bacua Ejja Jesosa acui ecueata'apeejo mano'yonaje esejaya mimishi cuijea'yojji —poani.

¹⁹ E'e, yahuajo nei Eyacuiñajjiya Isaia tehue mee ca poa jama ba'a:

"Beca cuana jama poani ba'a: —Ecuea eba ojjaña —poani. O shajja'ajjajji poaniya pea'ai jama acani ba'a: —E'e de, ¡ojjaña ojaya eba! —poso acani. Ojjaña ojaya eba poso acani. Eyaya ca ca ojjaña cuana ba meeje oja-ya eba oe pojji nei". Jamaya Eyacuiñajjiya yahuajo nei Isaia tehue mee ca poa.

²⁰ E'e, Eyacuiñajji ese jayojja jama jjashahuabaqui ajja. Ojjaña ba epo poso ohuaya ba cani quea sapa ca'a. E'e, dejja quea huiso esohui bajji, esohui huohuijji cuana, joya dejja cuanaja ejjashahuabaquijji mimicia-jeanobiajea cani pea'ai quea huiso ba epo poso Eyacuiñajji esohuijji Jesosajo jjabahuejjaqui mee ajja jama ba'a: Eyacuiñajjiya eseya ba cani emimishi cuijea'-yo Jesosa nijje jjapeequianijo ma dejja cuanajaya ba jjima. Yajja jjabahuejjaqui meeme yajji, quea huiso ba epo poso oya jjabahuejjaqui.

²¹ Eyacuiñajji ejjashahuabaquijji quea ja'a poanijo ohuaya eseya ba'e tiitii mee caje onijje, Jesosa nijje jjapeequianijo, ojaya esohui shajja'ajja poquiañajo pea'ai. Ohuaya eya esohui quea pame nee Jesosajo huohui mee canaje. Jamatii ojjaña quea jjashahuabaqui quehua jama poani ba'a: —¿Yajja yajji joya miquianaaya huohuiaña Jesosa mano'yonaje esejo, esejaya mimishi cuijea'yojji? Quea jjashahuabaqui quehua miya poani, de —jamaya Jesosaja epeeji pojjeama poani.

²² E'e de, ecuaña Jodio cuaa jama acani ba'a: —¡Eyacuiñajjiya jayojja acue, ma dejja ajjima acani! Majoya ecuaaya miya baje e'e jojo nei Eyacuiñajjiya huoojea'yo ojaya esohui huohuijji —jamaya quea tai poani Jodio cuana.

—¡Esohui huohuijji quea huiso ba epo jayojja jama mimicie! Jamajjeya ecuaaya miya baje Eyacuiñajjiya

huoojea'yo esohui huohuijji —jamaya quea tai poani Jodio pojjeama cuana.

²³ Ecuanaya ca ca jama poani ba'a: —Jesosa Quito Eyacuiñajjiya huoojea'yo ojjaña jaahuanajji acui ecueata'apeejo mano'yonaje eseja mimishi cuijea'yojji.

Jesososa Quitoja esohui shajja'ajja sa po ajja jjejojo Jodio cuana quea quene poani, poquiquehuani tii onijje jjapeequi ajja jjejojo. Jodio pojjeama cuaa pea'ai esohui cajaa acani: —Chojja Pabo, miyaya esohui quea ja'a pojjeama huohuiaña —jama siajje pomeya onaya poani.

²⁴ Jamatii Eyacuiñajjiya Jodio cuana, Jodio pojjeama cuana pea'ai babaca canaje Jesosa Quitoja epeeji nei epo'yojji. Eseyaya, Jesosa Quitoja epeeji cuanaja eba Jesosa Quitoja esohui quea pame nee. E'e, Eyacuiñajjiya Jesosa huoojea canaje mimishi cuijea'yojji. Jamajjeya esejaya eba Eyacuiñajji quea ca'a nee nee, ojjaña ojaya eba. ²⁵ E'e, Eyacuiñajji quea jjashahuabaqui ja'a nee nee. Ojjaña nei nei ojaya eba. Oya quea ca'a nee nee; pea chama' o jayojja. Jamajjeya ohuaya eseya ba'e tiitii mee caje'yo Jesosa Quito acui ecueata'apeejo esejaya mimishijo mano'yonajejo. Jamatii Jesosaja epeeji pojjeama aje oe jama poani ba'a: —¿Yajja poajo acuae Eyacuiñajjiya ecuanaja mimishi cuijea ca'yome Jesosa mano'ya poajo? Chojja —acani quea quehua jjashahuabaquiani jjejojo.

Eyacuiñajjiya eseya babaca canaje ojaya epeeji epojji jamatii onajaya eseya boti'ama

²⁶ Epeeji cuana, jjabashahuabaquie! Eyacuiñajjiya miquianaya Jesosa nijje jjapeequi meesahua jjimajo, ¿achajja miquianaya poanaje? Beshahua nei esohui ba po jjima. Beshahua nei ona huoojea po jjima, emeshi mese cuanaja bacua po jjima pea'ai miquianaya poanaje. ²⁷ Jamatii Jesosaja epeeji pojjeamaa jama acani ba'a: —Jesosaja epeeji quea pame pojjeama. Oya cuana quea jjashahuabaqui ja'a pojjeama —jama posoya acani Jesosaja epeeji pojjeama cuaa.

Eyacuiñajjiya ca ca eseya babaca canaje ojaya epeeji epojji, quea huiso esohui ba epo ona quea bicho po meeji. Eyacuiñajji jama poani ba'a: —Jesosaja epeeji pojjeama quea pame pojjeama jjashahuabaquiani —jamaya Eyacuiñajji poani.

²⁸ E'e, Jesosaja epeeji pojjeamaa eseya niñe ba cani jama ba'a: —Jesosaja epeeji cuana ona huoojeajji jayojja pojjeama, esohui ba po jjima jayojja pea'ai, aema' pea'ai. ¿Ajeo oya cuana eshajja'ajjajji? —poani.

Jamatii Eyacuiñajjiya eseya iyaa ca poa ojaya ebabaca. Jamajjeya ohuaya onaya ba mee caje jama ba'a: —Miya ojjaña ba epo poso poanijo, miquianajaya ejjashahuabaquijji quea tai. Miquianaya quea pame pojjeama. ¡Quea bicho pocue! —Eyacuiñajjiya acani.

²⁹ Jamajjeya ae pishana Eyacuiñajji nijje mimije jama ba'a: —Eyacuiñajji, ¡bacue! Eya ca ca iña jamatii quea pame nee —jamaya emimijji pojjeama miya Eyacuiñajji nijje.

Quijje pea'ai ojjaña Eyacuiñajji cojja nei nequi majje quea bicho, quea mete poaje. ³⁰ Jamatii Eyacuiñajjiya

eseya Jesosa Quito nijje jjapeequi meesahua ca'yonaje. Ojaya epeeji poanijo, ojaya ejjashahuabaquijji ba meesahua cani. Ojaya esohui jayojja jama ba'e meesahua cani. Mimishi cuijea'yo majje quea boejea po mee cani. Esey ba'e tii tii mee caje'yo onijje, Eyacuiñajjiya. ³¹ Yahuajo nei Eyacuiñajjiya esohui etehue'yo jama poa ba'a:

“Jamajjeya jesejaya Emeshi Mese nei bihuiacue! Oya oe nei quea pame nee. A'a jama pojji ba'a: —Eya ca ca iña jamatii quea pame nee”.

Jamaya Eyacuiñajjiya esohui etehue'yo poa.

Jesosa Quito acui ecueata'apeejo mano'yonaje

2 Ecuea epeeji cuana, yahuajo miqiana que poe jeahuaa eyaya esohui quea pame Jesusajo huohuinaje. Eya jama po jjima ba'a: —Eya ohueya dejja ojjaña esohui ba epo nei nei. Ecuea emimi quea ja'a. ¡Jamajjeya shajja'ajjacue mo! —jamaya ajjima ecuea.

Chojja, miqiana que poe majje eyaya Eyacuiñajjiya esohui e'e nei Jesosa Quitojo huohuinaje, ma onajaya yahuajo ba jjima poa. ² Miqiana que poe jjimahua eya jjashahuabaquinaje jama ba'a: —Eyaya Conitojo ba'e cuana huohuije esohui quea pame nee Jesosa Quitojo, ma acui ecueata'a peejo mano'yonaje esejaya mimishi cuijea'yojji. Pea esohui huohui jjima aje.

³ Miqiana que poe majje eya jjashahuaba neineiquinaje jama ba'a: —¿A'a eyaya Eyacuiñajjiya esohui huohuije quea ja'a nee pojja'a? —eya quea mete poanaje.

⁴ Jamajjeya Edojjoshahua Pame quea ca'a neeya eya huohui meesahua canaje esohui e'e nei miqianajaya eshajja'ajjajji. Esohui huohuijji ojjaña ba epohua jayojja jama ecuea huohui jjima. ⁵ Jamajjeya Eyacuiñajjiya miqianaya Jesosa Quito nijje jjapeequi meesahua canajejo, ojaya epeeji nei poanaje. Dejja ojjaña esohui ba epohua jama ecuea huohui jjima.

Eyacuiñajjiya ejjashahuabaquijji e'e jojo nei quea ja'a nee

⁶ Jamatii Jesusaja epeeji eyacua pojjeama eyaya huohuiaña; etii jayojja eyaya huohuiaña esohui quea ja'a nee, Eyacuiñajjiya ejjashahuabaquijji. Jesusaja epeeji pojjeamaja esohui jayojja jama pojjeama, emeshi mese cuanaja esohui jayojja jama pojjeama eyaya esohui huohuiaña, eshahuaaja esohui jayojja jama pojjeama pea'ai. Maya quijje ojjaña ca'a'ama poaje. Eyacuiñajjiya oya cuana ona huoojeajji popajea mee caje'yo.

⁷ E'e, ojjaña nei nei Eyacuiñajjiya eba. Eyaya Eyacuiñajjiya ejjashahuabaquijji quea ja'a nee Jesosa Quitojo huohuiaña. Yahuajo maya ejjashahuabaquijji ba mee jjima ojjaña, Eyacuiñajjiya. Jjeya ca ca ohuaya eseya, ojaya ehoojea'yo cuana ba mee canaje jama ba'a: Meshi pana jjimahuajo tii Eyacuiñajjiya eseya babaca ca poa Jesusaja epeeji cuana epo'yojji, onijje eba'e tiitii'yojji. Jesosa Quitohua mano'yo majje oja epeeji cuana ba'e tiitii mee caje'yo quea pame nee onijje. Jamaya

Eyacuiñajji jjashahuabaquia poa. ⁸ Maya Jodio pojjeamaja emeshi meseja ba jjima poa; Jodio etii cuanaja ba jjima pea'ai poa. Maya onajaya eba pojjeemo Emeshi Mese nei quea ca'a Jesosa Quito bajjani acui ecueata'a peejo mano mee'yo jjima aca quiaje. ⁹ Jamatii Eyacuiñajjiya yahuajo nei esohui tehue mee ca poa jama ba'a:

“Oya esejaya quea jea neejo, Eyacuiñajjiya eseya quea pame nee acaje'yo, ojjaña ojaya epeeji cuana. Maya esejaya ba jjima ecojjaja, maya esejaya shajja'ajja jjima eshajjaja, huohui jjima pea'ai. Maya eseya jjashahuabaqui jjima pea'ai. Esey ohuaya quea pame nee nee acaje'yo”.

Yahuajo nei jamaya tehue mee ca poa. ¹⁰ Maya Edojjoshahua Pameya eseya ba mee cani: Eyacuiñajjiya quea pame nee acani esejo, ma Jesosa Quitohua ojaya epeeji cuana ba'e tiitii mee caje'yo onijje eyajo.

Ojjaña Edojjoshahua Pameja eba. Jamajjeya ese que dobiqumajje ohuaya eseya ba mee cani Eyacuiñajjiya ejjashahuabaquijji. ¹¹ ¿Ajea eba oe dejjaja ejjashahuabaquijji? Ojaya eba ojaye nei ojaya ejjashahuabaquijji, onajaya ba jjima. Oya jayojjaya Edojjoshahua Pameja eba Eyacuiñajjiya ejjashahuabaquijji, ojaye neija. Eyacuiñajjiya eseya ba'e tiitii mee caje'yo Jesosa nijje jjapeequianijo ojaya eba nei. ¹² E'e, eseya Jesusaja epeeji poanijo shajjama' jayojja jama jjashahuabaqui ajja. Jamajjeya Eyacuiñajjiya Edojjoshahua Pame ese que dobiqumajje mee canaje. Ohuaya eseya ba mee canaje jama ba'a: Jesusaja epeeji poanijo ca ca oe Eyacuiñajjiya eseya ba'e tiitii mee caje'yo onijje, eseya ojaya quea jea neejo. Quea pame nee nee eseya acaje'yo pea'ai ohuaya. ¹³ Jamajjeya Jesusaja epeeji pojjeamaja esohui jayojja jama esejaya ehohuijji pojjeama. Chojja, Edojjoshahua Pameya eseya huohui meesahua cani ojaya ejjashahuabaquijji quea ja'a Jesusaja epeeji nei cuana huasijje.

¹⁴ Jamatii Jesusaja epeeji pojjeamaja ba jjima Edojjoshahua Pame. Ba meeme ajja Edojjoshahua Pameja ejjashahuabaquijji, quea quehua nee ojaya. Jamajjeya jama poani ba'a: —¿Apiojji Jesusa nijje ejjapeequijji? Maya ecuanajaya esohui quea quehua —jamaya poani.

E'e, ojaya jamatii ebajji pojjeama Jesosa Quitoja esohui. Maya Edojjoshahua Pameya eseya ba mee cani. ¹⁵ Esey ca ca Jesusaja epeeji poani. Edojjoshahua Pameya ese que dobiqumajje ba mee cani ojjaña eba'ejji quea pame; eba'ejji quea mimishi pea'ai ba mee cani jama ba'a: —E'e, jamaya. ¡Quea pame nee acue! —amee cani—. Pea'ai quea tai jjashahuabaquianijo, ohuaya jama amee cani ba'a: —Chojja, jamaya quea tai, Eyacuiñajjiya boti'ama —ameesahua cani pea'ai ojjaña quea ja'a eba'ejji.

Maya onajaya quea quehua nee nee. Jamajjeya Jesusaja epeeji pojjeamaja ojaya epeeji eniñebajji pojjeama jama ba'a: —¿Apiojji miqianaya jama ba'ani? ¿Apiojji ma esohui shajja'ajjaña, huohuiaña pea'ai? —jamaya e'ajji pojjeama onajaya.

¹⁶ E'e, yahuajo Eyacuiñajjiya esohui etehue'yo jama poa ba'a:

“Ojjaña Eyacuiñajjija ejjashahuabaquijji ¿aje eba? Chama'. ¿A'a eseyaya Eyacuiñajji ba meesahuaje? Chojja”.

Jamaya yahuaajo nei poa.

Jamatii Jesosa nijje jjapeequianijo, Edojjoshahua Pameya eseya Eyacuiñajjija ejjashahuabaquijji ba meesahua cani.

Pabohua Jesusaja epeeji jjabahuejjaqui mee cani

3 Ecuea epeeji cuana, miqianaya e bacua esho'i jayojja jama poani, quea jjashahuabaqui ja'a pojjeama poani tii tii. E'e, yahuaajo miqiana nijje nequiya eyaya Jesosa Quitoja huohuinaje. Jamatii beshahua nei miqianaya jjashajja'ajjaqui ajja. Jesosa nijje jjapee nei neiqui jjima jayojja jama poani; ojaya epeeji pojjeama jama poani. ² Jiquio ecua e bacua esho'i tojjo ba'e noe quia jjima acani jayojja jama ecuea miqianaya huohui jjima esohui quea ja'a nee quea camaja ebajji. Jjeya pea'ai miqianaya Jesusaja epeeji etii jayojja jama pojjeama ma esohui jjashajja'ajjaqui ajja. ³ Miqianaya aje oe Jesusaja epeeji pojjeama jayojja tiya aña. E'e, Jesusaja pea epeeji cuanaja esohui shajja'ajja sa po'yo ajja. Jjamimicuaaje nobiajeaquiani. Jamaya poanijo miqianaya Jesusaja epeeji quea ja'a pojjeama. Ojaya epeeji pojjeama jama poani, de. ⁴ E'e, miqianaya aje oe jama poani ba'a: —Eya ca iña Pabo shajja'ajjaji poani.

Beca ca jama poani ba'a: —Eya ca ca Apono shajja'ajjaji.

Jamaya poanijo Jesusaja epeeji quea ja'a nee jama jjashahuabaqui ajja miqianaya, de.

Ecua Apono nijje Jesusaa huoojea ca'yonaje ojaya esohui huohuijji epojji

⁵ Eya, Pabo Apono jayojja Jesusaja esohui huohuijji. Ohuaya ecua huoojea ca'yonaje ojaya esohui huohuiya. Jamajjeya miqianaya Jesosa nijje jjapeequi'yonaje ecuanaja esohui shajja'ajja majje. E'e, Eyacuiñajjija ojjaña ecua chaco mee cani. Ojaya esohui jama poani eya. Ojaya esohui jayojja jama acani Aponohua pea'ai. ⁶ Eyaya Eyacuiñajjija esohui huohui conaje miqiana huasijje. Aponohua ma esohui huohui ca o'oyanaje. Eyacuiñajjija ca ca oe miqianaya ojaya esohui ba meesahua ca'yonaje. E'e, jiquio ecua acui sisi banajjiya bana cani jayojja jama eyaya, Pabohua Eyacuiñajjija esohui huohui conaje miqiana huasijje. Echacojjiya acui sisi ebana'yo enaa sha cani jayojja jama Aponohua esohui huohui ca o'oyanaje miqianaya eshajja'ajjaji. ⁷ Esohui huohui coojjiya, esohui huohui o'oyajjiya pea'aiya ishoa'ajja cani esohui huohui majje. Eyacuiñajjija ohuaye nei ojaya esohui ba meesahua cani. E'e, jiquio ecua acui sisi banajjiya, acui sisi shajjiya pea'ai chaco majje ishoa'ajja cani a'a acui tiije'yo ebajji jayojja jama Eyacuiñajjija ohuaye nei acui sisi jayojja tii mee cani. ⁸ Ebanajji epo acui sisi shajji jayojja jama jjashahuabaquiani jama ba'a: —Eya

quea pame nee chaco majje, e'acui yiye meseya eya sosequia caje —jjashahuabaquiani cuana.

E'e jojo nei e'acui yiye meseya jamaya acaje'yo. ⁹ Miqianaya Eyacuiñajjija acui yiye jayojja. E'acui yiye mese jama Eyacuiñajjija miqianaya quea pame nee jaahuana cani. Jiquio ecua acui yiye chacojji jamaya ecuanaya Apono nijje Eyacuiñajjija echacojji poani; miqiana que ojaya esohui huohuiaña.

Jesosaja epeeji cuana Eyacuiñajjija equi jayojja

Jiquio ecua e'equi meseya oja equi jaahuana cani jayojja jama Eyacuiñajjija miqianaya jaahuana cani, ojjaña. ¹⁰ Eyacuiñajjija Jesosa Quito equi yamajjana quea ca'a nee jayojja jama nequi mee cani. Ecua Apono nijje Eyacuiñajjija equi iyajji jayojja jama poani. Jiquio ecua echacojjiya equi iya cani eyamajjana nequia majje equi e'oqueji pojjeama jayojja jama ecuaaya Jessaja esohui huohuiaña, miqianaya nahueña pea'ai Jessa nijje ejjapeequi meesahuaji, quea nee nee epojji pojjeama cuaquijo. Eyacuiñajjija eya huoojea majje quea ca'a po mee canaje ojaya esohui pea cuana huasijje huohui coojji. Jamajjeya eya equi yamajjana nequajji jayojja poanaje. Jjeya pea cuaa miqianaya esohui huohui cani e chamajo. Oya equi iyajjeyojji jayojja jama poani. ¡Miqiana quea ja'a nee nee ca-sohuihuohui cahua!

¹¹ Yahuaajo Eyacuiñajjija Jesosa Quito jiquio meshi cuana huasijje huoojea majje eseya huohui canaje jama ba'a: —¡A'a pea nijje jjapeequijji! ¡Ecua E bacua Eja oe neija esohui shajja'ajjacue! —acanaje.

Equi iyajjiya eyamajjana quea ca'a nequia cani jayojja jama equi nequi tiitii mee'yojji jayojja jama Eyacuiñajjija oja Bacua oe nei huoojea canaje ese ba'e tiitii meeya. ¡Oya oe shajja'ajjacue! ¹² E'e, esohui huohuijji cuana equi iyajji jayojja. Beca equi iyajjiya equi quea ca'a nee iya cani. Iya cani mei huo'o, mei oshe quea siyo, mei copo quea siyo nee nee pojja'a. Pea cuaa equi iya cani ca'a'ama; acui equi, bequiobo iña, huenihueni equi pojja'a. Jamaya esohui huohuijji quea hueaa acani. ¹³ Quijje cuaqui poeyajo, equi quiyo'yajo, ojjaña ba caje ache equi iyajji quea pameya equi quea ca'a nee iya canaje, ache equi iyajji quea hueaa equi ca'a'ama iya canaje pea'ai. Oya jayojjaya Jesosa Quitohua poe o'oya majje huohui caje jama ba'a: —Ma esohui huohuijji quea pameya esohui e'e nei huohui canaje. Jamajjeya o shajja'ajjaji cuana enijje jjapeequi pajea jji-ma acaje. Maya esohui huohuijji quea huea poanaje; quea tai esohui huohui canajejo, o shajja'ajjaji cuana enijje jjapeequi pajea'yonaje.

¹⁴ Jiquio ecua cuaqui poeyajo, equi iyajji quea ja'aja equi nequije quea ca'a jayojja jama Jesosa poe o'oyajo, esohui huohuijji quea ja'a nee Eyacuiñajjija sosequia caje quea pame nee, oja chaco quea pame sosejje.

¹⁵ Equi iyajji quea hueaja ca ca oja equi quiyo jeyojeyo-je'yo cuaqui poe'yajo jayojja jama poaje esohui huohuijji quea huea, Jesosa poe o'oyajo. Eyacuiñajjija oya cuana esosequajji pojjeama. Jamatii equi jiji'yajo dejja cuayajeaquinanani equiyo'yo poajeje jayojja ja-

ma oya cuana cuaquijo quiyo'yo ajja poaje'yo, behahua nei.

Miquianaaya Eyacuiñajjija equi ja'a quea mimishi ajji!

¹⁶ Ecuea epeeji cuana Conitojo ba'e, ja'a pajea'yojji eseya Eyacuiñajjija equi jayojja! Edojjoshahua Pame nei ese que dobiquinaje Jesusaja epeeji poanijo. Oya miquiana nijje anijo, miquianaya Eyacuiñajjija equi jayojja poanaje. ¹⁷ Eyacuiñajjija ojaya equi quea nahue nee: —Ecuea equi quea pame nee, jehue'ama. Miquianaya ecuea equi jayojja poanaje. Jamajjeya ecuea equi, miquea eyami, nahue ajjajo, quea mimishi poanijo eyaya miquianaya tecueaje —ohuaya acanaje.

¡Eyacuiñajjija ejjashahuabaquijji quea ja'a bacue, dejja-ja pojjeama!

¹⁸ Ecuea epeeji cuana, ja'a quea jjashahuabaqui quehua pojji! Miquianaya beca cuana jama poani ba'a: —Ecuana quea jjashahuabaqui ja'a poani, dejja ojjaña ba epo jayojja jama poani.

Chojja. ¡Jashahuabaquicue jama ba'a: —Eyacuiñajji, ecuea eba oe pojji nei. ¡Eya ba meesahuacue miquea ejjashahuabaquijji quea ja'a nee! —jamaya oya acue!

¹⁹ Jesusaja epeeji pojjeama quea huiso jamaya jjashahuabaquiani ba'a: —Ojjaña ecuanaja eba quea ja'a nee nee.

Eyacuiñajjiya ca ca onajaya ejjashahuabaquijji jama poani ba'a: —Oya cuana quea quehua jjashahuabaquiani, quea ja'a pojjeama, cajaa —oya poani.

E'e, Eyacuiñajjija esohui etehue'yo yahuajo nei jama poa ba'a:

“Quea huiso jiquio meshi cuanajo ba'e jjashahuaba taiquiani jama ba'a: —Ecuana ejjashahuabaquijji quea ja'a nee poani —poso oya poani. Chojja, oya cuana jjadasiaquijji poanijo, eyaya oya jjadasiaqui pajea meeje'yo”.

Jamaya aca poa Eyacuiñajjiya oja sohui etehue'yojo.

²⁰ Eyacuiñajjija pea esohui yahuajo nei etehue'yo jama poa ba'a:

“Eya oe nei quea jjashahuabaqui ja'a; jjadasia meequi ajja pea'ai. Dejja cuana chojja, ojjañaja ejjashahuabaquijji quea ja'a pojjeama”.

Jamaya yahuajo nei nei tehue mee ca poa.

²¹ Jamajjeya ja'a jama pojji ba'a: —Ma esohui huohuijji ejjashahuabaquijji quea ja'a nee. Oya cajjashahuabaquiahua —a'a pojji!

¡Bacue! Jesusa Quito miquea Emeshe Mese nei. Ohuaya ojjaña esohui huohuijji huoojea canaje miquiana onijje jjapeequi meesahuua. ¡Jamajjeya shajja'ajjacue! ²² E'e, Eyacuiñajjiya ojaya esohui huohuijji huoojea canaje miquiana huasijje. Ohuaya eya, Pabo ebionei huoojea canaje. Apono, Peno pea'ai huoojea canaje. Ohuaya ojjaña aquiana pana ca poa miquianajaya quea pame nee ejaahuanajji. Miya eshe ani ohuaya jaahuana cani; mano'yajo pea'ai jaahuana caje'yo quea pame nee. Ohuaya jjeyahua nei miquianajaya jaahuana cani. Quijje nei miquianajaya jaahuana caje'yo

tii tii pea'ai, Eyacuiñajjiya. E'e, Jesusaja epeeji poanijo miquianajaya e'aquiana mese jayojja jama poani. ²³ Eyacuiñajji Jesusa Quitoja Chii. Miquianajaya Jesusa Quitoja epeeji cuana. Jamajjeya ojjaña Eyacuiñajjija aquiana quea pame nee miquianajaya poani.

¡A'a Jesusaja huoojea'yo esohui huohuijji niñebajji!

⁴ ¡Epeeji cuana, ecua shajja'ajjacue! Eyacuiñajjiya ecua huoojea ca'yonaje esohui e'e nei Jesusa Quitoja huohuiya, ma yahuajo nei onajaya ba mee jjima poa. ² ¡Bacue! jiquio ecua echacojjiya o huoojeajji shajja'ajja cani jayojja jama ecuaaya aña. Jamajjeya ohua huoojea cajje ecuaaya Eyacuiñajjija esohui huohuaña, onajaya esohui pojjeama. Esohui quea pame nee Jesusa Quitoja ehuhui pajea'yojji pojjeama. ³ Jamajjeya ecuea miquianajaya eshajja'ajjajji pojjeama ejo jama poani ba'a: —Pabohua quea ja'a nee huohui cani —poani—. Pabohua quea ja'a pojjeama huohui cani —miquiaa ajje, eyaya eshajja'ajjajji pojjeama pea'ai. Onaa jama ejo huohui cajje pea'ai eyaya eshajja'ajja'yojji pojjeama.

Eya pea'ai ecue huohuijji jjashahuabaqui ajja jama ba'a: —E'e pojja'a ecuea ehuhui quea ja'a nee; e'e pojja'a quea ja'a pishana —jamaya eya jjashahuabaqui ajja pea'ai.

⁴ E'e, eya jjashahuabaquiani jama ba'a: —Eyaya Jesusa Quitoja chacoaña quea pame nee.

E'e pojja'a. Eyacuiñajjiya ojaya ejjashahuabaquijji ejo, eya chacoaña cahuohui cahua quijje. ⁵ Jamajjeya ecuanaja ejjashahuabaquijji, ojjaña ecuaaya anaje pea'ai miquianajaya ba jjimajo, ja'a ecuanajaya niñebajji! ¡Ishoa socue oe Jesusa Quitoja epoe o'oyajji! Majoya ohuaya, esejaya Emeshi Mese neiya ojjaña cuanaja ejjashahuabaquijji, ojjaña quehuajje acanaje pea'ai ba mee caje. Ojjaña shajja'ajja caje. Majoya eseya quea pame nee anajejo, Eyacuiñajji quea bihui nee poaje: —E'e, jamaya. Miya Jesusaja epeeji quea ja'a nee; quea pame nee ojo chaconaje —eseya acaje ohuaya.

¡Esohui huohuijji cuana pea jayojjaya quea jea ameya acue!

⁶ E'e epeeji cuana, miquiana jjabahuejjaqui meeji eyaya tehueña Aponojo, ejo pea'ai. Eyacuiñajjija esohui jama poa ba'a: “¡Oe epeeji quea boti, pea epeeji boti'ama a'a ajji!” Jamaya esohui etehue'yo poa.

Jamajjeya ja'a jama ajji ba'a: —Aponohua quea pame nee acani; Pabohua ca ca quea pame pishana acani —a'a pojji!

¡Ojjaña Jesusaja esohui huohuijji pea jayojjaya oe acue! Jamajjeya miquianaaya ma esohui etehue'yo jayojja jama e'e jojo nei aje. ⁷ E'e, Eyacuiñajjiya ojjaña Jesusaja epeeji pea jayojjaya ba cani. Ohuaya oe epeeji pea epeeji jayojjaya acani. Jamajjeya ja'a jjashahuabaquijji jama ba'a: —Eya ca iña quea pame nee. Pea cuana quea pame pishana —a'a jamaya jjashahuabaquijji!

Miquianajaya ca mi ca oe Eyacuiñajjija esohui jamatii ba epo poso poani. Chojja, ojaya esohui miquianajaya

ebajji pojjeama jamatii. Eyacuiñajjiya esohui huohuijji miqiuana huasijje esohui huohui mee majamaja canaje. ⁸ Miqiuana ca mi ca oe jama poso jjabaquiani ba'a: —Ecuana ca ca oe Jesosaja esohui jayojja jama ba'yani quea pame nee —poso jjabaquiani quiana—. Quea huiso ecuanajaya eba —nequiana poani pea'ai—. Ecuana ca ca ona huoojea'yojji poani Eyacuiñajji nijje. Pabo chojja, ona huoojeajji pojjeama —jamaya poso poani miqiuana.

Miqiuana Eyacuiñajji nijje ona huoojea'yojji e'e jojo nei jojjemo miqiuana oya quea bihui nee pome. Jamaya e'e jojo nei jojjemo ecua miqiuana nijje ona huoojea'yojji pome pea'ai.

¡Jashahuabaquicue ecua quea nee poanaje miqiuana sohui huohuijji!

⁹ Eyacuiñajjiya ecua huoojea canaje ojaya esohui huohuiya. Jamatii ojaya eba ecua shajja'ajja majje ojjaña soadojo cani jama ba'a: —¿Apiojji shai oya cuana shajja'ajjaje so'o, de? ¡Cua'a, oya cuana quecuajecue! Ojjaña oya cuana quea tai —jamaya onaya sijje poani.

Ecuana ca ca jashahuabaquiani jama ba'a: —E'e de, ojjaña meshijo ba'eca cuaa ecua soadojo cani, ojjaña eyajo aniya pea'ai.

¹⁰ E'e, Jesosa nijje jjapeequianijo, Jesosaja epeeji pojjeama cuaa ecua niñepoqui poso acani. Miqiuana ca ca ojjaña ba epo poso acani cuaa. Jesosaja epeeji pojjeama cuaa ecua ona huoojea'yojji jayojja jama pojjeama poso acani. Miqiuana ca ca ona huoojea'yojji jayojja jama acani. Onaaya ecua shajja'ajja jjima acani. Jamatii miqiuana shajja'ajja cani. ¹¹ E'e, jje-yahua nei ecua Jesosa Quitojo mimianijo quea nee poani; ojjaña pojja quea shoe poani. Quea naba taja poani. Daqui chiichiani ecuanaja. Pea cuaa ecua cuia cani Jesosa nijje jjapeequianijo. Ecuana poqui majamajani ojjaña cuiñajji yasijje quima' jayojja ecua. ¹² E'e, ecuaaya bobijo janobajjima nei chacoña. Pea cuana mimijajiyajo, ecuaaya mimisaja'a jjima añ. Jama poani ba'a: —Eyacuiñajjiya miqiuana caha —ecuaaya dejja quea tecue añ.

Jesosaja epeeji pojjeama, pea cuaa ecua napa cani. Jamatii quea quene po ajja. Jesosa nijje jjapeequi pajea'yo ajja pea'ai. ¹³ Pea cuaa niñeba cajje ecuaaya esohui quea beiya saja'añ. Jjeya pea'ai pea cuana ecuanajo quea tai mimiani jama ba'a: —Oya cuana Jesosaja epeeji cuana, cajaa. Shabo jama, caquishi-jehua —poani.

¡E jayojja jama pocue Jesosa nijje jjapeequianijo! —Pabohua aca poa

¹⁴ Ecua epeeji cuana, eyaya jiquio esohui tehueña miqiuana quea yeno po meeji pojjeama. Miqiuana ecua ebacua jayojja jama poanijo, jjabahuejaqui mee sa añ. ¹⁵ Esohui quea pame nee Jesosa Quitoja eyaya huohuinaje miqiuana huasijje. Ecua esohuijo miqiuana ojaya epeeji poanaje. Jamajjeya eya oe nei mique

chii jayojja jama poanaje. E'e pojja'a Jesosa Quitoja sohuihuohuijji quea huiso nee poeje miqiuana sohuihuohuiya. Sico meeme ajja pojja'a, quea huiso nee nee. Jamatii eyaya ebionei miqiuana huasijje esohui huohuinaje miqiuana chii jayojja poanaje. ¹⁶ ¡Jamajjeya ecua esohui shajja'ajja socue! ¡E jayojja jama pocue!

¹⁷ Jamajjeya eyaya Jesosaja epeeji Timoteo huoojeaje miqiuana quea pame ba'e meesahua. Timoteo ecua quea jea nee, Jesosaja epeeji quea ja'a nee poani. Ecua eba'ejjijo, ecua esohui Jesosa Quitojo pea'ai ohuaya huohui caje o'oya miqiuana epajea'yojji pojjeama, ma eyaya ojjaña Jesosaja epeeji cuana ojjaña cuiñajji ba'e yasijje huohuiañ. ¹⁸ Miqiuana beca cuana shajjama' poani ojjaña miquea eba poso poanijo. Ecua esohui shajja'ajja sa po'yo ajja. Jjashahuabaquiani jama ba'a: —Pabo poe ajja ecua baa —poani.

¹⁹ E'e pojja'a Eyacuiñajjiya eya huoojea caje'yo Conito huasijje, miqiuana huasijje quijje pishana. Shajjama' cuanaja esohui shajja'ajja maja sa po ajja eya. ¿A'a oya cuana Jesosa nijje jjapeequiani e'e jojo nei? ¿A'a Eyacuiñajjiya oya cuana ojaya esohui huohui meesahua cani quea ja'a nee? Maya eyaya ba sa añ. ²⁰ E'e, quea huiso esohui mimi majamaja majje e'e pojja'a jamatii Jesosaja epeeji pojjeama pojja'a nequiana. Jesosa nijje quea pame nee jjapeequianijo ca ca Eyacuiñajjiya eseya ba'e tiiti mee caje'yo onijje eyajo.

²¹ E'e, eya poeje'yo miqiuana baa. Shajjama' poani tii, tecueajeaje'yo. Ecua etehue'yo jayojja jama poanijo, eya quea bihui nee, quea bei nee poaje. Jamajjeya ¡ecua esohui shajja'ajjacue, eya miqiuana nijje quea bei epojji!

¡Jesosaja epeeji quea mimishi poani beibeiya tecuecuel!

5 Jesosaja epeeji Conitojo ba'eya eya huohui cañanaje jama ba'a: —Pabo, oe dejjaa Conitojo ba'eya oja shanase cojjo cani, Jesosaja epeejiya, de —acana-je.

Jamaya quea tai nee nee. Eyacuiñajji boti'ama nei nei. Jesosaja epeeji pojjeama jama po ajja, quea mete oya cuana. ² Jamatii miqiuana aje oe bicho'ama jjejojo jama poani ba'a: —Ecuana quea pame nee ba'e —nisho poani.

¡Oe epeeji quea mimishi nee poanijo, quea yeno pocue! Ma dejja oja mimishijo yeno'ama po jjimajo, ja'a onijje jjapeequijji! ¡Jesosaja epeeji cuana nijje a'a dobi-qui meeji!

—¡A'a ecua nijje Eyacuiñajji equi yasijje dobi-qui-ji! Eyacuiñajjiya miya eshajja'ajjaji pojjeama —oya acue.

³ Eya quea huesha nee yani; miqiuana nijje nequi meeme ajja. Jamatii miqiuana jashahuaba majamajquiani tii. ¡Eya Jesosaja epeeji etii ojaya huoojea'yo poanijo, shajja'ajjacue mo! Ecua ejjashahuabaquijji ma dejja quea mimishijo jama ba'a: —Oya quea mi-

mishi poanijo, ¡quea bicho nee po meecue! —eyaya miquiana nijje nequiya jjemo jamaya huohuime.

⁴Jamajjeya miquianaya Eyacuiñajjiya equi yasijje ojee poe majje, Jesosa Quito esejaya Emeshi Mese nei miquiana nijje anije, miquiana quea jjashahuabaqui ja'a po meejji ojaya esohui jayojja jama ameesahua caje. Eya pea'ai miquiana nijje jjashahuabaquianijo miquiana nijje nequi jayojja poaje. ⁵Jamajjeya ojee poe majje ¡ma dejja mimishi tecueacue jama ba'a: —¡Edosiquiana mi huoojeajji poaniya miya canapa cahua! —jama ya acue oja mimishijo quea yeno epojji!

Quea yeno po majje oja mimishi pajea caje'yo. Manoje'yo pojja'a. Jamatii esejaya Emeshi Mese neiya Jesosaa poe o'oya majje ma dejja huoojea ajja cuaqui yasijje, ca ohua mimishi pajea ca'yajo.

⁶Dejja quea mimishi miquiana nijje jjapeequianijo, jamatii miquianaya bicho'ama poanaje. Jamaya quea tai. Miquianajaya eba jiquio esohui jama ba'a: "Oe pojji neiya pahui shejjeemeejjiya ifahuhuo cajje pahui shejje meee cani" jamaya onaaya huohui cani. ⁷E'e, mimishi eshejjeemeejji jayojja jama poani. Oe dejja quea mimishi minijje ojee jjapeequianiya ojjaña quea mimishi po mee caje o jayojjaya. ¡Mimishi cajaa acue, ojjaña! Jamajjeya miquianaya quea mimishi po ajja, pahui eshejjeemeejjiya jayojja poaje. E'e, yahuajo nei Jodio cuaa Ejito meshijo nequiya ñajjajja cuia ca'ya poa ebacua cuana emano'yojji pojjeamajo jama jayojjaya Eyacuiñajjiya Jesosa Quito esejo mano mee ca'yonaje eseya onijje eba'e tiitii'yojji. ⁸E'e, Jodio cuana pahui eshejjeemeejjiya ojee ijjiya cani Eyacuiñajjiya eti-quiana-ja ebacua cuana mano mee'yo jjima aca poa shahuaba'yojji. Jamaya jayojja Jesosa esejo mano'yonajejo, eseya caba'yahua mimishi'ama e'e jojo nei. E'e, jama ya ba'yanijo Jesosa esejaya mimishijo mano'yonaje esejaya epajea'yojji pojjeama. Jamajjeya jiquio ecua Jodio cuaa ñajjajja cuia'yo majje ojee ijjiya cani jayojja, etii-quianajaya bacua cuana mano mee'yo jjima aca poa shahuaba'yojji jayojja jama eseyaya aña Jesosajo.

⁹Yahuajo pishana eyaya miquiana huasijje pea esohui etehue'yo huoojeanaje. Ma etehue'yojo eyaya jama huohuinaje ba'a: —¡Jesosaja epeeji quea mimishi nee poani nijje a'a jjapeequijji! ¡Joya pea cojjojji nijje a'a jjapeequijji! ¡Ona napajji nijje, quea mimishi jjashahuabaquiani nijje pea'ai a'a jjapeequijji! —eyaya miquiana huasijje tehuenaje.

¹⁰Eyaya jamaya tehuenaje Jesosaja epeeji quea mimishijo. Jesosaja epeeji pojjeamajo jamaya tehue jji-ma. E'e, mimishi cuana quea huiso nee yani: Quea nahue poani, sii poani, eshahua nijje mimiani pea'ai. Jamajjeya dejja mimishi pejejo ba'e sa po'yo ajjajo jiquio meshijo ba'e meeme ajja. ¿Achejo dejja mimishi chama' huasijje eba'eji? ¹¹Beca cuana ca ca jama po nishoani ba'a: —Epeeji cuana, eya Jesosaja epeeji pea'ai —poani. Jamatii oya cuana aje oe quea mimishi poani: Pea cojjojji poani, quea dejja tai, quea nishehui poani, quea mimijjequijjea poani, meshi epana bihuia cani, ishi'ishiani, sii poani, shajjama' poani pea'ai. ¡Je-

sosaja epeeji jama poajo, onijje a'a jjapeequijji, a'a anioquejji e'ijjiya'ijjiyajji!

¹²Eyacuiñajjiya eya huoojea jjima Jesosaja epeeji pojjeama tecueaa jama ba'a: —¡Miquianaya quea ja'a pojjeama ba'yanijo quea nee nee poaje!

¡Eyacuiñajjiya ca ca oya cuana catecueajea cahua! Ohuaya ecua huoojea canaje Jesosaja epeeji quea mimishi cuana jjabahuejjaqui meeya. ¹³Jamajjeya Jesosaja epeeji miquiana nijje nequi quea mimishi poajo, ¡niñeshe'acue: —Miya quea ja'a pojjeama poani —oya acue!

Jamajjeya ¡Eyacuiñajjiya esohui yahuajo tehue'yo jayojja jama acue! Yahuajo nei nei jama poa ba'a:

"Ecua epeeji quea mimishi poanijo, ¡a'a miquiana nijje nequi meejji, ecua epeeji cuana nijje! ¡Huoojea-cuayajea'yocue esecue yasijje!" Jamaya yahuajo nei Eyacuiñajjiya esohui etehue'yo poa.

¡A'a epeeji cuana dojojji dejja etii yasijje ca Jesosaja epeeji pojjeama huasijje!

6 Miquianaya Jesosaja epeeji poanijo ecua huapa pojjeama cuana poani. Jamajjeya Jesosaja epeeji nijje quea quene po majje Jesosaja epeeji pojjeama huasijje dejja etii yasijje ¡a'a oya dojojji ojaya ejjashahuabaquijji baa! Chojja. ¡Jesosaja epeeji etii yasijje poquicue! Eyacuiñajjiya ojaya epeeji etii huohui meesahua caje quea ja'a nee ojjaña quea bei epo meejji. ²E'e, eseya Jesosaja epeeji cuana quijje onijje ona huoojeajji poaje. Jamajjeya ijyehua nei ojjaña ojaya epeeji cuana quea bei po meesahuacue pea epeeji cuana nijje! ¡O huoojea'yojji nei jayojja jama oya cuana quea pame nee ameesahuacue! ³E'e, Jesosa poe o'oyajo, eseya esohuidojojji eyajo nequi huoojea'yojji poaje'yo onijje pea'ai. Jamajjeya jiquio meshijo nequiya ¡Jesosaja epeeji pea cuana nijje jjamimicuijaje nobiajjeaquiani quea bei po meecue! ¡Oya cuana shajja'ajja majje quea ja'a nee huohuicue! ⁴Jamajjeya Jesosaja epeeji nijje jjamimicuijaje nobiajjeaqui majje ¡a'a poquijji dejja etii yasijje, Jesosaja epeeji pojjeama huasijje miquiana quea bei epo meejji! ⁵Jamaya poanijo miquianajaya ejjashahuabaquijji quea tai poani. Jamajjeya miquianaya jjamimicuijaje nobiajjeaqui majje ¡Jesosaja epeeji etii iyaacue! Ohuaya miquianaya quea bei po mee caje pea epeeji nijje. ⁶Jamajjeya Jesosaja epeeji nijje mimijaji majje ¡a'a jja oe oya dojojji Jesosaja epeeji pojjeama huasijje ojaya ejjashahuabaquijji huohui meeya! Jamatii miquianaaya ca ca quea tai aña.

⁷E'e, miquianaya ca mi ca oe Jesosaja epeeji pojjeama jayojja jama poani. Jesosaja epeeji nijje jjamimicuijaje nobiajjeaqui majje oya dojoaña Jesosaja epeeji pojjeama huasijje. ¡A'a jja oe jamaya pojji! Chojja, miquianajaya epeeji minijje quea tai poajo, jamatii ¡a'a jjamimicuijaje nobiajjeaquijji! ¿Yajjajo acuae jjaya jamatii mi sii mee'ajjaña? ⁸Miquianaaya ca ca oe Jesosaja epeeji cuana minijje nequi quea tai aña, oya cuana dasiaña, onajaya aquiana siyaña pea'ai, de. Jamaya quea tai. ⁹¡Jashahuabaquicue oe! Miquianajaya eba mimis-

hi cuana Eyacuiñajji nijje eba'ejji pojjeama eyajo ojaya cuiñajji eyacuajo. Eyacuiñajjija esohui a'a pajea'yojji jama ba'a: "E'e jojo nei ojjaña quea mimishi poani pea nijje, ojjaña eshahua nijje mimiani, peaja ehuanase sii cani pea'ai, onaja yahue sii cani pea'ai, dejja cuana pea dejja nijje jjacojjoquiani, epona pea epona nijje yahue nisho poani pea'ai, ¹⁰ siipojji cuana pea'ai, quea dejja tai poani pea'ai, ehoo nei po huicha'a huicha'ani pea'ai, pea siajje ajji poani pea'ai, shajjama' cuana pea'ai Eyacuiñajji nijje eba'ejji pojjeama eyajo ojaya cuiñajji eyacuajo". ¹¹ Jamaya yahuajo miqianaya poanaje Jesosa nijje jjapeequi jjimahua. Jjeya ca ca esejaya Emeshi Mese neiya, Jesosa Quitohua miqianajaya mimishi cuijea ca'yajje quea boejea po mee ca'yonaje. Jamajjeya miqianaya jjeya ba'yani Eyacuiñajjijo. E'e, Jesosa Quito esejaya Emeshi Mese nei miqianajaya mimishi cuanajo mano'yonaje. Miqianaya quea boejea po mee ca'yonaje. Jamajjeya Eyacuiñajjiya miqianaya ba cani mimishi'ama. Edojjoshahua Pameya miqianaya Eyacuiñajjija esohui jayojja jama ba'e meesahua cani pea'ai. Jamajjeya ;ojjaña Jesosaja epeeji cuana nijje quea bei, quea pame nee ba'ecue! ;Mimishi'ama pocue!

¡Eyacuiñajjijo chacocue quea pame nee!

¹² Epeeji cuana, miqianaaya eya huohui'ajjanaje esohui etehue'yojo jama ba'a: —Eya ca ca Jesosaja epeeji. Jamajjeya eyaya ojjaña añña mete'amaa jjejojo, ma Jesosaja epeeji pojjeama cuaa acani —jamaya miqianaya poani quea quehua jjashahuabaquianijo.

Eya ca ca jama poani ba'a: —Pea cuana jayojja jama ba'e majje miqianaya quea pame pojjeama poaje —eya poani. E'e pojja'a eya mimije jama ba'a: —Ojjaña pea cuana jayojja jama eyaya aje —poaje.

Jamatii eya jamaya emimiji pojjeama. Chojja, jama po majje quijje eyaya jamaya apajea'yo jjima aje. E'e, jiquio ecua echacojjiya o chacomeejjiya esohui apajea meemee ajja jayojja jama quijje eyaya maya apajea'yo jjima aje.

¹³ Bobi ijia majje see ai yasijje dobiquiani. Bobi chamajo see ai quea nee poaje. Jamatii quijje eyajo ba'e'yo majje eseya bobi ijia pajeaje'yo. Quea shoe pojjeama poaje'yo. Jamaya Eyacuiñajjiya acaje'yo. Jamajjeya ja'a jjashahuaba tiitiquijji bobijo quea jette nee epojji-jo! Jama jjashahuabaquime pocue ba'a: —Eya Eyacuiñajjija equi jayojja. Oya ecuea eyamijo ba'yani. Eya quea jette jayojja po mee cani.

E'e, Emeshi Mese neiya, Eyacuiñajjiya ecuea eyami quea pame nee pana ca poa. Jaahuana cani quea pame nee pea'ai oja equi jayojja epojji. Ohuaya ecua pana ca poa quea mimishi nee pea nijje epojji pojjeama; onajaya ehuanase, yahue pojja'a esijji pojjeama pea'ai. ¹⁴ Jamajjeya esejaya Emeshi Mese nei Jesosa Quito mano'yajo, Eyacuiñajjiya oya shequi mee ca o'oyanaje. Jamaya ohuaya eseya ba'e mee caje o'oya pea'ai. Quea ca'a nee nee poaniya jjejojo ojjaña acaje'yo ohuaya.

¹⁵ Jesosa Quitoja epeeji poanijo ojjaña eseya ojaya eyami jayojja jama poani. Jamaya miqianajaya eba. Jamajjeya ipea cojjojji nijje a'a jaajji! Chojja. Jamaya poajo Eyacuiñajji miqiana nijje quea tecue nee nee poaje. ¹⁶ E'e, dejja epona quea mimishi nijje jaa majje oya cuana oe yamime jayojja poani. Jamaya Eyacuiñajjiya oya cuana ba cani. Miquea eba Eyacuiñajjija esohui etehue'yo jama ba'a: "Dejja epona nijje jaa majje oya cuana oe yamime jayojja poani". ¹⁷ Emeshi Mese nei Jesosa nijje jjapeequi majje ca ca eseya o jayojjaya jama jjashahuabaquime poani pea'ai.

¹⁸ Jamajjeya eyaya miqianaya huohuiaña jama ba'a: Dejja cuana, jepona miquea ehuanase pojjeama nijje a'a jaajji! Epona cuana, ja'a pea dejja nijje jaajji! ;Jiñayii acue! Quea mimishi po majje miquea eyami nei quea tai poaje. ;Ojjaña mimishi cuana a'a ajji pea'ai! ¹⁹ ;Bacue! Miquea eyami Edojjoshahua Pameya equi jayojja jama poani. Oya mique yami dojjo huasijje nequidobiqui'yonaje. E'e, Eyacuiñajji mi huoojajji poani. Ohuaya huoojaje ca'yonaje Edojjoshahua Pame miqiana que dobiquiya. ²⁰ Oya mi mesenajji epo. E'e, Jesosa Quito mano'yonaje miqianaja mimishi cuijea'yojji sosejje. Jamajjeya ;ojaya esohui jayojja jama ba'ecue! Miqianaya jama ba'yajo, pea cuaa mi ba majje Eyacuiñajji bihuia caje jama ba'a: —Eyacuiñajji quea ca'a nee nee. Ojaya epeeji quea pame nee ba'e meesahua cani —poaje.

¿A'a shacuima' nequi cuana cajjahuaquiahua?

7 Yahuajo pishana miqianaaya esohui tehuenaje ecuea ebajji. Ma esohui etehue'yojo eya miquiaa huohui'ajjanaje jama ba'a: —¿A'a shacuima' nequi cajjahuaquiahua? ¿A'a jamatii canequiahua pojja'a? —huohui'ajjame miqianaaya eya anaje.

Jamajjeya jjeya eyaya miqianaya saja'aña. E'e, shacuima' nequi eshacui sa po'yo ajjaje ca jamatii canequiahua. Jamaya quea pame. ² Jamatii quea huiso shacuima' nequiya epona cuana jea ba cani, onaja huana-se sii cani. Epona ahuema'ani jamaya quea mimishi poani pea'ai. Jamajjeya cajjahuaquiahua, cajjahueaquiahua pea'ai, ojjaña. Jamaya quea pame nee.

³ Yahue cuaa, imiquea ehuanase quea bihui nee po meecue! ;Jaahuanacue quea pame nee pea'ai! Ehuanase cuaa, imiquea yahue quea bihui nee po meecue! ;Onijje tii jaacue! ⁴ ;Mique yahueya huohui cani jayojja jama pocue onijje jaanijo! Yahue, imiquea ehuanase nijje jaanijo ohua sa cani jayojja jama acue! ⁵ E'e pojja'a yahue, ehuanase pea'ai mimi sa poani Eyacuiñajji nijje beca cahuime. Eyacuiñajji nijje mimianijo yahue ojaya ehuanase nijje jaa sa po ajja pojja'a. Jamaya quea pame, ca ehuanase yeno'ama poanijo. Beca cahui cuana Eyacuiñajji nijje mimi majje ;yahue oja ehuanase nijje cajjacojjoqui o'oyahua! Jamajjeya ehuanase yeno'ama, yahue pea'ai yeno'ama poaje. Quea yeno poajo, eshahuaa oya cuana quea mimishi jjashahuabaqui mee ca chana' pea cojjojji epojji. E'e, yahue, epona pea'ai ca'a'ama.

⁶ Ecuea epeeji cuana, jiquio esohui etehue'yo ecuea ejjashahuabaquijji jama ba'a: Eya ca ca shacuima' nequi. Ojjaña Jesusaja epeeji e jayojja jama shacuima' nequi, ahuema'ani pea'ai quea pame nee chaco majamajaje Jesusa Quitojo. Jamatii eyaya miquianaya jama-ya epojji pojjeama huohuiaña. Eyacuiñajjiya beca cuana quea pame nee ba'e meesahua cani jamatii shacuima' nequi, ahuema'ani pea'ai. Pea cuana ca ca jamatii ani quea mimishi po chana'. Jamajjeya oya cuana cajjahuanahuahua, cajjahueaquiahua pea'ai. ¡Eyacuiñajjiya ejjashahuabaquijji mijo ohua acani jayojja jama acue!

⁸ Jamatii eya jjashahuabaquiani shacuima' nequijo, eshacuimanojo, ahuema'anijo, e'ahuemanojo pea'ai jama ba'a: Eya ee nei, shacuima' nequi. Miquianaya e jayojja jama mee nei nequi majje jama quea pame nee nee poaje. ⁹ Jamatii e'e pojja'a miquianaya beca cuana ehuanase chamajo mimishi'ama eba'eji pojjeama. Jamajjeya ijjahuanahuahua! E'ahuemano cuana, miquiana ahuema'ani jayojja mimishi'ama eba'eji pojjeama. Jamajjeya ijjahueaquiyocue! Jamaya quea pame. Miquianaya quea yeno mee nei ba'yanijo quea mimishi po chana'. Jamaya quea tai.

¿A'a Jesusaja epeeji cuana huei cajji?

¹⁰ Jjeyahua nei eyaya Eyacuiñajjiya esohui tehueje yahue cuana huasijje, ehuanase cuana huasijje pea'ai miquianajaya ebajji jama ba'a: Ehuanase cuana, ¡miquaea yahue oe nei nijje ba'ecue! ¡A'a oya hueijji!

¹¹ ¡Huei majje ca oe ahuema' ba'e tiitii'yocue! ¡E'e pojja'a miqueahue jjeshe o'oyacue! Jamaya quea pame nee. Yahue cuana, ¡oya jayojja a'a miquea ehuanase hueijji! ¡Jaahuana tiitiicue! ¡Eyacuiñajjiya esohui jayojja jama acue!

¹² Jjeya ca ca eyaya pea esohui tehueje, ma Jesusaa tehue mee jjima, ecuea ejjashahuabaquijji tehueje pea cuana huasijje, Jesusaja epeeji cuana huasijje. Yahue cuana, e'e pojja'a miya Jesusaja epeeji poani, miquea ehuanase Jesusaja epeeji pojjeama. Jamatii miquea ehuanase minijje ba'e sa poanijo, ¡a'a oya hueijji!

¹³ Ehuanase cuana, e'e pojja'a miya Jesusaja epeeji poani, jamatii mique yahue Jesusa nijje jjepeequi jjima. Miqueahue minijje ba'e sa poanijo, ¡a'a oya hueijji!

¹⁴ Miya Jesusaja epeeji poanijo, miqueahue minijje ba'e sa poanijo, Eyacuiñajjiya oya quea pame acaje Jesusaja epeeji nijje ba'e sa poanijo. Yahue cuana, oya jayojja miquea ehuanase miquea huei jjima minijje ba'e sa poanijo, Eyacuiñajjiya oya quea pame acaje pea'ai miya Jesusaja epeeji poanijo. Oe yamime jayojja ohuaya micuana ba cani. Jamajjeya ohuaya miquianajaya ebacua cuana jaahuana caje pea'ai. Jesusaja epeeji pojjeamaja bacua cuana jama pojjeama oya cuana.

¹⁵ ¡Jiquio esohui bacue pea'ai, epeeji cuana! Eyacuiñajjiya ojaya epeeji cuana quea bei ba'e mee sa acani. Jamajjeya miquea ehuanase Jesusaja epeeji pojjeama jjejojya minijje ba'e sa po'yo ajja po majje capoquiahua. E'e, Jesusaja epeeji pojjeama Jesusaja epeeji

nijje ba'e sa po'yo ajja capoquiahua, epona, yahue pea'ai. Jamajjeya Jesusaja epeeji e'ahuemano jayojja anije, eshacuimano jayojja jama nequije. ¹⁶ Jamajjeya ehuanase cuana, ¡miquaea yahue nijje anicue, jamatii oya Jesusaja epeeji pojjeama! Oya Jesusa nijje jjapeequije pojja'a mi quea pame ba'yani ba majje. Yahue cuana, ¡miquaea ehuanase Jesusaja epeeji pojjeama nijje ba'ecue! Jamajjeya oya Jesusa nijje jjapeequije pojja'a.

¡Eyacuiñajjiya ejjashahuabaquijji jayojja jama ba'ecue!

¹⁷ Eyacuiñajjiya ojjaña miquianaya ojaya echacojji po mee cani. Oe epeeji pea epeeji jayojja jama chaco ajja. E'e, Eyacuiñajjiya miquianaya huoojea cani ojo chachohua. Peapea chaco meeme asahua cani. ¡Jamaya atiitiicue! Jamaya eyaya huohuiaña ojjaña Jesusaja epeeji cuana ojjaña cuiñajji cuanajo ba'e yasijje. ¹⁸ Jamajjeya oe epeeji Jesusa nijje jjapeequianijo cuiishasha jehusejjajea ca'ya poa, Jodio cuaa jjejojo. ¡Jamatii nequicue! Pea dejja cuiishasha ejehusejjajea'yo pojjeama Jodio dejja pojjeama jjejojo. ¡Jamatii nequicue, cuiishasha jehusejjajea jjima tii! ¹⁹ Jjeya nei Jesusa nijje jjapeequianijo, Eyacuiñajjiya eseya jama ajjima ba'a: —¡Cuiishasha jehusejjajea meecue! —po ajja eseya jje-ya.

—¡A'a cuiishasha jehusejjajea meeji! —po ajja pea'ai jje-ya.

Chojja. Jjeya Jesusa nijje jjapeequianijo, Eyacuiñajjiya eseya jama acani ba'a: —¡Ecuea esohui jayojja jama ba'ecue! —ohuaya eseya acani.

²⁰ Jamajjeya ¡miquianaya Jesusa nijje jjapeequi jeahuajo jayojja jama anicue quea pame nee! Jama ba'a: ²¹ Eyacuiñajjiya miquianaya iyaa canajejo, beca cuana echacojji sosema' poanaje. ¡Jamaya anicue yeno'ama! Jamatii miya miquea echaco meseja nahue'a-majo, poqui sa po majje ¡poquicue, miquea yajjijo chacoquicue! ²² Jamajjeya beca cuanaja echaco mese yanijo, ¡ojaya esohui jayojja jama cachaco cahua! Eseyaya Emeshi Mese nei Jesusaa oya cuana iyaa cajje ca ca oya echaco mesema' jayojja jama jjashahuabaquime poani. ¡Jesusaja ejjashahuabaquijji jayojja jama ca'a cahua! Oya jayojjaya pea cuaa echaco mesema' nequiyachaco cani ojaya yajjijo. Jamatii Jesusa Quito oya cuana iyaa cajje ojaya ejjashahuabaquijji jayojja jama ca'a cahua pea'ai. Jama ba'a: Jesusa nijje jjapeequi jji-mahuajo eseya eshahuaja echacojji sosema' poa ojjaña. Jesusaa iyaa majje eseya poqui mee canaje eshahuaajo echaco majajji pojjeama. Jamajjeya Jesusaja ejjashahuabaquijji jayojja jama ejja'a qui, esejaya Emeshi Mese neija. ²³ E'e, Eyacuiñajjiya eseya jjeshe ca'yonaje quea nahue nee nee, Jesusa Quito esejoma'no'yonaje soseje. Jamajjeya ¡ojaya esohui jayojja jama atiitiicue, onajaya pojjeama! ¡Ojo oe chacocue! ²⁴ ¿Ae shai po aninaje miquianaya Eyacuiñajjiya iyaa jji-mahuajo? ¡Jamaya atiitiicue quea bei! Eyacuiñajjiya miquianaya jaahuana caje'yo quea pame nee.

Pea etehue'yo shacuima' nequi yasijje, ahuema'ani ya-sijje pea'ai

²⁵ Miquianajaya etehue'yojo yahuajo eya huohui'ajjanaje nequiaa jama ba'a: —¿Yajja acuae poaje shacuima' nequi, ahuema'ani pea'ai? —tehuenaje nequiaa.

Maya esejaya Emeshi Mese neiya Jesusaa eya huohui jjima shacuima' nequijo, ahuema'anijo pea'ai. Eyaya ecuea ejjashahuabaquijji tehueaña miquianajaya ebajji. Jamatii Eyacuiñajjiya eya babaca canaje esohui quea pame nee Jesusaja ehuhuijji. Ohuaya eya esohui e'e nei huohui meesahua cani tii pea'ai. Jamajjeya ¡ecuea esohui shajja'ajjacue!

²⁶ Jjeya Jesusaja epeeji pojjeamaa eseya napa cani quea huiso nee. Jamajjeya quea camaja eba'ejji. Jamajjeya epona cuana, jjeya nei miya ahuema'ani, ¡jamaya ba'ecue! Shacuima' nequi cuana pea'ai, ¡jamatii ba'ecue! Jamaya eya jjashahuabaquiani. ²⁷ Jamatii miquea ehuanase yanijo ¡a'a oya hueijji! Miya shacuima' nequiya, ¡a'a ehuanase sajji! ²⁸ Eponajo jjahuanaqui sa poanijo miya quea mimishi pojjeama; jamaya quea pame. Epona, miya jjahueaqui sa poanijo quea pame, quea mimishi pojjeama pea'ai. Jamatii jjahuanaqui majje quea camaja poaje miquianajaya eba'ejji, bobijo, aquiana eba'ejji. Ehuanasejo quea huiso jjashahuabaqui majamajaje. Ebacua quea huiso po majje quea camaja poaje. Eya ca ca shacuima' nequi. Eba'ejjiyo jjashahuabaqui tiitii ajja. Jamajjeya miquianaya e jayojja nequianijo miquea eba'ejji camaja'ama pishana poaje.

²⁹ Ecuea epeeji cuana, eya jjashahuabaquiani jama ba'a: Epojja Jesusa Quitoja epoe o'oyajji beshahua nei apoa. Jamajjeya ¡a'a jjashahuaba tiitiiquijji miquea ehuanase neijo! ¡Jesusa Quitojo oe jjashahuaba neinei-queicue! ³⁰ E'e, Jesusa Quito poe o'oyani. ¡Ojaya epoejjiyo jjashahuaba tiitiiquicue! Jamajjeya ¡a'a quea yeno po tiitiijji eba'ejji quea camajajo, emano'yojo pea'ai! ¡Quea bihui nee nee poani, a'a jjashahuaba tiitiiquijji pea'ai! ¡A'a jjashahuaba tiitiiquijji aquiana jjeshejjijo, meshi cuana jjeshejjijo pea'ai! ³¹ Echaco quea huisojo jjashahuabaquianijo ¡a'a Jesusa Quitojo jjashahuabaqui pajea'yojji! Oya Jesusa poe o'oyajo jiquio meshi cuana, ojjaña aquiana cuana pea'ai chama'yo tii poaje'yo. ³² Jamajjeya ¡a'a miquianajaya aquiana quea huisojo jjashahuabaqui majamajaji! Jesusaja epeeji shacuima' nequi jjashahuabaquiani Jesusa Quitojo, ojaya ejjashahuabaquijji jayojja jama a sa neinei poani tii.

³³ Yahue ca ca jjashahuabaquiani ojaya ehuanase quea bihui nee epo meeji. Jamajjeya oya quea huiso aquianajo jjashahuabaquiani. ³⁴ E'e, shacuijji Jesusa Quito oe neijo jjashahuabaqui tiitii ajja. Oya ojaya ehuanasejo quea huiso jjashahuabaquiani pea'ai. Epona Jesusa Quitoja epeeji ahuema'ani Jesusajo jjashahuabaquiani. Jesusaja ejjashahuabaquijji jayojja jama a sa poani. Ojo chaco sa neinei poani pea'ai. Oja yahue enequijo, ehuanase jjashahuabaquiani quea huiso jahue quea bihui po meeji. Jesusa Quito oe neijo jjashahuabaqui tiitii ajja. Jamajjeya oya quea huiso aquianajo jjas-

hahuabaquiani. ³⁵ Jamajjeya epeeji cuana, eyaya jiquio esohui tehueaña miquiana quea pame ba'e mee-sahuajji, mijo quea camaja epo meeji pojjeama. E'e, eyaya miquianaya jama ajjima ba'a: —¡A'a jjahueaqui-jji! ¡Miquianaya quea pona jea nee po majje jamatii a'a jjahuanaquijji! —jamaya ecuea miquianaya huohui jjima. Chojja, eyaya miquianaya huohuaña jama ba'a: —¡Jesusa nijje quea ja'a nee jjapeequicue! ¡Ojaya esohui jayojja jama ba'ecue! ¡Quea huiso nee jjas-hahuabaquicue Jesusajo, aquiana cuanajo pojjeama! ¡Onijje chacocue! —jamaya eyaya ña miquianaya.

³⁶ Shacuima' nequija ebajji eyaya jama tehueaña ba'a: E'e pojja'a miquianaya yahuajo jama poa ba'a: —Ecuana ejjahuanaquijji pojjeama Jesusaja epeeji pojjeamaa ecua quea huiso napa canijo. Quea camaja nee poaje —poa yahuajo.

Jamajjeya shacuima' nequi cuana, miquea eshiye mese ahuema'ani jaajaa epo, miya huana sa neinei poanijo ¡oyo jjahuanaquicue! Jamaya quea pame nee, mimishi'ama. ³⁷ Jamatii shacuima' nequi oja shiye nijje ojaya ejjashahuabaqui'yojjiyo jama poaje pojja'a ba'a: —Eya ca ca ña jjahuanaqui sa po'yo ajja pea'ai. Eya quea pona jea nee pojjeama, quehuajje jjacojjoqui ajja nei nei —jamaya e'e jojo nei jjashahuabaqui majje jamatii canequiahua oya cuana, jjahuanaqui jjima tii. Jamaya quea pame nee nee. E'e, onaaya Jesusaja epeeji napa canijo, quea camaja poaje jjahuanaqui majje.

³⁸ Jamajjeya shacuima' nequi cuana, miquea eshiye mesejo jjahuanaqui majje miyaya quea pame ña. Eshiyese mese mi huana majje ca ca miyaya quea pame nee nee ña. E'e, miya Jesusajo nei jjashahuabaqui sa poani.

Paboja esohui e'ahuemanojo

³⁹ Epeeji cuana, jiquio esohui eyaya tehueaña Jesusaja epeeji e'ahuemanoja ebajji jama ba'a: Epona, ¡miqueahue eshe nequijo, onijje tii anicue! ¡A'a oya hueijji! ¡Miqueahue mano'yajo oe pea dejjajo jjahueaqui'yo-cue ca jjahueaqui'yo sa po majje! ¡Jesusaja epeejjijo oe jjahueaqui'yocue, epona cuana! ⁴⁰ Jamatii ecuea ejjashahuabaquijji e'ahuemanojo jama ba'a: Miqueahue mano'yajo, ¡mee nei anicue, ahuema'ani jama! Jamaya miya quea bihui nee nee poaje'yo. Edojjoshahua Pameya eya jjashahuabaqui meesahua canijo, ecuea esohui e'e nei.

¿A'a bobi eshahuaaja e'ijjiajji nisho ba'ehuanasohua majje ijja cajji?

8 Yahuajo miquianaaya ecue bajji tehuenaje. Jama huohui'ajjame nequiaa ña anaje ba'a: —¿A'a noe eyacuiñajji nishoja e'ijjiajji nisho, eshahuaaja e'ijjiajji nisho pea'ai ba'e huanasohua majje ijja cajji? ¿A'a e'ijjiajji pojjeama pojja'a? —eya huohui'ajjanaje nequiaa.

Jamajjeya jjeya eyaya miquianaya saja'aje jama ba'a: Pea cuaa bobi edahua'yo quia cani eyacuiñajji nisho huasijje, eshahua cuana huasijje pojja'a onijje ejjapeequijji, mase'ama epo meeji. Beca cuana jama poani

ba'a: —Ecuanaja eba epana'yo acui ejehui'yo, meshi epana'yo pea'ai, Eyacuiñajji pojjeama. Jamajjeya maya bobi ijia ca'yojji.

E'e jojo nei. Jamatii jamaya poanijo miquea ejjahahuabaquijji quea pame pishana. Ojjaña miya ojjaña ba epo poso poanijo quea pame pojjeama poaje. Pea ejjahahuabaquijji quea pame nee nee jama ba'a: —¡Pea epeeji cuana ejja'asahuaqui quea pame nee! ¡Quea jaji nee ejjapo meequi!

² E'e jamaya quea pame. Pea cuana jama jjashahuabaquiani ba'a: —Jamatii ecuea eba nei nei quea huiso.

Jamaya jjashahuabaquianijo oya quea ja'a jjashahuabaquijji jima. ³ Quea Eyacuiñajji jea nee poanijo ca ca, ojaya eba eseya ojaya epeeji nei poani.

⁴ Jamajjeya jjea eyaya miqianaya huohuije bobijo, ma eshahua huasijje, eyacuiñajji nisho huasijje quia canijo. Quia majje pea cuaa bobi ijia cani. Eseyaya eba eyacuiñajji nisho acui ejehui'yo, meshi epana'yo pojja'a, Eyacuiñajji e'e nei pojjeama. Eyacuiñajji e'e jojo nei oe nei yani. Jamajjeya bobi eyacuiñajji nisho huasijje quia majje eshahua e'ijiajji nisho ba'ehuanasohua ijia ca'yojji eseyaya. Jamaya quea mimishi poani pojjeama. ⁵ Pea cuana ca ca jjashahuaba quehuaquiani jama ba'a: —Eyajo, meshijo cuana pea'ai quea huiso eyacuiñajji yani.

Jamaya jjashahuaba quehuaquianijo quea huiso cuaa eyacuiñajji nishojo chaco cani, eshahua poa'ei. E'e, acui ejehui'yo, meshi epana'yo pojja'a, eshahua pojja'a, emeshi mese pea'ai Eyacuiñajji poso acani pea cuaa. ⁶ Eseyaya ca ca eba Eyacuiñajji oe nei yani. Oya eseyaya Chii ai. Ohuaya ohuaye nei ojjaña aquiana cuana pana ca'ya poa. Eseyaya onijje jjapeequiani, ojaya esohui shajja'ajjaña pea'ai. Jesosa Quito eseyaya Emeshi Mese oe nei poani pea'ai. Yahuajo nei Eyacuiñajjiya Jesosa Quito nijjeya ojjaña pana ca'ya poa. Nequi mee cani pea'ai. Jesosa Quitohua eseya ba'e mee cani pea'ai, ojaya epeeji nei cuana.

⁷ E'e jojo nei Eyacuiñajji oe nei yani eseyaya Chii ai. Jamatii jamaya Jesosaja epeeji ba jjima beca cuana. Yahuajo Jesosa Quito ba jjimahuajo onaaya bobi edahua'yo eshahua quea bihui po mee'yojji ijia canaje quea huiso. Jjea ma bobi ijia majje oya cuana quea mete nee jjashahuabaquiani jama ba'a: —¡Dee! Eya eshahua epeeji jayojja jama poani o'oya. Quea mimishi poani —jamaya eshahua jjashahuabaquianijo, e'e, oya cuana quea mimishi poani.

⁸ Miqianaya quea quehua jjashahuabaquiani jama ba'a: —Eyacuiñajji ecuanajo quea bihui nee pojjeama poaje, ca ojjaña bobi ijiañajo. Eyacuiñajji ecuanajo quea bihui nee pojjeama poaje, ca ecuaa pea bobi ijia ajjajo —poani beca cuana.

Chojja. Eyacuiñajji ese nijje quea bei poani Jesosa nijje jjapeequianijo, bobi ijiañajo pojjeama.

⁹ Epeeji cuana, ¡shajja'ajjacue mo! Miqianaya quea jjashahuabaqui ja'a. Jamajjeya bobi eshahua e'ijiajji nisho eba'ehuanasohua ijia majje miqianajaya eba jamaya poani quea mimishi pojjeama. Jesosaja epeeji ca'a'ama cuana ca ca quea jjashahuabaqui ja'a pojjea-

ma quea mimishi po o'oya mee chana'. ¹⁰ Jama po chana' ba'a: Miya eyacuiñajji nishoja equijo bobi ijia ani ba majje ohuaya ijia caje pea'ai pojja'a. Ijia'ijia ani, oya jjashahuabaquije eyacuiñajji nishojo, eyacuiñajji nisho bihuia cani poso oya quea ja'a pojjeama poaje. ¹¹ E'e, mi ba majje mi jayojja jama ma bobi ijia majje oya quea mete poaje: —E'e, eya eshahua bobi ijia majje quea mimishi po o'oyanaje —poso jjabaquije.

Jamajjeya Eyacuiñajji onijje quea quene poaje poso oya quea yeno poaje. Oja mimishijo Jesosa Quito mano'yonaje pea'ai. Oya mique chahua jama. Jamajjeya jaya quea yeno po chanajo a'a maya noe ijiajji! ¹² Miqianaya Jesosaja epeeji cuana quea ja'a poani. Jamatii pea epeeji ja'a'ama quea bicho, quea mete poani mi jayojja jama po majje. Jamajjeya miyaya oya quea mimishi po meenaje. Jamajjeya Jesosa Quitohua miya ba cani ona mimishi po meeji jayojja, quea mimishi pea'ai. ¹³ ¡Bacue, oe! Pea epeeji quea mete, quea mimishi pea'ai poani eya maya noe ijiaña ba majje, eya-ya maya noe e'ijia o'oyajji pojjeama nei nei. Jamajjeya Jesosaja epeeji ja'a'ama quea mimishi epo meeji pojjeama nei nei. ¡E jayojja jama pocue; Jesosaja epeeji ja'a'ama a'a quea mimishi po meeji!

¿Achajja ba'e cajji Jesosaja huoojea'yo esohui huohuijji?

9 Ecuea epeeji cuana Conitojo ba'e, eya ca iña e'e jojo nei Jesosaja huoojea'yo oja esohui huohuijji. Dejjaja huoojea'yo pojjeama iña iquio. Jesosaja epeeji quea ja'a nee ba'e meesahua sa ña nei nei. Yahuajo eyaya Jesosa banaje, eseyaya Emeshi Mese nei. Esohui quea pame nee ojo eyaya huohuinaje miqianaya huasijje. Shajja'ajja majje miqianaya ojaya epeeji poanaje. Maya miqianajaya eba. ² Jamajjeya e'e pojja'a pea cuana jama poani ba'a: —Pabo Jesosaja huoojea'yo pojjeama —poani.

Jamatii miqianajaya eya eba Jesosaa huoojea cani. E'e, miqianaya ojaya epeeji poanaje eya huohuijje. Jamajjeya quea huiso jama poani ba'a: —Conitojo ba'e cuana Jesosaja epeeji poanaje Pabaja esohui shajja'ajja majje. Jamajjeya eseyaya eba Eyacuiñajjiya Pabo huoojea canaje; ohuaya Pabo esohui huohui mee-sahua cani tii —poani cuana.

³ E'e, beca cuaa eya niñeba cani jama ba'a: —Pabo ca jja ca oma Eyacuiñajjiya huoojea'yo pojjeama.

Jamaya poajo, eyaya saja'aña jama ba'a: —Jesosaa ecuaa huoojea ca'yonaje ojaya esohui huohuiya —saja'ame ña.

⁴ E'e, eya Jesosaja huoojea'yo ojaya esohui huohuijji. Jamajjeya eyaya miquea bobi ijiaje sosema', eya sohuihuohuiaña soseje. Jamatii eya jamaya po ajja nei nei. ⁵ Jesosaja esohui huohuijji cuana, oja chahua mese pea'ai ca ca ehuanase cuana nijje poquiani esohui huohuiya. Jamaya poani Peno pea'ai. Jamaya quea pame nee. Eya jamaya po sa po majje quea pame poaje, ca ehuanase Jesosaja epeeji poanijo. ⁶ Ojjaña Jesosaja huoojea'yo esohui huohuijji cuana esohuijo nei chaco-chacoani tii, bobi yajjijo chaco-chaco ajja.

¿A'a ecuaaya oeyaya Benabe nijjeya cachacoahua bobi sosejje? ¿A'a ecuaaya oeyaya casohuihuohuiahua sosema'? ¿A'a jamaya quea pame? Eya ca ca jamaya poani ba'a: —Chojja; ecuanaya pea'ai casosequia cahua esohui huohuiaña sosejje —poani eya.

⁷ ¡Bacue! Emeshi meseja huoojea'yo, ona oja esohui shajja'ajja meeji poani ohuaya sosequia cani ojo chaco canaje sosejje. Oya jayojjaya e'acui yiye meseya acuijjajja ijia cani acui yiye chaco canaje sosejje. Ana'ai jaahuanajjiya tojjo na ishi cani jaahuana sosejje. ⁸ Jiquio ecuea esohui etehue'yo jayojja jama ojjaña poani. Jamaya ojjañaja eba. Jamajjeya ecuaña pea'ai cabobia cahua cuaa Eyacuiñajjiya esohui huohui sosejje. ⁹ Eyacuiñajjiya Moisesi yahuajo nei nei jama tehue meeme aca poa ba'a:

“¡Ana'ai chachacoanijo bobiacue! Eso' quishihuajo poequiya tii ca'ijjia cahua; ¡a'a naba huoshoji!”
Jamaya yahuajo nei Eyacuiñajjiya tehue mee ca poa. Ohuaya Moisesi jamaya tehue meeme aca poa ana'ai-jo nei pojjeama jjashahuabaquianijo. ¹⁰ Ohuaya esejo jjashahuabaquianijo pea'ai jamaya tehue mee ca poa. Oya jayojjaya que chacoji cuana, anoso sejjajji pea'ai chaco majje jama jjashahuabaquiani ba'a: —Eyaya anoso sejjajji sosejje quijje yeje'yo ecuea equijo e'ijjajji.

¹¹ Jiquio ecua chachacojiya jayojjaa ecuaaya mi-quianaya sohuihuohuinaje. Shajja'ajja majje Jesusaja epeeji poanaje. Jamajjeya jjeja ecuaña bobi quiaje esohui huohuinaje sosejje mi-quianaya quea pame nee poaje. ¹² E'e, pea esohui huohuiji sohuihuohui majje jama poani ba'a: —¡Ecuaa mi-quiana sohuihuohuinaje sosejje bobi, aquiana pea'ai che ecuaña quiacue! —poani pea esohui huohuiji.

Jamaya quea pame. Ecuaaya ca ca quea huiso nee esohui quea pame nee Jesusaja huohuinaje mi-quianajaya eshajja'ajjajji. Sosema'. Jamatii ecuanajaya mi-quianaya jama ajjima ba'a: —¡Aquiana mo che quiacue eya esohui huohuinaje sosejje! —ajjima ecuanajaya.

Chojja. Jamaya e'a jojjemo Jesusaja epeeji pojjeama sijje pome jama ba'a: —Pabohua ca jja ca esohui huohui cani quea huiso aquiana sosejje. Jamajjeya ecuaña shajja'ajja sa po ajja —sijje pome.

Jamajjeya eya aema' jayojja jama ba'yani; esohui huohuiaña sosema' ojjañaja eshajja'ajjajji.

¹³ Yahuajo nei nei Eyacuiñajjiya jama aca poa ba'a: —Jodio dejja cuaa Eyacuiñajjiya equijo chaco majje bobi Eyacuiñajji yasijje onaja quia ijia ca poa sosema'. Jodio etii cuaa Eyacuiñajjiya equijo huo dahua ca poa Eyacuiñajji quea bei epo meeji. Ma huo dahua tehue-jea jjimahua ijia ca poa Eyacuiñajjiya equijo chaco cani sosejje.

Maya miquea eba. ¹⁴ Oya jayojjaya esejaya Emeshi Mese neiya Jesusaa huohui canaje ojaya esohui huohuiji cuanajo jama ba'a: —Sohuihuohui canijo, ¡so-se quiacue ecuea esohui huohuiji! —poa.

¹⁵ Jamatii eya jamaya epojji pojjeama nei nei. Esohui huohuinaje sosejje bobi edojjji pojjeama. Jjeja esohui tehueña mi-quiana huasijje miquea bobi equia meeji pojjeama. Bobijo pojjeama eyaya esohui huohuiaña.

Eyaya Jesusa Quitoja esohui huohui tiitiije sosema' mi-quianaya. ¹⁶ Eyaya ehuohuiji pojjeama jama ba'a: —Eyaya ca eya Jesusaja esohui quea pame huohuiaña; jamajjeya eya quea pame nee.

Chojja. Eyacuiñajjiya eya huoojea ca'yonaje Jesusa Quitoja esohui huohuiya. Esohui huohui ajja jjemo eya quea yeno nee nee pome, Eyacuiñajjiya eya quea nee nee po mee came pea'ai. ¹⁷ Eyaya jamatii ecuea ejjashahuabaquijji jayojja jama esohui huohuiaña jojjemo jama huohuime ba'a: —¡Sosequiacue mo esohui huohuiaña sosejje! —ame.

Yahuajo eya jjashahuabaqui jjima Jesusaja esohui huohuiji. Chojja. Eyacuiñajjiya eya huoojea ca'yonaje ojaya esohui huohuiya. Eyaya ojo sosema' jayojja quea bihui nee chacoña. ¹⁸ ¿Ae sa poani eya esohui huohuiaña sosejje? Eya bejjo, bobi pea'ai sa po ajja esohui huohuiaña sosejje. E shajja'ajjajji huohui jjima jama pea'ai ba'a: —¡Che mo bejjo quiacue eya esohui huohuiaña sosejje! —jamaya ecuea ajjima.

Chojja, eya quea bihui nee Jesusaja esohui quea pame nee huohuiaña sosema'. ¹⁹ Chama' dejja e huoojea'yoji esohui huohuiji. Chojja. Jesusa nijje chaco sa poanijo eya chachacoani. Ojjañaja yajjijo chacoña. E'e, eyaya esohui huohuiaña ojjaña Jesusa nijje ejja-peequi meesahuajji. ²⁰ Jamajjeya Jodio cuana nijje ba'-yanijo, o jayojja jama ba'-yanijo eya Moisesija etehue'-yo jayojja jama aña pea'ai. Jamajjeya ohuaya ecuea esohui Jesusa Quitoja shajja'ajja caje'yo pojja'a. Moisesija etehue'yojo jjamimicuijaja nobiajeaqui ajja onijje.

²¹ Oya jayojjaya Jodio pojjeama cuanaja Moisesija etehue'yo ba jjimajo, eyaya onijje nequiya ohuaya jayojjaya jama aña. Moisesija etehue'yo huohui ajja. Chojja. Eyaya esohui quea pame nee Jesusaja huohuiaña ona Jesusa nijje jjapeequi meesahuajji. Jamajjeya Jesusaja esohui jama po majje Eyacuiñajjiya ejjashahuabaquijji jama aje pea'ai. Eya ca ca Eyacuiñajjiya esohui jayojja jama ba'yani tii, shajja'ajjaña tii tii, Jesusa Quitoja. Jamajjeya Eyacuiñajji quea bihui nee poani enijje. ²² Jesusaja epeeji quea jjashahuabaqui ja'a pishana nijje ba'-yanijo eya o jayojja jama poani, Jesusa nijje ejjapee neineiqui meesahuajji. E'e, Jesusa nijje ejjapeequi meesahuajji eyaya ojjaña joya e pejeje ba'e nijje jjapeequiani. Eyaya aje oe ojjaña pea cuana Jesusaja epeeji quea ja'a po meesahuaña.

²³ Jamaya eyaya aña ojjaña cuana esohui quea pame nee Jesusa Quitoja eshajja'ajja meeji. Jamajjeya eya quea bihui nee jjapeequiani Jesusaja epeeji eyacua cuana nijje.

²⁴ ¡Jashahuabaquicue esho'iquiana quebanei poanijo! Ojjaña cuajicuajiani aquiana iñajji sosema'. Oe esho'i quea cuejipashi nee nee ebionei poeje. Oya oe nei iña mee caje aquiana sosema'. Jiquio ecua esho'iquiana quea cuejipashi nee cuajicuajiani aquiana iñajji jayojja jama ¡mi-quianaya Jesusa Quito nijje jjapeequicue quea pame nee nee! ¡Ojaya esohui jama acue! Jamajjeya quijje ohuaya mi-quianaya quea pame nee ba'e tiitii mee caje'yo. ²⁵ Ojjaña esho'i cuana janobajjima nei cuajicuaji huicha'a huicha'ani, jjashahuabaquiani quea

cuejipashi nee epojji, aquiana e'iñajji. Jamatii ma aquiana quijje pishana chama'yo tii poaje'yo. Jesosa nijje jjapee neineiQUIAJO ca ca quijje ohuaya eseya quea pame nee nee sosequia caje'yo, eba'ejji quea pame nee nee epo tii tiijji. ²⁶ Jamajjeya eya Jesosa nijje jja-pee neineiQUIANI. Jjashahuaba tiitiquiani. Eya poqui aja cojjama' jama; dejja ehoo jama poqui ajja, eya. Ecuea eba Jesosaja esohui quea pame nee nee. ²⁷ Jesosaja epeeji quea pame nee, quea ja'a nee epojji eya jjashahuabaquiani quea huiso. E'e, ojaya esohui huohui huicha'a huicha'a majje eya quea bicho nee nee pome Jesosaja epeeji pame'ama po majje. Jama poajo Jesosa Quitohua quijje eya esosequia'yojji pojjeama. Eya ba caje ohuaya epeeji quea mimishi.

¡Etiiquiaa jayojja a'a eyacuiñajji nisho ajji!

10 Ecuea epeeji cuana, ijiquio esohui shajja'ajja-cue! Yahuaajo nei nei ecuanaja etiiQUIANA Moisesi nijje meshi jabojo poquianijo, Eyacuiñajjiya jaahuana ca'ya poa. Eyajo ona biajje bo ai nequi mee ca'ya poa eshequiya edahua ca poani jjejojo. Poquianijo bae huo'o huasijje poe'yanaje; bae yiyesamajje ejiojji quea jabo nee po mee majje, ojjaña tii ojee ojje miji yasijje poqui meesahua ca'ya poa quea pame nee ejiojjijje. ² Yahuaajo nei bo quimejjeje poquianijo, bae huo'o ojje miji yasijje poquianijo pea'ai ecuanaja etiiQUIANA Moisesija esohui shajja'ajja ca poa. Jamajjeya onajaya emeshi mese po'ya poa Moisesi. Oya jayojjaya jjeja eseya enajo besa mee cajje Jesosaja esohui jayojja jama eba'ejji. ³ Yahuaajo nei meshi jabojo Eyacuiñajjiya bobi pahui jayojja oque mee ca'ya poa meshi yasijje ojjaña etiiQUIANAJA e'ijjijji. ⁴ Ena chama' poajo, Quitohua ena jamatii cuaya meequi ca'ya poa bajjoojje etiiQUIANAJA e'ishijji.

Jamajjeya Quitohua ojaya epeeji cuana jaahuana cani. EtiiQUIANA Quitojo jama poa ba'a: —Oya ecuanaja nijje poquiani, de; ohuaya ecuanaja jaahuana cani. Jamajjeya ohuaya bajjoojje ena cuaya meequi canaje —poa.

⁵ Jamatii aje oe beshahua nei ojjaña ecuanaja etiiQUIANA quea mimishi po tiitii poa. Eyacuiñajji bihuia jjima aca poa. Eyacuiñajji quea quene ona nijje poa. Jamajjeya beshahua nei ojjaña mano ca'ya poa meshi jabojo tii.

⁶ Eyacuiñajjiya etiiQUIANA quea mimishi nee nee mano mee ca'ya poa ese jjabahuejjaquijji, mimishijo quea mete epojji. Jamajjeya mimishi cuana a sa po ajja poaje'yo eseya. ⁷ E'e, ecuanaja etiiQUIANA eyacuiñajji nisho nijje, acui ejuhui'yo nijje, eshahua nijje pea'ai mi mi ca'ya poa. Eyacuiñajjiya esohui yahuaajo nei etehue'yo jama poa ba'a:

“Yahuaajo oya cuana ijja'ijja majje, ishi'ishi majje pea'ai majamaja ca poa eshahua nijje jjapeequianijo”. Jamaya yahuaajo poa.

¡A'a ona jayojja jama quea mimishi pojji eshahua nijje! Jamaya quea tai. ⁸ EtiiQUIANA cuana aje oe onaja ehuanasejo jaanaje, onaja yahuejo jaanaje. Quea mimishi nee nee poanijo, Eyacuiñajjiya oya cuana quea huiso nee nee, 23.000 mano mee ca'ya poa oya pojjaajo

tii. Jamajjeya ja'a jja oe ona jayojja jama pojji! ¡A'a ona-jaya ehuanasejo, yahuejo pea'ai ba'ejji! ⁹ Ecuanaja etiiQUIANA cuana jjashahuabaquia poa jama ba'a: —Ecuanaja quea mimishi poajo, e'e poaja'a Eyacuiñajji quene'ama poaje ecuanaja mimishi cuanajo —jamaya poa, de.

Chojja. Quea mimishi poajo, Eyacuiñajjiya peyo cuana huoojea ca poa ona ijja. Jamajjeya jettiQUIANA jayojja jama a'a pojji! ¹⁰ Ecuanaja etiiQUIANA cuana Eyacuiñajji niñeba ca poa. Jama poa ba'a: —Eyacuiñajjiya ecuanaja quea pame nee ejaahuanajji pojjeama —aca poa.

Eyacuiñajji niñeba canijo, ohuaya ojaya esohuidojojji quea ca'a cuana huoojea ca'ya poa o niñebajji cuana mano mee'yohua. Jamajjeya jettiQUIANA aca poa jayojja jama niñebame a'a ajji Eyacuiñajji!

¹¹ ¡A'a pajea'yojji! Ecuanaja etiiQUIANA quea mimishi poaninajejo mano ca'ya poa yahuaajo nei. Jamaya Eyacuiñajjiya amajje esohui tehue mee ca poa esejaya ebajji. Jamajjeya jjeja ba mee cani e'e jojo nei oya quea quene poaje esejaya mimishijo. Jesosa Quito pojja'a jjeja poeje o'oya. ¡Jamajjeya etiiQUIANA quea mimishi nee nee poa jayojja a'a pojji!

¹² E'e poaja'a beca cuana quea quehua jjashahuabaquiani jama ba'a: —Eya quea pame nee poanijo eshahua eya quea mimishi epo meeji pojjeama.

Chojja. ¡Jamaya jjashahuabaquicue ba'a: —Eyacuiñajji, ¡eya quea pame po meesahuacue! ¡Nahue neineicue mo; quea mimishi a'a po mee o'oyajji! —jamaya Eyacuiñajji nijje mimicue!

¹³ Eshahuaa ojjaña quea mimishi po mee sa acani. Ohuaya miquianaya quea mimishi po mee sa acani. Jamatii Eyacuiñajjiya miquianaya epajea'yojji pojjeama. Ohuaya miquianaya ojaya epeeji quea pame nee po mee canijo, eshahuaa miya quea mimishi epo mee'yojji pojjeama. Beshahua nei quea mimishi po mee canijo, ¡Eyacuiñajji nijje mimicue: —Jesosaja, jeshahua quea huesha nee huoojeacue! ¡Eya quea pame po meecue mimishi'ama epojji! —jamaya pocue!

Jesosaja bobi ijjaña oya ja'a eshahuaaja epeeji jama pojji!

¹⁴ Jamajjeya ecuea epeeji cuana, jeshahuaaja epeeji cuana nijje a'a jjapeequijji! ¡Onaya eshahua nijje mimiani yasijje a'a poquijji! ¡Epana'yo cuanajo a'a jjashahuabaquijji pea'ai! ¹⁵ Ecuea eba miquianaya quea jjashahuabaqui ja'a nee poani. Jamajjeya jecuea esohuijo jjashahuaba neineiQUICUE, quea ja'a nee!

¹⁶ Eseyaya Jesosaja bobi ijjaña oya esejaya mimishijo mano'yonaje pajea'yo jjima yajji. Jesosaja bobi ijja jji-mahuajo, oja ena ishi jjimahuajo pea'ai eseya Eyacuiñajji nijje emimi jama ba'a: —Eyacuiñajji, miya quea pame nee nee.

Ma ena ishi jjimahuajo Jesosa Quitoja ena' ecua'yojo eseya ejjashahuabaqui jama ba'a: —Jesosaja mano'yonaje ecuea mimishi cuijea'yojji soseje —jamaya jjashahuabaquime epo.

Pahui ijja jjimahuajo eseya ejjashahuabaqui Jesosa Quitoja yamijo jama ba'a: —Jesosaja Quito eseya ojaya

epeeji quea pame nee epo meeji soseje mano'yona-je.

¹⁷ Pahui mijisisi jjimahuajo oe pahui yani. Eseyá Jesosaja epeeji cuana quea huiso. Jamatii pahui oe jayojja jama eseya poani. E'e, eseya ojee nequianijo eseye nei jayojja nequiani Jesosa Quito nijje nei japeequianijo.

¹⁸ ¡Jashahuabaquicue ecranajaya etiiquianajo, Jodio cuanajo! Oya cuana yahuajo nei jama poa ba'a: Eyacuiñajji nijje emimijji cuaa noe Eyacuiñajji yasijje equia'yo dahua ca poa. Noe dahua tehuejea jjimahua ijji caninaje Eyacuiñajji nijje japeequianiya jjejojo. ¹⁹ ¿Ajeo acuae eyaya miquiana jama huohuaña, ae ba meesahuajji? Jama ba'a: Bobi eyacuiñajji nisho huasijje quia majje dejja cuaa jamatii ijji cani. Eyacuiñajji nisho eshe pojjeama, Eyacuiñajji e'e jojo nei pojjeama, de.

²⁰ Jamatii eshahua epeeji cuaa bobi quia cani eyacuiñajji nisho epana'yo huasijje pojjeama. Maya eshahua cuana huasijje quia cani. Jamajjeya oya cuana Eyacuiñajji e'e jojo nei nijje japeequi ajja. Miquianaya Jesosaja epeeji cuana, ja'a eshahua epeeji jayojja jama ajji! ¡A'a eshahua cuana nijje pojji! ²¹ Jesosa Quito nijje japeequianiya jeshahua cuana nijje a'a japeequijji! Pea oya, de. Jamajjeya Jesosaja ena ishianajo, oja bobi ijjiñajjo pea'ai ¡bobi eshahua huasijje equia'yo a'a ijji pea'aijji! ²² Eshahua cuana Eyacuiñajji boti'ama nei nei. ¡A'a esejaya Emeshi Mese nei Eyacuiñajji quea quene po meeji eshahua nijje japeequianijo! ¿A'a miya quea ca'a nee poso jabaquiani? ¿A'a ya Eyacuiñajji ca'a'ama poso aña? Jamajjeya Jesosa nijje japeequiani ja'a eshahua epeeji po pea'aijji!

²³ Jesosa Quitoja epeeji beca cuana jama mimiani ba'a: —Eya Jesosaja epeeji poanijo ojjaña bobi, epana'yo huasijje quia'yo pea'ai ijji majje quea mimishi pojjeama poani —jamaya poani.

E'e jojo nei. Jamatii eyaya miquianaya saja'aña jama ba'a: —Chojja. Ma bobi ijji majje quea pame pojjeama poani. Maaya ojjaña Jesosa nijje japeequi meesahua ajja. Miquianaya jama jashahuaba quehuaquiani pea'ai ba'a: —Ecuaya ojjaña aje mimishi'ama poanijo.

Eyaya ca ca miquianaya huohuaña jama ba'a: —Ojjaña quea pame pojjeama e'ajji. ¡Jesosaja epeeji quea ja'a pojjeama cuana quea mimishi po mee o'oya chana! ²⁴ Jamajjeya a'a quea quehua jashahuabaquijji jama ba'a: —Eyaya ojjaña bobi jjesheje ecuea e'ijjiñajji —jamaya poanijo miquianaya Jesosaja pea epeeji cuanajo jashahuabaqui ajja.

Chojja. ¡Jashahuabaquicue pea cuana Jesosa nijje ejapeequi meesahuajji quea ja'a nee! ²⁵ Jamajjeya noe edahua'yo jjesheñajjo ja'a huohui'ajjaji jama ba'a: —¿A'a jiquio noe edahua'yo eshahua huasijje quia? —a'a jamaya huohui'ajjaji!

Jamajjeya ¡miyaya maya ijjiacue quea bihui nee, mete'ama! ²⁶ E'e, Eyacuiñajji esohui etehue'yo jama poa ba'a:

“Eyacuiñajjiya ojjaña meshi cuana pana ca'ya poa. Ojjaña aquiana pea'ai pana ca'ya poa. Jamajjeya ojaye nei meshi, aquiana pea'ai, ojjaña”.
Jamaya poa yahuajo nei.

²⁷ E'e pojja'a Jesosaja epeeji pojjeama miya iyaa caje ojaya equi yasijje bobi ijji. Jamajjeya ojaya equi yasijje poqui majje ¡bobi ijjiacue mete'ama! Ijji'ijjianijo ja'a huohui'ajjaji jama ba'a: —¿A'a jiquio noe edahua'yo eshahua huasijje quia? —a'a huohui'ajjaji! ¡Jamatii ijjiacue mete'ama!

²⁸ Jamatii ojee ijji'ijjianiya, pea esejaya epeejiya miya jama huohui caje pojja'a ba'a: —Jiquio bobi eshahua huasijje quia —jamaya acajje ja'a maya bobi ijjiñajji! Ma bobi quea pame nee e'ijjiñajji. Jamatii miya Jesosaja epeeji neiya ma bobi ijjiña ba majje esejaya epeeji quea yeno poaje pojja'a. ¡A'a oya quea yeno, quea bicho po meeji! ²⁹ E'e, miya Jesosaja epeeji quea pame poaniya ijjiñajje mete'ama. Jamatii mi ba majje Jesosaja epeeji quea ja'a pishana quea mete po chana' miyaya ma bobi ijjiñajjo. Jamajjeya ja'a ijjiñajji! ¡Oya quea bei po meecue; miya pea'ai quea bei pocue!

E'e pojja'a beca cuaa huohui caje jama ba'a: —Eyaya Jesosaja epeeji poaniya ojjaña bobi ijjiña mete'ama —acaje.

Eya ca ca jama po ajja. Pea cuana quea jashahuabaqui ja'a pojjeamajo quea mete poanijo, eyaya ojjaña bobi ijjiñajjo.

E'e pojja'a onaaya jama acaje pea'ai ba'a: ³⁰ —E'e, eyaya Eyacuiñajji bihuaña ojjaña bobi ijji jjimahuajo. Jamajjeya eyaya ojjaña bobi ijjiña mete'ama. Bobijo eyaya Eyacuiñajji bihuaña; jamajjeya ja'a enijje mimi-jajiji eya ojjaña bobi ijjiñajjo! —jamaya acaje pojja'a onaaya.

³¹ Jamajjeya ¡jiquio esohui bacue! Miyaya bobi ijjiñaño, e'ishijji ishianajo pea'ai ojjaña miquea eba'ejjiño pea'ai jashahuabaquicue jama ba'a: —Eyaya ojjaña cuana Eyacuiñajji bihua mee sa aña.

³² Jamajjeya ¡quea ja'a nee ba'e tiitacue! ¡A'a esejaya epeeji cuana quea mimishi po mee o'oyajji! ¡Jodio cuana, Jodio pojjeama, Jesosaja epeeji cuana pea'ai a'a quea mimishi po mee o'oyajji! ¡E'e, quea ja'a nee ba'e cue ojjaña cuana Jesosa nijje quea ja'a nee ejapeequi meesahuajji! ³³ ¡E jayojja jama pocue! Eya jashahuabaquiani ona quea bei po meesahuajji. Eya jashahuabaqui ajja jama ba'a: —¿Ae shai ejo quea pame?

Eyaya ca ca ojjaña quea bei po mee sa aña. Jamaya eyaya aña ojjaña Jesosaja epeeji epojji.

11 Eyaya Jesosa Quitoja esohui jayojja jama aña. ¡Jamajjeya e jayojja jama pocue miquianaya!

Esohui Eyacuiñajji equi yasijje dobiquianijo

² Ojjaña pojjaño miquianaya ejo jashahuabaquiani. Ecuca esohui jayojja jama po tiitiani, miquianaya. Jamaya quea pame. ³ Jamatii ¡ecuea esohui etehue'yo ba neineicue yahue cuana, ehuanase cuana pea'ai! Yahue cuana ojaya ehuanase huooejaji poani. Jesosa Quito ojjaña huooejaji poani tii, dejja cuana huooejaji poani, ojaya epeeji cuana huooejaji poani. Ojaya Chii Eyacuiñajji eyajo ani Jesosa Quito huooejaji poani pea'ai. ⁴ Jamajjeya dejja cuana, Eyacuiñajji equijo nequi enijje mimianijo, oja sohui huohui canijo pea'ai ¡jaahuojja cajiñajje! Jaahuojjajiya Eyacuiñajji esohui

huohui canijo Jesosa Quito cajaa ajji jayojja jama poani. ⁵ Epona cuana ca ca Eyacuiñajji equijo ani onijje mimianijo, ojaya esohui huohui caqui pea'ai jjasapataquicue! E'e, epona jjasapataqui ajjajo oja yahue cajaa ajji jayojja jama poani. Jamajjeya jjasapataqui ajjajo esao cobojea majje jayojja jama poani, quea bicho poani. ⁶ E'e, eponaa jjasapataqui ajjaa jjejojo cacobojea cahua. Jamatii epona esao cobojea majje quea bicho nee nee poaje. Jamajjeya bicho'ama epojji epona cajjahuojja taquiahua Eyacuiñajji equijo mimianijo.

⁷ Dejja cuaa, Eyacuiñajji epeejiya ejaahuojja iya ajja Eyacuiñajji equijo esohui huohui canijo. E'e, Eyacuiñajji dejja cuanajo jama poa ba'a: —Dejja cuana ojjaña e'aquiana mese poaje ojjaña aquiana meshijo ani. Jamaya Eyacuiñajjiya ojjaña ba mee caje ohuaya dejja pana ca'ya poa quea pame nee oya jayojja jama epojji. Jamajjeya ja'a epona jama poji! ¡A'a jjahuojjataquiiji nequiana dejja! Oya jayojjaya epona oja yahueja esohui jayojja jama acani oja yahueja yajji. ⁸ Eyacuiñajjiya dejja ebionei pana coo ca'ya poa. Dejja pana majje quijje epona pana ca'ya poa dejjaja edojjojjanijji sa'. ⁹ Eyacuiñajjiya dejja pana jjiima eponaja yajji. Chojja. Epona pana ca'ya poa dejjaja yajji. Dejja epona huoojeajji poa. Jamaya Eyacuiñajjiya a sa aca'ya poa. ¹⁰ Jamajjeya Eyacuiñajjiya esohuidojojji cuaa eseya ba canijo, epona cuana cajjahuojjataquiahua Eyacuiñajji nijje ojee mimianijo. Jamajjeya ojjaña ba cani yahue epona huoojeajji poani.

¹¹ Jamatii jjeja Emeshi Mese nei Jesosa nijje jjapeequi majje ehuanase cuaa yahue cuana ba'e meesahua cani Jesosa Quitojo. Yahue cuaa ehuanase jaahuana cani pea'ai. ¹² E'e, yahujajo nei nei dejja pana majje quijje Eyacuiñajjiya epona pana ca'ya poa dejjaja edojjojjanijji sa', ebionei epona. Jjeja ca ca dejja sho'i cuana eponaja mejo cuayani. Jamatii Eyacuiñajjiya ojjaña pana ca'ya poa, ojjaña nei nei.

¹³ Jamajjeya jashahuabaquicue epona cuanajo! ¡A'a ojjaña ojee Eyacuiñajji nijje mimianijo epona camimiahua jjahuojjataqui jjiima? ¡A'a jamaya quea pame nee? Chojja, quea pame pojjeama. ¹⁴ Ecuana eba dejja cuana saojji quea pame pojjeama. Epona jayojja poani, saojji. ¹⁵ Epona saojji ca ca quea pame nee nee. Eponaja esao ao ojaya ejjahuojja taquiiji jayojja. Jamaya Eyacuiñajjiya quea boti nee nee. ¹⁶ E'e pojja'a eponaja esao aojo, ejjahuojjataquiiji pea'ai pea cuana jjamimicuaiea nobiajeaqui sa poani enijje. Jamatii ecuea esohui jiquio jama ba'a: Epona cuana Eyacuiñajji equijo cajjahuojjataquiahua. Jesosaja epeeji cuaa ojjaña cuiñajji ba'eya jamaya huohui cani pea'ai.

¡Pea Jesosaja epeeji cuana nijje a'a quea mimishi poji!

¹⁷ Ecuea epeeji cuana, jjeja pea esohui eyaya tehueje miquianaja ebajji. Miquianaya Eyacuiñajji equijo ojee anijo quea pame pojjeama poani. Ojjaña cuana Jesosa nijje quea ja'a nee jjapeequi meesahua jjiima. Pea epeeji cuana ca ca quea yeno po mee añ. Jamajjeya eyaya miquianaya huohui Eyacuiñajji equijo quea ja'a nee epojji. ¹⁸ Pea cuaa eya huohui canaje ja-

ma ba'a: —Jesosaja epeeji cuana Conitojo ba'e Eyacuiñajji equijo ojee jjachichaqui majje jjamimicuaiea nobiajeaqui. Oe poji epeeji cuaa pea epeeji cuana nijje jjapeequi sa po ajja acani cuaa —jamaya acani cuaa.

E'e pojja'a miquianaya jamaya quea tai poani. ¹⁹ Jesosaja epeeji quea bei pojjeama mimicuaieanobiajea sa poani, pea nijje jjapeequi ajja. Jamaya quea tai. Jamatii jamaya poanijo, ojjaña ba caje ache dejja cuana Jesosaja epeeji e'e jojo nei pojjeama, ache oja epeeji e'e jojo nei ba caje pea'ai. ²⁰ E'e, miquianaya ca mi ca oe Eyacuiñajji equi yasijje dobiquiani esejaya Emeshi Mese nei Jesosaja bobi ojee ijiaa poso. Chojja, Jesosajo miquianaya jashahuabaqui ajja, oya esejo mano'yona jeo jashahuabaqui ajja. ²¹ Ojee ijia'ijia ajja pea'ai miquianaya. Chojja, pea cuana ishoa ajja. Jamajjeya beca cuaa quea huiso ijia cani. Quea huiso ishi cani pea'ai, quea jjeje nee nee poani. Pea cuana ca ca quea shoe nee poani. ²² Jamajjeya bobi quea huiso ijia sa poanijo miquianajaya equijo ijia'ijia socue! ¡A'a Eyacuiñajji equijo quea dejja tai poji! ¡Jesosaja epeeji aema' a'a quea bicho po meeji ojaya bobi quea huiso chamajo! Eyacuiñajji equijo quea tai añajo, eyaya ojjaña miquianaya tecueña jama ba'a: —¡Eyacuiñajji equijo ani a'a Jesosaja epeeji quea mimishi ajji bobijo!

¡Jesosaja bobi e'e jojo nei ijiaecue o pajea'yo jjiima yajji!
(Mateo 26.26-29; Macoso 14.22-25; Noca 22.14-20)

²³ Eseyaya Emeshi Mese neiya Jesosaa eya ba mee canaje jiquio esohui oja bobi ojee e'ijiajji, oya esejaya mimishijo mano'yonaje pajea'yo jjiima yajji. Maya yahujajo eyaya huohuinaje jama ba'a: —Oe mecajje esejaya Emeshi Mese nei Jesosaja epeeji nishohua oya quia canaje dejja maseja equecua'yojji. Iña majje dojo canaje cuaa. Iña jjimahuajo Jesosaa oe pahui jjeshe canaje. ²⁴ Eyacuiñajji bihuia majje mijisisi canaje. Ojaya epeeji cuana jama huohuime acanaje ba'a: —Jiquio pahui emijisisi ecuea eyami. Eya miquianajaya mimishi cuanajo manojeyo. Jamajjeya jiquio pahui ijiañajo miquianaaya eya miquianaja mimishijo manoyonaje pajea'yo jjiima yajji —Jesosaja poanaje.

²⁵ Pahui ijia majje Jesosa Quitohua caneco jjeshe canaje. Eyacuiñajji bihuia ca o'oyanaje. Huohui canaje jama ba'a: —Jiquio ena canecojo nequi ecuea ena'. E'e, ecuea ena' cuayaquije'yo. Eya ojjañaja mimishijo manojeyo. Jamajjeya Eyacuiñajjiya miquianaya huohui caje, ma ohua miquianajaya mimishi cuana cuijea caje'yo e mano'yajo, ma oja yahujajo huohui jjiima. Jamajjeya jiquio ena canecojo nequi ishianajo jashahuaba tiiti-quicue jama ba'a: "Jesosaja manoyajo oja ena' cuayaquinaje ecuea mimishi cuijea'yojji" jamaya acue —Jesosaja acanaje.

²⁶ Jiquio pahui, ena canecojo nequi pea'ai Jesosa Quitoja bobi poani. Jamajjeya ojee ojaya bobi ijiaña o shahuaba poquajji, ma oya esejaya mimishijo manoyonaje. ¡Jamaya acue esejaya Emeshi Mese nei Jesosaja Quito poe o'oya jjimahuajo! ²⁷ Jamajjeya esejaya Emeshi Mese nei Jesosaja bobi, pahui ijiañajo ojaya ena ca-

necojo nequi pea'ai ojee ishianajo ja'a quea dejja tai pojji! ¡Quea nishehui a'a pojji! ¡A'a quea mimishi jjas-hahuabaquiji pea'ai! Jamaya poanijo Jesosa quecua'-yojji jama poani miya. Eyacuiñajjiya quea nee nee po mee caje'yo. Jamajjeya quea ja'a jashahuabaqui ajjaa ja'a Jesusaja bobi ijjiajji, ojaya ena canecojo nequi pea'ai a'a ishijji! Quea ja'a ba'yaniya ¡quea bihui nee Jesusaja bobi ijjiacue, ojaya ena ishicie pea'ai!

²⁸ Jamajjeya Jesusaja bobi ijjia jjimahuajo, ¡ojaya ena ishi jjimahuajo pea'ai jashahuaba neineiquicue jama ba'a: —¿A'a eya e'e jojo nei Jesosa Quito nijje jjapee-quiani quea ja'a nee? —jjashahuabaquicue!

¡Majoya pahui ijjiacue, e'ishijji ishicie quea bihui nee pea'ai! ²⁹ Jesosa Quitoja esohui ojaya bobijo miquea quea quehuajo ja'a ijjiajji! Jesosa mijo mano'yonajejo jashahuabaqui jjimaa ja'a oja bobi ijjiajji! Miya ijjiajo Eyacuiñajji quea que nee nee po chana'. Miya quea nee po mee caje. ³⁰ Quea huiso miquiana nijje nequiya Jesusajo jashahuabaqui jjima oja bobi ijjia cani. Jamajjeya quea mano poani, beca cuana ca'a'ama poani. Jamajjeya beca cuana mano'yonaje pea'ai. ³¹ Miquea eba'ejjijjo jashahuabaqui majje ¡mimicue Eyacuiñajji nijje jama ba'a: —¡Ecuea mimishi cuana cuijea'yocue! —jamaya acue!

Jamajjeya Eyacuiñajjiya miquea mimishi cuijea'yo majje miya etecueajji pojjeama Jesusaja bobi ijjiañajo. ³² Jamatii Eyacuiñajjiya jjeya Jesusaja epeeji quea ja'a pishana quea mano, quea nee po mee cani ejjabahuejaqui meeji, mimishi cuana epajea mee'yojji. Jamajjeya quijje Jesusaja epeeji pojjeama cuana nijje equiyo'yojji pojjeama cuaquijo esahuaja epeeji cuana nijje.

³³ Jamajjeya epeeji cuana, ¡shajja'ajjacue mo! ¡Miquianaaya Jesusaja bobi ijjiañajo ojee oe ijjiacue o shahuaba'yojji! ¡A'a mee nei ijjia'ijji; ishoa socue cuana! ³⁴ Ojjaña joya quea naba taja, quea shoe pea'ai poani equijo ca ijjia'ijjiyahua Jesusaja bobi ijjia jjimahuajo. Jamajjeya Eyacuiñajji quea tecue po ajja miquiana nijje, quea pame nee ojee Jesusaja bobi ijjiañajo.

Miquea esohui etehue'yojo, quea huiso eya miquiaaya huohui'ajjanaje. Maya eyaya huohuije miquiana huasijje poe o'oya majje.

Edojjoshahua Pameya eseya Eyacuiñajji chaco meesahua cani

12 Ecuea epeeji, miquianajaya esohui etehue'yojo eya huohui'ajjanaje miquiaaya Edojjoshahua Pamejo. Jjeya nei eyaya maya huohuije miquianajaya ebajji. Edojjoshahua Pameya eseya Eyacuiñajji chaco meesahua cani. Ojjaña Eyacuiñajji ejjashahuabaquiji jayojja jama ameesahua cani. ² Yahuajo Jesosa Quito nijje jjapeequi jjimahu miquianaya jjapeequinaje esahua cuana nijje. Eyacuiñajji nisho nijje miminaje, acui ejuhui'yo nijje pea'ai. Maya shajjama', nabama' pea'ai. Jamaya miquianajaya eba. ³ Beca cuana jama sijje pome poani ba'a: —Jesosa sijjepojji. Oya Eyacuiñajji Bacua Eja pojjeama —jama sijje pomeya poani.

Jamajjeya miquianajaya eba oya cuana Edojjoshahua Pame nijje jjapeequi ajja. Onijje jjapeequianijo ca ca Edojjoshahua Pameya oeyaya eseya huohui meesahua cani jama ba'a: —Eseyaya Emeshi Mese nei oe nei nequi, Jesosa Quito —e'e, jamaya Edojjoshahua Pameya oeyaya eseya huohui meesahua cani.

⁴ Edojjoshahua Pame oe neiya eseya amee cani Eyacuiñajji quea pame nee. Oe epeeji oe aquiana quea pame nee Eyacuiñajji ameesahua cani. Beca cuana pea aquiana quea pame nee ameesahua cani. Quea huiso aquiana cuana Eyacuiñajji ameesahua cani Edojjoshahua Pameya. ⁵ Eseyaya Emeshi Mese oe nei yani. Ojaya nei yajji eseyaya chacoña. Ohuaya ojaya epeeji cuana huoojea cani quea huiso ojaya yajji quea pame a'yohua. Ojaya yajji ohuaya chaco meesahua cani ojjaña echaco. ⁶ Eyacuiñajji oe nei yani. Ohuaya Jesusaja epeeji cuana huoojea cani ojaya echacoji cuana a'yohua. Oe epeeji oe echacoji ameesahua cani, Eyacuiñajjiya. Pea epeeji pea echacoji ameesahua cani. ⁷ Edojjoshahua Pameya Jesusaja epeeji cuana quea pame ameesahua cani pea'ai. Jamajjeya ojjaña ba mee caje oya ese nijje nequi. E'e, ohuaya Jesusaja epeeji cuana quea ja'a ameesahua cani ojjaña Jesosa nijje ejjapeequi meesahuajji. ⁸ E'e, Edojjoshahua Pameya Jesusaja epeeji beca cuana quea jashahuabaqui ja'a po mee cani Eyacuiñajji ejjashahuabaquiji e'e jojo nei ehuhuiji. Pea epeejjiya Eyacuiñajji esohui jayojja jama onaya ba meesahua cani quea ja'a nee. ⁹ Pea epeeji cuana Jesusaja epeeji cuana quea ja'a, mete'ama pea'ai po mee cani. Beca epeeji cuana emanooja cuana huaquia meesahua cani Edojjoshahua Pameya. ¹⁰ Ohuaya pea epeeji cuana ma dejja ajjima acani ameesahua cani. Pea epeeji Eyacuiñajji esohui huohui meesahua cani quea ja'a nee, pea ba'e meeji. Beca cuana ba meesahua cani ache cuana e'e jojo nei ojaya, Edojjoshahua Pameya huoojea'yo poani ebajji. Ache dejja esahua nijje quehuajje jjapeequiani ba meesahua cani pea'ai. Edojjoshahua Pameya beca cuana Eyacuiñajji emimi mimi meesahua cani. Pea cuana ma emimi huohui meesahua cani ojjaña cuanaja ebajji. ¹¹ E'e, Edojjoshahua Pameya ojjaña Jesusaja epeeji jamaya ameesahua cani quea huiso. Ojaya ejjashahuabaquiji ojaya epeeji cuana huoojea cani, Edojjoshahua Pameya.

Eseyaya Emeshi Mese oe nei yani; ojaya epeeji cuana oja yami jayojja jama poani

¹² Ecuea eyami oe nei yani. Yaa cuana yani, equise cuana pea'ai yani. Quea huiso pea aquiana cuana yani ecue eyamijo. Jamatii ecuea eyami oe nei. Oya jayojjaya Jesusaja epeeji cuana poani, quea huiso ojee onijje jjapeequianijo. Jamatii ojjaña oe eyami jayojja jama poani; Jesosa Quitoja eyami jayojja jama eseya poani. ¹³ Jamaya poanaje ojjaña eseya ojaya epeeji cuana poanijo. E'e, Jodio cuana, Jodio pojjeama cuana ojaya epeeji poani. Sosema' chacochoani cuana, echaco mesema' pea'ai ojaya epeeji poani. Jamajjeya Edojjoshahua Pameya eseya Jesosa Quitoja eyami jayojja ja-

ma po mee canaje ojjaña, onijje jjapeequianijo. Edoj-joshahua Pameya esejo nequiya Jesusaja epeeji quea ja'a po mee cani.

¹⁴ E'e, esejaya eyami oe nei yani. Jamatii yaa yani, equise yani, ecojja yani, quea huiso pea aquiana yani esejaya yamijo pea'ai. ¹⁵ Ejiojji eme' jayojja jama pojjeama. Jamatii ejiojji quea pame nee. A'a ejiojji jama poaje pojja'a ba'a: —Eya eme' jayojja pojjeamajo eyamijo enequijji pojjeama —¿a'a jamaya mimi majje enequijji pojjeama? Chojja, jamaya po majje oya jamatii eyamijo nequi, de.

¹⁶ E'e, eshajja ecojja jayojja jama pojjeama. Jamatii eshajja pea'ai quea pame nee, esapajo nequi pea'ai. Eshajja jama mimijajime epojji pojjeama ba'a: —Eya ecojja jjemo eyamijo nequime —jamaya mimijaji ajja, jamatii jamaya po majje eyamijo nequime, de.

¹⁷ E'e, ecuea eyami ecojja oopana pojjeama. Chojja. Eshajja yani pea'ai ejjashajja'ajjaquijji. Ecuea eyami eshajja oopana pojjeama. Yani ehui pea'ai ejjashiye'ajjaquijji. ¹⁸ E'e, Eyacuiñajjiya ecuea eyami pana ca poa. Ohuaya sa cani jayojja jama aca poa. Jamajjeya ecojja cuana, eshajja cuana, ehui cuana, quea huiso pea aquiana pea'ai pana ca poa, ohuaya. ¹⁹ Jamaya epana jojjemo eya ese ejja pojjeama pome. E'e, Eyacuiñajjiya ecuea eyami ecojja oopana ajjima poa. Eya ecojja oopana e'a jojjemo eya ese ejja jayojja jama pojjeama pome. Jamajjeya ohuaya ecue eyamijo quea huiso aquiana pana canaje, jjashajja'ajjaquijji po mee canaje, jjashiye'ajjaquijji po mee canaje pea'ai. ²⁰ E'e jojo nei ecuea eyamijo yani quea huiso aquiana. Jamatii ecuea eyami oe nei jayojja jama poani. Oya jayojjaya Jesusaja epeeji quea huiso nee yani. Jamatii ojee onijje jjapeequianijo eseya oe jayojja jama poani, Jesusaja eyami jayojja jama poani.

²¹ Ecuea ecojjaa eme' cajaa a'ajja poani. Esapaa ejiojji cajaa ajjima acani pea'ai. Chojja ojjaña ojee quea pame nee nee poani. ²² Eyami dojjojo ca'a'ama. Jamatii eyami dojjojo cuana chama' jojjemo eyami eshe pojjeama pome. ²³ Beca eyami dojjojo e'e pojja'a hua'ama. Jamatii eseyaya eyami dojjojo ani nahue neineaña. Pea aquiana eyamijo anijo eseyaya daqui huoshoaña bicho'ama epojji. ²⁴ Jamatii pea eyamijo esapajo, emejo bicho'amajo daqui mi huoshoaña. Eyacuiñajji ca ca bicho'ama eseya eyamijo. Ojjaña aquiana eyamijo oja pana. Ojjaña eyami ojee nequia canaje oe eyamijo. Jiquio ecua eseyaya esejaya eyami nahueaña ojjaña eyami, jamatii beca cuanajo se quea bicho poani jama jayojja ¡Jesusaja epeejiya pea epeeji jjapeequi meesahuacue onijje quea pame nee! ²⁵ Ojjaña aquiana eyamijo ani oe eyami poani, ojee acani quea pame nee. Oe eyami pea eyamiya nahue cani. Jamajjeya eyami quea pame nee poani. ¡Ma jayojja jama eseyaya Jesusaja epeeji ojee ejjachacoqui onijje! ²⁶ E'e, oe mijijje eyami quea nee poanijo, pea mijijje quea mano poaje pea'ai. Ojjaña mijijje eyami cuana quea aja poanijo, quea pame nee poaje ojjaña. Oya jayojjaya eseya Jesusaja epeeji oe eyami jayojjaya poani. Jamajjeya oe epeeji quea nee poanijo, ojjaña quea yeno poani ojo.

Oe epeejiya quea pame nee nee acanijo, ojjaña onijje quea bihui nee poani.

²⁷ Jamajjeya ojaya ejjashahuabaquijji jama Eyacuiñajjiya esejaya eyami cuana pana ca poa quea huiso pea-pea cuana eyami. Oya jayojjaya Jesusaja epeeji cuana ojaya eyami quea huiso cuana jayojja jama poani. ²⁸ Jamajjeya Eyacuiñajjiya eseya Jesusaja epeeji cuana quea huiso peapea jjashahuabaqui'yome asahua cani ojaya epeeji cuana quea ja'a epojji. E'e, ohuaya beca epeeji huohui canaje jama ba'a: —Miyacuea ehucuea Jesosa Quitojo huohuiya.

Ohuaya pea cuana huohui canaje jama ba'a: —¡Ojjaña cuiñajji yasijje esohui quea pame nee Jesosa Quitojo huohuiquicue quea ja'a nee ojjaña eshajja'ajjajji!

Pea cuana huohui canaje jama ba'a: —¡Jesusa Quitoja epeeji cuana esohui huohuijji pocue!

Pea cuana ma dejjaa ajjima acani ameesahua canaje. Pea cuana emanojaa cuana huaquia meesahua canaje pea'ai. Pea epeeji cuana ona quea pame ba'e meesahuajji po mee canaje. Pea epeeji emeshi mese jayojja jama ojjaña jaahuanajji po mee cani. Pea cuana Eyacuiñajjiya pea emimi mimi meesahua cani. ²⁹ ¿A'a ojjaña Jesusaja epeeji cuana Eyacuiñajjiya huoojea cani esohui quea pame Jesusajo huohui coohua? ¿A'a ojjaña epeeji cuana Eyacuiñajjiya esohui quea huesha huohui cani? ¿A'a ojjaña ojaya epeeji cuana esohui huohuijji poani? ¿A'a ojjaña epeeji ma dejjaa ajjima acani ameesahua cani? Chojja. ³⁰ ¿A'a ojjaña epeeji cuana emanojaa cuana huaquia mee cani? Chojja. ¿A'a ojjaña ojaya epeeji cuana Eyacuiñajjiya emimi mimi meesahua cani? Chojja. ¿A'a ojjaña epeejiya ma emimi eseya esohui huohui cani ojjaña ebajji? Chojja.

³¹ E'e, Edojjoshahua Pameya eseya, Jesusaja epeeji cuana Eyacuiñajjiyo chaco meesahua cani. ¡Miquianaaya Eyacuiñajjiyo quea pame nee chaco neinei sa añajo quea pame nee oe acue, pea epeeji cuana quea ja'a nee eba'e meesahuajji! Jamatii eyaya miya huohuije e'e jojo nei joya ojjaña quea jea nee nee acani Eyacuiñajjiya ba cani quea pame nee nee. Jamajjeya ¡ojjaña quea jea acue!

Eyacuiñajjiya eseya ojjaña quea jea nee ameesahua cani

13 E'e, ojjaña e'e jojo nei quea jea acue jama ba'a: E'e pojja'a ojjaña dejjaja emimi, esohuidojojjiya emimi quea pame nee pea'ai mimi majje jamatii pea epeeji ecuea quea jea nee pojjeama. Jamajjeya ecuea pea cuana Jesusa nijje ejjapeequi meesahuajji pojjeama. Eya mimiani emimijeajji, esho'iquiaa cuiaqueyajea cani jama quea shajjaquijji epojji. ² Eyacuiñajjiya eya ojaya esohui quea huesha nee huohui meesahua cajje ojaya ejjashahuabaquijji ba meesahua cajje pea'ai, ojjaña ojaya esohui etehue'yo ba meesahua cajje pea'ai, ma dejjaa ajjima acani ameesahua cajje pea'ai jamatii pea epeeji ecuea quea jea nee pojjeama. Jamajjeya eyaya pea cuana Jesusa nijje ejjapeequi meesahuajji pojjeama. Eyacuiñajjiya eya ba cani mimishi cuijea'yo jjiima pea'ai. ³ Ojjaña ecuea aquiana cuana aema' cua-

na huasijje quiaje'yo pojja'a; Jesosa nijje jjapee nisho-quianijo, e'e pojja'a pea cuaa eya iña caje ejeanobia-jeajji. Jamatii pea cuana quea jea nee a'ajjajo eyaya oya cuana eba'e meesahua'yojji pojjeama Jesosa nijje. Eyacuiñajjiya eya ba cani mimishi cuijea'yo jjima pea'ai.

⁴ Pea cuana e'e jojo nei ecuea quea jea nee nee amajje oya cuana ecuea tecuea cuajijji pojjeama. Quea bei poaje. Pea cuanaja aquiana quea jea yajji pojjeama. Ecuea ehuhuijji pojjeama jama ba'a: —Eya ca iña quea pame nee nee poani.

Pea jayojja po sa po ajja nei nei pea'ai ca iña. ⁵ Pea cuana e'e jojo nei ecuea quea jea nee neejo ecuea eniñebajji pojjeama. Pea nijje emimijajji pojjeama. Quea nahue pojjeama poani, equenequene cuajijji pojjeama pea'ai. Pea cuana e'e jojo nei ecuea quea jea neejo, eya onaa quea tai acajje, aquiana napa cajje pea'ai eya quea yeno po tiitii ajja: —Onaaya eya quea mimishi acajje eyaya oya quea mimishi a pea'aie'yo —jamaya a'a jjashahuabaquijji.

⁶ Eyacuiñajji ecuea quea jea nee poanijo ecuea onajaya mimishi cuana boti'ama poaje. Ona quea pame nee poanijo ca ca eya quea bihui nee poaje pea'ai. ⁷ Pea cuana e'e jojo nei ecuea quea jea nee poanijo e napajji cuana nijje quea quene po ajja. Oe epeeji pea epeeji-jo siajje poanijo, ecuea eshajja'ajjajji pojjeama. Jesosa nijje jjapee tiitiquije'yo jamatii quea camaja poanijo. Jjashahuaba tiitiquije'yo jama ba'a: —E'e jojo nei Jesosaja epeeji poanijo, ohuaya eya ba'e tiitii mee caje'yo onijje eyajo.

⁸ Eyaya pea cuana quea jea nee atiitije'yo. Jamaya sa poani Eyacuiñajji. Jjeya ca ca Eyacuiñajjiya ojaya epeeji cuana esohui quea pame huohui meesahua cani. Jamatii eyajo huohui pajeaje'yo. Jjeya beca cuana Eyacuiñajjiya emimi mimi cani. Jamatii eyajo ma emimi mimi pajea caje'yo. Jjeya Eyacuiñajjiya ejjashahuabaquijji ba meesahua cani oe pojji. Quijje eyajo ojjaña ba mee caje'yo quea huiso. ⁹ Jjeya eseya Eyacuiñajjiya ejjashahuabaquijji oe pojji nei ba mee cani. Jjeya Edojjoshahua Pameya eseya Eyacuiñajjiya ejjashahuabaquijji oe pojji nei huohui meesahua cani. ¹⁰ Jesosa Quito poe o'oyajo ca ca eseya ojjaña Eyacuiñajjiya ejjashahuabaquijji cuana quea pame nee nee ba mee caje'yo.

¹¹ Jama poaje ba'a: Eya esho'yahuajo oe pojji jjashahuabaquinaje quea pame pishana. Ecuea esohui cuana quea pame pishana poanaje pea'ai. Tii majje ca ca etii jama jjashahuabaquime poanaje, quea ja'a nee. Quea ja'a nee huohuinaje pea'ai. ¹² Oya jayojjaya jjeya eseyaya Quito ba jjima aña ecojjaa. Jamajjeya ojjaña ojaya ejjashahuabaquijji ba mee jjima acani. Quijje poe o'oya majje ese cojja neiyo nequi oya mimije'yo. Jjeya ohuaya ojjaña esejaya ejjashahuabaquijji ba neinei cani. O poe o'oyajo eseyaya ojaya ejjashahuabaquijji ba neineije'yo pea'ai quea ja'a nee. Oya eseyaya ba neineije'yo pea'ai.

¹³ E'e, Jesosa Quito poe o'oyajo, eseya onijje jjapee tiitiquije'yo. Ojaya epoe'yojji eseya jja'ishoa'ajjaquiani. Jjeya esejaya ojaya epeeji cuana quea jea nee poa-

ni. E'e, Jesosa Quitoja epoe'yojji jja'ishoa'ajjaquiani, onijje jjapeequiani pea'ai. Ojaya epeeji cuana quea jea nee atiitiiña pea'ai. Jamaya Eyacuiñajji sa poani.

Edojjoshahua Pameya eseya chaco meesahua cani Jesosa nijje

14 Jamajjeya ijashahuaba tiitiquicue pea cuana quea jea nee e'ajji! Jamaya mimicue ba'a: —Eyacuiñajji, ¡Edojjoshahua Pame huoojeacue e que mi jayojja ameesahuaa, Jesosaja epeeji cuana quea ja'a nee onijje ejjapeequi meesahuajji! E'e, ¡miqua eshajja'ajjajji huohui meesahuacue ojjaña meshi yasijje!

² Ojjaña joya Eyacuiñajjiya emimijo mimiani onajaya ba jjima esohuijo Eyacuiñajji nijje mimiani, pea cuana nijje pojjeama. Edojjoshahua Pameya maya mimi meesahua cani. Jamatii pea cuanaja maya emimi quea quehua. Eyacuiñajjiya ohuaye nei shajja'ajja cani.

³ Eyacuiñajjiya esohui cuana quea ja'a nee huohui canijo ca ca Jesosaja epeeji cuana quea ja'a shajja'ajja cani. Onijje jjapee neinei qui meesahua cani. Quea bihui nee po meesahua cani pea'ai. ⁴ Ojjaña joya Eyacuiñajjiya emimijo mimiani onijje nei mimiani. Oya oe nei quea bihui nee poaje. Joya Eyacuiñajjiya esohui quea ja'a nee huohuijji poaniya ca ca quea huiso Jesosaja epeeji cuana quea bihui nee po mee caje.

⁵ Eya miquianajo jjashahuabaquiani jama ba'a: Ojjaña miquianaya Eyacuiñajjiya emimijo mimianijo jamaya quea pame pishana poaje. Eya quea bihui pishana poaje. Miquianaaya Eyacuiñajjiya esohui joya ojjaña eba esohuijo huohuiañajo ca ca jamaya quea pame nee nee, eya quea bihui nee nee poaje. E'e, Eyacuiñajjiya esohui quea ja'a nee huohui majje pea cuana Jesosa nijje jjapeequi meesahuaña. Eyacuiñajjiya pea emimijo mimi majje aje oe pea cuana Jesosa nijje ejjapeequi meesahuajji pojjeama. Pea epeejiya Eyacuiñajjiya pea emimi, ma ojjaña quea quehua shajja'ajja majje cahuhui cahua esejaya esohuijo. Jamaya ohuaya huohui majje ojjaña Jesosaja epeeji cuana quea pame nee jjapeequi meesahua caje Jesosa nijje.

⁶ Jamajjeya epeeji cuana, eya miquiana que poe majje mimi ajja pea emimijo joya miquianajaya bajjima esohuijo. Chojja, maya emimi shajja'ajja majje miquianaya Jesosa nijje ejjapeequijji pojjeama. Quea ja'a nee ca ca eyaya Eyacuiñajjiya ejjashahuabaquijji miquianaya ba meesahuaje. Ojaya esohui eyacua Jesosaja ba meesahuaje pea'ai.

⁷ ¡Iiquio esohuijo jjashahuabaquicue pea'ai! Dejja cuanaja ba jjima pishanajo dehue quea ja'a nee miamia ajja. E'iñaqueyajji baja jjimajo quea ja'a iñaqueya queya ajja pea'ai. Jamatii quea shajjaquijjo poaje, quea quehua. Jamajjeya ojjaña eshajja'ajjajji pojjeama.

⁸ Echacomeejjiya eshe'ana mia jjimajo, echacojji cuana poqui ajja chacohua. ⁹ Oya jayojjaya miquianaya pea emimijo joya onajaya quea quehuajo mimianijo, miqua esohui onajaya eshajja'ajjajji pojjeama. Jamajjeya esohui joya onaja quea ja'a neejo huohucue ojjaña ebaajji! ¹⁰ E'e, dejja cuana quea huiso meshi cuanajo

ba'yani. Quea huiso emimijo mimiani pea'ai. Jamatii ojjaña emimi ojjaña meshijo quea ja'a nee poani, ma meshijo ba'eja quea ja'a. Jamajjeya ojjañaja emimi onijje ba'e cuanaja quea ja'a nee. ¹¹ Jamatii oe dejja pea emimijo joya ecuea quea quehuajo mimianijo oya pea dejja, eya ojaya pea poani pea'ai. ¹² Jamajjeya mi-quianaya Edojjoshahua Pame nijje quea pame nee a sa poanijo Edojjoshahua Pame nijje mimicue jama ba'a: —¡Eya ameesahuacue quea pame nee, quea ja'a nee! Jamajjeya eya quea huiso Jesusaja epeeji cuana onijje jjapeequi meesahuaje. E'e, ¡quea ja'a nee nee Eyacuiñajji esohui huohui meesahuacue mo!

¹³ Jamajjeya Jesusaja epeeji Eyacuiñajji emimijo joya pea cuanaja quea quehuajo mimi majje oya Eyacuiñajji nijje camimiahua jama ba'a: —Ecue Chii, ¡joya o miminaje mo huohui meesahuacue quea epeeji cuanaja quea ja'a nee epojji! ¡Maya esohui mo huohui meesahuacue quea ja'a nee onajaya ebajji! —jamaya mimicue Eyacuiñajji nijje.

¹⁴ E'e, Eyacuiñajji pea emimijo ma ecuea ba jjimajo onijje mimi mee cajje jamatii ma e miminaje ecuea quea quehua poani pea'ai. Edojjoshahua Pameya eya mimi meesahua cani ecuea ejjashahuabaquiji pojjeama. ¹⁵ Jamajjeya eya jama poaje ba'a: Ecuea ejjashahuabaquiji quea ja'a nee jayojja eya mimije Eyacuiñajji nijje ecuea esohuijo; pea emimijo joya ecuea ba jjima esohuijo pea'ai eya onijje mimije pea'ai. Edojjoshahua Pameya eya sohuicuaya meesahua cani pea emimijo joya ecuea ba jjima esohuijo, ecuea edojjoshahua Jesusajo sohuicuayani; ecuea ejjashahuabaquiji quea ja'a nee jayojja jama eya sohuicuayani ecuea esohuijo pea'ai. ¹⁶ Miquiaaya pea emimijo Eyacuiñajji bihuiañajo, pea epeeji minijje Eyacuiñajji ebihuijji pojjeama. Ojaya ba jjima miquea esohui. ¹⁷ E'e, miyaya Eyacuiñajji bihuiaña quea pame nee. Jamatii miquea emimi onajaya quea quehua. Jamajjeya miyaya Jesusaja epeeji cuana onijje jjapeequi sahua jjima aje.

¹⁸ Miquianaya oe pojji mimiani Eyacuiñajji pea emimijo. Eyacuiñajjiya eya ojaya pea emimijo mimi meesahua canaje quea huiso. Jamajjeya eya onijje mimiani jama ba'a: —Jamaya Eyacuiñajji, miyaya eya quea pame nee anaje.

¹⁹ Jamatii Jesusaja epeeji cuana ojee nequiani Eyacuiñajji esohui shajja'ajjaji, eyaya quea ja'a nee huohui sa aña joya onaja ojjañaja eba esohuijo. Esohui quea ja'a nee, quehua'ama mimianijo, ojjaña shajja'ajja caje quea ja'a nee. Jamaya quea pame nee nee. Huohui sa po ajja quea huiso esohui pea emimijo, joya onajaya ba jjima esohuijo. Jamaya quea pame pishana.

²⁰ Ecuea epeeji cuana, ¡quea sho'i tai jayojja jama a'a jjashahuabaquiji! ¡Quea ja'a nee jjashahuabaquicue! ¡Jesusa Quitoja esohui ba neineicue! ¡A'a quea mimishi ba'eji pea'ai! ²¹ Eyacuiñajjiya esohui yahuajo nei tehue mee ca poa jama ba'a:

“Pea cuana pea meshijo ba'e, ma pea esohuijo mimiani pea'ai eyaya huoojeaje Jodio cuana jjabahuejjaqui meeya. Jamatii oya cuana aje oe o shajja'ajja sa po ajja poaje”.

Jamaya Eyacuiñajji esohui poa.

²² Jamajjeya Jesusa Quitoja epeeji etiiya Eyacuiñajji pea emimi shajja'ajja majje ba caje Eyacuiñajji e'e jojo nei ona nijje nequi. ¡Jesusaja epeeji pojjeama cuana ca oe Eyacuiñajji esohui huohuicue; joya o mimiani esohuijoya oe huohuicue! Esohui shajja'ajja majje oya cuana jjapeequije'yo Jesusa nijje. ²³ Jamajjeya Jesusaja epeeji cuana ojee nequianijo, e'e pojja'a ojjaña mi-quianaya Eyacuiñajji pea emimijo mimije. Jesusaja epeeji pojjeama cuaa, ojaya epeeji eyacua pea'aiya ma emimi shajja'ajja majje ¿ae shai oya cuana jjashahuabaquije? Miquianaya onajaya ba jjima esohuijo mimiani shajja'ajja majje jama acaje ba'a: —¡Dee! Jesusaja epeeji cuana niñe poqui'onaje. Jamajjeya quea quehua mimiani —acaje.

²⁴ Jesusaja epeeji cuaa ojee nequi majje Eyacuiñajji esohui quea ja'a nee huohui canijo ca ca, pea cuana shajja'ajja majje ojaya mimishi cuanajo quea yeno poaje. E'e, Jesusaja epeeji pojjeama cuana, ojaya epeeji eyacua cuana pojja'a Eyacuiñajji esohui shajja'ajja majje quea mete poaje jama ba'a: —Eyacuiñajjiya eya quea nee nee po mee caje'yo, de, ecuea mimishijo.

²⁵ Eyacuiñajji esohui huohuijiya ma dejja cuanaja ejjashahuabaquiji tai huohui cajo, shajja'ajja majje oya cuaa Eyacuiñajji bihuia caje ecui'oshajjajo nequiya. Jamma poaje ba'a: —E'e jojo nei Eyacuiñajji miquiana nijje nequi —acaje cuaa. Jesusa nijje jjapeequije'yo pea'ai.

¡Jesusaja epeeji ojee nequianijo Eyacuiñajji esohui huohuicue quea ja'a nee!

²⁶ Jamajjeya ecuea epeeji cuana, ¡bacue jiquio esohui! Miquianaya ojee nequi majje Eyacuiñajji esohui huohuiya, jama acue ba'a: Oe epeejiya Jesusa cabihuia cahua esohuicuayajji. Pea epeejiya Eyacuiñajji esohui cahuohui cahua. Peaa Eyacuiñajji ejjashahuabaquiji pea cuana que cahuohui cahua. Majoya pea epeeji Eyacuiñajji pea emimijo mimi sa poanijo, peaa cahuohui cahua esejaya esohuijo. Jamajjeya ¡Jesusaja epeeji ojee nequianijo quea ja'a nee acue! ¡Ojjaña Eyacuiñajji nijje jjapeequi meesahuacue! ²⁷ E'e pojja'a beca cuana Eyacuiñajji pea emimijo mimi sa poani. ¡Beca cuana, pea beca peejjima pojja'a mimi meecue, quea huiso pojjeama! Ma pea emimi mimianijo, ¡a'a ojee mimi meejji! ¡Oe epeeji mimi pajea'yajo, pea mimi meecue! ¡Oya mimi pajea'yajo, pea mimi meecue! Ma epeeji cuana Eyacuiñajji pea emimijo mimi majje, peaa cahuohui cahua esejaya esohuijo ojjañaja ebajji. ²⁸ Pea epeejiya ma emimi ba jjimajo, ¡a'a mimi meejji Jesusaja epeeji cuana ojee nequi yasijje! Oya oe nei nequi majje Eyacuiñajji emimijo camimiahua Eyacuiñajji nijje.

²⁹ Miquiana ojee nequijo beca esohui huohuijiya, pea beca peejjima pojja'aa Eyacuiñajji esohui quea ja'a nee cahuohui cahua, quea huiso pojjeama. Pea cuaa cashajja'ajja cahua. Shajja'ajja majje cajjashahuabaquiahua jama ba'a: —¿A'a e'e jojo nei Eyacuiñajji esohui huohui canaje? —cajjashahuabaquiahua.

³⁰ Jamatii Edojjoshahua Pameya pea epeeji jjas-hahuabaqui meesahua caje, oya pea'ai camimiahua ojaña eshajja'ajjajji. E'e, esohui huohuijjiya huohui pajea cajo, ma epeejiya Eyacuiñajjiya ejjashahuabaquijji cahuohui cahua. ³¹ Jamaya miquianaaya Eyacuiñajjiya ejjashahuabaquijji ba majje huohuije ojjaña. ¡Pea aca-je jja a'a huohuijji! ¡Oe epeejiya huohui pajea cajo, pea epeejiya cahuohui cahua! Jamajjeya Jesusaja epeeji cuana ba mee caje quea huiso Eyacuiñajjiya esohui. Quea bihui nee poaje pea'ai. ³² Jesusaja esohui huohui sa poanijo ¡ca'ishoa cahua! ¡Pea mimi pajea'yajo cahuohui cahua! ³³ E'e, Eyacuiñajjiya equijo ojaya epeeji cuaa ¡a'a becajje huohuijji! Quea shajjaquijji poaje. Eyacuiñajjiya ojaya epeeji cuana ojee shajja'ajja mee cani quea bei. ¡Bacue! Ojjaña Eyacuiñajjiya equi cuana-jo Jesusaja epeeji ojee nequi majje quea ja'a nee esohui huohui cani; becajje pojjeama huohui cani.

³⁴ Epona cuana, ojjaña Eyacuiñajjiya equijo ojee nequianijo, ¡a'a mimijji Eyacuiñajjiya esohui huohuijji mimianijo! ¡Jjashajja'ajjaquicue oe! Jodio cuanaja esohui etehue'yo yahuajo jama poa pea'ai ba'a:

“¡Eyacuiñajjiya equijo epona cuana cjjashajja'ajja-quiahua! Eyacuiñajjiya epeeji cuana huoojajji pojjeama oya cuana”.

Jamaya poa yahuajo. ³⁵ Esohui shajja'ajja majje e'e poaja epona cuana huohui'ajja sa poani ma esohuijo. Jamatii ¡Eyacuiñajjiya equijo a'a huohui'ajjajji! Jamaya quea pame pojjeama. Ojaya equi yasijje poqui majje ojaya yahue cahuohui'ajja cahua, eponaa.

³⁶ Ecuea epeeji cuana Conitojo ba'e, miquianajaya eba Eyacuiñajjiya esohui miquiana que poe coo jjima. Chojja. Pea cuaa ojaya esohui shajja'ajja canaje miquianaja shajja'ajja jjimahuajo. Jamajjeya ¡shajja'ajjacue mo! ³⁷ Miquianaya beca cuana jama poani ba'a: —Eya Eyacuiñajjiya esohui huohuijji e'e jojo nei poani. Eya Edojjoshahua Pameya quea pame nee ameesahua caje'yo Eyacuiñajjiyo. Jamajjeya ¡miquianaya jjabahuejjaquicue ecuea esohui Eyacuiñajjiya esohui e'e nei poani! ³⁸ Ojjaña joya miquiana nijje nequi ecuea esohui shajja'ajja sa po ajja, ¡a'a oya cuana shajja'ajjajji!

³⁹ Ecuea epeeji cuana, jamajjeya ¡Eyacuiñajjiya esohui huohui neineicue! Pea epeeji Eyacuiñajjiya pea emimijo mimi sa poanijo ¡oya camimiahua! ⁴⁰ Jamajjeya ¡Eyacuiñajjiya equijo ojee nequi majje ojjaña quea ja'a nee acue! ¡Ojjaña Jesusaja epeeji cuana shajja'ajjacue quea ja'a nee pea'ai!

Jesosa Quito mano'yo majje shequi o'oyanaje

15 Jjeyahua nei eya miquiana huasijje huohui sa o'oya poani esohui quea pame nee Jesosa Quito. Yahuajo pishana ma esohui shajja'ajja majje miquianaya onijje jjapeequi'yonaje quea ja'a nee. ² Ma esohui Jesosa Quitoja eyaya huohuinaje. Shajja'ajja majje miquianaya onijje jjapeequi'yonaje quea ja'a nee, cuaqui yasijje epoqui'yojji pojjeama. Jamatii Jesosa Quito nijje e'e jojo nei jjapeequi jjima ca mi ca oe cuaqui yasijje poquije'yo.

³ E'e, ma esohui quea pame nee Jesosa Quitojo shajja'ajja majje eyaya huohuinaje miquianajaya eshajja'ajjajji jama ba'a: Eyacuiñajjiya esohui yahuajo etehue'yo jayojja jama e'e jojo nei Jesosa Quito eseja mimishi cuanajo mano'yonaje. ⁴ Jesosa Quito mano'yajo, ojaya epeeji cuaa oya jjani ai yasijje huananobia ca'ya poa. Pea beca peejjima cahui po majje, Eyacuiñajjiya oya, Jesosa Quito shequi mee ca o'oya poa. E'e, Eyacuiñajjiya esohui yahuajo nei etehue'yo jayojja jama aca poa Jesusaa. ⁵ Eshe o'oya poajo, Penohua oya ba canaje. Majoya ome miji pea'ai pea beca, 12 huisomeya ojaya pea epeeji cuaa Jesosa Quito ba ca'yonaje, oja huoojea'yo cuaa. ⁶ Majoya quijje pishana quea huiso ojaya epeeji cuaa, 500 huisomeya ojee jjachichacui majje Jesosa Quito ba canaje eshe o'oya. Quea huiso ma epeeji jjeya eshe enequi'yo. Beca cuana mano'yonaje. ⁷ Majoya pea pojja Satiacohua Jesosa Quito ba canaje eshe o'oya. Majoya ojjaña oja huoojea'yo cuaa oya ba canaje eshe o'oya. ⁸ Majoya eyaya quijjeyejje neiya Jesosa Quito banaje pea'ai. E'e, yahuajo eya ojaya epeeji pojjeama poa. Jjeya ca ca eya ojaya epeeji po mee ca'yonaje pea'ai. ⁹ Jamajjeya eya quea pame pishana. Pea oja huoojea'yo cuana quea pame nee poani. E'e, o ba jjimahuajo eyaya ojaya epeeji cuana janobajjima nei napanaje. Jamatii Eyacuiñajjiya eya babaca canaje Jesusaja huoojea'yo epojji pea'ai. ¹⁰ Eya Eyacuiñajjiya quea jea nee nee poani. Jamajjeya ojaya esohui huohuijji po mee canaje, Jesusaja huoojea'yo po mee canaje pea'ai. Ohua huoojea caje eyaya ojaya esohui huohui neinei'yonaje. Jesusaja pea ehoojea'yo cuaa quea huiso pishana chaco canaje ojo. Eyaya ca ca ojo janobajjima nei chaco tiitiaña ohuaya eya chaco meesahua canajejo. E'e, ohuaya eya chaco meesahua ajja jojjemo eyaya ojo chaco jjima ame. ¹¹ E'e pojja'a pea ehoojea'yoja esohui Jesosa Quitojo miquianaaya shajja'ajjanaje. E'e pojja'a ecuea esohui ojo shajja'ajjanaje. Jamatii, ojjaña ecuaaya ma esohui quea pame Jesosa Quitojo huohuiaña. ¡Shajja'ajja majje miquianaaya ojaya esohui jayojja jama e'e jojo nei ba'ecue!

Jesosa Quitoja epeeji cuana quijje eshe o'oya poaje

¹² E'e, miquiana huasijje ecuaaya huohuinaje jama ba'a: —Jesosa Quito mano'yajo, Eyacuiñajjiya oya shequi mee ca o'oyanaje.

Jamajjeya ¿apiojji acuae jja oe miquianaya beca cuana jjeya sijje poani? Jama ba'a: —Eseya mano'yajo quijje eshequi mee'yojji pojjeama —¿apiojji jamaya sijje poani?

Chojja. Shequi mee caje o'oya eseya. ¹³ ¡Bacue, oe! Mano'yo majje eshe o'oya po meeme ajja jojjemo Jesosa Quito mano'yo majje shequi mee o'oya jjima acacuiaye pea'ai. Chojja. Oya shequi mee ca'ya poa, Eyacuiñajjiya. ¹⁴ Oya eshe o'oya pojjeama poa jojjemo ecuanaja esohui quea pame nee ojo e'e nei pojjeama pome. Oya mi shequi o'oya poa jojjemo miquianaya onijje jjapeequi jjima pome pea'ai. ¹⁵ Ecuaaya huohuiaña jama ba'a: —Eyacuiñajjiya Jesosa Quito shequi mee ca'yonaje —jamaya e'e nei pojjeama jojjemo ecuaa

siajje ponequime. Chojja, de. ¡Shajja'ajjacue mo! Ma siajjepojji cuanaja esohui e'e nei poani jojjemo ca emano'yo cuana shequi'yo jjima pome, Jesosa Quito shequi'yo jjima poquiaye pea'ai. Chojja, ecuea eba oya shequi'yonaje. ¹⁶ E'e, emano'yo cuana shequi'yo ajja jojjemo Jesosa Quito pea'ai shequi'yo jjima poquiaye. ¹⁷ Oya shequi o'oya jjima jojjemo miquianaaya siajjepojjija esohui shajja'ajja'yome, Jesosa nijje jjapeequi jjiima pome. E'e, Jesosa Quito shequi o'oya jjima poa jojjemo Eyacuiñajji quea quene nee tii pome, miquianajaya mimishi cuijea'yo jjima pea'ai pome. Chojja, ecuea eba Jesosa Quito shequi o'oyanaje. ¹⁸ Oya shequi o'oya jjima jojjemo ojaya epeeji yahuajo mano'yo cuana cuaqui yasijje poquiyoquiaye. Chojja, ecuea eba Jesosa Quito shequi o'oya poa. ¹⁹ E'e, eseya quea bihui nee onijje jjapeequi mee canaje jiquio meshijo ba'yanijo. Jamatii eseya eshe o'oya po mee ajja jojjemo eyajo onijje ba'e tiitii mee'yo jjima acame. Jamaya poani jojjemo ojjaña cuana esejo mimi'yome jama ba'a: —Pabohua ecuana siajje acanaje, de. “¡Jesosa Quito nijje jjapeequi'yocue!” siajje a'yome acanaje.

Chojja, ecuea eba eseya eshe o'oya po mee caje'yo. ²⁰ E'e jojo nei jamaya poanaje ba'a: Eyacuiñajjiya Jesosa Quito shequi mee ca o'oyanaje, eyami eyacua acoo ca'yonaje emano o'oyajji pojjeama. Jamajjeya esejaya eba ohuaya e'e jojo nei Jesosaja epeeji cuana ojjaña tii shequi mee caje o'oya emano o'oyajji pojjeama. ²¹ E'e, Adana quea mimishi poa sosejje mano mee ca'ya poa. Jamajjeya ojjaña manoje'yo, ba'e tiitii ajja meshi cuanajo ba'eca. Jesosa Quitohua ca ca quea pame nee nee acanajejo, ojjaña eshe o'oya po mee caje'yo. ²² Ojjaña cuana Adanaja osecua cuana poanijo o jayojja quea mimishi poani. Jamajjeya Eyacuiñajji nijje ba'e meeme ajja eyajo. Jesosa Quito nijje jjapeequi majje ca ca ohuaya eseya ba'e tiitii mee caje'yo onijje eyajo eshe o'oya po mee'yo majje. ²³ ¿Ache ebionei shequi mee ca o'oyanaje? Eyacuiñajjiya Jesosa Quito ebionei shequi mee ca o'oyanaje. Quijje poe o'oya majje ohuaya ojaya epeeji cuana shequi mee caje o'oya.

²⁴ E'e, quijje poe o'oya majje Jesosa Quito ojjañaja Emeshi Mese nei poaje'yo, ojjaña huoojea'yoyji. Jamajjeya ohuaya ojjaña quea mimishi poani jeabichajea'yo majje iña caje'yo. Iña majje shajja'ajja mee caje'yo. E'e, ohuaya Edosiquiana nei shajja'ajja mee caje'yo pea'ai. Ojjaña eshahua cuana pea'ai, ojjaña emeshi mese quea tai cuana pea'ai shajja'ajja mee caje'yo, Jesosa Quitohua. Jamaya amajje ohuaya ojjaña cuana ojjaña meshi cuanajo ba'e oja Chii bihuia mee caje'yo jama ba'a: —Eyacuiñajji, miya quea ca'a nee nee ojjaña huoojea'yoyji. ¡Ojjaña miya cashajja'ajja cahua! —jamaya ojjaña amee caje Jesosaa.

²⁵ E'e, Eyacuiñajjiya Jesosa Quito ojjaña mimishi cuana, eshahua cuana pea'ai jeabichajea meesahua cani. Jeabichajea jeyojeyo majje oya, Quito Emeshi Mese oe nei nei poaje'yo; ojjaña huoojea'yoyji nei poaje'yo.

²⁶ Yahuajo mimishi aca poa sosejje mano poquipoqui'yani. Quijjejeyje nei ese mano mee'yoyji chama'yo tii a'yo majje ojjaña cuana eshe o'oya po mee caje'yo, Je-

sosa Quitohua. Mano'yo ajja tii tii po mee caje'yo.

²⁷ Yahuajo nei Eyacuiñajjiya esohui etehue'yojo jama poa ba'a: “Eyacuiñajjiya ojjaña jeabichajea'yo majje ojjaña huoojea'yoyji po mee caje'yo oya”. Jamaya yahuajo Eyacuiñajjiya Jesosa Quito aca poa.

Jamatii Jesosa Quito Eyacuiñajji huoojea'yoyji pojjeama. Ojjaña pea cuana huoojea'yoyji ca ca Quito po mee caje'yo, Eyacuiñajjiya. ²⁸ E'e, Jesosa Quito ojjaña quea mimishi cuana jeabichajea sahuamee caje Eyacuiñajjiya, oya ojjaña huoojea'yoyji po mee caje'yo. Majoya oja Chii nijje Jesosa Quito mimije jama ba'a: —Ecue Chii, miya e huoojea'yoyji poani tii tii —jamaya poaje oja Bacua Ejja Jesosa Quito.

E'e, Eyacuiñajji e'e nei ojjaña huoojea'yoyji poaje'yo tii tii; eyajo nequi cuana, meshijo ani cuana pea'ai huoojea'yoyji poaje'yo tii tii.

²⁹ E'e jojo nei Eyacuiñajjiya eseya shequi mee caje o'oya. Jamatii beca cuana jama poani ba'a: —Emano'yo cuana eshequi mee o'oyajji pojjeama.

Beca epeeji cuana quea quehua jjashahuabaquiani jama ba'a: —Yahuajo Jesosaja epeeji mano'ya poa Eyacuiñajjiyo besa mee jjima. Jamajjeya emano'yoja yajjiyo ojaya epeeji eshe nequi Eyacuiñajjiyo besa mee cani cuaa emano'yoja bajjanijo, emano'yo cuana cuaquijo equiyo'yoyji pojjeamajo —jamaya beca cuaa acani. Oya cuana jjashahuabaquiani ojjaña cuana shequi mee caje o'oya. Jamajjeya jamaya acani.

³⁰ Eyacuiñajjiya eseya eshe o'oya epo mee'yoyji pojjeama jojjemo ¿ajeo acuae ecuaya ojjaña pojjaño Jesosa Quitoja sohui huohuime? Ojaya esohui huohuiañajo pea cuaa ecuana quecua nei nei sa acani. ³¹ Epeeji cuana, e'e jojo nei Eyacuiñajjiya eseya shequi mee caje o'oya. Miquiana esejaya Emeshi Mese nei Jesosa Quitoja esohui shajja'ajjanajejo, eya quea bihui nee. Jamatii pea cuaa quecuapana caniya tii eya Jesosa Quitojo chacochoani quea bihui nee. ³² E'e, eshahujaja epeeji cuaa ibia jama quea mase neeya Epesojo ba'eya eya beshahua nei mano mee ca'yonaje eya esohui ehuhui poajejje. Jesosa Quito eshe o'oya po ajja poa jojjemo ¿apiojji shai eyaya esohui huohui tiitiime so'o? Quea camaja nee poanaje. Dejja mimishi cuaa huohui cani jama ba'a: —Mecahujaje ecuana manoje'yo eshequi'yoyji pojjeama. ¡Jamajjeya jjeyahua nei e'ijjia'ijjia, e'ishi'ishi pea'ai! —poani.

Jamatii eshe epo o'oyajji pojjeama jojjemo eseya jamaya po pea'aime. ³³ ¡A'a quea quehua jjashahuabaquijji! ¡A'a onaaya miya jjadasia meequijji! Pea cuana siajje poani jama ba'a: —Ecuana eshequi mee o'oyajji pojjeama.

¡Onijje a'a jjapeequijji! O jayojjaya mi po chana', quea mimishi. ³⁴ Jamajjeya ¡pajea'yocue ejjashahuabaquijji quea quehua! ¡Jesosaja esohui jayojja jama po o'oyacue! ¡Esohui quea quehuajo a'a jjashajja'ajjaquijji! Beca cuanaja Eyacuiñajjiya esohui e'e nei ba jjima. Eyaya miquianaya huohuiaña quea bicho epojji.

¿Achajja shequi o'oyame acuae se poaje?

³⁵ E'e pojja'a miqianaaya eya huohui'ajjanaje jama ba'a: —¿Achajja shai Eyacuiñajjiya emano'yo cuana shequi mee caje o'oya? ¿Ache eyami shai esejaya poaje'yo? ¿A'a eyami eyacua?

³⁶ Miqianaya quea quehua jashahuabaquianijo ¡bace! Anoso quecua jima tii ajja. Quejo quecua cajje meshijo pohua'yani. Siobijje pohua majje ejjii chama'-yo poani, meshi pojji po'yani. ³⁷ Quejo quecua cani cuaa anoso, pea eso' pojja'a. Anoso sa' bana ca ajja. Chojja, eso' pohua majje esa' tiije'yo. ³⁸ Eyacuiñajjiya eso' pohua mee'yo majje esa' tii mee cani. Jamajjeya anoso pohua majje anoso sa' tiiani. Pea same anoso, huenuene sa' jayojja pojjeama. Jamaya Eyacuiñajjiya pana ca'ya poa.

³⁹ Oya jayojja eyami cuana: Oe eyami pea eyami jayojja pojjeama. Quea huiso peapea yamime yani. Ijjia-cajji pea yamime, dejja jayojja jama pojjeama. Cuichojji eyami pea. Jai cuana pea yamime, cuichojji jama pojjeama. ⁴⁰ Oya jayojjaya eyajo Eyacuiñajjiya esohuidojojji cuana yani quea huiso nee. Oya cuana yamima', dejja cuana jama pojjeama. Esohuidojojji cuaa quea pame acani Eyacuiñajjiya yajji. Jamatii dejjaa acani jayojja jama pojjeama acani. Dejja cuanaja eyami quea bame pea'ai. Eseyaya quea pame aña Eyacuiñajjiya yajji pea'ai. ⁴¹ Oya jayojjaya eshequi epojjajo quea pame nee. Ba'i eshequi jayojja jama pojjeama. Jamatii ba'i quea pame nee pea'ai. Majameta ba'i jayojja jama pojjeama. Jamatii majameta quea pame nee pea'ai. Oe majameta pea majameta jayojja jama pojjeama. Oe quea jiji nee, pea quea jiji pishana. Jamatii ojjaña quea pame nee.

⁴² Jiquio ecua anoso quecua cajje Eyacuiñajjiya esa' pohua mee cani jayojja jama eseya mano'yajo, Eyacuiñajjiya eshe o'oya po mee caje'yo. E'e, mojea ca'yajje esejaya eyami ihuije'yo. Chama'yo tii poaje'yo. Eshe o'oya po mee ca'yajje ca ca emano'yajji pojjeama. Eyami eyacua poaje'yo, quea pame nee nee esejaya. ⁴³ E'e, esejaya eyami mojea ca'yajje ihuije'yo. Ca'a'ama. Eshe o'oya po mee majje ca ca quea pame nee po mee caje'yo, Eyacuiñajjiya. Pea eyami eyacua quea ca'a nee poaje'yo emano beca'yajji pojjeama tii. ⁴⁴ Jjeya meshijo ba'yanijo esejaya eyami ca'a'ama. Manojeyo. Ojjaña cuana eseya jamatii ihuije'yo. Eshe o'oya po majje ca ca pea eyami poaje esejaya. Eyajo anicaja jayojja jama poaje'yo. E'e, jjeya esejaya eyami meshijo eba'ejji ca'a'ama. Jamajjeya e'e jojo nei quijje Eyacuiñajjiya esejaya pea eyami pana caje'yo eyacua, quea ca'a nee eyajo eba'e tiitii'yajji.

⁴⁵ Eyacuiñajjiya esohui etehue'yo jama poa ba'a: “Eyacuiñajjiya ebionei dejja Adana bajjani pana ca'ya poa. Eshe po mee ca'ya poa”. Jamaya yahuajo nei nei poa.

Adanaja eyami ca'a'ama poa. Quijje Jesosa Quitohua eseya eshe o'oya po mee cajje esejaya eyami eyacua poaje'yo, pea eyami. Eyajo anicaja jayojja jama poaje'yo quea ca'a nee, ihui'yo ajja. ⁴⁶ Eyacuiñajjiya esejaya eyami ca'a'ama ebionei pana ca'ya poa meshijo

eba'ejji. Quijje Jesosa Quitohua esejaya eyami eyacua pana caje'yo quea ca'a, quea pame nee pea'ai eyajo eba'e tiitii'yajji. ⁴⁷ Eyacuiñajjiya ebionei dejja Adana bajjanija eyami pana ca'ya poa meshi, meshijo eba'ejji. Shequi o'oya majje Jesosa Quitoja eyami eyacua poa, meshi pojjeama. Pea eyami ojaya, de, quea ca'a nee eyajo e'ani tiitii'yajji. ⁴⁸ Ojjaña cuana meshijo ba'e Adana jayojja. Eyami ca'a'ama. Meshi oopana. Jesosaja epeeji cuana ca ca o jayojja jama poaje'yo quea pame nee, quea ca'a nee onijje eyajo eba'e tiitii'yajji. Eyami meshi pojjeama poaje. ⁴⁹ Jjeya meshijo ba'yanijo esejaya eyami ebionei dejja eyami jayojja poani, meshi oopana. Quijje eyajo ba'e majje eseya Jesosa Quitoja eyami eyacua jayojjaya poaje'yo, meshi pojjeama.

⁵⁰ Epeeji cuana, ¡shajja'ajjacue ecuea esohui! Ojjaña meshijo ba'eja eyami ca'a'ama, e'ihui'yajji, meshi pojji epoyajji, Jesosa Quitoja eyami eyacua jayojja pojjeama. Ba'e meeme ajja eyajo Eyacuiñajjiya cuiñajji. E'e, jjeya esejaya eyami meshi, de, eshe epojji tiitii pojjeama eyajo. Quijje ca ca eseya eyami eyacua ba'e tiitii mee caje'yo eyajo, Eyacuiñajji ojjaña huoojea'yajji poanijo.

⁵¹ Jjeya shajja'ajjacue pea esohui! Yahuajo eseya jiquio esohui ba mee jima, eyacua, jama ba'a: Beca cuana mano'yo ajja nei nei Jesosa poe o'oya jjimahua. Ojjaña joya eshe nequi Jesosa Quito poe o'oyajo, emano'yajji pojjeama; onajaya eyami e'ihui'yajji pojjeama. Jesosa Quitohua ojaya epeeji cuanaja pea eyami panacuaji caje'yo eyacua. ⁵² E'e, quijjeyejje nei eshe'ana ai mia cajo, Jesosa Quitohua ojaya epeeji eshe nequi cuanaja pea eyami eyacua pana caje'yo. Jiquio ecua cojja capicapiani jayojja jama panacuaji'yomeya acaje. Eshe'ana mia cajo, ojjaña emano'yo cuana shequi mee caje'yo. Eyami eyacua panacuaji caje'yo eba'e tiitii'yajji. Mano o'oya ajja poaje'yo. E'e, ojjaña esejaya eyami eyacua poaje'yo. ⁵³ Jjeya esejaya eyami eba'e tiitijji pojjeama. Ca'a'ama. Manojeyo. Chama'yo tii poaje'yo. Jamajjeya poe'yo majje Jesosa Quitohua esejaya eyami eyacua pana caje'yo ese nequi tiitii mee'yajji, emano'yajji pojjeama tii tii. ⁵⁴ Jjeya jiquio meshijo eseya Jesosa Quitoja epeeji cuana enequi tiitijji pojjeama. Quijje ca ca ohuaya eseya nequi tiitii mee caje'yo eyajo. Jjeya meshijo ba'e eseya manojeyo. Quijje ca ca esejaya eyami eyacua mano'yo ajja poaje'yo. Ba'e tiitije'yo. E'e, Eyacuiñajjiya esohui yahuajo nei nei etehue'yo jayojja jama poaje. Yahuajo jama poa ba'a: “Dejja cuana mano'yo ajja tii tii. Eshe o'oya po tiitii mee caje'yo Eyacuiñajjiya”. ⁵⁵ Jamaya tehue mee ca poa yahuajo nei nei pea'ai ba'a:

“Emano'yo cuana emojeya'yo jaa tiitii ajja; eshe o'oya po mee caje'yo tii tii. Quijje mano'yo ajja nei nei poaje'yo”.

Jamaya yahuajo nei nei tehue mee ca poa Eyacuiñajjiya.

⁵⁶ Mimishi cuana po nequi jjejojo ojjaña cuana mano ca'yani. Jamajjeya ojjaña quea mete nee poani emano'yajji. Moisesija esohui etehue'yojo eseyaya baña ojjaña shajjama' poani. Jamajjeya manojeyo. ⁵⁷ Jjeya Eya-

cuiñajji ejjabihuaqui jama ba'a: —Eyacuiñajji, miya quea pame nee nee. Miyaya ecuanaja Emeshi Mese nei Jesosa Quito huoojeanaje ecuanaja mimishi cui-jea'yohua. Jamajjeya ecuanaja shequi meeje o'oya. Ba'e tiitii meeje'yo eyajo.

⁵⁸ Jamajjeya ecuea epeeji cuana, ¡Jesosa Quitoja esohui etehue'yo jayojja jama atiitiicue! ¡Ojaya epeeji quea pame nee po tiitiicue! ¡A'a Jesosa niije jjapeequi pajea'yojji! ¡Emeshi Mese neiyo Jesusajo chaco tiitiicue! Jjeya ojo chacochoanijo, quijje ohuaya eseya quea huiso sosequia caje'yo eyajo.

¡Ejjesheji chichacue Jesusaja epeeji aema' ba'e meesahuajji!

16 Yahuajo pishana miqianajaya etehuejo eya huohui'ajjanaje bejjo Jesusaja epeeji huasijje, ma Jodea meshijo ba'e yasijje ehoojeajji. Jjeya eyaya miqianaya saja'aje jama ba'a: Eyaya esohui tehuenaje Jesusaja epeeji cuana huasijje, Janata meshijo ba'e yasijje. ¡Ma esohui etehue'yo jayojja jama acue pea'ai miqianaaya! ² E'e, ¡bejjo chichacue! E'e, chacochoacoajo miqianaya sosequia cani cuaa ejjeshejjijo. Jamajjeya ojjaña epojja Eyacuiñajji ojee bihuiajjijo, nomico poj-jajo, ¡ejjesheji chichacue Jesusaja epeeji aema' huasijje ehoojeajji, Jodea meshijo ba'e yasijje! E'e pojja'a oe epeejiya oe pojji chaco majje oe pojji quia caje. Pea epeejiya quea huiso quia caje pojja'a. ¡Jamaya quea pame quiacue! Jamajjeya eya miqiana quea poe jji-mahuajo miquea ejjesheji echicha'yo poaje. ³ ¿Ache dejja cuana pojja'a ejjesheji echicha'yo dojo meeje'yo aema huasijje, Jenosanenajo ba'e yasijje? ¡Jashahuabaquicue ache dejja cuana quea pame nee ehoojeajji! Jamajjeya miqiana huasijje poe majje eyaya ma dejja cuana huoojeaje ejjesheji dojhua. Eyaya ecuea esohui etehue'yo huoojeaje onijje ojjaña esejaya epeeji cuana Jenosanenajo ba'eca ba meeji ma dejja cuana ecue huoojea'yo ejjesheji quiaa. ⁴ E'e pojja'a quijje jjashahuabaqui majje eya jama poaje ba'a: —E'e, eya pea'ai Jenosana huasijje capoquiahua. Jamaya quea pame nee —eya poaje. Jamajjeya ojee poquije.

⁵ Quijje eya Masenonia meshi yejenana sa poani. Yejenana majje miqiana quea poqui sa poani. ⁶ E'e pojja'a eya miqiana niije nequije quea huiso cahui cuanajo; quea huoe poani ba'i pojja cuanajo eya miqiana niije anije. Majoya eya ojjaña huapa cuana huasijje poquije o'oya. Miqianaaya eya poqui meesahuaje. Aquiana epoqui meeji quiaje pojja'a. ⁷ Jjeya ca ca eya miqiana quea poe sa po ajja. E'e, jjeya miqiana niije nequi meeme ajja quea huiso cahuijo. Jamajjeya quijje eya poeje miqiana baa. Poe majje miqiana niije nequije quea cahui huiso. Jamaya eya poaje esejaya Emeshi Mese neiya Jesusaa eya miqiana niije nequi mee sa acanijo. ⁸ Jjeya ca ca eya jjashahuabaquiani jiquiojo Epesojo enequijji. E'e, eya jiquiojo tii nequije. Jodio cuana ojjaña bobi quea cuanajo nequi chicha majje, bobi apoa po majje pea'ai ojjaña quea bihui nee ojee ijji'ijji. Maya eyaya ishoaña. ⁹ E'e, jiquiojo eyaya quea huiso cuana Eyacuiñajji esohui huohuaña.

Quea huiso nee neeya shajja'ajja cani. Jamatii quea huiso eshahuaja epeejiya eya Jesosa Quitojo mimi pajea mee'yo sa acani cuaa.

¹⁰ E'e pojja'a Timoteo miqiana quea poeje'yo. ¡Poe'yajo oya jaahuanacue, quea bihui nee po meecue! Oya e jayojja jama poani; esejaya Emeshi Mese nei Jesusajo chaco cani. ¹¹ Oya etii pishana. ¡Jamatii ojjaña miqianaaya oya shajja'ajjacue! ¡A'a ojo miamiajji! ¡Pea huasijje poqui meesahuacue quea bihui nee! Jamajjeya oya poeje o'oya e que. Eyaya oya ishoa'ajja anije Jesusaja pea epeeji cuana niije.

¹² Yahuajo eya Jesusaja epeeji Apono bajjani niije minaje jama ba'a: —Apono, ¿ache shono acuae miya poquije Conito huasijje esejaya epeeji cuana baa? ¡Jesusaja pea epeeji cuana niije oe poquicue jocuama! —eya poanaje.

Jjeya oya, Apono poqui sa po ajja quea huiso chacochoanijo. Quijje apoa po majje oya poquije miqiana baa.

Pea esohui quepe nei Etepanajo

¹³ Ecuea epeeji cuana, ¡quea ja'a nee jjashahuabaqui tiitiicue! Peaa miya dasia ca chana'. ¡Jesosa niije jjapeequianajo Eyacuiñajji esohui jayojja jama po tiitiicue quea pame nee! ¡A'a Jesusaja epeeji quea mete pojji! ¡Ojaya epeeji quea ca'a nee, quea pame nee pocue! ¹⁴ ¡Ojjaña quea jea nee acue! ¡Quea bei nee nee ba'ecue ona niije!

¹⁵ ¡Epeeji cuana, shajja'ajjacue mo! Miqianajaya eba Jesusaja epeeji quea pame nee Etepana bajjani. Ojaya huapa pojjeama cuana miqianajaya eba pea'ai, Jesusaja ebionei epeeji cuana Acaya meshijo poanaje. Jesusaja pea epeeji cuana jaahuana tiitii cani quea pame nee, Etepanaa. ¹⁶ Jamajjeya ¡onijje jjapeequicue! ¡Quea pame poanajo, oya shajja'ajjacue! ¡Pea cuaa Etepana jayojja jama quea pame nee Jesusajo chaco cani shajja'ajjacue pea'ai!

¹⁷ Ojjaña miqianaya poe ajja e baa, enijje jjapeequi'yohua. Jamatii miqianajaya epeeji cuana Etepana bajjani, Potonato pea'ai, Acaico pea'ai poeyanaje e chaco sahuua. Jamaya quea pame nee. ¹⁸ Miqiana quea bihui nee po mee canaje jayojjaya jama ohuaya eya quea bihui nee po mee cani. Quea pame nee poanajo, ¡oya cuana cashajja'ajja cahua ojjaña!

Esohui quijjeyeje nei tehue'yo

¹⁹ Jesusaja epeeji cuana Asia mishijo ba'e miqianajo jjashahuabaquiani. Jamajjeya eya huohui'ajja mee cani jama ba'a: —¿Achajja acuae nequiana ani so'o? —onajaya ebajji.

Jesosa epeeji Aquinaa ojaya ehuanase Pisina niije, ojjaña Jesusaja epeeji cuana Aquinaja equijo ojee dobiqiani Jesusaja esohui baa pea'aiya miqiana huohui'ajja cani jama ba'a: —¿Achajja acuae nequiana ani so'o?

²⁰ Ojjaña Jesusaja epeeji cuana jiquiojo ba'eya miqianaya huohui'ajja cani jamaya pea'ai.

Ojjaña Jesusaja epeeji cuana esejaya quea jea neejo, ¡quea bihui nee mimicue ojjaña cuana nijje!

²¹ Eya bajjani Pabo. Miquiana quea bihui nee epojji eyaya eyaye neiya jiquio esohui tehueaña miquiana huasijje jama ba'a: ²² —¡Ojjaña joya Emeshi Mese nei Jesusa Quito nijje e'e jojo nei jjapeequi ajja Eyacuiñajji-

ya quea nee nee capo mee cahua! ¡Esejaya Emeshi Mese nei Jesusa Quito capoe o'oyahua jjeya nei!

²³ ¡Esejaya Emeshi Mese nei Jesusa Quitohua miquianaya cajaahuana cahua quea pame nee!

²⁴ Esey Jesusaja epeeji cuana poanijo miquianaya ecuea quea jea nee nee poani, ojjaña. Mahuiso. Eyaya, Pabohua jiquio esohui tehuejeyonaje. Apoa.

2 CONITIO

Pabohua tecue ca o'oyanaje Jesosaja epeeji cuana Conitojo ba'e yasijje

¹ Eya Pabo, Jesosa Quitoja huoojea'yo oja sohui huohuijji. Jamaya Eyacuiñajjiya a sa acani. Timoteo esejaya epeeji enijje nequi. Eyaya tehueaña miqiana huasijje. E'e, miqiana Jesosaja epeeji cuana Conito cuiñajjiyo ba'e yasijje, ma Acaya meshijo ba'e yasijje cuanaya tehueaña eyaya.

² Eseyaya Emeshi Mese neiya Jesosa Quitohua, Eyacuiñajjiya, esejaya Chii neiya pea'ai miqianaya cajaahuana neinei cahua; quea bei caba'e mee cahua pea'ai!

Pabo Eyacuiñajji nijje mimiani quea bihui

³ Eyacuiñajji ejjabihuaqui! E'e, oya esejaya Emeshi Mese nei Jesosa Quitoja Chii, esejaya Chii nei pea'ai poani. Oya esejo jjashahuabaquiani quea bei. Ohuaya eseya quea bihui nee po mee cani pea'ai. ⁴ Eseyaya quea nee, quea yeno poanijo, ohuaya quea bihui nee po mee cani. Quea bihui nee po majje eseyaya pea cuana quea bihui nee po meeje'yo, yeno'ama pea'ai. Jamaya ejja'aqui ba'a: —Eyacuiñajjiya ecuana jaahuana cani. Oya miqiana jaahuanajji poani pea'ai. Jamajjeya ja'a quea yeno pojji!

⁵ Jesosa Quito quea nee poanaje dejja mimishi cuaa napa cajje. Eseyaya onijje jjapeequianijo, pea cuaa eseya napa caje pea'ai. Jamatii, eseya quea bihui nee po mee caje Jesosaa. Majoya eseyaya pea cuana quea bihui nee po meesahuaje Jesosa nijje. ⁶ E'e eyaya, Timoteohua pea'ai esohui huohuiaña Jesosajo. Jamajjeya pea cuaa ecuana napa cani. Jamatii, ecuanaja esohui shajja'ajja majje miqianaya Jesosa nijje jjapeequi'yanini. Ohuaya miqianaja mimishi cuana cuijea ca'yonaje. Jamajjeya miqianaya quea bei nee poani. E'e, Jesosaa ojaya epeeji quea ca'a nee po mee canijo, miqianaya quea ca'a nee poaje pea'ai. Jamajjeya pea cuaa miqiana napa cajje Jesosaja epeeji quea ca'a nee poaje tii. Onijje jjapee tiitiiquije'yo pea'ai. E'e, Jesosaa miqianaya ojaya epeeji quea ja'a po mee caje'yo ecuanaja jayojjaya, quea bei. ⁷ Jiquio ecuanajaya eba ba'a: Miqianaya Jesosaja epeeji quea ja'a po tiitiije'yo. E'e, miqianaya ecuana jayojja poaje. Jesosa nijje jjapeequianijo, pea cuaa napa caje. Jamatii Jesosaa miqianaya quea bei nee po mee caje ecuana jayojjaya. Jamaya Jesosaa acaje'yo miqianajo, ecuanajo pea'ai.

⁸ Epeeji cuana, jjeya ecuaaya huohuije quea nee ecuana poanaje Asia meshijo nequi miqianajaya

ebajji. Jomajo ecuana ba'enaje quea camaja nee nee, quea mano poanaje. E'e, ecuana jjashahuabaquinaje jama ba'a: —E'e, ecuanaja quea camaja nee nee Jesosa nijje ejjapeequijji, jiquio meshijo pojja'a mo manoj'e'yo. ⁹ E'e, mimishi cuana jjashahuabaquiani ecuana quecuajji.

Eyacuiñajjiya ecuana ba mee canaje jama ba'a: Dejja cuanaja ecuana ejaahuanajji pojjeama. Oya oe nei ecuana jaahuanajji poani. Ohuaya ohuaye nei emano'yoojaa cuana shequi mee ca o'oyani. Jamaya eseya ba mee canaje Eyacuiñajjiya.

¹⁰ E'e, mimishi cuaa napa huicha'a huicha'a cajje, ecuana quea nee nee poanaje. Beshahua nei mano'yonaje quea nee nee poanijo. Jamatii, Eyacuiñajjiya ecuana jaahuana ca'yonaje; mano'yo jjima Asia meshijo nequi. Ecuana jjashahuaba tiitiiquiani jama ba'a: —Eyacuiñajjiya ohuaye neiya ecuana jaahuana tiitii canijo, mano'yo jjima jjeya.

¹¹ E'e, miqianaya Eyacuiñajji nijje miminaje ecuana ojaya ejaahuana tiitiijji. Jamajjeya ohuaya miqianaya shajja'ajja canaje onijje mimiani. Ecuana jaahuana canaje. Jamajjeya quea huiso Jesosaja epeeji cuaa Eyacuiñajji bihuia caje jama ba'a: —Eyacuiñajji, miya quea pame nee nee. Miquea epeeji jaahuanaña quea ja'a nee.

Pabo Conito huasijje poqui jjima poaje

¹² Ecuanaja eba'ejjijo, echacojjijo, ehuhuijjiyo pea'ai ecuanajaya quea bihui nee huohuiaña. E'e, miqiana nijje, ojjaña pea cuana nijje nequinajejo pea'ai e'e jojo nei ecuanaja echaco quea pame nee poanaje. Eyacuiñajjiya ecuana chaco meesahua canaje ojo quea pame nee. Ecuanaja ejjashahuabaquijji quea ja'a nee pea'ai. Dejja cuanaja ejjashahuabaqui'yoyji jayojja jama ba'e ajja. Chojja, de. Eyacuiñajjiya ecuana ba'e meesahua cani ojaya esohui jayojja. ¹³ Ecuanaja esohui etehue'yo miqiana huasijje quea ja'a nee. Esohui quea quehua tehue jjima. Eya jjashahuabaquiani jama ba'a:

¹⁴ Yahujajo miqianaaya ecuana ba pishana majje ejjaba'e bamequi'yoyji banaje. Quijje quea ja'a nee baje'yo ecuana ba neinei majje. Jamajjeya Jesosa, Emeshi Mese nei poe o'oyajo, ecuaaya oya huohuije'yo miqiana ojaya epeeji quea pame poanaje. Cuanaya ojaya esohui jayojja ba'yanijo, miqianaaya quea bihui nee ecuanajo huohuije'yo Jesosa poe o'oyajo.

¹⁵ E'e, ecuea eba miqianaya jjabahuejjaquije eya esohui jayojja quea ja'a ba'yani. Jamajjeya jjeyahua nei eya miqiana que poqui o'oya sa poanaje miqiana Je-

sosajo quea ja'a nee ba'e meesahua o'oyaa. ¹⁶ Yahuajo eya jjashahuabaquinaje jama ba'a: —Jesosaja epeeji cuana Masenonia meshijo ba'e yasijje poquije eya do-biquinanaje Conito cuiñajji yasijje Jesosaja epeeji cuana sohuihuohuiya. Ma ba majjeya eya poquije Jodea meshi yasijje. Jamajjeya Conitojo ba'eca cuaa eya poqui meesahua caje pojja'a Jodea meshi yasijje —eya jjashahuabaquinaje.

¹⁷ Jamatii eya poqui jjima miquiana baa. Miquiana baquijji eya jjashahuabaquinaje quea ja'a nee. Ecuea epoquijji eya jjashahuabaqui ajja pea cuana jayojja jama. Jesosaja epeeji pojjeama cuaa huohui cani jama ba'a: —Eya poquije. Chojja, eya poqui ajja —jamaya eya jjashahuabaqui ajja. Eyaya ecuea ejjashahuabaquijji jayojja jama aje'yo. ¹⁸ Eyacuiñajji siajje po ajja, ojaya esohui jayojja jama ohuaya acani. Ojaya eba eya o jayojja e'e nei poani, siajje po ajja jama ba'a: —E'e pojja'a, de —jamaya eya siajje po ajja.

¹⁹ Eyaya Sinasi nijjeya, Timoteo nijjeya pea'ai Jesosa Quitojo huohuinaje miquiana huasijje. Oya Eyacuiñajji ja Bacua Eja. Ojaya esohui jayojja jama acaje'yo e'e jojo nei, ohuaya. ²⁰ Eyacuiñajji esohui yahuajo quea huiso, quea pame nee nee. Jesosa Quito ese jaahua-naa poeyanaje. Ohuaya ojjaña Eyacuiñajji esohui yahuajo jayojjaya jama jjea acaje'yo esejo. Jamajjeya Jesosa Quitohua Eyacuiñajji esohui jayojja jama acanijo, eseyaya Eyacuiñajji bihuiaña jama ba'a: —Jamaya Eyacuiñajji, miquea esohui quea pame nee nee, quea huiso ecuana nijje. Ojjaña e'e jojo nei poani. Miya siajje po ajja nei nei —jama bihuameya seya aña.

²¹ Eyacuiñajjiya ecuana, miquianaya pea'ai ojaya epeeji po mee canaje. Ohuaya eseya babaca ca'yonaje onijje ejjapeequijji. ²² Jama esejo acanaje ba'a: —Miquianaya ecuea epeeji cuana poani. Ecuea ejjeshe jayojja jama miquianaya —Eyacuiñajji poanaje.

Eyacuiñajjiya ese que hoojea canaje Edojjoshahua Pame ese jaahuanajji. Edojjoshahua Pameya eseya ba mee cani jama ba'a: Quijje eseya quea ja'a nee Jesosa jayojja ba'e tiitiije'yo Eyacuiñajji nijje eyajo.

²³ Eyacuiñajjiya ba cani ecuea ejjashahuabaquijji miquianajo quea pame nee poani. Jama poani eya ba'a: —Conito huasijje jjeya epoquiya jjemo eyaya onaya tecueaje'yome pojja'a, quea mimishi ba'yanijo. ²⁴ Eya miquianajaya emeshi mese pojjeama, miquiana huoojea neinei'yojji pojjeama. Eyaya ca ca esohui huohuiaña, Jesosaja esohui, miquiana quea bihui nee po meeji. E'e, Jesosaja esohui jayojja jama añajo, ojaya epeeji quea ja'a nee poaje'yo miquianaya.

2 Jjeya eya jama jjashahuabaquiani ba'a: —Jjeya Jesosaja epeeji Conitojo ba'e beca cuana quea mimishi poanijo, eya poqui ajja jocuama o tecueaa. Jjabahuejjaqui o'oyajo, quea yeno poaje o'oya oya cuana —eya poani.

² E'e, miquianaya eyaya quea yeno po mee majje, ¿ajeo acuae che eya quea bihui po'yome? ³ Jamajjeya yahuajo eyaya miquianaya tehuenaje quea tecue mimishi pajea mee'yojji. E'e, miquiana quea mimishi poanijo, eya quea yeno poanaje. Pea chama' e quea

bihui nee po meeji. Eya jjashahuabaquinaje miquianajo jama ba'a: —E'e jojo nei ohuaya Eyacuiñajji esohui jayojja jama acaje'yo. Majoya eya quea bihui nee poaje. Oya cuana quea bihui nee poaje pea'ai e'e jojo nei ba'e majje.

⁴ E'e, eyaya quea yeno nee esohui quea tecue tehuenaje miquiana jjabahuejjaqui mee'yojji. Quea camaja esohui quea tecue etehueji. Miquianaya quea yeno po mee sa po'yo ajja. Chojja. Eya jjashahuabaquinaje jama ba'a: —Ecuea esohui etehue'yo quea tecue mimishi cuanajo ba majje onajaya eba poaje ecuea quea jea nee nee poani —eya poani. E'e, jamaya ecuea ejjashahuabaquijji miquianajo.

Jesosaja epeeji quea mimishi tecuea majje ja'a quea tecue po tiitiiji onijje ohua mimishi pajea cajo!

⁵ Jesosaja epeeji miquiana nijje nequi ca ca oe quea mimishi poanaje. Eya quea yeno nee poanaje ojo. Miquianaya quea yeno poanaje pea'ai ojo. Jamajjeya eyaya o jjabahuejja meequijji tehuenaje oja mimishi cuana pajea mee'yojji. ⁶ Beshahua nei miquianaaya, ojjaña oya jjabahuejjaqui meenaje ojaya mimishi epajea'yojji. Apoa. ⁷ Jamajjeya ja'a oya quea yeno po tiitii meeji! ja'a oya tecuea tiitiiji! Chojja. Quea yeno nee nee po tiitii majje oya Jesosa nijje jjapeequi pajea'yo chana'. Jjabahuejjaqui'yajo, onijje jjapeequi'yocue quea pame nee! ⁸ E'e, oya jama huohucue ba'a: —Miya ecuanaja quea boti nee, epeeji —jamaya oya acue.

⁹ Yahuajo eyaya ma esohui tehuenaje miquiana ba'ajjaji so'o. Eya ba sa poanaje jama ba'a: —¿A'a shajjama' poaje? ¿A'a ecuea esohui jayojja jama poaje? —poanaje.

Jamajjeya eyaya esohui tehuenaje miquiana huasijje ma dejja quea mimishi jjabahuejjaqui mee'yojji. Miquianaya ecuea esohui etehue'yo jayojja jama po'yonaje. Quea pame. Apoa poanaje. ¹⁰ Jamajjeya miquianaya ma dejja quea mimishi poani nijje quene'ama poajo, eya onijje quene'ama poaje'yo pea'ai. E'e, ecuea aje ojaya mimishi epajea'yo pea'ai. Eya Jesosa Quitoja esohui huohuiji poanijo ma dejja mimishi nijje quea tecue poanaje. Jjeya ma dejja nijje tecue'ama poanaje. Jamajjeya imiquianaya pea'ai quea bei, quea ja'a pocue! ¹¹ Eseyaya quea bei, quea ja'a poanijo, Edosiquiaa eseya edasiajji pojjeama. E'e, eseyaya eba Edosiquianaja ejjashahuabaquijji. Oya aje oe edasiajji poani, de, Jesosaja epeeji cuana quea mimishi po mee o'oya sa acani.

Jesosaja ehuhui eyacua

¹² Yahuajo pishana eya poquinaje Toasa cuiñajji yasijje esohui quea pame Jesosa Quitojo huohuiya. Jomajo eseyaya Emeshi Mese neiya Jesosaa eya huohui meesahua canaje. Beca cuaa shajja'ajja canaje quea bihui nee. ¹³ Jamatii ecuea epeeji Tito poe jjima Toasa huasijje. Eya quea mete ojo poanaje: —E'e pojja'a oya quea huesha nee quea mano jaa pojja'a, quea nee poani pojja'a —jjashahuabaquinaje. Jamajjeya eya Toa-

sajo ba'e nijje miminaje jama ba'a: —Poquia iña Tito sa'ajjaa.

Majoya eya poquinaje Masenonia meshi yasijje.

¹⁴ Eseyaya Eyacuiñajji bihuiaña. Ohuaya eseya quea ja'a nee nequi mee cani. E'e, ohuaya eseya dejja mimishi cuana mimicuiajejanobiajea meesahua cani; eseya Jesosa Quito nijje jjapeequi mee cani quea ja'a nee. Ohuaya ecuanaja huohui meesahua cani ojjaña meshijo Jesosa Quitoja esohui. Ma esohui quea pame nee nee. Jiquio ecua shiyeshiye esejaya quea boti nee aña jama jayojjaya Jesosaja esohui ecuanajaya quea boti nee.

¹⁵ E'e, Eyacuiñajjiya ecuanaja huoojea ca'yonaje Jesosa Quitoja huohuiya. Ma esohui quea pame nee nee, ecuanaja quea boti nee nee. Jamajjeya ojjaña Jesosaja epeeji cuaa, ma Eyacuiñajjiya onijje ba'e tiitii mee caje'yohua, ojjaña quea mimishi poaniya pea'ai ma quijje quea nee nee po tiitijje'yohua pea'ai ba caje'yo Eyacuiñajji quea pame nee: —E'e Eyacuiñajji, miya quea pame nee nee. Pea chama' mi jayojja —oya bihuiaje eseyaya.

¹⁶ E'e, Jesosa Quitoja esohui shajja'ajja majje ojjaña mimishi cuana jjabaquije oya cuana cajaa'ya'yo, quea nee nee poaje'yo cuaquijo. Ma esohui shajja'ajja majje Jesosaja epeeji cuana ca ca jjabaquije oya cuana ba'e tiitijje'yo quea ja'a nee eyajo Eyacuiñajji nijje. ¹⁷ ¿Aya acuae maya esohui eyacua Jesosajo huohui caje pea cuana huasijje, de? Ma esohui quea pame Jesosa Quitoja ecuanaja huoojea majje sohuihuohui meesahua caje quea ja'a nee, ohuaya. Pea cuaa Eyacuiñajjiya esohui huohui cani bejjo sosejje. Ecuanaja, chojja. Ecuaya, Jesosaja epeeji poaniya quea bihui nee huohuiaña e'e jojo nei. Ecuanaja eba jama ba'a: E'e jojo nei Eyacuiñajjiya ecuanaja huoojea ca'yonaje ojaya esohui huohuiya.

Jesosa nijje chaco cani esohui eyacuajo

3 E'e, Eyacuiñajjiya ecuanaja huoojea ca'yonaje miquiana huasijje ojaya esohui huohuiya. Pea cuaa miquiana que quia ca'yonaje esohui peaja tehue'yo jama ba'a: “¡Jiquio dejja Jesosaja epeeji e'e jojo nei! ¡Jamajjeya oya cuana shajja'ajjacue!” Ecuanaja ca ca peaja tehue'yo equiajji pojjeama miquiana que jama ba'a: “¡Pabo quea pame nee; oya shajja'ajjacue!” Chojja. Ecuanaja miquianajaya eba Eyacuiñajjiya huoojea'yo. ² Ecuanaja jama jjashahuabaquiani ba'a: —Ojjaña ba cani ecuanajaya esohui shajja'ajja majje Jesosaja epeeji quea pame nee poanaje miquianaya, Conitojo ba'e cuana.

Jamajjeya ecuanaja e'e jojo nei Eyacuiñajjiya huoojea'yo ojaya esohui huohuiji ojjañaja eba, de. Jamajjeya esohui mi tehue mee cani jama ba'a: “Pabo quea pame nee, Eyacuiñajjiya huoojea'yo”.

³ E'e, ojjaña ba cani miquianaya Jesosaja epeeji cuana poanaje ecuanaja esohui shajja'ajja majje. Edojjoshahua Pameya miquianaya Jesosa nijje jjapeequi meesahua ca'yonaje. Yahua jojo nei Eyacuiñajjiya esohui mei beje biajje tehue majje ojjaña ba mee ca poa etiiquiana Moisesi oja huoojea'yo. Jjeya ca ca Eyacuiñajjiya Edojjoshahua Pameya miquianaya Jesosa Quito nij-

je jjapeequi meesahua ca'yonaje ecuea esohui miquiana shajja'ajjajo. Jamaya ohuaya ojjaña ba mee canaje eya oja huoojea'yo, ojaya esohui huohuiji.

⁴ Ecuanajaya eba Eyacuiñajjiya ecuanaja Jesosaja epeeji quea ja'a nee po mee majje huoojea canaje miquiana huasijje esohui huohuiya. ⁵ Jamajjeya jama jjashahuabaquiani ecuanaja ba'a: —¿A'a ecuanaja quea pame nee poanijo, quea sapa ja'a poanijo esohui huohuije quea ja'a nee? Chojja. Eyacuiñajjiya ecuanaja esohui huohui meesahua canijo ca ca quea ja'a nee poani ecuanaja esohui —jamaya ecuanaja jjashahuabaquiani.

⁶ E'e, Eyacuiñajjiya ecuanaja huohui meesahua cani ojaya esohui eyacua Jesosajo. Etiiquianaja esohui jayojja jama pojjeama ecuanajaya esohui; eyacua. Ecuanajaya etiiquiana Moisesi esohui yahua jojo nei etehue'yojo ojjaña ba ca poa jama ba'a: —E'e jojo nei mimishi poajo, Eyacuiñajjiya ojjaña quea nee nee po mee caje'yo tii tii; Eyacuiñajji nijje eba'e'yojji pojjeama.

Jjeya ca ca ecuaaya huohuiaña jama ba'a: —Mano'yajo, Edojjoshahua Pameya Jesosaja epeeji cuana ba'e tiitii mee caje'yo —ecuanaja poani.

⁷ E'e, yahua jojo nei Moisesi ojaña jama tehue aca poa ba'a: “Eseyaya quea mimishi poajo, Eyacuiñajjiya quea nee nee po mee caje'yo tii tii cuaquijo”. Jamatii Moisesiya Eyacuiñajjiya esohui quea tecue mei biajje tehue majje ojaya ecojja quea jiji nee nee cuaquijji jayojja poa esohui quea pamejojo. Jamajjeya Isaeni cuaa Moisesiya ecojja ba jjima aca poa quea siyo nee neejojo. Jamatii ojaya ecojja quea jiji nee po tiitii jjima poa. Quijje pishana quea jiji pojjeama po'ya poa. ⁸ ¿Ajea esohui quea pame nee nee po tiitijje? ¿A'a Moisesiya pojja'a? ¿A'a Edojjoshahua Pameya? Edojjoshahua Pameya eseya ba'e tiitii mee canijo quea pame nee; e'e, Moisesiya iye bame bame. ⁹ ¡Bacue! Moisesiya esohui etehue'yo quea pame pishana ojjaña cuaa ba canaje jama ba'a: Eseyaya quea mimishi poajo, Eyacuiñajjiya quea nee nee po mee caje'yo tii tii.

Edojjoshahua Pameya ca ca eseya Eyacuiñajjiya epeeji mimishi'ama po mee cani. Quea pame nee nee Edojjoshahua Pameya eseya acani. ¹⁰ Yahua jojo nei Moisesiya etehue'yojo ojjaña jjashahuabaquinaje ojaya esohui etehue'yo quea pameya poa. Jjeya pea ejjashahuabaquijji yani. Jjeya ca ca esohui quea pame nee eba'e tiitijji ecuanajaya eba. Quea pame nee nee esohui eyacua poani. ¹¹ E'e, yahua jojo nei ojaya esohui etehue'yo quea pame neejo Moisesi ma esohui tehue majje quea cojja jiji poa, quea cojja jiji nee epo tiitijji pojjeama. Jjeya ca ca esohui eyacua quea ja'a capo tiitijji'yahua. E'e, ecuanaja ba'e tiitii mee caje'yo quea pame nee nee epo tiitijji.

¹² E'e, ecuanajaya eba Edojjoshahua Pameya ecuanaja ba'e tiitii mee caje'yo. Jamajjeya ma esohui eyacua huohui tiitiaña bicho'ama. ¹³ Moisesi esohui tehue majje quea cojja jiji nee poa. Jamajjeya ojjaña cuana ojo quea mete poanijo, Moisesi jjacojja dodoqui'ya poa Isaeni cuana mete'ama epojji. Ecuanaja ca ca Moisesi jama pojjeama. Esohui eyacua eba'e tiitijji nahue ajja; huohui majamajaña ojjañaja ebajji. ¹⁴ E'e,

yahuajo Isaeni cuaa Moisesija esohui etehue'yo shajja'ajja majje jamatii eba'e tiitii'yoyji ba meemee ajja poa. Esohui eyacua onajaya quea quehua poa. Ejjacojja dodoqui jayojja oya poa. Jesosa Quitoja epeeji nei poanijo ca ca ohuaya esohui eyacua eba'e tiitii'yoyji ba mee cani. ¹⁵ Jjeya nei pea'ai Isaeni cuaa Moisesija esohui etehue'yo shajja'ajja canijo esohui eyacua eba'e tiitii'yoyji onajaya quea quehua. ¹⁶ Jamatii ojjaña joya Jesosa Quito nijje jjapeequiani ohuaya esohui eyacua ba mee caje'yo quea ja'a nee. ¹⁷ E'e, jamaya poaje Edojjoshahua Pameya, Jesosa Quitohua pea'ai eseya ba mee caje quea ja'a nee Eyacuiñajjiya ejjashahuabaquijji. Ma ba majje esohui eyacua esejaya quea ja'a nee poaje. Jamajjeya Jesosa nijje jjapeequi'yajo, ohuaya eseya ba'e tiitii mee caje'yo onijje, Moisesija esohui amajje pojjeama. ¹⁸ Jesosaja epeeji cuana poanijo eseya jjacojja paaqui jjima jayojja jama. E'e, ojjaña ba meeje Eyacuiñajjiya eseya Jesosa jayojja jama atitii meesahua cani. Jamajjeya Edojjoshahua Pameya eseya eyamijo aniya quea ja'a nee jjashahuabaqui mee cani. Jesosa jayojjaya popoqui mee cani eseya.

Pabohua esohui huohui cani quea ja'a nee eba'e meesahuajji

⁴ Eyacuiñajji ecuana nijje quea quene nee nee po tiitii ajja ecuanaja mimishi yahuajo poanaje cuanajo. Ecuana quea jea nee poanijo huoojea ca'yonaje ojaya esohui eyacua Jesusajo huohuiya. Jamajjeya ecuaaya quea ja'a nee huohuiaña yeno'ama, mete'ama. ² E'e, ma esohui Jesusajo huohuiaña quea mimishi ba'e'yo ajja. Quea mimishi jjashahuabaqui ajja pea'ai. Edasiajji cuana pojjeama. Ecuana esohui Jesusajo e'e jojo nei poani. Jamaya Eyacuiñajjiya eba. Jamajjeya ecuanaja esohui e'e jojo nei poanijo, ojjaña jjashahuabaquije jama ba'a: —E'e, jiquio esohui huohuijji cuanaja esohui e'e jojo nei poanijo, eyaya shajja'ajjaje. Oya cuana edasiajji cuana pojjeama.

³ Ecuaya Eyacuiñajjiya esohui e'e nei huohui tiitiiña. Jamatii beca cuanaja, Edosiquiana nijje jjapeequianija Jesusaja esohui quea quehua. Oya cuana aje oe quea nee nee poaje'yo tii tii. ⁴ Quea pame nee nee Jesosa Quito. Oya Eyacuiñajji Echii ai jama poani tii. Jamaya esejaya eba. Jamatii dejja mimishi cuana onijje jjapeequi sa po ajja. Oya cuana aje oe cojjama' jayojja, de. Jamajjeya Edosiquiana neiya, ma ojjaña dasiajji poaniya oya cuana dasia cani esohui quea pame nee nee Jesusajo ojaya ebajji pojjeama. ⁵ Joya ecuaaya sohuihuohuiaña miquianajaya e bihuiajji pojjeama. Chojja. Ecuaya huohuiaña jama ba'a: —Ecuana miquiana ba meesahuajji poani. Jesosa Quito ca ca Emeshi Mese nei poani. Jamajjeya j Jesosa bihuiaque miquianaaya! —ecuanaya miquiana niñeshe'ajji poani.

⁶ ¡Bacue! Yahuajo nei meshi pana jjimahuajo Eyacuiñajjiya jama huohuime aca poa ba'a: “Quea misí, ¡quea ja'a nee oe po'yocue!” aca poa; jjaja'aqui mee ca'ya poa. Jjeya ohuaya tiya eseya Jesusajo jjashahuabaqui meesahua cani quea ja'a nee. Jamajjeya oya esejaya eba quea pame nee nee Jesosa, quea ja'a nee nee

poani tii. E'e, Jesosa Quito Eyacuiñajji jayojjaya nei nei. Oya esejaya eba poanijo Eyacuiñajji quea pame, quea ja'a nee nee poani tii tii esejaya eba pea'ai.

Ona Jesosa nijje jjapee meesahuaquiañaajo ba'e tiitiiye'yo

⁷ Eyacuiñajjiya ecuana babaca canaje esohui quea pame nee huohuijji. Jamaya quea pame nee, de. Jamatii jiquio ecua meshimisi ca'a'ama jayojja jama eseya ca'a'ama. Jamatii Eyacuiñajjiya eseya ojaya epeeji quea ca'a nee acanijo, ojjaña ba cani jama ba'a: —E'e de, Eyacuiñajjiya quea ca'a neeya Jesusaja epeeji cuana quea ca'a nee o jayojja jama po mee cani. Ojjaña huasijje esohui quea pame nee huohui meesahua cani.

⁸ Mimishi cuaa ecuana napa cani. Jamatii ecuana ejeabichajea'yoyji pojjeama. Pea cuana quea mimishi poanijo, quea camaja tii ecuanaja eba'e'jji. Jamatii quea yeno nee nee pojjeama ecuana poani. ⁹ Mimishi cuaa napa cani Jesusaja esohui ehuhui poaje jjejojo. Jamatii Eyacuiñajjiya ecuana ejeana'yoyji pojjeama. Pea cuaa cuiajea cajo, jamatii ecuana mano'yo ajja. ¹⁰ Jesosa quea nee nee poanaje mimishi cuaa napa majamaja ca'yajje. Oya mano mee ca'yonaje, de. Jamaya ecuana acaje'yo pea'ai pojja'a Jesosa nijje jjapeequianijo. Jamajjeya ojjaña jama acaje ba'a: —E'e jojo nei Jesosaa jiquio dejja cuana ojaya epeeji nei po tiitii mee cani. Mimishi cuaa napa caje jamatii esohui huohui pajja jjima acani.

¹¹ E'e, pea cuaa ecuana napa majamaja cani Jesosa nijje jjapeequianijo. Ecuana quecua sa acani pea'ai. Jamatii ecuana quea ja'a nee po tiitiiñajo, ojjaña ba caje Jesosa ecuana jaahuanajji quea ja'a nee. Oya eshe, de. ¹² E'e, mimishi cuaa ecuana quea nee nee po mee cani esohui Jesusaja huohuiañaajo. Jamatii ecuanaja esohui shajja'ajja majje miquianaya Jesusaja epeeji poanaje. Jamajjeya ohuaya miquianajaya mimishi cuana cuiaje'yo majje ba'e tiitii mee caje'yo.

¹³ Yahuajo Eyacuiñajjiya esohui huohuijjiya Dabiya huohui ca poa jama ba'a: “Ecua eba e'e jojo nei Eyacuiñajji e jaahuanajji poani. Jamajjeya jamaya eyaya huohuiaña” Dabiya aca poa. Jjeya ecuana Dabi jayojja Eyacuiñajji nijje jjapeequiani. Ecuana eba e'e jojo nei Eyacuiñajjiya ecuana jaahuana cani. Jamajjeya ecuaaya esohui huohui tiitiiña jamatii mimishi cuaa napa cani tiya. Jama poani ba'a: ¹⁴ —Emeshi Mese nei Jesosa mano'yajo, Eyacuiñajjiya oya shequi mee ca'yonaje. Jamaya ecuana mano'yajo, e'e jojo nei Eyacuiñajjiya ecuana shequi mee caje'yo. Ohuaya ecuanaya, miquianaya pea'ai nequi tiitii mee caje'yo Jesosa nijje eyajo —ecuaaya aña.

¹⁵ E'e, quea camaja poani ecuana Jesusaja esohui huohuiañaajo. Jamatii ecuanaja esohui ba majje miquianaya Jesosa nijje jjapeequinaje. Jamajjeya Eyacuiñajjiya miquianaya ba'e tiitii mee cani. Pea cuana quea huiso Jesosa nijje jjapeequi'yajo, Eyacuiñajjiya oya cuana ba'e tiitii mee caje'yo. Jamajjeya oya bihuia caje jama

ba'a: —Eyacuiñajji quea pame nee nee poani. Quea ca'a nee nee poani pea'ai —acaje ojjaña.

¹⁶Jamajjeya ecuaaya maya esohui Jesusajo huohui pajea'yo ajja. Chojja. Onaa napa cajje ecuaana quea nee nee poani. Edejja tii cuana jayojja jama ca'a'ama poaje. Jamatii Eyacuiñajjiya ecuanaja edojjoshahua cuana quea ja'a po tiitii mee cani. ¹⁷Jjeya onaa napa cajje ecuaana quea nee poani Jesusa nijje jjapeequianijo. Quea nee po tiitii'yo ajja. E'e, jjeya quea nee poani. Jamatii Jesusa nijje jjapeequianijo, quijje ohuaya ecuaana ba'e tiitii mee cajje'yo quea pame nee nee eyajo onijje. Quea nee popajeaje'yo. Jamaya quea pame nee nee. ¹⁸Jjeya nei ecuaaya Jesusa ba jjima aña ecojjaa. Jamatii ecuaana jjashahuabaquiani Jesusa nijje eyajo eba'e'yojji. Jiquio meshijo eba'e'jji ecuaana jjashahuabaqui ajja. Jiquiojo ba'e tiitii ajja. Eyajo Jesusa nijje ca ca oe ba'e tiitii'yo.

Eba'e'jji quea pame nee eyajo

5 Ecuaaya jama baña ba'a: Eseyá mano'yajo Eyacuiñajjiya eyacua pana cajje'yo esejaya eyami. Eyami eyacua ani tiitii'yo eyajo. E'e, eseyá jiquio meshijo ba'yanijo ca'a'ama. Eyajo ba'e'yo majje quea ca'a nee eseyá poaje'yo tii tii. ²Eseyá jjeya nei ishóaña eyami eyacua. Cuanaya eseyá jiquio meshijo ba'yanijo quea nee nee poani. Jamajjeya jjashahuabaquiani jama ba'a: —Eya poqui sa poani eyahuasijje. Jomajo ecuea eyami eyacua poaje'yo.

³Jesosa poe o'oyajo, jiquio eyami eyacua poaje. Jiquio ecua jjapipi eyacua poani jama jayojja esejaya eyami eyacua poaje'yo. E'e, eseyá jjashahuabaquiani eyami eyacuajo. Quea pame nee poaje. ⁴Jiquio meshijo ba'yanijo eseyá quea nee nee poani. Quea camaja nee jiquiojo eba'e'jji. Eseyá eyami ca'a'ama, jjapipi jjacocoqui jjima jama. Jjacocoqui sa poani. E'e, eseyá poqui sa poani eyahuasijje. Jomajo eyami eyacua sa poani. Jiquiojo manoje'yo. Eyacua po majje ca ca eseyá ani tiitii'yo eyajo.

⁵Eyacuiñajjiya eseyá ba'e tiitii mee cani; esejaya eyami eyacua aca'yani pea'ai. Ohuaya Edojjoshahua Pame huoojea canaje ese que ese jaahuanajji. Edojjoshahua Pameya eseyá ba mee cani jama ba'a: E'e jojo nei Jesusaja epeeji poanijo ohuaya ecuaana eyami eyacua quia cajje'yo; ani tiitii mee cajje'yo onijje eyajo.

⁶Jamajjeya jjashahuabaquiani jama ba'a: —E'e, Eyacuiñajjiya eseyá ba'e tiitii mee cajje'yo onijje. Eseyá jiquio meshijo ba'yanijo Jesusa cojja nei jojo ani ajja. Eseyá eyami eyacua po majje Jesusa nijje ani tiitii'yo. Jjeya Jesusa esejaya ecojjaja ba jjima; jjaba meequi ajja. Jamatii eseyá jjashahuabaqui mee cani onijje enequi tiitii'yojji. Jiquio meshijo aquiana cuana quea huiso baña ecojjaa. Jamatii ma aquiana cuanajo jjashahuaba neineiqui ajja. ⁸E'e jojo nei baña Eyacuiñajjiya eseyá ba'e tiitii mee cajje'yo. Jamajjeya mete'ama, quea bei nee poani. Poqui sa poani Jesusa nijje eba'e tiitii'yojji, Emeshi Mese nei nijje. Ishoaña esejaya eyami eyacua. ⁹Jamajjeya jjeya nei eseyá Jesusaja esohui jayojja jama atiitii sa poani jiquio meshijo ba'yanijo. Quijje pea'ai

eyajo onijje ani tiitii'yo. Jamaya sa poani. ¹⁰E'e, esejá eba jama ba'a: Jesusa Quitohua eyajo ojjaña huoojeajji poanijo ojjaña meshijo ba'ya poa nequi mee cajje o cojja nei jojo. Ojjaña quea mimishi poanaje ohuaya quea nee nee po tiitii mee cajje'yo. Ojjaña quea pame poanaje ca ca quea bihui nee nee po tiitii mee cajje'yo. Jamaya eseyá baña.

Jesosaa ecuaana sohuihuohui mee cani ona onijje ejja-peequijji

¹¹E'e, Jesusaa, Emeshi Mese neiya ojjaña quea mimishi poani quea nee nee po mee cajje'yo tii tii. Quea tecue nee nee poaje ojjaña quea mimishi poani nijje. Jamajjeya ecuaaya ojjaña dejja cuana huohuiaña jama ba'a: —¡Jesusaja epeeji pocue! ¡Miquea mimishi cuana pajea'yocue!

Eyacuiñajjiya eba ecuaana ojaya epeeji poani. Ecuaana esohui e'e jojo nei poani, sijaaje pojjeama. Jamaya ojaya eba pea'ai.

Ecuaana jjashahuabaquiani jama ba'a: —Ojjaña Conitojo ba'eja eba esohui e'e nei ecuaaya huohuiaña.

¹²Jamajjeya ecuaana miquiana nijje jama po ajja ba'a: —¡Ecuaana bihuiaque quea pame poanijo! —chojja, jamaya ecuaana po ajja. Jiquio jama ecuaana a sa poani ba'a: Ecuaaya huohui tiitiaña eyacua eba'e'yojji Jesusa nijje eyajo.

Jamajjeya miquianaaya esohui huohuijji nisho huohuicue quea ja'a nee jama ba'a: —Miquianaaya ca ca oe niñebaña Pabo, esohui huohuijji nei. Miya jano-bajjima nei mimianijo quea pame esohui huohuijji po so jjabaquiani. Jamatii quea ja'a ba'e ajja. ¡Jesusa Quitojo oe quea ja'a nee jjashahuabaquicue! ¡Quea pame a'yocue! —jamaya esohui huohuijji nisho acue.

¹³Ecuanaja esohui quea pame Jesusajo, eba'e'yojji eyacuajo pea'ai shajja'ajja majje beca cuana sijaaje poani jama ba'a: —Pabo niñepoqui, de, ojaya epeeji cuana pea'ai niñepoqui —sijaaje poani.

Eyacuiñajji nijje chaco tiitiañaajo, onaaya ecuaana niñepoqui poso acani. Jamatii ecuaaya chaco tiitiaña Jesusaja esohui quea ja'a nee miquianajaya ebajji. ¹⁴Jesosa Quito ecuanajaya quea jea nee poanijo esohui e'e nei huohuiaña. E'e jojo nei ojjaña mimishi acanijo mano tiitii'yo. Jesusa mano'yonaje ojjaña mimishi cuijea'yojji, ojjaña cuaqui yasijje epoquijji pojjeamajo. Jamaya ecuanaja eba nei nei. ¹⁵E'e, Jesusa mano'yonaje ojaya epeeji mimishi cuijea'yojji. Mano'yajo, Eyacuiñajjiya oya shequi mee ca o'oyanaje. Jamajjeya ¡ojaya esohui jayojjaya ca'a cahua! ¡Yahuajo ejjashahuabaquijji capajea ca'yahua! ¹⁶Jesosa epeeji cuana po jjimahua ecuaana pea cuanajo jjashahuabaquinaje quea tai dejja mimishi jama. Jjeya, cho. Jjeya ecuanaja ejjashahuabaquijji pea cuanajo Jesusaja ejjashahuabaquijji jayojja jama quea ja'a nee poani. Ojaya epeeji cuana po jjimahua ecuaana Jesusa Quitojo jjashahuabaquinaje quea tai dejja mimishi jama. Jjeya, cho. ¹⁷Jamajjeya Jesusa Quito nijje jjapeequianijo, ohuaya eseyá pea jjashahuabaquime po mee cani. Eseyá ejjashahuabaquijji eyacua quea ja'a nee po mee cani. Jesusa Quito

ba jjimahuajo ba'ya poa jayojja po'yo ajja. Jjeya eseya pea jashahuabaqui'yome poani Jesosa jayojja.

¹⁸ Eyacuiñajjiya Jesosa Quito huoojea canaje esejo mano'yohua. Jesosa mano'yajo, Eyacuiñajji ese nijje quea quene po tiitii ajja. Ese nijje quea bei po'yo majje ohuaya eseya huoojea canaje ojjaña huasijje ojaya esohui huohuiya jama ba'a: —Eyacuiñajjiya Jesosa huoojea canaje eseja mimishijo mano'yohua. Jamajjeya Eyacuiñajji ese nijje quea quene po tiitii ajja. ¡Jesosa nijje jjapeequicue! ¹⁹ E'e, ohuaya Jesosa Quito huoojea canaje ojjaña mimishijo mano'yohua. Jamajjeya Eyacuiñajji ojjaña ese nijje quea bei poani. Quea quene jashahuaba tiitiqui ajja esejaya mimishi cuanajo —jamaya Eyacuiñajjiya eseya huohui meesahua cani.

E'e, jjeya Eyacuiñajjiya ecuana huoojea canaje jama huohuime aa ba'a: —Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Ojaya epeeji cuana pocue!

²⁰ E'e, ecuana Jesosa Quitoja esohui huohuijji poani. Ohuaya ecuana huoojea canaje onijje chachohua. E'e, Eyacuiñajjiya ecuana huoojea canaje ojaya esohui huohuiya miqiana huasijje. Jamajjeya ecuaaya esohui huohuiaña miqianaya Jesosaja epeeji epo meeji. Jama aña ba'a: —¡Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Jesosaja epeeji pocue, Eyacuiñajjiya pea'ai! —ecuana poani.

²¹ Jesosa Quito quea pame po tiitinaje mimishi'ama nei. Jamatii Eyacuiñajjiya jama acanaje ba'a: —Ojjaña mimishi cuana Jesosa Quitoja poaje. Jiquio ecua miqianaaya aquiana aboña jama ohuaya mimishi abo caje. Jamajjeya eyaya oya quea nee nee po mee'yo majje ojjaña mimishi cuana enapa tiitii'yojji pojjeama ca onijje jjapeequi'yajo —Eyacuiñajji poanaje. Jamajjeya Eyacuiñajjiya huohui canaje jama pea'ai ba'a: —Ojjaña Jesosa nijje jjapeequiani eyaya baña ecuea epeeji, shajjama' pojjeama —Eyacuiñajji poanaje.

6 E'e, ecuaaya Eyacuiñajji nijjeya ojjaña huasijje esohui quea pame nee Jesusajo huohuiaña. Jamajjeya ecuaaya miqiana huohui neineiaña jama ba'a: —¡Eyacuiñajjiya esohui shajja'ajja majje jamaya pocue! ¡A'a shajjama' pojji! Shajjama' cuana eba'e meeji pojjeama eyajo Jesosa nijje.

² Eyacuiñajjiya esohui shajja'ajjacue! Yahuajo nei nei ohuaya tehue mee ca poa jama ba'a:

“Jjeya nei miqianaya enijje mimiani miqiana mimishi cuijea'yojji. Eyaya miqianaya shajja'ajjanaje. Enijje mimianijo, eyaya miqianaya ba'e tiitii meeje'yo pea'ai”.

Jamaya Eyacuiñajjiya esohui yahuajo nei etehue'yo poa.

¡Bacue oe! Jjeyahua nei Eyacuiñajji miqiana shajja'ajja sa poani. Jjeya nei ohuaya miqianaya ba'e tiitii mee sa acani ojaya epeeji nei nei epojji.

Pabo quea nee nee poanaje

³ Ecuaaya Jesusaja esohui jayojja jama atiitiaña quea ja'a nee. Jamajjeya ojjaña ecuana ba majje Jesusaja

esohui shajja'ajja caje'yo. Jamaya ameemee ajja ba'a: —E'e de, Jesusaja epeeji cuana quea mimishi nee poani. Jamajjeya ecuana ojaya epeeji po sa po ajja —jama siajje pomeya epojji pojjeama.

⁴ Chojja. Ecuana ba majje ojjaña caba cahua ecuana Eyacuiñajjiya quea pame nee chachacoani jamatii onaa napa caniya tii. Quea pame nee po tiitiani. E'e, onaaya ecuana quea nee po mee cani, ecuana niñeba cani, Jesosa nijje jjapeequianijo eba'eji quea camaja poani pea cuana quea mimishi poanijo. ⁵ Maaya ecuana cuia majamaja canaje, jeanobiajea majamaja canaje, ecuana nijje quea quene nee po majje quea huiso jjachichachinaje. Ecuana cojja neijo nequi majje janobajjima mimipanajajinaje. Ecuana quea camaja chachaco majje cahui jjima tii aninaje. Quea shoe po majamajanaje pea'ai. Jamatii ecuanaaya esohui quea pame Jesusajo huohui majamajaña, huea'ama nei nei ecuana poani. ⁶ Mimishi'ama nei nei ba'vani pea'ai. E'e, ecuana chachacoani Jesusajo quea pame nee. Quea huiso esohui Jesusaja ecuanaja eba quea ja'a nee. Ecuana quenequene cuaji ajja pea cuana nijje. Quea bei poani. Dejja tai'ama poani. Edojjoshahua Pameya quea pame nee ameesahua cani pea'ai. Pea cuana ecuanaja quea jea nee poani e'e jojo nei pea'ai. Jamajjeya ojjaña ba cani ecuana Jesosa Quitoja echacojji quea ja'a nee. ⁷ Ecuanaja esohui e'e jojo nei poani. Eyacuiñajjiya huohui meesahua canijo ecuanaja esohui quea ja'a nee poani. Eyacuiñajjiya emimishi cuijea'yo jjejojo ecuana ba'vani quea ja'a. Jamajjeya ecuaaya eshahuaja epeeji cuana mimicuijeanobiajeaña esohui e'e nei mimi majje. Eyacuiñajjiya ameesahua canijo esohui e'e nei mimiani tii. ⁸ Cuanaya eya quea pame nee poanijo jamaya cuana poani ba'a: —Pabo quea pame nee poani.

Beca cuana jama poani ba'a: —Pabo ecuea boti'ama, Jesusaja esohui huohuijjiyojo.

Pea cuana ca ca jama poani ba'a: —Pabojja esohui quea ja'a nee.

Beca cuana ca jama poani ba'a: —Chojja, Pabojja esohui shajja'ajja sa po ajja ca iña.

Pea cuaa ca jama saja'ame acani ba'a: —Pabo Eyacuiñajjiya esohui huohuijji quea ja'a nee.

—Chojja, Pabo esohui huohuijji nisho. Oya siajje pojji —jama eya niñebameya acani cuaa.

⁹ —Pabo ecuea eba. Ohuaya quea pame nee huohui cani —beca cuana poani.

Pea cuana ca jama poani ba'a: —¿Ae shai poani Pabo? Oya ecuea ba jjima —poani.

Pea cuaa eya cuiajea sa acani. Jamatii eya eshe nequi, mano'yo jjima. Niñeba majje eya cuia canaje cuaa. Jamatii Eyacuiñajjiya jaahuana canaje jjejojo eya mano'yo jjima. ¹⁰ Quea huiso epeeji nisho poanajejo, eya quea yeno poani. Jamatii Eyacuiñajjiya eya quea bahui nee po mee cani. Eya aema' poanaje pea'ai. Jamatii ecuea esohui shajja'ajja majje quea huiso Jesusaja epeeji poani, quea pame ba'vani. E'e, Jesusaja epeeji poanijo eseya quea aquiana huiso nee nee jayojja. Jiquio meshijo ba'yanijo ca ca eya e'aquiana mese poj-

jeama. Jamatii Jesusaja epeeji poanijo ecuea quea hui-so aquiana yani eyajo.

¹¹ Ecuea epeeji cuana Conitojo ba'e, eyaya ojjaña ecuea ejjashahuabaquijji huohuiaña quea ja'a nee mi-quiana huasijje miqianaya ecuea quea jea nee nee poanijo. ¹² E'e, miqiana nijje jjapee neineiquiani, mi-qiana quea jea nee nee poanijo. Miqianaya ca ca enijje jjapee neineiqui sa po'yo ajja. ¹³ Jamajjeya epeeji cuana, ecuea esohui miqiana huasijje jama ba'a: —ijiquio ecua miya ecuea quea jea nee nee jamaya oe eya acue miqiaaya! ¡Enijje jjapee neineiquicue! —eya poani.

¡Dejja mimishi nijje a'a jjapee neineiquijji!

¹⁴ Miqianaya Jesusaja epeeji cuana poanijo ja'a nequijji Jesusaja epeeji pojjeama cuana nijje! ¡Ojaya epeeji cuana jayojja a'a pojji! Jesusaja ejjashahuabaquijji Edosiquiana neija ejjashahuabaquijji jama pojjeama. Pea oya, de. Jesusaja esohui quea ja'a nee cuaquijji jayojja. Edosiquiana neiya ca ca quea mimishi nee nee, quea tai nee nee acani. Ojee nequi ajja Jesusaja epeeji Edosiquianaja epeeji nijje. Pea oya, de. ¹⁵ Jesusa Quitoja ejjashahuabaquijji quea pame nee nee. Edosiquianaja ca ca quea tai. Pea ojaya, de. Jesusa Quitoja epeeji cuanaja ejjashahuabaquijji quea pame. Ojaya epeeji pojjeama cuanaja ejjashahuabaquijji ca ca quea tai. Pea ojaya, de. ¹⁶ Eyacuiñajji equi yasijje Jesusaja epeeji cuana dobiqiani ojee Eyacuiñajji bihuiaa, eyacuiñajji nisho bihuiaa pojjeama. Maya quea tai. Cuanaya Jesusaja epeeji cuana huasijje Eyacuiñajji dobiquinaje. Jamajjeya eshahuaja epeeji cuana nijje jjapeequi meemee ajja. Yahuajo nei Eyacuiñajjiya esohui huohui mee ca poa ojaya epeeji cuana huasijje jama ba'a:

“Miqianaya ecuea huapa pojjeama cuana poanijo, eya miqiana huasijje dobiqiani, miqiana nijje jjapee tiitiquiani pea'ai. E'e, eya oe nei miquea Eyacuiñajji. Miqianaya jaahuana tiitiaña pea'ai. Miqiana ecuea epeeji cuana poani”.

Jamaya pea esohui etehue'yo poa pea'ai ba'a:

¹⁷ “Jamajjeya ¡ecuea epeeji pojjeama cuana nijje a'a jjapee tiitiquijji! ¡Enijje nei oe jjapee tiitiquicue! ¡A'a quea mimishi pojji! Jamajjeya eyaya miqianaya ba'e meeje'yo enijje. ¹⁸ Cuanaya eya miqianajaya Chii nei poaje. Miqianaya ecuea ebacua piona cuana, ecuea ebacua eja cuana poaje'yo pea'ai. Eyaya mi jaahuanajji quea ca'a neeya jamaya aña”.

Jamaya Eyacuiñajjiya yahuajo nei huohui ca poa.

⁷ Ecuea epeeji cuana, ¡shajja'ajjacue mo! Eyacuiñajjiya jiquio esohui huohui canaje esejaya ebajji, ese jaahuanajji poaniya. Jamajjeya ja'a quea mimishi ba'eji; a'a quea mimishi jjashahuabaquijji pea'ai! Miqianajaya eba Eyacuiñajjiya ojjaña mimishi cuana quea nee nee po mee caje'yo tii tii. Jamajjeya ¡quea pame nee nee oe acue! ¡Eyacuiñajjiya ejjashahuabaquijji jama oe pocue! ¡Oya oe shajja'ajjacue!

Pabo quea bihui nee poanaje

² ¡Eya quea jea nee acue! Eyaya miqianaya quea pame nee a'yonaje. Ecuea esohui quea pame poanijojaya miqianaya quea pame nee nee po meeje'yo. E'e, miqianaya ecuea edasiajji pojjeama. ³ Eyaya jiquio esohui huohuiaña miqiana tecueajji pojjeama. Chojja. Yahuajo eyaya huohuinaje jama ba'a: —Miqianaya ecuea quea jea nee nee. Jamajjeya eya miqiana nijje ba'e majje quea bihui nee poaje. Cuanaya miqiana nijje nequi majje eya manoje'yo pojja'a. Jamatii, jamaya quea pame nee miqianaya ecuea quea jea nee poanijo.

⁴ Ecuea eba miqiaaya ecuea esohui etehue'yo jayojja jama aje'yo. Jamajjeya eyaya miqianajo jama huohuiaña ba'a: —Jesusaja epeeji cuana Conitojo ba'eya ecuea esohui etehue'yo jayojja jama acani —eya poani.

E'e, miqianajo eya quea bihui nee poani. Pea cuaa eya quea nee nee po mee cani Jesusa nijje jjapeequianijo. Jamatii eya quea bihui nee nee poani miqiana quea pame nee nee poanijojjo.

⁵ Ecuea epeeji Conitojo ba'e, eyaya miqianaya huohuije ecuea eba'ejjiyo pea meshijo. Eya Masenonia meshijo nequi pea cuaa napa majamaja canaje, niñeba majamaja canaje pea'ai. Jamajjeya eya quea ajjajja poanaje. ⁶ Jamatii Eyacuiñajjiya ojaya epeeji quea yeno nee nee poajo jaahuana cani. Jamajjeya ohuaya Tito huoojea ca'yonaje e quea bihui po mee'yojji. ⁷ E'e, Tito ba majje eya quea bihui nee poanaje. Ohuaya miqianajo huohui canaje quea pame jama ba'a: —Pabo, Jesusaja epeeji cuana Conitojo ba'eya eya, Tito, jaahuana ca'yonaje quea pame nee. Miya ojjañaja quea jea nee poani, Pabo. Yahuajo onaaya esohui huohuijji nisho shajja'ajja canaje. Jamajjeya miya quea yeno poanajejo, miquea epeeji cuana pea'ai quea yeno poanaje. Miya ona nijje quea bei po mee o'oya sa acani cuaa —jamaya Tito poanaje.

Jamajjeya miqianaya ejo jjashahuabaquianijo, eya quea bihui nee poani.

⁸ Yahuajo eyaya pea tehue'ya poa quea tecue. Ma esohuijaya miqianaya quea yeno poanaje. Quea camaja nee ma esohui etehuejji poanaje, miqiana tecueajji. Jamatii, ma etehue'yojo miqianaya quea yeno po tiitii ajja. ⁹ E'e, ma esohui etehue'yo ba majje miqianajaya quea yeno poanaje. Quea yeno po majje miqianajaya mimishi pajea'yonaje. Esohui huohuijji nishoja esohui sijje shajja'ajja pajea'yonaje pea'ai, miqianaaya. Jamajjeya miqianajo eya quea bihui nee poani. E'e, quea yeno poanajejo, Eyacuiñajjiya miqianaya ba'e meesahua ca'yonaje quea pame nee. Jamaya quea pame nee miqianajo. ¹⁰ Dejja cuana quea mimishi poani Eyacuiñajjiya quea yeno po mee cani oja mimishi pajea'yojji. Mimishi pajea'yo ca'yajo, Eyacuiñajjiya ojaya mimishi cuana cuijea ca'yani. Eshahuaja epeeji cuana quea yeno poani mimishi amajje. Jamatii Eyacuiñajjiya oya cuana quea nee nee po tiitii mee caje'yo mimishi pajea sa po'yo ajjajojo. ¹¹ E'e, Eyacuiñajji-

ya miqianaya quea yeno po mee ca'yonaje. Quea yeno po majje miqianaya quea pame nee poani. Shaj-jama' cuana, mimishi cuana miqiana nijje nequi. Oja-ya mimishi cuana cajaa aña miqianaaya. Oya miqianajaya epee'yoyji pojjeama; miqianaya onaya jayojja jama po ajja. Quea quene poanaje pea'ai esohui huohuiji nisho cuana nijje e siajje ajjiyojo. Miqianajaya eba Eyacuiñajjiya quea nee nee po mee caje'yo ojjaña mimishi cuana. Jamajjeya quea mete nee po majje mimishi cuana a sa po'yo ajja. Cuanaya enijje japee neinei qui sa poani, quea bei. Miqianajaya Eyacuiñajji quea boti nee poanijo esohui shajja'ajja o'oya sa poani. E'e, miqianaya quea ja'a jjashahuabaquianijo, ecuea eba miqianaya mimishi poani nijje japeequi'yo ajja. Jjabahuejjaqui meesahuaje'yo Jesosa nijje ejjapeequijji. Jamaya quea pame nee.

¹² Jamajjeya eyaya yahuajo esohui tehue majje miqiana huasijje huoojeanaje. Eyaya maya esohui tehuenaje miqiana jjashahuabaqui meejji jama ba'a: —E'e de, Pabo Eyacuiñajjiya huoojea'yo esohui huohuiji. Oya ecuanaja quea jea nee. ¡Oja tehue jayojja jama ejja'aqui o quea bihui pojji! —Jamaya miqianaya jjashahuabaquinaje.

Maya esohui eyaya tehuenaje dejja quea mimishi cuana tecueajji. Ma dejja cuanaja mimishijo pea cuana quea yeno poanaje. Eyaya ma esohui tehuenaje dejja quea yeno ani cuana yeno'ama po mee'yoyji pea'ai.

¹³ Jamajjeya ecuea etehue'yo ba majje miqianaya quea ja'a jjashahuabaqui o'oyani. Jamajjeya eya quea bihui nee poani.

Yahuajo miqiana nijje mimi jjimahuajo Tito quea yeno jjashahuabaquinaje jama ba'a: —Jesosaja epeeji cuana Conitojo ba'e quea mimishi jea nee nee.

Jamatii miqiana nijje mimi majje Tito quea bihui nee poanaje. Jamajjeya eya quea bihui nee poanaje Titoja esohui shajja'ajja majje miqianajo ohua huohui cajje.

¹⁴ Yahuajo eyaya oya huohuinaje jama ba'a: —Tito, Jesosaja epeeji cuana Conitojo ba'e minijje japeequije'yo. Miquea esohui shajja'ajja caje pea'ai —eyaya anaje.

E'e, ecuea esohui Tito nijje jayojja jama a'yonaje miqianaaya. Jamajjeya miqianaaya quea pame anaje; eya bicho'ama miqianajo. ¹⁵ Miqiana huasijje poqui jjimahuaja miqianaya Titoja quea boti nee pishana. Miqiana que poqui majje miqianaya ojaya quea boti nee nee. Oya quea bihui nee nee pea'ai. E'e, miqianajo jama poani ba'a: —E'e, Jesosaja epeeji cuana Conitojo ba'eya ecuea esohui shajja'ajja canaje quea jaji nee. Ohuaya ojjaña ecuea esohui shajja'ajja neinei canaje eya etecuea poajeya jjejojo. Ecuea esohui jayojja jama a sa poanaje —Tito poanaje.

¹⁶ E'e, ecuea eba miqianaya ecuea esohui jayojja jama poaje. Jamajjeya eya, Pabo, miqianajo quea bihui nee poani, de.

¡Jesosaja epeeji cuana ba'e meesahuacue!

8 Ecuea epeeji cuana Conitojo ba'e, jjeya eyaya miqianaya huohuije Jesosaja epeeji cuana Maseno-

nia meshijo ba'ejo. Eyacuiñajjiya oya cuana ejjesheji quia meesahua canaje Jesosaja epeeji cuana Jodea meshijo ba'e yasijje equiajji. ² E'e jojo nei quea camaja nee nee onajaya eba'eji, Masenonia meshijo ba'eja. Aema' cuana poanaje. Jamatii onaaya ejjesheji quia canaje quea bihui nee Jesosaja pea epeeji aema' nei cuana ba'e meesahuajji. Quea bihui nee nee poanijo quea huiso quia sa poanaje. ³ Ecuea eba oya cuana aema' poanaje. Jamatii ejjesheji quia canaje. Quia majje quea camaja, aema' nei poanaje. Ecuea oya cuana huohui jjima ejjesheji quiajji, pea cuana ba'e meesahuajji. Chojja. Jamatii quia canaje. ⁴ Oya cuana enijje mimi majamajanaje jama ba'a: —¡Ecuanaja ejjesheji dojocue! ¡Quiacue Jesosaja epeeji cuana Jodea meshijo ba'e yasijje ona ba'e meesahuajji! Jamaya ecua a sa neinei poani —poanaje Jesosaja epeeji cuana Masenonia meshijo ba'e.

⁵ Eya jjashahuabaquinaje jama ba'a: —Onaaya ejjesheji quia caje oe pojji pojja'a, quea huiso pojja'a.

Chojja de. Oya cuana jama poanaje ba'a: —Ojjaña ecuanaya Eyacuiñajjiya esohui jayojja jama poaje'yo. Cuanaya ojjaña ecuanajaya aquiana ojaya poani —jamaya oya cuana poanaje—. ¡Ecua huohucue Eyacuiñajjiya ejjashahuabaquijji! Miquea esohui jayojja jama ecua poaje'yo —jamaya Jesosaja epeeji cuana Masenonia meshijo ba'eya huohui canaje.

⁶ E'e, quea ja'a nee acanaje. Jamajjeya eya Tito nijje miminaje jama ba'a: —Tito, ¡Jesosaja epeeji cuana Conitojo ba'e yasijje poqui o'oyacue! Yahuajo miya ona nijje miminaje ejjesheji Jesosaja pea epeeji cuana huasijje equiajji, ona ba'e meesahuajji. Jamatii ejjesheji huoojea jjima. Jamajjeya ijjeya ona nijje mimi o'oyacue ejjesheji equiajjiyo! ¡Jama acue ba'a: "Jesosaja epeeji ba'e meesahuajja miqianaya quea pame nee poani Jesosajo" jamaya acue, Tito! —eyaya Tito huoojeaña ma esohui huohuiya.

⁷ E'e epeeji cuana, miqianaya quea pame nee poani jama ba'a: Jesosaja esohui jayojja jama poani. Miqianajaya esohui Jesosajo quea pame pea'ai. Miqianajaya eba quea huiso esohui Jesosaja. E'e jojo nei quea ja'a nee jjashahuabaquiani pea'ai. Eya miqianajaya quea jea nee poani pea'ai. Jamatii jjeya Eyacuiñajjiya miqianaya ejjesheji quia meesahua cani Jesosaja epeeji Jenosanenajo ba'e yasijje ona ba'e meesahuajji. Jamaya quea pame pea'ai. Ona napa cajje oya cuana aema' nei. Napa huicha'a huicha'a canaje cuana Jesosaja epeeji poanijojo. ⁸ Ecuea Tito miqiana que huoojea jjima ejjesheji quia meeya. Chojja. Jesosaja pea epeeji cuana jamatii ejjesheji quia canaje quea bihui nee. ¿A'a miqianaya onaya jayojja po sa poani pea'ai? ¿A'a miqianaaya quea pame nee aje pea'ai? ⁹ ¡Jashahuabaquicue Jesosaa miqianaya quea pame nee nee acanaje! Jama ba'a: Jesosa ba jjimahuajo miqianaya aema' jayojja poanaje. Jamatii ohuaya, Jesosa Quitohua, esejaya Emeshi Mese neiya miqianaya ba'e tiitii mee caje'yo onijje eyajo quea ja'a nee nee. Dejja cuana huasijje poe jjimahua Jesosa ba'e'yonaje eyajo quea ja'a nee nee. Meshi yasijje poe majje ca ca dejja cuana jayojjaya

poanaje, aema' pea'ai. Jamaya oya poanaje miquiana ba'e tiitii mee'yojji eyajo.

¹⁰ Jamajjeya miquianaya ejjeshejji quiajjijo eya jama poani ba'a: Oe shequiaja yahuajo miquianaya ebionei jjashahuabaquinaje ejjeshejji aema huasijje equiajji. Pea cuana jjashahuabaqui jjimahuajo miquianaya quia sa poanaje. ¹¹ E'e, miquianaya ejjeshejji quia sa poanaje. Jamajjeya ijjea miquianajaya ejjashahuabaquijji yahuajo jayojja jama acue! ¡Miquianajaya aquiana quea huiso yanijo quea huiso quiacue pea'ai! ¡A'a quea bejjo nahue pojji! ¹² Aquiana quia sa poanijo, Eyacuiñajji quea bihui nee poani e'aquiana mese nijje. Ojaya Eyacuiñajji quea jea nee poanijo e'aquiana meseja aquiana quea huiso poanijo quea huiso quia caje pojja'a. Aquiana oe pojji poanijo ca ca oe pojji aquiana quia caje. Jamatii Eyacuiñajjija eba esejaya aquiana quea huiso pojja'a, oe pojji pojja'a. ¿A'a aquiana cuana miquianajaya quea nahue? ¹³ Onaa napa cajje aema' nei nei ani quea camaja. Oya cuana miquianaa aquiana quiajje aema' nei epo'yojji pojjeama. Ma aema huasijje quea huiso aquiana quia majje miquianaya aema' nei poaje pojja'a. ¡A'a jamaya pojji! Chojja, jamaya eya huohui jjima. Eya jjashahuabaquiani jama ba'a: —Oe Jesusaja epeejjija aquiana cuana quea huiso poajo epeejji aema huasijje iye huiso quia majje chama' aema' poaje.

Jamaya eyaya amee sa aña. ¹⁴ Jjeya nei miquianajaya aquiana quea huiso. ¡Jesusaja epeejji aema huasijje quiacue! Quia majje oya cuana aema' pojjeama poaje. Quea ja'a ba'eje'yo. Quijje miquianaya aema' poajo, onajaya aquiana yanijo quia caje'yo miquiana huasijje pojja'a. E'e, ojjañaja aquiana cuana pea cuanaja aquiana cuana oya huisoajja poaje. ¹⁵ E'e, esohui etehue'yo yahuajo nei jayojjaya jama poani ba'a:

“Beca equa mese cuaa oe pojji bobi chicha canaje. Pea equa mese cuaa bobi quea huiso nee nee chicha majje nahue'ama poanaje bobijo. Jamajjeya ojjaña cuana bobijji poanaje, pea cuanaja bobi oya huisoajja ya poanaje”.

Pabohua Tito huoojja caje Conito cuiñajji yasijje

¹⁶ Eyaya Eyacuiñajji bihuiaña jama ba'a: —Eyacuiñajji, miyaya Tito jjashahuabaqui meenaje quea ja'a nee mi-quea epeejji cuanajo, Conitojo ba'ejo. Jamajjeya oya e jayojjaya onajo jjashahuabaquiani. Conitojo ba'e cuana quea ja'a nee ba'e mee sa acani Jesusajo. E'e Eyacuiñajji, jamaya miyaya Tito ameesahuanaje —jamaya eyaya Eyacuiñajji bihuiaña.

¹⁷ E'e epeejji cuana, ecuea esohui etehue'yo miquiana huasijje ejjeshejji aema huasijje equiajji ba majje Tito quea bihui nee poanaje. Miquiana huasijje poqui sa poani ecuea esohui etehue'yo huohuiya. Eyaya oya huoojja jjima. Chojja, oya jamatii poqui sa poani miquiana que. ¹⁸ Tito nijje eyaya pea dejja huoojjaña, Jesusaja epeejji pea'ai. Maya poquinaje ojjaña Jesusaja epeejji cuana huasijje esohui Jesusajo huohuiya. Shajja'ajja majje ojjaña Jesusaja epeejji cuaa huohui canaje

jama ba'a: —Maaya Jesusajo quea pame nee esohui huohui cani —acanaje cuaa.

¹⁹ Jesusaja epeejji cuaa pea cuiñajji cuanajo ba'eya jiquio epeejji babaca canaje enijje epoquijji Jenosanena huasijje ejjeshejji aema huasijje dojosahuaa. Jamaya eya ejjeshejji dojo sa neinei poani Jesusaja epeejji aema' poani yasijje ona ba'e meesahuajji. Jamajjeya pea cuana Jesusajo jjashahuabaquije jama ba'a: —E'e de, Jesusaa ojaya epeejji cuana quea ja'a nee ameesahua cani. Jesosa ca ca oe quea pame nee nee poani —poaje cuana.

²⁰ Ma epeejji enijje poquianiya ohuaya ba caje eyaya e'e jojo nei ma ejjeshejji aema huasijje quiaña. Jamajjeya pea cuana ejo sijje epojji pojjeama jama ba'a: —Pabo ejjeshejji sijji pojja'a —pea cuana jamaya epojji pojjeama.

²¹ E'e, eya jjashahuabaquiani jama ba'a: —Eyaya quea pame nee ejjeshejji dojoje. Jamajjeya ojjaña ba caje eya siipojji pojjeama. Jesusaja eba eyaya quea ja'a nee aña.

²² Tito nijje eyaya beca dejja huoojjaña miquiana baa. Maya ecuea eba. Oya pea'ai quea ja'a nee po tiitiani. Jesusajo chaco cani. Jjeya maya miquiana nijje quea ja'a nee nequije. Miquianajo jjashahuabaquiani jama ba'a: —Jesusaja epeejji cuana Conitojo ba'e quea pame nee poani. Quea bejjo nahue pojjeama, shajjama' pojjeama pea'ai poani.

²³ E'e pojja'a pea cuaa huohui'ajja caje: —¿A'ya cuae Tito?

Jamajjeya jaya cuana huohucue jama ba'a: —Tito-hua Pabo nijjeya esohui quea pame nee Jesusaja huohui cani. Ohuaya Pabo miquiana nijje chaco meesahua cani —huohucue!

Pea dejjaa ma beca epeejji cuanajo huohui'ajja cajo, jama acajo ba'a: —¿Aya acuae oya cuana huoojja canaje? —acajo, jaya cuana huohucue jama ba'a: —Jesusaja epeejji cuaa beca epeejji huoojja canaje miquiana huasijje, miquiana Jesusajo ba meesahuaa. Ohuaya Jesusajo huohui cani quea pame nee nee pea'ai —acue!

²⁴ Jamajjeya jiquio Jesusaja epeejji cuana quea jea nee acue! ¡Oya cuana jaahuanacue quea pame nee! ¡Oya cuana shajja'ajjacue pea'ai! Ma ba majje ojjaña Jesusaja epeejji cuaa ba caje miquianaya Jesusaja epeejji quea ja'a nee poani pea'ai. Jamajjeya ojjaña ba caje ecuanaja esohui quea pame miquianajo e'e nei poani pea'ai.

Ejjeshejji Jesusaja epeejji cuana huasijje equiajji

9 Eyaya miquiana huasijje esohui etehue majjamajji pojjeama Jesusaja pea epeejji aema' ba'e meesahuajji. ² Chojja. Ecuea eba miquianaya pea cuana ba'e meesahua sa neinei poani. Jamajjeya eyaya Jesusaja epeejji cuana Masenonia meshijo ba'e huohuinaje jama ba'a: —Jesusaja epeejji cuaa Acaya meshijo ba'eya ejjeshejji chicha sa acani aema huasijje equiajji. Jamaya ohuaya acanaje oe shequiaja yahuajo —jamaya eyaya pea cuana huohuinaje.

Ma esohui miqianajaya shajja'ajja majje pea epeeji cuana ejjesheji chicha sa poanaje pea'ai Jesosaja epeeji aema huasijje equiajji. ³ Jjeya eyaya beca cuana, Jesosaja epeeji cuana huoojeaña miqiana huasijje. Jamajjeya jecuea esohui ma ecua eyaya yahuajo huohuinaje jayojjaya oe acue! E'e, ma beca epeeji cuaa miqianaya ojee iyaa caje ejjesheji echichajji, aema' nei Jodea meshijo ba'e yasijje equiajji. Jamajjeya miqianajaya ejjesheji equiajji apoa poaje pea cuana poe jjimahuajo. ⁴ E'e, Jesosaja epeeji cuana Masenonia meshijo ba'e miqiana huasijje poe'yajo, miqianajaya ejjesheji aema huasijje equiajji apoa ajjimajo quea bicho nee nee poaje miqianaya. Eya pea'ai quea bicho poaje miqianaaya ecuea esohui jama ajjimajo. Quea bicho nee eya poaje. ⁵ Jamajjeya eyaya Jesosaja epeeji beca cuana huoojeaña pea epeeji cuana miqiana que poe jjimahuajo. Ohuaya miquea ejjesheji aema huasijje equiajji chicha meesahua caje. ¡Miqianajaya esohui yahuajo jayojjaya jama acue! Jamajjeya miqianajaya ejjesheji equiajji quea huiso poaje, miqianajaya ejjashahuabaquijji yahuajo jayojjaya. Jamajjeya miqianaaya quea bihui nee quiaje'yo.

¡A'a quea dejja tai pojji; a'a quea nishehui pojji!

⁶ ¡Jiquio esohui shajja'ajjacue pea'ai! Oe pojji bana majje quijje oe pojji chichaje'yo. Jiquio ecua eso' jayojjaya jama miqianajaya ejjesheji poaje. Jjeya quea dejja tai poanijo, quea nishehui poanijo pea'ai oe pojji aema huasijje quiajo, quijje Eyacuiñajjiya oe pojji quia caje'yo miqiana huasijje. Jjeya quea huiso quiañaño ca ca, dejja tai'ama poanijo ca ca quijje Eyacuiñajjiya quea huiso quia caje'yo miqiana huasijje. ⁷ Jamajjeya ijashahuaba neineiquicue ache huiso miqianaya quia sa poani! ¡Quea bihui nee quiacue! E'e, ¡jamatii miqianajaya ejjashahuabaquijji jayojja jama quiacue! Eyacuiñajjiya quea jea nee ojaya epeeji cuana. Ejjesheji quea bihui nee quia canijo, dejja tai'ama poanijo pea'ai Eyacuiñajji quea bihui nee poani. ⁸ E'e, Eyacuiñajjiya aquiana cuana quea huiso nee nee yani. Jamajjeya miqianajaya quea huiso ejjesheji aema huasijje quia majje, jamatii ohuaya miqianajaya aquiana quea huiso po tiitii mee caje'yo. Miqianaya aema' nei epojji pojjeama. Chojja. Eyacuiñajjiya miqianaya jaahuana cani. ⁹ Yahuajo nei nei esohui etehue'yo jama poa ba'a:

“Ojjaña joya ejjesheji quea huiso quia tiitii canaje aema' ba'e meesahuajji quea pame nee poanaje. Jamajjeya jjeyahua nei Eyacuiñajjiya oya quea ja'a ba'e meesahua caje. Quijje pea'ai ba'e tiitii mee caje'yo”. Jamaya yahuajo nei nei esohui etehue'yo poa.

¹⁰ Eyacuiñajjiya eso' quia cani ojjaña huasijje quejo equecuajji. Ohuaya bobi quia cani ojjaña bobiajji pea'ai. Jamajjeya ohuaya miqiana huasijje eso', bobi pea'ai quia majje, ¡miqianaaya aquiana cuana quiacue pea cuana huasijje! Jamaya quea pame nee. ¹¹ E'e, Eyacuiñajjiya miqiana huasijje aquiana mi ba'e meeji quia caje'yo. Jamajjeya miqianaaya pea huasijje aquiana o ba'e meeji quia poquia tiitii. Jamajjeya miqianajaya aquiana quea huiso equia'yo aema huasijje

eya quiajje onaaya huohui caje jama ba'a: —Eyacuiñajji ecua jaahuanajji quea pame nee nee poani. Ohuaya Conitojo ba'e cuana ecua que quia meeshahua canaje quea huiso, ma ecua Pabohua huohui canaje jama acanaje —poaje quea bihui nee.

¹² Ma aquiana cuana miqianaaya Jesosaja epeeji aema' cuana huasijje quiañaño, quea ja'a nee ba'e meeña. Cuanaya ma aquiana quea huiso quiañaño, onaaya Eyacuiñajji bihuia neinei cani: —E'e, Eyacuiñajji, jamaya. Miya quea pame nee poani ecua niije —poaje.

¹³ E'e, miqianaya dejja tai'ama poanijo, aquiana quiañaño quea huiso ba meeña miqiana Jesosaja epeeji quea ja'a nee poani. Jamajjeya oya cuana mimijama ba'a: —Eyacuiñajji, miyaya miquea epeeji cuana quea ja'a nee po meeña. Miyaya oya cuana quea huiso aquiana quianaje. Jamajjeya miquea pea epeeji cuana huasijje aquiana quea huiso huoojea canaje ona ba'e meesahuajji. E'e, miquea epeeji cuana Conitojo ba'eya huohui cani oya cuana Jesosa Quitoja epeeji cuana poani. Ecuana eba onajaya esohui e'e jojo nei poani miquea esohui jayojja jama oya cuana poanijo —jamaya pea cuaa huohui caje miqianajo.

¹⁴ Jamajjeya miqianaya ojaya quea jea poanijo, Eyacuiñajji niije mimi majje jama poaje miqianajo ba'a: —Eyacuiñajji, miyaya quea huiso aquiana quianaje ona que. Majoya Jesosaja epeeji cuana Conitojo ba'e quea huiso aquiana quia meesahuanaje ecua que. Ecuana quea jea amesahuanaje. ¡Quea pame nee poanijo, oya cuana jaahuanacue! —jamaya onaya mimijama Eyacuiñajji niije.

¹⁵ Eyacuiñajji esejo ijashahuabaquiani. Jamajjeya eyaya oya bihuiaña jama ba'a: —Eyacuiñajji, miyaya mique Bacua Ejja huoojeanaje ecua jaahuana. Quea pame nee nee poanaje miya —jamaya Eyacuiñajji bihuiaña eyaya.

Mahuiso ecuea esohui ejjesheji equiajji.

Pabo esohui huohuiji nei nei

10 Jjeya eyaya, Pabohua pea esohui tehueña. Eyacuiñajjiya eya huoojea canaje miqiana sohuihuohuiya. Jamajjeya ¡shajja'ajjacue mo! Jesosa Quito ese niije quea bei poani. Jamajjeya eseya ojaya epeeji poanijo, eya miqiana niije mimi neinei jama ba'a: —Beca siajjejojji cuana miqiana niije mimiani ejo jama ba'a: “Pabo aje oe ecua niije nequiahua oya ca'a'ama, quea mete poanaje. Quea huesha nei nequija jjejojo ca ca quea sohui bishaa, quea tecue pea'ai poani; poe majje, cho” oya siajje poani.

¡A'a maya siajjejojji cuana shajja'ajja! ¡A'a o jayojja jama mimijji! E niñebajji, eyaya miqiana tecueaje poe majje. Eya quea tecue poaje beca cuana niije ejo quea tai ijashahuabaquianijo. Oya cuana aje oe ijashahuabaquiani jama ba'a: —Pabo Eyacuiñajjiya huoojea'yo jayojja jama po aija. Ohuaya ojaya ejjashahuabaquijji jayojja jama poani, Jesosaja ejjashahuabaquijji jayojja jama pojjeama —ejo siajje poani beca cuana.

³ Chojja de. Eseyá Jesúsaja epeeji cuana jiquio mes-hijo ba'yanijo ojjaña quea mimishi mimicuiajeañobíajea sa seya aña. Jamatii eshahuaja epeeji cuana jayojja jama jashahuabaquí ajja eseya. ⁴ Eshahuaja epeeji cuana onajaya ejjashahuabaquíjji quea tai jayojja jama acani. Eya, chojja. Ecuea ejjashahuabaquíjji pojeama eyaya eshahuaja epeeji cuana mimicuiajeañobíajeaña. Eyacuíñajjiya ca ca eya ojaya ejjashahuabaquíjji ameesahua cani. Jamajjeya ohuaya eya ojjaña joya quea mimishi nee poani mimicuiajeañobíajea meesahua cani. ⁵ Ecuea eba Eyacuíñajjiya esohui quea ja'a nee. Jamajjeya beca cuana Eyacuíñajjiya esohui niñeba canijo, eyaya oya cuana mete mee majje mimicuiajeañobíajeaje; jjaníñebapajeaqui meeje'yo. Cuanaya beca cuana Eyacuíñajjiya quea tai jashahuabaquíani mimicuiajeañobíajeaje'yo pea'ai. E'e, Eyacuíñajjiya eya ameesahua canijo, beca cuana quea tai jashahuabaquíani eyaya Jesúsá Quitoja esohui jayojja jama ameeje'yo. ⁶ ¡Miquianaaya Jesúsaja esohui jayojja jama acue! ¡Ojaya epeeji nei pocue! Majoya eyaya shajjama' cuana miquiana nijje nequi, ojjaña quea mimishi poani pea'ai tecueaje.

⁷ Beca cuana miquiana nijje nequiya e cojja ba majje huohui cani jama ba'a: —Pabo ca'a'ama pojja'a. Sohui sajea'ama. Eyacuíñajjiya huoojea'yo pojeama, sohuihuohui sahua jjima pojja'a —jamaya poani e ba pishana majje.

Jamatii ecuea ejjashahuabaquíjji Jesúsajo onajaya eba pojeama. Oya nei Jesúsá Quitoja epeeji poso jjabaquiani. Cajjashahuabaquíahua jama ba'a: —Pabo pea'ai Jesúsá Quitoja epeeji poani e'e jojo nei. E'e, Pabo ecuaná jayojjaya jama poani —cajjashahuabaquíahua.

⁸ E'e, eya bicho'ama miquiana nijje emimijji. Jama mimi majamajame eya poani ba'a: —Eya iña iquío Eyacuíñajjiya esohui huohuijji. Ohuaya eya huoojea canaje miquiana huasijje oja sohui huohuiya, miquiana ojaya epeeji quea ja'a nee po meeya. Eya miquiana jjabahuejjaquianijo quea yeno po mee sa po'yo ajja. Cajja sa po'yo ajja pea'ai —jamaya eya miquiana nijje mimiani.

⁹ Eyaya miquianaya jjabahuejjaquianijo, quea ajjajja po mee sa po'yo ajja. ¹⁰ Beca siajjepojji cuana miquiana nijje nequi ejo siajje poani jama ba'a: —Pabojja esohui etehue'yo quea sohui ja'a poani. Emeshi meseja esohui etehue'yo quea ja'a jayojja jama poani pea'ai. Jamatii oya ecuaná nijje nequianijo ca'a'ama poani. Ojaya esohui quea ja'a pojeama pea'ai —jamaya siajje poani beca cuana.

¹¹ Ma siajjepojji cuana cajjabahuejjaquíahua jiquío jama ba'a: Miquiana huasijje poqui majje jiquío ecuea esohui etehue'yo jayojja jama eyaya aje'yo miquiana huasijje, e'e jojo nei.

¹² E'e, beca siajjepojji, esohui huohuijji nisho cuana miquiana nijje nequi mimiani jama ba'a: —Ecuana ca ca quea pame nee nee poani. ¡Ecuana oe shajja'ajja-cue! —jama siajje pomeya poani.

Eya ca ca jashahuabaquí sa po ajja jama ba'a: —Pea cuaa aje oe quea tai acani. E jayojja pojeama onaya. Eyaya ca ca oe quea pame nee aña —chojja, jamaya eya, Pabo po sa po'yo ajja.

Ma siajjepojji, esohui huohuijji nisho cuana aje oe jama poani tii ba'a: —Ecuana ejjashahuabaquíjji quea ja'a nee nee, onajaya, chojja. Ecuana jayojjaya jama capo'yahua ojjaña —jamaya poani.

Chojja. Quea ja'a pojeama jashahuabaquíani, de. ¹³ Eyacuíñajjiya ca ca eya huoojea canaje miquiana huasijje ojaya esohui huohuiya. Jamajjeya ojaya esohui eyaya huohuiaña bicho'ama miquiana huasijje. Ojjaña huasijje ca ca huohui jjima. ¹⁴ E'e, miquiana huasijje esohui Jesúsá Quitoja eyaya huohuinaje. ¡Bacue! Eyacuíñajjiya eya huoojea canaje miquiana huasijje esohui huohuiya. Ojaya esohui huohuijji e'e jojo nei eya. Eyaya quea ja'a nee huohuiaña. Jiquío ecue tehue'yojo eya bicho'ama. ¹⁵ Cuanaya miquianaya sohuihuohuiañaajo eya siajje po ajja jama ba'a: —Eya ee nei ojjaña huasijje esohui huohuijji nei quea ja'a nee. Onaya miquiana nijje chaco jjima; siajje poani —eya jama siajje pomeya po ajja.

Esohui huohuijji nisho ca ca oe jama siajje pomeya poani, oe nei esohui huohuijji poso jjabaquiani. Eya ca ca quea pame nee jashahuabaquíani jama ba'a: —Miquianaaya Conitojo ba'eya Jesúsá Quitoja esohui jayojjaya jama quea ja'a añaajo eya pea cuíñajji cuana huasijje esohui huohui meesahuaje Jesúsaja.

¹⁶ Jamajjeya miquianaya jamaya poajo eya poqui meeje pea meshi cuana huasijje esohui quea pame nee huohuiya Jesúsajo, onaja esohui huohui jjima huasijje. Esohui huohuijji pea meshi cuanaajo enequijo eya ona nijje enequi tiitijji pojeama. Iña ca jja ca poquije, de, pea cuana huasijje Jesúsaja esohui huohuiya. ¹⁷ E'e, yahuajo nei esohui etehue'yo jama poa ba'a:

“¡A'a jama huohuijji ba'a: —Eyaya jamatii quea pame aña. Chojja, jamaya pojeama. Jamaya huohucue ba'a: —Eyacuíñajjiya eya quea pame nee ameesahua cani. Jamajjeya eyaya quea pame aña —jamaya acue!” Yahuajo nei esohui etehue'yo jamaya poa. ¹⁸ Eyacuíñajji ojaya epeeji quea pame nee mimiani jama ba'a: —Jiquío epeejiya quea pame nee acani. Jamaya ecuea quea boti nee.

Beca cuaa ca ca huohui cani jama ba'a: —Eya quea pame nee poani jamatii. Jamajjeya ¡ecuea esohui shajja'ajjacue! —jamaya esohui huohuijji nisho poani onajaya quea jea e'ajji. Jamaya ca ca Eyacuíñajji boti'ama.

Esohui huohuijji nishojo Pabo quea yeno mimiani

11 Dejja ma ohua acanajejo jashahuaba tiitiquianijo esho'i jama mimijajiani, de. Jamatii ma eya anajejo mimianijo, ¡a'a jja oe enijje quea quene pojji! ¡Shajja'ajja socue mo! ² E'e, miquianaya Eyacuíñajjiya quea jea nee nee poanijo, ecuea quea jea nee nee poani pea'ai. E'e, eyaya miquianaya Jesúsá nijje jjapee coo meesahuquinaje. Jiquío ecua ejeajjiya ojaya ebase mimishi'ama nei huana mee sa acani jayojja ja-

ma eyaya miqianaya Jesosa nije jjapeequi mee sa aña quea boejea nee, eshahua nije pojjeama. ³ Ecuea eba miqianaya Jesosaja epeeji e'e jojo nei po sa nei-nei poani. Jjeya ca ca eya quea mete jjashahuabaqui-ani miqianajo, esohui huohuijji nishohua miqianaya quea tai jjashahuabaqui mee ca chana'. Jiquio ecua Edosiquiana neiya ma ecua peyo jayojjaa Ema dasia ca poa jayojja jama esohui huohuijji nishohua miqianaya dasia ca chana'; Jesosa nije jjapee pajea meequi ca chana'. ⁴ E'e de, miqianaaya aje oe ojjaña esohui huohuijji nisho shajja'ajjaña. Oya cuana Jesosajo siajje poani, Edojjoshahua Pamejo siajje poani pea'ai. Esohui quea pame Jesosajo ecuanaja esohui jayojja jama pojjeama huohui cani. ¿Apiojji acuaeya oya cuana shajja'ajjaña so'o? ⁵ Oya cuana ca jja ca oe Eyacuiñajjija huoojea'yo esohui huohuijji e'e jojo nei poso nequiaa aña; eya ca jja nequiaa ca oe cajaa aña. Chojja, eya ca ca iña iquio e'e jojo nei Eyacuiñajjija huoojea'yo. ⁶ E'e pojja'a oya cuana mimiani quea bishaa nee. Jamatii esohui quea pame Jesosaja ecuea eba nei nei. Jamaya miqianajaya eba. E'e, eyaya ma esohui huohui neinei-naje ojjaña cuiñajji cuana huasijje.

⁷ Eyaya Eyacuiñajjija esohui quea pame Jesosaja huohuinaje miqiana huasijje sosema'. Eyaya ecuea eba'ejji jjeshenaje pea'ai ecue chaco sosejje. Miquea echacojji jayojja jama poanaje eya. Jamaya miqianaya Eyacuiñajjija esohui ba meesahuanaje. ¿A'a jamaya quea tai, quea pame pojjeama? Chojja. Jamatii beca cuana jama poani ba'a: —Pabo pojja'a Eyacuiñajjija huoojea'yo pojjeama. Jamajjeya mi sosequia mee cani esohui huohui cani sosejje —jama siajje pomeya beca cuana poani.

⁸ ¡Bacue! Miquiana huasijje esohui huohuiañaajo, Jesosaja epeeji cuaa pea cuiñajjijo ba'eya eya sosequia canaje. Eya sohuihuohui meesahua canaje. Miquiana-ya ca ca oe Eyacuiñajjija esohui shajja'ajja majje jamatii sosequia jjima. ⁹ E'e, Jesosaja epeeji cuaa Masenoniajo ba'eya poe majje ecuea eba'ejji ye canaje. Yahua-jo miqiana nije ba'eya eyaya miqianajaya bobi ijja jjima: —¡Che mo oe esohui huohui sosejje! —ajjima ecuea miqianaya. Jamaya eyaya sosema' esohui huohui poquia tiitiije quijje pea'ai.

Jamajjeya miqianajaya jama yajji pojjeama ba'a: —Pabo ecuaaya bobianaje, quea huiso ba'e meesahuanaje —jamaya e'ajji pojjeama miqianajaya.

¹⁰ Chojja. Jamajjeya ojjaña cuaa Acaya meshijo ba'eya ba caje eyaya esohui huohuinaje miqiana huasijje sosema'. Jesosa Quitohua ba cani eya e'e jojo nei mimiani. ¹¹ Jamaya eyaya huohuiaña miqiana ecuea quea jea nee nee poanijo. Jamaya Eyacuiñajjija eba. ¹² E'e, eyaya Jesosajo huohui tiitiije miqiana huasijje sosema'. Jamajjeya esohui huohuijji nishohua jama huohui-me yajji pojjeama ba'a: —Ecuana Pabo jayojja chaco-chacoani —jamaya e'ajji pojjeama onajaya.

Esohui huohuijji nisho nequiaa sosequianaje esohui huohui cani sosejje. ¹³ Oya cuana ca ca oma Eyacuiñajjija huoojea'yo nisho poani, Eyacuiñajjija huoojea'yo pojjeama. Miquianaya dasia cani; Jesosaja huoojea'yo

esohui huohuijji poso nequiaa aña. ¹⁴ E'e de, Edosiquiana nei Satanasa jama oya cuana poani. Ohuaya, Satanasa ojjaña dasia cani; Jesosaja esohuidojojji quea pame nee poso acani cuaa. ¹⁵ Jamajjeya ojaya echacojji cuaa miqianaya dasia cani pea'ai jama ba'a: Oya cuana Eyacuiñajjija echacojji quea pame nee poso nequiaa aña, de. ¡Poe o'oya majje Jesosaa oya cuana quea nee nee po mee caje'yo tii tii!

Pabo Jesosaja huoojea'yo poanijo quea nee poa

¹⁶ Jamajjeya eyaya miqianaya huohui o'oyaje quea bicho pishana. ¡A'a eya esho'i jama mimiani poso ajji ma eya anajejo mimianijo! ¡Miquiaaya ejo jamaya poso aña, jamatii eya che shajja'ajja socue! Ma eya Jesosajo anajejo mimije so'o esho'i jama, onajaya quea jea e'ajji nisho. ¹⁷ Jiquio ca ca ecuea esohui; eya jjeya Jesosa jayojja jama pojjeama mimiani. Eya esho'i jama ma eya anajejo mimiani quea huiso. ¹⁸ Jamatii quea huiso esohui huohuijji nisho esho'i jama ojaya huapa pojjeamajo, ma ohua acanajejo pea'ai mimimimiani. Jamajjeya ona jayojja jama eya pea'ai mimije. Eya ca ca iña quea bicho mimije. ¹⁹ Miquianaya aje oe jjashahuabaqui-ani jama ba'a: —Ojjaña ecuea eba. Eya ca ca iña jja-dasia meequi ajja esohui huohuijji nisho cuana —jjashahuabaqui-ani.

Jamajjeya shajja'ajjaña joya esho'i jama joya ohua acanajejo mimiani pea'ai. ²⁰ E'e, ma esohui huohuijji nishohua miya chaco mee cani sosema', minijje ba'ya-ni sosema', miquea aquiana mesena'yo sa acani, miya tanacua cani, cojja cuiapojjea cani pea'ai quea bicho epo meeji. Jamatii miqianaaya aje oe oya cuana shajja'ajjaña, de. ²¹ ¿Apiojji acuae jja oe shajja'ajjaña? Ecuea ca ca jamaya ajjima. Jamajjojoya ¿a'a eya ca'a-a-ma poso nequiaa aña, de? ¿A'a ma esohui huohuijji nisho cuana esho'i jayojja jama mimiani onaja quea jea e'ajji? E'e. Jamajjeya eya jamaya mimije pea'ai. ²² Esohui huohuijji nisho jama poani ba'a: —Ecuanaya jja iquio Emeo dejja cuana, Emeo esohui mimiani. ¡Dee! Eya pea'ai Emeo dejja, Emeo esohui mimiani. —Ecuana Isaeni dejja cuana —poani pea'ai ma esohui huohuijji nisho.

Eya pea'ai Isaeni dejja, onaya jayojjaya.

—Ecuana etiiquiana Amajama bajjani —ma esohui huohuijji nisho poani.

Amajama ecuea etiiquiana pea'ai, de.

²³ —Ecuana jja oe Jesosa Quitohua huoojea canaje esohui huohuijji —oya cuana siajje poani.

Eya ca ca e'e jojo nei Jesosa Quitoja huoojea'yo, de. Jjeya eya esho'i jama mimiani. Jamatii eyaya janobajjima nei chaconaje Jesosa nije. Esohui huohuijji nishohua aje oe oe pojji chaco cani. Dejja mimishi cuaa eya jeanobiajea huicha'a huicha'a canaje esohui eya ehuohui poaje jjejojo. Oya cuana, cho. Jodio etii cuaa eya cuia majamaja canaje Jesosaja esohui eya ehuohui poaje jjejojo. Ma esohui huohuijji nisho pea cuanaja cuia neinei jjima. Eya beshahua nei mano'yonaje; quea huiso mano huicha'a huicha'a'ajja'yonaje. ²⁴ E'e, ojjaña ba canijo, Jodio etii cuaa eya quea huiso cuiasejja

neinei'ajja canaje, 39 cuiasejjame acanaje, de, huaca jee ejeapashajjajjaa. Cuiasejja majamaja canaje, me oeije huisome cuiasejjame acanaje; pea meshijo cuia, pea meshi cuanajo cuia ca iña acanaje cuaa, de. Beshahua nei ca iña mano'yonaje mo, de. ²⁵ Jodio cuaa eya cuiasejja canaje acui sisiya, pea beca peejjima cuiasejjame acanaje pea'ai. Jaja canaje pea'ai meiya eya esohui ehuohui poaje jjejojo. Beshahua nei eya hui'i'yonaje, pea beca peejjima hui'ime poanaje. E'e de, bishe ai cuana jaanobiquinaje bae ai yasijje. Jamajjeya oe mecajje, oe pojjaajo pea'ai eya bae aijo huepee biajje jjeejjee ba'e'yonaje. ²⁶ Cuanaya eya poqui hui-cha'a huicha'anaje pea cuiñajji cuana huasijje esohui huohuiya. Poquije beshahua nei eya mano'yonaje yohuajo ba'a: cuei quea cuejipashi neijo, siipojji cuanajo, Jodio cuanajo, Jodio pojjeama cuanajo pea'ai. Cuiñajji quea quemojo, ebiojo pea'ai deja mimishi cuaa napa cajje eya beshahua nei mano'yonaje. Bae aijo beshahua nei hui'i'yonaje pea'ai. Jesosaja epeejji nishohua cuia cajje beshahua nei eya poquijeyo'yonaje pea'ai. ²⁷ Eyaya chaco neineinaje; cahui jjiima poanaje pea'ai. Quea camajajo hueahuea'yonaje. Quea mano poanaje. Quea shoe poanaje. Quea naba taja nee nee poanaje. Bobimajo mano'ajja'yonaje. Eya quea hueo nei nei poanaje, daqui mooma' poanaje pea'ai. ²⁸ E'e, quea camaja ecuea eba'ejji. Cuanaya ojjaña pojjaajo eya jjashahuaba majamajaquiani ojjaña Jesosaja epeejji cuana jaahuanajji. ²⁹ Jamajjeya Jesosaja epeejji nei cuana quea mete, ca'a'ama poanijo, eya quea yeno nee nee jjashahuabaquiani. Oya cuana quea mimishi poajo, mimishi pajea mee sa neineiaña eyaya. Jamaya eya poanaje.

³⁰ Esohui huohuijji nishohua miquianaya dasia canijo, eya camimi majamajaquiahua ecuea eba'ejji. Jjeya ca ca eyaya miquianaya huohuije pea esohui. Ma ba majje miquianaaya baje eya quea mete, deja ca'a'ama jayojja jama poani. ³¹ Eyacuiñajji esejaya Emeshi Mese nei Jesosaja Chii. ¡Oya cabihuia tiitii cahua! Ojaya eba eya e'e jojo nei mimiani jama ba'a: Yahuajo Aneta emeshi mese poa Damasico cuiñajji. Ohuaya ojaya echacosahuajji cuana huoojea canaje e sa'ajja'yohua ojjaña ejiojjijje, ba'yo majje e jeanobiajeajji. ³² Jamatii eya ojaya iña jjima, de. Eya Damasicojo nequi quehua poquinaje mecajje. ³³ E'e, Jesosaja epeejji cuaa mei jiyoyo nequiya equi huejjajje eya jjepai aijo jjabioquiajo, jeaoquea ca'yonaje cuaa jjonajo.

Jesosaa Pabo jjacahuibaqui mee canaje ojaya eba'ejji eyajo

12 Eya esho'i jama ma eya añajo mimi majamajani miquiana sohui huohuijji nisho eshajja'ajja poaje jjejojo. Jjeya ca ca eyaya miquianaya huohuije pea esohui, ma Jesosaa eya jjacahuibaqui mee canaje huohuije. ² Yahuajo nei quea shequiaja huiso, 14 shequiajame yahuajo Jesosaa eya ojaya e'anijji eyajo jjacahuibaqui mee ca poa. Eya jjacahuibaquinaje pojja'a. E'e pojja'a eya eshe dojosohuaqui ca poa pojja'a. Ecuea ba jjima. Eyacuiñajji ca ca oe eba. ³ E'e, eya

pojja'a eshe ba mee ca poa. Jjacahuibaqui mee ca pojja'a mo poa. Eyacuiñajji ca ca oe eba. Ecuea ca ca ba jjima. ⁴ Jamatii ecuea eba maya: Jesosaa eya ba mee ca poa; ohuaya eya dojosohuaqui ca poa ojaya eba'ejji Quea Pame Nee bajjani yasijje, Panaiso bajjani yasijje. Jomajo eyaya shajja'ajjanaje esohui quea bame nee nee. Maya eyaya miquianaya huohui meeme ajja, yajja huohuime yajji jojoya. E'e, Jesosa eyajo ba'e enijje miminaje. ⁵ Jamatii eya ma esohuijji mimi huicha'a hui-cha'a ajja esho'i jama. Chojja. Eyaya miya ba meeje eya quea ca'a nee nee pojjeama. E'e jojo nei Jesosa enijje miminaje eyajo. ⁶ Jamajjeya ma eya anajejo mimi huicha'a huicha'ajo jamatii eya esohui huohuijji nisho jama pojjeama mimiani. Ecuea esohui ca ca e'e jojo nei. Miquiana nijje ba'eya eyaya chaco neineinaje miquianaaya banaje. Shajja'ajjanaje ecuea esohui Jesosaja esohui huohuiañajo. Jamajjeya ejo jjashahuabaquiani e'e jojo nei miquianaya. Jamajjeya ma eya anajejo esohui majajji pojjeama esho'i jama, de, miquiana ejo jama esohui poaje jjejojo ba'a: —Pabo ca ca quea pame nee nee Jesosaja epeejji quea ca'a tii tii —miquianaaya esohui poaje jjejojo.

Chojja, eya jamaya pojjeama.

⁷ Jamajjeya Jesosaa eya ojaya eba'ejji quea pame nee nee eyajo ba mee majje Eyacuiñajjiya eya quea nee po mee canaje emanomeejji pojja'a. Jamajjeya eya quea ca'a tii tii ejjashahuabaquijji pojjeama. Jiquio ecua Edosiquiana neija Satanasaja huoojea e cuiajji jayojja jama jiquio emanomeejji pojja'aa eya quea nee nee po tiitii mee cani. ⁸ Eya Jesosa nijje miminaje pea beca peejjima mimime. Jama poanaje ba'a: —Jesosaa Quito, eya quea nee nee nequi. ¡Che mo oe nee'ama po meecue! —eya mimime poanaje.

⁹ Jamatii Jesosaa eya saja'a canaje jama ba'a: —Pabo, e'e jojo nei eyaya miya jaahuanaje. Eyaya miya chaco meesahuaje. Miya ca'a'ama poanijo, chaco neinei meesahuaje, jamatii quea nee —acanaje.

Jamajjeya eya ca'a'ama poanijo quea bihui nee poani. E'e, ecuea eba Jesosaa quea ca'a nee nee poaniya eya quea ja'a nee ojo chaco meesahua cani. ¹⁰ Jamajjeya eya quea nee nee poanijo, ecuea eba'ejji quea camaja poanijo pea'ai jamatii eya quea bihui nee poani. Pea cuaa eya napa canijo, mimijajianijo pea'ai, jamatii quea bihui poani. Jesosaja esohui huohuijjiyojo, jamaya deja mimishiya eya acani. Jamatii eya quea bihui nee poani tii. E'e, eya ca'a'ama poanijo, Jesosaa eya quea ca'a nee po mee cani.

Pabo Jesosaja epeejji cuana Conitojo ba'ejo quea yeno poanaje

¹¹ Eya esho'i jama ma eya anajejo mimi majamajane miquiana esohui huohuijji nisho eshajja'ajja poaje jjejojo. Oya cuana aje oe Eyacuiñajji huoojea'yo esohui huohuijji poso jjaboquiani. Eya ca ca iña e'e jojo nei Eyacuiñajji huoojea'yo. Miquianaaya ca jja ca oe eya banaje Jesosajo chaco chaco aninaje. Jamatii ejo huohui jjiima jama ba'a: —Pabo e'e jojo nei Jesosaja

huoojhea'yo esohui huohuijji —miquiaa mo che ehuohuinaje ese.

Miquianaaya mo oe che quea pame nee mi huohuinaje, jamajjeya eya ecuea eba'ejjiijo camimiquiahua esho'i jama, de. ¹² E'e, eya miquiana nijje nequi Jesusaa eya atiitii mee canaje quea huiso ma dejjaa ajjima acani amee canaje miquianajaya ebajji. Jamajjeya miquea eba eya Jesusaja huoojhea'yo esohui huohuijji. ¹³ ¿A'a eyaya miquianaya quea pame pishana anaje, Jesusaja epeeji cuana pea cuiñajjiijo ba'e quea pame anaje pojja'a? Chojja. Ohuaya e ba'e meeji quia canaje. Maya eyaya jjeshenaje. Miquianajaya quia jjima. Jamatii ecuea bobijo huohui'ajja jjima. E'e pojja'a eyaya miquianaya ehuohui'ajjanaje ese jama ba'a: —¡Jesusaja pea epeeji jama sosequiameya mo che acue esohui huohuiaña sosejje! —e'anaje ese. Jamatii jamaya mimi jjima eya.

¹⁴ Yahuaajo eya miquiana baa poquinaje beca poquime. Jjeya eya apoa. Poquije o'oya miquiana baa. Poqui majje eyaya eba'e meejiijo mimimimi ajja poaje. Chojja. Eya miquianajaya ejjesheji sa po ajja. Miquianaya ca ca eya sa poani ecuea epeeji pojji. Jiquio ecua esho'i cuaa oja chii, ojaya enaese pea'ai bobia ajja jayojja jama eyaya miquea bobi sa ajja. Jamajjeya eya mique chii jayojja jama poanijo eya mi jaahuanajji poani. Miquianaya ca ca e jaahuanajji pojjeama. ¹⁵ Jamajjeya eyaya miquianaya Jesusajo ba meesahuaje sosema'. Jamajjeya e'e pojja'a eya aema' poaje. Cuanaya eyaya quea huiso chacoje miquiana esohui ba meesahuajji. Eya pojja'a hueahueaje miquianaya jaahuanajo. Jamatii. Ecuea miquianaya quea jea nee nee. ¿Apiojji acuae eya miquianajaya quea jea pishana, miquianaya ecuea quea jea nee nee poanijo?

¹⁶ Miquianajaya eba eya miquiana nijje nequi camajama miquianajo poa. Chojja. Miquianajaya bobi ijji jjima ecuea. Jamatii beca cuana aje ejo sijje poani jama ba'a: —Pabo sijjepojji. Ecuana dasia ca'yonaje —sijje oya cuana poani.

¹⁷ Chojja de, ecuea miquianaya dasia jjima. Esohui huohuijji ma eya huoojeanaje miquianaya dasia jjiima pea'ai. ¹⁸ Eyaya Tito huoojeanaje jama ba'a: —¡Poquicue miya Conito huasijje esohui huohuiya Jesusajo! ¡Jesusaja epeeji oe dojocue minijje! —poanaje eya.

¿A'a Titohua miquianaya dasia canaje? Chojja. Ohuaya eyaya jayojjaya acanaje. Miquianaya ojaya quea jea nee pea'ai ecuea jayojjaya.

¹⁹ ¿A'a cuae miquianaya ecuea etehuejo jama jjashahuabaquiani pojja'a ba'a: —Pabohua aje pojja'a jja oe huohui cani oya e'e jojo nei Jesusaja huoojhea'yo esohui huohuijji. Ecuana Jesusaja huoojhea'yo nisho poani —a'a jamaya miquianaya jjashahuaba taiquiani?

¡Bacue oe! Eyacuiñajji eba eya Jesusaja esohui jayojja jama e'e jojo nei huohuiaña. Epeeji cuana, miquianaya ecuea quea jea nee. Jamajjeya eyaya ojjaña añña miquiana Jesusa nijje quea ja'a nee ejjapeequi meesahuajji. ²⁰ Jjeya eya poquije miquiana baa. Miquianajo quea yeno jjashahuabaquiani jama ba'a: —¡Dee! E'e pojja'a quea mimishi poani o'oya: Jjamimi-

cuiajea nobiajeaquiani, onaja aquiana jea ba cani, quea quene nee nee poani, quea aquiana nahue poani, quea nishhui poani, mimijajiani, pea cuanajo maimaiani, oya jjeshe sa pojji pea'ai jjejojo mimiani, quea shajjaquijjo, shajjama' poani pea'ai pojja'a —jamaya eya jjashahuabaquiani miquianajo, Conitojo ba'e cuanajo.

Miquianaya jamaya poajo eya quea yeno nee nee poaje. ¿A'a miquianaya quea yeno poaje miquianajaya mimishijo eya tecueajje? ²¹ E'e, miquiana quea mimishi poani ba majje eya quea tecue nee nee po chana'. Eya quea yeno nee, quea bicho poaje miquianajo. E'e pojja'a eya paje miquiana ba majje, ca beca cuanaja mimishi pajea'yo jjimajo, de, quea mimishi ba'yanijo, quea apo, quea tai, de. Jamaya miquianaya poanijo, eya quea yeno nee nee poaje ba majje.

13 Yahuaajo eya miquiana huasijje poquinaje beca-nejjiijo pea'ai poquime poanaje. Jjeya eya poquije o'oya miquiana baa. Jamajjeya ¡bacue! Eyacuiñajji esohui yahuajo etehue'yo jama poa ba'a:

“Oe dejja peajo maimaiani ¡a'a shajja'ajjaji! ¡Becaa, pea beca peejjimaa oya jayojja huohui cajo, shajja'ajjacue!”

Jamaya tehue ca poa yahuajo nei.

² Jamajjeya jjeya eya miquiana huasijje poquije o'oya pea beca peejjima poquime epojji. Yahuaajo miquiana nijje nequiya eyaya huohuinaje jama ba'a: —Ojjaña joya quea mimishi po tiitiani, joya jjeya nei quea mimishi poani pea'ai eyaya tecueajea neineije poe o'oya majje —jamaya eyaya jjeya miquianaya huohui o'oyaña.

³ E'e, Jesusa Quitohua eya huoojea canaje miquiana huasijje ojaya esohui huohuiya. Ohuaya eya huoojea cani miquiana jjabahuejjaqui meeji pea'ai. Joya miquiana nijje ba'e quea mimishi poani tii tii quea nee nee po mee caje'yo, ohuaya. ⁴ ¡Bacue! Dejja maseya Jesusa yahuajo nei acui ecueata'apeejo me cacajea cajje oya mano'yonaje. Jesusaja ca ca oya cuana jeabichajea jjima. Jamatii Eyacuiñajji quea ca'a nee nee poaniya Jesusa shequi mee ca o'yanaje; quea ca'a nee nee ba'e tiitii mee cani. Yahuaajo Jesusa ca'a'ama jayojja poa. Jamaya pea'ai eya ca'a'ama. Jamatii Jesusaa eya quea ja'a nee ojaya esohui huohui meesahua cani miquiana jjabahuejjaqui meeji.

⁵ ¡Jashahuabaquicue! ¿A'a Jesusaja esohui jayojja jama añña miquianaaya? Jesusa Quito miquiana nijje yani. ¿A'a miquianajaya ba jjima? Jesusa miquiana nijje pojjeama ca miquianaya ojaya epeeji nishojo, de. ⁶ Eya ca ca iña Jesusaja esohui huohuijji e'e jojo nei. ⁷ Jamajjeya eya Eyacuiñajji nijje mimiani miquiana mimishi paje meesahuajji jama ba'a: —Eyacuiñajji, ¡miquia epeeji cuana Conitojo ba'e mimishi'ama nei ba'e meesahuacue! —eya poani.

Eya jama jjashahuabaqui ajja ba'a: —Jesusaja epeeji Conitojo ba'eca mimishi'ama ba'e ba majje pea cuaa eya bihua caje, esohui huohuijji nei —jamaya eya po ajja.

Chojja, miqianaaya eya Eyacuiñajjija huoojea pojjeama poso añã; esohui huohuijji nisho poso añã; jamatii eya Eyacuiñajji nijje mimiani miqianaya ojaya epeeji quea ja'a nee eba'e meesahuajji. ⁸ E'e, dejjaja Eyacuiñajjija esohui e'e nei ehoojea pajea mee'yojji pojjeama ojjaña huasijje. Jamajjeya ecuea esohui e'e jojo nei, siajje pojjeama. ⁹ Jamajjeya miqianaya quea pame, mimishi'ama ba'e ba majje eya quea bihui nee poaje. Jamajjeya miqianaya etecueajji pojjeama, jamatii tecuea jjimajo eya Eyacuiñajjija huoojea'yo quea ja'a nee pojjeama poso añã. Jamajjeya eya Eyacuiñajji nijje mimiani miqianajo jama ba'a: —Eyacuiñajji, imiquea epeeji cuana quea ja'a nee nee ba'e meesahuacue oe! —eya poani.

¹⁰ Jamajjeya miqiana huasijje poqui jjimahuaa eyaya esohui tehueañã miqianajaya mimishi epajea'yojji. E'e, eya Eyacuiñajjija huoojea'yo esohui huohuijji, miqiana jjabahuejjaqui meeji. Eyacuiñajjija eya huoojea jjima miqiana janobajjima nei tecueajeaa quea yeno nee nee epo meeji. Chojja, ohuaya eya huoojea canaje miqiana quea ja'a nee ba'e meesahuua. Jamajjeya mi

ba majje eyaya miqianaya etecueajeajji pojjeama mimishi'ama ba majje.

¹¹ Mahuiso ecuea esohui.

Esohui oe yejje nei etehue'yo

Ecuea epeeji cuana, ¡quea bihui nee pocue! ¡Shajja'ajjacue ecuea esohui! ¡Jama acue! ¡Jashahuaba nei-neiquicue quea ja'a nee nee eba'ejji! ¡Ojee Jesosa nijje jjapeequicue! ¡Quea bei nee pocue! Jamaya poajo, Eyacuiñajjiya minijje ani tiitije'yo. Miqianaya ojaya quea nee nee. Oya ca ca oe quea bei nee nee.

¹² ¡Ojjaña Jesosaja epeeji nijje mimicue quea bei!

¹³ Ojjaña enijje nequiya miqianaya huohui'ajja cani jama ba'a: —¿Achajja acuae nequiiana so'o? —onajaya ebajji.

¹⁴ ¡Esejaya Emeshi Mese nei Jesosa Quitohua miqianaya cajaahuana cahua! Eyacuiñajjija miqianaya quea jea nee. ¡Onijje caba'e tiitii mee cahua! ¡Edojjoshahua Pame miqiana nijje cjjapeequiahua tii tii!

Mahuiso. Eyaya, Pabohua jiquio esohui tehue'yona-je. Apoa.

JANATA

Pabohua tehue canaje Jesusaja epeeji cuana Janata meshijo ba'e yasijje

1 Eya Pabo bajjani. Ecuea epeeji cuana Janata meshijo ba'e, eyaya miquiana que jiquio esohui tehuenaje, Jesusaja epeeji cuana huasijje. Ojjaña Jesusaja epeeji cuana enijje nequiya pea'ai miquianajo jjashahuabaquiani. Eya huohui'ajja mee cani jama ba'a: —¿Achajja a nequiana ani so'o? ¿A'a quea pame? —poani ecuanaja ebajji.

Eyacuiñajjiya, esejaya Chii aiya Jesusa Quito emano'yoojaa shequi mee ca o'oya poa. Ohuaya Jesusa Quito nijjeya eya huoojea canaje esohui huohuiya. Dejja cuana ca ca e huoojea'yoyji pojjeama.

³ Ecuea epeeji cuana, eya Eyacuiñajji nijje mimiani miquianajo jama ba'a: —Ecue Chii, ¡miquea epeeji cuana Janata meshijo ba'e quea pame nee jaahuana-cue! ¡Quea bei po meecue pea'ai! —jamaya eya mimiani esejaya Chii ai nijje, Jesusa esejaya Emeshi Mese nei nijje pea'ai.

⁴ Eyacuiñajjiya Jesusa Quito huoojea ca poa mano'yohua, esejaya mimishi cuijea'yoyji epojji. Jamajjeya Eyacuiñajjiya ejjashahuabaquijji jayojja jama Jesusa mano'yonaje esejo, shajjama' cuana jayojja jama pojjeama eba'e mee'yoyji. ⁵ Jamajjeya Eyacuiñajji ejjabihuaqui jama ba'a: —Eyacuiñajji, ecuanaja Chii, miya quea ca'a nee nee, quea pame nee nee yani tii tii. Pea chama' mi jayojja —oya ejjabihua tiitiqúi. Jamaya ca-poahua.

Jesosa Quito oe nei ese mimishi cuijea'yoyji poani

⁶ Ecuea epeeji cuana Janata meshijo ba'e, eya quea mete miquianajo. Yahuajo miquiana nijje nequiya eyaya miquianaya huohuia poa. Jesusa Quito miquianaja mimishijo mano'yonajejo, Eyacuiñajjiya miquianaya iyaa canaje onijje ejjapeequijji. Shajja'ajja majje Jesusa nijje jjapeequi'yonaje. Jamatii onijje jjapeequi pajea'yani. ¿Apiojji acuae oe onijje jjapeequi pajea'yani so'o? Jjeya aje oe miquianaaya onajaya esohui e'e nei pojjeama shajja'ajjaña, esohui quea pame poso año. ⁷ Pea chama' esohui quea pame nee ese ba'e tiitii mee'yoyji. Esohui Jesusa Quitoja ecuanajaya yani oe nei e'e jojo nei. Esohui huohuijji nisho cuaa ca ca miquianaya quea quehua jjashahuabaqui mee sa acani Jesusa Quitoja. Jama siajje poani ba'a: —Ecuanaja etiiquiana Moisesija esohui jayojja jama ba'ejo ca ca oe Eyacuiñajjiya miquianaya emimishi cuijea'yo ba caje'yo, Jesusa Qui-

to nijje jjapeequiajo pojjeama —siajje poani esohui huohuijji nisho cuana.

⁸ Yahuajo ecuaaya miquianaya esohui huohuia poa esohui quea pame nee Jesusaja jama ba'a: —Jesusa nijje jjapeequianajo, Eyacuiñajjiya miquianaya ba cani emimishi cuijea'yo —ecuaaya huohuinaje.

Onaaya miquianaya pea esohui ma ecuanaja esohui jayojja jama pojjeama huohui cajo, Eyacuiñajjiya oya cahuojea cahua cuaqui yasijje quea nee nee epo'yoyji tii tii. E'e, ecuanaya pojja'a, esohuidojojji pojja'a Jesusaja siajje pojji jjemo Eyacuiñajjiya huoojea came cuaqui yasijje. ⁹ E'e, yahuajo ecuaaya miquianaya huohuinaje. Jjeya eyaya huohui o'oyaña jama ba'a: —Yahuajo ecuea esohui shajja'ajja majje miquianaya jjapeequi'yonaje Jesusa nijje. Oya oe nei miquea mimishi cuijea'yoyji. Jamajjeya ojjaña esohui huohuijji nishohua pea esohui, ma ecuea esohui jayojja jama pojjeama Jesusajo huohui cajo, Eyacuiñajjiya cahuojea cahua cuaqui yasijje quea nee nee epo'yoyji tii tii.

¹⁰ Eyaya Eyacuiñajjiya esohui jayojja jama huohuiaña. Eyacuiñajji ca ca oe eyaya quea bihui po mee sa año. Eyaya esohui huohuiaña dejja cuana quea bihui epojji pojjeama ejo. Jama epo meeji pojjeama ba'a: —Pabo ca ca oe quea pame nee —e'ameejji pojjeama. Chojja, eya onaaya bihua cani jojjemo Jesusa Quitoja esohui huohuijji pojjeama pome.

Jamaya Pabo Jesusa Quitoja esohui huohuijji poa

¹¹ Epeeji cuana, ¡bacue! Eyaya esohui quea pame nee Jesusa Quitoja huohuinaje, dejjaja ejjashahuabaqui'yoyji pojjeama. ¹² Jiquio esohui quea pame nee onajaya eya huohui jjima, ba meesahua jjima pea'ai. Jesusa Quitoja ca ca oeyaya eya ba meesahua canaje.

¹³ Yahuajo nei Jodio etiiquianaja esohui jayojja jama ba'yaniya eyaya Jesusaja epeeji cuana napanaje quea huiso onijje ejjapeequi poani jjejojo. Jamaya miquianajaya eba. E'e, eyaya aje oe ojjaña Jesusaja epeeji cuana quecua'yo sa anaje. ¹⁴ E'e, yahuajo eyaya Jodio etiiquianaja esohui jayojjaya ba'e sa neinei poa. Ba neineinaje. Pea Jodiohua e tii nei'ajjaa esohui ba pishana canaje. Jamajjeya: —¡Etiiquianaja esohui jayojja jama caba'yahua ojjaña Jodio cuana! ¡A'a pajea'yoyji! —eya jamaya po huicha'a huicha'anaje yahuajo.

¹⁵ Jamatii Eyacuiñajjiya eya quea jea nee poa. E'e, ohuaya eya babaca ca poa eteejo ba'yahua ojaya esohui huohuijji epojji: ¹⁶ —Pabo ecuea poaje. Eyaya oya babacanaje ecue Bacua Eja Jesusa peeji epojji —poanaje Eyacuiñajji.

Majoya eya babaca majje Eyacuiñajjiya eya huoojea canaje ojaya esohui huohuiya Jodio pojjeama cuana huasijje. Jamajjeya ohua huoojea cajje eya pea cuana nijje mimi jjima jama ba'a: —¡Che mo eya huohucue esohui quea pame Jesusaja! ¿Achajja acuae Jesusajo ehuhuijji? —ecuea ajjima cuana.

¹⁷ Jesusaja huoojea'yo ojaya esohui huohuijji Jenosanenajo ba'e yasijje eya poqui jjima pea'ai onijje mimiya. Yahuajo Jesusaa oya huoojea ca poa ojaya esohui huohuiya e huoojea jjimahuajo. Jamatii eya ona nijje mimi jjima esohui huohui sahuajji. Chojja. Eyacuiñajjiya iyaa cajje jjeya nei Anamia meshi yasijje ca ca eya poquicujinaje meshi jabo huasijje, quima huasijje. Jomajo ani quijje nei eya poe o'oyanaje Damasco cuiñajji yasijje. ¹⁸ E'e, pea beca peejjima shequijame po majje eya poquinaje Jenosanena huasijje Peno baa. Onijje aninaje oe pojji cahuime, ejiojji oeje cahuime, 15 cahuime. ¹⁹ Jomajo nequi eyaya Satiaco banaje pea'ai, esejaya Emeshi Mese neija echahua mese. Mahuiso banaje Jesusaja huoojea'yo esohui huohuijji. Pea cuana nijje ca ca iña mimi jjima. ²⁰ Jamaya eyaya e'e jojo nei huohuiaña; Eyacuiñajjiya eba eya siajje poani pojjeama.

²¹ Majoya Peno nijje mimi majje eya poquinaje Sinia meshi yasijje, Sinisia meshi yasijje pea'ai. ²² Jamajjeya Jesusaja epeeji cuana Jodea meshijo ba'eja eya ba jjima ecojjaja. Cho, eya pea meshi yasijje poquia poa. ²³ Jamatii onaaya ejo huohui canaje jama ba'a: —Pabohua ca pa jjaja ca oe jjeya Eyacuiñajjiya esohui huohui cani, Jesusaja. Yahuajo aje ohuaya ecuana quea huiso napa canaje, Jesusaja epeeji cuana. Ecuana quecua jeyojeyo sa acanaje. Jesusa nijje jjapeequi pajea mee sa acanaje. Jjeya ca ca ohuaya esohui e'e nei huohui cani. E'e de, ohuaya esohui jama huohui cani pea'ai ba'a: “¡Jesusa nijje jjapeequicue eba'e tiitii'yoyji!” poani oya Pabo, de —jamaya onaya poani.

²⁴ Jamajjeya ma esohui ejo shajja'ajja majje Jesusaja epeeji Jodea meshijo ba'e cuana quea bihui nee poanaje. Eyacuiñajji bihuia canaje jama ba'a: —Ecue Chii, miya quea pame nee nee, quea ca'a nee nee. Miyaya miyaye nei Pabo miquea epeeji po meenaje, ecuana napa pajea meenaje —acanaje cuaa.

Jesusaja huoojea'yo esohui huohuijji Jenosanenajo ba'e cuana Pabo nijje jjapeequinaje

2 Majoya quijje nei nei, 14 shequijame po majje eya Benabe nijje poe o'oyanaje Jenasanena huasijje. Tito yenaje pea'ai enijje. ² Eyacuiñajjiya huoojea cajje eya Jenosanena huasijje poe o'oyanaje. E'e, eya jjacahuiba meequi canaje jama ba'a: —Pabo, ¡Jenosanena huasijje poqui'yocue! —acanaje Eyacuiñajjiya eya cahuijo.

Jamajjeya Jenosanena huasijje poe'yo majje eya Jesusaja huoojea'yo ojaya epeeji jaahuanajji cuana nijje miminaje, pea cuana nijje pojjeama. Jjachichaquiajo, eyaya huohuinaje jama ba'a: —Esohui quea pame nee Jesusaja eyaya huohuinaje Jodio pojjeama cuana huasijje —eyaya anaje.

Jamaya ecuea huohui jjima ona que. Jodio pojjeama cuana huasijje esohui huohui pajea mee ca chana', jama huoojeame eya aca chana' cuaa ba'a: —¡A'a jja oe Jodio pojjeama huasijje esohui huohui majajji Jesusaja esohui! —jamaya quea pame pojjeama poso aca chana' cuaa.

³ Jamajjeya e shajja'ajja majje Jesusaja epeeji jaahuanajji cuana quea bihui nee poanaje: —E'e, jamaya acue! —poanaje.

E'e, ohuaya Tito enijje poe' ba canaje Jodio pojjeama; Jieno dejja ca ca oya, Tito. Jamajjeya Jodio etiiquianaja esohui jayojja jama ajjima, cuiishasha jehusejjajea jjima. Jamatii Tito ecuanaja etiiquianaja esohui jayojja jama amee jjima, cuiishasha jehusejjajea mee jjima Jesusaja epeeji jaahuanajji cuanaja. Jamajjeya jjeya Jesusaja epeeji cuanaja cuiishasha jehusejjajea jjima.

⁴ Beca cuana ca ca jamatii iyaa jjima dobiquinaje ecuanaja esohui shajja'ajjaa, ecuana mimiciuajeanobijaeaa. Oya cuana aje oe siajje poanaje: —Ecuana pea'ai Jesusa Quitoja epeeji —oya poanaje. Siajje po majje ecuana tecueajea canaje jama ba'a: —Tito aje oe Jieno, esejaya etiiquianaja esohui jayojja jama ajjima; cuiishasha jehusejjajea jjima. ¡Oya oe jamaya amee-cue! ¿Apiojji acuae etiiquianaja esohui jama apajea meeña? Jesusa nijje jjapeequi majje jamatii Moisesija esohui jayojja jama caba'yahua —jamaya oya cuana mimijajinaje ecuana nijje.

Chojja. Jesusa nijje jjapeequi majje eseya etiiquianaja esohui jayojja jama epo'yoyji pojjeama. Jamatii ma dejja cuaa ecuanaya yahuajo jama ba'e mee sa acani.

⁵ Chojja de, ma dejja cuanaja esohui shajja'ajja jjima ecuanajaya. Ojaya esohui jama huohui ajja nei nei. Jamaya huohuime ya jojjemo miquiana ma Jodio pojjeama cuana dasia'yome. Ecuaya ca ca yahuajo jama huohui tiitiaña esohui quea pame nee Jesusajo mi-quianaya onijje ejjapeequi meesahua'yoyji tii tii.

⁶ Jamajjeya Jesusaja huoojea'yo ojaya esohui huohuijji etii Jenosanenajo ba'e enijje jama mimime poanaje ba'a: —E'e, ¡yahuajo jama esohui quea pame nee Jesusajo huohuicue Jodio pojjeama cuana huasijje! ¡A'a huohui pajea'yoyji! —poanaje.

E'e, pea esohui ecuea ba jjima onajaya huohui jjima. Ma esohui ecuea eba poanaje, ecuea eyacua pojjeama. Ojjaña Jesusaja epeeji cuaa shajja'ajja neinei cani. Jamatii eya Eyacuiñajjiya huoojea'yo, onajaya pojjeama. Jamajjeya Eyacuiñajjiya eba ecuea ejjashahuabaquijji. Eyaya quea ja'a nee nee esohui huohuiaña ojaya eba. O quea bihui po mee sa iña poani, dejja cuana pojjeama. ⁷ Jamajjeya ma dejja etii cuaa eya pea esohui huohui mee jjima. Chojja, huohui canaje jama ba'a: —E'e, jamajjeya Eyacuiñajjiya Pabo huoojea canaje Jodio pojjeama huasijje esohui quea pame Jesusajo huohuiya. Peno ca ca ohuaya huoojea canaje Jodio cuana huasijje esohui huohuiya —acanaje Jesusaja epeeji etii cuaa.

⁸ E'e, jamaya poanaje. Ma dejja etii cuaa ba canaje Eyacuiñajjiya Peno sohuihuohui sahua canaje Jodio cuana huasijje. Oya jayojjaya ohuaya eya sohuihuohui

sahua canaje Jodio pojjeama huasijje. E'e, Peno, eya pea'ai Jesusaja huoojea'yo esohui huohuijji. ⁹Jamajjeya ma dejja etii cuaa, Jesusaja epeeji jaahuanajjiya, Penohua, Satiacohua, Huaniya pea'ai eya jama acanaje ba'a: —Pabo, ecuanaja eba e'e jojo nei miya Eyacuiñajjiya huoojea'yo Jodio pojjeama huasijje ojaya esohui huohuiya —acanaje.

Jamajjeya ojee quea bihui nee jama poanaje ba'a: —Pabo, ¡miyaya Benabe nijjeya esohui quea pame nee, Jesusaja esohui huohuiquicue Jodio pojjeama cuana huasijje! Ecuaya ca ca Jodio cuana huasijje esohui huohuije —poanaje.

¹⁰Ecuana huohui canaje jama pea'ai ba'a: —E'e, ¡jamajjeya Jesusaja epeeji aema' a'a pajea'yojji! ¡Bejjo oe pojji huoojeacue aema' nei neiya o ba'e meesahuajji! —acanaje.

Ma esohui shajja'ajja majje eya quea bihui nee poanaje. Eya pea'ai aema huasijje bejjo huoojea sa poani nei nei.

Peno Atioquia cuiñajji yasijje poquiyajo Pabohua oya tecuea canaje

¹¹Majoya Jesusaja epeeji jaahuanajji nijje mimi majje eya: —Poquia iña —poanaje. Majoya ecua poqui'yonaje Atioquia cuiñajji quea quemo huasijje, quea huesha nee. Jomajo quea huiso Jodio pojjeama cuana ba'yaní. Quijje Peno ecua que poeyanaje Atioquia huasijje. Jomajo ani pishana majje Peno quea ja'a pojjeama poanaje. Jamajjeya eyaya oya tecueanaje ojjañaja ebajji. ¹²Jama poanaje ba'a: Poe coo majje Peno quea pame nee ¡jjia'¡jjianaje ojjaña Jesusaja epeeji cuana nijje, Jodio pojjeama cuana nijje, jamatii Jodio etiiquianaja esohui jama ajjima cuanaja; cuiishasha jehuissejja-jea jjima. Majoya quijje pishana beca Jodio dejja cuana poeyanaje, Satiacoja huoojea'yo. Ma Jodio cuana poeyajo, Peno aje oe quea pame po'yo ajja. Ani sa po'yo ajja Jodio pojjeama cuana nijje. Jodio pojjeama cuana nijje ¡jjia'¡jjia'yo ajja poanaje Jodio cuanajo quea mete jjejojo. Jodio cuana quea quene po mee sa po'yo ajja poa, ma jama poani ba'a: —Jodio pojjeama aje oe Jodio etiiquianaja esohui jayojja jama ca'a cahua, cuiishasha cajehuissejjajea cahua de, jamatii Jesusaja epeeji cuana pea'ai —beca Jodio cuaa acani.

¹³Jamajjeya Peno Jodio pojjeama cuana nijje ¡jjia'¡jjia'yo ajja ba majje pea Jodio cuana pea'ai aje oe Jodio pojjeama cuana nijje ¡jjia'¡jjia'yo ajja poanaje. E'e, yahuajo oya cuana jama poanaje ba'a: —Eyacuiñajjiya ecua ba'e tiitii mee caje'yo eyajo Jesosa nijje ¡japeequianajo, etiiquianaja esohui jama añajo pojjeama —acanaje cuaa yahuajo.

Jamatii aje oe Jesusaja epeeji Jodio cuana Jesusaja epeeji Jodio pojjeama cuana nijje ¡jjia'¡jjia'yo ajja poanaje. Ma ba majje Benabe pea'ai jamaya quea ja'a pojjeama poanaje, jamatii yahuajo Eyacuiñajjiya oya huoojea canaje Jodio pojjeama cuana huasijje.

¹⁴Jamajjeya ma ba majje eya ¡jashahuabaquinaje jama ba'a: —Quea ja'a pojjeama ohuaya acani, esohui quea pame nee Jesusaja jayojja jama ajjima acani.

Jamajjeya eyaya Peno tecueanaje ojjañaja eshajja'ajjaji. Jama anaje ba'a: —Peno, miya Jodio dejja. Mique chii, miquea enaese pea'ai Jodio. Jamatii Jodio cuana jama ba'e pajea'yonaje. E'e, Jodio pojjeama cuana nijje aninaje, ona nijje ¡jjia'¡jjia aninaje. Jamajjeya ¿apiojji acuae jjeya miyaya Jodio pojjeama ba'e mee sa aña Jodio etiiquianaja esohui jama? Jamaya miyaya quea ja'a pojjeama aña, Peno —eyaya Peno jamaya anaje.

Jesosa nijje ¡japeequianajo, Eyacuiñajjiya Jodio cuana, Jodio pojjeama cuana pea'ai ba'e tiitii mee caje'yo.

¹⁵Majoya eya Peno nijje, pea Jodio cuana nijje pea'ai jama poanaje ba'a: —Ecue chii aje ¡ja Jodio pea'ai, mi-quianajaya aje ¡ja Jodio pea'aiya. Jamajjeya jama poani Jodio pojjeama cuanajo ba'a: “Ecuana Jodio dejja; joya ecua Jodio pojjeama cuana jama po ajja. Oya cuana aje oe quea mimishi nee nee poani tii, ecuanajaya etiiquianaja esohui jayojja jama ba'e ajja” jamaya poani Jodio cuana quea quehua ¡jashahuabaquianajo —eyaya anaje—. ¹⁶Jjeya ecuanaya Jesosa nijje ¡japeequiani. Jamajjeya ecuanaja eba e'e jojo nei Jesosa Quito nijje ¡japeequianajo ca ca oe Eyacuiñajjiya eseya ba caní mimishi'ama'yo, etiiquiana Moisesija esohui jama ba'e nishoanajo pojjeama. Jamajjeya eseya Jesosa Quito nijje ¡japeequiani mimishi ecuijea mee'yojji. Jamaya eseya ¡jashahuabaquiani ba'a: —E'e jojo nei Eyacuiñajjiya ecua ba caní emimishi cuijea'yo Jesosa nijje ¡japeequianajo, etiiquiana Moisesija esohui jama ba'yanajo pojjeama. Jamajjeya Moisesija esohui jama añajo pojjeama Eyacuiñajjiya eseya ba caje mimishi'ama'yo.

¹⁷Eya Peno nijje, pea Jodio cuana nijje jama poanaje pea'ai ba'a: —E'e, esejaya eba e'e jojo nei Jesosa nijje ¡japeequianajo ca ca oe Eyacuiñajjiya eseya ba caní emimishi cuijea'yo, jamatii Moisesija esohui jayojja jama ba'e ajja. Jamajjeya eseya Jodio pojjeama jayojja poani. ¿A'a jamajjeya Jesosa Quitoja quea jea nee mimishi poanajo? Chojja, jamaya pojjeama. Mimishi Jesosa Quitoja boti'ama. Mimishi po mee'yo ajja nei nei oya.

¹⁸E'e, eyaya huohui huicha'a huicha'anaje Moisesija esohui jama caba'e pajea'yahua. Ojaya esohui jama ba'e nishoanajo ca ca Eyacuiñajjiya eseya mimishi'ama'yo ebajji pojjeama. Jamajjeya eyaya ¡jjeya jama ehuhui'yo ¡jajemo ba'a: —¡Moisesija esohui jayojja jama acue! Jamajjeya Eyacuiñajjiya mi-quianaya ba caje emimishi cuijea'yo —e'a ¡jajemo eyaya Eyacuiñajji quea quene po mee'yome, mi-quiana dasiajji po mee'yome pea'ai.

E'e, ¡iquio ecua equi cajja'yo majje oya tii iya o'oyaña jayojja jama eyaya a'yome, ca Moisesija esohui ehuhui o'oya ¡jajemo. ¹⁹Moisesija esohui ba neinei majje eya ¡jabahuejjaquinaje ma esohui jayojja jama quea camaja nee nee eba'ejji. Ameemee ajja, de. Jamajjeya ecuea eba e'e jojo nei Jesosa nijje ¡japeequianajo ca ca oe Eyacuiñajjiya eya ba caje emimishi cuijea'yo.

¡iquio ecua emano'yo cuana esohui jama eba'e majajji pojjeama jayojja eya Jesosa nijje ¡japeequi majje Moisesija esohui jama eba'e majajji pojjeama. Eyacui-

ñajjija ejjashahuabaquijji quea ja'a nee jayojja jama ca ca iña ba'eje. ²⁰ E'e, eya Jesosa Quitoja quea jea nee neejo oya acui ecueata'apeejo mano'yonaje ejo, ecue mimishi cuijea'yojji, eya onijje eba'e tiitii mee'yojji. Jamajjeya onijje jjapeequi majje eya yahuajo jama quea mimishi eba'e majajji pojjeama. Pea jjashahuabaqui'yome ecuea poani. Jjeya ca ca Eyacuiñajjija Bacua Ejja Jesosa Quitohua enijje nequiya eya ojaya ejjashahuabaquijji jayojja jama ba'e meesahua cani. E'e, eseya ojaya quea jea nee neejo Eyacuiñajjija oja Bacua Ejja huoojea canaje eseya mimishi cuijea'yohua. ²¹ Jamajjeya eya onijje jjapee tiitiiquije'yo. ¿A'a Moisesija esohui jayojja jama poanijo, Eyacuiñajjija eseya ba caje mimishi'ama'yo? Chojja. Ohuaya eseya ba caje'yo mimishi'ama'yo Moisesija esohui jayojja jama ba'yani jójje-mo Jesosa Quito mano'yonaje emanojea'yojji, manojea'yo quiaye.

¿Achajja acuae mi Eyacuiñajjija emimishi cuijea'yo ba cani?

3 Ecuea epeeji Janata meshijo ba'e, ¿apiojji acuae miquianaya quea jjashahuabaqui quehua poani? ¿A'a cuae onaaya miquianaya dasia majje esohui e'e nei pajea mee ca'yonaje? Yahuajo miquiana nijje nequiya ecuaaya Eyacuiñajjija esohui Jesosaja huohuinaje quea ja'a nee: —Jesosa Quito acui ecueata'apeejo mano'yonaje esejaya mimishi cuijea'yojji sosejje —huohuinaje.

Shajja'ajja majje miquianaya Jesosa Quitoja epeeji nei po'yonaje. ² Jjashahuabaquicue oe! Jesosa nijje jjapeequiajo ca ca oe Eyacuiñajjija ojaya Edojjoshahua Pame huoojea canaje miquiana huasijje dobiquiya. Moisesija esohui jayojja jama ba'e nishoanijo pojjeama miquiana huasijje dobiquinaje Edojjoshahua Pame. ³ Edojjoshahua Pame quea ca'a neeya miquianaya Jesosa Quitoja epeeji po mee cajje Eyacuiñajjija bacua poanaje. ¿A'a cuae jjeya nequiana jama poani so'o ba'a: —Eyaya ca ca eya eyaye nei Eyacuiñajjija esohui jayojja jama ajeyojeyo'yo —a'a jamaya poso nequiaa aña?

Chojja. ¿A'a quea jjashahuabaqui quehua pojji! ⁴ Yahuajo Jesosa nijje jjapeequianijo, pea cuaa miquianaya quea nee nee po mee canaje. Jamatii Jesosa nijje jjapeequi pajea jjima poanaje. ¿A'a jjeya jamatii onijje jjapeequi pajea sa poani? Jamajjeya ¿ajeo acuae nequiana yahuajo quea nee poa Jesosa nijje jjapeequi majje? Chojja. ¿A'a jamaya pojji! ⁵ Yahuajo Jesosa nijje jjapeequianijo ca ca oe Eyacuiñajjija quea ca'a neeya ojaya Edojjoshahua Pame miquiana huasijje huoojea canaje. Miquianaya o jayojja jama ameesahua canaje ma dejjaa ajjima acani pea'ai. Ohuaya jamaya ameesahua canaje miquiaaya esohui quea pame nee Jesosajo shajja'ajjañajo, onijje jjapeequianijo pea'ai; Moisesija etehue'yo jayojja jama anishoañajo pojjeama.

Onijje jjapeequianijo Eyacuiñajjija Amajama ba ca poa emimishi cuijea'yo
(Genesis 12.3)

⁶ Jjashahuabaquicue Amajamajo! Yahuajo nei Eyacuiñajjija Amajamajo tehue mee ca poa jama ba'a: “Amajama Eyacuiñajji nijje jjapeequi'ya poa e'e jojo nei. Jamajjeya Eyacuiñajjija oya ba ca poa mimishi'ama”.

Yahuajo jamaya tehue me aca poa.

Jamajjeya Amajama Eyacuiñajji nijje jjapeequi'ya poa; o jayojjaya eseya Jesosa nijje cajjapeequi'yahua. ⁷ E'e, ojjaña joya Amajama jayojja Jesosa nijje jjapeequiani Amajamaja osecua nei cuana poani, Jodio cuana, Jodio pojjeama cuana pea'ai. Jamaya miquianajaya eba.

⁸ E'e, yahuajo nei nei Eyacuiñajji jjashahuabaquinaje jama ba'a: “Enijje e'e jojo nei jjapeequi'yajo, eyaya Jodio pojjeama pea'ai baje mimishi'ama”. Jamaya yahuajo poa. Jamajjeya yahuajo nei Eyacuiñajjija Amajama huohui ca poa jama pea'ai ba'a:

“Amajama, miya ecuea epeeji nei poanijo, eyaya miya baña mimishi'ama. Quea huiso nee ojjaña meshijo ba'e, ojjaña esohuijo mimiani cuana pea'ai eyaya mimishi'ama baje'yo enijje jjapeequi'yajo”. Jamaya Eyacuiñajjija Amajama huohui ca poa yahuajo nei nei.

⁹ E'e, Amajama Eyacuiñajji nijje jjapee neinei'ya poa. Jamajjeya ojjaña o jayojja jama Eyacuiñajji nijje jjapee neinei'yaniji Eyacuiñajjija ba caje mimishi'ama'yo. ¹⁰ Yahuajo nei nei Eyacuiñajjija tehue mee ca poa jama ba'a:

“Moisesija esohui etehue'yo jayojja jama ba'e tiitii ajjajo, Eyacuiñajjija miquianaya quea nee nee po mee caje'yo, quea nee tii tii”.

Jamaya yahuajo nei nei tehue ca poa. Jamajjeya Moisesija esohui jayojja jama ba'e nishoanijo quea nee nee poaje'yo. Chama' joya ojjaña Moisesija esohui etehue'yo atitii'yo poani. Quea camaja nee nee. Ameemee ajja.

¹¹ E'e jojo nei Eyacuiñajjija esohui huohuijija tehue ca poa jama ba'a:

“Ojjaña joya onijje jjapeequi'yani Eyacuiñajjija ba caje mimishi'ama. Onijje ba'e tiitii mee caje'yo eyajo”.

Jama tehuemeya aca poa. Jamajjeya ecuanaja eba e'e jojo nei onijje jjapeequi'yanijo ca ca oe Eyacuiñajjija eseya ba caje mimishi'ama, Moisesija esohui jayojja jama ba'e nishoanijo pojjeama. ¹² Jamajjeya a'a quea quehua jjashahuabaquijji jama ba'a: —Eyacuiñajjija eya ba'e tiitii mee caje'yo Moisesija esohui etehue'yo jayojja jama eya atiiiañajo.

Jamaya jjashahuabaquianijo Jesosa oe nei nijje jjapeequi ajja tii tii. Maya ba'e tiitii sa poanijo Moisesija esohui jayojja jama atitii nisho cani. Jamatii ba'e tiitii ajja. ¡Bacue! Eyacuiñajjija esohui yahuajo nei tehue mee ca poa jama ba'a:

“Ojjaña cuaa Moisesija esohui etehue'yo jayojjaya jama ca'a tiitii cahua eyajo eba'e'yojji tii tii”.

Jamaya yahuajo tehue mee ca poa. Jamatii chama' nei nei joya Moisesija esohui etehue'yo jayojjaya jama atii-tii cani.

¹³ Eyacuiñajjiya mimishi cuana jama acani ba'a: —Eyaya miquianaya baña quea mimishi nee, e que ej-janequichipiquijji pojjeama poaje —poani Eyacuiñajji. Jesosa Quito ca ca mimishi'ama mano'yonaje eseja-ya mimishi cuijea'yojji sosejje. Yahuajo nei Eyacuiñajjiya esohui tehue ca poa jama ba'a:

“Ojjaña joya acuijo ba'ehuanasohua ba'e, e'aa jeyo ba'e aje oe Eyacuiñajjiya ba cani quea mimishi, o que ej-janequichipiquijji pojjeama”.

Jamajjeya Jesosa Quito acui ecueata'apeejo ba'ehuanasohua jajo, Eyacuiñajjiya oya huohui ca poa jama ba'a:

“Miquea epeeji cuanaja mimishi miquea po'yonaje. Jamajjeya eyaya oya cuana baña mimishi'ama, mimishi cuijea'yonaje”.

¹⁴ Yahuajo nei Eyacuiñajjiya Amajama jama aca poa ba'a:

“Amajama, miya enijje jjapee neinei-quianijo, quijje eyaya quea huiso cuana, ojjaña meshijo ba'e cuana baje mimishi'ama”.

Jamaya yahuajo nei aca poa. Jamajjeya Jodio pojjeama cuana pea'ai Jesosa Quito nijje jjapeequi'yanijo, Eyacuiñajjiya oya cuana ba caje mimishi'ama. E'e, Jesosa Quito mano'yonaje acui ecueata'apeejo esejaya mimishi cuijea'yojji. Jamajjeya Eyacuiñajjiya ojaya esohui jayojja jama acaje: Esey a ba'e tiitii mee caje'yo onijje. Edojjoshahua Pame huoojja canaje ese yasijje pea'ai, Jesosa nijje jjapeequi'yanijo.

Eyacuiñajjiya esohui Amajama nijje Moisesija esohui jayojja jama pojjeama

¹⁵ Ecuea epeeji cuana Janatajo ba'e, jjeya eyaya pea esohui tehueña miquiana ba meesahuajji, Eyacuiñajjiya esohui ba meesahuajji. ¡Bacue! Jama aña ba'a: Eseyaya papeni tehueña esejaya aqui ana quijje equijjo-jeajji. Tehue majje bajjani tehueña. Epeeji bajjani tehue meeña pea'ai ojjaña ebaaji. Bajjani tehue majje esejaya esohui etehue'yo epajea'yojji pojjeama. Jamaya e'e jojo nei acaje'yo cuana. ¹⁶ Oya jayojja yahuajo nei Eyacuiñajjiya Amajama huohui ca poa jama ba'a: “Amajama, eyaya miya quea pame nee aje'yo, mique osecua pea'ai”. Jamaya Eyacuiñajjiya yahuajo nei aca poa.

E'e, Eyacuiñajjiya Amajama jama aca poa ba'a: “Eyaya quea pame nee aje'yo miquea osecua oe” aca poa. “Miquea osecua quea huiso cuana nijje” ca ca ajjima aje'yo Eyacuiñajjiya aca poa. E'e, Eyacuiñajji jjashahua baquinaje ojaya huoojja'yo ojjaña jaahuanajji, Jesosa Quito, Amajamaja osecuajo. ¹⁷ Jamaya poanaje ba'a: Yahuajo nei nei Eyacuiñajjiya Amajama huohui ca poa jama ba'a: “Enijje e'e jojo nei jjapeequianijo, eyaya miya quea pame nee aje'yo, ojjaña meshi yasijje ba'e cuana quea pame nee aje pea'ai. E'e jojo nei eyaya ecuea esohui jayojja jama aje'yo tii tii” huohuime aca poa.

Jamaya Eyacuiñajjiya Amajama huohui ca poa yahuajo nei nei. Majoya quijje nei nei, 430 shequiajame po majje ohuaya Moisesi huohui ca poa ojaya esohui cuana ojjaña Jodio cuana huasijje ehuohuijji. Jamajjeya Moisesi ojaya esohui tehue mee majje Eyacuiñajjiya ojaya esohui Amajama nijje epajea'yojji pojjeama pea'ai. Chojja. Jama po ajja ba'a: “Jjeya ecuea esohui Amajama nijje eya anaje e'abecajji pojjeama” po ajja Eyacuiñajji. Ohuaya jamatii ojaya esohui Amajama nijje aca poa jayojja jama acaje'yo tii tii: Esey mimishi'ama ba caje onijje jjapeequianijo; Moisesija esohui etehue'yo jayojja jama anishoañajo pojjeama. ¹⁸ Jamajjeya e'e jojo nei onijje jjapeequianijo ca ca oe Eyacuiñajjiya esey a ba caje mimishi'ama, Moisesija esohui etehue'yo jama ba'e nishoanijo pojjeama. E'e, Eyacuiñajjiya esey a ba'e tiitii mee caje'yo Moisesija esohui jama ba'yanijojjemo ojaya esohui Amajama nijje ohua huohui ca poa jayojja jama ajjima aca'yome. Chojja, ohuaya ca ca oe ojaya esohui jayojja jama acaje'yo tii tii.

¹⁹ Jamajjeya miquianaya pojja'a jama poani ba'a: —¡Dee! Jamajjeya zapiojji acuae Moisesija esohui ba mee ca poa, ajeo shai tehue mee ca poa?

Eyaya miquianaya ba meeje. Jama ba'a: Eyacuiñajjiya maya tehue mee ca poa ese ba meeji ojjaña tii shajjama' poanijo. Yahuajo ca ca Eyacuiñajjiya Amajama huohui ca poa oja osecua poeje, ma ojjaña meshijo ba'e cuana quea pame acaje, Jesosa Quito bajjani. Jesosaa poe majje ecua ba mee ca poa Eyacuiñajjiya esey a mimishi'ama ba caje onijje jjapeequianijo, Moisesija esohui jayojja jama ba'e nishoanijo pojjeama. Jamatii Jesosa cuaya jjimahuajo, Moisesija esohui ojjaña ba ca poa jama ba'a: Ojjaña meshijo ba'e cuana shajjama' poani. Jamajjeya Eyacuiñajjiya shajjama' cuana quea nee nee po mee caje'yo.

Yahuajo nei nei Eyacuiñajji Amajama nijje miminaje jama ba'a: “E'e jojo nei eyaya miya quea pame nee aje”. Moisesija esohui tehue mee ca poajo ca ca Eyacuiñajji onijje mimi jjima. Ohuaya ojaya esohuidojojji huoojja ca poa Moisesi sohuihuohuiya. Majoya Moisesiya Eyacuiñajjiya esohui huohui ca poa pea cuana huasijje.

²⁰ E'e, oya Eyacuiñajji Amajama nijje miminaje: —E'e jojo nei eyaya miya quea pame nee aje —aca poa ohuaya. E'e, Eyacuiñajji Amajama nijje miminaje, pea Eyacuiñajjiya huoojja jjima Amajama nijje mimiya. Jamajjeya e'e jojo nei ma esohui jayojja jama acaje'yo tii tii, Eyacuiñajjiya.

²¹ E'e pojja'a miquianaya jjashahuaba quehuaquiani jama ba'a: —Jamajjeya Moisesi ojaya esohui tehue mee majje ojaya esohui ma Amajama nijje ohua huohui ca poa pajea ca'yonaje pojja'a Eyacuiñajjiya —jamaya jjashahuaba quehuaquiani pojja'a beca cuana.

Chojja, jamaya pojjeama. Yahuajo nei nei Eyacuiñajjiya huohui ca poa ojjaña onijje jjapeequiani ohuaya ba caje mimishi'ama. Majoya Moisesiya Eyacuiñajjiya sohui tehue ca poa ojaya ejjashahuabaquijji ba meesahuajji. Ma esohui cuana tehue mee ca poa jamatii

ojaya eba jamaya ba'e tiitii ajja ojjaña. Chama' nei nei joya ojaya esohui jayojja jama ba'yani tii. Ma esohui jayojja jama eba'e mee jojjemo Eyacuiñajjiya eseya ba'e tiitii mee ca'yome jamaya ba'yani jojjemo: —Eyaya miya baña mimishi'ama ecuea esohui jayojja jama ba'yanijo —jama huohui'yomeya jojjemo.

²² Jamajjeya Eyacuiñajjiya etehue'yo jayojja jama ba'e tiitii ajjajo eseya shajjama' cuana poani, quea mimishi. Jamaya ohuaya huohui ca poa. Jamajjeya Jesosa nijje jjapeequianijo ca ca oe Eyacuiñajjiya eseya ba cani mimishi'ama, eba'e tiitii mee'yojji.

Jesosa nijje jjapeequianijo eseya ba'e tiitii mee caje'yo, Moisesija esohui jama amajje pojjeama

²³ Yahuaajo nei onajaya huohui jjima Jesosa nijje ejja-peequi'yojji. Moisesija esohui jayojja jama ba'yanijo, Eyacuiñajjiya ojjaña mimishi'ama ba cani poso aca poa cuaa. Jamajjeya ma esohui jayojja jama ba'e meeme ajjajo, ejeanobiajea jayojjaya ojjaña poa. Jamaya ojjaña poa esohui quea pame nee Jesusaja shajja'ajja jjimahuajo. ²⁴ Cuanaya Jesosa Quito poe jjimahuajo, ojjaña cuana esho'i jama poanaje. Moisesija esohui esho'i jjabahuejjaqui meejji jayojja jama poa. Jiquio ecua o jaahuanajjiya esho'iquiana niñeshe'a cani jayojja jama Moisesija esohui ba majje ojjaña ba ca poa quea ja'a eba'ejji, quea ja'a eba'ejji pojjeama pea'ai. Jamajjeya ma esohui ojjaña ba ca poa Eyacuiñajji ona nijje quea quene poani Moisesija etehue'yo jayojja jama ajjimajo. Jesosa poeyajo ca ca onijje jjapeequi'yajo, Eyacuiñajjiya eseya ba cani mimishi'ama. ²⁵ Jjeya eseya Jesusaja epeeji poani. Jamajjeya esejaya eba Eyacuiñajjiya ojjaña ba caje mimishi'ama Moisesija etehue'yo jayojja jama ba'e nishoanijo pojjeama. Jamajjeya jjeya eseya esho'iquiana jayojja jama pojjeama; etii jayojja jama poani.

Jjeya eseya Eyacuiñajjiya bacua cuana po'yonaje

²⁶ E'e, Jesosa Quito nijje jjapeequi'yo majje eseya Eyacuiñajjiya bacua cuana poani, Jodio cuana, Jodio pojjeama cuana pea'ai, ojjaña. ²⁷ Jesosa nijje jjapeequi'yajo eseya onaaya besa mee canaje Eyacuiñajjiyo. Jamaya ojjaña ba meenaje eseya Jesusaja epeeji e'e jojo nei poani, Eyacuiñajjiya bacua cuana. Jjeya eseya Jesosa Quito jayojja jama ba'yani, yahuaajo jama pojjeama. ²⁸ E'e, Jesusaa ojjaña ojaya epeeji ba cani oya jayojjaya, pea epeeji jayojjaya. Jama poani ba'a: —Jodio cuana Jodio pojjeama cuana jayojjaya; echacojji sosema' cuana ona huoojajji poani jayojja; dejja cuana epona cuana jayojjaya pea'ai. Ojjaña pea jayojjaya eyaya ecuea epeeji baña —Jesosa poani.

²⁹ Jesosa Amajamaja osecua nei poa. Jamajjeya ojaya epeeji nei Amajamaja osecua cuana poani. Onijje jjapeequianijo, Eyacuiñajjiya Amajama ba ca poa mimishi'ama. Jamajjeya Eyacuiñajjiya Jesusaja epeeji cuana mimishi'ama ba cani pea'ai, Amajama jayojjaya.

Jiquio ecua ebacua ejjaa aquiana mesena ca'yani jama jayojjaya Eyacuiñajjiya eseya ba'e tiitii mee caje'yo Jesosa esejo mano'yonajejo

⁴ Ecuea epeeji cuana, eseya Eyacuiñajjiya bacua po'yonaje. Jamajjeya ojjaña ojaya aquiana esejaya poaje'yo. Eyaya miqianaya maya esohui ba mee sa aña. Jamajjeya jiquio jama acue ba'a: Oe esho'i oja chiija quijjojea. Mano'yo jjimahuaa ejeajjiya o tiimeejji epojji huohui ca poa jama ba'a: —Ojjaña aquiana ecue quijjojea ecue bacuaja poaje'yo. ¡O esho'yahua miyaya jaahuanacue! ¡Ecuea aquiana pea'ai jaahuanacue! ¡Oya tiiyajo quia'yocue! —aca poa ejeajjiya.

Jamajjeya jjeya nei ojjaña aquiana oja chiija quijjojea esho'ija. Jamatii esho'i neiya o tiimeejji cashajja'ajja cahua, echacojjiya jama cashajja'ajja cahua. Tii majje ca ca onaja huoojea'yo shajja'ajja pajea caje'yo, esho'iya.

³ Esho'i nei oja chiija aquiana quia jjima jayojja jama yahuaajo Eyacuiñajjiya eseya quea jjashahuabaqui ja'a po mee jjima poa. Epeeji pojjeamaja esohui jayojja jama eseya poa. Shajjama' jayojja ba'e sa po'yo ajja poa; jamatii jamaya poa. ⁴ Jamajjeya Eyacuiñajji yahuaajo nei jama poanaje ba'a: —Ecuea eba ache shejo, ache poj-jajo eyaya ecue Bacua huoojeaje —poa.

Jamajjeya ma shejo, ma pojajajo tii ojaya ejjashahua-baquijji yahuaajo jayojja jama ohuaya Jesosa huoojea canaje. Jesosa ese jayojjaya yamijji poa, Jodio eponaja mejo. Jamajjeya ohuaya Moisesija esohui etehue'yo jayojja nei nei aca'ya poa e'e jojo nei. ⁵ Ojjaña ma esohui jayojja jama ba'e nishoanijo, Eyacuiñajjiya eseya ba cani mimishi cuijea'yo jjima. Jamajjeya oya, Jesosa poeyanaje ese mimishi cuijea'yojji sosequia'yohua. E'e, oya mano'yonaje eseya Eyacuiñajjiya bacua cuana epo mee'yojji.

⁶ Jamajjeya oja bacua poanijo, Eyacuiñajjiya Edojjoshahua Pame huoojea canaje ese que dobiquiya. Edojjoshahua Pameya eseya mimi meesahua cani jama ba'a: —Eyacuiñajji, Echii ai, jjeya miya ecue Chii e'e jojo nei —ameesahua cani eseya.

⁷ Jamajjeya Eyacuiñajji eseya Chii poanijo jjeya eseya esho'i nei jayojja pojjeama, echacojji jayojja jama pojjeama pea'ai. Jjeya ca ca eseya oja bacua etii pishana poani. Jamajjeya jiquio ecua ejeajjiya oja bacua etii acani jayojja jama Eyacuiñajjiya eseya acani, ma ecua ohuaya huohui ca poa jamaya acani.

Pabo quea mete Jesusaja epeeji cuanajo poa

⁸ Ecuea epeeji cuana, yahuaajo miqianajaya ba jjima poa Eyacuiñajji. Jamajjeya eshahua nijje miminaje, eyacuiñajji nisho nijje pea'ai. Maya mi huoojajji poanaje; o jayojja jama popajea meeme ajja poa. ⁹ ¡A'a jja oe jamaya po o'oyajji! Maya miqiana ba'e meesahua ajja, jaahuana ajja, mimishi cuijea'yo ajja pea'ai. Jjeya ca ca miqiaaya Eyacuiñajji babacanaje mique Chii epojji, ama e'e jojo nei ohuaya miya babaca ca poa oja bacua cuana epo'yojji. Jamajjeya ¿apiojji acuaeya jja oe jjeya

esohui quea quehua shajja'ajja o'oya sa aña so'o? Jamaya quiana quea jjashahuabaqui quehua poani, de.
¹⁰ E'e, jjeya miqianaya Jodio etiiquiana jama ba'e sa poanijo quea quehua jjashahuabaqui jama ba'a: —Jodio etiiquiana ojee ijia'ijia aninaje Eyacuiñajji bihuiajji, ojaya esohui epajea'yojji pojjeamajo. Oe epojajo jamaya acaninaje, oe ba'ijo cuanaya jamaya acaninaje, pea ba'ijo jamaya acaninaje pea'ai, pea shequiaya cuanajo jamaya acaninaje pea'ai. Ecuanaaya Jodio etiiquiana jama atiitije, Eyacuiñajjiya ecuana ba caje mimishi'ama —jamaya quea quehua jjashahuabaqui miqianaya.

¹¹ Jamajjeya eya quea mete miqianajo. E'e pojja'a eyaya quea huiso cahui miqianaya huasijje esohui huohui majamajanaje ehuohuijajji.

¹² Ecuea epeeji cuana, miqianaya ecuea quea jea nee, Jesusaja epeeji cuana. Yahuajo eya miqianajaya quea jea nee poa. Miqiana nijje nequiya eyaya ecuea etiiquianaja esohui apajea'yonaje. Jamajjeya eya Jodio pojjeama jama ba'enaje, miqiana jama. ¡Che, oe e jayojja jama ba'ecue! ¡Yahuajo jama Jesusaja epeeji nei po o'oyacue! ¹³ Miqianajaya eba yahuajo eya quea mano poanaje miqiana nijje ani. Miqiana nijje aniya esohui quea pame nee Jesusaja huohui coonaje, jama-tii quea manohua poaniya tii. ¹⁴ Eya jjashahuabaquinaje jama pea'ai ba'a: —Eya quea mano poani ba majje Janata dejja cuaa eya cajaa acaje, eya huoojeacuayaje caje pojja'a cuiñajji esecue yasijje —poanaje.

Chojja, miqianaaya eya jaahuanaje, huoojeacuayaje jjima poanaje. Eyacuiñajjiya esohuidojojji poeyajo miqianaaya oya quea pame aje jayojja jama eya quea pame nee anaje; Jesusa Quito poeyajo, oya quea pame nee aje pea'ai jayojja jama eya anaje, de miqiaaya.

¹⁵ Eya miqianajaya quea jea neejo ecuea esohui shajja'ajjanaje quea jaji nee nee. Jjashajja'ajjaquinaje pea'ai. Ecuea eba miqianaya jama poanaje ba'a: —Pabo ecuanaja quea jea nee neejo oya quea pame nee ca'a'yahua. E'e, ecuea ecojja cajja cajji jjemo eyaya oya quia'yome, de —poanaje.

Jjeya ca ca miqianaaya eya shajja'ajja pajea'yonaje. ¿Apiojji acuae ecue esohui shajja'ajja sa po'yo ajja quiana jjeya, de? ¹⁶ Eyaya esohui e'e nei huohuiaña tii. ¿A'a majoya eya miqianajaya boti'ama?

¹⁷ Beca cuaa, esohui huohuijji nishohua miqianaya quea jea nee nisho acani. Ohuaya miqianaya enijje jjapeequi pajea mee sa acani ecuea esohui Jesusajo epajea mee'yojji. Ojaya esohui oe nei shajja'ajja mee sa acani. ¹⁸ Onaaya miqianaya e'e jojo nei quea jea acani ca ca jamaya quea pame nee. E'e, pea cuana quea jea nee ejja'aqui tii. Esohui huohuijji nishohua miqianaya esohui e'e nei pajea mee cani quea pame pojjeama. Jamajjeya miqianaaya esohui e'e nei aña tii quea pame nee eya miqiana nijje nequi jjimahuajo, miqiana nijje nequianijo pea'ai. ¹⁹ Epeeji cuana, ecuea ca mi ca miqianaya quea jea nee e'e jojo nei. Jiquio ecua epona cuana quea bacua nee nee poani jayojja jama eya quea yeno nee jjashahuabaquime poani miqianajo, ecuea esohui pajea'yañajo. Eya quea

yeno nee poaje tii tii; miqiana Jesusa Quito jayojja jama ba'e'yajo ca ca iña oe yeno'ama poaje'yo; ojaya ejjashahuabaquijji jayojja jama miqiana po'yajo, eya yeno'ama poaje'yo. ²⁰ Jamajjeya jjeya nei miqiana que poqui sa poani. Miqiana nijje mimi sa poani. Miqiana nijje enequi jojjemo ecuea eba pome mi jjabahuejjaqui meeji.

¡Esohui Jesusajo shajja'ajjacue Sanaja bacua jama epojji!

²¹ Miqiana beca cuana Eyacuiñajjiya esohui ma Moisesi tehue mee ca poa jayojja jama ba'e sa poani. Jamatii miqianajaya ma esohui shajja'ajja jjima, ba jjima pea'ai. ²² Jamajjeya eyaya miqianaya huohuije jama ba'a: ¡jjashahuabaquicue Eyacuiñajjiya esohui Amajamajo! Amajamaja bacua ejja cuayanaje becanejjiji pea'ai. Oe ebacua ejjaja enaeseya chaco ca poa Amajamaja equijo, oja huanaseja yajji. Oya Janita bajjani poa. Pea ebacua ejja Isaaca bajjanija enaese Amajamaja ehuanase poa. Oya Sana bajjani poa. ²³ Janita epona sho'yahua jjamejoquinaje. Oja bacua cuaya poa Amajamaja bacua, ojjaña esejaya ebacua cuayani jayojja jama poa. Chama' Eyacuiñajjiya huohui ma ebacujajo poa. Sana ca ca epona tii, bacuama' poa, esho'yahua jjamejoqui jjima poa. Eyacuiñajjiya Sana huohui ca poa jama ba'a: “Sana, ecuea eba miya epona tii, esho'yahua miya jjamejoqui jjima poa. Jamatii miya jjamejoquije; miquea ebacua cuayaje, dejja” aca poa. Jamajjeya Eyacuiñajjiya huohui canaje jayojja Sanaja bacua Isaaca cuaya poa, Amajamaja jea. ²⁴ Jiquio beca eponajo jjashahuabaquicue eba meesahuajji beca ejjashahuabaquijji jama ba'a: Beca enaese yania poa, Sana, pea ca Janita. Eyacuiñajji beca dejja nijje miminaje pea'ai, Amajama nijje, Moisesi nijje pea'ai. Ebionei Eyacuiñajji Amajama nijje miminaje. Huohui ca poa jama ba'a: “Enijje jjapee neineiquianijo, eyaya miya baña mimishi'ama” aca poa. Ma esohui quea pame nee epona Sana bajjani jayojja.

Majoya quijje Eyacuiñajji Moisesi nijje miminaje eyiyo Sinai bajjani biajje. Ojaya esohui huohui mee ca poa: “Moisesi, jiquio ecuea esohui Jodio cuana shajja'ajja meecue!” aca poa. Jiquio esohui quea camaja nee e'ajji, epona Janitaja eba'ejji jayojja jama. Oya onaja huoojea'yo Amajamaja equijo echacojji. Jamajjeya ojjaña jaya Moisesija esohui jayojja jama ba'e sa poani Janitaja bacua cuana jama, echacojji sosema' jayojja. Moisesija etehue'yo shajja'ajjaji cuana Eyacuiñajjiya ba cani mimishi cuijea'yo jjima. ²⁵ E'e, Sinai meshijo yani eyiyo Janita bajjani Anamia meshijo ba'eja esohui. Cuanaya Jodio cuanaja cuiñajji quea quemo Jenosanena bajjani Janita jayojja jama. Janita epona echacojji onajaya yajji-joyojja jama ojjaña Jenosanenajo ba'e cuana quea jjashahuabaqui quehuajo jama poani ba'a: —Eyacuiñajjiya ecuana ba caje mimishi'ama ojjaña Moisesija etehue'yo jayojja jama ba'yajo —poani.

Jamajjeya Jodio cuaa Moisesija esohui etehue'yo anisho canii tii. ²⁶ Jenosanena eyacua eyajo nequi. Ojjaña Jenosanena eyacuajo eba'ejji cuana echacojji soe-

sema' jayojja yajji pojjeama. Ma ecua Eyacuiñajjiya huohui ca poa jayojja jama eseya acaje'yo; Jesosa nijje jjapeequi'yajo, ohuaya eseya mimishi cuijea ca'yani. Jamajjeya eseya Sanaja bacua jayojja jama poani. ²⁷ E'e, yahuajo Eyacuiñajjiya esohui etehue'yo Sanajo jama poa ba'a:

“Epona, ¡quea bihui nee pocue, jamatii miya bacua-ma! ¡Jamatii jjamejoqui jjima quea bihui pocue! Eyaya miya quea osecua huiso po meeje. Quijje miquea eba-cua poaje, miqueahueja jea. Quea huiso nee nee poaje mique osecua cuana. E'e, miya ehuei'yo pojjeama. Quijje miquea osecua quea huiso poaje”.

Jamaya yahuajo nei Eyacuiñajjiya tehue mee ca poa.

E'e, Eyacuiñajjiya Sana quea pame aca poa jama ohuaya jjeya eseya quea pame acani, Jesusaja epeeji cuana.

²⁸ Ecuea epeeji cuana, jjeya eseya Jesusaja epeeji poani cuana. Ma ecua ohuaya yahuajo huohui ca poa jamaya Eyacuiñajjiya Amajamaja bacua Isaaca cuaya mee ca poa. Oya jayojjaya jjeya ohuaya eseya oja bacua cuana po mee ca'yani, Jesosa nijje jjapeequi jeahuajo. Jamaya ohuaya huohui ca poa yahuajo.

²⁹ Yahuajo Eyacuiñajjiya Edojjoshahua Pameya Sanaja bacua Isaaca cuaya meesahua ca poa, Amajamaja jea. Oya jayojjaya Edojjoshahua Pameya eseya pea jjashahuabaquime po mee cani. Jiquio ecua yahuajo nei Janitaja bacua mimijajinaje Sanaja bacua nijje jayojja jama jjeya Jesusaja epeeji pojjeama ese nijje mimijajiani, quea mimishi acani ojaya epeeji epo poani jjejojo.

³⁰ Jamatii miquea eba Eyacuiñajjiya esohui etehue'yo jama poa ba'a:

“Epona Janita bajjani equijo chacochocho ani ¡huojoecua yajjea'yocue! ¡Quea huesha huojeeja'yocue oja bacua nijje! E'e, miquea aquiana equijjojea oja bacuaja pojjeama poaje. Miquea ehuanase neija, Sanaja bacua ojaña mesena caje”.

Jamaya yahuajo Eyacuiñajjiya Amajama huohui ca poa.

³¹ Janitaja osecua cuana Moisesija esohui etehue'yo jayojja jama aca poa. Eyacuiñajjiya maya ba cani mimishi cuijea'yo jjima. Eseyca ca ca, Jesusaja epeeji cuana ca ca Sanaja bacua Isaaca jama Eyacuiñajjiya ba cani emimishi cuijea'yo, Jesosa nijje jjapeequianijo.

Etiiquianaja esohui jayojja jama ja'a ba'e o'oyajji!

5 Ecuea epeeji cuana, Jesosa nijje jjapeequi meesahua majje Eyacuiñajjiya eseya ba canaje emimishi cuijea'yo. Jamajjeya ja'a jama pojji ba'a: —Etiiquiana jayojja tiya oe eba'e'yo Eyacuiñajjiya eseya mimishi'ama ebajji, Moisesija esohui etehue'yo jayojja jama oe eba'e'yo —a'a jamaya pojji!

Chojja. Jjeya Jesusaja epeeji poanijo, ja'a miquianaya Moisesija esohui etehue'yo jayojja jama ba'e o'oyajji! ¡A'a echacojji sosema' jayojja jama po'yoyji! ² ¡Shajja'ajjacue! Eyaya, Pabohua miquianaya jama huohuiaña ba'a: E'e jojo nei miquianaaya etiiquianaja ehuhui'yo jayojja jama amajje, cuiishasha jehusejjajea mee majje ojjaña miya ba cani Jesosa nijje jjapeequi pajea'yani. Jamajjeya etiiquianaja ehuhui'yo jayojja jama amajje,

cuiishasha jehusejjajea mee majje ca mi ca oe Jesosa nijje jjapee nishoquiani. ³ Jamajjeya eyaya miquianaya e'e jojo nei huohui o'oyaña ma Eyacuiñajjiya yahuajo nei huohui ca poa jama ba'a: “Isaenija bacua cuana cuiishasha cajehusejjajea cahua. Jamaya ojjaña ba caje oya cuana Moisesija etehue'yo jayojja jama ba'yani” jamaya yahuajo aca poa e'e jojo nei. Jamajjeya miquianaaya etiiquianaja, Moisesija esohui etehue'yo jayojja jama a sa po'yo majje ojjaña tii aneinei'yocue oe! ⁴ E'e, jama aña ba'a: —Eyacuiñajjiya eya ba caje mimishi'ama Moisesija esohui etehue'yo jama aña.

Jamajjeya aje oe ma miquianayame tii ca jja mi ca oe Jesosa oe nei nijje jjapee neinei'ajji. Jiquio jama mimi pajea'yome aje mi poani ba'a: —Eyacuiñajji, ¡eya miquea quea jea nee nee jo jaahuanacue mo! ¡Miquea esohui jayojja jama ecue mimishi cuijea'yocue! —jamaya mimi pajea'yome mi poanaje, de.

⁵ Ecuanaya ca ca jama poani ba'a: —Ecuanaja eba Jesosa nijje e'e jojo nei jjapeequianijo, Eyacuiñajjiya ecua ba caje emimishi cuijea'yo.

Edojjoshahua Pameya ecua ba meesahua cani e'e jojo nei Eyacuiñajjiya jamaya eseya acaje'yo o que poqui'yajo. ⁶ Jamajjeya Jesusaja epeeji cuana, Jodio cuana, Jodio pojjeama cuana pea'ai Eyacuiñajjiya ba cani oya jayojjaya, pea jayojjaya. Ohuaya jamaya acani ba'a: —Ojjaña joya e'e jojo nei Jesosa nijje jjapeequi'yani, Jesosa quea jea nee acani pea'ai eyaya baña emimishi cuijea'yo —Eyacuiñajjiya acani.

⁷ Ecuea epeeji cuana, yahuajo miquianaya esohui quea pame nee Jesusaja shajja'ajjanaje quea ja'a nee. Beshahua nei jjapee neinei'ajjanaje. Jjeya ca ca onaaya miquianaya esohui e'e nei pajea mee cani pea esohui eshajja'ajjaji. ⁸ Eyacuiñajji pojjeama miquianaya jama huohuime acani. Chojja.

—¡Esohui e'e nei ba neinei'ajjanaje! —jamaya ca ca Eyacuiñajjiya eseya acani.

⁹ ¡Bacue! E'e jojo nei pa ponaja oe pojji pahui shejje meejiya quea huiso pohuipohui shejje mee cani. Jiquio ecua eshejje meejiya pahui shejje mee cani jayojja jama oe esohui huohuiji nishohua quea huiso cuana esohui e'e nei pajea mee ca'yani. ¹⁰ Jamatii ecuea eba esejaya Emeshi Mese nei Jesusaa ojaya esohui jayojja jama acaje. Jamajjeya miquianajaya esohui e'e nei epajea'yoyji pojjeama, etiiquiana Moisesija esohui jayojja jama eba'e nisho'yoyji pojjeama. Jamajjeya ecuea eba Eyacuiñajjiya e'e jojo nei ma esohui huohuiji nisho quea nee nee po mee caje'yo pea'ai, jamatii edejja tiya jamaya huohuime acani pojja'a.

¹¹ Epeeji cuana, ¡jjashahuabaquicue! Beca cuana ojo sijje poani jama ba'a: —Pabohua pea'ai ca pa jjaja ca oe huohui cani etiiquianaja Moisesija esohui jayojja cuiishasha jehusejjajea mee cani pea'ai —sijje poani ojo.

Chojja. Yahuajo ca ca oe Jesosa nijje jjapeequi jji-mahuaa eyaya jamaya pea Jodio cuana huohuia poa. Jamajjeya oya cuana enijje quea bei poa, quea quene pojjeama. Jjeya ca ca eyaya esohui eyacua huohuiaña jama ba'a: —Jesusa acui ecueata'apeejo mano'yonaje

esejo, eseja mimishi cuijea'yoyji soseje. Onijje jjapeequi'yojo ca ca oe Eyacuiñajjiya miqianaya ba caje emimishi cuijea'yo —huohuime jjeya aña.

Jamajjeya ma shajja'ajja majje Jodio cuana enijje quea quene poani. Eyaya yahuajo jama Moisesija esohui ehuohui jojjemo Jodio enijje quene'ama pome. Oya cuana enijje quea quene poanijo, miqianajaya eba eyaya jamaya huohui maja ajja.

¹² ¡Esohui huohuijji nisho, ma miqiana dasiajji poani ca'a'ama capoahua! Maya jama poani ba'a: —¡Moisesija esohui jama ca'a cahua! ¡Cuiishasha cajehusejjajea cahua! —acani.

¡Oya cuanaya cabiña jjajeajeaquiahua pea'ai, de! Jamajjeya jiquio ecua ejjajja chamajo jjabacuaeajqui ajja jayojja jama esohui huohuijji nishoja mi dasiajji epo cuanaja quea huiso edasia maja'yoyji pojjeama.

¡Edojjoshahua Pameja esohui jayojja jama ba'ecue!

¹³ Jesusaja epeeji cuana Janata meshijo ba'e, miqianaya ecuea quea jea nee. ¡Jamajjeya mo shajja'ajjacue! Eyacuiñajjiya miqianaya babaca canaje Jesusaja epeeji epo'yoyji, Moisesija esohui e'ajji pojjeama. Jamatii miqianaya, Jesusaja epeejiya ja'a jamaya ajji ba'a: —Eyacuiñajjiya eya ba cani mimishi'ama Jesosa nijje jjapeequianijo. Eya Moisesija esohui etehue'yo jayojja jama apajea mee canaje. Jamajjeya eya jamatii ba'eje o'oya yahuajo jama, quea mimishi —a'a jamaya pojji!

Chojja, jamaya pojjeama. ¡Pea cuana asahuacue; quea jea nee nee acue! Jesosa Quito nijje jjapeequi'yanijo, Eyacuiñajjiya miqianaya quea ja'a po mee cani ojaya esohui jama eba'ejji. ¹⁴ Jamaya Moisesiya tehue ca poa yahuajo ba'a:

“¡Pea cuana quea jea nee nee acue! Miya quea ja'a ba'e sa poani. Jamajjeya ¡pea cuana quea ja'a ba'e mee sahuacue, mi jayojjaya! ¡Pea cuana mi pejeje ba'e pea'ai mique huapa pojjeama jayojja quea jeaya oe acue!”

Jamaya yahuajo Moisesiya tehue ca poa.

E'e jojo nei pea cuana quea jea nee nee añajo ojjaña Moisesija esohui jama aña. ¹⁵ Pea cuana nijje mimijajiani ca ca oya cuana miquea quea jea pojjeama. ¡Jiquio ecua ijjiacajji cuaa jja'ijjiacajji majje jja'ijjiacajji jeyojoquiani jayojja jama a'a pojji! ¡A'a pea cuana nijje quea quene nee nee pojji! ¡A'a quea yeno nee nee po meeji! ¡A'a mimijajji! ¡Pea epeeji cuana nijje quea bei pojjeamajo ojee jjapeepajaeajqui mee ca chana'!

Edojjoshahua Pameja ejjashahuabaquijji pea ojjaña yahuajo ba'eja jayojja jama pojjeama

¹⁶ Ecuea epeeji, ¡shajja'ajjacue! ¡Edojjoshahua Pameja ejjashahuabaquijji jayojja jama ba'ecue, yahuajo jama pojjeama! ¡Yahuajo jayojja a'a sa'yoyji! Quea mimishi ja'a ba'e sa po o'oyajji! ¹⁷ E'e, yahuajo quea mimishi ba'ya poa. ¡Jamaya a'a po sa po o'oyajji! Edojjoshahua Pameya ca ca eseya ba'e meesahua cani; pea ejjashahuabaquiyoyji po mee cani, de. ¿Apiojji acuae mi

yahuajo ba'ya poa jayojja jama ba'yani, ejjashahuabaquijji eyacua jama pojjeama ba'yani? ¹⁸ Jjeya Edojjoshahua Pameja ejjashahuabaquijji jama ba'yanijo ca ca Eyacuiñajjiya eseya ba cani emimishi cuijea'yo; etiiquiana Moisesija esohui jayojja jama ba'yanijo pojjeama.

¹⁹ Ojjaña joya Edojjoshahua Pameja ejjashahuabaquijji jayojja jama a'ajja ca ca quea mimishi poaje'yo. E'e, jamaya pojjeama ba'yanijo onajaya ehuanase sii caje, onajaya yahue jea ba majje sii caje pea'ai, quea mimishi jjashahuabaquianijo edejja oya dejja nijje, epona oya epona nijje pea'ai quea mimishi acaje bicho'ama. Quea tai jjashahuabaqui majje jamaya acaje'yo. ²⁰ Eshahua nijje, eyacuiñajji nisho nijje mimije; eyamiquecua poaje, quea quene nee nee poaje; jjamicuiajea nobiajeajji; pea jayojja jama nequi sa poaje; quea tecue nee nee poaje; quea dejja tai, quea nishehui poaje; mimijajji pea'ai. Ojjaña joya Edojjoshahua Pameja jayojja jjashahuabaqui ajjaa quea tai acani. ²¹ Onajaya aquiana jea ba cani, ehoo nei po tiitiiani, ojee ishi'ishi majje quea tai poani pea cuana nijje. E'e, ojjaña mimishi acani; yahuajo jayojja ba'yanijo tii quea mimishi po tiitiiani.

Yahuajo eyaya miqianaya huohuinaje; jjeya eyaya huohui o'oyaña jama ba'a: E'e jojo nei ojjaña joya jamaya ba'yani aje oe Eyacuiñajji nijje eba'e'yoyji pojjeama, Eyacuiñajjiya cuiñajji eyacua huasijje edobiquijji pojjeama Jesosa poe o'oyajo.

²² Edojjoshahua Pameya eseya ba'e meesahua canijo ca ca jama poani ba'a: Pea cuana esejaya quea jea poani, quea bihui nee poani, quea bei poani, ojjaña nijje quea pame nee poani, quenequenecuai ajja pea'ai, mase'ama poani pea'ai, ojjaña cuana quea jea nee aña tii tii; esejaya esohui jayojja jama aña pea'ai. ²³ Eseyajjabihuajqui mee sa po'yo ajja pea'ai. Quea mimishi po sa po majje quea ja'a jjashahuabaquiani mimishi epojji pojjeamajo. Jamaya poani Edojjoshahua Pameja ejjashahuabaquijji jayojja jama ba'yanijo. E'e, jamaya ba'yanijo Eyacuiñajji quea bihui po mee aña seya. ²⁴ Eseyajjesosa Quitoja epeeji poanaje. Jamajjeya mimishi a sa po'yo ajja. E'e, Jesosa Quito mano'yonaje acui ecueata'apeejo ecuanaja mimishi cuijea'yoyji. Jiquio ecua emano'yo shajoshajo'yo ajja jayojja jama eseya Jesusaja epeeji poanijo mimishi a sa po'yo ajja. Pea jjashahuabaquiyome eseya Jesusaja epeeji cuana poani. ²⁵ E'e, Edojjoshahua Pameya ecuanaja Jesosa nijje jjapeequi meesahua canajejo, eseya ojaya ejjashahuabaquijji jayojja jama ejja'aqui. ²⁶ ¡Jiquio jama a'a jjashahuabaquijji ba'a: —Eya ee nei Jesusaja epeeji quea pame nee poani. Pea cuana quea pame pojjeama —jamaya a'a pojji!

¡A'a pea cuana quea quene po meeji! ¡Pea cuanaja aquiana a'a jea bajji pea'ai!

¡Quea pame nee pocue pea cuana nijje!

6 Ecuea epeeji cuana, ¡bacue jiquio esohui! Jesosa Quitoja epeeji quea mimishi po o'oyajo, ¡onijje mimiquicue! E'e, miqianaya Jesusaja epeeji quea ja'a

poanijo ;oya mimishi pajea meesahua'yocue! ;Quea bei oya jjabahuejjaqui meecue! ;Quea jashahuabaqui ja'a nee pocue! Miya quea mimishi po o'oya chana' pea'ai. ² ;Jesosa Quitoja epeeji ojaya esohui jayojja jama ba'e meesahuacue! ;Jamajjeya ojjaña miquianaaya ojaya esohui jayojja jama acue! Jiquio ecua e'abojji quea biqueje ishajja cani jayojja jama eba'eji quea camaja poanijo, ;epeeji cuana ba'e meesahuacue! ³ Beca cuana jashahuaba taiquiani jama ba'a: —Eya ee nei quea pame nee; pea cuana quea pame pojjeama —po-so jjabaquiani.

Chojja, ojaya ejjashahuabaquiji quea quehua, quea tai. ⁴ Ojjaña Jesosaja epeeji cajjashahuaba neinei-quiahua ojaya eba'eji. ;Quea pame amajje quea bihui nee capoahua! ;A'a jashahuabaquiji jama ba'a: —¿A'a pea cuana e jayojja jama quea pame aña? —a'a jamaya pojji!

⁵ Jamajjeya ojjaña eseyaya quea mimishi po majje ;Eyacuiñajji huohucue! A'a jama ajji ba'a: —Onaaya eya quea mimishi po mee canaje.

Chojja. Ma miyame tii ca mi ca quea mimishi.

⁶ Epeeji cuana, ;Jesosaja esohui huohuiji aquiana ojaya eba'e meeji quiacue! E'e, esohui huohui cani so-sejje casosequia cahua.

⁷ ;A'a jjadasiaquiji pojji! ;A'a quea jashahuabaqui tai pojji! Eyacuiñajji ca ca jjadasia meeji ajja. Ohuaya quijje ojjaña sosequia caje'yo ma eseyaya meshijo ba'yahuaa anaje sosejje. Ojjaña ojaya eba. Jamajjeya jiquio ecua anoso quecua majje quijje anoso chicha caje'yo quea huiso nee jayojja jama quijje Eyacuiñajjiya acaje'yo. ⁸ E'e. Jamajjeya yahuajo jayojja jama jashahuaba tiitiquiani quea mimishi epojji, e'e jojo quea mimishi poaje. Jamajjeya quijje Eyacuiñajjiya quea nee nee po mee caje'yo tii tii quea mimishi poanaje sosejje. Edojjoshahua Pameja esohui shajja'ajjaña jo ca e'e jojo nei quea pame po mee caje'yo; eseya ba'e tiitii mee caje'yo onijje.

⁹ ;Jamajjeya quea pame nee eja'atiitiqui! Quea pame nee apajea'yo ajjajo, e'e jojo nei Eyacuiñajjiya eseya quea bihui nee po mee caje'yo Jesosa Quito poe o'oyajo. E'e, jiquio ecua equa meseya oja quejo chaco pajea'yo jjima acani jama, quijje tii'yajo ejjajja quea pame chicha ca'yani jayojjaya eseyaya Edojjoshahua Pameja esohui jayojja jama apajea'yo ajjajo, quijje Eyacuiñajjiya eseya quea pame nee acaje'yo. ¹⁰ ;Jamajjeya ojjaña cuana quea pame eja'atiitiqui! ;Jesosaja epeeji cuana ca ca quea pame nee nee eja'atiitiqui eseja huapa pojjeama jayojja!

Pabohua pea esohui huohui canaje

¹¹ Epeeji cuana, eyaya eyaye nei jiquio esohui tehueaña. Miquea eba eya tehueaña jayojja; tehue ai'ai yaña. ¹² ;Bacue! Beca cuana jashahuaba taiquiani; onaya jjabihuaqui mee sa poani. Oya cuana esohui huohuiji nei poso acani. Miquianaya huohui cani

esohui siajje jama ba'a: —;Moisesija esohui jayojja jama acue! ;Onaya cuiishasha jehusejjajja meecue Eyacuiñajjiya miquianaya ebajji emimishi cuijea'yo! —jama siajje ameya mi acani.

Jamajjeya esohui e'e nei mi huohui cani jama ba'a: —Jesosa acui ecueata'apeejo mano'yonaje esejo. Onijje japeequi'yajo Eyacuiñajjiya eseya ba caje emimishi cuijea'yo —jamaya miquianaya huohui jjima acani. Chojja, oya cuana quea mete jashahuabaquiani jama ba'a: —Ecuaa jama huohui'yo jojjemo ba'a: “;Jesosa nijje oe japeequi'yocue!” jamaya e'a jojjemo onaya ecuaa nijje quea quene nee pome —jamaya esohui huohuiji nisho poani.

¹³ E'e de, maya etiiquiana Moisesija esohui etehue'yo jayojja jama ecuiishasha jehusejjajja'yo. Jamatii aje oe ojjaña pea esohui etehue'yo jayojja jama ba'e'yo ajja. Miquianaya cuiishasha jehusejjajja mee sa acani jama huohui mee'yojji ba'a: —Ecuana jama esohui ca ca oe shajja'ajja cani ojjaña.

¹⁴ Eyaya ca ca oe quea bihui huohui tiitiaña jama ba'a: —Jesosa Quito acui ecueata'apeejo mano'yonajejo, onijje tii tii japeequiani. Jamajjeya Eyacuiñajjiya eya ba cani emimishi cuijea'yo.

Jamajjeya eya yahuajo jama ba'e maja sa po'yo ajja. Mimishi cajaa a'yonaje. Jjea ecuea eba'eji pea'yo po-naje. Jesosaja epeeji pojjeama cuana ca ca oe e jayojja jama ba'e sa po'yo ajja cuana. Eya ojaya boti'ama nei.

¹⁵ Jesosa Quitohua eseya pea jashahuabaquime po mee cani. Eyacuiñajjiya eseya ba cani emimishi cuijea'yo Jesosa nijje japeequianajo, Moisesija esohui jayojja jama aña jo pojjeama; cuiishasha jehusejjajjaña jo pojjeama, cuiishasha jehusejjajja jjimajo pojjeama pea'ai. Chojja, pea jashahuabaquime eseya po mee cani Eyacuiñajjiya.

¹⁶ Jamajjeya ojjaña quea pame nee ba'yanajo, Jesosaja epeeji e'e jojo nei cuana jo eya Eyacuiñajji nijje mimiani jama ba'a: —Ecue Chii, ;Jesosaja epeeji cuana quea bei ba'e meesahuacue! ;Tecue'ama ona nijje pocue!

¹⁷ ;A'a jja oe enijje jjamimicuijajja nobiajajquiji esohui huohuiji nishoja esohuijo! Eya e'e jojo nei Jesosaja huojaja'yo esohui huohuiji. Jamajjeya ja'a huohui o'oyajji jama ba'a: —Pabohua cahuohui cahua jama ba'a: “;Etiiquianaja Moisesija esohui etehue'yo jama acue Eyacuiñajjiya miquianaya emimishi cuijea'yo ebajji!” —a'a jamaya pojji!

Mimishi cuaa eya cuia canaje quea huiso esohui eya huohui poaje jjejojo. Ecuea esi' quea huiso yanajo, ojjaña ba caje eya e'e jojo nei Jesosaja huojaja'yo.

¹⁸ Ecuea epeeji cuana, ;esejaya Emeshi Mese nei Jesosa Quitohua miquianaya caba'e meesahua cahua quea pame nee! Jamaya capoahua tii.

Mahuiso ecuea esohui. Eyaya, Pabohua jiquio esohui tehue'yonaje. Apoa.

EPESIO

Pabohua tehue canaje Jesusaja epeeji cuana Epeso cuiñajjiyo ba'e yasijje

1 Eya bajjani Pabo. Jesusa Quitohua eya huoojea canaje oja sohui huohuiya. Jamaya Eyacuiñajji sa poanaje. Eyaya miqianaya Epeso cuiñajjiyo ba'e yasijje esohui tehueaña. E'e, miqianaya Jesusa Quito nijje jjapeequiani. ² Eyacuiñajji esejaya Chii ai poani. Jesusa Quito esejaya Emeshi Mese nei oe nei. ¡Ohuaya miqianaya quea bei nee caba'e meesahua cahua! ¡Quea bojea capo mee cahua pea'ai!

Jesosa eyajo ba'e jayojja jama eseya ba'e mee caje'yo Eyacuiñajjiya

³ Eyacuiñajji ca ca oe Jesusa Quitoja Chii poani. Jesosa esejaya Emeshi Mese nei poani. Eyacuiñajji ejjabihuaqui jama ba'a: —Eyacuiñajji, miya quea pame nee nee poani.

E'e, ohuaya Jesusa huoojea canaje esejaya mimishi cuijea'yohua. Cuanaya ohuaya eseya ba'e tiitii mee caje'yo onijje eyajo. E'e, eseya o jayojjaya jama ba'e mee caje'yo quea pame nee eyajo. ⁴ ¡Iquio meshi pana jjimahuajo Eyacuiñajji jjashahuabaquinaje jama ba'a: —Ojjaña cuana Jesusa nijje jjapeequiani ecue bacua cuana po meeje'yo. Quea pame nee poaje. Mimishi'ama pea'ai poaje.

⁵ E'e, yahuajo nei nei eseya Eyacuiñajjiya quea jea nee poanijo oya jjashahuabaquinaje jama ba'a: —Oya cuana ecue bacua cuana po meeje'yo, eba'ehuana jayojja ecue Bacua Jesusa Quito nijje jjapeequianajo.

E'e, jamaya Eyacuiñajji sa poanaje yahuajo nei nei. ⁶ Jamajjeya eseyaya oya bihuaña jama ba'a: —Eyacuiñajji, miyaya ecuana jaahuana neineiaña.

E'e, Eyacuiñajjiya oja Bacua Jesusa quea jea nee nee acani. Eseya quea jea nee nee acanijo pea'ai Jesusa huoojea canaje mano'yohua, eseya mimishi cuijea'yoyji. Jamatii, sosema' huoojea canaje. ⁷ Jamajjeya eseya cuaqui yasijje epoquijji pojjeama. E'e, jamaya poanaje Jesusa mano'yajo; ena' ojaya cuayaquinaje eseya mimishi cuana cuijea'yoyji. E'e, eseya quea jea nee nee poanijo jamaya amee canaje Eyacuiñajjiya. Quea pame nee nee oya. Pea chama' o jayojja. ⁸ Quea pame nee nee ojaya ejjashahuabaqui'yoyji. Ojaya eba ojjaña nei nei. Jamajjeya ohuaya eseya ba'e tiitii mee caje'yo onijje eyajo. ⁹ E'e, yahuajo nei nei esejaya ba jjima ojaya ejjashahuabaquiijji. Jjeya ca ca ohuaya eseya ba meesahua cani ojaya ejjashahuabaquiijji cuana Jesusa Quitoja. Jamaya ohuaya acaje'yo ba'a: Jesusa Quitohua

esejaya mimishi cuana cuijea ca'yonajejo, Eyacuiñajjiya eseya ba'e tiitii mee caje'yo onijje eyajo Jesusa Quito poe o'oyajo. ¹⁰ E'e, quiije Eyacuiñajjiya Jesusa Quito Emeshi Mese nei oe nei po mee caje'yo. Ojjaña meshijo, ojjaña eyajo pea'ai huoojeajji poaje'yo tii tii. Oya ojjaña quea bei po meeji poaje. Jama jjashahuabaqui-meya poa Eyacuiñajji.

¹¹ E'e, yahuajo nei nei Eyacuiñajjiya eseya Jesusaja epeeji cuana babaca ca'ya poa Jesusaja epeeji epo'yoyji. Cuanaya Eyacuiñajji yahuajo nei nei meshi pana jjimahuajo jjashahuabaquinaje esejo jama ba'a: —Jesusaja epeeji cuana quiije nei ecuea ejjashahuabaqui'yoyji jayojja jama poaje'yo.

Jamajjeya Eyacuiñajjiya ojaya epeeji cuana quiije ojaya ejjashahuabaquiijji jayojja jama amee caje'yo. ¹² Jamajjeya ecuaa, Jesusa Quitoja ebionei epeeji cuana Eyacuiñajji bihuaña jama ba'a: —Eyacuiñajji, miya quea pame nee nee poani, ecuana Jesusaja epeeji po mee'yonaje.

¹³ Yahuajo Eyacuiñajji ecuanajo jjashahuabaquinaje, Jodio cuanajo. Jjeya oya miqianajo, Jodio pojjeama cuanajo jjashahuabaquiiani pea'ai. E'e, eyaya miqiana huasijje Jesusa Quitoja esohui e'e nei huohuinaje Jodio pojjeama huasijje. Shajja'ajja majje miqianaya Jesusa Quitoja epeeji poanaje. Jamajjeya Eyacuiñajjiya miqianaya ojaya ebacua cuana po mee ca'yonaje. E'e, miqianaaya shajja'ajjanaje Eyacuiñajjiya ejjashahuabaqui'yoyji quea pame nee miqianajo jama ba'a: —Eyaya Jodio pojjeama cuana ba'e tiitii mee sa aña Jesusa nijje eyajo Jesusaja epeeji poanijo.

Cuanaya Eyacuiñajjiya yahuajo nei huohui ca poa jama ba'a: —Eyaya Edojjoshahua Pame huoojeaje'yo Jesusaja epeeji yasijje ona jaahuana. Oya cuana Jesusa nijje jjapee tiitiqui meesahua caje'yo —oya poa.

Jamajjeya esejaya eba jama ba'a: —E'e, Eyacuiñajjiya eseya jaahuana canijo ohuaya ojaya ejjashahuabaqui'yoyji esejo jayojja jama acaje'yo e'e jojo nei —eseyaya baña.

¹⁴ E'e, Eyacuiñajjiya yahuajo huohui ca poa jama ba'a: —Jodio pojjeama cuana ecuea epeeji poaje'yo beca cuana.

Eyacuiñajjiya jamaya huohui ca poa. Jamajjeya Jodio pojjeama cuana oja bacua cuana po mee caje'yo. Onijje ba'e tiitii mee caje'yo. Ojaya ebacua cuana po'yo majje ohuaya bihuaña caje jama ba'a: —E'e Eyacuiñajji, miya quea pame nee poani e'e jojo nei.

Pabo miminaje Eyacuiñajji nijje Epesojo ba'e cuana quea pame nee epo mee'yojji

¹⁵ E'e, miqianaya Eyacuiñajji epeeji poanaje. Peaa eya miqianajo huohui canaje jama ba'a: —Beca cuana Epeso cuiñajji ba'e Jesosaja, esejaya Emeshi Mese neija epeeji poanaje. Onaaya ojjaña Jesosaja epeeji cuana quea jea nee acani —eya acanaje cuaa.

¹⁶ Jamajjeya ohuaya miqianaya oja bacua cuana po mee ca'yonaje shajja'ajja majje eya mimiani Eyacuiñajji nijje miqianajo: —Eyacuiñajji, ¡miqua epeeji cuana Epesojo ba'e minijje jjapeequi meesahuacue quea pame nee!

¹⁷ E'e, eya mimiani Eyacuiñajji nijje miqianajo jama ba'a: —Eyacuiñajji, miya Emeshi Mese nei Jesosa Quitoja Chii quea pame nee. Jamajjeya ¡miqua epeeji cuana Epesojo ba'e quea ja'a nee jjashahuabaqui meecue! ¡Oya cuana miqua ejjashahuabaqui'yojji, miqua esohui cuana pea'ai ba meesahuacue! Jamajjeya onajaya eba nei nei miya poaje. ¹⁸ E'e Eyacuiñajji, ¡oya cuana ba meecue quea ja'a nee miqua ejjashahuabaqui'ji! E'e Eyacuiñajji, miyaya oya cuana babaca'yonaje; oya cuana ba'e tiitii meeje'yo Jesosa nijje eyajo. ¡Quea pame nee nee Jesosa nijje eba'eji, de! ¡Maya oya cuana ba meesahuacue quea ja'a nee! E'e, jamaya miqua ejjashahuabaqui'ji miqua epeeji cuana. ¹⁹ Eyacuiñajji, miya quea ca'a nee nee poani; pea chama' mi jayojja quea ca'a nee nee. ¡E'e Eyacuiñajji, miya quea ca'a nee nee poanaje Jesosa Quito jaahuanajji! ¡Miqua epeeji cuana ba meesahuacue miya quea ca'a nee nee poani ecuaña jaahuanajji pea'ai! —eya jamaya mimiani Eyacuiñajji nijje miqianajo.

²⁰ E'e jojo nei Eyacuiñajji quea ca'a nee nee. Jamajjeya Jesosa Quito dejja mase cuaa quecua ca'yajje mano'yajo, Eyacuiñajji shequi mee ca o'oya poa. Shequi mee'yo majje yahuasijje dojosohuacui ca'ya poa. Jomajo Eyacuiñajji Jesosa Quito onijje ojjaña huoojea'yojji po mee cani. ²¹ E'e, Jesosa oe nei quea ca'a nee nee po mee ca'yonaje. Oya ojjaña huoojea'yojji po mee ca'yonaje. Emeshi Mese oe nei po mee ca'yonaje pea'ai. E'e, Jesosa quea ca'a nee nee, quea pame nee nee yani jjeya; quijje aje oe oya ma ani tiitii'yome poaje. Oya quea bajjani huiso nee, quea pame nee nee poani Jesosa. ²² E'e, Eyacuiñajji Jesosa Quito Emeshi Mese quea ca'a nee nequi mee canaje. Ojjaña aquiana cuana Jesosaja poanaje. Ojjaña oja epeeji cuana Emeshi Mese nei poanaje Jesosa. Eyacuiñajji huohui canaje jama ba'a: —¡Jesosa Quito shajja'ajjacue, ojjaña!

²³ E'e, Jesusaa ojaya epeeji cuana ojaya esohui jayojja jama ameesahua cani. Ojjaña ojaya epeeji cuana nijje nequi majje oya cuana ameesahua cani quea pame nee. E'e, ojaya epeeji cuana Jesosaja eyami jayojja jama poani.

Eyacuiñajjiya eseya eyajo ba'e tiitii mee caje'yo

² Yahuajo miqianaya quea mimishi nee nee poa jjejojo Eyacuiñajji nijje jjapeequi jjima poa. ² E'e, yahuajo miqianaya pea cuana quea mimishi jayojja jama Edosiquiana nijje jjapeequinaje, eshahua cuana mese nijje. Ohuaya shajjama' cuana quea mimishi po meesahua cani. ³ E'e ecuaña, Jodio cuana miqiana jayojjaya poa. Eyacuiñajji jjashajja'ajjaqui ajja pea'ai poa. Shajjama' jayojja jama po sa poanaje eshahuaja epeeji jayojjaya. E'e de, ecuanajaya ejjashahuabaqui'ji quea mimishi jayojja jama po sa poanaje. Jamajjeya yahuajo pishana ecuaña, Jodio cuana, miqianaya Jodio pojjeama cuana pea'ai eshahuaja epeeji quea mimishi poanajo Eyacuiñajjiya huohui canaje jama ba'a: —Miqianaya aje oe quea nee nee po meeje'yo eyaya, eshahuaja epeeji quea mimishi nee neejojo —Eyacuiñajji poa.

⁴ Jamatii Eyacuiñajji eseya mimishijo jjashahuabaqui tiitii sa po ajja eseya ojaya quea jea nee nee poanajo.

⁵ E'e, yahuajo pishana eseya Eyacuiñajji nijje jjapeequi jjima poa quea mimishi po sa neinei poanajo. Jamatii Eyacuiñajjiya eseya oja bacua quea pame cuana po mee canaje Jesosaja epeeji poanajo. E'e de, jamaya Eyacuiñajjiya eseya quea jea nee acanijo esejaya mimishi cuana cuijea ca'yonaje. ⁶ Jamajjeya Jesosa Quitoja eseya mimishi cuana cuijea ca'yonaje, Eyacuiñajjiya ecuaña, miqianaya pea'ai ojaya bacua cuana po mee ca'yonaje ojee eyajo eba'e tiitii mee'yojji. Jamajjeya Eyacuiñajjiya ecuanaya, miqianaya pea'ai ba'e tiitii mee cani Jesosa Quito nijje eyajo. Jamaya ohuaya huohui ca poa ba'a: —Jesosaja epeeji poanajo eyaya miqianaya o jayojjaya nequi tiitii meeña quea ca'a nee, quea pame nee pea'ai.

⁷ E'e, Eyacuiñajjiya esejaya mimishi cuijea'yo majje ese nijje quea bei poani. Jamajjeya ojjaña cuana esohuicuayajji ba mee cani; quijje pea'ai ba mee caje jama ba'a: —E'e nei eseya Jesosa Quitoja epeeji poanajo, Eyacuiñajji ese nijje quea bei poani. E'e, Eyacuiñajji ese nijje quea pame nee nee poani tii.

⁸ E'e de, eseya Eyacuiñajjiya quea jea nee nee. Jamajjeya miqianaya huohuaña jama ba'a: —Ecua eba Eyacuiñajjiya ecua mimishi cuana cuijea ca'yonaje eya onijje jjapeequi jeahuajo —jamaya poanajo Eyacuiñajjiya miqianaya quea pame nee acani. E'e, ohuaya miqianajaya mimishi cuijea ca'yonaje onijje mimiyajo.

¿A'a miqianaya quea pame nee nee poani sosejje mimishi cuijea ca'yonaje? Chojja de, ohuaya mimishi cuana cuijea ca'yonaje sosema'. ⁹ E'e, ohuaya esejaya mimishi cuijea ca'yonaje sosema'. Jamajjeya pea cuana siajje epojji pojjeama jama ba'a: —Eya quea pame nee poani sosejje Eyacuiñajjiya ecua mimishi cuijea ca'yonaje —chojja, jamaya poani siajje'yojji cuana.

¹⁰ E'e, esejaya eba Eyacuiñajjiya eseya pea jjashahuabaquime po mee ca'yonaje. Jamaya ohuaya aca'yonaje Jesosaja epeeji cuana poanajo. E'e, ohuaya jamaya aca'yonaje. Eseyo ojaya ejjashahuabaqui'ji jayojja jama atiitii mee ca'yani pea'ai. Ojaya ejjashahuabaqui'ji ese-

jo jama ba'a: —;Eya miqianajaya quea jea neejo pea cuana quea pame nee atiitiicue!

Eyacuiñajjiya Jodio pojjeama sa cani ojaya epeeji epoiji

¹¹ Miqianaya Epesojo ba'e Jodio cuana pojjeama. ¡Jamajjeya jjashahuabaquicue! Miqianajaya chii cuana Jodo pojjeama poa. Jamajjeya Jodio cuana miqianajo maimai aninaje jama ba'a: —Oya cuana ca ca oma Jodio pojjeama; Eyacuiñajjiya epeeji pojjeama.

E'e, Jodio cuana quea quehua jjashahuabaquinaje jama ba'a: Cuiishasha biso nei jehuissejjajeañajo ecuaa Eyacuiñajjiya epeeji quea pame nee poani poso ecuaa anaje, Jodio cuana. ¹² Jamajjeya yahuajo Jesosa Eyacuiñajjiya huoojea'yo ojjaña jaahuanajji miqianajaya ba jjima poa Jodio pojjeamaja jjejojo. Miqianaya Eyacuiñajji ba po jjima jjejojo Eyacuiñajji ba epo cuana nijje jjapeequi ajja poa. E'e, miqianajaya Eyacuiñajji bihuia jjima Jodio cuana nijje. Yahuajo Eyacuiñajjiya huohui ca poa Jodio cuana jama ba'a: —Eyaya huoojeaje ojjaña jaahuanajji miqiana huasijje —poanaje.

Maya miqianajaya ba jjima poa Jodio pojjeamaja jjejojo. Jamajjeya miqianaya jjashahuabaquinaje jama ba'a: —E'e de, ecuaa jaahuanajji quea pame nee chama'. ¿Aya acuae ecuaa jaahuana caje'yo? —poanaje.

E'e de, miqianajaya Eyacuiñajji ba jjima poanaje. Jamajjeya ¿aya miqianaya jaahuana canaje? Quea camaja eba'eji mee nei jiquio meshijo. ¹³ Jjeya ca ca miqianaya Eyacuiñajjiya epeeji cuana poani Jesosa Quito nijje jjapeequianijo. E'e, yahuajo miqianaya Eyacuiñajji bihuia po jjima poanaje. Jjeya ca ca Eyacuiñajjiya miqiana Jodio cuana jayojja jama amee canaje. E'e, jjeya miqianaya Eyacuiñajji bihuiajji. Jesosa Quito miqianajaya mimishi cuijea'yojji mano'yonaje, ojaya ena' cuayaqui'yonaje. Jamajjeya Eyacuiñajjiya miqianaya oja bacua cuana po mee ca'yonaje.

Jodio cuana nijje Jodio pojjeama cuana ojee jjapeequije Eyacuiñajji nijje

¹⁴ E'e, Jesosa Quitohua ecuaa ojaya epeeji po mee canajejo, beca Jodio cuana Jodio pojjeamajo huohui cani jama ba'a: —E'e de, Jodio pojjeama cuana Eyacuiñajji bihuia cani ecuaa jayojjaya Jesosaja epeeji poaniya jjejojo —poani.

E'e, Jodio cuana Jodio pojjeama cuana nijje Jesosaja epeeji poani jjejojo huapa pojjeama poani. Jjeya Jesosaja epeeji poani jjejojo Jodio cuanaja ejjashahuabaquiji jayojja jama Jodio pojjeama cuana jjashahuabaquiani. Epeeji nei nei poanaje. E'e de, jamaya poanaje Jesosa Quito ojjañaja mimishi cuijea'yojji acui ecueata'apeejo mano'yonajejo. ¹⁵ Ojjañaja mimishi cuijea'yojji poani jjejojo Jesosa ojaya epeeji cuana nijje miminaje jama ba'a: —¡Jodio etiikianaja esohui jayojja jama a'a ajji ca ecuea epeeji epoiji! Chojja, enijje jjapeequianijo Jodio cuana, Jodio pojjeama cuana pea'ai ecuea epeeji cuana poanaje. Ojjaña cuana huapa pojjeama cuana poanaje. Jamajjeya Jodio cuana Jodio poj-

jeama cuana nijje ojee jjapeequi meeje'yo quea bei —acanaje Jesosa Quitohua.

¹⁶ Jesosaa Jodio cuana, Jodio pojjeama cuana pea'ai ojaya epeeji cuana po mee ca'yonaje; oya cuana Eyacuiñajjiya epeeji cuana poanaje. E'e, oya cuana Eyacuiñajjiya bacua cuana poanijo, ojee nequi mee caje huapa pojjeama jayojja jama, quea bei. Jamaya amee canaje Jesosaa acui ecueata'apeejo mano'yo majje.

¹⁷ Cuanaya Jesosa Quito poeyanaje miqiana que, ma Jodio pojjeama huasijje jama huohuiya ba'a: —E'e de, jjeya miqianaya Eyacuiñajjiya epeeji po meeña. Yahuajo miqianajaya Eyacuiñajji ba jjima Jodio pojjeamaja jjejojo. Jjeya ca ca ojaya epeeji quea bei poani miqianaya —Jesosaa poanaje.

Jesosaa ecuaa huasijje, ma Jodio cuana huasijje poeyanajeya Eyacuiñajjiya esohui bajji yasijje. Ma ecua miqiana huohui canaje jayojjaya jama ecuaaya huohui canaje pea'ai. ¹⁸ Jamajjeya ecuaa, Jodio bajjani cuana Eyacuiñajji nijje mimiani; miqianaya Jodio pojjeama cuana pea'ai Eyacuiñajji nijje mimije'yo, esejaya Chii ai nijje. E'e, Edojjoshahua Pame oe nei yani ojjaña Jesosaja epeeji cuana nijje. Ohuaya Jesosaja epeeji cuana Eyacuiñajji nijje mimi meesahua cani mete'ama.

¹⁹ Jamajjeya jjeya Eyacuiñajjiya Jodio pojjeama cuana jama acani ba'a: —Yahuajo miqianaya ecuea epeeji pojjeamajo eyaya miqianaya jaahuana jjima poa. Jjeya ca ca miqianaya ecuea epeeji poani. Ecuea huapa pojjeama poani ecuea pea epeeji cuana nijjeya —acanaje Eyacuiñajjiya. ²⁰ E'e, Jesosaja huoojea'yo cuanaja esohui shajja'ajjanaje miqianaaya. Cuanaya yahuajo nei Jodio esohui huohuijji cuana esohui e'e nei huohui canaje. Maya jjeya miqianaaya shajja'ajjanaje. Jamajjeya miqianaya Jesosaja epeeji poanaje pea'ai. Jamaya po mee canaje Jesosaa ba'a: Ojaya epeeji cuana equi jayojja jama nequi. Jesosa Quito ca ca quea ca'a nee, quea pame nee nee poani, equi yamajjana quea ca'a jayojja oya. E'e, jiquio ecua eyamajjanajo acui ejeasehuijaajji huana majje acui equecuajeajji huisajo bequiobo ba'ehuana cani jayojja jama Jesosaa ojaya esohui huohuijji cuana quea pame nequi mee cani. Majoya esohui huohuijjiya ojjaña Jesosaja epeeji cuana quea pame ba'e meesahua cani. Jesosaja huoojea'yo esohui huohuijji cuana, Jodioja esohui huohuijji cuana pea'ai ma acui eba'ehuanasohuajji jayojja jama poani. ²¹ Jjeya miqianaya Jesosaja epeeji po majje acui ejeasehuijji jaajji biajje nequi jayojja jama poani. Jamajjeya jiquio ecua equi yamajjana quea ca'a nequijo equi quea ca'a nequia mee cani jayojja jama Jesosaa quea ca'a poaniya ojaya epeeji cuana ojee quea ca'a onijje jjapeequi mee cani. Equi quea ca'a jayojja po mee cani. ²² E'e, jjeya miqianaya, Jodio pojjeama Jesosa Quitoja epeeji poanijo Edojjoshahua Pame ojjañajo nequi. Jamajjeya ojaya epeeji Jodio bajjani cuana nijje ojee nequi, equi quea ca'a jayojja poani.

Pabohua esohui huohui majamaja canaje Jodio pojjeama cuanaja ebajji

3 Eya Pabo, Jesosa Quitoja esohui huohuijji. Eyaya ojaya esohui huohuinaje miqiana huasijje, Jodio pojjeama bajjani yasijje ojaya epeeji nei epo meeji. Jesosaja esohui huohuiañajo pea cuaa eya iña majje jeanobiajea ca'yonaje eya esohui ehuhui poaje jjejojo.

²Jamatii. Pea cuaa miqiana huasijje huohuiqui canaje ejo jama ba'a: —Eyacuiñajjiya Pabo huoojea canaje ojaya esohui Jesusajo huohuiya Jodio pojjeama cuana huasijje —acanjaje.

³Yahuajo miqianajaya ba jjima Eyacuiñajjiya ejjashahuabaquiji jama ba'a: —Jesosa Quitohua ojjaña ojaya epeeji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo.

Maya Eyacuiñajjiya eya ojaya epeejiyojo ba mee canaje. Jamaya ecuea esohui etehue'yo miqiana huasijje yahuajo huohuia poa. ⁴E'e, maya miqianaaya banaje. Jamajjeya jama jjashahuabaquime poanaje ba'a: —E'e jojo nei Eyacuiñajjiya Pabo ba mee canaje ojaya ejjashahuabaquiji jama ba'a: Jesosa Quitohua ojjaña ojaya epeeji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo —jamaya miqianajaya eba poanaje.

⁵Yahuajo nei ca ca Eyacuiñajjiya pea cuana huasijje huohui jjima ojaya ejjashahuabaquiji Jesosa Quitojo, ma Jodio pojjeama cuana ojaya epeeji po mee majje o jaahuanajji poaje'yo pea'ai. Jjeya ca ca Eyacuiñajjiya Edojjoshahua Pame huoojea canaje ojaya epeeji cuana huasijje. Ojaya epeeji beca cuana huoojea canaje ojaya ejjashahuabaquiji jayoija jama huohuiya. Edojjoshahua Pameya ma esohui huohuijji cuana ba mee canaje Eyacuiñajjiya ejjashahuabaquiji Jodio pojjeama jo pea'ai. ⁶Eyacuiñajji jjashahuabaquinaje Jodio pojjeama cuanajo jama ba'a: —Jodio pojjeama cuana ecuea epeeji po majje ecuea huapa pojjeama cuana poaje. Oya cuana ba'e tiitii meeje'yo eyajo Jesosa nijje. E'e nei, eyaya huohuinaje ecuea epeeji cuana Jodio bajjani cuana huasijje jayoija jamaya eyaya aje'yo ecuea epeeji Jodio pojjeama cuana huasijje pea'ai. Jamaya eyaya aje, oya cuana Jesusaja epeeji poanajo. E'e, Jodio pojjeama cuaa shajja'ajja canaje ecuea esohui Jesosa Quitojo —Eyacuiñajji poanaje.

⁷E'e jojo nei Eyacuiñajjiya eya huoojea canaje ojaya esohui quea pame nee Jesusajo huohuiya. Eya ojaya quea jea poanajejo, ohuaya eya ojaya epeeji po mee ca'yonaje, eya ojaya esohui huohuijji po mee canaje pea'ai. ⁸Jamajjeya Jesusaja pea epeeji cuana quea pame nee nee; eya ca ca quea pame pishana yahuajo Jesusaja epeeji cuana cuia mee'yojji poa jjejojo. Jamatii Jesosa nijje jjapeequiyajo, Eyacuiñajjiya eya huoojea canaje ojaya esohui huohuiya. E'e de, eya ojaya esohui huohuijji poanaje, esohui quea pame nee Jesusa Quitojo ehuhuijji Jodio pojjeama cuana huasijje. Jamajjeya oya cuana ba meeje ache pame nee nee Eyacuiñajjiya ejjashahuabaquiji onajo. E'e, jjeya oya cuana ba'e tiitii mee caje'yo eyajo Jesusaja epeeji poani jojoja.

⁹Eyacuiñajjiya eya huoojea canaje ojjaña ojaya ejjashahuabaquiji ba meesahuua, ma yahuajo ojjañaja ba jjima poa. Ecuea esohui shajja'ajja majje ojjaña ba caje jama ba'a: Ojjaña Jesusaja epeeji ojee ba'e tiitii mee caje'yo eyajo onijje e'e jojo nei jjapeequianajo, Jodio cuana, Jodio pojjeama cuana pea'ai. E'e, Eyacuiñajji quea ca'a nee nee. Oja pana'yo ojjaña, de. Yahuajo nei oya jjashahuabaquia poa ojjaña jaahuanajji. Jamatii ecuanajaya etiiqiana maya ejjashahuabaquiji ba mee jjima poa Eyacuiñajjiya. ¹⁰E'e, Eyacuiñajjiya eya huoojea canaje ojaya ejjashahuabaquiji huohuiya. Jamajjeya ojjaña esohuidojoji mese cuaa, ojjaña pea cuana eyajo nequiya cahuohui cahua jama ba'a: —¡Bacue oe! Eyacuiñajji jjashahuabaquiani quea pame nee, quea ja'a nee nee. E'e, ohuaya ojjaña ojaya epeeji cuana onijje nequi tiitii mee cani eyajo —ojjanaa ca'a cahua.

¹¹Jamaya Eyacuiñajji jjashahuabaquia poa yahuajo nei nei, jiquio meshi pana jjimahuajo. Ojaya ejjashahuabaquiji quea ja'a nee jayoija jama poanaje Jesosa Quito, esejaya Emeshi Mese nei. ¹²Jamajjeya jjeya eseya mimiye'yo Eyacuiñajji nijje mete'ama Jesosa Quitoja epeeji po majje. ¹³Jamajjeya eyaya miqianaya huohuiaña jama ba'a: —Miqiana huasijje Jesusaja esohui huohuiañajo, pea cuaa eya jeanobiajea canaje eya miqiana huasijje esohui ehuhui poaje jjejojo. Jamatii ja'a quea yeno pojji! Quea camaja ejeanobia ejaajji, de. Jamatii ecuea esohuijo miqianaya Jesusaja epeeji poanaje.

Jesosa Quitohua eseya quea jea nee nee acani

¹⁴Jamajjeya miqianaya, Jodio pojjeama Jesusaja huapa pojjeama poanajo, eya Eyacuiñajji nijje mimiani miqianajo. E'e, Eyacuiñajji esejaya Chii ai quea pame nee nijje eya mimiani jama ba'a: —Eyacuiñajji, miya quea pame nee nee —eya poani.

¹⁵E'e, Eyacuiñajjiya pana ca poa ojjaña. Jesusaja epeeji jjeya eyajo nequi, ojjaña ojaya epeeji jiquiojo nequi pea'ai Eyacuiñajjiya bacua cuana poani. Etiiqiana ojaya epeeji cuana pea'ai Eyacuiñajjiya bacua cuana poa. ¹⁶Jamajjeya eya onijje jama mimiani miqianajo ba'a: —Eyacuiñajji, miya quea pame nee yani tii tii quea ca'a nee nee. Miyaya Edojjoshahua Pame huoojeanaje miquea epeeji cuana Epesojo ba'e yasijje quea ca'a po meeya. ¡Edojjoshahua Pameya miquea epeeji cuana caba'e meesahua cahua quea ja'a nee miquea esohui jayoija jama! ¹⁷E'e Eyacuiñajji, miquea epeeji cuaa huohui cani jama ba'a: “Jesosa nijje ecuaña jjapee tiitiiqiani”. Jamajjeya joya cuana Jesosa Quitoja ejjashahuabaqui'yojji jayoija jama jjashahuabaqui meesahuacue quea ja'a nee! ¡Jamaya acue Eyacuiñajji, miya quea ca'a nee poanajo! E'e, miquea ejjashahuabaquiji jama ba'a: “Ecuea epeeji cuana quea jea nee poani. Eyaya oya cuana quea ja'a nee ba'e meesahuaje ecuea ejjashahuabaquiji quea ja'a nee jayoija jama”. E'e Eyacuiñajji, quea jea nee nee miquea epeeji cuana. ¡Maya miyaya oya cuana ba meesahuacue! Jamajjeya oya cuana mijo jama poani ba'a: “Eyacuiñajjiya ecuaña quea jea nee nee poani. Ecuaña jaahuana cani quea

pame nee nee" oya cuana poani. ¹⁸ E'e Eyacuiñajji, jjamajjeya miquea epeeji cuana Epesojo ba'e, ojjaña miquea pea epeeji cuana pea'ai ba meesahuacue miquea ejjashahuabaquijji quea pame nee nee onajo poani! Jamaya miyaya ojjaña quea jea nee nee añ. ¹⁹ E'e, oya cuana Jesosa Quitoja quea jea nee nee poanaje. Ojaya epeeji cuana po meesahua ca'yonaje. ¡Jamaya oya cuana ba meesahuacue, Eyacuiñajji! Quea jea nee nee miquea ojjaña. Ecuana ya ba meeme ajja. Jamatii jjashahuabaqui meeme ajja. E'e Eyacuiñajji, ¡miquea epeeji cuana ba meesahuacue miquea ejjashahuabaquijji quea ja'a nee onajo pea'ai! Quea huiso nee, de. Jamajjeya joya ecua miyaya huohuiaña jamaya acaje'yo cuaa quea pame nee. Onajaya ejjashahuabaquijji miquea jayojja jama poaje'yo.

²⁰ —E'e Eyacuiñajji, ecuaaya miya bihuiaña. Miya quea ca'a nee nee oe nei poani quea pame nee nee. Jamajjeya miquea ejjashahuabaquijji quea ja'a nee nee ecuanajo añ, miyaya. E'e, quea pame nee nee ecuaa jaahuanaña, miyaya. Quea pame nee nee miyaya añ, Eyacuiñajji. E'e, ecuaa jjapeequi meesahuaña minijje miya quea ca'a nee nee poanijo. Jamaya apoa —jamaya eya mimiani Eyacuiñajji nijje miquianajo.

²¹ Jamajjeya jesevaya ojjaña Jesosaja epeeji cuaa Eyacuiñajji ejjabihuia tiitiqui'yo! Oya quea pame nee nee.

¡Ojee ejjachacoqui ojjaña quea bhui ba'yaniya!

4 E'e, eyaya, Pabohua Emeshi Mese neija esohui huohuiañajo, pea cuaa eya jeanobiajea canaje eya esohui ehuhui poaje jjejojo. Jamajjeya jecuea esohui shajja'ajjacue! Jjeya miquianajaya eba Eyacuiñajji ejjashahuabaquijji miquianajo; ohuaya miquianaya babaca canaje onijje quea ja'a nee nee ejjapeequijji. Jamajjeya jama ya ba'ecue ojaya epeeji nei! ² ¡Jesosaja epeeji cuana quea bei pocue! ¡A'a quea mase pojji pea cuana nijje! ¡A'a tecueacuajijji! Minijje quea mimishi poajo, jmatii oya cuana quea jea nee acue! ³ E'e, Edojjoshahua Pameya Jesosaja epeeji cuana ojee jjapeequi meesahua cani quea bei. Jamajjeya ¡miquianaaya ojjaña jamaya atiitiecue pea'ai! ⁴ ¡Bacue! Ojjaña eseya Jesosaja epeeji cuana Jesosaja eyami jayojja jama poani, oe eyami jayojja poani. ¡Bacue! Edojjoshahua Pame oe nei esejo yani, ojjaña Jesosaja epeeji cuanajo. Eyacuiñajji eseya babaca cajje ojaya oe nei ejjashahuabaquijji ojjañajo jjashahuabaqui mee canaje jama ba'a: —Ecuea epeeji cuana ba'e tiitii meeje'yo Jesosa nijje eyajo —poanaje.

⁵ Eseyaya Emeshi Mese nei oe nei yani. Jesosaja esohui e'e nei nei oe nei yani, pea chama'. Onaaya eseya besa mee canaje enajo ojjañaja ebajji eseya Jesosa Quito oe nei nijje jjapeequiani. ⁶ Oe Eyacuiñajji yani tii tii; pea chama'. Oya oe nei ojjañaja Chii ai. Oya ca ca oe ojjaña huoojeajji. Ojjaña ameesahua cani de, ojjaña nijje nequi pea'ai. Jamajjeya ¡Jesosaja epeeji cuana nijjeya oe quea bei nee jjapeequicue miquianaya!

⁷ E'e. Jamajjeya Eyacuiñajjiya ojjaña Jesosaja epeeji cuana chaco meesahua cani onijje. Oe epeeji chaco meesahua cani iye huiso; pea chaco meesahua cani

quea huiso, esohui huohuijji pojja'a, pea echacojjijo pojja'a. ⁸ Jamajjeya Eyacuiñajjiya yahuajo nei jama tehueme aca poa Jesosajo ba'a:

“Eyahuasijje sohuaqui'yo majje ohuaya quea huiso dejja cuana onijje jjapeequi meesahua caje'yo. Ohuaya ojaya epeeji cuana onijje chaco meesahua caje pea'ai”.

Jamaya tehue mee ca poa yahuajo nei nei Jesosa Quitojo.

⁹ ¿Yajjajje acuae yahuajo nei tehue ca poa? Jama ba'a: “Eyahuasijje sohuaqui'yonaje”. Jama poanijo ba'a: Ebionei Jesosa eyajo ani meshi yasijje poeyanaje.

¹⁰ Meshi yasijje poe majje eyahuasijje poqui o'oyanaje. Jomajo oya quea ca'a nee nee nequi tiitijje'yo, ojjaña huoojea'yojji epojji tii tii, Emeshi Mese nei epo'yojji.

¹¹ Jesosaa ojaya epeeji cuana onijje chaco meesahua cani jama ba'a: Beca cuana ohuaya huoojea canaje ojaya esohui huohuiya. Beca cuana huohui meesahua cani ma ohua quijje acaje'yo. Pea cuana huohui meesahua cani ojaya esohui quea ja'a nee nee. Pea cuana ca ojaya epeeji jaahuanajji po mee cani. Pea ca esohui huohuijji po meesahua cani ojaya epeeji cuana quea huiso ojaya esohui eba meesahuajji. ¹² Jamaya Jesosaa ameesahua cani ojjaña ojaya echacojji quea pame nee epojji. Jamajjeya ojjaña ojaya epeeji cuana quea ja'a nee nee eba'e poquijji.

¹³ Jamajjeya eseya Eyacuiñajjiya Bacua Jesosaja epeeji cuana ojee jjapeequije ojaya esohui jayojja jama. Ojjaña eseyaya oya ba neineije'yo pea'ai. Jamaya eseya ojaya epeeji cuana quea ja'a nee poaje. O jayojja jjashahuabaquime poaje, epeeji etii jayojja poaje. ¹⁴ Jjeya nei jjapeequiani jayojja jama pojjeama eseya poaje. E'e, jiquio ecua beniya enashajo dojo cani pea mijijje jayojja jama esohui huohuijji nisho cuaa joya jjeya nei Jesosa nijje jjapeequiani dasia majje poquiquehua mee cani. Oya cuana jjashahuaba majamajaquiani ese dasiajji. ¹⁵ Eseyaya ca ca pea cuana quea jea poanijo esohui e'e jojo nei huohuiaña Jesosa, eseyaya Emeshi Mese nei jayojja jjashahuabaquime epojji. ¹⁶ ¡Bacue! Dejja eyami: eme', equise, ojjaña ojaya ejjashahuabaquijji jayojja jama ojee quea pame poanijo quea ja'a nee nequi dejja. Jiquio ecua dejja eyami jayojja jama Jesosaja epeeji cuaa ojee chaco cani quea pame nee, Jesosaja ejjashahuabaquijji jama. E'e, ohuaya ojjaña ojaya epeeji huoojeajji poaniya ojee chaco mee cani onijje. ¡Jamajjeya ojjaña quea jea nee acue cuana! ¡Onaya jjapeequi meesahuacue!

Pea ba'e'yome epojji Jesosa Quito nijje

¹⁷ Eya, Pabo Jesosaa huoojea ca'yonaje miquiana huasijje esohui huohuiya. Jamajjeya jecuea esohui shajja'ajjacue! ¡Jesosaja epeeji pojjeama cuana quea mimishi jama a'a pojji! Ojaya ejjashahuabaquijji cuana cajaa. ¹⁸ E'e, oya cuana quea mimishi jjashahuabaquiani. Pea eba'ejjijo jjabahuejjaqui ajja. Jjapeequi ajja Jesosa nijje. Shajjama' de, mimishi quea boti nee ojaya.

¹⁹ Mimishi cuanajo bicho'ama. Quea tai nee nee atiitii cani. Quea mimishi tii tii po sa neinei poani, de. ²⁰ Mi-

qui anaaya ca ca Jesusaja esohui shajja'ajjanaje. Jamajjeya ¡ba'ecue quea pame nee! ²¹ ¿A'a miquianaaya Jesusaja esohui shajja'ajjanaje? E'e. ¿A'a jjabahuejjaquinaje? E'e. Ojaya esohui ca ca oe e'e jojo nei poani. ²² Jama poanaje ba'a:

—¡Ma mi ba'ya poa quea tai Jesusa Quito ba jji-mahuajo pajea neinei'yocue! ¡Cajaa acue! Quea mimishi jjashahuaba tiitiiqui aninajejo beshahua nei miya poquinaje cuaqui yasijje. ²³ ¡Eyacuiñajjiya miquianaya quea pame nee cajjashahuabaqui mee cahua Jesusaja ejjashahuabaquijji! ²⁴ Eyacuiñajjiya miquianaya ba'e mee caje o jayojja. Jamaya e'e jojo nei quea pame nee eba'ejji. Jamajjeya ¡ba'ecue Eyacuiñajjiya ejjashahuabaquijji jayojja jama!

²⁵ Eseyá Jesusa nijje jjapeequi majje huapa pojjeama cuana poani. Jamajjeya ¡a'a onaya sijje aiji! ¡Ojjaña Jesusaja epeeji cuana nijje e'e nei mimicue! ²⁶ ¡Miquianaya onaja mimishijo a'a quea quene po tiitiijji! ¡Jeyahua nei oe quea bei nee po o'oyacue! ²⁷ Quea quene po tiitianijjo, Edosiquiaa miquianaya dasia ca chana'. Quea mimishi, quea mimijjequijjea po mee ca o'oya chana', de. ²⁸ Jamajjeya miya siipojji ¡sii popajea'yocue! ¡Quea pame oe chaco neineicue! Jamaya eba'ejji quea pame poaje miquea quea huiso, aema' ba'e meesahuajji pea'ai.

²⁹ ¡A'a quea mimishi mimijji pea'ai! ¡Esohui quea pame nee mimi tiitiicue pea cuana jjapeequi meesahuajji! Jamajjeya pea cuana miquea esohui shajja'ajja majje quea pame poaje. ³⁰ Cuanaya Jesusaja epeeji quea mimishi po o'oyajo, Edojjoshahua Pame quea yeno poani. ¡A'a oya quea yeno po meeji! E'e, Eyacuiñajjiya ese quea boejea po mee'yo majje Edojjoshahua Pame huoojea canaje ese nijje nequiya. Jamajjeya Jesusa Quito poe o'oyajo Edojjoshahua Pameya huohui caje esjo jama ba'a: —Oya cuana Jesusaja epeeji nei —poaje.

³¹ Jamajjeya ¡a'a mimijajji! ¡A'a quea quene pojji! ¡A'a quea tecue pojji! ¡A'a jjaniñebaquijji! ¡A'a jjamicuiajea nobiajeaquijji pea'ai! Chojja, ¡ojjaña mimishi cuana pajea neinei'yocue! ³² ¡Pea cuana oe ba'e sahuacue quea pame nee! ¡Quea jea nee acue! Pea cuaa miya niñeba canijo, napa canijo pea'ai ¡onijje quea bei pocue! E'e, Jesusa Quito miquea mimishijo mano'yajo, Eyacuiñajjiya miquea mimishi cuana cuijea ca'yonaje, quea quene po tiitii ajja mimishijo. ¡Jamaya acue miquianaaya, ojjaña!

Jesusaja epeeji, ¡ojaya esohui jayojja jama acue!

5 Eyacuiñajjiya miquianaya quea jea nee acani, oja bacua cuana. Jamajjeya ¡o jayojja jama pocue miquiana ojaya epeeji cuana poanijo! ² Jesusa Quito ese cuanajo mano'yonaje oya quea ese jea nee poanijo. Eyacuiñajji quea bihui nee poanaje oja Bacua Eja esejo mano'yajo. E'e, yahuajo nei Jodio cuaa huichacha quea shiye nee nee ba'esohuaqui mee ca poa Eyacuiñajji bihuijji. Ma jayojjaya Jesusa mano'yonaje esejaya mimishijo. Jamajjeya ¡pea cuana quea jea nee acue miquianaaya, Jesusa Quitohua jayojja jama acue! ³ Jamajjeya miquianaya ojaya epeeji poanijo ¡Jesusa jama po-

cue! ¡A'a quea mimishi jjashahuabaquijji! ¡Mimishijo oe a'a mimijji pea'ai! ¡Quea mimishi a'a pojji! E'e, ¡a'a sha-cuima' nequi, ahuema'ani pea'ai, onajaya yahue, ehuanase pea'ai a'a siijji! ¡A'a quea dejja tai pojji! ¡A'a quea nishehui pojji pea'ai! ⁴ ¡Esohui quea tai a'a mimijji pea'ai! ¡Shajjama' jayojja a'a mimijji! ¡Quea mimishi, quea mimijjequijjea a'a mimijji! Jamaya quea tai. ¡Quea bihui nee ca ca Eyacuiñajji nijje mimicue! ⁵ ¡Bacue oe! Pea cojjojji, dejja quea tai pea'ai, quea aquiana nahuejo epana'yo bihuijji jayojja poani pea'ai eyahuasijje edobiquijji pojjeama. Jesusa Quito nijje, Eyacuiñajji nijje pea'ai eba'ejji pojjeama eyajo, Jesusa ojjaña huoojeajji poanijo. Chama' dejja mimishija eba'ejji yajji eyajo. ⁶ Sijjepojji cuaa miya ba'e mee ca chana' quea mimishi. ¡Oya cuana a'a shajja'ajjajji! Mimishi acanijo, shajjama' poanijo pea'ai Eyacuiñajjiya quea nee tii tii po mee caje'yo e'e jojo nei. ⁷ Jamajjeya ¡a'a mimishi cuana nijje jjapeequijji!

⁸ Yahuajo miquianaya quea mimishi ba'ya poa pea'ai. Jjeya ca ca miya Jesusaja epeeji cuana poanijo ejiojji quea ja'ajje onijje poquiani. Jamajjeya ¡Jesusaja esohui jayojja jama quea ja'a nee acue! ⁹ E'e, Jesusa nijje jjapeequianijjo ojjaña quea pame nee eseyaya aña. Jjashahuabaquiani quea ja'a nee pea'ai. Esohui e'e nei jayojja jama ba'yani pea'ai. ¹⁰ Quea pame nee eseyaya aña, Eyacuiñajji quea bihui nee poani. Jamajjeya ¡jjashahuabaquicue Eyacuiñajji quea bihui nee epo meeji! ¹¹ Jamajjeya shajjama' cuana quea mimishi poanijo, ¡onijje a'a quea mimishi pojji! ¡Oya cuana tecueacue jama ba'a: —Jamaya quea tai. ¡A'a quea mimishi pojji! —acue!

¹² Ohuaya quehuajje mimishi quea tai nee nee acani. ¡A'a mimishi cuanajo mimimimijji! ¡Cajaa acue! ¹³ Jesusa shajjama' cuana jjabahuejjaqui meesahua cani; jama poani ba'a: —Coma ca quea tai; ¡a'a jamaya pojji! ¡Quea pame nee acue!

¹⁴ Jiquio ecua cuaquijjiya mecajje ojjaña jeaja'a cani jayojja jama Jesusa Quitohua shajjama' cuana mimishi pajea mee'yo majje quea ja'a ba'e meesahua cani. Jamajjeya yahuajo nei nei jama sohuicuayame poa cuana ba'a:

“Shajjama' cuana, ¡jjashajja'ajjaquicue! ¡Eshahua nijje popajea'yocue! Quitohua miya quea ja'a nee ba'e meesahua caje'yo”.

Jamaya aca poa yahuajo nei nei.

¹⁵ Jamajjeya ¡jjashahuaba neineiquicue quea ja'a nee eba'ejji! ¡Shajjama' cuana jayojja jama a'a ba'ejji! ¡Jesusaja esohui jayojja jama ba'ecue! ¹⁶ E'e, ¡jjeya janobajjima nei chacochocho tiitiicue quea ja'a nee Jesusa Quitojo! Jjeya aje oe quea camaja, quea huiso cuana quea mimishi poani. ¹⁷ Jamajjeya ¡a'a shajjama' pojji! Eyacuiñajjiya miya sa cani ojaya echacojji epojji. Jamajjeya oya huohui'ajjacue jama ba'a: —Eyacuiñajji, ¿a'ya cuae eya miyaya chaco meeje so'o?

¹⁸ ¡A'a jja oe huoojji! Chojja, ishi'ishianijjo miquianaya quea tai nee poaje'yo. ¡Edojjoshahua Pameja esohui miquiana nijje jama acue! ¹⁹ ¡Jamaya esohui quea pa-

me nee Eyacuiñajjiyo mimicue! Jama acue ba'a:
—Cua'a. ¡Eyacuiñajji nijje esohuicuaya!

E'e, Edojjoshahua Pameya sohuicuaya mee caniya ¡quea bihui nee Eyacuiñajji bihuiacue sohuicuayanijo!
²⁰ Cuanaya Jesosa Quito esejaya Emeshi Mese nei poanijo, ¡Eyacuiñajji, esejaya Chii ai bihuiacue jama ba'a:
—E'e Eyacuiñajji, jamaya. Miyaya quea pame nee atii-tiaña —acue!

Ehuohuiji yahue cuana huasijje, ehuanase cuana huasijje pea'ai

²¹ ¡Jiquio pea esohui bacue! Jama ba'a: Jesosa Quitoja esohui shajja'ajjajji poanijo ¡ba'ecue quea bei nee miquea huapa pojjeama cuana nijje!

²² Ehuanase cuana, ¡shajja'ajjacue mo! Miquiana Jesosaja epeeji poanijo ¡miquea yahue shajja'ajjacue oe!
²³ E'e, Jesosa Quito Emeshi Mese nei oe nei poanijo, ojaya esohui shajja'ajja cani ojaya epeeji cuaa. Jamaya miquea yahue mi huooejajji poani pea'ai. ¡Oya shajja'ajjacue! Cuanaya Jesusaa ojaya epeeji cuana jaahuana cani quea pame nee. Jesusaa jayojjaya yahue cuaa ehuanase cajaanahua cahua pea'ai. ²⁴ Jesosa Quitoja epeeji e'e jojo nei cuaa ojaya esohui jayojja jama atitii cani. Jamaya ehuanase cuaa, ¡miquea yahue shajja'ajja tiitacue!

²⁵ Yahue cuana, ¡shajja'ajjacue mo pea'ai! Jesosa Quito ojaya epeeji cuana quea jea nee poanijo mano'yonaje onaja mimishi cuijea'yojji. Jamaya yahue cuaa, ¡miquea ehuanase quea jea nee acue! ¡Quea ja'a nee jaahuanacue! ²⁶ E'e, Jesosa Quito ojaya epeeji cuana mimishi cuijea'yo majje Eyacuiñajji nijje miminaje jama ba'a: —Jiquio cuaa ecuea esohui shajja'ajja canaje. Peaa oya cuana besa mee canaje mijo pea'ai —poanaje.

²⁷ Jamaya poanaje Jesosa, ojaya epeeji e'e jojo nei cuana quea pame nee nee epo meeji ba'a: mimishi'ama, quea tai pojjeama, quea ja'a nee nee epo meeji.
²⁸ Jamajoya yahue cuaa, ¡miquea ehuanase ba'e meesahuacue! E'e, miya quea pame ba'e sa poanijo ¡miquea ehuanase ba'e meesahuacue quea pame! Ehuanase ba'e meesahuacue miya quea pame ba'eje pea'ai. ²⁹ E'e, dejja cuana quea nee nee nequi sa po ajja. Chojja. Bobi, daqui pea'ai sa'ajja cani quea pame eba'eji. Quiajjaya Jesusaa jaahuana cani ojaya epeeji cuana. ³⁰ Jamaya oya poani eseya ojaya eyami jayojja nei nei poanijo. ³¹ Jamajjeya Eyacuiñajji esohui yahuajo nei etehue'yo jama poa ba'a:

“Joya. Yahue ojaya ehuanase nijje ba'yanijo oya cuana oe nei poani, beca pojjeama. Jamaya oya cuana ba cani Eyacuiñajjiya. Jamajjeya yahueya ojaya ehuanase oe nei cajaanahua cahua quea pame nee. Quea jea nee nee ca'a cahua; oja chii, oja enaese quea jea pishana ca'a cahua”.

Jamaya yahuajo nei Eyacuiñajjiya tehue mee ca poa.

³² Eyacuiñajji esohui quea pame nee nee yani Quitojo, ojaya epeeji cuanajo pea'ai jama ba'a: Jesosa Quito ojaya epeeji cuana nijje oe nei jayojja poani, quea huiso pojjeama, oya jayojja jjashahuabaquime

poani pea'ai. Jamaya Eyacuiñajjiya oya cuana ba cani oe nei jayojja. ³³ Oya jayojjaya yahueya, miya quea pame nee ba'e sa poanijo ¡miquea ehuanase quea jea nee nee acue! ¡Ba'e meesahuacue quea pame nee! Ehuanaseya, ¡miquea yahue shajja'ajjacue oe!

Ehuohuiji esho'i cuana huasijje echii mese cuana huasijje pea'ai

6 Esho'i cuana, miya Emeshi Mese neija, Jesusaja epeeji poanijo ¡shajja'ajjacue mique chii, miquea enaese pea'ai! Jamaya quea pame. E'e, Eyacuiñajjiya jama aca poa ba'a:

² “¡Mique chiiya, miquea enaeseya pea'ai huohui cani jayojja jama acue! ³ Jamajjeya eyaya miquianaya ba'e meeje quea bihui nee, quea pame nee. Quea huiso shequiaja ba'e meeje”.

Jamaya Eyacuiñajjiya huohui ca poa.

⁴ Echii meseya, enaeseya pea'ai, ¡miquea ebacua cuana jaahuanacue quea pame nee! ¡A'a onijje quea tecue nee pojji! ¡A'a quea quene nee po meeji! ¡Oya cuana huohuicue Emeshi Mese neija, Jesusaja esohui! ¡Miquea esohui shajja'ajja meecue!

Ehuohuiji echacoji cuana huasijje echaco meeji cuana huasijje pea'ai

⁵ Echacoji cuana, ¡miquea echacomeejji esohui jayojja jama pocue! ¡Chacocue quea pame nee ojaya! Jamajjeya Jesosa miquianajo quea bihui nee poaje. ⁶ Miya chacochoani quea pame nee miquea echaco meejiya ba canijo o quea bihui po meeji. ¡Ojaya ba jji-majo a'a quea huea pojji! ¡Chacocue quea pame nee Jesosa Quitohua miya ba canijo! Jesosa miquea echacomeejji poani. ⁷ E'e, ¡miquea echacomeejji chacoquea quea bihui nee! Pea cuanaja yajjiyo quea pame chacochoanijo Jesosa quea bihui nee po mee añña miyaya. ⁸ E'e, ¡jiquio esohui shajja'ajjacue! Beca cuaa chaco cani ojaya echacomeejjiyo. Pea cuanaja echacomeejji chama'. Quea pame nee chacochoanijo Emeshi Mese neiya, Jesusaa ojjaña sosequia caje'yo quijje eyajo.

⁹ Echacomeejji cuaa, ¡sosequiacue miquea echacoji cuana ma ona chacochoanaje soseje! ¡A'a quea mete po meeji! ¡A'a tecuea neinejji! Echaco meejiya Emeshi Mese nei yani eyajo. Echacojiya Emeshi Mese nei yani eyajo pea'ai, Jesosa bajjani. Eyacuiñajji mijo jjashahuabaquiani jayojja jama ojjaña cuanajo jjashahuabaquiani pea'ai. Quea pame nee chacochoanajo, ojjaña sosequia caje'yo quijje eyajo, echacoji, echacomeejji pea'ai.

Eyacuiñajjiya eseya quea ca'a nee po mee cani

¹⁰ ¡Pea esohui shajja'ajjacue! ¡Jjapee neinequicue Jesosa nijje! Jamajjeya ohuaya miquianaya ojaya epeeji quea ca'a po mee caje'yo. Oya quea ca'a nee nee poanijo miquianaya quea ca'a po mee caje'yo pea'ai.

¹¹ Eyacuiñajji nijje mimicue pea'ai jama ba'a: —Eyacuiñajji, ¡eya miquea ejjashahuabaquijji jayojja jama amesahuacue quea ja'a nee!

Jamajjeya ohuaya miqianaya Edosiquiana nei, Sata-nasa bajjani jeabichajea mee caje'yo, ohua dasia sa acanijo. ¹² Pea cuaa quea mase cuaa ecuana Jesosa nij-je jjapeequi pajea mee'yo sa acani. Oya cuana dejja pojjeama, Edosiquiana, eshahua cuana pea'ai. Jjeya quea camaja eshahuaja epeeji cuanaa quea tai acanijo. E'e, eshahua cuaa huoojea cani ojaya epeeji cuana, ojjaña quea mimishi poani pea'ai ecuana dasiaa nisho, ecuana jeabichajea nisho pea'ai. ¹³ Jamajjeya ¡Eyacuiñajji nijje mimicue jama ba'a: —Eyacuiñajji, ¡eya mi-quea ejjashahuabaquijji cuana jayojja jama amee-sahuacue! —jamaya acue!

Jamajjeya eshahuaa jeabichajea sa acanijo, miqianaya quea ca'a poaje; eshahua jeabichajeaje'yo Eyacuiñajjiya miya asahua canijo. E'e, Eyacuiñajjiya miqianaya ojaya epeeji quea ca'a po mee caje'yo. ¹⁴ ¡Quea ja'a nee jjashahuabaquicue! ¡Esohui e'e nei ba neineicue! Jiquio ecua Shomano sohuinanohua ejjacomayijjiqijji yii cani ejjaquecuaquijji jama jayojja ¡esohui e'e nei ba neineicue quea ja'a nee epojji! Cuanaya sohuinanohua baa daqui quea moo ese'ojje huosho cani onaa equecua'yo poani jjejojo jama jayojja ¡quea ja'a nee, mimishi'ama ba'ecue eshahuaa napa cajje miya ejjadasia meequijji pojjeama! ¹⁵ Jiquio ecua ejiojji shejee, sapato, sohuinanohua huosho cani acuishajo mete'ama epojji jayojja jama ¡Eyacuiñajjiya esohui ba neineicue mete'ama esohui huohuijji! ¹⁶ ¡Eyacuiñajjiya esohui jayojja jama atitiicue pea'ai! Jiquio ecua sohuinanohua copocopo baa emejo huosho cani ejjaqueyaquijji, iña cani ejjaquecuaquijji, emeje edahua huo'ohuo'o icui nequiñajji jayojja jama ¡Eyacuiñajjiya esohui jayojja jama atitiicue Edosiquianaja miya edasiajji pojjeama! ¹⁷ Cuanaya jiquio ecua sohuinanohua ejaahuojja ca'a, baajee sapa iya cani jama onaja sapa jaja jjima yajji jayojja jama ¡esohui esapajo huacue miqianaya quea tai ejjashahuabaqui meeji pojjeama eshahuaja, Jesosaja epeeji nei poanijo! Jamaya pea'ai jiquio ecua sohuinanohua baa se beca iña cani pea jajajeabichajeajji jama jayojjaya ¡Eyacuiñajjiya esohui mimicue eshahua mimicuijjeanobiajeajji, Edoj-joshahua Pameya ameesahua canijo! ¹⁸ Jamajjeya ¡Eyacuiñajji nijje mimicue jama ba'a: —Eyacuiñajji, ¡eya mi-quea epeeji quea ca'a nee mo po meecue eshahua cuana, eshahuaja epeeji cuana pea'ai mimicuijjeano-

biajeajji! ¡Edojjoshahua Pame huoojeacue minijje emi-mi tiitii meesahuajji! —jamaya oe acue!

Jamajjeya ¡jjashahuaba neineiquicue quea ja'a nee! ¡A'a Jesosa nijje jjapeequi pajea'yojji! ¡Ojjaña Jesosaja epeeji cuanao mimi huicha'ahuicha'acue jama ba'a: —Eyacuiñajji, ¡ojjaña Jesosaja epeeji cuana jaahuana-cue! ¡Quea ja'a nee po meecue! —jamaya acue!

¹⁹ Jamajjeya Eyacuiñajji nijje mimicue ejo jama ba'a: —Eyacuiñajji, Pabo miquea esohui huohui canijo ¡huohui meesahuacue mete'ama! Oya huohui meesahuacue, Eyacuiñajji, jama ba'a: “Jesosaa Jodio pojjeama cuana ojaya epeeji po mee cani onijje eba'e tiitii'-yojji eyajo. Maya yahuajo onajaya ba jjima” —jamaya mimicue Eyacuiñajji nijje ejo.

²⁰ E'e, Eyacuiñajjiya eya huoojea canaje Jesosaja esohui huohuiya. Ma esohui quea pame nee huohuiañajo, dejja quea mase cuaa eya iña majje jeanobiajea canaje. Jamajjeya ¡Eyacuiñajji nijje mimicue ejo esohui quea pame nee Jesosajo mete'ama ehuhui meesahuajji!

Pabo mimiani Eyacuiñajji nijje ojjaña Epesojo ba'e jaahuanajji

²¹ ¡Pea esohui bacue! Dejja bajjani Tiquico yani ecua-na nijje. Oya ecuanaja quea jea nee nee, ecuea epeeji nei nei. Ohuaya ecuana Jesosaja esohui huohui sahua cani. Miquiana huasijje poqui majje ohuaya huohui ca-je ejo, ma eya aña jayojjaya huohui caje'yo pea'ai.

²² E'e, eyaya oya huoojeaña miqiana huasijje ecuanajo huohuiya. Oya shajja'ajja majje miqianaya yeno'ama poaje ecuanajo.

²³ Eya quea huiso mimiani Eyacuiñajji nijje miqianajo jama ba'a: —Eyacuiñajji, miya ecuanaja Chii ai. Jesosa Quito, miya ecuanaja Emeshi Mese nei. ¡Ojjaña mi-quea epeeji cuana Epesojo ba'e quea bei nee po meecue! ¡Oya cuana ojjaña miquea epeeji cuana quea jea nee po meesahuacue! ¡Oya cuana miquea esohui jayojja jama ba'e meesahuacue quea ja'a nee pea'ai! —jamaya eya poani.

²⁴ Jamajjeya esejaya Emeshi Mese nei Jesosa Quito quea jea tii tii poanijo, ¡Eyacuiñajjiya miqianaya ca-ba'e meesahua cahua!

Mahuiso ecuea esohui. Eyaya Pabo bajjaniya esohui tehuejeyonaje. Apoa.

PINIPESE

**Pabohua Shomajo ejeanobia aniya esohui tehue cani
Jesosaja epeeji cuana Pinipo cuiñajji ba'e yasijje**

1 Ecuana bajjani Pabo, Timoteo pea'ai. Ecuana
Jesosa Quitoja echacoji cuana ojaya yajji. Ecuana
ya esohui tehueña ojjaña miquiana huasijje, Eyacu-
ñajji epeeji cuana Pinipo cuiñajji ba'e yasijje, Eya-
cuiñajji esohui huohuiji cuana huasijje, o pejeje
ca'ajji yasijje pea'ai tehueña ecuaaya. ² Eyacuñajji
ecuanaja Chii ai. Jesosa Quito ecuanaja Emeshi Mese
nei. Ohuaya miquianaya cahaahua cahua quea pame
nee. Mimishi cuana cuijea'yo majje quea bei capo mee
ca'yahua pea'ai.

Pabo Eyacuñajji nijje mimiani Jesosa Quitoja epeeji

³ Miquianajo jjashahuabaqui'yo majje ecuanaja Eya-
cuiñajji bihuia tiitiaña. ⁴ Yahuaajo Jesosa Quitoja esohui
shajja'ajja jeahuajo miquianaaya eya esohui huohui
meesahua'yonaje, jjeja nei pea'ai. Jamajjeja eya Eya-
cuiñajji nijje miquianajo mimi tiitianajo quea bihui nee
poani. ⁶ Ecuana eba e'e jojo nei Eyacuñajjiya miquiana-
ya ojaya esohui jama ba'e meesahua coo ca'ya poa
yahuajo. Jesosa Quitoja epeeji quea ca'a pishana po
mee ca'yonaje. Jjeja quea ca'a nee pishana po mee
ca'yani. Quijje ca ca Jesosa Quito poe o'oyajo ohuaya
miquianaya quea ca'a nee nee ba'e tiitii mee caje'yo
eyajo onijje. ⁷ Eya miquianajo jjashahuaba tiitiquiani
miquiana quea jea nee neejojo. Jamaya quea pame.
E'e de, eyaya Jesosa Quitoja esohui janobajjima nei
huohuiañajo, miquiaaya eya huohui meesahanaje.
E'e, dejja cuanaja eya iña jjimahuajo, jeanobiajea cajo
pea'ai, miquianaaya aquiana eba'e meesahuajji huoo-
jeanaje e que. ⁸ Jesosa Quitohua miquianaya quea jea
nee acani, jamaya eyaya miquianaya aña. Jamajjeja
miquianaya eyaya baqui sa aña, de. Eyacuñajji eba
eya e'e jojo nei mimiani.

⁹ Eya mimiani Eyacuñajji nijje miquianajo jama ba'a:
—Eyacuñajji, Jesosa Quitoja epeeji cuana pea epeeji
cuana quea jea pishana acani. ¡Oya cuana pea cuana
quea jea nee nee amecue, miyaya! ¡Quea huiso mijo
ba meesahuacue pea'ai! ¡Quea jjashahuabaqui ja'a
nee po meecue pea'ai quea pame nee eba'eji, mimis-
hi'ama! ¹⁰ Jamajjeja Quitohua poe o'oya majje oya cua-
na etecueajji pojjeama. ¹¹ E'e Eyacuñajji, Jesosa Quito
onijje ba'yanajo, ohuaya ojaya epeeji cuana quea pa-
me nee ba'e meesahua cani mijo. Jesosaja epeeji cuana
quea pame nee acanajo, dejja cuana miya bihuia caje'yo.
Ojjaña ba caje miya, Eyacuñajji ca ca oe quea ca'a

nee nee, quea pame nee nee pea'ai poani —jamaya
eya, Pabo mimiani Eyacuñajji nijje miquianajo, Pinipo
meshijo ba'ejo.

Jesosa Quito ecue yami dojjojo nequi

¹² Ecuana epeeji cuana, ¡bacue jiquio esohui! Dejjja
cuana eya iña majje quea huesha dojo canaje jeano-
biaa. Quea camaja ejo poanaje. Jamatii, pea meshi
cuana huasijje pea dejja quea huiso cuana huasijje Je-
sosa Quitoja esohui huohui'yonaje eyaya. Jamaya
quea pame nee. ¹³ E'e, eya jiquiacua ye canaje cuana
emeshi meseja ejaquecuaquiji quea huiso huasijje,
pea cuana emeshi meseja equi quea quemojo ba'e ya-
sijje. Onaaya ba canaje eya eme' jeyo'yo nequi Jesosa
Quitoja esohui huohuijijojo onaja jeyo'yo. ¹⁴ Eya jiquio-
jo nequianajo, beshahua nei ojjaña Jesosa Quitoja
epeeji cuana onijje japee neineiiani e'e jojo nei. Jje-
ya ca ca onaaya janobajjima nei Eyacuñajji esohui
huohui cani mete'ama.

¹⁵ Jesosa Quitoja epeeji cuana, oe pojji cuana Jesosaja
esohui huohui cani ejo quea quene poaniya jjejojo. Jja-
mimicuaieja nobiajeaqui sa poani pea'ai. Beca cuana
ca, cho. Jesosa Quitojo mimiani quea bihui nee, quea
bei pea'ai. ¹⁶ Ohuaya Jesosa Quito, eya pea'ai quea jea
nee acanajo huohui cani. Onajaya eba Eyacuñajjiya eya
huoojea ca'yonaje Jesosa Quitoja esohui huohuiya. Ja-
nobajjima nei huohuiañajo, pea cuana ba caje Jesosa
Quitoja esohui e'e nei. Pea cuana enijje quea bei pojjea-
maa, Jesosa Quitoja esohui huohui cani quea tecue,
emaimajji jayojja. Ma dejja cuana aje oe pea cuana
eya pajea mee'yo sa acani, onijje japeequi mee'yo sa
acani. Eya ejeyo'yo nequijo quea camaja pishana.

Ohuaya eya quea camaja nee nee po mee sa acani.
¹⁸ E'e de, beca dejja cuana quea tecue nee huohui cani.
Pea cuana quea bei huohui cani. ¿Apiojji shai Jesosa
Quitojo huohui cani? Jamatii, Jesosa Quitojo huohui ca-
najo, eya quea bihui nee nee.

¹⁹ E'e, miquianaya ejo mimiani Eyacuñajji nijje; Jeso-
sa Quitohua, Edojjoshahua Pameya pea'ai eya quea
ca'a po mee cani quea pame nee. Jamajjeja quijje eya
quea pame nee ba'eje'yo. Jamaya ecue eba. Jamajje-
ya eya quea bihui nee po tiitije'yo.

²⁰ Eya jjashahuaba tiitiquiani Jesosa Quitojo echaco-
ji. Jesosa Quitojo chaco sa neinei poani quea pame nee
nee. Jamajjeja eya bicho'ama ecue eba'eji. E'e, jje-
yahua nei, quijje pea'ai eya eshe nequi ba'e sa poani
Quito nijje mete'ama nei. Eshe nequije pojja'a; quecua
caje'yo cuana pojja'a. Jamatii. Eya quea pame, mete'a-

ma ba'yanijo, pea cuaa Quito bihuia caje'yo. ²¹ Eya jjas-hahuabaquiani jama ba'a: —Eya eshe nequianijo, Jesosa Quito ecue eyamijo nequi. Quijje, mano'yo majje eya onijje ba'eje'yo eyajo quea pame nee nee. Jiquiojo ca ca quea pame pishana eya ba'yani. ²² E'e de, jiquio meshijo ba'yanijo eyaya Jesosa Quitoja esohui huohuije'yo pea cuana huasijje. ¿Achejo shai ba'e sa poani eya ijeya? Jiquiojo pojja'a. Eyajo Jesosa Quito nijje pojja'a. Cua'a de. ²³ Jjeyahua nei jiquio meshijo ba'e sa neinei poani eya. ¿Achejo shai? Eyajo Jesosa Quito nijje eba'ejji ca ca oe e'e jojo nei ecuea quea pame nee nee. ²⁴ Jamatii, eya jiquio meshijo ba'e tiitianijo, quea pame nee poaje miqianaya. ²⁵ E'e nei jamaya ecuea ejjas-hahuabaqui'yojji. E'e, eya ba'eje'yo jiquio meshijo. Jamaya ecuea eba. Eya miqiana nijje nequije Jesosa Quitoja epeeji quea ca'a nee epo meesahuajji, quea bihui nee Jesosa Quito ba meesahuajji pea'ai. Jamaya e'e jojo nei. ²⁶ Jamajjeya miqianaaya Jesosa Quito bihuiaje'yo e'e jojo nei enijje quijje e miqiana que poquiyajo.

²⁷ E'e, eya epoquijji pojjeama pojja'a miqiana baa; baquije pojja'a mi ba'ajjaa. ¡Jamatii! Esohui quea pame nee Jesosa Quitoja miqianajaya eba. Jamajjeya ¡jamaya ba'ecue quea ja'a nee! Jamajjeya eyaya shajja'ajjaje miqianaya Jesosa Quitoja epeeji cuana ojee quea ca'a nee ba'yani. Ojee janobajjima nei huohuiaña Eyacuiñajji esohui Jesosa Quitoja pea'ai. ²⁸ Dejja mimishi cuaa miqianaya napa cajo, ja'a oe quea mete pojji! Chojja, miya ca ca mete'ama tiitii anianijo, ma dejja mimishi cuaa ba caje jama ba'a: Quijje Eyacuiñajjiya oya cuana napa tiitii caje'yo cuaquijo. Oya cuana ba mee caje pea'ai miqianaya ca ca ba'e tiitii mee caje'yo eyajo, ohuaya. ²⁹ E'e, Eyacuiñajjiya miqianaya jjapeequi meesahua cani Jesosa Quito nijje. Pea cuana, cho. Jamaya pea'ai ba'a: Jesosa Quito nijje ba'yanijo, pea cuaa miqianaya napa caje. Jamaya Eyacuiñajjiya eba. E'e, ohuaya miqianaya nahue caje peaa napa cajo. ¡Jamatii quea bihui pocue! ³⁰ ¡Jjeya miqianaya, e jayojjaya janobajjima nei eshahuaaja epeeji cuana jeabichajeacue! E'e, jjeyahua nei eyaya jamaya Jesosa Quitoja huohuiaña tii. Jamaya miquea eba.

Jesosa Quito quea bei, quea ca'a nee nee pea'ai

2 ¿A'a Jesosa Quitohua miqianaya quea bihui nee po mee cani? Ohuaya quea jea nee nee acanijo, ¿a'a miqianaaya pea cuana quea jea nee nee añña pea'ai? ¿A'a Edojjoshahua Pame nijje jjapeequiani miqianaya? ¿A'a pea dejja cuana nijje miqianaya quea bei? ¿A'a pea dejja ba'e meesahuaña pea'ai? ¡E'e jojo nei jamaya oe pocue! ² Jamajjeya ¡miqianaaya iña oe che quea bihui nee nee po meecue, de! Ojjaña oe ojee jjas-hahuabaquicue Jesosa Quitoja ejjashahuabaquijji jayojjaya jama ba'a: ¡Ojee jjapeequicue quea bei nee! ¡Pea cuana quea jea nee acue miqianaaya! E'e, ¡ojee Jesosa Quitoja jjas-hahuabaquicue! ³ ¡A'a mimijajji pea quea bicho po meeji! ¡A'a jamaya pojji miqianaya! Chojja. ¡Pea cuana nijje quea bei nee nee pocue! Jjas-

hahuabaquicue jama ba'a: —Eya quea pame pishana; pea cuana quea pame nee.

⁴ Miquianaya quea pame nee ba'e sa poani. Jamaya quea pame. ¡Pea cuana a'a pajea'yojji! ¡Ba'e mee-sahuacue quea pame nee pea'ai! ⁵ ¡Jesosa Quitoja ej-jashahuabaquijji jayojja jama jjas-hahuaba tiitiicue! ⁶ Jama ba'a: Oya, Jesosa Quito Eyacuiñajji jayojjaya tii tii poa. Jamatii Eyacuiñajji jayojja pojjeama po'yo majje meshijo nequi yeno'ama Jesosa Quito poa. ⁷ E'e, Jesosa Quito nequi tiitii ajja poa eyajo, Eyacuiñajji jayojjaya jama pojjeama poa. Oya Eyacuiñajjiya yajji oja echa-cojji meshi yasijje poe sa poa. Jamajjeya eseya esho'i cuaya poa jama Jesosa Quito cuaya pohua, yamijji. ⁸ Oya ba'e'yonaje dejja cuana jayojja. Eyacuiñajjiya oya huoojea canaje dejja cuana jayojja mano'yequa epoiji. Jamajjeya oya dejja cuana jayojja jama quecua mee'yo-me acanaje cuaa. E'e nei acui ecueata'apeejo Jesosa Quito mano'yonaje dejja mimishi jayojja. ⁹ Jamajjeya Eyacuiñajjiya oya shequi mee ca o'oyanaje. Eyahuasijje dojosohuaqui ca'yonaje. Jesosa Quito oe nei ojjaña Emeshi Mese nei po mee ca'yonaje. ¹⁰ Jamajjeya quijje ojjaña eyajo ba'eya, dejja eshe cuana pea'aiya, ojjaña yahuajo emano'yo pea'aiya, ojjaña eshahua cuana pea'aiya Jesosa Quito bihuia caje'yo ecui'oshajjajo nequiya. ¹¹ Ojjaña cojja ba majje ojjaña huohui caje'yo Jesosa Quito e'e jojo nei Emeshi Mese oe nei quea ca'a nee nee po tiitiani. Jamajjeya Eyacuiñajji, Jesosa Quitoja Chii bihuia caje'yo, ojjaña nei neiya. Jamaya poaje'yo.

Jesosa Quitoja epeeji ejjijji jayojja

¹² Jamajjeya ecuea epeeji e'e jojo nei cuana, ¡shajja'ajjacue ecuea esohui! Yahuajo miqiana nijje nequiahua eya miqiaaya ecuea esohui shajja'ajjanaje. Jjeya eya quea huesha nee nequi. Miquiana nijje enequijji pojjeama. ¡Jamatii jiquio ecua eyaya huohuiaña jama atiitiecue! ¡A'a pajea'yojji! Eyacuiñajjiya miqianajaya mimishi cuijea ca'yonaje, jamajjeya ¡shajja'ajja tiitiecue oe ojaya esohui! ¡Miqianaya oe jjas-hahuabaquicue quea bei! ¹³ E'e de, Eyacuiñajjiya miqianaya ba'e meesahua cani ojaya ejjashahuabaquijji jayojja. Jamajjeya miqianaya ojaya esohui jama ba'e sa poani. Ohuaya miqianaya jjas-hahuabaqui meesahua cani quea bihui nee ojaya ejjashahuabaquijji jayojja.

¹⁴ Eyacuiñajjiyo chacochoani ja'a panajajji! ¡A'a jja oe jjamimicuaiea nobiajeaquijji! ¹⁵ Jamajjeya miqianaaya pea cuanaja etecueajji pojjeama. Eyacuiñajjiya eba-cua cuana quea pame nee miqianaya poaje. Es-hahuaja epeeji cuana ca ca quea tai nee nee, sijjepojji nee nee quea chipi nee nequi. E'e nei miqiana quea boejea ba'yanijo, majameta beca jijinequi jama poaje. Jamajjeya ojjaña dejja quea mimishi cuaa ba caje miqianaya Jesosa Quitoja epeeji e'e jojo nei. ¹⁶ E'e, miqiaaya ona huasijje Eyacuiñajjiya esohui huohuiaña Jesosa jayojja eba'ejji, yahuajo jama pojjeama eba'ejji huohuiaña. Miquianaya jamaya poanijo, eya quea bihui nee poaje'yo Jesosa Quito poe o'oyajo. Ma pojja-jo eyaya baje ecuea echaco, ecuea esohui pea'ai mi-

quianajaya pajea'yo jjima pojja'a. ¹⁷ Jamaya poaje pea'ai pojja'a ba'a: Yahuaajo nei nei Eyacuiñajji epeeji cuaa aquiana dahuaajea caninaje Eyacuiñajji bihuiajji. Aquiana Eyacuiñajji quea bihui nee epo meeji jayojja jama jjeja e'e pojja'a eya manaje'yo miqianaya Jesosa Quito nijje ejjapeequi meesahuajji. Jamajjeja Eyacuiñajji quea bihui nee poaje miqianajo. E'e de, eya pea'ai miqianajo quea bihui nee poani. ¹⁸ ¡Jamajjeja quea bihui nee pocue enijje!

Pabohua Timoteojo, Epamonitojo pea'ai huohui cani

¹⁹ Eyaya Timoteo huoojea sa aña miqiana que. E'e pojja'a Jesosaa, esejaya Emeshi Mese neiya eya Timoteo huoojea mee caje jjeyahua nei. Timoteohua miqiana ba majje eya huohui cahuaje e quea bihui pojji. ²⁰ E'e, ecuea ejjashahuabaquiji quea pame nee jayojja jama Timoteo oe nei jjashahuabaquiani miqianajo. Ohuaya miqianaya quea pame nee Jesosa Quito nijje ba'e meesahua sa neinei acani. ²¹ Pea dejja cuana ca ca oja aquianajo jjashahuaba tiitiquiani. Jesosa Quitoja echacojji jjashahuabaqui sa po ajja. ²² Timoteohua Eyacuiñajji esohui quea pame nee huohui canaje. Jamajjeja miqianajaya eba oya quea pame nee. Esho'yahua oja chii nijje chaco ca poa jayojja jama acanaje Timoteohua enijje; esohui Jesosa Quitoja huohui canaje, Timoteohua. ²³ Jamajjeja jjeyahua nei eyaya oya huoojea sa aña miqiana que. ¿Yajja shai dejja cuaa eya acaje'yo jiquiojo ba'ecaa? Maya shajja'ajja majje eyaya Timoteo huoojeacuajije miqiana que. ²⁴ Eya jjashahuabaquiani jama ba'a: Eseyaya Emeshi Mese neiya eya poqui meesahua caje miqiana que, Pinipojo ba'e yasijje quijje pishana pojja'a.

²⁵ Eya jjeja miqianajo jjashahuabaquiani. Jamajjeja eyaya Epamonito huoojeaje miqiana que. Oya ecue chahua jayojja Jesosa Quito nijje jjapeequianijo. Ohuaya Jesosa Quitoja esohui eya huohui meesahua canaje. Yahuaajo miqianaya oya huoojeanaje e que aquiana quiaa, e jaahuanaa pea'ai. ²⁶ Oya miqianaya ba o'oya sa poani, de. Miqianaaya shajja'ajjanaje oya quea mano nee nee poanaje. Miqianaya ojo quea yeno poso, oya quea yeno poanaje. ²⁷ E'e, oya quea mano poanaje. Beshahua nei mano'yonaje. Eyacuiñajji oya huaquia meesahua ca'yonaje, de. O emano'yo jojjemo eya quea yeno nee nee pome. Eyacuiñajji e quea yeno nee nee nequi mee sa po ajja. ²⁸ Jamajjeja jjeja eya o huoojea sa neinei poani miqiana que. O ba o'oya majje quea bihui nee miqianaya poaje. Miqianaya ojo quea bihui nee poanajo, eya pea'ai quea bihui nee poaje. ²⁹ Jamajjeja Jesosa Quito nijje jjapeequianijo Epamonito miqiana que poe o'oyajo, ¡onijje jama mimicue ba'a: —¡Mi poe'yajo eya quea bihui nee! —acue!

Quea pame nee poani Epamonito. Pea oya jayojja poanajo pea'ai ¡shajja'ajjacue! ³⁰ Oya Jesosa Quitojo chacochoanajo beshahua nei mano'yonaje. E'e, quea camaja nee nee, de. Jamatii ohuaya chaco tiitii canaje mete'ama nei. Miqianaaya e que poe ajja jjejojo Epamonito huoojeanaje e chacosahuaa.

Esohui e'e jojo nei quea pame nee

3 Ecuea epeeji nei cuana, jjeja eyaya pea esohui tehueje miqiana que. ¡Emeshi Mese neijo quea bihui nee pocue, miqianaya! Yahuaajo eyaya esohui miqiana que huohuinaje. Jjeja oyaya tehue o'oyaña quea bihui nee miqiana Jesosa Quitoja epeeji quea ca'a nee nee epo meeji. Jamajjeja pea cuaa miqiana-ya edasajji pojjeama. ² Jodio esohui huohuiji nisho cuana ja'a shajja'ajjaji! Oya edasajji cuana, iñaehua quea mase jja'ijjaquiani jama. Jesosa Quito nijje jjapeequi ajja. Miquea cuiishasha jee biso nei jehusejja-jea mee sa acani huohuime acani ca ohua. ³ Cuiishasha biso nei jehusejjajea mee majje maya dejja cuana jjapee nishoquiani Eyacuiñajji nijje. Eseyaya ca ca Eyacuiñajji epeeji e'e jojo nei. E'e, Edojjoshahua Pameya eseyaya Eyacuiñajji bihuia meesahua cani. Jamajjeja eseyaya quea bihui nee nee jjapeequiani Jesosa Quito nijje. Ohuaya, Jesosa Quitoja ca ca oe eseyaya mimishi'ama po mee caje'yo. ⁴ Pea dejjaa aje oe Jodio etiiquianaja esohui jama amajje jjashahuaba quehuaquiani jama ba'a: —Eya Eyacuiñajji epeeji quea pame nee.

Chojja de. Yahuaajo Jodio etiiquianaja esohui jama quea huiso eyaya a'yonaje. Ma esohui quea huiso nee nee yahuaajo jama amajje ¿a'a eya quea pame nee? Chojja. ⁵ Yahuaajo aje eyaya jama anaje ba'a: Jodio etiiquianaja esohui etehue'yo jama acanajo, eya me oeije pea beca peejjima cahuime, 8 cahuime etiijo, ecuea cuiishasha biso nei jehusejjajea ca'ya poa cuaa. Eya Isaeni dejja. Jamaya ecue chii poa. Ecuea etiiquiana Bejami bajjani. Jamajjeja eya Jodio nei Bejami cuana nijje. Jamajjeja eya Emeo esohui mimiani. Eya Jodio etiiquianaja esohui jayojja jama poanaje pea Jodio esohui huohuiji Paniseo bajjani cuana nijje. ⁶ Jodio etiiquianaja esohui cuana quea jea nee nee poa ecuea. Jamajjeja eyaya Jesosa Quitoja epeeji cuana janobajjima nei napanaje; etiiquianaja esohui a sa po ajjajojo napanaje. E'e, eyaya ma esohui cuana jayojja jama aneinei'yonaje yahuaajo. Jamajjeja Jodio dejja cuana enijje mimijaji jjima poa. ⁷ Jodioja esohui quea huiso shajja'ajja majje eya jjashahuaba taiquinaje jama ba'a: —Eya quea pame nee nee ba'e —poso jbaquinaje.

Jjeja ca ca Jesosa Quitoja esohui ya'yojji eyaya Jodioja esohui cajaa a'yonaje. ⁸ E'e, eya jjashahuabaquiani jama pea'ai ba'a: Ojjaña aquiana quea pame cuana oe pojji sosejje, sosema', shabo jama cajaa aña. Jesosa Quito ca ca aquiana quea sose huiso nee nee jayojja eyaya baña. Jamajjeja aje iña oe jama jjashahuabaquime poani ba'a: Jesosa Quito, ecuea Emeshi Mese nei nijje jjapeequianijo eya quea pame nee nee poani. Quea sose huiso nee nee eyaya Jesosa Quito baña. ⁹ E'e, Jesosa Quitoja epeeji poanajo, eya ohuaya onijje nequi tiitii mee caje'yo; quea boejea'yo nee nequi mee caje'yo. Jodioja esohui cuana jama amajje eya quea boejea'yo pojjeama. Eya Jesosa Quito nijje e'e jojo nei jjapeequianijo, ohuaya eya quea boejea po mee ca'yaní. E'e, Eyacuiñajjiya huohui cani: —Ojjaña Jesosa Quitoja epeeji cuana eyaya quea boejea'yo po mee yaña.

¹⁰ E'e, yahuajo Jesosa Quito ecuea eba pishana poanaje. Jjeya eya o ba neinei'yo sa poani. Eyacuiñajji quea ca'a nee poanijo ohuaya Jesosa Quito shequi mee ca o'oyanaje. Jamajoya eya o jayojjaya caba'e mee ca'-yahua. Ma ecua oya napa ca poa jama jayojjaya eya acaje'yo pea cuaa, Jesosa nijje jjapeequianijo mo cuia caje'yo cuaa pojja'a o jayojjaya. ¡Jamatii mo ca'a ca'-yahua! ¹¹ Jamajjeya jjeya eya jjashahuabaquiani jama ba'a: —Eyacuiñajjiya eya shequi mee caje o'oya. Jesosa Quito nijje ba'e tiitii mee caje'yo Jesosa Quito jayojjaya, quea boejea ba'eje'yo onijje tii.

Pabohua Jesosa Quitojo chaco tiitii cani

¹² Eya Jesosa Quito jayojja jama pojjeama. Oya quea pame nee nee, quea ca'a nee nee pea'ai. Eya quea ca'a pishana. Jjeya eyaya janobajjima nei chacoaña Jesosa Quitojo. Jamajjeya ohuaya eya ojaya epeeji quea ca'a po mee cani. E'e, Jesosa Quitohua eya jjeshe'yo majje onijje jjapee tiitii meequi ca'yani. ¹³ Ecuea epeeji cuana, ¡shajja'ajjacue! Ecuea ejjashahuabaquiji jama ba'a: Eya Jesosa Quitoja epeeji quea ca'a nee, quea pame nee nee pojjeama. Eya ca ca jamaya poani ba'a: Eya jjashahuabaqui tiitii ajja ecuea esohuijo ma eya yahuajo anajejo. Jjeya eya jjashahuabaquiani jama ba'a: Jesosa Quitohua eya chaco meesahua caje janobajjima nei ojo. Jamaya eyaya a sa neineiaña. ¹⁴ Eyaya janobajjima nei chaco tiitiaña Jesosa Quitojo. Jamajjeya quijje Eyacuiñajjiya ecuea echaco soseje sosequia caje'yo. Jamaya acaje Jesosa Quitohua eya eyahuasijje iyaa'yo majje onijje eba'e tiitii'yojji.

¹⁵ Jamajjeya eseya, Jesosa Quitoja epeeji quea ca'a cuana Jesosa Quitoja ejjashahuabaquiji jayojja jama jjashahuabaquiani tii tii. E'e pojja'a miquianaya jamaya po ajja. Eyacuiñajjiya miquianaya jjashahuabaqui mee caje'yo quea ja'a nee o jayojjaya. ¹⁶ E'e nei, eseyaya Eyacuiñajjiya esohui quea huiso ba huicha'a huicha'a-ña. Jamajjeya ¡ojaya esohui jayojja jama ejja'a tiitiiqui!

¹⁷ Ojjaña ecuea epeeji cuana, ¡e jayojja ba'ecue! ¡Pea dejja cuana babacacue; ma ecua eyaya miquiana nijje nequiya anaje jamaya ca'a cahua cuaa! ¡Onaya oe jamaya atiitiecue, miquianaaya! ¹⁸ Yahuajo eyaya miquianaya huohui majamajanaje pea dejja cuana quea mimishi nee nee poanijo. Jjeya quea yeno nee eyaya huohuije o'oya ma dejja cuanajo. Jesosa Quito acui ecueata'apeejo mano'yonaje. Oya cuana ca ca Jesosa Quitoja esohui jayojja jama po ajjajo o quecua'yojji epo jayojja poani. ¹⁹ Jamajjeya ma dejja cuana cuaqui yasijje poquije'yo. Ojaya aquiana huisojo jjashahuaba tiitiiquiani. Eyacuiñajjiyo jjashahuabaqui sa po'yo ajja. Oya cuana oja mimishijo bicho'ama, quea bihui nee poani. E'e, jjashahuaba tiitiiquiani quea tai. ²⁰ Eseyaya ca ca jamaya ba'e ajja; Jesosa Quito nijje eyajo ba'e tiitije'yo. Jesosa Quitohua eshahua eseya mesena pajea mee ca'yonaje. E'e de, esejaya Emeshi Mese nei Jesosa Quito poeje o'oya. O poe o'oyajji eseyaya ishoa'ajjaña quea bihui neeya. ²¹ Eseyaya eyami ca'a'ama. Jesosa Quitohua poe o'oya majje esejaya eyami quea ca'a nee nee panacuaji caje'yo ojaya eyami jayojja jama quea

ca'a nee nee epo'yojji tii tii. Jamaya po mee caje'yo ohuaya quea ca'a nee nee poanijo. E'e, quea ca'a nee poanijo ohuaya ojjaña huoojea tiitii cani. Ojjaña aquiana cuiña cani, Jesosa Quitohua.

Pea esohui cuana eba'ejji quea pamejo

4 Jamajjeya ecuea epeeji cuana, ¡jjapee tiitiiquicue quea ca'a nee! Miquianaya ecuea quea jea nee. Baqui o'oya sa neinei poani. Miquianajo eya quea bihui nee. Miquianaaya quea pame nee Jesosa Quitojo añajo maya ecuea esosequia'yojji jayojja. Jamajjeya ecuea etehue'yo jayojja jama poanijo, miquianaya esejaya Emeshi Mese neijo quea ca'a ba'eje. Eyaya miquianaya quea jea nee nee añe.

² Epona cuana Emonia bajjani, Sinitique pea'ai, ¡shajja'ajjacue mo, che! Emeshi Mese nei Jesosa nijje jjapeequianijo ¡a'a jjamicucijjea nobiajeaquiji! ³ Ecuea pea epeeji nei, ¡miyaya ma epona beca quea bei ba'e meesahuacue! Ohuaya yahuajo eya Eyacuiñajjiya esohui huohui meesahua neinei ca'yonaje. Dejja Cuemetete bajjaniya esohui huohui meesahua neinei ca'yonaje pea'ai. Quea huiso ecuea pea epeeji cuana esohui huohui meesahua ca'yonaje pea'ai. E'e, Eyacuiñajjiya ojaya esohui etehue'yojo eyajo oja bajjani cuana tehue ca'yonaje ona ba'e mee tiitii'yojji.

⁴ Miquianaya Jesosa nijje jjapeequianijo ¡quea bihui nee po tiitiecue! ¡E'e jojo nei quea bihui nee po tiitiecue! ⁵ ¡Quea bei nee pocue ojjaña cuana nijje! Jamajjeya ojjaña cuaa ba caje esejaya Emeshi Mese nei poeje jje-yahua nei pojja'a. ⁶ ¡A'a quea mete pojji! Chojja. ¡Mimicue Eyacuiñajji nijje! ¡Aquiana sa poanijo oya oe huohucue! ¡Eyacuiñajji bihuicue pea'ai! ⁷ Jamajoya Eyacuiñajjiya miquianaya quea bei nee nee po mee caje. Quea bei nee nee miquianaya poaje Jesosa Quitojo. Ojjaña dejja cuana jamaya jjashahuabaqui ajja. E'e, Jesosa Quito nijje jjapeequianijo, ohuaya miquianaya quea quijiji jaji nee po mee caje. Mete'ama jjashahuabaqui meeme acani pea'ai.

⁸ Epeeji cuana, jjeya pea esohui oe pojji eyaya miquianaya huohuije. ¡Esohui e'e jojo neijo jjashahuaba tiitiiquicue ojjaña Eyacuiñajjiya esohui quea pame nee jo pea'ai! ¡jjashahuabaquicue pea dejja cuanaja eba'ejji quea pame nee jo pea'ai! Ejjashahuabaquiji quea bei epo'yojji, quea bihui nee epo'yojji pea'aijo ¡jjashahuabaquicue! Echacojji quea pame nee nee jo, Eyacuiñajjiya dejja cuana quea bihui nee po mee canijo pea'ai ¡jjashahuaba tiitiiquicue! E'e, jamaya ojjañaja quea jea nee. ⁹ Ecuea esohui shajja'ajjanaje miquianaaya. Ecuea esohui etehue'yo banaje pea'ai. ¡Jamaya miquianaya po tiitiecue! Ecuea echaco quea pame banaje. ¡Jamaya miquianaaya atiitiecue pea'ai! Jamajjeya Eyacuiñajji minijje nequi tiitije; quea bei po mee caje.

Pabo ojaya epeeji Pinipojo ba'e cuana nijje quea bihui poani

¹⁰ Yahuajo nei miquianaaya aquiana eba'e meejji huoojeanaje e que, sosema'. Yahuajo pishana quiojjoja

miquianaaya pajea'yo jjiima aña. Jamatii aquiana huoojea jjiima poa. Jjeya eya ba'e sahua o'oyaña. Jamajjeya eya quea bihui nee nee esejaya Emeshi Mese nei nijje, Jesosa Quito nijje jjapeequiani. ¹¹ ¡A'a jjashahuabaquijji eya mimiani eya aema' poanijo! Eya jjashahuabaqui tiitii ajja aquiana eba'e meejjijo. Oe pojji aquiana ecuea poanijo, jamatii. ¹² E'e, aema' poanijo, jamatii. Eya quea bei. Ecuea aquiana quea huiso yanijo, jamatii eya quea bihui. E'e pojja'a ecuea eba'ejji quea camaja poaje o'oya. E'e pojja'a camaja'ama poaje. Jamatii. Eya mijje Eyacuiñajji nijje jama ba'a: —E'e Eyacuiñajji, ecuea eba'ejji quea pame.

E'e, quea jejjejo, quea shoe pea'ajjo, aema' poanijo, aquianajji pojja'a poanijo jamatii eya quea bihui. ¹³ Jamajjeya quea camaja poanijo jamatii eya quea bihui nee Jesosa Quitohua eya ba'e meesahua canijo. ¹⁴ E'e, ecuea eba'ejji quea camaja poanijo, miquianaaya eya ba'e meesahuanaje quea jea nee. Jamaya quea pame.

¹⁵ Yahuajo Eyacuiñajji esohui quea pame miquiana huasijje, Pinipojo ba'e yasijje huohui coo majje eya Masenonia meshijo nequi poquinaje. Ma pojjaajo, quijje pea'ai miquiaaya nei eya aquiana quianaje. Jesosaja epeeji cuana pea cuiñajji ba'eja aquiana quia'yo jjiima. Maya miquianajaya eba. ¹⁶ E'e, eya Tesanonicajo chachacoanijo eba'ejji quea camaja ecuea poanaje. Jamajjeya miquiaaya aquiana huoojea huicha'a huicha'anaje e que. ¹⁷ Miquianajaya aquiana ehoojeajji eya jjashahuabaqui ajja poanaje. Ecuea ejjashahuabaqui'yojji ca ca jiquio jama ba'a: Miquiaaya aquiana e que quia'yona je sosema'. Jamajjeya Eyacuiñajji miquianaya quea ja'a nee po mee caje. E'e, quijje pea'ai

quea huiso sosequia caje'yo ohuaya ma miquiaaya anaje soseje. ¹⁸ Miquiaaya Epamonito huoojeanaje e que aquiana quiaa. Jamajjeya jjeya quea huiso nee ecuea aquiana eba'ejji yani. Ba'eje eya quea pame nee. E'e, ma aquiana equia'yojji aquiana Eyacuiñajji yasijje ebihua'yojji jayojja, quea shiye nee nee jayojja, Eyacuiñajji quea bihui nee nee epo meeji. ¹⁹ Eseyaya Eyacuiñajji aquiana quea pame nee, quea huiso yani, de. Jamajjeya e'e jojo nei ohuaya miquianaya ba'e meesahua caje. Jamaya poaje ohuaya miquianaya Jesosa Quito nijje jjapeequianijo.

²⁰ Ojjaña Jesosaja epeeji cuaa Eyacuiñajji, esejaya Chii ai eyajo cabihua tiitii cahua jjeya nei, quijje pea'ai. Jamaya capohua.

Esohui quea bihui epo meeji

²¹ Ojjaña Jesosaja epeeji cuana quea bihui nee huohui'ajjacue jama ba'a: —¿Achajja acuae quiana so'o, de? —ecuanajaya ebajji.

Jesosaja epeeji cuaa enijje nequiya miquianaya huohui'ajja cani jama ba'a: —¿Achajja acuae quiana so'o de? —onajaya ebajji.

²² Jesosaja epeeji cuana emeshi mesejo chaco canijo, ojjaña cuana jiquio tiijo pea'aiya miquianaya huohui'ajja cani jama ba'a: —¿Achajja acuae quiana so'o, de? —onajaya ebajji.

²³ Eseyaya Emeshi Mese nei Jesosa Quito miquianajaya eyami dojjojo nequi. ¡Ohuaya miquianaya quea pame nee cahaahua cahua! Mahuiso ecuea esohui.

Eyaya Pabohua tehuejyonaje. Apoa.

CONOSENSE

Pabohua Shomajo ejeanobia aniya esohui tehue canaje Jesosaja epeeji cuana Conosa cuiñajjiyo ba'e yasijje

1 Eya Pabo, Jesosa Quitoja huoojea'yo ojava esohui huohuiya. Jamaya Eyacuiñajji sa poanaje. ² Timoteohua esejaya epeeji enijje esohui tehue cani miquiana huasijje jama ba'a: Ma Eyacuiñajjiya epeeji cuana huasijjeme Conosa cuiñajjiyo ba'e, ecuanaja epeeji e'e jojo nei Jesosa Quito nijje jjapee neineiquiani yasijje.

¡Esejaya Chii aiya, Eyacuiñajjiya miquianaya ca-jaahuana cahua quea pame nee, quea bei capo mee cahua pea'ai!

Pabohua Eyacuiñajji bihuia cani

³ Eyacuiñajji, esejaya Emeshi Mese nei Jesosa Quitoja Chii eyaya bihuia tiitiaña onijje miquianajo mimianijo.

⁴ E'e, pea cuaa eya huohui cani jama ba'a: —Jesosaja epeeji cuaa Conosajo ba'ecaa Jesosa Quito shajja'ajja cani tii. Ojjaña Eyacuiñajjiya epeeji cuana quea jea nee acani pea'ai.

⁵ E'e, miquianaya esohui e'e jojo nei Jesosa Quitoja yahuajo pishana shajja'ajja coo majje onijje jjapeequinaje. Jjashahuabaquiani eba'e tiitii'yoyji quea pame nee eyajo onijje pea'ai. E'e jojo nei Eyacuiñajjiya jamaya acaje'yo miquianajo. ⁶ Jiquio esohui e'e jojo nei Jesosa Quitoja ojjaña meshi yasijje huohui cani. Jamajjeya quea huiso dejja ba'e mee cani quea pame nee, miquiana jayojjaya. Jamaya miquianaaya esohui shajja'ajja coo majje jjabahuejjaqui'yonaje. Jamajjeya jjabahuejja neineiqui'yonaje ba'a: Eyacuiñajjiya dejja cuana jaahuana cani e'e jojo nei. ⁷ Dejja Epapasi bajjani ecuanajaya quea jea nee. Ohuaya Jesosa Quitoja esohui huohui ca'yonaje miquiana que. Oya ecuana jayojjaya Jesosa Quitoja yajjiyo chacochoani. Ecuana sohuihuohui sahuajji quea pame nee pea'ai. ⁸ Ohuaya ecuana huohui canaje jama ba'a: —Edojjoshahua Pameya Jesosaja epeeji cuana Conosajo ba'e pea epeeji cuana quea jea nee po mee cani —Epapasi poanaje.

Pabo miminaje Eyacuiñajji nijje

⁹ Epapasija esohui quea pame nee miquianajo shajja'ajja'yo majje ecuana Eyacuiñajji nijje mimi huicha'a huicha'ani jama ba'a: —Eyacuiñajji, ¡ecuanajaya epeeji cuana ba neinei meesahuacue ache echacojji shai mijo onajaya poaje! Edojjoshahua Pameya oya cuana miquea esohui caba meesahua cahua quea pame nee, cajjashahuabaqui meesahua cahua quea ja'a nee epojji pea'ai. ¹⁰ Jamajjeya ¡oya cuana Jesosa Quitoja esohui

jayojja jama ba'e tiitii mee'yocue! Jamaya poanijo Jesosa Quito quea bihui nee nee poaje onajo. ¡Quea pame nee nee chaco tiitii meecue Jesosa Quitojo pea'ai! E'e Eyacuiñajji, ¡miquea epeeji mijo jjabahuejja tiitii meequicue pea'ai! ¹¹ Miya ca ca oe quea ca'a nee nee, Eyacuiñajji. Jamajjeya ¡miquea epeeji cuana Conosajo ba'e jjapeequi meesahuacue quea ca'a nee nee! Jamajjeya oya cuana miquea esohui pajea'yo ajja tii tii dejja quea mase cuaa napa cajje, yeno'ama poaje. ¹² Eyacuiñajji, ecue Chii ai, oya cuana quea boejea'yo po mee'yonaje miyaya. Jamajjeya quijje oya cuana miquea pea epeeji cuana nijje ba'e tiitii meeje'yo quea ja'a nee mijiye eyajo. E'e Eyacuiñajji, jamajjeya apoa.

¹³ Yahuajo eseya Edosiquiaa napa ca'yonaje. Quea mase nee, quea mimishi nee nee. Jjeya ca ca esejaya Chii aiya eseya jjeshe ca'yonaje. Jamajjeya oja Bacua oe nei esejaya Emeshi Mese nei quea ca'a poaje'yo tii. Oja Bacua Jesosa Quito Eyacuiñajjiya quea jea nee nee poani tii tii. ¹⁴ Jama ba'a: Jesosa Quitohua esejaya mimishi cuana cuijea'yo majje Edosiquiana quea ca'a nee eseya mesena pajea mee ca'yonaje.

Jesosa Quito esejo mano'yonaje

¹⁵ Dejja cuanaja Eyacuiñajji ecojja bajji pojjeama, jja-cojjaba meequi ajja. Jamatii oja Bacua Jesosa Quito Eyacuiñajji jayojja nei neiya, o jayojjaya jama poani pea'ai. Jamajjeya Jesosa Quito ba majje Eyacuiñajji esejaya eba. Oya, Jesosa Quito ojjaña e'aquiana mese. Ojjaña aquiana cuana oja pana poa. ¹⁶ E'e, Eyacuiñajjiya Jesosa Quito nijjeya ojjaña aquiana cuana pana ca'ya poa, jiquio aquiana ba'a: Ojjaña aquiana ojjaña meshi cuanajo pana ca'ya poa; ojjaña aquiana eyajo pana ca'ya poa pea'ai. Aquiana cuana ecojjaja ebajji, pea aquiana ecojjaja ebajji pojjeama pea'ai pana ca'ya poa jiquio ba'a: Eyacuiñajjiya esohuidojojji quea ca'a nee pana ca'ya poa, esahua cuana quea huiso, quea mimishi po jjimahuajo, pana ca'ya poa pea'ai. E'e, Eyacuiñajjiya Jesosa Quito nijjeya ojjaña aquiana, ojjaña tii pana ca'ya poa Jesosa Quitoja ya'yoyji. ¹⁷ E'e, oya Jesosa Quito ba'e tiitiiya poa ojjaña aquiana pana jji-mahuajo. Ojjaña aquiana nequi tiitii mee cani quea pame nee, Jesosa Quitohua. ¹⁸ Ojjaña ojava epeeji cuanaja mese poani tii tii pea'ai. Ohuaya ma epeeji ojava huapa pojjeama jayojja jama ojee jjapeequi meesahua cani, ojjaña. O jayojja ba'e meesahua cani. Mano'yo majje Jesosa Quito ebonei shequi o'oyanaje. Jamajjeya oya oe nei quea ca'a nee nee poani tii tii. ¹⁹ E'e, oja Bacua Jesosa Quito o jayojja poani tii tiijo, Eyacuiñajji

quea bihui nee nee poani. ²⁰ Yahuajo dejja cuana quea mimishijo Eyacuiñajjiya ojjaña aquiana cajaa aca'ya poa. Jesosa Quito acui ecueata'apeejo ba'e na cuayaqui'yonaje. Mano'yonaje. Jamajjeya Eyacuiñajjiya mimishi cuana cuijea caje'yo. Jamajjeya quea bei po o'oyanaje ojjaña oja pana cuana nijje eyajo, meshi cuana-jo anica cuana nijje pea'ai.

²¹ E'e, miquianaya yahuajo quea mimishi poanijo, quea jjashahuabaqui tai poanijo pea'ai Eyacuiñajji nijje jjapeequi ajja. Quea huesha nee poquiquehuani jayojja poanaje. ²² Jesosa dejja jayojja yamijji nequinaje. Jamajjeya Jesosa Quito esejaya mimishi cuana-jo yonaje, Eyacuiñajjiya eseya ojaya epeeji cuana po mee ca'yonaje. Jamajjeya Jesosa Quitohua eseya Eyacuiñajji yasijje poqui mee caje'yo mimishi'ama, quea boejea epo'yo pea'ai. Jamajjeya Eyacuiñajji ese nijje quea bei poaje eyajo, ca ojaya esohui jama ba'e tiitiinajejo, Jesosa Quitoja esohuijo jjashahuaba tiitiiquina-jejo pea'ai. ²³ Jiquio esohui shajja'ajja majje ja'a pajea'yojji pea'ai! Quea huiso dejjaa quea huiso meshijo ba'eya jiquio esohui shajja'ajja cani eseyaya jayojjaya.

Jesosa Quitohua ca oe Pabo huoojea canaje esohui huohuiya

Jesosa Quitoja esohui ojjaña dejjaa shajja'ajja canaje ojjaña meshijo. Eya ca ca iña e'e jojo nei Eyacuiñajjiya esohui huohuijji; Jesosa Quitoja esohui huohuiaña. ²⁴ Jesosa Quitoja esohui eya huohuiyajo, pea cuaa eya jeyo majje jeanobiajea canaje quea huiso cahuijo; quea nee. Jamatii eya quea bihui nee poani. Yahuajo Jesosa Quito quea nee nee poa. Jjeya eya quea nee pishana poani miquiana Jesosaja esohui jayojja ba'e meesahuajji. E'e pojja'a quijje Jesosa jayojja eya quea nee nee poaje. Dejja cuaa eya napa cajje eya quea ca'a poajo, Jesosaja epeeji cuana quea ca'a poaje pea'ai. ²⁵ E'e jojo nei Eyacuiñajjiya eya huoojea ca'yonaje ojaya esohui huohuiya ojaya epeeji cuana huasijje. Jamaya miquianaya jjapeequi meesahuaña Jesosa Quito nijje. Ojjaña Jesosaja esohui huohuiaña pea'ai. Jiquio esohui eseya Eyacuiñajjiya ba meesahua cani. ²⁶ Jiquio esohui dejja cuana quea quehua yahuajo nei poa. Ba mee jjima poa. Jjeya ca ca Eyacuiñajjiya ojaya epeeji nei cuana Jesosa Quitoja esohui ba meesahua cani quea ja'a nee. ²⁷ Jamajjeya Jjeya Eyacuiñajjiya ojjaña ojaya epeeji cuana, Jodio pojjeama cuana pea'ai ba mee sa acani ojaya esohui Jesosa Quitojo. Ma esohui quea pame nee nee jama ba'a: Jesosa Quito esejaya eyami dojjojo nequi tiitiyani. Jamajjeya eseya jjashahuabaquiani onijje eyajo enequi tiiti'yojji. ²⁸ Ojjaña Jesosa Quitoja esohui ecuaaya huohuiaña quea ja'a nee ojjaña huasijje. Ojjaña nei nei jjabahuejjaqui meeaña ojjaña Jesosa Quitoja epeeji quea ca'a nee epojji. E'e, jamaya poaje Jesosa Quito poe o'oyajo. ²⁹ Miquianaya Quitoja epeeji quea ca'a nee epojji eyaya janobajjima nei esohui huohuiaña Jesosa Quitoja. Jesosa Quito ecuea eyami dojjojo quea ca'a nee nequi. Ohuaya eya esohui ba neinei meesahua cani miquiana huasijje ehuhuijji.

² ¡Bacue jiquio! Eya janobajjima nei jjashahuabaqui majje Eyacuiñajji nijje mimi neinei miquianajo Conosajo ba'e yasijje. Mimi neinei Jesosa Quitoja epeeji cuana Naonisea cuiñajjiyo ba'e yasijje pea'ai, Jesosa Quitoja epeeji cuana ecuea ba jjima cuana huasijje pea'ai. Jamatii eya jjashahuabaquiani onajo pea'ai. ² Jamajjeya eyaya ojjaña miquianaya Jesosa Quitoja epeeji cuana quea ca'a nee po meesahuaje'yo. Miquianaya pea cuana nijje jjapeequi meesahuaje'yo e'e jojo nei pea'ai, esohui quea pame nee Jesosa Quitojo jjabahuejjaqui meesahuaje. Quea bei nee jjashajja'ajjaquije. E'e, Jjeya ojjaña cuana esohui Jesosa Quitoja Eyacuiñajjiya ba meesahua caje'yo quea ja'a nee. Yahuajo ca maya ba mee jjima poa. ³ Jesosa Quitoja eba ojaye nei Eyacuiñajjiya ejjashahuabaquijji, ojjaña tii. Onijje jjapeequianijo, Eyacuiñajjiya ejjashahuabaqui'yojji quea ja'a nee ba meesahua cani Jesosa Quitohua. ⁴ ¡Ecuea esohui etehue'yo ba neineicue miquiaaya! Pea dejja cuana sijje poani Eyacuiñajjiyo ja'a shajja'ajjajji! Dasia ca chana' mi. ⁵ E'e, eya ejeanobia ani. Jamajjeya miquiana nijje eya enequijji pojjeama. Jamatii eya jjashahuaba tiitiquiani miquianajo, miquiana nijje nequi jayojjaya. Ecuea eba miquianaya Jesosa Quito nijje jja-pee neineiquiani quea pame nee, ojaya esohui jayojja jama poani pea'ai. Jamajjeya eya quea bihui nee nee poani miquianajo.

Jesosaa eseya o jayojja ba'e meesahua caje'yo

⁶ Jamajjeya miquianaya Jesosa Quito nijje ebinei jja-peequi'yonajejo oya miquea Emeshi Mese nei quea pame nee poanaje. Jamajjeya ¡ba'ecue ojaya epeeji nei! ⁷ Jamajjeya ¡Jesosa Quitoja epeeji quea ca'a nee oe pocue! ¡Ojaya esohui ba tiitiicue! ¡Ojaya esohui e'e jojo neijo jjashahuaba tiitiicue pea'ai! E'e, jamaya pea dejjaa miquianaya huohui canaje. Eyacuiñajji nijje jamaya mimi tiitiicue: —E'e Eyacuiñajji, jamaya miquea esohui quea pame nee nee.

⁸ Dejja cuaa esohui e'e nei pojjeama huohui cani miquianaya. Quea quehua nee, etiquiana cuana esohui. Jesosa Quitoja esohui jayojja jama pojjeama, quea ja'a nee pojjeama. ¡A'a shajja'ajjajji! Dasia caje'yo cuaa mi.

⁹ Jamajjeya ¡bacue jiquio! Oya Jesosa Quito eseya jayojja yamijji poa. Jamatii oya Eyacuiñajji nei poa. ¹⁰ Jesosa Quito nijje jjapeequianijo, Eyacuiñajjiya eseya ba'e tiiti mee caje'yo Jesosa Quito jayojja epo'yojji. E'e, Jesosa Quito Emeshi Mese nei oe nei quea ca'a nee nee. Ojjaña eshahua cuana mese, Eyacuiñajjiya esohuidojojji cuana mese pea'ai quea ca'a pishana, de.

¹¹ Ojaya etiquianaja esohui jama Jodio dejja cuaa cuiishasha jehusejjajea cani. Jamaya huohui jjima acani Jesosa Quitohua. Onijje jjapeequianijo, ohuaya miquianajaya mimishi pajea mee ca'yani, miquianajaya ejjashahuabaqui'yojji quea mimishi chama'yo po mee ca'yani. ¹² Jesosa Quito mano'yajo dejja cuaa ohuajea ca poa. Eyacuiñajjiya oya shequi mee ca o'oyanaje. Jesosa Quito ohuajea ca poa jayojja jamaya peaa mi-

quianaya enajo besa mee canaje Eyacuiñajjiyo. Jamajjeya Eyacuiñajjiya Jesosa Quito shequi mee ca o'oyanaje jayojja jamaya ohuaya miquianaya ba'e meesahua caje'yo Jesosa Quito jama epo'yoyji, ojaya esohuiyo jjas-hajja'ajjaquianijo. ¹³ Yahuajo Jodio pojjeamaja Eyacuiñajjiya esohui miquianajaya ba jjima. Quea mimishi nee nee poanijo miquea edojjoshahua cuaqui yasijje dobiqui'yo quiaye poanaje. Jjeya ca ca Eyacuiñajjiya miquianaya ba'e tiitii mee caje'yo Jesosa Quito nijje mimishi cuana ojjaña tii cuijea ca'yonajejo. ¹⁴ Esey aje oe Moisesija esohui etehuejo jjas-hajja'ajjaqui ajjajo, Eyacuiñajjiya tehue mee canaje jama ba'a: "Ojjaña quea mimishi nee nee" poanaje. Jamatii jojoya Jesosa Quito esejaya mimishijo mano'yonaje acui ecueata'a-peejo. Jamajjeya Eyacuiñajjiya e'e jojo nei esejaya mimishi cuana cuijea neinei ca'yonaje. ¹⁵ E'e, Jesosa Quito acui ecueata'apeejo mano'yonaje. Jamajjeya es-hahua cuana ca'a'ama po mee ca'ya poa, Eyacuiñajjiya. Jamaya ojjaña eshahua mese cuana jeabichajea ca'ya poa. Eyacuiñajjiya ojjaña ba mee canaje eyajo anica.

¡A'a esohui e'e nei pojjeama shajja'ajjajji!

¹⁶ Jamajjeya ¡bacue oe! Pea cuaa miquianaya tecuea cani ojjaña bobi miquiaa ijjañaajo, pea e'ishijji ishianajo pea'ai. ¡A'a oya cuana shajja'ajjajji! Jodio cuanaja esohui jama ba'a: Ojee e'ijjajji pojajajo, epojja chaco-chaco mee ajja pea'aijo huohui cani; ¡a'a oya cuana shajja'ajjajji! ¹⁷ Yahuajo ma esohui cuanajo dejja cuana jjashahuaba meequi ca'yonaje ma Jesosa Quitohua quijje poe majje acañaje. ¡Jjeya nei Jesosa Quitojo jjas-hahuabaquicue! Oya ca ca oe nei quea pame nee. ¹⁸ Pea dejja cuaa jjacahuibaqui majje miquianaya Eyacuiñajjiya esohuidojojji bihuia mee sa acani bobima' ani tii. Ma dejja cuana ojaya ejjashahuabaquijji quea taijo mimi huicha'a huicha'ani. Jama sijje pome poani ba'a: —Ecuea ejjashahuabaquijji quea ja'a nee; onajaya quea ja'a pojjeama —poani.

Tecuea canijo ca oe ¡a'a jjashajja'ajjaquijji! Eyacuiñajji nijje mi poqui pajea mee ca chana'. ¹⁹ Ma dejja cuana aje oe Jesosa Quito nijje, esejaya Emeshi Mese nei nijje jjapeequi pajea'yonaje. Eseyaya Emeshi Mese neiya Jesosa Quitohua ojjaña ojaya epeeji cuana jjabahuejjaqui mee cani ojee. Jama ba'a: Jesosa Quito ojjaña ojaya epeeji cuana nijje ese ejja jayojja poani. Ojjaña ojaya epeeji cuana Jesosa Quitoja eyami jayojja poani. Esapa jayojja esejaya Emeshi Mese nei Jesosa Quito poani. Jiquio ecua esapaa eyami poqui mee cani jayojja jama Jesosa Quitohua ojjaña ojaya epeeji cuana huoojea cani, jjabahuejja meequi cani ojee ejjapeequijji. Jamaya Eyacuiñajjiya quea boti nee. Jamaya Eyacuiñajjiya ojjaña ojaya epeeji quea ca'a nee po mee sa acani. Eseyaya Emeshi Mese neiya Jesosa Quitohua ojjaña ojaya epeeji cuana ojee onijje jjabahuejja meequi cani; jamaya Eyacuiñajjiya ojjaña ojaya epeeji cuana quea ca'a nee po mee cani. Jamajjeya ojjaña ojee jjapeequi mee cani Jesosa nijje.

²⁰ Miquianaya Jesosa Quito jayojja jama poanijo Jesosa Quitoja epeeji pojjeama cuanaja esohui quea quehua ¡a'a shajja'ajjajji! ¿Apiojji acuae jjeya maya esohui quea quehua shajja'ajja sa poani? Jesosa Quito nijje jjapeequianijo eshahuaja epeeji pojjeama poani. ²¹ Esohui quea quehua jiquio jama ba'a: —Jiquio aquiana ¡a'a napajji! ¡A'a pea bobi cuana ijjañajji! ¡Pea e'ishijji a'a ishijji! —jamaya dejja cuaa huohui nisho cani.

²² Jama pojjeama ca ca Eyacuiñajjiya esohui. Bobi cuana ijjañajjejo majje chama'yo tii poani. Joya miquiaa napaña aquiana chama'yo tii poaje pea'ai. ²³ E'e, jiquio dejja cuaa pea cuana dasia cani; ojaya esohui quea quehua quea ja'a poso acani cuaa. Jamajjeya pea cuana jjashahuaba quehuaqui majje oe pojji bobi ijja jji-ma acani. Pea'ai Jesosaja esohui jama ba'e sa po'yo ajja. Cho, quea ja'a pojjeama ba'yani. Jamaya poanijo dejja cuana quea mimishi jjashahuabaqui pajea ajja.

Yahuajo quea tai ba'ya poa eba'ejji Jesosa Quito nijje quea pame

3 Eyacuiñajjiya Jesosa Quito ba'e mee ca o'oyanaje. Jamajjeya ohuaya miquianaya ba'e mee caje'yo Jesosa Quito jayojja. Jamajjeya ijashahuaba tiitiicue Jesosa Quitojo eyajo eba'ejji! Jama ba'a: Eyacuiñajjiya Jesosa Quito ojjaña huoojea'yoyji quea ca'a nee nee po mee ca'yonaje. Oya Eyacuiñajjiya ebianeijji mijiije ani. ² E'e, ijashahuaba tiitiicue oe Jesosa Quitojo! ¡Aquiana taijo oe a'a jjashahuabaquijji! ³ Jama ba'a: Dejja emano'yooja mimishi po'yo ajja. Jamaya miquianaya jjeya emano'yo jayojjaya mimishi po sa po'yo ajja. Jesosa Quito Eyacuiñajji nijje nequi tiitiiani. Ohuaya miquianaya jaahuana cani quea pame nee. ⁴ Jesosa Quito poe o'oyajo, eseya onijje nequi tiitiije'yo quea ja'a nee nee; o jayojjaya poaje'yo onijje jjapee tiitiicue-nijo. Jamajjeya oe ijashahuaba tiitiicue Jesosa Quitojo!

⁵ E'e, Jesosa Quito nijje jjapeequi majje jamaya ebio-nei acue ba'a: ¡Ojjaña mimishi cuana oe pajea neinei'yocue! ¡A'a pea cojjojji pojji! ¡A'a jama jjashahuabaquimeya pojji! ¡A'a quea tai jjashahuabaquijji! ¡A'a quea mimishi ba'e sa pojji! Onajaya aquiana ¡a'a quea jea bajji pea'ai! Quea dejja tai poanijo aje oe miquianaya eyacuiñajji nisho bihuiajji jayojja poani, de. ⁶ Jiquio mimishi cuana jama atiitii canijo, Eyacuiñajjiya shajjama' cuana quea nee nee po mee caje'yo. ⁷ Jamaya aje oe miquiaaya yahuajo mimishi ahuicha'a huicha'a'yonaje pea'ai onaaya acani jayojjaya. ⁸ ¡Jjeya ca ca pajea neinei'yocue ojjaña mimishi cuana! Jamajjeya ¡a'a quea tecue nee nee pojji! ¡A'a quea quene nee nee pojji! ¡A'a quea mase nee nee pojji! ¡A'a pea nijje mimijajji! ¡A'a quea tai mimijji! ⁹ E'e, miquianajaya eba'ejji quea mimishi yahuajo jama apajea'yonajejo ¡a'a sijje pojji!

¹⁰ Jjeya miquianajaya eba'ejji quea pame nee po'yonaje. Eyacuiñajjiya miquianaya ba'e meesahua cani quea boejea, o jayojja epojji, o ba neineiiji epojji. Jamajjeya ¡a'a quea mimishi po'yoyji!

¹¹ Jamajjeya Jesosa Quito nijje jjapeequianijo ojjaña ojaya epeeji cuana cajjapeequiahua pea nijje; pea ja-

yojja oe capoahua. Jodio cuana ca ca Jodio pojjeama jayojjaya ca'a'ama; dejja ecuiishasha jehuissejja'yo ca ca cuiishasha jehuissejja jjima jayojja pea'ai, Jieno dejja pojjeama cuana, Sitinia dejja cuana pea'ai; echacojji sosema' ca ca dejja echacomeejjima' jayojja, ca'a'ama ojjaña. Jesosa Quito ca ca oe nei quea ca'a nee nee nequi tii tii. ¹² E'e, Eyacuiñajjiya miquianaya babaca ca'ya poa ma ojaya epeejjime epojji. Ohuaya miquianaya quea jea nee nee acanaje pea'ai, Eyacuiñajjiya. Jamajjeya quea pame ba'ecue jiquio jama ba'a: ¡Aema' cuana ba'e meesahuacue! ¡Pea cuana nijje jjapeequicue! ¡Mase'ama oe pocue! ¡Quea bei oe pocue! ¡Tecue'ama pea'ai oe pocue! ¹³ ¡Ona nijje tecue'ama pocue! E'e pojja'a pea cuaa miquianaya quea mimishi acaje. ¡Jamatii ojaya mimishi pajea'yocue; ohuaya miquea mimishi capajea ca'yahua pea'ai! E'e, Jesosa Quitohua miquianajaya mimishi cuana cuijea ca'yonaje; jamajjeya ¡miquianaaya oe pea cuanaja mimishi pajea'yocue! ¹⁴ E'e jojo nei ¡pea cuana quea jea nee acue! Jamaya poanijo miquianaya ojee quea ja'a nee nee ba'eje. ¹⁵ ¡Miquianaaya oe quea bei nee nee ba'ecue Jesosa Quitohua miquianaya quea bei nee ba'e meesahua canijo! Miquianaya ca ca oe Jesosa Quitoja epeejji poani. Jamajjeya eseya jjapeequi mee caje'yo quea cojja bei epojji. Ma joya miquianaya iyaa ca'yonaje Eyacuiñajjiya. ¡Eyacuiñajji bihuiaquea pea'ai!

¹⁶ ¡Ojjaña Jesosa Quitoja esohui cuana shajja'ajja tiitiicue! ¡Quea ja'a nee esohui esejaya epeejji cuana huasijje huohuicue; shajja'ajjacue pea'ai! ¡Ojee jjabahuejjaqui meecue quea ja'a nee pea'ai! Eyacuiñajji bihuiañajo jama pocue ba'a: ¡Sohuicuayacue quea bihui nee Jesosa Quitojo! ¡Miquianaaya Eyacuiñajji bihuiaquea sohuicuayaniya pea'ai! ¡Quea quijijji bei nee pea'ai pocue Eyacuiñajji! E'e, ¡o jayojjaya jama ba'ecue! ¹⁷ Eseyaya Emeshi Mese nei Jesosa. Ojaya epeejji poanijo ¡ojjaña miquea esohui ojaya yajji acue! ¡Ojjaña miquea echaco ojaya epojji chacocue pea'ai! Jesosa Quitohua miquianaya jamaya ameesahua canijo, ¡Eyacuiñajji, esejaya Chii ai oe bihuiaque!

Eyacuiñajji esejaya eyamijo quea pame nequi

¹⁸ Jamajjeya ehuanase cuaaya, Jesusaja epeejjiya, ¡yahue shajja'ajjacue! Jamaya miquianaya quea pame nee poaje. ¹⁹ Yahueya, ¡miquea ehuanase quea jea nee acue! ¡A'a oe onijje quea tecue nee pojji!

²⁰ Esho'i cuaa, Jesusaja epeejji poaniya, ¡shajja'ajja tiitiicue mique chii, miquea enaese pea'ai! Jamaya miquianaya poanijo, Jesosa Quito quea bihui nee poaje. ²¹ Echii cuaa, enaeseya pea'ai, ¡a'a jamatii tecuea huicha'ajji mique bacua cuana! Oya cuana quea yeno nee poaje miquiaa tecuea tiitii'yajje.

¡Echacojji cuana, echacomeejji cuana pea'ai quea pame oe pocue!

²² Miquianaaya echacomeejjijo chacochoani ojaya yajjiyo ¡miquianaja echacomeejjija esohui jama chacomeya oe acue, ojjaña tii! ¡O ba majje a'a chaco nishojji!

Cho. ¡E'e jojo nei quea bihui nee oe chacocue ojaya! ¡Jamaya oe acue miquianaaya! ¡Jesosa Quito oe quea jea nee ejja'aqui! ²³ Miquianaaya echacomeejjijo chacoñaajo Eyacuiñajjiyo chacoña pea'ai. Jamajjeya ¡chaco neineicue Eyacuiñajjiyo quea bihui nee epojji! ²⁴ E'e, miquianajaya eba jama ba'a: Quijje eyajo esejaya Emeshi Mese neiya miquea echaco quea pame nee cuana sosequia caje'yo, ma ecua ohuaya huohui ca poa jayojjaya acaje'yo. E'e, miquianaya chacochoani Jesosa Quitojo, esejaya Emeshi Mese neijo. ²⁵ ¡Bacue oe! Eyacuiñajjiyo ojjaña shajjama' cuana napa caje'yo quea mimishi poani sosejje. Ohuaya ojjañaja mimishi ba cani. Jamajjeya joya quea mimishi nee nee poani janobajjima nei napa caje'yo; joya quea mimishi pishana poani oe pojji napa caje'yo.

4 Ojjaña echacomeejji cuaa, ¡shajja'ajjacue mo oe! Miquea echacojji cuana miquea yajjiyo chacochoani ¡sosequiacue oya huiso tii! ¡Oya cuana oe jaahuanacue quea pame nee epojji! ¡A'a pajea'yojji miquea Emeshi Mese neiya eyajo aniya miya ba tiitii cani!

Pea cuana Pabohua niñeshe'a cani

² Epeejji cuana, ¡mimi majamajacue Eyacuiñajji nijje ojjaña pojjaajo! ¡Huea'ama mimicue! ¡Oya oe bihuiaquea onijje mimianijo! ³ ¡Eyacuiñajji nijje oe ojee mimicue ecuanajoya pea'ai! Jamajjeya ohuaya ecua huohui meesahua tiitii caje'yo esohui pame nee Jesosa Quitoja, ma onajaya yahuajo ba jjima. Ma esohui eya huohuijaya, dejja mimishi cuaa eya iña majje jeanobiaja ca'yonaje. ⁴ Jamatii miquianaya ejo Eyacuiñajji nijje mimianijo, ohuaya eya Jesosa Quitoja esohui huohui meesahua caje'yo quea ja'a nee.

⁵ Jesosa Quitoja epeejji pojjeama cuana nijje mimianijo ¡jjashahuaba neineiquicue quea ja'a nee! ¡Quea pame nee oe ona nijje po tiitiicue pea'ai! ⁶ ¡Quea bei, quea ja'a nee pea'ai mimicue Jesosa Quitoja epeejji pojjeama cuana nijje! ¡Jashahuaba neineiquicue onijje mimi jjimahuajo! Jamajjeya onaya Jesosa Quito ba meesahuaje'yo.

Pabohua quea bihui nee esohui tehue canaje pea cuana huasijje

⁷ Dejja Tiquico bajjani Jesusaja epeejji, e jayojjaya Jesusajo chacochoani, ecuanajaya quea jea nee nee. Ohuaya eya chacosahua ca'yonaje Jesosa Quitojo quea pame nee pea'ai. Ohuaya miquianaya huohui cañaquije jiquiojo e ba'yanijo. ⁸ Eyaya oya huoojeaje miquiana huasijje e huohuiya. Ojaya esohui ecuanajo shajja'ajja majje ¡quea bihui nee pocue! ⁹ Tiquico nijje Onesimo poquije. Oya ecua jayojjaya Jesusaja epeejji quea pame nee pea'ai. Yahuajo oya miquianajaya cuiñajjiyo ba'ya poa. Ojjaña jiquiojo onaa acani huohui caje miquiana huasijje, Onesimohua. ¹⁰ Anitaco enijje ejeyo'yo nequi ejjaje nobiaquijji equijo. Ohuaya miquianaya huohui'ajja cani jama ba'a: —¿Achajja acuae quiana so'o? —ojaya ebajji.

Macosohua pea'ai huohui'ajja cani: —¿Achajja acuae quiana so'o, de, ecuanajaya ebajji?

Oya Macoso Benabeja jjo'yaseja bacua ejja. Miquiana que poquiyajo, ¡oya jaahuanacue quea pame nee! Jamaya eyaya miquianaya huohuinaje yahuajo. ¹¹ Jesosa Josoto yani pea'ai. Ohuaya huohui'ajja cani pea'aya: —¿Achajja acuae nequiana so'o, ecuanajaya ebajji?

Jiquiojo pea beca peejjima Jodio cuana Jesusaja epeeji yani. Ohuaya eya chaco meesahua cani quea pame nee Eyacuiñajjiya yajji, esejaya Emeshi Mese neija yajji. Pea Jodio cuanaja enijje chaco jjima, de. ¹² Epapasi cuanaya yani enijje. Ohuaya pea'ai esohui quea bihui nee huohui cani miquiana que. Yahuajo oya miquiana nijje ba'ya poa pea'ai. Jesosa Quitoja yajji chaco cani ohuaya. Janobajjiima nei mimi tiitiani Eyacuiñajji nijje miquianajo jama ba'a: —Eyacuiñajji, ¡miyaya ojjaña Conosajo ba'e cuana Jesosa Quito nijje jja-peequi meesahuacue quea ja'a nee! ¡Miquea esohuijo e'e jojo nei oya cuana jjabahuejjaqui meesahuacue! ¡Miquea esohui jama ba'e tiitii meesahuacue, Eyacuiñajji! —jamaya Epapasi mimiani Eyacuiñajji nijje miquianajo.

¹³ E'e, Epapasi mimi tiitiani Eyacuiñajji nijje miquiana jaahuanajji. Quea huesha cuiñajji yasijje Jesusaja epeeji cuana Naonisea cuiñajji ba'e yasijje, Jienaponi

cuiñajji ba'e pea'ai yasijje Eyacuiñajji nijje mimi tiitiani, Epapasi. Jamaya eyaya oya baña. ¹⁴ Ecuanajaya epeeji quea pame nee Noca bajjani yani jiquiojo. Oya eshicuijjiqiajji, de. Dejja Demasi bajjani yani pea'ai. Ohuaya esohui quea bihui nee huoojea cani miquiana huasijje.

¹⁵ ¡Ecuanajaya esohui quea bihui nee huohuicue Jesusaja epeeji nei cuana huasijje Naoniseajo ba'e yasijje! ¡Epona Nema bajjani oe huohuicue! ¡Ojaya epeeji cuanaya pea'ai huohuicue, joya oja equi yasijje jjachachaquiani Eyacuiñajji esohui baa! ¹⁶ E'e, jiquio ecuea esohui etehue'yo ba neinei majje ¡huohuicue Jesusaja epeeji cuana huasijje Naoniseajo ba'e yasijje! Majoya ohuaya miquianaya quia caje o'oya pea esohui etehue'yo, ma eyaya ebionei tehuenaje o que. ¡Ma esohui shajja'ajjacue, ojjaña miquiaaya! ¹⁷ Pea dejja Aquipo bajjani huohuicue ecuea esohui jama ba'a: —Eyacuiñajjiya miya huoojea ca'yonaje ojo chachhua. Jamajjeya ¡chacocue quea pame nee ojo! ¡Ojjaña joya ecua ohuaya huohui cani jamaya oe acue!

¹⁸ Eyaya ca eya jiquio esohui quea bihui nee tehue'yonaje. Dejja cuanaja eya pichojea'yo jjima; eya ejeyo'yo tii nequi. ¡A'a eya pajea'yojji! ¡Eyacuiñajjiya miquiana cajaahuana tiitii cahua quea pame nee!

Mahuiso. Eya Pabo bajjani esohui tehuejji. Apoa.

1 TESANONISESE

Pabohua esohui tehue canaje Jesusaja epeeji cuana Tesanonica cuiñajjijo ba'e yasijje

1 Eya Pabo. Sinasi, Timoteo pea'ai enijje nequi. Jiquio esohui ecuaaya tehueaña miquiana huasijje, ma Jesusaja epeeji nei cuana Tesanonica cuiñajjijo ba'e yasijje. Miquianaya Eyacuiñajji eseja Chii ai nijje jjapeequiani, Jesosa Quito esejaya Emeshi Mese nei nijje jjapeequiani pea'ai. ¡Eyacuiñajjiya, Jesosa Quito pea'ai miquianaya quea pame nee cajaanahuana cahua! ¡Quea bei capo mee cahua pea'ai!

Jesosaja epeeji cuana quea pame nee ba'yani

² Eyacuiñajji nijje mimianijo ecuaaya oya bihuiaña miquianajo. E'e, ecuaana Eyacuiñajji nijje mimi huicha'a huicha'ani miquianajo jama ba'a: ³ —Eyacuiñajji, ecuanaja Chii ai, Jesusaja epeeji Tesanonicajo ba'eca minijje jjapeequiani cuana quea pame nee nee. Miya ojaya quea boti nee nee; minijje quea pame nee chaco cani tii. Oya cuana Jesosa Quito nijje, ecuanaja Emeshi Mese nei nijje jjapee tiitiqianani quea pame nee. E'e, jjas-hahuabaquiani jama ba'a: “Jesosaa ecuaana ba'e tiitii mee caje'yo onijje eyajo” —jamaya ecuaana mimiani Eyacuiñajji nijje miquianajo.

⁴ Epeeji cuana, miquianaya Eyacuiñajjija quea jea nee nee. Ohuaya miquianaya babaca majje iyaa canaje ojaya epeeji epo tiitii'yojji. Jamaya ecuanajaya eba.

⁵ E'e, ecuaaya Eyacuiñajjija esohui quea pame nee Jesusaja huohuinaje miquianajaya eshajja'ajjajji. Edojjoshahua Pameya ecuanaya sohuihuohui meesahua canaje quea ja'a nee nee; miquianaya ba mee canaje Eyacuiñajjija esohui e'e nei, dejjaja esohui pojjeama. Ecuaana quea pame nee ba'enaje miquiana nijje. Jamajjeya ecuanaya miquiaaya banaje quea pame nee ba'e. Jamajjeya miquianaya ba'enaje quea pame nee ecuaana jayojjaya. ⁶ E'e, miquianaya ecuaana jayojjaya ba'enaje quea pame nee nee; esejaya Emeshi Mese nei jayojja jama pea'ai ba'enaje. Jamajjeya pea cuana miquianaya cuia canaje Jesusa nijje jjapee neineiquianijjo. Jamatii miquianaaya quea bihui neeya Jesusaja esohui shajja'ajjanaje; Edojjoshahua Pameya miquianaya quea bihui nee po mee canaje. ⁷ E'e, miquianaya quea ja'a nee jjapeequinaje Jesusa nijje. Jamajjeya ojjaña Jesusaja epeeji cuana Masenonia meshijo ba'eca cuana, Acaya meshijo ba'eca pea'ai miquiana ba majje quea ja'a nee jjapeequi sa poani Jesusa nijje miquiana jayojjaya. ⁸ Miquianajaya esohui Emeshi Mese nei, Jesosaja ojjaña Jesusaja epeeji cuana shajja'ajja canaje. E'e,

Masenonia meshijo ba'eca cuana, Acaya meshijo ba'eca cuana pea'ai shajja'ajja canaje. Ojjaña ba canaje miquianaya Jesusaja epeeji quea ja'a nee poani. Ojjaña cuana quea huiso meshijo ba'eya pea'ai ba canaje miquianaya Eyacuiñajjija esohui jayojja jama po tiitiiani quea pame nee. E'e, ojjaña cuana ojjaña meshi cuanajo ba'eya miquianajo shajja'ajja canaje. Jamajjeya ecuaaya oya cuana huohui o'oya jjima año. ⁹ Onaaya ca ca ecuaana huohui cani miquianajo jama ba'a: —Jesusaja epeeji cuana Tesanonicajo ba'e Pabojja esohui Jesusajo ebionei shajja'ajja jeahua jjashajja'ajjaquinaje quea bihui nee. Jesusaja epeeji cuana poanaje. Eyacuiñajji nisho, meshi epana'yo cuana bihuia pajea ca'yonaje. Jjeya nei ca ca oya cuana Eyacuiñajji e'e nei nijje jjapeequiani. E'e, Eyacuiñajji ca ca oe nei yani tii tii, eshe.

¹⁰ Ohuaya Eyacuiñajjija Bacua Ejja oe nei Jesusaja epoe o'oyajji ishoa'ajja cani —jamaya ojjaña miquianajo poani.

E'e, Eyacuiñajjija Bacua Ejja Jesusa mano'yajo, Eyacuiñajjiya oya ba'e mee ca o'oyanaje. Jjeya ohuaya, Jesusaa esejaya mimishi cuana cuijea ca poquipoqui'yanani. Jamajjeya quijje Eyacuiñajjiya eseya sosequia caje'yo jiquio meshijo ba'ya poa sosejjea; ohuaya eseya quea nee nee epo mee'yojji pojjeama shajjama' cuana nijje.

Pabo chachacoa poa Tesanonica meshijo

2 Yahuajo ecuaaya Jesusaja esohui huohuinaje; miquianaya shajjama' pojjeama poa. Chojja, shajja'ajja neinei nequiaa poa. Miquianajaya jama eba pea'ai ba'a: ² Miquiana baa Tesanonica huasijje poqui jjimahua ecuaana cuia canaje Jodio cuana Pinipo cuiñajjijo ba'eca cuana. Ecuaana nijje mimijajinaje pea'ai. Pea cuana ecuaana cuia canaje Jesusaja esohui huohui mee ajjaa jjejo; jamatii Eyacuiñajjiya ecuaana ojaya esohui quea pame nee Jesusa Quitojo huohui meesahua canaje miquiana huasijje mete'ama, miquianajaya eshajja'ajjajji.

³ E'e, miquiana huasijje sohuihuohuiañajo ecuanajaya ejjashahuabaquijji quea ja'a nee poanaje. Ecuanajaya esohui siajje pojjeama. Miquiana dasia sa po'yo ajja pea'ai. ⁴ Chojja. Eyacuiñajjija eba ecuanaya siajjepojji pojjeama. Jamajjeya ohuaya ecuaana huoojea canaje Jesusaja esohui quea pame nee huohuiya. Eyacuiñajjija ejjashahuabaquijji jayojja jama huohuiaña ecuaaya. Eyacuiñajjija eba nei nei ecuanajaya ejjashahuabaquijji ojaya ejjashahuabaquijji jayojja jama poani tii. Ecuaaya oya quea bihui nee po mee sa año ecuaana nijje. E'e

pojja'a pea cuana quea bihui pojjeama ecuanaja huohui'yojo. Jamatii ecuaa jashahuabaquiani jama ba'a: —Ecuaya esohui huohuiaña pea cuanaja ejjashahuabaquiji jayojja jama pojjeama, pea cuana enijje quea bihui epojji pojjeama —chojja, Eyacuiñajji quea bihui nee po mee sa aña ecuaa nijje. ⁵ Miquianajaya ecuaa eba. Esohui quea bihui nisho mimi jjima miquiana nijje miquiana dasiajji, aquiana sosema' edojji pea'ai. Chojja, Eyacuiñajji eba ecuanajaya ejjashahuabaquiji quea pame nee. ⁶ Jashahuabaqui ajja jama ba'a: —Ecuana esohui quea pame nee shajja'ajja majje ecuaa cabihuia cahua cuaa; aquiana caquia cahua pea'ai —chojja, ecuaa jashahuabaqui ajja pea cuanaja ebihuiajji.

⁷ Ecuaa Jesosa Quitoja hoojea'yo ojaya esohui huohuijji. Jamajjeya miquianajaya aquiana sosema' jjesheme esohui huohuinaje sosejje. Jamatii aquiana cuana ecuanajaya jjeshe jjima poanaje. Chojja, miquiana nijje quea bei ba'enaje. Jiquio ecua enaeseya oja bacua cuana jaahuana cani, quea jea nee acani jayojjaya jama ecuaaya miquianaya anaje. ⁸ Miquianaya ecuanajaya quea boti nee nee poanijo Eyacuiñajji esohui quea pame nee nee Jesosaja huohuinaje miquiana huasijje. Pea cuaa ecuaa cuia ca chana' Jesosaja esohui ehuohui poaje jjejojo. Jamatii miquianaya ecuanajaya quea jea nee nee poanijo esohui huohui tiitinaje. ⁹ E'e, miquianajaya eba miquiana nijje nequianijo ecuaaya janobajjima nei chaco tiitinaje eba'ejji sosejje. Eyacuiñajji esohui quea pame nee Jesosaja huohuiaña chaco tiitinaje epojjajo, mecajje pea'ai. Jamaya anaje ecuaaya. Jamajjeya miquianajaya ecuaa eba'ejji quia jjima poanaje. Eyacuiñajji esohui huohuinaje sosema' miquianajaya eshajja'ajjaji.

¹⁰ Ecuaa miquiana nijje ba'enaje quea bei nee, mimishi'ama, quea pame nee, dejja tai'ama. Jamaya miquianajaya eba. Jamaya Eyacuiñajji eba pea'ai. Jamajjeya yajjajo pea cuaa ecuaa niñeba cani so'o quea dejja tai poanaje miame? ¹¹ E'e, echii meseya oja bacua cuana cuiña cani quea pame nee jayojjaya jama ecuaaya miquianaya anaje. Jamaya miquianajaya eba pea'ai.

¹² Ecuaaya miquianaya huohui majamajanaje jama ba'a: —¡Quea bihui nee Jesosa Quito nijje jjapeequicue! ¡A'a quea yeno pojji onaa miya quea mimishi acaje! Eyacuiñajji oe nei quea ja'a nee nee, quea ca'a nee nee poani tii tii. Oya oe nei ojjaña hoojea'yojji poani. Ohuaya miquianaya babaca canaje onijje eba'e tiitii'yojji eyajo. Jamajjeya ojaya esohui jayojja jama ba'e tiitiecue Eyacuiñajji miquiana nijje quea bihui nee epojji!

¹³ Ecuaaya Eyacuiñajji bihuiaña miquianajo jama ba'a: —Eyacuiñajji, eyaya miya bihuiaña Jesosaja epeeji cuana Tesanonicajo ba'e quea pame nee poani yasijje. E'e, miyaya miquea esohui huohui meesahuaña, onaaya shajja'ajja canaje. Quea bihui nee poanaje. Quea ja'a jashahuabaquinaje jama ba'a: “E'e jojo nei Pabohua ojaya esohui pojjeama huohui cani; Eyacuiñajji esohui quea pame ca ca huohui cani” poanaje cuana —jamaya ecuaaya Eyacuiñajji bihuia huicha'a huicha'aña miquianajo.

E'e epeeji cuana, Jesosa nijje jjapeequianijo, Eyacuiñajji miquianaya ba'e meesahua cani quea pame nee ojaya esohui e'e nei jayojjaya.

¹⁴ Yahuajo Jesosaja peeji cuana Jodio meshijo ba'e onijje, Jesosa Quito nijje jjapeequianijo, pea Jodio cuaa, oja huapa pojjeama cuaa oya cuana cuia ca poa quea huiso nee. Oya jayojjaya jjeya miquianaya Jesosa nijje jjapeequianijo, miquianajaya huapa pojjeama cuaa miquianaya cuia cani pea'ai. ¹⁵ E'e, yahuajo nei nei Jodio cuaa Eyacuiñajji esohui huohuijji cuana cuiajea ca'ya poa. Majoya esejaya Emeshi Mese nei Jesosa quecua mee ca'ya poa pea'ai. Jjeya eseya cuia cani pea'ai, Jodio cuaa. Shajjamaa po tiitiiya jjejojo Jodio cuaa Eyacuiñajji quea quene po tiitii mee capoquiani. Jodio cuaa aje oe ojjaña dejja cuana quea tai acani. ¹⁶ E'e, ecuaaya Jodio pojjeama cuana huasijje Eyacuiñajji esohui quea pame nee Jesosajo huohuiaña. Jodio pojjeama cuana Jesosa nijje jjapeequi mee sa aña onijje eyajo eba'e tiitii mee'yojji quea pame nee. Jamatii Jodio cuaa aje oe ecuaa Jesosaja esohui huohui pajea mee'yo sa acani tii. Jamaya oya cuana, Jodio cuana quea mimishi nee nee po tiitiani. Jamajjoya aje jja oe Eyacuiñajji quea quene nee poani Jodio cuana nijje. Quea yeno nee nee po tiitii mee cani Jodio cuana.

Pabo poqui o'oya sa poanaje Tesanonica huasijje

¹⁷ Epeeji cuana, yahuajo ecuaa miquiana nijje nequijo, Jodio cuana ecuaa nijje quea quene nee nee poanaje. Jamajjeya miquiana nijje nequi tiitii jjima poanaje. Jamatii miquianaya ecuanajaya pajea'yo jjima. Chojja, miquianajo jashahuabaquiani tii. Poqui o'oya sa neinei poanaje miquiana baa. Mi poqui mee ca o'oyajje ecuaa quea yeno nee poanaje. ¹⁸ E'e jojo nei ecuaa poqui o'oya sa poanaje miquiana huasijje. E'e eya, Pabo poqui huicha'a huicha'a'ajjanaje. Jamatii Edosiquiana neiya eya poqui mee jjima acanaje. ¹⁹ E'e jojo nei miquianaya Jesosaja epeeji poanijo, ecuaa quea bihui nee nee poani. Jamajjeya esejaya Emeshi Mese nei Jesosa Quito poe o'oyajo, miquiana onijje nequiyajo, ecuaa quea bihui nee poaje'yo. E'e, jiquio ecua se chacochoajo sosequia cajje eseya quea bihui nee poani jayojja jama ecuaa quea bihui nee nee poaje miquiana Jesosa nijje nequi ba majje. ²⁰ E'e, miquianaya quea pame nee Jesosa nijje jjapeequianijo, ecuaaya Eyacuiñajji bihuiaña. Quea jaji nee poani pea'ai miquianajo.

Pabohua Timoteo hoojea canaje Tesanonicajo ba'ecuaa ba'ajja'yohua

3 Jamajjeya miquianajo quea yeno jashahuaba tiitiqui majje eya jama poanaje ba'a: —E'e, eya ee nei Atena cuiñajji nequije. Timoteo, ¡miya poquicue Jesosaja epeeji cuana Tesanonicajo ba'e baa! —eya poanaje.

² Majoya eyaya esejaya epeeji nei Timoteo hoojeanaje miquiana baa. Timoteohua ecuaa nijjeya Eyacuiñajji esohui quea pame nee Jesosaja huohui tiitii ca-

ni. Eyaya oya huohuinaje jama ba'a: —Timoteo, ¡Jesosaja epeeji cuana quea ja'a nee, quea pame nee jja-peequi meesahuacue Jesusa nijje! ¡Oya cuana Jesusaja esohui jayojja jama atiitii meesahuacue quea bihui nee! ³ Jamajjeya onaaya oya cuana cuia canijo, Jesusa nijje jjapeepeaquei'yo ajja —jamaya eyaya Timoteo huohuinaje miquiana que huoojea jjimahuaa.

Jamatii miquianajaya eba pea cuaa Jesusaja epeeji cuana cuia caje'yo. Eyacuiñajjija eba eseya ojaya epeeji cuana quea ja'a poaje onaa cuia cajje. Jamajjeya cuia pajea mee jjima acani. ⁴ E'e, yahuajo miquiana nijje nequiya ecuaaya huohuinaje jama ba'a: —Jesusaja epeeji poanijo pea cuaa eseya cuia caje.

E'e jojo nei. Jjeya pea cuaa miquianaya cuia cani. Jamaya miquianajaya eba. ⁵ Jamajjeya eya quea mete miquianajo poanaje. Timoteo huoojeanaje miquiana baa: —¡A'a Jesusa nijje jjapeequiiani tii ba'ajjaqui'yo socue, Timoteo! —eya poanaje.

E'e, eya quea mete miquianajo poanaje. E'e pojja'a Edosiquiana neiya miquianaya Jesusa nijje jjapeequi pajea mee ca'yonaje. Jamaya epo'yo jojjemo, miquianajaya Eyacuiñajjija esohui epajea'yo jojjemo ecuaa quea yeno pome; esohui huohuijeajji pojja'a eyaya sohuihuohuijea nequinaje.

⁶ E'e de, miquiana ba majje jjeya nei Timoteo poe o'oyanaje e que. Ohuaya huohui caña'yonaje jama ba'a: —Jesusaja epeeji cuana Tesanonicajo ba'e Jesusa nijje jjapeequiiani tii; pajea'yo jjima. Eyacuiñajjija esohui jayojja jama po tiitiiani; pea cuana quea jea nee acani. Eya pea'ai ohuaya quea jea nee acajjequinaje. Oya cuana ecuanajo jjashahuaba tiitiquiani quea pame nee. Jiquio ecua ecuanaya jjashahuabaquinaje o baquijji jamaya oya cuana jjashahuabaquiiani ecuaa bahuajji —jamaya eya Timoteohua huohui caña'yonaje miquianajo.

⁷ Jamajjeya ma shajja'ajja majje ecuaa quea bihui nee poanaje. E'e de, ecuaa aema' poani Jesusa nijje jjapeequiiani. Pea cuaa ecuaa cuia cani pea'ai. Jamatii miquianaya ecuaa quea bihui nee po meeña. E'e, miquianaya Jesusa Quitoja esohui jayojja jama poanijo tii miquianaaya ecuaa quea bihui nee nee po meeña. ⁸ E'e de, miquianaaya esejaya Emeshi Mese neija esohui jayojja jama atiitiañajo, ecuaa quea bihui nee, quea bei nee pea'ai poani. ⁹ E'e jojo nei jjeya miquianajo ecuaaya Eyacuiñajji bihuia neineiaña. Eyacuiñajjiya ecuaa quea bihui nee po mee cani miquianaya quea pame nee onijje jjapeequiiani.

¹⁰ Jamajjeya ecuaa onijje mimi tiitiiani jama ba'a: —Eyacuiñajji, ¡ecuaa poqui meesahua o'oyacue ecuanaja epeeji cuana baa! ¡Ojjaña miquea esohui huohui meesahua o'oyacue onajaya eshajja'ajjajji, quea pame nee minijje ejjapeequi'yojji! —jamaya ecuaa Eyacuiñajji nijje mimiani ojjaña pojjaajo, ojjaña mecajje pea'ai.

¹¹ Ecuaa onijje mimi neineiiani jama pea'ai ba'a: —Eyacuiñajji, ecuanaja Chii ai, Emeshi Mese nei Jesusa pea'ai, ¡che ecuaa poqui meesahuacue Tesanonica huasijje miquea epeeji cuana baa! ¹² E'e Emeshi Mese nei, ¡miquea epeeji cuaa Tesanonicajo ba'e cuaa pea

miquea epeeji cuana quea jea nee nee ameesahuacue! ¡Ojjaña cuana pea'ai quea jea nee nee ameesahuacue! ¡Ecuaa oya cuana quea jea nee nee añña jayojjaya jama oya cuana pea cuana quea jea nee nee ameesahuacue pea'ai! ¹³ E'e Eyacuiñajji, ecuanaja Chii ai, ¡oya cuana Jesusaja epeeji cuana quea ja'a nee po meesahuacue quea boejea, mimishi'ama eba'e'yojji! Jamajjeya ecuanaja Emeshi Mese nei Jesusaa ojjaña ojaya esohuidojojji cuana nijje poe o'oya majje oya cuana mi cojja nei nequi mee caje'yo quea boejea, bicho'ama. E'e, ¡jamaya acue Eyacuiñajji! —jamajjeya eya Eyacuiñajji nijje mimi tiitiiani miquiana huasijje.

¡Quea pame nee ba'ecue Eyacuiñajji minijje quea bihui epojji!

4 Jamajjeya epeeji cuana, eyaya pea esohui tehueje miquianajaya ebajji. Yahuajo ecuaaya miquianaya huohuinaje quea pame nee eba'e'jji. Ma ecuanajaya esohui jayojja jama ba'yanijo, Eyacuiñajji quea bihui nee poani miquiana nijje. Jamaya miquianaya ba'enaje. Jjeya esejaya Emeshi Mese neiya, Jesusa Quitoja ecuaa ma esohui tehue mee ca o'oyani miquiana huasijje quea pame tii eba'e poquijji. ² Yahuajo esejaya Emeshi Mese neiya, Jesusaa ecuaa huoojea canaje miquiana sohuihuohuiya. Ma esohui miquianajaya eba. ³ Eyacuiñajjiya ejjashahuabaquijji miquianajaya eba'e'yojji jama ba'a: —¡Quea pame nee ba'ecue, mimishi'ama nei nei! ¡A'a onajaya ehuanase siijji! ¡A'a peaja yahue siijji! ¡A'a pea cojjojji pojji! ⁴ Dejja cuana, ¡miquianaya eponajo jjahuanaqui sa poanijo quea ja'a nee jjashahuabaquicue! ¡Eyacuiñajjiya esohui jayojja jama epona huanacue quea pame nee! ⁵ ¡A'a quea mimishi jjashahuabaquijji Eyacuiñajjiya epeeji pojjeama cuana jayojja! Oya cuana aje oe pea epona cuana nijje jaani; ojaya ehuanase jaahuana jjima acani. ⁶ Onajaya ehuanase sii canijo, e'e jojo nei Eyacuiñajjiya dejja cuana quea nee nee po mee caje'yo. Jamajjeya miquianaaya ca ca ¡a'a onajaya ehuanase siijji! ¡A'a jea bajji pea'ai! —jamaya Eyacuiñajji jjashahuabaquiiani ojaya epeeji cuanajo. Jamaya yahuajo ecuaaya miquianaya huohuinaje.

⁷ E'e, Eyacuiñajjiya eseya iyaa majje huohui canaje jama ba'a: —¡Ecuaa epeeji cuana po majje ecuaa esohui jayojja jama ba'ecue quea pame nee nee! ¡A'a oe quea mimishi pojji! ¡A'a oe quea mimishi ba'e'jji!

⁸ Jiquio esohui cuana Eyacuiñajjiya esohui, de; dejjaja esohui pojjeama. Jamajjeya ojjaña joya jiquio esohui cuana jayojja jama ba'e sa po'yo ajja Eyacuiñajji nijje jjapeequi sa po'yo ajja; Eyacuiñajji cajaa a'yojji poani. Eyacuiñajjiya ca ca oe ese yasijje ojaya Edojjoshahua Pame huoojea ca'yonaje quea pame nee eba'e meesahua'yojji.

⁹ Miquianaaya Jesusaja pea epeeji cuana quea jea nee añajo, eyaya miquiana que esohui etehue o'oyajji pojjeama ca comajo. E'e, Eyacuiñajjiya miquianaya jjabahuejja meequi canaje ojjaña ojaya epeeji cuana quea jea nee e'ajji. ¹⁰ E'e jojo nei miquianaaya jamaya añña; Jesusaja epeeji cuana ojjaña Masenonia meshijo

ba'e cuana quea jea nee aña. E'e, Eyacuiñajjija esohui jayojja jama aña miquiaaya. Epeeji cuana, ¡Jesosaja epeeji oe quea jea nee nee atiitiicue! Jamaya ecuaaya miquianaya huohui neineiaña.

¹¹ Yahuaajo ecuaaya miquianaya sohuihuohuinaje jama ba'a: —¡Quea bei ba'e tiitiicue! ¡A'a jjachichaquijji pea cuana miminaanaa ani yasijje! ¡Miquea bobijo, daquijo, eba'ejjijo pea'ai chacocue! ¡Quea ja'a nee jjashahuaba tiitiicue! ¹² Jamajjeya miquianaya aquianajji poaje; miquianaya bobi yasijje epo'yojji pojjeama bobijji po'yo majje. Pea huasijje bobijo cua ajja poaje. Jamajjeya miquianaya quea pame ba'yani ba majje Jesosaja epeeji pojjeama cuaa miquianaya shajja'ajja caje Jesosaja esohui miquianaaya huohuiañaajo. Jamajjeya miquianaya quea pame ba'eje.

Emeshi Mese nei Jesosa poe o'oyajo ojaya epeeji emano'yo cuana shequije o'oya

¹³ Epeeji cuana, eyaya jiquio pea esohui tehueaña miquiana ba meeji e'e jojo nei Jesosaja epeeji cuanaajo, ma yahuaajo mano ca'ya poajo. Jamajjeya miquianaaya yeno'ama poaje emano'yo cuanaajo. Pea cuana ca ca, Jesosaja epeeji pojjeama cuana quea yeno nee nee poani emano'yo cuana shequi'yo jjima poanijo poso.

¹⁴ Eseyaya eba e'e jojo nei Jesosa mano'yajo Eyacuiñajjiya oya shequi mee ca o'oya poa. Oya jayojjaya Jesosaja epeeji cuana mano'yajo, Eyacuiñajjiya oya cuana shequi mee caje o'oya. Jamajjeya Jesosa poe o'oyajo Eyacuiñajjiya onijje huoojea caje ojaya epeeji ma yahuaajo mano'ya poa cuana. Jamaya e'e jojo nei; jamaya jjashahuabaquime eseya poani.

¹⁵ E'e, Emeshi Mese neiya Jesosaa ecuaana huohui ca poa jamaya eyaya miquianaya huohuiaña jama ba'a: Poe o'oya majje Emeshi Mese neiya, Jesosaa ojaya epeeji eshe nequi cuana, ojaya epeeji yahuaajo emano'yo cuana nijje ojee jjequisohua caje'yo onijje eyahuasijje. ¹⁶ E'e, Emeshi Mese nei Jesosa eyajo ani meshi yasijje poe jeahuajo janobajjima nei taaaje; esohuidojojji jaahuanajjiya quea ca'a nee neeya emiajjimía caní jayojja taaame poaje, janobajjima nei nei. Eyacuiñajjiya emiajjimía caje cuaa pea'ai. Majoya Emeshi Mese nei eyajo ani jjapashineijje nequioqueje bo biajje nequi. Jamajjeya ojaya epeeji cuanaja, ma yahuaajo mano'ya poaja eyami eshe po mee caje o'oya, eyacua. ¹⁷ Majoya poe o'oya majje, emano'yo cuanaja eyami eshe o'oya po mee majje Jesosa Quitohua ojaya epeeji eshe nequi cuana bo biajje jjequisohua caje'yo emano'yo cuana nijje, ojee. Bo biajje nequije Jesosa nijje. Majoya ojjaña ojaya epeeji cuana onijje ba'e tiitiije'yo Emeshi Mese nei nijje, Jesosa nijje. ¹⁸ Jamajjeya jiquio esohuijo quea bihui nee nee pocue! ¡Jesosaja pea epeeji cuana quea bihui nee po meesahuacue! ¡Jiquio esohui cuana huohui huicha'a huicha'acue! Jama ba'a: —Jesosaa ojjaña ojaya epeeji cuanaja eyami eyacua po mee majje jjequisohua caje'yo eyahuasijje onijje eba'e tiiti'yojji, ojaya epeeji yahuaajo mano'ya poa cuana nijje pea'ai.

¡Jesosaja epoe o'oyajjiyo jjashahuaba tiitiicue!

⁵ Epeeji cuana, ¡shajja'ajjacue mo oe! Jesosaja epoe o'oyajji miquianajaya eba. Jamajjeya eyaya miquiana huasijje etehuejji pojjeama ache pojjaajo oya poeje o'oya ebajo ese. ² Chojja, ¿ache pojjaajo shai poeje o'oya Jesosa? Emeshi Mese neija epoe o'oyajji eseja ya ba jjima epojja. Jiquio ecua siipojji quehuajje poecuajiani jayojja jama Jesosa quehua poecuajije o'oya. ³ O poe jjimahuajo pishana mimishi cuana jama poaje ba'a: "Ojjaña quea bei poani. Ecua quea pame nee ba'e tiitiije'yo" onaa jama po'ajjaquijo tiija Jesosa Quito poeje o'oya. Mimishi cuana quea nee nee po mee caje'yo. E'e, Jesosa poe o'oyajo chama' ejja'aniquehuaquijji poaje. Jiquio ecua epona cuana bacua nee cuajiani jama poecuajime poaje Jesosa.

⁴ Ecua epeeji cuana, miquianaya Jesosa nijje jjapeequiani. Jamajjeya ¡quea ja'a nee jjashahuabaquicue! ¡Jesosaja epoe o'oyajji ishoo'ajja anicue! Jamajjeya jiquio ecua siipojji chamajo poso equi jaahuana ajja jayojja jama a'a pojji! ¡Jesosaja epoe o'oyajji ishoo anicue! ⁵ Ojjaña miquianaya onijje jjapeequiani; quea ja'a nee nee ba'yani, epojjaajo quea ja'a poquiani jayojja jama poani. E'e, eseya eshahua nijje poquiquehua ajja. ¡Joya ecua eshahua quea mimishi poani jama a'a pojji! ⁶ Pea cuana ca ca Jesosaja epoe o'oyajji ishoo ajja. Jamaya pojjeama eseya. Chojja. ¡Jesosaja epoe o'oyajji ejja'ishoo'ajjaqui! ¡Quea ja'a nee ejjashahuabaqui pea'ai!

⁷ Shajjama' cuana quea jjashahuabaqui quehua poani Jesosaja epoe o'oyajji ishoo ajja. Quea jjashahuabaqui quehua poanijo shajjama' cuana quea mimishi ba'yani. E'e, jiquio ecua mecaje huoo majje shajjama' cuana jjashahuabaqui ajja jayojja jama onaya Jesosaja epoe o'oyajjiyo jjashahuabaqui ajja. ⁸ Eseyaca ca, Jesosaja epeeji cuana quea ja'a nee ba'yani Eyacuiñajjiya esohui jama. Quea ja'a nee jjashahuabaquiani. Jamajjeya Jesosaja epoe'yojji ishoo'ajjaña. E'e, jiquio ecua sohuinanohua baa daqui quea moo ese'ojje huosho caní onaja quecua jjima yajji jayojja jama eseya Jesosa nijje jjapeequiani. ¡Pea cuana quea jea nee nee ejja'aqui pea'ai! Jamajjeya Eyacuiñajjiya eseya Edosiquiana nei jeabichajea meesahua caje. Jiquio ecua sohuinanohua ejaahuojja ca'a, baajee sapajo iya caní onaja sapajaja jjima yajji jayojja eseya Jesosa nijje jjapeequiani; esejaya eba Eyacuiñajjiya eseya mimishi cuana cuijea'yo majje ba'e tiitii mee caje'yo onijje eyajo. ⁹ ¿A'a Eyacuiñajjiya eseya babaca canaje cuaqui yasijje quea nee nee epo'yojji? Chojja. Eseyaya Emeshi Mese nei nijje, Jesosa Quito nijje jjapeequianijo, mimishi cuana cuijea majje Eyacuiñajjiya eseya ba'e tiitii mee caje'yo onijje. ¹⁰ E'e, Jesosa Quito eseya mimishijo mano'ya poa. Jamajjeya eseya onijje ba'e tiitii mee caje'yo eyajo. E'e pojja'a o poe o'oya jjimahuajo eseya manoje'yo. E'e pojja'a oya poeje o'oya ese eshe nequijo. Jamatii ojjaña eseya onijje ojee ba'e tiitiije'yo eyajo.

¹¹ Jamajjeya jiquio esohuijo quea bihui nee nee pocue! ¡Jiquio esohui huohui huicha'a huicha'acue Jeso-

saja epeeji cuana quea bihui nee epojji! ¡Oya cuana Jesosa Quito nijje quea jaji nee jjapeequi meesahuacue pea'ai! Jamaya miquiaaya aña; ¡jamaya oe atitiicue!

Pabohua eba'eji quea pamejo tehue canaje

¹² Epeeji cuana, jjeya eyaya pea esohui tehueaña miqianaya ebajji jama ba'a: ¡Jesosaja epeeji etii cuana miquiana nijje nequi shajja'ajjacue oe! Ohuaya miquianaya jaahuana cani, Eyacuiñajji esohui huohui cani pea'ai. ¹³ Oya cuana Eyacuiñajji quea pame nee chachacoanijo ¡quea boti nee acue! ¡Quea pame nee jjashahuabaquicue onajo pea'ai! ¡Ojjaña Jesosaja epeeji cuana nijje quea bei pocue!

¹⁴ E'e epeeji cuana, jama acue pea'ai ba'a: Jesosaja epeeji quea huea poanijo, ¡janobajjima nei onijje mimicue! ¡Epeeji quea mete cuana quea bei po meesahuacue! Epeeji eshahua nijje poquiquehua sa poanijo, ¡quea ja'a ba'e meesahuacue! ¡Tecue'ama po tiitiecue ojjaña cuana nijje! ¹⁵ Onaa miya napa cajje ¡a'a jja-soseaquijji! ¡A'a onaya napa pea'aijji! ¡Ojjaña pojajjo jjashahuaba neineiquicue ojjaña Jesosaja epeeji cuana nijje, pea cuana nijje pea'ai quea pame nee epojji! ¹⁶ Jesosaja epeeji poanijo ¡quea bihui nee po tiitiecue!

¹⁷ ¡Eyacuiñajji nijje mimi huicha'a huicha'acue ojjaña pojajjo! ¹⁸ Miquianaya quea pame ba'yanijo, quea camaja miquianajo poanijo pea'ai ¡jamatii Eyacuiñajji bihuicue oe! Jamaya Eyacuiñajji ejjashahuabaquiyoyji miquianajo, Jesosa Quito nijje jjapeequianijo.

¹⁹ Edojjoshahua Pame minijje mimianijo, ¡a'a shajjama' pojji! ²⁰ Eyacuiñajji esohui huohuijji esohui huohui canijo, ¡shajja'ajja neineicue oe! ²¹ ¡Jamatii ojjaña esohui shajja'ajja neinei majje quea ja'a jjashahua-

baquicue! ¡Esohui e'e nei jama acue! ²² ¡Ojjaña mimishi cuana pajea neinei'yocue! E'e, ¡quea pame nee nee ba'e tiitiecue!

²³ Jamajjeya eya Eyacuiñajji nijje miquiana huasijje mimiani jama ba'a: —Eyacuiñajji, miyaya ojjaña quea bei po tiitii meeaña. ¡Miquea epeeji cuana minijje jjapee neineiqui meesahuacue quea boejea nee epo'yoyji! ¡Oya cuana ba'e meesahuacue quea pame nee nee, mimishi'ama: ojaya ejjashahuabaquijji, ojaya eyami pea'ai, ojaya edojjoshahua pea'ai! Jamajjeya ecuanaja Emeshi Mese nei Jesosa Quito poe o'oyajo oya cuana bicho'ama, mimishi'ama poaje'yo —jamaya eya mimiani Eyacuiñajji nijje miquiana huasijje.

²⁴ Eyacuiñajjiya ojaya esohui miquiana nijje epajea'yoyji pojjeama tii tii. Ohuaya miquianaya iyaa canaje onijje ejjapee tiitiqui poquijji. Jamajjeya ohuaya miquianaya jjapeequi tiitii mee caje'yo quea pame nee nee.

²⁵ Ecuea epeeji cuana, ¡Eyacuiñajji nijje mimicue ecuanajo, ejo pea'ai!

²⁶ Ojjaña Jesosaja epeeji cuana nijje quea bihui nee mimicue jama ba'a: —Pabo miquianajo jjashahuaba tiitiquiani; quea jea nee nee pa mi Paboja.

²⁷ Eyaya Emeshi Mese nei Jesosaja esohui huohuijji poaniya miquianaya huohuiaña jama ba'a: ¡liquio ecuea esohui etehue'yo ojjaña Jesosaja epeeji cuana huasijje huohuicue, ojjaña tii! Jamaya.

²⁸ ¡Esejaya Emeshi Mese neiya Jesosa Quitohua miquianaya quea pame nee cahaahua cahua!

Mahuiso. Eyaya Pabohua ¡liquio esohui tehue'yonaje. Apoa.

2 TESANONISESE

Pabohua esohui tehue ca o'oyanaje Jesusaja epeeji cuana Tesanonicajo ba'e yasijje

1 Eya Pabo. Sinasi, Timoteo pea'ai enijje nequi. Ecuaya jiquio esohui tehue o'oyaña miqiana huasijje, ma Jesusaja epeeji cuana Tesanonica cuiñajji-jo ba'e yasijje. Miquianaya Eyacuiñajji esejaya Chii ai nijje jjapeequiani; Jesosa Quito esejaya Emeshi Mese nei nijje jjapeequiani pea'ai.

² Eseyaya Chii ai Eyacuiñajjiya, esejaya Emeshi Mese nei Jesosa Quitohua pea'ai miqianaya cahaahua cahua quea pame nee! ¡Quea bei capo mee cahua pea'ai! Jesosa Quito poe o'oya majje ojjaña huoojea'yoyji poaje'yo.

³ Epeeji cuana, ecuaaya Eyacuiñajji nijje mimianijo oya bihuiaña miqianajo jama ba'a: —Eyacuiñajji, Jesosaja epeeji cuana Tesanonicajo ba'eca minijje jjapeequi poquipoquiani cuana quea pame nee nee. Ohuaya Jesusaja pea epeeji cuana quea jea nee nee acani; yahuajo ca ca pea cuana quea jea pishana aca poa —jamaya ecuaa Eyacuiñajji nijje mimi huicha'a huicha'ani miqianajo. Jamaya quea pame nee miqianaya Eyacuiñajji esohui jayojjaya jama po tiitianiyo.

⁴ Jamajjeya Eyacuiñajji epeeji cuana pea meshijo ba'e cuana nijje ecuaa mimiani quea bihui nee miqianajo jama ba'a: —Jesosaja epeeji cuana Tesanonicajo ba'eca onijje jjapee tiitiquiani quea pame nee. Eyacuiñajji esohui jayojja jama poani. Oya cuana janobajjima nei napa cani cuaa Jesosa nijje jjapeequianijo. Jamatii Jesosa nijje jjapeequi pajea'yo ajja.

⁵ E'e, jjeya pea cuaa miqianaya napa cani Jesosa nijje jjapeequianijojo. Miquianaya onijje jjapeequi pajea ajjajojo Eyacuiñajjiya miqianaya Jesusaja epeeji quea ca'a po mee cani. Jesosa que, ma ese huoojea'yoyji poani yasijje eseya ba'e tiitii mee caje'yo onijje. Jamajjeya ojjaña cuaa ba caje Eyacuiñajjiya ejjashahuabaquiji miqianajo quea pame nee. ⁶ Eyacuiñajjiya quea pame nee nee atiitii cani. Jamajjeya mimishi cuaa miqianaya napa canijo, quijje Eyacuiñajjiya oya cuana sosequia caje'yo; quea nee nee po mee caje'yo tii tii. ⁷ Eyacuiñajjiya mimishi cuana eseya, Jesusaja epeeji cuana napa pajea mee caje'yo. Jamaya Eyacuiñajjiya eseya acaje'yo Emeshi Mese nei Jesosa poe o'oyajo. E'e, Jesosa eyajo ani quea jeajahua nee nee cuaqui jama oya jjapashineijje nequioqueje. Eyacuiñajjiya esohuidojojji quea ca'a cuana onijje nequioqueje. ⁸ Nequioque majje ohuaya, Jesosaa ojjaña ojaya epeeji pojjeama cuana quea nee nee po mee caje'yo Eyacuiñajjiya esohui shaj-

ja'ajja sa po'yo ajja poajojo, esohui quea pame nee nee Emeshi Mese nei Jesusaja jayojja jama a sa po ajja poa jojjo. ⁹ Jamajjeya oya cuana quea yeno poaje'yo tii tii. Eyacuiñajjiya oya cuana huoojea caje'yo cuaqui yasijje quea nee nee epo tiitii nequi'yoyji. Eseyaya Emeshi Mese nei quea pame nee nee, quea ca'a nee nee nijje eyajo eba'e'yoyji pojjeama oya cuana. ¹⁰ Ojjaña ojaya epeeji cuana ca ca, ma ohua mimishi cuijea ca'yajje quea pame nee po mee ca'yonaje ca ca Jesosaa ba'e mee caje'yo quea pame nee nee poe o'oya majje. Eseyaya Jesosa bihuia neineije'yo ba majje. Epeeji cuana, miqianaya ecuanaja esohui Jesusajo quea bihui nee shajja'ajjanaje. Jamajjeya miqianaya ojaya pea epeeji cuana nijjeya Jesosa bihuia neineije'yo.

¹¹ Jamajjeya ecuaa Eyacuiñajji nijje mimi huicha'a huicha'ani miqiana huasijje jama ba'a: —Eyacuiñajji, miyaya miquea epeeji cuana iyaanaje quea pame nee minijje ejjapeequi'yoyji. Jamajjeya jaya cuana quea pame nee ba'e meesahuacue mi jayojjaya! E'e Eyacuiñajji, miquea epeeji cuana quea pame nee po sa poani. Miya quea ca'a nee nee poani tii. Jamajjeya jaya cuana quea pame nee po meesahuacue! ¡Miquea esohui jayojja jama ameesahua tiitiecue quea pame nee, Jesosa nijje jjapeequianijo! —jamaya eya mimiani Eyacuiñajji nijje.

¹² Jamajjeya Eyacuiñajjiya miqianaya ba'e meesahua canijo, miqiaaya Jesosa bihuiaje jama ba'a: —Emeshi Mese nei Jesosa, ¡miya quea pame nee nee poani tii tiil! Jesosaa miqianaya pea'ai bihuia caje jama ba'a: —Miqianaya ecuaa epeeji quea pame nee.

E'e, jamaya poaje Eyacuiñajjiya, esejaya Emeshi Mese nei Jesosa Quitohua pea'ai miqianaya jaahua cani quea pame nee nee.

Jesosa poe jjimahuajo Edosiquiana neija epeeji quea mimishi nee nee poeje'yo

2 Ecuaa epeeji cuana, e'e jojo nei esejaya Emeshi Mese nei poeje o'oya. Eseyaya, ojjaña ojaya epeeji cuana ojee jjequisohua caje'yo onijje epo'yoyji tii tii. ² Jamajjeya ¡quea jjashahuabaqui ja'a nee pocue! ¡A'a quea mete pojji Jesosa Quito poe o'oyanajejo poso! Onaya siajje poani jama ba'a: —Emeshi Mese nei Jesosa poe o'oyanaje yahuajo. Jamaya Pabo poanaje —jama siajje pomeya poani cuana.

¡A'a quea mete pojji pea cuanaja esohui e'e nei pojjeamajo! Chojja, Jesosa poe o'oya jjima. E'e pojja'a pea cuana siajje poanaje jama ba'a: —Eyacuiñajjiya ecuaa

ma ohua quiije acaje'yo huohui meesahua cani. Ohuaya ecuana ba mee canaje Jesosa Quito poe o'oyanaje —jamaya poani beca cuana.

Onaya siajje poani jama ba'a: —Pabohua, ojaya epeeji cuaa pea'ai tehue canaje Jesosa poe o'oyanaje yahuajo pishana —jamaya poani cuana.

Chojja, oya poe o'oya jjima. ³ ¡Ma siajjepojji cuana a'a shajja'ajjajji! Onaaya miqianaya jjashahuabaqui quehua mee ca chana'. Jamajjeya eyaya miqianaya huohuije Jesosa Quitoja epoe o'oyajji: Ebionei, Jesosa Quito poe jjimahuajo, quea huiso cuana onijje jjapeequi pajea caje'yo, Eyacuiñajji esohui shajja'ajja sa po'yo ajja poaje pea'ai. Majoya Edosiquiana neija epeeji quea mimishi nee nee poeje. Oya Eyacuiñajji quea nee nee po mee caje'yo cuaquijo. ⁴ Ma dejja quea mimishiya jama acaje ba'a: Ohuaya Eyacuiñajji e'e nei, ojjaña eyacuiñajji nisho cuana pea'ai jeabichajea mee sa acaje. Ojjaña cuana jjashahuabaqui quehua mee sa acaje jama ba'a: —Oya oe nee quea pame nee nee poani. ¡Ojjaña oya cabihua cahua! —poaje cuana.

Oya Jenosanena huasijje poqui majje Eyacuiñajji equi quea quemo huasijje dobiquije. Anioque majje siajje poaje jama ba'a: —Eya ca iña Eyacuiñajji e'e jojo nei —jama siajje pomeya poaje.

⁵ Epeeji cuana, yahuajo eyaya miqiana nijje nequiya jamaya huohuinaje. ¿A'a ecuea esohui pajea'yonaje? ⁶ ¿Apiojji ma dejja quea mimishi nee nee poe jjima? Miqianajaya eba. Eyacuiñajji poe mee jjima jjejojo mi poeyani. Jamajjeya quiije ojaya epoejji apoa poajo ma dejja, Edosiquiana neija epeeji quea mimishi nee nee poani poeje. ⁷ Jjeya Edosiquia huoojajji poaniya dejja cuana quea mimishi quehuajje po mee cani. Jamatii jjeya Eyacuiñajji Edosiquiana neija epeeji quea mimishi nee nee poe mee jjima acani. Quijje ca ca oya poeje ojjaña Jesosa nijje jjapeequi mee pajea'yohua nisho. ⁸ Majoya ojjaña oya ba caje ecojja. Jamatii esejaya Emeshi Mese neiya, Jesosaa oya tecueajea caje'yo, mano mee caje'yo. Ma ohua acaninaje chama'yo tii po mee caje'yo. Jamaya Jesosaa quea ca'a nee nee, quea jeajahua nee nee poe'yo majje acaje'yo, ojjaña huoojajji. ⁹ Edosiquiana huoojajji poaniya, Sata-nasa bajjaniya ma dejja quea mimishi huoojaja caje. Jamajjeya ohuaya oya ma pea dejjaa ajjima acani ameesahua caje ojjaña dasiajji nisho. Ba majje ojjaña quea ajjajja nee nee poaje, quea mete nee nee poaje cuana. ¹⁰ Ma dejjaa quea mimishi nee neeya quea huiso cuana dasia caje'yo. Jesosaja epeeji pojjeama cuana dasia neinei caje'yo, ojjaña joya cuaqui yasijje poquije'yo. Onaya aje oe Jesosaja esohui e'e nei shajja'ajja sa po ajjajjo Jesosaa ojaya mimishi ecuijea'yojji pojjeama. Jamajjeya cuaqui yasijje poquije'yo. ¹¹ Shajjama' poani jojoya Eyacuiñajji oya cuana jjashahuabaqui meesahua ajja. Jamajjeya onaaya Edosiquiana neija epeejiya siajje acani e'e jojo nei poso acaje cuaa. ¹² Jamajjeya oya cuana, ojjaña joya Jesosaja esohui shajja'ajja sa po'yo ajja, ojjaña joya mimishi quea boti nee nee ajji poani Eyacuiñajji huoojaja caje'yo cuaqui yasijje.

Eyacuiñajjiya ojaya epeeji cuana ba'e tiitii mee caje'yo

¹³ Jesosaja epeeji cuana, ecuana Eyacuiñajji nijje mi-mi majamajani miqianajo jama ba'a: —Eyacuiñajji, ecuaaya miya bihuiaña. Miyaya miquea epeeji cuana Tesanonicajo ba'e Jesosa nijje jjapeequi meesahua'yonaje quea pame nee —jamaya ecuana mimiani Eyacuiñajji nijje miqianajo.

E'e epeeji cuana, miqianaya esejaya Emeshi Mese neija quea boti nee nee. Yahuajo nei nei, meshi pana jjimahuajo Eyacuiñajjiya miqianaya babaca ca'ya poa Jesosaja epeeji epojji, onijje eba'e tiitii'yojji. Ohuaya Edojjoshahua Pame huoojaja ca'yonaje miqiana Jesosa nijje jjapeequi meesahua'yojji. Jamaya miqianaya Eyacuiñajjiya acani ojaya esohui jayojja jama añajo.

¹⁴ Eyacuiñajjiya ecuana huoojaja canaje miqiana huasijje ojaya esohui huohuiya. Jjashajja'ajjaquijajo Eyacuiñajjiya miqianaya Jesosa nijje jjapeequi meesahua ca'yonaje. Jamajjeya miqianaya esejaya Emeshi Mese nei nijje, Jesosa Quito nijje quea ja'a nee ba'e tiitii mee caje'yo eyajo pea'ai.

¹⁵ Jamajjeya epeeji cuana, ¡esohui e'e nei pojjeama a'a shajja'ajjajji! ¡Ecuana ehuohui'yo, esohui etehue'yo cuana pea'ai a'a pajea'yojji! ¹⁶ Jamajjeya ecuana Eyacuiñajji nijje, Jesosa Quito nijje pea'ai mimi neineiani jama ba'a: —Jesosaja Quito, miya ecuanaja Emeshi Mese nei. Eyacuiñajji, miya ecuanaja Chii ai eyajo ani. Miya quea pame nee nee. Miyaya ecuana quea jea nee añajo. Jamajjeya Edojjoshahua Pame huoojeanaje ecuanaja quea bihui nee po tiitii meeya. Miyaya ecuana ba'e tiitii meeje'yo eyajo pea'ai. ¹⁷ Jamajjeya ¡miquea epeeji cuana Tesanonicajo ba'e quea bihui nee, mete'ama po meecue! ¡Oya cuana ba'e meesahuacue tii quea pame nee! ¡Miquea esohui quea pame nee jayojja jama atiitii meesahuacue pea'ai! —jamaya ecuana mimiani Eyacuiñajji nijje miqianajo.

¡Eyacuiñajji nijje mimicue ecuanajo!

3 Epeeji cuana, jjeyahua nei ecuaaya pea esohui tehueje miqianajaya ebajji. ¡Eyacuiñajji nijje mimicue ecuanajo! Jama acue ba'a: —Eyacuiñajji, ecuanaja Chii, ¡miyaya Pabo, ojaya epeeji cuana pea'ai jaahuanacue! ¡Jesosaja esohui huohuicuaqui meesahuacue ojjaña cuana huasijje! Esohui shajja'ajja cajo ¡quea huiso minijje jjapeequi meesahua'yocue! Jamajjeya ¡ecuana jayojjaya pea cuana jjeyahua nei Jesosaja epeeji po meesahuacue! ¡Ojaya esohuijo jjashajja'ajja meesahua'yocue pea'ai! ² E'e Eyacuiñajji, ¡Pabo, ojaya epeeji cuana pea'ai jaahuanacue dejja mase cuanajo, mimishi cuanajo pea'ai! ¡A'a Pabo napa meeji cuana esohui huohui canijo! —jamaya mimicue Eyacuiñajji nijje ecuanajo. E'e, quea huiso cuana Jesosa nijje jjapeequi sa po'yo ajja.

³ Eseyaya Emeshi Mese nei Jesosaa pajea'yo jjima acaje. Ma ohua yahuajo huohui ca poa jayojja jama ohuaya e'e jojo nei acaje'yo. Jamajjeya miqianaya onijje jjapeequi meesahua caje'yo tii tii quea ja'a nee, ohuaya.

Edosiquiaa miya napa cajo, quea mimishi po mee sa acajo, ohuaya miqianaya jaahuana tiitii caje'yo; quea pame nee ba'e meesahua caje'yo. ⁴ Ecuana jaya eba esejaya Emeshi Mese neiya, Jesusaa miqianaya jaahuana cani. Jamajjeya miqianaaya ecuanaja esohui pajea'yo jjima aje; atiitiije'yo pea'ai. E'e, jamaya ecuanajaya eba. ⁵ Ecuanaaya Eyacuiñajji nijje mimiani miqianajo jama ba'a: —Eyacuiñajji, ecuanaja Chii, miyaya Jesusaja epeeji cuana Tesanonicajo ba'e quea jea nee aña. ¡Maya oya cuana ba meesahuacue! Ecuanaaya Emeshi Mese nei Jesusa meshijo ba'yahua quea nee nee poanaje mimishi cuana napa cajje. Jamatii ohuaya miya pajea'yo ajja tii tii poanaje, quea quene nee nee po jjima pea'ai. ¡Jesusa Quito jayojja jama ojaya epeeji cuana po meecue! Jamajjeya mimishi cuana napa cajo Jesusa nijje jjapee tiitiiquije'yo. ¡Jamaya oe ameesahuacue cuana, Eyacuiñajji! —jamaya ecuanaya Eyacuiñajji nijje mimiani.

Ojjaña cachaco cahua

⁶ Epeeji cuana, ijjeaya ecuanaja pea esohui shajja'ajja-cue! Eseyaya Emeshi Mese nei Jesusa Quitohua ecuanaya huohui meesahua cani jama ba'a: —¡Jesusaja epeeji quea huea cuana nijje a'a jjapeequijji! Ma epeeji quea huea cuana chacochocho ajja, ecuanaja esohui jayojja jama ba'e sa po'yo ajja, jjashajja'ajjaqui ajja pea'ai. ⁷ Miqianaaya ecuanaya banaje miqiana nijje nequiyachaco tiitiinaje, huea'ama poanaje. ¡Ecuana jayojjaya jama pocue; huea'ama chaco tiitiicue! ⁸ E'e, ecuaaya miqianajaya aquiana eba'eji jjeshe majje sosequianaje; sosema' pojjeama jjeshenaje. Mecajje, epojjajo pea'ai chaco tiitiinaje ejjesheji soseje, bobi jjesheji. Jamajjeya miqianajaya bobi cuana jjeshe jjima sosema'. ⁹ Jesusaa ecuanaya huoojea canaje ojaya esohui huohuiya. Jamajjeya esohui huohuiaña soseje ecuaaya miqianaya cahuohuiaña jama ba'a: “¡Ecuana eba'eji quiacue sosema', esohui huohuiaña soseje!” Jamatii ecuaaya miqianaya jamaya ajjima nei nei. Chojja, ecuaaya chaconaje aquiana jjesheji. Jamaya quea pame nee. ¡Ecuana jayojjaya jama pocue! ¡Miqianaaya chacocue! ¹⁰ Miqiana nijje ba'yahua ecuaaya huohuinaje jama ba'a: —Ojjaña joya quea

huesa poani, chacochocho sa po'yo ajja aje oe ¡a'a bobajji!

¹¹ Epeeji cuana, onaaya ecuanaya huohui canaje jama ba'a: —Jesusaja epeeji cuana Tesanonicajo ba'e quea huea poani beca cuana. Pea cuanajo maimaiani, quea miminaa poani, chacochocho sa po'yo ajja tii pea'ai. Jamaya quea pame pojjeama poani.

¹² Jamajjeya esejaya Emeshi Mese neiya, Jesusa Quitohua ecuanaya huohui meesahua cani ojjaña quea huea poani yasijje jama ba'a: —¡Eyacuiñajji esohui jayojja jama ba'ecue! ¡Quea bei pocue! ¡Chacocue oe! ¡Bobi miquea tii ijjiacue! —jama huohuimeya ecuaaya aña joya quea huea poanijo.

¹³ Ecuea epeeji cuana, miqianaaya pea cuana quea pame nee aña. ¡Jamaya quea pame nee atiitiicue! ¡A'a quea huea pojji!

¹⁴ Beca cuana jiquio esohui etehue'yo jayojja jama a sa po'yo ajja pojja'a. ¡Shajjama' cuana ba neineicue! ¡Ona nijje a'a jjapeequijji! Jamajjeya shajjama' cuana quea bicho poaje ojaya mimishi cuanajo. Quea bicho po majje jjashajja'ajjaqui poaja'a. ¹⁵ Jesusaja epeeji cuana quea mimishi poanijo, shajjama' poanijo ¡jama-tii a'a quea quene nee nee pojji onijje! Chojja. Oya cuana miquea epeeji. ¡Huapa pojjeama jayojja jama oya cuana niñeshe'acue!

Pabohua esohui quea bihui nee huohui canaje

¹⁶ Ecuea epeeji cuana, ¡bacue ecuea pea esohui! Eya Eyacuiñajji nijje mimiani miqianajo jama ba'a: —Eyacuiñajji, ecuanaja Emeshi Mese nei, miyaya ecuanaya quea bei po mee tiitiiña. Jamajjeya ¡miquea epeeji cuana Tesanonicajo ba'e quea bei nee nee po meecue, quea bei tii tii! ¡Oya cuana jaahuanacue, quea pame nee ba'e meesahuacue! —jamaya eya poani.

¹⁷ Eya Pabo. Eyaya ca eya jiquio esohui quea bihui nee tehue'yonaje miqiana huasijje. Jamaya eyaya ecuea bajjani tehueña ojjaña ecuea esohui etehue'yojo. Jamajjeya ¡miqianaaya bacue jiquio esohui ecue tehue'yo!

¹⁸ ¡Eseyaya Emeshi Mese neiya Jesusa Quitohua miqianaya quea pame nee cajaanahua cahua!

Mahuiso ecuea esohui. Ahoa.

1 TIMOTEO

Pabohua esohui tehue canaje Timoteo que

1 Timoteo, eyaya esohui tehueaña mi que miquea ebajji. Eya Pabo, Jesosa Quitoja esohui huohuijji. Jamaya Eyacuiñajjiya, Jesosa Quitoja pe'a' ai eya huoojea canaje. Eyacuiñajjiya esejaya mimishi cuana cuijea jeyojeyo ca'yonaje. Jesosa Quitoja eseya ba'e tiitii mee caje'yo onijje, esejaya ejjashahuabaqui'yojji quea pame jayojja. ² Timoteo, miya ecuea ebacua ejja jayojja poani Jesosa nijje jjapeequianijo. Jamajjeya eyaya esohui tehueaña mi que.

Eyacuiñajji esejaya Chii ai eyajo ani; Jesosa Quito eseya Emeshi Mese nei poani pe'a' ai. ¡Ohuaya miya ca-jaahuana cahua quea pame nee! ¡Mijo cajjashahuabaqui'yahua quea pame nee pe'a' ai! ¡Miya quea bei nee capo mee cahua pe'a' ai!

¡Esohui e'e nei pojjeama a'a shajja'ajjajji!

³ Timoteo, ecuea esohui minijje Masenonia meshi ya-sijje poquianijo jama eyaya huohuije o'oya ba'a: ¡Epe-so cuiñajjijo nequicue! Jamajjeya miyaya pea esohui huohuijji cuana huoojeacue jama ba'a: —Esohui e'e nei pojjeama Jesosajo ¡a'a huohui o'oyajji! Esohui e'e nei pojjeama cuana, esohui quea huiso etiiquianaja pe'a' ai ¡a'a shajja'ajjajji! ⁴ Ma esohui cuanajo jjashahuabaqui majje dejja cuana mimicuijjeanobiajea cani cuaa. Jamajjeya ¡oya cuana e'e jojo nei Jesusaja epeejji cuana ca ca jjabahuejja neinei qui meecue! ¡A'a oe esohui quea quehua shajja'ajjajji! ⁵ E'e, Eyacuiñajjiya esohui esohui huohuijji cuana jjashahuabaqui majje mimishi a sa po'yo ajja poani. Quea jjashahuabaqui pame poani pe'a' ai. Jamajjeya Jesusaja esohui e'e jojo nei jama acanijo pe'a' ai pea cuana e'e jojo nei quea jea nee acaje'yo. ⁶ Jamaya po ajja esohui huohuijji shaja. Jamajjeya oya cuana esohui quea ja'a pojjeamajo mimimimiani. ⁷ Moisesija esohui etehue'yojo huohui sa poani. Ma esohui ojaya ba jjima; quea quehua ojaya. Jamatii mimi neinei ani esohui huohuijji shaja cuana.

⁸ Jamaya esejaya eba ba'a: Moisesija esohui etehue'yo cuana quea pame nee. ¿Apiojji acuae Moisesiya esohui tehue ca poa? Quea jjashahuabaqui ja'a po majje ca oe ¡Moiseija esohui etehue'yo jayojjaya jama acue! ⁹ ¡Bacue oe! Eyacuiñajjiya Moisesi esohui tehue mee ca poa dejja quea pame tecueajji pojjeama. Cho, tehue mee canaje shajjama' cuana tecueajji. Dejja shajjama' jama poani ba'a: Esohui etehue'yo jayojja jama a'ajja; emeshi meseja esohui jama a sa po ajja pe'a' ai; Eyacuiñajji shajja'ajja sa po ajja; quea tai ba'ya-

ni; quea jjashahuabaqui tai poani; Eyacuiñajjiyo jjashahuabaqui ajja; oja chii quecuajji poani; oja nae quecuajji poani; pea cuana quecuajji poani pe'a' ai. ¹⁰ E'e, shajjama' cuana pea cojjojji poani; pea dejja see huejja cojjojji poani; pea epona so cojjojji poani; peaja ebacua sii majje quiajji poani; pea jeameejji poani; siajjepojji poani; oya esohui pajea'yojji poani; peaja esohuijo siajje poani pe'a' ai; Eyacuiñajjiya esohui etehue'yo jama po ajja pe'a' ai. ¹¹ E'e, jiquio Moisesija etehue'yo Eyacuiñajjiya esohui quea pame nee nee. Maya eya Eyacuiñajjiya huohui meesahua cani. Oya quea ca'a nee nee; oe nei quea pame nee nee eya jaahuana cani, Eyacuiñajjiya.

Eyaya Jesosa Quito bihuiaña ohua sohuihuohui meesahua caniya jjejojo

¹² Eseyaya Emeshi Mese neija, Jesosa Quitoja eba oja-ya esohui pajea'yo ajja tii tii, eya. Jamajjeya ohuaya eya huoojea ca'yonaje ojaya esohui huohuiya. Jamajjeya eyaya Jesosa Quito bihuiaña ohua sohuihuohui meesahua caniya jjejojo. ¹³ Yahuaajo aje eya Jesosa nijje mimijaji'yonaje, ojo quea tai miminaje, ojaya epeejji cuana iña mee'yonaje ejeanobiajeajji. Jamatii, eya jjashahuabaqui jjimahua, oya ecuea ba jjimahuaajo, Jesosa Quito ejo quea tecue jjashahuabaqui tiitiiqui'yo ajja poanaje, de; ¹⁴ ejo quea pame nee jjashahuabaquinaje de, esejaya Emeshi Mese nei, Jesosa Quito. Jamajjeya jjeja eya ojaya epeejji nei poani; ohuaya eya quea jea nee nee acani, de.

¹⁵ ¡Bacue jiquio esohui e'e nei nei, quea pame nee poani! Ojjaña cuaa caba neinei cahua jama ba'a: Jesosa Quito jiquio meshi yasijje poeyanaje ojjaña cuanaja mimishi cuana cuijea'yohua. Eya jamaya jjashahuabaqui ani ba'a: Ojjaña dejja cuana quea mimishi pishana; eya ca ca quea mimishi nee nee poanaje. ¹⁶ Jamatii Jesosa Quito ejo quea pame nee jjashahuabaquinaje, de. Jamajjeya oya enijje tecue'ama poanijo, pea cuaa ba cani oya tecue'ama enijje, oya tecue'ama dejja mimishi cuana nijje, ca onijje jjapeequi'yajo. Ba'e tiitii mee caje'yo Eyacuiñajji nijje.

¹⁷ ¡Emeshi Mese nei ejjashajja'ajjaqui! ¡Ejjabihuia tiitiiqui pe'a' ai! Eyacuiñajji ese huoojeajji poani nequi tiitii-je'yo. E'e, oe nei nei Eyacuiñajji yani; pea chama'. Jamajjeya oya dejja cuanaja ecojja bajji pojjeama. Jama-ya capoahua.

Jamaya pea cuana cahuhui cahua Timoteohua

¹⁸ E'e Timoteo, miya ecue bacua ejja jayojja jama poani. Jamajje eyaya miya huoojeaña ecuea esohui

huohuiya pea esohui huohuiji cuana huasijje. Yahuaajo pishana pea cuaa miya huohui canaje jama ba'a: —Timoteo, quijje miya esohui huohuiji quea pame nee nee poaje'yo —acanaje cuaa miya.

Jamajjeya ¡esohui e'e jojo nei janobajjima nei huohui-cue quea bihui nee, dejja quea ca'a jayojjaa! ¹⁹ ¡Eyacuiñajji esohui e'e nei shahuaba neineicue! ¡Quea ja'a nee ba'ecue e'e jojo nei ojaya esohui jayojja jama! Be-ca cuana jama a sa po'yo ajja jjejojo poquiquehua'yonaje. Jamajjeya aema' nei nei jayojja jama poanaje. Esohui e'e jojo nei pajea ca'yonaje, Jesosa Quitoja.

²⁰ Jamaya poanaje dejja bajjani Imeneo, Anejano cuanaya. Jamajje eyaya oya cuana cajaa a'yonaje. ¡Edosiquiaa canapa cahua! Jamajjeya ¡oya cuana cajjabahuejjaquiahua Eyacuiñajji nijje emimijaji pajea'yojji!

Jesosaja epeeji cuana ojjaña cuanajo camimiquiahua Eyacuiñajji nijje

2 Ebionei eyaya huohuiaña jama ba'a: ¡Eyacuiñajji nijje mimicue! Eseyaya cuana Eyacuiñajji nijje camimiquiahua ojjaña cuanajo. Jamajjeya Eyacuiñajji epeeji cuana jama amecue ba'a: —Ecue Chii ai, Eyacuiñajji, ¡eya ba'e meesahuacue! ¡Ojjaña cuana ba'e meesahuacue pea'ai! Ecuaya miya bihuiaña. ² Jamajjeya ¡ojjaña cuana jaahuanacue! ¡Emeshi mese cuana, emeshi meseja echacoji cuana pea'ai huohui meesahuacue quea bei nee! Jamajjeya ecuanaya miquea esohui jayojja jama quea ja'a nee ba'yanijo quea bei nee nequije'yo —jamaya acue cuana.

³ E'e, jamaya onijje mimianijo Eyacuiñajji quea bihui nee po meeña, eseyaya. Ohuaya esejaya mimishi cuana cuijea ca'yonaje, de. ⁴ Ojjañaja mimishi cuana cuijea neinei'yo sa poani pea'ai. Ojaya esohui e'e nei ba meesahua sa poani pea'ai. ⁵ Oya ojjaña nahue sa poani. E'e, Eyacuiñajji e'e jojo nei oe nei yani dejja cuiñajji. Cuanaya oe nei yani Jesosa Quito. E'e, Eyacuiñajji dejja quea mimishijo quea tecue poani. Jamajjeya Jesosa Quito Eyacuiñajji nijje mimiani ojjaña dejja mimishi cuanajo. Eyacuiñajji quea bei ona nijje poaje'yo. Jesosa Quito Eyacuiñajji; oya dejja pea'aiya poanaje. ⁶ Oya mano'yonaje ojjañaja mimishi cuijea mee'yojji sosejje. Jamaya oya sa poanaje. Jamajjeya ojjaña cuana ba'e tii-tii mee sa poani Eyacuiñajji nijje eyajo. ⁷ Jamajjeya Jesosaa huoojea canaje ojaya esohui huohuiya. E'e jojo nei, siajje pojjeama, ohuaya eya huoojea ca'yonaje Jodio pojjeama cuana huasijje ojaya esohui e'e nei huohuiya. Jamajjeya ojjaña cuana eyaya Jesosajo jjabahuejjaqui meeje'yo.

Jamaya ca'a cahua Eyacuiñajji equijo

⁸ Majoya eyaya miya huohuiaña jama ba'a: Eseyaya, ojjaña meshi cuanajo ba'e cuana pea'ai camimiquiahua Eyacuiñajji nijje ojaya equijo. Onijje mimianijo ¡a'a quea mimishi pojji! ¡A'a quea quene pojji pea cuana nijje! ¡A'a jjamimicuijjea nobiajeaquijji pea'ai!

⁹ Majoya eyaya miya huohui meeña epona cuana jama ba'a: —Epona cuana, ¡daqui quea pame nee huos-

hocue! ¡A'a daqui huoshoji quea bicho epo mee'yojji! ¡Aquiana quea nahue neeya ehooja a'a ijji ca'a meeji! ¡Mei siyosiyoy quea nahue nee nee, eijji quea nahue nee nee pea'ai a'a yijji! ¡Daqui quea nahue nee nee a'a huoshoji pea'ai, eponaa! —jamaya acue, Timoteo, jamajjeya peaja ejea bajji pojjeama.

¹⁰ Timoteo, ¡epona cuana jama acue pea'ai ba'a: —Epona cuana, ¡miya Eyacuiñajji bihuiajji poanijo quea ja'a nee nee ba'ecue! ¹¹ ¡Jjabahuejjaquicue, Jesosaja epeeji nei pocue! ¡Esohui huohuijiya esohui huohui canijo jashajja'ajjaquicue! ¡A'a mimi neinei! —jamaya epona cuana acue!

¹² Eyaya epona cuana huoojea ajja dejja cuana huasijje esohui huohuiya. Cuanaya ¡a'a dejja cuana huoojeajji eponaa! Cho, jamaya quea pame pojjeama. Epona ca oe cajjashajja'ajjaquiahua. ¹³ E'e, Eyacuiñajjiya ebionei dejja Adana bajjani pana coo ca'ya poa. Majoya Adana pana'yo majje epona Ema bajjani pana ca'ya poa. ¹⁴ Edosiquianaja Adana dasia'yo jjiima poa; epona ca ca oe dasia ca'ya poa. Dasia cajje shajjama' poanaje. Quea mimishi aca'yonaje Emaa. ¹⁵ Jamajjeya bacua cuayanijo epona quea nee nee poani. Jamatii, Eyacuiñajjiya eponaja mimishi cuana cuijea caje'yo pea'ai ca ojaya esohui jayojja jama jshahuabaquianijo, ojaya epeeji poanijo. (Eyacuiñajjiya epona cuana cuajji ya-sijje huoojea ajja ojaya epeeji cuana poanijo.)

Jesosaja epeeji jaahuanajji cuana jamaya capohua

3 Timoteo, ¡pea esohui shajja'ajjacue! Jiquio esohui e'e nei, ba'a: Dejja cuana Jesosaja epeeji cuana jaahuana sa poanijo, jamaya quea pame nee. ² E'e Timoteo, jamajjeya miyaya Jesosaja epeeji jaahuanajji epoji jama huohucue ba'a: —¡Quea pame nee ba'ecue! Jamajjeya peaa miya etecueajji pojjeama. ¡Ehuana-se oe nei huanacue! ¡Quea ja'a nee jshahuabaquicue, yajjajja'ama! Jamajjeya quea mimishi ba'e ajja. ¡Quea pame nee pea'ai ba'ecue pea cuana nijje! ¡Jjapeequicue pea cuana nijje! ¡Quea ja'a nee Eyacuiñajjiya esohui huohucue! ³ ¡Ecahuishi, ejjisesa quea sese nee nee a'a ishijji! ¡A'a jjacuiaquijji! Cho. ¡Quea bei pocue ojjaña nijje! ¡A'a quea tecue pojji! ¡A'a quea bejjo huiso sa pojji! ⁴ Ojjaña cuana miquea equijo ba'e jaahuanacue jama ba'a: ¡Miquea ebacua cuana miquea esohui jayojja jama po meecue! ¡Jshajja'ajjaqui meecue pea'ai! —jamaya Jesosaja epeeji jaahuanajji epoji acue, Timoteo.

⁵ E'e, Jesosaja epeeji jaahuanajjiya ojjaña cuana ojaya equijo ba'e jaahuanahuana ajjajo Jesosaja epeeji cuana jaahuana ajja pea'ai poaje. ⁶ Timoteo, ¡Jesosaja epeeji jjeya nei jjapeequi a'a huoojeajji Jesosaja epeeji jaahuana! Oya shajjama' po chana'; quea ja'a huohui ajja. Jamajjeya Eyacuiñajjiya oya tecuea ca chana'. Jamaya Eyacuiñajjiya Edosiquiana shajjama' poanijo tecueajea ca'yonaje yahuaajo nei nei. ⁷ E'e, Jesosaja epeeji jaahuanajji quea huiso shequiajajo jjapeequiani ca-ba'eyahua quea pame nee. Jamajjeya Jesosaja epeeji pojjeama cuaa ojo huohui caje jama ba'a: —E'e, oya dejja quea pame nee poani tii.

Oya quea tai poajo ca ca pea cuaa oya tecueajea ca-je'yo. Edosiquianaa pea cuana onijje mimijaji mee ca chana', dasia ca chana'. Jamajjeya onaa tecuea cajje quea yeno po majje quea mimishi po chana'.

Jesosaja epeejjija eba'esahuajji cuana jamaya ca-poahua

⁸ Timoteo, ¡Jesosaja epeejjija eba'esahuajji cuana babaquicue! Jama acue cuana ba'a: —¡Quea ja'a nee ba'ecue! ¡E'e jojo nei nei mimicue! ¡A'a quea huiso ishijji, a'a huoojji! ¡A'a quea dejja tai pojji! ¡A'a edasiajji pojji pea'ai! ⁹ ¡Ojjaña Eyacuiñajji esohui e'e nei jama atiiticue quea ja'a nee! Yahuaajo ma esohui Eyacuiñajji-ja dejja cuana ba meesahua jjiima; jjeja ba mee cani quea huiso —jamaya oya cuana acue, Timoteo.

¹⁰ Cuanaya ¡Jesosaja epeejjija eba'esahuajji cuana baba jjimahua oya ba neineicue! ¡Oya jjabahuejjaqui meecue pea'ai! ¡Quea pame nee poanijo, oya huoojeacue Jesosaja epeeji ba'esahuaa!

¹¹ Jesosaja epeejjija eba'esahuajji cuanaja ehuanase cuanaya jama acue ba'a, Timoteo: —¡Quea ja'a nee ba'ecue, epona! ¡A'a quea mimijjequijea pojji! ¡A'a ishishijji! ¡Jesosaja epeeji cuana ba'e meesahuacue; nishelui'ama pocue! —jamaya miyaya oya cuana acue, Timoteo.

¹² E'e Timoteo, Jesosaja epeejjija eba'esahuajji baba-ca majje oya cuana jiquio jama acue ba'a: —¡Oe ehuanase huanacue! ¡Miquea ebacua cuana, ojjaña miquea equijo ba'e pea'ai jaahuanacue quea ja'a nee! ¹³ E'e, miyaya quea ja'a nee Jesosaja epeeji ba'esahuañaajo, onaaya miya ojjaña shajja'ajja cajje quea bihui nee. Jesosa Quitoja esohui bicho'ama nei huohuime aje, ¡quea ja'a nee acue!

E'e Timoteo, ¡Jesosaja epeeji quea pame nee babacacue Jesosaja epeeji ba'esahuajji! Jamaya apoa.

Eyacuiñajji equijo ojaya epeeji jamaya capoahua

¹⁴ Timoteo, jiquio pea esohui cuana eyaya tehueaña mi que. Eya mi baa poqui sa poani quijje pishana.

¹⁵ E'e pojja'a jjeja eya epoquijji pojjeama mi que. Jamajjeya eyaya mi que esohui tehueaña mi huohuijji achajja Jesosaja epeeji cuana poaje so'o quea pame nee epojji. Ecuea esohui etehue'yojo miyaya ba meeje cuana. E'e, Eyacuiñajji ca ca enequi eshe tii tii. Ojaya epeeji cuana ojjaña meshijo ba'yani. Oya cuana Eyacuiñajji huapa pojjeama jayojja jama poani. Ojaya esohui e'e nei ojjaña cuana ba meesahua cani, Eyacuiñajjiya. ¹⁶ Jamaya e'e jojo nei ba'a: Eyacuiñajji esohui e'e nei, quea pame nee nee. Ma esohui yahuaajo ojaya ba mee jjiima poa. Jjeja ojaya esohuijji eseya quea ja'a nee ba'eje'yo. Jamaya ojaya esohui Jesosa Quitoja ba'a:

“Eyacuiñajji jiquio meshi yasijje poeyanaje; dejja jayojjaya yamijji ba'ya poa. Edojjoshahua Pameya huohui canaje quea pame nee oya. Eyacuiñajji esohuidojojji cuaa oya ba canaje. Ojaya epeeji cuaa ojo huohui canaje Jodio pojjeama cuana huasijje. Quea huiso dejja

cuaa ojjaña meshi cuanajo oja sohui shajja'ajja majje jjabahuejjaqui ca'yonaje. Quijje Eyacuiñajjiya oya jjequisohua ca'yonaje eya huasijje”.

Jamaya yahuaajo nei Isaiaa tehue ca poa.

Beca cuana Eyacuiñajji nijje poquipajeanae

⁴ Timoteo, pea esohui eyaya huohuije esohui huohuijji nishojo. Yahuaajo nei Edojjoshahua Pameya huohui ca poa jama ba'a: —Quijje Jesosa Quito poe o'oya jjimahuajo, Eyacuiñajji esohuijji jjabahuejjaqui majje beca cuaa ojaya esohui jayojja jama apajea cajje'yo. Eshahua cuana shajja'ajja cajje. Eshahuaja esohui tai cuana jayojja jama acaje. Eshahua cuana aje oe jjadasiaquijji, de. ² Ojaya esohui e'e nei pojjeama. Eshahua cuaa beca dejja cuana sijje po mee cani. Jamajjeya ma dejja cuana sijje po majje bicho'ama poani. ³ Jama sijje pome poani ba'a: —¡Eponajo a'a jjuhanaquijji! ¡A'a beca bobi cuana ijjiijji; quea ajja coma! ¡Eshahuaa cuia cajje! —poani.

⁴ Chojja. Eyacuiñajjiya ojjaña bobi cuana pana ca'ya poa e'ijjiijji; quea pame nee. Jamajjeya Jesosaja epeeji cuaa esohui e'e nei ba majje, Eyacuiñajji bobijo bihuia majje pea'ai ojjaña bobi quea pame cuana ca'ijji cahua. ⁵ Jamajjeya Eyacuiñajji nijje mimi majje, ojaya esohui mimi majje pea'ai quea jaji nee ca'ijji cahua bobi cuana.

¡Jesosaja echacojji quea pame nee pocue!

⁶ Timoteo, pea esohui eyaya tehueaña mi que Jesosa Quitoja jama ba'a: ¡Esohui cuana ojo Jesosaja epeeji cuana huasijje huohui majamajacue miyaya! Jamajjeya oya cuana ba'e meesahuaje quea pame nee. ¡Eyacuiñajji esohui e'e nei cuana ba huicha'a huicha'acue! Miya ojaya esohui huohuijji quea ja'a nee poaje pea'ai. Ma esohui e'e nei Jesosa Quitoja yahuaajo shajja'ajja majje jamaya ahucha'a'yonaje miyaya, Timoteo. ⁷ ¡Etiquianaja esohui quea quehua a'a shajja'ajji, Eyacuiñajji esohui cuana jayojja jama pojjeama! Onajaya esohuiya quea pame ba'e mee nisho cani. ¡A'a jamaya pojji! Timoteo, ¡miyaya oe Eyacuiñajji esohui jayojja jama amajamajacue! ⁸ Jamaya acue ba'a: Chaco tiitii majje miquea eyami quea ca'a poaje. Jamaya quea pame pishana. Eyacuiñajji esohui jayojja jama atiitii majje ojaya epeeji quea ja'a poaje. Jamaya quea pame nee nee. Jamaya poanijo Eyacuiñajjiya miya jjejahua nei quea pame nee ba'e mee cajje; mano'yajo, ba'e tiitii mee cajje'yo eyajo pea'ai.

⁹ E'e, jiquio esohui e'e nei nei. Jamajjeya ¡ojjaña cashajja'ajja tiitii cahua! ¹⁰ Jamajjeya Eyacuiñajji esohui e'e nei poanijo ecuaana janobajjima nei Jesosaja epeeji cuanajo chacochoani. Pea ecuaana nijje janobajjima mimijajiani. Jamatii Eyacuiñajji eshe yani; o epoe o'oyajji cuuaaya ishoa'ajjaña. Ohuaya ojjaña onijje jja-peequi mee'yo sa acani. Ojjaña joya e'e jojo nei poani ohuaya mimishi cuijea cajje'yo. ¹¹ Jamajjeya jiquio esohui cuana huohui neineicue! ¡Ojjaña cuana jjabahuejjaqui meecue miyaya, Timoteo!

¡Quea pame nee ba'ecue, Timoteo!

¹² Timoteo, miya edejja sho'i pishana poani. Jamatii pea cuaa miquea esohui cashajja'ajja cahua. Jamajjeya ¡quea ja'a nee Jesosa Quitojo mimicue, miya! ¡Quea jaji nee oe pocue! ¡Pea cuana quea jea nee acue! ¡Eyacuiñajji nijje jjapee tiitiuicue e'e jojo nei! ¡Ojaya epeeji nei nei pocue! ¡Quea jashahuabaqui ja'a nee oe pocue pea'ai! Jamajjeya ojjaña Jesosaja epeeji cuana mi jayojjaya poaje. Quea pame nee nee acaje'yo cuaa.

¹³ Eya, Pabo poeje quijje pishana mi baa. E poe jji-mahuajo, ¡Eyacuiñajjija esohui huohuicue ojjaña joya Jesosaja epeeji ejjachichaqui ani yasijje! ¡Ojjaña cuana jjabahuejjaqui meesahuacue; Jesosaja esohui ba meesahuacue pea'ai! ¹⁴ Yahuajo Jesosaja epeeji etii cuaa miya huoojea sa poanijo mijo huohui canaje jama ba'a: —Timoteo quijje esohui huohuijji quea pame nee poaje'yo.

Jamajjeya onaa huoojea cajje miya Eyacuiñajjija esohui huohui meesahua canaje. ¡Maya a'a pajea'yojji! ¡Jamaya po tiitiicue Eyacuiñajjijo! ¹⁵ Jamajjeya ¡Eyacuiñajjija esohui ba neineicue! ¡Ojaya esohuijo jashahua-ba tiitiuicue pea'ai! Jamajjeya ojjaña miya ba cajje jjea esohui ba neinei'yona; yahuajo miquea bajea jjima poanaje.

¹⁶ E'e, ¡miquea esohui jayojja jama ba'e tiitiicue quea pame nee! ¡Esohui e'e nei huohui huicha'a huicha'acue! Jamajjeya miya poquiquehua ajja eshahua ejojji tai yasijje. Pea cuana miquea esohui shajja'ajja majje cuaqui yasijje epoqui'yojji pojjeama pea'ai.

¡Jamaya ba'ecue Jesosaja epeeji cuana nijje!

5 Pea esohui eyaya, Pabohua tehueaña mi que, Timoteo: ¡Edejja tii a'a tecueajji! ¡Quea jea acue! Quea mimishi poajo, ¡onijje mimicue, mique chii nijje jama mimimeya pocue! ¡Oya ba meesahuacue pea'ai! ¡Mique chahua jayojja jama jaahuanameya acue esho'i cuana! ² ¡Epona tii nijje mimicue quea pame nee! Quea mimishi poajo, ¡miquea enaese nijje mimiani jayojjaya jama mimimeya pocue! Epona sho'i cuana quea mimishi poajo, ¡mique jjo'i nijje jayojja jama mimimeya oe pocue! E'e, ¡epona cuana nijje oe quea pame nee nee pocue!

E'ahuemano cuanajo huohui canaje Pabohua

³ Timoteo, miyaya Jesosaja epeeji cuana e'ahuemanojo jama huohuicue ba'a: —¡E'ahuemano cuana ba'e meesahuacue quea pame nee, ca ebacua etii chamajo! ⁴ E'ahuemanoja ebacua cuana yanijo, oja osecua cuana yanijo ohuaya cahaahuana cahua oja nae; oja yano mese cuanaya cahaahuana cahua oja equijo. Nis-hehui'ama capoahua. ¡Oja chii etii, oja nae epona tii po'yajo pea'ai cabobia cahua! Esho'yahua eseya eseja naeya bobia ca poa. Jamaya eseyaya eseja nae aje'yo ohua jaahuana ca poa sosejje. Jamaya Eyacuiñajjija quea boti nee nee. ⁵ Beca e'ahuemano quea yeno nee nee poani; oja bacua cuana chama', oja osecua cuana

pea'ai chama'. Jamajjeya e'ahuemano aema' Eyacuiñajji nijje jjapeequiiani. Ebacua etii chamajo Eyacuiñajji nijje mimi huicha'a huicha'ani ojjaña pojja, mecajje pea'ai. Onijje mimiani pea cuanajo pea'ai. Jamajjeya Eyacuiñajjija pea cuana ba'e meesahua cani quea pame nee.

⁶ Beca cuana e'ahuemano quea mimishi poani. Yajjajja'ama. Poquiquehuani cuaqui yasijje, Eyacuiñajji nijje jjapeequi jjima jayojja jama poani. ⁷ Jamajjeya ¡jiquio esohui cuana huohuicue e'ahuemanoja bacua cuana huasijje, Jesosaja epeeji cuana huasijje! Jamajjeya pea cuanaja oya cuana etecueajji pojjeama. ⁸ E'e, esejaya huapa pojjeama cuana, ojjaña eseja equijo ba'e mi jaahuana majje eseyaya Eyacuiñajji cajaa aña. Jamaya quea tai nee nee. Pea cuana Eyacuiñajjija esohui ba po jjima cuana ca ca quea tai pishana poani.

⁹ Jamajjeya ¡Jesosaja epeeji e'ahuemano quea pame nee miqianaaya ba'e meesahuacue! Ca joya jama ba'yani ba'a: E'ahuemano epona tii, pea beca peejjima dejjaja pea ejojji cuana huiso shequiajame, 60 shequiajame etii; pea yahuejo jahuacui'yo jjima; ¹⁰ ojjaña cuana ojo quea pame mimianijo pea'ai, ohuaya ebacua quea pame nee tii mee ca'yona; pea cuana ojaya eba pojjeama bobia canajejo pea'ai, pea cuanaja equi shabojeajji epo pea'ai; emanojaa cuana jaahuana canajejo pea'ai, quea pame nee ahuicha'a huicha'a ca'yona; pea'ai, ¡ma e'ahuemano ba'e meesahuacue quea pame nee! E'e, oja bajjani catehuequiahua pea e'ahuemano etii quea pame cuana nijje Jesosaja epeeji cuanaja eba'e meesahuajji.

¹¹ Ecuca ehuhuijji e'ahuemano etii pishana jama ba'a: E'ahuemano cuana etii pishana ca ca e'ahuemano etii nei jayojja jama pojjeama; chacochocho ajja Jesosa Quitojo. ¡A'a ojaya bajjani tehuejji pea e'ahuemano etii quea pame nijje! Quea dejja jea po o'oya majje jahuaeajji o'oya. Jesosa Quito nijje jjapeequi pajea'yo chana'. ¹² Jamajjeya beca cuana ojaya esohui ma ecua oya Jesosa Quito nijje poanaje jama e'ajji pojjeama. E'e, yahuajo ohuaya huohui canaje jama ba'a: —Ecuca jahuaeajji o'oyajji pojjeama; Jesosa Quitojo nei chacochocho'yo tii tii —poanaje.

Ma o Jesosa Quito nijje jama miminaje pajea ca'yona. Jamajjeya Jesosaja epeeji cuaa oya cuana tecuea cajje'yo. ¹³ E'ahuemano esho'i pishana chacochocho ajja jo quea huea poaje. Poqui majamajaje ojjaña equi cuana huasijje anicuaa. Pea cuana niñeba cajje pojja'a. Ojjaña cuanajo quea miminaa nee nee poanijo mimijaji chana'. ¹⁴ Timoteo, jamajjeya eya e'ahuemanojo jashahuabaqui jama ba'a: E'ahuemano cuana etii pojjeama cajahuaeajji o'oyahua. Ojaya ebacua cuana caitii mee cahua; oja equijo cachacochochoquiahua pea'ai. Jamaya poanijo mimishi'ama nei. Jamajjeya Jesosaja epeeji pojjeama cuana ojaya epeeji cuana nijje tecue tecue ajja poaje. ¹⁵ Eya jamaya mimiani oe pojji e'ahuemano cuana nijje, ma Jesosa nijje jjapeequi pajea'yani nijje, Edosiquiana nijje jjapeequi sa poani nijje pea'ai.

¹⁶ Jamajjeya Jesosaja epeeji cuaa e'ahuemano oja huapa pojjeama cahaahuana cahua ojaya equijo; ¡a'a

oya Jesusaja pea epeeji cuana jaahuana meeji! Jamajjeya Jesusaja epeejiya e'ahuemano jaahuana caje, ca joya ebacua etii chamajo.

Jesosaja epeeji jaahuanajji etii

¹⁷ Jesusaja epeeji jaahuanajji cuaa Jesusaja epeeji quea pame jaahuana canajejo, caba'e meesahua cahua Jesusaja epeeji cuaa. E'e, ohuaya Eyacuiñajjiya esohui etehue'yo huohui canaje; onaya jjabahuejjaqui mee canaje pea'ai. Jamajjeya ꞑcaba'e meesahua cahua cuaa! ¹⁸ E'e, yahuajo nei jamaya Moisesija esohui etehue'yo poa ba'a:

“Ana'aiya anoso ai dojo cani edaasa biajje. ꞑJamajjeya anoso ai oe pojji quiacue e'ijji!”

Yahuajo nei jama poanaje pea'ai ba'a: “ꞑEchacojiya chaco cajo sosequiacue!” Jamajjeya ꞑJesusaja epeeji jaahuanajji sosequiacue ohua chaco canaje sosejje!

¹⁹ Oe dejjaa Jesusaja epeeji jaahuanajji tecuea cajo, ꞑa'a shajja'ajjaji! ꞑBeca, pea beca peejiima pojja'a pea jayojja pea'ai mimime poajo, shajja'ajjacue! ²⁰ Jesusaja epeeji jaahuanajji quea mimishi po huicha'a huicha'anijo, ꞑtecueaquicue ejjabahuejjaquiji, ojjaña ba caqui, ojjaña jjabahuejjaquiji! Jamajjeya pea cuana mimishijo quea mete poaje.

²¹ Timoteo, Eyacuiñajjiya, Jesusa Quitohua, esohuidojojji quea pame cuaa cojja ba canijo pea'ai, eyaya miya huohuaña jama ba'a: ꞑMiyaya ecuea esohui jama acue! ꞑJashahuabaquicue quea ja'a nee Jesusaja epeeji jaahuanajji cuana tecuea jjimahuajo! ꞑOya jayojjaya ojjaña apea'aicue!

²² ꞑJesusaja epeeji jjeja nei jjapeequi a'a huoojja cuajiji Jesusaja epeeji jaahuanaa! ꞑOya ba neineicue huoojja jjimahuua! Oya quea mimishi poajo, pea cuaa miya tecuea ca chana'. ꞑQuea ja'a nee jashahuaba tiitiicue! Pea mimishi acanijo, ꞑona nijje a'a quea mimishi pojji!

²³ Timoteo, miquea see ai quea nee po huicha'a huicha'anijo ꞑoe pojji acuijajja na, uva na quea sese pishana ishucue, ena oopana pojjeama!

²⁴ Jamajje jjeahua nei beca cuaa mimishi quehuajje pojjeama acani; ojjaña ba cani. Eyacuiñajjiya oja mimishi cuanajo quea nee nee po mee caje'yo quijje pishana. Pea cuaa mimishi cuana quehuajje acani. Quijje oja mimishi ba majje ojjaña oya cuana tecuea caje'yo. ²⁵ Jamaya pea'ai beca cuaa quea pame nee acani. Jjeja nei ojjaña oya ba cani. Oe pojji cuaa quea pame nee quehuajje acani. Quijje ojjaña ba caje oya quea pame nee nee poani.

Echacoji cuaa sosemajo chacochoaniya o chacomeeji cashajja'ajja cahua

6 Timoteo, echacoji cuana Jesusaja epeeji cuana huohucue jama ba'a: —Epeeji cuana, ꞑmiquianaaya chacoña sosemajo, mi chacomeejiya esohui shajja'ajjacue! Miquiana mi jashajja'ajjaquijajo, pea cuaa Eyacuiñajji niñeba ca chana'; esejaya esohuijo pea'ai jjanifebaqui chana'. ² Miquea echacomeeji Je-

sosa nijje jjapeequianijo, edoe mese jayojja tecue'ama poanijo, ꞑa'a shajjama' pojji! Chojja, ꞑshajja'ajja tiitiicue oya! Mi chacomeeji poani Jesusaja epeeji poanijo Jesusa ojaya quea boti nee pea'ai. Miya miquea echacomeejiya yajjiyo chacochoanijo quea huiso sosejje poaje ojaya —jamaya acue echacoji cuana, Timoteo.

E'e Timoteo, ꞑiquio esohui cuana huohui neineicue! ꞑJamaya ojjaña cuana jjabahuejjaqui meesahuacue!

ꞑQuea bei ba'ecue esohui e'e nei jayojja!

³ Timoteo, pea dejja cuaa ecuanaja esohui jayojja jama huohui ajjajo, esohui e'e nei Jesusajo huohui sa po ajjajo oya cuana shajjama', de. Eba'e quea ja'a neejo huohui sa po ajjajo pea'ai oya cuana shajjama' poani.

⁴ Esohui e'e nei onajaya ba jjima. Esohui quea quehuajo mimicuijjeanojjea sa poani, de. Mimicuijjeanojjea canijo dejja cuana quea quene po mee cani pea cuana nijje. Quea bei pojjeama po mee cani; pea cuana mimijaji mee cani; quea tai nee jashahuabaqui mee cani pea cuanajo pea'ai. ⁵ E'e, esohui e'e jojo neijo jjabahuejjaqui mee jjimajo, quea jashahuabaqui tai neejo pea'ai quea huiso cuaa mimicuijjeanojjea huicha'a cani. Jamajjeya oya cuana jashahuaba quehuacuani jama ba'a: —Ecuaya Eyacuiñajjiya esohui huohuañaajo quea huiso ejjesheji chichaje.

ꞑIquio dejja cuana nijje a'a jjapeequiji! Quea tai nee nee.

⁶ E'e jojo nei Eyacuiñajjiya esohui jayojja jama ba'yanijo, quea jaji nee poanijo pea'ai, quea bihui nee nee poaje'yo. ⁷ E'e, eseya cuayanaje aema' nei nei. Quijje mano'yo majje aema' nei nei poquije'yo. ⁸ Bobi, daqui, equi yani. Jamajjeya se quea bihui nee nee poaje'yo. ⁹ Joya quea huiso aquiana nahue sa poani ca ca eshahuaja ejioji yasijje poqui quehua'yo chana'. Ejjashahuabaqui'yoji cuana quea taijo quea tai ba'eje'yo, quea yeno. Cuaqui yasijje quijje poquije'yo pea'ai, de. ¹⁰ E'e, quea huiso ejjesheji cuana, quea huiso aquiana cuana sa neinei poanijo ojjaña mimishi cuana acani cuaa. Ejjesheji cuana, aquiana cuana sa neinei poanijo Eyacuiñajjiya esohui jayojja jama apajea cani. Jamajjeya quea yeno nee nee poani; quea bei nee ba'e ajja.

Pabohua Timoteo huoojja cani quea pame eba'eji

¹¹ Timoteo, miya ca ca oe Eyacuiñajjiya epeeji nei, ojo chacochoani pea'ai. ꞑMa acajji tai jama a'a ajji! Jashahuabaquicue quea pame nee eba'eji jama ba'a: ꞑPea cuana quea jea nee acue! ꞑEyacuiñajji jayojja ba'ecue, quea ja'a nee! ꞑOjaya esohui jayojja jama atiitiicue! ꞑPea cuaa miya napa cajje quea ca'a nee nee pocue! ꞑQuea bei nee nequicue pea'ai! ¹² Jama jashahuabaquime pocue ba'a: ꞑDejja quebanei poanijo janobajjima nei nei cuajicuajiani jayojjaya miya Eyacuiñajji nijje quea ja'a nee nee jjapeequicue! Huea'ama poajo ohuaya miya ba'e tiiti mee caje'yo onijje, mano'yajo. Yahuajo ojjaña cojja ba canijo miyaya huohuinaje jama ba'a: —Jesusa Quito ecuea Emeshi Mese nei jjeja poani.

Jamajjeya miya Jesusaja epeeji poanaje e'e jojo nei; Eyacuiñajjiya miya babaca ca'yonaje onijje eba'e tiitii'-yojji. ¹³ Jamajjeya Eyacuiñajjiya ojjaña aquiana eshe po mee ca'yani; Jesosa quea pame nee miminaje emeshi mese Ponisio Pinato bajjani nijje jama ba'a: "Eya ca iña Emeshi Mese oe nei; ecuea esohui e'e nei nei" poanaje Jesosa. Jamajjeya Eyacuiñajjiya, Jesosa Quitohua pea'aiya ba canijo, eyaya miya huohuiaña jama ba'a: ¹⁴ ¡Eyacuiñajjiya esohui jayojja jama atiitiicue! Jamajjeya pea cuanaja miya etecueajji pojjeama. ¡Jamaya acue Jesosa Quito esejaya Emeshi Mese nei poe o'oya jji-mahuajo!

¹⁵ ¿Ache shono poeje o'oya Jesosa Quito? Eyacuiñajjiya eba. Ohuaya Jesosa Quito poe meesahua caje'yo. Eyacuiñajji quea pame nee nee, quea ca'a nee pea'ai, ojjaña huoojea'yojji oe nei. E'e, Eyacuiñajji ojjañaja emeshi mese huoojeajji poani. Ojjaña dejja jaahuanajji poani cuana huoojeajji poani oya. ¹⁶ Oya ca ca oe mano'yo ajja tii tii. Oya quea jeajahua nee nee enequi tii tii. Jamajjeya dejja cuana jamatii o que poqui ajja. Dejja cuanaja oya cojja ba jjima poani. Jjeya jjacojjaba meequi ajja pea'ai. Jamajjeya ojjaña oya cabihuia cahua. ¡Oya oe nei quea ca'a nee nee po tiitii'yani! Jamatii oya, de.

Dejja cuana quea aquiana huiso nee neejo

¹⁷ Timoteo, dejja cuana quea aquiana huiso nee nee yasijje huohuicue jama ba'a: —¡Pea cuana a'a cajaa aj-

ji! ¡Miquea aquiana quea huisojo a'a jjashahuabaqui tiitiiiji! Quea huiso aquiana cuana nequi tiitii ajjajo ja'a aquiana quea huiso jea bajji! Miyaya ¡Eyacuiñajji eshe tii tii nequi quea jea nee acue! Ohuaya ojjaña aquiana quia cani ese quea jaji pojji. ¹⁸ ¡Pea quea pame nee acue miyaya! E'e, ¡pea cuana nijje quea pame nee atiitiicue! ¡A'a quea aquiana nahue pojji aema' cuana nijje; nishehui'ama pocue! —jamaya oya cuana acue, Timoteo.

¹⁹ Jamaya poani tiitiijo, quijje Eyacuiñajjiya oya cuana sosequia caje'yo quea huiso eyajo. Jamajjeya Eyacuiñajjiya oya cuana nequi tiitii mee caje'yo eyajo onijje. Eba'eji quea ja'a nee nee, quea pame nee nee ojaya poaje'yo.

²⁰ Timoteo, ¡miyaya Eyacuiñajjiya esohui quea pame nee jama atiitiicue! ¡Esohui e'e nei pojjeama Eyacuiñajjiya esohui jayojja jama pojjeama a'a shajja'ajjaji! Quea quehua, de. ²¹ Jamajjeya beca cuana esohui quea quehua nee, e'e nei pojjeama shajja'ajja majje poqui-quehua'yonaje. Jamajjeya Eyacuiñajjiya esohui e'e nei pajea ca'yonaje, onaaya.

Timoteo, ¡Eyacuiñajjiya miquianaya cajaahuana cahua! Jamaya capoahua. Apoa.

Eya, Pabo esohui tehuejji.

2 TIMOTEO

Pabohua Eyacuiñajjija esohui tehue ca o'oyanaje Timoteo que

1 Timoteo, eyaya esohui mi que tehueje o'oya. Eya Pabo, Jesosa Quitoja esohui huohuijji. E'e, Eyacuiñajjiya eya huoojea canaje ojaya esohui huohui'yohua jama ba'a: Jesosa Quito niije e'e jojo nei jjapeequianijo, onijje eyajo eseya ba'e tiitii mee caje'yo Eyacuiñajjiya. ² Timoteo, miya ecuea quea jea nee nee, ecuea ebacua ejja jayojja jama Jesosa Quito niije jjapeequianijo. ¡Eyacuiñajjiya esejaya Chii ai eyajo aniya, Jesosa Quitohua esejaya Emeshi Mese neiya pea'aiya miya cahaahuana cahua quea pame nee! ¡Mijo cajjashahuabaquiahua quea pame nee! ¡Miya quea bei nee capo mee cahua pea'ai!

³ Eyacuiñajjijo eya quea bihui nee chacochoani bicho'ama nei nei. Jamaya ecuea etiiquiana cuana pea'ai poa. Timoteo, miya quea ja'a nee ba'yanijo, eyaya Eyacuiñajji janobajjima nei bihuiaña mijo. E'e, mijo pea'ai eya onijje mimi huicha'a huicha'ani ojjaña mecajje, ojjaña pojjaajo pea'ai. ⁴ Miya pa neineinaje e poqui'yajo. Maya ecuea pajea'yo jjima. Eya mi ba sa neinei poani quea bihui nee epojji. ⁵ Eya jjashahuabaquiani jama ba'a: Miya Eyacuiñajjija esohui jayojja jama aña quea bihui nee. Ecuea eba yahuajo miquea yano mese Moina bajjaniya, miquea enaese Enise pea'aiya Eyacuiñajjija esohui jayojja jama aca poa quea bihui nee. E'e, jamajjeya o jayojja jama jjeya miya Eyacuiñajji niije e'e jojo nei jjapeequiani.

⁶ Jamajjeya eyaya miya huohui o'oyaña jama ba'a: Yahuajo mijo Eyacuiñajji niije mimi majje eyaya miya huoojeanaje ojaya echacojji epojji. E'e, sapa napa'ajjanaje emeya Jesusaja echacojji quea pame epojji. Jamajjeya Eyacuiñajjiya miya Jesusaja epeeji jaahuana sahua cani. ¡Jamaya ojo chaco tiiticue! ⁷ E'e, Edojjoshahua Pameya, Eyacuiñajjija huoojea'yohua eseya mete'ama po mee cani. Quea ja'a nee Eyacuiñajjijo chaco mee ca'yani. Eseyaya Eyacuiñajji, pea cuana pea'ai quea jea nee po meesahua ca'yani pea'ai. Quea ja'a nee jjashahuabaqui mee cani pea'ai, Edojjoshahua Pameya.

⁸ Jamajjeya esejaya Emeshi Mese neijo huohuiañajo ja'a quea bicho pojji, miya! Eya onijje jjapeequianijo, dejja quea mase cuaa eya iña majje jeanobia canaje. Eyacuiñajjija esohui quea pame nee huohuiañajo eya napa cani cuaa. Jamatii ja'a quea bicho pojji ejo! Chojja. E jayojja jama napa cajo, ja'a oe quea mete pojji! Eyacuiñajjiya miya quea ca'a po meesahua canijo, ja'a

ojaya esohui huohui pajea'yojji! ⁹ Ohuaya esejaya mimishi cuijea ca'yonaje. Jamajjeya cuaqui yasijje epoqui'yojji pojjeama. Iyaa ca'yonaje ojo quea pame nee eba'e'yojji, ma ojaya epeejime epo'yojji. ¿A'a eseya quea pame poanijo, ohuaya eseya iyaa ca'yonaje onijje ejjapeequijji? Chojja. Yahuajo nei nei meshi pana jjimahuajo Eyacuiñajji jjashahuabaquia poa Jesosa Quito huoojeajji esejaya mimishi cuana cuijea'yojji. ¹⁰ E'e, yahuajo esejaya ba jjima poa ojjaña cuana Eyacuiñajjiya quea jea nee nee acani. Jjeya ca ca esejaya eba. Ese jaahuanajji Jesosa Quito poeyanaje. Mano'yonaje. Mano'yo majje shequi o'oyanaje. Eyahuasijje jjequisohua ca'yonaje. Eseyaya ohuaya jama acanaje ba'a: —Mano'yo majje miqianaya cuana ba'e tiitiije'yo Eyacuiñajji niije —Jesusaa acanaje.

Jamajjeya ohuaya mete'ama po mee caje'yo eseya mano'yanijo. Ba'e tiitii mee caje'yo ojaya esohui quea pame nee ba mee canijo. ¹¹ Ma esohui quea pame nee Jesosa Quitoja eyaya huohuiaña. Eyacuiñajjiya eya huoojea ca'yonaje ojaya esohui huohuiya, ojjaña cuana jjabahuejjaqui meeya pea'ai. ¹² Ma esohui huohuiañajo, pea cuaa eya napa cani. Quea nee poani eya. Jamatii eya bicho'ama Jesosa Quitojo. Eyacuiñajji ecuea eba nei nei. E'e jojo nei oya ese jaahuanajji, de. Jamajje ecuea eba ojaya esohui jayojja jama eya ameesahua tiitii caje'yo ohuaya, Jesosa poe o'oyajo.

¹³ Ma esohui e'e nei Jesosa Quitoja eyaya miya ba meenaje. ¡Ecuea esohui jayojja tii huohucue! Jamaya poanijo ¡Jesosa Quito shajja'ajjacue! ¡Eyacuiñajji quea jea nee acue pea'ai, jamaya Jesosa Quitohua miya po meesahua canijo! ¹⁴ Ohuaya miya jiquio esohui quea pame nee jjabahuejjaqui meesahua canaje. ¡Ma esohui jayojja jama po tiiticue! Edojjoshahua Pameya esejo nequi tiitianiya miya jamaya asahua caje'yo.

¹⁵ Quea huiso dejja Asia meshijo ba'e enijje jjapeequi pajea'yonaje. Pijeno, Emojene pea'ai jamaya poanaje. Maya miquea eba. ¹⁶ Ecuea Emeshi Mese neiya dejja Onesipono bajjani, ojaya huapa pojjeama pea'ai ca-ba'e meesahua cahua quea pame nee. Ohuaya eya quea jaji nee po mee canaje. Pea dejja cuaa eya jeanobia canaje. Jamatii oya, Onesipono ejo bicho'ama poanaje. ¹⁷ E'e, Shoma cuiñajji yasijje poe majje, eya sa'ajja neinei'yo majje eya ba ca'yonaje, Onesiponohua. ¹⁸ Jamajjeya esejaya Emeshi Mese neiya poe o'oya majje Onesipono sosequia caje'yo. Jamajjeya ohuaya Onesipono jaahuana tiitii caje'yo quea pame nee. Dejja mimishi ca ca quea nee po mee caje'yo tii tii. E'e, miquea eba eya Epeso cuiñajjijo nequijo, Onesiponohua eya quea pame nee ba'e meesahua ca poa.

¡Echacojji quea pame jayoija jama pocue Jesusajo!

2 E'e Timoteo, miya ecuea ebacua ejja jayoija. Miya quea ca'a po mee cani Jesosa Quitohua, ese jaahuanajjiya. Jamajjeya ¡quea pame tiitii jjapeequicue onijje! 2 Miyaya ecuea esohui shajja'ajjanaje. Quea huiso dejjaa shajja'ajja canaje pea'ai. ¡Jiquio esohui huohucue miyaya Jesusaja epeeji e'e jojo nei yasijje! Ona jjabahuejjaqui majje ¡ma esohui quea pame che jja oma oe huohui meesahuacue quea pame nee pea cuana huasijje! 3 Pea cuaa miya napa caje'yo Jesosa Quito nijje jjapeequianijo; jamatii ¡a'a quea mete pojji! ¡Jjapee tiitiqicue e'e jojo nei! ¡Emeshi Mese neija echacojji quea ca'a pocue! 4 Jama ba'a: Dejja echacomeejjijo chaco canijo pea nijje chacochaco sa po ajja. Chojo. Ohuaya ojaya echacomeejjija esohui jama chaco cani. ¡Jamaya oe pocue; Jesosa Quito nijje chacochoanijo a'a eshahua nijje pojji! 5 Jamajjeya jama poani pea'ai ba'a: Dejja janobajjima nei cuajicuaji neinei ani pea cuana nijje. Joya ebionei cuajicuaji cooani oe aquiana quea pame quia cani sosema'. Jiquio ecua ohua huohui caje jama mi cuajicuajiajo, shajjama' poajo, aquiana equiajji pojjeama. ¡Jamaya jjashahuabaquicue Jesosa Quitojo chacoañajo; janobajjima chacocue! ¡A'a shajjama' jayoija jama pojji! 6 Dejja quejo janobajjima nei chaco'yo majje, que bana majje pea'ai ohuaya ebionei bobi cachicha cahua ojaya e'ijjiajji. Jamajjeya ¡a'a quea huea pojji Jesosa Quitojo chacochoani! 7 ¡Jiquio ecuea esohuijjo jjashahuaba neineiquicue, miya! Eseyaya Emeshi Mese neiya miya jiquio esohui ba meesahua caje'yo.

8 Jamajje ¡jjashahuaba tiitiqicue Jesosa Quitojo! Eyacuiñajjiya Jesosa Quito shequi mee ca o'oya poa. Ojaya Jesusaja etiiquiana yahuaajo nei nei ba'ya poa Dabi bajjani etiiquianaja emeshi mese poa. 9 Jiquio esohui quea pame nee Jesosa Quitojo eyaya huohuaña. Jamajjeya dejja tai cuaa eya napa canaje, dejja quea mimishi poso eya jeanobia canaje. Jamatii. Dejja tai cuanaja eya Eyacuiñajjiya esohui ehuohui pajea mee'yojji pojjeama. 10 Jamajjeya dejja cuaa eya napa cajje jamatii eya quea ca'a tii tii Jesusajo poani. Jamajjeya eyaya ojjaña Eyacuiñajjiya ehabaca cuana quea ca'a po meesahuaje'yo. Jamajjeya Jesosa Quitohua onajaya mimishi cuana cuijea neinei caje'yo. Oya cuana nequi tiitii mee caje'yo eyajo quea ja'a nee nee ese jayoija. Eyacuiñajji nijje nequi tiitiije'yo.

11 Jiquio esohui e'e nei jama ba'a:

“Eseyaya Jesusaja epeeji jjejojo pea cuaa mano mee ca'yajje Jesosa nijje eshe tiitii ba'eje'yo eseya eyajo. 12 Jjeya onijje jjapee tiitiqianijo quijje Jesosa nijje ona huoojea'yojji poaje'yo. Jjeya eseyaya cajaa ajje ohuaya eseya quijje cajaa acaje'yo pea'ai.

13 Eseyaya ojaya esohui atitii ajjajo, jamatii ohuaya eseya pajea'yo ajja. Ojjaña ojaya esohui jayojjaya jama acaje'yo tii, ohuaya. Oya esohui sjajje a'ajja nei ne'”.

Echacojji quea pame nee

14 ¡Jamaya miyaya ecuea ehuohui'yo cuana esohui huohuijji cuana huasijje huohui huicha'a huicha'acue! Janobajjima nei huohucue jama ba'a: —Emeshi Mese neiya miya ba neinei canijo, ¡a'a mimicuijjeanobiaejjiji!

Jjamimicuijjea nobiajeaquijji ca ca quea tai. Jamaya poanijo mi shajja'ajjajji poani cuana poquiquehua chana'. 15 ¡Quea ja'a nee nee oe jjashahuabaquicue quea pame nee Eyacuiñajjiyo echacojji! Jamajjeya oya mijo quea jaji nee poaje. E'e, ¡miyaya ojaya esohui e'e nei huohucue quea ja'a nee! Jamajjeya miya ojaya echacojji quea pame nee poaje, bicho'ama. 16 Beca cuanaja Eyacuiñajji boti'ama, de. Jamajjeya ¡a'a shajja'ajjajji onajaya mimi quea tai Eyacuiñajjiyo! Ma esohui tai shajja'ajja canijo pea cuaa Eyacuiñajji ba jjima acaje. E'e, esohui tai shajja'ajja majje jjashahuabaqui ajja poaje. 17 Tajjaja ijia biso nei anicuayani, quijje ijia huesha cani. Tajjaja ijia jayoija jama poani esohui quea tai. Esohui huohuijji taija esohui quea tai shajja'ajja majje quijje quea tai nee poaje'yo quea huiso cuana. Jjapeequi pajea caje'yo pojja'a. Jamaya esohui huohuijji nisho cuana Pineto bajjani, Imeneo pea'ai poani. 18 Ohuaya esohui e'e nei pajea ca'yonaje. Sjajje poani jama ba'a: —Ojaya epeeji mano'yajo, Eyacuiñajjiya eyami eyacua aje oe e'a'yojji pojjeama —acani.

Jamajjeya beca cuana ma esohui taijaya poquiquehua mee cani. Eyacuiñajjiya esohui e'e nei pajea mee cani pea'ai, ma esohui huohuijji nishohua. 19 ¡A'a oya cuana shajja'ajjajji! Eseyaya ca ca Eyacuiñajji nijje jjaapeequi pajea'yo ajja. Eyacuiñajjiya esohui quea ja'a nee nee nequi jayoija jama Eyacuiñajjiya esohui nequi tiitiije'yo. E'e, yahuaajo nei nei esohui tehue mee ca poa jama ba'a: “Eseyaya Emeshi Mese neija ebacua cuana ojaya eba ache ese ejja e'e jojo nei poaje”. Pea tehue mee ca poa jama ba'a: “¡Eyacuiñajjiya epeeji neiya mimishi cuana capajea neinei cayahua!” Jama yahuaajo nei tehue meemeya aca poa, Eyacuiñajjiya.

20 Cuanaya equi tii tiijo quea huiso aquiana cuana yani: ena ishijji cuana, ena nequijji cuana, ena shojji natajee oshe quea nahue siyosiyoyani. Ena nequijji mei huo'o quea ca'a yani aquiana quea nahue iyajji. Acui epejja cuana yani, meshimisi pea'ai yani, ca'a'ama, aquiana nahue'ama iyajji. 21 Jiquio ecua ena nequijji ca'a'ama jayoija jama eseya poaje mimishijo. Eseyaya mimishi cuana pajea'yo majje ena nequijji quea nahue jayojja jama poaje'yo. Jamajjeya mimishi pajea'yojji chacoje'yo Eyacuiñajjiyo. E'e, quea pame nee poanijo Eyacuiñajjiya eseya huoojea caje'yo ojo chachohua. Jamaya eseya Eyacuiñajjiya tii poaje'yo.

22 Jamajjeya ¡shacuima' nequija ejjashahuaba taiquijji jama a'a pojji miya! Jiquio jama quea bihui nee po huicha'acue ba'a: ¡Quea ja'a ba'ecue! ¡Eyacuiñajjiya esohuijjo jjabahuejja neineiquicue! ¡Pea cuana quea jea nee acue! ¡Ojjaña nijje quea bei pocue! Beca cuana quea bihui nee Eyacuiñajjiyo nijje mimiani. Quea ja'a nee

jjashahuabaquiiani pea'ai. ¡O jayojjaya oe pocue!
²³ ¡Esohui quea tai, quea quehua pea'ai a'a shajja'ajjajji! Ma esohui shajja'ajja majje deija cuana jjamimicuiajea nobiajeaquiije. Jamaya miquea eba. ²⁴ Miya Eyacuiñajjiija echacojji poanijo ca ¡a'a jjamimicuiajea nobiajeaquiiji! Chojo. ¡Ojjaña nijje mase'ama pocue! ¡Jesosa Quitoja esohui cuana oe huohucue quea pame nee! ¡A'a tecuea cuajijji pea'ai! ²⁵ Pea cuana esohui e'e neiyo maimaianijo, ¡quea bei esohui huohui o'oyacue! Jamajjeya e'e pojja'a Eyacuiñajjiya ojaya esohui e'e neiyo jjabahuejjaqui meesahua caje'yo oya cuana; jjashahuaba taiqui pajea mee caje'yo. ²⁶ Jamajjeya oya cuana quea ja'a nee jjashahuabaquiije o'oya pojja'a, Eyacuiñajji nijje jjapeequije'yo. Joya esohuijo mimijajiani aje oe poquiquehua'yonaje de, Edosiquiana nijje. Ohuaya oya cuana dasia ca'yonaje o jayojja epo'yojji. ¡Oya cuana Eyacuiñajji nijje cajapeequiahua! E'e, dejjaa ibia me' ijja mee cani. Ibia eme' ijja meeani, eme' jjequihuijja-jea majje poquiani. Eme' ijja mee'ajja jjabahuejjaquiiani. Jiquio ecua ibia eme' ijja mee'ajja poe beca'yo ajja jayojja jama eshahua epeejiya dasia cajje eshajja'ajja becaqui'yojji pojjeama; jjabahuejjaquiiani oya pojja'a.

Epojja apoa epojji

3 Timoteo, jiquio ba neineicue pea'ai ba'a: Epojja cuana beshahua nei oe poajo, Jesosa Quito poe o'oya jjimahuajo, eba'ejji quea camaja nee nee poaje ojjaña cuanaja deija quea mimishi nee nee poanijo. ² E'e, deija cuana ojaya aquiana cuanajo, ojaya eba'ejji-jo, ejjeshejjijo pea'ai quea nahue poaje'yo. Quea deija tai poaje'yo, quea nishahui poaje'yo epona cuana pea'ai. Bicho'ama jjejojo quea miminaa ojaya ejjashahuabaquiijjo poaje'yo tii tii. Eyacuiñajjiija esohui huohuijji shajja'ajja sa po ajja poaje'yo. Mimijajiji cuana pea'ai poaje'yo. Oja chiija, enaese pea'aija esohuijo shajjama' poaje'yo oya cuana. Ejeajji etii cuana, enaese etii pea'ai boti'ama acaje'yo: —Ecuea miya ebobajji pojjeama —acaje'yo.

Eyacuiñajjiija esohui jama a sa po'yo ajja poaje'yo. ³ Ojaya huapa pojjeama cuana boti'ama acaje'yo pea'ai. Quea sapa ca'a jjejojo jjashahuabaqui ajja pea'ai. Pea cuanajo siajje poaje'yo. Mimishi cuana epajea mee'yojji pojjeama. Quea mase ibia jama poaje'yo. Mimipanajea panajeaje'yo pea nijje. Deija quea pame nee boti'ama acaje'yo, cajaa acaje'yo pea'ai. ⁴ Pea nijje jjapee nishoquiije'yo. Jjabahuejjaqui jjima tii tii poaje'yo. Jama siajje pome poaje ba'a: —Eya ca ca oe che oya quea pame nee —nisho poaje.

Quea mimijjequiya jjejojo Eyacuiñajji boti'ama poaje'yo. ⁵ Eyacuiñajji nijje jjapee nishoquiije'yo. Jamatii ojaya esohui jayojja jama oya po ajja poaje. Timoteo, ¡a'a onijje jjapeequijji! ⁶ Jjeya nei esohui huohuijji tai cuana equi cuana huasijje poqui majamaja majje siajje poani. Epona jjabahuejjaqui ja'a jjima cuana dasia cani. Jiquio epona cuana aje oe quea mimijjequiyea nee nee; quea ja'a jjashahuabaqui'yo ajja, de. Ma deija tai cuanaja esohui tai shajja'ajja sa poani. ⁷ Oya cuana ojjaña esohui quea quehua shajja'ajjajji jjejojo Jesosa

Quitoja esohui e'e neiyo jjabahuejjaqui'yo ajja. ⁸ Jama-ya yahuajo nei nei ejiojjiicuiajji cuana Janese, pea Jame-se cuanaya nequia poa. Moisesija esohui shajja'ajja sa po ajja poa. Jjeyahua nei esohui huohuijji quea mimishi Janese, Jame-se pea'ai jayojja jamaya yani. Oya cuana esohui e'e nei Jesosa Quitoja shajja'ajja sa po ajja pea'ai. Quea jjashahuabaqui tai nee nee poani pea'ai. Jamajjeya Eyacuiñajjiya oya cuana cajaa acaje'yo, Jesosa Quito nijje jjapeequi sa po ajjajo. ⁹ Quijje pishana quea huiso dejjaa jama acaje'yo ba'a: —E'e, joya esohui huohuijji tai cuana jjadasiaqui'yojji, ejiojjiicuiajji Janese, Jame-se pea'ai jayojja poani —acaje cuaa. Jamajjeya jjadasia mee majamajaqui ajja poaje.

Pabaja esohui apoa epojji nei Timoteo huasijje

¹⁰ Timoteo, miya enijje nequinajejo eya ca ca miquea eba nei nei poanaje. Ojjaña ecuea ehuhui'yo miquea eba pea'ai. Ojjaña ecuea eba'e'yojji miquea eba pea'ai. Ecuea ejjashahuabaqui'yojji quea pame nee. Miquea eba eya Eyacuiñajjiija epeeji nei poani. Pea cuaa eya napa cajje ona nijje quenequene ajja poa. Ecuea pea cuana quea jea nee. Eyaya mete'ama Eyacuiñajjiija chaco tiitii'yonaje. Jamaya miquea eba pea'ai. ¹¹ E'e, miquea eba ecuea ehuhuijo pea cuaa janobajjima nei eya napa ca'yonaje Atioquiajo ba'e cuaa, Iconiojo ba'e cuaa, Nisatajo ba'e cuaa pea'ai. Napa majamaja cajje eya quea nee nee poanaje. Jamatii ecuea Jesosa Quitoja esohui pajea'yo jjima. Emeshi Mese neiya eya jaahuana tiitii ca'yonaje. Jamaya miquea eba, Timoteo. ¹² E'e de, ojjaña joya Jesosa Quito nijje jjapee neinei-quiiani pea cuaa napa caje. ¹³ Edasiajji cuana jjeyahua nei quea tai. Quijje ca ca quea tai nee nee poaje. Eshahua ma deija tai cuana nijje siajje poanaje. Jamajjeya ma edasia'yojji cuaa pea cuana dasia caje'yo pea'ai. ¹⁴ Timoteo, miquea eba miquea esohui huohuijji cuanaja ehuhui'yo e'e nei. Ma ehuhui'yo cuanajo miya jjabahuejjaqui'yonaje. Jamajjeya ¡maya esohui shahua-ba tiitii'cue; a'a pajea'yojji! ¡Jamaya oe acue! ¹⁵ Miyaya esho'yahua Eyacuiñajjiija esohui quea pame nee ba neinei'yonaje. Ojaya esohui etehue'yo miquea eba. E'e, ma etehue'yojo miyaya baje'yo jama ba'a: Eyacuiñajjiya miya jaahuana caje'yo miya Jesosa Quito nijje jjapeequianijo.

¹⁶ Eyacuiñajjiya deija pame cuana ojjaña ojaya esohui tehue mee ca'ya poa. Eseyaya jiquio esohui huohuijje pea cuana Jesosa Quitoja jjabahuejjaquiije'yo, ojaya mimishijo quea yeno poaje'yo pea'ai, ojjaña ba caje'yo ache esohui e'e nei pojjeama pea'ai. E'e, ma esohui huohui majje ojjaña quea bojea nee ba'e meesahuaje'yo. Eba'ejji quea pame ba meesahuaje'yo pea'ai. ¹⁷ E'e, ma esohui etehue'yo quea ja'a nee ba majje Eyacuiñajjiija echacojji quea ja'a nee poaje'yo. Ojjaña quea pame nee poaje'yo pea'ai Eyacuiñajji nijje, esohui ba neinei majje.

Pabo Eyacuiñajjiya sosequia caje'yo

4 Eyacuiñajjiya, Jesosa Quitoja pea'ai ecuea esohui eba. Jesosa Quito poe o'oya majje ojjaña huoojea'yojji poaje'yo. Yahuajo mano'yo cuana, jjeya eshe nequi cuana pea'ai sosequia caje'yo. Ojjaña ojaya epeeji cuana quea pame poani ba'e tiitii mee caje'yo onijje eyajo, Eyacuiñajjiya. Mimishi cuana ca ca quea nee nee po mee caje'yo cuaquijo. ² Jamajjeya eyaya miya huoojeaña jama ba'a: ¡Eyacuiñajjiya esohui oe huohui tiitiicue jjeya, miyaya! Dejja cuana jjashajja'ajjaqui sa po ajjajo ¡jamatiya huohuicue! Mimishi cuana acanijo ¡tecueajeaña jayojja acue! Jama acue ba'a: "¡A'a quea tai poiji! ¡A'a quea mimijequijea poiji!" Pea cuana quea pame poanijo jama acue ba'a: "E'e, ¡jamaya Eyacuiñajjiyo ba'ecue!" ¡Quea pame, quea mimi bei nee huohui tiitiicue ojjaña Eyacuiñajjiya esohui! ³ Quijje ca ca dejja cuana esohui e'e nei shajja'ajja sa po ajja poaje. Quea mimishi ba'e sa poanijo oya cuana quea huiso esohui huohuiji tai iyaa caje ojaya ejjashahuabaqui'yojji huohuiya. ⁴ Eyacuiñajjiya esohui e'e nei shajja'ajja sa po'yo ajja poaje. Etiiquianaja ehuhui'yo quea quehua cuana shajja'ajja caje'yo. ⁵ Timoteo, ¡miya ca oe quea ja'a nee nee jjashahuabaquicue ojjaña pojjajo! Peaa miya napa cajje ¡jamatii quea ca'a, met'e'ama pea'ai pocue! ¡Eyacuiñajjiya esohui Jesosa Quitoja huohui tiitiicue! ¡E'e jojo nei ojjaña ma ecua eyaya miya huohuinaje jamaya acue!

⁶ E'e, ecuea echacoji Eyacuiñajjiya esohui jjeya behahua nei apoa poanijo, dejja mimishi cuaa eya mano mee caje'yo. Ijjiacajji jayojjaya mano mee'yome acaje'yo cuaa. Quijje pishana, jjeyahua nei pojja'a eya poquije'yo eyahuasijje Jesosa Quito que ba'e'yohua. ⁷ Eya janobajjima nei chacochocho'yonaje Eyacuiñajji niije. Ecuea echacoji Jesosa Quitoja apoa. Eyacuiñajjiya esohui jayojja jama a'yonaje e'e jojo nei eyaya. Jamajjeya eya onijje quea ja'a nee ba'yanijo, eya sosequia caje'yo eyajo. ⁸ Eseyaya Emeshi mese nei niije quea pame nee chacochocho'yonaje, eya quea huiso sosequia caje'yo poe o'oya majje. Ohuaya eya huohui caje'yo jama ba'a: —Miyaa ecuea echacoji quea ja'a nee poanaje.

E'e, ojjaña ojaya epeeji cuaa ma ojaya epoe o'oyajji-jo quea bihui neeya ishoa'ajja ca'ani Jesosa Quitohua sosequia caje'yo quea huiso pea'ai.

Pea esohui Timoteo que

⁹ Eya ee nei ani. Jamajjeya ¡jjeyahua nei poecuajicue ee nei anijo! ¹⁰ Ecuea epeeji Quesete poquinaje Janata meshi yasijje. Tito pea'ai poquinaje Damasia meshi yasijje. Dejja Nema bajjani aje oe ojaya aquiana cuana quea boti neejo Eyacuiñajjiyo jjashahuabaqui ajja. E pa-jea'yo majje e que nequi'yo ajja. Oya poqui'yonaje Te-

sanonica huasijje. ¹¹ Tiquico eyaya huoojea'yonaje Epe-so huasijje. Noca ca ca oe enijje nequi. Jamajjeya miya e que poe o'oya majje ¡ecuea epeeji Macoso jjequicue pea'ai! Ohuaya eya chacosahua caje'yo. ¹³ Ecuea daqui moo quea ao eyaya jeana'yonaje Toasajo, Capoja equijo. ¡Maya jjequi'yocue! ¡Esohui etehue'yo cuana pea'ai ye'yocue! ¡Esohui ejeejo tehue'yo cuana pea'aiya oe ye'yocue jjo!

¹⁴ Timoteo, Anejano ma baa huo'o chacoji poani janobajjima nei mimijajinaje enijje quea mimishi, de. Ojaya mimishijo Jesosa Quitohua oya napa caje'yo quijje. ¹⁵ Eseyaya Jesosa Quitoja esohui huohuiañajo oya janobajjima nei mimijajinaje pea'ai. ¡Jamajjeya oya ba neineicue! Oya quea tai, de.

¹⁶ Dejja etii cuaa eya jeanobia'yo majje iyaa ca o'oyanaje ehuhui'ajjaji ecuea esohuijo. Eya huohui'ajja coo canajejo, ecuea epeeji cuana enijje nequi ajja. E ejeanobiajojo oya cuana quea mete nee nee poanaje. Poquinaje. Eya jea cana'yonaje: —Paboya esohui Jesosa Quitojo e'e nei nei —jamaya huohuime ajjima ecuea epeeji quea metete jjejojo. Eya nahue jjima onajaya. Eya Eyacuiñajji niije miminaje ona cuanajo. Jamajjeya e'e pojja'a Eyacuiñajjiya oya cuana etecueajeajji pojeama quea mete poanijo. ¹⁷ Jamatii Jesosa Quito ecuea Emeshi Mese nei ca ca enijje nequi'yonaje. Ohuaya eya quea ca'a po mee ca'yonaje. Ojjaña ojaya esohui janobajjima nei huohuiañajo quea huiso cuana Jodio pojeama shajja'ajja mee'yonaje. Pea cuana ibia jama quea mase e quecua sa poanijo, Eyacuiñajjiya eya jaahuana ca'yonaje pea'ai. ¹⁸ E'e, ojjaña ma dejja mase cuanajo ecuea Emeshi Mese neiya, Jesosa Quitohua eya jaahuana caje'yo. Ohuaya eya eyahuasijje dojosohuaqui caje'yo onijje ba'e'yohua. Jomajo oya ojjaña huoojea'yojji ca ca oe quea ca'a nee nee. ¡Oya ojjaña dejja cuaa cabihuia tiitii cahua! ¡Jamaya capo'yahua!

¡Ojjaña niije mimicue quea bihui nee ejo!

¹⁹ Aquina, ojaya ehuanase Pisina pea'ai, Onesipono, ojaya huapa pojeama cuana pea'ai jama huohuicue miyaya ba'a: —¿Achajja acuae nequiana so'o?

²⁰ Dejja Enasito bajjani nequinaje Conitojo. Topimo eyaya jeana'yonaje Mineto cuiñajjiyo emano jaa.

²¹ ¡Poecuajicue e que, eeno po jjimahuajo!

Dejja Eomono bajjani, Ponete pea'ai, Nino pea'ai, Caonia pea'ai, ojjaña Eyacuiñajjiya epeeji cuana pea'ai-ya miya huohui'ajja cani jama ba'a: —¿Achajja acuae mi ani so'o, de? —ojaya ebajji nequiana.

²² ¡Emeshi Mese neiya Jesosa Quitohua miya quea ja'a capo mee cahua! ¡Ohuaya ojjaña miquianaya ca-jaahuana cahua quea pame nee! ¡Jamaya capo'yahua!

Mahuiso. Eyaya Pabohua esohui tehue'yonaje. Apoa.

TITO

Pabohua esohui tehue canaje Tito que

1 Tito, eyaya jiquio esohui tehueaña mi que mi-quea ebajji. Eya, Pabo Eyacuiñajji chacochoacoani oja yajji. Jesosa Quitohua eya huoojea canaje ojaya epeeji cuana huasijje ojaya esohui huohuiya. Jamajjeya eyaya Eyacuiñajji babaca'yo cuana onijje jjapeequi meesahuaña e'e jojo nei. Oya cuana Eyacuiñajji esohui e'e jojo nei ba meesahuaña pea'ai. Jamajjeya oya cuana ma esohui jayojja jama ba'e meeje quea ja'a nee. ² E'e, Jesosa nijje e'e jojo nei jjapeequianijo, Eyacuiñajji ojaña eseya ba'e tiitii mee caje'yo onijje eyajo. Jamaya Eyacuiñajji huohui ca'ya poa meshi pana jjimahuajo. Oya ca ca oe siajje po ajja nei nei. ³ Jjeya nei ca ca Eyacuiñajji eseya ojaya esohui quea pame nee Jesusajo ba mee ca'yonaje. E'e, ohuaya, esejaya ejaahuanajji eya huoojea ca'yonaje jama ba'a: —¡Poquicue miya; ecuea esohui quea pame nee huohucue ojjaña deja cuana huasijje! —jamaya ohuaya eya acanaje.

⁴ Tito, eyaya jiquio esohui tehueaña mi que, miya e jayojjaya Jesosa nijje jjapeequianijo. ¡Eyacuiñajji esejaya Chii ai eyajo aniya, Jesosa Quito ese jaahuanajjiya pea'ai miya cajaanahua cahua quea pame nee! ¡Miya quea bei nee capo mee cahua pea'ai!

Jesosaja epeeji jaahuanajji cuana quea pame nee caba'yahua

⁵ Tito, yahuajo eseya Queta nasijo Eyacuiñajji esohui huohui nequinaje. Jamatii Eyacuiñajji esohui huohui jeyojeyo jjima poanaje. Jamajjeya eyaya miya nequi mee'yonaje Queta nasijo Jesusaja epeeji jjabahuejja meequiji ojjaña ojaya esohuijo. ⁶ Jamajjeya ojjaña cuiñajji yasijje Jesusaja epeeji etii babacacue Jesusaja epeeji jaahuanajji epojji! Ecuea esohui Jesusaja epeeji jaahuanajji huohucue jama ba'a: —Jesusaja epeeji jaahuanajji caba'yahua jama ba'a: ¡Quea ja'a nee caba'e tiitii'yahua, mimishi'ama! Jamajjeya o ba majje onaaya jama acaje ba'a: “Oya e'e jojo nei Eyacuiñajji esohui jayojja jama ba'ani”. ¡Shacuiji poaniya ehuanase oe nei cahuana cahua quea ja'a nee! ¡Oja bacua cuana Jesusaja epeeji cuana capo'yahua, shajjama' pojjeama capo'yahua! Jamajjeya oya cuana ba majjeya onaya mimimimi ajja jama ba'a: “Oja bacua cuana quea mimishi nee nee, shajjama' pea'ai poani”. ⁷ Jesusaja epeeji jaahuanajjiya ojjaña ojaya epeeji cajaanahua cahua, caba'e meesahua cahua pea'ai! Jamajjeya ¡quea pame nee caba'yahua, mimishi'ama! Ja-

majjeya onaaya oya eniñebajji pojjeama. ¡A'a jjabahua taiquiji! Jama ba'a: “Eya ca iña quea pame nee; pea cuana quea pame pojjeama”. ¡A'a queneque-ne cuajiji! ¡A'a ishi'ishiji! ¡A'a pea nijje jjacuaquiji! ¡A'a quea deja tai pojji pea'ai! ⁸ E'e, Jesusaja epeeji jaahuanajjiya ¡pea cuana nijje cjjapeequiahua; ojaya equijo caba'e mee cahua joya oja cuiñajji yasijje poeyajo! ¡Ohuaya pea cuana quea jea nee ca'a cahua! ¡Oya quea ja'a nee cjjashahuabaquiahua quea pame nee eba'eji! ¡Ohuaya emeshi meseja esohui jayojja jama ca'a cahua! ¡Eyacuiñajji esohui jayojja jama caba'yahua tii! ¡Cjjashahuaba tiitiiquiahua mimishi'ama eba'eji! ⁹ E'e, ¡Jesusaja epeeji jaahuanajji cuana esejaya esohui jayojja jama caba'yahua tii! Jamajjeya ojaya epeeji cuana Jesusajo e'e jojo nei huohui majje Jesusa nijje jjapee neineiqui mee caje'yo. Onaya esohui e'e nei Jesusajo siajje poani. Oya cuana jjabahuejjaqui'yo majje siajje poani pajea caje'yo pea'ai. Jamaya eyaya, Pabohua huohuaña Jesusaja epeeji jaahuanajji cuana. ¡Jamaya caba'yahua oya cuana!

¡Shajjama' cuana siajje poani pajea mee'yocue!

¹⁰ E'e Tito, ¡Jesusaja epeeji jaahuanajji huoojea esohui e'e nei huohuiya! Quea huiso Jodio cuana Jesusa nijje jjapeequinaje. Jamatii oya cuana esohui huohuiji nisho poani. Oya cuana shajjama' poani, pea cuana dasia cani, siajje poani jama ba'a: —¡Ojjaña Jesusaja epeeji cuana Moisesija esohui etehue'yo jayojja jama caba'yahua! ¡Cuiishasha biso nei cajehusejjajea cahua! Majoya aje oe Eyacuiñajjiya oya cuana ba caje emimishi cuijea'yo —jamaya onaaya pea cuana dasia ca'ani.

¹¹ Tito, miyaya Jesusaja epeeji jaahuanajji huoojea majje ¡oya cuana ma esohui huohuiji nisho cuana huohui pajea mee'yocue! E'e, esohui huohuiji nisho cuana beca Jesusaja epeeji cuana siajje po majje jjabahuaqui quehua mee cani Jesusajo. Oya cuana siajje poani Jesusaja epeeji cuana nijje bejjo jjesheji.

¹² E'e Tito, ojjaña Queta nasijo ba'eca cuana quea mimishi nee nee. Jamajjeya oe esohui huohuijiya Queta nasijo ba'eya huohui canaje jama ba'a: —Ojjaña deja cuana Queta meshijo ba'e siajjepojji nei nei poani. Quea mase ijjiacajji jayojja jama poani. Quea huea nee poani, jeje ajja nei nei poani pea'ai —jamaya acanaje Queta dejja.

¹³ Jamaya e'e jojo nei. Jamajjeya ¡Jesusaja epeeji cuana niñeshe'a neineicue! ¡Jjabahuejja meequicue esohui e'e neijo Jesusa Quitojo! ¹⁴ Jamajjeya onaaya Jesusaja

esohui e'e jojo nei jayojja jama acaje'yo. Jodio etiiquia-na cuanaja esohui e'e nei pojjeamajo jjashajja'ajjaqui ajja, esohui huohuijji nishoja esohui pajea caje'yo pea'ai. ¹⁵ Jesusaja epeeji cuana jjabahuejjaqui'yo majje, quea ja'a jjashahuabaqui majje quea ja'a nee ba'yani. Beca cuana ca ca quea mimishi jjashahuabaquiiani-jo Eyacuiñajjija esohui jayojja jama a'ajja. Jamajjeya oya cuana quea mimishi ba'yani tii. Jjashahuaba tiitiiquiani mimishi epojji. Mimishi po majje quea yeno pojjeama, quea bicho pojjeama poani. ¹⁶ Oya cuana, esohui huohuijji nisho cuana siajje poani jama ba'a: —Ecuana Eyacuiñajjija epeeji poani.

Chojja de. Siajje poani. Oya cuana Eyacuiñajjija esohui jayojja jama a'ajja. Eyacuiñajji ojaya ba jjima. Eyacuiñajjija mimishi boti'ama. Jamatii oya cuana quea mimishi ba'yani. Shajjama' poani. Mimishi cuana pajea'yo ajja.

¡Esohui e'e nei huohuicue ojjaña quea pame nee ba'e meeji!

2 Tito, ¡miyaya oe ojjaña quea pame nee eba'e mee'yojji huohuicue Eyacuiñajjija esohui e'e nei ojjaña cuana huasijje, quea pame nee nee ona ba'ejji! ² ¡Edejjaja tii cuana huohuicue jama ba'a: —¡A'a jja oe huoojji! ¡Quea ja'a nee jjashahuabaquicue quea pame nee eba'ejji! ¡Eyacuiñajjija esohui jayojja jama ba'ecue! ¡Pea cuana quea jea nee acue! Jesosa nijje jjapeequianijo, pea cuana miya napa caje. Jamatii ¡a'a Jesosa nijje jjapeequi pajea'yojji! —acue!

³ Epona tii cuana huohuicue jama ba'a: —¡Jesusaja epeeji quea pame nee jayojjaya ba'ecue! ¡A'a pea cuana niñebajji! ¡A'a ishi'ishijji! ¡Eyacuiñajjija esohui quea pame neejo pea cuana jjabahuejja meequicue pea'ai quea pame nee eba'ejji!

⁴ E'e, epona cuana niñeshe'acue jama ba'a: —¡Quea bei pocue! ¡Miqueahue, mique bacua cuana pea'ai quea jea nee acue! ⁵ ¡Quea ja'a nee jjashahuabaquicue! ¡A'a quea mimijjequijea jjashahuabaquijji! ¡Miquea equijo chacocue quea pame nee, huea'ama! ¡Pea cuana quea jea nee acue! ¡Miqueahueja esohui shajja'ajjacue pea'ai! Jamajjeya mi ba majje pea cuana huohui caje jama ba'a: “¡Bacue! Jesusaja epeeji cuana quea pame nee poani. Jamajjeya Jesusaja esohui e'e nei, quea pame nee”.

⁶ Tito, ¡oya jayojjaya shacuima' nequi cuana huohuicue pea'ai! ¡Jama acue ba'a: —Shacuima' nequi cuana, ¡quea ja'a nee jjashahuabaquicue Jesusa nijje ejjapee neineiquijji mimishi'ama! —jamaya shacuima' nequi cuana niñeshe'a neineicue!

⁷ Tito, ¡miya pea'ai ba'ecue quea ja'a nee nee! Jamajjeya miya onaaya ba majje jama acaje ba'a: —E'e, Tito ba'yani quea ja'a nee. Jamajjeya ¡o jayojjaya eba'e!

E'e Tito, jjabahuejjaqui majje jama acue ba'a: ¡Esohui e'e nei huohuicue! ¡Quea ja'a nee oe huohuicue! ⁸ Jamajjeya pea cuana miquea esohui shajja'ajja caje'yo. Miquea esohui e'e jojo nei poanijo, onajaya miya eniñebajji pojjeama. Jamajjeya pea cuana minijje mimi-jaji majje quea bicho poaje. E'e, miya onaaya ba caje

quea pame nee poani; miquea eba'ejji, miquea esohui quea ja'a nee pea'ai.

⁹ Tito, ¡echacojji cuana joya ojaya echaco meejjija yajjijo sosema' chacochoacoani huohuicue jama ba'a: —¡Mi huoojeajji poani shajja'ajjacue! ¡Ojaya esohui jayojja jama chacocue! ¡A'a mimijajjiji onijje! Jamajjeya oya minijje quea bei poaje. ¹⁰ ¡Ojaya aquiana a'a sii poquaijji! Chojja, ¡quea pame oe ba'ecue! Jamajjeya mi huoojeajji poani jjashahuabaquije miyaya ojaya aquiana jaahuanaje'yo quea pame nee. E'e echacojji cuana, miquianaya jamaya quea pame nee ba'yanijo pea cuana Eyacuiñajjija esohui shajja'ajja caje, esejaya Emeshi Mese neija. Jama acaje cuana ba'a: “¡Jiquio echacojji Jesusaja epeeji poani. Oya quea pame nee, mimishi'ama ba'yani. Jamajjeya Eyacuiñajjija esohui quea pame nee. Jamaya caba'yahua” acaje cuana —jamaya echacojji cuana acue, Tito!

Eyacuiñajjija eseya ba mee canaje ojaya ejjashahuabaquijji quea bei ojjaña poani

¹¹ E'e Tito, ojjaña Eyacuiñajjija quea jea nee neejo ohuaya ojjaña ba mee cani jama ba'a: Ohuaya ojjaña cuana ba'e meesahua cani. Jesusaja epeeji cuana mimishi cuijea'yo majje ba'e tiitii mee caje'yo eyajo onijje. ¹² Jamajjoya ohuaya eseya jama acani ba'a: —¡Ecuea esohui jayojja jama acue! Jamajjeya eya quea bei poaje miquiana nijje. ¡Ejjashahuabaquijji quea mimishi pajea'yocue! E'e, ¡jiquio meshijo ba'yanijo jjashahuabaquicue quea pame nee! ¡E jayojja poaniya pea cuana quea jea nee acue! ¡Ecuea esohui jayojja jama atiitiicue quea pame nee pea'ai! —jamaya Eyacuiñajji poani.

¹³ ¡Jamaya ejja'aqui Jesusaja epoe o'oyajjijo ishoaño-jo! Enejaya eba oya e'e jojo nei poeje o'oya. Quea ca'a nee nee, quea jeajahua nee nee poeje'yo. Oya, Jesosa Quito ese jaahuanajji, oe nei quea ja'a nee nee. Eyacuiñajji nei oya. ¹⁴ Yahuajo Jesosa esejo mano'yonaje. Onaaya oya iña canaje equecua'yojji. Jamatii Jesosa mimi jjima jama ba'a: —¡A'a eya quecua'yojji! —chojja, jamaya Jesosa mimi jjima.

Ohuaya esejaya mimishijo mano'yonajejo, Eyacuiñajjija eseya ba cani emimishi cuijea'yo. Jamaya ohuaya eseya ma ojaya epejjime po mee ca'yonaje. Jamajjoya ohuaya eseya ba'e mee cani ojaya ejjashahuabaquijji jayojjaya quea boejea'yo, mimishi'ama. Jamajjeya ¡quea pame nee nee eba'e tii tii!

¹⁵ E'e Tito, ¡jiquio esohui huohuicue! ¡Jesusaja epeeji cuana ba'e meesahuacue quea ja'a nee! ¡Shajjama' cuana jjabahuejja meequicue! Jama acue ba'a: —Eyacuiñajjija eya huoojea canaje oja esohui huohuiya. ¡Jamajjeya shajja'ajjacue mo!

Jesosaja epeeji cuana quea pame nee caba'yahua jama ba'a:

3 Tito, Jesusaja epeeji cuana huohui o'oyacue jama ba'a: —¡Miquea emeshi meseja esohui jayojja jama acue! ¡Mi huoojeajji poanija esohui jayojja jama

acue pea'ai! E'e, ¡miquianaaya Jesusaja epeeji cuana poaniya quea pame nee atiitiicue huea'ama! ² ¡A'a pea cuana niñebajji! ¡A'a jjamimicuaiea nobiajeaquijji pea cuana nijje! ¡Ojjaña nijje quea bihui pocue; ba'e meesahuacue quea bihui nee! ³ ¡Ojjaña nijje quea bei nee pocue! ¡A'a quenequene cuajijji! E'e, yahuajo Jesosa nijje jjapeequi jjimahuajo eseya quea mimishi poanaje pea'ai ona jayojjaya. Jjeya ca chojja. Yahuajo eseya jjashahuaba taiquinaje. Shajjama' pea'ai poanaje. Esohui huohuijji nisho cuaa eseya dasia ca'yonaje. Yahuajo eseya mimishi pajea'yo sa poanaje. Jamatii pajea'yo jji-ma poanaje. Jamaya Jesusaja epeeji pojjeama jayojja jama poanaje, quea mimishi boti nee. E'e, yahuajo Jesosa nijje jjapeequi jjimahuajo eseya jjashahuaba tiiti-quinaje quea mimishi epojji. Quea dejja tai poanaje; onajaya aquiana jea banaje. Pea cuana boti'ama nei nei poanaje. Esey onajaya boti'ama nei nei poanaje pea'ai. Jjasoseaquijji ponequinaje. Jamaya aje oe eseya yahuajo ba'ya poa. ⁴ E'e, yahuajo eseya quea mimishi ponequinaje. Jamatii ese jaahuanajjiya, Eyacuiñajjiya eseya ba mee canaje ojjaña ojaya quea boti nee nee. Jamajjeya ohuaya ojjaña quea jea nee nee acani. ⁵ E'e, Eyacuiñajjiya esejaya mimishi cuijea ca'yajje eseya ba'e tiitiije'yo eyajo. Esey quea pame poanijo pojjeama ohuaya esejaya mimishi cuijea ca'yonaje. Chojja, chama' joya quea pame nee mimishi'ama ba'yani. Jamatii Jesosa esejaya mimishijo mano'yonajejo, Eyacuiñajjiya esejaya mimishi cuijea ca'yonaje. E'e, Eyacuiñajji quea quene tii tii pojjeama ese nijje poanaje; eseya ojaya quea jea nee nee poanaje. Jamajjeya ohuaya esejaya mimishi cuijea'yo majje Edojjoshahua Pame ese que dobiqúi mee ca'yonaje eseya quea bihui nee epojji. Ohuaya eseya ba'e meesahua cani Eyacuiñajjiya esohui jayojja, yahuajo jama pojjeama. ⁶ E'e, Jesosa Quito esejaya mimishijo mano'yonaje ese ba'e tiitii mee'yojji. Majoya Eyacuiñajjiya Edojjoshahua Pame huoojea ca'yonaje ese que dobiquiya, ese quea pame nee ba'e meesahuaa. ⁷ Jamajjeya eseya ojaya bacua cuana poanijo ohuaya eseya ba'e tiitii mee caje'yo onijje eyajo. E'e, eseya Eyacuiñajjiya quea jea nee acanaje; ohuaya huohui canaje jama ba'a: —Jesusaja epeeji cuana eyaya baña mimishi'ama, emimishi cuijea'yo.

⁸ Tito, jiquio esohui ecue etehue'yo e'e nei. Jamajjeya jiquio esohui huohui neineicue ojjaña Jesusaja epeeji cuana huasijje! Shajja'ajja majje onaaya quea pame nee atiitii caje'yo. E'e, jiquio esohui quea pame nee. Shajja'ajja neinei majje ojjaña cuana quea pame nee ba'eje'yo. ⁹ Jamatii beca cuana ecue sohui jayojja jama ba'e ajja, quea pame ba'e ajja. Oya cuana aje oe jjami-

micuiajea nobiajeaquiani onajaya esohui quea quehuajo, Jodio etiquiana cuanajo, Moisesija esohui etehue'yojo pea'ai. E'e, jamaya quea tai. ¡A'a ona jayojja jama pojji, Tito! Jamaya po majje miquea pea cuana quea pame nee ejjapeequi meesahuajji pojjeama Jesosa nijje. ¹⁰ Esohui huohuijji nisho Jesusaja epeeji cuana ojaya esohuijji jjashahuabaqui pajea mee sa poani. Peaja esohui shajja'ajja mee sa poani. ¡Esohui huohuijji nisho huohuicue jama ba'a: —¡Miquea esohui quea tai huohui pajea'yocue! —acue!

Oya cuana shajjama' poanijo, ¡oya huohui o'oyacue ojaya esohui quea tai ehuhui pajea'yojji; beca huohui'yome acue! ¡Majoya oya cuana shajjama' po tiiti-ajo, oya cuana cajaa a'yocue! ¡A'a onijje jjapeequi o'oyajji! ¹¹ Mi shajja'ajja sa po'yo ajjajo miquea eba ma esohui huohuijji nisho cuana shajjama' nei nei. Oya cuana quea pame po sa po'yo ajja nei nei. Eyacuiñajjiya esohui jayojja jama a sa po'yo ajja. Jamajjeya quea mimishi poanijo, Eyacuiñajjiya oya cuana tecuea caje'yo. Quea nee nee po mee caje'yo pea'ai.

¡Poecue e que Nicoponi yasijje!

¹² Tito, quijje eyaya Jesusaja epeeji mi que, Queta nashi yasijje huoojeaje; Atema, Tiquico pojja'a huoojeaje. Mi que ba'eñaquiajo ¡poecue e que Nicoponi yasijje! Jomajo eyaya miya ishoaje. Majoya eseya eeno shejo Nicoponijo ba'eje.

¹³ Emeshi meseja esohui bajji Sena bajjani, Jesusaja esohui huohuijji Apono bajjani pea'ai Queta meshijo nequi ajja. Jjeya nei pea meshi yasijje poquije. Jamajjeya ¡joya cuana poqui meesahuacue! ¡Bobi cuana, eba'ejji cuana pea'ai quiacue!

¹⁴ Tito, jamajjeya ¡Jesusaja epeeji cuana huohuicue jama ba'a: —¡Quea pame nee eba'e, huea'ama! ¡Jesusaja esohui huohuijji cuana, aema' cuana pea'ai ejjaquiaqui aquiana cuana; onaya ejjaba'e meesahuaqui! —jamaya acue Jesusaja epeeji cuana ona jaahuanajji epojji!

¹⁵ Ojjaña Jesusaja epeeji cuana enijje nequiya eya huohui'ajja mee cani jama ba'a: —Tito, ¿achajja ami ani so'o ecuanajaya ebajji?

Ojjaña Jesusaja epeeji cuana Quetajo ba'e huohuicue jama ba'a: —Pabohua, ojjaña onijje nequiya pea'ai jama acani ba'a: “¿Achajja acuae quiana ani so'o?” ecuanajaya ebajji. Ecuanaya ojjañaja quea boti nee.

Miquianaya Eyacuiñajjiya quea jea nee nee. ¡Ohuaya miquianaya cajaanahua cahua! Mahuiso eyaya, Pabohua mi que tehuenaje, Tito. Apoa.

PINEMO

Pabohua esohui tehue canaje Pinemo que

1 Ecuea epeeji Pinemo, eyaya Pabohua jiquio esohui mi que tehueaña. Eyaya Jesosa Quitoja esohui huohuañaajo, dejja mase cuaa eya iña'yo majje jeanobia ca'yonaje. Eseyaya epeeji Timoteo enijje nequi. Pinemo, ecuaaya miya quea jea nee aña. Miyaya eya chaco meesahuaña. ²Jamajjeya jiquio pea ecuaaya esohui etehue'yo huoojeaje Jesusaja epeeji cuana huasijje, ma miquea equi yasijje ojee dobiquiani Jesosa Quito bihuiaa. Eseyaya epeeji epona Apia bajjani que tehueaña pea'ai. Oya esejaya jjo'i jayojjaya. Dejja Aquipo bajjani que tehueaña pea'ai, ma ese nijje chacoconaje Jesosa Quitoja.

³ Eyacuiñajji esejaya Chii ai poani. Jesosa Quito esejaya Emeshi Mese nei poani. ¡Ohuaya miquianaya ca-jaahuana cahua! Miquianaya ojaya epeeji cuana poanijo, ¡quea bei nee capo mee cahua pea'ai!

Pabo Pinemojo quea bihui nee poani

⁴ Pinemo, eya Eyacuiñajji nijje mimianijo oya bihuiaña miya quea pame poanijojo. ⁵ E'e, pea dejja cuaa huohui cani jama ba'a: —Pinemohua ojjaña Jesusaja epeeji cuana quea jea nee acani, Jesosa Quitoja esohui jayojja jama po tiitiani pea'ai.

⁶ Jamajjeya eya Eyacuiñajji nijje mimiani mijo jama ba'a: —Eyacuiñajji, ¡Pinemo Jesusaja epeeji cuana nijje jjapeequi meesahuacue quea ja'a nee! Jamajjeya Jesusaja epeeji ojaya esohui jayojja jama poaje'yo Pinemo nijje. E'e Eyacuiñajji, ecuanaja echaco quea pame nee Jesosa Quitojo. Jamajjeya ¡miyaya Pinemo ojjaña onijje jjachichaquiani pea'ai jjabahuejja meequisahuacue joya miya o asahuanajejo quea pame nee! —jamaya eya mimiani Eyacuiñajji nijje mijo, Pinemo.

⁷ E'e Pinemo, miyaya ojjaña Jesusaja epeeji cuana quea jea nee aña. Miquea echacojji quea pame neejo pea epeeji cuana quea bihui nee poanaje. Jamajjeya eya quea bihui nee poani mijo.

Pabohua Onesimojo tehue canaje

⁸ Jamajjeya Pinemo, eya Jesusaja epeeji jaahuaniijji etiiya jjejojo beshahua nei miya tehuenaje jama ba'a: "Onesimo miquea equi yasijje poqui'yajo ja'a oe cuiajjequi'yojji; ja'ajjequi o'oyacue!"

⁹ Chojja, ecuea jama tehueme'yajji pojjeama mi que; eya miquea quea jea neejo ecuea etehue'yo jayojja jamaya miyaya aje'yo. E'e eya, Pabo etii. Eya Jesosa Quitoja huoojea'yo ojaya esohui huohuiya. Jjeya eya eja-

nobia ani; dejja mase cuaa eya iña'yo majje jeanobia-jea ca'yonaje Jesusaja esohui huohui mee ajjaa jjejojo.

¹⁰ Pinemo, eyaya mi que tehueaña Onesimojo. Ecuea esohui shajja'ajja majje Onesimo Jesosa Quito nijje jja-peequi'yonaje. Jamajjeya oya ecuea ebacua ejja jayojja jama poanaje. Jamaya oya poanaje eya jiquiojo Shoma cuiñajji eme' jeyo'yo anijo. ¹¹ Yahuajo minijje nequiya Onesimohua quea tai aca poa. Jjeya ca quea tai pojjeama'yo. Quea pame nee ejo chaco ca'yani. Mijo chaco caje o'oya pea'ai; jjeya ca ca quea pame nee chaco caje'yo, Onesimohua.

¹² Ecuea Onesimo quea jea nee nee poani; jamatii eyaya oya huoojeaje o'oya mi que minijje eba'e o'oyajji. ¹³ E'e pojja'a miyaya oya huoojeaje o'oya e que enijje eba'e'yojji. Jamajjeya eya quea bihui nee poaje'yo. Jamajjeya aje mo oe jama jjashahuabaquimeya poani. Eya jiquiojo nequi eme' jeyo'yo, Jesosa Quitoja esohui huohuijji poani joyoya. Miya e ba'e meesahua sa poanijo ¡Onesimo, miquea echacojji yacua huoojea'yocue e ba'e meesahuaa! ¹⁴ Miquea echacojji ecuea enahuejji pojjeama. Chojja, miquea ejjashahuabaqui'yojji jayojja jama a sa ca ca iña poani. Eya ca ca iña mi huoojeajji pojjeama ca Onesimo enijje e'ani meejji, e ba'e meesahuajji. ¡Miquea ejjashahuabaqui'yojji jayojja jama miyaya quea bihui nee a'yocue ejo! ¹⁵ Yahuajo oya minijje chacochocho maja sa po ajja jjejojo quehua poquia poa. Jjeya ca ca oya miyaya jaahuana tiitije'yo. ¹⁶ Oya ca ca minijje chacochocho nequinaje sosema'. Jjeya ca ca oya Jesusaja epeeji poanijo miquea mique chahua jayojja jama po'yonaje pea'ai. E'e, oya esejaya chahua jayojja jama poani Jesosa Quito nijje jjapeequianijo. Eseyaya oya quea jea nee nee poani. E'e de, ecuea oya quea jea nee nee. Jjeya oya Jesosa Quitoja epeeji; miquea echacojji pea'ai. Jamajjeya ¡miyaya oya quea jea nee nee acue!

¹⁷ Jamajjeya ¡ecuea etehue'yojo jjashahuabaquicue! Pinemo, ¡eya miquea epeeji poanijo, Onesimo ba'e mee o'oyacue minijje! ¡Bacue! Eya mi que poquiajo, miya quea bihui nee poaje'yo. ¡Jamaya oe pocue Onesimo mi que poqui'yajo! ¹⁸ ¿A'a yahuajo ohuaya miquea aquiana sii ca poa? ¿A'a ma aquiana quea sose hui so nee nee? ¡A'a Onesimo sosequia meejji! ¡Eyaya oe casosequia'yahua! ¹⁹ Jamajjeya eyaya esohui tehueaña ecuea emeya jama ba'a: Pinemo, eyaya Pabohua miya sosequiaje'yo ma Onesimohua sii ca poa.

Jamatii ¡jjashahuabaquicue! Miya Jesosa Quitoja epeeji poanaje eya huohuije shajja'ajja majje. ¿Ache sose hui so acuae ecuea esohui miyaya shajja'ajjanaje Jesosa Quitojo? ¿A'a quea hui so nee nee? ²⁰ E'e Pine-

mo, miya ecue chahua jayojja jama poani. Jamajjeya eseya Jesosa Quito nijje jjapeequianijo, ¡che iña quea quiijiji jaji nee po mee'yocue! ¡Onesimo mi que poqui'yajo, ja'ajjequi'yo majje jjequidobia'yocue!

²¹ ¡Jiquio eyaya esohui tehueaña mi que; ecuea eba miya; ecuea esohui jayojja miyaya aje'yo e'e nei, quea pame nee nee aje'yo tii pea'ai.

²² ¡Pea ecuea esohui jayojja jama a'yocue! ¡Equi equacuayiji cuiashabacue e aniñajjiya! Poejeya pojja'a mo mi que. Miquianaya Eyacuiñajji nijje mimi huicha'ahui-cha'a ani jama ba'a: —¡Eyacuiñajji, miyaya dejja mase cuana Pabo pichojea mee'yocue oe, equi ejjajeanobia-quiijijo ani! —miquianaya poanaje.

Jamajjeya eya jjashahuabaquiani jiquio jama ba'a: —E'e, Eyacuiñajjiya eya poqui meesahua caje mi que. Joya ecua miya mimiani jamaya Eyacuiñajjiya acaje'yo —jamaya eya jjashahuabaquiani.

Pea esohui quea bihui nee epo meeji

²³ Dejja Epapasi bajjani Jesosa Quitoja esohui huohuiiji poani jojoya, dejja maseya oya iña majje jeanobiajea ca'yonaje pea'ai. Ohuaya eya huohui'ajja mee cani jama ba'a: —Pinemo, ¿achajja acuae mi ani so'o, de?

²⁴ Pea ecuea epeeji cuana enijjeya Jesosa Quitojo chacochoani. Ohuaya eya huohui'ajja mee cani jama ba'a: —Pinemo, ¿achajja acuae mi ani so'o? —yohua cuana ba'a: Macoso, Anitaco, Demasi, Noca pea'ai. Mahuisohuaya mi huohui'ajja mee cani.

²⁵ Esejaya Emeshi Mese oe nei, Jesosa Quitohua ¡miquianaya cajaanuana cahua quea pame nee! Mahuiso-ya Pinemo, apoa. Eyaya Pabohua esohui tehuejeyona-je.

EMEO

Eyacuiñajjiya oja Bacua Ejja huoojea canaje ona oja esohui ba meeya

1 Ecuea epeeji cuana quea huiso meshijo ba'e, yahuajo nei nei Eyacuiñajjiya ojaya epeeji nei cuana huoojea ca poa esejaya etiiquiana que, Jodio etiiquiana que. Jama poa ba'a: "¡Huohuiquicue Jodio cuana huasijje ecuea ejjashahuabaquijji ojjañaja ebajji! ¡Huohui majamajacue oe!" Ma huoojea nequime aca poa; pea mano'yajo huoojea'yo esohui huohuijji aca nequia poa. Oe esohui huohuijji quea huiso huohui meesahua ca poa Eyacuiñajjiya ojaya ejjashahuabaquijji. Pea esohui huohuijji pea esohui huohui meesahua ca poa ojaya ejjashahuabaquijji pea'ai. Jamatii huohui jjima poa ojjaña Eyacuiñajjiya ejjashahuabaquijji. ²Jjeya ca ca Eyacuiñajjiya oja Bacua Ejja Jesosa Quito bajjani huoojea canaje eseya ojjaña ojaya ejjashahuabaquijji ba meeya. Ohuaya Jesosaa oja Chii nijjeya ojjaña pana ca'ya poa, ojjaña aquiana meshijo e'anijji, eyatahuatahuajo enequijji pea'ai pana ca'ya poa. Jamajjeya ojaya nei aquiana. Jesosa ojjaña huoojea'yojji poani tii tii eyajo, meshi cuanajo pea'ai. ³Jesosaa oja Chii jayojjaya poa. Quea pame nee nee, quea ca'a nee nee. Jesosa oja Chii jayojjaya poani tii tii. Oya quea sohui poja nee neeya jjejojo ojjaña nequi mee ca poa. Ma ecua ohuaya yahuajo huohui ca poa jamaya acani ohuaya jjeya ojjaña eyajo nequi, ojjaña meshijo nequi pea'ai nequi ca'a tiitii mee cani Jesosaa. Oya ojjañaja mimishi cuijea'yo majje, ma ojjaña ojaya epeeji epojji-jja mimishi cuijea'yo majje anioquenaje oja Chii pejeje ebianeijje. Jomajo oya, Jesosa ojjaña huoojea'yojji poani tii tii. E'e, Eyacuiñajji, Jesosa pea'ai quea ca'a nee nee po tiitiani. Pea ca'a'ama.

Jesosaa Eyacuiñajjiya Bacua Ejja quea ja'a nee nee esohuidojojji cuana quea ja'a pishana

⁴Eyacuiñajjiya Jesosa nequi mee cani quea ja'a nee nee. Ojaya esohuidojojji cuana ca ca nequi mee cani quea ja'a pishana. Esohuidojojji cuana bajjani canaje quea bajjani pame pishana, Eyacuiñajjiya echacojji bajjani. Jesosa ca ca Eyacuiñajjiya Ebacua Ejja quea pame nee nee. ⁵"Eyaya miya ojjaña ba meeaña cuana, miya ca ca oe ecue Bacua Ejja. Eya ca ca iña mique Chii". Jamaya Eyacuiñajjiya Jesosa acanaje. Eyacuiñajjiya ca ca esohuidojojji cuana jama huohuime ajjimaya. Eyacuiñajjiya Jesosa jama huohuime aca o'oyanaje ba'a: "¡Eya e'e jojo nee mique Chii caba cahua cuaa! E'e, miya ecue Bacua Ejja oe nei". Jama Jesosa huohuimeya aca-

naje. Jama huohuimeya esohuidojojji ajjima Eyacuiñajjiya.

⁶Eyacuiñajjiya oja Bacua Ejja oe nei meshi yasijje huoojea jeahua esohuidojojji jama huohuime aca poa ba'a: "¡Esohuidojojji cuana, ecue Bacua Ejja oe bihuia-cue, ojjaña!" Jamaya Eyacuiñajjiya aca poa Jesosajo.

⁷Esohuidojojji jama aca poa ba'a: "Eyaya ecuea esohuidojojji huoojeaña quea cuejipas-hi nee nee pojjeje jama, quea quemo nee nee beni jama".

Jamaya Eyacuiñajji poa.

⁸Oja bacua ca ca Eyacuiñajjiya huohui ca poa jama ba'a:

"Miya ca ca oe ecue Bacua Ejja e'e jojo nei, e jayojjaya tii tiiya Eyacuiñajjiya ca mi coma. Miya ojjaña huoojeajji poani tii tii ojjaña meshi yasijje. Quea ja'a nee nee ojjaña huoojeaña tii tii. ⁹Ojjaña quea ja'a nee nee poani; ecuea ejjashahuabaquijji jayojja jama poani miquea quea boti nee nee poani. Mimishi cuana ca ca cajaaña. Jamajjeya eyaya miya babaca'ya poa ojjañaja Emeshi Mese nei epojji. Ojjaña miya shajja'ajja caje ojjaña meshijo ba'eca cuaa. Pea emeshi mese shajja'ajja jjima acaje cuaa. Jamajjeya miya quea jaji nee nee poani tii".

Jamaya yahuajo nei Eyacuiñajjiya tehue mee ca poa Jesosa nijje.

¹⁰Eyacuiñajjiya pea esohui tehue mee ca poa oja Bacua Ejja nijje, Jesosa nijje jama ba'a:

"Emeshi Mese nei, miyaya ebionei meshi pana cooa poa ojjaña. Eyatahuatahua pana cooa poa quea huesha nee nee, ojjaña eyajo enequijji pea'ai. ¹¹Ojjaña miquea epana'yo oe poaje, meshi cuana, eyatahuatahua pea'ai. Miya ca ca nequi tiitije'yo. E'e, miya ca ca oe nequi tiitije'yo. Meshi etii poaje, eyatahuatahua pea'ai. Jiquio ecua daqui eyacua daqui chii poani, daqui chii chii'yajo iñajjaja'yo majje jeajeaña jayojja jama eyaya meshi aje, eyatahuatahua pea'ai. ¹²E'e, daqui chii jeajeaña eyacua ehuoshojji jayojja jama meshi, eyatahuatahua pea'ai tii'yajo eyaya cajaa aje eyacua epana'yojji. Miya ca ca jamatii nequi tiitije'yo quea ja'a nee nee".

Jamaya poanaje Eyacuiñajji oja Bacua Ejja nijje, Jesosa nijje.

¹³E'e, jamaya Eyacuiñajjiya oja Bacua huohui ca poa esejaya ebajji jama ba'a:

"¡Anioquecua ecuea ebianeijje enijje ojjaña huoojea'yojji! ¡Epejeje ishoa'ajjacue! Mi quecuajji nisho yani. Eyaya oya cuana ca'a'ama po mee majje mi shajja'ajjaji po meeje'yo".

Jamaya Eyacuiñajjiya oja Bacua Ejja ca ca oe huohui ca poa. Esohuidojojji nijje ca ca jama mimimeya po jjiima.

¹⁴ E'e, esohuidojojji cuana Eyacuiñajjiya huoojea'yo ca ca oe. Oya cuana huoojea cani Jesusaja epeeji cuana jaahuanaa, ma onijje eyajo eba'e tiitii'yojji cuana jaahuanajji.

¡Jesusa shajja'ajjacue ojaya epeeji nei epojji!

2 Ecuea epeeji cuana, jamajjeya ¡shajja'ajja neinei-cue Jesusaja esohui ojaya epeeji nei nei epojji! Yahuajo pishana maya shajja'ajjanaje eseyaya. Esohui pajea'yo majje ca se ca oe bishe jeyo jjima jayojja beniya dojojea cani jayojja jama poaje; poquiquehua chana se esohui pajea'yo majje. ² Yahuajo nei nei Eyacuiñajjiya esohuidojojji esejaya etiiquiana huasijje huoojea ca poa. Oja sohui e'e nei huohui huicha'a huicha'a mee ca poa: “¡Shajja'ajjacue ecuea esohuidojojji esohui e'e nei!” jamaya Eyacuiñajjiya etiiquiana aca'ya poa.

Jamajjeya shajjama' cuana Eyacuiñajjiya quea nee po mee ca poa oja esohui ajjimajojo. Jjashajja'ajjaqui ajja-jojo quea nee nee po mee ca'ya poa. ³ Jjeya ca ca Eyacuiñajjiya eseya quea pame nee nee acani. Jesusa nijje jjapeequianajo, ohuaya eseya ba'e tiitii mee caje'yo eyajo. Jesusa nijje jjapeequi sa po'yo ajjajo cho, eba'e tiitii mee'yojji pojjeama. E'e, Jesusaa esejaya Emeshi Mese neiya huohui coo ca poa jama ba'a: —Enijje jjapeequiajo, eyaya miquianaya ba'e tiitii meeje'yo enijje —Jesusa poanaje.

Majoya o shajja'ajjajji cuaa eseya huohui canaje jama ba'a: —E'e jojo nei Jesusaa eseya ba'e tiitii mee caje'yo eyajo onijje jjapeequianajo.

⁴ Eyacuiñajjiya pea'ai ba mee canaje ma esohui e'e jojo nei. E'e, Eyacuiñajjiya Jesusaja epeeji cuana ma dejjaa ajjima acani ameesahua canaje. Ma dejjaja yahuajo ba jjima poa ba meesahua canaje pea'ai. Edoj-joshahua Pame huoojea canaje pea'ai ojaya ejjashahuabaquijji jayojja jama ameesahuaa, Eyacuiñajjiya. Jamajjeya eseya ba mee canaje e'e jojo nei Jesusaa eseya ba'e tiitii mee caje'yo eyajo onijje jjapeequianajo.

Meshi eyacuajo ojjaña huoojea'yojji poaje Jesusa

⁵ E'e, quijje Eyacuiñajjiya meshi pana caje'yo eyacua. Ma meshi eyacuajo ecuaaya miquianaya huohuiaña jama poaje ba'a: Eyacuiñajji Jesusaja epeeji cuana nijje jama poanaje ba'a: —E'e jojo nei meshi eyacuajo miquianaya ona huoojeajji poaje —Eyacuiñajji jamaya poanaje Jesusaja epeeji cuana nijje. Jamaya mimi jjima esohuidojojji nijje, de. ⁶ Chojja. Yahuajo nei nei Dabi tehue meesahua ca poa Eyacuiñajjiya jama ba'a:

“Eyacuiñajji, miya jjashahuaba tiitiiquiani meshijo eba'e'jji cuanajo. Dejja cuana ca'a'ama. Quea pame pishana. Jamatii oya cuana miyaya jaahuanaña. ⁷ E'e Eyacuiñajji, yahuajo miyaya ojjaña dejja cuana quea pame anaje; esohuidojojji quea pame nee jayojja beshahua nei anaje. Jamaya miyaya oya cuana nequi meenaje iye huiso daqui sheme. Miyaya oya cuana quea ja'a nee

nee po meenaje. ⁸ Quea ca'a nee nee po meenaje miyaya ojjaña huoojea'yojji epojji”.

Jamaya Eyacuiñajjiya yahuajo nei Dabi tehue mee ca poa. E'e, ma etehue'yojo jama poa ba'a: “Dejja ojjaña huoojea'yojji po mee canaje Eyacuiñajjiya”. E'e, ojjaña huoojea'yojji po mee ca poa, ojjaña aquiana cuana huoojeajji. Jamatii eseyaya baña jjeya dejja cuana ojjaña huoojeajji po jjima poani.

⁹ Jesusa ca ca esejaya eba. Eyacuiñajjiya oya nequi mee ca poa beshahua nei esohuidojojji quea pame jayojja. Jamaya nequi mee ca poa oe pojji daqui sheme. Eseyaya Eyacuiñajjiya quea jea nee poanajo, Jesusa ese jayojja yamijji poa; emano'yojjiya poa. Jamajjeya Jesusa ojjaña nahuejji mano'yonaje. Eyacuiñajjiya oya shequi mee ca o'oyanaje quea bame nee nee enequi tiitii'yojji. Pea chama' o jayojja, de.

¹⁰ Eyacuiñajjiya oja Bacua Ejja nijjeya, Jesusa nijjeya ojjaña pana majje nequi mee cani, ojjaña eyajo nequi, ojjaña meshijo ba'e pea'ai. Ojjaña yani de, Eyacuiñajji quea bihui po mee'jji. Oya ojjaña Emeshi Mese tii poani; ojjaña Jesusaja epeeji nequi tiitii mee sa poani onijje: —E'e, ecuea Ebacua Ejja quea nee nee po majje oya ojjaña jaahuanajji poaje —jamaya Eyacuiñajji jjashahuabaquinaje—. Jamajjeya jamaya poaje. Ecuea Ebacua Ejja quea nee nee po meeje. Jamaya quea pame. Jamajjeya ohuaya, Jesusaa quea huiso ba'e tiitii mee caje'yo onijje eyajo —jamaya Eyacuiñajji poanaje.

¹¹ Jamajjeya Jesusaa ojjaña eseya quea boejea po mee ca'yani mimishi cuijea'yo majje. Jamaya ojjaña eseya Eyacuiñajjiya bacua po mee cani o jayojja pea'aiya. Jamajjeya oya, Jesusa ese nijje quea bihui nee jama poani ba'a: —Ecue Chii miquianajaya Chii pea'ai poani. Miquianaya ecuea ecue chahua mese cuana, ecue jjo'i cuana —Jesusa poani.

¹² E'e, Eyacuiñajjiya esohui yahuajo nei etehue'yojo Jesusa oja Chii nijje jama poa ba'a:

“Eyacuiñajji, eya ecuea huapa pojjeama cuana nijje mimije mijo. Eyaya miya bihuiaje ojjaña ecuea epeeji cuanaja eshajja'ajjajji jama ba'a: —Eyacuiñajji, miya ca ca oe quea ca'a nee nee nequi —jamajjeya eya sohucua yaje”.

¹³ Jamaya pea esohui yahuajo nei etehue'yojo Jesusaa aca poa ba'a:

“Eyacuiñajji, eya ca ca iña miyaya baña Eyacuiñajji nei nei. Miyaya eya jaahuanaña e'e jojo nei”.

Jama pea'ai poa ba'a:

“Eyacuiñajji, jeya bacue ecuea huapa pojjeama cuana nijje, ojjaña joya miyaya enijje jjapeequi meesahuanaje nijje!”

Jamaya yahuajo nei Eyacuiñajjiya Isaia tehue mee ca poa Jesusaja esohui.

¹⁴ Jesusaja epeeji cuana dejja cuana aje oe yamijji. Jamajjeya oya, Jesusa poeyanaje yamijji, ese jayojjaya mano'yome epojji. Mano'yonajeya jjejojo ohuaya Edosiquiana nei Satanasa bajjani jeabichajea ca'yonaje, ma ojjaña manomee'yojji poani jeabichajea ca'yonaje. E'e, eba'e tiitii'yojji jjejojo mete'ama eseya poaje emano'yojji. ¹⁵ Yahuajo ojjaña eseya quea mete jjashahua-

baqui aninaje jama ba'a: —E'e de, eya manojeyo. Jamaya quea tai. Quea mete ca iña emano'yoyji —eseya poanaje.

Jesosaja epeeji nei ca ca jjashahuabaquiani jama ba'a: —E'e, eya manojeyo. Jamatii Eyacuiñajjiya eya ba'e tiitii mee caje'yo onijje eyajo.

¹⁶ Jamajjeya Jesosa dejja jayoyja yamijji poeyanaje. Poeyanaje esohuidojojji jayoyja pojjeama, esohuidojojji jaahuanaa pojjeama. Chojja. Jesosa poeyanaje dejja jayoyja yamijji ese jaahuanaa, Amajamaja osecua cuana jaahuanaa. ¹⁷ Jamajjeya oya, Jesosa ese jayoyjaya poanaje ojjaña ojaya epeeji nei jaahuanajji jama ba'a: Eya-cuiñajji nijje emimijji etii yahuajo ba'eya Eyacuiñajjiya esohui jayoyja jama aca poa Eyacuiñajji Jodio cuana nijje quea bei epo meeji nisho. Jjeya ca ca Jesosaa Eyacuiñajjiya ejjashahuabaquijji jama e'e jojo nei acani quea ja'a nee. Eseja mimishi cuijea'yoyji manoyonaje. Jamaya Eyacuiñajji ese nijje e'e jojo nei quea bei po mee canaje tii tii. ¹⁸ Jiquio meshijo ba'e Jesosa quea nee nee poa. Cuanaya Edosiquiana neiya, Satanasaa Jesosa quea mimishi epo meeji nisho aca poa. Jamajjeya Satanasaa eseya quea mimishi po mee sa acanijo, Jesosaa eseya quea pame ba'e mee cani. Jamaya Jesosaa ameesahua cani ba'a: —Chojja, eya Jesosaja epeeji poani. Ohuaya eya jaahuana canijo, quea mimishi po maja sa po ajja ca iña —jamaya Jesosaa eseya po meesahua cani.

Jesosaja quea pame nee; Moisesi quea pame pishana poa

3 Jamajjeya ecuea epeeji cuana, ¡Jesosajo oe jjashahuabaquicue! Eyacuiñajjiya eseya babaca canaje Jesosaja epeeji epojji, onijje eyajo eba'e tiitii'yoyji. E'e, ¡Jesosajo oe jjashahuaba tiitiiquicue! Eyacuiñajjiya oya huoojea canaje ese jaahuanaa: —Miya enijje ma mimi poquime poaje miquea epeeji cuanajo. Quea pame nee nee jamaya poaje'yo tii —jamaya Eyacuiñajji poanaje Jesosa nijje.

² E'e, Eyacuiñajjiya yahuajo Jesosa babaca ca poa ojaya epeeji cuana jaahuanajji epojji. Ojaya epeeji cuanajo onijje emimijji quea pame nee nee po mee ca poa. Ma ecua Eyacuiñajjiya huohui canaje jamaya e'e jojo nei acanaje Jesosaa. Jesosaa jayoyjaya etiiquiana Moisesiya Eyacuiñajjiya epeeji cuana jaahuaname aca poa yahuajo nei nei. ³ Moisesi ca ca quea ja'a pishana poa. Jesosa ca ca quea ja'a nee nee poanaje. E'e, jiquio ecua se equi iya jjimajo jjashahuabaquiani, jamaya Jesosa jjashahuabaquinaje eseya Eyacuiñajjiya epeeji quea ja'a nee epo meeji. ¡Quea pame nee nee Jesosa! Moisesi ca ca echacosahuajji jayoyja jama poa; Jodio cuana beshahua nei Eyacuiñajji nijje jjapeequi meesahua ca poa. ⁴ E'e, ojjaña equi cuana equi iyajji poaniya iya cani. Jiquio ecua equi iyajji poaniya equi iya cani jama panameya Eyacuiñajjiya aca poa. Ojjaña pana'yo majje quea ja'a nee jjeya nequi mee cani. Jama jayoyjaya Jesosaa ojaya epeeji cuana yahuajo nei nei ba'ya poa quea ja'a nee onijje jjapeequi meesahua ca poa; ojaya epeeji jjeya nei ba'yani pea'ai jjapeequi meesahua ca-

ni onijje. ⁵ Jamajjeya Moisesi Eyacuiñajjiya echacojji poa. Jiquio ecua echacojjiya equijo chaco neinei cani jama jayoyja Moisesiya Eyacuiñajjiya esohui pea cuana ba mee ca poa; ma Eyacuiñajjiya quijje huohui caje Moisesiya huohui ca poa pea'ai. ⁶ Jesosa Quito ca ca Eyacuiñajjiya Ebacua Ejja. Oya e'equi mese jayoyjaya, equi chacojji jayoyja pojjeama. Eseyo ojaya equi jayoyja poani. E'e, eseya Eyacuiñajjiya equi jayoyja poani ca jama jjashahuabaquianijo tii ba'a: —Eya Eyacuiñajjiya epeeji. Ohuaya eya ba'e tiitii mee caje'yo onijje eyajo.

Jamajjeya ¡jamaya huohui tiitiiquicue! ¡Jesosaja nijje quea bihui nee jjapee tiitiiquicue! Ohuaya eseya jaahuana cani quea ja'a nee nee.

Ojaya epeeji cuana jomishoca mee caje'yo Jesosaja

⁷ Yahuajo nei nei Edojjoshahua Pameya esejaya etiiquiana esohui tehue mee ca poa jama ba'a:

“Jjeya nei Eyacuiñajji minijje mimianijo, ¡ojaya esohui shajja'ajja neineicue! ⁸ ¡A'a shajjama' poji! ¡Miquianajaya etiiquiana jayoyja jja oe a'a poji! Yahuajo nei Eyacuiñajjiya esohui shajja'ajja jjima poa meshi jabojo nequija. Meshi quimajo nequi etiiquiana cuana quea mimishi nee nee poa. Jamatii Eyacuiñajji quenequene cuaji ajja poa etiiquiana nijje. ⁹ E'e, miquianajaya etiiquiana yahuajo nei ba'ya poa Eyacuiñajji ba'ajja ca poa. Jama poa ba'a: —Eya quea mimishi poanijo jamatii Eyacuiñajjiya eya etecueajji pojjeama —jama posoya jjabaquia poa cuana. Jamajjeya Eyacuiñajjiya jama aca poa ba'a: —Miquianaya ca jja ca oe quea mimishi nee nee. Quea huio shequijame, 40 shequijame eya miquianajo ishoa'ajjaña poa miquianajaya mimishi cuana epajea'yoyji nisho. ¹⁰ Jamajjeya mimishi pajea'yo ajjajo eya quea tecue miquiana nijje poa: Miquianajaya ejjashahuabaquijji quea quehua, quea tai. Ecuea esohui jayoyja jama a sa po'yo ajja. Jjabahuejjaqui'yo ajja —jamaya Eyacuiñajji poa—. ¹¹ Jamajjeya quea quene po majje eyaya miquianaya tecueajejanaje jama ba'a: Shajjama' poanijo e'e jojo nei miquianaya ca mi ca oe edobiquijji pojjeama ecue meshi quea pame yasijje ejomishocajji, quea bei eba'e'yoyji pea'ai”. Jamaya Eyacuiñajjiya etiiquiana cuana Moisesi nijje nequi tecueajea ca poa. Jamaya yahuajo nei esohui etehue'yo poa.

¹² Ecuea epeeji cuana, jamajjeya oe ¡quea ja'a nee jjashahuabaquicue! ¡Eyacuiñajjiya sohui jama acue! ¡A'a quea quehua jjashahuabaquijji! Shajjama' po majje Eyacuiñajji nijje miya jjapee pajeaqui chana'. Tecuea ca chana' mi. Oya ca ca oe ba'e tiitiani, de. ¹³ Jesosaja pea epeeji cuana nijje ca ca mimi huicha'a huicha'acue jama ba'a: —jjeya nei Jesosa nijje ejjapee neineiqui!

Jamaya poanijo miquianaya mimishi cuanaja edasijji pojjeama; quea mimishi nee nee epojji pojjeama.

¹⁴ E'e, Jesosa nijje jjapeequi jahuajo eseya jjashahuaba neineiquinaje onijje eyajo eba'e tiitii'yoyji. ¡Jamaya ejjashahuabaqui poqui! Jamajjeya quijje eseya onijje ona huoojea'yoyji poaje'yo tii tii eyajo.

¹⁵ E'e, jamaya yahuajo nei esohui etehue'yo poa ba'a:

“Jjeya nei Eyacuiñajji minijje mimianijo ;ojaya esohui shajja'ajja neineicue! ¡A'a shajjama' pojji! ¡Miquianajaya etiiquiana jayojja jama a'a pojji!”
Jamaya yahuajo Dabiya tehue ca poa.

¹⁶ ¡Bacue! Moisesiya esejaya etiiquiana Ejito meshijo ba'e poqui meesahua ca'ya poa. Eyacuiñajji ona nijje mimi huicha'a huicha'a poa. Jamatii beshahua nei ojjaña shajjama' poa. ¹⁷ Ona nijje Eyacuiñajji quea quene nee poa quea shequiaja huiso nee neejo, 40 shequiajame. Oya cuana ca ca quea mimishi nee nee poa. Jamajjeya mano ca'ya poa, oe mano popoqui'ya poa meshi jabojo, quimajo. ¹⁸ Shajjama' tiitii poajojo Eyacuiñajjiya oya cuana tecuea ca poa jama ba'a: “E'e jojo nei miquianaya ecue meshi yasijje edobiquijji pojjeama quea bei nee ejomishocajji. ¡Quea mimishi nee nee mi coma!” Jamaya Eyacuiñajjiya etiiquiana yahuajo nei nei ba'ya poa tecuea ca poa.

¹⁹ Jamajjeya e'e jojo nei oya cuana meshi quea pame nee yasijje dobiqui jjima poa ejomishocajji Eyacuiñajjiya esohui shajja'ajja sa po ajja jjejojo, ojaya epeeji nei pojjeama jjejojya.

Etiiquiana jayojja jama eseya ejomishocajji yasijje dobiqui ajja po chana'

4 Jamajjeya Eyacuiñajjiya yahuajo nei etiiquiana huohui ca poa jayojja jama ohuaya jjeya eseya huohui cani jama ba'a: —¡E que poe'yocue ejomishocajji, quea jjashahuabaqui bei nee nee epo'yojji! —oya poani.

Jamajjeya ¡quea ja'a jjashahuabaquicue! ¡Pea cuana quea ja'a jjashahuabaqui meesahuacue! ¡Ojee Jesusaja epeeji nei pocue! Jamajjeya Eyacuiñajjiya eseya o jayojjaya jomishoca mee caje'yo, ojjaña. ² E'e, yahuajo nei Eyacuiñajjiya esejaya etiiquiana cuana huohui ca poa esohui quea pame nee nee. Jjeya eseyaya jiquio esohui quea pame nee shajja'ajjaña pea'ai, etiiquiaa jayojjaya. Etiiquiaa cuaa jiquio esohui shajja'ajja nisho ca poa. Shajjama' poaa jjejojo eshajja'ajjaejji shajja'ajjaeja ca'ya poa. Jamajjeya Eyacuiñajjiya oya cuana jomishoca mee jjima aca poa, etiiquiana cuana. ³ Eseyaya jjeya Eyacuiñajjiya esohui quea pame nee e'e jojo nei shajja'ajjaña. Ojaya esohui jayojja jama añajo, onijje jomishoca mee caje'yo, eseya. E'e, etiiquiana aje jja oe shajjama' poajojo Eyacuiñajjiya tecuea ca poa jama ba'a:

“Jamajjeya quea quene po majje eyaya oya cuana tecueajeaneja jama ba'a: —Shajjama' poanijo e'e jojo nei miquianaya edobiquijji pojjeama ecue meshi quea pame yasijje quea jaji nee ejomishocajji”.

Jamaya Eyacuiñajjiya aca poa. Yahuajo ojjaña cuana panajeyo majje Eyacuiñajji jomishoca poa. Apoa ojjaña amajje Eyacuiñajji jomishoca poa. Jamatii etiiquiana shajjama' cuana tecuea ca poa jama ba'a:

“Oya cuana aje oe edobiquijji pojjeama ecuea meshi quea pame yasijje quea jaji nee ejomishocajji”.

Jamaya Eyacuiñajji poa.

⁴ E'e jojo nei pea esohui yahuajo nei etehue'yo jama poa ba'a:

“Eyacuiñajjiya ojjaña panajeyo ca poa quea cahui huisojo, me oeje oe, 6 cahuime. Majoya ojjaña apoa amajje oya jomisho ca poa cahui oe”. ⁵ E'e, etiiquianajo aje oe jama tehue me ya pea'ai poa ba'a: “Oya cuana aje oe dobiqui jjima poaje enijje jomishocaa”.

⁶ Jamajjeya etiiquiana cuana yahuajo nei ba'e yasijje ebionei Eyacuiñajjiya oja esohui quea pame nee huohui ca poa. Shajjama' poa jjejojo dobiqui jjima poa Eyacuiñajjiya meshi quea pame yasijje onijje jomishocaa. Pea cuana ca ca Eyacuiñajji quea dobiquije jomishocaa. ⁷ Jamajjeya etiiquiana cuana Moisesi nijje nequi jjashajja'ajjaqui ajjaajojo jomishoca mee jjima aca poa. Jamajjeya Eyacuiñajjiya quijje nei Dabi tehue mee ca poa jama ba'a etiiquianaja osecua cuana huasijje: “¡Jjeya nei jjashajja'ajjaquicue!” Jamaya Eyacuiñajji poanaje esejaya etiiquiana nijje, ma Dabi nijje nequi nijje. Jamajjeya eyaya Dabija etehue'yo huohuije o'oya jama ba'a: “Jjeya nei Eyacuiñajji minijje mimianijo ;ojaya esohui shajja'ajja neineicue! ¡A'a shajjama' pojji!”
Jamaya yahuajo nei Dabiya tehue ca poa etiiquianaja onijje ba'eja ebajji.

⁸ E'e, Eyacuiñajjiya Josoe etiiquiana cuana ojaya meshi quea pame yasijje poqui meesahua ca poa. Jamatii jomishoca jjima poa; quea jjashahuabaqui ja'a po jjima. Jamajjeya esejaya eba Eyacuiñajji jjashahuabaquiani jama ba'a: —Quijje eyaya ojjaña ecuea epeeji nei cuana jomishoca meeje'yo —Eyacuiñajji poani.

⁹ E'e, quijje Eyacuiñajjiya ojjaña ojaya epeeji cuana jomishoca tiitii mee caje'yo onijje. Yahuajo nei ohuaya me oeje oe, 6 cahuime ojjaña panajeyo ca poa. Panajeyo majje jomisho ca poa oe cahuime. O jayojjaya Eyacuiñajjiya ojaya epeeji nei cuana jomishoca mee caje'yo. ¹⁰ Jamajjeya Eyacuiñajjiya me oeje oe cahuime chaco majje chaco pajea ca poa; o jomishoca poa jayojjaya eseya Jesusa nijje jjapeequi majje quea bei jjashahuabaquiani. Quijje chachaco pajeaje'yo, jomishoca tiitije'yo onijje eyajo. ¹¹ Jamajjeya ijashajja'ajjaquicue oe! ¡Quea ja'a nei jjashahuabaquicue Jesusaja epeeji nei epojji, e'e jojo nei onijje ejomishoca tiitii'yojji! ¡A'a oe esejaya etiiquiana jama pojji! Shajjama' poani Eyacuiñajji nijje ejomishocajji pojjeama. Cajaa mi acaje'yo.

¹² E'e, Jesusa nijje jjapeequianijo oya ese nijje mimiani, o jayojja ameesahua cani. Ojaya esohui jayojja jama ohuaya eseya e'e jojo nei ameesahua caje'yo. E'e, ojaya esohui baa se beca jama. Jiquio ecua baaa shejjihejiya jehuija'ajjae majje esa' ba cani jama jayojjaya Eyacuiñajjiya esejaya ejashahuabaqui'yojji cuana ba cani. E'e, Eyacuiñajjiya esohui ba neinei majje eseya jjashahuabaquije esejaya eba'ejjijo quea ja'a pojja'a, quea mimishi pojja'a poani. ¹³ E'e jojo nei ojjaña Eyacuiñajjiya eba oja pana'yo. Chama' Eyacuiñajjiyo ejjanequi quehuaquijji, de. Jamajjeya quijje nei o cojja nei nequi majje eseyaya huohuije'yo quio eseya eshe nequi anequinaje cuana.

Jesosa esejo Eyacuiñajji nijje mimianijo ¡quea ja'a nee jjapeequicue!

¹⁴ Jamajjeya ¡Jesosa nijje jjapeequicue! Jesosa ca ca oe nei Eyacuiñajji nijje mimi neinei; oya Eyacuiñajji nijje emimijji etii quea pame nee nee. Oya Eyacuiñajji Ebacua Ejja oe nei. Eyahuasijje poqui'yonaje. Oja Chii pejejo nequi, Eyacuiñajji pejejo. Onijje mimiani esejo. Jamajjeya ¡Jesosa nijje e'e nei jjapeequicue! ¹⁵ E'e, Jesosa Eyacuiñajji nijje mimi neinei esejo. Oya ese jayojjaya quea nee poanaje. Jamajjeya: —Jesosa, eya quea nee, quea yeno nee ani —eseya poani.

Eseya Jesosa nijje jamaya mimiajo, ohuaya eseja sa-ja'a cani jama ba'a: —E'e, ecuea eba. Eya quea nee nee, quea yeno nee nee pea'ai poanaje. Jamajjeya eyaya miya jaahuanaje —jamaya Jesusaa eseja acani.

Satanasaa Jesosa quea mimishi po mee sa aca poa. Jamatii jjadasia meequi ajja poa. Jesosa ca ca oe quea mimishi po ajja nei nei poa. Jamajjeya eseja quea mimishi poajo, ohuaya, Jesusaa eseja jaahuana cani tecue'amaa jjejojo. ¹⁶ Jamajjeya ¡Jesosa nijje bicho'ama emimi! Ohuaya eseja mimishi cuana cuijea caje'yo. Eseja ojaya quea jea nee poanijo quea pame nee jaahuana caje'yo tii tii. Ca'a'ama poajo quea ca'a po mee caje'yo pea'ai.

5 ¡Bacue! Eyacuiñajji esohui jama jayojja eseja etiiquiana beca dejja onijje nequi babaca ca poa Eyacuiñajji nijje emimijji etii epojji. Babaca majje huojjea ca poa jama ba'a: —Eyacuiñajji nijje mimicue esejo! ¡Aquiana cuana, ijjiacajji cuana ehune' nequi pea'ai dahuacue ecuanaja yajji, Eyacuiñajji ecuanaja mimishijo quea bei epo meeji! —jamaya aca poa etiiquiana.

² Ojjaña eseja etiiquiana ca'a'ama, Eyacuiñajji esohui ba neinei po jjima cuana, quea mimishi poa. Ma Eyacuiñajji nijje emimijji etii ca'a'ama pea'aio oya pea cuana nijje tecue'ama poa. Quea bei mimianinaje Eyacuiñajji nijje pea cuanajo. ³ Jamatii oya ca'a'ama jjejojo quea mimishi poani pea'ai. Jamajjeya ijjiacajji ehune' jaja majje onaja mimishijo dahuajea jeahuajo Eyacuiñajji nijje mimia poa jama ba'a: —Eyacuiñajji, ¡ecuea mimishi cuijea'yocue! —acaninaje ohuaya. Majoya jama poa ba'a: —Eyacuiñajji, ¡jiquio e'aquiana meseja mimishi cuijea'yocue pea'ai! —huohuime acaninaje Eyacuiñajji nijje mimianijo.

⁴ Quea pame nee Eyacuiñajji nijje emimijji etii epojji. Dejja cuana mimi ajja Eyacuiñajji nijje jama ba'a: —Eya ca iña jamatii minijje emimijji etii poaje —jamaya mimime epojji pojjeama. Chojja. Eyacuiñajji oeyaya iyaa majje onijje emimijji etii po mee ca poa. Jamaya yahuajo nei ohuaya ebionei onijje emimijji etii Anoni bajani aca poa.

⁵ Jamajjeya jamaya pea'ai Jesosa Quito Eyacuiñajji nijje emimijji etii jamatii po jjima poa. Oya Eyacuiñajji eba-baca poa. Eyacuiñajji ca ca oe Jesosa onijje emimijji nei po mee ca poa yahuajo nei nei. Jama poa ba'a: “Eyaya miya ojjaña ba mee aña cuana miya ca ca oe ecue Bacua Ejja. Eya ca ca iña mique Chii” jamaya Eya-

cuiñajji Jesosa acanaje. ⁶ Majoya huohui ca poa jama pea'ai ba'a:

“Miya enijje emimijji poaje'yo tii tii Menequisine jama. Oya yahuajo nei nei enijje emimijji nei po tiitia poa”. Jamaya yahuajo nei nei Eyacuiñajji tehue mee ca poa esohui Jesusajo.

⁷ E'e, yahuajo nei Jesosa ese nijje nequiahua oya Eyacuiñajji nijje mimi huicha'a huicha'anaje jama ba'a: —Ecue Chii, ¡nahuecue mo! Onaaya eya quecuajea ca chana' —jamaya Jesosa mimi neineinaje Eyacuiñajji nijje. Quea yeno nee nee jjejojo panaje. Oya Jesosa quea ca'a pojjeama jjabaquinaje. Oja Chii quea bihui po mee sa acanaje. Jamajjeya onijje mimiajo Eyacuiñajji shajja'ajja canaje. Eyacuiñajji Jesosa mano'yo jjima po mee sa ajjima jjojemo Jesosa mano'yo jjima poquia-ye.

⁸ Jesosa Eyacuiñajji Bacua Ejja oe nei. Jamatii oya quea nee nee poa mimishi cuana quecua ca'yajje. Eyacuiñajji ejjashahuabaqui'yojji jayojja jama ba'yanijo, quea nee nee po'ya poa onaa napa neinei cajje. E'e, ojaya eba ojjaña joya Eyacuiñajji esohui jayojja jama ba'e sa poani jjeya meshijo ba'e quea nee nee poaje onaa napa cajje. ⁹ Jamajjeya Eyacuiñajji Jesosa yahuajo nei jama aca poa ba'a: —Miya ca ca oe nei quea pame nee nee mimishi cuijea'yojji epojji. Pea chama' mimishi cuijea'yojji —aca poa Eyacuiñajji.

Jamajjeya Jesusaa eseja mimishi cuijea'yo majje ba'e tiiti mee caje'yo, joya o shajja'ajjaji poani nei.

¹⁰ E'e, yahuajo nei Eyacuiñajji oya huohui ca poa jama ba'a: “E'e jojo nei miya ojjaña jaahuanajji poaje. Miya enijje emimijji etii poaje'yo tii tii; Menequisine jama, ma yahuajo nei enijje emimijji nei poa jayojja jama miya poaje'yo”.

¡Quea ja'a nee Jesosa nijje jjapeequicue!

¹¹ Ecuea esohui ma Eyacuiñajji nijje emimijji neijo, Menequisine bajjanijo apoa pojjeama. Maya jamatii quea camaja eba meeji. Miquianaya ca ca oe jjas-hahuabaqui ajjaa jjejojo Eyacuiñajji esohui oe pojji baña. Jamajjeya jiquio esohui miquianajaya quea quehua poaje. ¹² E'e, miquianaya yahuajo nei Jesusaja epeejji poa. Jamajjeya miquianaaya aje oe epeejji eyacua esohui ehuhuinaje ese. Jamatii onaaya miquianaaya casohuihuohui huicha'a huicha'a cahua epeejji eyacua jayojja jama, de. Jiquio ecua ebacua jjeya cuaya tojjojo ba'e, bobi ijji poa jjima jayojja jamaya miquianaaya Eyacuiñajji esohui camaja'ama nei nei baña de, esohui ebionei camaja'ama ebajji jama. ¹³ E'e, ebacua jjeya cuaya tojjojo ba'e jayojja jama miquianaya Jesusaja epeejji eyacua jama; ojaya epeejji quea ja'a poa jjima. Jamajjeya eba'ejji quea tai ma Eyacuiñajji boti'ama miquianajaya ba jjima, eba'ejji quea pame ma Eyacuiñajji quea boti nee miquianajaya ba jjima pea'ai. ¹⁴ Jiquio ecua etiiya bobi ijji cani jayojja jama Jesusaja epeejji quea ja'a neeya ojjaña ojaya esohui ba cani. Eba'ejji quea mimishi amaja ajja, ma Eyacuiñajji boti'ama. Quea pame nee acani ohuaya. Jamaya Jeso-

saja epeeji quea ja'aa esohui huohui cani onajaya ebajji.

6 Yahuajo Jesosa nijje jjapeequi jeahuaa eseyaya shajja'ajjanaje Eyacuiñajjiya esohui quehua'ama. ¡Jjeya ca ca ojjaña ojaya esohui Jesusaja bacue! ¡Quea ja'a nee pocue Jesusaja epeeji etii! E'e, yahuajo jjeya nei jjapeequi jeahuaa Jesusaja esohui quehua'ama shajja'ajjanaje jama ba'a: —¡Miquea mimishi pajea'yo-cue! ¡Jesusaja epeeji nei pocue! ² ¡Onaaya miya cabesa mee cahua Jesosa nijje epojji! Onaaya miqianajaya esapajo eme' huana caje Edojjoshahua Pame miqianaa que edobiquijji. Eyacuiñajjiya emano'yo cuana shequi mee caje o'oya. Shajjama' cuana Eyacuiñajjiya quea nee nee po mee caje'yo —jamaya yahuajo Jesosa nijje jjapeequi jeahuaa eseyaya shajja'ajjanaje esohui quehua'ama.

³ ¡Jjeya ca oe Eyacuiñajjiya esohui ojjaña ejjashajja'ajjaqui Jesusaja epeeji quea ja'a nee epojji! E'e, jamaya poaje Eyacuiñajji nijje mimianijo jama ba'a: —Eyacuiñajji, jecua ba meesahuacue ojjaña miquea esohui!

⁴ E'e, beca cuana aje oe Eyacuiñajjiya esohui shajja'ajja majje jama poani ba'a: —Eya ecue mimishijo quea yeno. Mimishi pajea neinei'e'yo Jesosa nijje ejjapeequijji —poani.

Jamatii quijje shajjama' nei poaje o'oya pojja'a. Jamaya po majje oya cuana mimishi pajea sa po'yo ajja, de. Jesosa, eseja mimishi cuijea'yojji pajea neinei ca'yani, de. Pea chama' mimishi cuijea'yojji. Jamajjeya chama' o mimishi cuijea'yojji. E'e, oya cuana aje oe yahuajo jama poa ba'a: Yahuajo Eyacuiñajjiya esohui quea pame e'e nei shajja'ajja canaje. Eyacuiñajjiya oya cuana quea pame nee acanaje. Ba mee canaje Jesusaa ba'e tiitii mee cani ojaya epeeji nei onijje eyajo. Ba mee canaje Edojjoshahua Pameya oya cuana jaahuana caje'yo pea'ai. ⁵ Ba canaje pea'ai Eyacuiñajjiya esohui quea pame nee nee jayojja jama ba'yanijo quea bei nee poaje'yo. Eyacuiñajjiya acanaje jayojja ma dejja ajiima acani ba canaje pea'ai. E'e, jamaya ojaya eba poanaje. ⁶ Jamatii aje oe shajjama' po o'oyani, de. Jesosa cajaa amajje pea chama' mimishi cuijea'yojji. E'e, yahuajo dejja mimishiya Eyacuiñajjiya Bacua acui ecueata'apeejo caca ca poa jayojja jama oya cuana Jesosa quecua'yojji jayojja poani. Jesosa cajaa ajji poani. Jesosa niñeba ca o'oyani ojjañaja eshajja'ajjajji. Quea tai nee nee ca ca oma.

⁷ Que quea pamejo ena po majamajajo bobi tii cuajiani quea pame nee. Apoa poajo eque meseya bobi chicha cani. Jamaya Eyacuiñajjiya quea pame nee nee po mee cani. ⁸ Que quea taijo ca ca bobi tii ajja. Jjono, acuisha, acui pojja'a pohuani. Jamajjeya eque meseya que cajaa acani jama ba'a: —¡iquio que jehua'yonaje, cajaa —acani.

¡iquio ecua eque meseya que cajaa acani jayojjaya jama acaje'yo Eyacuiñajjiya. Quea nee nee po mee caje'yo cuaquijo ¡iquio Jesosa cajaa ajji nei nei poani cuana.

Jesosa cajaa a'ajja eseya ohuaya e'e jojo nei ba'e tiitii mee caje'yo onijje

⁹ E'e Jesosaja epeeji cuana, ¡iquio eyaya esohui quea tecue tehueña miqiana jjashajja'ajjaqui ajjajo. Jamatii miqianaya ecuea quea jea nee nee. Miqianajo jjashahuabaquiani jama ba'a: —Ecuea epeeji cuana, miqianaaya Jesosa cajaa yajji pojjeama. Chojja. Ojaya epeeji poanijo, Jesusaa miqianaya ojaya esohui jama atiitii meesahua caje'yo —jamaya eya poani.

¹⁰ E'e, yahuajo, jjeya pea'ai miqianaaya Jesusaja epeeji cuana quea jea nee añajo pea cuana ba'e meesahuaña tii quea ja'a nee. Jamajjeya Jesusaja epeeji cuana quea jea añajo Jesosa quea jea nee añajo pea'ai. Jamaya Eyacuiñajjiya eba. Jamajjeya ohuaya quea pame nee nee sosequia caje'yo quea pame nee miqiaaaya añajo. E'e, ohuaya quea ja'a nee acani tii tii. ¹¹ Cuana eyaya miqianaya huohuaña jama ba'a: ¡Jesusaja epoe o'oyajji ishoacue! ¡Jamaya atiitiicue! ¡Quea jaji nee ba'e tiitii poquicue ojjaña Jesusaja epeeji cuana nijje! Jamajjeya ecuea eba poaje e'e jojo nei miqianaya Jesusaja epeeji nei onijje ba'e tiitiije'yo. ¹² E'e, yahuajo Eyacuiñajjiya eseya jama acanaje ba'a: —Eya miqianaya ba'e tiitii meeje'yo enijje —oya poanaje.

Jamajjeya ja'a quea huea pojji! Eyacuiñajjiya epeeji nei jama jjashahuabaquime pocue ba'a: Eyacuiñajjiya e'e jojo nei ojjaña ma ecua ohuaya huohui canaje jamaya ajeyojeyo caje'yo. ¡A'a jjashahuabaquijji ohuaya jama ajiima e'acaje poso!

Eyacuiñajjiya ¡iquio ecua ohuaya huohui canaje jamaya acani e'e jojo nei

¹³ E'e, yahuajo nei nei Eyacuiñajji miminaje esejaya etiiquiana nijje, Amajama nijje jama ba'a:

“Eyaya miya quea pame nee aje. E'e jojo nei miquea ebacua cuayaje dejja sho'i. Miquea osecua quea huiso nee nee poaje'yo. Eya ca ca oe nei quea ca'a nee nee poanijo jamaya ameeje'yo. Chama' pea e huoojea'yojji poani”.

Jamaya Eyacuiñajjiya aca poa.

¹⁵ Amajama shajja'ajja majje jjashahuabaquia poa jama ba'a: —E'e jojo nei ma ohuaya huohui canajeya jamaya acaje Eyacuiñajjiya. Jamajjeya ecuea ebacua cuayaje. Ecuea osecua cuana quea huiso nee nee poaje —jamaya Amajama jjashahuabaqui pajea ajja nei nei poa. Jamajjeya Eyacuiñajjiya jamaya acanaje. Quijje nei Amajamaja bacua cuaya poa dejja sho'i.

¹⁶ Eseyo ca ca jama poani ba'a: —E'e jojo nei ¡iquio ecua eyaya huohuaña jama neiya eyaya aje.

Jamaya po majje pea huasijje poquiani dejja etii yasijje jama huohuiya ba'a: —¡Ecuea esohui etehue'yojo miquea bajjani tehuecua ojjañaja ebajji e'e jojo nei eyaya ecuea esohui aje! E'e, Eyacuiñajjiya ba canijo eyaya ecuea esohui jayojja jama aje'yo —jamaya eseyaya añajo.

Jamajjeya deija etiija bajjani etehue'yo ba majje onajaya eniñeba'yojji pojjeama jama ba'a: —Chojja, ojaya esohui jayojja jama e'a'yojji pojjeama ohuaya.

¹⁷ Oya jayojja Eyacuiñajjiya ojaya epeeji cuana jama acani ba'a: —E'e jojo nei ma ecua eyaya miqianaya huohuinaje jamaya eyaya miqianaya e'e jojo nei ba'e tiitii meeje'yo enijje.

Jamaya amajje oya jamaya poanaje pea'ai ba'a: —Eya eshe tii tii nequi. Jamajjeya ecuea esohui epajea'yojji pojjeama; jamaya eyaya e'e jojo nei aje'yo —jamaya ohuaya aca poa ojjañaja ebajji.

¹⁸ E'e, Eyacuiñajjiya ma ecua ohua huohui ca poa jayojjaya jama acaje'yo. Oya siajje po ajja nei nei. Oya eshe tii tii nequi quea ca'a nee nee. Jamajjeya ojaya esohui epajea'yojji pojjeama. Jamaya e'e jojo nei acaje'yo. Jamajjeya ¡Jesosa nijje ejjapeequi quea bihui nee nee! Jiquio ecua bishe jaadobiquiajo, onaa jjono jea ca-jo seya iñacuajiaña ehui'yo poaniya jjejojo jayojja jama eseya Eyacuiñajji nijje mimiani ese jaahuanajji, ese ba'e tiitii mee'yojji onijje eyajo. ¹⁹ E'e, acui ca'aca'ajo bishe ai jeyo cani cuaa edojojea ca poajejje, ehui'yo poajejje jayojja jama eseya Jesosa nijje jjapeequiani ese jaahuanajji, ese nahuejji, eshahua nijje epoquiquehua poaje jjejojo. Quea ca'a nee Jesosa, de. E'e, jama poani ba'a: Jodioja Eyacuiñajji nijje emimijji etii cuana Eyacuiñajji equi yasijje dobiqúi majje equi dojjojo pea equecuayijji sisi yasijje dobiqúi majamajanaje daquija secue pene yasijje. Ma equecuayijji sisi yasijje Jodio cuana oe nei dobiquinaje Eyacuiñajji nijje mimiya ojjañaja mimishi cuijea'yojji. Jesosa ca ca eyahuasijje dobiqúi'yonaje. Jjeya oya Eyacuiñajji pejejo yani. Onijje mimiani esejo. ²⁰ E'e, ese eyahuasijje poqui jjimahuajo, Jesosa eyahuasijje poqui'yonaje. Huohui canaje jama ba'a: —Ecuea epeeji cuana quijje eyahuasijje poeje'yo enijje eba'e tiitii'yojji —jamaya Jesosa poanaje ese jjabahuejja neineiquijji.

Jamajjeya Jesosa Eyacuiñajji nijje emimijji oe nei quea ca'a nee nee poani. Jamaya oya po tiitii'yani. Yahujajo nei nequi Eyacuiñajji nijje emimijji Menequisine bajjani jayojja jama poanaje Jesosa.

Menequisine Eyacuiñajji nijje emimijji nei poa

(Genesis 14)

7 E'e, jiquio Menequisine yahujajo nei nei nequia poa. Oya Sanemi cuiñajji meshi mese poa. Eyacuiñajji nijje emimijji nei pea'ai poa. Eyacuiñajjiya quea ca'a nee neeya oya jamaya po mee ca poa. Jamajjeya yahujajo nei etiiquiana Amajama pea emeshi mese quea mimishi cuana quecua jeyojeyo'yo majje poe'ya poa. Ma ba majje Menequisine jama poa ba'a: —Amajama, miya quea pame nee. ¡Eyacuiñajjiya miya quea ca'a nee capo mee cahua! —aca poa.

² Amajamaa aquiana cuana quea huiso nee nee ye ca'ya poa, ma emeshi mese mimishi cuanaja sii ye ca'ya poa. Ma aquiana iye huiso quia ca poa Menequisineja epojji; jama aca poa ba'a: Amajamaja aquiana ome miji pea'ai huisome, 10 huisome yanijo ohuaya oe quia ca poa Menequisineja epojji. Peapea aquiana

cuana ojjaña aquiana jamaya aca poa. Menequisineja bajjani Ese Ejjaja esohuijo jama ba'a: Emeshi mese quea ja'a nee ba'yani bajjani. Emeshi mese quea bei ba'yani bajjani pea'ai oya Sanemi cuiñajji meshi mese poanijo. ³ Oya cuamejje pojja'a poa; ecuanaja ba jjima Menequisineja chii bajjani, ojaya enaese bajjani ba jjima pea'ai, ojaya ebacua ecuanajaya bajjani ba jjima pea'ai. Oya ache shono cuaya poa ba jjima, ache shono mano'ya poa ba jjima pea'ai. Chama' etehue'yo poa. Eyacuiñajjiya ca pa ca oe Menequisine huohui ca poa jama ba'a: —Menequisine, ¡miya enijje emimijji nei pocue! ¡Jamaya po tiitiicue! —aca poa. Oya jayojja Eyacuiñajjiya oja Bacua Eja huohui ca poa pea'ai.

⁴ Jamejjeja ¡jjashahuabaquicue Menequisinejo! Deija etii quea pame nee nee oya poa. Amajama ca ca deija etii quea pame nee pea'ai poa. E'e, esejaya etiiquiana Amajamaa oya aquiana quia ca poa ma aquiana emeshi mese mimishi cuanaja sii jjequi'yo majje iye huiso quia ca'ya poa Menequisineja epojji. ⁵ Amajama mano'yajo, quijje nei Moisesiya Amajamaja osecua Nemi bajjani Eyacuiñajji esohui huohui ca poa, Anonija bacua eja. Jama aca poa ba'a: “Nemi miya, miquea ebacua cuana pea'ai Eyacuiñajji nijje emimijji poaje'yo Jodio cuanajo. Jamajjeya Jodio cuaa miya caquia cahua aquiana eba'ejji, jama caquia cahua ba'a: Ojaya ome miji pea'ai, 10 huisome aquiana yanijo oe caquia cahua. Ojjaña ojaya aquiana cuana jamaya ca'a cahua” jamaya Eyacuiñajji esohui etehue'yo poani.

Nemi, ojjaña Jodio cuana pea'ai Amajamaja osecua cuana. Jamatii Jodio cuanaja mahuisoya aquiana cuana jjeshe ca poquia poa Nemija bacua cuaa, oja huapa pojjeama cuanaja aquiana. ⁶ Menequisine ca ca yahujajo nei nei ba'ya poa Nemi cuaya jjimahuajo, Nemi Jodio cuanaja Eyacuiñajji nijje emimijji po jjimahuajo. Jamajjeya Nemija bacua pojjeama Menequisine poa. Jamatii Amajamaa oya aquiana quia ca poa. E'e, yahujajo nei Eyacuiñajjiya Amajama huohui ca poa jama ba'a: “Amajama, jiquio meshi miquea poaje'yo. Miquea osecua cuanaja poaje'yo tii tii” aca poa Eyacuiñajjiya. “Miquea osecua cuana quea huiso nei nei poaje'yo” aca poa pea'ai.

Jamatii Amajamaa aquiana quia cajje Menequisineya huohui ca poa: —Amajama, miya quea pame. ¡Miya quea ca'a capo mee cahua Eyacuiñajjiya! —aca poa.

⁷ E'e, Eyacuiñajji nijje emimijji Menequisine bajjani Amajama nijje miminaje Eyacuiñajjiya oya quea ca'a epo meejji. Jamaya esejaya eba Amajama beshahua nei quea pame nee, Menequisine ca ca quea pame nee nee. Jamajjeya quea pame nee nee Amajama oya iye huiso aquiana cuana quia ca poa. ⁸ Quijje Jodio cuaa aquiana cuana iye huiso quia ca poquia poa Amajamaja osecua Eyacuiñajji nijje emimijji cuana huasijje, Nemi, oja bacua eja cuana huasijje. Jamatii ma Eyacuiñajji nijje mimiani cuana mano ca poqui'ya poa. Menequisinejo ca ca Eyacuiñajji esohui jama poani ba'a: —Menequisine, ¡miya enijje emimijji nei po tiitiicue! —poani.

⁹ Menequisine yahuajo ba'ya poa Amajamaja osecua jea jjimahuajo. Amajamaa iye huiso aquiana Menequisine quia canaje. Jamajjeya Jodio cuaa huohui cani jama ba'a: —Amajamaa aquiana quia ca poa; Nemiya pea'aiya aquiana quia canaje, oya Amajamaja osecuaja cuiisa' dojjojo nequiahuaa —jamaya Jodio poani Nemiyo, oja osecua cuanajo pea'ai. Jamatii quijje nei Nemiya, oja osecua cuaa pea'ai Eyacuiñajji nijje emimijji poanijo Jodioja aquiana iye huiso jjeshe ca poquia poa ojaya epojji, ojaya osecua cuanaja epojji pea'ai.

¹¹ Eyacuiñajjiya Nemi, oja bacua cuana pea'ai huoojea ca poa onijje emimijji epojji, ojaya esohui Jodio cuana ba meesahuajji, quea ja'a eba'e meesahuajji pea'ai. Jamatii oya cuana aje oe deija cuana poa, Eyacuiñajjiya epeeji pishana poa. Jamajjeya Eyacuiñajjiya esohui jayojja jama ba'e tiitii jjima poa. Jamajoya Eyacuiñajjiya pea onijje emimijji nei huoojea canaje, Nemiya osecua pojjeama, pea. E'e, ohuaya Jesosa Quito huoojea canaje. Jesosa Eyacuiñajji nijje emimijji nei poanaje, Anoni jama pojjeama. Oya Jesosa Eyacuiñajji nijje emimijji nei Menequisine jayojja jama poanaje. E'e, Jesosaa ca ca oeyaya eseya Eyacuiñajjiya esohui jayojja jama ameesahua cani. ¹² E'e, Moisesija esohui jayojja jama Anonija osecua cuana Eyacuiñajji nijje emimijji cuana poa. Jjeya ca ca Eyacuiñajjiya pea onijje emimijji po mee canaje, oja Bacua Ejja Jesosa, Anonija osecua pojjeama. Jamajjeya jjeya eseya yahuajo jama ba'e ajja. Moisesija esohui jayojja jama amaja ajja. Jjeya ca ca eseya ba'yani Emeshi Mese nei Jesosaja esohui jayojja jama, yahuajo jama pojjeama. Jamajjeya Eyacuiñajjiya eseya ba ca'yani mimishi'ama'yo. ¹³ E'e, yahuajo Eyacuiñajjiya Jesosa jama aca poa ba'a: —Jamajjeya miya enijje emimijji nei poaje'yo ecuea epeeji cuanajo —Eyacuiñajjiya aca poa.

Jamatii Jesosa Nemiya osecua pojjeama poa. Pea oya de, etiiquiana Jodaja jeaja osecua. Joda ca ca Eyacuiñajji nijje emimijji nei pojjeama poa. Jamajjeya Jodaja jeaja osecua cuanaja aquiana cuana dahuaa jjima poa mei e'ya sohujajo Eyacuiñajji quea bei mimishi cuana nijje epo meeji. Chojja, jamaya pojjeama Moisesija esohui Jodaja osecua cuanajo. Jamatii Eyacuiñajjiya Jesosa jama aca poa ba'a: —Miya enijje emimijji nei nei poaje'yo ecuea epeeji cuanajo.

¹⁵ Jamajjeya ecuea esohui Eyacuiñajji nijje emimijjiyo jjeya miquianajaya quea ja'a poani jama ba'a: Eyacuiñajji nijje emimijji Jesosa Quito poanaje. Jamatii oya Eyacuiñajji nijje emimijji nei Menequisine jayojjaya, Nemiya osecua pojjeama. ¹⁶ Jamajjeya Jesosa ca ca oe Eyacuiñajji nijje emimijji nei poanaje, Eyacuiñajjiya huoojea'yo, dejjaja, Moisesija pea'ai huoojea pojjeama. Oya Jesosa quea ca'a nee nee, enequi tiitii'yo pea'ai. Jamajjeya oya Eyacuiñajji nijje emimijji nei poanaje ojaya epeeji cuanajo. ¹⁷ Yahuajo nei Dabiya Eyacuiñajjiya esohui tehue ca poa jama ba'a: “Miya enijje emimijji nei poaje'yo ecuea epeeji cuanajo. Jamaya poaje'yo tii tii, enijje emimijji nei Menequisine jayojja jama” jama ya Eyacuiñajji poanaje Jesosa Quito nijje.

¹⁸ Etiiquiana Moisesija esohui ajji poani yahuajo quea pame pojjeama ba'ya poa. Mimishi'ama po mee jjima poa. Jamajjeya etiiquiana Moisesija esohui jayojja jama jjeya apajea ca'yonaje. Jjeya ca ca eseya Jesosaja epeeji poanijo ojaya esohui jayojja jama ba'yani, yahuajo jayojja jama pojjeama. E'e, Jesosa Eyacuiñajji nijje mimiani esejo. Eyacuiñajjiya bacua cuana eseya po mee cani. Jamajjeya ba'e tiitii mee caje'yo onijje eyajo.

²⁰ E'e, Eyacuiñajjiya Jesosa huohui ca poa jama ba'a: “Eya Eyacuiñajji quea ca'a nee enequi tii tii quea ja'a nee. Ecuea esohui jayojja jama eyaya e'e jojo nei aje'yo. Eyaya jama huohuiaña ba'a: —Miya ecuea cuana epeeji mimi tiitii'yo enijje”.

Jamaya Eyacuiñajjiya aca poa. E'e, Eyacuiñajjiya Jesosa huohui neinei ca poa onijje emimijji, ese ba'e tiitii mee'yojji. Yahuajo nei Nemiya osecua cuana onijje emimijji poanijo Eyacuiñajji ojjaña nijje mimi jjima. Jjeya Jesosa Eyacuiñajji nijje mimianijo ca ca Eyacuiñajji ojjaña ese nijje mimiani.

²² Jamajjeya esejaya eba e'e jojo nei Eyacuiñajjiya esohui ma ecua ohuaya Jesosa huohui ca poa jamaya ohuaya e'e jojo nei acaje quea pame nee nee. Jamajjeya ohuaya ojjaña ojaya epeeji cuana onijje ba'e tiitii mee caje'yo. Ma ohua Moisesi huohui ca poa ca ca quea pame pishana: Ojaya esohui jayojja jama ba'e neineiyo ojaya eba'ba'ca poaje'yo, Eyacuiñajjiya.

²³ Nemi nequi tiitii ajja poa Eyacuiñajji nijje pea cuanajo emimijji tii. Deija tii majje mano'ya poa. Jamajjeya jamaya ojaya osecua quea huiso nee nee popoquia poa, Eyacuiñajji nijje emimijji etii cuana. E'e, oe mano'yo majje oja bacua Eyacuiñajji nijje emimijji etii poa. Jamaya popoquia poa quea huiso nee nee. ²⁴ Jesosa ca ca eshe, mano'yo ajja tii tii. Jamajjeya oya Eyacuiñajji nijje e'e jojo nei mimi tiitiani esejo, oja epeeji cuanajo. ²⁵ E'e, Jesosa mano'yo ajja, eshe tii tii nequi'yo Eyacuiñajji nijje esejo emimijji. Jamajjeya Jesosaja epeeji nei poanijo Eyacuiñajjiya bacua cuana poani. Ohuaya eseya ba'e tiitii mee caje'yo onijje eyajo.

²⁶ Esey aje oe quea mimishi jjejojo Eyacuiñajjiya esohui jayojjaya jama ba'e jjima poaje. Jesosaa ca ca esejaya mimishi cuijea'yo majje ba'e tiitii mee caje'yo onijje. E'e, Jesosa oe nei quea pame nee nee, mimishi'ama nei nei, quea boejea nee nee, deija mimishi jayojja jama pojjeama tii tii. Oya eyajo oja Chii pejejo nequi, ojjaña huoojea'yojji poani tii tii. ²⁷ Nemiya osecua Eyacuiñajji nijje emimijji cuana aje oe Jesosa jayojja jama pojjeama poa. Ohuaya ca ca oe quea mimishiya jjejojo ojjaña pojja aquiana cuana dahua'jea caninaje Eyacuiñajji quea bei po meeji. Aquiana dahua'jea jjimahuajo Eyacuiñajji nijje miminaje jama ba'a: —Eyacuiñajji, ¡ecuea mimishi cuijea'yocue! —jamaya Eyacuiñajji nijje emimijji etii Nemiya osecua aca poquia poa.

Majoya oya cuana mimishijo aquiana dahua'jea majje Eyacuiñajji nijje miminaje pea cuanajo jama ba'a: —Eyacuiñajji, ¡miqua epeeji cuanaja mimishi cuana cuijea'yocue! —aca poquia poa Eyacuiñajji nijje emimijji etiiya.

Jesosa ca ca jama pojjeama. Oya mano'yonaje ojjañaja mimishi cuijea'yojji soseje. Oya apoa po'yonaje, emano beca'yojji pojjeama tii. ²⁸ Jamajjeya etiiquiana Moisesija esohuijo dejja cuana Eyacuiñajji nijje emimijji po mee ca cuaa poa, Nemija osecua cuana. Oya cuana aje oe Eyacuiñajji esohui jayojja jama ba'e'yo jjima poa. Jamajjeya Moisesi nijje mimi majje quijje nei Eyacuiñajjiya oja Bacua Ejja Jesosa jama aca poa ba'a: "Miyaya oe nei mimishi'ama nei nei. Jamajjeya miya oe nei enijje emimijji nei poaje'yo ecuea epeeji cuanajo" jamaya Eyacuiñajji poanaje.

Eyajo Jesosa Quito nequi tiitiiani esejo Eyacuiñajji nijje mimiani tii tii

8 Jamajjeya ijashahuabaquicue Jesosa Quitojo! Oya Eyacuiñajji nei nei. Eyajo nequi tiitiiani esejo Eyacuiñajji nijje mimiani tii tii. Eyacuiñajji quea ca'a nee nee pejeje nequi, ebianeijji; onijje ojjaña huoojeajji poani tii tii. ² Jama ba'a: Yahuajo nei Jodio Eyacuiñajji nijje emimijji etii daqui equi dojjo huasijje, equecuayijji biso nei yasijje dobiq'ya poa Eyacuiñajji nijje mimiya, Jodio cuana nijje Eyacuiñajji quea bei epojji. Ma daqui equi Jodio cuanaja soco poa Eyacuiñajji esohui shajja'ajjajji. Jesosa ca ca dobiq'yonaje Eyacuiñajji e'anioque ani yasijje tii, daqui equi dejjaja soco huasijje pojjeama. Jomajo oya Eyacuiñajji nijje mimiani esejo. ³ Jiquio Jodio cuana Eyacuiñajji nijje emimijji etii cuana babaca majje jama poa ba'a: —iMiyaya aquiana dahuacue ijjiacajji ehuone' pea'ai; Eyacuiñajji ecuana nijje quea bei po meecue! —aca poa Jodio cuaa.

Jamaya ona jayojjaya esejaya Eyacuiñajji nijje emimijji neiya, Jesusaa Eyacuiñajji quea bei po mee canaje ese nijje. Eseyaya mimishi cuana cuijea mee'yojji soseje oya mano'yonaje. ⁴ Jesosa meshijo enequi jojjemo oya Eyacuiñajji nijje emimijji etii pojjeama pome. E'e, Jodioja Eyacuiñajji nijje emimijji etii cuana meshijo yania poa, Nemija osecua cuana. Moisesija etehue'yo jayojja jama aquiana dahua ca poquianinaje Eyacuiñajji quea bei po meejji. ⁵ Jamaya yahuajo poa ba'a: Moisesi eyiyo huasijje jaasohuaquiajo, Eyacuiñajjiya oya huohui ca poa daqui equijo. Jama aca poa ba'a: "iEcuea esohui jayojjaya nei nei daqui equi acue! iQuea bame nee nee oe acue!" ca poa Eyacuiñajjiya.

Jamatii daqui equi iya mee ca poa ona ba meejji ma ohua quijje Jesusaa acaje'yo eyajo. Jamajjeya Jodio cuanaja emimijji Eyacuiñajji nijje quea pame pishana poa. Jesosa ca ca quea pame nee nee. Jamaya pea'ai Eyacuiñajjiya yahuajo nei ojaya esohui huohui ca poa Moisesija etehue'yojji. Ma esohui etehue'yo quea pame poa. Quijje ca ca Eyacuiñajjiya esohui eyacua Jesosa huohui mee ca poa. Maya esohui quea pame nee nee. E'e, esohui ma ohua ijjea huohui ca poa jayojja jama eseya añajo, Jesusaa eseya ba'e tiitii mee caje'yo onijje eyajo. Jamaya esejaya eba. Jamajjeya eseya quea jaji nee poani. Yahuajo Jodio cuana quea jaji pishana poa: Onajaya ba jjima poa Jesusaja esohui eba'e tiitii'yojji onijje eyajo.

⁷ E'e, yahuajo nei Eyacuiñajjiya Jodio cuana Moisesi nijje nequi ba mee ca poa ojaya esohui. Jamatii ma esohui jayojja ohuaya acani mimishi pajea'yo jjima poa cuanaja. Ma esohui jayojja jama ba'yanijo mimishi cuijea'yojji jojjemo Eyacuiñajjiya Jesosa huoojea jjima poquiyaye esohui eyacua huohuiya. ⁸ Jamajjeya Eyacuiñajjiya ojaya epeeji cuana tecuea ca poa. Jama tecueame aca poa ba'a:

"Quijje eyaya esohui eyacua huohuije ojjaña Jodio cuanaja eshajja'ajjajji, ma Isaenija osecua cuanaja, Jodaja osecua cuanaja pea'ai eshajja'ajjajji. ⁹ Yahuajo nei eyaya miqianajaya etiiquiana Ejito meshijo ba'e pea meshi yasijje dojo meesahuanaje. Ecuea esohui quea pame nee huohui huicha'a huicha'a meenaje pea'ai. Jamatii etiiquiana cuana shajjama' poa. Ecuea esohui jayojja jama a sa po'yo ajja poa. Jamajjeya eyaya oya cuana jaahuana jjima a poa. Jamajjeya eyaya pea esohui quea pame nee aje'yo miqiana nijje. Jiquio esohui eyacua poaje, yahuajo jama pojjeama poaje. Eyaya jamaya huohuiaña".
Jamaya Eyacuiñajji poanaje.

¹⁰ "Quijje eyaya Isaenija osecua cuana esohui eyacua huohuije jama ba'a: Jamajjeya miqianaya ijashahuabaqui meesahuaje ecuea ejjashahuabaquijji jayojja. Ecuea esohui jayojja jama eyaya miqianaya ameesahuaje: —Eyacuiñajjiya ecuana jaahuana cani —miqianaaya aje. Eyaya miqianaya saja'aje'yo: —Miqianaya cuana ecuea epeeji nei e'e jojo nei —eyaya aje'yo. ¹¹ Miqianaya enijje jjapeequije'yo ojjaña, edejja tii cuana, esho'iquiana pea'ai. Jamajjeya pea nijje jama epo majajji pojjeama ba'a: —iEyacuiñajji nijje oe jjapeequicue! —e'a majajji pojjeama cuana. Chojja, oya jja iña ojjañaja eba poaje'yo añaja.

¹² Jamajjeya eyaya ojjaña cuanaja mimishi cuijea nei neije'yo. Majoya eya ijashahuaba majaqui ajja miqianaja mimishijo. Quea bei poaje. Jamaya eyaya Isaenija osecua cuana huohuije".

Jamaya Eyacuiñajji yahuajo nei nei poa Isaeni nijje.

¹³ E'e, jiquio ecua daqui chii chii'yajo eyacua jjeshe majje daqui echii seya jeajeaña jayojja jama esohui eyacua amajje Eyacuiñajjiya esohui yahuajo nei Moisesi oja tehue meejo ijashahuaba neinei meequi'yo jjima aca poa: —iEcuea esohui eyacua jayojja jama acue; esohui yahuajo jayojja jama pojjeama! —jamaya Eyacuiñajjiya eseya huohui cani jjea.

Jodio etiiquianaja daqui equi Eyacuiñajjiya esohui bajji

9 Yahuajo nei Eyacuiñajjiya Moisesi huohui ca poa jama ba'a: —iJamaya oe enijje mimicue! iJamaya eya bihuicue pea'ai! —aca poa—. iEqui iyacue enijje emimijji! —aca poa pea'ai.

² Jamajjeya Jodio cuaa daqui equi soco majje iya ca poa Eyacuiñajjiya esohui shajja'ajjajji, ma Moisesi tehue mee ca poa jayojja jama e'ajji. Jamajjeya yahuajo nei iya ca poa jama ba'a: Ebionei equi equecuayijji ai'ai nequia ca poa. Ma equecuayijji ai'ajjaya cuaquijji nequijji nequia ca poa, baa huo'o. Majoya acui equecuas-hiyo, mesa, quecua ca poa. Mesa quecuajeyo majje

cuia'asha ca poa baa huo'ohua. Majoya mesa biajje pahui ojjaña pojjaño iya majamaja ca poa piatojo Eyacuiñajji ebañji. Ma equecuayijji ai'ai bajjani ca poa Eyacuiñajji Nijje Ejjapeequijji bajjani. ³ Majoya biso nei quecuayijjime aca poa daqui equi yiyedojojo. Majoya daqui moohua secue pene ca poa. Daqui moo quea bame nee ba'ehuana ca poa esecue jjani queyajji. Ma equecuayijji biso nei bajjani ca poa Eyacuiñajji Ese Nijje Emimijji Quea Bame bajjani. ⁴ Ma equecuayijji biso nei-jo nequia ca poa cuaqui cojjasha anijji baa huo'o, shiyeshiye dahuajji. Shiyeshiye dahuajjea cajje huichacha quea shiye nee nee ba'esohuaquia poa. Majoya cajohui huana ca poa pea'ai; baa huo'ohua cuia'asha ca poa. Maya bajjani ca poa Eyacuiñajji Eshohui Etehue'yo Huanajji bajjani. Ma cajohuijo baa huo'o tahuoo e'iyania ania poa. Baa huo'o tahuoojo ebio ania poa pahui sisi, ma yahuajo nei nei Eyacuiñajjiya etiiquiana cuana Moisesi nijje ijji aca poa. Anonija tojje acui ejaqueca ca'aquijji ma cajohui dojjojo ehuanaobia jaa poa, ma tojjejo yahuajo pohua poa acui iña. Beca mei beje pea'ai cajohui dojjojo ania poa, ma mei bejejo yahuajo nei Moisesija tehue'yo Eyacuiñajjiya esohui mei beje biajje oja tehue'yo, 10 esohui etehue'yo jaa poa. ⁵ Cajohui biajje ania poa cuichojji nisho esohuidojojji jayojja. Quea bame nee nee, baa huo'o pea'ai. Oja ecuichohua queya ca poa cajohui. Ma esohuidojojji nisho cajohui yasijje cojja nequia poa. Ma ba majje Jodio cuana jjashahuabaqui'ya poa Eyacuiñajji onijje yani, oja mimishi cuijea'yojji. Jamatii jjeja miya ecuea ehuhuijji pojjeama ojjaña joya daqui equijo nequi aquiana.

⁶ Ojjaña equi apoa poajo, Jodioja Eyacuiñajji nijje emimijji etii dobiquia poa equecuayijji ai'ai yasijje. Ojjaña pojjaño dobiqui nequia poa Eyacuiñajjiya yajji chachohua. ⁷ Jamatii equecuayijji biso nei yasijje oe nei dobiquianinaje Eyacuiñajji nijje emimijji etii. Pea eshequiaja cuanaño oe dobiacquime poaninaje. Ohuaya ijjiacajji ehuone na' dojodobiaqui caninaje. Majoya Eyacuiñajji nijje mimianinaje jama ba'a: —¡Eyacuiñajji, ecuea mimishi cuijea'yocue! E'e, jiquio ijjiacajji eyaya ehuone' cuia'yonaje ecue mimishi cuijea'yojji sosejje —poaninaje oya.

Majoya jama poaninaje pea'ai ba'a: —¡Ojjaña miquea epeejji mimishi cuijea'yocue pea'ai! E'e, jiquio ijjiacajji ehuone' eyaya cuia'yonaje ojjaña mimishi cuijea'yojji sosejje —poaninaje. Jamaya oya po majamaja anijo, ojjaña oja mimishi cuana pajea'yo jjima acaninaje cuaa.

⁸ Jamajjeja ijashahuabaquicue daqui equijo, Jodio cuanaja iyajo! Jamaya ma daqui equi enequiojjoja jjeja Edojjoshahua Pameya eseya ba meesahua cani jama ba'a: Ma daqui equi e'anijo tii ma equecuayijji biso nei yasijje oe nei Eyacuiñajji nijje emimijji etii dobiquianinaje Eyacuiñajji nijje mimiya, ojjaña cuana dobiqui jjima poanaje. ⁹ E'e, Eyacuiñajji nijje mimiani etii oe nei dobiquianinaje Eyacuiñajji nijje mimiya. Ma shahuaba majjeja esejaya eba ojjaña cuana Eyacuiñajji nijje mimi meeme ajja poa. Jjeja ca ca eseya Eyacui-

ñajji nijje mimiya, ojjaña. Yahuajo nei quea huio ijjiacajji ehuone' dahuajjea caninaje Eyacuiñajji ona nijje quea bei epojji. Dahuajjea majamaja caninaje. Jamatii oya cuana jjashahuabaquianinaje jama ba'a: —E'e pojja'a eya quea boejea pojjeama. E'e pojja'a ecuea mimishi cuijea'yo jjima —poaninaje cuana.

¹⁰ Yahuajo nei bobijo tehue ca poa pea'ai Moisesija etehue'yojo jama ba'a: —¡Beca bobi a'a ijjiacajji! ¡Beca e'ishijji pea'ai a'a jja oe ishijji! —jamaya Moisesiya tehue ca poa Jodio cuanaja e'ajji.

Moisesija etehue'yo jayojja jama Jodio etiiquiana piato, shajjajji cuana pea'ai shacua caninaje pea'ai. Ma etehue'yo jayojja jama besa majamajaninaje pea'ai. Jamajjeja etehue'yo jayojja jama besa majje quea yami boejea poa, jamatii quea mimishi tii poa, quea jjashahuabaqui tai. Eyacuiñajjiya oya cuana Moisesija etehue jayojja jama amee caninaje Jesosa poe jji-mahuajo. Jesosa ca ca oeya ojjaña mimishi cuijea'yojji poani.

Jesosaja ena' cuayaquia poa esejja mimishi cuijea'yojji

¹¹ Jamajjeja jjeja Eyacuiñajjiya huoojea'yo ese jaahuanajji Jesosa Quito bajjani poeyanaje ese que. Oya Eyacuiñajji nijje emimijji nei eyacua. Ohuaya eseya quea pame nee nee acanaje. Quijje ohuaya eseya ba'e tiitii mee caje'yo onijje, mimishi cuijea'yo majje.

Daqui equi eyiye equecuayijji biso nei yasijje dejjja cuanaja iya huasijje dobiqui jjima Jesosa Eyacuiñajji nijje esejja mimiya. Cho. Oya eyahuasijje dobiquinaje Eyacuiñajji e'anioque ani yasijje, eyiye biso nei quea pame nee nee jayojja huasijje. Oya Jesosa Eyacuiñajji nijje mimiani esejja. ¹² Jesosaa chivo na', ana'ai na' dojodobiaqui jjima eyahuasijje, de. Cho. Oya acui ecueata'apeejo mano'yonaje esejaya mimishi cuijea'yojji sosejje. Jamajjeja ohuaya eseya ba'e tiitii mee caje'yo onijje.

¹³ E'e, yahuajo nei Moisesija etehue'yo jayojja jama acaninaje cuaa. Jamajjeja Eyacuiñajji nijje emimijji cuaa ana'ai na', chivo na' pea'ai tepe jayojja huasijje sho majje ojjaña Jodio cuana jeasijjea majamaja caninaje. Majoya ana'aija bacua dahuajjea'yo majje oja yami equioyoyeja pohui ena tejee nane majje ojjaña Jodio cuana jeasijjea majamaja caninaje. Jeasijjea cajo, pea Jodio cuaa ona ba caninaje quea boejea jayojja. Jamatii eyami nei quea boejea jayojja poaninaje. Mimishi ca ca ecuijea'yo pojjeama. ¹⁴ E'e, ana'ai na', chivo na' pea'ai jeasijjea cajo, eyami ca ca oe quea boejea jayojja poaninaje. Jesosa Quito ca ca quea pame nee nee ese mimishi cuijea'yojji, de. Edojjoshahua Pame enequi tii tii. Ohuaya Jesosa ameesahua canaje Eyacuiñajji ejjashahuabaqui'yojji jayojjaya. Oya Jesosa mimishi'ama nei nei, mimishi'ama tii tii poanaje. E'e, oya acui ecueata'apeejo mano'yo majje ojaya ena' cuayaquinaje. Jamajjeja ohuaya esejaya mimishi cuijea caje'yo onijje jjapeequiyajo: —Ecue Chii, ecue na' cuayaquinaje eyaya ecuea epeejji mimishi cuana cuijea nei-neije'yo —Jesosaa aca poa.

Jamajjeja Jesosaja epeejji nei poajo, Eyacuiñajjiya eseya quea boejea nee nee po mee cani ojaya ejjas-

hahuabaquijji jayojja jama eba'e'yojji, etiiquianaja esohui jayojja jama pojjeama. E'e, jamaya Eyacuiñajjiya acani ohuaya enequi tiitiya jjejojo.

¹⁵ Ojjaña joya etiiquianaja Moisesija esohui jayojja jama aiji nisho poaninaje quea mimishi nee nee poa. Jamatii Jesosa Quito mano'yonaje onajaya mimishi cuijea'yojji sosejje. Jamajjeya eseya Jesosaa huohui cani jama ba'a: —Eyacuiñajjiya miqianaya ojaya esohui huohui ca o'oyani esohui eyacua jama ba'a: “Eyaya miqianaya quea pame nee nee aje'yo. Ojjaña ecue babaca'yo enijje ba'e tiitii meeje'yo eyajo” jamaya Eyacuiñajji poani —Jesosaa aca poa.

¹⁶ Jama poani ba'a: Mano'yo jjimahuajo dejja jiquiojo ba'eya ojaya huapa pojjeama acani jama ba'a: —E mano'yajo ecuea aquiana cuana miquea poaje'yo, cha —acani cuaa.

Jamajjeya ma dejja mano'yo majje ojaya aquiana cuana oja huapa pojjeamaja poaje'yo. Eshe nequija ca mi ca equia'yojji pojjeama. O mano'yajo ca ca oe jjeshe ca'yojji. ¹⁸ Oya jayojja yahuajo nei Eyacuiñajjiya oja sohui tehue mee majje Moisesi aquiana queca mee ca poa. Moisesi jama aca poa ba'a: —¡Aquiana ehuone! quecuajea'yocue! Oja na' cuayaquajajo eyaya baje miqianaaya e'e jojo nei ecuea esohui jayojja jama aña ecuea epeeji nei epojji —Eyacuiñajjiya aca poa.

¹⁹ Jamajjeya Moisesiya ojjaña Eyacuiñajjiya esohui etehue'yo huohui caninaje ojjañaja eshajja'ajjajji. Majoya ijjiacajji ehuone', ana'ai, chivo pea'ai cuia caninaje. Aquiana na' tepejo sho caninaje ena tejje. Majoya ñajjajja ña huo'o acui aa quea shiyajo cuiabebo caninaje. Majoya ena tejje nane majje esohui etehue'yo jeasiji caninaje, ojjaña Jodio cuana jeasijjea caninaje pea'ai aquiana naa. ²⁰ Majoya Moisesiya oya cuana jama aca poa ba'a: —Eyacuiñajjiya eseya ba mee ca poa ojaya esohui e'e jojo nei. Ojaya esohui jayojja jama ohuaya acaje'yo tii. Jamajjeya eyaya miqianaya jeasijjeaña ijjiacajji naa. ¡Eya ena' jeasijjeajje jama pocue ba'a: “E'e, eseyaya ojjaña Eyacuiñajjiya esohui jayojja jama aje'yo tii” acue! —Moisesiya aca poa.

²¹ Jamaya pea'ai Moisesiya daqui equi acaninaje, ojjaña daqui equijo nequi aquiana pea'ai jeasijjea caninaje ijjiacajji naa, ojjaña. ²² Jamaya acaninaje ojjaña Jodio etiiquiaa beshahua nei ojjaña aquiana cuana, Eyacuiñajjiya quea boejea'yo jayojja ebajji. Aquiana na' shojea caninaje Eyacuiñajji oya cuana quea boejea'yo jayojja epo meeji pea'ai. Jamaya Moisesija sohui etehue'yo poa. E'e, Eyacuiñajjiya jama aca poa ba'a: —Ijjiacajji ehuone! queca cajo oja na' cuayaquajajo, eyaya miqianajaya mimishi cuijeaje'yo —aca poa.

Jamajjeya ena' cuayaqui ajjajo aje oe mimishi ecuijea'yojji pojjeama.

Jesosa Quito mano'yonaje mimishi cuijea neinei ca'yonaje

²³ Jamajjeya ijjiacajji na' jeasijjea cajje ojjaña daqui equijo nequi aquiana quea boejea'yo jayojja po mee ca poa Jodio etiiquiaa. Jamaya acajo Eyacuiñajjiya ma aquiana ba ca poa quea boejea'yo jayojja. Jamaya Eya-

cuiñajjiya eseya ba mee cani. Jesosa Quito mano'yajo oja na' cuayaquinaje; mimishi cuijea neinei ca'yonaje esejaya. Quea boejea'yo po mee canaje. Jamajjeya eseya Eyacuiñajji cojja neiyo nequi mee caje'yo eyajo. E'e, aquiana naa jeasijjea cajje pojjeama eseya, Jesosaja epeeji cuana quea boejea nee poaje'yo. ²⁴ Oya jayojja Jodioja Eyacuiñajji nijje emimijji etii equecuayijji sisi yasijje dobiquia poa Jodio cuanao Eyacuiñajji nijje mimiya oya Jodio cuana nijje quea bei epojji. Jamaya Eyacuiñajjiya eseya ba mee cani Jesosa Quito eyahuasijje dobiqui'yonaje Eyacuiñajji nijje esejo mimiya. Jesosa ca ca daqui equi yasijje pojjeama dobiqui'yonaje. Cho. Eyahuasijje dobiqui'yonaje. Jjeya nei oya, Jesosa Quito Eyacuiñajji cojja neiyo nequi, onijje esejo mimiani de, Eyacuiñajji ese nijje quea bei epojji. ²⁵ Yahuajo nei jamaya poa pea'ai ba'a: Jodio Eyacuiñajji nijje mimiani etii equecuayijji biso nei yasijje dobi majamaja quianinaje. Pea shequajajo dobiaqui poaninaje, pea shequajajo dobiqui poaninaje. Oe dobiquime poaninaje oe shequajajo. Pea ena' dojodobiaqui caninaje, aquiana ehuone na'. Aquiana na' jeasijjea majje jama acaninaje ba'a: —Eyacuiñajji, ¡ecuanaja mimishi cuana cuijea'yocue! —poaninaje.

Jesosa Quito ca ca ojjaña shequajajo pojjeama mano'ya poa. Mano'yonaje oe nei mano'yome poa. Ojaya ena' cuayaquinaje esejaya mimishi cuijea'yojji sosejje.

²⁶ Jesosaja ena' aquiana na' jayojja jama poa jojjemo oya mano majamaja quiaye. E'e, dejja pana'yo majje mano majamaja quiaye quea huiso nee nee, de. Jamatii Jesosa mano'yonaje oe mano'yome poanaje, quea huiso pojjeama. Jamajjeya jjeya nei ojjaña Eyacuiñajjiya esohui beshahua nei apoa poanijo, Jesosa mano'yonaje. Ojaya ena' cuayaquinaje mimishi cuijea'yojji. ²⁷ Eseya aje oe manoje'yo pea'ai; oe nei mano'yome poaje'yo. Mano'yo majje Eyacuiñajji cojja neiyo nequije'yo. Ohuaya huohui caje quio ese ba'ya poa sosejje. Eseya quea pame ba'yaninajejo ba'e tiitii mee caje'yo onijje eyajo. Quea mimishi ba'yaninajejo ca ca quea nee nee po tiitii mee caje'yo. ²⁸ Jamajjeya Jesosa Quito mano'yonaje, oe mano'yome poanaje pea'ai. Oya mano'yonaje mimishi cuijea'yojji ojjañaja. E'e, yahuajo Jesosa Quito mano'ya poa. Quijje oya poeje o'oya mimishi cuijea'yohua pojjeama. Poeje'yo ojaya epeeji ba'e tiitii mee'yohua, ojjaña joya ojo jja'ishoa'ajjaquiani jjehua'yohua.

Ijjiacajji ehuone naa jeasijjea cajo mimishi ecuijea'yo pojjeama

10 Jodio Eyacuiñajji nijje mimiani cuaa Moisesija etehue'yo jayojja jama amajamaja caninaje. Onajaya ba jjima pishana ma Eyacuiñajjiya quijje eseya quea pame nee nee acaje'yo. Onajaya quea ja'a pojjeama. Eyacuiñajji nijje mimiani cuaa quea huiso aquiana biajje ena' jeasijjea cajje Eyacuiñajjiya ma aquiana cuana ba ca poa quea boejea jayojja. Ojjaña shequajajo ijjiacajji ehuone' queca majamaja majje jama poaninaje ba'a: —Eyacuiñajji, ¡miquea epeeji

cuanaja mimishi cuijea'yocue ojjaña! —acaninaje Jodio cuaa.

Jamatii Eyacuiñajjiya etiiquianaja mimishi cuijea nei-nei'yo jjima aquiana ehuone' cuia ca'yajo. ²Jamajjeya aquiana ehuone' cuia ca'yajo etiiquiana quea boejea nee nee epo mee jojjemo aquiana cuia majamaja jjima aca quiaye. E'e, oya cuana quea boejea nee nee epo mee jojjemo mimishijo yeno'ama poquiaye. ³Jamatii ijjiacajji ehuone' ojjaña shequiajajo cuia majamaja caninaje. Jama poaninaje ba'a: —Eyacuiñajji, ¡miquea epeeji cuanaja mimishi cuijea'yocue! —acaninaje.

Cuia majje jama po ajja poaninaje ba'a: —Jjeya ca ca ecuanajaya mimishi chama'yo poaje —ajjima acaninaje. Cho. Jama poaninaje ba'a: —Ecuana quea mimishi, de —Jodio etiiquiana cuana poaninaje.

⁴Chojja, ana'ai na', chivo na' pea'ai jeasijjea majje mimishi cuana ecuijea'yojji pojjeama. ⁵Jamajjeya Jesosa Quitohua poe jeahuua oja Chii jama aca poa ba'a: "Ecue Chii, miquea epeeji cuana aquiana ehuone' nequi cuia mee sa po'yo ajja, miya. Aquiana ehuone' dahuajea mee sa po'yo ajja pea'ai miya. Cho. Miyaya eya dejja cuana huasijje huoojeaña yamijji. ⁶E'e, miquea epeeji cuaa aquiana ehuone' cuia cani mimishi cuijea'yojji nisho mi quea bihui nee po meeji nisho. Ma ohua dahuajea cajoya miya quea bihui nee pojjeama poani. ⁷Jamajjeya eyaya miya jama anaje ba'a: —Ecue Chii, eya meshi yasijje poeyanaje. Miquea ejjashahuabaqui'yojji jayojjaya jama eyaya aje'yo. Jamaya yaya aje'yo mi quea bihui nee po meeji".

Jamaya yahuajo oja Chii Eyacuiñajji Jesosa Quitohua acanaje. ⁸E'e, Jesosaa oja Chii jama acanaje ba'a:

"Ecue Chii, miquea epeeji cuaa ijjiacajji ehuone' nequi cuia mee sa po'yo ajja, dahuajea mee sa po'yo ajja pea'ai miya. Ijjiacajji ehuone' cuia cani cuaa mimishi cuijea'yojji nishojo aje oe miya quea bihui nee pojjeama poani. Maya dahuajea canijo pea'ai miya quea bihui nee pojjeama".

Jamaya acanaje Jesosaa, jamatii yahuajo Moisesija esohui etehui'yo jayojja jama Jodio cuanaa aca poquianinaje, ehuone' cuia majamaja ca poquianinaje. ⁹Jamajjeya majoya Jesosaa jama acanaje ba'a: "Ecue Chii, eyaya miquea ejjashahuabaqui'yojji jayojja jama aje'yo mi quea bihui nee po meeji". Jamaya acanaje.

Jamajjeya Jesosa Quito poeyanajejo ca ca oe Eyacuiñajjiya eseya jama acani ba'a: —¡Jesosa Quito jayojja jama pocue, oe! ¡Ecuea ejjashahuabaqui'yojji jayojja jama oe atiitiicue! Jjeya ohuaya eseya huohui maja ajja jama ba'a: —¡Jodio etiiquiana yahuajo nei nei ba'ya poa jayojja jama acue! ¡Ehuone' cuia'yo majje dahua-jea'yocue miquea mimishi ecuijea mee'yojji! —Cho. Jamaya Eyacuiñajjiya eseya amaja ajja. ¹⁰Jamajjeya Jesosa Quitohua Eyacuiñajjiya ejjashahuabaqui'yojji jayojja jama acanaje. Mano'yonaje; oe mano'yome poanaje eseja mimishi cuijea'yojji. Jamajjeya Eyacuiñajjiya eseya mimishi cuijea'yo majje quea boejea po mee ca'yani Jesosaja epeeji nei cuana.

¹¹Yahuajo nei Jodio Eyacuiñajji nijje mimiani etii ojjaña pojja daqui equijo chachochaconaje. Ehuone' cuia

majamaja caninaje mimishi cuijea mee'yojji nisho. Ecuijea'yojji cuijea ca'yaninaje de, mimishi cuijea'yo jjima poa. ¹²Jesosa Quito ca ca Eyacuiñajji nijje emimijji nei. Oya ca ca oe mano'yonaje; oe mano'yome poanaje. Aquiana ehuone' mano'yani jayojja jama pojjeama poanaje oya. Mano'yonaje mimishi cuijea'yojji. Apoa. Mano beca'yo ajja. Eyahuasijje sohuaqui'yonaje. Eyacuiñajji pejejo anioque'yonaje, ebianeij mijiije. Eyacuiñajji nijjeya ojjaña huoojea'yojji poani oya, Jesosa. ¹³Majoya jjeya ohuaya ishoa ca ani Eyacuiñajjiya eshahua cuana, ojjaña ojaya epeeji pojjeama, shajjama' cuana pea'ai jeabichajea'yo majje quea nee nee po mee caje'yo tii tii. ¹⁴E'e, Jesosa acui ecueata'apeejo mano'yonaje; ojaya epeeji mimishi'ama po mee ca poa. Jamajjeya eseya Eyacuiñajjiya esohui jayojja jama amesahua cani.

¹⁵Edojjoshahua Pameya pea'ai eseya ba meesahua cani Eyacuiñajjiya esohui ma ohua yahuajo tehue mee ca poa ojaya epeeji ebajji. Ebionei jama poa ba'a:

¹⁶"Quiije eyaya miquianaya esohui eyacua huohuije. Jamajjeya miquianaya jjashahuabaqui meesahuaje ecuea ejjashahuabaquiiji jayojja. Ecuea esohui jayojja jama eyaya miquianaya amesahuaje".

¹⁷Majoya ohuaya jiquio esohui tehue mee ca poa:

"Jamajjeya eyaya ojjaña cuanaja mimishi cuijea nei-nei'yo. Majoya eya jjashahuaba majamajaqui ajja mi-quianaja mimishijo. Quea bei poaje".

Eyacuiñajjiya jama tehue meemeya aca poa. ¹⁸Jamajjeya Jesosa Quito esejaya mimishijo mano'yo majje mimishi cuijea ca'yonaje. Apoa poanaje. Jamajjeya oya mano beca'yo ajja. E'e, aquiana ehuone' quecua maja ajja pea'ai, ¿ajeo quecua'yojji? Jesosa mimishi cuijea'yojji quea pame nee poanaje.

¡Jesosa chipi nei ejjapeequi!

¹⁹Yahuajo Jodio Eyacuiñajji nijje mimiani cuana quea mete dobiquia poa daqui equecuayijji biso nei yasijje. Dobiquia poa Eyacuiñajji nijje mimiya. E'e, Jesosa Quitohua mano'yonaje; ojaya ena' cuayaquinaje ese quea boejea po mee'yojji. Jamajjeya Jesosaja epeeji cuana, jjeya Eyacuiñajji nijje emimi mete'ama nei. ²⁰Yahuajo nei Eyacuiñajji nijje emimijji etii oe nei daqui esecueje equecuayijji biso nei yasijje dobiquianinaje Eyacuiñajji nijje mimiya. Jjeya eseya Eyacuiñajji nijje mimiani, ojjaña. Jesosa esejo mano'yonaje. Jjeya oya eshe, enequi tii tii. Jamajjeya eseya mimi majamajani Eyacuiñajji nijje. ²¹Oya, Jesosa Eyacuiñajji nijje emimijji nei esejo pea'ai. Esey jaahuana tiitii cani, ojaya epeeji nei. ²²Jamajjeya eseya ojaya epeeji e'e jojo nei poanijo Eyacuiñajji nijje emimi. E'e jojo nei emimi tii tii onijje. ¡A'a jama pojji ba'a: —Dee! Eya quea mimishi Eyacuiñajji nijje emimijji —a'a jamaya pojji! Cho, esejaya mimishi cuana cuijea ca'yonajejo eseya quea boejea nee'yo.

²³Eyacuiñajjiya ojaya esohui jayojja jama acaje'yo. Sjajje po ajja oya. E'e jojo nei eseya ba'e tiitii mee caje'yo onijje eyajo. Jamaya esejaya eba. Jamajjeya ¡ejjapeequi onijje nei! ²⁴¡Jesosaja epeeji cuana quea jea nee eja'aqui! E'e, ¡ejjashahuabaqui pea epeeji cuanajo, o

ba'e meesahuajji, Jesusajo echaco sahuajji pea'ai!
²⁵ Beca epeeji cuana aje oe jjachicha pajequinaje;
 ojee Eyacuiñajji bihuia ajja po'yonaje. ¡A'a oya cuana
 jayojja jama pojji! ¡Ojee ejjachichaqui! Jesusaja epeeji
 cuana nijje emimi jama ba'a: —¡Quea bihui pocue! ¡Je-
 sosa nijje jjapeequicue ecuana nijje! —ejja'aqui.

E'e, Jesusa Quito esejaya Emeshi Mese nei poeje'yo.
 Jamajjeya oe jamaya epo tiitii.

¡Jesusa Quito a'a cajaa ajji!

²⁶ Beca cuana aje oe Eyacuiñajji esohui e'e nei ba
 majje jamatii quea mimishi po tiitii sa poani. Jamajjeya
 ojaya mimishi ecuijea'yojji pojjeama. E'e, Jesusa ca ca
 oe mimishi cuijea'yojji. Pea chama'. ²⁷ Jamajjeya Eya-
 cuiñajjiya ojjaña shajjama' cuana jeajea caje'yo cuaqui
 yasijje onijje mi jjapeequi'yajo. Quea nee nee po tiitii
 mee caje'yo. ²⁸ Yahuajo nei Jodio etiiquiaa Moisesija
 etehue'yo jayojja jama mi atitii cajo, cuiajea ca'yanina-
 je, dejja etii cuaa. Beca dejja cuaa oya jayojja huohui-
 me acajoya jama ba'a: "Oya ca ca oma shajjama', Moi-
 sesija esohui jayojja jama a sa po ajja. ¡Cacuijaja ca'-
 yahua cuaa ca oma!" jama huohuime acajoya cuiajea
 ca'yaninaje dejja etiiya. Chama'yo tii aca'yaninaje cua-
 na. ²⁹ Oya jayojjaya jjea beca cuana Eyacuiñajjiya Ba-
 cua Ejjajo, Jesusajo mimipanajeapanajeani. Cajaa acani
 quea mimishi nee neeya jjejojo. Eyacuiñajjiya esohui
 quea pame nee ojjaña ba mee canaje jama ba'a: —Je-
 sosa mano'yonaje miquianajaya mimishi cuijea'yojji
 —jamaya ba mee canaje.

Jamatii beca cuana siajje poani jama ba'a: —Jesusa
 dejja mimishi jayojja jama mano'yonaje, jamatii.

Edojjoshahua Pameya ojjaña quea pame jaahuana
 sa acani. Jamatii beca cuana Edojjoshahua Pame shaj-
 ja'ajja sa po'yo ajja. Cajaa acani. Oya cuana quea tai
 nee nee poani. Jamajjeya oya cuana quea nee nee po
 mee caje'yo tii tii Eyacuiñajjiya. Yahuajo nei Moisesija
 etehue'yojo shajjama' poanijo ca ca quea tai pishana.
 Jamatii quecuajea ca'yaninaje cuaa. ³⁰ E'e, esejaya eba
 Eyacuiñajjiya yahuajo tehue mee ca poa jama ba'a:

"Eyaya eyaye nei dejja mimishi quea nee nee po mee-
 je'yo. Ojjaña joya pea cuana quea nee poani eyaya
 quea nee nee po meeje'yo".

Jamaya Eyacuiñajji poa pea'ai ba'a: "Ecuea epeeji quea
 mimishi poajo, eyaya oya cuana ejjabahuejjaquijji
 quea nee po meeje". Jamaya Eyacuiñajji poa pea'ai.

³¹ Jamajjeya ¡quea mete nee nee capoahua ojjaña jo-
 ya Jesusa Quito cajaa ajji poani, de! Eyacuiñajjiya oya
 cuana quea nee nee po mee caje'yo. Oya ca ca oe nei
 eshe nequi tii tii, quea ca'a nee nee.

Jesosa nijje jjapeequi majje ¡quea ja'a nee po tiitii!

³² Ecuea epeeji cuana, ¡jjashahuabaquicue! Yahuajo
 Jesusa nijje jjapeequi jeahuajo miquianaya ojaya
 epeeji quea ja'a nee poanaje. E'e, Eyacuiñajjiya esohui
 shajja'ajja majje miquianaya onijje jjapeequinaje. Edoj-
 joshahua Pame miquiana que dobiquinaje pea'ai. Ja-
 majjeya Jesusaja epeeji pojjeama cuaa miquianaya na-

pa canaje quea huiso. Miquianaya quea nee poanaje.
 Jamatii Jesusa nijje jjapeequi pajea ajja poanaje, jjapee
 neineiquinaje. ³³ E'e, Jesusaja epeeji pojjeama miquia-
 na nijje mimijajinaje quea huiso ojjaña eshajja'ajjaji.
 Miquianaya napa canaje pea'ai. Quea nee po mee ca-
 naje. Jamatii miquianaya mete'ama poanaje. Onaa Je-
 sosa epeeji napa canijo, miquianaya onijje jjapeequi-
 naje, Jesusaja epeeji cuana nijje. ³⁴ Ejeanobia jaa hua-
 sijje pea'ai miquianaya poquinaje mete'ama Jesusaja
 epeeji cuana baa, ona bobiaa. Miquianaya ejeanobia
 jaajo aquiana sijjea ca'yonaje cuaa. Jamatii miquianaya
 yeno'ama poanaje. Quea bihui miminaje jama ba'a:
 —Ecuana Jesusaja epeeji poanijo ohuaya ecuana
 quea pame nee nee acaje'yo quijje. Ecuana ba'e tiitii
 mee caje'yo onijje eyajo —poanaje miquianaya.

³⁵ Jamajjeya ¡a'a jja oe Jesusa nijje jjapeepajaequi'yoj-
 ji! Onijje jjapee neineiquianijo, ohuaya miya quea pa-
 me nee acaje'yo. Eyajo miya quea huiso sosequia ca-
 je'yo pea'ai. ³⁶ E'e, ¡quea bihui nee atitii Eya-
 cuiñajji esohui jama! ¡A'a hueahueajji! Jamaya miquiaaya
 atitiiyajo, ohuaya miquianaya quea pame nee nee
 acaje'yo. Ojaya esohui yahuajo ohua huohui ca poa ja-
 maya ohuaya acaje'yo. Miquianaya ba'e tiitii mee caje'-
 yo onijje eyajo. ³⁷ E'e, Eyacuiñajjiya esohui yahuajo nei
 etehui'yo jama poa ba'a:

"¡Ishoa socue ojaya epeeji! Jjea nei pojja'a oya poe-
 je'yo, quijje nei pojjeama.

³⁸ Ojjaña joya enijje jjapee tiitiiquiani eyaya baña mi-
 mishi'ama, quea boejea'yo. Enijje jjapeepajaequijajo ca
 ca ecuea boti'ama; quea nee po meeje'yo".
 Jamaya esohui etehui'yo poa.

³⁹ Ecuana ca ca jamaya pojjeama. Jesusa nijje jja-
 peepajaequi'yo ajja tii. Jamajjeya Eyacuiñajjiya ecuana
 quea nee nee epo mee'yojji pojjeama. Cho. Ecuana Je-
 sosa nijje jjapee tiitiiquianijo ohuaya ba'e tiitii mee ca-
 je'yo onijje eyajo.

Beca etiiquiana Eyacuiñajjiya epeeji nei poa

11 Ecuea epeeji cuana, esejaya eba nei nei jama
 ba'a: Jesusaja epeeji poanijo e'e jojo nei Eyacui-
 ñajjiya ojaya esohui jayojja jama eseya acaje'yo. Jamaj-
 jeya eseya jama poani ba'a: —E'e jojo nei Jesusa quea
 huiso esohui huohui canaje; jjea beca cuana esejaya
 quea quehua. Jamatii quijje eseyaya baje'yo.

² Jamajjeya Jesusaja epeeji poanijo eseyaya baña
 Eyacuiñajjiya ojjaña tii pana ca poa. E'e, oya jama poa
 ba'a: —Meshi cuana, ¡jjapanaquicue! —jamaya acajje
 meshi jjapanaquia poa. E'e, yahuajo nei ojjaña chama'
 nei nei poa. Jamatii Eyacuiñajjiya ojjaña pana ca'ya
 poa.

E'e, etiiquiana pea'ai Eyacuiñajji nijje jjapeequianijo,
 ojaya esohui jayojja jama acanijo pea'ai, Eyacuiñajji
 ona nijje jama poa ba'a: —Miquianaya ecuea epeeji
 poanijo eyaya miya baña quea pame nee poani —aca
 poa.

Etiiquiana Abeni bajjani Eyacuiñajjija epeeji nei poa

⁴ Abeni Eyacuiñajjija epeeji poanajejo ojaya esohui jayojja jama aca poa quea pame nee. Jamajjeya ijjiacajji ehuone' dahuajea cajo Eyacuiñajji bihuiajji, Eyacuiñajji onijje miminaje jama ba'a: —Abeni, miya quea ja'a nee anaje. Jamaya ecuea quea boti nee. Jamajjeya eyaya miya baña mimishi'ama —Eyacuiñajji poa.

Abenija o'iya Cainiya Eyacuiñajjija esohui jayojja jama pojjeama aca poa. Quea pame pojjeama aquiana quia ca poa Eyacuiñajji bihuiajji. Jamajjeya Cainija quia'yo Eyacuiñajjija boti'ama poa. Jamajjeya Caini jashahuabaquinaje jama ba'a: —Eyacuiñajjija Abeni quea jea nee poani. Ojaya eya boti'ama. Jamajjeya eyaya Abeni cuijeaje'yo —aca poa Cainiya. Jamatii ecuanaja eba Abeniyaya Eyacuiñajjija esohui jayojja jama aca poajo ojaya epeeji nei poa. Abeniyaya quea pame aca poajo eseya jjashahuabaqui majje Eyacuiñajji nijje jjapeequi quea pame nee.

Etiiquiana Enoca bajjani Eyacuiñajjija epeeji nei poa

⁵ Enoca Eyacuiñajjija epeeji nei nei poa pea'ai. Jamajjeya oya mano'yo jjima. Eyacuiñajjiya oya jjequisohua ca'ya poa eyahuasijje eshe tii. Onijje nequi dejja cuaa oya sa'ajja ca'ya poa. Chama' ba ca'ya cuaa poa. Eyacuiñajjija esohui yahuajo nei nei tehue ca poa Enocajo jama ba'a: “Eyacuiñajjija esohui jayojja jama aca poajo Eyacuiñajji quea bihui nee poa Enocajo” jamaya tehue ca poa.

⁶ E'e, Eyacuiñajji nijje jjapeequi ajjajo, ojaya esohui jayojja jama a'ajjajo, Eyacuiñajji ojjaña ese nijje quea bihui nee pojjeama poaje. Ojjaña joya Eyacuiñajji nijje jjapeequi sa poani cahuohui cahua jama ba'a: —Ecuea eba Eyacuiñajji enequi tii tii, eshe. Ojjaña joya oya sa poani ohuaya e'e jojo nei quea pame nee acani —cahuohui cahua.

Etiiquiana Noe bajjani Eyacuiñajjija epeeji nei poa

⁷ Noe Eyacuiñajjija epeeji nei pea'ai poa. Jamajjeya Eyacuiñajjiya oya huohui ca poa jama ba'a: —Ojjaña meshijo ba'e cuana hui'ijeaje'yo ena jjayehuequiajo. Ohuajea caje ojjaña tii —Eyacuiñajjiya aca poa.

Noeja ba jjima poa ena quea quemo nee poaje. Jamatii ohuaya Eyacuiñajjija esohui shajja'ajja ca poa. Bische, nacha quea quemo nee nee iya ca poa ojaya, oja bacua cuanaja edobiquijji, hui'i'yo jjima epojji. Jamajjeya Eyacuiñajji onijje mimia poa jama ba'a: —Noe, miya ecuea epeeji poani. Ecuea esohui jayojja jama aña. Jamajjeya eyaya miya baña mimishi'ama —aca poa.

Noeya Eyacuiñajji shajja'ajja ca poajo, eseyaya baña pea cuana aje oe shajjama' nei nei poa.

Etiiquiana Amajama bajjani Eyacuiñajjija epeeji nei poa

⁸ Amajama Eyacuiñajjija epeeji nei poa. Jamajjeya Amajamaa shajja'ajja ca poa Eyacuiñajji onijje mimiajo.

Jama poa ba'a: —Amajama, imiquea meshijo nequi cuayaqui'yocue! ¡Poquicue pea meshi yasijje, ma miquea ba jjima huasijje! Eyaya ma meshiya miya quiaje. Miquea eba'ejji poaje'yo, miquea osecua cuanaja pea'ai poaje'yo —Eyacuiñajjiya aca poa.

Jamajjeya Amajamaa Eyacuiñajji shajja'ajja ca poa. Poquia poa jamatii oja ba jjima meshi yasijje. ⁹ Jamajjeya Eyacuiñajjija esohui jayojja jama poanijo oya ba'e-qui'ya poa pea meshi yasijje, ma Eyacuiñajjiya o huohui ca poa huasijje. Ma meshijo ba'e dejja pea poa. Jamajjeya Amajamaja equi iya jjima poa; daqui equijo ba'ya poa. Jamaya pea'ai poa oja bacua Isaaca, ojaya osecua Jacobo pea'ai.

—Jiquio meshi eyaya miya quiaje miquea eba'ejji —jamaya Eyacuiñajjiya huohui ca poa Amajama, oja bacua Isaaca, ojaya osecua Jacobo pea'ai.

¹⁰ E'e, Amajama jashahuabaquinaje pea cuiñajjijo, cuiñajji eyacuajo, ma Eyacuiñajjiya eyajo iya canijo. Amajama jama poa ba'a: —Quijje eya Eyacuiñajjija cuiñajji eyacuajo ba'eje.

Etiiquiana epona Sana bajjani Eyacuiñajjija epeeji poa

¹¹ Sana Eyacuiñajjija epeeji nei poa pea'ai. Jamajjeya Sana pona tii nojinoji majje jjamejoquia poa, jamatii esho'yahua jjamejoqui jjima poa. Eyacuiñajjiya oya jjamejoqui meesahua ca poa ojaya epeeji nei poanijo. Sana jjashahuabaquia poa jama ba'a: —Eyacuiñajjiya huohui canaje Amajama ecuanaja ebacuajo e'e nei. Jamajjeya ma ecua ecuanaya ohuaya huohui canaje jamaya acaje'yo e'e jojo nei —Sana poanaje.

¹² Amajama Eyacuiñajji nijje jjapeequinaje pea'ai, oja sohuijo e'e nei jjabahuejjaquinaje. Jamajjeya dejja tii nojinoji majje, 100 shequiajame tii majje ebacua jea ca poa. Ehuanae etii nojinoji jjamejoquia poa, jamatii yahuajo nei bacuama' nei nei poa. Jamajjeya ojaya osecua quea huiso nee nee quijje jjapapaqui'ya poa. Majameta huisoajja poa, sico meemea ajja quea huiso nee nee. Meshijajjijo ani mei sisi huisoajja poa.

Etiiquiana cuiñajji eyacuajo eyajo jjashahuabaquianinaje

¹³ Jiquio etiiquiana Eyacuiñajji nijje jjapee tiitiquianinaje. Dejja tii majje mano'ya poa Eyacuiñajjija epeeji tiiya. E'e, Eyacuiñajjiya oya cuana huohui ca poa jama ba'a: —Eyaya miya jiquio meshi quiaje'yo miquea epojji, miquea osecua cuanaja epojji pea'ai.

Jamatii maya meshi ojaya pojjeama, mesena jjima poa: —Eyacuiñajjija esohui e'e nei, ohuaya meshi quea pame nee quijje quia caje'yo ecuanaja osecua cuanaja epojji —etiiquiana jjashahuabaquianinaje. Jamajjeya oya cuana quea bei nee po'ayequianinaje: —Ecuana jiquio meshijo anije so'o —poaninaje etiiquiana—. Meshijo ca jja ca oe ecuanaja eba'e tiitiijji pojjeama. Eyajo ca ca oe ecuanaja ba'e tiitiije'yo Eyacuiñajjija cuiñajji eyacuajo —jamaya poaninaje Amajama, Isaaca, Jacobo cuana.

¹⁴ E'e, oya jamaya poaninaje pea eba'ejjijo jjashahua-baquianijo. Eba'ejji e'e jojo neiyo jjashahuabaquianinaje ojaya epojji tii tiijo. ¹⁵ Oya cuana jjashahuaba majaquei ajja poa meshijo, ma yahuajo oja jiña'yojo. Jjashahuabaquianinaje jama ba'a: —Ma e ba'ya poa meshi yasijje ca iña poqui sa po'yo ajja. ¿Ajeo epoqui o'oyajji, de? —poanaje oya cuana.

¹⁶ Chojja. Oya cuana pea eba'ejjijo jjashahuabaquianinaje, eba'ejji eyacua quea pame nee neejo eyajo Eyacuiñajji nijje. Jamajjeya Amajama jama poa ba'a: —Eyacuiñajji, eya miquea epeeji.

Amajama jama poajo Eyacuiñajji etiquiana nijje mininaje jama ba'a: “Miquianaya ecuea epeeji nei; eya quea bei nee miquianajo” aca poa. Jamajjeya Eyacuiñajjiya oya cuana ojaya cuiñajji eyacua quea pame nee yasijje ba'e mee caje'yo, ma ohua yahuajo eyajo pana ca'ya poa huasijje.

¹⁷ E'e, Amajama Eyacuiñajjiya epeeji nei poa. Yahuajo Eyacuiñajjiya oya huohui ca poa: “Amajama, miquea ebacua cuayaje” aca poa. Majoya Amajama ebacua cuayajo Isaaca bajjani aca poa. Majoya Eyacuiñajjiya Amajama jama aca poa ba'a: “Isaacaja bacua ca ca oe eyaya baña miquea osecua e'e nei, pea cuana ca chojja” aca poa. Jamatii quijje Eyacuiñajjiya Amajama jama aca poa ba'a: “Amajama, imiquea ebacua ejja oe nei Isaaca bajjani mei biajje huana majje yacua'yocue, dahuajea'yocue!” Jamaya Eyacuiñajjiya Amajama huohuime aca poa a'a e'e jojo nei ohuaya shajja'ajja caje ebajji: “Eya e'e jojo nei Amajamaja quea jea neejo, ohuaya ecuea esohui shajja'ajja caje” poanaje.

¹⁹ Majoya Eyacuiñajjiya esohui shajja'ajja majje Amajama oja bacua ejja dojo ca poa eyacua'yojji nisho: —E'e, eyaya Eyacuiñajjiya esohui jayojja jama aje'yo; ecue bacua oe nei yacuajeaje'yo —Amajama poanaje—. E'e, eya Isaaca yacua'yajo, Eyacuiñajjiya oya emanoyojaa shequi mee caje o'oya —Amajama poanaje.

Jamajjeya Isaaca yacua jjimahuajo Eyacuiñajjiya Amajama huohui canaje jama ba'a: “Amajama, ja'a miquea ebacua Isaaca yacua'yojji!” aca poa.

Jamajjeya Amajamaa Isaaca equi yasijje dojo ca o'oya poa, eshe. Beshahua nei Isaaca yacua ca'yonaje. Jamajjeya eyacua'yojaa shequi o'oya jayojja Isaaca poa.

Etiquiana Isaaca, Jacobo, Jose pea'ai Eyacuiñajjiya epeeji poa

²⁰ Isaaca Eyacuiñajjiya epeeji nei pea'ai poa. Jamajjeya ojaya ebacua ejja Jacobo, Esao pea'ai huohui ca poa jama ba'a: —Jacobo, Esao pea'ai, ishajja'ajjacue mo! Ma ecua eya ohua huohui ca poa jayojja jama Eyacuiñajjiya acaje'yo miquiana nijje. Ohuaya miquiana nijje quea pame nee acaje'yo. E'e, jiquio meshi miquea osecua cuanaja poaje'yo —aca poa Isaacaa.

²¹ Jacobo pea'ai Eyacuiñajjiya epeeji nei poa. Jacobohua dejja tii majje oja bacua ejja Jose bajjanija bacua cuana huohui ca poa jama ba'a: —Ecuea osecua, Eyacuiñajjiya miquianaya quea pame nee ca'a cahua e'e jojo nei —Jacobohua aca poa ojaya osecua cuana, Joseja bacua ejja cuana.

Majoya Jacobohua Eyacuiñajji bihuia ca poa. Oya dejja tii nojinoji majje ojaya acui ejjaquecua ca'aquijjiyo nequisohuanaje Eyacuiñajji bihuiajji. Jama aca poa ba'a: —Eyacuiñajji, miya oe nei quea pame nee nee. Eyaya miya bihuiaña —aca poa Jacobohua.

²² Jose pea'ai Eyacuiñajjiya epeeji nei poa. Jamajjeya tii nojinoji'yo majje mano'yo jjimahuaa Joseya oja bacua ejja huohui ca poa jama ba'a: —E'e jojo nei Eyacuiñajjiya eseya ojjaña Amajamaja pea osecua cuana nijje Ejito meshijo nequi cuayaqui meesahua caje'yo pea meshi yasijje epoqui'yojji, eseja meshi yasijje. Jamajjeya je mano'yajo ecuea esa' cuana dojo'yocue ecue meshi yasijje! jJani ai yasijje huanadobiañaqui'yocue! —huohuime aca poa Joseya.

Etiquiana Moisesi bajjani Eyacuiñajjiya epeeji nei poa

²³ Moisesija chii, ojaya enaese pea'ai Eyacuiñajjiya epeeji nei nei poa. Jamajjeya Ejito meshi meseya Panao bajjanija ojjaña Ejito meshijo ba'e cuana Jodio cuana jama aca poa ba'a: —jJodio cuana, miquea ebacua cuaya jeahuajo cuei yasijje jeaqueajeacue! —aca poa.

Jamatii Moisesija chiiya, oja naeya pea'ai Panao shajja'ajja jjima aca poa. Mete'ama poa. Panaoja esohui jayojja jama ajjima aca poa; Moisesi jeaqueajea jjima aca poa. Ba majje jama aca poa ba'a: —Jiquio ebacua quea pame nee, quea ja'a nee nee —aca poa ejejjiya.

Jamajjeya equijo huanaquehua ca poa pea beca peejjima ba'ime onaa ejaja ca'yo poajeje. ²⁴ Panaoja bacua pionaa Moisesi ba majje tii mee ca poa. Jamatii tii majje Moisesi Eyacuiñajjiya epeeji nei poa. Jodio cuana nijje ba'e'yo sa poa, oja huapa pojjeama nijje. Moisesiya Ejito dejja jama aca poa ba'a: —jA'a eya nequiaa jama ajji ba'a: “Miya Panaoja bacuaseja bacua” a'a eya ajji! —Moisesiya aca poa.

²⁵ Ejito dejjaa aje oe Jodio cuana sosema' chaco mee ca poa, cuiasejjajea ca poa quea huiso nee, Eyacuiñajjiya epeeji cuana. Quea nee poa. Jamatii Moisesi Jodio cuana nijje ba'e sa poa. Oya Ejito cuana nijje ba'e sa po ajja neinei poa oya cuana quea mimishi poanijojo. Oya ca ca Eyacuiñajji nijje jjapeequi sa poa jamatii quea nee. ²⁶ Jjashahuabaquia poa jama ba'a: —Eyacuiñajjiya huoojea'yo ojjaña jaahuanajji quea tai nee acaje'yo mimishi cuaa. Eya quea nee capoahua pea'ai o jayojjaya. Jamatii, jamaya quea pame nee. Ejito dejjaja aquiana quea nahue ecuea yani. Jamatii cajaa eyaya ajeaje —Moisesi poa. Ojaya eba poa Eyacuiñajjiya oya quea pame acaje'yo quijje onijje jjapeequianijo.

²⁷ Moisesi Eyacuiñajjiya epeeji nei nei poa. Panaohua ca ca Eyacuiñajjiya epeeji Jodio cuana nahue sa aca poa ojaya echacojji sosema' epojji; quea tai, quea mase oya poa. Jamatii Moisesi Panaojo mete'ama poa: —Eyaya ca iña Eyacuiñajjiya epeeji Ejito meshijo ani cuayaqui meesahuaje'yo ecuanaja meshi yasijje epoqui'yojji —jamaya Moisesiya Panao aca poa mete'ama nei. E'e, Eyacuiñajji Moisesija eba poa, jamatii Eyacuiñajji jjaba meequi ajjajojo ojaya ecojjaja ba jjima poa.

²⁸ Moisesiya Eyacuiñajjija epeeji nei poaniya jjejojo Eyacuiñajjija esohui jayojja huohuime aca poa Jodio cuana jama ba'a: —¡Ñajjajja cuiacue! Majoya cuia'yo majje ijeasijjeacue oja naa miquea esecue jjanijo esohuidojojjiya miquea ebacua ejja ecuiajeajji pojjeamajo, cojjasobo! Jamajjeya poeje shajjamaja bacua ejja cuiajeaa —Moisesiya aca poa.

Jamajjeya Moisesiya esohuidojojjiya Jodio cuanaja ebacua ejja cuia jjima amee ca poa. Majoya jamaya Jodio cuaa ojjaña shequiaya ojee ijia ca poa ebacua cuia'yo jjima aca poa shejo, epajea'yojji pojjeama jojo-ya.

²⁹ Jodio cuana Isaenija osecua cuana Eyacuiñajjija epeeji poa yahuajo nei Moisesi Jodio cuana jaahuana coojji poa. Jamajjeya Eyacuiñajjija oya cuana bae huo'o oje miji yasijje poqui mee ca poa ejiojji jaboje. Ba majje Ejito dejja jama poa ba'a: —¡Cua'a! ¡Poquicue ma ecua Jodio dejja poquia bacue! —poa. Jamatii Ejito dejja epoquijji nisho po'ajja poa. Hui'i jeyojeyo'ya poa ojjaña. Enaa oya cuana jepajea ca poa.

³⁰ Isaenija osecua cuana Eyacuiñajjija epeeji poa Josoe o huojjea'yojji poanijo pea'ai. Jamajjeya Eyacuiñajjija esohui jayojja jama Jenico cuiñajji sahuajje jjajeacohuiqui nequi'ya poa. Quea huiso cahuime dobiqui jjima, me oeje pea beca cahuime, 7 cahuime aca poa. Eyacuiñajjija mei peeyi jaabichajjea meequi ca poa meshi yasijje. Jamaya aca poa Isaeni dejja cuaa. Ojjaña mimishi cuana jomajo ba'e quecua jeyojeyo meesahua ca poa, Eyacuiñajjija.

³¹ Epona Shajami bajjani, ma pea cojjoji yahuajo poa Eyacuiñajjija epeeji po'yonaje. Jamajjeya Josoeja huojjea beca dejja Jenico cuiñajji quehua baa dobiqui Shajamiya oja equi yasijje iyaaquehua ca poa onaa equecua ca poajeje. Jamajjeya Josoeja sohuinano cuaa dejja mimishi quecuajea'yo majje Shajami quecua'yo jji-ma poa. Josoeja huohui ca poa jama ba'a: —¡A'a Shajamija huapa pojjeama quecuajji! —aca poa.

Jodio etiiquiana quea huiso Eyacuiñajjija epeeji poa

³² Pea etiiquiana quea huiso Eyacuiñajjija epeeji nei poa. Beca cuana ma bajjani poa ba'a: Jjeneoni bajjani, Banaca bajjani, pea Sanisohui bajjani, pea Jepete bajjani, pea Dabi bajjani, pea Samoeni bajjani. Quea huiso Eyacuiñajjija esohui huohuijji Jodio etiiquiana poa. Jje-ya ca ca eyaya ojaya cuanaja eba'ejjijo ehuohui jeyojeyojji pojjeama quea huisojojo. ³³ Oya cuana Eyacuiñajjija epeeji nei poaninajejo oya cuana ameesahua canaje joya ecua peaa ajjima acani jama. Jamajjeya beca cuaa emeshi mese quea mimishi cuana jeabichajjea ca poa. Pea cuana ona huojjeajji quea ja'a nee poa. Pea cuana quea ca'a poa, quea ja'a nee ba'e'ya poa. Ojaya esohui yahuajo jayojja ma ecua ohuaya yahuajo esohui huohui ca poa jamaya aca poa onajo, Eyacuiñajjija. Pea cuana neonija, ibia naa ashaja ijia jjima poa Eyacuiñajjija oya jjanaba cami meequi ca poa ojaya epeeji cuana e'ijjia ca'yo poaje jjejojya. ³⁴ Pea cuana Eyacuiñajjija jaahuana canajejo quiyo'yo jjima poa. Cuaqui jiji neijo nequi quiyo'yo jjima poa. Pea cuana

quehuajje poquicuaaji meesahua ca poa dejja maseya equecua ca poaje jjejojya. Pea epeeji cuana ca'a'ama. Jamatii Eyacuiñajjija quea ca'a po mee ca poa; dejja mase quea huiso cuana jeabichajjea ca poa, Eyacuiñajjija epeeji pojjeama mete mee ca poa. ³⁵ Epona cuana quea yeno nee nee ebacua mano'yajo poa. Jamatii Eyacuiñajjija ebacua cuana emano'yojaa shequi mee ca o'oya poa. Quea bihui nee po mee ca poa. Pea cuana ca ca dejja mimishiya quea nee nee po mee ca'ya poa. Quea nee neejo mano'ya poa. Oya cuana huohui ca poa dejja mimishiya: —¡Eyacuiñajji nijje jja-peequi pajea'yocue! ¡Cajaa acue! Majoya miya quecua'yo jjima poaje —poanaje cuana.

—Chojja. Eya Eyacuiñajjija epeeji nei. Oya cajaa a'ajja tii ecuea. Eya ca ca iña mete'ama emano'yojji —saja'ame aca poa Eyacuiñajjija epeeji cuaa.

Jamajjeya aje oe quecua ca'ya cuaa poa. Ma epeeji nei jjashahuabaquianinaje jama ba'a: —Eyacuiñajjija e'e jojo nei eya quea pame nee ba'e tiitii mee caje'yo onijje eyajo quijje —poa mano jjimahua.

³⁶ Dejja mimishi cuana Eyacuiñajjija epeeji cuanajo soa neineinaje ojjaña ba canijo pea'ai. Napa canaje, cuiasejjajea canaje jjonohua, jeyo canaje cadenaaa, jeanobiajea canaje. ³⁷ Jajahuejjajea canaje meiya pea'ai. E'e, acui ijjasejjameejjiya oya cuana ijjasejjajea mee caninaje, esapa jajasejjajea ca poa baaa Eyacuiñajji a'ca cajaa acaje'yo ebajji. Aema' poa; daquimajo ijjiacajji jee daqui huosho ca poa. Bobi yasijje po'ya poa. Quea naba taja nee nee pea'ai poa. E'e, ojjaña ba canaje dejja mimishi cuaa oya cuana quea tai nee nee aca poa, cajaa aca poa. Jama aca poa: —¡Dee! Jiquio dejja cuana quea tai, cajaa. ¡Ejjacuiajeaqui'yo! —aca cuaa poa.

³⁸ Jamajjeya oya cuana dejja masejo quea mete jjejojo quehuajje poquinaje. Cuajicuaqi poquinaje meshi quima huasijje, eyiyo huasijje, jani yasijje pea'ai. Equi chamajo jjanijo ba'ya poa.

³⁹ Jiquio Jodio etiiquiana Eyacuiñajjija epeeji poa, quea pame nee. Eyacuiñajji jama poa ona nijje ba'a: —Miya ecuea epeeji nei quea pame nee nee, ecuea ehuohui jayojja jama aña.

Jamatii Eyacuiñajjija ejjashahuabaquijji quea pame nee ajjima poa ona nijje jiquio meshijo ba'yanijo. ⁴⁰ Jamajjeya Eyacuiñajjija oya cuana ishoa mee ca poa. E'e, Eyacuiñajji jjashahuabaquinaje ojjaña cuana quea boejea'yo epo mee'yojji; ojjaña yahuajo nei cuana ba'ya poa, eseya jjeya nei ba'e pea'ai quea boejea'yo epo mee'yojji. Jamajjeya ojjaña eseya ojee ba'e tiitiije'yo quea boejea Eyacuiñajji nijje eyajo, ojjaña tii.

**¡Eyacuiñajjija epeeji yahuajo ba'ya poa jayojja ba'ecue
Jesosaja epeeji nei!**

12 Jamajjeya ojjaña Eyacuiñajjija epeeji yahuajo ba'ya poaa jjeya nei ecuana huohui cani jama ba'a: —¡Bacue! Ecuana Eyacuiñajjija epeeji nei poa. ¡Ecuana jayojja pocue! —poani.

Ecuana Jesosaja epeeji dejja cuajicuaajiani jama. Mimishi ca ca aquiana quea biquie eba'o ba'e jayojja. Jamatii ecuaaya ca'a'amaa jjejojo mimishi acuajiaña. Ji-

quio ecua dejja aquiana abo po jjima cuajicuaajiani jayojja jama eseyaya mimishi ejjapajea neinei'yo Jesosaja epeeji nei epo'yoyji. Oya, Jesosa esejaya ecuaajicuaaji meesahuajji jayojja. Jamajjeya ojaya ejjashahuabaquijji jayojja jama ejja'a tiitii'yo. ² Jamajjeya ¡Jesosajo jjashahuabaquicue! Ohuaya yahuajo eseya onijje jjapeequi mee canaje. Jjeya ohuaya eseya onijje jjapee tiitii'yo meesahua cani. Jesosa jama jjashahuabaqui ajja ba'a: —Chojja de, eya acui ecueata'apeejo emano'yoyji pojjeama —jamaya po jjima poa.

Chojja. Jesosa jama poanaje ba'a: —E'e, ojjaña enijje quea mimishi nee nee poaje. Jamatii eya ecue Chiia huohui ca poa jayojja jama mano'yome poaje acui ecueata'apeejo. Jamajjeya quijje eya ecue Chii nijje anioqueje quea bihui nee ojaya esohui jayojja jama amajje —jamaya Jesosa poanaje.

Jamajjeya Jesosa mano'yo majje Eyacuiñajji pejejo anioquenaje ebianeí mijijje ojjaña huoojea'yoyji.

³ E'e, ¡jjashahuabaquicue Jesosajo! Yahuajo nei mimishi cuaa onijje quea quene nee nee po majje quea nee nee po mee canaje. Jamajjeya Jesosajo jjashahuabaquianijo miqianaya quea yeno epojji pojjeama onaa napa cajje. Onijje jjapeequi pajea'yo ajja poaje. ⁴ Yahuajo miqianaya ojee jjapeequianijo Jesosaja epeeji quea ja'a po'yonaje. Shajjama' po jjima. ¡Bacue! Jesosaa oja Chiija ehuhui jayojja ohua huohui cajo, mimishi cuaa quecua ca'ya poa. Miqianaya ca ca mimishi cuaa cuia'yo jjima Jesosa nijje jjapeequianijo.

⁵ ¡A'a pajea'yoyji Eyacuiñajji esohui etehue'yo! Ejeajjiya oja bacua cuana tecuea cani ejjashajja'ajjaquijji jayojja jama Eyacuiñajji ese nijje miminaje:

⁶ “Ecuea ebacua cuana, ¡eyaya miqianaya jjabahuejjaqui meeaña shajja'ajjacue mo! Eyaya miqianaya miquea mimishijo tecueaña ja'a quea yeno pojji! E'e, ojjaña joya ecuea quea jea nee nee eyaya jjabahuejjaqui meeaña. Ecuea ebacua cuana eyaya tecueaña mimishi'ama epojji”.

Jamaya Eyacuiñajjiya, esejaja Chii aiya eseya aca poa.

⁷ Jamajjeya Eyacuiñajjiya miqianaya jjabahuejjaqui mee canijo, ja'a quea yeno pojji! ¡Onijje mimicie jama ba'a: —Eyacuiñajji, miya ecue Chii ai. Miyaya eya quea nee po meeaña eya miquea esohuijo ejjabahuejjaqui meeji —jamaya onijje mimicie!

E'e, ¡iquio ecua seya esejaya ebacua cuana tecueaña jamaya Eyacuiñajjiya eseya acani. Eseja bacua cuana eseyaya tecueaña ejjabahuejjaquijji. ⁸ Ojjaña ejeajji cuaa oja bacua cuana niñeshe'a cani. Ejeajjiya oja bacua tecuea jjima acani shajjama' poanijo onaya mimije jama ba'a: —¡Dee! Oja bacua pojjeama pojja'a, jamajjeya mi jjabahuejjaqui mee cani. Jea jjima jama, de —acaje cuaa.

Oya jayojjaya Eyacuiñajjiya ojjaña ojaya ebacua cuana jjabahuejjaqui mee cani shajjama' epojji pojjeama. Ohuaya miqianaya jjabahuejjaqui mee jjima acani ca ca miqianaya oja bacua pojjeama, peaja bacua pojja'a.

⁹ E'e, ejeajji cuaa eseya niñeshe'a cani esho'yahua ejjashajja'ajjaquijji. Jamajjeya oya jayojjaya esejaya Chii

ai ejjashajja'ajja neinei'yo; ohuaya eseya ba'e tiitii mee cani. ¹⁰ Eyacuiñajjiya esejaja Chii aiya ca ca eseya tecuea cani quea ja'a nee eba'eji. Jjabahuejjaqui mee cani o jayojja quea pame nee nee, quea boejea'yo nee epo tiitii meeji. Eseyaya ejeajjiya ca ca ojaya ejjashahuabaquijji jayojja jama eseya tecuea ca poa esho'yahua.

¹¹ Jjeya Eyacuiñajjiya quea nee po mee cani ejjabahuejjaqui meeji eseya quea bihui pojjeama, quea yeno poani. Jamatii quijje jjabahuejja neinei'yo majje eseya quea jjashahuabaqui ja'a nee poaje, quea bei nee nee poaje.

¹² Jamajjeya ja'a quea yeno pojji jamatii quea camaja poanijo! ¡Quea ja'a nee oe jjapeequicue Eyacuiñajji nijje! ¹³ Jamajjeya ¡ejiojji epi jaji neijje poquiani jayojja jama pocue! ¡Quea ja'a nee jjapeequicue Jesosa nijje! ¡Pea cuana jjapee neinei'yo meesahuacue pea'ai Jesosa jayojja epojji!

¡Jesosa nijje a'a jjapee pajeaqui'yoyji!

¹⁴ Ecuea epeeji cuana, ¡quea bei ba'ecue ojjaña nijje! ¡Quea boejea'yo ba'ecue pea'ai! Quea boejea'yo ba'e'yo ajja aje oe Eyacuiñajji nijje eba'e tiitii'yoyji pojjeama. ¹⁵ ¡Ba neineicue! ¡Ojjaña Eyacuiñajji nijje jjapee neinei'yo meesahuacue onijje eba'e tiitii'yoyji! A'a jja oe jama pojji ba'a: Acui iña quea cuaja nee nee pejejo nequi majje mano'yo chana'. Oya jayojja dejja tecueya ojjaña o pejejo ba'e quea tecue po mee cani. Quea tecue po tiitiani, quea huiso quea quene po mee cani. Quea huiso quea mimishi po mee cani pea'ai. Jamajjeya ja'a quea tecue po majajji! Quea tecue po majjeya Eyacuiñajji pajea'yo chana'. ¹⁶ ¡A'a pea cojjoji pojji pea'ai! ¡A'a etiiquiana Esao bajjani jayojja jama pojji pea'ai! Ojaya, Esaoja, yahuajo nei Eyacuiñajji esohui boti'ama poa. Ojaya ejjashahuabaquijji jayojja jama poa jama ba'a: Oya cojjasobo poa. Jamajjeya oja chii mano'yajo, ojjaña ojaya aquiana equijjojea cajo Esaoja poaje'yo, cojjasoboja. Jamatii oja chahua huohui ca poa jama ba'a: —Cha, ¡che mo bobi quiacue! Quea shoe mo coma. Miya bobiaje soseje aje mi sosequiaje'yo; ma cacaa quijjojea cajo eyaya miya quiaje'yo; ecuea pojjeama poaje'yo, miquea poaje'yo —aca poa oja chahua Esaoja, jjashahuabaqui jjima jayojja poa.

¹⁷ Cojjasobojo Jodioja ejeajji cuana jama poaninaje ba'a: —Eyacuiñajji, ¡ecuea ecue bacua cojjasobo jaahuanacue, quea aquiana huiso po meecue! —poaninaje Jodio etiiquiana.

Jamajjeya quijje Esao oja chii nijje miminaje jama ba'a: —Ecue chii, ¡Eyacuiñajji nijje mimicie e jaahuanajji! —poa—. ¡Jama acue ba'a: “Eyacuiñajji, ¡ecuea ebacua cojjasobo Esao bajjani jaahuanacue!” acue! —jamaya Esaoja oja chii aca poa.

—Chojja, Esao. Yahuajo eya jamaya miminaje Eyacuiñajji nijje mique chahuajo, mijo pojjeama. Apoa —oja chiya jama saja'ameya aca poa.

Jamajjeya Esao cajaa aca poa cojjasobo jayojja jama epojji pojjeama.

Jamajjeya Esao pa neineinaje, quea yeno nee nee poanaje oya chiya aquiana mesena'yo sajo. Jamatii oja

chii ma ohua yahuajo esohui huohui ca poajo pajeapa-
jea'yo ajja poa pea esohui ehuohui o'oyajji. Eseyaya
eba Esaoja esohui oja chahua nijje, oja chiiya aquiiana
quia ca poa bobi sosejje. Jamajjeya oja chiiya oya cojja-
sobo jayojja pojjeama aca'ya poa.

¹⁸ Yahuajo nei nei pea'ai Eyacuiñajjiya eyiyo Sinai baj-
janijo nequiya esohui huohui ca poa; Jodio etiiquiiana
Moisesi nijje nequi quea mete nee nee poa. E'e, yahua-
jo Jodio cuana eyiyo huasijje poe majje Sinai eyiyojo
nequiñaquia poa. Eyiyo ba cañaquia poa jiji neinei-
qui. Quea bo moo eyiyo biajje nequia poa. Quea huichacha
moo, quea misi poa. Quea beni quemo pea'ai poa eyi-
yo biajje. Pojjeje baa siyoo pea'ai po nequia poa.

¹⁹ Taaa po neinei nequia poa, huaca she'ana quea que-
mo mia cani jayojja jama shajja'ajja ca poa Eyacuiñajji-
ya emimi. Ma shajja'ajja majje quea mete nee nee poa
etiiquiiana cuana Eyacuiñajjiyo. Jama taaame aca poa
ba'a: —¡Ecuana nijje a'a mimi o'oyajji! —taaa ca poa
cuana quea ajjajja nee nee jjejojo.

²⁰ “¡A'a eyiyo huasijje jaasohuajji!” Eyacuiñajjiya aca
poa. “¡A'a aquiiana ehuone' jaasohua meeji pea'ai!
¡Jaasohuajo ca jajahuejjajjeacue meiya!” Eyacuiñajjiya
aca poa.

²¹ Jamajjeya ojjaña tii quea mete nee nee poa. Ba
majje etiiquiiana Moisesi pea'ai quea ajjajja nee nee
poa: —Eya quea mete nee nee jjejojo piopioani —Moi-
sesi poa.

²² Jjeya ca ca yahuajo jama pojjeama. Miquianaya ca
ca Eyacuiñajjiya oja sohui ba mee canijo ¡a'a quea me-
te pojji! Miquianaya Eyacuiñajji ba'e yasijje poeyanaje.
Ma eba'ejji eyiyo Sioni bajjani jayojja, ma Jenosanena
eyacuajo nequi jayojja. Maya Eyacuiñajjiya cuiñajji eya-
cua eyajo. Jomajo Eyacuiñajji ba'e tiitiani, eshe. Ma
cuiñajjiyo Eyacuiñajjiya esohuidojojji ejjanequichicha-
qui; quea bihui nee nee, quea huiso nee nee nequi, de.
Sicosico meemee ajja, yajja sicome yajji quea huiso
nee nee oya aña. ²³ Jomajo Eyacuiñajjiya epeeji cuana
quea bihui nee nee Eyacuiñajji pejejo yani pea'ai ma
yahuajo nei nei onijje jjapeequia poa. Eyacuiñajjiya oja
bajjani cuana oja esohui etehue'yojo tehue ca poa eya-
jo. E'e, miquianaya Eyacuiñajji nijje jjapeequiani. Ohua-
ya ojjaña cuana meshijo ba'e sosequia caje ojjaña ma
onaa acanaje sosejje. Jomajo, eyajo Eyacuiñajjiya epee-
ji emano'yo cuanaja edojjoshahua cuana yani, ma
yahuajo mimishi cuijea ca'ya poa cuana. ²⁴ E'e, miquia-
naya Jesosa nijje jjapeequiani. Ohuaya ca ca oe eseya
esohui eyacua huohui canaje eba'e tiitii mee'yojji. Ese-
jo mano'yonaje pea'ai. Ojaya ena' cuayaquia poa ese-
jaya mimishi cuijea'yojji sosejje. Oya Jesosa Adanaja
bacua ejja Abeni bajjani jayojja jama pojjeama. Abenija
ena' cuayaquiajo oja o'i Eyacuiñajjiya tecuea neinei ca
poa echahua mese cuia ca'yajo.

²⁵ ¡Jamajjeya Eyacuiñajjiya esohui shajja'ajjacue! ¡A'a
shajjama' pojji! Yahuajo eyiyo Sinai pejejo Moisesiya
Eyacuiñajjiya esohui huohui majamaja ca poa etiiquia-
naja eshajja'ajjajji nisho. Jamatii aje oe shajjama' poa.
Jamajjeya Eyacuiñajjiya oya cuana quea nee po mee ca
poa. Jjeya Eyacuiñajjiya eyajo nequiya eseya huohui ca-

ni oja sohui eyacua, ma esejaya yahuajo shajja'ajja jji-
ma. Shajjama' poajo e'e jojo nei ohuaya eseya quea
nee nee po mee caje'yo, de. ²⁶ E'e, yahuajo nei Eyacui-
ñajjiya eyiyo Sinai biajje sohuihuohui ca poajo, meshi
huehuahuehua mee ca poa janobajjima nei. Jjeya oya
jama poanaje ba'a: “Eyaya e'e jojo nei meshi, eya-
tahuatahua pea'ai huehuahuehua meeje'yo janobajji-
ma nei nei” jamaya Eyacuiñajji poanaje.

²⁷ Jamajjeya Eyacuiñajjiya jama acajo ba'a: “Meshi,
eyatahuatahua pea'ai huehuahuehua meeje'yo” acajo,
esejaya eba ohuaya ojjaña oja pana huehuahuehua
mee'yo majje chama'yo tii poaje'yo ojjaña aquiiana
yahuajo oja pana'yo. Ojjaña aquiiana eyacua
ehuehuahuehua'yojji pojjeama anije'yo tii tii.

²⁸ Eyacuiñajji ojjaña huoojea'yojji poani tii tii. Chama'
o jeabichajja'yojji epojji. Ese huoojea'yojji poani tii tii
oya. Jamajjeya Eyacuiñajji ejjabihuiaqui jama ba'a: —Ja-
maya Eyacuiñajji, miya quea pame nee nee poani tii.
Miya ecua huoojea'yojji quea ca'a nee nee.

E'e, ¡Eyacuiñajjiya esohui jayojja jama eba'e tii tii!
¡Oya ejjashajja'ajja tiitiqui! ¡Quea mete epo tii tii; shaj-
jama' pojjeama epo! ²⁹ ¡Ojo ejjashahuabaqui! Jiquio
ecua cuaquijo quiyo jeajea jeyojeyo yani jayojja jama
Eyacuiñajjiya shajjama' cuana quea nee nee po mee
caje'yo, de.

**¡Jesosaja epeeji poanijo ba'ecue quea pame Eyacui-
ñajjiya quea boti nee e'ajji!**

13 Ecuea epeeji cuana, ¡pea cuana Jesosaja epeeji
pea'ai poanijo quea jea nee nee atiitiec huapa
pojjeama jama! ² ¡Pea cuana miquianajaya ba jjima
quea jea acue! ¡Equi yasijje poeyajo quea pame nee
acue pea'ai! ¡Miquianajaya equi yasijje iyaacue! Yahua-
jo beca cuana jama poanijo esohuidojojji jaahuana ca
poa, jamatii oya ojaya cuana ba jjima esohuidojojji
poa. Jjashahuabaquia poa jama ba'a: —E'e, jiquio dejja
cuana ecuea ba jjima eyaya bobiaje —esohuidojojji
pojjeama poso aca poa.

³ ¡Cuanaya baquicue Jesosaja epeeji joya ejeanobia-
jea jaa cuana! ¡A'a oya cuana pajea'yojji! ¡Jjashahuaba-
quicue jama ba'a: —Eya ona jayojja jama ejeanobiajea
jaa jjemo quea shoe, quea yeno pome. Jamajjeya eya-
ya oya cuana baquije, bobi quiaje, onijje jjapeequije
—pocue!

¡A'a pajea'yojji Jesosaja epeeji quea nee poani onaa
napa cajo pea'ai! ¡Jjashahuabaquicue jama ba'a:
—Onaa napa cajje eya quea nee pome, eya quea yeno
pome. Jamajjeya eyaya oya cuana baquije quea bihui
epojji. Ona nijje jjapeequije. Eyacuiñajji nijje mimije
onajo pea'ai —pocue! ¡Jamajjeya oya cuana baquicue,
ona nijje jjapeequicue!

⁴ Jjashahuabaquicue jama ba'a: ¡A'a jjacojjoquijji!
Yahueya, ¡miquia ehuanae oe nei jaahuanacue! ¡Onij-
je tii jacue! Ojjañaja eba jamaya quea pame nee. Ja-
majjeya ¡a'a quea mimishi pojji! ¡A'a pea cojjojji pojji
yahue, ehuanae pea'ai! Jama poajoya Eyacuiñajjiya
e'e jojo nei miquianaya tecuea neinei majje quea nee
nee po mee caje'yo.

⁵ ¡A'a quea aquiana jea pojji! Eyacuiñajjiya eseya jama acanaje ba'a: "Eyaya miya epajea'yojji pojjeama nei nei. Eyaya miya ejeana'yojji pojjeama" poanaje.

⁶ Jamajjeya miquea aquiana eba'e meeji yanijo ¡quea bei pocue! Esohui yahuajo etehue'yo jayojja jama mimicue jama ba'a:

"Eyacuiñajjiya, Emeshi Mese neiya eya jaahuana cani tii tii. Jamajjeya eya mete'ama poani. Dejja mimishi cuaa eya ejeabichajea'yojji pojjeama. Eyacuiñajjiya eya ejaahuana pajea'yojji pojjeama".

¡Jamaya mimi majamacue!

¡Jjapee tiitiuicue Jesosa nijje!

⁷ ¡A'a pajea'yojji Eyacuiñajjiya esohui huohuijji, yahuajo miqiana sohui huohuijji poa! ¡Jjashahuabaquicue oya cuana quea ja'a nee ba'enaje Jesosa nijje jjapeequianijo! Mano'ya poa Jesusaja epeeji nei. ¡O jayojjaya Jesosa nijje jjapee neineiucue! ⁸ E'e, Jesosa Quito oja sohui jayojja jama poani, pajea'yo ajja tii tii. Ojaya ejjashahuabaquijji yahuajo nei jayojjaya nei acani tii. Quijje nei jamaya atiitii caje'yo pea'ai. ⁹ Jamajjeya ¡peapea ehuohui'yo Jesusaja esohui e'e nei jayojja jama pojjeama a'a shajja'ajjajji! Pea ehuohui'yo shajja'ajja majje o jayojja mimishi mi po'yo chana'. Eyacuiñajjiya eseya quea jea nee nee acanijo esohui e'e nei ba meesahua cani Jesusaja epeeji quea ca'a nee epojji. Pea cuaa ca ca shajja'ajjacani esohui quea quehua bobijo jama ba'a: —¡Beca bobi a'a ¡ijjajji Jesusaja epeeji nei epojji! —acani Jodio etii cuaa.

Ma esohui shajja'ajja cani cuaa eshajja'ajjajjeajji, de. Bobijo pojjeama Jesusaja epeeji nei poaje; ojaya esohui ba neinei majje.

¹⁰ Ecuea epeeji cuana, yahuajo nei nei Jodio etiiquianaja Eyacuiñajji nijje emimijji cuaa, ma Eyacuiñajjiya daqui equijo chacochoaninajeya aquiana ehuone' dahua majje ¡jija ca poa. Jamatii Eyacuiñajjiya esohui eyacua ba mee jjima poa. Eyacuiñajjiya esohui eyacua bobi jayojja. Ojaya epeeji poanijo, ohuaya eseya oja esohui jayojja jama po mee cani, ma esohui bobi e'ijjajji jayojja ba meesahua cani.

¹¹ Yahuajo nei Eyacuiñajji nijje emimijji etiiya aquiana na' dojobiaqui caninaje Eyacuiñajjiya equi yasijje, equecuayijji biso nei yasijje. Ojjaña shequiajajo oe dojobiaquime acaninaje ¡ijjiacajji ehuone na'. Dojobiaqui majje jeasijjea caninaje Eyacuiñajjiya ebajji. Jeasijjea caninaje Eyacuiñajjiya etiiquianaja mimishi ecuijea'yojji sosejje. Ma aquiana etiiquianaja ¡jija jjima poa. Chojja. Dojocuyaqui caninaje cuiñajji esecue yasijje edahuajea'yojji. ¹² Oya jayojja Jesosa mano'yajo ojaya ena' cuayaquia poa esejaya mimishi cuijea'yojji sosejje, mimishi'ama nei nei epo mee'yojji. Dejja mimishi cuaa oya dojocuyaqui ca poa cuiñajji esecue yasijje equecua'yojji. ¹³ E'e, dejja mimishi cuaa oya quea tai aca poa. Jamatii Jesosa jjashahuabaqui jjima jama ba'a: —Chojja, eya acui ecueata'apeejo mano sa po'yo ajja —jama po jjimaya Jesosa. Jama poanaje ba'a: —Eya manoje'yo acui ecueata'apeejo mimishi sosequia'yojji —Jesosa poanaje.

Jamajjeya Jesosa jayojja jama epo tiitiijji. Jesosa nijje jjapeequianijo, mimishi cuaa eseya quea tai acajje jamatii Jesosa nijje ejjapee tiitiiqui. ¹⁴ Eseyaya eba ¡jiquio meshijo eba'e tiitiijji pojjeama. Meshi esejaya eba'e tiijji yajji pojjeama. Quijje ca ca eseya ba'e tiitiije'yo eba'ejji eyacuajo Jesosa nijje. Ma eba'ejji eyacuajo eseya jjashahuabaquiani. ¹⁵ Jamajjeya Jesusaja epeeji poanijo ¡Eyacuiñajji ejjabihua tiitiiqui! Jama ba'a: —Eyacuiñajji, miya quea pame nee nee. Pea chama' mi jayojja —ejja'a tiitiiqui.

Jesosa Eyacuiñajji nijje mimiani ese cuanajo. Jamajjeya eseyaya oya bihuiaña jama ba'a: —Jesosa, miya ecuanaja Emeshi Mese nei quea pame nee —oya bihuiaña.

¹⁶ ¡Pea cuana quea pame nee atiitiucue pea'ai! ¡Nishehui'ama pocue, dejja tai'ama pocue! ¡A'a pajea'yojji! Jamaya poanijo Eyacuiñajji quea bihui nee poaje miqiana nijje.

¹⁷ ¡Jesusaja epeeji jaahuanajji cuanaja esohui jayojja jama acue! ¡Shajja'ajjacue, miqianaaya! Quijje Eyacuiñajji cojja nei nequiya emeshi meseya, mi jaahuanajjiya huohui caje achajja miqianaya jaahuana canaje. Jamajjeya miqianaya jaahuana cani quea pame nee, Jesosa nijje ejjapee pajeaqui'yojji pojjeama. Miquiaa shajja'ajjajje ohuaya miya quea bihui nee ba'e meesahua caje'yo. Shajjama' poajo ca ca quea yeno nee poaje. Miquianaya quea yeno nee nee poaje pea'ai.

¹⁸ Epeeji cuana, ¡Eyacuiñajji nijje mimicue ecuanajo! Eyacuiñajjiya eba ecua quea ja'a nee ba'e sa poani tii tii ojo. Ecuanaya jjabaquiani quea ja'a nee ba'yani ojaya esohui jama. ¹⁹ Jamajjeya ¡ecuanajo mimicue Eyacuiñajji nijje jama ba'a: —Eyacuiñajji, ¡Pabo poe meesahua o'oyacue ecua baa! ¡Jjeya nei oe poe meesahuacue! —acue!

Esohui quijjejeje nei tehue'yo

²⁰ Ecuea epeeji cuana, esejaya Emeshi Mese nei Jesosa oja epeeji cuana jaahuanajji poani, ñajjajja jaahuanajji nei nei jayojja oya poani. Mano'yajo, Eyacuiñajjiya Jesosa shequi mee ca o'oyanaje. Jamajjeya Jesosa shequi mee'yo majje Eyacuiñajji jama poanaje ba'a: —Ecuea Ebacua Eja miqianajo mano'yonajejo, ojaya ena' cuayaquinajejo, ¡jjea ecuea esohui eyacua jayojja jama atiitiucue! Jamajjeya miqianaya ba'e tiiti meeje'yo enijje eyajo —Eyacuiñajji poanaje.

²¹ Miquianajo eya Eyacuiñajji nijje mimiani jama ba'a: —Eyacuiñajji, ¡miqua epeeji cuana ejjaba'echejjequi ba'eca cuana quea bei ba'e meesahuacue! ¡Chaco meesahuacue mijo quea pame nee nee! ¡Miqua ejjashahuabaquijji jayojja jama ameesahuacue pea'ai! Miqua Ebacua Eja Jesosa Quito nijje jjapeequianijo, ¡jamaya ameesahuacue Jesosa quea bihui nee epojji! ¡Oya quea ca'a nee nee quea pame nee caba'e tiiti'iyahua! Jamaya Eyacuiñajji —eya poani.

²² Ecuea epeeji cuana, eyaya ¡jiquio esohui tehueña miqiana quea bihui pojji. Eyaya oe pojji esohui tehueña. Jamajjeya ¡ecuea esohui shajja'ajja neineiucue quea bihui nee! ²³ Eseyaya epeeji Timoteo ejeano-

bia jaa poa. Cuayaqui mee ca'yonaje. Quijje pishana oya e que poe'yo majje enijje poquije miquiana baa.

²⁴Jamajjeya epeeji cuana, miquianajaya esohui huohuijji cuana ojjaña Eyacuiñajjija epeeji cuana miquiana nijje ba'e pea'ai ;ecuanaja esohui huohuicue jama ba'a: —¿Achajja acuae nequiana ani so'o? —acue ecuanaja ebajji!

Ojjaña Eyacuiñajjija epeeji cuana Itania meshijje poe miquianajo jjashahuabaquiani: —¿Achajja ami ani so'o? —huohui'ajjame acani ojaya ebajji.

²⁵¡Eyacuiñajjiya, esejaya Chii aiya miquianaya ca-jaahuana cahua quea pame nee!

Mahuiso ecuea esohui. Eyaya Pabo bajjaniya esohui tehuejeyonaje. Apoa.

SANTIACO

Satiacohua esohui quea bihui nee tehue canaje Jesosaja epeeji cuana huasijje

1 Epeeji cuana, eyaya jiquio esohui quea bihui nee tehueaña miquianajaya ebajji, ma ojjaña Jesusaja epeeji cuana ojjaña meshijo ba'eja ebajji. Eya Satiaco bajjani. Eyacuiñajjiya, esejaya Emeshi Mese nei Jesosa Quitohua pea'aiya eya huoojea canaje ojaya esohui huohuiya. Jamajjeya eyaya quea bihui nee chacoaña onijje.

Eyacuiñajjiya Jesusaja epeeji cuana jjabahuejja meequi cani

² Ecuea epeeji cuana, ¡shajja'ajjacue mo! Miquianajaya eba'ejji quea camaja poanijo, jamatii ja'a quea yeno pojji! Chojja, quea bihui nee pocue jama ba'a: —E'e, Eyacuiñajjiya quea pame nee acani. Ohuaya eya jjashahuabaqui mee cani.

³ E'e, miquianajaya eba jama ba'a: Eba'ejji quea camaja poanijo Eyacuiñajjiya eseya jjashahuabaqui mee cani Jesosa Quito nijje quea pame nee ejjapeequijji. Jamajjeya miquianajaya yeno'ama Jesosa nijje jjapee tiitiquije'yo quea ja'a nee nee. ⁴ ¡Jesusaja epeeji quea ja'a nee po tiitiecue! ¡E'e jojo nei pocue! Jamajjeya Jesusajo jjashahuabaqui tiitiquianijo Eyacuiñajjiya miquianajaya quea ja'a nee ba'e mee caje mimishi'ama, apoa epo jayojja pea'ai.

⁵ E'e pojja'a miquianajaya ba jjima Eyacuiñajjiyo eba'ejji. Jamajjeya ¡Eyacuiñajji nijje mimiecue ojaya ejjashahuabaqui'yojji ebajji! Ojaya miya etecueajji pojjeama. Miya quea jjashahuabaqui ja'a po mee caje, o jayojjaya. Joya ecua miyaya huohui'ajjaña jama saja'ameya aje mi acaje'yo quea bihui nee nee ojjaña cuana ojaya quea jea nee neejo. ⁶ Jamatii Eyacuiñajji nijje mimianijo ¡jjashahuabaquicue quea pame nee! Jama ba'a: —Jiquio ecua eya onijje mimiani jamaya acaje'yo e'e jojo nei Eyacuiñajjiya.

A'a jjashahuabaqui taiquijji jama ba'a: —E'e pojja'a jiquio ecua eya onijje miminaje jamaya Eyacuiñajjiya e'ajji pojjeama.

¡Bacue! Joya quea jjashahuabaqui tai poani enashajo poani jama. Jiquio ecua beniya enashajo dojo cani oe miji yasijje, quijje pea miji yasijje dojo ca o'oyani jamaya oya cuana Jesusajo quea ja'a jjashahuabaqui jjima. Peapea jjashahuabaquime oya cuana poani. ⁷ Jamaya jjashahuabaquianijo quea tai; Eyacuiñajjiya oya cuana shajja'ajja jjima jayojja jama acaje. Jamajjeya jamaya jjashahuabaquianijo ja'a jama pojji ba'a: —Eyacuiñajji-

ya ma e onijje miminaje shajja'ajja cani. Eya ba'e meesahua caje pea'ai —a'a jamaya e'a caje poso jjabaquijji! Eyacuiñajjiya eshajja'ajjajji pojjeama miya. ⁸ E'e, Jesusajo quea quehua jjashahuabaqui majje quea pame eba'ejji pojjeama tii tii.

Aema' cuana joya ecua quea aquiana huiso jama

⁹ Jesusaja epeeji aema' cuana, dejja etii pojjeama pea'ai quea bihui nee capoahua Eyacuiñajjiya oja mimishi cuana cuijea ca'yonajejo. Oya ba cani epeeji quea aquiana huiso jayojja, oya jayojjaya ba cani. ¹⁰ Jesusaja epeeji quea aquiana huiso quea bihui nee capoahua pea'ai, jamatii ojaya aquiana cuana chama'poajo. Joya quea aquiana huiso shasha jama. Nequi tiitii ajja. Chama'yo tii poaje'yo. ¹¹ E'e, jiquio ecua eshequi jaasohuajo quea quiyo nee nee poajo sipone joca'yani, yaa'yo majje ojaya shasha jjahua'amaqui yani, majoya aje huojojjeani jama jayojjaya joya aquiana huisohuiso cuana poani. Aquiana cuana chicha majamaja cani tii oya cuana manaje'yo, chama'yo tii poaje'yo. Jamajjeya ojjaña Jesusaja epeeji cuana quea bihui nee capoahua Eyacuiñajjiya oya ba cani pea cuana jayojjaya. E'e, aema' cuana Eyacuiñajjiya ba cani pea cuana jayojjaya, joya quea aquiana huiso nee jayojjaya. Joya quea aquiana huiso ca ca ohuaya ba cani aema' jayojjaya.

Eba'ejji quea camaja

¹² Jesusaja epeeji quea pame nee eshahuaa iyaa caje jjashajja'ajjaqui ajja poaje; quea mimishi po sa po'yo ajja poaje. Ohuaya Eyacuiñajjiya esohui jayojja jama atiitii cani. Jamajjeya joya cuana quea bihui nee nee capoahua! E'e, Eyacuiñajjiya huohui ca poa jama ba'a: —Eya ojaya quea jea nee nee poanijo, ecuea epeeji cuana ecuea esohui pajea'yo ajjajo eyaya oya cuana ba'e tiitii meeje'yo enijje eyajo.

¹³ Mimishi amajje, quea tai jjashahuabaqui majje pea'ai beca cuana sijje poani jama ba'a: —Eyacuiñajjiya eya quea mimishi po mee cani —jama ohua acani posoya jjabaquiani.

Chojja, de. Ma miyame tii ca mi ca quea mimishi. Eyacuiñajjiya ca ca mimishi a'ajja nei nei. Jamajjeya ohuaya eseya quea mimishi epo meeji pojjeama nei nei. ¹⁴ Ojjaña aje oe quea mimishi po sa poanijo quea mimishi poani ojaya ejjashahuabaqui'yojji. Joya ecua oya jjashahuabaquiani jama quea mimishi po meeya poani. ¹⁵ Jamajjeya quea mimishi jjashahuabaqui majje mimishi acaje'yo. Mimishi amajje manaje'yo. Majoya

Eyacuiñajjiya mimishi cuana quea nee nee po mee caje'yo tii tii quea mimishi poanaje jojoya.

¹⁶ Ecuea epeeji cuana, ¡shajja'ajjacue mo oe! ¡A'a quea quehua jjashahuabaquijji Eyacuiñajji! Ohuaya ca ca oe eseya quea ja'a nee po meesahua cani.

¹⁷ Ohuaya, eseya Chii aiya yahuajo nei nei ojjaña aquiana eyajo nequi pana ca poa: eshequi, ba'i, majameta cuana pea'ai pana ca poa. Oya cuana quijje quea misi poaje'yo. Eyacuiñajji ca ca oe, chojja. Jiquio ecua oya jjeya nei nequi jama tii tiya nequi tiitii poquije. Ohuaya eseya quea pame nee nee acani. Jamajjeya ohuaya eseya ojjaña aquiana pame quia cani e'e jojo nei.

¹⁸ E'e, Eyacuiñajjiya ojjaña eseya babaca canaje ojaya epeeji nei epojji. Ohuaya esohui e'e nei huoojea canaje esejaya ebajji. Jamajjeya eseya Jesosa nijje jjapeequi meesahua cani. Eseya ca ca ojaya quea boti nee nee poani; pea aquiana cuana oja pana ojaya iye botiboti poani.

¡Eyacuiñajjiya esohui shajja'ajjacue e'e jojo nei!

¹⁹ Ecuea epeeji cuana, ¡shajja'ajjacue mo oe! ¡Ojjaña pojajajo Eyacuiñajjiya esohuijo jjashajja'ajjaquicue! ¡Mimi jjimahuajo quea ja'a nee jjashahuabaquicue pea'ai! ¡A'a quea quene pojji; pea cuana nijje a'a quenequene cuajjiji! ²⁰ Quea quene poanijo Eyacuiñajjiya ejjashahuabaquijji quea ja'a nee jayojja jama yajji pojjeama. ²¹ Jamajjeya ja'a quea quene pojji! ¡Ojjaña ejjashahuabaquijji quea tai epojji, quea mimishi pajea'yocue! ¡A'a pea cuana jama ba'eji! Eyacuiñajjiya eseya ojaya esohui ba meesahua cani. ¡Ojaya esohui shajja'ajjacue; jamaya ba'ecue quea bihui nee! Jamajjeya ohuaya eseya ba'e tiitii mee caje'yo onijje eyajo. ²² Eyacuiñajjiya esohui shajja'ajja majje jamaya po ajjajo miqianaya quea tai jjashahuabaquiani, quea quehua poani. ¡Eyacuiñajjiya esohui shajja'ajja majje ca oe shajja'ajja tiitii-cueya!

²³ E'e, beca cuana Eyacuiñajjiya esohui shajja'ajja majje jamatii jjashajja'ajjaqui ajja poani. Jiquio ecua se ecojjabajjiyo jjacojjabaquiani jama poani: ²⁴ Eseya ecojja ba majje poquiani. Quijje pishana seya ecojja pajeacuaji yaña: —¿Achajja shai ecuea ecojja poanaje? —se poani.

E'e, ecojja ba majje pajeacuaji yaña jama jayojjaya beca cuana poani. Eyacuiñajjiya esohui quea pame nee shajja'ajja cani. Jamatii shajja'ajja majje pajeacuaji ca'yani. Esohui jayojja jama ba'e ajja. ²⁵ Pea cuana ca ca esohui shajja'ajja majje jjashahuaba neinei-quiani. Pajeapajea'yo ajja poani. Jamajjeya ojjaña pojajajo esohui ba neinei cani; pajeapajea'yo ajjajo ma esohui jayojja jama po tiitiani. Eyacuiñajjiya oya cuana mimishi pajea meesahua ca'yani. Quea ja'a nee nee ba'e meesahua cani, quea bihui nee po mee cani pea'ai joya ojaya esohui jayojja jama ba'yanijo. ²⁶ Beca cuana aje oe jjashahuabaquiani jama ba'a: —Eya Jesosa Quitoja epeeji poani —jama posoya jjabaquiani. Jamatii quea mimishi, quea mimijjequijjea mimi tiitianijo oya cuana Jesosa Quitoja epeeji pojjeama. Chojja, epeeji nisho poani.

²⁷ Eyacuiñajji esejaya Chii ai jama poanaje ba'a: —¡Ecuea epeeji e'e nei cuaa e'e jojo nei enijje jjapeequianiya quea pame nee ca'a cahua! Jama ba'a: ¡Esho'i echii mano'yo catii mee cahua quea pame nee! ¡Epona e'ahuemano quea yeno poani caba'e meesahua cahua quea pame nee pea'ai! ¡Eshahuaja epeeji quea mimishi jayojja jama a'a pojji! —acanjaje eseya Chii aiya.

¡Ojjaña cuana quea boti nee acue!

² Ecuea epeeji cuana, ¡shajja'ajjacue mo oe! Esajja Emeshi Mese nei Jesosa Quito quea pame nee nee poani, quea ca'a nee nee poani pea'ai. Miqianaya onijje jjapeequianijo, jamaya pocue ba'a: ¡Ojjaña Jesosaja epeeji cuana pea jayojjaya acue! Jamajjeya ¡quea pame jjashahuabaquicue ojjañajo, aquianajjiyo, aquianama' cuanajo pea'ai! ² Jama ba'a: E'e pojja'a Jesosaja epeeji aquianajji Eyacuiñajjiya equi yasijje dobi-quiani. Ojaya eme' bajji mei huo'o quea nahue, ojaya daqui quea nahue ehusho ba'e pea'ai miqianaya baña. Majoya pea epeeji aema', daqui chiiiji Eyacuiñajjiya equi yasijje dobi-quiani. ³ Miqianaya quea mimishi jjashahuabaquiani. Jamajjeya joya quea aquiana huiso nee quea boti aña jama ba'a: —Ma'aje, jiquio e'anioqueji quea pame nee. ¡Jiquiojo anioquecuel! —aña.

Aema' nijje ca ca miqianaya jama poani ba'a: —¡Comajo tii ca miña nequicue! ¡Quea huesha anioquecuel pojja'a! —jamaya miquiaa ajje aema' cuana quea bicho poani. Jamaya quea tai.

⁴ Miqianaya peaja aquianajo jjashahuabaquiani; jjanibequiani jama ba'a: —Joya quea aquiana huiso quea pame poani. Aema' ca ca quea tai, cajaa —jamaya miqianaya quea tai jjashahuabaquiani.

⁵ Ecuea epeeji cuana, ¡shajja'ajjacue mo oe! Eyacuiñajjiya Jesosaja epeeji cuana aema' cuana babaca canaje Jesosaja epeeji nei cuana epojji. Ohuaya huohui canaje jama ba'a: —Ojjaña joya ecuea esohui jayojja jama acani enijje nequi meeje eya ojjaña huoojajji poaje —jamaya Eyacuiñajjiya huohui ca poa ojjaña joya Jesosa quea boti nee ajji poani.

⁶ Jamatii miquiaaya aje oe aema' cuana quea bicho po meeña. ¿Ache dejja cuaa shai sohuinano huoojea cani mi dojhua emeshi meseja etecueajji? ¿A'a aema' cuaa? Chojja. Bejjojjiya ca mi ca miqianaya napa mee cani. ⁷ Ohuaya Jesosa Quito niñeba cani pea'ai. E'e, oya Jesosa Quito quea pame nee nee Eyacuiñajjiya huoojea canaje ese jaahuanaa. Jamatii mimishi cuaa oya niñeba cani.

⁸ ¡Miqianaaya Eyacuiñajjiya esohui jayojja jama acue! Yahuajo ohuaya huohui ca poa jama ba'a: —Miyaya quea bihui nee ba'e sa poani. Jamajjeya ¡pea cuana quea bihui nee ba'e meesahuacue quea pame nee pea'ai! Jamajjeya ¡ojjaña cuana quea boti nee acue!

Jamaya e'e jojo nei añajo miqianaya quea pame nee poani. ⁹ Jamatii miqianaaya aje oe dejja quea aquiana huiso nee cuana quea jea aña. Aema' cuana ca ca quea bicho po meeña. Jamaya quea mimishi, Eyacuiñajjiya esohui jayojja jama pojjeama. Jamajjeya ohuaya miqianaya tecuea caje'yo ojaya esohui jayojja

mi añajo, ma etiquiana Moisesiya tehue ca poa jayojja jama miya mi ajo. ¹⁰ Moisesiya etehue'yo quea huiso nee poa. Ojaya esohui etehue'yo oe nei ajjimajo miya shajjama' poani, ojjaña ojaya esohui etehue'yo ajjima amajje. ¹¹ E'e, Eyacuiñajjiya Moisesi tehue mee ca poa jama ba'a: "¡A'a pea cojjojji pojji!" Ohuaya tehue mee ca poa jama pea'ai ba'a: "¡A'a pea quecua'yojji!" Jamajjeya joya pea quecua'yojji poani quea tai nee nee poani, jamatii pea cojjojji pojjeama poani. Eyacuiñajjiya esohui etehue'yo pajea ca'yani.

¹² Jamatii Jesusaja esohui jayojja jama añajo ca ca eseya mimishi'ama poani. Ma esohui jayojja jama añajo Eyacuiñajjiya eseya etecueajji pojjeama. Jamajjeya Jesusaja esohui jayojja jama atitiicue quea pame nee! ¹³ Quijje Eyacuiñajjiya ojjaña cuana sosequia caje'yo ma ecua oya jiquio meshijo ba'enaje jama sosequia'yomeya acaje'yo. Ojjaña joya pea cuana nijje quea bei poanaje Eyacuiñajji onijje quea bei poaje pea'ai. Joya pea cuana nijje quea bei pojjeama poanaje ca ca Eyacuiñajjiya tecuea caje'yo. Jamatii Eyacuiñajji quea mase pojjeama. Ohuaya ojjaña mimishi cuana pajea mee'yo sa acani, quea nee nee ese po mee sa po'yo ajja.

¡Jesusaja epeeji cuana quea pame caba'e ca'yahual!

¹⁴ Ecuea epeeji cuana, ¡shajja'ajjacue mo oe! Beca cuana jama poani ba'a: —Eya quea pame nee nee, eya Jesusaja esohui jayojja jama poani —poso jjabaquiani.

Jamatii oya cuana Jesusaja epeeji pojjeama jayojja jama ba'yani, quea pame pojjeama. Jamajjeya ¿a'a Eyacuiñajjiya ojaya mimishi cuijea caje'yo? ¿A'a onijje ba'e tiitii mee caje'yo eyajo? Chojja de, ¡quea pame ca'a cahua pea'ai! Quea pame pojjeama ba'yanijo ca se ca oe emimijajji eseya mimijeani jama ba'a: —Eya Jesusaja epeeji poani.

¹⁵ Jamajjeya jama jjashahuabaquime pocue ba'a: Yani pojja'a Jesusaja epeeji cuana beshahua nei daquima', quea shoe pea'ai pojja'a. ¹⁶ Joya aema' cuana pojja'a miquianaaya huohuiaña jama ba'a: —¡Quea bihui nee pocue! ¡Huoe'ama, quea jejje pocue! —jamaya pojja'a miquianaaya oya aña. Jamatii quea dejja taiya jjejojo miyaya bobi, daqui pea'ai mi quiaña. Jamaya po ajjajo ehuhuijajji miquianaaya aema' huohuiaña jama ba'a: —¡Quea bihui, quea jejje pocue; huoe'ama pocue pea'ai!

¹⁷ Oya jayojjaya beca cuana poani: —Eya Jesusaja epeeji poani.

Jamatii Jesusaja esohui jayojja jama mi acanijo oya Jesusaja epeeji nei pojjeama.

¹⁸ Onaya jjamimicuijaja nobiajeaquiani jama ba'a: —Eya Jesusaja epeeji. Eyacuiñajjiya esohui ecuea eba. Pea ca ca jama poani ba'a: —Eyaya Eyacuiñajjiya esohui jayojja jama atitiiaña.

Eyaya ca ca huohuiaña jama ba'a: —Eyacuiñajjiya esohui jayojja jama a'ajjajo eyaya miquianaya baña Jesusaja epeeji pojjeama. Quea pame nee nee Eyacuiñajjiya esohui jayojja jama añajo ca ca ojjañaja eba eseya Jesusaja epeeji nei poani —jamaya eyaya aña.

¹⁹ Miquianajaya eba Eyacuiñajji oe nei yani tii tii. Jamaya quea pame nee, e'e jojo nei poani. Jamaya eshahua cuanaja eba pea'ai, ma Eyacuiñajji oe nei yani tii tii. Jamajjeya oya cuana quea mete tii tii poani, Eyacuiñajjiya oya cuana quea nee nee po mee caje'yo.

²⁰ Miquianaya jjashahuabaquiani quea quehua jama ba'a: —Eya Jesusaja epeeji poani.

Jamatii Jesusaja esohui quea pame jayojja jama a'ajja. Jamaya quea tai ba'yanijo miya Jesusaja epeeji pojjeama. Jamajjeya miquianajaya ejjashahuabaquijji eyaya jiquio esohui tehueña esejaya etiquiana Amajamajo. ²¹ Yahujajo nei nei esejaya etiquiana Amajamaa Eyacuiñajjiya esohui jayojja jama aca poa. Jamajjeya Eyacuiñajjiya oja mimishi cuana cuijea ca'ya poa. E'e, Amajamaa ojaya esohui a'a shajja'ajja caje ebajji Eyacuiñajjiya oya huohui ca poa jama ba'a: "Amajama, ¡miquiea ebacua mei e'ya biajje jeyo majje yacuajecue, eya quiacue!" Amajamaa Eyacuiñajji shajja'ajja ca poa. Oja bacua ejja oe nei mei biajje jeyo majje Eyacuiñajji yasijje quia ca poa. Beshahua nei yacua ca'ya poa. Jamaya ojaya esohui ma ecua Eyacuiñajjiya huohui canaje jayojjaya Amajamaa aca poajo, Eyacuiñajjiya oya jama aca poa ba'a: "Amajama, miyaya ecuea esohui shajja'ajjañajo ecuea eba miya ecuea epeeji nei. Eyaya miquea mimishi cuana cuijeaje'yo". Jamaya Eyacuiñajjiya aca poa.

²² ¿A'a miquianaya jjashahuabaquinaje Amajama Eyacuiñajjiya epeeji e'e jojo nei? E'e. Ohuaya huohui ca poa jama ba'a: —Eya Eyacuiñajjiya epeeji —aca poa.

Majoya ohuaya Eyacuiñajji shajja'ajja ca poa; Eyacuiñajjiya esohui jayojja jama aca poa. Jamajjeya oya e'e jojo nei Eyacuiñajjiya epeeji quea pame nee nee poa.

²³ Jamajjeya Eyacuiñajjiya esohui yahujajo nei jama poa ba'a: —Amajamaa huohui ca poa jama ba'a: "Eya Eyacuiñajjiya epeeji" aca poa Amajamaa. Majoya ohuaya Eyacuiñajjiya esohui jayojja jama aca poa pea'ai. Jamajjeya Eyacuiñajji Amajama nijje jama poa ba'a: "Miyaya ecuea epeeji e'e jojo nei. Jamajjeya eyaya miquea mimishi cuana cuijeaje'yo" —jamaya Eyacuiñajji poanaje.

²⁴ Jamajjeya eseya Eyacuiñajji nijje mimianijo, ojaya esohui jama añajo pea'ai, Eyacuiñajjiya esejaya mimishi cuana cuijea ca'yani. Jamaya eyaya miquianaya ba mee yaña.

²⁵ Oya jayojjaya yahujajo nei nei Shajami poa, Amajama jayojjaya poa. E'e, yahujajo nei nei oe epona Shajami yaña poa. Shajami Jodio pojjeama poa. Oya quea mimishi pea cojjojji nei nei poa. Jamatii ohuaya Eyacuiñajjiya epeeji quea pame nee aca poa. Nahue ca poa sohuinano cuaa equecuaca'yo poanijje. Jamajjeya Eyacuiñajjiya oja mimishi cuana cuijea ca'ya poa. E'e, Shajamiya Eyacuiñajjiya epeeji becanelijji pea'ai quehuajje bobia ca poa, Jodio cuanaja esohui huohuijji cuana. Majoya oya cuana quehuajje poqui meesahua ca poa pea ejjojijje, onaa equecuaca ca poaje jjejojya. E'e, Shajamiya ejjashahuabaquijji Eyacuiñajjiyo quea pame nee poa.

²⁶ Jamajjeya esejaya eba jama ba'a: Eseyaya edojjoshahua poqui'yo majje esejaya eyami ihuije'yo, cajaa.

Oya jayojjaya ojjaña joya Eyacuiñajjiya esohui shajja'ajja majje jashajja'ajjaqui ajja poani maya Jesusaja epeeji pojjeama, cajaa pea'ai. Ehuohuijajjiya huohui cani jama ba'a: —Eya Jesusaja epeeji poani.

3 Ecuea epeeji cuana, ¡shajja'ajjacue mo oe! Eseyaya quea mimishi poajo, Eyacuiñajjiya tecuea caje'yo. Jamaya miquea eba. Eyacuiñajjiya esohui huohuijji cuana quea mimishi poajo ca ca Eyacuiñajjiya oya cuana tecuea neinei cañaje'yo janobajjima nei. Jamajjeya oe ja'a eseyaya quea huiso Eyacuiñajjiya esohui huohuijji po sa pojji!

Beca cuanaja chama' esohui jjochijji

² Ojjaña pojajajo eseyaya quea mimishi pishana poani. Joya esohui quea mimishi mimi ajja tii tii, mimijjequijjequi'yo ajja poani ca ca ojaya ejjashahuabaquijji quea ja'a nee poani tii. Jamajjeya oya quea pame tii ba'yani.

³ Eseyaya baacui sisi mapichija enaba huasijje huana nobiaña ehui jjequijjea poquijji. Majoya eseyaya mapichi poqui meeña cua ese poqui sa poaje yasijje. Jamatitii baacui enabajo che biso nei ba'yani.

⁴ Oya jayojjaya bishe quea quemo quea cuejipashi nei poquiani. Jamatitii ebishe meseya bishe quijjo aniya bishe dojo cani cua o poqui sa poaje yasijje, quii ca'a cani, jamatitii equica'ajji biso neiya.

⁵ Jiquio ecua bishe quica'ajjiya bishe ai huijjea cani jama jamatitii che biso neiya jayojja jama esejaya enaba quea biso, jamatitii beca cuana quea huiso esohui quea tecue mimiani. Quea miminaa poani bicho'ama.

¡Jashahuabaquicue cuaquijo pea'ai! Cuaqui cojjasha sisiya quijjo'yo jima ebio quea jabo dahuaeja cani, ebio quea quemo. ⁶ Ma jayojjaya beca cuanaja e'ana quea mimishi mimimianijjo yana cuaqui jayojja jama poani. Jamajjeya jiquio ecua cuaquiya ebio dahua tehueja cani, acui cuana quea tehue po mee cani jama jayojjaya esohui quea mimishi mimianijjo ejjashahuabaquijji quea tai po mee cani. E'e, esho'iquiana quea tai mimiani; tii majje quea tai mimiani pea'ai, quea mimishi. E'e, eshahua cuaa eseyaya quea tai nee nee mimi mee cani. Jamajjeya Eyacuiñajjiya ojjaña joya quea mimishi mimiani quea nee nee po mee caje'yo.

⁷ ¡Bacue! Eseyaya ojjaña ijjiacajji cuanaja ebacua huoniaña. Ijjiacajji mase cuanaja bacua cuana, cuichojjiya bacua cuana huoniaña; shaneija bacua cuanaya huoniaña, nahuoo jai besijji cuana pea'ai. Jjabahuonequi meeña. ⁸ Jamatitii esejaya esohui quea tai, quea tecue ca ca quea mimipanajjea epojji chama' esohui jjochijji, ca pea nijje emimijaji pajea'yoyji. Jiquio ecua peyoja ese na jama quea nee nee poani jama esohui quea taijaya pea epeeji cuana quea yeno nee nee po mee cani.

⁹ Eseyaya aje oe Eyacuiñajji, esejaya Chii ai bihuiaña esejaya enabaa. Jamatitii majoya eseyaya pea cuana nijje mimijajiani, ma Eyacuiñajjiya pana ca poa o jayojja epojji nijjeya eseyaya mimijajiani. Jamaya quea tai. ¹⁰ E'e, esohui quea bei, quea pame mimi majje quijje pishana esohui quea tecue nee nee, quea mimishi nee mimiani pea'ai. Ecuea epeeji cuana, ja'a oe jamaya pojji!

¹¹ ¡Jashahuabaquicue! Ena teohuejja cajje ena ihui'a-

ma cuayani, sese'ama. Ena sese ena quea pame tejje teohuejja cajje cuaya ajja. Jiquio ecua ena quea pame cuaya majje ena sese cuaya ajja jayojja jama pojjeama esejaya enaba. Esohui quea pame mimi majje esohui quea mimishi mimiani, ena sese jama cuayani esohui. ¹² Epeeji cuana, miquea eba jememe acuijo chama' esiye. Jememejo tii ajja esiye. Jjono cuanajo tii ajja acuijajja, shihuijajja pea'ai. Oya jayojja meshi eteohuejjaje ena quea pame cuayani; ena sese cuaya ajja. Jamajjeya esohui quea pame mimi majje ¿apiojji acuae nequiana esohui quea mimishi mimiani, pea cuana niñebaña pea'ai? Jamaya se quea pame pojjeama nee nee.

Eyacuiñajjiya eseyaya quea ja'a jashahuabaqui mee cani

¹³ ¿A'a miqianaya quea ja'a jashahuabaquiani? ¿A'a jjabahuejjaquinaje quea pame nee eba'ejji? Jamajjeya ¡quea pame nee atiiticue! ¡Tecue'ama pocue! Quea pame nee añajo pea cuaa ba caje miqianajaya ejjashahuabaquijji quea pame nee poani. ¹⁴ Pea cuanajo quea quene nee nee jashahuabaquianijjo, quea nishehui, quea dejja tai nee nee poanijjo pea'ai ¡quea yeno pocue miqianajaya mimishijjo! ¡A'a sijje pojji Eyacuiñajji nijje jama ba'a: —Eya quea pame nee ba'yani —a'a jama sijje pomeya pojji! Chojja.

¹⁵ Ojjaña joya quea tecue nee nee, quea nishehui pea'ai poani Eyacuiñajjiya Edojjoshahua Pame jayojja jama jashahuabaqui ajja. Chojja. Oya cuana eshahua-ja ejjashahuabaquijji jayojja jama poani quea mimijjequijjea, quea mimishi. Mimishi cuana Eyacuiñajjiya esohui jayojja jama po ajja tii tii, Eyacuiñajjiya epeeji pojjeama. ¹⁶ Quea tecue po tiitianijjo, quea nahue po tiitianijjo pea'ai ojjaña peapea mimishi cuana acani tii tii pea'ai. Quea ja'a ba'e ajja. ¹⁷ Eyacuiñajjiya ejjashahuabaquijji quea pame nee nee. Ojaya ejjashahuabaquijji jayojja jama jashahuabaquianijjo eseyaya mimishi'ama poaje: Quene'ama. Nishehui'ama, dejja tai'ama. Shajjama' pojjeama. Quea bei poaje. Quea pame nee poaje'yo tii tii pea'ai. ¡A'a oe nei dejja quea jea ajji; ojjaña cuana oe quea jea acue! ¡Jesusaja epeeji e'e jajo nei pocue pea'ai, epeeji nisho pojjeama! ¹⁸ Jamajjeya ¡quea bei nee ba'ecue! ¡Pea cuana quea bei ba'e meesahuacue pea'ai! E'e, eseye nei quea bei poanijjo, quea pame nee poanijjo pea'ai, pea cuana quea pame nee poaje ese jayojjaya.

¡Jesusaja epeeji pojjeama jayojja jama a'a ba'ejji!

4 ¿Apiojji acuae quiana esohui quea tai nee nee mimiani so'o Jesusaja pea epeeji cuana nijje? ¿Apiojji acuae quiana jjamimicuijjea nobiajjeaquiani pea'ai? Ecuea eba. Miqianaya quea huiso aquiana jea bañajo quea tecue nee nee poani, quea dejja tai poani pea'ai. ² Miqianaya ca ca oe quea aquiana huiso po sa poani. Jamatitii ejjeshejji chamajajo ca ya ca oe mi jjesheña. Jamajjeya ajeo ejjeshejji pojjeamajajo ca ya ca oe pea quecua sa aña e'aquiana mejo'yoyji. Onajaya aquiana jea ba majje miqianaya jjamimicuijjea nobiajjeaquiana

ni; jjacuiaquiani pea'ai. Jamatii miqianaya Eyacuiñajji nijje mimi ajja jama ba'a: —Eyacuiñajji, ¡che mo ma aquiana jjeshe meesahuacue! —Jamaya Eyacuiñajji nijje mimi jjimajojo ca mi ca mi jjeshe meesahua cani aquiana cuana.

³ Beca cuana aje oe Eyacuiñajji nijje mimiani aquiana sa poanijo. Jamatii ma aquianajo quea nahue nee poanijo ojaya miqianaya ma aquiana equia meejji pojjeama. Aquiana miquea miqueya nei epojjijo quea tai jjas-hahuabaquiani. Eyacuiñajji ejjashahuabaquiji jayojja jama a'ajjajo ojaya miya eshajja'ajjaji pojjeama. ⁴ ¡Bacue! Jiquio ecua ehuanase ojaya yahue boti'ama amajje pea deija nijje poani jama jayojjaya miqianaya Eyacuiñajji nijje jjapeepajeaqui'yani mimishi cuana nijje ejjapeequi'yojji. Jamajjeya miqianaya Jesusaja epeeji pojjeama cuana nijje jjapee neineiquianijo miqianaya Eyacuiñajji boti'ama aña. Quea mimishi ba'e sa poanijo Eyacuiñajji quecua'yojji jayojja poani. ⁵ Eyacuiñajji-ja esohui yahuajo nei nei tehue ca poa cuaa jama ba'a: "Eyacuiñajjiya ojaya Edojjoshahua Pame ojaya epeeji cuana huasijje huoojea ca'yonaje ojaya eyami yasijje dobiquiya. Edojjoshahua Pameya ojaya epeeji cuana nahue tiitii cani mimishi'ama epojji".

Jamaya yahuajo nee tehue ca poa. ¿A'a Eyacuiñajjiya ma esohui etehuejajji tehue mee ca poa posoya aña miqiaaya?

⁶ Eyacuiñajjiya eseya jaahuana cani quea ja'a nee. Ohuaya eseya ba'e meesahua cani quea pame nee. E'e, ojaya esohui yahuajo nei tehue mee ca poa jama ba'a:

"Eyacuiñajjiya ojjaña joya mimishijo bicho'ama poani, quea quene poani pea'ai jeabichajea cani. Quea yeno nee nee po mee cani pea'ai. Ojjaña quea bei poani, quene'ama poani pea'ai ohuaya ba'e meesahua cani quea pame nee".

Jamaya yahuajo nei tehue mee ca poa.

⁷ Jamajjeya oe ¡Eyacuiñajjiya esohui jayojja jama pocue! ¡Edosiquiana nei nijje a'a jjapeequijji! ¡A'a oya shajja'ajjaji! ¡Oya huoojeacue! Jamajjeya miqianaya Jesusaja epeeji poanijo Edosiquiana miqiana huoojeajji pojjeama poani. Chojja, jjanequishiñaqui majje oya poquije quea huesha nee. ⁸ ¡Jesusa nijje jjapee neineicue! Jamajjeya ohuaya miqianaya jaahuana tiitii caje'yo. ¡Miquea mimishi cuana pajea nei'yocue! ¡Jesusaja epeeji nisho a'a pojji! ¡Ojaya epeeji nei nei oe pocue Eyacuiñajjiya esohui etehue'yo jayojja jama! ¡Quea boejea ba'e neinei'yocue! ⁹ ¡Miquea mimishijo quea yeno nee pocue! ¡Pa neineicue! ¡Mimishi cuanajo quea bihui jayojja a'a soajji! ¡Mimishi cuana amajje a'a quea bei jayojja pojji! Chojja. ¹⁰ Quea tai po majje quea bicho nee nee mimicue Eyacuiñajji nijje jama ba'a: —Eyacuiñajji, ¡eya mimishi pajea meesahua'yocue! E'e, eya ca'a'ama. ¡Jaahuana neineicue mo oe, quea bei enijje pocue!

Jamaya onijje mimianijo Eyacuiñajjiya miqianaya shajja'ajja caje. Miqianajaya emimi onijje jayojja jama ohuaya acaje.

¡A'a pea cuanajo maimaijji!

¹¹ Ecuea epeeji cuana, miqianaya Jesusaja epeeji cuana poani. Jamajjeya ¡Jesusaja pea epeeji cuana a'a niñebajji! Jesusaja epeeji cuaa, beca cuaa pea epeeji niñeba cani jama ba'a: —Oya Jesusaja epeeji quea pame pojjeama —Jamaya acani Eyacuiñajjiya esohui jayojja jama a sa po'yo ajjaa jjejojo.

Jamajjeya ohuaya Eyacuiñajjiya esohui niñeba cani jama ba'a: —Eyacuiñajjiya esohui quea pame pojjeama poani.

Ohuaya Eyacuiñajjiya esohui jayojja jama a'ajja boti'ama jojya. Jamajjeya oya cuana Eyacuiñajjiya esohui niñebajji poani. ¹² ¡Bacue! Eyacuiñajji oe nei ojjaña huoojeajji poani quea pame nee. Oya oe nei quea ja'a nee nee jjashahuabaquiani ojaya epeeji cuanajo. Ohuaya ohuaye nei mimishi cuana cuijea ca'yani. Jamajjeya ohuaya ohuaye nei mimishi cuana quea nee nee po mee caje'yo tii tii. Jamajjeya ¡a'a pea epeeji cuana niñebajji! Miya ca ca Eyacuiñajji jayojja jama pojjeama.

¡Eyacuiñajjiya ejjashahuabaquiji jayojja jama acue!

¹³ Beca cuana mimiani jama ba'a: —Mecahuajje pojja'a eya poquije pea cuiñajji yasijje. Jocuama eya nequije oe shequijame. Chacochocho majje ejjeshajji quea huiso jjesheje —poani.

¹⁴ ¡Eya shajja'ajjacue! ¿Ae shai poaje mecahuajje? Miqianajaya eba pojjeama. ¿Ache shono manojeyo eseya? Eseyaya ba jjima. ¡Bacue! Eseyaya huoja jama. Jiquio ecua eshequi jaasohua pishanajo huoja jjachamaqui'yani, poquiani jama jayojja miqianaya jiquio meshijo enequi tiitijji pojjeama; ca'a'ama. ¹⁵ Jamajjeya jama pocue ba'a: —Eyacuiñajjiya ecua ba'e meesahua canijo, ecua ba'eje quea pame nee. Ohuaya ecua chacochocho canijo, ecua chacochocho ma echacochocho.

¹⁶ Jamatii miqianaya bicho'ama mimiani jama ba'a: —Eya jamatii quea pame chacochochoani. Quea pame ba'yani jamatii.

Chojja. Miqianaya emimijeajji mimijeani. Jjashahuabaquiani quea quehua nee nee.

¹⁷ Eyacuiñajjiya ojjaña quea pame nee ameesahua sa acani. Ma ba majje jamatii beca cuana quea pame po sa po'yo ajja. Jamaya poani jjejojya quea mimishi nee nee poani.

Dejja quea aquiana huiso niñeshe'ajji

5 Quea dejja tai jjejojo ona dasiajji poani, ¡shajja'ajjacue mo oe! Jjeya miqianaya quea aquiana huiso poani. ¡Jamatii quea yeno nee nee pocue, pa neineicue pea'ai! Quijje aje oe quea yeno nee nee poaje, quea camaja nee poaje'yo. Quea nee nee poaje'yo miqianaya. ² Miqianajaya aquiana quea nahue cuana shaashaajeaje quea huiso. Mojojea caje. Miquea daqui quea nahue cuana huiñajeaje'yo, machichi aiya ij-jiahuiñajeaje caje'yo quiiteteya pea'ai. ³ Miquea aquiana mei huo'o quea nahue cuana, mei oshe quea nahue

cuana, bejjo cuana pea'ai seejeaje'yo. Miquea aquiana cuana esee'yo, ehuiñajea'yo ba majje onaaya miya jama acaje ba'a: —Oya quea dejja tai; oya quea nishehui poanaje. Quea aquiana jeaa jjejojo aquiana quea huiso nee nee nahue tiitii canaje.

Miquea ejjesheji chama'yo tii poaje'yo. Jiquio ecua cuaquijo quiyo'yo majje eseya quea nee nee poani jama jayojja miquea aquiana cuana chama'yo tii poajo miya quea yeno nee nee poaje'yo. Majoya Eyacuiñajjiya miya tecuea caje quea dejja tai poanaje jojoya, aquiana cuana quea huiso nee chicha majje nahuejje poanaje jojoya. ⁴ E'e, echacojji cuana mique quea cuanajo chacocho'yonaje miquea sosequia'yo jjima. Ma echacojji cuana Eyacuiñajji niije mimiani mijo; huohui cani, sosema' miya chaco mee canaje jjejojo. Onaaya mique quea cuanajo bobi sosema' chicha ca'yonaje pea'ai. Majoya oya cuana taaani Eyacuiñajji yasijje mimi majje miquea sosequia'yo jjima jjejojo. Eyacuiñajji quea ca'a nee nee, ojjaña huoojja'yojji nei nei oya poani. Ohuaya echacojji cuana pa ani shajja'ajja canaje. Jamajjeya ohuaya miya tecuea cani quea dejja taijojo. ⁵ E'e, miyaya aje oe aquiana quea huiso jiquio meshijo chichanaje; miquea yajjijo quea huiso aquiana pame, quea nahue nee pea'ai chichanaje, siinaje pea'ai. Quea aquiana jea nee nee poanaje. Quea bobi huiso nee nee miya poanaje. Jamatii jeje ajja tii tii poanaje. Quea dejja tai poanaje; quea nishehui poanaje epona. Jamajjeya Eyacuiñajjiya miqianaya quea nee nee po mee caje'yo. ⁶ Miyaya aje oe aema' cuana, joya mimishi'ama quea pame nee poani pea'ai tecueanaje. Oya cuana quecuajejanaje pea'ai. Jamatii oya cuana minijje jjasoseaqui'yo ajja, jeabichajea sa po'yo ajja pea'ai. Eyacuiñajjiya ca ca oe miya quea nee nee po mee caje'yo tii tii ona miya mi sosequiajo. Jamaya eyaya miqianaya aña, edejja tai cuana. Mahuiso.

¡Eyacuiñajji niije mimicue eba'e meesahuajji!

⁷ Jamajjeya ecuea epeeji cuana, ¡Jesosaja epoe o'oyajjijo jja'ishoa'ajjaqui nequicue quea bei! Onaaya miqianaya quea mimishi acanijo, ¡Jamatii Jesosa niije jja-pee tiitiiquicue yeno'ama! Eseyaya shijje quecua majje ishoa'ajjaña shijje ti'yojjo eso' yajji. Jiquio ecua seya ena ishoa'ajjaña shijje pohua'yojji jama ¡ishoa'ajjameya acue Jesosaja epoe o'oyajjijo! ⁸ E'e, quijje pishana esejaya Emeshi Mese nei Jesosa poeje o'oya. Jamajjeya oe ¡jjeja quea pame nee onijje jjapee neinei tiitiiquicue e'e jojo nei!

⁹ Ecuea epeeji cuana, ¡a'a Jesosaja pea epeeji cuana niñebajji Eyacuiñajjiya miqianaya etecueajji pojjeama! Poe majje Jesosaa huohui cañaje'yo joya quea pame poanaje; joya quea mimishi poanaje huohui cañaje'yo pea'ai. Jjeyahua nei esejaya Emeshi Mese nei Jesosa chipi nei nequi. Jjeyahua nei pojja'a oya poeje o'oya.

¹⁰ Epeeji cuana, ¡shahuabacue Eyacuiñajjiya esohui huohuijji cuana ma yahuajo nei nei ba'ya poa! Ohuaya esejaya Emeshi Mese neijo huohui ca poa. ¡O jayojjaya jama quea bei pocue! E'e, yahuajo onaaya oya cuana cuia ca poa pea'ai. Jamatii Eyacuiñajji niije jjapee tiitii-

qui nequia poa. ¹¹ E'e, oya cuana napa ca poa cuaa quea huiso. Jamatii Eyacuiñajji niije jjapeequi pajea'yo jjima poa. Jamajjeya eseya jama poani ba'a: —Oya cuana Eyacuiñajjiya epeeji quea bihui neeya poa, ma etiiquiana cuana.

E'e, ¡niñeba'yocue Eyacuiñajjiya epeeji yahuajo nei nei nequia poa etiiquiana! Jobi bojojea'ajja'ya poa; quea nee nee poa. Jamatii Eyacuiñajji niije jjapeepajeaqui'yo jjima poa. Jamajjeya Eyacuiñajjiya oya quea pame nee aca poa. Jjajea meequi ca'ya poa. Jamaya miquea eba. Eyacuiñajjiya eseya quea jea nee poanijo quea pame nee nee acani, quea bei pea'ai.

¹² ¡Jiquio ecuea pea esohui ba neineicue, epeeji cuana! ¡A'a oe sijje pojji! ¡A'a oe jama pojji ba'a: —Eyacuiñajjiya eya ba canijo, eyaya e'e nei huohuiaña. Ecuea esohui e'e nei pojjeama jojjemo eya Eyacuiñajjiya quea nee po mee ca'yome. Ojjaña eyajo ba'e cuaa eya ba cani, ojjaña meshijo ba'e cuaa eya ba cani pea'ai eyaya e'e nei huohuiaña. Ecuea esohui e'e nei pojjeama jojjemo Edosiquiaa eya quea mano po mee ca'yome —a'a jamaya pojji!

Chojja, ¡esohui e'e nei huohucue jama tii tii! Jamajjeya ¡chaco sa poanijo jama acue ba'a: —E'e, eyaya chaco sa aña —acue! Chacocho sa po ajjajo ¡huohucue jama ba'a: —Chojja, eya chacocho sa po'yo ajja —acue! ¡E'e jojo nei oe huohui poquiacue! ¡E'e jojo nei jayojja mimianijo Eyacuiñajjiya miya tecuea ca'yo chana'!

¡Eyacuiñajji niije mimicue emanojaa oja ehuaquia mee'yojji!

¹³ ¿A'a beca cuana quea yeno nee nee yani? Quea yeno po majje ¡Eyacuiñajji niije camimiahua! ¿A'a pea cuana quea bihui nee poani? Quea bihui nee po majje ¡Eyacuiñajji cabihuia cahua sohuicuayanijo! ¹⁴ ¿A'a emanojaa yani? ¡Eyacuiñajjiya epeeji etii cuana ca'iyaa cahua! Oya cuana poe majje Eyacuiñajji niije mimije emanojaa huaquia mee'yojji. Jamajjeya emanojaa bahua shicui caje acuijjajja seiya Jesosaja epeeji poanijo. Majoya Eyacuiñajji niije mimije emanojaa huaquia'yojji, ejjaajajji'yojji pea'ai. ¹⁵ Eyacuiñajji niije mimianijo cajjashahuabaquiahua jama ba'a: —Ecuana Eyacuiñajji niije mimiani emanojaa oja ehuaquia mee'yojji. Ohuaya e'e jojo nei ecua shajja'ajja caje; emanojaa huaquia mee caje'yo —jamaya capoahua.

Jamaya jjashahuabaquianijo, Eyacuiñajjiya eseya onijje mimiajo shajja'ajja caje; jamaya acaje'yo e'e jojo nei. Emanojaa quea mano poani oja mimishijo, Eyacuiñajjiya oja mimishi cuana cuijea caje'yo pea'ai. ¹⁶ Jamajjeya mimishi amajje ¡quea yeno nee mimicue pea cuana niije! ¡Miquea mimishi huohucue! Jamajjeya Jesosaja pea epeeji cuaa miqianaya mimishi apajea meesahua caje'yo. Majoya ¡mimicue Eyacuiñajji niije pea cuanajo! Eyacuiñajjiya miqianaya huaquia mee caje'yo. E'e, Jesosaja epeeji mimishi'ama Eyacuiñajji niije mimi neineiyajo Eyacuiñajjiya oya shajja'ajja caje; jamaya acaje ojo.

¹⁷ Yahuaajo nei nei esejaya etiiquiana Enia bajjani ba'ya poa. Oya ese jayojjaya poa. Jamatii oya miminequia poa Eyacuiñajji nijje ena chama' epo mee'yojji. Jamajjeya ena chama' poa beshahua nei ebeca pea pea'ai shequiajame. ¹⁸ Meshi quea jabo nee nee poajo, Enia Eyacuiñajji nijje mimi o'oya poa ena epo'yojji. Eyacuiñajjiya Enia onijje mimiajo shajja'ajja ca poa; ena quea quemo po mee ca'ya poa. Eso' cuana equecua ani pohua mee ca'ya poa.

¹⁹ Ecuea epeeji cuana, ¡bacue! Jesosaja epeejiya Eyacuiñajji esohui etehue'yo jayojja jama ba'e pajea'ya-jo, ¡oya quea pame nee ba'e meesahua o'oyacue mi-quianaaya! Jamajjeya Eyacuiñajji esohui jayojja jama acaje o'oya ohuaya. ²⁰ Jamajjeya Jেসসা নিজে জাপেই মীসাহুয়া ও'য়ানীজো, ওয়া কানা কুই যাসীজে এপুই'য়ীজী পুজীমা. Eyacuiñajjiya ojaya mimishi quea huiiso cuana cuijea caje'yo.

Mahuiso ecuea esohui. Eyaya, Satiacohua esohui tehuenaje. Apoa.

1 PENO

Penohua tehue canaje Jesusaja epeeji yasijje ejjaba'e-chejjequi ba'eca huasijje

1 Eya Peno bajjani. Jesosa Quitohua eya huoojea canaje ojaya esohui huohuiya. Eyaya jiquio esohui tehueña miqiana huasijje, ma Jesusaja epeeji nei cuana huasijje. Miqianaya yahuajo ba'enaje Jodio meshijo. Jesusaja epeeji poanijojo onaaya miqianaya napa canaje. Jamajjeya miqianaya poquinaje quea huiso cuiñajji cuana huasijje, pea meshi cuana huasijje. Ma meshi cuana bajjani yasijje ba'a: Ponito meshi yasijje, Janata meshi yasijje, Capanosia meshi yasijje, Asia meshi yasijje, Bitinia meshi yasijje pea'ai poquinaje miqianaya. ² Yahuajo nei Eyacuiñajjiya, esejaya Chii eyajo aniya miqianaya babaca canaje ojaya epeeji nei epojji. E'e, yahuajo nei oya miqianajo jjashahuabaquinaje jama ba'a: —Miqianaya ecuea epeeji cuana poaje quijje. Edojjoshahua Pameya miqianaya quea pame nee ba'e meesahua caje ecuea esohui jayojja. Jamajjeya miqianaya Jesusa Quitoja esohui shajja'ajajji poaje. Jesosa Quito manojeyo miqiana quea boejea epo mee'yoyji —jamaya Eyacuiñajji jashahuabaquia poa esejo.

¡Eyacuiñajjiya miqianaya caba'e mee cahua quea pame nee nee! ¡Ohuaya miqianaya quea bei capo mee cahua pea'ai!

Jesosa Quito jjeya eshe anijo ecuana quea bihui nee nee poani

³ ¡Eseyaya Eyacuiñajji ejjabihua tiitiqui! Oya Jesosa Quitoja Chii. Oya esejaya mimishi cuanajo jjashahuabaqui tiitii ajja. Eseyaya quea jea nee poanijo, Jesosa Quito manoyajo, Eyacuiñajjiya oya shequi mee ca o'yanaje. Jesosa Quito eshe o'oya poanijo, eseya Jesosa jayojjaya ba'e tiitii mee caje'yo Eyacuiñajjiya. Jamajje jjashahuabaquiani quea bihui nee Jesosa nijje eba'e tiitii'yoyji. ⁴ Aquiana jiquiojo quea pame pishana, ani tiitii'yo ajja; ihui'yo majje chama'yo tii poaje'yo. Quijje ca ca Eyacuiñajjiya eseya ba'e tiitii mee caje'yo quea pame nee eyajo. Jamaya ohuaya huohui canaje. Ohuaya eseya pajea'yo jjima acaje. ⁵ Miqianaya jjashahuabaquiani jama ba'a: —Eyacuiñajjiya ojaya esohui etehue'yo jayojja jama acaje'yo.

Jamaya jjashahuabaquianijo, Eyacuiñajjiya miqianaya jaahuana caje. Oya quea ca'a nee nee. Jamajjeya Jesosa Quito poe o'oyajo, Eyacuiñajjiya miqianajo huohui caje jama ba'a: —Miqianaya Jesusaja epeeji cuana poanijo ba'e tiitii meeje'yo enijje eyajo.

⁶ Jamajjeya ¡quea bihui nee po tiitiecue Eyacuiñajjiya miqianaya ba'e tiitii mee caje'yo jjejojo! E'e pojja'a oe pojji cahui cuanajo quea nee poaje onaaya miqianaya napa cani Jesosa nijje jjapeequianijo. Jamatii. ⁷ Quea nee poani Jesusaja epeeji poanijo, Eyacuiñajjiya ba caje miqianaya ojaya epeeji nei nei. Jama poani ba'a: Mei huo'o topo majje cuaquijo dahua cani cuaa mei shaa chama'yo epojji. Jamatii mei huo'o quea pame pishana; see'yo majje quea pame pojjeama poaje. Miqianaya ca ca Eyacuiñajjiya quea boti nee nee. Jiquio ecua mei huo'o cuaquijo dahua cani cuaa mei shaa chama'yo epojji jayojja jama onaa miqiana napa cajje Eyacuiñajjiya miqianajaya ejjashahuabaquijji tai chama'yo po mee caje'yo. Jesusaja epeeji e'e nei quea pame nee po mee caje'yo. Jamajjeya ojjaña Eyacuiñajji bihuia caje jama ba'a: —E'e, Jesosa Quitoja epeeji cuana quea pame nee. Jamajjeya ¡Eyacuiñajji ejjabihuaqui, oya ba'e tiitiani quea ca'a nee nee jjejojo!

⁸ Jesosa Quito miqianajaya eba pojjeama ecojjaja. Jamatii oya miqianajaya quea boti nee nee. E'e, ojaya miqianajaya ba jjima eyami. Jamatii ojaya esohui jayojja jama poani. Jamajjeya miqianaya quea bihui nee nee poani. Pea cuanaja ba jjima Jesusaja epeeji quea bihui nee nee poani. ⁹ E'e, Jesosa nijje jjapeequi'yanijo, ohuaya miqianaja mimishi cuana cuijea ca'yonaje; ba'e tiitii mee caje'yo pea'ai, ohuaya.

¹⁰ E'e, jjeya nei ohuaya miqianaya ba'e meesahua cani. Cuanaya ba'e tiitii mee caje'yo. Jamaya Eyacuiñajjiya esohui huohuiji yahuajo nei ba sa poa; jjashahuaba neineiquia poa pea'ai. Ohuaya yahuajo nei huohui ca poa jama ba'a: —Eyacuiñajjiya quijje dejja cuana ba'e tiitii mee caje'yo onijje eyajo —jamaya yahuajo nei aca poa.

¹¹ Edojjoshahua Pameya yahuajo nei ma esohui huohuiji cuana jjashahuabaqui mee ca poa jama ba'a: —Quijje Eyacuiñajjiya huoojea'yo ojjaña jaahuanajji poeje. Oya quea ca'a nee nee poaje. Jamatii quea nee nee poaje'yo. Quea nee po majje ojjaña quea pame nee ba'e tiitii mee caje'yo eyajo onijje —jamaya Edojjoshahua Pameya oya cuana jjashahuaba meequi ca poa.

Jamajjeya oya cuana jama poa pea'ai ba'a: —¿Ache shono shai oya Eyacuiñajjiya huoojea'yo ojjaña jaahuanajji poeje so'o? ¿Achajja shai ohuaya poe majje acaje'yo? —jamaya poa cuana.

¹² Eyacuiñajjiya ma esohui huohuiji cuana jjashahuaba meequi ca poa jama pea'ai ba'a: —Miqianajaya esohui cuanajo ojjaña cuana quijje nei quea bihui nee

poaje. Jamatii jjeya miqianajaya maya ba jjima —jamaya yahuajo nei nei poa.

Jjeya Eyacuiñajjiya Edojjoshahua Pame huoojea canaje esohui huohuiji cuana huasijje Jesosa Quitojo huohui meesahuaa miqiana huasijje. Oya cuanaa esohui huohuijija esohui, ma yahuajo ba'ya poaja jayojja jama huohui cani. Ma esohui quea pame nee Jesosa Quitojo Eyacuiñajjiya esohuidojojji cuana eyajo nequi ba sa poani pea'ai.

¡Eyacuiñajjiya esohui jama ba'ecue!

¹³ Jamajjeya ijjeya ejjashahuabaquijji quea ja'a jama acue! ¡A'a quea quehua jjashahuabaquijji! Poe o'oya majje Jesosa Quitohua miqianaya ba'e tiitii mee caje'yo eyajo onijje. ¡Jamaya jjashahuaba neineiquicue!

¹⁴ ¡Eyacuiñajjiya esohui cuana jayojja jama atitiicue! Jesosa Quito ba jjimahuajo miqianaya quea mimishi poanaje. ¡Jjeya miqianaya ejjashahuabaquijji quea mimishi yahuajo jama a'a pojji! ¹⁵ ¡Jjeya ca oe quea pame nee pocue! Eyacuiñajjiya miqianaya iyaa canaje onijje ejjapeequi'yojji. Oya quea pame nee nee. ¡Joya ecua ohuaya quea pame nee acani jamaya oe acue!

¹⁶ E'e, Eyacuiñajjiya esohui etehue'yo yahuajo nei jama poa ba'a:

“Eya quea pame nee nee poani; ¡je jayojjaya jama quea pame nee nee, quea boejea pea'ai oe pocue!” Jamaya tehue ca poa yahuajo nei.

¹⁷ Eyacuiñajji niije mimianijo miqianaya jama poani ba'a: —Eyacuiñajji, miya ecuanaja Chii ai —poani.

¡Bacue oe! Eyacuiñajji oe dejjaja eba'ejjijjo jjashahuabaquiani, oya jayojjaya jjashahuabaquiani pea cuanaja eba'ejjijjo. E'e, ojjaña shajjama' cuana ohuaya huohui caje jama ba'a: —Miqianaya ca mi ca oe quea mimishi nee nee poanijo quea nee nee poaje'yo tii —acaje.

Quea pame poanijo ca ca eseya jama huohui caje'yo ba'a: —Jamaya quea pame nee, enijje ba'e tiitijje'yo eyajo —Eyacuiñajji poaje.

Jiquio meshijo eseya ba'e tiitii ajja. Jamajjeya jiquio meshijo ba'yanijo ¡ojjaña pojajajo Eyacuiñajjiya esohui jayojja jama acue! ¡Oya shajja'ajjacue! ¹⁸ Yahuajo miqianaya ba'e'yonaje etiquiana cuanaja ehuohui jayojja jama quea mimishi. Oya cuana Moisesija esohui etehue'yo jayojja jama ba'e nishonaje. ¿A'a bejjo sosejje mimishi cuana cuijea mee ca'yojji? Chojja. Ejjeshajji, esodojjo quea nahue, mei quea nahue pea'ai quijje pishana sosema' poaje. ¹⁹ ¡Bacue oe! Jesosa Quitohua miqianajaya mimishi cuana cuijea'yojji sosejje sosequia ca'yonaje. E'e, jiquio ecua ñajjajja esho'i quea pame, tai'ama quecua ca'yaninaje cuaa jayojja jama Jesosa Quito quea pame nee, mimishi'ama quecua ca'yonaje cuaa esejaya mimishi cuijea'yojji. Oja ena' cuayaquinajejo, Eyacuiñajjiya esejaya mimishi cuana cuijea caje'yo. ²⁰ Yahuajo nei nei meshi pana jjimahuajo Eyacuiñajji jjashahuabaquinaje quijje nei Jesosa Quito huoojeaje mimishi cuanajo mano'yohua. E'e, Eyacuiñajjiya Jesosa babaca canaje ese jaahuanajji. Jjeya epojja cuana beshahua nei oe poanajejo Jesosa Quito poeyanaje esejaya mimishi cuijea'yohua, quea boejea

ba'e mee'yohua pea'ai. ²¹ Miqianaya quea boejea acanajejo, jaahuana canajejo pea'ai Eyacuiñajji miqianajaya eba poaje. Cuanaya Eyacuiñajjiya Jesosa Quito shequi mee ca o'yanaje. Ojjaña huoojea'yojji quea ca'a nee nee po mee ca'yonaje pea'ai. Jamajjeya jjeya miqianaya Eyacuiñajjiya esohui jayojja jama poani. Ohuaya miqianaya jjashahuabaqui mee cani jama ba'a: —E'e, Eyacuiñajjiya ecua ba'e tiitii mee caje'yo onijje eyajo.

²² Jjeya miqianaaya Eyacuiñajjiya esohui jayojja jama añajo, mimishi cuana apajea mee ca'yonaje, Eyacuiñajjiya. Edojjoshahua Pameya miqianaya Jesusaja epeejji cuana quea jea nee ameesahua canaje. Jamajjeya ¡ojjaña Jesusaja epeejji cuana quea jea nee atitiicue! ²³ Jesosa Quito miqianajaya mimishi cuanajo mano'yonajejo, Eyacuiñajjiya miqianaya pea ejjashahuabaquijji ba'e mee ca'yani. E'e, miqianaya quea pame nee ba'e tiitiani pea ejjashahuabaquijji, dejjaja bacua jayojja jama pojjeama. Oya cuana ca'a'ama, oe pojji shequiajame ba'yani. Eba'ejji eyajo ca ca eba'e tiitii'yojji, oe po ajja. ²⁴ ¡Bacue oe! Eyacuiñajjiya esohui etehue'yo yahuajo nei nei jama poa ba'a:

“Ojjaña dejja cuana sipone jama, ca'a'ama. Oe pojji cahuijo sipone shasha cuana quea pame. Jjeya nei jo-ca'yo majje chama'yo tii poaje'yo.

²⁵ Esejaya Emeshi Mese neija esohui cuana ca ca quea pame yani tiitijje'yo”.

Yahuajo nei jamaya poa.

E'e, ma esohui quea pame nee Jesusaja esohui huohuiji cuaa miqiana huasijje huohui canaje, Jesusaja esohui.

¡Jesosa Quito niije quea pame nee ba'ecue miqianaya!

² ¡Jjeyahua nei ojjaña mimishi cuana pajea neinei'yocue! ¡Onaja aquiana a'a jea bajji! ¡A'a jjadasiaquijji pojji, siipojji pea'ai a'a pojji! ¡Sijjepojji a'a pojji! ¡A'a pea cuana niije mimijajijji! ¡A'a epeejji nisho pojji! ² ¡Eyacuiñajjiya esohui ba neineicue! ¡Jiquio ecua eba-cua esho'ya tojjo quea boti nee, ojjaña pojajajo tojjo ishi neinei cani jayojja jama Eyacuiñajjiya esohuijo pocue miqianaya! ¡Ojjaña pojajajo esohui ba neineicue! ¡Ba majje Jesosa Quitoja epeejji quea ja'a nee pocue! ³ Eyacuiñajjiya esohui yahuajo nei jama poa ba'a: “Quito niije japeequi majje miqianaaya oya banaje quea pame nee nee poani”.

⁴ ¡Jjapeequicue Jesosa Quito niije! Oya quea pame nee nee, quea ca'a nee nee pea'ai. Beca cuana onijje japeequi sa po ajja poa. Oya cuana jama poanaje ba'a: —Jesosa Quito cajaa. Ecuana onijje japeequi sa po ajja.

Eyacuiñajji ca ca Jesosa Quito quea jea nee nee jama mimime poanaje ba'a: —Oya quea pame nee acui ca'a quea ja'a nee jama, equi yamajjana quea ca'a jama. Ecua oya quea jea nee nee.

⁵ Equijo acui ca'a eyamajjana cuana nequia cani cuaa. Oya jayojjaya ojjaña Jesusaja epeejji cuana Eyacuiñajjiya equi jayojja. ¡Equi yamajjana quea pame nee

jayojja jama pocue! ¡Quea ca'a nee nequicue Jesosa Quitojo! Jamajjeya ¡Eyacuiñajji nijje emimijji cuana pea'ai pocue, miquianaya! ¡Jiquio ecua Jodioja Eyacuiñajji nijje emimijji cuaa chaco ca poa Eyacuiñajji bihuiajji jamaya oe acue! ¡Eyacuiñajjijo chacocue quea pame nee! ¡Jamaya oe acue Jesosa Quito miquianajaya mimishi cuanajo mano'yonajejo! ⁶ Jamaya Eyacuiñajjija esohui Jesosa Quitojo etehue'yo yahuajo poa ba'a:

“¡Bacue oe! Eyaya oya babacaje enequi tiitii mee'yojji ecuea cuiñajji Sioni bajjanijo. Oya acui ca'a equi yamajjana quea pame nee, quea ca'a nee pea'ai jayojja jama. Ojjaña jaya jjeja nei onijje jjapeequiani quijje yeno'ama poaje”.

Jamaya yahuajo nei poa.

⁷ E'e, jjeja ojjaña Jesosaja epeeji poanija oya quea jea nee. E'e, Jesosa quea pame nee nee ma equi yamajjana quea ca'a jayojja. Pea cuanaja Jesosa boti'ama, ma equi yamajjana quea ca'a jayojja boti'ama. Jamaya Eyacuiñajjija esohui etehue'yo yahuajo nei Jesosa Quitojo poa ba'a:

“Ma equi yamajjana jayojja equi iyajji cuaa cajaa aca poa. Jamatii Eyacuiñajjiya ma equi yamajjana oe nei quea pame nequi tiitii mee cani, equi jaabicha ajja epojji”.

⁸ Jamaya cuanaya pea esohui Jesosa Quitojo etehue'yo poa ba'a:

“Quea huiso cuaa oya ma equi yamajjana jayojja cajaa acaje'yo. E'e, jiquio ecua acuihuojjajo ejiojjiije jjaquecuata'aqui majje jaabichajeaquiani jayojja jama poaje ojjaña jaya o cajaa ajji poaje'yo”.

Jamaya poa yahuajo. Onaaya Eyacuiñajjija esohui Jesosa Quitoja cajaa acani shajja'ajja sa po ajjaa jjejojo. Yahuajo nei Eyacuiñajjija eba poa jama ba'a: “Oya cuana ecuea esohui shajja'ajja sa po ajja poaje. Jamaya capo'yahua” poa.

⁹ Miquianaya ca ca Eyacuiñajjija eabaca ojaya epeeji cuana epojji, onijje emimijji ojjaña cuanajo. Eyacuiñajjija epeeji cuana quea pame nee poanaje miquianaya. E'e, Eyacuiñajji ojjaña emeshi mese cuana huoojeajji poani. Miquianaya babaca ca poa ma ohua huohui ca poa ehuhuijji. Jamajjeya miquianaaya huohuiaña jama ba'a: —Eyacuiñajjiya eseya babaca canaje. Mimishi cuana cuijea ca'yajje eseya ba'e mee cani quea ja'a nee nee, de.

E'e, yahuajo miquianaya ba'ya poa quea mimishi. Jjeja ca chojja. ¹⁰ Yahuajo Eyacuiñajjija epeeji pojjeama poa. Jjeja ca ca miquianaya ojaya epeeji cuana poanaje. Yahuajo mi jaahuanajji chama' poa Eyacuiñajji miquianajaya boti'amajojo. Jjeja ca ca Eyacuiñajjiya miquianaya jaahuana cani quea pame nee. Onijje jjapeequianijo, miquianajaya Emeshi Mese nei oya poani.

Eyacuiñajjija echacojji poanijo miquianaya jama ba'e-cue ba'a:

¹¹ Ecuea epeeji cuana, ¡shajja'ajjacue mo! Miquiana ca ca pea, ojjaña quea mimishi ojjaña meshi cuanajo ba'e jayojja jama pojjeama. Miquianajaya meshi eyajo yani. Jiquio meshijo ani tiitii ajja. Jamajjeya ja'a

quea mimishi ba'ejji! Mimishi cuana amajje miquiana-ya quea tai nequi tiitii'yo chana'. ¹² Jesosaja epeeji pojjeamaa miquianajaya eba'e pame ba neinei cani. Jamajjeya ¡quea pame nee atiitiicue! Oya cuana miquianajo siajje poani jama ba'a: —Jesosaja epeeji cuana quea mimishi.

Jamatii miquianajaya eba'ejji quea pame nee ba majje ma dejja cuanaa huohui caje Jesosa Quito poe o'oyajo jama ba'a: —Eyacuiñajjiya ojaya epeeji cuana quea pame ameesahua ca'yonaje —poaje ojjaña.

¡Miquianaja emeshi meseja esohui shajja'ajjacue!

¹³ Epeeji cuana, ¡miquianaaya Jesosaja epeeji poanijo emeshi mese cuaa huohui cani jayojja jama acue! Jamajjeya miquiana ba majje Jesosa Quito niñeba ajja poaje. E'e, pea cuanaja emeshi mese ehoojeajji pojjeama. Jamajjeya jaya shajja'ajjacue! ¹⁴ Emeshi meseja ojaya echacojji cuana huoojea cani ojjaña jaahuanaa. Jamajjeya oya cuana poeyani mimishi cuana napaa. Ojjaña quea pame poani nijje ca ca quea bihui nee poani. ¹⁵ Miquianaaya quea pame nee añajoya, shajjama' cuana esohui e'e nei pojjeama huohui pajea caje'yo. Jamaya Eyacuiñajji sa poani.

¹⁶ Yahuajo miquianaaya mimishi cuana a'yonaje, eme jeyo'yo jayojja jama poanaje. Jjeja ca ca Jesosa Quitoja ejeyo'yo jaa pichojea ca'yani jayojja jama amee cani. Jamatii, ja'a jama pojji ba'a: —Jesosaa eya epichojea'yo jayojja jama po mee ca'yani. Jamajjeya jeyaya jamatii mimishi ca'a majamaja'yahua! —a'a jamaya pojji! ¡Eyacuiñajjija echacojji quea pame cuana pocue! ¹⁷ ¡Pea cuanajo a'a maimajji! ¡Ojjaña Jesosaja epeeji cuana quea boti nee acue! ¡Eyacuiñajjija esohui jama acue quea bihui nee! ¡Miquea emeshi meseja huohui canijo shajja'ajjacue pea'ai!

Jesosa Quito quea nee nee poanaje jamatii oja Chiija esohui jayojja jama poanaje ¡Jesosa jayojja jama pocue!

¹⁸ ¡Bacue! ¡Mique emeshi meseja esohui shajja'ajjacue quea bihui nee! ¡Miquianajaya emeshi mese quea pameja esohui jayojja jama pocue! ¡Miquianajaya emeshi mese quea tecueja esohui jayojja jama acue pea'ai! ¹⁹ Miquianaaya quea pame chacoajo, e'e pojja'a echacomeejji quea tecue miquiana nijje poani. Jamatii ¡Eyacuiñajjija esohui ba majje quea bei pocue! Jamaya quea pame. ²⁰ Quea pame nee chacochoajo, miquianajaya emeshi meseja miquianaya quea yeno po mee caje'yo pojja'a. Jamatii Eyacuiñajjiya miquianajo huohui caje jama ba'a: —Miquianaya ecuea epeeji cuana quea pame.

Quea tai miquiaa chacome ajo ca ca miquianajaya emeshi meseja napa caje. Jamatii ¡catecuea cahua quea tai miquiaa chaconajejaya!

²¹ Jesosa Quito esejaya mimishijo quea nee nee poanaje. Jamajjeya Eyacuiñajjiya eseya huohui cani jama ba'a: —¡Jesosa Quito jayojja jama pocue! Oya quene-

quene cuaji ajja poa. Quea bei nee. ¡Jamaya pocue mi-quianaya!

²² Yahuajo nei esohui huohuijjiya esohui tehue ca poa Jesusajo jama ba'a: "Oya mimishi'ama. Oya siajje-pojji pojjeama pea'ai". ²³ Pea cuana Jesusa Quito nije mimijajajo, onije mimijaji ajja Jesusa poa. Onaaya Jesusa Quito napa canaje. Jamatii oya tecueajea jjima. Chojja: —Ecue Chii, oya cuana ca ca enije quea mase poanijo, ¡cajaa a'yocue! —jamaya ajjima Jesusaja.

Jama ca ca oe poanaje ba'a: —Ecue Chii, miya quea pame nee. Deija cuana quea mimishi poani ba majje oya cuana quea nee nee po meeje'yo quijje, miyaya —Jesusa poanaje.

²⁴ ¡Jamaya capo'yahua! Jesusa Quito eseya mimishi cuanajo mano'yonaje acui ecueata'apeejo. Oya quea nee nee poanaje eseya mimishi cuijea'yojji. Jamajjeya eseya mimishi pajea mee ca'yani. Cuanaya ojo eseya Eyacuiñajjiya esohui jayojja jama po tiitii mee caje'yo quea pame nee. Jesusa Quito cuiasejjajea canaje cuaa ejee ejeapashajjajaa. Quecua ca'yonaje. Ma ecuiasejjajo, equecua'yojo pea'ai eseya quea boejea po mee canaje Jesusaa. ²⁵ Yahuajo miqianaya ñajjajja oe nei ecuaquisho'yo jayojja jama poanaje. Jjeya Jesusa Quito ñajjajja cuiñajji jayojja jamaa miqianaya sa'ajja'yo majje jjeshe ca'yonaje ejaahuanajji.

¡Yahue, ehuanase cuana pea'ai, ba'ecue quea pame!

3 Eyaya epona cuana jama aña ba'a: ¡Quea pame nee ba'ecue! Ehuanase cuana, ¡miqianajaya yahue cuana shajja'ajjacue! E'e pojja'a miquea yahue Jesusaja epeeji pojjeama. ¡Jamatii ohua huohui cani jayojja jama acue! Jamajjeya miya quea pame ba'ani ba majje miquea yahue Jesusaja epeeji poaje'yo jamatii, Jesusajo huohui majamaja jjima. ² E'e, miya quea pame poanijo, miyaya oya shajja'ajjañaajo pea'ai, yahue Jesusaja epeeji poaje pojja'a. ³ A'a jjashahuabaquijji jama ba'a: —Eya aquiana quea pame huosho'yo majje quea pame poaje. Eyijji quea pame yijje. Daqui quea nahue huoshoje. Ecuea sao ao ijjiaca'a meeje quea pame. Jamajjeya eya quea pame nee poaje.

⁴ Chojja. Quea ja'a nee jjashahuabaquianijo, mimishi'ama poani pea'aijo miqianaya quea pame nee poaje. Jamaya Eyacuiñajjiya quea boti nee nee. Jamajjeya ¡quea bei, tecue'ama, quea pame nee pea'ai pocue! ⁵ E'e, yahuajo nei epona cuana Eyacuiñajjiya epeeji poanijo ojaya esohui jayojja jama poa. Yahueja esohui shajja'ajja ca poa pea'ai. Jamajjeya ma epona cuana yahueja quea boti nee nee poa. ⁶ Yahuajo nei epona Sana bajjani quea pame nee poa. Ojahueya Amajamaa huohui cani jayojjaya jama aca poa, Sanaa. Ojahue nijje jama poa ba'a: —Miya ecueahue, e huoojeajji.

Epona cuana, ¡miqianaya quea pame nee po sa poanijo Sana jayojja jama pocue quea pame nee! ¡Jesusa nije jjapeequicue mete'ama nei pea'ai!

⁷ Yahue cuana, ¡shajja'ajjacue mo pea'ai! Epona cuana ca'a'ama pishanajo, ¡ehuanase cuana jaahuanacue quea pame nee! Eyacuiñajjiya yahue cuana, ehuanase cuana pea'ai ba'e tiitii mee caje'yo eyajo. Jamajjeya

¡ehuanase cuana quea boti nee acue! Jamaya poanijo, Eyacuiñajjiya shajja'ajja caje miqianaya onije mimianijo.

Pea cuaa Jesusaja epeeji napa caje pojja'a

⁸ ¡Jjeya pea esohui shajja'ajjacue! ¡Ojjaña miqianaya Eyacuiñajjiya esohui jayojja jama pea nije jjapeequicue! ¡Ojjaña Jesusaja epeeji cuana quea jea nee acue! ¡Huapa pojjeama jayojja acue! ¡Quea bei pocue ojjaña cuana nije; tecue'ama pocue! ⁹ ¡Pea cuana miqianaya nije quea mase poanijo, a'a onije quea mase poa'ajji! ¡Minijje mimijajianijo, a'a ona nije mimijajijji pea'ai! Chojja. ¡Quea pame nee pocue! Jamaya Eyacuiñajjiya miqianaya huoojea canaje. Miqianaya iyaa canaje quea bihui nee epojji. Jamajjeya ¡pea cuana nije quea pame nee pocue! ¹⁰ Eyacuiñajjiya esohui etehue'yo yahuajo nei jama poa ba'a:

“Quea pame ba'e sa poanijo, quea bihui nee ba'e sa poanijo pea'ai ¡esohui quea mimishi epojji a'a huohuijji! ¡A'a siajje pojji!

¹¹ ¡Mimishi pajea'yo majje quea pame nee oe atiitii-cue! ¡Pea cuana nije quea bei po tii tiicue pea'ai!

¹² Eyacuiñajjiya esohui cuana jayojja jama quea pame añaajo, ohuaya miqianaya jaahuana cani quea pame nee. Cuanaya ohuaya miqianaya shajja'ajja caje'yo onije mimianijo. Ojjaña quea mimishi poani ca ca Eyacuiñajjiya tecuea caje'yo”.

Jamaya yahuajo nei tehue mee ca poa Eyacuiñajjiya.

¹³ ¿A'a miqianaya napa caje cuaa miqiaaya quea pame nee atiitiiñaajo? ¹⁴ E'e pojja'a. Jamatii Eyacuiñajjiya miqianaya quea bihui nee poa mee caje. Jamajjeya ¡a'a quea mete pojji! ¡A'a quea yeno pojji pea'ai! Quea bei jjashahuabaquicue jama ba'a: ¹⁵ —Jesusa Quito quea pame nee poanaje; eya ojaya ehuhui jayojja jama poaje. Oya oe nei ecuea Emeshi Mese nei yani.

E'e pojja'a miqianaya huohui'ajja caje cuaa jama ba'a: —¿Yajjaje acuae miya quea bihui nee jjashahuabaquiani so'o Eyacuiñajjiya miya ba'e tiitii mee caje'yo?

Jamaya acajje ¡huohuicue miqianajaya ejjashahuabaquijji quea pame nee Jesusa Quitojo! ¹⁶ ¡Quea bei nee oe huohuicue, tecue'ama! E'e, ¡Jesusaja epeeji poanijo ba'ecue quea pame nee! Jamajjeya miqianaya bicho'ama poaje pea cuaa niñeba cajje. E'e, miqianaya quea pame nee ba'yanijo, oya cuana quea bicho poaje mi niñeba majje. ¹⁷ Miquiaa quea pame añaajo, pea cuaa pojja'a nequiana napa caje. ¡Jamatii quea pame pocue! E'e pojja'a jamaya Eyacuiñajji miqianajo jjashahuabaquiani. Quea mimishi poanijo, pea cuaa miya cuia caje. ¡Jamaya ca'a cahua cuaa ca mimishi cuana! Jamajjeya ¡a'a quea mimishi pojji!

Shequi'yo majje Jesusaa ma yahuajo mano'yo cuana nequica huasijje sohuihuohuiqui canaje

¹⁸ ¡Bacue! Jesusa Quito mimishi'ama nei nei. Jamatii oya mano'yonaje mimishi cuana cuijea mee'yojji. Apoa aje mimishi cuijea ca'yonaje. Ohuaya miqianaya Eyacuiñajjiya epeeji cuana poa mee ca'yonaje. Oya Jesusa

mano'yajo Edojjoshahua Pameya oya shequi mee ca'yonaaje. ¹⁹ E'e, Jesosa Quito jjani yasijje ejeanobia jaajo ojaya edojjoshahua poquinaje ma yahuajo mano'yo cuana nequica huasijje esohui huohuiya jama ba'a: —E'e, iña mano'yonaaje mimishi cuijea'yojji, apoa anaje —aca poa.

Ma yahuajo nei mano'yo cuana poqui mee jjima poa eyahuasijje; ejeanobia jaa jayojja poa. ²⁰ Yahuajo nei mano'yo cuana Eyacuiñajji shajja'ajja sa po ajja poa. Noeya bishe ai quecua canijo, Eyacuiñajjiya shajjama' cuana ishoa'ajja ca'ya poa quea huiso shequiajame ache shono ohua mimishi pajea caje'yo ebajji nisho. Jamatii oe pojji cuana, me oejje pea beca peejjima hui-some, 8 huisome bishe ai yasijje dobiqúi majje hui'i'yo jjima poa johuijo. Johuiya oya cuana bishejo ba'e jeaj-je ca'ya poa quea pame nee.

²¹ ¡Bacue! Johui yahuajo nei poa jjeya ca jiquio jama ba'a: Jjeya oe dejjaa pea cuana Eyacuiñajji besa mee cani enajo. E'e, jiquio ecua dejja bishe ai dojjojo ani cuana johuiya jeajjee ca poa jayojjaya jama jjeya oe dejjaa pea cuana Eyacuiñajji besa mee cani Edojjoshahua Pame ona que dobiqúi'yajo. Jamajjeya ba'e tiitii mee cani Jesosa Quito nijje. Ena huasijje iñajeanobia cajje Jamatii meshi topo caje. Mimishi cuana ca ca eto-pojeajji pojjeama. Jamajjeya Eyacuiñajji nijje e'e jojo nei mimiajo, ohuaya esejaya mimishi cuana cuijea ca'yajje pea jjashahuabaquime po mee ca'yani. Jamaya Eyacuiñajjiya acaje'yo Jesosa Quito ma emano'yojaa shequi mee ca o'oya poajojya. ²² Jjeya nei Jesosa Quito eyajo Eyacuiñajjiya ebianeimijijje e'anioque ani. Ohuaya ojjaña Eyacuiñajjiya esohuidojojji cuana, esohuidojojji huoojeajji poani pea'ai huoojea cani quea pame nee ameeya. Ojjaña eshahua cuana quea mete poani Jesosa Quitohua tecuea cajje.

¡Pea jjashahuabaqui'yome pocue!

4 Jamajjeya Jesosa Quito jiquio meshijo nequi quea nee nee poanaje. Dejja oya napa canaje Eyacuiñajjiya esohui huohuijijjojo. ¡Miquianaya Jesosa Quito jama pocue! Eyacuiñajjiya esohui huohuiañajo quea nee poaje pojja'a. Jamatii quea nee poanijo ¡Jesosaja epeeji quea ca'a pocue, mimishi'ama! ² Jamajjeya ¡Jesosaja epeeji quea ca'a nee poaniya ojjaña ejjas-hahuabaqui'yojji quea tai pajea'yocue! ¡Eyacuiñajjiya ej-jashahuabaquiiji jayojja jama ba'e tiitiicue quea pame nee! ³ Yahuajo nei quea huiso shequiajajo miquianaya quea mimishi ba'e'yonaaje. Eshahuaja epeeji cuana jayojja ojjaña mimishi atiitii'yonaaje, miquianaaya. Ejjas-hahuabaquiiji quea mimishi nee nee poanaje. Ehuoo jaa tiitiinaje pea'ai. Ojee quea shajjaquiijo ijja'ijjianaje quea mimishi jjejojo. Ojee ishi'ishi tiitiinaje pea'ai. Eyacuiñajji nisho pea'ai miquianaaya bihuia majamajana-je. Eshahua nijje miminaje pea'ai. Jamaya quea tai nee nee miquianaaya atiitiinaje yahuajo nei nei. ⁴ Jjeya ca ca miquea epeeji quea mimishi nijje jjapeequi'yo ajja onijje quea mimishi epojji. Jamajjeya oya cuana miquiana nijje quea tecue poani. Miquianaya niñeba cani pea'ai onijje mi jjapeequiajo. ⁵ Jamatii. Quijje ma dejja

mimishi cuana Eyacuiñajjiya o cojja neiyo nequi mee caje ojaya mimishijo huohui epojji. Majoya quea nee nee po mee caje'yo tii tii. Ojjaña etiiquiana mimishi yahuajo mano'yo cuana quea nee nee po mee caje'yo, ojjaña jjeya quea mimishi poani quea nee nee po mee caje'yo pea'ai, Eyacuiñajjiya. ⁶ Jamajjeya Eyacuiñajjiya esohui quea pame nee Jesosa Quito huohui mee ca'yonaaje ojjaña yahuajo nei ba'ya poa huasijje mano'yo jjimahua. Jamajjeya mano'yajo, oya cuana ba'e tiitii mee ca'yonaaje quea pame nee eyajo onijje. Jamatii ojjaña ma etiiquiana cuana mano'yonaaje dejja quea pame, dejja quea mimishi pea'ai.

Eyacuiñajjiya ojjana quea pame nee asahua cani

⁷ E'e, Jesosa Quitoja epoe o'oyajji beshahua nei apoa. Jamajjeya ijashahuabaquicue quea ja'a nee! ¡Ojaya esohui jama ba'ecue Eyacuiñajji nijje emimiji bicho'ama! ⁸ ¡Jiquio esohui shajja'ajja neineicue! ¡Ojjaña Jesosaja epeeji cuana quea jea nee nee acue! ¡Pea cuana quea jea nee poanijo onaja mimishi cuana pajea'yocue quene'ama! ⁹ Jesosaja epeeji cuana poe'yajo, ijjequinobiacue quea bihui neeya miquea equi yasijje aniya! ¹⁰ Eyacuiñajjiya ojjaña ojaya epeeji quea pame chaco meesahua cani ojo. Ojjaña ojaya epeeji pea jayojja jama chaco ajja. Peapea chacome ameesahua cani ojo ojjaña quea bihui nee eba'e meejji. ¡Ohuaya miquiana chaco meesahua canijo, ojjaña cuana quea bihui nee ba'e meesahuacue! Jama acue ba'a: ¹¹ Esohui huohui sa po majje ¡Eyacuiñajjiya esohui huohuicue! Pea cuana ba'e meesahua sa po majje ¡ba'e meesahuacue Eyacuiñajjiya miquiana ba'e meesahua canijo! Jamajjeya ojaya epeeji cuana quea pame nee poanijo ojjaña cuaa Eyacuiñajji bihuia caje: —E'e, Jesosa Quitohua esejaya mimishi cuana cuijea ca'yajo, quea pame nee onijje chacochoani —jamaya oya cabihuia tiitii cahua. ¡Oya ojjañaja Emeshi Mese quea ca'a nee capo tiitii'yahua pea'ai! ¡Jamaya capoahua!

Pea cuaa Jesosaja epeeji cuana napa caje

¹² Ecuea epeeji cuana, ¡shajja'ajjacue mo! ¡A'a quea yeno pojji pea cuaa miquianaya janobajjima napa canijo! A'a jjashahuabaquiiji jama ba'a: —Eya ee nei quea nee nee poani Jesosa Quito nijje jjapeequianajo.

Chojja, pea cuaa napa cani quea huiso Jesosaja epeeji cuana. ¹³ Jamajjeya onaa napa cajje ja'a quea yeno pojji! ¡Quea bihui nee pocue Jesosa Quito yahuajo nei onaa aca poa jayojjaya jamaya miquianaya acani jjeya! Onaa napa cajje Jesosa quea nee poanaje pea'ai. E'e, miquianaya jjeya quea nee o jayojjaya poanijo quijje quea bihui nee poaje Jesosa Quito quea pame nee nee, quea ca'a nee nee poe o'oyajo. ¹⁴ Jesosaja epeeji poanijo, pea cuana minijje mimijajajo ¡Jamatii quea bihui pocue! E'e de, Edojjoshahua Pame quea ca'a nee miquiana nijje nequi quea bihui nee miquiana po meejji. ¹⁵ ¡A'a quea mimishi pojji; a'a pea quecuajji; a'a siijji; a'a pea niñebajji pea'ai! ¡A'a jamaya pojji! Jamatii jamaya quea mimishi poanijo aje mi oe dejja etii

cuaa napa caje. Quea nee nee po mee caje. ¹⁶ Jesosa Quitoja epeeji poanijo ca ca oe pea cuaa miqianaya napa caje ¡jamatii a'a quea bicho pojji! ¡Eyacuiñajji bihuiaque jama ba'a: —Eyacuiñajji, eya quea bihui nee Jesosa Quitoja epeeji poanijo, jamatii onaaya eya napa cani —acue! ¹⁷ ¡A'a oe Jesusaja epeeji pojjeama jayojja jama ba'eji quea mimishi! ¡Bacue oe! Jjeya apoa. Jesosa Quito poeje'yo ojjaña cuanaja eba'ejjijo huohuiya. Ojjaña joya quea ja'a nee ba'yani quea pame nee acaje poe'yo majje. Ojjaña quea mimishi poani aje oe quea nee nee po mee caje'yo. Ebionei Jesosa Quitohua ojaya epeeji cuanaja eba'eji cuanajo huohui caje. Majoya ojaya epeeji pojjeama quea mimishi nee tecuea caje. Ojaya epeeji quea mimishi tecuea cajo, ¡ache sohui tecue nei neiya huohui caje ojaya epeeji pojjeama! Tecuea neinei caje'yo. ¹⁸ E'e, Eyacuiñajji esohui etehue'yo jama poa ba'a:

“Quea camaja nee Quitoja epeeji neija mimishi cuijea'yojji, eyahuasijje edobiqui mee'yojji pea'ai. Jamajjeya Quitoja epeeji pojjeama, deja quea mimishi pea'ai ¿yajja shai poaje? ¡Eyahuasijje edobiqui mee'yojji pojjeama ca coma, de!”

¹⁹ Jamajjeya deja mimishiya eseya Jesusaja epeeji cuana napa cajo onijje jjapeequianijo ¡jamatii Eyacuiñajji esohui a'a pajea'yojji! Jamaya Eyacuiñajji ejjashahuabaqui'yojji. Jamajjeya ¡quea pame nee nee atiitiecue! E'e, Eyacuiñajji eseya pana ca'ya poa. Ojaya esohui jayojja jama acaje'yo e'e jojo nei, epajea'yojji pojjeama Eyacuiñajji.

Penoja esohui etehue'yo Jesusaja epeeji jaahuanajji cuana huasijje

5 Jjeya eyaya Jesusaja epeeji jaahuanajji cuana huohuiaña. Eya ca iña Jesusaja epeeji cuana jaahuanajji pea'ai. Yahuaajo pea cuaa Jesosa Quito cuia caqui eyaya oya ba poa. Jesosa Quito poe o'oyajo, eya o jayojja quea pame nee, quea ca'a nee nee poaje'yo. Jamajjeya eyaya tehueña jama ba'a: ² ¡Miquianaaya Jesosa Quitoja epeeji cuana jaahuanajji poaniya oya cuana jaahuanacue quea pame nee! Eyacuiñajjiya miqianaya huoojea canaje ojaya epeeji cuana jaahuanajji. Jamajjeya ¡quea bihui nee oya cuana jaahuanacue, tecue'ama! Jesosa Quito miqianajaya quea jea nee nee jojo chacocue quea bihui nee, ejjesheji quea huiso sa poanijo pojjeama! Eyacuiñajjiya miqianaya huoojea ca'yonaje ojaya epeeji jaahuanajji. ³ Jamajjeya ¡o huoojea'yojji quea tecue jama jayojja a'a pojji! Jamajjeya Jesusaja epeeji cuaa miqiana ba majje quea pame atiitii caje pea'ai; miqiana jayojjaya poaje. ⁴ E'e, Jesosa Quito ojaya epeeji cuana jaahuanajji huoojeajji poani. Jamajjeya poe o'oya majje ohuaya eseya o jayojja quea pame nee, quea ca'a nee po mee caje'yo.

⁵ Cuanaya Jesusaja epeeji jjeya nei onijje jjapeequiani cuana eyaya huohuiaña jama ba'a: ¡Jesusaja epeeji jaahuanajji cuana shajja'ajjacue! ¡Quea bei pocue!

Yahuaajo nei Eyacuiñajji esohui etehue'yo jama poa ba'a:

“Beca cuana quea ca'a poso jjabaquianijo Eyacuiñajji oya cuana ba cani quea mimishi. Jamajjeya ohuaya oya cuana jeabichajea caje'yo. Pea quea bei poani ca ca jaahuana caje'yo, Eyacuiñajjiya”.

Jamaya yahuaajo nei poa. ⁶ Jamajjeya ¡Eyacuiñajji ejjashahuabaqui'yo jayojja jama acue quea bei nee! Oya quea ca'a nee enequi tii tii. Jamajjeya quijje ohua apoa acaje miqianaya ona jaahuanajji quea ja'a nee po mee caje'yo. ⁷ Jjeya oya jjashahuabaquiani miqiana jaahuanajji. Jamajjeya mete'ama jjashahuabaquicue ojo jama ba'a: —E'e jojo nei Eyacuiñajjiya eya jaahuana caje'yo.

⁸ ¡Quea jjashahuabaqui ja'a nee pocue! ¡Ojjaña ba neineicue! Edosiquiana quea mase poqui tiitiani ojjaña dasiaa. Jiquio ecua ibia quea mase po ayequiani aquiana sa'ajjaa jayojja jama Edosiquiaa eseya sa'ajja cani edasijji. ⁹ E'e, miqianajaya eba Jesusaja epeeji cuana ojjaña meshijo ba'e Edosiquiaa napa mee caje quea nee poani miqiana jama. Jamajjeya ¡Jesusaja epeeji quea ca'a nee pocue! ¡Ojaya esohui a'a pajea'yojji! ¹⁰ E'e, oe pojji cahuime miqianaya quea nee poaje Jesosa Quito nijje jjapeequianijo. Jamatii miqianaya ojaya epeeji cuana quea ja'a nee po mee caje'yo. Ohuaya miqianaya quea ca'a nee nee po mee caje'yo. Ojaya esohui cuana jayojja jama ba'e tiitii meesahua caje pea'ai. E'e de, Eyacuiñajjiya, ese jaahuanajjiya miqianaya babaca ca'ya poa. Miqianaya Jesosa Quito nijje jjapeequianijo, o jayojjaya quea ca'a nee, quea pame nee nee po tiitii mee caje'yo.

¹¹ ¡Eyacuiñajji ojjaña huoojea'yojji oe nei quea ca'a nee nee po tiitiani! ¡Jamaya capoahua!

Penhua quea bei tehue cani Jesusaja epeeji cuana huasijje

¹² Ecuea epeeji Simano bajjani enijje nequi. Ecuea eba oya Jesosa nijje jjapeequiani quea pame nee. Ohuaya jiquio esohui etehue'yo biso nei tehue meesahua cani. Ecuaaya miqiana quea tehueña quea ja'a nee, quea bihui nee nee pea'ai ejjapeequi meesahuajji. Ecuea eba e'e jojo nei Eyacuiñajjiya miqianaya quea pame jaahuana cani. Jamajjeya ¡onijje jjapee tiitiquicue!

¹³ Jesusaja epeeji cuana jiquiojo, Babenonia cuiñajji jayojjajo ba'e Eyacuiñajjiya babaca ca'yonaje ojaya epeeji nei epojji, miqiana jayojjaya. Oya cuana, Macoso ma ecuea ebacua ejja jayojja pea'ai miqianajo jjashahuabaquiani. —¿Achajja ami ani so'o? —ohuaya huohui'ajja mee cani.

¹⁴ ¡Ojjaña Jesusaja epeeji cuana jomajo ba'e nijje quea bei nee mimi tiitiecue! Onijje jjapeequianijo, ¡Jesusa Quitohua miqianaya quea ja'a nee caba'e meesahua cahua!

Eyaya, Peno bajjaniya jiquio esohui tehue'yonaje. Mahuiso. Apoa.

2 PENO

Penohua tehue ca o'oyanaje Jesosaja epeeji cuana huasijje

1 Eyaya Simohui Peno bajjaniya miquiana huasijje tehueaña. Eya Jesosa Quitoja esohui huohui ayequijji poani. Ohuaya eya huoojea ca'yonaje ojaya esohui huohuiya. Oya Jesosa Quito e'e jojo nei Eyacuiñajji, esejaya mimishi cuijea'yojji poani. Quea pame nee nee ojaya esohui. Ohuaya miquianaya ojaya esohui cuana jayojja jama amesahua cani. Mimishi cuana cuijea ca'yajje ohuaya ecuanaya, miquianaya pea'ai quea boejea po mee ca'yonaje. ² E'e, Eyacuiñajji, esejaya Emeshi Mese nei Jesosa Quito pea'ai miquianajaya eba nei nei. Jamajjeya jahuaya miquianaya cajaahuana cahua quea pame nee! ¡Quea bei nee capo mee cahua pea'ai!

Eyacuiñajjiya eseya babaca'yo majje iyaa canaje

³ E'e, Jesosa quea ca'a nee nee ba majje ohuaya eseya ojaya esohui jayojja jama ba'e meesahua cani quea pame nee. Esey a iyaa ca'yonaje ojaya epeeji nei epo meeji, o jayojja jama epojji. Quea ca'a nee, quea pame nee nee po mee cani pea'ai. ⁴ Jamajjeya ohuaya eseya iyaa majje huohui canaje jama ba'a: —Miquianaya e jayojja quea pame nee poaje e jayojja quea ca'a nee epo'yojji —aca poa.

Jamajjeya Eyacuiñajjiya ejjashahuabaqui'yojji jayojja jama jjashahuabaqui'yome poaje'yo. Eseyaya ejjashahuabaqui'yojji quea mimishi, quea tai pea'ai pajea mee caje'yo. E'e, eseya pea quea mimishi jayojja pojjeama.

⁵ Jamajjeya miquianaya Jesosa Quito nijje jjapeequianajo ¡quea pame ba'ecue! ¡Eyacuiñajjiya esohui cuana ba neineicue pea'ai! ⁶ ¡Quea ja'a nee jjashahuabaquicue! ¡Jesosa nijje jjapee tiitiquicue! ¡A'a onaa napa cani jjabaquijji! ¡Eyacuiñajjiya ejjashahuabaquijji jayojja jama jjashahuaba tiitiquicue! ⁷ ¡Eyacuiñajjiya epeeji cuana jaahuanacue quea pame nee! ¡Ojjaña quea jea nee nee acue pea'ai! E'e, ¡quea boti nee acue! ⁸ Jamajjeya miquiaaya jamaya atiitiañajo Emeshi Mese Jesosa Quitoja echacojji quea ja'a nee nee poaje, oya miquea eba poanajo. ¡Jesosa Quitoja esohui jama acue pea'ai! ⁹ Ojjaña jiquio esohui jama a'ajja aje oe cojjama' jayojja de, quea cojja jama jayojja poani. Quea jjashahuabaqui ja'a pojjeama. Jamajjeya pajea ca'yani ma Jesosa Quitohua yahuajo ojaya mimishi cuana cuijea ca'yonaje.

¹⁰ Jamajjeya epeeji cuana, ¡quea ja'a nee po tiitucue Jesosa Quitoja epeeji poanajo! Eyacuiñajjiya yahuajo miquianaya iyaa ca'ya poa quea ja'a nee eba'e'yojji. Cuanaya oya yahuajo jjashahuabaquinaje jama ba'a: —Miquianaya ecuea epeeji nei poaje'yo.

Jamajjeya miquianaya Eyacuiñajjiyo quea pame nee atiitiañajo quea mimishi epo o'oyajji pojjeama. ¹¹ Eyacuiñajjiya miquianaya dobiqumee caje'yo ojaya cuiñajji eyacua huasijje quea bihui nee. Ma cuiñajjiyo Emeshi Mese Jesosa Quito ojjaña huoojea'yojji oe nei poaje'yo tii. Ohuaya miquianaya onijje ba'e tiitii mee caje'yo.

Penohua esohui e'e nei huohui ca o'oyanaje

¹² Jiquio esohui e'e nei miquianajaya eba. Jamaya quea bihui nee atiitiañajo quea pame nee poani. Jamatii eyaya maya huohui majamajaña. Jamajjeya miquianaaya pajea'yo ajja esohui e'e nei. ¹³ Jiquio meshijo eshe nequiya jjeya nei eyaya miquianaya jjashahuabaqui tiitii meeje'yo ma esohui cuanajo. Jamaya quea pame miquianajo. ¹⁴ E'e, esejaya Emeshi Mese neiya, Jesosa Quitohua yahuajo pishana eya huohui canaje jama ba'a: —Peno, quijje pishana miya manaje'yo.

¹⁵ Jamajjeya jjeyahua nei eyaya miquiana huasijje esohui e'e nei huohui majamajaña miquianajaya epaje'yojji pojjeama e mano'yajo.

Jesosa Quito jiquio meshijo nequi Penohua ba ca poa

¹⁶ Ecuaaya miquianaya huohuinaje Jesosa Quitoja epoe o'oyajjiyo. Oya quea ca'a nee nee poeje'yo, Emeshi Mese nei poani. Ecuaaya oya Eyacuiñajjiya Ebacua Eja banaje ecojjaa. Jamajjeya ecuanajaya esohui e'e nei ojo, etiikianaja esohui yahuajo jayojja jama pojjeama; ojaya yahuajo ba jjimajo ca ca esohui e'e nei pojjeama. ¹⁷ E'e, eseya Chii ai Eyacuiñajji eyajo ani Jesosa Quito nijje miminaje quea pame nee nee. Jesosa Quito oe nei quea ca'a nee nee poanajo miminaje Eyacuiñajji. E'e, Jesosa Quito nijje nequiya eyaya Huani nijje, Jacobo nijje nequiya pea'ai shajja'ajjanaje Eyacuiñajji eyajo quea ja'a nee Jesosa nijje mimiani. Jama poanaje ba'a: —Jesosa ecuea Ebacua Eja oe nei quea pame nee. Oya ecuea quea jea nee nee. Ohuaya ecuea ejjashahuabaquijji jayojja jama acani —Eyacuiñajji poanaje.

¹⁸ Eyacuiñajjiya ma esohui cuana eyajo huohui canajo, ecuaaya shajja'ajjanaje Jesosa nijje eyiyo biajje nequiya. Eyijojo Eyacuiñajji shajja'ajja majje ecuaana jjashahuabaquinaje jama ba'a: —Eyacuiñajji eyijojo miminaje e'e jojo nei. Jamaya quea pame.

¹⁹ Jamajjeya ecuanaja esohui Jesosa Quitoja epoe o'oyajjijo baña quea ja'a nee. Eyacuiñajjiya esohui huohuijji cuanaja esohui yahuajo e'e nei poa. Jamajjeya ¡shajja'ajjacue! Ma esohui yahuajo nei cuaquijji jayojja jama poa. Jiquio ecua cuaquijjiya mecalle quea apo neejo jeaja'a cani jayojja jama jiquio esohui e'e neiya miqianaya Jesosa ba meesahua caje, jamatii esohui e'e nei pojjeama huohui cani cuaa quea huiso. Miqianaya Jesusaja poe o'oyajjijo quea ja'a nee baje ma esohui e'e nei ba neinei majje. Jamatii Jesusaja epoe o'oyajji ca ca jiquio ecua eshequi huiyejji jaa-sohua majje ja'a'aja'a'a pojebeani jama jjashahuabaqui meemeya se acaje Jesusaa.

²⁰ ¡Ba neineicue jiquio esohui! Eyacuiñajjiya esohui huohuijji yahuajo nei ba'eca poa esohui tehue mee ca poa. Ma esohui cuana onajaya ejjashahuabaquijji pojjeama, Eyacuiñajjiya ejjashahuabaquijji. ²¹ E'e, yahuajo nei dejja cuanaja Eyacuiñajjiya esohui jamatii tehue jjiima. Onajaya ejjashahuabaquijji huohui jjiima pea'ai. Chojja. Edojjoshahua Pameya Eyacuiñajjiya epeeji quea pame nee cuana ojaya esohui huohui meesahua ca'ya poa.

Esohui huohuijji nisho cuana siajje poani Eyacuiñajjiya esohuijjo

2 Yahuajo nei Eyacuiñajjiya esohui huohuijji nisho cuana siajje poa pea cuana huasijje. Jjeyahua nei pea esohui huohuijji nisho cuana miqiana que siajje poaje Eyacuiñajjiya esohuijjo. Ohua siajje acaje dejja cuana poquiquehua chana' cuaqui yasijje. Eseyaya Emeshi Mese nei, Jesosa onaja mimishi cuanajo mano'yonaje. Jamatii oja sohui siajje acanijo esohui huohuijji nishohua Jesosa cajaa acani. Jamajjeya Eyacuiñajjiya oya cuana quea nee nee po mee caje'yo, ojjaña esohui huohuijji nisho. ² Ona siajje poanijo, quea huiso dejja cuana quea mimishi nee poaje o jayojjaya. Jamajjeya esohui huohuijji nisho cuana siajje poani jojoya pea cuana Jesusaja esohui cuanajo mimi-jajije'yo. ³ Cuanaya esohui huohuijji nishohua quea huiso ejjeshejji sa poanijo miqiana que ojaya ejjashahuabaqui'yojji e'e nei pojjeama huohui caje. Quea bejjo jeaa jjejojo miqianaya dasia caje; dasia majje bejjo quea huiso chicha caje.

Yahuajo nei Eyacuiñajji jjashahuabaquia poa esohui huohuijji nisho napajji. Jama poa ba'a: —Esohui huohuijji nisho cuana eyaya baña. Eyaya oya cuana epajea'yojji pojjeama; quea nee nee po meeje'yo e'e jojo nei.

⁴ ¡Bacue oe! Yahuajo nei nei esohuidojojji cuana eyajo quea mimishi poa. Jamajjeya Eyacuiñajjiya oya cuana quea huesha nee nee jea ca poa, quea misi nee nee yasijje jeajea ca'ya poa quea nee nee epoiji. Jomajo oya cuana ecuaya meequi'yojji pojjeama. Ejeyo'yo jama ani, de. Quijje Jesosa Quito poe o'oyajo, Eyacuiñajjiya ma esohuidojojji quea mimishi cuana tecuea nei nei majje jeajea caje'yo cuaqui yasijje quea nee nee epo'yojji tii tii.

⁵ Yahuajo nei nei ojjaña quea mimishi nee poanijo, Eyacuiñajjiya ena quea quemo nee nee huoojea ca poa; ojjaña mimishi cuana hui'i mee ca'ya poa. E'e, ojjaña meshi cuana ohuajea mee ca poa. Oe dejjaa Noe bajjaniya Eyacuiñajjiya esohui jayojja jama aca poa. Jamajjeya oya hui'i'yo ajja poa. Ojaya bacua ejja, oja ose-cuajana quea pame cuana pea'ai hui'i'yo jjiima pea'ai poa. Me oeje beca, 7 huisome cuana Noe niije ani Eyacuiñajjiya jaahuana ca poa.

⁶ Majoya ojjaña cuana Sonoma cuiñajjiyo ba'e, Jomoha cuiñajjiyo ba'e pea'ai quea mimishi nee nee poa. Jamajjeya Eyacuiñajjiya ma cuiñajji cuana quiyo jeyojeyo mee ca'ya poa. Chama'yo tii aca'ya poa dejja, equi, aquiana cuana pea'ai. Jamaya Eyacuiñajjiya ojjaña ba mee cani e'e jojo nei ohuaya ojjaña quea mimishi poani quea nee nee po mee caje'yo. Jamajjeya ojjaña quea mete mimishi epoiji pocue! ⁷ E'e, yahuajo nei Sonoma cuiñajjiyo quiyo'yo jjimahuajo Eyacuiñajjiya ojaya epeeji Noti bajjani Sonomajo ba'e huoojeacuaya ca poa cuiñajji esecue yasijje quiyo'yo jjiima epoiji. Notiya Eyacuiñajjiya esohui jama atiitii ca poa. Jamajjeya oya quea yeno nee nee poa ojjaña jomajo quea mimishi ba'yanijo. ⁸ Ma cuiñajjiyo ba'eya Notiya ba majamaja caninaje dejja cuana quea mimishi nee nee; quea shajjaquijjo tii tii poani shajja'ajja caninaje pea'ai. Ohuaya, Notiya ma Eyacuiñajjiya huohui ca poa jayojja jama aca poa. Jamajjeya quea yeno nee nee poa dejja cuana quea mimishi po tiitianijo.

⁹ Jamajjeya jjeja ecuanaja ba mee cani jama ba'a: Eyacuiñajjiya ojjaña quea pame nee poani jaahuana cani. Jamajjeya dejja mimishi cuanaja ojaya epeeji cuana quea mimishi epo meeji pojjeama. Ecuanaya ba mee cani jjeja nei pea'ai Eyacuiñajjiya ojjaña quea mimishi poani quea nee nee po mee caje'yo. Quijje Jesosa Quito poe o'oyajo, ojjaña mimishi cuana quea nee nee po tiitii mee caje'yo, Eyacuiñajjiya. ¹⁰ Pea cuana quea mimishi, quea tai jjashahuaba tiitiquiani. Jamaya oya cuana ba'e sa poani. Oya cuana emeshi mese cuanaja esohui shajja'ajja sa po ajja pea'ai. Jamajjeya Eyacuiñajjiya oya cuana quea nee nee po mee caje'yo.

Oya jayojjaya esohui huohuijji nisho cuana quea mase nee nee. Shajjama' pea'ai. Jesosa Quitoja esohuidojojji quea pame cuana niñeba cani mete'amaa jjejojo, bicho'amaa jjejojo pea'ai. ¹¹ Jamatii mimishi cuana ca'a'ama ojjaña. Eyajo Eyacuiñajjiya esohuidojojji cuana ca ca quea ca'a nee nee poani. Ma dejjaja ba jjiima acani pea'ai. Jamatii ohuaya esohui huohuijji nisho cuana jama niñebame ajjima acani ba'a: —Jesosa, jiquio esohui huohuijji nisho cajaa acue, cuiajea'yocue! —jamaya po ajja esohuidojojji cuana.

¹² Esohui huohuijji nisho cuana ca ca quea mase nee nee. Quea ja'a nee jjashahuabaqui ajja pea'ai. Jamatii ijjiacajji jjabahuonequi jjiima jama ba'yan. Jiquio ecua ijjiacajji tiyajo ojjaña sa'ajja cani equecua'yojji jayojja jama esohui huohuijji nisho quea nee nee po mee caje'yo Eyacuiñajjiya. E'e, oya cuana jjabahuejjaqui ajja nei nei. Eyacuiñajjiya esohuijjo niñeba cani quea quehuajojo.

¹³ Esohui huohuijji nisho cuaa pea cuana quea yeno po mee cani. Jamajjeya Eyacuiñajjiya oya cuana quea yeno, quea nee nee po mee caje'yo. E'e de, quea bihui nee jayojja oya cuana mimishi cuana a sa poani ojjaña pojajajo. Jamatii quea mimishi poani tii miquiana nijje ojee ijia sa poani Jesosa Quitoja bobi. Miquiana quea mimishi po mee sa poani pea'ai oya cuana. ¹⁴ E'e, esohui huohuijji nisho cuana epona mimishi cuana jea ba cani; onijje jaa sa poani. Jiquio ecua jejje ajja tii tii jayojja jama oya cuana quea mimishi po tiitiani, jjas-hahuaba tiitiquiani quea mimishi epojji. Jesosaja epeeji ca'a'ama quea mimishi po mee cani pea'ai. Quea dejja tai poanijo pea cuana dasia majje aquiana sii cani pea'ai. Jamajjeya Eyacuiñajji quea quene poani esohui huohuijji nisho cuana nijje. Yahuajo jashahuabaquinaje o huoojea'yojji cuaqui yasijje quea mimishi poanijo. ¹⁵ Esohui huohuijji nisho cuana Jesosaja ejiojijije poqui pajea'yo majje cuaquisho'yonaje eshahuaja ejiojji yasijje. Eyacuiñajjiya esohui huohuijji yahuajo nei ba'ya poa Beonija bacua ejja Banaami bajjani quea mimishi poa. Ejjeshejji quea huiso sa poanijo Eyacuiñajjiya esohui jama a sa po ajja poa. Banaami jayojja jama esohui huohuijji nisho cuana poani, quea mimishi nee nee, de. ¹⁶ Eyacuiñajjiya Banaami tecuea ca'ya poa yahuajo nei, mimishijo. Mapichi sisi mimi mee ca poa Banaami nijje, Banaami jayojja mimimeya poa. Mapichi sisiya tecuea cajje Banaami ojaya ejjashahuabaquijji quea mimishi pajea ca'yonaje.

¹⁷ Jjeya ojjaña esohui huohuijji nisho cuana ena eteohuejja nama'yo, ejoca'yo jayojja jama poani, cajaa ya'yo jayojja. Cuanaya bo poeanijo beniya dojocuaij canijo, ena chama' poaje. Eso' equecua'yo epohua'yojji pojjeama quea jabojajo. Jiquio ecua bo dojocuaij cani jayojja ena chama' jayojja jama ojjaña esohui huohuijji nishohua Jesosaja esohui quea ja'a huohuihuohui ajja. Jamajjeya Eyacuiñajjiya oya cuana cajaa acaje; quea nee nee po mee caje'yo; quea huesha nee nee, quea misi nee nee yasijje jeajea caje'yo. ¹⁸ Esohui huohuijji nisho cuanaja ejjashahuabaquijji quea quehua nee. Jamatii quea miminaa, bicho'ama poani. Oya cuana jashahuabaquiani quea mimishi. Pea cuana, ma yahuajo mimishi pajea'yojji poanaje quea mimishi po mee caje o'oya. ¹⁹ Esohui huohuijji nisho cuana mimishi pajea'yo ajja. Jamatii oya cuana siajje poani tii tii jama ba'a: —Ecuanaajaya esohui cuana shajja'ajja majje imiquianajaya ejjashahuabaquijji jayojja jama atiitiecue! —siajje poani.

Chojja, jamaya pojjeama. ¡Bacue! Ojjaña joya mimishi atiitijji poani Edosiquiana o huoojeajji poani. Quea pame nee poanijo ca ca Eyacuiñajji o huoojeajji poani.

²⁰ Jamajjeya beca cuaa mimishi pajea ca'yonaje; quea mase popajea ca'yonaje esejaya Emeshi Mese nei Jesosa Quito nijje ejjapeequijji. Jamatii onijje jjapeequi majje aje oe quea mimishi po o'oyanaje. Ojaya esohui shajja'ajja maja sa po'yo ajja poanaje. Yahuajo jama oya cuana ba'e o'oyanaje, Jesosaja epeeji pojjeama jama quea mimishi. Yahuajo Jesosa nijje jjapeequi jji-mahuajo oja mimishijo Eyacuiñajjiya oya cuana tecuea

caje. Jesosa nijje jjapeequi pajea'yajo ca ca tecuea nei-nei caje'yo. ²¹ Jamajjeya ojjaña joya Jesosaja esohui shajja'ajja majje pajea cani, quea mimishi po o'oyani Eyacuiñajjiya janobajjima nei tecueajea caje'yo. Quea nee nee po mee caje'yo. Pea cuanaja Jesosaja esohui shajja'ajja jjimahuajo quea mimishi poani Eyacuiñajjiya tecuea caje; quea nee pishana po mee caje'yo oja mimishi cuanajo. Esohui e'e nei Jesosajo shajja'ajja jjimajo mi tecuea nei-nei caje'yo. ²² E'e, jamaya acani cuaa ba'a: "Iñaehuaa bohuii majje bohuii ijia ca o'oyani. Cuanaya cuichi topo cajje cuichi quea boejea pepajo besaje o'oya". Jiquio ecua iñaehua, cuichi pea'ai jipoi yasijje poqui o'oyani jayojja jama beca dejja cuana poani; Jesosaja esohui shajja'ajja majje pajea ca'yani, poqui o'oyani mimishi yasijje.

Jesosaja Quito poeje o'oya; ma ecua ohuaya huohui ca poa jamaya e'e jojo nei poaje

3 Epeeji cuana, eyaya becanajjiijji pea'ai tehue'yo-me anaje ecuea esohui miquiana que. ¡Ecuea etehue'yo yahuajo, ecuea etehue'yo jjeya tehuejo pea'ai miquianaya jashahuaba tiitiquicue quea ja'a nee Jesosa Quitojo! ² ¡Eyacuiñajjiya esohui huohuijji quea pame cuanaja esohui yahuajo nei a'a pajea'yojji! Eseyaya Emeshi Mese nei Jesosa ese ba'e tiitii mee'yojji. ¡Ojaya esohui pea'ai a'a pajea'yojji! Ohuaya ojaya epeeji cuana huoojea ca'yonaje ojaya esohui huohuiya miquiana huasijje.

³ ¡Bacue jiquio esohui! Jesosa poe o'oya jjimahuajo pishana quea huiso quea mimishi poeje. Ojaya ejjashahuabaquijji quea mimishi nee nee poaje. Miquianaya soadojo caje Jesosaja epoe o'oyajji miquiaa huohuañajo. ⁴ Minijje mimijajije jama ba'a: —¡Dee! Yahuajo Jesosaa huohui canaje ojaya epoe o'oyajji. Jamatii poe'yo jjima. Jesosa siajje poani, de. Yahuajo nei nei ecuanaja etiquiana ba'ya poa meshi pana ca jeahuajo. Oya jayojjaya jama poani ojjaña jjeya nei. Jama tii tii. Poe o'oya ajja Jesosa —siajje poaje dejja mimishi cuana.

⁵ Oya cuana aje oe quea mimishi; Eyacuiñajjiya pana'yo cuana yahuajo nei pajea'yo sa poani. Yahuajo nei nei Eyacuiñajjiya ojjaña aquiana cuana eyajo pana ca'ya poa. Majameta cuana, ba'i, eshequi pea'ai pana ca'ya poa. Meshi cuana pana ca'ya poa. Aquiana cuana ojjaña meshijo pana ca'ya poa, dejja cuana pea'ai. Yahuajo nei nei chama' meshi poa. Ena nei ania poa. Jamajjeya Eyacuiñajjiya ena huosa mee ca poa. Meshi ani cooa poa. ⁶ Yahuajo nei Eyacuiñajjiya ena jjayehuejjequi mee ca o'oya poa. Ojjaña mimishi cuana ojjaña meshijo ba'e hui'ya poa. ⁷ Jjeya nei aquiana cuana eyajo nequi, aquiana meshi cuanajo yani pea'ai. Eyacuiñajjiya ojjaña aquiana nequi mee cani. Quijje ojjaña aquiana eyajo nequi, ojjaña cuana meshijo nequi pea'ai quiojea mee caje'yo. Chama'yo tii po mee caje'yo ojjaña aquiana cuana. E'e, Jesosa poe o'oyajo, ojjaña mimishi cuana quea nee nee po mee caje'yo quea mimishi poanaje sosejje, Eyacuiñajjiya. E'e, ojjaña quea mimishi poani quiojea tiitii nequije'yo cuaquijo.

⁸ Ecuea epeeji cuana, ipea esohui ecuea shajja'ajja-cue! ¡A'a pajea'yojji! Eyacuiñajji ba'e tiitiani. Jamajjeya quea huiso nee nee, mil shequiajame oe cahuime jayojjaya poani ojo, oya jayojjaya. ⁹ Eseyaya Emeshi Mese nei Jesosaja epajea'yojji pojjeama ojaya esohui o poe o'oyajji. Jamaya acaje ohuaya e'e jojo nei. Pea cuana siajje poani jama ba'a: —Jesosaa ojaya esohui pajea ca'yonaje, de; poe'yo ajja.

Chojja. Jesosa quea mase pojjeamaa jjejojo ishoa cani tii ojjaña cuanaja mimishi epajea'yojji. E'e, ese jeajea sa po ajja oya cuaqui yasijje. Quea boejea po mee sa acani ojjaña. ¹⁰ Quijje Emeshi Mese nei Jesosa poecuajije quea huiso ojo jjashahuabaqui ajja yanijo. Siipojji poecuajiani jayojja jama poecuajime Jesosa poaje. Oya poe o'oyajo, ojjaña aquiana eyajo chama'yo tii poaje; quiyojeyo'yo quea shajjaquiijo. Ojjaña meshi cuana, ojjaña aquiana meshijo nequi pea'ai quiyo'yo majje chama'yo tii poaje'yo. ¹¹ E'e, quijje ojjaña aquiana quiyojeyo caje'yo. Jamajjeya zae shai poaje miquianaya jjeja nei? ¡A'a quea mimishi pojji! ¡Ba'ecue quea pame nee nee! ¡Eyacuiñajji esohui jayojja jama acue quea bihui nee! ¹² ¡Jamaya pocue Jesosa ishoa'ajja poani! E'e, ¡jojo chaco tiitiecue! Jamajjeya Jesosa poecuajije jjeja nei pojja'a. Ojo chaco ajjajo, oya jjeja nei poe'yo ajja pojja'a, quijje pojja'a poeje'yo. Oya poe o'oyajo, ojjaña aquiana eyajo nequi quiyojeyo caje'yo. Ojjaña aquiana quiyojeyo'yo. ¹³ Yahuajo nei Eyacuiñajjiya huohui ca poa jama ba'a: —Quijje eyaya aquiana cuana eyajo panaje'yo eyacua. Meshi eyacua panaje'yo pea'ai eyaya. Jomajo ojjaña cuaa ecuea esohui jayojja jama atitii caje'yo quea pame, mimishi'ama —jamaya Eyacuinajji poanaje.

Ecuaaya ishoaña meshi eyacua, eya eyacuajo pea'ai de, quea boejea'yo eba'e'yojji.

¹⁴ Ecuea epeeji cuana, ¡bacue! ¡Miquianaya Jesosaja epoe o'oyajji ishoaño ba'ecue Eyacuiñajji esohui ja-

yojja jama! Jamajjeya Eyacuiñajjiya ba caje miquianaya ojaya epeeji quea pame nee. ¡Jesosa nijje jjapeequicue e'e jojo nei! Jamajjeya Eyacuiñajji miquiana nijje quea bei po tiitije'yo. ¹⁵ Jesosa quea tecue pocuaji ajja mimishi cuana nijje. Ishoa cani, jamajjeya mi poe'yani. Jamajjeya ijjeja onijje jjapeequi'yocue! Ohuaya eseya ba'e tiitii mee caje'yo onijje eyajo. Jamaya ecuanaja epeeji Pabohua tehue canaje pea'ai miquiana huasijje, ecuea etehue'yo jayojja. Jamaya Eyacuiñajjiya Pabo jjashahuabaqui meesahua ca'yonaje quea ja'a nee.

¹⁶ E'e, ecuea etehue'yo Jesosajo jayojja jama Pabohua tehue canaje quea huiso nee. Beca esohui ojaya esohui etehue'yo quea camaja ebajji. Jamajjeya beca cuana jjashahuaba quehuaquianijo quea ja'a nee huohui ajja Pabojja esohui etehue'yo. Oya cuana siajje poani esohuijo. Jamajjeya quijje Eyacuiñajjiya oya cuana quea nee nee po mee caje'yo.

¹⁷ E'e epeeji cuana, jamaya miquianajaya eba. Jamajjeya ¡a'a shajja'ajjaji siajjepojji cuanaja esohui! Oya cuana shajja'ajja majje jjashahuaba quehuaqui chana'. E'e, esohui huohui nisho cuana Eyacuiñajji esohui jayojja jama a sa po ajja. ¡O jayojja jama a'a pojji! ¹⁸ E'e, Jesosa Quitohua, esejaya Emeshi Mese neiya eseya quea boejea po mee'yo majje ba'e tiitii mee caje'yo onijje eyajo. ¡Ojaya epeeji quea ca'a nee nee po tiitiecue! Yahuajo miquianaya ojaya epeeji eyacua quea ca'a pishana poanaje. Jamajjeya oe pojji miquianajaya eba poanaje. ¡Ojjaña esohui cuana Jesosa Quitojo ba neinei poquiacue! Mahuiso ecuea esohui.

¡Ojjaña cuaa Jesosa Quito cabihuia tiitii cahua: —Jesosa Quito, miya quea pame nee nee —jamaya ca'a cahua!

Eyaya, Penohua jiquio esohui e'e nei cuana tehuejeyonaje. Apoa.

1 HUANI

Huaniya tehue canaje eba'e tiitii'yojijjo

1 Epeeji cuana, eyaya, Huaniya miquiana que esohui tehueaña Jesosa Quitojo. Yahuaajo nei nei meshi, aquiana cuana, dejja pea'ai pana coo jjimahuaajo oya yaña tii tiia poa. Jamajjeya Jesosa Quitohua eseya Eyacuiñajji ba mee cani, eseya ba'e tiitii mee cani pea'ai. E'e jojo nei eyaya oya shajja'ajjanaje ecue eshajjaa. Eyaya oya banaje ecue ecojjaa. O ba neinei majje eya quea bihui nee poanaje. Oya ese jayojjaya poanaje, yamijji. Jamajjeya eya onijje jjapeequinaje. ² E'e, Jesosa ese jayojja poeyanaje yamijji, ese ba'e tiitii mee'yohua. Eyaya oya banaje e'e jojo nei. Jamajjeya eyaya miquianaya jama huohuime aña ba'a: Yahuaajo nei nei Jesosa Quito yaña tiitiia poa Eyacuiñajji nijje, oja Chii nijje. Eseja Chii neiya Eyacuiñajjiya oya meshi yasijje huoojea canaje ese jayojja epojji, yamijji. Esejaya mimishi cuijea'yo majje ohuaya eseya cuana ba'e tiitii mee caje'yo onijje eyajo. ³ E'e, eyaya oya, Jesosa Quito banaje; ojaya esohui shajja'ajjanaje pea'ai. Jamajjeya aje jja mi oe eyaya miquianaya huohuiaña enijje ejjapeequi'yojji. Jamajjeya eseya Eyacuiñajji nijje, eseja Chii nei nijje jjapeequiani, oja Bacua Eija Jesosa Quito nijje pea'ai jjapeequi poquiani. ⁴ Jamajjeya jiquio esohui cuana eyaya tehueaña miquiana quea bihui nee nee po meeji. Jamajjeya Jesosaja epeeji poanijo quea bihui nee nee poaje'yo.

Eyacuiñajji quea ja'a nee nee enequi tii mimishi'ama

⁵ Epeeji cuana, eyaya Jesosa Quitoja esohui shajja'ajjanaje. Maya eyaya miquianaya huohuiaña jama ba'a: Eyacuiñajji quea ja'a nee nee poani tii. Jiquio ecua cuacuijjiya mecajje jjiinequianiya ojjaña jeaja'a cani jayojja jama ohuaya eseya cuana, dejja mimishi cuana quea ja'a nee jjashahuabaqui mee cani. Eyacuiñajji mimishi'ama tii tii, quea tai pojjeama; Eyacuiñajji quea apo pojjeama epojjajo jama tii oya ba'e. ⁶ Jamajjeya joya mimishi po majje quea apo jayojja tii ba'vani mimiani jama ba'a: —Eya Eyacuiñajji nijje jjapeequiani —Eyacuiñajji nijje jjapeequiani poso oya jjabaquiani, sijje poani.

Chojja. Jjapee neineiquiani pojjeama mi coma, jjadasiaquiani jja mi coma. Jiquio ecua se mecajje quea misijo poquiquehuani jayojja jama oya poani. ⁷ Eyacuiñajji ca ca quea ja'a nee nee poani tii, quea boejea nee nee. Jamajjeya Eyacuiñajji jayojja jama quea ja'a nee ba'vanijo eseya jjapeequiani quea pame nee Jesosaja epeeji cuana nijje. Jesosa Quitoja ena' cuayaqui'yo

majje oya esejo mano'yonaje. Jamajjeya onijje jjapeequianijo, eseja Chii Eyacuiñajjiya esejaya mimishi cuana cuijea ca poqui'vani.

⁸ Ojjaña joya jama poani ba'a: —Iña ca ca mimishi'ama —jamaya quea quehua jjashahuabaquiani. Jamaya jjabaquianijo Jesosa ojaya ba jjima nei nei.

⁹ Eyacuiñajji nijje mimiajo ca ca ohuaya esejaya mimishi cuana cuijea caje'yo. E'e, jama poajo ba'a: —Eyacuiñajji, eya quea mimishi poani. ¡Ecuea mimishi cuana cuijea'yocue! —jamaya mimiajo ohuaya ojaya esohui jayojja jama acaje'yo e'e jojo nei.

E'e, Jesosa esejaya mimishi cuanajo mano'yonajejo ohuaya eseja mimishi cuana cuijea'yo majje mimishi pajea meesahua caje'yo. Eseyaya quea boejea po mee caje'yo. ¹⁰ E'e, Eyacuiñajjiya jama aca poa ba'a: —Ojjaña cuana quea mimishi nee nee poani —ohuaya aca poa.

Jamajjeya ojjaña joya jama poani ba'a: —Chojja, iña ca ca mimishi'ama —jama poaniya sijjepojji. Eyacuiñajji sijje poani posoya acani pea'ai. Jamajjeya ojjaña joya jama poani Eyacuiñajjiya esohui etehue'yo ba po jjima jayojja poani.

Jesosa Quito esejo mimiani Eyacuiñajji nijje

2 E'e ecuea epeeji cuana, miquiana mimishi'ama po meesahuajji eyaya jiquio esohui tehueaña. Jamatii eseya quea mimishi poajo, Jesosa Quito esejo mimiani Eyacuiñajji nijje, oja Chii nijje jama ba'a: —Ecue Chii, eya mano'yonaje ecuea epeeji cuanaja mimishi cuana cuijea'yojji sosejje. Jamajjeya ja'a quea quene pojji onijje! —jamaya Jesosa poani.

Jesosa Quito ca ca oe mimishi'ama, quea pame nee nee. Jamajjeya Eyacuiñajjiya Jesosa onijje mimiajo shajja'ajja cani, jamaya acani esejo. ² E'e, Jesosa acui ecueata'apeejo mano'ya poa eseja mimishi cuana cuijea'yojji sosejje. Ojjaña cuana ojjaña meshijo ba'eca cuanaja mimishi cuijea'yojji sosejje Jesosa mano'yonaje.

¡Eyacuiñajji esohui jayojja jama ba'ecue!

³ E'e ecuea epeeji cuana, Jesosaja esohui cuana jayojja jama añajo eseya ojaya epeeji poani e'e jojo nei; onijje ba'e tiitiije'yo eyajo. Jamaya esejaya eba. ⁴ Beca cuana aje oe jama poani ba'a: —Eya ca iña Jesosaja epeeji poani —jama posoya jjabaquiani cuana.

Jamatii oya cuana aje oe Jesosaja esohui jayojja jama ba'e ajja. Jamajjeya oya cuana sijje poani. Jesosa ojaya ba jjima. ⁵ Ojjaña joya Eyacuiñajji quea jea nee nee

ajji poani ca ca ojaya esohui jayojja jama ba'yani. Jamajjeya ¡Eyacuiñajjija esohui jayojja jama ba'e tiitiicue Jesosa Quitoja epeeji quea ja'a nee epojji! ⁶ Jamajjeya ojjaña joya e'e jojo nei jama poani ba'a: —Eya Jesosa Quito nijje jjapeequiani —jamaya poanijo ¡quea pame nee nee caba'yahua, Jesosa Quitohua aca poa jayojja jama ca'a cahua! Jamaya ba'yanijo eseya e'e jojo nei ojaya epeeji jjabaquije.

¡Pea cuana quea jea nee nee acue!

⁷ Epeeji cuana, yahuajo nei Eyacuiñajjija esohui huohuijjiya esohui tehue ca poa miqianaja ebajji. Ma esohui miqianaaya shajja'ajjanaje Jesosa nijje jjapeequi jeahuaa. Ma esohui etehue'yo eyaya tehue o'oyaña miqiana jjashahuabaqui meeji. ⁸ Jamatii eyaya ma esohui tehue etii jayojjaya tehue o'oyaña miqiana huasijje jama ba'a: —¡Pea cuana quea jea nee nee acue!

Jiquio esohui jayojja jama aca poa Jesosaa; pea cuana quea jea nee nee aca poa. Yahuajo ojjañaja ejjashahuabaquijji cuana quea tai, quea quehua poa Eyacuiñajjija esohui e'e nei shajja'ajja jjimahuajo. Jjeya ca ca miqianaaya Eyacuiñajjija esohui jama pea cuana quea jea nee nee aña pea'ai. Ma esohui e'e nei cuaquijji jayojja jamaa ojjaña quea ja'a jjashahuabaqui meesahua cani. ⁹ Jamajjeya ojjaña joya jama poani ba'a: —Eya Jesosaja esohui jayojja jama ba'yani quea ja'a nee —jamaya poani aje oe sijje poani.

Jesosaja epeeji nijje quea quene nee poani tii tiijo quea mimishi nee ba'yani, Jesosaja esohui shajja'ajja nisho cani, Jesosaja epeeji e'e jojo nei pojjeama. ¹⁰ Ojjaña joya Jesosaja epeeji cuana quea jea nee nee acani ca ca quea ja'a nee nee ba'yani. Jesosa jayojja jama ba'yani. Jamajjeya ohuaya pea epeeji poquiquehua mee'yo jjima acani, quea mimishi po mee'yo jjima acani. ¹¹ Ojjaña joya Jesosaja epeeji cuana nijje quea quene nee nee poani ca ca quea mimishi tii ba'yani. Jiquio ecua se ecojja bebo poqui taiyani jama, ejiojji ba jjima jayojja jama oya cuana poani quea mimishi ba'yani jjejojo.

¡Jesosaja epeeji cuana etii, esho'i pea'ai quea ja'a nee ba'ecue!

¹² Ecuea epeeji cuana, miqianaya Jesosaja epeeji poanijo, Eyacuiñajjija miquea mimishi cuana cuijea ca'yonaje. Jamajjeya eyaya jiquio esohui tehueaña miqianajaya ebajji. ¹³ Yahuajo nei nei meshi pana jjimahuajo Jesosa eba'e tiitia poa. Jesosa nijje jjapeequianijo eyaya miqiana huasijje esohui tehueaña edejja tii cuana huasijje. Shacuima' nequi cuana, miqianaya Edosiquiana jeabichajea'yojji epo. Jamajjeya eyaya miqiana huasijje esohui tehueaña pea'ai. Esho'i cuana, Eyacuiñajji eseja Chii nei miqianajaya eba. Jamajjeya eyaya miqiana huasijje tehueaña pea'ai. ¹⁴ E'e edejja tii cuana, Jesosa yahuajo nei nei eba'e tiitia poa miqianajaya eba. Jamajjeya eyaya esohui tehueaña miqianajaya ebajji. E'e shacuima' nequi

cuana, miqianaya quea ca'a poani, dejja tii'yo jjima. Eyacuiñajjija esohui jayojja jama aña. Jamajjeya miqianaya Edosiquiana jeabichajea'yojji epo pea'ai. Jamajjeya eyaya miqiana huasijje tehueaña pea'ai.

¡A'a yahuajo jama ba'e sa pojji Jesosaja epeeji pojjeama jama!

¹⁵ Epeeji cuana, ja'a yahuajo jama ba'e sa pojji quea mimishi, Jesosaja epeeji pojjeama jama! Aquiana cuana jiquio meshijo ani ja'a quea jea nee ajji! ¡A'a aquianajo jjashahuaba tiitiqijji! E'e, Jesosaja epeeji pojjeama jama ba'e sa poanijo, aquiana cuanajo jjashahuaba tiitiqianijo pea'ai Eyacuiñajji, eseja Chii nei miquea quea boti pojjeama. ¹⁶ E'e, Jesosaja epeeji pojjeama cuana Eyacuiñajjijo jjashahuabaqui ajja nei nei. Chojja, oya cuana jjashahuabaquiani jiquio meshijo eba'ejjijo jama ba'a: Quea mimishi nee nee ba'e sa poani; aquiana cuana ba majje jea ba neinei cani pea'ai; quea dejja tai poani, quea nishehui pea'ai poani. Dejja quea dejja tai jayojja jama ba'e sa poani quea aquiana huiso nee nee. Ona huoojajji po sa poani pea'ai. Jamaya ba'e sa poani eshahuaja epeeji cuana. ¹⁷ Jamatii joya aquiana ojjaña cuana sa neinei poani chama'yo tii poaje'yo. Ojjaña quea mimishi nee jjashahuabaquiani, Jesosaja epeeji pojjeama quea nee nee poaje'yo tii tii. Ojjaña joya Eyacuiñajjija esohui jayojja jama ba'yani ca ca ba'e tiitiie'yo onijje eyajo. Jamajjeya ¡yahuajo jama a'a ba'eji, Jesosaja epeeji pojjeama jama!

Jesosaja Quito cuiajji epojji nisho poeje, Emeshi Mese nei nisho poaje. Eseyca ca ca Jesosaja epeeji e'e jojo nei poani. ¹⁸ Ecuea epeeji cuana, ¡shajja'ajjacue mo! Yahuajo eyaya miqianaya huohuinaje jama ba'a: —Quijje Jesosa poe jjimahuajo oe dejja poeje. Oya pea, Edosiquiana neija epeeji; dejja jayojja nei neiya oya poeje. Jesosa Quito cuiajji nisho poaje; ojjañaja Emeshi Mese nei nisho poaje —jamaya eyaya huohuinaje.

Jamatii jjeya nei Jesosa Quito cuiapanajji poani yani, emeshi mese nei nisho quea huiso yani pea'ai. Jamajjeya esejaya eba Jesosaja epoe o'oyajji beshahua nei apoa. ¹⁹ Jiquio Jesosa Quito cuiapanajji poani cuana yahuajo pishana ese nijje nequinaje. Jamatii oya cuana Jesosaja epeeji nei pojjeama poa. Jamajjeya ese nijje nequi tiitii ajja poa. E'e, oya cuana Jesosaja epeeji nei epo jjemo ese nijje nequi tiitii'yo quiaye. Oya cuana ca ca poqui'yonaje. Jamajjeya esejaya eba oya cuana Jesosaja epeeji nei pojjeama.

²⁰ Miqiana que ca ca Jesosa Quitohua Edojjoshahua Pame huoojea canaje. Ohuaya miqianaya ojjaña Jesosa Quitoja esohui e'e nei ba mee canaje. ²¹ Jesosaja esohui e'e nei miqianajaya ebajojo eyaya jiquio esohui miqiana huasijje tehueaña. E'e, miqianajaya eba sijjepojji cuana Jesosaja epeeji pojjeama. ²² Sijjepojji cuaa aje oe jama huohuime acani ba'a: —Jesosaja ca ca oma Eyacuiñajjija huoojea'yo ojjaña jaahuanajji pojjeama, Quito pojjeama.

Ojjaña joya jamaya Jesosajo poani aje oe Jesosa Quito Eyacuiñajjija Bacua Ejja pojjeama poso acani. Jamajjeya ohuaya Eyacuiñajji, eseja Chii nei cajaa acani

pea'ai. E'e, oya cuana aje oe Jesosa Quito cuiapanajji poani. ²³ E'e, ojjaña joya Jesosa Quito Eyacuiñajji Ba-cua Ejja pojjeama poso ajji poani Eyacuiñajji nijje jja-peequi ajja pea'ai. Joya Eyacuiñajji Bacua Ejja nijje jja-peequiani Jesosa nijje ca ca eseja Chii nei eyajo ani nij-je pea'ai jjapeequiani.

²⁴ Jamajjeya esohui quea pame nee Jesusajo, ma mi-quiaa shajja'ajja coa poa ja'a pajea'yojji! ¡Jamaya atii-tiicue! E'e, ma esohui pajea'yo ajjajo miqianaya Eya-cuiñajji Bacua Ejja nijje jjapee tiitiquije'yo Jesosa nij-je. Eyacuiñajji eseja Chii nei nijje jjapee tiitiquije'yo pea'ai. ²⁵ E'e, yahuajo nei ecuaana nijje nequiahuaa Je-sosa Quitohua huohui ca poa jama ba'a: —Eyaya mi-qianaya, ecuea epeeji cuana ba'e tiitii meeje'yo enijje eyajo —jamaya ecuaana huohui ca poa Jesusaa.

²⁶ Ecuea epeeji cuana, eyaya jiquio esohui e'e nei tehuenaje miqiana huasijje sijjepojji cuanajo, ma Je-sosa cuiapanajji epo cuanajo. Poquiquehua mee ca chana' mi. ²⁷ Miquiana que ca ca Jesosa Quitohua Edoj-joshahua Pame huoojea ca'yona. Oya, Edojjoshahua Pame miqiana nijje nequi tiitiani. Ohuaya miqiana-ya Jesusaja esohui ba meesahua cani quea ja'a nee. Ja-majjeya pea esohui huohuiji chamajo jamatii Edojjos-hahua Pameya miqianaya ojjaña Eyacuiñajji esohui e'e nei ba meesahua cani quea ja'a nee. Oya sijjepojji pojjeama. Jamajjeya jodaya esohui cuana jayojja jama ba'ecue Jesosa Quito nijje ejjapee tiitiqui'yojji!

Jesosaja epeeji cuana

²⁸ Jamajjeya ecuea epeeji cuana, ¡Jesosa Quito nijje jjapee tiitiquicue bicho'ama epojji! Jamajjeya Jesosa Quito poe o'oyajo ojo eseya mete'ama poaje. Ohua cojja ba neinei cajje eseya bicho'ama poaje'yo. ²⁹ Mi-qianajaya eba Jesosa Quito mimishi'ama, quea pame nee nee. Jamajjeya ojjaña joya mimishi'ama, quea pa-me nee nee ba'yani Jesusaja epeeji cuana poani.

3 ¡Jashahuabaquicue! Eseja Chii nei Eyacuiñajji eseya quea jea nee nee acani. Jamajjeya ohuaya jama acanaje ba'a: —Eyaya miqianaya ecue bacua cuana po meenaje —jamaya acanaje ohuaya.

E'e, ohuaya eseya oja bacua cuana po mee ca'yona-je. Jamajjeya pea cuana Jesosa nijje jjapeequi sa po aj-jajo ese nijje jjapeequi ajja pea'ai.

² Ecuea epeeji cuana, jjeja eseya Eyacuiñajji bacua cuana. Jamatii quijje ¿ae jayojja eseya poaje'yo? Maya esejaya ba jjima jjeja. Jamatii esejaya eba Jesosa Quito poe o'oyajo eseyaya oya baje ecojjaa. Jamajjeya eseya jashahuabaquiani jama ba'a: —E'e jojo nei Jesosa Qui-to poe o'oyajo eseya o jayojjaya nei nei poaje'yo.

³ Quea pame nee nee Jesosa. Ojjaña joya jama jja-shahuabaquime po'ani tii Jesosa Quitojo jja'ishoa'ajja-quiani. Mimishi cuana pajea neinei ca'yani pea'ai. Quea boejea ba'yani Jesosa Quito jayojja epo'yojjiya.

⁴ Shajjama' cuaa ca ca mimishi acanijo Eyacuiñajji ejjashahuabaquiji quea pame nee jayojja jama po ajja. E'e, jamajjeya Eyacuiñajji esohuijo jashajja'ajjaqui aj-jajje quea mimishi poani. ⁵ Eseyaya eba Jesosa Quito mimishi'ama nei nei. Oya poeyanaje eseja mimishi

cuana cuijea'yohua. ⁶ Jamajjeya Jesosa Quito nijje jja-peequi'yo majje eseya mimishi amaja sa po'yo ajja; pa-jea'yaña seya. Ojjaña joya mimishi atitii sa poani ca ca Jesosa Quito nijje jjapeequi jjima, ojaya ba jjima, de.

⁷ Ecuea epeeji cuana, ¡quea ja'a nee jashahuabaqui-cue pea cuanaja miqianaya edasijji pojjeama! Jesosa Quito quea pame nee nee, mimishi'ama. Jamajjeya oj-jaña joya Jesosa Quito jayojja mimishi'ama ba'yani oya cuana quea pame nee pea'ai poani. ⁸ Joya mimishi ahuicha'a huicha'ajji poani ca ca eshahua epeeji poani. E'e, Edosiquiana nei yahuajo nei nei yaña poa meshijo. Ohuaya mimishi acoo ca poa. Eyacuiñajji Bacua Ejja Jesosa ca ca meshi yasijje poeyanaje ojjaña cuana mimishi pajea mee'yohua, eshahua cuana quea nee nee po meeya, eshahua epeeji cuana pea'ai.

⁹ Eseyaya, Eyacuiñajji bacua cuana ca ca oe mimishi atitii sa po'yo ajja, Edojjoshahua Pameya ecuaana hua-sijje edobiquinequiya eyacua po mee cani. E'e, ohuaya eseya Eyacuiñajji ejjashahuabaquiji jayojja jama jja-shahuabaqui mee cani. Jamajjeya eseya Eyacuiñajji bacua po majje mimishi epo maja'yojji pojjeama. ¹⁰ Ja-majjeya eseyaya Eyacuiñajji bacua cuana baña jama ba'a: Ojjaña joya mimishi a sa po'yo ajja, Eyacuiñajji esohui jayojja jama ba'yani Eyacuiñajji bacua cuana. Ojjaña joya mimishi atitii poani, pea cuana quea jea a'ajja pea'ai, Jesusaja epeeji cuana nijje jjapeequi ajja pea'ai ca eshahua epeeji cuana, Edosiquianaja ba-cua cuana.

¡Pea cuana oe quea jea nee eja'aqui!

¹¹ E'e ecuea epeeji cuana, ¡pea cuana oe quea jea nee nee eja'aqui! Jamaya yahuajo onijje jjapeequi jeahuajo Jesusaa eseya huohui coo ca poa. ¹² Jamajjeya ja'a Adanaja bacua Caini jayojja jama pojji! Oya es-hahuaja epeeji poa. Jamajjeya oja chahua sapa cuiahuejjajea ca'ya poa. E'e, oja chahua quea pame poanajejojo Caini onijje quea quene nee poa; quea mi-mishiya jjejojya oja chahua cuiahuejjajea ca'ya poa. ¹³ Jamajjeya oya jayojjaya Jesusaja epeeji pojjeamaja miqianaya boti'ama pea'ai acajje a'a jashahuabaquij-ji jama ba'a: —¿Apiojji shai eya onajaya boti'ama?

Oya cuana eshahua epeeji cuana, Caini jayojja. Eseyaya ca ca Jesusaja epeeji, echahua mese jayojja. Ja-majjeya ese nijje quea quene nee poani.

¹⁴ Eseyaya Jesusaja epeeji cuana quea jea nee nee aña. Jamajjeya esejaya eba e'e jojo nei eseya pea jja-shahuabaquime poani, yahuajo jama pojjeama. Jamaj-jeya eseya Eyacuiñajji nijje ba'e tiitii'yo eyajo; cuaqui yasijje epoqui'yojji pojjeama. Joya pea cuana quea jea a'ajja ca ca quea nee nee poaje'yo, cuaqui yasijje po-qui'yo tii tii pea jashahuabaquime po'yo jjima jjejojo. ¹⁵ Joya pea cuana nijje quea quene nee nee poani aje oe pea quecuajji poani. Eseyaya eba pea quecuajji cua-na eshahua nijje jjapeequiani tii; oya cuana eba'e tiitii'-yojji pojjeama eyajo.

¹⁶ Jesosa Quito esejo mano'ya poa eseja mimishi cui-jea'yojji. Jamaya esejaya eba e'e jojo nei eseya ojaya quea jea nee nee. Jamajjeya ¡Jesusaja epeeji cuana

quea jea nee nee ejja'aqui pea'ai; oya cuana ejjaba'e meesahuaqui! ¹⁷ Epeeji quea dejja taiya ca ca quea aqui ana huisohua ojaya epeeji aema' nei nei ba majje aqui ana quia jjima acani; quea mano jaa, quea shoe nee ba majje jjashahuabaqui ajja, ba'e meesahua sa po'yo ajja ojaya quea jea pojjeama jojoya. Jamajjeya oya Eyacuiñajji jayojja jama po ajja Eyacuiñajji ojaya quea jea pojjeama jojoya. ¹⁸ Ecuea epeeji cuana, ishaja'ajjacue mo! Pea cuana esejaya quea jea nee poanijo joya cuana quea pame nee nee ejjaba'e meesahuaqui! Jamaya quea pame nee. Esey a pea cuana quea pame ajjimajo ca ca jama siajje pome se poani ba'a: —Pea cuana ca ca ecuea quea jea nee poani —jama siajje pome se poani.

¡Pea cuana quea jea ejja'aqui Eyacuiñajji bicho'ama epojji!

¹⁹ E'e, Jesusaja epeeji cuana quea jea nee eseya añajo Jesusaja esohui e'e nei jayojja jama ba'ani, Jesusa nije jjapeequiani quea pame nee nee pea'ai. Jamajjeya Eyacuiñajji cojja nei nequi majje bicho'ama eseya poaje'yo. ²⁰ E'e pojja'a eseya quea yeno jjashahuabaquiani jama ba'a: —Esey Eyacuiñajji eba nei nei. Ojaya eya eba quea mimishi poanaje —jamaya pojja'a poani.

¡Bacue! Eyacuiñajji eseya mimishi cuijea ca poqui yani. Jamajjeya ¡yeno'ama pocue! ²¹ E'e epeeji cuana, eseya ejjashahuabaqui jama ba'a: —Eya Jesusa nije jjapeequiani. Jamajjeya Eyacuiñajji ecuea mimishi cuijea ca'yonaje. Enije quea bei poani.

Jamaya e'e jojo nei poanijo eseya bicho'ama poani Eyacuiñajji nije emimijji. ²² E'e, Eyacuiñajji esohui jayojja jama eseya añajo, Jesusa nije jjapeequianijo pea'ai Eyacuiñajji quea bihui nee ese nije poaje. Jamajjeya onije mimiajo ohuaya eseya shajja'ajja caje. Ma ecua eseya onije miminaje jamaya ohuaya acaje.

²³ E'e, Eyacuiñajji eseya huohui ca poa jama ba'a: —¡Ecue Bacua Eja Jesusa Quito nije jjapeequicue! ¡Jesusaja epeeji cuana quea jea nee nee acue pea'ai! —jamaya ohuaya eseya huohui ca poa.

²⁴ Ojjaña joya Eyacuiñajji esohui jayojja jama aji poani Eyacuiñajji nije jjapeequiani. Eyacuiñajji ona nije jjapeequiani pea'ai. Eyacuiñajji Edojjoshahua Pame huoojea canaje ese que dobiquiya. Ohuaya eseya ba mee cani Eyacuiñajji ese nije nequi.

Jesusaja epeeji nishohua mi dasia ca chana'

4 Ecuea epeeji cuana, ¡ojjaña esohui huohuiji cuana esohui a'a shajja'ajjajji! Chojja, beca cuana Edojjoshahua Pameja huoojea'yo pojjeama, esohui huohuiji nisho. Jamajjeya ¡ojjaña cuana ba neineicue! Quea ja'a nee jjashahuabaquicue jama ba'a: —¿A'a oya cuana Eyacuiñajji esohui e'e nei jayojja jama huohui cani?

E'e, quea huiso siajje poji cuana ojjaña huasijje poquiani. Siajje poani jama ba'a: —Eyacuiñajji eya huoojea canaje ojaya esohui huohuiya.

² Jamajjeya Eyacuiñajji esohui huohuiji e'e nei mi-quea eba poaje jama ba'a: Edojjoshahua Pameya oya cuana huohui meesahua caje jama ba'a: —Jesusa Quito ese jayojjaya yamijji poeyanaje.

Jamajjeya jamaya ohua huohui cajo miquea eba oya cuana Edojjoshahua Pameja huoojea'yo esohui huohuiji poani.

³ Pea cuana ca ca esohui huohuiji nishohua jamaya huohui ajja. Chojja, oya cuana siajje poani jama ba'a: —Jesusa Eyacuiñajji huoojea'yo ojjaña jaahuanajji pojjeama. Eyacuiñajji Bacua Eja meshi yasijje poe jjima dejja jayojja yamijji —jamaya huohui canijo aje oe miqianajaya eba oya cuana esohui huohuiji nisho, Jesusa Quito quecuajji nisho epo. Eyacuiñajji oya cuana huoojea jjima.

Yahuajo eyaya miqianaya huohuinaje oya cuana poeje. Jjeyahua nei oya yani quea huiso. Ojjaña huasijje poquinaje jjadasiaquiya.

⁴ Ecuea epeeji cuana, miqianaya ca ca Eyacuiñajji bacua cuana poanaje. Jamajjeya ohuaya miqianaya dasia mee jjima acani Jesusaja epeeji pojjeama cuana. Miqianaya ona jeabichajajji jayojja jama poani. E'e, Eyacuiñajji Edojjoshahua Pame miqianajo nequi ca ca oe quea ca'a nee nee. Eshahua cuana, Edosiquiana quea ca'a pishana. Eshahua miqianaya quea mimishi po mee'ajja cani. ⁵ Esohui huohuiji nisho cuana eshahua nije jjapeequianiya jjejojo Eyacuiñajji esohui jayojja jama huohui ajja. Eba'eji quea mimishi onaaya quea boti nee nee acani. Dejja mimishiya jayojjaya huohui cani. Jamajjeya mimishi cuana oya cuana shajja'ajja cani. ⁶ Esey ca ca Eyacuiñajji bacua cuana poani. Jamajjeya Jesusaja epeeji cuana Eyacuiñajji nije jjapeequiani pea'aiya jjejojo esejaya esohui shajja'ajja cani. Pea cuana Jesusaja epeeji pojjeama ca ca Eyacuiñajji nije jjapeequi sa po'yo ajja; ecuanajaya esohui shajja'ajja sa po'yo ajja. Jamajjeya Jesusaja epeeji nei esejaya eba; ohuaya esejaya esohui shajja'ajja cani. Pea cuana, esahuaja epeeji cuana esejaya eba pea'ai; oya cuana esejaya esohui shajja'ajja sa po'yo ajja.

Ojjaña Eyacuiñajji quea boti nee poani

⁷ Epeeji cuana, miqianaya ecuea quea jea nee poani. Ojjaña cuana Eyacuiñajji quea jea nee nee poani. Jamajjeya pea cuana quea jea nee nee ejja'aqui tii tii. E'e, jamajjeya eseya Eyacuiñajji bacua poanijo o jayojja jama poani. Pea cuana quea jea nee nee ejja'aqui Jesusa nije jjapeequianijo. ⁸ Ojjaña joya pea cuana boti'ama poani ca ca Eyacuiñajji nije jjapeequi ajja, Eyacuiñajji ba po jjima pea'ai. E'e, Eyacuiñajji ojjaña cuana quea jea nee acani tii tii. ⁹ Esey cuana ojaya quea jea nee nee. Jamajjeya ohuaya oja Bacua Eja oe nei Jesusa huoojea ca poa ese que, jiquio meshi yasijje. Jama ohua acanajejoya, ojjaña eba eseya Eyacuiñajji quea jea nee nee acani. E'e, Jesusa ese que poeyanaje eseya mimishi cuana cuijea'yohua. Jamajjeya eseya onije ba'e tiitii mee caje'yo eyajo quea pame nee nee. ¹⁰ ¡Bacue! Yahuajo nei esejaya Eyacuiñajji boti'ama

poa. Jamatii ohuaya ca ca oe ebionei eseya quea jea nee aca poa. Jamajjeya ohuaya ojaya Ebacua Ejja Jesosa Quito huoojea ca poa ese que, mano'yohua eseya mimishi cuijea'yojji sosejje. ¹¹ Ecuea epeeji cuana, Eyacuiñajjiya eseya quea jea nee nee acanaje; jamajjeya ipea cuana quea jea nee nee ejja'aqui! ¹² Yahuajo, jjeja nei pea'ai esejaya Eyacuiñajji ba jjima ecojjaja. Jamatii esejaya ojaya epeeji cuana quea jea poanijo tii Eyacuiñajji ese nijje nequiani. Ohuaya eseya pea cuana quea jea nee nee po meesahua cani. Jamaya Eyacuiñajji sa poani.

¹³ E'e, Eyacuiñajjiya Edojjoshahua Pame ese que do-biquiya huoojea canaje. Jamajojoya Edojjoshahua Pameya eseya ba meesahua cani Eyacuiñajji ese nijje nequiani, eseya onijje japeequiani pea'ai.

¹⁴ Epeeji cuana, eyaya Jesosa banaje ecojjaa. Jamajjeya ojjaña huasijje jama huohuimeya aña. Eseja Chii nei eyajo aniya oja Bacua Ejja Jesosa huoojea canaje meshi yasijje mano'yohua, ojjaña cuana ojjaña meshijo ba'e ca cuanaja mimishi cuana cuijea'yohua onijje eyajo eba'e tiitii mee'yojji. ¹⁵ Jamajjeya eseyaya jama huohuime aña ba'a: —Jesosa Eyacuiñajjiya Bacua Ejja oe nei.

Ojjaña joya jama poaniya e'e jojo nei Eyacuiñajjiya bacua cuana poani. Eyacuiñajji onijje nequiani pea'ai.

¹⁶ Eseyaya eba e'e jojo nei Eyacuiñajjiya eseya quea jea nee nee acani.

Eyacuiñajjiya ca ca oe ojjaña quea jea nee nee acani. Jamajjeya ojjaña joya pea cuana quea jea nee nee ajji poani pea'ai ca ca oe Eyacuiñajji nijje japee neinei-quiani. Eyacuiñajji ma dejja cuana nijjeya nequiani pea'ai. ¹⁷ Jamajjeya Eyacuiñajji esejaya quea jea nee nee poanijo pea cuana quea jea nee nee ejja'aqui Jesosa Quito jayojja jama epojji. Jamajjeya eseya bicho'ama poaje Eyacuiñajji. Jesosa Quito poe o'oya majje ohuaya ojjaña eseya sosequia caje'yo ma eseya meshijo ba'eya anaje sosejje. Shajjama' cuana ca ca ohuaya quea nee nee po mee caje'yo. Ojaya epeeji quea pame nee cuana ca ca ohuaya ba'e tiitii mee caje'yo onijje eyajo. ¹⁸ Eseyaya eba Eyacuiñajji, pea cuana pea'ai esejaya quea jea nee nee poanijo eseya mete'ama nei nei poaje. E'e, Eyacuiñajji esejaya quea jea neejojjo eseya jjashahuabaquiani jama ba'a: —Eyacuiñajji enijje quea tecue epojji pojjeama.

Jamajjeya mete'ama poani. Ojjaña joya Eyacuiñajji quea jea a'ajja ca ca quea mete poani. Jjashahuabaquiani jama ba'a: —Eyacuiñajji enijje quea tecue nee nee poaje —jamaya jjashahuabaquianijo Jesosaja epeeji pojjeama poani. ¹⁹ E'e, yahuajo nei nei Eyacuiñajjiya Jesosaja epeeji pojjeama cuana quea jea nee nee acanaje. Jamajjeya Eyacuiñajji quea jea nee nee ejja'aqui, pea cuana eseyaya quea jea nee nee ejja'aqui pea'ai. ²⁰ Beca cuana jama poani ba'a: —Ecuea Eyacuiñajji quea jea nee nee.

Jamatii oya cuana Jesosaja epeeji cuana quea jea nee a'ajja. Jamajjeya oya cuana sijje poani. Pea cuana cojja ba majje boti'ama acani. Jamajjeya ojaya Eyacuiñajji quea jea nee e'ajji pojjeama ca ba jjima ecojjaja.

²¹ Eyacuiñajjiya eseya huohui ca poa jama ba'a: —Eya,

Eyacuiñajji miqianajaya quea jea nee nee poanijo ipea cuana quea jea nee acue pea'ai!

Jesosaa eseya Edosiquiana jeabichajea mee cani

5 Ojjaña Jesosaja epeeji cuana jjashahuabaquiani jama ba'a: —Jesosa Eyacuiñajjiya huoojea'yo ojjaña jaahuanajji.

Eseyaya jamaya jjashahuabaquianijo, Eyacuiñajjiya eseya oja bacua cuana po mee cani. Ojjaña joya Eyacuiñajji, esejaya Chii nei eyajo ani quea jea nee nee ajji poani Eyacuiñajjiya Bacua Ejja Jesosa quea jea nee ajji poani pea'ai. ² Oya jayojjaya Eyacuiñajji esejaya quea jea nee neejoj, ojaya esohui jayojja jama poanijo pea'ai esejaya eba jama ba'a: Ojjaña Jesosaja epeeji cuana, Eyacuiñajjiya bacua cuana esejaya quea jea nee poani. ³ Eyacuiñajji e'e jojo nei esejaya quea jea nee poanijo jiquio ecua ojaya esohui etehue'yo cuana jayojja jama poani. Ohuaya eseya jamaya ameesahua canijo, ojaya esohui cuana camaja'ama. ⁴ E'e, eseya Jesosa nijje japeequiani. Jamajjeya eshahuaaja epeeji cuana mimicuijjeano-biajeaña. Eyacuiñajjiya bacua cuana poanijo eseyaya mimishi cuana mimicuijjeano-biajeaña. Mimishi'ama ba'e mee aña pea'ai. ⁵ E'e jojo nei Jesosa Eyacuiñajjiya Bacua Ejja oe nei. Jamaya jjashahuabaquianijo, onijje japeequianijo eseya mimishi'ama ba'eje. Eshahuaaja epeeji cuana mimicuijjeano-biajeaña pea'ai.

Ehuohui'yo Jesosa Quitojo

⁶ Jesosa Quito meshi yasijje poeyajo, Huaniya oya enajo besa mee ca poa Eyacuiñajjiyo. Majoya ojaya ena' cuayaquijajo Jesosa mano'ya poa esejaya mimishi cuijea'yojji sosejje. Jamaya Edojjoshahua Pameya huohui ca poa Jesosa Quitojo. Ojaya esohui Jesosajo e'e nei poani. E'e, Edojjoshahua Pame sijje po ajja nei nei. ⁷ E'e, pea beca peejjimaa eyajo nequiya jamaya huohui cani Jesosa Quitojo. E'e, Echii neiya, Ebacua Ejja, Edojjoshahua Pameya pea'ai, mahuisohuaya oya jayojjaya huohui cani Jesosa Eyacuiñajjiya Bacua Ejja.

⁸ Jiquio meshijo pea'ai pea beca peejjimaa Jesosa Quitojo huohui cani pea'ai. E'e, Edojjoshahua Pameya jamaya huohui cani Jesosajo. Peaa Jesosa besa mee cajo Eyacuiñajjiya huohui ca poa jama ba'a: "Jesosa ecuea Ebacua Ejja quea jea nee nee" aca poa. Jesosa mano'yajo ojaya ena' cuayaqui'yonajejo pea'ai ojjaña jama aca poa ba'a: "Oya Jesosa e'e jojo nei Eyacuiñajjiya Bacua Ejja nei" poa. Mahuisohuaya oya jayojjaya Jesosa Quitojo huohui cani. Jamajjeya esejaya eba e'e jojo nei Jesosa Eyacuiñajjiya Bacua Ejja. ⁹ E'e, dejja cuanaja Jesosa ba neinei jjima. Jamatii onajaya esohui eseyaya shajja'ajjaña. Eyacuiñajjiya esohui Jesosajo ca ca e'e nei nei. ¡Maya oe ejjashajja'ajja neinei qui! Ohuaya yahuajo huohui ca poa jama ba'a: —Jesosa ecue Bacua Ejja.

¹⁰ Jamajjeya ojjaña joya jama poani ba'a: —Jesosa Eyacuiñajjiya Bacua Ejja e'e jojo nei —jamaya poanijo Edojjoshahua Pame ese nijje nequi. Jamaya jjashahuabaqui sa po'yo ajjajo ca ca sijje poani jama ba'a: —Chojja, Jesosa Eyacuiñajjiya Bacua Ejja pojjeama. Eya-

cuiñajjiya ecuana siajje aca poa —jama siajje pomeya poani cuana.

¹¹ E'e, Eyacuiñajjiya eseya huohui canaje jama ba'a: —Eyaya ecue Ebacua Ejja Jesosa huoojeanaje miquiana ba'e tiitii mee'yohua. Onijje jjapeequiajo miquiana ya ba'e tiitii meeje'yo eyajo onijje —Eyacuiñajji jamaya poanaje.

¹² Jamajjeya oja Bacua Ejja Jesosa nijje jjapeequiajo, Eyacuiñajjiya eseya cuana ba'e tiitii mee caje'yo onijje eyajo. Onijje jjapeequi sa po'yo ajjajo ca se ca Eyacuiñajjiya Bacua Jesosa nijje eba'e mee'yoyji pojjeama eyajo; quea nee nee poaje'yo tii tii.

Eba'ejji quea pame nee eyajo

¹³ Ecuea epeeji cuana, miquianaya Eyacuiñajjiya Bacua Ejja Jesosa nijje e'e jojo nei jjapeequiani. Jamajjeya eyaya jiquio esohui tehueaña miquiana ba meeji e'e jojo nei onijje eba'e tiitii'yoyji eyajo. ¹⁴ Eseyaya eba e'e jojo nei jama ba'a: Eseyaya ojaya ejjashahuabaquiji jayojja jama añajo, Eyacuiñajji eseya Chii nei nijje mimianijo ohuaya eseya shajja'ajja cani. ¹⁵ E'e, o jayojjaya jjashahuabaquime poanijo e'e jojo nei Eyacuiñajjiya shajja'ajja caje esejaya emimi onijje. Jamajjeya esejaya emimi onijje jayojja jama ohuaya acaje'yo. Jamajjeya eseya bicho'ama onijje emimiji.

¡Eseyaya epeeji quea mimishi poanijo mimicue Eyacuiñajji nijje!

¹⁶ Epeeji cuana, Jesusaja epeeji quea mimishi poani ba majje ¡ma epeeji joya oe mimicue Eyacuiñajji nijje oja mimishi cuijea'yoyji, o ba'e tiitii mee'yoyji! Jamajjeya Eyacuiñajjiya oja mimishi cuijea caje'yo. Pea epeeji cuana, coya quea mimishi nee nee po tiitianijo ecuea miquianaya ehuohuiji pojjeama ojo emimiji

Eyacuiñajji nijje jama ba'a: —Eyacuiñajji, ¡a'a ma epeeji quea nee po meeji jamatii quea mimishi atitii canijo! —chojja, ¡a'a jamaya mimiji Eyacuiñajji nijje ma dejjajo! Eyacuiñajjiya joya quea mimishi nee nee aji poani cuana quea nee nee po mee caje'yo. ¹⁷ Eyacuiñajjiya esohui jayojja jama a'ajjajo eseya quea mimishi poani. Jamatii mimishi amajje eseya Eyacuiñajji nijje mimi'ya-jo ohuaya esejaya mimishi cuijea caje'yo. Joya mimishi quea tai nee nee aji tii tii poani ca ca Eyacuiñajjiya quea nee nee po mee caje'yo.

Esohui quiijeyejje nei tehue

¹⁸ Ecuea epeeji cuana, esejaya eba Eyacuiñajjiya bacua cuana, ma ohua quea pame nee po mee ca'yonaje quea mimishi tii tii po'yo ajja, pajea ca'yonaje. Eyacuiñajjiya Bacua Ejja, Jesosa Quitohua ojaya epeeji cuana jaahuana cani, nahue cani Edosiquianaja quea mimishi epo mee'yoyji pojjeama. ¹⁹ Eseyaya eba pea'ai eseya Jesusaja epeeji poani, Eyacuiñajjiya bacua cuana poani. Pea cuana ca ca eshahuaja epeeji poani. Edosiquiana aje oe ona huoojeajji poani. ²⁰ Eseyaya eba pea'ai Eyacuiñajjiya Bacua Ejja, Jesosa meshi yasijje poeyanaje. Ohuaya eseya quea ja'a nee nee jjashahuabaqui meesahua cani. Jamajjeya ohuaya eseya Eyacuiñajji e'e nei ba meesahua cani. Jamajjeya eseya Eyacuiñajjiya Bacua Ejja oe nei nijje, Jesusa Quito nijje jjapeequi majje eseya Eyacuiñajjiya bacua cuana poani. Jesusaja Chii ca ca oe Eyacuiñajji e'e nei ese ba'e tiitii mee'yoyji poani.

²¹ Jamajjeya ecuea epeeji cuana, ¡a'a eshahua cuana nijje mimiji, eyacuiñajji nisho nijje pea'ai a'a mimiji! Jamaya capoahua.

Mahuiso ecuea esohui. Eyaya, Huani bajjaniya jiquio esohui tehuenaje miquianajaya ebajji. Apoa.

2 HUANI

Huaniya tehue canaje epona quea pame nee que oja bacua cuana huasijje pea'ai

¹ Eya Huani, Jesusaja epeeji jaahuanajji etii. Ecuea epeeji Senia, eyaya mi que tehueaña; miquea ebacua cuana huasijje pea'ai tehueaña. Miya epona quea pame nee, Jesusaja epeeji nei. Jamajjeya miya e'e jojo nei ecuea quea jea nee. Ojjaña Jesusaja epeeji cuaa miya quea jea nee acani pea'ai. ² E'e, eseyaya Eyacuiñajji esohui quea jea nee aña. Ojaya esohui e'e nei. Jamajjeya eseya jjashahuabaquiani ma esohuijaya; pajea'yo ajja tii tii. Eyacuiñajji esohui jayojja se ba'yanipa' ai. Jamajjeya ojaya epeeji cuana quea jea nee nee aña, eseyaya.

³ Eyacuiñajji esejaya Chii nei; ojaya Ebacua Ejja oe nei Jesosa Quito esejaya Emeshi Mese nei. ¡Ohuaya eseya caba'e meesahua cahua quea pame nee! ¡Esejo quea bei cajjashahuabaquiahua pea'ai! Ohuaya eseya quea bei po mee cani mimishi cuijea ca'yajje. Jamajjeya eseyaya ojjaña Jesusaja epeeji cuana quea jea nee aña e'e jojo nei.

Esohui e'e nei

⁴ Senia, eyaya miquea ebacua beca cuana banaje. Oya cuana Eyacuiñajji esohui e'e jojo nei jama poani. Jamajjeya eya quea bihui nee nee poani. ⁵ Jamajjeya ecuea epeeji, eyaya Eyacuiñajji esohui huohui o'oyaña mi que, ma eyaya yahuajo huohuinaje. Jiquio esohui eyacua pojjeama. E'e, yahuajo ojaya esohui jama poanaje ba'a: "¡Jesusaja epeeji cuaa ojjaña ojaya epeeji cuana quea jea nee ca'a cahua!" ⁶ Eyacuiñajji esejaya quea jea nee poanijo ojaya esohui jama epo tiitii'yo. Ojaya esohui yahuajo jama poa ba'a: "¡Pea cuana miqiaaya quea jea nee nee atiitiicue!"

⁷ Epeeji, quea huiso esohui huohui nisho cuana poquiani ojjaña meshi cuana huasijje. Dasia cani, de.

Jiquio esohui huohui nisho cuana jama siajje pome poani ba'a: —Jesosa Eyacuiñajji e'e jojo nei pojjeama, Eyacuiñajji huojea'yo dejja jaahuanajji Quito bajjani pojjeama. Quito dejja jayojjaya yamijji meshi yasijje poe'yo jjima —jama siajje pomeya poani cuana. Ma siajjepojji cuana Jesusaja epeeji pojjeama; o cuiapanajji poani. Quea huiso cuana dasia cani. ⁸ ¡Jashahua-ba tiitiicue quea ja'a nee! Jamajjeya ojaya miqianaya edasia'yojji pojjeama. E'e, Jesusajo ba'yanijo, ojo chacoaña quea pame neejo pea'ai, quijje eseya quea huiso sosequia caje'yo Eyacuiñajjiya, eyajo. Ma siajjepojji cuaa miqianaya dasia ca chana'; onijje poqui-quehuajo ca ca miqianaya aema' jayojja jama poaje'yo Jesosa poe o'oyajo.

⁹ Joya Jesusaja esohui jama a sa po ajja aje oe Eyacuiñajji epeeji pojjeama. Eseyaya Jesusaja esohui jama poanijo ca ca Eyacuiñajji nijje jjapeequiani e'e jojo nei; oja Bacua nijje, Jesosa Quito nijje jjapeequiani e'e jojo nei pea'ai. ¹⁰ Pea dejja cuana miqianajaya equi yasijje poeyanijo, oya cuana Jesusaja esohui e'e jojo nei huohui sa po ajjajo, ja'a jama ajji ba'a: —Epeeji, ¡ecuea equi yasijje dobiec! —a'a ajji! Chojja, oya Eyacuiñajji epeeji pojjeama. ¹¹ Onijje jjapeequianijo oya miyaya quea mimishi po meesahuaña. Jamaya quea tai.

Pea esohui oe neiya huohui cani Huaniya

¹² Quea huiso esohui huohui sa eyaya aña miqiana que. Ma esohui cuana ecuea etehuejji pojjeama. Quijje eya miqiana que poqui sa poani. Miqiana nijje nequi majje eyaya quea huiso pea esohui huohuije. E'e, eseya ojee po'yo majje quea bihui nee nee poaje'yo.

¹³ Mique shehueja bacua cuaa jama acanaje ba'a: —A'i, ¿achajja acuae mi ani so'o?

Mahuiso ecuea esohui. Eyaya, Huaniya, Jesusaja epeeji jaahuanajji etiya jiquio esohui tehuenaje. Apoa.

3 HUANI

Huanija pea etehue'yo, quijeyejje nei oja tehue

1 Eya Huani, Jesusaja epeeji jaahuanajji etii. Ecuea epeeji Cayo, eyaya jiquio esohui tehueaña mi-quea ebajji. Eseyaya quea boti nee nee Jesusaja esohui e'e nei. Jamajjeya miya ecuea epeeji nei, ecuea quea boti nee nee. ² Ecuea epeeji, eya Eyacuiñajji nijje mimi miani mijo jama ba'a: —Eyacuiñajji, ¡ecuea epeeji Cayo jaahuanacue! Oya Jesosa nijje quea ja'a nee jjapeequiani. Jamajjeya ¡oya quea ja'a nee ba'e meesahuacue! —eya poani.

³ Jesusaja pea epeeji cuana e que poeyanaje. Ohuaya eya huohui canaje jama ba'a: —Cayo quea pame nee nee ba'yani. Ohuaya Eyacuiñajji esohui jayojja jama atiitii cani —eya acanaje pea cuaa.

E'e, miya Eyacuiñajji nijje jjapeequiani quea pame nee. Jamajjeya eya quea bihui nee nee poani mijo.

⁴ E'e, ojjaña Jesusaja epeeji cuana ecue bacua cuana jama. Jamajjeya Jesusaja esohui quea pame nee jama ba'yanijo, eya quea bihui nee nee poani shajja'ajja majje.

Huani quea bihui nee poani Cayojo

⁵ Ecuea epeeji Cayo, miyaya Jesusaja epeeji yahuaajo miquea eba pojjeama cuana jaahuanaña quea pame nee, mi que poeyajo. ⁶ Jamajjeya Jesusaja epeeji cuaa poe majje ecua huohui canaje jama ba'a: —Cayohua Jesusaja epeeji cuana quea jea nee acani —jamaya onaaya eya acaña'yonaje.

¡Jesusaja epeeji cuana poqui meesahuacue! Jamaya quea pame nee. Eyacuiñajji chaco canijo, oya cuana ojaya quea boti nee. Jamajjeya ¡miyaya oya cuana jaahuanacue quea pame nee; a'a jaahuana pajea'yojji!

⁷ Oya cuana poquiani ojjaña meshi cuana huasijje Jesusaja esohui huohuiya. Poquije oya cuana Jesusaja epeeji pojjeama nijje mimi jjima poani jama ba'a: —¡Ba'e meesahuacue mo! —jama po ajjaya oya cuana.

⁸ Jamajjeya eseyaya Jesusaja epeeji poaniya ¡Jesusaja esohui huohuiji cuana poqui meesahuacue! Jamaya eseya o jayojjaya Jesusaja echacojji poani.

Dejja Diotepe bajjani quea mimishi poanaje

⁹ Eyaya esohui tehue'yonaje Jesusaja epeeji cuana jomajo tii ba'e yasijje. Jamatii Diotepeya ecuea

etehue'yo jama a sa po'yo ajja. Jomajo tii oya Jesusaja epeeji cuana jaahuanajji oe nei nequi sa poani, Diotepe. Oya mimi sa po ajja jama ba'a: —E'e, Eyacuiñajjiya Huani huoojea ca'yonaje. Jamajjeya ¡Huanija esohui shajja'ajjae!

¹⁰ Miquiana que poe'yo majje eyaya huohuije'yo Diotepe ba'yani quea mimishijo. Oya ecuanajo maimai, niñeba cani quea tai. Sijje poani. Jesusaja pea esohui huohuiji cuana oque poquiajo, Diotepe onijje jjapeequi'yo ajja. Oya o bobia ajja. Pea cuana bobia mee ajja pea'ai. Onaa bobia sa acanijo, oya quea tecue poani: —¡Pea esohui huohuiji bobia sa añajo miquianaya aje oe Jesusaja epeeji pojjeama! Jamajjeya ¡a'a ecua nijje jjapeequijji! —jamaya acani Diotepeya.

¹¹ Ecuea epeeji Cayo, ¡a'a dejja quea mimishi jama pojji! Dejja cuana quea pame poani cuana Jesusaja epeeji poani. Quea mimishi poani ca ca Jesusaja epeeji pojjeama.

Dejja Demetio bajjani quea pame poani

¹² Ojjaña dejja cuana quea bihui nee mimi Demetiojo jiquio jama ba'a: —Demetiohua quea pame nee acani —poani cuana. E'e, Edojjoshahua Pameya Demetiojo Jesusaja epeeji cuana mimi meesahua cani quea pame nee. Ecuea esohui ojo e'e nei poani. Jamaya miquea eba.

Esohui quea bihui nee epo meejji

¹³ Cayo, quea huiso esohui huohui sa poani eya mi que. Tehuetehue majamaja sa po ajja ca iña. ¹⁴ Jamajjeya quijje pishana eya poqui sa poani mi ba o'oyaa. Mi ba majje mimije o'oya. ¹⁵ ¡Eyacuiñajjiya miya quea bei nee capo mee cahua! Ojjaña miquea epeeji cuana jiquiojo ba'eya jama acani ba'a: —¿Achajja acuae mi ani so'o, Cayo?

¡Ojjaña ecuanaja epeeji cuana nijje mimicue ejo jama ba'a: —¿Achajja acuae nequiana so'o? Huani poani —acue!

Mahuiso. Eyaya, Huaniya, Jesusaja epeeji cuana jaahuanajji etiiya jiquio esohui tehuenaje. Apoa.

JODE

Jodeya esohui tehue canaje Jesosaja epeeji cuana huasijje

1 Eya Jode, Satiacoja chahua. Eya Jesosa Quitoja huoojea'yo. Ecuea epeeji cuana, eyaya miqiana que tehueaña jama ba'a: Eseyaya Chii ai Eyacuiñajjiya miqianaya iyaa ca'yonaje onijje ejjapeequi meesahua'yojji. Miqianaya ojaya quea jea nee nee poani; Jesosa Quitohua miqianaya jaahuana cani pea'ai.
² Eyacuiñajjiya miqianaya quea jea nee ca'a cahua tiil; Miqianaya caba'e meesahua cahua quea ja'a nee! iQuea bei nee caba'e meesahua cahua pea'ai!

Esohui huohuijji nisho cuana

³ Ecuea epeeji cuana, yahuajo eya jjashahuaba nei-neiquinaje miqiana que esohui etehuejji, Jesosa Quitohua esejaya mimishi cuana cuijea ca'yonajejo eba meeji. Jjeya ca ca quea huiso jjashahuabaqui majje eyaya pea esohui tehueaña miqiana que jama ba'a: iHuohui neineicue Jesosa Quitoja esohui! Eyacuiñajjiya ma esohui e'e jojo nei huoojea canaje ese que, ma ojaya epeeji nei cuana que. iMa esohui quea pame nee a'a huohui taijji!

⁴ E'e, eyaya jamaya huohuiaña Eyacuiñajjiya esohui huohuijji nisho cuana. Ma deja quea mimishi cuana Jesosaja epeeji cuana nijje jjapee nishoquiani. Quea mimishi atiitii sa poanijo oya cuana jama siajje pome poani ba'a: —Eyacuiñajji quea pame nee poani; deja cuana quea mimishi jamatii caba'yahua; cuaqui yasijje ehoojea'yojji pojjeama Eyacuiñajjiya —jamaya poani esohui huohuijji nisho.

Ma esohui huohuijji nishohua Jesosa Quito, esejaya Emeshi Mese nei oe nei cajaa aca'yonaje. Yahuajo nei nei Eyacuiñajjiya esohui tehuejji cuana esohui tehue ca poa ma deja quea mimishijoya. Jama tehueme aca poa ba'a: “Quijje Eyacuiñajjiya esohui huohuijji nisho cuana tecuea neinei caje'yo, de”.

⁵ ¿Yajja acuae Eyacuiñajjiya aca poa yahuajo Isaeni etiiquiana shajjama' poajo? Miqianajaya eba; jamatii miqianaya eyaya huohuije o'oya. Yahuajo Eyacuiñajjiya Ejito deja quea mase cuana Isaeni cuana pichojea mee ca'ya poa; Ejito meshijo ba'e cuaya meesahuaqui ca'ya poa pea'ai. Jamatii quijje pishana Isaeni cuana ojaya esohui shajja'ajja sa po ajja poajo, quea huiso mano mee ca'ya poa. ⁶ Cuanaya yahuajo Eyacuiñajjiya esohuidojojji beca cuana quea mimishi poa eyajo ba'e. Eyacuiñajjiya ehohui jayojja jama chaco tiitii sa po ajja poa. Jamajjeya Eyacuiñajjiya oya cuana iña majje jeyo

ca'ya poa; quea huesha nee nee jeanobiajea ca'ya poa, cuayaqui mee'yo jjima aca'ya poa. Quijje Jesosa Quitohua poe o'oya majje esohuidojojji tai janobajjima nei tecueajea caje'yo quea nee nee epo mee tiitii'yojji.

⁷ Yahuajo nei Sonoma cuiñajji, Jomona cuiñajji pea'ai, pea cuiñajji sisi quea chipi nee yaña poa. Jomajo dejja quea huiso cuana quea mimishi nee nee poa. Pea dejja cuana see huejja cojojji poa, de. Quea mimishi nee nee jjashahuaba tiitiiqui nequia poa. Esohuidojojji quea tai jayojja jama quea mimishi poa. Jamajjeya Eyacuiñajjiya oya cuana, ma dejja quea mimishi cuana pea'ai quiyo jeyojeyojea mee ca'ya poa cuaquiya. Jamajjeya ojjaña cuana jjeya ba'e ba mee caje Eyacuiñajji mimishijo quea quene nee nee poani; cuaquijo quea nee nee po mee caje'yo mimishi poani cuana. ⁸ Maya jiquio esohui huohuijji nishoja eba, ma jjeya nei miqiana que poyanija eba. Jamatii jjeya oya cuana quea mimishi nee nee poani; yahuajo nei nei ba'e cuana jayojjaya jama poani. Ojaya ejjashahuabaqui'yojji quea tai poani cuanaya. Eyacuiñajjiya ehohui'yo cuana shajja'ajja sa po'yo ajja pea'ai. Eyacuiñajjiya esohuidojojji quea ca'a cuana niñeba cani pea'ai jama ba'a: —Ecuanaja ejjacahuibaquijji Eyacuiñajjiyo e'e nei.

⁹ Jamatii Eyacuiñajjiya esohuidojojji quea ca'a nee nee Miyeni bajjani pea esohuidojojji quea mimishi nijje mimijaji jjima poa. Yahuajo Moisesi mano'yajo, Miyeniya Moisesija eyami ohuajea sa aca poa; Edosiquiana ca ca Moisesija eyami ohuajea mee sa po ajja poa. Miyeniya Edosiquiana mimicuijjeanobiajea canaje, jamatii onijje mimijaji jjima poa. Jamaya miminaje ba'a: —iEyacuiñajjiya oe miya catecuea cahua, ca joya mimishishiqui! —aca poa.

¹⁰ Miqiana nijje nequi esohui huohuijji nishohua ca ca aquiana joya ojaya ba jjimajo niñeba cani quea mimishiya jjejojo. Jjashahuaba bamebamequi ajja oya cuana. Ijjiacajji jayojja jjejojo jjashahuabaqui ajja poani; quea ja'a po ajja. Jamajjeya quea mimishi tii poani jjejojo cuaquijo tii nequi tiitii'yo. ¹¹ Eyacuiñajjiya oya cuana quea yeno capo mee tiitii cahua jjashajja'ajjaqui ajja jojya. Esohui huohuijji nisho cuana deja bajjani Cainija ejjashahuabaqui'yojji jayojja jama poani, quea mase nee, quea bejjo nahue jjejojo. E'e, esohui huohuijji quea pame cuana niñeba cani tii tii. Mimijaji neinei. Quea mimishi tii tii poani, deja Banaami bajjani jayojja jama poani, ma yahuajo nei quea bejjo nahue poaninaje. Jamajjeya ohuaya esohui huohui tai caninaje. Onaya cuana shajjama' poani, dejja Cone bajjani jayojja jama, ma yahuajo Eyacuiñajjiya esohui shajja'ajja sa po ajja poa. Jamajjeya Eyacuiñajjiya ma

ecua dejja tai cuana yahuajo mano mee ca'ya poa jayojja jama jjeya esohui huohuijji nisho cuana acaje'yo.

¹² Jiquio esohui huohuijji nisho cuana quea mimishi nee nee. Miquianaya ojee Jesosa Quitoja bobi ijjañaajo, quea bihui nee poanijo, oya cuana jama poani ba'a: —Ecuana miquea epeeji poani.

Chojja. Miquianaya dasia cani. Miquiana nijje ijja'ij-jianijo jejje ajja, quea bobi nee, bicho'ama poani, de. Oya cuana jama poani ba'a: Bo ba majje eseya jjas-hahuabaquiani jama ba'a: —Ena poaje, de.

Jamatii beniya bo cuana dojo cuajicuaji canijo ena oque ajja que yasijje. Jamaya jiquio esohui huohuijji nisho cuana aje oe; esohui quea pame huohui ajja, de. Oya cuana acui jjaaja ajja jama poani pea'ai. Acuijjaaja shejo acui ba majje acuijjaaja sa'ajja cani e'acuijjaaja meseya. Ejjajja chamaajo acui jajajea ca'yani. Jamaya esohui huohuijji nishohua esohui quea pame huohui ajjaajo, Eyacuiñajjiya oya cuana cajaa acaje'yo. ¹³ Oya cuana enashajo jama poani: Bae ai'aijo enashajo po majje meshi jeapohui cani; ena quea jehue nee poani. Enashajo jayojja jamaya jiquio esohui huohuijji nisho quea tai poani. Miquianaya quea mimishi ba'e mee ca chana' pea'ai; poquiquehua mee ca chana' eshahuaja ejiojji yasijje. Jamajjeya oya cuana cuaqui quea misi nee yasijje dobi tiitii meequi caje'yo. Majameta oquequi majje jijnanani, chama'yo tii ponanani, quea misi nee nee yasijje oquequiani. Jamaya esohui huohuijji nisho; esohui e'e jojo nei huohui ajjaajo cajaa acaje'yo Eyacuiñajjiya; quea huesha nee nee, quea tai nee nee yasijje huoojea caje'yo quea nee nee epo'yojji tii tii.

¹⁴ Ebionei nei dejja Adanaja osecuaja osecua tii majje, ojaya osecua cuana tii majje pea'ai etiquiana Enoqui bajjani ba'ya poa. Yahuajo nei nei Enoqui miminaje jiquio esohui huohuijji nishojo pea'ai. Jama poa ba'a:

“¡Bacue oe! Eseyaya Emeshi Mese nei poeje'yo ojjaña esohuidojojji pame cuana nijje.

¹⁵ Oya poeje'yo ojjaña mimishi cuana janobajjima nei tecueajea'yohua. Ma dejja cuana quea mimishi poani; Eyacuiñajjiya esohui jayojja jama a sa po ajja. Eyacuiñajji niñebajji poani. Jamajjeya tecueajea neinei caje'yo Eyacuiñajjiya”.

Jamaya Enoqui yahuajo nei nei poa jiquio esohui huohuijji nisho cuanaajo. ¹⁶ E'e, jiquio esohui huohuijji nisho cuana esohui huohuijji quea pame cuana niñeba cani tii tii. Mimijaji neinei. Quea mimishi tii tii po sa poani. Onajaya ejjashahuabaquijji quea miminaa poani bicho'ama. Pea dejja cuana nijje mimi nishoani ejjadasiaquijji.

Pea esohui dejja mimishi cuanaajo

¹⁷ Ecueta epeeji cuana, ja'a pajea'yojji esejaya Emeshi Mese nei Jesosa Quitoja huoojea'yo cuanaajo esohui! Ja-

maya onaaya huohui canaje ba'a: ¹⁸ —Jesosa Quito poe o'oya jjimahuaajo, ojjaña cuana quea mimishi nee nee poaje. Miquianaya Jesosa nijje jjapee neinei-quiani-jo, oya cuana mimijaji neinei-je miquiana nijje. Ojaya ej-jashahuabaquijji quea mimishi nee jama atiitii caje'yo pea'ai —jamaya Jesosaja huoojea'yo cuana acanaje.

¹⁹ E'e, jiquio esohui huohuijji nisho cuana bicho'ama cuanaya, de; quea jjashahuabaqui tai nee nee. Oya cuana Edojjoshahua Pame nijje jjapeequi sa po ajja. Jamajjeya ojaya esohui quea quehuajo Jesosaja epeeji cuana ojee jjapeequi pajea mee ca'yani esohui e'e nei pojjeamajo.

²⁰ Ecueta epeeji cuana, imiquianaaya ca ca oe Jesosa Quitoja esohui jayojja jama oe atiitii-cue quea ja'a nee! ¡Ba neineicue ojaya esohui, ojjaña tii! ¡Pea epeeji cuana ba meesahuacue ma esohui e'e nei pea'ai! Edojjoshahua Pameya miquianaya mimi meesahua canijo, imimi neineicue Eyacuiñajji nijje! ²¹ Miquianaaya ishoaña esejaya Emeshi Mese nei Jesosa Quitoja epoe o'oyajji. Ohuaya miquianajaya mimishi cuana cujea ca'yonajejo, cuaqui yasijje epoqui'yojji pojjeama; eyajo ba'e tiitii mee caje'yo onijje. ¡Eyacuiñajjiya esohui jayojja oe ba'ecue! Jamajjeya ohuaya miquianaya jaahuana caje'yo quea bei; tecuea jjima acaje'yo.

²² Pea cuana jjashahuaba quehuabaquianijo, ja'a onijje quea tecue nee nee pojji! ¡Esohui e'e jojo nei ba meesahua o'oyacue quea ja'a nee! ²³ Jamajjeya oya cuana poqui ajja cuaqui yasijje mimishi ohua pajea ca'yajo. Jjashahuabaquicue jiquio jama ba'a: —¡Onajaya mimishi quea tai nee; mimishi cajaa!

Jamajjeya miquianaya quea mimishi po ajja, ma ecua onaya yahuajo quea mimishi nee nee poanaje jayojja jama po ajja.

¡Eyacuiñajji oe bihuicue!

²⁴ Eyacuiñajji quea ca'a neeya miquianaya quea ja'a nee ba'e meesahua caje'yo; mimishi'ama nei nei po mee caje'yo. Jamajjeya miquianaya quea bojea nee nee, quea bei nee nee pea'ai nequi mee caje'yo eyajo, o ani cojja nei eseya nequije'yo. ²⁵ Yani oe nei Eyacuiñajji e'e jojo nei. Jesosa Quito, esejaya Emeshi Mese nei esejo mano'yonajejo, Eyacuiñajjiya eseya ba'e tiitii mee caje'yo onijje eyajo. E'e jojo nei Eyacuiñajji oe nei eyajo yani tii tii quea ca'a nee nee, quea ja'a nee nee. Oya ojjañaaja Emeshi Mese oe nei po tiitiije'yo. Ohuaya ojjaña amee tiitii caje'yo pea'ai. E'e nei jamaya oya poanaje yahuajo, meshi pana jjimahuaajo; jjeyahua nei jamaya oya poani; quijje jamaya oya po tiitiije'yo.

Mahuiso. Eyaya, Jodeya, Jesosa Quitoja huoojea'yohua jiquio esohui tehuenaje. Apoa.

APOCANISI

Eyacuiñajjiya jja'aqui mee canaje quijje ohua acaje'yo

1 Eya Huani, Jesusaja epeeji jaahuanajji etii. Jesusa Quitohua eya tehue mee canaje jiquio esohui cuana ojjaña que jama ba'a: Eyacuiñajjiya jama acanaje ba'a: —Eyaya ecuea Ebacua Ejja Jesusa Quito ojaya ebajji jja'aqui meeje'yo ma eya quijje aje. Jamajjeya Jesusaa ojjaña ojaya epeeji jaahuanajji cuana ba mee caje ma eya quijje pishana aje —Eyacuiñajji poanaje.

Ba majje Jesusaa esohuidojojji huoojea canaje e que. Esohuidojojjiya ecuea ebajji jjanequipanaqui mee canaje quijje Eyacuiñajjiya acaje. ² Esohuidojojjiya ba mee cajo, eyaya tehue'yonaje ojjaña ma ohua quijje acaje. Jiquio esohui ecue tehue Eyacuiñajjiya huohui cajje. Jesusa Quitohua ecuea ebajji jjanequipanaqui mee canaje e'e jojo nei. ³ Ojjaña joya jiquio esohui etehue'yo e'e jojo nei bajji poani quea bihui nee poaje'yo. E'e, jiquio ejjanequipanaqui meeji ba majje, jiquio esohui jayojja jama amajje pea'ai quea bihui nee poaje'yo. Ojjaña jiquio etehue'yo jayojja quijje pishana apoa poaje'yo. Beshahua nei apoa.

Esohui etehue'yo Jesusaja epeeji cuana huasijje Asia meshijo ba'e yasijje

⁴ Eyaya Huaniya esohui tehueña Jesusaja epeeji cuana huasijje me oeje beca cuiñajji ba'e yasijje Asia meshi yasijje pea'ai. Ecuea esohui etehue'yo jama ba'a: Eyacuiñajji yahuaño nei nei nequi tiitiia poa. Jjeya nei yani tii tii. Quijje oya ani tiitiije'yo pea'ai. E'e, oya poeje o'oya. Edojjoshahua Pame nequiani Eyacuiñajji e'anioque ani cojja nei. Jesusa Quito jomajo yani pea'ai. ¡Ohuaya miqianaya cajaanahua cahua quea pame nee; quea bei capo mee cahua pea'ai! E'e, Jesusa Quitohua e'e jojo nei huohui canaje Eyacuiñajji. Oya mano'yo majje ebionei shequi o'oyanaje eba'e tiitiyojji. Oya ojjaña emeshi mese cuana huoojeajji poani pea'ai. Jesusa ecuaña quea jea nee poanijo mano'yonaje acui ecueata'apeejo. E'e, oya mano'yajo oja ena' cuayaquinaje esejaya mimishi cuana cuijea'yoyji. ⁶ Oya ojjaña huoojeajji poanijo eseya ojjaña huoojeajji po mee cani onijje. Eseyá huoojea cani esohui huohuiya oja Chiija, Eyacuiñajji. ¡E'e, oya oe nei ojjaña huoojea'yoyji quea ca'a capo'yahua tii tii! ¡Ojjaña oya cabihua cahua tii tii! Jamaya capoahua.

⁷ ¡Bacue! Oya poeje o'oya bo biajje. Ojjaña oya ba caje. O quecua'yoyji epohua pea'aiya oya ba caje. Ojjaña dejja mimishi ojjaña meshijo ba'e o ba majje quea mete nee nee poaje'yo. Pa neineije'yo jama ba'a:

—¡Coya aje oe Jesusa poeyani esejaya mimishijo ese napaa! —ojjaña poaje. E'e, jamaya capoahua.

⁸ —Eya yahuaño anitiitiia poa. Jjeya eya yani tii tii; quijje eya poeje o'oya pea'ai. Eyaya ojjaña jamaya ña —Eyacuiñajjiya jamaya acani. Oya ojjaña huoojea'yoyji quea ca'a nee nee poani.

Huaniya Jesusa ba ca'ya poa ejjanequipanaqui nequi

⁹ Epeeji cuana, eya miqianajaya edoe mese jayojja jama poani eseya Jesusa nijje jjapeequianijo. Jesusaa eseya huoojea canijo ese nijje anije'yo. Onijje jjapeequianijo, pea cuaa eseya quea nee po mee cani. Eseyá quea nee poanijo jamatii Jesusa nijje jjapeequi pajea'yo ajja. E'e, eya ña majje pea cuaa aje ña oe eya nasi Patamoso bajjani yasijje huoojeajea canaje Eyacuiñajjiya esohui huohuijijojjo pea'ai. ¹⁰ Edojjoshahua Pameya eya ba mee canaje Jesusaja epoe o'oyajji. Oya jama poanaje ba'a: E daasajje nequi eyaya shajja'ajjanaje Jesusaja esohui. ¹¹ Eshe'ana janobajjima nei emiajji jayojja jama Jesusaa eya huohui canaje jama ba'a: —Huani, eyaya miya quea huiso ba meeje. ¡Maya oe tehuecue! ¡Tehue mee majje esohui huoojeacue ecuea epeeji cuana huasijje me oeje beca cuiñajji ba'eca huasijje, Asia meshi yasijje! Ma cuiñajji huiso cuana huasijje ba'a: Epeso cuiñajji, Esemina cuiñajji, Penamo cuiñajji, Tiatina cuiñajji, Sanisi cuiñajji, Pinanepia cuiñajji, Naonisea cuiñajji pea'ai yasijje —Jesusa poanaje.

¹² Majoya ojaya esohui shajja'ajja majje eyaya bajenaje ae enijje mimiani ebajji. Eyaya banaje cuaquijji me oeje beca huisome cuaquijji nequijji nequi.

¹³ Cuaquijji yiyesamaneijo nequi eyaya banaje Jesusa, ojjañaja Edoe Mese. Oya ca ca oe quea pame nee nee nequi jama ba'a: Oja daqui quea ao nee nee ojaya ejiojji yasijje yee ba'e. Mei huo'o esipi quea nahuejo ejjayica'aqui dojjojjanijijje. ¹⁴ Ojaya ehoojja ña quea oshe nee nee bo oshe jayojja. Ojaya ecojja quea jeajahua nee nee cuaqui jijiani jayojja. ¹⁵ Ojaya ejiojji ca ca quea siyo nee nee baa cuaquijo quea quiyo nee nee po majje quiyo huo'o huo'oani jayojja jama. Ojaya emimi'yo janobajjima nei ena quea cuejipashi nee mei pasaca biajje oquequiani jama. ¹⁶ Majameta me oeje beca huisome oja me jjotojo yani, ebiane meje. Oja enabajje cuayanaje esohui quea ja'a nee nee baa quea shejji jayojja; baa se beca jayojja. Ojaya ebose quea jeajahua nee nee eshequi quea jiji nee nee jayojja.

¹⁷ O ba majje eya quea mete jjejojo jaabichaquinaje oja ejiojji pejeje, emano'yo jayojja mo jaanaje. Jamajjeya ohuaya eya napa'ajja canaje ebiane emeje. Jama

poanaje ba'a: —¡A'a quea mete pojji! Eya yahuajo nei nei nequi tiitiia poa. Eya nequi tiitiiani pea'ai. ¹⁸ Eya mano'yo majje shequi o'oyanaje. Eya eshe tii tii yani. Eya emano'yo huoojea'yojji. Eyaya oya cuana eshe o'oya po meeje'yo, yamijji po meeje'yo. Ecue esohuijo ojjaña mimishi cuana poquije'yo cuaqui yasijje. Ojjaña quea pame ca ca eyahuasijje poquije'yo. ¹⁹ Huani, eyaya miya ba meeña ojjaña ma ohua jjeya nei acani, quijje nei ohua acaje pea'ai. ¡Ba majje maya tehuecue! ²⁰ Eyaya miya ba meeje majameta me oeje pea beca huisome ecue me jjotojo ani, cuaquijji nequijji me oeje beca pea'ai. Maya miquea quea quehua. Jama poani ba'a: Mei huo'o cuaquijji nequijji quea nahue jayojja oya cuana, ecuea epeeji nei cuana ba'e ma me oeje beca cuiñajjijo ba'eca. Majameta cuana esohui huohuijji cuana jayojja, ecuea epeeji jaahuanajji jayojja pea'ai —Jesosa poanaje enijje.

Jesosaja esohui Huaniya tehue canaje Jesosaja epeeji cuana Epesojo ba'eca huasijje

2 Majoya Jesosaa huohui canaje jama ba'a: —Huani, ¡ecuea esohui tehuecue esohui huohuijji Epesojo ba'e yasijje! Oya ecuea epeeji jaahuanajji. Jama tehue me acue ba'a: “Jamaya eyaya miya huohuiaña ba'a: Eya Jesosa Quito. Eyaya esohui huohuijji cuana majameta me oeje beca huisome jayojja jaahuanaña ecuea eme jjotojo. Eyaya ecuea epeeji ma cuaquijji nequijji jayojja jaahuanaña pea'ai. Jamaya eyaya miya huohuiaña ba'a: ² Ecuea eba ojjaña miquianajaya eba'ejji. Miquianaaya enijje ojjaña pojjaño chaco neineaña. Quea camaja. Jamatii enijje chaco pajea'yo ajja. Miquianaya jjapeequi ajja esohui huohuijji nisho cuana nijje. Oya cuana siajje poanaje jama ba'a: —Jesosaa ecua huoojea canaje oja sohui huohuiya.

“Jamatii miquianaaya ona shajja'ajja nei nei majje huohuinaje jama ba'a: —Chojja, miquianaya siajje poani. Esohui huohuijji nisho jja mi coma —miquiana poanaje. ³ E'e, miquianaaya enijje chaco neineaña, chaco chaco pajea'yo ajja. Enijje chaco chaco anijjo, pea cuaa miquianaya napa canaje quea huiso. Jamatii enijje miquianaya chaco chaco anijjo. ⁴ Jamatii eya miquianajo quea yeno poani. E'e, yahuajo eya miquianajaya quea jea nee nee poanaje. Jjeya ca ca chojja, quea jea pishana. Jamaya quea mimishi. ⁵ Jamajjeya ijashahuabaquicue! Yahuajo eya miquianajaya quea jea nee nee poanaje. ¡Eya quea jea nee nee a o'oyacue, ma ecua miquiaaya yahuajo anaje jamaya acue! ¡Bacue oe! Miquianaya e shajja'ajja sa po ajjaño eya poe cuajije miquiana que. Jiquio ecua cuaquijji quijjo'yo majje quea misi po'yani jayojja jama eyaya miquianaya ecuea esohui huohui pajea meeje'yo, ca miquianaya ma ecua yahuajo miquiaaya eya quea jea nee nee anaje jama mi a o'oyajo. ⁶ Jamatii pea miquianajaya ejashahuabaquijji quea ja'a ecuea ejashahuabaquijji jayojja jama poani ba'a: Dejjaja Niconasi bajjanijja epeeji cuana quea mimishi. Miquianajaya ojaya esohui boti'ama. Maya ecuea boti'ama pea'ai.

⁷ “Jamajjeya ¡shajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje! ¿A'a miquianaya e shajja'ajjaji? ¿A'a shajja'ajja sa poani? Ojjaña joya enijje jjapee tiitiqiani eshahua jeabichajeajji poani. Jamajoya eyaya oya cuana nequi tiiti meeje'yo Eyacuiñajji nijje eyajo. Eyaya oya cuana acuijajja ijja meeje Eba'e tiiti mee'yojji, ma Eyacuiñajjija acui yiyejo nequi”.

—Jamaya eyaya, Jesosaa huoojeaña ecuea esohui etehue'yo ecuea epeeji cuana Epesojo ba'eca huasijje. ¡Jamaya tehuecue, Huani! —Jesosaa eya acanaje.

Jesosaja esohui ojaya epeeji cuana Esemina cuiñajjijo ba'eca huasijje

⁸ Majoya Jesosaa huohui ca o'oyanaje jama ba'a: —Huani, ¡ecuea esohui tehuecue esohui huohuijji Eseminajo ba'e yasijje! Oya ecuea epeeji nei jaahuanajji. Ejo jama tehuecue ba'a: “Eya Jesosa Quito. Jamaya eyaya miya huohuiaña: Eya yahuajo nei nei nequi tiitiia poa. Eya nequi tiitiiani pea'ai. Mano'yo majje eya shequi o'oyanaje. ⁹ Ecuea eba miquianaya enijje jjapeequianajo pea cuaa napa canaje. Jamajjeya miquianaya aema'. Jamatii ecuea epeeji poanajo miquiana quea aquiana huiso jayojja. Quea bei nee nee poani. Ecuea eba pea'ai beca cuaa miquianaya niñeba cani. Oya cuana siajje poani jama ba'a: —Ecuanaaya Jodio cuana —poani.

“Chojja, Jodio cuana pojjeama oya, Eyacuiñajjija epeeji pojjeama. Edosiquianaja epeeji cuana poani. ¹⁰ ¡Bacue! Quijje pishana miquianaya napa caje cuaa. Edosiquianaja epeeji cuaa miquianaya iña majje jeanobia caje enijje ejjapeequi pajea'yojji nisho. Oe pojji cahuime miquianaya quea nee po mee caje, ¹⁰ cahuime. Jamatii ¡a'a quea mete pojji! ¡A'a enijje jjapeequi pajea'yojji jamatii cuia cajje! E pajea'yo ajja tii tii eyaya miquianaya ba'e tiiti meeje'yo eyajo Eyacuiñajji nijje. ¹¹ Jamajjeya ¡shajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca cuana huasijje! Ojjaña joya enijje jjapee tiitiqiani cuaqui yasijje epoqui'yojji pojjeama”.

—Jamaya eyaya, Jesosaa huoojeaña ecuea esohui etehue'yo ecuea epeeji cuana Eseminajo ba'eca huasijje. ¡Jamaya tehuecue, Huani! —Jesosaa eya acanaje.

Jesosaja esohui ojaya epeeji cuana Penamo cuiñajjijo ba'eca huasijje

¹² Majoya Jesosaa eya huohui ca o'oyanaje jama ba'a: —Huani, ¡ecuea esohui tehuecue ecuea esohui huohuijji Penamo cuiñajjijo ba'e yasijje! E'e, esohui tehuecue jama ba'a: “Eya Jesosa Quito. Eyaya esohui huoojeaje mi que. Baa ose miji pea'ai isho jama quea shejji nee nee, quea ca'a nee nee jayojja ecuea esohui. ¹³ Ecuea epeeji cuana, miquianaya ba'anyi cuiñajji quea mimishijo. Beshahua nei ojjaña jomajo ba'e Edosiquiana nei nijje jjapeequiani. Jamatii miquianaaya ecuea esohui jayojja jama atiitiña. Ecuea epeeji Anatipa bajjani miquiana nijje ba'e yonaje. Ohuaya

ecuea esohui huohui majamaja canaje quea pame nee. Jamajoya oya pea cuaa quecua ca'yonaje. Jamatii miquianaya enijje japeequi pajea'yo ajja. ¹⁴ Jamatii eya miquianajo quea yeno. Quea mimishi poani miquiana-ya; Banaamija esohui jama aje oe poani beca cuana Penamojo ba'eca. Ohuaya, Banaamiya emeshi mese Banaca bajjani yahuajo nei nei ba mee ca poa Isaeni cuana quea mimishi, quea tai epo mee'yojji. Miquiana-ya beca cuaa Isaeni cuana quea mimishi ba'ya poa jayojja jama poani. E'e, jjeja bobi, noe cuanaya eyacuiñajji nisho bihuiajji dahua majje dejja mimishi cuana nijje ojee ijija'ijjiani pea'ai. Pea epona cuana nijje quea mimishi poani pea'ai. ¹⁵ Cuanaya miquiana nijje japeequiani beca cuana quea mimishi. Dejja Niconasi bajjanija esohui quea tai pajea sa po'yo ajja. Quea mimishi nee nee. ¹⁶ Jamajjeya ¡miquianajaya mimishi cuana pajea'yocue! Pajea sa po'yo ajjajo eya poecuajije miquiana que. Poe majje eyaya ecuea epeeji quea mimishi poani tecuea neineije'yo. Baa ose miji pea'ai isho jama quea shejji nee nee quea ca'a nee nee jayojja ecuea esohui poaje. Quea yeno nee nee po meeje'yo.

¹⁷ "Jamajjeya ¡shajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje! Ojjaña joya enijje japee tiitiquiani Edosiquiana jeabichajeajji poani. Jamajoya eyaya oya cuana ba'e meesahuaje'yo tii tii. E'e, yahuajo Eyacuiñajjiya ojjaña Moisesi nijje nequi pahui sisi eyajje oque ijija mee ca poa. Jamaya eyaya aje o'oya miquianajaya. Maya ecuea epeeji pojjeamaja ba jjima. Ecuea epeeji cuana huasijje eyaya quiaje mei oshe sisi pea'ai. Mei oshe biajje bajjani eyacua etehue'yo yani, maya onajaya ba jjima. Emei oshe meseja eba ojaye nei".

—Jamaya eyaya, Jesusaa huoojeaña ecuea esohui etehue'yo ecuea epeeji cuana Penamojo ba'eca huasijje. ¡Jamaya tehucue, Huani! —eya Jesusaa acanaje.

Esohui Jesusaja epeeji cuana huasijje Tiatina cuiñajji ba'eca huasijje

¹⁸ Majoya Jesusaa pea esohui huohui canaje jama ba'a: —Huani, ¡ecuea esohui jiquio eya huohuiaña tehucue esohui huohuijji Tiatina cuiñajji ba'e yasijje! Jamaya tehucue ejo ba'a: "Eyaya, Jesusaa, Eyacuiñajjiya Bacua Ejjaa miquiana que tehueaña. Ecuea ecojja cuaqui jijiani jayojja quea ja'a nee nee. Ecuea ejiojji cuana baa huo'o cuaqui quea quiyo nee nee nee nequi jayojja quea jiji nee nee poani. ¹⁹ Ecuea epeeji, ojjaña joya miquianaaya aña cuana ecuea eba. Miquianaaya eya quea jea nee nee aña. Enijje japeequi pajea'yo ajja nei nei pea'ai. Quea camajajo jamatii enijje chaco pajea'yo ajja. Jamaya miquianaaya quea pame nee nee aña jje-ya, yahuajo jama pojjeama; yahuajo quea pame pishana poa. ²⁰ Jamatii eya quea yeno miquianajo, de. E'e, miquianaya quea mimishi poani. Epona quea mimishi Jesameni bajjani shajja'ajja cani beca cuaa. Oya aje oe siajjepojji jama poani ba'a: —Eya ca iña Eyacuiñajjiya huoojea'yo oja sohui huohuiya —oya poani.

"Chojja, siajje poani oya. Ohuaya aje oe ecuea epeeji cuana dasia cani. Quea mimishi po mee cani. E'e, oja-

ya esohui quea mimishijo beca cuana bobi, noe cuana-ya eyacuiñajji nisho bihuiajji dahua majje ojee ijija mee cani mimishi cuana nijje. Pea epona cuana nijje quea mimishi poani ojaya esohui quea mimishijo. ²¹ Ecuea maya epona napa jjima; ohuaya pojja'a mimishi pajea caje'yo. Jamatii oya quea mimishi ca'a; pajea sa po'yo ajja. ²² Jamajjeya eyaya oya quea nee nee po meeje'yo, ojjaña cuana joya o jayojjaya quea mimishi poani pea'ai quea nee nee po meeje'yo, ca mimishi cuana pajea sa po'yo ajjajo. ²³ Ojjaña joya o shajja'ajjajji poani eyaya mano meeje'yo. Chama'yo tii poaje'yo. Jamajoya ma ba majjeya ojjaña ecuea epeeji cuana jjabahuejja-quiye e'e jojo nei ecuea eba ojjaña cuanaja ejjashahua-baquijji. Quehuajje ejjashahuabaqui meeji pojjeama. E'e, ojjañaja eba'ejji ba majje eyaya sosequiaje'yo. Quea mimishi poanijo quea nee nee po meeje'yo. Quea pame poanijo ca ca quea bihui nee nee po meeje'yo.

²⁴ "Jamatii miquianaya Tiatinajo ba'e quea huiso nee ma esohui quea mimishi jayojja jama po ajja. Edosiquianaja esohui quea quehua, quea mimishi cuana jayojja jama po ajja pea'ai. Ba sa po ajja pea'ai. Jamajjeya eyaya miquianaya jamaya huohuiaña: ¡A'a ecuea esohui pajea'yojji! Mahuiso. ²⁵ Miquianaya ecuea epeeji cuana poani. ¡Ishoacue ecuea epoe o'oyajji! ¡A'a enijje japeequi pajea'yojji! ²⁶ Ecue Chiiya eya ojjaña meshijo ojjaña huoojea'yojji po mee tiitii cani. Jamaya eyaya miquianaya ameeje'yo enijje japee tiitiquianijo. E'e, miquianaaya eshahua jeabichajeaña. Ecuea esohui jayojja jama atiitiañajo, peaa miquianaya cuiajea caje'yo pojja'a. Jamatii eyaya miquianaya enijje ona huoojea'yojji nequi meeje'yo tii tii. Ojjaña huoojea'yojji quea ca'a nee nee poaje'yo, ojjaña cuana ojjaña meshijo ba'eca cuana huoojea'yojji nei nei quijje poaje'yo. Jiquio ecua meshimisi jajaajajea cani baaa jamaya shajjama' cuana ojjaña meshijo ba'eca jeabichajeaje'-yo miquianaaya enijje ojjaña huoojea'yojji nequi'yo majje. ²⁸ Eyaya miquianaya quiaje'yo pea'ai aquiana quea pame nee nee yohua jayojja ba'a: majameta ai, eshequi huiyejji mecajjeahua nei jaasohuani jayojja jama.

²⁹ "Jamajjeya ¡shajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje; jashahuabaquicue!"

—Jamaya eyaya, Jesusaa huoojeaña ecuea esohui etehue'yo ecuea epeeji cuana Tiatinajo ba'eca huasijje. ¡Jamaya tehucue, Huani! —eya Jesusaa acanaje.

Jesusaja esohui ojaya epeeji cuana huasijje Sanisi cuiñajji ba'eca huasijje

3 Majoya Jesusaa eya huohui canaje jama ba'a: —Huani, ¡ecuea esohui tehucue esohui huohuijji Sanisi cuiñajji ba'e yasijje, ma ecuea epeeji nei cuana jaahuanajji yasijje! Tehucue jama ba'a: "Eya Jesusa Quito. Eyaya Edojjoshahua Pame miquiana huasijje huoojeaña. Eyaya miquianaya huohuiaña: Ecuea epeeji cuana, ojjaña miquianajaya eba'ejji cuana eyaya baña. Pea cuaa miquianajo huohui canaje jama

ba'a: —Jesosaja epeeji cuana Sanisijo ba'ecaa Jesosaja esohui jayojja jama acani —poanaje.

¹“Jamatii eyaya miqianaya baña beshahua nei ecuea esohui jayojja jama ba'e ajja. ²Jamajjeya ꞑecuea esohuijjo jashahuabaquicue quea ja'a nee! Quea mimishi poanijo miqianaya jashahuabaquiani oe pojji. Beshahua nei jashahuabaqui ja'a pajea'yonaje. Jama-ya quea mimishi, de. Eyacuiñajjija esohui jayojja jama a'ajja miqianaaya. ³Ecuea esohui huohuijjiya ecuea esohui huohui canaje miqiana huasijje. Jamajjeya ꞑecuea esohui jama acue! ꞑMimishi cuana pajea'yocue! Ejo jashahuabaqui ajjajo aje oe eya miqiana que quehuaje poecuajije quea nee nee po meeya, siipojji quehuaje poeyani jayojja. Eya ache pojajajo miqiana que poeje o'oya miqianajaya ebajji pojjeama.

⁴“Jamatii beca cuana Sanisijo ba'e quea boejea'yo ba'e, mimishi'ama nei. Oya cuana enijje ba'e meeje'yo. Quea pame nee ba'e eyaya oya cuana daqui quea oshe nee nee huosho meeje'yo enijje eba'e tiitii'yojji.

⁵E'e, ojjaña jaya enijje japeequi pajea'yo ajja daqui quea oshe nee nee huosho meeje'yo. Ojaya ebajjani cuana eyaya tehue'yonaje eba'e tiitii mee'yojji. Maya ojaya ebajjani eyaya ecuijea'yojji pojjeama. Oya cuana-jo ca ca eyaya ecue Chii huohuije jama ba'a: —E'e, oya cuana ecuea epeeji nei —jamaya eya poaje ojjaña esohuidojojji cojja neijo ani.

⁶“Jamajjeya ishajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje; jashahuabaquicue!”

—Jamaya eyaya, Jesosaa huoojeaña ecuea esohui etehue'yo ecuea epeeji cuana Sanisijo ba'eca huasijje. ꞑJamaya tehucue, Huani! —eya Jesosaa acanaje.

Jesosaja esohui ojaya epeeji cuana huasijje, Pinanepia cuiñajjijo ba'eca huasijje

⁷Majoya Jesosaa eya huohui canaje: —Huani, ꞑecuea esohui ecuea esohui huohuijji, ecuea epeeji jaahuanajji Pinanepia cuiñajjijo ba'e yasijje tehucue pea'ai! Jama tehucue acue ba'a: “Ecuea epeeji cuana, eyaya, Jesosa Quitohua quea ja'a nee nee añña, mimishi'ama, e'e jojo nei Eyacuiñajji. Yahuaajo nei etiiquiana Dabi Jodio cuanaja emeshi mese poanaje. Jjeya eya Eyacuiñajjija cuiñajji eyacua mese. Eyaya esecue ca'a majje pea edobiqui meeji pojjeama. Ca'apejo majje pea dobiqui meeje.

⁸“Ecuea epeeji cuana, miqianajaya eba'ejji ecuea eba. Miqianaya oe pojji yani. Jamatii ecuea esohui jayojja jama añña. Enijje japeequi pajea'yo jjima. Jamajjeya eyaya miqianaya esohui huohui meeje pea cuana huasijje. Eshahuaja epeeji cuana miqianaya huohui pajea mee'yojji pojjeama. ⁹Oya cuana siajje poani jama ba'a: —Ecuana Jodio, e'e jojo nei Eyacuiñajjija epeeji —oya cuana poani.

“Jamajjeya eyaya eshahuaja epeeji cuana miqiana que poe meeje ecui'oshajjajo nequiya miqiana bihuiaa jama ba'a: —E'e, miqianaya Eyacuiñajjija epeeji e'e jojo nei, ojaya quea jea nee nee.

¹⁰“Pea cuana miqianaya napa cani. Jamatii miqianaya ecuea esohui jayojja jama enijje japee tiitiquije'yo. Jamajjeya quijje eyaya baje ache cuana ecuea epeeji e'e jojo nei. Quijje eshahuaja epeeji ojjaña cuana quea nee nee po meeje'yo; eyaya miqianaya jaahuana nei-neije'yo. ¹¹Quijje pishana eya, Jesosa poeje o'oya miqiana que. Jamajjeya ꞑecuea esohui jayojja jama po tiiticue! Jamajjeya pea cuanaja miqianaya edasiajji pojjeama. Majoya Eyacuiñajjija ejjashahuabaqui'yojji miqianajo jama acaje ba'a: Miqianaya ba'e tiitii mee caje'yo onijje. ¹²ꞑBacue! Ojjaña miqianaya enijje japeequi pajea'yo ajjajo eyaya eyajo nequi tiitii meeje'yo. Acui ca'a, equi yamajjana quea quemo, quea ca'a nequiye'yo tii tii jayojja jama ecuea epeeji nei nequi tiitii-je'yo eyajo. Eyaya ojjaña cuana ba meeje miqianaya ecuea epeeji e'e jojo nei, Eyacuiñajjija pea'ai. Jiquio ecua e'acui meseya acuijo oja bajjani quecuatehue cani jayojja jama eyaya aje'yo; ecuea epeeji nei cuana tehueje. Jamajjeya miqianaya, ojjaña ecuea epeeji pea'ai ojee enijje eyajo ani meeje'yo. Enijje poeje'yo; Eyacuiñajjija cuiñajji eyacua, Jenosanena eyacua bajjani jayojja jama poeje. Ecuea bajjani eyacua poaje eya quea ca'a nequianajo. Maya eyaya ojjaña miqianaya ba meeje'yo.

¹³“Jamajjeya ishajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje; jashahuabaquicue!”

—Jamaya eyaya, Jesosaa huohuiaña ecuea epeeji cuana Pinanepiajo ba'eca huasijje. ꞑJamaya tehucue, Huani! —Jesosaa eya acanaje.

Jesosaja esohui ojaya epeeji cuana huasijje Naonisea cuiñajjijo ba'eca huasijje

¹⁴Majoya Jesosaa eya huohui ca o'oyanaje pea'ai jama ba'a: —Huani, ꞑecuea esohui huohuijji Naonisea cuiñajjijo ba'e yasijje tehucue ecuea esohui! Oya ecuea epeeji nei jaahuanajji. Jama oya tehucue ba'a: “Ecuea epeeji cuana, eya Jesosa e'e jojo nei Eyacuiñajjija huoojea'yo. Eyaya huohuiaña Eyacuiñajjija esohui e'e nei. Eyaya Eyacuiñajji nijjeya ojjaña pana coa poa. Eyaya miqianaya huohuiaña jama ba'a: ¹⁵Ojjaña miqianajaya eba'ejji cuana ecuea eba. Eyaya baña miqianaya enijje japee neineiqui sa po ajja. Jamatii e ca-ja sa po'yo ajja pea'ai. ꞑA'a epeeji nisho pojji! ꞑE cajaa a sa amajje jja ca iña oe huohucue! E'ishijji quea quiyo pojjeama jayojja poani miqianaya. E'ishijji quea hueo pishana enabajo peajja, ena quea tai jama. Jiquio ecua seya chijjoco ena ishi'ajja majje ojjaña'yaña jayojja jama eyaya miqianaya cajaa achana', ca ecuea esohui miqianaaya mi shajja'ajjajo. ¹⁷Miqianaya aje oe jiquio jama jashahuaba quehuaquiani ba'a: —Eya ca iña Eyacuiñajjija epeeji quea pame nee poani —miqianaya jamaya poani. Jamaya pea'ai poani ba'a: —Eya dejja quea aquiana huiso jayojja jama poani.

“Chojja. Miqianajaya eba pojjeama Eyacuiñajjija miqianaya ba cani jama ba'a: Miqianaya aema' jayojja, daquima' jayojja, cojjama' jayojjaya. Miqianaya quea mimishi ba'yanijo Eyacuiñajji quea yeno nee nee poani

miquianajo. ¹⁸ Jamajjeya eyaya miquianaya huohuaña: ¡Eya sa neineicue! ¡Ecuea esohui shajja'ajja neineicue! Ecuea esohui mei huo'o quea nahue jayojja jama poanijo, miquianajaya eba'ejji quea ja'a nee poaje. Eya miquianajo mano'yonaje miquianajaya mimishi cuijea'yojji. ¡Jamaya jjashahuabaquicue! Maya ba majje miquianaya daqui oshe ehuosho'yo ba'e jayojja jama poaje, quea boejea nee. Jamajjeya miquianaya bicho'ama poaje miquianajaya mimishijo. ¡Edojjoshahua Pame bacue! Oya ecojja shicuijji jayojja; ohuaya miquianaya ecuea esohui ba meesahua caje'yo, quea jjashahuabaqui ja'a nee po mee caje'yo. ¹⁹ Ojjaña ecuea epeejji eyaya tanacuaña, tecueña pea'ai ejjabahuejjaqui meejji ecuea quea jea nee neejo. Jamajjeya ca oe jecuea esohui jayojja jama acue e'e jojo nei! ¡Ecuea epeejji nisho a'a po majajji! ²⁰ ¡Bacue! Esecuejo nequiya iyaa cani edobiquijji, miquiana nijje ejjapeequijji. Oya jayojjaya eya poani. Eyaya miquianaya iyaaña. E shajja'ajja majje jama pocue ba'a: —¡Jesosa, dobicue! —Jamaya poajo eya miquiana que dobiqijje miquiana jjashahuabaqui meejji. Miquianaya enijje jjapeequije pea'ai. Jiquio ecua epeejji cuana ojee ijia'ijjiani jama poaje eseya. ²¹ E'e, ojjaña joya enijje jjapee tiitiqiani eshahua jeabichajjiji poani. Jamajjeya quijje eyajo eyaya huohuije jama ba'a: —¡Enijje nequicue! ¡Enijje ojjaña huojja'yojji pocue!

“E'e, miquianaya e jayojja jama poaje. Eyaya quea ca'aa jjejojo Edosiquiana jeabichajanaje. Jamajjeya ecue Chii nijje eya anioqueani; ojjaña huojja'ajji poani tii tii. ²² Jamajjeya ¡shajja'ajjacue Edojjoshahua Pameja esohui; ojjaña ecuea epeejji cuana Asia meshijo ba'eca cuana jjashahuabaquicue!”

—Jamaya eyaya, Jesosaa huojjaña ecuea esohui etehue'yo ecuea epeejji cuana huasijje Naonisea cuiñajjijo ba'e yasijje. ¡Jamaya tehucue, Huani! —eya Jesosaa acanaje.

Ojjaña eyajo ba'ecaa Jesosa bihuia cani

4 Majoya esohuidojojjiya jjanequipana meequi canaje jama ba'a: Eya ba mee canaje esecue eca'apejo nequi jayojja eyajo. Jjanequipana cooqui mee canajejo Jesosa enijje miminaje. Ojaya esohui eshe'ana emiajji jayojja jama janobajjima nei huohui canaje yahuajo pishana. Jjeya ohuaya eya huohui ca o'oyanaje jama ba'a: —Huani, ¡poecue eyahuasijje e que! Eyaya miya ba meeje jiquio eya quijje aje —Jesosa poanaje.

² Jjeyahua nei Edojjoshahua Pameya eya ba mee canaje jama ba'a: Emeshi Mese nei e'anioque ani ojjaña huojja'yojji. ³ ¡Oya ache bame nee nee poanaje! Quea jeajahua nee nee mei ca'a quea siyo jayojja: mei quea nahue jasepe bajjani jayojja, codinania mei bajjani jayojja pea'ai. Ojaya e'anioquejji eshijje copocopo jayojja yaninaje quea bame nee nee mei tahuua esemenana mei bajjaniya jeasiyo cani jayojja jama. ⁴ Quea huiso Jesosaja epeejji etii cuana, 24 huisome onijje e'anioque ani. Eyacuiñajji ca ca eyiyesama neijo ani. Onajaya daqui quea oshe nee nee. Esapajo iya mei huo'o ejaahuojja quea nahue ani emeshi mese epojji. ⁵ Eya-

cuiñajjiya ojaya e'anioquejjiyo aniya pojjeje po mee cani, beni jjaqueyaqui mee cani, cueji taaa po mee cani pea'ai. O cojja neijo cuaquijji me oeje beca huisome nequi. Jiquio cuaquijji cuana jama ba'a: Edojjoshahua Pameya acani Jesosaja epeejji cuana nijje ma ecua me oeje beca cuiñajjijo ba'e jama. ⁶ Eyacuiñajji cojja nei eyaya banaje bae quea tahua nee nee jayojja, quea coe nee nee, quea siyo nee nee jayojja.

Eyaya banaje pea'ai ebeca pee pea'ai aquiana eshe, quea cojja huiso nee nee Eyacuiñajji e'anioque ani pejeje, cojja beca jayojja, ecojja quipa huejjaje jjabaquiani pea'ai. ⁷ Oe aquiana eshe ibia jayojja. Pea ana'ai jayojja. Pea aquiana dejja jayojja cojjame, dejja cuichoiji jayojja. Pea huipa cuabesaba'e jayojja jama. ⁸ Ojjaña jiquio aquiana eshe cuichoiji cuabesajji de, ojjaña 6 cuichome, me oeje oe cuichome. Ojjaña cuana quea cojja huiso nee nee; ojaya ecucho quimejjeje pea'ai ecojja cuana yani. Ojjaña cuana sohuicuayani tii tii Eyacuiñajji bihuiajji; sohuicuaya pajea ajja nei nei mecajje ai quiana. Jamaya poani ba'a:

“Eyacuiñajji, miya ca ca oe quea pame, mimishi'ama, quea boejea nee nee. Miya ojjaña Emeshi Mese nei quea ca'a nee nee. Miya yahuajo nei nei ani tiitiia poa, jjeya ani tiitiiani, quijje ani tiitiije'yo pea'ai”.

Jamaya oya cuana poani.

⁹ E'e, ma aquiana eshe cuana sohuicuayani Eyacuiñajji bihuiajji. Jama poani ba'a: “Eyacuiñajji, miya oe nei quea pame nee nee, oe nei nequi tiitiiani, ¡ojjaña miya cabihuia cahua!” oya cuana jama sohuicuayameya poani.

¹⁰ Ma shajja'ajja majjeya Jesosaja epeejji etii cuaa, ma 24 huisomeya ecui'oshajjajo nequiya Eyacuiñajji bihuia cani. E'e, oya oe nei e'anioque ani tii tii bihuia cani. Onajaya mei huo'o ejaahuojja quea nahue nee cjjajjea majje Eyacuiñajji ejojji pejeje iyaoquea cani. E'e, Eyacuiñajji oe nei quea ca'a nee nee. Jamajjeya oya bihuia cani cuaa jama ba'a:

¹¹ “Eyacuiñajji, miya oe nei ecuanaja Emeshi Mese nei. Miya oe nei quea pame nee nee. Jamajjeya ecuaaya miya bihuiaña. Miya oe nei ani tiitiije'yo, oe nei ojjaña huojja'ajji. Miyaya ojjaña aquiana cuana pana cooa poa. E'e, ojjaña aquiana miyaya saña. Jamajjeya pana majje nequi tiiti meeña, miyaya”.

Jamaya Eyacuiñajji bihuia cani ma 24 epeejji etii cuaa eyajo aniya.

Ejeje esohui etehue'yo eyaya banaje

5 Majoya eyaya, Huaniya Eyacuiñajji e'anioquejjiyo ani banaje. Ojaya eme' ebianeijje esohui ejejeo tehue e'ñabebo nequi eyaya banaje. Jiquio ejejeo quea huiso esohui etehue poanaje, omiji pea'ai tehue me'ya poanaje. Tehuejeyo majje me oeje beca, ⁷ ijia-baji meeme'ya poanaje. ² Eyaya esohuidojojji quea ca'a nee nee banaje pea'ai. Ohuaya ojjaña cuana janobajjima nei huohui'ajja canaje jama ba'a: —¿A'ya cuae quea pame nee nee esohui etehue'yo hui isajji esohui etehue'yo ebajji? ¡Joya quea pame nee nee Eyacuiñajji

cojja nei nei nequicue esohui etehue'yo ecueabaji hui isajji! —esohuidojojji jama taaameya poanaje.

³Jamatii eyajo ba'e, meshijo ba'e pea'ai, yahuajo emano'yo pea'ai chama' poanaje oe quea pame nee nee esohui cuiabaji hui isajji, ejee jjequijeapiihuijji. Chojja, chama' nei nei poanaje oe quea pame nee nee ma esohui ba meeji. ⁴Jamajjeya chama' nei nei ba majje eya quea yeno poanaje. Pa neineinaje. ⁵Majoya Jesusaja epeeji etii, ma Eyacuiñajji bihuia caniya pea 24 huisome cuana nijjeya eya huohui canaje: —¡A'a oe pajji! ¡Bacue! Oe dejja Jesusa bajjani yani, ma Jodaja osecua, emeshi mese Dabija osecua poa. Oya ca ca oe-ya esohui cueabajijji hui isa majje ejee jjequijeapiihui caje'yo esohui ebajji. Oya quea ca'a nee nee, ibia naa asha jayojja jama ojjaña huoojea'yojji poani.

⁶Majoya eyaya banaje oe dejja Eyacuiñajji e'anioque ani pejejo nequi. Oya ebeca pee pea'ai huisome aquiana eshe cuana yiyesama neijo nequi, Jesusaja epeeji etii quea ca'a quea huiso cuana yiyesama neijo nequi pea'ai. Oya ca ca jiquio jama ba'a, ñajjajja esho'i equecua'yo jayojja ojjañaja mimishi cuijea'yojji. Oya Emeshi Mese nei quea ca'ajo ñajjajja yahue she'anajji jayojja me oeje beca she'aname jayojja eyaya oya banaje. Ojjaña ojaya eba neineijo oya quea cojja huiso nee jayojja banaje eyaya, me oeje beca cojjame jayojja eyaya oya banaje, 7 cojjame. Ecojja cuana Edojjoshahua Pameya acani, ma Edojjoshahua Pameya Jesusaja epeeji cuana ojjaña meshijo ba'eja yajjijo acani jayojja. ⁷Ma dejjaa ñajjajja equecua'yo jayojjaa Eyacuiñajji que jianequichipiqui majje jjeshe canaje esohui etehue'yo oja ebiane meje ifanequia nequi. ⁸Jamajjeya aquiana eshe cuaa ebeca pee pea'ai huisomeya Jesusa bihuia canaje. Jesusaja epeeji etii quea huiso 24 huisome pea'aiya Jesusa, ma ñajjajja equecua'yo jayojja bihuia canaje ecui'oshajjajo nequiya. Oya cuanaja e'inaqueyajji yaninaje. Mei huo'o caneco madeja pohui jayojja anijji yaninaje pea'ai. Madeja pohui jayojja huichachanaje. Huichacha quea shiye Eyacuiñajjija epeeji emimi onijje jayojja. ⁹Jesusaja epeeji etii cuana esohui eyacua sohuicuayanaje Jesusa bihuiajji jama ba'a:

“Jesusa Quito, ¡miya quea pame nee neejo esohui etehue'yo jjeshe majje ecueabaji hui isacue! E'e, miya quecua canaje cuaa. Miquea ena' cuayaquijajo mano'yonaje ojjaña cuanaja mimishi cuijea'yojji. Ojjaña miquea ejjeshe'yo jayojja. Jamajjeya Eyacuiñajji nijje jja-peequi meeaña ojjaña cuana ojjaña meshijo ba'e, ojjaña cuiñajjijo ba'e, ojjaña pea esohuijo mimiani cuana pea'ai. ¹⁰Jesosa, miya ojjaña huoojea'yojji poani. Jamajjeya ecuana huoojeaje minijje ojjaña joya ojjaña meshijo ba'e huoojeaa, esejaya Chii aija esohui huohuiya pea'ai”.

Jama sohuicuayameya poanaje Jesusa bihuiajji.

¹¹Majoya eyajo eyaya banaje esohuidojojji quea huiso nee nee. Eyaya onajaya esohuicuayajji shajja'ajjanaje pea'ai. Oya cuana quea huiso nee neejo sicosico ajja. ¡Ache huiso nei nei, de! Oya cuana ejjanequitoqui'yo nequinaje aquiana eshe cuana, Jesusaja epeeji etii

cuana quea huiso pea'ai ejjanequitoqui nequi'yonaje. Ojjaña yiyesama neijo Eyacuiñajji e'anioque ani.

¹²Onaya janobajjima nei sohuicuayanaje; Jesusa bihuia canaje jama ba'a:

“Jesusa, miya quea pame nee nee. Miya ojjañaja mimishijo mano'yonaje, ñajjajja sho'i equecua'yo jayojja jama poanaje. Miya oe nei ojjaña huoojeajji. Ojjaña aquiana miquea, ojjaña tii. Ojjaña miquea eba. Miyaya quea ca'a poaniya jjejojo ojjaña aña. Ecuanaaya miya shajja'ajjaña; ecuanaaya miya bihuiaña. Ecuanaaya huohuiaña mijo jama ba'a: —Jamaya quea pame nee miyaya aña —poani”.

Jamaya esohuidojojji cuana poanaje eyajo.

¹³Majoya eyaya shajja'ajjanaje ojjaña Eyacuiñajjija pana cuana, ojjaña eyajo ba'eca cuana, ojjaña meshijo ba'eca cuana, ojjaña yahuajo mano'yo cuana, ojjaña enajo ba'eca cuana pea'aiya sohuicuayani. Ojjaña cuana Eyacuiñajji e'anioquejijjo ani bihuia cani. Jesusa ma ñajjajja jayojja jama mano'yonaje pea'ai bihuia cani onaaya jama ba'a:

“Eyacuiñajji, miya ojjaña huoojeajji. Jesusa, miya ecuanajo mano'yonaje. Jamaya quea pame nee nee. Jamajjeya ojjaña ecuanaaya miya bihuiaña. Miya shajja'ajjaña pea'ai ecuanaaya. Quea ca'a nee neeya jjejojo miyaya ojjaña cuana aña. ¡Jamaya capoahua tii tii!”

Jamaya sohuicuayani ojjaña cuana.

¹⁴Majoya aquiana eshe cuana Eyacuiñajji pejejo ani jama poanaje ba'a: —E'e, ¡jamaya ojjaña miya ca-bihuia cahua tii tii!

Jesusaja epeeji etii cuaa, ma 24 huisomeya pea'ai Eyacuiñajji bihuia canaje ecui'oshajjajo nequiya. Oya ca ca oe enequi tii tii. E'e, Jesusa etehue'yo ecueabajijji me oeje beca ecueabajime'ya hui isajja mee caje, Eyacuiñajjiya.

Esohui etehue'yo oe ecueabajijji'ya isajja canaje Jesusa

6 Majoya eyaya, Huaniya banaje jama ba'a: Jesusa, ma ñajjajja sho'i equecua'yo jayojja yani. Ohuaya oe etehue'yo ecueabajijji'ya isajja canaje, ebionei. Majoya eyaya shajja'ajjanaje oe aquiana eshe eyajo mimiani. Ojaya esohui cueji taaani jayojja. Joya mapichi aija edaasa biajje ani yasijje taaanaje jama ba'a: —¡Poecue!

²Jjeya nei eyaya banaje mapichi oshe poeyani. Ohuaya mapichija edaasa biajje aniya mai ecohuijji ifa canaje. Oya emeshi meseja ejaahuojja quea nahue nee quia canaje cuaa. Oya poquicuajinaje ojjaña jeabichajja, emeshi mese quea ca'a nee nee jayojjaya.

³Majoya Jesusaa pea ecueabajijji'ya isa canaje. Eyaya pea aquiana eshe eyajo shajja'ajjanaje. Ohuaya jama iyaame acanaje ba'a: —¡Poecue!

⁴Jjeya nei eyaya banaje mapichi ai quea huo'o nei nei. Dejja mapichija edaasa biajje ani baa ai quia canaje cuaa. Oya jama huohuime acanaje cuaa ba'a: —¡Poquicue miya! ¡Ojjaña jjaquecuaqui meecue pea cuana nijjeya! —Jamaya poanijo ojjaña quea tecue nee nee po mee cani ojjaña pea cuana nijje.

⁵ Majoya Jesosaa pea ecueabajijji'ya isajea ca o'oyanaje. Pea aquiana esheya iyaa canaje jama ba'a: —¡Poecue!

Majoya mapichi ai tehue poeyani eyaya banaje. Ohuaya mapichija edaasa biajje aniya e'ipia'ajjajji iña canaje, bobi ipia'ajjajji, oe pojji bobi yani jojoya.

⁶ Majoya eyaya shajja'ajjanaje pea eyajo mimiani aquiana eshe yiyesamajje nequi. Jama poanaje joya mapichija edaasa biajje ani nijje ba'a: —¡Echacojji cuana oe pojjajo chacochocho majje oe pojji bobi quiacue chaco sosejje! ¡Anoso oe pojji, oe tepe iye quemo pojja'a quiacue; shijje iye huiso pea beca peejjima tepe pojja'a quiacue jjeyahua nei e'ijjajji! ¡A'a huana meejji quijje e'ijjia'yojji! ¡Acuijajja sei, acuijajja na e'ishijji a'a quea nahue ameejji! —o'ya poanaje.

⁷ Majoya Jesosaa pea ecueabajijji'ya isajea cajo eyaya shajja'ajjanaje pea aquiana eshe eyajo. Ohuaya jama iyaame acanaje ba'a: —¡Poecue!

⁸ Jamajjeya ijeya nei eyaya banaje mapichi jahua poeyani. Ohuaya mapichija edaasa biajje aniya quea huiso nee nee mano mee caje'yo. Jamajjeya oya Jjamaano meequi'yojji bajjani. Mano mee ca'yajje ojjaña poqui mee caje'yo emano'yo sajaa huasijje. Oya huohui canaje cuaa jama ba'a: —¡Quea huiso nee nee mano mee'yocue ojjaña meshijo ba'eca! ¡Oe dejja mano mee'yocue; beca cuana a'a mano meejji! ¡Jamaya amajamacue ojjaña meshijo ba'e cuana! ¡Quea huiso mano mee'yocue jjaquecuaquianijo; bobi chamajo pea'ai, emanomeejji jo pea'ai mano mee'yocue! ¡Ijjia-cajji quea mase cuaa dejja quea huiso ijja mee'yocue pea'ai!

⁹ Majoya Jesosaa, ma ñajjajja sho'i equecua'yo jayojjaja pea ecueabajijji'ya isajea cajo eyaya banaje quea huiso Jesosaja epeejji yahua jo mano'yo cuana eyajo nequi'yo. Pea cuaa oya cuana quecua ca'yonaje Eyacuiñajji esohui jama ajji poanijojo, Jesosaja esohui huohuijijojo pea'ai. E'e, oya cuana jiquio jama ba'a: Jodio cuaa ñajjajja ebacua cuana mei e'iya biajje cuia cajje na' cuayaquianinaje mimishi cuijea'yojji jayojja jama dejja cuaa Jesosaja epeejji cuana quecua ca'yajje onajaya ena' cuayaqui'ya poa. ¹⁰ Jamajjeya oya cuana taaanaje jama ba'a: —Emeshi Mese nei, miya quea pame nee; ojjaña miyaya ña. Huohui majje jamaya poani. ¡Bacue oe, dejja mimishi cuaa ecua quecua ca'yonaje! Jamajjeya ¿ache shono shai ojjaña quea mimishi ojjaña meshi cuanajo ba'e quea nee nee po meeje'yo miyaya? —o'ya cuana poanaje.

¹¹ Eyacuiñajjiya oya cuana quia canaje daqui oshe quea ao nee nee. Ona nijje miminaje jama ba'a: —Pea cuaa miqianaya quecua ca'yonaje ecuea esohui huohuijijo poanijojo. Miquea edoe mese cuana ecuea epeejji cuana enijje chacochochoani pea cuaa quecua caje'yo pea'ai. Jamajjeya ¡shoa socue! Quecujeyo cajo, eyaya dejja mimishi cuana quea nee nee po meeje'yo —Eyacuiñajjiya acanaje.

¹² Majoya Jesosaa pea ecueabajijji'ya isajea cajo eyaya banaje jama ba'a: Meshi huehuahuehuanaje janobajjima nei. Eshequi quea apo nee nee poanaje, daqui

tehue nei jayojja poanaje. Ba'i quea huo'o nee, ena' jayojja poanaje. ¹³ Majameta cuana jjacajjaqui majje jijijioquenaje meshi yasijje, beni pajjiya acuijajja etahua jeahuojojea cani jayojja poanaje. ¹⁴ Eyatahuatahua chama'yo tii poanaje. Jjahuejjajjaqui majje yoquise esipi ejejequieapiihui nequi jjaajjaqui'yanii jayojja poanaje pea'ai. Eyayo, nasi cuana pea'ai jjaajaajjaqui majje jasheshojeaquinaje meshi huehuahuehuajo. ¹⁵ Jamaya emeshi mese cuana poanaje pea'ai; jeabichajja'yonaje ojjaña. E'e, jiquio jama poanaje ba'a: Emeshi mese cuana, dejja huooejaji cuana, dejja quea aquiana huiso cuana, sohuinano mese cuana, dejja etii cuana, dejja ehooejajjima' cuana, dejja ehooejajjiijji cuana pea'ai jja'aniquehuaqui canaje jiani cuana huasijje, eyayo cuana huasijje pea'ai. ¹⁶ Ojjaña jiquio dejja mimishi cuana quea mete nee nee poanijo siasianaje jama ba'a: —Eyacuiñajji ojjaña huooejaji oya yanii. Jesosa ñajjajja sho'i equecua'yo jayojja yanii pea'ai. Eseyaquea mimishi poanijo, oya cuana quea quene nee nee poani ese nijje. ¡Jamajjeya eyayo cuana, mei ai cuana pea'ai ecua biajje ca'oqueahua, Eyacuiñajjiya eseyaquea eba ca cuahuajje, Jesosaa eseyaquea quea nee nee epo mee ca cuahuajje! ¹⁷ E'e, oya cuana poeyani ojjaña quea mimishi napaa. Ojjaña eseyaquea manojeyo, de —jama siasiamaya dejja mimishi cuana poaje.

Jesosaja epeejji bahua tehue canaje Jodio cuanaja ojjaña ebajji

7 Majoya eyaya banaje ebeca pee pea'ai esohuidojojji cuana. Eyacuiñajji onijje miminaje beni cuana ehooejaji pojjeamajo. Beni quea quemo dejja cuana napajji meshi cuana huasijje, bae ai cuana huasijje, acui cuana huasijje epoqui poaje jjejojoya iña canii esohuidojojji cuaa. ² Majoya eyaya pea esohuidojojji banaje; eshequi poeje mijijje poeyanaje. Ohuaya aquiana etehuejji ye canaje Eyacuiñajjiya epeejji cuana bahua tehuejji ojjañaja ebajji. Ma esohuidojojji ebepa pee pea'ai cuana huasijje taaanaje meshi cuana, bae cuana pea'ai enapa ca poaje jjejojo. Jama poanaje ba'a: ³ —¡Ishoa socue! ¡Meshi, bae ai, acui cuana pea'ai a'a jinapajji so'o! ¡Eyaya Eyacuiñajjiya epeejji Jodio cuana Eyacuiñajjiya bajjani ojjañaja ebajji cabahua tehuesahua! —ma esohuidojojji poanaje.

⁴ ¿Ache huiso tehue canaje ebahuajje Eyacuiñajjiya bajjani ojjañaja ebajji? Eyaya shajja'ajjanaje jama ba'a: —Jodio cuana Eyacuiñajjiya bajjani quea huiso nee nee tehue canaje ebahuajje, 144.000 huisome. Jodio etiiquianaja Isaenija bacua eja 12 cuana poa. Ojaya osecua cuana tehue canaje. ⁵ Jama tehueme acanaje ba'a: Jodaja osecua cuana 12.000 huisome; Shobenija osecua cuana 12.000 huisome; Janeja oya jayojjaya 12.000 huisome; ⁶ Aseneja oya jayojjaya 12.000 huisome; Netanija jamaya pea'ai 12.000 huisome; Manaseja osecua cuana 12.000 huisome; ⁷ Simeonija osecua cuana 12.000 huisome; Nemija osecua cuana 12.000 huisome; Isacanija osecua cuana 12.000 huisome;

⁸ Sabononija oya jayojjaya 12.000 huisome;
Joseja oya jayojjaya 12.000 huisome;
Bejamija jamaya pea'ai 12.000 huisome.
Mahuisoya Eyacuiñajjija bajjani tehue mee canaje Jo-
dio cuanaja ebahuajje.

**Quea huiso nee nee ojee nequi daqui oshe huosho'yo
epo**

⁹ Majoya eyaya banaje quea huiso nee nee pea cua-
na, Jodio pojjeama ojee echicha'yo nequi, daqui oshe
nee nee huosho'yo epo. Quea huiso nee nee poanijojo
esicojji pojjeama. Oya cuana ojjaña meshijo ba'e, ojja-
ña cuiñajjijo ba'e pea'ai poeyani. Dejjja tehue cuana,
Ese Ejja cuana, dejjja nei cuana, ojjaña de, poeyani. Oj-
jaña pea esohuio mimiani cuana poeyani pea'ai. Ojja-
ña oya cuana Eyacuiñajji cojja nei nequi. Cuanaya Jeso-
sa ñajjajja equecua'yo jayojja cojja nei nequi yasijje
poeyani ojjaña. Onajaya daqui ao quea oshe nee nee.
Onaaya jjememe iña jeasohua cani Jesosa bihuiajji.

¹⁰ Ojjaña cuana taaanaje jama ba'a:

“Eyacuiñajji, miyaya ojjaña huoojeaña. Jesosa, miya
mano'yonaje ñajjajja equecua'yo jayojja. E'e, miyaya
ecuanaya ba'e tiitii meeaña”.

Jamaya acanaje cuaa.

¹¹ Majoya ojjaña esohuidojojji eyajo cuana Jesusaja
epeeji etii pejeje nequi, ebeca pee pea'ai aquiana es-
he cuana pejeje nequi pea'ai, Eyacuiñajji ma ojjaña yi-
yesama neijje ani yasijje jjaneequichipiquinaje. Eyacui-
ñajji ojjaña huoojea'yojji poani bihuia canaje esohuido-
jojji cuanaa ecui'oshajjajo nequiya. Jama poanaje ba'a:
“¡Jamaya capo'yahua, Eyacuiñajji! Miya quea pame
nee nee. Ojjaña miquea eba. Miya shajja'ajjaña tii tii
ecuaaaya. Miya ojjaña huoojeajji enequi tii tii. Ojjaña
ecuaaaya miya bihuia tiitii aña. ¹² Miya quea ca'a nee
neejo ojjaña miyaya aña tii tii. ¡E'e, jamaya capo'yahua
tii tii!”

Ojjaña esohuidojojji jamaya sohuicuayanaje.

¹³ Majoya Jesusaja epeeji etiiya eya huohui'ajja cana-
je jama ba'a: —Huani, ojjaña jiquio echicha'yo nequi
daqui oshe nei huosho'yo epo ¿a'a miquea eba?
¿Achejje shai oya cuana poeyani so'o?

¹⁴ Jamajjeya eyaya oya jama anaje ba'a: —Chojja,
ecuea ba jjima. Miyaya ca ya ca oe baña, de. ¡Che iña
oe huohucue!

Ohuaya eya saja'a canaje jama ba'a: —Onaya ba'e'-
yonaje meshijo. Jesosa nijje jjapeequianijo, dejjja mi-
mishi cuaa oya cuana napa huicha'ahuicha'a canaje. Ji-
quio ecua dejjja daqui oshe tajja cajje quea boejea
nee nee poani jayojja jama Jesusaa ojjañaja mimishi
cuijea ca'yajje quea boejea nee nee poani. E'e, Jesosa
ñajjajja sho'i equecua'yo jayojja poanaje. Ojaya ena'
cuayaqui majje ojjañaja mimishi cuijea'yojji poanaje.

¹⁵ Jamajjeya oya cuana nequi mee ca'yani Eyacuiñajji
cojja neijo eyajo. Jomajo onaaya Eyacuiñajji nijje chaco
tiitii cani quea bihui nee nee. Eyacuiñajji ojjaña huoo-
jea'yojji poani. Ohuaya ojaya epeeji cuana jaahuana
tiitii cani. ¹⁶ Ojaya epeeji cuana quea shoe pojjeama
poaje'yo. Quea nabataja po ajja pea'ai. Eshequijo qui-

yo'yo ajja, quea mano po'yo ajja pea'ai. ¹⁷ E'e, Jesosa
ñajjajja equecua'yo jayojja Eyacuiñajji pejeje nequi. Ji-
quio ecua ñajjajja cuiñajjiya ñajjajja cuana jaahuana
cani, ena eteo ishi mee cani jama jayojja Jesusaa ojaya
epeeji cuana jaahuana cani. Ojaya e'ishijji ishi mee
majje ba'e tiitii mee caje'yo onijje pea'ai eyajo. Eyacui-
ñajjiya jaahuana canijo, oya cuana quea yeno po ajja.
Pa'yo ajja poaje'yo —jamaya Eyacuiñajjiya epeeji etii
poanaje.

**Pea ecueabajjiji'ya isa canaje ma me oeje beca oe
poanaje**

⁸ Majoya Jesusaa pea ecueabajjiji'ya isa canaje. Ja-
majjeya ojjaña ecueabajjiji'ya me oeje beca huiso-
me'ya oeyejje nei isajea ca'ya poa. Jamajjeya oeyejje
nei ecueabajjiji'ya isa ca'yajo, ojjaña cuana eyajo ani je-
ca neinei po'yonaje. ² Quijje pishana eyaya banaje me
oeje beca esohuidojojji Eyacuiñajji cojja nei nequi. Oya
cuana huasijje eshe'ana ai jayojja me oeje beca quia
mee canaje Eyacuiñajjiya emiajji.

³ Majoya eyaya banaje pea esohuidojojji. Ohuaya shi-
yeshiye dahuajji mei huo'o quea nahue ifanequia cani
mei huo'o e'iya aquiana dahuajji pejeje. Oya quia cana-
je cuaa madeja pohui jayojja quea shiye nee nee
edahuaejajji Eyacuiñajji bihuiajji. Maya dahuajea cana-
je mei huo'o e'iya biajje, ma Eyacuiñajji anioqueani
pejeje. Jiquio ecua madeja pohui dahuajea cajje hui-
chacha quea shiye ba'esohuaquiani jayojja jama Eya-
cuiñajjiya epeeji cuanaja emimi onijje eyahuasijje ba'e-
sohuaquianijo Eyacuiñajjiya shajja'ajja cani. ⁴ Jamajjeya
madeja pohui jayojja quea shiye nee nee esohuidojojji-
ja eme jjotojo ani quiyo nequinaje. Huichacha ba'e-
sohuaquinaje Eyacuiñajji yasijje. Ma huichacha ba'e-
sohuaquianijo, Eyacuiñajjiya shajja'ajja canaje Jesusaja
epeeji cuanaja emimi onijje. ⁵ Majoya ma esohuidojoj-
jiya cuaqui cojja sha mei e'iya biajje ani iya canaje shi-
yeshiye dahuajji. Majoya eyajo nequiya ohuaya cua-
qui cojja sha shiyeshiye dahuajji ani jeaoqueajea cana-
je meshi yasijje. Majoya cueji cuana taaa poanaje ja-
nobajjima nei. Pojjeje baa siyoo cuana poanaje. Meshi
huehuahuehuanaje pea'ai. Quea shajjaquijjo pea'ai
poanaje.

Emiajji cuana

⁶ Majoya me oeje becaa, ⁷ esohuidojojji cuaa emiajji
cuana iña canaje emiajji. ⁷ Ebionei esohuidojojjiya oja-
ya emiajji ana'ai she'ana jayojja mia canaje aquiana
quea huiso meshijo edahuaejajji. Mia cajo, quea huiso
meja jjacajjaquinaje oquequinaje meshi yasijje. Pojje-
jeya quea huiso meshi dahua canaje. Ena' oquequinaje
meshi yasijje pea'ai. Jamajjeya meshi quea huiso qui-
yonaje. Oe meshi quiyonaje; beca quiyo jjima poanaje.
Pea quiyonaje; beca quiyo jjima poanaje. Jamaya poa-
naje ojjaña meshijo. Acui cuana jamaya poanaje
pea'ai. Oe acui quiyo'yonaje; beca acui quiyo jjima
poanaje. Ojjaña huenihueni quiyo'yonaje. Chama'yo tii
poanaje.

⁸ Me oeje oe pea esohuidojojji cuanaja mia jjiima oja-ya emiajji cuana. Jamajjeya majoya pea esohuidojojjiya ojaya emiajji ana'ai she'ana jayojja mia canaje. Taaa'yo majje ohuaya aquiana eyiyo quea quemo nee, quea jiji nee jayojja jeaqueajea canaje bae ai cuana huasijje. Quea huiso bae ai quea huo'o poanaje ena' jayojja. Ena' jjejojo quea ihui poanaje. ⁹ Jamajjeya quea huiso nahuoo mano'yonaje. Oe nahuoo mano'yonaje; beca mano'yo jjiima poanaje. Jamaya poanaje ojjaña nahuoo cuana. Quea huiso bishe ai hui'i'yonaje. Oe bishe hui'i'yonaje; beca hui'i'yo jjiima poanaje. Jamaya poanaje ojjaña bishe cuana.

¹⁰ Me oeje huiso esohuidojojji cuanaja emiajji cuana mia jjiima so'o. Jamajjeya majoya pea esohuidojojjiya ojaya emiajji mia cajo oe majameta eyajo nequi quea jiji nei, cuaquijji quea quemo jayojjaya oquequinaje quea huiso cuei yasijje. ¹¹ Maya majameta ma bajjani ba'a: Quea Pase Nee Nee bajjani. Jamajjeya quea huiso cuei, ena eteo pea'ai quea tai poanaje. Oe cuei quea pase nee nee; beca cuei pase'ama poanaje. Jamaya poanaje ojjaña ena. Jamajjeya quea huiso dejja cuana mano'yonaje ena quea pasejojo.

Ebeca pee pea'ai huisomeja esohuidojojji cuanaja emiajji mia jjiima so'o. ¹² Jamajjeya majoya pea esohuidojojjiya ojaya emiajji mia cajo eshequi jaasohua pishana majje jiji ajja, quea misi poanaje. Mecajje ba'i jamaya poanaje pea'ai. Jaasohua pishana majje quea misi poanaje. Majameta cuana quea misi poanaje pea'ai: Oe majameta jiji ajja; beca cuana jiji canaje. Jamaya poanaje ojjaña majameta.

¹³ Majoya eyaya banaje huipa cuabesani. Oya taaana-je jama ba'a: —Quea yeno nee nee poaje ojjaña meshijo ba'eca cuana. E'e, pea beca pee jjiimaa esohuidojojji cuaa emiajji eshe'ana jayojja mia caje. Mia cajo, quea nee nee poaje quea huiso dejja cuana —jama taaameya poanaje huipa. Jamaya poani eyaya banaje, Huaniya.

⁹ Majoya pea esohuidojojjiya ojaya emiajji mia canaje. Mia cajo pea majameta jayojja meshi yasijje oquequiani eyaya banaje. Oya majameta jayojja huasijje quia mee canaje Eyacuiñajjiya esecue cojja quecuaca'apejo meeji, yave quia canaje jjani ai quea doe nee nee ca'apejojji. ² Jjani ai quea doe nee nee ca'apejo cajje eyaya banaje huichacha quea quemo ba'esohuaquinaje que quea quemo nee nee dahuaajea cani jayojja, quea jiji nee nee poani jayojja. Eshequi quea misi poanaje huichacha quea quemojo. ³ Huichacha quea quemojo ani satajje jayojja cuayaquinaje, satajje ejja pojja'a. Quea satajje moo nee nee poanaje. Meshi yasijje poeyanaje. Ma satajjeja ehua'o cuana aji jayojja, quimajji. ⁴ Satajje quimajji huohui canaje Eyacuiñajjiya jama ba'a: —¡A'a huenihueni napajji! ¡Acui sisi, acui quea quemo pea'ai a'a napajji! ¡A'a napajji ecuea epeeji ma ebahujje ecuea bajjani ecue etehue'yo! ¡Ecuea epeeji pojjeama ca ca napacue, ma ebahujje ecuea bajjani tehue jjiima! ⁵ ¡Oya cuana a'a mano mee'-yojji! ¡Quea nee nee oe po meecue me oeje ba'ime, 5 ba'ime! —poanaje.

Jamajjeya equimaa quecua majamaja cajje quea nee nee po mee canaje, ajiya quecua cani jayojja. ⁶ Jamajjeya dejja mimishi cuana mano'yo sa poaje ma me oeje ba'ime. Jamatii mano'yo jjiima poaje.

⁷ Ma satajje ejja cuana jiquio jayojja jama ba'a: Yamijji mapichi ai ejjaquecuaquijji dojojji jayojja. Dejja jayojja cojjame. Mapichi mei huo'o quea nahueja sapa huahuo iya jayojja. ⁸ Satajje ejja cuana saojji de, epona jayojja. Ojaya ese' quea ao, ibia jayojjaya. ⁹ Ese'ojje baa daqui quea moo eba'e huana. Oya cuana cuichoiji pea'ai. Ojaya ecucho cuana quea shajjaquijjo, mapichi quea huiso nee nee cuajicuaquijjebeani jayojja jama poani, mapichiya pea ejjaquecuaquijji dojojji jayojja. Dejja jayojja quecuaa. ¹⁰ Satajje ejja cuanaja ehua'o aji jayojja, quimajji. Dejja cuana quecua caje equimaa. Quea nee nee po mee caje'yo me oeje ba'ime. ¹¹ Satajje ejja cuanaja ehoojeajji yani. Oya jjani ai cuiñajji, ma emano'yojaa nequi quea doe nee nee cuiñajji. Jodio cuanaja esohuijo ojaya bajjani Abodono bajjani; Jieno cuanaja esohuijo oya Aponiono bajjani; Ese Ejjaja esohuijo ojaya bajjani Ojjaña Quea Yeno Po Mee'yojji bajjani.

¹² Jamajjeya ebionei epojja cuana quea nee nee poani apoacanaje. Quijje pishana quea camaja nee nee poaje. E'e, beca esohuidojojji cuanaja emiajji mia jjiima.

¹³ Majoya pea esohuidojojjiya ojaya emiajji mia canaje. Mia cajo eyaya pea shajja'ajjanaje. Oya mimiani ebeca pee pea'ai eshe'ana yiyesama neijo nequi. Ma eshe'ana cuana yani mei huo'o e'iyaa biajje, Eyacuiñajji cojja nei nequi. ¹⁴ Eyacuiñajji jama poanaje ba'a esohuidojojji nijje, ma jjeja nei mia canaje nijje ba'a: —Ebeca pee pea'ai esohuidojojji cuana yani cuei quea quemojo, Eopate cuei yobijo. ¡Maya esohuidojojji cuana jomajo ejeyo nequi pichojeaquiyocue! —Eyacuiñajji poanaje—. ¹⁵ E'e, eyaya ma esohuidojojji cuana nequi meeña jjeja nei ehoojeajji jayojja. Jiquio shequiajajo, jiquio ba'ijo, jiquio pojajajo, jiquio eshequi nequi pojajajo pea'ai ehoojeajji. Poquije mimishi cuana quea huiso nee nee quecuaa. Jama quecuame acaje ba'a: Oe dejja quecua caje, becanejjijji pea'ai quecua jjiima acaje. Jamaya acaje'yo ojjaña dejja cuana ojjaña meshijo ba'eca cuana —jamaya Eyacuiñajji poanaje.

E'e, ma esohuidojojji cuana pichojea mee'yo majje huoojea caje jjaquecuaquiya. ¹⁶ Dejja mase mapichija edaasa biajje ani huoojea caje quea huiso nee nee. Peaa eya huohui canaje ache huiso dejja mase cuana mapichija edaasa biajje ani. Quea huiso nee nee, dosciento millone, 200.000.000 huisome poaje, de.

¹⁷ E'e, Jesusaa eya, Huani ecuea ebajji ba mee canaje mapichi cuana, dejja cuana mapichija edaasa biajje ani pea'ai. Eyaya oya cuana banaje jama ba'a: Ojaya ese'ojje baa daqui quea moo ba'ehuana canaje ona equecua ca'yo poaje jjejojo. Baa daqui quea moo quea siyo, quea tahua nee, quea jahua nee jayojja pea'ai. Mapichi cuanaja esapa cuana ibia naa asha jayojja. Enabajje cuayani cuaqui jiji jayojja, huichacha, beni quea ihui, quea pase, mei quea ihui jayojja pea'ai. ¹⁸ Oya cuaquijo, huichachajo, beni quea ihuijo pea'ai quea huiso dejja mimishi cuana manojeyo. Oe dejja

mano mee caje'yo; becamejijiji pea'ai mano'yo jjima poaje. Jamaya poaje ojjaña dejja mimishi cuana ojjaña meshijo ba'eca cuanaya. ¹⁹ Oya mapichi ai cuaa quea huiso nee nee mano mee caje'yo; cuaquijijiya ojaya enabajje cuayaniya mano mee caje'yo. Ojaya ehua'ohua pea'aiya dejja cuana quea nee nee po mee caje. Mapichi cuanaja ehua'o cuana peyo jayojja, sapa-me ehua'o icuijo enequi ese'. Maaya dejja mimishi cuana ijijia cajje quea nee nee poaje'yo.

²⁰ E'e, Eyacuiñajjiya dejja mimishi cuana napa majajja mee ca'yonaje. Jamatii, quea huiso ma pojajjo mano'yo jjima poanaje cuana. Jamatii onaya mimishi cuana pajea sa po'yo ajja. Eshahua cuana bihuia pajea'yo ajja, eyacuiñajji nisho cuana bihuia pajea'yo ajja pea'ai. Eyacuiñajji nisho acanaje cuaa, mei huo'o quea nahue, mei oshe quea nahue, mei jahua quea nahue, mei nahue'ama, acui pea'ai eyacuiñajji nisho acanaje. Mayi eyacuiñajji nisho cuana shajjama', jiojjima', cojjama' pea'ai. ²¹ E'e, maya dejja cuana quea mimishi tii tii poanaje pea quecuajji cuana, jjadasiaquijji cuana, sii-pojji cuana, pea cuana cojjojji poani cuana. Mimishi cuana pajea'yo ajja; quea mimishi po tiitii'yonaje.

Pea esohuidojojji Huaniya ba canaje

10 Majoya eyaya, Huaniya banaje eyajo pea esohuidojojji ba'eoqueani meshi yasijje. Oya bo oshe biajje nequi. Ojaya daqui bo oshe nei nei jayojja. Ojaya sapa biajje eshijje quea bame nee nee jayojja ej-janequitoqui'yo nequiani. Ojaya ecojja quea jiji nee nee eshequi jayojjaya poani. Ojaya equise jijiani, equi yamajjana acui ca'a jijiani jayojja jama poani. ² Ohuaya ejee etehue'yo iña cani emeya. Ecueabajjiji'ya oeyejje nei isajea ca'yajo jjaeapichojojjoqui'yonaje. Oya epii nequi. Ojaya ebiane jiojji bae ai biajje nequi; shani jiojji ca meshi yasijje nequi. ³ Oya taaanaje janobajjima nei ibia quea quemo nee nee mimiani jayojja. Ojaya esohui me oejje beca huiso cueji jayojja poanaje. ⁴ Cueji cuana jayojja shajja'ajja majje eyaya ojaya esohui tehue'ajjanaje. Esohui tehue jjimahuajo pea eyajo nequi enijje miminaje jama ba'a: —Chojja. ¡Me oejje beca cuejija esohui a'a tehuejji! ¡A'a huohuijji oja-ya esohui! —poanaje.

⁵ Majoya ma esohuidojojjiya bae ai biajje nequiya, meshijo nequiya pea'aiya oja eme' ebiane eme' jeasohua canaje eyahuasijje. ⁶ Majoya oya miminaje jama ba'a: —Eyacuiñajjiya ojaya esohui ma ecua ohuaya yahuajo huohui canaje jamaya e'e jojo nei jjeyahua nei acaje'yo. Oya quea ca'a nee nee poani. E'e, oya ba'e tiitiani; eya cuana, ojjaña aquiana eyajo nequi pea'ai pana ca'ya poa; meshi cuana, ojjaña aquiana cuana meshijo nequi pea'ai pana ca'ya poa. Bae cuana, ojjaña aquiana cuana bajio ani pea'ai pana ca'ya poa, Eyacuiñajjiya —jamaya esohuidojojji ma ebiane jiojjijje enajo nequi, shani jiojjijje meshijo nequi poanaje; ohuaya huohui canaje jama ba'a: —Jjeya apoa. Ma ecua ohuaya huohui canaje jamaya jjeyahua nei Eyacuiñajjiya acaje'yo. ⁷ Yahuajo Eyacuiñajjiya ojaya esohui huohuijji cuana huohui mee ca poa ma ohua

quijje nei acaje. Quijje pishana pea esohuidojojjiya quijjeyejje neiya ojaya emiajji mia caje. E'e, ojjaña ba mee caje Eyacuiñajjiya acaje cuana ma yahuajo oja dejja cuana ba mee jjima poa, ma ohua quijje acaje pea'ai, maya yahuajo nei onajaya quea quehua poanaje —jamaya ma esohuidojojji poanaje.

Me oejje oe esohuidojojji cuaa emiajji cuana mia canaje. ⁸ Majoya oya eyajo nequi mimi o'oyanaje enijje jama ba'a: —Huani, ¡ejee etehue'yo jjeshecue! ¡Ma esohuidojojji meshijo, ena ojjojo pea'ai jiojji nequiya emejo nequi ejee etehue'yo jjeshecue!

⁹ Jamajoya eya poquinaje esohuidojojji yasijje. Eyaya oya huohuinaje jama ba'a: —¡Quiacue mo ejee etehue'yo!

Jamajjeya eya ohuaya huohui canaje jama ba'a: —E'e Huani, ma'aje. ¡Ejee etehue'yo ijjiacue! Miya ijjiyajje quea biquia nee poaje huini jayojja. Jamatii miya ijjiyajje quea pase nee nee see aijo poaje —ma esohuidojojji poanaje.

¹⁰ Jamajoya eyaya ejee etehue'yo jjeshe majje ijjiyanaje. Quea biquia huini jayojja poanaje. Jamatii eya ijjiyajje quea pase nee nee poanaje see aijo. Jamajjeya eyaya banaje ma esohui etehue'yojo quea huiso cuana quea nee nee poaje'yo. ¹¹ Majoya pea eyajo nequiya eya huohui ca o'oyanaje jama ba'a: —Huaniya, ¡quea huiso dejja cuana huasijje, ojjaña meshi cuana huasijje ojjaña pea mimime cuana huasijje, quea huiso emeshi mese yasijje pea'ai huohuiquicue ma Eyacuiñajjiya quijje acaje'yo! —jamaya poanaje eyajo nequi.

Beca esohui huohuijjiya esohui huohui canaje

11 Majoya Eyacuiñajjiya pea eyajo nequiya eya quia mee canaje acui e'ipia'ajajji. Ohuaya eya huohui canaje jama ba'a: —Huani, ¡Eyacuiñajjiya equi ipia'ajjacue! ¡Mei e'iya aa aquiana dahuajji pea'ai ipia'ajjacue! ¡Dejja cuana jomajo nequi Eyacuiñajji bihuiajji pea'ai sicocue! ² ¡Jodio pojjeamaja e'anijji Eyacuiñajjiya equi pejejo ani a'a ipia'ajajji! Jodio pojjeama cuaa Eyacuiñajjiya epeeji cuana napa caje beshahua nei ebeca pee pea'ai shequijame, 42 ba'ime. Jodio ojaya epeeji cuana Eyacuiñajjiya quea boti nee, ojaya Jenosanena cuiñajji quea boti nee jayojjaya. ³ Eyaya ecuea becamejijiji pea'ai esohui huohuijji huoojaje dejja cuana huasijje ecuea esohui huohuiya. Eyaya oya cuana ecue sohui huohui meeje quea huiso cahuijo, 1.260 cahuime. Ohuaya pea daqui huosho caje, dejja emano'yojo quea yeno nee nee poani jayojjaya. Jamajjeya ojjaña ba caje ojjaña meshijo ba'eca cuana quea nee nee poaje. ⁴ Ma ecuea becamejijiji pea'ai esohui huohuijji cuana beca onimo acui cuana jayojja. Oya cuana beca cuaquijji nequijji Eyacuiñajji cojja nei nequi jayojja pea'ai. Jamajjeya ojjaña ba caje Eyacuiñajjiya oya cuana jaahuana cana. ⁵ E'e, onaa esohui huohuijji napa cajo cuaqui cuayani ojaya enabajje, o napajji poani quiyojaje dejja mimishi cuana. Jamaya ojjaña manaje'yo, ma beca esohui huohuijji napajji poani. ⁶ Eyacuiñajjiya jiquio esohui huohuijji quea ca'a po mee cana. Jamajjeya ohuaya jama acaje'yo ba'a:

Eyacuiñajjija esohui huohuijji poaniya ohuaya ena chama' po mee cani. Quea jabo po mee cani. Ohuaya sa majje ena' jayojja po mee cani cuei cuana, bae cuana pea'ai. Ohuaya sa majje ojjaña cuana napa cani pea'ai.

⁷ Majoya jiquio beca esohui huohuijji cuaa huohui pajea majje, oe aquiana quea mase nee nee ma jjani ai quea doe neejo ba'e poeje ma esohui huohuijji cuana cuiajea. Jeabichajea majje cuiajea caje'yo. ⁸ Oya cuana mano'yo majje jamatii jaaje ejiojjijo, Jenosanena cuiñajjijo. Ma cuiñajjijo pea cuaa yahuajo Jesosa, ese jaahuanajji acui ecueata'apeejo ba'ehuanasohuajea canaje. Deija cuana Jenosanena cuiñajjijo ba'eca quea mimishi poaje, ojjaña Sonoma meshijo yahuajo nei ba'ya poa jayojja, Ejito meshijo ba'eca jayojjaya pea'ai quea mimishi poaje. ⁹ Jamajjeya quea mimishi poaniya jjejojo Eyacuiñajjija esohui huohuijji poani mano'yajo emojeajji pojjeama. Ejiojjijo tii oya jamatii jaajeaje pea beca peejjima cahuime. Ojjaña cuiñajjijo ba'eca cuana, ojjaña pea esohuijji mimiani cuana ojjaña meshijo ba'e pea'ai poeje ma esohui huohuijji emano'yojaa baa.

¹⁰ Ojjaña deija mase cuana quea bihui nee nee poaje ma esohui huohuijji mano'yonajejo. Jamajjeya aquiana quia caje onajaya epeeji cuana huasijje sosema'. E'e, ma esohui huohuijjiya ojjaña quea mimishi poani napa canaje quea hui so cahuime. Jamajjeya o mano'yajo quea bihui nee poaje ojjaña mimishi cuana.

¹¹ Jamatii pea beca peejjima cahuime poajo Eyacuiñajjija ma beca esohui huohuijji shequi mee caje o'oya. Nequisohua mee caje o'oya pea'ai. Jamajjeya ojjaña deija mimishi cuana oya cuana eshe o'oya ba majje quea mete nee nee poaje. ¹² Majoya ma esohui huohuijjiya shajja'ajja caje pea eyajo nequi mimi nequi onijje jama ba'a: —¡Yacua oe poe'yocue!

Jamajjeya oya cuana bo oshe biajje nequi sohuaquije'yo eyahuasijje. Sohuaquije'yo o quecua'yojji epo cuaa ba caje. ¹³ Majoya deija mimishi cuaa ba caquijo tii, Eyacuiñajjija meshi huehuahuehua mee caje'yo. Quea hui so equi jaabichajea meequi caje'yo. Deija cuana Jenosanenajo ba'e manoje'yo quea hui so nee nee, 7.000 huisome. Pea cuana mano'yo jjima poaje. Oya cuana quea mete nee nee poaje'yo. Jama poaje ba'a: —E'e de, Eyacuiñajji eyajo ba'e quea pame nee nee, quea ca'a nee nee —jamaya quea hui so poaje.

¹⁴ E'e, jamaya ma beca esohuidojojjiya mia majje deija mimishi napa caje'yo. Quijje pishana pea esohuidojojjiya mia cajo deija mimishi cuana ojjaña meshi cuana ba'eca cuana napa caje'yo pea'ai.

Pea esohuidojojjiya mia canaje

¹⁵ Majoya pea esohuidojojjiya ojaya emiajji mia canaje. Mia cajo pea cuana eyajo ba'e janobajjima nei sohuicuayanaje jama ba'a:

“Eyacuiñajji, miya ojjaña huoojeajji poani, ojjaña meshijo ba'eca cuana huoojeajji poani. Miyaya huoojeana-je Quito, mique huoojea'yo ojjaña cuana jaahuanajji. ¡Jesosa Quito ojjaña huoojeajji po meecue! ¡Ohuaya ojjaña cuana cahuoojea cahua tii tii!”
Jamaya oya cuana poanaje.

¹⁶ Majoya quea hui so Jesosaja epeeji etii cuanaa, 24, Eyacuiñajji cojja nei e'anioque aniya Eyacuiñajji bihuia canaje ecui'oshajjajo nequiya. Jama poanaje ba'a:

¹⁷ “Eyacuiñajji, miya oe nei quea ca'a nee nee po tiitiiani, ojjaña huoojeajji poani tii tii pea'ai. Ecuaaya miya bihuiaña miya quea pame nee nee poanijo. E'e, miya yahuajo nei nei ani tiitiia poa. Jjeya miya ani tiitiiani pea'ai. Ecuaaya miya bihuiaña miya ojjaña huoojeajji-jojo. E'e, miya quea ca'a nee nee po tiitiiani miya oe nei ojjaña huoojeajji poani tii tii. ¹⁸ Ojjaña deija mimishi cuaa miya jeabichajea sa acani. Jamatii miya ona nijje quea quene nee nee poaje jjeya nei; quea nee nee po meeje'yo. E'e, jjeya miyaya deija mimishi cuana quea nee nee po meeje, oya ojjaña meshijo ba'e napajji poanajejo. E'e, ojjaña yahuajo nei emano'yo jjeya miyaya huohuije miquea ejjashahuabaquijji onajaya eba'ejjijo. Deija quea mimishi poa quea nee nee po meeje'yo. Miquea esohui huohuijji cuaa, Jesosaja epeeji cuaa mi-quea esohui jayojja jama acanijo ca ca miyaya quea bihui nee po meeje'yo. Minijje ani tiiti mije'yo pea'ai ojjaña miquea epeeji, esho'i cuana, etii cuana pea'ai”.
Jamaya Jesosaja epeeji etii cuana poaje.

¹⁹ Majoya eya ba mee canaje Eyacuiñajjija equi eyajo ani. Eyiye dojjo ba mee canaje. Jomajo Eyacuiñajji yani. Jomajo yani acui equecua quea bame nee, Eyacuiñajjiya esohui etehue'yo huanajji. Ma esohui etehue'yo etii-quianaa Moisesi nijjeya tehue ca poa. Ma esohui etehue'yo eya bajo, pojjeje quea hui so jeaja'a canaje, baa siyoo taaa poanaje, cueji poanaje pea'ai, meshi huehuahuehuanaje, meja jjacajjajequinaje, quea hui so nee oquequinaje pea'ai. E'e, jamaya eyaya banaje.

Epona eshequi jayojja sa'o huo'o jayojjaa napa canaje

12 Majoya eyaya banaje aquiana ai'ai eyajo, ma Eyacuiñajjija quijje ohua acaje. Jiquio jama poaje ba'a: Eyaya banaje epona eyajo. Ojaya daqui quea jiji nee eshequi jayojja. Oya nequinaje ba'i biajje. Ojaya esapa huahuo yani majameta cuana, jiojji miji beca, 12 majameta. ² Oya siasianaje ebacua neejo. ³ Majoya eyaya banaje aquiana ai'ai eyajo, sa'o ai jayojja quea huo'o, sa'o ai ejja pojja'a. Oya quea sapa hui so, me oeje beca, 7 sapame. Oya quea she'ana hui so pea'ai, ome miji pea'ai she'aname, 10 she'aname. Oja sapa cuanajo ejaahuojja jayojja yani pea'ai, me oeje beca ejaahuojja. ⁴ Ohuaya iña canaje quea hui so majameta cuana ehua'ohua. Iña majje majameta cuana jeaoqueajea canaje meshi yasijje. Oe majameta iña canaje, beca iña jjima poanaje. Jamaya ojjaña majameta cuana acanaje ma aquiana sa'o ai jayojjaa. Oya sa'o ai jayojja epona pejeje nequinaje oja bacua ijiajji nisho, cuayajo. ⁵ Jamajjeya ma eponaja ebacua cuayanaje deija sho'i. Oya ojjaña huoojeajji quea ca'a nee nee poaje'yo. Ohuaya ojjaña shajja'ajja mee caje'yo ojaya esohui. Jamajjeya sa'o ai jayojjaja oya ijia jimahua peaa ma ebacua dojo canaje eyahuasijje Eyacuiñajji e'anioque ani yasijje. ⁶ Majoya ma epona poquicuaicujainaje quea huesha, meshi quima huasijje. Jomajo Eyacuiñaj-

jiya eponaja eba'e meeji acanaje. Jomajo Eyacuiñajjiya oya jaahuana canaje quea cahui huiso, 1.260 cahuime.

⁷ Majoya eyajo quea huiso nee nee jjaquecuaquinaje. Jama poanaje ba'a: Ma sa'o ai jayojjaa ojaya esohuidojojji quea mimishi, quea huiso nee nee cuana nijjeya jjaquecuaquinaje esohuidojojji pame cuana nijje, Miyeni ojaya esohuidojojji quea pame nee nee quea huiso nee nee nijje. ⁸ Miyeni quea ca'a nee nee, sa'o ai jayojja quea ca'a pishana. Jamajjeya Miyeniya sa'o ai jeabichajea majje jeaoqueajea canaje meshi yasijje. E'e, sa'o ai, ojaya esohuidojojji cuana pea'ai nequi tiitii mee jjima acanaje eyajo. ⁹ Miyeniya oya cuana jeaoqueajea canaje meshi yasijje. Ma sa'o aija pea bajjani cuana jama ba'a: Peyo nei yahuajo nequia poa bajjani, eshahua nei bajjani pea'ai, Edosiquiana nei bajjani pea'ai, Satanasa. Ohuaya beshahua nei ojjaña cuana ojjaña meshijo ba'eca cuana dasia cani, quea mimishi po mee cani. E'e, ma sa'o ai ojaya esohuidojojji cuana nijje jeaoqueajea canaje meshi yasijje Miyeniya, esohuidojojji quea pameya.

¹⁰ Majoya pea eyajo nequi enijje miminaje janobajjima nei. Jama poanaje ba'a: —Jjeya nei Eyacuiñajjiya ecuana ba'e tiitii mee cani. Ohuaya Edosiquiana nei jeabichajea ca'yonaje. Jamajjeya oya ojjañaja Emeshi Mese nei poani. Ohuaya, Quitohua ojjaña huoojaja cani pea'ai. Oya Eyacuiñajjiya huoojaja'yo ojjaña jaahuanajji. Ma sa'o ai jayojjaa, Edosiquiana neiya ojjaña Jesusaja epeeji cuana niñeba cani tii tii, ohuaya esohui sijje acani Eyacuiñajji yasijje. ¹¹ Cuanaya Jesosa Quitohua, ma ñajajja sho'i equecua'yo jayojjaa ojaya epeeji cuana quea boejea po mee cani oya na' cuayaquia poaa jjejojo, poquijeyonajeya jjejojo. Ohuaya ojaya epeeji cuana Edosiquiana nei jeabichajea meesahua cani. Ojaya epeeji cuana Jesusaja esohui huohui canaje. Edosiquiana jeabichajea mee canaje pea'ai. Mimishi cuana oya cuana quecua canaje Jesusaja esohui huohuiji poanijojo. Jamatii ohuaya mete'ama, yeno'ama pea'ai esohui huohui tiitii canaje. ¹² Jamajjeya ojjaña eyajo nequi, ¡quea bihui nee pocue! Ojjaña meshi cuanajo ba'e, miqianaya quea nee nee poaje'yo Edosiquiana miqiana que jeaoqueajea ca'yonaje jojaya. Oya quea mase nee nee poani. Ojaya eba jama poaje ba'a: Quijje pishana Eyacuiñajjiya oya jeajea caje'yo cuaqui yasijje. Jamajjeya oya ojjaña meshijo ba'e nijje quea mase nee nee poaje —jamaya peaa eyajo ba'eya eya huohui canaje.

¹³ Ma sa'o ai jayojja meshi yasijje oquequi'yo majje quea quene nee nee poanaje. Jamajjeya ohuaya epona, ma bacuajji poanaje enaese ocuecuaji canaje eshajomano meejea'yojji nisho. ¹⁴ Eyacuiñajjiya ma epona quia canaje beca ecuicho, huipa jayojja cuichomeya ecuabesajji. Jamajjeya oya cuabesanaje quea huesha, meshi quima huasijje. Jomajo Eyacuiñajjiya oya jaahuana canaje ma sa'o ai jayojjaa enapa ca poaje jjejojo. Eyacuiñajjiya oya jaahuana canaje quea huiso nee nee cahuime, beshahua nei ebeca pee pea'ai shequijame. ¹⁵ Majoya sa'o ai jayojjaa enabajje ena quea quemo ojajaja canaje cuei quea quemo jayojja epona hui'i mee'

yojji nisho. ¹⁶ Jamatii Eyacuiñajjiya epona jaahuana canaje. E'e, meshi jjaajjejequi mee majje ma ena quea quemo meshi yasijje shajadobiqui mee canaje. Oya epona jja'aniquehuaquiñaquinaje quea huesha. ¹⁷ Jamajoya aje oe sa'o ai jayojja quea quene nee nee po majje poquinaje ma eponaja pea ebacua cuana nijje jjaquecuaquiya. Ojjaña jaya Eyacuiñajjiya esohui jayojja jama ba'yani, Jesusaja esohui e'e jojo nei huohui tiitijji poani pea'ai quecua sa acanaje ma sa'o ai jayojjaa. Jamaya eyaya, Huaniya banaje.

Aquiana mase bae ai'aijo ani etaja huasijje nequiso-huaquinaje

13 Majoya eya jjacahuibaquinaje bae ai'ai sahuajo nequi. Jomajo eyaya banaje sa'o ai jayojjaa ishoa cani pea aquiana mase shanei ai jayojja, shanei ejja pojja'a. Oya bae ai'aijo ani cojja cuaya majje nequiso-huanaje etaja huasijje. Oya quea sapa huiso, me oeje beca, 7 sapame. Ojaya eshe'ana quea huiso yani pea'ai, ome miji pea'ai, 10 she'aname. Ojjaña eshe'anajo yani ejaahuojja jayojja. Ojjaña esapajo yani etehue'yo quea tai pea'ai, Eyacuiñajji niñebajji tehue'yo. ² Ma shanei ai ejja jiquio jama ba'a: Oya ibia ecojjo-pia'yo ai jayojja, ibia chehue ai jayojja jiojime. Oya ibia naa asha se' quemoajja, quea se' quemo nee nee. E'e, oya quea mase nee. Edosiquiana neiya, Satanasa, sa'o ai jayojjaa pea'aiya ma shanei ai ejja quea mase o jayojjaya po mee canaje, Edosiquiana nei jayojjaya poanaje. Jamajjeya oya quea ca'a nee poani, quea huiso huoojajji poani. ³ Oya equecua'ajja'yo jayojja sapa-me poanaje, ma shanei ai ejjaja esapa. Jamatii jjajajaqui mee ca'yonaje. Jamajoya quea huiso dejja cuana meshi cuanajo ba'eya ma shanei ai ejjajo quea meteya jjejojo ojaya esohui jayojja jama acanaje. ⁴ E'e, sa'o ai jayojjaa shanei ai ejja ojjaña huoojajji po mee canaje. Jamajjeya ojjaña sa'o ai jayojja bihuia ca'yonaje ecui'oshajjajo nequia. Shanei ai ejja quea ca'a nee nee poso bihuia canaje cuana pea'ai jama ba'a: —Pea o jayojja chama'. Chama' o jeabichajea'yojji epo, de —acanaje cuana.

⁵ Shanei ai ejja ojjaña meshijo ba'e huoojajji poaje quea huiso ba'ijo, 42 ba'ime. Quea mimi tai nee nee poanaje. Jamajjeya Eyacuiñajji onijje quea quene nee nee poanaje. ⁶ Ohuaya Eyacuiñajji eyajo ani ojjaña huoojajji poani niñeba canaje. Ojjaña Eyacuiñajji nijje nequi niñeba canaje pea'ai, shanei ai ejjaa. ⁷ Jamatii Eyacuiñajjiya oya jeabichajea jjima. Jamajjeya ohuaya Jesusaja epeeji cuana nijje jjapee nishoqui majje jeabichajea canaje. Jamajjeya ojjaña ojaya esohui jayojja jama acanaje. ⁸ E'e, ojjaña meshijo ba'ecaa oya bihuia canaje. Jesusaja epeeji cuanaja ca ca oya shanei ai jayojja bihuia jjima. E'e, meshi pana jjimahuajo tii Jesosaa, ma ñajajja sho'i equecua'yo jayojjaa ojjaña ojaya epeeji bajjani tehue canaje eba'e tiitii mee'yojji. Jamajjeya ohuaya shanei ai jayojja bihuia jjima acani.

⁹ ¡Shajja'ajjacue oe; jjashahuabaquicue oe! ¹⁰ Jaja'ña aquiani ejeanobajji quijje onaa oya iña majje jeanobia caje'yo pea'ai. Ojjaña jaya jjajajaquiani manaje'

yo; yacua pea'ai caje'yo cuaa. Jamajjeya ojjaña Jesusaja epeeji cuana quea nee poanijo jamatii mete'ama caj-japee tiitiquiahua onijje.

¹¹ Majoya eyaya, Huaniya banaje pea aquiana quea mase pea'ai shaijjami ai quea mase nee jayojja, shaijjami ejja. Oya meshi quipajo ani cuayanaje. Ojaya eshe'ana becanejjijji pea'ai ñajjajja yahue jayojja. Jamatii ojaya esohui sa'o ai jayojja quea ajjajja epo meeji.

¹² Ebionei shanei ai ejjaa jiquio jjeya meshi quipajo ani cuayanaje shaijjami ai ejja o jayojja ojjaña huoojeajji po mee ca'yonaje. Jamajjeya pea shaijjami ejjaa ma meshi quipajo ani cuayaa ojjaña huoojea canaje ma shanei ai ejja esapa jaja'ajja bihuiaa. ¹³ Ohuaya, ma meshi quipajo ani cuayaa ma dejjaa ajjima acani acanaje quea huiso nee. E'e, ojjaña dejjaja ebajji ohuaya cuaqui oque mee canaje meshi yasijje. ¹⁴ Ohuaya jamaya acanaje ojjaña ma ebionei shanei ai bihuia meeji. Ma dejjaa ajjima acani amajjeya ohuaya ojjaña cuana dasia canaje. E'e, ohuaya dejja cuana ebionei shanei ai nisho pana mee canaje epana'yo, ma shanei ai esapa jaja'ajja jjajjaequi'yonaje nisho pana mee canaje.

¹⁵ Majoya ma meshi quipajje cuaya poa shaijjami ai ejjaa shanei ai nisho epana'yo eshe jayojja mimi meeme po mee canaje. Jamajjeya ohuaya jama acanaje ba'a: —¡Ojjaña joya e bihuia ajja iñacue, quecua'yea'yocue, oe! —poanaje shanei ai nisho epana'yo.

¹⁶ Majoya shanei aya huohui canaje jama ba'a: —¡Ojjaña cuana, ojjaña tii tehucue ebahuajje, ebiane emejje pojja'a ecuea bajjani! ¡Ojjaña esho'i, ojjaña etii pea'ai, ojjaña echacojji cuana, ojjaña echacomeejji cuana, ojjaña quea aquiana huiso poani cuana, ojjaña aema' cuana pea'ai jamaya tehucue ecuea bajjani, ecuea ebajji! ¹⁷ Ojjaña joya jjatehue meequi jjima aje oe ¡a'a aquiana cuana jjeshe meeji! ¡A'a aquiana quia meeji pea'ai! —oya poanaje.

¹⁸ ¡Bacue oe! ¡Ojjaña quea jjashahuabaqui ja'a, shanei aija ebajjani etehue'yo bacue! Ojaya etehue'yo ojaya bajjani jama ba'a: 666.

Quea huiso nee ojaya epeeji nei Jesusa nijje jjaja'a meequi canaje, 144.000 huisome

14 Majoya Eyacuiñajjiya eya eyahuasijje ba mee canaje Jesusa Sioni eyiyo biajje nequi. Eya ba mee canaje ojaya epeeji cuana quea huiso nee nee Jesusa nijje nequi, 144.000 huisome. Onaya ebahuajje etehue'yo Jesusaja ebajji, Echii aija ebajji pea'ai ojaya jojaya. ² Majoya eyaya shajja'ajjanaje eyajo ojjaña ma epeeji cuana sohuicuayani, Jesusa bihuia poani. Eyaya oya cuana shajja'ajjanaje ena tii tii poani jayojja, cueji baa siyoo poani jayojja, quea huiso e'iñaqueyaji cuana iñaqueya cani cuaa jayojja. ³ Ojjaña Jesusaja epeeji cuana quea huiso nee nee sohuicuayanaje Eyacuiñajji cojja nei nequi, ebeca pee pea'ai aquiana eshe cojja nei nequi, Jesusaja epeeji etii 24 huisome cojja nei nequi pea'ai. Jomajo ojee nequi Jesusaja epeeji quea huiso nee nee cuana sohuicuayanaje, esohuicuayajji eyacua. Ma esohuicuayajji eyacua pea cuanaja eyajo ba'e cuanaja ebajji pojjeama. Ma esohui esohuicuayajji Je-

soaja epeeji yahuajo meshijo ba'yahua mimishi cui-jea'yo cuana ca ca oe sohuicuayani. ⁴ Quea boejea'yo ba'enaje, epana'yo bihuia jjima poanaje onajaya. Siajje po ajja nei nei pea'ai, mimishi'ama nei nei pea'ai. Oya cuana Jesusa nijje jjapee neineiquinaje, ma ñajjajja sho'i equecua'yo jayojja nijje. Onijje tii poquiani. Jesusa acui ecueata'apeejo mano'yonaje onaja mimishi cuana sosequia'yojji. Jiquio ecua ebana coojji jjajjani quea pame nee jama jayojja oya cuana quea pame nee. E'e, jiquio ecua ebana coojji ebionei jjajjani quea pame nee poani Jodio cuaa Eyacuiñajji yasijje quia cani ojaya epojji jama jayojjaya oya cuana Eyacuiñajji nijje ba'e tiitije'yo Jesusa nijje pea'ai jiquio 144.000 Jodio cuana. Jamaya eya, Huani cahuibanaje.

Pea esohuidojojjiya huohui canaje Jesusa poe o'oyajji

⁶ Majoya eyaya banaje pea esohuidojojji eyajo cuabesani. Eyacuiñajjiya oya huoojea canaje ojjaña cuana huasijje Jesusa ojjaña cuana ba'e tiiti mee canijo huohuiya. E'e, ohuaya Jesusajo huohui cani ojjaña cuana ojjaña esohuijo mimiani yasijje. ⁷ Ohuaya jama acanaje ba'a: —¡Eyacuiñajji shajja'ajjacue! Oya jama acue ba'a: “Eyacuiñajji, miya quea pame nee nee”. ¡Oya bihuiaque! Ohuaya ojjaña eyajo ba'e pana canaje; meshi, bae ai'ai cuana, cuei cuana pea'ai pana canaje. E'e, ¡jamaya acue oya; ¡jeyahua nei ohuaya ojjaña mimishi cuana quea nee nee po mee caje! —esohuidojojjiya ojjaña acanaje.

⁸ Ma ebionei esohuidojojji huohui cajo, pea esohuidojojji poeyanaje. Huohui canaje jama ba'a: —Ojjaña ma cuiñajji quea quemojo ba'e quea mimishi poanijo quea nee nee po mee caje, Babinonia cuiñajji bajjanijo ba'e cuana. Jiquio ecua oe epona quea mimishiya quea huiso dejja cuana quea mimishi po mee cani jama jayojja dejja cuana jomajo ba'eya pea cuana pea cuiñajji cuanajo ba'e quea mimishi po mee ca'yonaje —jamaya ma esohuidojojji poanaje.

⁹ Majoya pea esohuidojojji poeyanaje. Huohui canaje jama ba'a: —Ojjaña joya shanei ai jayojja bihuijji poani shanei nisho'ya pea'ai bihuiajji poani, shanei aija bajjani jayojja ebahuajje, emejje pojja'a jjatehue meequi pea'ai quea nee nee po mee caje'yo Eyacuiñajjiya.

¹⁰ E'e, jamaya acajo Eyacuiñajjiya ona nijje quea quene nee nee poaje'yo. Cuaquijo, huichacha quea ihui nee nee quea nee nee po tiitije'yo. Ojjaña esohuidojojji quea pame neeya ba caje, Jesusaa ma ñajjajja equecua'yo jayojja pea'aiya oya cuana ba caje'yo cuaquijo nequi. ¹¹ E'e, oya cuana quea nee nee poaje'yo tii tii; cuaqui huichacha ba'esohuaquije'yo tii tii. Ojjaña joya shanei ai jayojja bihuiajji poani, shanei nisho bihuiajji poani pea'ai, shaneija bajjani jayojja ebahuajje jatehue meequi pea'ai quea nee nee poaje'yo tii tii, quea nee po pajea'yo ajja tii epojjajo, mecajje pea'ai —jamaya poanaje esohuidojojji.

¹² Jamajjeya ojjaña Jesusaja epeeji cuana dejja mimishiya napa cajo jamatii mete'ama cajjapee tiitiquiahua, ma Jesusa nijje jjapeequi pajea'yo ajja, ojjaña Eyacuiñajjiya esohui jayojja jama acani pea'ai.

¹³ Majoya eyaya, Huaniya shajja'ajjanaje pea eyajo mimiani jama ba'a: —Huani, jiquio ecuea esohui tehuecue! Eyacuiñajjiya jjeya nei, quijje pea'ai quea bihui nee nee po mee caje'yo ojjaña Jesusaja esohui huohuijji ma esohui huohuijjiyo de jja mimishiya quea caje —poanaje.

Majoya Edojjoshahua Pameya jama acanaje ba'a: —E'e jojo nei Jesusaja epeeji cuana ojaya esohui huohuijjiyo mano'yajo ba'e tiitii mee caje'yo Eyacuiñajjiya, jomishoca mee caje'yo; oya cuana sosequia caje'yo esohui huohui canaje sosejje.

Jamaya eya, Huani Jesusaa cahui ba mee canaje.

Eyacuiñajjiya de jja mimishi cuana napa neinei mee canaje

¹⁴ Majoya eyaya, Huaniya eyahuasijje banaje pea jama ba'a: Oe Dejjaja Bacua Ejja jayojjaya bo oshe biajje anioqueani. Ejaahuojja mei huo'o quea nahue esapajo ani ye'o quea canaje, baa ai shehuihui baa quea shejji iña canaje ebiane meije. ¹⁵ Majoya eyajo pea esohuidojojji Eyacuiñajjiya equijo ani cuayanaje. Cuaya majje taaanaje joya bo oshe biajje ani yasijje. Jama poanaje ba'a: —Dejja mimishi cuana meshijo ani anoso ai yiye ejahua nee nee jayojja. Jamajjeya janoso ai jahuajo jajasejja ca'yani baa ai shehuihuiya echicha'yojji jayojja jama jjeya nei de jja mimishi cuana acue! ¡Oya cuana chichacue, oe! —jama taaameya poanaje.

¹⁶ Jamajjeya ohuaya bo oshe biajje aniya ojjaña mimishi cuana meshijo ba'eca jaja ca'yonaje; chicha canaje ojjaña. Apoa aca'yonaje.

¹⁷ Majoya eyaya, Huaniya banaje pea esohuidojojji eyajo Eyacuiñajjiya equijo ani cuayanaje. Ojaya baa ai shehuihui yani pea'ai. ¹⁸ Majoya pea esohuidojojji mei e'lya pejeje ani, ma cuaqui jijiani pejeje ani poeyanaje. Oya taaanaje esohuidojojji baa aijji ani yasijje. Jama poanaje ba'a: —Ojjaña mimishi cuana meshijo ba'e acui jjaaja ejahua nee nee jayojja jama. ¡Jamajjeya ejjaaja jahuajo sejja cani jayojja jjeya nei de jja mimishi cuana acue! ¡Quea mimishi poanajo quea nee nee po mee cue! —ma esohuidojojji poanaje.

¹⁹ Jamajjeya meshi yasijje poe majje ma esohuidojojji-ya ojjaña mimishi cuana meshijo ba'eca cuana jaja majje chicha canaje quea nee nee epo mee'yojji. E'e, Eyacuiñajji quea quene poaje mimishi cuanajo. Eca ijja pashajji yasijje nequia cani jayojja jama acaje'yo de jja mimishi cuana.

²⁰ Jiquio ecua eca jajasejja majje cuiñajji pejeje ijja-pasha mee cajje eca na cuayaquiani jayojja jama ojjaña quea mimishi poani acaje'yo cuaa. Eyacuiñajji ba sa po'yo ajjajo quea huiso nee nee mano'yonaje; jjaquecuaqui'yo majje ena' cuayaquinaje cuei quea quemo jayojja jama, de.

Esohuidojojji cuaa ye canaje me oeje beca mimishi cuana napajji

15 Majoya Eyacuiñajjiya ecuea ebajji jjaaja'aqui mee canaje ma quijjeyejje nei ohua acaje. Eyaya ba-

naje pea aquiana ai'ai eyajo nequi. Ba majje quea ajjaja nee nee poanaje. Ma aquiana ai'ai jama ba'a: Me oeje beca esohuidojojji eyaya banaje, Eyacuiñajjiya huoojea cuana ojjaña meshijo ba'eca cuana quea nee nee po meeji. Ojjaña napajji me oeje beca huisome eyaya banaje. Ona napa majje chama' pea enapajji poaje. E'e, Eyacuiñajjiya ejjashahuabaquijji ojjaña napajji apoa poaje'yo. ² Majoya eyaya banaje bae ai quea siyo tahuoo quea siyo jayojja cuaquijji quea jeajahua tejee. Ma bae ai sahuajo nequi ojjaña Jesusaja epeeji cuana. Maaya shanei ai eja jeabichajea ca'yonaje, shanei ai nisho jeabichajea ca'yonaje pea'ai. Jesusaja epeeji cuaa shanei aija bajjani tehue mee jjima acanaje onajaya ebahuaje. Onijje jjapeequi'yo ajja pea'ai. Jamajjeya Eyacuiñajjiya Jesusaja epeeji cuana huasijje quia canaje e'iñaqueyaji cuana esohuicuayaji. ³ Jamajjeya Jesusaja epeeji cuana sohuicuayanaje Jesosa bihuiajji, Eyacuiñajji bihuiajji pea'ai. E'e, Moisesi, Eyacuiñajjiya esohui huohuijji sohuicuaya poa jayojja jama-ya sohuicuayame poanaje Jesusaja epeeji cuana, Jesusaa quea pame nee acanajejo. Jesosa bihuia canaje jama ba'a:

“Eyacuiñajji, miya oe nei quea ca'a nee nee poani tiitii. Ecuana quea boejea nee po mee'yonaje. Jamaya quea pame nee. E'e, miya quea pame nee nee poani, e'e jojo nei pea'ai. Miya ojjaña huoojeajji po tiitiani.

⁴ Ecuana Emeshi Mese Jesosa, ojjaña miquea esohui cashajja'ajja tiitii cahua, camimi cahua jama ba'a: —Jesosa, miya quea ca'a nee nee po tiitiani —capoahua. E'e, ojjaña miya bihuia caje'yo. E'e Jesosa, miya oe nei quea pame nee nee poani tiitijjo Eyacuiñajjiya miya quea boti nee. Eyacuiñajjiya ojjaña miquea eba'eji quea pame ba mee canajejo, ¡ojjaña meshijo ba'eca cuaa miya cabihuia cahua, mi pejeje nequiya!” Jamaya poanaje ojjaña Jesusaja epeeji cuana.

⁵ Majoya eyaya eyajo banaje Eyacuiñajjiya equi. Eyacuiñajjiya equi equecuayijji biso nei esecue eca'apejo nequi banaje. Jomajo yani Eyacuiñajjiya esohui etehue'yo. ⁶ Eyaya banaje me oeje beca esohuidojojji Eyacuiñajjiya equijo nequi cuayanaje. Ojaya emejo yani de jja mimishi napajji, ojjaña meshijo ba'eca cuana napajji. Ojaya daqui quea oshe nee nee quea jeajahua nee. Ee'ojje baa daqui ehuosho ba'e mei huo'o quea nahue nee. ⁷ Majoya eyaya banaje eyajo ma ebeca pee pea'ai aquiana eshe cuana Eyacuiñajji pejeje ani. Oe aquiana esheya caneco cuana quia canaje ma esohuidojojji cuana. Me oeje beca caneco cuana quia canaje.

Ma caneco cuanajo yani aquiana de jja mimishi cuana quea nee nee epo meeji. Eyacuiñajji enequi tii tii quea quene nee nee poani ojjaña quea mimishi poani nijje. ⁸ Jamajjeya Eyacuiñajjiya equijo aninaje huichacha quea quemo nee nee; Eyacuiñajji quea ca'a, quea jeajahua, quea jiji nee nee pea'ai jayojja jomajo nequinaje. Jamajjeya ojjaña cuana Eyacuiñajjiya equi yasijje dobiqii mee jjima poanaje. Quijje me oeje beca esohuidojojji-ya me oeje beca aquiana de jja mimishi cuana quea nee epo meeji apoa amajje pea cuana Eyacuiñajjiya equi yasijje eyajo dobiqii mee caje'yo.

⁸ Jamajjeya Eyacuiñajjiya equijo aninaje huichacha quea quemo nee nee; Eyacuiñajji quea ca'a, quea jeajahua, quea jiji nee nee pea'ai jayojja jomajo nequinaje. Jamajjeya ojjaña cuana Eyacuiñajjiya equi yasijje dobiqii mee jjima poanaje. Quijje me oeje beca esohuidojojji-ya me oeje beca aquiana de jja mimishi cuana quea nee epo meeji apoa amajje pea cuana Eyacuiñajjiya equi yasijje eyajo dobiqii mee caje'yo.

Me oejje beca aquiana cuana dejja mimishi napajji

16 Majoya eyaya Eyacuiñajji shajja'ajjanaje ojaya equijo mimiani. Ohuaya me oejje beca esohuidojojji cuana huohui canaje jama ba'a: —¡Aquiana mi-quianajaya canecojo ani shojeacue ojjaña meshijo ba'e yasijje ojjaña quea nee nee po meeji!

E'e, Eyacuiñajjiya ona nijje quea quene neejo quea nee nee po mee caje'yo. ² Jamajjeya majoya ebionei esohuidojojjiya ma aquiana ojaya canecojo ani shojea canaje ojjaña meshijo ba'e yasijje. Jamajjeya ojjaña cuana ma shanei aija bajjani jayojja ebahuaaje tehue'yo chiji po mee canaje quea nee nee. Quea nee nee po mee ca'yonaje ohua shanei ai jayojja bihuia canajejo, shanei ai nisho epana'yo bihuia canajejo pea'ai.

Me oejje oe pea esohuidojojjiya aquiana caneco cuanajo ani shojea jjima so'o. ³ Majoya pea esohuidojojjiya aquiana ojaya canecojo ani shojea canaje bae ai yasijje. Jamajjeya bae ena quea huo'o nee equecua'yo na' cuayaquiani jayojja po'yonaje, quea ihui po'yonaje ojjaña aquiana enajo nequica mano'yojji.

Me oejje esohuidojojjiya aquiana caneco cuanajo ani; shojea jjima so'o. ⁴ Majoya pea esohuidojojjiya aquiana ojaya canecojo ani shojea canaje cuei quea quemo cuana huasijje, cuei sisi cuana huasijje pea'ai. Jamajjeya ojjaña ena quea huo'o, quea ihui po'yonaje nahuoo cuana mano'yojji. ⁵ Majoya esohuidojojjiya, ena jaahuanajji poaniya huohui canaje jama ba'a: —Jesosa, miquea ejjashahuabaquijji cuana, miquea esohui cuana ojjaña mimishi cuanajo quea pame nee, e'e jojo nei pea'ai. E'e, miya quea pame nee poani jojoya miya Eyacuiñajjiya quea jea nee nee. Miya yahuajo nei nei yania poa; jjeja nei miya yani tii tii pea'ai. Jamajjeya ojjaña mimishi cuanajo miquea esohui quea ja'a nee.

⁶ E'e Jesosa, ojjaña dejja mimishi cuana miquea epeeji cuana, miquea esohui huohuiji cuana pea'ai quecua ca'yajje ena' cuayaquinaje, jashojeajequinaje. Jamajjeya miyaya mimishi cuana ena', equecua'yo cuanaja ena' cuayaquiani jayojja ishi meeña quea ihui o manojea'yojji. ¡Jamaya capo'yahua! —poanaje.

⁷ Majoya eyaya shajja'ajjanaje pea eyajo mei e'iya pejejo nequi. Oya jama poanaje ba'a: —E'e Eyacuiñajji, miya quea ca'a nee, ojjaña huoojeaña. Miquea ejjashahuabaquijji cuana e'e jojo nei quea pame nee. ¡Pea quea mimishi poanijo napacue! ¡Jamaya capoahua!

⁸ Ebeca pee pea'ai esohuidojojjiya aquiana ojaya canecojo ani shojea jjima so'o. Majoya pea esohuidojojjiya aquiana ojaya canecojo ani shojea canaje eshequi yasijje. Jamajjeya eshequi quea quiyo nee nee po'yonaje. Quea quiyo nee nee po majjeya ojjaña meshijo ba'e dahua canaje. ⁹ Eyacuiñajjiya ojaya esohuidojojji cuana huoojea canaje dejja mimishi cuana quea nee nee po meeya. Jamajjeya eshequiya dahua cajje Eyacuiñajji niñeba canaje cuana. Jamatii dejja mimishi cuana ojaya mimishi pajea'yo aija quea mimishi nee nee jjejo. Eyacuiñajji bihuia'yo aija pea'ai.

Pea beca peejiima esohuidojojjiya aquiana ojaya caneco cuanajo shojea jjima ani so'o. ¹⁰ Jamajjeya majoya

pea esohuidojojjiya aquiana ojaya canecojo ani shojea canaje shanei ai jayojja que, ma ojaya epeeji cuana meshijo ba'e huoojeajji poani que. Jamajjeya quea misi nee nee poanaje. Ojjaña quea nee nee poanaje. Quea nee neejo jja'ana ijjaajejeaqui canaje. ¹¹ Quea nee poanijo, chiji poanijo pea'ai ojjaña cuana Eyacuiñajji eyajo ba'e niñeba canaje. Jamatii ma shanei ai ejja, ojaya epeeji cuana pea aija mimishi cuana pajea'yo aija poanaje.

Beca esohuidojojjiya aquiana ojaya caneco cuanajo ani shojea jjima so'o. ¹² Jamajjeya majoya pea esohuidojojjiya aquiana ojaya canecojo ani shojea canaje cuei ai yasijje, Eopate cuei yasijje. Esohuidojojjiya ma cuei huosa mee ca'yonaje. Huosa'yajo emeshi mese cuana meshi eshequi poeji mijijje ba'eca poeje sohui-nano quea huiso nee nee cuana nijje jjaquecuaquiya.

¹³ Majoya eyaya banaje pea beca peejiima eshahua cuana, shona hui jayojja. Oya cuana cuayanaje ma sa'o aija enabajje, shanei ai ejjaja enabajje, esohui huohuiji nisho esiajje pojjiya enabajje pea'ai cuayanaje. ¹⁴ Jiquio eshahua cuana ma dejja aijjima acani quea huiso acanaje. Oya cuana poquije ojjaña meshi yasijje ojjaña emeshi mese chichaa Eyacuiñajji nijje ejaquecuaquijji. Majoya Jesosa poeje'yo sa'o ai jayojja jeabichajea.

¹⁵ Majoya eyaya shajja'ajjanaje Jesosa mimiani jama ba'a: —¡Shajja'ajjacue mo! Beca cuana ejo ishoa aija. Jamatii eya poejuajje siipojji poejuajcuajiani jayojja. Joya ejo ishoa'ishoa'ajja ani tii tii quea bihui nee nee poaje. E'e, eyaya oya cuana quea bojea po meeje'yo. Oya cuana daquijji jayojja jama poaje e poe o'oyajo. Jamajjeya oya cuana bicho'ama poaje e poe o'oyajo.

¹⁶ Majoya ma eshahua cuana ojjaña emeshi mese cuana jjachichaqui mee canaje oe meshi yasijje eyiyo Majeno bajjani yasijje, ma Jodioja esohuijo Amayeno meshi bajjani yasijje.

¹⁷ Oe esohuidojojjiya aquiana ojaya canecojo ani shojea jjima so'o. Majoya ohuaya ma aquiana ojaya canecojo ani shojea canaje beni yasijje. Shojea cajo eyaya shajja'ajjanaje pea eyajo Eyacuiñajjiya equijo nequi janobajjima nei taaanaje jama ba'a: —Apoa. Eyacuiñajjiya dejja quea mimishi cuana quea nee nee po mee ca'yonaje.

¹⁸ Majoya pojjeje baa siyoo po majamajanaje, taaanaje, cueji po majamajanaje pea'ai. Meshi huehuahuehuanaje janobajjima nei nei pea'ai; yahua-jo nei meshi huehuahuehuanaje oe pojji. ¹⁹ Jamajjeya Babinonia cuiñajji quea quemojo meshi jjamijisisi jeaquinaje, pea beca peejiima jjamijisisi jeaquime poanaje. Ojjaña pea cuiñajji cuana ojjaña meshijo jaabichajequinaje pea'ai. Eyacuiñajjiya Babinonia cuiñajji quea quemojo jashahuabaqui majje ojjaña dejja jomajo ba'e quea nee nee po mee ca'yonaje. Ojjaña mimishijo quea quene nee nee poanaje Eyacuiñajji.

²⁰ Huehuahuehua majje ojjaña nasi ai cuana chama'yo tii poanaje. Ojjaña eyiyo cuana chama'yo tii poanaje pea'ai. Jamajjeya dejja cuana eyiyo ba'yo jjima acaje.

²¹ Meja na ejjajacajjaqui cuana quea quemo nee nee, 50 quinome biquieme oquenaje dejja cuana biajje. Ja-

majjeya dejja mimishi cuaa quea nee nee po majje Eyacuiñajji niñeba neinei canaje.

Epona quea mimishi

17 Majoya oe esohuidojojji e que poeyanaje, ma aquiana canecojo ani shojea canaje. Oya enijje miminaje jama ba'a: —¡Cua'a! Eyaya miya ba meeje ache nee nee poaje ba'a ojjaña ma cuiñajji quea mimishijo ba'e. Ojjaña cuana epona pea cojjojji jayojja nei nei poani. Oya quea huiso bae biajje anioqueani jayojja jama quea huiso nee nee quea mimishi po mee cani. ² Ohuaya quea huiso emeshi mese cuana quea mimishi po mee cani onijje, bejjo sosejje. Ojjaña meshijo ba'e cuana quea mimishi jjashahuabaqui mee cani, ojjaña cuana onijje quea mimishi po tiitii mee cani. E'e, oya cuana ehoo nei jayojja jama poani. Jiquio ecua dejja huoo majje quea cachasa sei nee jayojja jama oya cuana quea mimishi tii tii po sa poani.

³ Majoya ma esohuidojojjiya eya dojo canaje meshi quima huasijje. Edojjoshahua Pameya eya jjashahuabaqui mee canaje. Jamajjeya eyaya jomajo pea epona banaje. Oya shadaa ai huo'o jayojjaja edaasa biajje aninaje. Ma shadaa ai jayojjaja edaasajo yani bajjani cuana etehue'yo, Eyacuiñajji bajjani cuana jayojja. Jamaya Eyacuiñajji boti'ama, de. Ma shadaa ai jayojja, shadaa ai ejja pojja'a quea sapa huiso, me oejje beca sapame, 7 sapame. Oya she'anajji pea'ai, quea huiso she'aname ome miji pea'ai, 10 she'aname. ⁴ Ma eponaja daqui quea huo'o nee nee. Ojaya eyiijji quea huiso nee nee, mei huo'o cuana, mei oshe quea nahue cuana, ojjaña mei nahue cuana pea'ai. Oja me cuanajo yani oe caneco quea nahue, mei huo'o caneco. Ma mei huo'o canecojo ani aquiana quea tai. Maya ojjaña ojaya ejjashahuabaquijji quea mimishi cuana jayojja, quea huiso dejja cuana nijje quea tai poanaje pea'ai jayojja. ⁵ Ebahualje ojaya bajjani etehue'yo poanaje ma ojjaña dejja cuanaja quea quehua. Ese ejjaja esohuijo jama bajjani ba'a: "Babinonia cuiñajji quea quemo ojjaña mimishi cuana ba'ejji" bajjani. Jama tehueme'yaya ojaya ebahuajo jaa. ⁶ Majoya eyaya oya banaje quea mimishi nee nee. Ohuaya quea huiso Jesusaja epeeji cuana quecua ca'yonaje Jesusaja esohui huohuijjiyojo. Jamajjeya ma epona ehoo jayojja quea bihui nee poani Jesusaja epeeji quecua ca'yajo. Ma epona quea mimishi ba majje eya quea ajjajja nei poanaje. ⁷ Majoya ma esohuidojojjiya eya huohui canaje jama ba'a: —Huani, ¿apiojji acuae miya quea ajjajja nee epona quea mimishijo? ¿Ae jayojja jama ma epona quea mimishi nee, ma shadaa ai jayojja pea'ai? Eyaya miya huohuije: Jjeya miquea eba pojjeama ma shadaa ai quea sapa huiso, me oejje beca sapame, quea she'ana huiso pea'ai, ome miji pea'ai, 10 she'aname. ⁸ ¡Bacue! Oya shadaa ai jayojja yahuajo nei nei nequia poa meshijo. Jamatii jjeya oya chama' meshijo. Quijje oya quea huesha nee jaa poeje o'oya, jani aijo ma mimishi cuana mano'yo majje poqui'yanijje jaa poeje o'oya. Majoya Eyacuiñajjiya oya quea nee nee po mee caje'yo. Jamajjeya Jesusaja epeeji pojjeama quea huiso meshijo

ba'e, ma Eyacuiñajjiya yahuajo nei nei meshi pana coo jeahuajo onajaya bajjani cuana tehue jjima ojaya etehue'yo eba'e tiitii'yojjiyo, maya cuana ma shadaa ai jayojja ba majje quea ajjajja nee nee poaje. E'e, ma shadaa ai jayojja yahuajo nei nei nequia poa; jjeya ca chama' meshijo; jamatii quijje quea huesha nee jaa poeje o'oya Jesusa jeabichajeaa nisho —esohuidojojji poanaje.

⁹ Majoya esohuidojojjiya eya huohui canaje jama ba'a: —¡Quea ja'a nee jjashahuabaquicue shadaa aija sapa quea huiso, epona quea mimishi pea'ai ebajji! ¡Bacue! Shadaa aija me oejje beca sapa eyiyo cuana jayojja poani. Jiquio eyiyo cuana biajje anioqueani epona quea mimishi. Jiquio eyiyo cuana jayojjaya me oejje beca emeshi mese cuana poani. ¹⁰ Me oejje emeshi mese cuana chama'yo tii poanaje. Oe emeshi mese jjeya nei enequi. Pea emeshi mese quijje pishana poeje. Poe majje oya nequije oe pojji cahuime. ¹¹ Ma shadaa ai jayojja, shadaa ai ejja yahuajo nei nequia poa meshijo. Jjeya oya chama'. Quijje oya poeje o'oya; emeshi mese quijjejeje nei nequi poaje me oejje beca emeshi mese cuana apoa poajo. Oya poe jjimahuajo me oejje beca emeshi mese cuana eyiyo cuana jayojja nequinaje. Ona nijje shadaa ai ejja jayojjaya emeshi mese nequinaje pea'ai. Majoya Eyacuiñajjiya oya chama'yo tii po mee caje'yo. ¹² Huani —Esohuidojojjiya eya acanaje—, miyaya banaje ome miji pea'ai huiso eshe'ana, shadaa ai ejjaja eshe'ana. Ma eshe'ana cuana ome miji pea'ai emeshi mese cuana jayojja. Oya cuana quijje emeshi mese cuana poaje. Shadaa ai ejja nijjeya ojjaña cuana huoojea caje'yo oe pojji cahuime cuana. ¹³ Ojjaña emeshi mese pea emeshi mese cuana jayojjaya jama jjashahuabaquije Jesusa jeabichajeajji. E'e, ojjaña emeshi mese quea mimishi cuaa shadaa ai ejja shajja'ajja caje'yo. Dejja mase cuana huoojea caje shadaa ai ejja nijjeya Jesusa nijje jjaquecuaquiya. ¹⁴ E'e, ojjaña quea mimishi cuana ojee poquije Jesusa quecuaa nisho. E'e, Jesusa quecua sa acaje cuaa. Jamatii Jesusa quea ca'a nee nee. Ojjaña huoojea caje'yo. Ojjaña emeshi mese cuana huoojeajji oe nei Emeshi Mese nei poaje'yo Jesusa. Jamajjeya Jesusaa ojaya epeeji cuana nijjeya ojjaña quea mimishi poani quecuadehuejea caje'yo. E'e, Jesusa nijje ani ojjaña ojaya epeeji cuana. Jesusaa oya cuana babaca'yo majje iyaa canaje ojaya epeeji epojji —esohuidojojjiya eya acanaje.

¹⁵ Majoya ma esohuidojojjiya eya huohui canaje jama ba'a: —Huani, miyaya banaje bae jayojja quea huiso, quea quemo cuana. Ma bae cuana biajje anioquenaje epona pea cojjojji nei nei. Ma bae jayojja cuana dejja quea huiso nee nee jayojja, ojjaña meshijo ba'eca cuana, ojjaña pea esohuijo mimiani cuana pea'ai. Quea huiso nee nee, de —esohuidojojji poanaje—. ¹⁶ Huani, miyaya banaje shadaa ai ejja quea she'ana huiso, ome miji pea'ai she'aname, 10 she'aname. Maya ome miji pea'ai, 10 emeshi mese jayojja, de. Maya onajaya ma epona pea cojjojji jayojja boti'ama nei nei poaje. Jamajjeya ma epona jeabichajea caje'yo. Jeabichajea majje jeajea caje'yo epona quea mimishi daquima' jayojja;

dahuajea caje'yo. Jiquio ecua ijjiacajjiya aquiana iña majje ijjiya cani jayojja jama epona mimishi chama'yo tii acaje'yo ma emeshi mese cuaa. ¹⁷ E'e, Eyacuiñajjiya ma emeshi mese cuana ojaya esohui jayojja jama amee caje'yo. Jjashahuabaqui mee caje'yo jama ba'a: "Ecuuaaya ma shadaa ai ejja huasijje huoojeaje'yo ecuanaja dejja mase cuana quea huiso nee nee oya quea ca'a nee epo meeji". Jamajjeya ojjaña dejja mase cuana huoojea caje'yo cuaa shadaa ai ejja quea ca'a nee nee epojji. Jamaya Eyacuiñajjiya huohui canaje ma ohua quiije nei acaje —esohuidojojjiya eya jamaya acanaje—. ¹⁸ Huani, miyaya banaje ma epona pea cojojji jayojja. Ma epona cuiñajji quea quemo nee ojjaña quea mimishi ba'eji jayojja. Maaya ojjaña pea emeshi mese cuana huoojea cani —jamaya esohuidojojjiya eya acanaje.

Eyacuiñajjiya ojjaña Babinonia cuiñajjiyo ba'e quea nee nee po mee caje'yo

18 Majoya eyaya, Huaniya banaje pea esohuidojojji. Oya eyajo nequi nequioquenaje dejja cuana huasijje. Eyacuiñajjiya oya quea ca'a po mee canaje. Jamajjeya esohuidojojjiya ojjaña huoojea canaje. Quea jeajahua nee nee poaniya jjejojo meshi cuana jeaja'ajea canaje. ² Jama taaame poanaje ba'a: —Ojjaña quea mimishi Babinoniajo ba'e Eyacuiñajjiya quea nee nee po mee caje'yo, chama'yo tii po mee caje'yo. Jamajjeya ma cuiñajjiyo ba'equije'yo edosiquiana cuana, eshahua cuana pea'ai, ojjaña cuichoiji quea tai ijjiya ca ajja pea'ai jomajo ba'equije'yo. ³ Ojjaña cuana quea mimishi nee nee ma cuiñajjiyo ba'e. Jamajjeya ojjaña dejja cuana pea cuiñajji cuanajo ba'e quea mimishi po mee ca'yonaje. E'e, dejja cuana quea mimishi ba'e ehoo nei jayojja quea jjashahuabaqui tai poani. Jamaya dejja cuana ma cuiñajji quea quemojo ba'eya pea cuana ehoo nei jayojja jama po mee cani. Ojjaña pea emeshi mese cuana quea mimishi poani dejja cuana ma cuiñajji quea quemojo ba'e jayojjaya. Ma cuiñajji quea mimishi, quea quemojo yani quea huiso aquiana. Jamajjeya dejja quea aquiana huiso cuana peapea aquiana quea huiso nee jjeshe cani jomajo —jamaya ohuaya eya acanaje.

⁴ Majoya eyaya, Huaniya shajja'ajjanaje pea eyajo aniya Jesosaja epeeji cuana iyaa cani jama ba'a: —Ecua epeeji cuana, ja'a anijji ma cuiñajji quea mimishijo! Ona jayojja quea mimishi mi po chana'. ¡A'a jomajo ba'e majajji; miqianaya quea nee nee po chana', onaya jayojjaya! E'e, Eyacuiñajjiya ojjaña cuana jomajo ba'e quea nee nee po mee caje'yo quea mimishi poanijojo. ⁵ Eyacuiñajjiya ba canaje onajaya mimishi cuana quea huiso nee nee. Jamajjeya oya jjashahuabaquiani ona napajji quea mimishi nee nee poanijo. ⁶ Ojjaña jomajo ba'eya miqianaya napa canaje ecua epeeji poanijo. Jama napa'yomeya Eyacuiñajjiya oya cuana acaje'yo. Onaaya miqianaya quea nee nee po mee canaje enijje jjapeequianijo. Jamajjeya Eyacuiñajjiya oya cuana quea nee nee po tiiti mee caje'yo. Oya cuana miqianaya quea yeno po mee canaje. Jamajjeya

Eyacuiñajjiya oya cuana quea yeno po tiiti mee caje'yo. ⁷ Ojjaña ma cuiñajji quea mimishijo ba'eya jjeshe canaje aquiana cuana quea huiso nee nee. E'e, onajaya aquiana quea huiso nee nee. Ma aquiana oja jjeshe huisoajjaya Eyacuiñajjiya oya cuana quea nee nee po mee caje'yo, quea yeno po mee caje'yo pea'ai. E'e, ojjaña jomajo ba'eya huohui canaje jama ba'a: "Ecuana-jaya cuiñajji quea pame emeshi meseja epona jayojja jama poani, quea huiso aquiana quea nahue yani. E'ahuemano jayojja jama pojjeama. Quea jaji nee nee. Ojjaña jiquiojo ba'eca quea yeno po ajja tii tii" poanaje cuiñajji quea mimishijo ba'eca cuana —jamaya poanaje pea eyajo ani enijje. ⁸ —Jamatii quiije Eyacuiñajjiya ojjaña ma cuiñajjiyo ba'eca quea nee nee po mee caje'yo. Quea yeno po mee caje'yo. Quea shoe po mee caje'yo pea'ai. Ojjaña quiyo jeyojeyo mee caje'yo pea'ai. E'e, Eyacuiñajji quea ca'a nee nee ma dejja quea mimishi cuanajo jjashahuabaquije quea nee nee epo meeji —poanaje pea eyajo ani.

⁹ Emeshi mese cuana dejja mimishi cuana ma cuiñajjiyo ba'e nijje quea mimishi nee nee poanaje. Jamajjeya ma cuiñajji jijanijo huichacha ba majje emeshi mese cuana paje'yo jama ba'a: —Ecuana epeeji cuana ma cuiñajjiyo ba'e quiyo'yoqui. Onajaya aquiana quea huiso ecuanajaya quea boti nee nee. Quiyo'yo majje aquiana quea nahue, quea pame chama'yo tii poaje, de —jamaya emeshi mese quea mimishi paje quea yeno jjejojo.

¹⁰ Cuiñajji quea quemo quiyo'yanijo emeshi mese cuana quea huesha nee nee quea mete jjejojo. Quea yeno poaje pea'ai. Quea yeno po majje janobajji-ma nei paje jama ba'a: —¡Bacue oe! Babinonia cuiñajji etii quea quemo nee nee quiyo'yoqui. Ecuana epeeji cuana jomajo ba'e quea nee nee po'yoqui. Jjeya nei ojjaña jomajo ba'e mano cuaji'yonaje. Chama'yo tii poaje'yo —emeshi mese mimishi paje'yo.

¹¹ Ojjaña dejja quea aquiana huiso ojjaña meshijo ba'e quea yeno poaje Babinonia quiyo'yajo. Oya cuana paje jama ba'a: —Ojjaña Babinoniajo ba'e chama'yo poanaje. Yahuajo ecuanajaya ohuaya aquiana quea huiso nee jjeshe canaje. Jjeya ejjeshe maja'yojji pojjeama. ¹² E'e, yahuajo aquiana jjeshe canaje jama ba'a: Mei huo'o quea nahue, mei oshe quea nahue, mei sisi quea nahue cuana, mei oshe sisi quea copo pena bajjani cuana jjeshe canaje, daqui quea huiso quea nahue, daqui huo'o quea bame, daqui beje nei quea nahue, daqui huo'ohuo'o quea nahue cuana jjeshe canaje; ojjaña acui equecuashiyo quea shiye cuana quea nahue, ojjaña aquiana bame pea'ai jjeshe canaje yahuajo; acui ejehui quea nahue cuana, ijjiacajji cuana ese' ai'ai, mei jahua edahua, baa edahua cuana, mei ejaja bame cuana pea'ai yahuajo jjeshe canaje ma cuiñajji etiiyo ba'eca cuaa. ¹³ Bobi quea shiye, quea johua po meeji cuana jjeshe canaje pea'ai ma bajjani ba'a: canela, eña quea shiye cuana, madeja jayojja pohui quea shiye cuana, pea shiyeshiye pohui, jjonojajja na sese, acuijjajja sei, anoso pohui jayojja, bobi anoso jayojja pea'ai jjeshe canaje. Ana'ai quea huiso cuana,

ñajajja quea huišo cuana, mapichi quea huišo cuana, mapichija aquiana edojojji quea huišo cuana, echacojji sosema' cuana, ojjaña chaco tiitii mee cani pea'ai jjeshe canaje cuaa ma cuiñajji etiiyo ba'eya —jama pa animeya ojjaña dejja cuana poaje Babinonia quiyoqui ba majje.

¹⁴ Majoya esohuidojojji eyajo nequi ojjaña Babinonia-jo ba'e nijje miminaje jama ba'a: —Yahuajo miqianaya ojjaña aquiana cuana jomajo ani jjeshe sa poanaje. Jjeya chama'. Ojjaña miqianajaya aquiana chama'yo tii tii poanaje. Eba'eji quea pame chaco jjima chama' poanaje. Miqianajaya aquiana quea huišo nee nee ejjeshe o'oyajji pojjeama —esohuidojojji poanaje.

¹⁵ Majoya eya ohuaya huohui canaje jama ba'a: —Huani, Babinonia dejja cuaa aquiana quea huišo nee nee yahuajo jjeshe canaje. Jamajjeya dejja aquiana quiajji cuaa quea huišo nee nee aquiana Babinonia dejja huasijje quia huicha'a huicha'a canaje quea huišo nee nee bejjo sosejje. Jjeya Babinonia dejja cuana quiyo'yonaje, quea nee nee po'yonaje. Jamajjeya aquiana quiajji cuana quea huesha nee nequije quea mete jjejojo. Quea yeno poaje pea'ai. ¹⁶ Pa neineiye jama ba'a: “¡Oya bacue oe! ¡Babinonia cuiñajji etii quiyo'yonaje! Ecuana epeeji cuana jomajo ba'e quiyo jeyojeyo'yonaje. Ojjaña jomajo ba'e daqui quea nahue, daqui huo'o quea nahue, emeshi meseja daqui huo'ohuo'o jayojja quea nahue pea'ai huosho canaje. Eyijji mei huo'o quea nahue, mei sisi quea siyo, quea nahue, mei oshe sisi quea copo pena bajjani pea'ai daquijo ba'ehuana canaje. ¹⁷ Jjeya nei ojjaña jomajo ba'e manocuai'yonaje. Chama'yo tii po'yonaje” dejja quea aquiana huišo pa ani, achacua ojaya aquiana equia'yoyji pojjeamajojo. Cuanaya ojjaña bishe ai mese cuana, ojjaña bishe aijo poquiani pea'ai, ojjaña echacojji bishe aijo chaco cani, ojjaña jai jjequicuayajji poani cuana pea'ai quea huesha nee nequije. ¹⁸ Onaaya huichacha quea quemo ba caje ma cuiñajji etii quiyo'yanijo. Huichacha ba majje huohui caje jama ba'a: “Babinonia quea pame nee, de. Pea cuiñajji quea pame pishana. ¡Chama' pea cuiñajji Babinonia jayojja!” pa neineiye.

¹⁹ Babinonia quiyo'yanii ba majje dejja cuana quea yeno nee poaje. Jamajjeya oya cuana quea yeno jjejojo meshi pohuiya jjasapa natajajaquije. Janobajjima nei pa neineiye'yo pea'ai jama ba'a: —¡Oya bacue oe! ¡Babinonia cuiñajji etii quiyo'ya! Ojjaña dejja cuana bishe ai cuana chacochoani quea bejjo huišo poanaje; quea huišo nee nee aquiana cuana jjeshe canaje Babinonia dejja cuaa bejjo sosejje —jamaya ojjaña bishe ai cuana nequi paje.

²⁰ Majoya esohuidojojji miminaje jama ba'a: —Ojjaña eyajo ani, ¡quea bihui nee nee pocue! E'e, Babinonia cuiñajji quea mimishi nee nee quiyo'yonaje. ¡Ojjaña Jesosaja epeeji cuana, o shajja'ajajji cuana pea'ai, ojjaña Eyacuiñajji esohui huohuijji cuana, Jesosaja huojja'yo esohui huohuiya pea'ai quea bihui nee pocue! Eyacuiñajji Babinonia quiyojja mee ca'ya, ojjaña jo-

majo ba'e pea'ai quiyojja mee ca'yonaje, miqianaya ohua napa canaje sosejje.

²¹ Majoya esohuidojojji quea ca'a nee neeya mei quea quemo nee nee, shijje cuiapojomeeji mei quea quemo jayojja jeaqueajea canaje bae ai yasijje. Mei chama'yo tii poanaje. Mei jeaqueajea majje huohui canaje jama ba'a: —Eyaya mei janobajjima nei jeaqueajea'yonaje. Jamaya eyaya Babinonia chama'yo tii po meeje'yo; janobajjima nei napaje'yo. E'iya o'oyajji pojjeama tii tii poaje'yo. ²² Yahuajo quea huišo jomajo ba'eya e'ñaqueyajji cuana ñaqueya canaje esohui cuayajji, dehue mia canaje, emiajji eshe'ana jayojja mia canaje pea'ai. Jamaya oya cuana yahuajo poanaje. Quijje ca chojja, jamaya epo o'oyajji pojjeama. Chama'yo tii poaje'yo. Quea huišo jomajo ba'e yahuajo chacochoconaje. Jjeya chama'yo tii echacojji cuana poaje'yo. Quea huišo anoso ai cuana cuiapasha canaje cuaa yahuajo, meiya. Jjeya anoso ai cuiapashajji chama'yo tii poaje'yo quiyo'yo majje. ²³ Jomajo cuaquijji ejji o'oyajji pojjeama tii tii, quea misi po tiitii'yo. Jomajo jjahueaqui ajja tiitii poaje'yo. Chama' poaje'yo yahue esho'i oja huanase esho'i nijje emimijji quea bihui nee. Chama'yo tii tii. Yahuajo ojjaña jomajo ba'e quea aquiana huišo nee nee poanaje; pea cuiñajji cuana quea aquiana huišo pishana poanaje. Yahuajo Babinonia dejja cuaa quea huišo pea cuana dasia ca'yonaje. ²⁴ Quea huišo Jesosaja esohui huohuijji cuana quecua ca'yonaje cuaa pea'ai esohui huohuijji joyoya. Quea huišo pea cuana jomajo ba'e quecua ca'yonaje pea'ai, Babinonia dejja cuaa quea maseya jjejojo, de —ma esohuidojojji quea ca'a nee jamaya poanaje.

Eyajo ojjaña Eyacuiñajji bihuia canaje

19 Majoya eyaya shajja'ajjanaje quea huišo nee nee eyajo ba'e. Oya cuana janobajjima nei sohuicuayani jama ba'a:

“Eyacuiñajji quea pame nee nee poani. Ohuaya ojaya epeeji cuana ba'e tiitii mee cani eyajo. Oya oe nei ba'e tiitiani. Oya oe nei quea ca'a nee nee nequi tiitiani.

² E'e, ojaya ejjashahuabaqui'yoyji dejja mimishi cuana e'e nei poani. Ma epona pea cojojji nei nei quea nee nee po mee ca'yonaje. Maaya quea huišo meshi cuana ba'e cuana quea mimishi nee po mee canaje. Jamajjeya Eyacuiñajji oya quea nee nee po mee ca'yonaje. Cuanaya ma epona taiya Jesosaja epeeji cuana quea huišo quecua ca'yonaje Eyacuiñajji oya quea nee nee po mee ca'yonaje”.

³ Majoya ojjaña eyajo ba'e janobajjima nei taaa o'yanaje jama ba'a: —Eyacuiñajji quea pame nee nee poani. Ohuaya ojjaña quea mimishi ma cuiñajji aijo ba'eca quiyo tiitii mee caje'yo.

⁴ Majoya eyajo Jesosaja epeeji etiiya quea huišo cuaa, ma ²⁴ huišomeya, aquiana eshe cuaa ma ebeca pee pea'ai huišomeya ecui'oshajjajo nequiya Eyacuiñajji bihuia ca'yonaje. Jama taaame poanaje ba'a: —Eyacuiñajji, miya quea pame nee nee. ¡Ojjaña miya cabihuia cahua! ¡Jamaya capo'yahua! —jamaya onaaya Eyacuiñajji e'anioque ani bihuia canaje.

⁵ Majoya pea eyajo Eyacuiñajji pejejeo nequi taaanaje jama ba'a:

“Ojjaña Eyacuiñajjija epeeji cuanaa, ojjaña Eyacuiñajjija esohui shajja'ajjajji poaniya, ojjaña etiya, ojjaña esho'i cuaa pea'ai, ¡Eyacuiñajji bihuiaque!”

Jamaya pea eyajo nequi taaanaje.

⁶ Majoya eyaya shajja'ajjanaje pea cuana quea shajja-quijjo. Quea huiso cueji taaani jayojja, cuei quea que-mo, quea cuejipashi nee mei pasaca biajje oqueani jayojja. E'e, ojjaña Eyacuiñajji janobajjima nei bihuia canaje jama ba'a:

“Eyacuiñajji quea pame nee nee. Eyacuiñajji quea ca'a nee nee ani tiitiije'yo. Ohuaya ojjaña huoojea tiitii cani.

⁷ ¡Eseyo ojo quea bihui nee capo'yahua! ¡Eseyo ojo quea bihui nee camimi'yahua pea'ai! Jama ba'a: Eyacuiñajjijo ecuana quea bihui nee nee. Oya oe nei quea ca'a nee po tiitiani. Oya oe nei yani tii tii. Jesosa, ma ñajjajja equecua'yo jayojja quea pame nee. Jjeya oya quea pame nee nequi yahue ejjahuanacuquijjijo jayojja. Ojjaña ojaya epeeji cuana epona ejjahueacuquijjijo apoa jayojja jama quea boejea nee. E'e, Jesosa poeje o'oya ojaya epeeji cuana jaahuanaa. ⁸ Ojjaña ojaya epeeji cuana daqui oshe quea pame, quea boejea, quea jeajahua huosho majje enequi. Jiquio ecua eponaja daqui oshe quea boejea ejjahueacuquijji jayojja jama Jesosaja epeeji cuana quea pame quea boejea'yo pea'ai ba'e”. Jamaya pea cuaa eyajo nequiya Eyacuiñajji bihuia canaje.

⁹ Majoya esohuidojojji eyajo nequiya eya huohui canaje jama ba'a: —Huani, esohui tehucue jama ba'a: “¡Jesosaja ejjahuanacuquijjijoya ojjaña ojaya epeeji cuana ojee ca'ijjia'ijjia mee cahua onijje! ¡Ojjaña onijje ojee ij-jia'ijjia ani quea bihui nee capo'yahua!” E'e, jiquio ecuea esohui e'e nei nei poani. Jamaya Eyacuiñajji poani —eya jamaya acanaje esohuidojojjiya.

¹⁰ Majoya ojaya esohui shajja'ajja majje eya esohuidojojji pejejeo ecui'oshajjajo nequinaje o bihuiajji. Jamatii oya enijje miminaje jama ba'a: —Chojja, Huani. ¡A'a eya bihuiajji! Eya Jesosaja echacojji poani mi jayojjaya, miquea epeeji cuana jayojjaya pea'ai. E'e, mi-quianaaya Jesosaja esohui jayojja jama añña pea'ai. Edojoshahua Pameya ojjaña Jesosaja epeeji cuana Jesosaja esohui ba mee cani quea ja'a nee, Huani. Jamajjeya ¡Eyacuiñajji oe nei bihuiaque! —ohuaya eya acanaje.

Huaniya Jesosa ba canaje mapichi osheja edaasa biajje ani

¹¹ Majoya eyaya, Huaniya ojjaña eyajo ba neinei'yonaje. E cojja neijo mapichi oshe nequi. Oya mapichija edaasa biajje ani quea pame nee nee. Ojaya esohui e'e nei. Ojaya esohui pea cuanaja eba'ejjijjo e'e nei pea'ai. Ohuaya ojjaña quea mimishi poani quecua cani, oya cuana quea nee nee po mee cani quea mimishi poanijo. ¹² E'e, oya mapichija edaasa biajje ani quea cojja jiji nee, cuaquijjiji jayojja cojjame; ojaya ejaahuojja yani pea'ai. Ohuaya quea huiso emeshi mese cuana huoojea cani. Quea huiso cuaa oya shajja'ajja cani. Ojaya

bajjani etehue'yo yani. Jamatii pea cuanaja maya ebajjani quea quehua. Ojaya eba ojaye nei ojaya bajjani.

¹³ Ojaya daqui ao quea huo'o nee nee, ena' jayojja jama enajo iyanobiajea jayojjaya. Oya ca ca oe Eyacuiñajjija esohui bameejji. ¹⁴ Quea huiso eyajo ba'e o quishishijji poquije jjaquecuaquiya. Ojjaña quea huiso nee nee cuana mapichi osheja edaasa biajje poquije. Ojjaña daqui oshe quea pame nee, quea nahue,

quea boejea nee, de. ¹⁵ Ojaya enabajje yani esohui quea ja'a nee baa quea ca'a, quea shejji nee jayojjaya. Ma esohui huohui majje ojjaña dejja cuana ojjaña meshi cuanajo jeabichajea caje'yo. Quea ca'a nee nee poanijo ohuaya ojjaña dejja ojaya esohui jayojja jama amee caje'yo. Ojjaña shajja'ajja mee caje'yo pea'ai.

E'e, Eyacuiñajji ojjaña dejja mimishi ojjaña meshijo ba'e nijje quea quene nee nee poanijo ohuaya, ma mapichi osheja edaasa biajje aniya quea tecue ojjaña huoojea caje'yo. Jiquio ecua acuijajja quecuapasha cani cuaa jayojja jama Jesosa Quitohua ojjaña dejja cuana acaje'yo; mete mee majje shajja'ajja mee caje'yo.

¹⁶ Ojaya daqui aajo, ojaya huachinequi quea quemajo pea'ai yani ebajjani tehue'yo jama ba'a:

“Ojjaña emeshi mese cuana huoojeajji; ojjaña cuana huoojea'yojji poani”.

¹⁷ Majoya eyaya, Huaniya pea esohuidojojji banaje eshequijo nequi. Ohuaya janobajjima nei iyaa canaje ojjaña be'o cuabesa ba'e; jama acanaje ba'a: —¡Be'o cuana! ¡Miquianaya poecue! ¡Ojee ijjia'ijjiahuacue! Eyacuiñajjija dejja mimishi quea huiso quecua mee caje'yo. ¹⁸ E'e, ¡jjeyahua nei emeshi mese cuana ijjiahuacue, dejja mase cuanaja mese cuana, dejja ca'a cuana, mapichi cuana, mapichija edaasa biajje ani cuana, dejja mimishi quea huiso, echacojji sosema' cuana, echacojji bejjo sosejje chaco cani cuana, esho'i cuana, etii cuana pea'ai ojjaña ijjiahuacue! —ohuaya acanaje be'o cuana.

¹⁹ Majoya eyaya banaje ma shanei ai ejja quea huiso emeshi mese nijje, quea huiso dejja mase nijje pea'ai ojee poquiani Jesosa quecuaa nisho, ma mapichi osheja edaasa biajje ani quecuaa nisho, quea huiso cuana Jesosa nijje nequi quecuaa nisho pea'ai. Ojjaña poquinaje Jamayeno meshi yasijje jjaquecuaquiya. ²⁰ Majoya Jesosaa shanei ejja, esohui huohuijji nisho pea'ai iña canaje. E'e, ohuaya iña canaje esohui huohuijji nisho, ma shanei ejja nijje tiya quea huiso ma dejjaa ajjima acanaje ojjaña cuana dasia'yojji, shanei ejja bihuia mee'yojji, ma shanei ejja nisho oja a'yo bihuiajji dasia'yojji, ojjaña joya shanei ejjaja dasia'yo majje oja bahua tehue pea'ai iña canaje. Jamajjeya ma shanei ejja, ma esohui huohuijji nisho pea'ai iña'yo majje Jesosaa oya cuana jeajea ca'yonaje bae ai jijiani yasijje, bae quea ihui yasijje. Jomajo tii quea nee nee po tiitiije'yo. ²¹ Majoya Jesosaa mapichi oshejo e'anioque aniya ojjaña ejjaquecuaquijji cuana quea mimishi quecua jeyojeyo ca'yonaje baa jayojjaa, oja esohui'ya. E'e, ojaya enabaja baa jayojja yani, ojaya esohui. Majoya ojjaña dejja mimishi cuana mano'yajo, be'o cuana poeyanaje quea huiso nee nee. Emano'yo cuana ijjia neinei ca'yonaje.

Quea jeje nee nee poanaje be'o cuana ojjaña equcua'yo cuana ijia'yo majje. Jamaya eya, Huani cahuiba mee canaje.

Edosiquiana nei jeyo canaje quea shequiaja huiso nee nee 1.000 shequiajame

20 Majoya eyaya banaje pea esohuidojojji. Oya eyajo nequi meshi yasijje poeyani. Ohuaya jiani ai ma emano'yo cuana nequi quea doe nee nee nequi cuana cojja yahuejeajji ye cani emejo, aquiana quea ca'a cadena quea quemo jayojja pea'ai ye cani. ² Ohuaya iña cañaquinaje, jeabichajea canaje Edosiquiana nei, sa'o ai quea mase nee Satanasa bajjani, ma yahuajo nei nei pea'ai esejaya etiiquiana pana coo ca jeahua dasiajji poa. Iña majje ma esohuidojojjiya Edosiquiana jeyo canaje cadena quea quemohua quea shequiaja huiso nee nee, 1.000 shequiajame ejeano-biajeajji. ³ Jeyo majje oya jeajea canaje jiani ai yasijje, ma emano cuana nequi yasijje quea doe nee nee yasijje. Capa canaje. Capa majje ca'a canaje. Ca'a majje cojjaahuejea canaje. Enaba capajji'yajo tehue canaje jama ba'a: "Edosiquiana nei ecuayaqui'yojji pojjeama quea shequiaja huiso nee nee, 1.000 shequiajame nequije'yo ojjaña meshijo ba'eca cuana dasia'yo jjima ya'yojji". Jamaya tehue canaje esohuidojojjiya. Jamatii quijje nei ma shequiaja huiso nee nee apoa po majjeya Edosiquiana nei ma emano cuana huasijje, jiani ai quea doe nee nee yasijje ejeyo nequi cacuyaqui'yahua beca ba' cuanajo dejja mimishi cuana dasia o'oyajji.

Ebionei eshequi mee o'oyajji

⁴ Majoya quijje pishana eyaya banaje ona huoojeajji cuana e'anioque ani. Eyacuiñajjiya oya cuana huoojea canaje ojaya epeeji cuana huoojea Jesosa nijjeya. Eyaya banaje pea'ai quea huiso nee nee Jesosaja esohui huohuijji cuana ma onaa sapa jajasejjajea ca poa. Mano mee ca'ya poa dejja mimishi cuaa Jesosaja esohui huohuijji poanijojo, Eyacuiñajjiya esohui cuana huohuijji poanijojo pea'ai. Jesosaja epeeji cuaa yahuaajo pishana shanei ejja quea mase pishana bihuia jjima, shanei ejja quea mase pishana nisho, meshi epana'yo pea'ai bihuia jjima. Ojaya ebahuajje, emejje pea'ai etehue'yo chama' shanei ejjaja eba'yoyji, ma 666 jayojja tehueme'ya chama'. Eyaya oya cuana banaje shequije o'oya. Shequi o'oya mee majje Eyacuiñajjiya oya cuana Jesosa Quito nijje ojjaña huoojeajji po mee caje'yo quea huiso nee nee shequiajame. E'e, 1.000 shequiajame Jesosa Quito nijje anije'yo. ⁵ Pea emano'yo cuana ma quea mimishi mano'yo cuana shequi o'oya jjima; 1.000 shequiajame apoa po jjimahuajo oya cuana shequi o'oya jjima. Joya shequi o'oyani 1.000 shequiajame po jjimahuajo bajjani ebionei eshequi mee'yoyji. ⁶ Joya ebionei shequi mee caje o'oya quea bihui nee nee, quea pame nee nee poani. Oya cuana nee'ama poaje'yo. Epoqui'yoyji pojjeama cuaqui yasijje. Joya ecua pea cuana quea mimishi poani jayojja jama epo'yoyji pojjeama Jesosaja epeeji cuana. Chojja, oya cua-

na Eyacuiñajji nijje emimijji poaje'yo. Oya cuana ojjaña huoojeajji poaje'yo Jesosa Quito nijje pea'ai quea shequiaja huiso nee nee, 1.000 shequiajame.

Edosiquiana nei jeajea caje'yo cuaqui yasijje

⁷ Quijje nei ma 1.000 shequiajame po majje Eyacuiñajjiya Edosiquiana nei pichojea mee caje'yo. Jamajje-ya oya poquije'yo. ⁸ E'e, Edosiquiana nei poquije'yo ojjaña meshijo ba'eca dasiaa. Ohuaya ojjaña Co meshijo ba'e, Maco meshijo ba'e pea'ai dasiaqui caje'yo. Ohuaya oya cuana ojee epojji iyaa caje Eyacuiñajji quecuajji nisho. Ojjaña oja dasia'yo cuana Edosiquiana nei nijje nequije'yo. Oya cuana quea huiso nee nee poaje ojjaña meshijaji sope huisoajja. ⁹ Jamajjeya oya cuana quea mase nee nee poaje. Poquije'yo ojjaña meshi cuana huasijje ojjaña jeabichajea. Eyacuiñajjiya epeeji queya caje'yo equcuajji. E'e, Jenosanena queya caje'yo Eyacuiñajjiya epeeji cuana jomajo nequi quecuajji nisho. Jamatii Eyacuiñajjiya eyajo aniya dejja mimishi cuana ba majje cuaqui jeoqueajea caje ona biajje. Oya cuana Jesosaja epeeji queya'yo epo tii nequi manodehueleje'yo, ojjaña. Ojjaña quiyo jeyojeyo caje'yo. Chama'yo tii poaje'yo. ¹⁰ Majoya Eyacuiñajjiya Edosiquiana nei jeajea caje'yo bae quea jiji nee jayojja huasijje, bae quea ihui, quea pase yasijje. Ma oja dasia'yo cuana pea'ai jeajea caje'yo bae jijiani yasijje, Eyacuiñajjiya. Pea shanei ejja nijje, pea Eyacuiñajjiya esohui huohuijji nisho quea mimishi pea'ai nijje oya cuana quea nee nee po tiitiije'yo bae jijiani yasijje.

Ojjaña quea mimishi cuaqui yasijje jea caje'yo ecuayaqui'yoyji pojjeama

¹¹ Majoya eyaya banaje jama ba'a: Epojja oe poajo Eyacuiñajjiya ojjaña huoojea caje'yo enapa'yoyji. Oya Eyacuiñajji quea jeajahua nee, quea oshe nee nee bo oshe quea jeajahua nee jayojja. Ojjañaja Emeshi Mese nei oya. Ojjaña meshijo nequi, ojjaña eyajo nequi pea'ai quea ajjaja nee poani ojo. Jamatii oya cuana quehuajje poqui meeme aija, achacua epoquijji.

¹² Majoya eyaya banaje ojjaña dejja cuana ma yahuajo mano'yo cuana, jjeya nei mano'yo pea'ai; ojjaña etiiquiana cuana, ojjaña esho'i cuana pea'ai. Ojjaña nequinaje Eyacuiñajji cojja nei. Eyacuiñajjiya esohui etehue'yo cuana she'a canaje. Pea esohui etehue'yo she'a canaje pea'ai. Maya o ba'e tiitii mee'yoyji oja tehue. Ma esohui etehue'yo ba majje Eyacuiñajjiya huohui canaje ojaya ejjashahuabaqui'yoyji ojjaña ba'ya poa cuanajo. E'e, ma esohui etehue'yo ba majje ojjaña huoojea caje'yo. Ojaya epeeji cuana, ojjaña joya quea bojea poani cuana quea bihui nee nee po mee caje'yo. Ojjaña joya quea mimishi po nequia poa cuana ca ca quea nee nee po mee caje'yo. ¹³ Ojjaña ma yahuajo bae ai'aio hui'i'yo cuana shequije o'oya. Ojjaña ma yahuajo mojea ca poa cuana, ojjaña emano'yoyja cuana pea'ai shequije o'oya. Ojjaña joya quea bojea poa cuana quea bihui nee nee po mee caje'yo Eyacuiñajjiya. Ojjaña joya quea mimishi poa cuana ca ca quea nee nee

po mee ca'yoquiye tii tii. ¹⁴ Majoya apoa. Ojjaña mimishi cuana bae ai jayojja jijiani yasijje jeajea caje'yo ecua yaqui'yojji tii tii pojjeama. Ma bae jijiani bajjani Emano Beca'yojji, quea nee nee nee epo nequi'yojji. ¹⁵ E'e, ojjaña joya ebajjani tehue'yo pojjeama Eyacuiñajjiya etehue'yojo o ba'e tiitii mee'yojji aje oe jeajea caje'yo cuaqui jijiani yasijje, bae ai jayojja quea jiji nee nee yasijje, de.

Eyacuiñajjiya Huani ba mee canaje meshi cuana, eyatahuatahua pea'ai eyacua

21 Majoya Eyacuiñajjiya eya, Huani ba mee canaje eyatahuatahua, meshi cuana pea'ai eyacua. Eya-tahuatahua, meshi cuana pea'ai yahuajo jama pojjeama. Bae ai'ai cuana chama'yo tii poanaje. ² Eyaya Jesosaja epeeji cuana quea pame nee nee, quea boejea nee banaje. E'e, Jenosanena cuiñajji eyacua jayojja poanaje. Oya cuana eyajo Eyacuiñajji nijje nequi ojee nequioquenaje. ¡Oya cuana ache bame nee nee! Epona ejjahueaquijji jayojja, daqui eyacua quea pame nee huosho cani jayojja, ojaya ejjahuoja quecuaca'aquijji jayojja. ¡Jamaya Eyacuiñajjiya cuiñajji eyacua, ache bame nee nee! ³ Eyaya shajja'ajjanaje pea Eyacuiñajji pejejo nequi enijje janobajjima nei mimiani jama ba'a: —Huani, ¡bacue oe! Meshi eyacuajo Eyacuiñajji dejja cuana nijje ba'e tiitiani. Oya cuana Eyacuiñajjiya jama acaje ba'a: "¡Iquio dejja cuana ecuea epeeji cuana poani. Eya ona nijje ani tiitii'yo". ⁴ E'e. Jamajjeya Jesosaja epeeji cuana quea yeno po ajja tii tii, mano beca'yo ajja, pa ajja, shoe'ama, nee'ama poaje'yo tii tii. Yahuajo jama pojjeama poaje'yo —poanaje pea eyajo nequi.

⁵ Majoya Eyacuiñajjiya ojjaña huoojeajjiya eya huohui canaje jama ba'a: —Eyaya ojjaña eyacua ameeaña. Ecuea esohui e'e jojo nei. Jamaya eyaya aje, Huani. Jamajjeya ¡ecuea esohui tehuecua! —poanaje.

⁶ Majoya Eyacuiñajjiya eya jama acanaje ba'a: —Eya yahuajo nei nei ani tiitii poa. Quijje nei eya ani tiitii'yo pea'ai. ¡Ojjaña joya quea naba taja jayojja poani poecue e que! Eyaya e'ishijji ishi meeje sosema'. Enijje jjapeequi sa neinei poanijo quea naba taja jayojja jama poani. Jamajjeya eyaya oya ba'e tiitii meeje'yo. ⁷ Ojjaña joya enijje jjapee tiitiiquiani Edosiquiana nei jeabichajeajji poani. Jamajjeya eyaya oya cuana ecuea ebacua cuana po meeje'yo. E'e eya, Eyacuiñajji ona nijje ani tiitii'yo. ⁸ Pea cuana, chojja. Ojjaña quea mete jjejojo enijje jjapee pajeaqui'vani, eshahuaja epeeji cuana, ojjaña quea mimishi ba'e cuana, pea quecuajji cuana, pea cojjojji cuana, eyamiquecua cuana, ojjaña quea tai acani, eyacuiñajji nisho bihuiajji cuana, ojjaña siajje-pojji cuana, edasiajji cuana pea'ai poquiye'yo cuaqui yasijje, bae ai jayojja jijiani yasijje poquiye'yo. Maya bajjani Emano Beca'yojji quea nee nee epo nequi'yojji —Eyacuiñajjiya eya jamaya acanaje.

Huaniya ba canaje Jenosanena cuiñajji eyacua

⁹ Majoya oe esohuidojojji enijje mimiya poeyanaje. Yahuajo pishana oya me oejeje oe esohuidojojji cuana

nijjeya me oejeje beca caneco iñajji poanaje. Maaya dejja cuana me oejeje beca napame acanaje. E que poe majje ma esohuidojojji jama poanaje ba'a: —Huani, ¡poecue enijje! Ojjaña Jesosaja epeeji cuana epona ejjahueaquijji jayojja eyaya miya ba meeje —ohuaya eya acanaje Jesosajo, ma ñajjajja sho'i equecua'yo jayojjajo.

¹⁰ Majoya Edojjoshahua Pameya eya dojo canaje eyiyo ao'ao daasa huasijje. Ohuaya eya ba mee canaje cuiñajji eyacua ojaya quea jea nee Jenosanena eyacua bajjani. Ma cuiñajji eyajo ani Eyacuiñajji anijo anioqueani Jenosanena eyacua. ¹¹ Eyacuiñajji ma cuiñajji nequi quea jeaja'a nee nee poani. Jasipe mei bajjani jayojja poani quea jeaja'a nee, tahuoo oshe eshequiya jeaja'a cani jayojja. ¹² Ma cuiñajji peeyi quea ao nee nee, quea quemo nee nee. Yani quea huiso esecue cuana, oe ejiojji beca, 12 secueme. Esohuidojojjiya oe ejiojji beca huismo esecue cuana cuiña cani. Esecue cuanajo Isaenija bacua ejja cuanaja bajjani etehue'yo yani, oe ejiojji beca, 12 bajjanime. ¹³ Eshequi poeje mijijje pea beca peejjima esecue cuana jaa; eeno poeje mijijje pea beca peejjima esecue cuana jaa; eshequi dobiqijje mijijje pea'ai pea beca peejjima esecue cuana jaa.

¹⁴ Ma cuiñajji quibo iya 12 meija quibo iya. Ma mei biajje etehue'yo yani, Jesosaja huoojea'yoja, 12 huismo cuanaja bajjani.

Jenosanena eyacua ipia'ajja canaje esohuidojojjiya

¹⁵ Esohuidojojjiya ma enijje miminajeya ma cuiñajji ipia'ajja canaje mei huo'o baacuiya. Esecue cuana ipia'ajja canaje pea'ai. Jiyo ipia'ajja canaje pea'ai. ¹⁶ Jamaya poanaje ba'a: Ojjaña cuiñajjiya ejjapeequijji'ya oya quemajja pea'ai. Ipia'ajja majje ba canaje ache quemo nee nee poanaje ba'a: Quea quemo nee nee 2.200 kilometro quemome. Oya aohuajja pea'ai, 2.200 kilometro aome. ¹⁷ Ejjapeequijji'ya quea moo nee nee, 64 metro moome. Ohuaya ipia'ajja canaje esejaya e'ipia'ajjajji jayojjaa. ¹⁸ Ejjapeequijji'ya jasipe mei quea ca'a, quea jeaja'a. Cuiñajji mei huo'o oopana quea nahue nee nee, quea ja'a, tahuoo quea ja'a jayojja. Quea bame nee nee. ¹⁹ Ejjapeequijji'ya quibojo yani quea huiso mei e'iya quea bame nee nee epojji, pea-pea mei cuana quea nahue nee nee jama ba'a: Jasipe mei cuana, sapino mei quea tahua jiji, asata mei cuana, esemeana mei cuana quea tahua jiji, ²⁰ onise cuana quea huo'o sii oshe, caneniani cuana quea huo'o jiji, quesonite cuana quea jahua siyo, benio cuana quea jeajahua, topasio cuana jahuahua jijijiji, quisopasa cuana iye tahuatahua. Jasine mei cuana pea'ai, ameta mei cuana iye huo'ohuo'o pea'ai. Mahuiso mei cuana ejjapeequijji'ya quibojo e'iya ani. Quea pame nee nee, sho acui iñajo ani eshequiya jeaja'a cajje jahua, huo'o, tahua poani jayojjaya. ²¹ Oe ejiojji beca, 12 esecue jjani cuana ejjaa. Ma esecue jjani cuana mei copo oshe pena ai bajjani cuana jayojja, quea nahue nee nee. Ejiojji cuana cuiñajji jaa mei huo'o oopana quea nahue, tahuoo oshe quea ja'a jayojjaya.

Huaniya cuiñajji eyacua quea jeajahua nee ba canaje

²² Ma cuiñajjijo ecuea ba jjima equi Eyacuiñajji bihuajji jayojja. E'e, Eyacuiñajji quea ca'a nee nee ma cuiñajjijo ba'yani, Jesosa ma ñajjajja equecua'yo jayojja jomajo ba'yani pea'ai. Jamajjeya jamatii oya cuana bihuia cani, ojjaña. ²³ Jomajo Eyacuiñajjiya ojjaña jeaja'a cani. Jesosaa ma ñajjajja equecua'yo jayojjaa ejijijji-ya jeajiji cani jayojjaya. Jamajjeya quea ja'a nee nee poanijo eshequi, ba'i pea'ai chama' poani. ²⁴ Jesosaa ojaya epeeji cuana quea bame nee nee po mee canajejo oya cuana ba'e mee caje'yo quea ja'a nee. Emeshi mese cuana ojjaña meshijo ba'eca cuaa Eyacuiñajji bihuia caje'yo jama ba'a: —Ojjaña aquiana quea pame miquea poani.

²⁵ Cuiñajji esecue cuana eca'apejo tii nequije'yo sine'yo ajja jojaya. ²⁶ Ojjaña cuana cuiñajji eyacua huasijje dobiquije Eyacuiñajji bihuiaa jama ba'a: —Eyacuiñajji, miya quea pame nee nee.

²⁷ Jomajo ca ca ojjaña cuana quea mimishi cuana, quea tai cuana pea'ai, jjadasiaquijji cuana pea'ai edobiquijji pojjeama nei nei. Joya ebajjani tehue'yo cuana ca ca oe dobiqumee caje'yo, Eyacuiñajjiya. Jesosaa, ma ñajjajja equecua'yo jayojjaa tehue canaje ojjaña ojaya epeeji cuanaja bajjani eba'e tiitii'yojji oja tehue.

Ena oshe eba'e tiitii mee'yojji

22 Majoya pea esohuidojojjiya eya cuei quea tahua, quea pame nee eyajo ba mee canaje. Ma cuei Eyacuiñajji e'anioque ani pejejo yobi nequi. Jesosa nequi pejejo cuei shaja cuayaqui pea'ai. Ojjaña joya ma ena ishi cani ba'e tiitii mee cani Jesosaa, Eyacuiñajjiya pea'ai. ² Eyacuiñajjiya cuiñajji eyacuajo ejaa ejiojji quea quemo. Ma ejiojji tii ma cuei quea pame jaa. Cui sahuajo, beca mijijje yani acui bajjani Eba'e tiitii'yojji. Ojjaña ba'ijo jjajja huicha'a huicha'ani. Ma acuiña cuana ijia majje ojjaña jomajo ba'e quea ja'a nee ba'e tiitii'yo. ³ Yahuajo ojjaña quea mimishi poanijo Eyacuiñajjiya quea camaja po mee canaje ojjaña meshi cuanajo ba'eca. Eyajo eba'ejji camaja'ama poaje mimishi cuana chama'yo poanijo. Eyacuiñajji eyajo ma cuiñajji quea pamejo anioqueani. Jesosa, ma ñajjajja equecua'yo jayojja, jomajo yani pea'ai. Jomajo Jesosaja epeeji cuaa oya bihuia tiitii caje'yo. ⁴ Jesosaja epeeji cuaa oya ba caje'yo ecojjaa. Ojaya etehue'yo ebahuajje tehue canaje ojjañaja ebajji ojjaña ojaya epeeji cuana. ⁵ Cuanaya Eyacuiñajji quea cojja ja'a nee, quea jeajahua nee poanijo ma cuiñajji quea ja'a nee po tiitii'yo, misi'ama tii tii. Jamajjeya jomajo chama' cuaquijji. Chama' eshequi pea'ai. Ojjaña ojaya epeeji cuana onijje nequi tiitii'yo emeshi mese jayojja quea pame nee, ojjaña huoojeajji jayojja.

⁶ Majoya ma esohuidojojji enijje miminaje jama ba'a: —E'e, ecuea esohui e'e jojo nei. Jamajjeya shajja'ajja-cue! Emeshi Mese neiya Eyacuiñajjiya yahuajo Edojjos-hahua Pame huoojea canaje ojaya esohui huohuijji huohui meesahuaa. Eyacuiñajjiya eya, ojaya esohuido-

jojji huoojea canaje mi que, ma ohua quijje pishana acaje'yo ejjanequipana meequi'yojji —jamaya eya acanaje esohuidojojjiya.

⁷ Majoya Jesosa enijje miminaje jama ba'a: —Huani, eya, Jesosa Quito poeje o'oya quijje pishana. Ojjaña jiquio esohui etehue'yo ma eya quijje aje'yo eyaya miya ba meeaña e'e nei. Ojjaña joya jiquio esohui e'e jojo nei jama ajji poani quea bihui nee nee capoahua —Jesosa Quitohua eya acanaje.

⁸ E'e, eya, Huani ma esohuidojojji shajja'ajja majje ecuea ebajji ohua jjanequipana meequi cajo pea'ai, eya o pejejo ecui'oshajjajo nequinaje o bihuajji. ⁹ Jamatii ohuaya eya jama acanaje ba'a: —¡A'a eya bihuajji! Chojja. Eya Jesosaja echacojji poani mi jayojjaya, mi-quea epeeji cuana ma Eyacuiñajjiya esohui huohuijji cuana jayojjaya, ojjaña ojaya epeeji cuana jayojjaya jama poani pea'ai, eya. E'e, oya cuana jiquio esohui etehue'yo jayojja jama acani e'e jojo nei. Jamajjeya ¡Eyacuiñajji oe bihuia-cue e'e jojo nei! —ohuaya eya acanaje.

¹⁰ Majoya ma esohuidojojji miminaje enijje jama ba'a: —Huani, quijje pishana ojjaña jiquio esohui jayojja jama acaje'yo Eyacuiñajjiya. Jamajjeya tehue majje ejejo ¡esohui etehue'yo a'a jjajjajji! ¡A'a esohui cuiabajji! ¡Ojjaña ba meecue Eyacuiñajjiya ma ohua quijje pishana acaje'yo! ¹¹ Ojjaña joya quea mimishi poani Eyacuiñajjiya huohui caje jama ba'a: “Ojjaña quea mimishi poani jamatii quea mimishiya capo tiitiiquiahua. Ojjaña quea tai jjashahuabaquiani jamatii quea taiya caj-jashahuabaqui nequiahua tii tii. Jesosaja epeeji cuana ca ca quea ja'a nee canequi tiitii'yahua. Ojjaña Jesosaja epeeji quea pame nee canequi tiitii'yahua quea pame nee” poani Eyacuiñajji —jamaya ma esohuidojojji poanaje.

Jesosaja esohui ecuanajaya eshajja'ajajji

¹² Majoya Jesosa enijje mimi o'oyanaje jama ba'a: —¡Bacue oe! Quijje pishana eya meshi yasijje poeje o'oya. Poe majje eyaya ojjaña sosequiaje'yo, onajaya eba'ejji soseje. Ojjaña quea mimishi poani aje oe quea nee nee po meeje'yo. Ojjaña quea pame ba'enaje ca ca quea bihui nee nee po meeje'yo, eyaya. ¹³ Yahuajo nei ojjaña pana jjimahuajo eya yania tii tiia poa. Quijje ojjaña meshijo chama'yo tii poajo eya ani tiitii'yo.

¹⁴ Ojjaña ecuea epeeji cuana quea boejea, daqui quea boejea jayojja quea bihui nee poaje. Oya cuana acuijajja eba'e tiitii mee'yojji ijia meeje. Eyacuiñajjiya cuiñajji eyacua huasijje dobiqumeeje'yo esecueje. ¹⁵ Ojjaña joya quea mimishi poani epoquijji pojjeama eyahuasijje Eyacuiñajji ani yasijje. Oya cuana iñahuehua jayojja jama quea tai, quea mase; jjajiojji cuiaquijji cuana, pea cojjojji cuana, jjaquecuaquijji cuana pea'ai, eshahuaja epeeji cuana pea'ai, siajjejojji cuana pea ai, siajje po majje quea bihui nee poani cuana pea'ai —Jesosa poanaje.

¹⁶ —Eyaya, Jesosaa huoojeanaje ecuea esohuidojojji miqiana que ecuea esohui huohuiya. E'e, ohuaya miqiana nijjeya huohui caje ecuea esohui ecuea esohui

huohuijji cuana huasijje Asia meshijo ba'eca huasijje. Jodio cuanaja etiiquiana Dabi yahuaajo nei Jodio cuanaja emeshi mese poa. Eya ca ca iña Dabija osecua poani. E'e, eya, Jesosa oe nei quea ja'a nee nee nequi, eshequi huiyejji majameta jayojja —Jesosa poanaje.

¹⁷ E'e, eya, Huani jama poani ba'a: —Edojjoshahua Pameya ojjaña iyaa cani Jesosa nijje ejjapeequi'yojji. Jesosaja epeejji cuana ojjaña nijje mimiani jama ba'a: “¡Poecue ojjaña, Jesosa nijje jjapeequicue!”

Jamajjeya shajja'ajja majje ojjaña huohuicue jama ba'a: “¡Ojjaña poecue, Jesosa nijje jjapeequicue!”

¡Ojjaña quea naba taja nee nee jayojja poecue Jesosa que! E'e, ba'e tii tii sa poanijo ¡poecue Jesosa que! ¡Ena eba'e tiitii'yojji ishihuacue sosema! Jesosaja esohui cuana ena eba'e tiitii'jji jayojjaya.

¹⁸ Eyaya, Huaniya miquianaya esohui huohuiaña jama ba'a: Jiquio Jesosaja esohui shajja'ajja majje jama acue ba'a: ¡Pea esohui e'e nei pojjeama a'a huohuijji! Pea esohui e'e nei pojjeama miya huohuiajo Eyacuiñajjija quea nee nee tii tii po mee caje'yo. E'e, esohuido-

jojji cuanaja aquiana quea nee nee epo meejiya miquianaya quea nee nee po mee caje'yo. ¹⁹ Jiquio Jesosaja esohui jayojja jama huohui sa po ajja shajjama' poanijo Eyacuiñajjija ma shajjama' cuana cajaa acaje'yo. Jamajoya shajjama' cuana eba'e tiitii mee'yojji pojjeama Jesosa nijje. E'e, ma acuijjajja eba'e tiitii mee'yojji ijjia mee jjima acaje'yo. Eyacuiñajjija cuiñajji quea pame nee yasijje dobi meequi jjima acaje'yo. Jiquio esohui esohuidojojjiya huohui cajo eyaya tehue'yona-je.

²⁰ E'e, Jesosa Quitohua ojjaña jiquio esohui etehue'yo cuana huohui canaje. Ohuaya huohui cani jama ba'a: —¡E'e jojo nei eya quijje pishana poeje o'oya!

²¹ E'e, ¡jamaya capoe'yahua! ¡Jesosaa ojjaña Eyacuiñajjija epeejji cuana cajaanahuana cahua quea pame nee!

Mahuiso Jesosaa jjanequipana meequi canaje ecuea ebajji ojjaña ohua acaje quijje. Eya, Huani jiquio esohui tehuenaje. Apoa.